


God Ago Maror
Muturta Agamukan



The New Testament in the Bargam Language of Papua New Guinea

**God Ago Maror Muturta Agamukan
The New Testament in the Bargam Language of Papua New
Guinea
Nupela Testamen long tokples Bargam long Niugini**

copyright © 2001 Wycliffe Bible Translators, Inc.

Language: Bargam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-05

PDF generated using Haiola and XeLaTeX on 11 Nov 2022 from source files dated 22 Nov 2019
e6d4bba7-efc9-5580-b990-ee6b0ef92064

Contents

Matyu	1
Mak	49
Luk	78
Jon	128
Aposel	163
Rom	210
1 Korin	233
2 Korin	254
Galesiya	269
Efesus	277
Filipay	285
Kolosi	291
1 Tesalonaika	297
2 Tesalonaika	302
1 Timoti	305
2 Timoti	312
Taitus	317
Filemon	320
Hibru	322
Jems	339
1 Pita	345
2 Pita	352
1 Jon	356
2 Jon	362
3 Jon	363
Jud	364
Revelesen	366

Matyu o Yesus awagamun Matyu mar tonta Gamuk ameb lehaqta

Yesus awagamun dimunta Matyu mar tonta kab Yesus in ago kabiy alulin emim le in wol eman moqim in eraqim ago wamataw gihulosad Heven-ib Amam ago hib tugwalahta na awagamun bunmo Matyu ago wagam kab giqus bugaqta. Matyu in Juda on mataw Yesus anan helmo haqiyta na ginadin emad in wagam ka mar tonta.

Daq ayah diqta Matyu i giqisihu na kazaq. Kwaziqmo God gamuk asor awaz meqinta bilaqan ago nantut mar tonan usta. Ussa abeb Yesus gwahtiqim gamuk na bunmo tuwol net bug. Gamuk na ni kazaq naguneq teq ahol waq: Matyu 1.22-23; 2.4-6; 2.14-15; 2.23; 4.13-16; 8.16-17; 12.15-21; 13.34-35; 21.2-5; 21.16; 26.24; 26.31; 26.54; 27.6-10.

Teq nagah araq ayahta Matyu wagam kab bilamta na kazaq. Yesus in Amam God ago on mataw bunmo gigo king iyeq osdaq haqad in ago kabiy daq emyaqta. Ad in anad on mataw bunmo inmo ahaqenib iyeq anad muziniy haqad in gibilenyaqta.

Wagam Matyu mar tonta ka aduganib Yesus gamuk sisqaqta bilamta abaynaginmo giqusaq. 1) Matyu 5.1-7.29 nab Yesus garah araq abiganih ghwalehim on mataw God ago maror anan gibilanta na agamukan usaq. 2) Matyu 10 nab Yesus in ago disaipel giqemid uliq-uliqgo leheq in ago soleq gibilen daqay haqad gamuk gibilanta na usaq. 3) Matyu 13 nab Yesus in mataw God ago maror giqisihunnan haqad gamuk awowun kabemmo bilamta na giqusaq. 4) Matyu 18 nab on mataw Yesus ago nan huritad osyata na in ezaq an wamuzad os daqay na ago agamukan usaq. 5) Matyu 24.1-25.46 nab uliq Jerusalem-ub Juda gigo Tempel meqniyidaqta na agamukan teq Yesus in ta boldaqta na ago ananin usaq-tamo.

Yesus og kab gwahtimta awagamun

*Yesus asesan ginan
(Luk 3.23-38)*

¹ Ari ka Yesus Krais asesan diqmo ginan. Yesus in Devit asenlulibta. Teq Devit in Abraham asenlulibta.

² Ari Abraham in Aisak amam.
Sa Aisak in Jekob amam.

Sa Jekob in Juda amaqbaban nenaq gitamam.

³ Sa Juda in Peres ama Sera inaq gimam. Giger na ginan anan Tamar.

Sa Peres in Hesron amam.

Sa Hesron in Ram amam.

⁴ Sa Ram in Aminadab amam.

Sa Aminadab in Nason amam.

Sa Nason in Salmon amam.

⁵ Sa Salmon in Bowaz amam. Teq Bowaz anen Rahab.

Sa Bowaz in Obet amam. Teq Obet anen Rut.

Sa Obet in Jesi amam.

⁶ Sa Jesi in Isrel gigo king Devit amam.

Teq Devit in Solomon amam. Solomon anen in kwaziqmo mat anan Uriya haqayta na awe iyim osta.

⁷ Sa Solomon in Rehobowam amam.

Sa Rehobowam in Abiya amam.

Sa Abiya in Asa amam.

⁸ Sa Asa in Jehosafat amam.

Sa Jehosafat in Jehoram amam.

Sa Jehoram in Usiya amam.

⁹ Sa Usiya in Jotam amam.

Sa Jotam in Ahaz amam.

Sa Ahaz in Hesekiya amam.

¹⁰ Sa Hesekiya in Manase amam.

Sa Manase in Emon amam.

Sa Emon in Josaya amam.

¹¹ Sa Josaya in Jekonaya amaqbaban ne-naq gimam.

An Jekonaya amaqbaban nenaq gigo kamub Babiloniya mataw bolim Isrel nenaq bab emim in Isrel on mataw giwazim giqad lehim in gigo ogib giqeman in begbeg iyim osiyya.

¹² Ari in Isrel giqad Babiloniya-ib lehiyta nab Yesus asesan asor gwahtiqiyya na ginan kazaq.

Jekonaya in Sealtyiel amam.

Sa Sealtyiel in Zerubabel amam.

¹³ Sa Zerubabel in Abiyut amam.

Sa Abiyut in Eliyakim amam.

Sa Eliyakim in Azor amam.

¹⁴ Sa Azor in Zadok amam.

Sa Zadok in Akim amam.

Sa Akim in Eliyut amam.

¹⁵ Sa Eliyut in Eleasar amam.

Sa Eleasar in Matan amam.

Sa Matan in Jekob amam.

¹⁶ Sa Jekob in Josep amam.

An Josep in Mariya aduw iyan Mariya in Jesus am, on mataw anan Krais*

¹⁷ Nazaq iyan Abraham asenlulib iyim bolim Devit-ib iytu nab Yesus asesan in 14 nazaq iyi. Ad Devit asenlulib iyim bolim Isrel on mataw Babiloniya-ib begbeg iyim osiyya nab in asesan 14 nazaq iyi. Ad Isrel

* ^{1:16:} Gamuk Krais ka alulin “God mat emid bo i gilumsihdaqta na amatin” haqayta.’ haqayta na.

on mataw Babiloniya-ib begbeg iyim osim bolim Krais gwahtimta nab in asesan 14 nazaq iyymo.

*Mariya in ago amun Yesus am
(Luk 2.1-7)*

¹⁸ Ari Yesus Krais anen amta awaga-mun kazaq. Mariya anan bilaqiy. In teq Josep waqdaq haqiy. Haqan teq Mariya ayow Josep inaq an a hi waqsamo God ago Bugaw Dimunta Mariya aholib bolan in agem tiqiy. ¹⁹ Agem iysa aduw Josep nazaq in ago aw ahol waqad anad emyaq, Ya Mariya tuhulosdaiq haqyaq. Haqad teq in mat dimunta iyim in awe mebay ugnan anad a hi bilaqyaq. In anad emyaq, Ya nan kabemmo a hi bilaqad kiskismo tuhulosdaiq haqyaq.

²⁰ Haqad in anad nazaq emad luwad kam araqab in ussa ago sen qway aduganib Iyahta ago angelo araq in ameb tugwahtim. Gwahtiqim in bulon, Devit ases Josep ham. Ni ningaw aw Mariya waqgo hi rab ham. Ni hurit ham. Amun nawa ningaw aw agemab usaqta na God ago Bugaw Dimunta inmo ugta ham. ²¹ Ugan ningaw aw na amun matta araq tiqemdaq ham. Emid ni anan Yesus biydaq ham. Na ezaqgo in teq ago on mataw gigo daq meqinta giwalemad gimen dante wastitayid in God agerab tileh daqay ham.

²²⁻²³ Nazaq iyan daq na in Iyahta ago gamuk araq in kwaziqmo ago nantut aqezab eman gwahtimta na tuwolnet bug. Gamuk na kazaq bilam,

Ne huriyi ham. Aw araq mat inaq asit a hi usta na agem iyeq amun matta araq tiqemdaq haqad in bilam ham. Emid teq mataw amun na anan biyeq Emanuvel tihaq daqay haqad in bilam ham. *Aisyasa 7.14*

Teq gamuk Emanuvel na alulin in kazaq: "God i ginaq osauqta" haqayta.

²⁴ Ari Josep usim ago sen qway na tihiqiyen in ticeram. Eraqim Iyahta ago angelo bulonta nazaqmo in emim awe Mariya tuwam. ²⁵ Waqim teq in asit inaq a hi ussa le awe amun matta na tiqam. Eman Josep in amun anan Yesus haqad tibiy.

2

Zeq gwalaqta ban mataw aseseqta Yesus ahol waqnan bolby

¹⁻² Ari Herot saw Judiya-ib king iyim ossa Mariya in saw nabmo uliq Betlehem-ub Yesus tiqam. Eman teq zeq gwalaqta ban kantri araq ago mataw aseseqta ginad awaz meqinta asor uliq Jerusalem-ub bolim mataw haresmo susumun negeq bilaq yaqay, Amun muturta Juda gigo king na edob diq osaq? haq yaqay. I in ago ulig saw zeq gwalaqta ban ahol waqim i nagunim

bol haq yaqay. I amun na ahol waqeq teq i amen lotu emam haqad i bol haq yaqay. ³ Haqsa Herot gamuk na huritim ritan. Sa Jerusalem-ub on mataw bunmo riteniymo.

⁴ An Herot in Isrel gigo mataw tamaz emayta gigo aseseqta na teq mataw Moses ago gunun hurit kemiya na bumno gi-humab wolim tisusumun nag, Mat ne anan Krais haqayta na uliq edob diq gwahtiq-daqta? ham. ⁵⁻⁶ Haqan mataw aseseqta na buloniy, Saw Judiya-ib uliq anan Betlehem haqayta nab in gwahtiqdaqta haqiy. God ago nantut gamuk nazaq mar tonan usaqta haqiy. Gamuk na bilam,

Uliq Betlehem saw Judiya-ibta ham ni saw Judiya-ib uliq gibin inaqta na gi-haqaenbita a haiq ham haqiy. Na ezaqgo ne gilikmanib teq maror araq ayahta tugwahtiqdaq ham haqiy. Gwahtiqeq teq in yaqgo on mataw Isrel tigiwamuzdaq haqad in bilam haqiy.

Maika 5.2

⁷ Haqan Herot gamuk na huritim in ulilemimmoo nan eman saw zeq gwalaqta ban mataw ginad awaz meqinta na gigo hib tilah, in boleq Herot ahol waq daqay haqad. An mataw na bolan in tisusumun nag, Kam gineh diq ulig na gwahtim? ham. ⁸ Haqan mataw aseseqta na tubuloniy. Bulonan Herot gigeman Betlehem-ub lehsa in gibilan, Ne leheq amun na nagun naqmo diq hiqiy ham. Naguneq ne ahol waqeq teq boleq ya ibileniy ham. Ibilenid ta ya leheq in ayon lotu tiqemdaiqmo ham.

⁹ In nazaq gibilenan huritadmo in tilehiy. Lehad ulig teko zeq gwalaqta ban ahol waqiyta na in ahol a ta waqiy. Ahol waqsa ulig na ameb lehim bit amun usaqta nabmo titur. ¹⁰ Tursa in ulig na ahol waqad in ginad tidimini naqmo diq hiqiy yaqay.

¹¹ Ginad dimniysa in le bit aduganib gwahtiqim amun anen Mariya inaq ossa tigibiyiy. Gibiyad in gibakbakan ulum laquwim ginobun mulbunim ogib woqsa in amun amen lotu emad abin tiqluwi. Ad teq in amun ayon naw a boliyta na hasim tuqugiy. Naw na gol teq masil dimunta teq nal ahurun dimun diqta na tuqugiy. ¹² Ugadmo in nab tuqusiy. Ussa in gigo sen qway aduganib God kazaq gibilan, Ne muleqeq Herot ago hib ta hi lehiy ham. Haqan in usim eraqim dan ta araq muzim giqliqab muleqim tilehiy.

Josep ago aw amun nenaq Isip-ub wole-hiy

¹³ Ari mataw aseseqta kantri araqabta na muleqim gigo uliqab ta lehsa Josep a ta usim sen qwaysa Iyahta ago angelo tubulon, Ni eraq ham. Herot teq ningaw amun na wol emnan tinagundaq ham. Ni

3

Jon mataw huz negyaqta na in on mataw gamuk gibilenyaq

(Mak 1.2-8; Luk 3.1-18; Jon 1.19-28)

amun anen inaq giwaqeç qiqad kantri Isip-ubmo tukeq woleh ham. Ni nab leheq ossa ya a ta nibilenid teq ni qiqad ta boldaq ham.¹⁴ Haqan tarom nabmo Josep eraqim amun na anen inaq giwaqim qiqad Isip-ub tuwolehiy.¹⁵ Wolehim ossa Herot tumoqan teq in ta muleqiy. Nazaq iyan daq na in Iyahta ago gamuk in kwaziqmo eman ago nantut aqezab gwahtimta na tuwolnet bug. Gamuk na bilam, Ya itatin lilewunid in Isip huloseq gwahtiç daq haqad in bilam. *Hosea 11.1*

King Herot bilaqan onmin matmatta susibta ginol eman moqiy

¹⁶ Ari zeq gwalaqta ban mataw ginad awaz meqinta na in Herot ame titonim dan ta araq waqim in gigo uliqab ta lehiyta na ago Herot tuhurit. Huritim in agem meqin diq iysa in ago bab mataw asor giqeman Betlehem-ub lehim in uliq sinsin nagab onmin matmatta ginen muturmo giqemiyya gigo ulig gigermo a hi iyayta nagan tiginol em bugiy. Na ezaqgo Herot in mataw marorta na susumun negim kam gineh diq ulig gwahtiçan in ahol waqiyta na ago in huritta iyan in onmin nazaqta ginol am.

¹⁷ Nazaq iyan daq na in kwaziqmo God ago nantut Jeremaya gamuk bilamta na tuwol net bug. In kazaq bilam,

¹⁸ Uliq Rama-ib aw araq gaq wazad ek tonaq ham. Na Jekob awe Resel in ago onmin ginan gaq wazaq ham. Gaq wazsa on mataw anad waqsa in hulosaq ham. Na ezaqgo in ago onmin na tumoqiyta na ago ham. *Jeremaya 31.15*

Josep ago aw amun nenaq Isip hulosim Isrel-ib ta lehiy

¹⁹⁻²⁰ Ari Josep Isip-ub ossa Herot tumom. Moqan teq Josep usim sen ta qwayan Iyahta ago angelo na gwahtiçim tubulon, Ni eraq ham. Mataw ningo amun wol emnan bilaqiyta na tumoq bugiy ham. Ning aw amun giwaqeç qiqad Isrel-ib ta gwaleh ham.²¹ Haqan in eraqim amun anen inaq giwaqim nenaq Isrel-ib tugwalehiy.

²² Gwalehim Herot atatin Arkelaus amango ban waqim saw Judiya-ib on mataw gigo king iyim osaqtta na ago Josep tuhurit. Huritim in saw Judiya-ib lehan rab. Ad in usim sen ta qwayim gamuk araq kazaq hurit, Ni saw Judiya-ib hi leh ham. Haqan Josep eraqim saw ta araq anan Galiliy haqayta nab ago aw amun nenaq tilah.²³ Lehim in uliq anan Nasaret haqayta nab tuqosiy.

Nazaq iyan daq na in God ago gamuk araq nantut bilaqiyta na tuwol net bug. Gamuk na bilam, In anan mat uliq Nasaret-ibta haq daqay ham.

¹ Ari Jesus uliq Nasaret-ib osim ayah tiqiy bugan kam nagab Jon mataw huz negyaqta na tugwahtim. Gwahtiçim in saw Judiya-ib og araq amatawun haiqtab osad teq in on mataw God ago gamuk tigibilenyaq. ² In bilaqyaq, God ago maror bolim sinsin tiqiy haqyaq. Nazaq iyan ne ginad buliyeq gigo daq meqinta gileh ugyi haqyaq.

³ Ari kwaziqmo God ago nantut Aisaya mat anan bilamta na amatin in Jon-mo. Teq Aisaya bilam,

Mat na aqez saw amatawun haiqtab lileyim bilaqaq, Ne Iyahta ayon dan balaw toniy haqaq ham. Ad ne in ayon dante na wastitayid titnonan haqaq ham. *Aisaya 40.3*

⁴ Haqan Jon gwahtiçim osad in ago tubusan karuw anan kamel haqayta na asan ulim emiya. Teq in karuw asan asor am gan nog ahulib am wazeq luuyaqta. Luwad in ago didaq kasum teq garanab kubiç akokin neqyaqta.

⁵ Ari Jon in God ago gamuk na bilaqsa uliq Jerusalem-ub teq saw Judiya-ib teq yuw Jodan aqurumnib uliq sinsin usayta nagab on mataw kabemmo Jon ago hib tubol yaqay. ⁶ Bolad in gigo daq teq ginad meqinta ulum hassa Jon qiqad le yuw Jodan-ib gihuz negyaq.

⁷ Sa Farisi teq Sadyusi kabemmo yuw huznanz bolsa Jon tigibiy. Gibiyad in ginadad gibilan, Ne ured amidgotniz ham. God teq ne ginan agem meqniyya gimeqin tondaqta na nog gibilenan ne tukim gigbeb leh nog iyay? ham. ⁸ Ne ginad meqniyya gigem bulyiid teq ne gigo daq nazaqmo tubuliydaq ham. ⁹ Luweq ne ginad kazaq em daqay ham. I Abraham asenlulibta haq daqay ham. Nazaq iyan God anad dimunta igad a hi gimeqin tondaq haq daqay ham. Nazaq ne ginad hi emiy ham. Ya ne gibilenaiq ham. God gig kag gibilenid buliyeq Abraham asenlulniz tygo azawayin in aholib usaqta ham. ¹⁰ Talgis ay abeqarib tuqusaq ham. Ay bunmo anon dimunta a hi emaqta na in qwayeq faqab hunegid le tuqoydaq ham.

¹¹ Ne ginad buliyeq gigo daq meqinta gileh ugan teq ya ne yuwbimo huz negaigeta ham. Ari mat araq teq ya ibeb boldaqta na abin in ya ibin uriyamta ham. Ya in ahaqenibita ham. In yaqgo Iyahta ham. Ya in ago kabibiy mat samanta ham. In boleq nagah giger God ago Bugaw Dimunta teq faq inaq gimalib ne tuhuz negdaq ham. ¹² In abenab sabol wazim in

ago wit wolayta asawnib wit tigiluwiyinham. Giluwiyad in wit anagin dimunta na ginuweq ago wit abitnib humab tuwoldaq ham. Humab wolad in wit asan meqinta na ginuweq faq a hi miyaqtah hunegid le tuqyodaq ham.

*Jon Yesus huz ug
(Mak 1.9-11; Luk 3.21-22)*

¹³ Ari kam nab Yesus saw Galiliy hulosim Jon huz yagdaq haqad yuw Jodan-ib Jon ago hib tubol. ¹⁴ Bolan Jon huz ugnan hulosyaq. Ad in bulon, Ya ni a hi huz nigratq ham. Ninmo teq ya huz yagdaq ham. Ni ezaq haqad yaqgo hib bol? ham. ¹⁵ Haqan Yesus amenin emim bulon, Nab iysa ya bilay nazaq muran ni em ham. I God anad muzinad daq dimunta ka tigemam ham. Daq dimdimunta God anan anad bilaqaqta na i araq diq a hi hulosam ham. In nazaq haqanmo Jon aqez muzinim tuhuz ug. ¹⁶ Huz ugan Yesus hidmo yuw hulosim dubub gwaladmo ame gwalehim kait misireq nog iyim aqez hassa in ahol wam. Ahol waqsa God ago Bugaw Dimunta ah husta nog iyim hitiqim bolim aholib tisogot. ¹⁷ Soqotan Heven-ib God aqez kazaq bilam, Mat ka ya itatin ham. Ya in anan inad bilaqsa ya igem dimun diq iyaqta ham.

4

*Satan Yesus ulum wam
(Mak 1.12-13; Luk 4.1-13)*

¹ Ari daq na abe ban God ago Bugaw Dimunta in Yesus waqim ad saw araq amatawun haiqtab tilah, Satan in Yesus anad ulum waqdaq haqad. ² A lehan saw nab Yesus didaq haiqmo ossa kam 40 nazaqmo thiqiy. An abeb in agemnan tumoqyaq.

³ In agemnan moqad ossa Mat 1 Gilum Waqaqta na bolim tubulon, Ni God atatin iyeq teq ni gig ka bulonid in buliyeq bret iyid ni neq ham. ⁴ Haqan Yesus amenin emim bilam, God ago marib gamuk araq kazaq bilam ham.

Bret amomo in mat eman kayeqmo a hi osaqa haqad in bilam ham. Mat God aqezab gamuk gwahtiqaqta na bunmo huritim muzinad teq in kayeqmo osaqa haqad in bilam ham. *Lo 8.3*

⁵ In nazaq bilaqan Satan in waqim ad God ago uliq tawonta Jerusalem-ub tilah. A lehim in Tempel abigmanib Yesus eman titur. ⁶ Tursa in bulon, God ago marib gamuk araq kazaq bilam ham, God in ago angelo gibilenid in tinibiy muz daqay haqad in bilam ham.

Nibiy muzad in boleq gibenab tinsor daqay haqad in bilam ham. Luweq ni nisen gigib woltaydaq

haqad in bilam ham. *Buk Song 91.11-12*

Nazaq iyan ni God atatin iyeq teq ni sortukeq woq ham. Woqsa ni nimam nilumsihsa ya nibiyiq ham. ⁷ Haqan Yesus bilam, Teq God ago marib gamuk ta araq kazaq usaqmo ham. Na in bilam,

Iyahta in ning God haqad in bilam ham.

Nazaq iyan ni girerey emad in hi ulum waq haqad in bilam ham. *Lo 6.16*

⁸ Haqanmo Satan in Yesus waqim ad garah araq sisqaqta abigmanib tugwalah. A gwalehim in kantri aseseqta gigo nagah dimdimunta bunmo tiqishun bug. ⁹ Isihun bugad teq in Yesus bulon, Ni yaqmen nibakkban ulum laquwad ya ibin iluwid teq ya nagah ko bummo tinigdaiq ham. ¹⁰ Haqan Yesus bulon, Satan ni tuk ham. God ago marib gamuk kazaq bilam ham.

Iyahta in ning God haqad in bilam ham. Ni in amomo abin iluwad ago kabiy emdaq haqad in bilam ham. *Lo 6.13*

¹¹ Ari Yesus nazaq haqanmo Satan in hulosadmo tilah. Lehsa teq God ago angelo asor bolim Yesus tuqulumsihiy.

*Yesus saw Galiliy-ib ago kabiy alulin am
(Mak 1.14-15; Luk 4.14-15)*

¹² Ari Yesus in Jon irquriya na huritim in muleqim saw Galiliy-ib tilah. ¹³ Lehim in uliq Nasaret hulosim le uliq Kapaneam-ub tuqos. Uliq Kapaneam na in Juda gisesan Zebulun ayow Naptaliy inaq gigo og amuganib yuw akurorgan anan Galiliy haqayta na aqurumnib usaqta. ¹⁴ Yesus le uliq Kapaneam-ub tuqossa teq daq na in God ago gamuk kwaziqmo nantut Aisaya bilamta na tuwol net bug. ¹⁵ Gamuk na bilam,

Saw Zebulun teq saw Naptaliy in yuw ayahta akurorqanta aqurumnib usaqta ham. Saw giger na in yuw Jodan aqurumun kozaq ban usaqta ham. Teq mataw saw giger na ginan Galiliy haqayta ham. Ad in bilaqay, Saw nab on mataw en ta asor Juda a haiqta kabemmo Juda gilikmanib osay haqayta ham.

¹⁶ On mataw saw nab osayta na in ginad a hi em hasad meqin diq os yaqayta ham. Bilaqne in romriqab os yaqayta nazaqmo ham. Teq muran mataw na saw anuwan ayahta ahol tuwaqiy ham. Saw anuwan na bilaqne tarommo saw hastitaysa zeq ahokan gwalaq nazaq nogta in ahol waqiy ham. *Aisaya 9.1-2*

¹⁷ Ari Yesus uliq Kapaneam-ub lehim tuqosad teq in gamuk alulin emim tibilam, God ago maror bolim sinsin tiqiy ham.

Nazaq iyan ne ginad buliyeq gigo daq meqinta gileh ugyl ham.

Yesus in God ago maror agamukan bilaqad in on mataw gigo moq wastitayan dimniy yaqay

Yesus mataw aweweinqmo gililewunan in muzim inaq lehiy

(Mak 1.16-20; Luk 5.1-11)

¹⁸ Ari Yesus yuw-kurorqan Galiliy aqurumun muzim lehad luwim in maqbab gigermo dob hunegim nabiq waqad luwsa tigibiy. Araq na anan Saimon. In anan araq Pita haqayta. Teq in amikqan anan Andru. In giger kabiy naqmo em yaqayta amatawun. ¹⁹ Yesus mataw giger na gibiyad gibilan, Ne ya imuzeq boliy ham. Bolsa ya giqishunid ne nabiq waqayta nazaqmo teq ne mataw tigiwaq daqay ham. ²⁰ Haqan hidmo giger na dob hulosan ussa in Yesus muzim inaq tilehiy.

²¹ Lehad luwim Yesus maqbab gigermo a ta gibiy. Mataw na in Sebediy atatniz Jems ama Jon inaq. In gimam inaq muyib dob wastitayad ossa Yesus giger na tigililewummo. ²² Gililewunan hidmo in gimam hulosan muyib ossa in Yesus muzim inaq tilehiy.

Yesus on mataw suleq negad teq in kabemmo giwastitayan dimniy yaqay
(Luk 6.17-19)

²³ Ari Yesus saw Galiliy-ib uliq bunmo lehad in on mataw gigo bit humab wolayta nab suleq negad in God ago maror og kab gwahtimta na agamukan tigibilenyaq. In gamuk dimunta na gibilenad teq in gigo moq teq gihol asor meqniya na bunmo tigiwastitayyaqmo. ²⁴ In nazaq emsa abin saw Siriya-ib uliq bunmo tilah. Lehan mataw gigo moq inaq na bunmo giqad Yesus ago hib tubol yaqay. Mataw gigo moq amo amo inaqta na teq mataw gihol titiyaqta na teq mataw gihol gibensen agadan iyim in ogib woqim gibensen ayim gihol harara nemaqta na teq mataw gigo bugaw meqinta giholib usaqta na teq mataw gibensen momta nagan bunmo giqad bolid Yesus in giwastitayyaq. ²⁵ Teq on mataw dauh biyahmo saw Galiliy-ibta teq saw Dekapolis-ibta* teq uliq Jerusalem-ubta teq saw Judiya-ibta teq yuw Jodan aqurumnipta na kabemmo in Yesus muzeq inaq leh yaqay.

* 4:25: Nan Dekapolis ka alulin in 'Uliq 10' haqayta.

Yesus on mataw tidimniyim osayta na ginan bilam

(Luk 6.20-23)

1-2 Ari Yesus on mataw dauh biyahmo gibiyad in garah araq abigmanib tugwalah. Gwalehim in os woqim ossa ago disaipel agerab tuboliy. Bolan Yesus gamuk negim kazaq gibilan,

³ Ni nog bilaqaq, Ya God ago maror aduganib gwahtiqaqta na ago ya mat dimun a haqiq haqqaqta na ni tidimniyim osaq ham.

Na ezaqgo ni teq God ago maror aduganib gwahtiqaq ananon diqmo tuqosdaq ham.

⁴ Ni nog ninad meqniysa gaqad osaqta na ni tidimniyim osaq ham.

Na ezaqgo God teq ni ninad tuwaqdaq ham.

⁵ Ni nog daq haresmo a hi emad tok nemim luwaqta na ni tidimniyim osaq ham.

Na ezaqgo ni teq mat nibin inaqta tiqyidaq ham.

⁶ Ni nog didaq teq yuwnan moqaqta nazaqmo ni God ago daq titnonta anan moqaqta na ni tidimniyim osaq ham.

Na ezaqgo God teq nagah ni anan moqaqta na nigid tiniyundaq ham.

⁷ Ni nog on mataw ginan ninad meqniysa ni ninad negaqta na ni tidimniyim osaq ham.

Na ezaqgo God teq ni ninan anad meqniysa in anad tinigdaqmo ham.

⁸ Ni nog nigem dimun diqmo anumlan haiqmo usaqta na ni tidimniyim osaq ham.

Na ezaqgo ni teq God ahol tuwaqdaq ham.

⁹ Ni nog mataw gilikmanib an mug teq an wol bayan woqaqta na ni tidimniyim osaq ham.

Na ezaqgo mataw teq ni ninan God atatin tihaq daqay ham.

¹⁰ Ni nog God ago daq titnonta emsa mataw afaqan nigayta na ni tidimniyim osaq ham.

Na ezaqgo ni teq God ago maror aduganib gwahtiqaq ananon diqmo tuqosdaq ham.

¹¹ Ni nog niholib ya ibin ussa mataw nibilawunad teq in ni nimeqin tonad nimalib nan katiyta emayta na ni tidimniyim osaq ham. ¹² Ni ninad dimniyis nigem dimun diq iyan ham. Na ezaqgo ningo naw ayahmo Heven-ib nawa nibaq tunim usaq ham. Kwaziqmo mataw in God ago nantut ginan gigem meqniysa in nazaqmo gimeqin ton yaqaymo ham.

*Kamis agon hiqiyta ago gamuk awowun
(Mak 9.50; Luk 14.34-35)*

¹³ Ari Yesus gamuk bilaq tutim a lehad in bilam, Kamis didaq eman aneq dimninyaqta nazaq nogmo ne og kab osayta ham. Teq kamis agon hiqiyid i ezaq tonid teq kamis na agon inaq a ta iydaq? ham. Kamis nazaqta na akabiyan haiqta ham. Mataw ogib hunegim gisenab tubaysisiyata ham.

¹⁴ Ne og kab saw anuwan nogta iyim osayta ham. Ne ginad emiy ham. Uliq araq garah abigmanib usad in ulilem ahi usaqta ham. Na ezaqgo taromab mataw na gigo faq oysa mataw ahol waqayta ham. ¹⁵ Ad nazaqmo mataw lam miderim kumramab ahi sihenayta ham. Haiq ham. In lam miderim ulilib othenan oysa bit nab mataw bunmo anuwanib osayta ham. ¹⁶ Ad nazaqmo ne gigo daq dimunta ne mataw gimeb ulalabmo emsa in ahol waqiy ham. Ne gigo daq dimunta na lam anuwan oy nog iysa mataw ahol waqad teq in ne Gimam Heven-ib Osaqta na abin tiqiluw daqay ham.

Yesus God ago maror alulin anan bilam

¹⁷ Ne luweq ya inan bilaq daqay, Matka God ago maror Moses mar tonta na teq gamuk God ago nantut mar toniyta na baymuznan bol haq daqay ham. Nazaq ne ginad hi emiy ham. Ya gamuk na baymuzgo ahi bol ham. Ya gamuk na muzinad wol net buggo haqad ya bolta ham. ¹⁸ Ya helmo ne gibilenaiq ham. Og kait inaq us tutsumo God ago maror agamukan asit diq araq ahi hi hiqiydaq ham. Mar na bun diqmo kuluwa-kuluwmo ussa le nagah bunmo in anan bilamta na tugwahtiqaq ham. ¹⁹ Nazaq iyan mat God ago marib gunun araq amik diqta itiyonad teq in nazaqmo mataw giqisihunid in emsa mat na God ago maror aduganib abin amik diq iydaq ham. Ari mat God ago marib gunun bunmo muz bugad teq in nazaqmo mataw giqisihunid in emsa mat na God ago maror aduganib abin tidimniydaq ham. ²⁰ Ya ne gibilenaiq ham. Ne gigo daq titntona ne emayta na in mataw Moses ago gunun huri kemiyta na giyogniz Farisi nenaq gigo daq ahi giquriyamid ne God ago maror aduganib le ahi gwahtiqaq daqay ham.

Yesus an anobun wastitay ago bilam (Luk 12.57-59)

²¹ Teq ne gisesan gigo gunun araq ne huritiyta na in kazaq bilam ham. Ni mat wol emid hi moqan haqad in bilam ham. Ad mat in mat araq wol emid moqid mat na hazizirib leheq ago daq na amenin tuwaqdaq haqad in bilam ham.

²² Ta teq yaqmo kazaq ne gibilenaiq ham. Ni nigem meqinta nimaqbab ugeq ni hazizirib titurdaqmo ham. Ad ni nimaqbab bilawuneq ni kaunsel ayahta na gimeb tugwahtiqaq ham. Ad ni nimaqbab buloneq bilaqdaq. Ni agadan haqeq ni saw faq oyad ahi miyaqta nab tilehdaq ham.

²³⁻²⁴ Nazaq iyan ni God naw ugnan haqad ago tamaz em abanab naw tigemad nab ni niyow meqin tonta na anadin emeq ni ningi naw ban nab hulosad niyowgo hib leh ham. Leheq niyow inaq an anobun wastitayeq teq ni muleqeq ningi naw na God ug ham. ²⁵ Ari ta mat araq nan nignan haqad ninaq hazizirib lehad hidmo danib ni inaq gamuk na wastitay ham. Luweq mat na niwaqeq megistret abenab niqemdaq ham. Niqemid megistret niwaqeq humrey gibenaq niqemid humrey niwazeq bit giqirquran osaytab tiniqem daqay ham. ²⁶ Ya helmo ne gibilenaiq ham. Ni bit na hidmo ahi hulosdaq ham. Ni bit nab osad ningi daq meqinta amenin zay bugeq teq ni asanib tugwahtiqaq ham.

Yesus mataw an alulib hureqayta na ginan bilam

²⁷ Teq ne gisesan gigo gunun araq ne huritiyta na in kazaq bilam ham. Ni an alulib hureqeq inaq hi usiy haqad in bilam ham.

²⁸ Ta teq yaqmo kazaq ne gibilenaiq ham. Mat in aw tuwaqim teq in aw ta araq amebmo ahol waqad in utetad anadibmo bilaqqaq. Ya aw ko waqeq inaq us nagta haqaqta, mat na in awe meqin tonim an haresmo huramta nog tiqiy ham. ²⁹ Teq ni nimeqnagin niqabun kat nigid ni ninad helta hulosnan tonad ni nimeqnagin na othaseq hunegid lehan ham. Ni nihol asormo os dimuntab lehdaqta na in dimun ham. Ari ni nihol anaghan bunmo ussa in ni niwazeq nihunegid ni saw faq oyaqtat lehdaqta na in meqin diq ham. ³⁰ Teq ni niben niqabun kat nigid ni ninad helta hulosnan tonad ni niben na uroteq hunegid lehanmo ham. Ni nihol asormo os dimuntab lehdaqta na in dimun ham. Ari ni nihol anaghan bunmo ussa ni saw faq oyaqtat lehdaqta na in meqin diq ham.

Yesus mataw aw tuwaqim teq muzayta na ginan bilam

(Matyu 19.9; Mak 10.11-12; Luk 16.18)

³¹ Teq ne gisesan gigo gunun araq na in kazaq bilam ham.

Mat araq anadibmo awe tumuznan haqad in sansandek mar toneq awe ugad teq in tumuzdaq haqad in bilam ham.

³² Ta teq yaqmo kazaq ne gibilenaiq ham. Mat araq awe in mat ta araq uteteq inaq

luwsa aduw diq na in aw na muznan in tuzmudaq ham. Ari in awe daq araq meqinta a hi emsa aduw anadib samanmo muzeq in awe na timeqin tondaq ham. Na ezaqgo in ago aw muzta na le mat muturta a ta waqim in bilaqne aduw hulosim mat araq inaq luw nog iyaqta ham. Sa mat muturta na in aw aduw muzan osta na waqim inaq osad in bilaqne mat ta araq ago aw inaq luw nog iyaqtamo ham.

Mataw gigo gamuk zaway ugad helmo ulilib haqayta na ago Yesus bilam

³³ Teq ne gisesan gigo gunun araq ne huriytiya na in kazaq bilam ham.

Ni nagah araq abinib Iyahta bulondaq, Helmo ya nimnen kabiy ka tiqemdaiq haqeq na ni nazaqmo diq tiqemdaq haqad in bilam ham. Ni ahi katyidaq haqad in bilam ham.

³⁴ Ta teq yaqmo kazaq ne gibelenaiq ham. Ni ningo gamuk ulumsihnan haqad nagah araq anan hikidik biy ham. Ad ni helmo haqad Heven anan hi biymo ham. Na ezaqgo saw nab God in ago ban tawontab osad nagah bunmo giwamuzaqta ham. ³⁵ Teq ne helmo haqad og ka anan hi biyimo ham. Og ka in God asen abanan iysa in asen emim osaqla ham. Teq ne helmo haqad uliq Jerusalem anan hi biyimo ham. Uliq ayahita na in God ago king ago uliqa ham. ³⁶ Teq ne helmo haqad negmo gihol anan hi biyimo ham. Na ezaqgo ne gifaqnib giqensan araq emid husta o dubta iygo ne zaway haiqgam ham. ³⁷ Ne nan heltaqmo bilaqiy ham. Egemo ne bilaqiy ham. Teq haiqgammo ne bilaqiy ham. Ari gamuk hares mataw in gigo nan ulumsihnan haqad bilaqayta na mat meqinta naqmo in giqezab eman gwahtiqaqta ham.

Mat araq nimeqin tonid ni amenin hi emgo Yesus bilam
(Luk 6.29-30)

³⁸ Teq ne gisesan gigo gunun araq ne huriytiya na in kazaq bilam ham.

Mat araq ni nime ulum hasid ni amenin in ame tuqulum hasdaqmo haqad in bilam ham. Teq mat araq ni nite wolworld ni amenin in ate tuwolwordaqmo haqad in bilam ham.

³⁹ Ta teq yaqmo ne kazaq gibelenaiq ham. Mat araq ni nimeqin tonid ni amenin hi em ham. Ad mat araq ni nimanmanan niqabun wolid ni nihol buliyid in nimanmanan ninasarán wol tonanmo ham. ⁴⁰ Mat araq ningó niholsihen waqnan haqad hurmey gigo sansandek na nigid ni niholsihen na ugad ni ningo saket inaqmo ug ton ham. ⁴¹ Ad mat araq in ago es afaqanta kilomita amulikmo sorgo nibe yaheq nibilenid ni ago es na sor tuteq ad kilomita amulikmo a ta leh ham. ⁴² Mat

araq ningó nagah anan sunid na ni ug ham. Ad mat araq ningó nagah waqeq teq amenin emgo nibilenid na ni ugad hi baymuz ham.

Ne gibabun ginan ginad bilaq ago adan
(Luk 6.27-28, 32-36)

⁴³ Teq ne gisesan gigo gunun araq ne huriytiya na in kazaq bilam ham.

Ni nimaqbabamno gilowan tonad ningo bab ni nigem meqinta neg haqad in bilam ham.

⁴⁴ Ta teq yaqmo kazaq diq ne gibelenaiq ham. Ne gigo bab ginan ginad bilaqan ham. Ad mataw ne gibilawunsa ne in gimen God bulomid in gidimum tonan ham. ⁴⁵ Ne nazaq tonedq teq ne Gimam Heven-ib Osaqta na atatniz diqmo iyeq tuqos daqay ham. Gimam Iyahta na in ago zeq eman mataw meqmeqinta teq dimdimunta inaqmo gimalib worireqaqta ham. Ad in urom eman mataw daq dimun emayta teq daq meqin emayta inaqmo gigo hib woqaqtamo ham. ⁴⁶ Mat araq ni ninan anad bilaqsa ta ni in anan ninad bilaqqaqta na in nagah a haitq ham. Ne daq na amenin araq God abenab ahi waq daqay ham. Mataw giben meqinta takis waqayta na in nazaqmo emayta ham. ⁴⁷ Teq ne giyognizmo nenaq gamuk emayta na in nagah a haitq ham. On mataw en ta asor Juda a haitq nagan in nazaqmo emayta ham. ⁴⁸ Nazaq iyan ne Gimam Heven-ib titnonimmo osaqla nazaqmo diq ne titnoneqmo osiy ham.

6

Mataw gina haiqta gilumsihgo agamukan

¹ Ne gihol waz naqmo hiciyyiham. Luweq ne ginad em daqay, I daq dimdimunta mataw gimeb emsa in i gibiyad i gabin tiqiluw daqay haq daqay ham. Ne nazaq emeq ne Gimam Heven-ib Osaqta na abenab naw araq dimunta ahi waq daqay ham.

² Mataw gimileq meqinta na in mataw gina haiqta nagah tinegnan haqad in mat araq bulonan in bit humab wolaytab teq uliq gemab taur ulam negaqla ham. Mataw na ginad kazaq emay ham. Mat ka taur ulamsa mataw bunmo gime bo gibiyad i mataw ginaghan haiqta ka nagah negsa in i gibiyad gabin tiqiluw daqay haqayta ham. Ya ne gibelenaiq ham. Mataw na in gigo naw nawaqmo tuwaqiy ham. In God abenab naw araq dimunta ahi waq daqay ham.

Nazaq iyan in emay nazaq ne hi emiy ham. ³ Ne mat ana haiqta ulumsihnan haqad ne mataw gime titoneqmo ulumsihny ham. ⁴ Ne nazaq ulilemeqmo daq emsa mataw ne ahi gibiy daqay ham. Id teq ne

Gimam daq ulilemabta ahol waqaqta na in ne naw dimunta tinegdaq ham.

*Mataw God inaq gamuk emad bulon daqayta na ago Yesus bilam
(Luk 11.2-4)*

⁵ Teq mataw gimileq meqinta na in God inaq gamuk emnan haqad in bit humab wolaytab teq uliq gemab ulalab turad in God inaq gamuk emayta ham. In ginad emay, I God inaq gamuk emsa mataw i gibiy daqay haqad in nazaq emayta ham. Ya helmo ne gibilenaiq ham. Mataw na in gigo daq na anawun nawaqmo tuwaqiy ham. In God abenab nagah araq dimunta a ta hi waq daqay ham.

Nazaq iyan in emay nazaq ne hi emiy ham. ⁶ Ne God inaq gamuk emnan haqad ne bit aduganib gwahtiqeq dan oteq teq ne Gimam ulilemim osaqua na inaq gamuk emiy ham. Sa ne Gimam daq ulilemabta ahol waqaqta na in amenin dimunta tinegdaq ham.

⁷ On mataw en ta asor Juda a haiqta nagan in gigo god katiyta inaq gamuk emad in gamuk samanta kabemmo inaqmo blaqim a lehayta ham. In ginad emay, I daq kazaq emsa teq i gigo god i giqez tuhuritdaq haqayta ham. ⁸ Ta teq ne in gigo daq na hi muziniy ham. Na ezaqgo ne nagah araq ago siqim iyayta na anan Gimam Iyah a hi bulonsamo in tekomo tuhuritta ham. ⁹ Ari ne God inaq gamuk emnan ne kazaq buloniham.

I Gimam Iyah Heven-ib osaqua,

Ni on mataw bunmo giqemid in ni ninan waziniy.

¹⁰ Ad ni ning maror emid og kab gwah-tiqan.

Sa mataw Heven-ib ninad muzinaya nazaqmo ni mataw og kabta giqemid in ni ninad muziniy.

¹¹ Kam amulik-mulikmo ago didaqla ni ig.

¹² Ad mataw i gigo hib daq meqinta emsa i walemad anadin a ta hi emauqta nazaqmo ni i gigo daq meqinta giwale-mad anadin ta hi emmo.

¹³ Nagah i gilum waqdaqta na ni wasihid i giholib hi gwahtiqan.

Sa mat meqinta na i gimeqin tonsa ni i gilumsih.

¹⁴ Ad Jesus bilam, Ne hurity ham. Mataw ne gimeqin tonsa ne in gigo daq na walemad anadin a ta hi emsa ne Gimam Heven-ib Osaqta na in ne gigo daq meqinta tigiwalemdaqmo ham. ¹⁵ Ari mataw ne gimeqin tonsa ne in gigo daq na a hi walemsa Gimam Iyah in ne gigo daq meqinta a hi giwalemdaqmo ham.

Jesus mataw didaq udinayta na ago bilam

¹⁶ Mataw gimileq meqinta na in didaq tuqudinad in ginobun iyim giwaq meqin diq iysa luwayta ham. In ginad emay, I ginobun iyeq luwsa mataw i tigibiy daqay haqad in nazaq emayta ham. Ya helmo ne gibilenaiq ham. Mataw na in gigo nawawaqmo tuwaqiy ham. In God abenab naraq dimunta a ta hi waq daqay ham.

Nazaq iyan in emay nazaq ne hi emiy ham. ¹⁷ Ne didaq tuqudinnan haqad ne ginobun suholeq giqensan otsireqiy ham. ¹⁸ Ne nazaq emid teq mataw ne didaq udinayta na ago a hi hurit daqay ham. Ta teq ne Gimam ulilemim osaqua na in amomo ne tigibiydaq ham. Ad ne Gimam daq ulilemabta ahol waqaqta na in ne gigo daq dimunta na amenin dimuntamo tinegdaq ham.

Mataw Heven ago nagah dimunta gi-holyon humab emgo Yesus bilam

(Luk 12.33-34)

¹⁹ Ari Jesus kazaq bilam, Ne giholyon nagah dimdimunta og kab humab hi emiy ham. Og kab bidbid teq hurhur in nagah meqin tonayta ham. Teq mataw girin in-aqta na in gel wolim gwahtiqim nagah rin tonayta ham. ²⁰ Nazaq iyan ne Heven-ibmo nagah dimdimunta giholyon humab emiy ham. Uliq nab bidbid teq hurhur haiqta ham. Teq mataw gel wolim gwahtiqim nagah rin tonayta na haiqmo ham. ²¹ Ne ginad emiy ham. Uliq edob ne gigo nagah dimdimunta usdaqta nabmo teq ne ginad ayahmo tuqusdaqmo ham.

Ni nimeqnagin nihol anuwan ugaqta

(Luk 11.34-36)

²² Ni nimeqnagin nihol bunmo anuwan ugaqta ham. Ni nime dimun iyid ni nihol bunmo anuwan inaq tiqiydaq ham. ²³ Ari ni nime meqin iyid ni nihol bunmo aromriq inaq tiqiydaq ham. Nazaq iyan ni nimuganib anuwan us nagta na in romriq iyid romriq na in ni niholib ayahmo diq tiqiydaq ham.

Mat araq mataw aseseqta giger gigo kabibiy mat a hi iydaq

(Luk 16.13)

²⁴ Ari mat araq in mataw aseseqta giger giqez a hi muzdaqta ham. In nazaq tonad luweq in araq agem meqinta ugad araq in agem dimunta ugdaq ham. Teq in araq anadin diq emad araq in gileh ugdaq ham. Nazaq iyan ne mani anadin diq emad ne God aqez a hi muzin daqaymo ham.

Yesus mataw ginad meqniysa ginad kabemmo emayta na ginan bilam

(Luk 12.22-31)

²⁵ Nazaq iyan ya ne gibilenaiq ham. Ne gigo luw os anan ginad haresmo hi emiy ham. Ad “I teq naga neqam?” o “I teq

naga uluwam?" haqad ne nazaq ginad hi emiy ham. Teq ne giholgo ginad haresmo hi emiyham. Ad "I teq naga amalib i gihol isiham?" haqad nazaq ne ginad hi emiy ham. Ne didaq neqqomo og kab a hi osayta ham. Ad ne gihol in tubusanib sihgomo a hi usaqta ham.

²⁶ Ne ah gibiy ham. In didaq a hi leyaya ham. Ad in didaq tayim didaq abitnib a hi emaytamo ham. Teq ne Gimam Heven-ib Osaqta inmo didaq negsa neqayta ham. Ari in nagah amik diqta na anononmo wamuzqaqta nazaqmo in ne a hi giwamuzdaqmo ye? ham. Haiqgam ham. Ne ah ayahmo giquriyamiya ham. ²⁷ Ne gilikmanib nog diq inmo ahol anan anad meqniysi a ahol moqdaqta akaman na ulum riyawuneq asitmo a ta osdaq? ham. Na haiqgam ham.

²⁸ Ad nagaqgo ne tubusango ginad haresmo emaya? ham. Ne mazrewrew kabiyyab gwalaqta na anadin emiy ham. Teq in ezaq gwalaqta na ne ahol waq kemiham. In aholyon kabiyaaraq a hi emaqta ham. Ad in aholyon tubusan a hi initaqtamo ham. ²⁹ Teq ya ne gibileaiq ham. Kwaziqmo Isrel gigo king Solomon in ago balaw dimdimunta aholib emyaqta ham. Ta teq in ago balaw araq dimun diqta mazrewrew nogta haiqgam ham. ³⁰ Muran mazrewrew na kabiyyab gwaliim turaq ham. Sa babeq mataw uroteq faqab ginuwid gwalaq ham. On mataw, ne ginad God anan helmo haqayta na in amik diq ham. God nagah samanta na balaw tonad in nazaqmo ne giholyon tubusan a hi negdaqmo ye? ham. Haiqgam ham. In tinegdaq ham.

³¹⁻³² Ne nagah osgota na a hi waqeq ne meqin os daqayta na ago ne Gimam Heven-ib osaqta na tuhurit ham. Nazaq iyan ne ginad haresmo emad, "I teq naga neqam?" o "I teq naga uluwam?" nazaq ne ginad hi emiy ham. On mataw en ta asor Juda a haitqanagan in nagah osgota na waqgo haqad giholtuw bulad luwayta ham. ³³ Teq negmo nazaq hi emiy ham. Itureqmo ne God ago maror aduganib gwahtiqeq in ago daq dimdimunta emgo ne giholtuw bulad luwiy ham. Ne nazaq emsa teq God nagah osgota na bunmo inaqmo tinegdaq ham.

³⁴ Nazaq iyan ne kam babeqta na anadin diq hi emiy ham. Kam babeqta na inmo ago afaqan araq inaqta ham. Luweq ne babeq ago afaqanta na waqeq kam muranta na ago inaq wastoneq ne loyinsa in afaqan ayah diqta iydaq ham.

7

*Ne on mataw gigo daq hi ulum kemiya
(Luk 6.37-38, 41-42)*

¹ Ne mataw gigo daq ulum kemad, "Ka mataw meqin" nazaq ne ginan hi bilaqiy ham. Luweq God ne gigo daq ulum kemad ne ginan nazaq bilaqdqaqmo ham. ² Na ezaqgo ne mataw gigo daq ulum kemim ginan bilaqayta nazaqmo teq God in ne gigo daq ulum kemeq ne ginan bilaqdqaqmo ham. Daq ezaqta ne mataw gimen emayta nazaqmo God in amenin ne gimen tiqemdaqmo ham. ³ Nagaqgo ni niyow ameb rohroh amik diqta ussa ni ahol waqad ta ninmo nimeb ay anabun ayahta usaqta na ni ahol a hi waqaq? ham. ⁴ Ni ninad ezaq emad ni niyow bulonaq. Ya iyow haqaq ni nimeb rohroh usaqta na ya walemann haqaq? ham. Haqad ta ninmo nimeb ay anabun ayahta na usaq ham. ⁵ Ni nimileq meqin diq ham. Itureqmo ninmo nimeb ay anabun usaqta na walemeq nime saw anononmo ahol waqad teq ni le niyow ameb rohroh usaqta na walem ham.

⁶ Ne gihol waziy ham. Mataw asor in bilaqne bul gaun nog ham. Ne God ago gamuk dimdimunta negsa in bilaq daqay. Na nagah amik diq haq daqay ham. Bilaqne pokpok dimdimunta anawun ayahmota hunegan bul ginognib woqan in ahol waqad bay ninalayta nazaq nog ham. Ad ne mataw meqinta na ginan maqbab haqsa abeb in gihol buliyeq ne gibabun diq iyeq teq in ne tigimeqin ton daqay ham. Bilaqne gaun anamreniz didaq negsa in gihol builiyim gimugayta nazaq nog ham.

*Mataw God bulonsa in nagah dimdimunta negaqta
(Luk 11.9-13)*

⁷ Ne nagah araq anan God susumun ugidaq in tinegdaq ham. Ne nagah araq nagineq teq ne ahol tuwaq daqay ham. Ne dan ez wolhamsa teq God ne giyon dan tihas negdaq ham. ⁸ On mataw nagah anan God susumun ugayta na in nagah na waqayta ham. Teq on mataw nagah nagunayta na in nagah na ahol waqayta ham. Ad on mataw dan ez wolhamayta na God teq in giyon dan tihas negdaq ham.

⁹ Ne gilikmanib mat araq atatin in bret anan amam bulonid amam gig ugdaq e? ham. Haiqgam ham. ¹⁰ Ad in ago amun na nabiq anan bulonsa amam in nagah ahulinaqta gimugaqta araq waqeq ugdaq e? ham. Na haiqmo ham. ¹¹ Ne mataw ginad meqinta usaqta ham. Teq ne gigo onmin nagah dimdimunta neggo ne tuhurit kemiya ham. Ari ne Gimam Heven-ib osaqta na in nazaq ago on mataw a hi gitondaqmo ye? ham. Haiq ham. On mataw in Gimam Iyahta na inaq gamuk bilaqad bulonsa in ago nagah dimdimun diqta tinegdaq ham. ¹² Nazaq iyan on

mataw in ne ezaq gitonid ne ginad dimniydaqta nazaqmo ne in gigo hib daq emiymo ham. Daq naqmo in God ago maror Moses mar tonta na teq God ago nantut gamuk mar toniyta na bunmo alulin diq ham.

*Ne dan ez amikta nab le gwahtiqa
(Luk 13.24)*

¹³ Ne dan ez amik diqta nab le gwahtiqa ham. Dan mataw muzim le hiqiyata na agarahin haiqta ham. Teq dan meqinta na ago dan ez ayahmo diqta ham. Nazaq iyan on mataw kabemmo dan ez nabmo le gwahtiqa ham. ¹⁴ Ari dan ni muzeq le saw kayeqmo kuluwa-kuluwmo osaytab gwahtiqa ham. Na in garah aseseqta kabemmo inaqta ham. Ad dan dimunta na ago dan ez amik diqta ham. Nazaq iyan on mataw gilikmanib amulik-mulikmo in dan ez na nagunim ahol waqayta ham.

*Ne nantut katiyta na gigo gihol asawan woltayi
(Luk 6.43-44; 13.25-27)*

¹⁵ Ne nantut katiyta na ginan ne gihol asawan woltayi ham. Ne mataw na giloyinsa in mataw midemqan diqta bilaqne sipsip nog iy daqayta ham. Teq in ginadmo diq na in ne kat negeq ne gimeqin tonnan ham. Bilaqne gaun kwasikta sipsip gimus emim gineqayta nazaq nog ham. ¹⁶ Mataw katiyta na gigo kabiyan emsa teq ne in gigo tuhurit kem daqay ham. Mataw am asasuqin inaqta ahulib wain anagin waqayta ye? ham. Teq in sisihun meqinta abiyyoran inaqta na amuganib ay fik anon waqayta ye? ham. Haiqmo diq ham. ¹⁷ Na nazaqmo ham. Ay dimdimunta bunmo ginon dimunta emayta ham. Teq ay meqinta anon meqinta emaqta ham. ¹⁸ Ay dimunta anon meqinta a hi emdaqta ham. Teq ay meqinta anon dimunta a hi emdaqta ham. ¹⁹ Ay bunmo anon dimunta a hi emayta na mataw in qwayim hunegan faqab lehayta ham. ²⁰ Nazaq iyan ne mataw katiyta na gigo kabiyan emsa ahol waqad teq ne in gigo tuhurit kem daqay ham.

²¹ On mataw kabemmo ya inan samanta biyim bilaqqay, Iyahta, Iyahta haqayta ham. In ginad emay, I Jesus anan Iyahta biyadmo i God ago maror aduganib le tugwahtiqa haqay ham. Hikidik ham. Mat ya imam anad muzaqta naqmo in ya imam Heven-ib osaqta na ago maror aduganib tugwahtiqa ham. ²² Abeb mataw kabemmo yaqgo maror aduganib gwahtiqa tonadmo in ya ibileneq bilaq daqay, Iyahta, Iyahta haq daqay ham. I ogib osad ni nibinib nagah abeh teq gwahtiqa ham. Teq i nibinib mataw giholib bugaw meqinta gimuzta haq daqay ham. Ad i nibinib

daq azawayin inaqta kabemmo emta haq daqay ham. ²³ Haqid teq ya giblendaiq, Ya ne gigo a hi hurit haqdaiq ham. Ne mataw daq meqinta emayta ne ya ihuloseq kozaq lehiy ham.

*Bit emgo adan gigermo
(Luk 6.47-49)*

²⁴ Nazaq iyan on mataw yaqgo gamuk ka huritim muzinayta na in bilaqne mat ago bit gig ayatha amalib amta nazaq nog iy daqay ham. ²⁵ Mat na bit tiqeman teq urom ayahmo wom ham. Woqsa uq hitiqad tim ayahta inaqmo eraqim sibim le bit na othasan teq haiq ham. Bit na a hi wom ham. Na ezaqgo mat na gigmo diq amalib ago bit alulin am ham.

²⁶ Ari on mataw yaqgo gamuk ka huritim teq a hi muzinayta na in bilaqne mat agadanta ago bit ibur amalib amta nazaq nog iy daqay ham. ²⁷ Mat na bit tiqeman teq urom ayatha woqan uq hitim ham. Uq hitiqad tim inaqmo sibim le bit othasan bit na atoranmo woqim timeqniy has ham.

²⁸ Ari Jesus gamuk na bunmo bilaq bugan tihiqyan on mataw dauh biyahta na in ago suleq huritim in gihol turuh nem yaqay. ²⁹ Na ezaqgo Jesus ago gamuk in mataw Moses ago gunun hurit kemiyya na gigo gamuk nog a hi iyyaq. In ago gamuk bilaqne God inmo abin ugan in suleq bilamta nazaq nog iyyaq.

8

*Yesus mat araq ago moq lepra inaqta wastitayan dimniy
(Mak 1.40-44; Luk 5.12-14)*

¹ Ari Yesus garah nab osim gewoqanmo on mataw dauh kabemmo muzim inaq tileh yaqay. ² Lehsa mat araq ago moq lepra inaqta bolim Yesus agerab abak-bakan ulum laquwim turad teq in bulon, Iyahta ham ni ninad bilaqsa teq ni ya iwastitayid ya God ameb isan anumlan ka tihiqiydaq ham. ³ Haqan Yesus aben itiwunim mat na wazad bulon, Ya inad bilaqqay ham. Ni nisanib ninumlan usaqta na hiqiyay ham. Haqan muran diq nawaqmo mat na ago moq lepra tihiqiy. ⁴ An Yesus in mat na adek wazim bulon, Daq kawa ya emta ka ago ni mat araq hikidik bulon ham. Ni leheq mat tamaz emaqta naqmo nihol isihun ham. Isihunad teq Moses bilamta nazaqmo ni nihol anawun em ham. Emid teq mataw ningi moq tihiqiyta na ago tuhurit daqay ham.

*Yesus bab mataw gigo ayatha araq ago kabibiy mat wastitayan ahol tidimniy
(Luk 7.1-10)*

⁵⁻⁶ Ari Yesus le uliq Kapaneam-ub tugwahtiqa teq Rom gigo bab mataw 100

nazaq gigo ayahta araq bolim in anad awaz meqin amalib Yesus bulonim bilam, Iyatha ham. Yaqgo kabibiy mat kowa bitab moqad usaq ham. In abensen moqan ahol titiy naqmo hiqiysa usaq ham. ⁷ Haqan Yesus bulon, Ya teq leheq wastitayid in tidimniydaq ham. ⁸ Haqan bab mataw gigo ayahta na amenin emim bilam, Iyatha ham ni yaqgo bit aduganib le gwahtiqaqta na ago ya mat dimun a haiq ham. Ya inad emaiq ham ni kabmo turad gamuk bilaqidmo yaqgo kabibiy mat na ahol tidimniydaq ham. ⁹ Na ezaqgo ya inaqmo yaqgo mat danmepta ahaqenib osaiqta ham. Ad yaqgo mataw bab emayta na in ya ihaqenib osaytamo ham. Ossa ya araq bulonaiq, "Ni leh" haqsa in lehaqta ham. Teq ya araq bulonaiq, "Ni bol" haqsa in bolaqtamo ham. Ad yaqgo kabibiy mat bulonaiq, "Ni kabi em" haqsa in kabi na emaqta ham. Nazaq iyan ya inad emaiq ham ni gamukmo bilaqid yaqgo kabibiy mat na ahol tidimniydaq haqaiq ham.

¹⁰ Haqan Yesus mat na ago gamuk huitim ahol turuh nam. Ad in mataw muzim inaq boliya na gibilan, Ya ne gibilenaiq ham. Mat ka in Juda mat a haiqta ham. Teq in Juda mataw bunmo giquriyamim ya inan helmo diq haqaqta ham. ¹¹ Ad ya ne gibilenaiq ham. Zeq gwalaqta ban teq zeq wolehaqta ban on mataw amo amota kabemmo boleq in Abraham, Aisak teq Jekob nenaq God ago maror aduganib didaq negad tuqos daqay ham. ¹² Ari on mataw Gimam Iyah ago maror aduganib damneb le gwahtiqaq nagiyta na God in gimuzid asanib gwahtiqaq romriqab tuqos daqay ham. Osad in ginad meqniysa gaqad gite guruwad os daqay ham. ¹³ Haqad in bab mataw gigo ameba na bulon, Ni leh ham. Ni ninad helta usaqta nazaqmo in tugwahtiqaq ham. An kam nabmo mat na ago kabibiy mat na ahol tidimniy.

Yesus Pita alen aqawun wastitayan dimniy

(Mak 1.29-31; Luk 4.38-39)

¹⁴ Ari Yesus le Pita ago bitab gwahtiqaq in Pita alen asan afan iyad banab ussa ahol wam. ¹⁵ Ahol waqad in le aw na abenab wazanmo in asan afan iyim usta na tuhulos ug. Hulos uganmo in eraqim Yesus amen didaq anaran usta na waqim a bolim tuqug.

Yesus on mataw gigo moq inaqla kabemmo giwastitayan dimniyiy

(Mak 1.32-34; Luk 4.40-41)

¹⁶ Ari teq zeq wolehsa imisor diq tiqyan mataw in giyogni kabemmo giholib bugaw meqinta usaqta na giwaqim giqad Yesus ago hib tuboliy. A bolan Yesus gamukmo bilaqsa bugaw meqinta na tituk yaqay. Sa in mataw gigo moq inaq

na giwastitayan gihol tidimniy yaqaymo. ¹⁷ Daq nazaq gwahtiqaq in God ago nantut Aisaya aqezab gamuk gwahtimta na tuwol net bug. Gamuk na bilam,

In i gigo moq teq gihol asor meqniyta na inmo ahol ugim soran i gihol tidimniy ham. *Aisaya 53.4*

*Yesus muzeq inaq lehgo adan
(Luk 9.57-60)*

¹⁸ Ari on mataw dauh biyatha Yesus lilut ugim tursa in gibiyad ago disaipel gibilan, I yuw urumun kozaq ban lehuq ham.

¹⁹ Haqad in tilehsamo mat araq Moses ago gunun hurit kamta na bolim Yesus bulon, Tisa ham. Uliq saw edob nilehdaqta nab ya nimuzeq ninaq tilehdaiq ham. ²⁰ Haqan Yesus bulon, Ni ninad em haseq teq ya imuzeug bol ham. Gaun kwaskita kuduqib usayta ham. Ah in gigo rir inaqla ham. Ari Mat Atatin in ago us osad anamur emdaqta abanan araq diq hajqgam ham.

²¹ Haqan teq Yesus ago disaipel ta araq bolim bulon, Iyatha ham ni ya ihulossa ya leheq imam tumomta na yay tonad teq ya boleq nimuzeq ninaq tilehdaiq ham. ²² Haqan Yesus bilam, Nab iyan ham. Mataw giwitan moqim usad in God anadin a hi emayta na in gimo an wamuzad an yay toniy ham. Sa ni ya imuzeug bol ham.

*Yesus bilaqan tim ayahta kute nam
(Mak 4.35-41; Luk 8.22-25)*

²³ Ari Yesus muyib gwalsa in ago disaipel muzim inaq tugwaliyomo. ²⁴ Gwalmi lehadmo Yesus ame rursa wo muyib ussa tim ayahta eraqim kamis wolan muy isihnan tonyaq. ²⁵ Isihnan tonsa disaipel bolim Yesus bulonan tigeram. Eraqan in buloniy, Iyatha haqiy ni i gilumsih haqiy. I tumoqnan tonauq haqiy. ²⁶ Haqan in gibilan, Ne nagaggo rabay? ham. Ne ginad helta na amik diq ham. Haqad in eraqim tim kamis inaq ginadan in kute timeniy.

²⁷ Kute nemanmo disaipel ahol waqad in gihol riten lam. Admo in bilaqiy, Ka naga matin diq? haqiy. Tim yuw inaq in aqez huriyatya haqiy.

Yesus mataw giger giholib bugaw meqinta gimuz

(Mak 5.1-17; Luk 8.26-37)

²⁸ Ari Yesus le yuw-kurorgan Galiliy aqurumun kozaq ban tugwahtim, uliq Gadara gigo og saw ban. Gwahtiqaq mataw giholib bugaw meqinta usayta giger in hodhog hulosim bolim danib Yesus ahol twaqaq. Mataw na agadan iyim saw nab kwasik diq iyim luwsa on mataw dan nab a hikidik luw yaqayta. ²⁹ In giger Yesus ahol waqadmo lileyim bilaqiy, God atatin haqiy ni i ezaq gittonnan bol? haqiy. I

meqniyamta akaman na a hi gwahtiqsamo ni i gimeqin tonnan kab bolya haqiy.

³⁰ In nazaq haqsmo bul gihumaban araq ayahta pesan nogmo didaq neqad turiy. ³¹ Tursa bugaw meqinta nagan ginad meqniysa Yesus bulon yaqay, Ni i gimuznan iysun ni i gimuzid bul gi-humab inaq ko gimuganib lehuq haq yaqay. ³² Haqsa Yesus gibilan, Ne nabmo lehiy ham. Haqanmo mataw giger giholib bugaw gicusiyta na gwahtiqa le bul na gimuganib woqanmo bul bunmo sibtayim lehim garah asisibranih bay hilek tonim yuwmeb woqim tumoq bugiy.

³³ An mataw bul giwamuzim osiyta na in daq na ahol waqad in tukim giquliqab tilehiy. Lehim in mataw giholib bugaw meqinta usim teq gihulos negiyta na ago ananin in gigo walmataw tigibilem bugiy. ³⁴ Gibilenan in huritim uliq na hulosad bunmo Yesus ahol waqnan tilehiy. Lehim in Yesus abe yahad buloni, Ni saw ka huloseq leh haqiy.

9

Yesus mat araq abensen aditin moq bugta wastitayan dimniy

(Mak 2.1-12; Luk 5.17-26)

¹ Ari Yesus muyib gwalim yuw urotim urum kozaq ban le gwahtiqa in ago uliqab tilah. ² Lehammo inataw asor in mat araq abensen aditin tumoq bugta banab ussa in sorim a bolsa Yesus tigibiy. Gibiyad in mataw na ginad helta ahol waqadmo in mat moqatqa na tubulon, Yaqgo amun ham ni ninad hi meqniyan ham. Ya ningi daq meqinta bunmo tigiwalem bug ham. ³ Haqan mataw Moses ago gunun hurit kemiyya na asor in gamuk na huritim in gihol bulonim bilaq yaqay, Mat ko in God bilawunad ago ban waq nog iyaq haq yaqay. ⁴ In nazaq ginad emsamo Yesus tuhurit. Huritim in bilam, Nagaqgo ne ginad meqinta nazaq emay? ham. ⁵ Ya naga gamukin bilaqid teq ne nan a hi yang daqay? ham. “Ya ningi daq meqinta tigiwalem” haqdaiq o “Ni eraqeql loq gel” haqdaiq? ham. ⁶ Teq Mat Atatin in og kab daq meqinta walemgoo azawayin aholib usaqta na ago ne hurit daqay haqad ya kazaq diq bilaqdaiq ham. Haqad in mat abensen moqan banab usaqta na tubulon, Ni eraqeql ningi us ban waqeql ad ningi bitab a leh ham. ⁷ Haqan mat na eraqimmo ago bitab tilah. ⁸ An on mataw nab turiyta na in nagah na ahol waqim tirabi. Rabad teq in God abin tiqiluw yaqay. Na ezaqgo God inmo ago zaway na eman mataw gigo hib ulal iytia na ago.

Yesus Matyu bulunan in muzim inaq lah
(Mak 2.13-17; Luk 5.27-32)

⁹ Ari Yesus lehad luwim in mat araq anan Matyu haqayta takis abitnib ossa ahol tuwam. Ahol waqadmo in bulon, Ni ya imuzeq bol ham. Haqan Matyu eraqim Yesus muzim inaq tilah.

¹⁰ An daq na abe ban Yesus le bitab didaq neqad tuqos. Ossa mataw gibin meqinta takis waqayta teq mataw daq meqinta emayta nenaq kabemmo bolim Yesus ago disaipel nenaq didaq neqad tuqosiymo. ¹¹ Ossa Farisi nazaq gibiyad in Yesus ago disaipel tisusumun negiy, Doq tonnan ne gigo tisa in mataw takis waqayta ko teq mataw daq meqinta emayta ko nenaq didaq neqad osaq? haqiy. ¹² In nazaq haqan Yesus huritim gibilan, Mataw gigo moq haiqta na in le dokta ahol a hi waqayta ham. Mataw gigo moq inaqua naqmo dokta ago hib lehayta ham. ¹³ Ne leheq God ago marib gamuk araq usaqta ka ago alulin diq ne hurit kemiyy ham. Gamuk nab God bilam, Ne yaqmen tamaz emad karuw anat uro-tayta na ya hulosaiq haqad in bilam ham. Ne mataw gigem neg daqayta naqmo ya ahol waqnan inad bilaqaqta haqad in bilam ham. Hosea 6.6

Haqad Yesus bilam, Nazaq iyan ya on mataw titntota gililewunnan a hi bol ham. Ya on mataw daq meqinta emad osayta naqmo gililewunnan bolta ham.

Mataw didaq udinayta na ago Yesus bilam

(Mak 2.18-22; Luk 5.33-39)

¹⁴ Ari kam nab Jon ago disaipel bolim in Yesus susumun ugim bilaqiy, Ezaq tonim sirisirimo i Farisi nenaq didaq udinsa ta ningo disaipel didaq a hi udinayta? haqiy. ¹⁵ Haqan Yesus gibilan, Mat araq aw waq-nan tonsa in ayogniz boleq inaq osad in ginad meqniysa gaq waz daqay ye? ham. Haiqgam ham. Na ezaqgo in giyow na inaq osad in ginad dimniysa osayta na ago ham. Ari abeb mataw asor boleq mat aw waqaqta na ayogniz gibenab tuwaq daqay ham. Kam na teq boldaqta ham. Bolid teq mat na ayogniz didaq tuqudin daqayta ham.

¹⁶ Haqad in bilam, Mataw tubusan muturta waqim amalib tubusan kwaziqta misiramtta inaq a hi initayta ham. Luweq in tubusan kwaziqta na suholsa tubusan muturta na irnik toneq le amik iyadmo in tubusan kwaziqta na bulsireqid ayahmo diq a ta tartaydaq ham.

¹⁷ Ad nazaqmo mataw wain ayun muturta memeq asan kwaziqtab a hi tenay-tamo ham. In nazaq tonid wain agurin gwalad huhuw nemsia memeq asan kwaziqta na tartayid wain ayun mutbaleq ogib woqsa memeq asan na timeqniydaqmo

ham. Nazaq iyan mataw memeq asan muturtamo waqim wain ayun muturta tenayta ham. Tenan wain ayun teq memeq asan inaq araqibmo dimunmo usaqta ham.

Yesus aw araq ned hunegaqta wastitayim teq in maror araq amiy tumomta wazan eram

(Mak 5.22-43; Luk 8.41-56)

¹⁸ Ari Yesus in Jon ago disaipel nenaq gamuk bilaqad tursa Juda gigo mat marorta araq bolim Yesus agerab abakan ulum laquwim turad bulon, Ya imiy muran diqmo tumoqim usaq ham. Teq ni boleq niben aholib emeq wazid in kayeq ta iyan ham. ¹⁹ Haqanmo Yesus ago disaipel nenaq eraqim mat na muzim inaq tilehiy.

²⁰ Lehsa aw araq ulig 12 nazaq mogad ned hunegad luwyqaqta na in Yesus agilehun ban bolim ago tubusan adek tuwaz. ²¹ Na ezaqgo in tekomo ahol bulonim bilam, Ya iben Yesus ago tubusan adekmo wazeq teq ya ihol tidimniydaq ham. ²² Haqad in Yesus ago tubusan adek wazsamo Yesus ahol buliyim ahol waqad bulon, Ya imiy ham ni ninad hi meqniyan ham. Ni ya inan helmo hamta naqmo niqeman ni nihol tidimniy ham. Haqsamo aw na ahol tidimniy.

²³ Ari Yesus le Juda gigo mat marorta na ago bitab tugwahtim. Gwahtiqim in on gaq wazsa mataw kadug ulamat gihulan kabemmo emsa gibiy. ²⁴ Gibiyad in gibilan, Ne eraeq qozaq lehiy ham. Amun aw na a hi mom ham. In usaq ham. In nazaq haqan on mataw na bunimo in aqez tiyuquwuniiy.

²⁵ Yuquwunsa Yesus gimuzan asan ban gwahtiqsa in le gwahtiqim amun aw na aben wazan in eraqim titur. ²⁶ An teq Yesus daq amta na abin saw nab uliq bunmo tilah.

Yesus mataw gigermo gime haiqta giwastitayan dimniyyi

²⁷ Ari Yesus uliq na hulosim lehsa mataw giger gime haiqta in muzim inaq lehad teq in lileyeq bulon yaqay, Devit atatin* haq yaqay ni i ginan ninad meqniyan haq yaqay. ²⁸ Haqsa Yesus le bitab tugwahtiqanno mataw giger gime haiqta na in ago hib tuboliy. Bolan Yesus tisusumun nag, Ya ne giwastitaydaiqta na ago ne ginad helmo haqay ye? ham. Haqan in bilaqiy, Iyahta haqiy i helmo tihaqauq haqiy. ²⁹ Haqan Yesus aben mataw giger na gimeqnagnib emim gibilan, Ne ya inan helmo haqayta nazaqmo in ne giholib gwahtiqan ham. ³⁰ Haqanmo mataw giger na gimeqnagnin tiriram. Gime rireqan Yesus gamuk awaz

meqin diqta gibilenim bilam, Daq kawa ne giholib gwahtimta ka ago ne mat araq diq hikidik buloniy ham. ³¹ Haqan teq haiq. Mataw giger na Yesus giholib daq amta na bilaqsa abin saw nab uliq bunmo tilah bug.

Yesus mat araq aqez haiqta wastitayan dimniy

³² Mataw giger na Yesus hulosim tilehsa on mataw in mat ta araq aqez haiqta aholib bugaw meqinta usaqta waqim Yesus ago hib a boliy. ³³ A bolan Yesus bugaw meqinta na muzan lehan teq mat aqez haiqta na gamuk tibilaqyaq. Gamuk bilaqsa on mataw ahol waqad in gihol turuh nemsat bilaq yaqay, Kwaziqmo nagah araq kazaqta Isrel-ib a hi gwahtimta haq yaqay. ³⁴ Haqsa teq ta Farisi bilaq yaqay, In bugaw meqinta gigo danmepta na ago zaway amalib bugaw meqinta gimuzuqta haq yaqay.

Yesus in ago disaipel kabiynag

Yesus on mataw ginan anad meqniy

³⁵ Ari Yesus uliq saw bunmo tilehad luwyaq. Luwad in mataw gigo bit humab wolaytab gwahtiqeq suleq negad teq in God ago maror og kab gwahtimta na agamukan tigibilenyaq. In gamuk dimun diqta na gibilenad teq in mataw gigo moq teq gihol asor meqniyta na bunmo giwastitaysa in gihol tidimniy yaqay.

³⁶ Sa Yesus on mataw dauh buyahta na gibiyad in ginan anad timeqniy. Na ezaqgo on mataw na meqin diq osad in gimo gihol ulumsihgo biyab a hi iy yaqayta na ago iyan. Mataw na bilaqne sipsip ginamren haiqta os nog iy yaqayta. ³⁷ Nazaq iyan Yesus in ago disaipel gibilan, Kabiyyad didaq kabemmo tizilimim gicusaq ham. Teq kabibiy mataw kabemmo diq haiq ham. ³⁸ Nazaq iyan ne kabiyy anamren inaq gamuk emad bulonsa in kabibiy mataw kabemmo gigemid boleq in ago didaq na giwaq uguy ham.

10

Yesus Aposel 12 na gitowun am

(Mak 3.13-19; Luk 6.12-16)

¹ Ari Yesus in ago disaipel 12 na gibilenan agerab tuboliy. Bolan in ahol abinib bugaw meqinta gimuzgo azawayin tinag. Negad in moq bunmo wastitaygo azawayin teq mataw gihol asor meqniyta na bunmo giwastitaygo azawayin tinagmo.

²⁻⁴ Teq Aposel 12 na ginan kazaq: Simon, in anan araq Pita haqayta teq Saimon amikqan Andru teq Sebediy atatniz giger

* ^{9:27:} Isrel on mataw ginad em yaqay, God mat emid bo i gilumsihdaqta amatin na in i gises Devit asenlulib tugwahtiqdaq haq yaqay. Haqad luweq Yesus in mat naqmo iydaq haqad teq mataw asor in anan 'Devit atatin' haq yaqay.

Jems ama Jon inaq teq Filip teq Bartolomyu teq Tomas teq Matyu mat takis waqyaqta na teq Alfiyus atatin Jems teq Tadiyus teq Saimon mat Rom nenaq bab emyaqta amatin na teq Judas uliq Kariyot-ibta na. Mat naqmo in Yesus waqim bab gibenab amta.

*Yesus Apostel 12 na kabiyl nag
(Mak 6.7-13; Luk 9.1-5)*

⁵ Ari Yesus in mataw 12 na giqeman lehsa in gibilan, Ne on mataw en ta asor Juda a haiqta nagan gigo hib hi lehiy ham. Ad ne Samariya gigo uliq araqab le hi gwahatiqyimo ham. ⁶ Ne Isrel on mataw gimomo gigo hib lehiy ham. Mataw na in bilaqne sipsip nabag haresmo le luwayta nog ham. ⁷ Ne leheq luwad gamuk dimunta kazaq gibileniy ham. God ago maror bolim sinsin tiqiy haqad ne gibileniy ham. ⁸ Ad ne on mataw moqayta na giwastitayid dimniyyiham. Mataw tumoqiyta na ne giwazid ta eraqiy ham. Ad mataw gigo moq lepra inaqta na ne giwastitayid in gihol dimniyyiham. Ya zaway negta na ne samanmo waqiy ham. Ne zayim a hi waqiyta ham. Nazaq iyan ne on mataw samanmo tigilumsih daqaymo ham. Gilumsihad ne amenin waqgo hi bilaqiy ham.

⁹ Ad ne mani gol teq mani silva teq mani kapa-ta araq waqeinq ad hi lehiy ham. ¹⁰ Teq ne ziy araq es siheneq danib a lehgo hi waqiyimo ham. Tubusan amulik giholib usaqta naqmo ne a lehad araqmo ta hi waqiy ham. Ne gigo gisendugan gisenab hi emiy ham. Ad ne katek wazeq ad hi lehiyimo ham. Na ezaqgo ne mataw gimen kabiyl samanmo a hi em daqayta ham. Ne yaqqo kabiyl emsa mataw didaq nagah tineg daqay ham.

¹¹ Ari ne leheq uliq araqab gwahtiqeq nab ne on mataw gibiy kemiy ham. Uliq nab nog in mat dimunta teq titnonta na ne ahol waqeinq teq ne mat naqmo inaq oseq le ne uliq na tuhulos daqay ham.

¹² Ne bit aqez araqab loqeinq on mataw nabta gibilen waqiy ham. ¹³ In on mataw dimdimunta iyid teq ne gigem dimunta in gigo hib tilehdag ham. Ari in dimunta a haiq iyid ne gigem dimunta negiyta na in ne gigo hib muleqeq ta boldaq ham. ¹⁴ Bit nab mat araq ne giwazinad nenaq a hi osid teq ne bit na hulosad gisen aqogin wolhamid nab woqan ham. Ad naqmo uliq araqab on mataw ne gigo gamuk a hi huritid ne uliq na hulosad gisen aqogin wolhamid uliq nab woqan ham. ¹⁵ Ya ne helmo gibilenaiq ham. Abeb God hazizir ayatha emdaqta nab uliq giger Sodom teq Gomora afagan waq daqayta nazaq nog uliq na a hi waq daqay ham. Uliq ne gibaymuz daqayta na in uliq giger

na giquriyameq afagan ayah diqta tuwaq daqay ham.

*Yesus bilam, Afagan kabemmo teq gwahtiqdaq ham
(Mak 13.9-13; Luk 21.12-17)*

¹⁶ Ne huritiy ham. Ya ne giqeman ne bilaqne sipsip gaun kwasikta gilikmanib leh nog iyay ham. Nazaq iyan nagah ahulinaqta anad em hasim daq emaqta naqmo ne gihol waz naqmo hiqiyiy ham. Ad ah muluk kiskismo luwaqta naqmo ne luwiymo ham. ¹⁷ Ne mataw ginan gihol waz naqmo hiqiyiy ham. In teq ne giwazeq kaunsel gibenab giqem daqay ham. Ad in gigo bit humab wolaytab ne giwazeq ginol titay daqay ham.

¹⁸ Ne ya inan helmo haqad imuzad luwayta na ago in ne giwazeq in gigo king teq in gigo gavman aseseqta gigo hib ne giqad tileh daqay ham. Giqad lehid teq ne nagah gimeb ahol waqiyta na awagamun gibilensa mataw aseseqta teq on mataw en ta asor Juda a haiqta nagan in tuhurit daqay ham. ¹⁹ Mataw na ne giwazeq giqad mataw aseseqta gimeb lehid ne hi rabiy ham. Ad ne naga gamukin bilaq daqayta na ago ginadnad hi emiy ham. Kam nabmo teq God in ne naga gamukin bilaq daqayta na tinegdaq ham. ²⁰ Nazaq iyan negmo diq gamuk na a hi bilaq daqay ham. Haiqgam ham. Ne Gimam ago Bugaw Dimunta naqmo in gamuk emid ne giqezab gwahtiqdaqta ham.

²¹ Kam nab teq mataw in gimaqban giwaeq bab gibenab giqemid in ginol emid tumoq daqay ham. Sa giman in naqmo gigo onmin giwazeq bab gibenab giqem daqaymo ham. Teq onmin in naqmo ginemaman gihar negad bab gibenab giqemid in ginol emid tumoq daqaymo ham. ²² Ya ihol abin ne giholib usaqta na ago on mataw bunmo gigem meqinta ne neg daqay ham. Ari mat aw nog in zaway diq iyeq ossa le in gigo kam abebtanta iyadqta nab teq God in gilumsiheq ta giwaqdaq ham. ²³ Teq uliq araqab on mataw eraqeq ne gimeqin tonsa ne tukeq uliq ta araqab lehiy ham. Ya helmo ne gibilenaiq ham. Ne Isrel gigo uliq a hi wolnet bugsa Mat Atatin tuboldaq ham.

²⁴ Ne ginad emiy ham. Disaipel araq in ago tisa uriyameq danmeb a hi lehdag ham. Sa kabibiy mat in ago ayatha a hi itiyondaqmo ham. ²⁵ Disaipel na in ago tisa nogmo iyid na in dimunmo ham. Teq kabibiy mat na in ago mat ayah nogmo iyid na in dimunmo tiqiydaqmo ham. Nazaq iyan mataw bit anamren bilawunad anan Belsebul haqeq in naqmo bit anamren na ago asenlul ginan meqin diq tibilaq daqaymo ham.

*On mataw nog diq rabun daqayta?
(Luk 12.2-7)*

²⁶ Nagah bunmo mataw giqisihan usaqta na abeb teq God hasid mataw bunmo ahol tuwaq daqay ham. Ad nagah bunmo mataw gikasnakinib usaqta na abeb teq God emid ulalab tugwahtiqaq ham. Nazaq iyan ne yaqgo gamuk mataw gibilenko hi rabiy ham. ²⁷ Ya romriqab gamuk gibilenaiqta na ne saw anuwanibmo mataw gibileniy ham. Ad ne gamuk kiskismo gidekib huriyatya na ne bit ahuqunib gwale turad teq ne dedibmo lileyeq mataw gibileniy ham.

²⁸ Mataw ne gisanmo wol em daqayta ham. Ari in ne giwitan wol emgo in gigo zaway haigta ham. Nazaq iyan ne mataw hi girabuniy ham. Haig ham. Mat araq ne rabun daqayta nawa osaq ham. In mataw gisan teq giwitan inaqmo gihunegan saw faq oyad a hi miyaqtaw wolehim timeqniy hasayta ham.

²⁹ Mataw mani asit diqmo hulosim ah amikmikta giger gizayayta ham. Teq ah amik diqta nagan giholib daq araq gwahatiqsa ne Gimam Iyah tuhuritaqta ham. ³⁰ Ad God ne gibiy kemad ne gifaqnib giqensan na in ginulnim ganim diq usaqta na in tuhurit bugta ham. ³¹ Nazaq iyan ne hi rabiy ham. Ne ah amikmikta na nog a haig ham. Ne ah amikmikta na ayahmo giquriyamiya ham.

*I Yesus abin bilaqgo gimebay hi woqan
(Luk 12.8-9)*

³² Ari mat aw nog in mataw gimeb bilaqdaq, Ya Yesus-mo ago matta iyim osaqta haqdaqta na ya nazaqmo ya imam Heven-ib osaqta na ameb mataw na ginan bilaqdaiq, In yaqgota tihqdaiqmo ham. ³³ Ad mat aw nog in on mataw girabunad gimeb gileh yagid ya nazaqmo ya imam Heven-ib osaqta na ameb mataw na gileh tinegdaiqmo ham.

*Yesus on mataw gihusernan bol
(Luk 12.51-53; 14.26-27)*

³⁴ Ne luweq ginad em daqay, Ya og kab on mataw bunmo giqemid zib alowab osgo haqad ya bolta haq daqay ham. Haigqam ham. Ya bab emid gwahtiqaq haqad bolta ham. ³⁵ Na in kazaq ham. Mat araq ya inan helmo haqsa in amam gileh yagdaq ham. In giger nazaq emad,

Mat na amam inaq an gihar ug daqay ham.

Ad nazaqmo amun awta anen inaq an gihar ug daqay ham.

Sa aw in aduw anen inaq an gihar ug daqay ham.

³⁶ Mat asenlulmo diq eraqe mat na bab ug daqay ham.

³⁷ Ari mat in anenmaman ginan anad bilaqsa teq in ya inan anad a hi diq bilaqqa, mat na in yaqgo disaipel iyeq osgo dimun a hi iydaq ham. Ad mat in atatin o in amiy anan anad bilaqsa teq in ya inan anad a hi diq bilaqqa, mat na in yaqgo disaipel a hi iydaqmo ham. ³⁸ Teq mat in ago kruse waqim abetarib emim ya imuzim a hi bolaqta, mat na in yaqgo disaipel iyeq osgo dimun a haiqmo ham. ³⁹ Na ezaggo mat inmo ahol anadin emdaqta na in nabag tihiqiyadaq ham. Ari mat yaqgo kabiy emad ahol nog hulosdaqta na in dimunmo kuluwa-kuluwmo tuqosdaq ham.

*Mat Yesus ago on mataw gilumsihdaqta na in teq naw araq dimunta tuwaqdaq
(Mak 9.41)*

⁴⁰ Ari on mataw ne giwazinad in bilaqne ya iwazinayta nog tiqiyaymo ham. Ad in ya iwazinad in mat ya igeman bolta na tuwazinaymo ham. ⁴¹ Mat aw nog in God ago nantut araq bolsa ahol waq hasad wazinayta na, on mataw na in God ago nantut naw waqayta nazaq in tuwaq daqaymo ham. Ad mat aw nog in mat araq titnonta bolsa ahol waq hasad wazinayta na, on mataw na in mataw titnonta bunmo naw waqdaqayta nazaq in tuwaq daqaymo ham. ⁴² Ad mat aw nog in yaqgo disaipel gibin haiqta kagan gigo araq ahol waq hasad anan Yesus ago disaipel haqad yuw soqreq ugid uluwdaqta na, ya ne helmo gibilenaiq ham. On mataw na God abenab naw dimunta tuwaq daqaymo ham.

Yesus in naga matin diq?

11

*Jon mataw huz negyaqta na in ago disaipel giqeman Yesus ago hib lehiy
(Luk 7.18-35)*

¹ Ari Yesus in ago disaipel 12 na suleq negim tihiqiyen teq in uliq na hulosim saw Galiliy-ib uliq-uliqgo lehad tiluwyaq. Luwad in God ago gamuk on mataw tigibilyenyaq.

² Sa Jon irquran osad in Krais kabiy emaqta na abin tuhurit. Huritim in ago disaipel asor giqeman Yesus ago hib lehiy. ³ Lehim in Yesus tisusumun ugiy, Ni i nibaq tunim osta naqmo amatin ni bol o haiq mat ta araq teq abeb boldaqta i baq tunam? haqiy. ⁴⁻⁵ Haqan Yesus in gigo gamuk amenin emim bilam, Ko gibiyiy ham. Mataw gimehaiqta saw ahol tuwaqay ham. Mataw gisen meqinta tiloq gelay ham. Mataw gigo moq lepra inaqta gisanib ginumlan usta na tihiqiyaq ham. Ad mataw gidek haiqta gamuk tuhuritay ham. Teq mataw tumoqiyya kayeq iyim

ta eraqay ham. Mataw ginaghan haiqta God ago gamuk dimunta tuwaqay ham. Ne muleqeq leheq nagah ne gimeb kawa ahol tuwaqiyta ka teq gamuk kawa ne tuhuriyiya ka bunmo Jon buloniy ham. ⁶ Mat ya ibiyad anadnad a hi emad teq in ya inan helmo diq haqaqta, mat na tidimniyim osaq ham.

⁷⁻⁸ Ari Jon ago disaipel muleqim tilehsa Jesus in on mataw biyahta nab turiyta na Jon anan gibilenim bilam, Kwaziqmo ne nog diq ahol waqnan saw amatawun haiqtab lehiy? ham. Ne mat araq bilaqne tuqir tim retsa ahol wolad ahulan iysa ne ahol waqnan lehiy ye? ham. Teq ne nog diq ahol waqnan saw nab lehiy? ham. Ne mat araq tubusan dimunta muturta welim tursa ahol waqnan lehiy ye? ham. Mataw tubusan dimunta muturta welayta na in king gigo bit aseseqtay osayta ham. ⁹ Ne ya ibileniy ham. Ne nog diq ahol waqnan lehiy? ham. Ne God ago nantut araq ahol waqnan lehiy ye? ham. Helmo ham. Mat na in God ago nantut araq ham. Teq mat nawa na in God ago nantut kwaziqmo osiyta na bunmo giquriyamta ham. ¹⁰ Mat naqmo God ago marib ananin mar tonan usaqta ham. Gamuk na bilam,

Ahol waqiy ham, ya teq mat araq emid in yaqgo gamuk ad danmeb lehdaq haqad in bilam ham. Leheq in ninmen dan tuwastitaydaq haqad in bilam ham. Wastitayid teq ni lehdaq haqad in bilam ham. *Malakay 3.1*

¹¹ Ya helmo ne gibilenaiq ham. Jon mataw huz negyaqta na in mataw og kab gwahitiqya na bunmo giquriyamim in abin ayah diqta ham. Ta teq mat aw nog God ago maror aduganib gibin amik diq usaqta na in Jon tuquriyamita ham.

¹²⁻¹³ God ago nantut kwaziqta na bunmo teq God ago maror Moses mar tonta na in nagah abeb teq gwahtiqaqta na ago bilaqan ussa bo Jon ago kamubmo iy ham. An Jon mataw huz negyaqta na ago akannib iyim bo muranmo God ago maror og kab gwahitiqim awaz diq meqniyim lehaqta ham. Sa mataw asor in giwaz diq meqniyim maror na geg ugad in ginadibmo wasihnan tonayta ham. ¹⁴ Ari ne yaqgo gamuk ka huritna iysun ne hurituy ham. God ago gamuk bilam, Elaija bolid teq Krais boldaq haqad in bilam ham. Teq ya ne gibilenaiq ham. Elaija boldaq hamta na in Jon-mo anan bilamta ham. ¹⁵ Mat aw nog in gidek inaq iyeq teq in gamuk ka hurituy ham.

¹⁶ Ya on mataw kam kabta gigo daq anan bilaqnan teq ya gamuk awowun ezaq diqta amalib bilaqdaiq? ham. In bilaqne on-min maket-ib an bulonad osayta nazaq nog ham. ¹⁷ In bilaq,

I ne gimen kadug ulamsa ne ginad dimniysa a hi doray haqayta ham. Teq i gaq wazsa ne ginad meqniysa a hi gaqay haqayta ham.

¹⁸ Ari Jon bolim didaq amo amo a hi neqad wain ayun a hi uluwyaqta ham. Sa ne in anan bilaq yaqay, Bugaw meqinta aholib usaq haq yaqay ham. ¹⁹ Ta teq Mat Atatin bolim didaq neqad wain uluwsa ne bilaqay, Mat ko meqin haqayta ham. In didaq kabemmo neqad wain ayun ayahmo uluwyaqta amatin haqayta ham. In mataw gibin meqintak takis waqayta na teq mataw daq meqinta emayta na giyowmo diq haqayta ham. O tob iyan ham. Abeb ya Jon inaq i gigo kabyi anon tiqemsa teq i giger ginad em hasim daq emta na ulal tiqiydaq ham.

*On mataw ginad gigem a hi buliyayta na oseq timeqniy daqay
(Luk 10.13-15)*

²⁰ Ari Jesus uliq kagan gigo hib daq azawayin inaqta kabemmo amta ka tig-nadyaq. Na ezaqgo in daq azawayin inaqta emsa on mataw uliq nagabta ginad a hi buliyitya na ago iyan. ²¹ Ginadad in kazaq bilam, Uliq Korasin teq uliq Betsaida ham ne teq timeqniy daqay ham. Kwaziqmo mat araq leheq daq azawayin inaq ya ne gigo hib emta nazaq in uliq giger Tairib teq Saidon-ib emid on mataw na ginad tubiliy nagiy ham. Ginad buliyeq in gigo daq teq ginad meqinta gileh ugad in tubusan asorqan abiyornaqta weleq butbut huz nagiy ham. Teq ne yaqgo daq azawayin inaqta na ahol waqim ne ginad buliyim gigo daq meqinta gileh a hi ugly ham. ²² Nazaq iyan ya ne gibilenaiq ham. Abeb God hazizir ayahta emdaqta nab Tair teq Saidon afagan waq daqayta nazaq nog ne a hi waq daqay ham. Ne in giquriyameq afaqan ayah diqta tuwaq daqay ham.

²³ Teq uliq Kapaneam ham ne gibin iluwid Heven-ib gwalehdaq e? ham. Haiqgam ham. In ne gihunegid ne mataw tumoqiyta gigo sawab tuwoleh daqay ham. Na ezaqgo kwaziqmo mat araq leheq ya ne gigo hib daq azawayin inaq emta nazaq in uliq Sodom-ub emid uliq na og kab a hi hiciyid i muran ahol waq nagta ham. ²⁴ Nazaq iyan ya ne gibilenaiq ham. Abeb God hazizir ayahta emdaqta nab uliq Sodom afagan waq daqayta nazaq nog ne a hi waq daqay ham. Ne in giquriyameq afaqan ayah diqta tuwaq daqay ham.

*Yesus bilam, Ne yaqgo hib boleq ginamur emiy ham
(Luk 10.21-22)*

²⁵ Ari kam nab Yesus kazaq bilam, O ya imam ham, Heven-ib teq og kab inaqmo ni Iyahta iyim osaqta ham. Ni mataw ginad

awaz meqinta na teq mataw gimaqbel inaq iyim igmo ag haqad osayta na ni yaqgo kabiy alulin a hi giqisihunta ham. Haiq ham. Mataw gihol wazan woqsa in onmin gibin haiqta os nog iyayta naqmo ni yaqgo kabiy alulin tigiqisihunta ham. ²⁶ Ya imam ham ni ninad nazaqmo usan ni tiqam ham. Nazaq iyan ya esey nigaiq ham.

²⁷ Haqad Jesus ta bilam, Ya imam in ago kabiy bunmo ya ibenab tiqam ham. Mat araq diq in yaqgo a hi hurit ham. Ya imam amomo in yaqgo huritta ham. Teq mat araq ya imam ago a hi huritmo ham. Ya in atatin iyim ya imomo in ago huritta ham. Ad on mataw ya inad bilaqsa imam giqisihunaiqta naqmo in ya imam ago huritaytamo ham. ²⁸ Ne on mataw kabiy awaz meqinta emad afaqan sorayta na ne bunmo yaqgo hib boliy ham. Bolid ya qiqemid ne ginamur tiqem daqay ham. ²⁹ Ne boleq yaqgo kabiy soriy ham. Ad ne yaqgo daq ahol waqad nazaqmo ne emiy ham. Ya ihol wazan woqsa ya ibin a hi iluwaiqta ham. Ne nazaqmo toneq teq ne ginamur emad gihol sinamolsa tuqos daqay ham. ³⁰ Na ezaqgo ya kabiy negdaiqta na in awaz meqin diq a haiq ham. Ad ne yaqgo afaqan sor daqayta na in afaqan diq a haiqmo ham.

12

*Mataw Juda gigo lotu akannib kabiy a hi emayta na ago Yesus bilam
(Mak 2.23-28; Luk 6.1-5)*

¹ Ari Juda gigo lotu akaman araqab Yesus ago disaipel nenaq kabiy araq wit leyitta aduganib gwahtiqa tileh yaqay. Lehad ago disaipel gigem moqsa in wit anagin asor guraqim tineq yaqay. ² Neqsa Farisi asor gribiyad in Yesus buloniy, Ni ko gibiy haqiy. Ningo disaipel in lotu akaman ago gunun itiyonim kabiyyab wit tuguraqay haqiy.

³ Haqan Yesus gibilan, Nabag ne Devit ago dahu nenaq gigem moqsa Devit daq amta na awagamun ne ahol a hi waqiy-ya ham. ⁴ Devit agemnan moqad le God ago bit aduganib gwahtiqa in gunun itiyonim God ameb bret eman osta na tinam ham. Helmo, Devit bret tawonta na neqdaqta abin haiqta ham. Sa in ayogniz na in bret na neqgo gabin haiqtamo ham. Mataw tamaz emayta naqmo gimomo bret na neqayta ham. Ta teq Devit ayogniz nenaq gigem moq titaysa neqim in daq meqinta a hi emiy ham.

⁵ Teq God ago maror Moses mar tonta na aduganib gamuk araq usaqta ka ne ahol a hi waqay ye? ham. Gamuk na bilam, Mataw tamaz emayta na in Juda gigo lotu akannib Tempel-ib kabiy emad in lotu

akaman ago gunun na itiyonayta haqad in bilam ham. Ta teq in God ameb gihol a hi meqin tonayta haqad in bilam ham. ⁶ Ya ne gibileniq ham. Nagah araq Tempel uriyamta in kawa ne nenaq osaq ham. ⁷ Teq God ago gamukib nan ta araqmo usaq ham. Gamuk na bilam, Hosea 6.6

Ne yaqmen tamaz emad karuw anat urotayta na ya hulosaiq haqad in bilam ham. Ne mataw ginan ginad meqniydaqta naqmo ya ahol waqnan inad bilaqaqta haqad in bilam ham.

*Juda gigo lotu akannib Yesus mat araq aben meqinta wastitayan dimniy
(Mak 3.1-6; Luk 6.6-11)*

⁹ Ari Yesus saw na hulosim uliq ta araqab lehim in mataw na gigo bit humab wolaytab tugwahtim. ¹⁰ Sa mat araq aben akogan anedan mayim aditinmo usaqta in nab osmo. Ossa Farisi in Yesus ulum waqnan haqad tuboliyomo. Bolim in Yesus kat ugid nan araq ginad a hi usaqta bilaqid i tuwazam haqad in Yesus kazaq susumun ugiy, I gigo lotu akannib i mat moqaqta wastitayid dimniydaq ohaiq? haqiy. I Juda gigo maror ezaq bilamta? haqiy. ¹¹ Haqan Yesus gibilan, Ta ne gilikmanib mat araq ago sipsip lotu akannib yayib woqid mat na wazeq hureqid a hi gwvaldaq e? ham. Haiqgam ham. In hureqid tugwaldaq ham. ¹² Teq mat in sipsip nog a haiq ham. Mat in sipsip ayahmo uriyamta ham. Nazaq iyan i lotu akannib mataw gidimum tonamta na ago agununin haiqgam ham. ¹³ Haqad in mat na bulon, Niben itiwun ham. Haqan mat na aben meqinta na itiwunan in aben dimunta na nogmo tiqiy. ¹⁴ An teq Farisi na gigem meqniysa asanib gwahtiqa humab enim in ezaq toneq Yesus wol emid moqdaqta na agamukan tibilaq yaqay.

Yesus in God ago kabiyy mat dimunta
¹⁵ Sa Yesus in Farisi ginad na tuhurit in uliq na hulosadmo tilah. Lehsa on mataw dahu kabemmo muzim inaq lehsa Yesus in gigo asor gigo moq inaqta na bunmo giwastitayan gihol tidimniy yaqay. ¹⁶ Gihol dimniysa Yesus atoranmo gibilenyaq, Ne ya ihol abin ka ulalab hi bilaqiy hagyaaq.

¹⁷⁻¹⁸ Yesus daq nazaq emad in God ago tantut Aisaya aqezab gamuk gwahtiqa na tuwol net bug. Gamuk nab God bilam, Ka yaqgo kabiyy mat ham. Yaqmo in anan bilaqan osaqta ham. Ya in anan inad bilaqsa igem tidimniyaq ham. Teq ya

igo Bugaw Dimunta emid in aholib tilehdaqta ham. Lehid teq yaqgo kabibiy mat na in yaqgo daq titnonta agamukan on mataw en ta asor Juda a haiqta nagan tigibilendaq ham.

¹⁹ In mataw nenaq an a hi mugdaqta ham. Ad in uliq gemab turad gamuk atoranmo a hi bilaqdaqta ham. ²⁰ Yaqgo kabibiy mat na amidemqanmo luwdaqta ham. Luwad in tuqir araq asitmo talquweq tursa ahol waqad a hi orqaydaq ham. Ad in lam araq ago faq miyan tonsa ahol waqad in a hi wolmiydaq ham.

In ago daq nazaq amidemqan diqmo emad luwsa teq on mataw uliq saw bunmo God ago daq titnontab tuqos daqay ham. ²¹ Ad teq on mataw en ta asor Juda a haiqta nagan in mat naqmo anan helmo haqad in God teq gilumsihdaqta na akaman baq tuneq tuqos daqay ham. *Aisaya 42.1-4*

Mataw asor bilaqiy, Yesus bugaw meqinta Belsebul inaq kabi emaqta haqiy (Mak 3.20-30; Luk 11.14-23; 12.10)

²² Ari kam nab on mataw in mat araq aholib bugaw meqinta usaqta waqim Yesus ago hib a boliy. Mat na ame haiqta teq in gamuk a hi emyaqta. A bolanmo Yesus in mat na wastitayan in gamuk bilaqad teq in saw ahol tuwaqqaq. ²³ Sa on mataw dauh biyahmo nab osiyta na in gihol turuh nemsa bilaqiy, Luweq mat ka in Devit atatin* i baq tunim osauqta naqmo iydaq daqagya? haqiy. ²⁴ Haqsa ta Farisi in mataw giquez nazaq huritum bilaqiy, Haiq haqiy. Mat na in bugaw meqinta gigo dambetta Belsebul ago zaway amalib bugaw meqinta gimuzaqta haqiy.

²⁵ Haqsa Yesus mataw na ginad hurit kemip gibilan, Kantri araq ago on mataw gihol husereq an gihar ugad an wolad oseq in thiqiqi bug daqay ham. Teq uliq araqab o bit araqab on mataw gihol husereq an gihar ugad an wolad osad in zaway iyeq a hi tur daqay ham. ²⁶ Ad nazaqmo Satan immo ago kabibiy mataw ginaq an gihar ugad gimuzid in gihol huserid giger tiqiy daqaymo ham. In nazaq toneq Satan ago zaway hiqiysa ago kabiy tuwoqdaq ham.

²⁷ Ari ya Belsebul ago zaway amalib bugaw meqinta gimuzid ta ne gigo gisenlul asor na in nog diq ago zaway amalib bugaw meqinta gimuzayta? ham. Nazaq iyan ne ya ibilawunayta na negmo gigo gisenlul naqmo in tuqulum kem daqay ham. Ulum kemeq in bilaq daqay, Gamuk nawa ne bilaqayta na ne katiyay haq daqay ham.

²⁸ Ari God ago Bugaw Dimunta ilumsihsa ya bugaw meqinta gimuzsa teq ne ginad emiy ham. God ago maror ne gilikmanib tubol haqiy ham.

²⁹ Mat araq ezaq toneq teq in mat awaz meqinta ago bit aduganib gwahtiqaq ago nagah ginuwdaq? ham. In mat awaz meqinta na abensen irquireq teq in mat na ago bit aduganib gwahtiqaq ago nagah tiginuwdaq ham. ³⁰ Ne ginad emiy ham. On mataw ya inaq kabiy a hi emayta na in ya ibabun ham. Teq on mataw ya inaq yaqgo dauh a hi girom tonayta na in yaqgo mataw gimusun hares-haresmo lehaya ham.

³¹ Nazaq iyan ya ne gibilenaiq ham. God in on mataw gigo daq meqinta teq in bilawunayta na bunmo tigiwalem bugdaq ham. Ari in God ago Bugaw Dimunta bilawunid God in gigo daq meqinta na a hi walemdaq ham. ³² Teq on mataw Mat Atatin bilawunid God in gigo daq meqinta na tuwalemdaq ham. Ari on mataw God ago Bugaw Dimunta anan meqinta haqid God in gigo daq meqinta na a hi walemdaq ham. Muran kam kab teq abeb kam muturta teq boldaqta nab daq meqinta na in giholib tuqus tutdaq ham.

Ay meqinta anon meqinta emaqta (Luk 6.43-45)

³³ Ne gime haiq e? ham. Ne ay alowan tonid in anon dimunta emdaqta ham. Teq ne ay meqin tonid in anon meqinmo emdaqta ham. Mataw ay anon ahol waq kemim teq in ay ezaqta na ago ginad em hasay ham. ³⁴ Mataw meqinta ne bilaqne nagah ahulinaqta ginaqmugnaqta nog ham. Ne mataw meqinta iyim iyan ezaq teq ne giquezab gamuk dimunta gwahtiqaq? ham. Nagah mat agemab ayahmo usaqta naqmo in aqezab gwahitiqaqta ham. ³⁵ Mat dimunta agemab anad dimunta kabemmo ussa in daq dimunta emaqta ham. Sa mat meqinta agemab anad meqinta kabemmo ussa in daq meqinta emaqta ham. ³⁶ Ya ne gibilenaiq ham. Abeb God hazizir ayahta emdaqta nab teq on mataw bunmo in ginad ezaq emad gamuk hares alulin haiqta bilaqiyta na in tibilaq kem daqay ham. ³⁷ Na ezaqgo ningi gamuk naqmo in ni nilum kemdaqta ham. Ni niqezab gamuk dimunta gwahitiqa abeb God in ni ninan mat dimunta haqdaq ham. Ad nazaqmo ni niqezab gamuk meqinta gwahtiqa abeb God in ni ninan mat meqinta haqdaq ham.

Mataw asor daq azawayin inaqta ahol waqnan bilaqiy (Mak 8.11-12; Luk 11.29-32)

* **12:23:** Matyu 9.27 nab teq ni gamuk 'Devit atatin' ka alulin ahol waqdaq.

³⁸ Ari mataw Moses ago gunun huriit kemiyyta na asor teq Farisi asor in Jesus buloniy, Tisa haqiy ni daq araq azawayin inaqta emsa i ahol waquq haqiy. Ahol waqeq teq i bilaqam, Helmo ni God-mo ago kabi emaqta haqam haqiy. ³⁹ Haqan Jesus amenin emim gibilan, Ne on mataw muran kam kabta ham, ne on mataw meqinta God gileh ugayta ham. Ne daq azawayin inaqta naqmo ahol waqnau bilaqayta ham. Teq God in daq araq azawayin inaq a hi em negdaq ham. God ago nantut Jona aholib daq gwahtimta naqmo ne ahol tuwaq daqay ham. ⁴⁰ Jona kam ezeqmanmo nabiq ayahta na agemab usta ham. An nazaqmo Mat Atatin kam ezeqmanmo og aduganib tuqusdaqmo ham.

⁴¹ Abeb God hazizir ayahta emdaqta nab on mataw Niniwe-ibta na in mataw muran kam kabta nenaq eraqeet God ameb turad teq Niniwe mataw na in mataw kam kabta gigo daq meqinta emid ulal tiqyidaq ham. Na ezaqgo on mataw Niniwe-ibta na in Jona ago gamuk huriit in ginad buliyim gigo daq meqinta gileh ugiy ham. Teq ne ahol waqiy ham. Mat araq Jona uriyamta na in kawa ne gilikmanib osaq ham. Ta teq ne in ago gamuk huriit ginad a hi buliyayta ham.

⁴² Ad God hazizir ayahta emdaqta nab teq aw marorta kwaziqmo saw araq pesantab osta na in on mataw muran kam kabta nenaq eraqeet God ameb turad teq aw na in mataw kam kabta gigo daq meqinta emid ulal tiqyidaq ham. Na ezaqgo aw marorta na in uliq pesan diqtab osad Solomon abin huriit in eraqim Solomon ago gamuk dimunta huriitan haqad ago hib tilah ham. Teq ne ahol waqiy ham. Mat araq Solomon uriyamta na in kawa ne gilikmanib osaq ham. Ta teq ne in ago gamuk dimunta huriitan gituw hiqiyayta ham.

Bugaw meqinta muleqim ta bol (Luk 11.24-26)

⁴³ Haqad Jesus bilam, Bugaw meqinta araq mat hulos ugim gwahtiqa haresmo saw ayuwun haiqtab lehim luwaqta ham. Luwad in ban araq anamur emad osdaqta na nagunaqta ham. Teq hajq ham. In ban araq nazaqta ahol a hi waqaqta ham. ⁴⁴ In ban araq ahol a hi waqim teq in ahol bulonim bilaqaq, Bit kwaziqmo ya osta nab ya muleqeq ta lehdaiq haqaqta ham. Haqad in bit nab muleqim ta lehim bit na samanmo ussa asawun wolriironim anaghan bunmo wastitayim abanab eman ussa in ahol waqaqta ham. ⁴⁵ Ahol waqim teq in lehim bugaw meqin diqta 7 nazaq in daq meqinta emgo uriyamita na gililewunim giwaqim nenaq ta bolim

in bit nab gwahtiqa osayta ham. Mebmebmo bugaw amulikmo mat na aholib ussa in ahol meqin dimun nog osyaqta ham. Ari muran teq bugaw 8 nazaq bolim mat na aholib ussa in ahol timeqniy hasim osaqla ham. Ad daq nazaqmo on mataw meqinta kam kabta ka giholib tugwahtiqaqmo ham.

*Yesus anenan teq amagniz na gingan?
(Mak 3.31-35; Luk 8.19-21)*

⁴⁶ Ari Yesus on mataw biyatha na gibile nad ossamo in anen teq amagniz in inaq gamuk bilaqnan haqad bolim asanib tituriy. [⁴⁷ Tursa mat araq Yesus bulon, Ko gibiy ham. Ni ninen teq ni nimagniz bolim in ni ninaq gamuk bilaqnan haqad kowa asanib turay ham.] ⁴⁸ Haqan Yesus in mat na ago gamuk amenin emim bilam, Ya inen teq ya imagniz gingan diq? ham. ⁴⁹ Haqad in aben ago disaipel gigo hib itiyad bilam, Ka gibiy ham. Ya inen teq ya imagniz kawa osay ham. ⁵⁰ Mat aw nog in ya imam Heven-ib osaqla na anad muzad ago kabi emayta naqmo in ya ima teq in ya ihiy teq in ya inen ham.

13

*Mat araq kabiayab wit anagin hunagta ago gamuk awowun
(Mak 4.1-9; Luk 8.4-8)*

¹ Ari kam nabmo Yesus bit hulosim asanib tugwahtim. Gwahtiqa in lehim yuw-kurorqan Galiliy aqurumnib tuqos. ² Ossa on mataw dauh kabemmo bolim Jesus agerabmo diq loqsa iyan Yesus gibon emim muy araqab gwalim tuqos. Ossa on mataw na yuw aqurumnib turiy. ³ Tursa Yesus suleq kabemmo negad gamuk amo amo tigibilenyaq. Ad in gibilan, Ne huriity ham. Mat araq ago kabiayab wit anagin hunegnan tilah ham. ⁴ In lehim wit anagin hunegad luwsa asor danib woqan ah bolim tineqiy ham. ⁵ Sa wit anagin asor saw agigin inaqtab og asitmo usaqla nab wom ham. Woqim og ayah diq haiqgam iyan wit hidmo tugwal ham. ⁶ An zeq gwalim oysa wit na aninin haiqgam iyan in mayim tumom ham. ⁷ Sa wit asor am asasugin inaqta na aduganib wom ham. Woqan am asasugin inaqta na gwalaq isihan wit na abesbesan iy ham. ⁸ Teq wit asor og dimuntab woqim anon tiqam ham. Asor anon kabemmo diq 100 nazaq gigam ham. Sa asor anon 60 nazaq gigam ham. ⁹ Mat aw nog in gidek inaq iyeq teq in gamuk ka huriity ham.

*Yesus anad ezaq emad gamuk awowunmo on mataw gibilenyaq
(Mak 4.10-12; Luk 8.9-10)*

¹⁰ Ari disaipel in Jesus ago hib bolim tisusumun ugiy, Ni ezaq haqad gamuk awowunmo amalib on mataw gibilenaqta? haqiy. ¹¹ Haqan Yesus in gigo gamuk amenin emim gibilan, Negmo God ago maror aduganib osayta ham. Nazaq iyan God ago maror abe alulin ulilemim usaqta na in negmo tigiqishunaq ham. Ari on mataw asan banta na in a hi gigisihunaq ham. ¹² Na ezaqgo in on mataw gigo nagah inaqta na bunmo nagah asor a ta negid in gigo nagah kabemmo diq tiqyidaq ham. Teq in mataw ginaghan haiqta na gibenab nagah asitmo wazayta na walem bugdaq ham.

¹³ Daq naqmo ago ya gamuk awowunmo bilaqaqta ham. Ya mataw asanibta na gamuk awowunibmo gibilensa in gime saw waqad teq in nagah araq ahol a hi waqayta ham. In gidek emad teq in gamuk a hi huriyatd ginad a hi em hasayta ham. ¹⁴ Mataw na daq nazaq emad in God ago nantut Aisaya gamuk bilamta na tuwol net bugay ham. Aisaya bilam,

Ne gamuk huritad teq ne ginad a hi em has daqay haqad in bilam ham. Ne gime saw waqad teq ne nagah araq ahol a hi waq daqay haqad in bilam ham. Na ezaqgo on mataw ka gigem soqotim usaqta haqad in bilam ham. Sa in gideksan ituqim usaqtamo haqad in bilam ham. Mataw ka gime miyim osayta haqad in bilam ham.

¹⁵ God in nazaq giqeman luweq in gime nagah ahol waqad teq in gidek nan huriyatd in ginad em has nagiy haqad in bilam ham. Ginad em hasad gigem buliyeq in God ago hib ta boldi God giwastitayid tidimniy nagiy haqad in bilam ham. *Aisaya 6.9-10*

¹⁶ Teq negmo ginad dimniyan ham. Ne gime nagah ahol tuwaqayta ham. Ad ne gidek gamuk tuhuritayta ham. ¹⁷ Ya helmo ne gibileniq ham. Kwaziqmo God ago nantut kabemmo teq mataw dimdimunta kabemmo in nagah muran kawa ne ahol waqayta ka in ahol waqan ginad diq bilaq yaqayta ham. Teq in moqim ahol a hi waqiyta ham. Ad gamuk kawa ne huriyatayta ka in huriytan ginad bilaq yaqaytamo ham. Teq in moqim a hi huriyita ham.

Mat kabiyyab wit anagin hunagta na ago alulin

(Mak 4.13-20; Luk 8.11-15)

¹⁸ Ari mat didaq anagin kabiyyab hunagta ago gamuk awowun na alulin ne huriyit ham. ¹⁹ Mat aw nog in God ago maror agamukan huriitim ginad a hi em hasayta na in bilaqne wit anagin danib woqaqta na nog ham. God ago gamuk mataw na

gigemab leyan ussa Satan hidmo bolim gamuk na gigemab ta walemaqta ham.

²⁰ Teq mat araq in wit anagin og agigin inaqtab woqaqta na nog ham. In God ago gamuk huriitim in anad bilaqsa hidmo waqaqta ham. ²¹ Teq mat naqanta in bilaqne wit aninin haiqta nog ham. In God ago gamuk agemabmo diq a hi wazad in muzinad sisqmo a hi luwaqta ham. Na ezaqgo in God ago gamuk muzinaqta na ago mataw in meqin tonad afaqan amo amo ugsa in hidmo God hulosqta ham.

²² Teq mat araq in wit anagin am asasuqin inaqta aduganib woqaqta na nog ham. Mat naqanta in God ago gamuk huritaqta ham. Teq in og ka ago nagah kabemmo anadin emsa mani-mo in kat ugad anad hureqta ham. Nagah nagan in God ago gamuk isihsa iyan gamuk na in mat na agemab anon a hi emaqta ham.

²³ Teq mat araq in wit anagin og dimuntab woqaqta na nog ham. Mat naqanta in God ago gamuk huriitim anad em hasaqta ham. Anad em hassa God ago gamuk in agemab anon emaqta ham. Mat araq agemab in anon kabemmo diq 100 nazaq giqemaqta ham. Sa mat araq agemab in anon 60 nazaq giqemaqta ham. Sa mat araq agemab in anon 30 nazaq giqemaqta ham.

Bonbon meqinta kabiyyab gwalta ago gamuk awowun

²⁴ Ari Yesus gamuk awowun araq ta gibilan. In bilam, God ago maror in bilaqne mat araq ago kabiyyab wit anagin dimunta hunagta nazaq nog ham. ²⁵ Hunegan teq taromab mat na ago bab bolim bonbon anagin wit alikmanib hunegim lah ham.

²⁶ An abeb wit na gwalmi anon tiqemsa nab teq kabiyyi mataw in bonbon na wit inaq araqib tursa ahol tuwaq kemyi ham. ²⁷ Ad in lehim kabiyy na anamren tubuloniy ham. Mat ayah haqiy i bilaw ni ningkabiyya wit anagin dimunta hunag hawta haqiy ham. Teq ta ezaq tonim i lehim bonbon meqinta ko wit inaq tursa i ahol waw? haqad in bilaqiy ham. ²⁸ An kabiyy anamren gibilan, Na i gibabun araq daq na am haqad in bilam ham. Haqan kabiyy mataw na susumuniy, I leheq bonbon ko titeqam e? haqiy ham. ²⁹ Haqan in gibilan, Haiq ham. Luweq ne bonbon na titeqed ne wit inaqmo titeq daqay haqad in gibilan ham. ³⁰ Nab iyan ham. Sa garabmo gwalsal le didaq waqgo akaman iyan haqad in bilam ham. Didaq waqgo akamnib teq ya kabiyy mataw gibileneq bilagdaiq, Ne bonbon meqinta ko titeqeq gituq toneq faqab em oygo humab emiy haqdaiq haqad in bilam ham. Ad wit dimunta na ne

teeqeq yaqgo didaq abitnib nab humab emiy haqdaiq haqad in bilam ham.

*Ay mastet anagin ago gamuk awowun
(Mak 4.30-32; Luk 13.18-19)*

³¹ Ari Yesus gamuk awowun araq ta bilam, God ago maror in bilaqne ay mastet anagin amik diqta amulikmo mat araq ago kabiyyab layta na nog ham. ³² Didaq anagin bunmo gilikmanib mastet anagin in amik diqta ham. Teq in gwalim ayah iyim in kwasin-kwasan kabiyyabta na bunmo giquriyamaqta ham. Giquriyamim in bilaqne ay diq gwal nog iyan ah bolim abenab giholyon rir enim osayta ham.

*Yis ago gamuk awowun
(Luk 13.20-21)*

³³ Ad Yesus gamuk awowun araq kazaq ta bilam, God ago maror in bilaqne yis nogta ham. Aw araq yis na waqim mel deg ezeqman nazaq inaq buliyan yis ulilemim ussa mel na bunmo huhuw tinam ham.

*Yesus gamuk awowunmo on mataw gibilenyaqta
(Mak 4.33-34)*

³⁴ Ari Yesus in on mataw dauh bunmo gamuk awowunmo amalib gibilenyaqta. In gamuk bilaq sireqeq a hi gibilenyaq. Haiqgam. In gamuk awowunmo negyaqta. ³⁵ In daq nazaq emad in God ago nantut araq gamuk bilamta na tuwol net bug. Gamuk na bilam, Ya ite akeq nagah God ulileman usta na anan ya gamuk awowunmo amalib tibilaqdaiq ham. Nagah na og ka mutur gwahtinta nab iyim bo muran kam kabmo in ulilemim usta ham. Ussa nagah na ago agamukan ya muran kam kabmo tibilaqdaiq ham.

Buk Song 78.2

Bonbon meqinta kabiyyab gwalta na ago alulin

³⁶ Ari Yesus on mataw gihulosim le bit araq aduganib tugwahtim. Gwahtiqan ago disaipel in agerab bolim buloni, Ni teq gamuk awowun bonbon meqinta kabiyyab gwalta na adugan ni i tigibilendaq e? haqiqi. ³⁷ Haqan Yesus amenin enim kazaq gibilan, Mat wit anagin dimunta hunegaqta na in Mat Atatin ham. ³⁸ Teq kabiyy na in og ka ham. Wit anagin dimunta na in on mataw God ago maror aduganib osayta naqmo ham. Teq bonbon meqinta na in Satan ago on mataw ham. ³⁹ Ad bab bonbon meqinta kabiyyab hunagta na in Satan ham. Teq didaq waqgo akaman na in og ka ago kam abebtanta ham. Ad kabiyy mataw na in God ago angelo ham. ⁴⁰ Mataw bonbon meqinta humab wolim faqab eman oyaq nazaqmo teq og ka ago kam abebtanta nab in tiqem daqay ham. ⁴¹ Kam nab Mat Atatin

in ago angelo giqemid in og kab boleq God ago maror aduganib nagah meqinta mataw ginad hureqsa in ginad helta hulosnan tonayta na teq on mataw God ago gunun itiyonayta na bunmo tiginuw bug daqay ham. ⁴² In ginuweq a le hunegid faq ayahtab le tuwoq daqay ham. Woqe q osad teq in gaqad gite sisad tuqos daqay ham. ⁴³ Kam nab on mataw dimdimunta na ulal iyeq in God ago maror aduganib zeq anuwan oy nog iyad tuqos daqay ham. Mat aw nog in gidek inaq iyeq teq in gamuk ka hurity ham.

Nagah araq dimun diqta ulilemim usaqta na ago gamuk awowun

⁴⁴ God ago maror in bilaqne nagah araq dimun diqta og araqab ulileman usaqta nazaq nog ham. Mat araq og nab lehim nagah na ahol waqim teq in a ta ulilam ton ham. Ulilemim in anad dimniysa lehim ago nagah bunmo giwaqim a le gizayim amenin mani waqim teq in lehim og na zayan nagah dimunta ulilemim usaqta na inmo ago diqta tiqiy ham.

Kaliloy pokpok anawun ayahmota na ago gamuk awowun

⁴⁵ Teq God ago maror in bilaqne mat mani akabiyen emaqta araq in kaliloy pokpok dimdimunta nagunad luwaqta nazaq nog ham. ⁴⁶ Mat na pokpok nagunad luwim in araq dimun diqta ahol tuwam ham. Ahol waqim teq in lehim ago nagah bunmo giwaqim a le gizayim amenin mani waqim teq in lehim pokpok na aholyon titay ham.

Nabiq ago dob ago gamuk awowun

⁴⁷ Teq God ago maror in bilaqne nabiq adobun kamisib hunegan wo ussa nabiq amo amo bolim dob nab woqiyta nazaq nog ham. ⁴⁸ Nabiq kabemmo dobub wogon dob ate gwalan mataw hureqan bo dubub tugwal ham. Gwalan mataw na nabiq dimdimunta giwaqim degib giqemad nabiq meqmeqinta nag in gihunegi ham. ⁴⁹ Ari og ka ago kam abebtanta in nazaqmo tugwahtiqdaqta ham. Angelo boleq mataw meqmeqinta mataw dimdimunta gilikmanib osayta na giluwiyeqmo tigiwaq daqay ham. ⁵⁰ Giwaqeq giqad le faq ayahtab gihunegid le tuwoq daqay ham. Woqe q in faq nab osad teq in gaqad gite sisad tuqos daqay ham.

⁵¹ Haqad Yesus in ago disaipel susumun negim gibilan, Ne gamuk ka adugan bunmo ginad tiqem hasiy ye? ham. Haqan in buloni, Eqe haqiqi. ⁵² Haqan Yesus gibilan, Mataw Moses ago gunun hurit kemiyyta na asor in God ago maror agamukan muturta huritim muzinim in disaipel tiqiyita ham. Nazaq iyan mataw

na in bilaqne bit araq ayahta anamreniz nog iyayta ham. Bit anamreniz na in gigo nagah kabemmo bit aduganib usaqta nab in nagah muturta teq kwaziqta inaqmo giwaqim asanib ad gwahtiqim mataw qiqisihunayta ham.

On mataw uliq Nasaret-ibta Yesus gileh ugyi
(Mak 6.1-6; Luk 4.16-30)

⁵³ Ari Yesus gamuk awowun na bilaqim thiqiyan in uliq na hulosim tilah. ⁵⁴ Lehim inmo ago uliq diq Nasaret-ib tugwah-tim. Gwahtiqim in Juda gigo bit humab wolaytab lehim God ago gamuk asuleqin on mataw tigibilenyaq. Gibilensa in huri-tad gihol riten nog iy yaqay. Gihol riten nog iysa in bilaq yaqay, Mat ko ago anad awaz meqinta na teq in daq azawayin inaqta emaqta na in edob diq wam? haq yaqay. ⁵⁵ In mat bit emaqta naqmo atatinta haq yaqay. In anen Mariya-mo haq yaqay. In amagniz Jems teq Josep teq Saimon teq Judas haq yaqay. ⁵⁶ Teq in ahiiyan bunmo kawa i nenaq osauq haq yaqay. Mat ko daq zawayta nagan edob diq wam? haq yaqay. ⁵⁷ In nazaq haqad Yesus anan gigem timeqniy yaqay. Gigem meqniysi Yesus gibilan, God ago nantut abin uliq bunmo usaqta ham. Ari inmo ago uliqab teq in ago bitabmo diq in ahol abin haiqta ham.

⁵⁸ Ari on mataw na Yesus anan helmo a hi haqsia iyan in uliq nab daq azawayin inaqta kabemmo a hi am.

14

Jon mataw huz negyaqta na wol eman mom

(Mak 6.14-29; Luk 3.19-20; 9.7-9)

¹⁻² Ari kam nab king Herot in on mataw Galiliy-ibta giwamuzim osad in Yesus kabiy daq emyaqta na ago abin tuhurit. Hu-ritim in ago kabibiy mataw gibilan, Ko Jon mataw huz negyaqta naqmo ham. God in hodhodab wazan eraqan in aholib zaway ayahmo usaqta ham. ³⁻⁴ Na ezaqgo kwaziqmo Herot in ama Filip awe Herodiyyas hureqim wam. Waqan Jon in Herot bulonyaq, Ni God ago gunun ayahta itiyonim aw na wamta haqyaq. In nazaq haqsa teq Herot bilaqan in ago mataw asor lehim Jon wazim tiqirqruryi. ⁵ Irquran ossa Herot in wol emgo anad emyaqta teq on mataw bunmo Jon anan God ago nantut araq haqsa iyan in wol emnan rabyaq.

⁶ Ari kam araqab Herot anen iqamta na akaman tugwahtim. An mataw asor bolim Herot inaq humab wolum didaq neqad osiy. Ossa Herot awe Herodiyyas amiy bolim mataw na ginognib dorsa Herot in ahol waqad anad tibilam. ⁷ Anad bilaqsa in amun aw na bulon, God ya ibiysa ya helmo

dij bilaqaiq ham. Ni nagah araq ninad usaqta na anan ibilenid ya tinigdaiq ham. ⁸ Haqan amun aw na in anen Herodiyyas anad huritnam tilah. Lehan anen anadta bulonan in ta bolim Herot tubulon, Ni Jon mataw huz negyaqta na anat uroteq afaqin degib emeq a bo ya yag ham. ⁹ In nazaq bilagan king na afaqan tiqiy. Afaqan iyad teq in helmo ulilib hamta na anadin emad in mataw na gimeb amebay woqnan hulos. Nazaq iyan amun aw nagah anan bilamta na in em uggo tibilam. ¹⁰ Ad in nan eman lehan mataw giqirqruran osayta na abitnib in Jon anat urot tayim afaqin tuwaqiy. ¹¹ Waqim in degib emim a bolim aw barasta na tuqugiy. Ugan in waqim anen ago hib ad tilah. ¹² An abeb Jon ago disaipel huritim in bolim asan waqim a lehim tiyay toniy. Yay tonim teq in lehim Yesus tubuloni.

Yesus on mataw 5,000 nazaq didaq nag
(Mak 6.31-44; Luk 9.10-17; Jon 6.1-13)

¹³ Ari Jon wol emiya na ago Yesus hu-ritim in tuyib gwalim saw na hulosim saw araq amatawun haiqtab tilah. Lehsa on mataw kabemmo huritim in gigo uliq hulosim in yuw aqurumun muzim gisen-abmo Yesus muzim inaq tilehiyimo. ¹⁴ An abeb Yesus bo tugwatiqim in tuyib hulosad dubub gwalimmo ame le on mataw kabemmo gibiyad in ginan anad timeqniy. Anad meqniysi in gigo asor gigo moq inaq na giwastitayan gihol tidimniyyi.

¹⁵ Sa imisor zeq tuwolehsa Yesus ago disaipel bolim tubuloni, Saw ka amatawun haiqta haqiy. Teq zeq tuwolehaqmo haqiy. Nazaq iyan ni on mataw giqemid in uliq sinsin usayta kogab lehad giholmen didaq zayeq neqiy haqiy. ¹⁶ Haqan Yesus bilam, Na nagaqgo in leh daqay? ham. Negmo didaq negid neqiy ham. ¹⁷ Haqan in bu-loni, I gigo didaq ka kabem a haiq haqiy. Bret abaynaginmo teq nabiq gigermo kawa usaq haqiy. ¹⁸ Haqan Yesus gibilan, Nagah nag ne giwaseq yaqgo hib a boliy ham.

¹⁹ Haqad in on mataw gibilan in saw nab sisihunibmo tuqos woqiy. Os woqim ossa Yesus bret abaynagin na teq nabiq giger na waqim ame ulilib gwalsa in God esey ugim teq in bret na orgayim ago disaipel tingay. Negan disaipel waqim on mataw tinegiy. ²⁰ Negan in bunmo didaq na neqan tiqiyunin bug. Giyuninan disaipel didaq abeyan hulosiyta na ginuwim kuram 12 nazaqmo gisihenan ate tugwal bug. ²¹ Ari mataw didaq neqiyta na ginulin-gan kabemmo diq 5,000 nazaq. Ad in on teq onmin a hi ginulinii.

Yesus yuw amalib bayim lah

(Mak 6.45-52; Jon 6.16-21)

²² Ari Yesus in ago disaipel giqeman tuyib gwalim in ameb yuw-kurorqan

Galiliy urotim aqurumun kozaq ban tilehiy. Lehsa inmo osim mataw dauh biyahta na giqeman giquliqab tilehiy. ²³ Giqeman lehsa teq in amomo God inaq gamuk emnan haqad garahab tugwalah. In gwalehim ossa imisor diq tiqiyan in amomo garah nabmo tuqos. ²⁴ Ossa muy pesamno tiqiyan tim ayaħmo eraqim muy anobun ban bolad in kamis wolsa eraqim muy tuqothasyaq. ²⁵ Othassa saw tiħastitaynan tonsa tarom asor ussamo Yesus in ago disaipel gigerab yuw bayim tilah. ²⁶ Lehsa disaipel in Jesus yuw bayim bolsa ahol waqadmo in ritemim an bulonij, Ko wit araqagħya haqiq. Haqad in rabad tiqek ton yaqay. ²⁷ Ek tonsa Yesus hidmo gibilan, Ne giwaz meqniyyiham. Ka yaqmo leħaiq ham. Ne hi rabiy ham.

²⁸ Haqanmo Pita amenin emim bilam, Iyaħta ham ka nimmo iyeq teq ni ya ibilenid ya nazaqmo yuw bayeq nigerab leħiħ ham. ²⁹ Haqan Yesus bulon, Ni bol ham. Haqan Pita muy hulosim yuw bayim Yesus agerab tilah. ³⁰ Lehsa tim awaz meqin diq sibsa in tirabyaq. Rabad in yuw aduganib tu-woleħyaq. Woleħadmo in lilejim bilam, Iyaħta ni ya iwaz ham. ³¹ Haqsamo hidmo Yesus aben emim Pita tuwaz. Wazad in bulon, Ni ninad helmo haqaqta na amik ham. Ezaq haqad ni ninad giger usaq? ham. ³² Haqad in giger muyib għwalanno tim timidam. ³³ Mideman mataw muyib osiyya na in Yesus abin iluwad bilaq yaqay, Helmo ni God atatinmo diq haq yaqay.

*Yesus uliq Genesaret-ib mataw moqayta kabemmo giwastitayn dimniyyi
(Mak 6.53-56)*

³⁴ Ari Yesus ago disaipel nenaq yuwwurorqan Galiliy urotim lehim urum kozaq ban uliq Genesaret ago lan eżab tugwalib. ³⁵ Għwalan mataw saw nabta na in Jesus ahol waq hasim in uliq sinsin usayta nagħnan eman leħan mataw in giyogniz gigo moq inaqta na bunmo giqad Yesus ago hib tuboliy. ³⁶ Bolim in ginad awaz meqin amalib Yesus bulon yaqay, Ni on mataw gigo moq inaq ka għiħoloid in giben ningħi tubusaq adekmo wazij haq yaqay. Haqsa on mataw Yesus ago tubusaq adek waz yaqayta na bunmo għiħol tidimniy yaqay.

15

*God ago maror i gisesan gigo gunun giquriyyam
(Mak 7.1-13)*

¹⁻² Ari kam nabmo Farisi asor teq mataw Moses ago gunun huriġ kemiyya na asor in Jerusalem hulosim Yesus ago hib tuboliy. Bolim in susumun ugim bilaqiy, Ezaq haqad ningħi disaipel i gisesan gigo gunun itiyyonim giben a hi suħolimmo didaq neqayta? haqiq.

³ Haqan Yesus in gigo gamuk amenin emim għiblan, Ta ne ezaq haqad ne gisesan gigo gunun muzinad teq ne God ago gunun itiyyonayta? ham. ⁴ God bilam, Ni ninen nimam giwazinad ġilumsih haqad in bilam ham. Teq in bilam, Mat araq anen amam a hi giqqudinad gamuk meqinta amalib għiblawnid ne wol emid moqan haqad in bilam ham. ⁵ Ta teq negħmo kazaq bilaqayta ham. Mat araq in anen amam għiblēneq bilaqdaq. Yaqgo nagħaq ne ġilumsiħgo usta na ya inad buliyyim God abinib eman usaqta haqdaq haqad ne bilaqayta ham. ⁶ Mat na gamuk awaz meqinta nazaq bilaqeq teq in anen amam giwazinad a ta hi ġilumsiħda qta haqad ne bilaqayta ham. Nazaq iyan ne God ago gamuk bayan woqim samanta ussa ne gisesan gigo hib gunun waqiyta naqmo ne wazan eraqaqta ham.

⁷ Ne mataw gimileq meqin diqta ham. God ago nantut Aisaya in ne ġilum kemm ne gigo daq na anan hel diqmo bilam ham. ⁸ In bilam,

On mataw ka giezezabmo God abin iluwayta haqad in bilam ham. Teq in ginad gigem pesamno God ago hib usaqta haqad in bilam ham.

⁹ Mataw na God abin samanta iluwayta haqad in bilam ham. In mataw og kabtaqmo gigo gunun anan bilaqay, God ago maror dimunta haqayha haqad in bilam ham. Ad in gunun naqmo mataw giqisħiħunayta haqad in bilam ham. *Aisaya 29.13*

*Yesus daq meqmeqinta mataw giqeman God ameb għiħol anumlan inaq iyaqta na ginan bilam
(Mak 7.14-23)*

¹⁰ Ari Yesus on mataw biyaħta na gibilenan bolan in għiblan, Ne gamuk ka hu riteq teq ginad em hasiq ham. ¹¹ Nagħi bunno mataw wazim għiex ġieb eman leħaqta na in mataw għiħol eman God ameb anumlan a hi iyaqta ham. Haiq ham. Nagħi mat adugħanib usim bo aqezab għwahtiqaqta naqmo in mat aħol eman God ameb anumlan inaq iyaqta ham.

¹² Haqanmo disaipel in agerab loqim bulonij, Se haqiq ni Farisi gigo gamuk bayan woqsa in huritim gigem timeqniyyaq haqiq. ¹³ Haqan Yesus bilam, Didaq ahokan bunno ya imam Heven-ib oṣaqta a hi layta na in titeqdaq ham. ¹⁴ Mataw na għiħoloid luwiħ ham. In għime ħażqiha ham. Ĝime hiqiyas in mataw għiblenay, Dan kawāqmo usaq haqayta ham. Bo kazaq leħiha haqayta ham. Teq mat ame ħajtqat in mat ta araq ame ħajtammo dan isħiħuneq a leħadmo in giger garabmo le yayib tuwoq daqay ham.

¹⁵ Haqan Pita bilam, Nagħi mat eman aħol anumlan inaq iyaqta ago gamuk

awowun na alulin ni i gibilen ham. ¹⁶ Haqan Yesus bilam, Ne kam gineh teq ginad em daqay? ham. ¹⁷ Nagah mat ateb eman agemab wolehaqta na in abekoqib lehim le yayib wolehaqta ham. Na ne ginad a hi emay ye? ham. ¹⁸ Ari nagah mat aqezab gwahtiqaqta na in mat agemab usim teq gwahiqaqta ham. Nazaq iyan nagah naqmo in mat na eman God ameb ahol anumlan inaq iyaqta ham.

¹⁹ Daq meqinta mataw gigemab gwahiqaqta na kagzaq ham. Ni ninad meqmeqinta nigemab usaqta na teq ni mat wol emaqta na teq ni an alulib hureqim inaq usaqta na teq ni an a hi waqadmo an haresmo hureqim inaq usaqta na teq ni rin tonaqta na teq ni hazizirib mat araq kat ugaqta na teq ni mataw gibilawunaqta na ham. ²⁰ Daq nagan bunmo in mat eman God ameb ahol anumlan inaq iyaqta ham. Ari mat aben a hi suholadmo didaq neqaqta na in ahol eman God ameb anumlan inaq a hi iyaqta ham.

Saw Kenan-ib aw araq Yesus anan helmo ham

(Mak 7.24-30)

²¹ Ari Yesus uliq na hulosim in uliq giger Tair teq Saidon gigo saw ban tilah. ²² Lehan Kenan-ib aw araq saw nab osyaqta na bolim in lileyim bilam, O Iyatha ham. Ni Devit atatin* ham. Ni ya inan ninad meqniyan ham. Bugaw araq meqinta ya imiy meqin diq tonaq ham. ²³ Haqan Yesus amenin araq a hi bilam. An Yesus ago disaipel bolim buloni, Aw ka i gimuzad gilllewunad luwaq haqiy. Nagah in anan bilaqaqta na ni em ugidmo in lehan haqiy. ²⁴ Haqan Yesus bilam, God iqeman ya Isrel on mataw gimomo gigo hib bolta ham. Isrel on mataw na in bilaqne sipsip nabag lehiyta nog ham. An ya on mataw naqmo ginagunim bol ham. Ya mataw en ta araq gigo hib a hi bol ham.

²⁵ An aw na bolim Yesus agerab abakan ulum laquwim turad bulon, Iyatha ham ni ya ilumsih ham. ²⁶ Haqan Yesus amenin emim bilam, Ni hulossa yaqgo onmin didaq negid giyunin bugid teq ham. Luweq ya onmin gigo didaqta na waqe qgaun negid neqsa yaqgo onmin gigemnan moq daqay ham. Daq nawa na in dimun a haq ham. ²⁷ Haqan aw na bilam, Iyatha ni helmo bilaqaq ham. Ta teq gaun in gimam ago ban ahaqenib didaq aneglan woqsa in neqyatamo ham. ²⁸ Haqan Yesus bilam, Ni ninad helmo haqaqta na ayahmo ham. Nagah anan ninad bilaqaqta na in ningo hib tugwahtiqdaq ham. Yesus nazaq

bilaqan muran diq nawaqmo aw na amiy ahol tidimniy.

Yesus mataw kabemmo gigo moq inaqla giwastitayan dimniyyi

²⁹ Ari Yesus uliq na hulosad in yuwkurorqan Galiliy aqurumun muzim lehim in garah araqab gwalehim tugas wom. ³⁰ Os woqim ossa teq on mataw kabemmo in ago hib gaboliy. Gabolad in mataw gisen meqinta teq gime haiqta teq giditin kok tonta teq giqez haiqta teq gigo moq amo amo giholib usaqta kabemmo in Yesus ago hib giqad gaboliy. Giqad gabolim Yesus anognib giqeman teq Yesus in giwastitayan tidimniyyi. ³¹ An on mataw biyatha na in mataw giqez haiqta na gamuk tiqemsa teq mataw giditin kok tonta na gihol tidimniysa teq mataw gisen meqinta na eraqim tiloq gelsa teq mataw gime haiqta na saw ahol tuwaqsa in nazaq gibiyad in gihol turuh nemyaq. Gihol turuh nemsia in Isrel gigo God abin tiqiluw yaqay.

Yesus on mataw 4,000 nazaq didaq nag (Mak 8.1-10)

³² Ari Yesus in ago disaipel gibilenan bolan in gibilan, Ya on mataw ka ginan inad timeqniyyaq ham. Ya nenaq kam ezeqmanmo osan in gigo didaq tihiqiy ham. In didaq haiqmo gigemnan moqsa ya samanmo gigemid lehnana ituw hiqiyaq ham. Luweq in lehad danib gime sinsanid woq daqay ham. ³³ Haqan disaipel buloni, Saw ka saman diqta haqiy. I edob bret kabemmo giwaqeq on mataw humab ayahta kazaq ka i negid neq daqay? haqiy. ³⁴ Haqan Yesus tisusumun nag, Ta negmo gigo bret ganim diq usaq? ham. An in bilaqiy, I gigo bret 7 nazaq diq teq nabiq amikmikta amulik-mulikmo kawa usaq haqiy.

³⁵ Haqan Yesus on mataw gibilenan in ogib os woqim tuqosiy. ³⁶ Ossa teq Yesus in bret 7 na nabiq inaq giwaqim God esey ugim teq in orqayim ago disaipel tinag. Negan disaipel waqim on mataw tinegiy. ³⁷ Negan on mataw bunmo neqan tigiyunin bug. Giyunin bugan didaq abeyan asor osan in kuram 7 giwaqim amalib tigisiheni. ³⁸ Mataw didaq neqiyta na ginulin-qan kabemmo diq 4,000 nazaq. Teq on onmin nenaq a hi ginulin bugiy. ³⁹ An Yesus on mataw giqeman tilehsa teq in muyib gwalim og anan Magadan haqayta na ago saw ban tilah.

16

*Mataw Yesus daq araq azawayin inaqla emsa ahol waqnan bilaqiy
(Mak 8.11-13; Luk 11.29-32)*

* 15:22: Matyu 9.27 nab teq ni gamuk 'Devit atatin' ka alulin ahol waqdaq.

¹ Ari Farisi asor teq Sadyusi asor in Yesus ulum waqnan haqad agerab tuboliy. Bolim in bilaqiy, Ni Mat Iyah ulilib osaqtan na bulonid in daq araq azawayin inaqta emid ahol waquq haqiy. Ahol waqad teq i ni ninan helmo tihaqam haqiy. ² Haqan Yesus amenin emim bilam, [Zeq wolehad imisor iysa kait akakaqan iysa ne ahol waqad bilaqay, Kam tidimniydan kait akakaqan iyaq haqayta ham. ³ Ad tarommo onqas dubta tiqad kait akakaqan iysa ne ahol waqad bilaqay, Muran urom woqad tim sibdaq haqayta ham. Ne kait awaqtan ahol waqad nagah teg gwahtiqaqta na ago ne ginad em hasayta ham. Ta teq muran kam kab ne nagah ahol waqad ginad a hi em hasay ham.] ⁴ On mataw kam kabta ham ne on mataw meqinta God gileh ugayta ham. Ne daq azawayin inaqta naqmo ahol waqnan bilaqayta ham. Ta teq God in daq araq azawayin inaqta a hi giqis-hundaq ham. Kwaziqmo Jona aholib daq gwahtimta naqmo ne ahol waq daqay ham. Haqad Yesus in gihulosad tilah.

Farisi teq Sadyusi nenaq gigo gamuk awowun

(Mak 8.14-21)

⁵ Ari disaipel yuw-kurorqan Galiliy urotim le urum kozaq ban tugwahtiqaq. Teq in gidek zizalan bret asor waqim ad a hi boliv. ⁶ Sa Yesus gibilan, Ne Farisi teq Sadyusi gigo yis anan gihol waz naqmo hiqiyiy ham. ⁷ Haqan disaipel in gimo an bulonim bilaqiy, Ka i bret waqim ad a hi bolan daqag in bilaqayta haqiy. ⁸ Haqsa Yesus in gigo gamuk tuhuritim in bilam, Mataw ham ne gigo ginad helmo haqayta na amik diq ham. Ezaqgo ne bilaqay, I bret haiq haqay? ham. ⁹ Ne ginad a hi emad os tutay ye? ham. Mataw 5,000 nazaq bret abaynagin neqan teq ne abeyan ginuwim kuram kabemmo gisiheniyya na ne anadin a hi emay ye? ham. ¹⁰ Teq mataw 4,000 nazaq bret 7 neqan ne abeyan ginuwim kuram kabemmo gisiheniyya na ne anadin a hi emaymo ye? ham. ¹¹ Ezaq diq tonim ne ginad a hi emay? ham. Ya bret diq anan a hi gibilen ham. Ya bilay, Ne Farisi teq Sadyusi gigo yis anan gihol waz naqmo hiqiyiy hay ham. ¹² In nazaq haqan teq disaipel ginad tiqemiy. Yesus in bret ago yis anan a hi bilam haqiy. In Farisi teq Sadyusi gigo daq in on mataw giqisihunayta naqmo i anan gihol waz naqmo hiqiyam haqad in bilamta haqiy.

Pita Yesus ahol alulin bilaq siram

(Mak 8.27-30; Luk 9.18-21)

¹³ Ari Yesus uliq ayahta Sisariya Filipay gigo saw ban lehim kam nab in ago disaipel susumun negim bilam, On mataw in Mat Atatin anan nog diq haqsa ne huriyat?

ham. ¹⁴ Haqan disaipel buloniy, Mataw asor ni ninan Jon mataw huz negyaqta na amatin haqay haqiy. Sa asor ni ninan bilaqay, Ni Elaija haqay haqiy. Sa asor bilaqay, Jeremaya o God ago nantut kwaziqta na gigo araq daqag ni haqay haqiy. ¹⁵ An Yesus a ta susumun nag, Ta negmo ya inan nog diq haqay? ham. ¹⁶ Haqan Saimon Pita amenin emim tibilam, Ni Krais ham. God mat emid bo i gilumsihdaqta amatin na ninmo ham. Ni God kayeqmo osaqtan na atatin ham.

¹⁷ Haqan Yesus bulon, Jona atatin Saimon ham, ni tidimniyim osaq ham. Ogib kab mat araq in ya ihol alulin nawa ni tibilamta na in a hi niqisihun ham. Haiqgam ham. Ya imam Heven-ib osaqtan naqmo in ya ihol alulin na tiniqisihun ham. ¹⁸ An ya kazaq nibilenaiq ham. Pita ni gig nog ham. Ni nimalib teq yaqgo on mataw giqemid in nab zaway iyeq titur daqay ham. Tursa nagah zawayta mataw tumoqiyta gigo uliqaq boleq gigothassa in a hi hiqiy daqay ham. ¹⁹ Ya teq zaway kazaq tinigdaiq ham. Og kab mat araq God ago maror aduganib gwahtiqaqna tonsa ni wasi-hadaqta na tekomo God in mat na wasihiqo anad tiqamtamo ham. Ari mat araq God ago maror aduganib gwahtiqaqna tonsa ni bo gwahtiqaq haqdaqta na tekomo God in mat na gwahtiqaq anad tiqamtamo ham. ²⁰ Haqad Yesus in ago disaipel gunun negim atoranmo gibilan, Ne ya ihol alulin ya mat God iqeman bolta anan Krais haqayta na ago ne mat araq hikidik buloniy ham.

Yesus teq moqdaqta na ahol loyinad in ago daq bunmo ago disaipel giqisihun

Yesus bilam, Ya moqeq teq ta eraqdaiq ham

(Mak 8.31-9.1; Luk 9.22-27)

²¹ Ari kam nabmo Yesus ago gamuk amepta in moqdaqta na alulin emim in ago disaipel gibilenim bilam, Ya Jerusalem-ub lehmo tilehdaiq ham. Lehid mataw marorta na teq mataw tamaz emayta gigo aseseqta na teq mataw Moses ago gunun hurit kemiyya na in sanctity ayahmo tiyag daqay ham. Yagad teq in ya inol emid tumoqdaiq ham. Moqeq ya kam ezeq-manmo usid teq God iwazid ta eraqdaiq ham. ²² Haqan Pita nazaq huritadmo in Yesus waqim dan adek ban a lehim teq in wadim bulon, Iyatha ham haiq diqmo ham. Daq meqinta nagan niholib a hi gwahtiqaqdaq ham. ²³ An Yesus ahol buliyim in Pita kazaq bulon, Satan ni tukeq ya igilehun ban leh ham. Ni ya idanin qwaynan tonaq ham. Ni God anad a hi muzaq ham. Haiq

ham. Ni mat og kabtaqmo anad muzaq ham.

²⁴ Haqad in ago disaipel bunmo kazaq gibilan, Mat araq ya imuzeq bolnan haqad anad emeq in ahol wazid woqan ham. Ad ya afqaq soraiqta nazaqmo in sornan anad bilaqsa in ago kruse sorid abetarib gwalan ham. In nazaq toneq teq in ya imuzeq bolan ham. ²⁵ Na ezaqgo mat nog inmo ahol anadin emad asan alowan tonaqta na in ahol awitan tihik hulesdaq ham. Ari mat nog in ya inadin emad ahol non hulosdaqta na in dimunmo kuluwakuluwmo tuqosdaq ham.

²⁶ Nagaqgo mataw og kab osad in giholyon nagah kabemmo diq rom tonayta? ham. Abeb in moqid in gigo nagah giholyon rom toniyta na ezaq teq gilumsihdaq? ham. In gihol awitan tihik hules daqay ham. Teq in nagah ogibta na amalib gihol awitan zayeq os dimuntab le tugwah-tiq daqay ye? ham. Na haimko ham.

²⁷ Abeb Mat Atatin in amam ago ahol anuwanib ago angelo nenaq tuboldaqta ham. Boleq in on mataw bunmo gigo daq in emiyya na ahunibmo amenin tinegdaq ham. ²⁸ Ya helmo ne gibilenaq ham. On mataw muran kam kab osayta ka gigo asor a hi moqadmo in Mat Atatin king iyeq bolsa ahol tuwaq daqay ham.

17

*Yesus ahol awaqañ lul araq diq iy
(Mak 9.2-13; Luk 9.28-36)*

¹ Ari abeb kam 6 nazaq tihiqiyen Yesus in Pita teq Jems ama Jon inaq giwaqim ne-naq garah araq sisqaqt a bigmanib tugwalehiy. Gwalehim in nab giholbinmo tuqosiy. ² Ossa mataw na gimeb Yesus ahol bulyim awaqañ lul araq diq iy. In anobun zeq anuwan nog iysa ago tubusan hus diq saw anuwan nog iy. ³ Sa disaipel nazaq Yesus ahol waqad ossamo Elaija ayow Moses inaq giwitan tugwahiqiyan. Gwahtiqim in disaipel gimeb Yesus inaq gamuk bilaqad turii.

⁴ Tursa Pita in Yesus bulon, Iyahta ham i kab osauqta ka in dimun diq ham. Ni ninad bilaqid ya kab baybay ezeqmanmo tiqemdaiq ham. Araq ninmen teq araq Moses amen teq araq Elaija amen ham.

⁵ In nazaq bilaqad tursamo onqas anuwan inaqta gehitiqim tigiqisih. Gigisihan God aqez onqas na aduganib bilam, Ka ya itatin ham. Ya in anan inad bilaqsa ya igem dimun diq iyaqta ham. Ne in aqez huritity ham. ⁶ An disaipel God aqez na huritim gihol rabsa in ogib woqim tuqusiy. ⁷ Ussa Yesus gigerab bolim giwazad gibilan, Ne hi rabiy ham. Eraqiy ham. ⁸ Haqan in ogib usad gimemo gwalehim in mat araq

ahol a hi waqiy. In Yesus amomo tursa ahol waqiy.

⁹ Ari in aweweqmo garah na hulosim gewoqadmo Yesus disaipel ezeqman na gidek wazim gibilan, Ne muran sen qway nog iyim nagah ahol waqiyta ka ne mat araq hikidik buloniq ham. Abeb God in Mat Atatin hodhodab waz ta eraqid teq ne naghak ka ago tibilaq daqay ham.

¹⁰ Haqan disaipel tisusumun ugiy, Ta ezaqta ago mataw Moses ago gunun hurit kemiyta na bilaqay, Elaija danmeb bolid teq Krais abeb boldaq haqayta? haqiy.

¹¹ Haqan Yesus bilam, Helmo ham. Elaija boldaqta ham. In boleq nagah bunmo tuwastitaydaqta ham. ¹² Ta teq ya ne gibilenaq ham. Elaija tubol ham. Bolan mataw in ahol a hi waq hasad in ginadibmo mat na aholib daqdaq emim timeqin toniy ham. Ad teq in nazaqmo Mat Atatin ayon emsa in sanctity ayahmo tuwaqdaqmo ham. ¹³ Yesus nazaq haqanmo disaipel ginad tiqemiy, Yesus in Jon mataw huz neqyaqta naqmo anan bilaqaq haqiy.

Yesus amun araq aholib bugaw meqinta muz

(Mak 9.14-29; Luk 9.37-43)

¹⁴⁻¹⁵ Ari Yesus ago disaipel ezeqman na nenaq on mataw biyatha na gigerab gewoqanmo mat araq bo Yesus agerab loqim abakbakan ulum laquwim turad bilam, Iyahta ham ni yaqgo amun matta ka ninad ug ham. In agadan iyad ahol meqin diq iyaqta ham. Sirisirimo in faqmeh teq yuwmeb woqqaqta ham. ¹⁶ Sa ya waqim ningi disaipel gigo hib a bolan in wastitaygo biyab a hi iyiy ham. ¹⁷ Haqan Yesus bilam, On mataw kam kabta ne God anan helmo a hi haqayta ham. Ad ne ginad titnonim diq a hi usaqta ham. Kam ganim teq ya nenaq a ta osdaiq? ham. Kam ganim teq ya ne ginad siqim iyaqta na ago a hi bilaqad ya ne gigo afqaqan sordaiq? ham. Ne amun yaqgo hib kab a boliy ham. ¹⁸ Haqan in amun a bolan Yesus bugaw meqinta na tuwad. Wadammo bugaw meqinta na amun tuhulos ug. Hulos ugan nawaqmo amun na ago moq tihiqiy.

¹⁹ Abeb disaipel in gimomo Yesus ago hib bolim buloniq, I ezaq iyim bugaw meqinta ko a hi muz? haqiy. ²⁰ An Yesus gibilan, Ne ginad helmo haqayta na in siqim diq na ago ne bugaw meqinta na a hi muziy ham. Ya helmo ne gibilenaq ham, Ne ginad helmo haqayta na amik diq ay mastet anagin nog usid teq ne garah ka buloneq bilaq daqay. Ni eraqeq kobmo leh haqid in ne giqez tumuzdaq ham. Ad teq ne nagah araq a hi em daqayta a hi iy daqay ham. [²¹ Teq bugaw meqinta muzgo adanteqin

araq araq haiqgam ham. Ne God amomo bulonad susumun ugad teq ne didaq udiniy ham. Dante amulik naqmo amalib teq ne bugaw meqinta muz daqayta ham.]

*Yesus ame gigerta bilam, Ya moqeq teq ta eraqdaq ham
(Mak 9.30-32; Luk 9.43-45)*

²² Ari Yesus ago disaipel nenaq saw Galiliy-ib humab wolum osad teq in ago disaipel gibilan, Mat araq teq Mat Atatin waqeq mataw gibenab tiqemdaq ham.
²³ Emid teq in wol emid tumoqdaq ham. Moqeq kam ezeqmanmo usid teq God in wazid ta eraqdaq ham. Haqan disaipel gihol afaqan diq iyi.

Yesus Tempel ago takis zay

²⁴ Ari abeb in le uliq Kapaneam-ub tugwahtiqiy. Gwahtiqanmo nab mataw Tempel ago takis waqayta na in Pita ago hib bolim tisusumun ugiy, Ne gigo tisa ko Tempel ago takis zayaqta ye? haqiy.
²⁵ Haqan Pita bilam, Eqe ham in zayaqta ham. Haqad in muleqim bitab ta bolim in nan na ago asit a hi bilaqsamo Yesus inmo gamuk na wazan eraqan in tisusumun, Saimon ham ni ninad ezaq emaq? ham. Og kab mataw king iyim osayta na in gingen gigo hib takis waqayta? ham. In gimo gigo onmin gigo hib takis waqayta ohaiq in mataw ta asor gigo hib waqayta? ham.
²⁶ Haqan Pita bilam, In mataw ta asor gigo hib takis waqayta ham. An Yesus bulon, Ni dimunmo tibilam ham. King gigo onmin takis a hi zayaqta ham. In samanmo osayta ham.
²⁷ Nazaq iyan i takis a hi emanta na in dimunmo ham. Ta teq luweq i mataw na gigem wizid in i ginad daqay ham. Nazaq iyan ni yuwub leheq aul huneg ham. Hunegeq nabiq danmebta ni tuqotdaqta na ni waqeq ate hiksis ham. Hiksiseq teq in ateb mani araq ussa ni ahol tuwaqdaq ham. Mani na ni waqeq a le ya ninaq giholyon takis na ni zayad neg ham.

18

God ago maror aduganib nog in mat ayah diqta?

(Mak 9.33-37; Luk 9.46-48)

¹ Kam nab Yesus ago disaipel in Yesus ago hib bolim tisusumun ugiy, God ago maror aduganib nog in ayah diqta? haqiy.
² Haqan Yesus amun amikta araq bulongan bolan in amun na eman disaipel gilik-manib titur.
³ Tursa Yesus gibilan, Ya helmo ne gibilenaiq ham. Amun kazaqta ka abin haiqta ham. Teq ne ginad bulyeq amun abin haiqta ka nogmo a hi iyeq ne God ago maror aduganib a hi gwahtiq daqay ham.

⁴ Ari mat nog inmo ahol wazid woqsa in amun abin haiqta nog iyeq mat naqmo God ago maror aduganib abin ayatha tiqiydaq ham.

*Yesus daq hiiq mataw ginad helta meqin tonaqta na ginan bilam
(Mak 9.42-48; Luk 17.1-2)*

⁵ Mat nog in amun kaqanta ya ibinib bolsa ahol waqad wazinaqta na in ya iwazinaqmo ham. ⁶ Ari ne gigo araq in onmin amikmikta ya inan helmo haqayta na gigo araq* baymuzsa in anad helta na hulosnan tonid mat naqanta in yaqgo faq meqin diq tuwaqdaq ham. Na in kwaziqmo gig ayatha anatgumnib am wazeq hunegid kamismeb woqid yuw tineq nagta ham. Neqid mat na moqeq daq meqinta na a hi emeq in yaqgo faq meqin diqta na a hi waq nagta ham.

⁷ Daq meqinta mataw ginad hureqsa in ginad helta hulosayta na og kab tugwahtiqdaqta ham. Teq mat aw nog daq nazaq em daqayta na in timeqni has daqayta ham.

⁸ Ni nibensen araq kat nigid ni ninad helta hulosnan tonad ni nihol asor na ureoteq hunegid lehan ham. Ni niben o nisen amulikmo inaq iyeq ni God inaq kuluwa-kuluwmo osdaqta na in dimunmo ham. Ari ni niben nisen giger inaq iyid in nihunegid ni faq a hi miyaqta nab lehdaqta na in meqin diq ham. ⁹ Ari ni nimeqnagin araq kat nigid ni ninad helta hulosnan tonad ni nimeqnagin na othaseq hunegid lehan ham. Ni nimeqnagin amulikmo inaq iyeq ni God inaq kuluwa-kuluwmo osdaqta na in dimunmo ham. Ari ni nimeqnagin giger inaq iyid in nihunegid ni os meqinta na ago faqab lehdaqta na in meqin diq ham.

*Sipsip araq nabag lahta ago gamuk awowun
(Luk 15.3-7)*

¹⁰⁻¹¹ Ne gihol wamuziy ham. Luweq ne onmin amikmikta na gigo araq baymuz daqay ham. Ya kazaq ne gibilenaiq ham. In gigo angelo gibiy muzayta na in Heven-ib ya imam anobun tutimmo ahol waqayta ham.
¹² Teq ne ginad ezaq emay? ham. Mat araq in ago sipsip 100 nazaq giwamuzad luwsa ta araq nabag lehid mat na le a hi nagundaq e? ham. Haiqgam ham. In ago sipsip 99 na gihulosid garahab luwsa in leheq sipsip amulikmo nabag lahta na tinagundaq ham.
¹³ Ya helmo ne gibilenaiq ham. Mat na in ago sipsip nabag lahta na ahol tuwaqeq ari in ago sipsip kabemmo garahab luwad nabag a hi lehiyta

* **18:6:** Mataw asor ginad emay, Yesus onmin amikmikta ginan bilamta na in ago disaipel ta asor gibin haiqta na ginan bilam haqay.

na ginadin a hi emdaq ham. In ago sipsip amulikmo nabag lehan in nagim le ta wamta naqmo ago in anad dimniy naqmo hiqiydaq ham. ¹⁴ Na nazaqmo ne Gimam Heven-ib osaqta na in onmin amikmikta na gigo araq aban iygo in anad a hi bilaqaq ham.

*Ni nimaqbab araq daq meqinta emid ni inaq wastitaydaqta adan
(Luk 17.3)*

¹⁵ Ni nimaqbab araq daq araq meqinta niholib emid ni leheq ahol waq ham. Ahol waqad ni inaq negmo giger giholbinmo osad ni ago daq meqinta na anan bulon waq ham. In ningo gamuk huritid teq ni nimaqbab na hureqid in God ago hib ta boldaq ham. ¹⁶ Ari in niqez a hi huritid ni boleq mat amulik o giger nazaq giwaqeq nenaq ta leheq nimaqbab na inaq gamuk na wastitay waqiy ham. Na ezaqgo mataw na in giqez niqez inaq wastonid ningo gamuk awaz timeqniydaq ham. ¹⁷ Ari ni nimaqbab na in ne giqez a hi huritid ni on mataw yaqgo nan huritayta na bunmo gibilen ham. Gibilenid in ni nimaqbab na bulonsa in giqez a hi huritid teq ne bunmo mat na aholib hiqiyiy ham. Ne on mataw en ta asor Juda a haiqta nagan teq mataw takis waqayta na giholib hiqiyayta nazaq ne mat na aholib hiqiyymo ham.

¹⁸ Ya helmo ne gibilenaiq ham. Og kab ne gigo mat araq in ago daq meqinta hulosnan atuw hiqiysa ne baymuzza God tekomo mat na baymuzgo anad tiqamtamo ham. Ari mat na in ago daq meqinta na hulosid ne ta waqid ne gimuganib ta bolid God tekomo mat na ta waqgo anad tiqamtamo ham. ¹⁹ Ad ya ne a ta gibilenaiq ham. Og kab ne gigo mataw giger in nagah araq anan gigem amulikmo iyad ya imam Heven-ib osaqta na bulonsa in nagah anan ginad usaqta na tinegdaq ham. ²⁰ Na ezaqgo mataw giger o ezeqman nazaq ya ibinib humab emeq ossa teq ya in gilikmanib tuqosdaiqmo ham.

Kabibiy mat araq ayow inaq an anobun a hi wastitayita gigo gamuk awowun

²¹ Ari kam nab Pita bolim Yesus kazaq susumun ug, Iyahta ham ya imaqbab araq imeqin tonsa ya ime ganim in ago daq na walemad anadin a ta hi emdaiq? ham. Ya inad emaiq, Ya ime 7 nazaq ago daq meqinta walemdaiqta na in kabemmo diq haqaiq ham. ²² Haqan Yesus bilam, Haiq ham. Ni nimaqbab ame 77 nazaq nimeqin tonid ni nazaqmo nime 77 nazaq in ago daq meqinta na walemad anadin a ta emdaq ham.

²³ Ni hurit ham. God ago maror aduganib daq usaqta na in bilaqne king araq ago kabibiy mataw in gigo ayahta ago mani

asor samanmo waqiyta nazaq nog ham. ²⁴ Abeb king na in ago mani amenin waqgo alulin emsa mataw in ago mani waqiyta na gigo araq in ago hib tubol ham. Mat na in king ago 10 milyon kina wamta ham. ²⁵ Waqim teq in mani na amenin emdaqta na araq diq aholib a hi us ham. Nazaq iyan in ago ayahta na bilam, Mat ka ago aw amun nenaq gizayid in leheq mat araq ago kabibiy mataw samanta iyeq osiy haqad in bilam ham. Ad in ago nagah bunmo gizayeq mani na ne waq a bo ya yagi yagihaqad in bilam ham. I daq nazaq emid teq mat ka in yaqgo mani amenin asormo tiqemdaq haqad in bilam ham. ²⁶ Haqan kabibiy mat na nazaq huritadmo in king agerab abakbakan ulum laquwim turad bulon, Ni ya inan ninad meqniysa ni asit ibaq tun haqad in bilam ham. Ya ning mani wayta na amenin bunmo tinigdaq haqad in bilam ham. ²⁷ An kabibiy mat ago ayahta na in anan anad meqniysa in ago hib amenin usta na tuwal em bug ham. Ad in mat na hulosan tilah ham.

²⁸ Teq kabibiy mat na asanib gwahtiqlim lehim in aholoyow araq in inaq araqib kabiy emayta na ahol tuwam ham. Ahol waqad in ayow na anatgumnib waz naqmo hiqiyadmo bulon, Yaqgo 100 kina niholib usaqta na muran diqmo ni yagdaqta haqad in bulon ham. ²⁹ Haqan in ayow na huritadmo in abakbakan ulum laquwim turad bulon, Ni ya inan ninad meqniysa ni asit ibaq tun haqad in bilam ham. Ya mani wayta na amenin bunmo tinigdaq haqad in bilam ham. ³⁰ Teq haiq ham. Mat na hulos ham. Ad in ayow na wazim a lehim bit giqirqruran osaytab tiqam ham. Emad in bulon, Ni bit kab oseq le ni yaqgo gimeq wamta na amenin em bugeq teq ni gwahtiqlaq haqad in bilam ham.

³¹ Ari mat na ayogniz asor in inaq araqib kabiy emayta na in daq nazaq ahol waqad in gigem meqin diq iyiham. Gigem meqniysa in lehim daq gwahtimta na awagamun bunmo in gigo ayahta tubuloniy ham. ³² Bulunan kabibiy mat na ago ayahta innen nan eman bolan in bulon, Ni kabibiy mat meqin haqad in bilam ham. Teko ni gaqsa ya ning amenin usta na walem bugta haqad in bilam ham. ³³ Ya ni ninan inad meqniyta haqad in bilam ham. Ta ezaq haqad ni niyow na anan ni ninad a hi meqniyom? haqad in bilam ham. ³⁴ Haqad agem meqniysa in mat na waqim bit giqirqruran osayta nab a tilah ham. A lehim in mataw bit na wamuzayta gibenab emim gibilan, Ne mat ka santiyi ugsa le in yaqgo gimeq wamta na amenin em bugeq teq in gwahtiqlaq haqad in bilam ham. ³⁵ Haqad Yesus bilam, Ya ne gibelenaiq ham. Ne giyogniz nenaq an anobun a

hi wastitayid ya imam Heven-ib osaqtan na
in nazaqmo ne tigitondaqmo ham.

19

*Yesus on mataw an tuwaqim teq an ta
hulosayta na ginan bilam*

(Mak 10.1-12; Luk 16.18)

¹ Ari gamuk na tihiqiyen Yesus saw Galiliy hulosad in yuw Jodan urotim saw Judiya-ib tilah. ² Lehsa on mataw kabemmo muzim inaq tilehiyimo. Lehan nab teq Yesus in gigo asor gigo moq inaqta na giwastitayan tidimniy yaqay.

³ Sa Farisi asor Yesus ulum waqman haqad agerab tuboliy. Bolim in tisusumun ugiy, I Juda gigo maror bilam, Mat anadibmo ago aw muznan in tumuzdaq hamta na in daq dimun o daq meqin? haqiy. ⁴ Haqan Yesus amenin emim bilam, Ne tobag God ago gamuk ka ahol a hi waqiy daqagya ham. Gamuk na kazaq bilam ham. Mebmekmo diq God nagah bunmo giqe-
mad in on mataw matmatta teq on-
qonta inaqmo giqam haqad in bilam
ham. *Jenesis 1.21; 5.2*

Teq in bilam,

⁵ Daq alulin naqmo ago mat in anen amam gihuloseq in awe aholib tisoqotdaq ham. Soqoteq in giger gihol amulikmo iyeq tuqos daqay haqad in bilam ham. *Jenesis 2.24*

⁶ Nazaq iyan mat awe inaq in gihol giger a ta hi iyayta ham. Haiqgam ham. In giger gihol amulikmo tiqiyim osayta ham. Nazaq iyan nagah God am tuwazan usaqta na mat araq ta hi urotan ham.

⁷ Haqanmo Farisi amenin emim buloniy, Nazaq na teq ta ezaqta ago Moses gunun igim bilam, Mat araq aw muz agamukan mar toneq ago aw ugadmo in tumuzdaq haqad in bilam? haqiy. ⁸ Haqan Yesus gibilan, Ne gigem soqotim usad God anad a hi muzinsa iyan Moses ne gihulosan ne on gimuzayta ham. Ta teq kwaziq diqmo God nagah bunmo giqamtan nab daq naqanta a hi usta ham. ⁹ Ad yaqmo kazaq ne gibilenaiq ham. Mat awe muzad aw ta araq muturta waqaqta na in bilaqne mat ta araq ago aw inaq luw nog iyaqta ham. Ari mat na awe in mat ta araq uteteq inaq luwsa aduw diq na in aw na muznan in tumuzdaq ham.

¹⁰ Haqan disaipel buloniy, Mat in aw inaq gigo daq nazaq usid ari in an hi waqiy haqiy. ¹¹ Haqan Yesus kazaq gibilan, On mataw bunmo in ne gigo gamuk na a hi hurit daqay ham. God in mataw asormo zaway negan in aw a hi waqadmo samanmo osayta ham. ¹² Mataw aw a hi waqayta na alulin amo amo ham. Mataw asor genen nazaqmo giqeman in ginad aw

waqgo hulosayta ham. Ta asor gikayogin ayan in aw a hi waqayta ham. Ad mataw ta asor in God ago maror anadin emad in aw waqgo gihol wasihayta ham. Mat nog in ne gigo gamuk na huritad teq in muzinnan iysun in muzinan ham.

*Yesus onmin amikmikta gidimun tonad
gibar ton*

(Mak 10.13-16; Luk 18.15-17)

¹³ Ari kam nabmo on mataw gigo onmin amikmikta giqad Yesus ago hib tubol yaqay, Yesus aben in giholib emeq giwazad gimen God bulondaq haqad. Teq haiq. In onmin giqad bolsa disaipel ginadad tigimuz yaqay. ¹⁴ Sa Yesus gibilan, Ne onmin gihulosid yaqgo hib boly ham. Ne hi giwasihiy ham. On mataw naqantaqmo God ago maror aduganib gwahtiqa yata ham. ¹⁵ Haqadmo in onmin na gimalib aben emim giwazad teq in tilah.

*Mat araq ago nagah kabemmo usaqta
na Yesus inaq gamuk bilam*

(Mak 10.17-31; Luk 18.18-30)

¹⁶ Ari Yesus tilehsamo mat araq in ago hib bolim bulon, Tisa ham ya daq dimun doqag diqta emeq teq ya os dimunta kuluwakuluwmo osayta na iholyon tuwaqdaq? ham. ¹⁷ Haqan Yesus bulon, Nagaqgo ni nagah dimunta ago ya susumun yagad? ham. Mat amulikmoqmo in dimunta ham. Ari ni kayeqmo kuluwa-kuluwmo tuqosnan haqad ni gunun bunmo Moses bilamta na muz bug ham. ¹⁸ Haqan mat na bulon, Na naga gununin diq? ham. Haqan Yesus bilam, Gunun ni muzdaqta na kawa ham. Ni mat araq wol emid hi moqan ham. Ni an alulib hureqeq inaq hi us ham. Ni hi rin ton ham.

Ni hazizirib mat araq hi kat ug ham.

¹⁹ Ni ninenmaman giqez hurit ham. *Kisim
Bek 20.12-16*

Ad nimmo nihol anan ninad bilaqaq nazaqmo ni niyow anan ninad bilaqaq ham. *Wok Pris 19.18*

²⁰ Haqan mat minminta na in Yesus bulon, Gunun nagan bunmo ya tumuz bugta ham. Ta ya daq ezaq diqta emnagta a hi emaiq? ham. ²¹ Haqan Yesus bulon, Ari ni mat dimun diqta tiqiy hasnan iysun ni leheq ningo nagah bunmo giza-
yeq amenin waqeq mataw ginaghan haiqta neg ham. Ni nazaq toneq teq ni Heven-ib ningo nagah kabemmo diq inaq iydaq ham. Ad ni daq na emeq teq ni ya imuzeq bol ham. ²² Haqan mat minminta na gamuk nazaq huritim in anobun iyim anad ayahmo meqniysi tilah. Na ezaqgo in ago nagah dimdimunta kabemmo usta na ago iyan.

²³ Sa Yesus in ago disaipel gibilenim bilam, Ya gamuk helmo ne gibilenaiq ham.

Mat ago nagah kabemmo usaqta na in God ago maror aduganib gwahtiiggo afaqan diq ham. ²⁴ Ya ne a ta gibilenaiq ham. Karuw ayahta anan kamel haqayta na in nidel akwiyaknib le tugwahtiqaq e? ham. Hikidik ham. Ad nazaqmo mat ago es kabemmo ginadin emaqta na in God ago maror aduganib le a hi gwahtiqaqmo ham.

²⁵ Haqan disaipel gamuk na huritim gihol turuh nam. Gihol turuh nemsia in bilaqiy, Nazaq iyid teq mat araq diq God ago os dimunta nab le a hi gwahtiqaqya haqiq. ²⁶ Haqan Yesus gibiyad gibilan, Mataw in gimo gigo zaway amalib le a hi gwahtiqaqdaqta ham. Ari God-mo mataw gilumsihsa teq in le tugwahtiqaq ham. Na ezaqgo God in nagah araq a hi emdaqta a haiq ham.

²⁷ Haqan Pita amenin emim bulon, Ni i gibiy ham. I nagah bunmo gihulosim i ninmo nimuzim ninaq tilehauq ham. Teq God amenin ezaqta tigidaq? ham. ²⁸ Haqan Yesus in disaipel bunmo gibilan, Ya helmo ne gibilenaiq ham. God nagah bunmo og kab giwastitayid mutur iyadaqta akaman nab Mat Atatin abin ayahta inaq iyeq ago ban tawontab tuqos woqdaq ham. Kam nab teq ne mataw ya imuzim boliyta na ne nazaqmo marorgo ban 12 nazaq nab ne tuqos daqaymo ham. Osad ne Isrel gigo gem 12 na tigibiyumuz daqay ham.

²⁹ Teq mat aw nog in ya imuzeq bolnan haqad in gigo bit teq gimaqbaban teq gihian teq ginemaman teq gigo onmin teq gigo og gihulosiyta, on mataw na bunno teq in gigo nagah na amenin 100 nazaq tuwaq daqay ham. Ad teq in God ago os dimuntab gwahtiigeq kuluwa-kuluwmo tuqos daqay ham. ³⁰ Kam nab teq mataw gibin inaq iyim og kab osayta na kabemmo gibin hiqysa bo abeb tiqiy daqay ham. Sa mataw kabemmo og kab gibin haiqta na in gibin inaq iyeq le danmeeb tiqiy daqay ham.

20

Mataw am wain akabiyan emiyta gigo gamuk awowun

¹ Ari Yesus bilam, God ago maror in bilaqne mat araq tarommo lehim kabibiy mataw asor in ago ogib am wain akabiyan em daqay haqad giwamta nazaq nog ham. ² Mat na lehim kabibiy mataw giwaqad gibilan, Kam amulik-mulikmo ya gimeq amulik-mulikmo amalib ne tigizay-daiq haqad in bilam ham. Haqan mataw na 'dimunmo' haqiq ham. An mat na qigeman in wain akabiyan emnan tilehiy ham.

³ Lehsa 9 kilok nagzaq mat na maket-ib lehim mataw asor samanmo kabiy haiqmo tursa in gibiy ham. ⁴ Gibiyad in gibilan, Ne inaqmo leheq wain akabiyan emiy haqad

in bilam ham. Emid teq ya ne kabiy em daqayta na amenin anononmo tinegdaiq haqad in bilam ham. ⁵ Haqan mataw na tilehiyomu ham. Lehsa 12 kilok teq 3 kilok mat na lehim in a nazaqmo ta am ham. ⁶ Emim teq 5 kilok imisor in lehim mataw asor samanmo tursa in gibiy ham. Gibiyad in gibilan, Ne nagaqgo kam kab sisagmo samanmo turiy? haqad in bilam ham. ⁷ An mataw na bilaqiy, I mat araq kabiy a hi igaq haqiq ham. Haqan mat na gibilan, Ne inaqmo leheq yaqgo wain akabiyan emiy haqad in bilam ham.

⁸ Ari imisor diq tigiyen kabiy anamren na in mat kabibiy mataw gibunib turaqta na bulon, Ni kabibiy mataw gibilen bolid mani neg haqad in bilam ham. Itureq ni kabibiy mataw abeb bolim kabiy emiyta na gizay haqad in bilam ham. Gizayeq teq ni ta mataw ameb bolim kabiy emiyta na gizay haqad in bilam ham. ⁹ An mataw 5 kilok imisor bolim kabiy emiyta na in gwahtiqaq in amulik-mulikmo mani ameta amulik-mulikmo waqiq ham. ¹⁰ Waqsa mataw ameb diq bolim kabiy emiyta na in ginad emiy, I mani ayahmo waqam daqayha haqiq ham. Haqimmo hajiq ham. In nazaqmo mani ameta amulikmo waqtoniyomu ham. ¹¹⁻¹² In mani na waqim ahol waqan ayah a hi iyan in gigem meqinta kabiy anamren ugad bilaqiy, Mataw abeb bolim kabiy emiyta na in kam sisag diq kabiy a hi emiyta haqiq ham. Mataw abeb na gigo mani nogmo i gigo haqiq ham. I tarommo kabiy atoran diq emim zeq giynoya bo imisor tiqiy haqiq ham. Teq ni araqibmo i gizayqa haqiq ham.

¹³ An kabiy anamren in mataw na gigo araq bulonim bilam, Kadoy ham ya ni a hi nimeqin ton haqad in bilam ham. Ya ninaq ni mani ameta amulikmo waqgo a hi bilawta ye? haqad in bilam ham. ¹⁴ Ning mani na ni waqeq a leh haqad in bilam ham. Mani nawa ya nigta nazaqmo ya mataw abeb boliyta na neggo inad bilaqan ya tinegmo haqad in bilam ham. ¹⁵ Nagah na in yaqgo haqad in bilam ham. Ya inadibmo a hi gizaydaiq e? haqad in bilam ham. Nagaggo ni nigem meqniyad? haqad in bilam ham. Ya daq dimunta emaiq haqad in bilam ham. ¹⁶ Haqad Yesus bilam, God ago maror aduganib daq nazaqmo usaqta ham. On mataw abeb iyim osayta na in bo danmeeb iysa ta asor danmeeb iyim osayta na in le abeb tiqiy daqay ham.

Yesus ame ezeqmanta bilam, Ya moqeet teq ta eraqdaiq ham

(Mak 10.32-34; Luk 18.31-33)

¹⁷⁻¹⁸ Ari Yesus in mataw biyahmo ne-naq Jerusalem-ub tugwalehyaq. In danib gwalehad luwad in ago disaipel 12 na

giwaqim giqad lehim giholbin osad teq in gibilan, Ne hurityi ham. Muran i Jerusalem-ub tugwalehauq ham. Nab teq mat araq in Mat Atatin waqeinq mataw tamaz emayta gigo aseseqta na giyogniz mataw Moses ago gunun huriit kemiyyta na nenaq gibenab tiqemdaq ham. Emid in ayon tibilaq daqay, Wol emid moqan haq daqay ham. ¹⁹ Haqad in mataw en araq Juda a haiqta na gibenab emid in Mat Atatin bilawunad woltitayad teq in ayib abensen dom wolid tumoqdaq ham. Moqeq kam ezeqmanmo usid teq God wazid ta eraqdaq ham.

*Jems ama Jon inaq maror iyeq osnan bilaqiy
(Mak 10.35-45)*

²⁰ Ari kam nab Sebediy atatniz giger Jems ama Jon inaq in ginen inaq Yesus ago hib tuboliy. Bolim in ginen Yesus anognib abakbakan ulum laquwim turad in Yesus ago hib nagah araq waqgo haqad tisusumun ug. ²¹ An Yesus bulon, Ni naga waqnan? ham. Haqan aw na bilam, Yaqgo onmin giger ka in ningi maror aduganib maror aseseqta iyeq osgo haqad ni gitowun meeq bilaq ham. Araq niben niqabun ban ossa araq niben ninasaran ban osdaq na ago ni bilaqsa mataw ka hurityi ham.

²² In nazaq bilaqan Yesus amenin emim gibilan, Ne nagah anan susumunayta ka ago ne a hi huriit kemiyy ham. Abeb mataw gileh yagsa santitiy ayahmo tikiqish bugdaq ham. Ne giger teq gog ayuwun agon meqin digta ya uluwdaiqta na asor ne tuquluw daqaymo ye? ham. Haqan giger na bilaqiy, Na i tuquluwamta haqiy. ²³ An Yesus gibilan, Helmo ham. Ne giger teq yaqgo gogib yuw tuquluw daqayta ham. Ari nog diq ya iben iqabun ban osdaqta na teq nog ya iben inasaran ban osdaqta na in yaqgo nagah a hajq ham. Ya imam in mataw gangan gimen ban tuwastitayan usaqta naqmo in ban na tuwaq daqay ham.

²⁴ Ari disaipel 10 na gamuk na huriit in maqbab giger na gigem meqinta negiy. ²⁵ In nazaq tonsa Yesus gibilenan agerab bolan in gibilan, On mataw en ta asor Juda a haiqta nagan gigo maror aseseqta in gihol abin iluwad igmo ag haqad osayta ham. Ad in gigo walmataw giqemid in gimo ginad muzad gihadqenib iyeq osgo in giwaz meqniyayta ham. Na ago ne tuhuriitya ham. ²⁶ Teq ne in gigo daq na hikidik muziniy ham. Ne gilikmanib mat nog in mat ayahta iyeq osnan haqad in ahol wazid woqsa in ne gilumsiheq gimen kabiy eman ham. ²⁷ Ad mat nog in ne gigo mat amebta iyeq osnan haqad in ne gigo kabibiy mat

samanta iyeq osan ham. ²⁸ Ne Mat Atatin em nogmo ne emiy ham. In mataw giqemid inmen kabiy sorgo a hi bol ham. In mataw gigo kabibiy mat nog iyeq in gigo afagan inmo ahol ugad teq in ahol amalib mataw kabemmo gizayeq bab gibenab ta giwaggo haqad in bolta ham.

*Yesus mataw giger gime haiqta giwasti-tayan dimniyyi
(Mak 10.46-52; Luk 18.35-43)*

²⁹ Ari Yesus ago disaipel nenaq uliq Jeriko hulosad tilehiy. Lehsa on mataw kabemmo Yesus muzim inaq tilehiyomo. ³⁰ Sa mataw giger gime haiqta dan adekib osad in Yesus bolaqta na abin tuhuriity. Huritim in dedibmo lileyim bilaqiy, Iyahta haqiy. Devit atatin* haqiy. Ni i ginan ninad meqniyan haqiy. ³¹ Haqan on mataw biyahta na in mataw giger na ginad gibileni, Ne giqez hiqiyi haqiy. Haqan haq. In dedibmo a ta lileyim bilaqiy, Iyahta haqiy. Devit atatin haqiy. Ni i ginan ninad meqniyan haqiy. ³² Haqsa Yesus ahol wasihim turad in giger na gililewunim gibilan, Ya ne ezaq gitondaiq? ham. ³³ Haqan in buloni, Iyahta haqiy ni i gime wastitayid dimniyan haqiy. ³⁴ Haqan Yesus in ginan anad meqniysa in aben mataw giger na gimeqnagnib tiqam. Eman muran diq nawaqmo in gime hastitayan in saw ahol tuwaq yaqay. Ad in Yesus muzim inaq tilehiy.

Yesus le uliq ayahta Jerusalem-ub gwahtiqim teq in on mataw suleq negyaq

21

*Yesus king nog iyim le uliq Jerusalem-ub tugwahitim
(Mak 11.1-11; Luk 19.28-40; Jon 12.12-19)*

¹⁻² Ari Yesus ago dauh nenaq le Jerusalem sinsin tuqugad in le uliq Bettfage-ib tugwah-tiqiy, garah Oliv asenab. Gwahtiqim nab Yesus in disaipel giger gigeman danmeh lehsa in gibilan, Ne le uliq ginobun ban usaqta kob gwahtiqeqmo donki araq amidi-on inaq am giwazan turayta na ne tigibiy daqay ham. Na ne giqamun haseq giwaqeq giqad yaqgo hib a boliy ham. ³ Sa mat araq nan bilaqid teq ne kazaq buloni ham. Iyahta karuw giger ka gigo hib ago kabiy inaq haqad ne buloni ham. Bulonid teq in hid naqmo giqemid tubol daqay ham.

⁴ Yesus nazaq bilaqim in kwaziqmo God ago nantut gamuk bilamta na tuwol net bug. ⁵ Gamuk na bilam,

* **20:30:** Matyu 9.27 nab teq ni gamuk 'Devit atatin' ka alulin ahol waqdaq.

Ne on mataw uliq Sayon-ibta kazaq gibileniy ham. Ahol waqiy haqiy ham. Ne gigo king nawa donki amalib osim tubolaq haqiy ham. In ahol wazan woqsa donki amidon amalib osim bolaq haqad ne nazaq gibileniy ham. *Aisaya 62.11*

⁶ An disaipel giger na lehim Yesus gibilanta nazaqmo in tiqemiy. ⁷ In donki anen amidon inaq giwaqim giqad tuboliy. Bolim in gigo tubusan asor donki gimalib eman Yesus tubusan na amalib tuqos. ⁸ Ossa on mataw kabemmo in gigo tubusan danib gihere niy. Gihurensa asor in ay aben qwayim danib rireniyomo. ⁹ Samo on mataw Yesus anobun ban danmeh lehad asor agilehun ban muzim inaq bolad in lileyim bilaq yaqay,

Devit atatin* ka abin sorid ulilib gwalan haq yaqay.

Mat ka Iyatha abinib bolan i ginad bilaq gigayinaq haq yaqay.

I God abin sorid ulilibmo diq gwalan haq yaqay.

¹⁰ Ari Yesus le uliq Jerusalem-ub tugwah-tim. Gwahtiqa-samo on mataw uliq nabta na bunmo gihol turuh nemsa bilaq yaqay, Ko nog diq? haq yaqay. ¹¹ Haq-samo on mataw biyahta Yesus muzim inaq bolitya na bilaq yaqay, Ka God ago nantut Yesus uliq Nasaret saw Galiliy-ibta naqmo amatin haq yaqay.

Mataw Tempel-ib mani akabiyan emsa Yesus gimuzan asan ban gwahtiqa'y

(Mak 11.15-19; Luk 19.45-48; Jon 2.13-22)

¹² Ari Yesus Tempel agelin aduganib le gwahtiqa'm in mataw nagah gizayad osiyta na gimuzan asanib tukim tilehiy. Lehsa Yesus in mataw mani amo amo waqad amenin bit na ago mani negayta na gigo ban otbuliyan tuwom. Ad teq in mataw ah† ¹³ Ad in mataw na gibilan, God ago marib in gamuk araq kazaq bilam ham.

Mataw yaqgo bit anan bilaq daqay, God inaq gamuk emgo abitan haq daqay haqad in bilam ham. *Aisaya 56.7*

Ta teq ne bit ka eman in mataw rin tonayta gigo bit nog tiqiyaq ham.

¹⁴ Teq Yesus Tempel-ib luwsa mataw asor gime haiqta teq gisen meqinta in ago hib bolsa in giwastitayan tidimniyyi. ¹⁵ Sa mataw tamaz emayta gigo aseseqta na teq mataw Moses ago gunun hurit kemiyya na in Yesus daq azawayin inaq na emsa ahol tuwaqiy. Ahol waqsa teq ta onmin in Tempel agelin aduganib turad in lileyim bilaq yaqay, I Devit atatin ka abin wazid

ulilibmo gwalan haq yaqay. Haqsa mataw aseseqta gamuk na huritad in gigem meqin diq iy yaqay. ¹⁶ Gigem meqniysa in Yesus buloni, Onmin ko ni nibin iluwsa ni a hi huritaq e? haqiy. Haqan Yesus gibilan, Ya huritaq ham. Ta ne God ago marib gamuk araq mar tonan usaqta na ne ahol a hi waqiy daqagya ham. Gamuk na bilam, Ni onmin amikmikta teq onmin susibta giquez eman in ni nibin soran ulilibmo gwalaq haqad in bilam ham. *Buk Song 8.2*

¹⁷ Haqadmo in mataw na gihulosad uliq Betaniy-ib tilah. Lehim tarom nab in uliq nab tuqus.

Yesus bilaqan ay fik araq may
(Mak 11.12-14, 20-24)

¹⁸ Usim tarommo diq Yesus eraqim uliq Jerusalem-ub muleqim ta lah. Lehad danib in aqem tumoqyaq. ¹⁹ Agem mogsa in ame le ay fik araq dan adek ban tursa ahol waqad agerab tilom. Loqim in anon araq ahol a hi wam. Haiqgam. Aben samanmo ananmo us. An in ay fik na bulonim bilam, Ni ninon a ta hi emdaq ham. Haiq diqmo ham. Haqan hid naqmo ay fik na tumay.

²⁰ Mayan disaipel ahol waqad gihol riten lamsa bilaqiy. Ay fik ko ezaq tonim hid naqmo may? haqiy. ²¹ Haqan Yesus gibilan, Ya helmo ne gibileqa ham. Ne helmo diq haqad ginad giger a hi emeq ya ay fik bulonan mayta kazaqmo ne tiqem daqaymo ham. Ad ne garah ko bulonid in ne giquez muzeq sor tukeq le kamismeb tuwoqdaq ham. ²² Ne ginad em hasiy ham. Ne helmo haqad God inaq gamuk emeq teq nagah ne anan susumunayta na ne tuwaq daqay ham.

Mataw aseseqta in nog Yesus ahol abin ugtta na anan susumun ugiy
(Mak 11.27-33; Luk 20.1-8)

²³ Ari Yesus Tempel agelin aduganib lo gwahtiqa'm in on mataw suleq tinegyaq. Suleq negsa mataw tamaz emayta gigo aseseqta na teq Juda gigo mataw marorta na in ago hib bolim atoranmo susumun ugiy, Ni nibin ezaqta iyim ni daq kagan emaq? haqiy. Teq nog diq nibin na nig? haqiy.

²⁴ Haqan Yesus gibilan, Ta ya nazaqmo nagah araq ago ne tisusumun negnan ham. Ne yaqgo susumun ka amenin emid teq nog ibin yagan ya daq kagan emaitga na ago ya tigibilendaiqmo ham. ²⁵ Ari Jon mataw gihuz negyaqta ago kabiya na edob bol? ham. Kabiya na Heven-ib bolta o haiq in matawmo gigo hib kabiya na wamta? ham.

Haqan mataw aseseqta na in gimo an mugad bilaqiy, I bilaqam, Kabiya na God ago

* **21:9:** Matyu 9.27 nab teq ni gamuk 'Devit atatin' ka alulin ahol waqdaq. † **21:12:** Ah na amalib in God ayon tamaz em yaqayta.' gizayad osiyta na gigo ban giqot bulyan woqymo.

hib bolta haqid in tibilaqdaq, Ta nagaqgo ne Jon ago gamuk huriit anan helmo a hi haqiy? haqdaq haqiy. ²⁶ Ari i bilaqam, Kabiy na matawmo gigo hib bolta haqeinqi on mataw biyahta ka girabunam haqiy. Na ezaqgo in bunmo Jon anan bilaqay, God ago nantut araqmo diq haqayta haqiy. ²⁷ Nazaq iyan in Yesus ago susumun na amenin emim buloniy, I a hi huriit haqiy. Haqan Yesus gibilan, Ya nazaqmo ham. Nog ibin yagan ya daq kagan emaiqta na ago ya a hi gibilendaiqmo ham.

Onmin giger gigo gamuk awowun

²⁸ Haqad Yesus in mataw aseseqta na gibilan, Ne ginad ezaq emay? ham. Mat araq ago onmin gigermo nenaq os yaqay ham. Osad teq gimam in atatin aqenta na bulon, Amun ham muran ni leheq yaqgo am wain akabiyan em ham. ²⁹ Haqan atatin bilam, Ya ituw hiqiyaq ham. Ta teq abeb in anad bulyim in kabiy na emnan tilah ham. ³⁰ Sa gimam in atatin ta araq na ago hib tilah ham. Lehim in teko bilamta nazaqmo in ta na tubulonmo ham. Bulonan amun na bilam, Eqe mam ya le kabiy na tiqemdaq ham. Haqim teq in a hi lah ham. ³¹ Ari onmin giger na gilikmanib amun nog in amam anad muzta? ham. Haqan mataw na bilaqiy, Amun ameba naqmo haqiy. Haqan Yesus gibilenim bilam, Ya helmo ne gibilenaiq ham. Mataw takis waqayta na teq on danatabta na in ne giqiriyamim ameb diq God ago maror aduganib tugwahtiqay ham.

³² Haqad in bilam, Jon daq dimunta giqishunyajta ham. Giqishunsa teq ne in ago gamuk anan helmo a hi haqiy ham. Ari mataw takis waqayta na teq on danatabta na in Jon ago gamuk anan helmo haqsa ne in gibiyiy ham. Gibiyad teq ne ginad bulyim Jon ago gamuk na anan helmo a hi haqiy ham.

Mataw meqinta am wain akabiyan emiyta gigo gamuk awowun

(Mak 12.1-12; Luk 20.9-19)

³³ Haqad Yesus bilam, Gamuk awowun ta araq ka ne huriity ham. Mat araq in ago og araqab am wain anagin kabemmo leyim tigel ton ham. Gel tonim in yay araq wain anagin em woqid bay nialeq ayun waqqota na titay ham. Na tiliqiyan in mat kabiy wamuzdaqta ayon bit araq asen sisqa emim in kabiy na mataw asor gibenab tiqam ham. In anad mataw na in gimo giholyon kabiy emad wain anagin asor waqad asor in ya yag daqay haqad ham. Kabiy anamren anad nazaq emad gibilenim hulosad in era uliq araq pesantab tilah ham. ³⁴ Lehim ossa wain anagin waqgo akaman sinsin tiqiy ham. Sinsin iysa in ago kabibiy mataw

giqeman in mataw na gibenab ago wain anagin asor waqnan tilehiy ham. ³⁵ Lehan mataw wain akabiyan emayta na in mataw na giwazim araq wolad araq in wol emiy ham. Ad in araq gigib woliy ham. ³⁶ An kabiy anamren in ago mataw kabemmo giqeman ta lehiy ham. Mebmebmo in mataw giqeman lehiyta na in kabem a haiq ham. Ari in abeb mataw giqeman lehiyta na in kabemmo diq ham. In mataw na giqeman lehsa mataw wain akabiyan emayta na in nazaqmo tigimeqin toniymo ham.

³⁷ An abeb diq kabiy anamren in atatinmo eman tilah ham. In anad am, Ya itatin em lehid teq mataw na in aqez tuhurit daqay haqad ham. ³⁸ Teq haiq ham. Mataw kabiy wamuzayta na in kably anamren atatin bolsa ahol waqad in gimo an bulonim bilaqiy, Abeb mat ko amam moqid in amam ago ahuran nagah bunmo tuwaqdaqta haqiy ham. Bolsa i le mat ko wol emid moqanno haqiy ham. Moqqa amam ago kabiy ka i giholyon waquq haqiy ham. ³⁹ Haqad in mat na waqim kably asanib a lehim wol eman tumom ham.

⁴⁰ Nazaq iyan kabiy anamren boleq in mataw wain akabiyan wamuzayta na ezaq gitondaq? ham. ⁴¹ Haqan mataw na buloniy, Kabiy anamren in mataw meqinta na sanitiy ayahmo negad ginol emid tumoq bug daqay haqiy. Sa in ago kabiy na waqeq kabibiy mataw ta asor bunta tinegdaq haqiy. Negid in kabiy na anononmo wamuzad wain anagin waqgo akamnib in wain anagin asor waqeq kabiy anamren tuqug daqay haqiy.

⁴² Haqan Yesus gibilan, Ne God ago mar ahol a hi waqayta ye? ham. Mar nab gamuk araq kazaq bilam ham.

Tituq mataw anan bilaqiy ‘megin’ haqiyta naqmo in awaz meqin diq turad bit anon bunmo soraq haqad in bilam ham. Iyathaqmo nagah na eman gwahtiyan i ahol waqsa in dimun diq iyaq haqad in bilam ham. *Buk Song 118.22-23*

⁴³ Nazaq iyan ya ne gibilenaiq ham. God in ago maror ne gibenab walemeq in on mataw lul ta araq in ago maror akabiyan anononmo em daqayta naqmo gibenab tiqemdaq ham. [⁴⁴ Sa mat araq tituq na amalib woqeinq in aditin bunmo tuwolbiyadaq ham. Ari tituq na in mat araq amalib woqeinq in mat na tuwol ninal bugdaq ham.]

⁴⁵ Ari mataw tamaz emayta gigo aseseqta na giyogniz Farisi nenaq in Yesus gamuk awowun bilamta na huriit ginen tiqemiy, Yesus igmo ginen bilaqaq haqiy. ⁴⁶ Haqad in Yesus wazeq irqurnan ginen emad teq in ta on mataw ginen rab yaqay. Na ezaqgo

on mataw na ginad em yaqay, Yesus in God ago nantut araq haq yaqay.

22

Maror araq atatin aw waqnan tonsa ayon didaq ayahta oytä ago gamuk awowun (Luk 14.16-24)

¹ Ari Yesus gamuk awowun ta araq gibilan. ² God ago maror in bilaqne king araq ago amun matta aw waqnan tonsa in ayon didaq ayahta oytä nazaq nog ham. ³ Danmeeb in mataw humab nab boleq an waq adidaqan neq daqayta na gimen nan eman tilah ham. Lehan abeb didaq neqgo akaman na tugwahtiqan in ago kabibiy mataw giqeman in mataw tanabmo gimen nan amta na gibilenan a ta lehiy ham. Lehan mataw na bunmo humab nab bolnan gituw tihiqiy ham.

⁴ An king na in ago kabibiy mataw ta asor giqeman ta lehiy ham. Lehsa in gibilan, Ne le ya iqeziq tuteq mataw ya gimen nan emta na kazaq gibileniy ham. Ne huriit yaqay ham. Ya didaq nagah bunmo tigiwastitay haqiy ham. Yaqgo bulmakau matmatta teq yaggo bulmakau giminidgotniz ginon aseseqta na ya ginol emim tigiqoy haqiy ham. Ya nagah bunmo tigiwastitayan usaq haqiy ham. Ne an waqgo adidaqnib boliy haqad ne gibileniy ham. ⁵ Haqan kabibiy mataw gamuk na huriit in lehim mataw na nazamqo tigibileniy ham. Gibilenan mataw na in king ago gamuk na a hi huriit yaqay ham. Ad in haresmo lehad araq ago kabiyab tilah ham. Sa araq ago mani akabiyan emnan tilah ham. ⁶ Sa mataw na asor in king ago kabibiy mataw na giwazim gimeqin diq tonim ginol eman tumoqiy ham.

⁷ Moqan king na agem meqniyan in ago bab mataw giqeman lehim in mataw in ago kabibiy mataw ginol emiya na ginol eman tumoq bugiy ham. Ginol emad in gigo uliqab bit nagah bunmo mideran tuqoy bug ham. ⁸ Sa king na in ago kabibiy mataw gibilan, Ya an waqgo adidaqan tuwastitayan usaq ham. Ta teq ya mataw gibilenta na in yaqgo humabub bolgo dimun a hait ham. ⁹ Nazaq iyan ne lehad dante buntab mataw gibiyad ne mataw na bunmo gibilenid in yaqgo an waq adidaqnib kab boliy haqad in bilam ham.

¹⁰ Haqan kabibiy mataw na tilehiy ham. Lehad in dante buntab mataw gibiyad gihumab woliy, mataw meqmeqinta teq mataw dimdimunta inaqmo ham. Gihumab wolani bit humab em daqayta nab ban tihiqiy bug ham.

¹¹ Ari mataw bo humabub tuqossa teq king na in gibiyanaq tugwahtim ham. Gwahtiqim gibiyim gibiyim lehadmo mat

araq ago tubusan anumlan inaqta emim an waq ahumabnib nab ossa in ahol tuwam ham. ¹² Ahol waqad in mat na bulonim bilam, Kadoy ham. Ezaqgo ni tubusan araq dimunta emim teq ni bo a hi gwah-tim? haqad in bilam ham. Haqan mat na amenin araq emdaqta hait ham. ¹³ Nazaq iyan king in ago kabibiy mataw gibilan, Ne mat ka abensen am wazeq hunegid le asanib gwahtiqeq in romriqab osan ham. Osad in anad meqniysa gaqad ate guruwad tuqosdaq haqad in bilam ham. ¹⁴ Haqad Yesus bilam, God in mataw kabemmo gililewunaqta ham. Gililewunad in mataw na gilikmanib amulik-mulikmo gilumim giwaqaqta ham.

Mataw Sisa takis ugayta na ago in Yesus ulum waqiy

(Mak 12.13-17; Luk 20.20-26)

¹⁵ Ari Farisi asor lehim humab wolim osad teq in ezaq toneq Yesus kat ugid in gavman gigo gunun araq itiyonad nan hi bilaqanta bilaqid i tuwazam haqad in an bulonad osiy. ¹⁶ Osim in ginad tiqemim in gigo matawta asor teq Herot ago matawta asor nenaq giqeman tilehiy. Lehim in Yesus ago hib gwahtiqim tubuloniy, Tisa haqiy, i ningi tuhurit haqiy. Ni a hi katiyaqta haqiy. Ad ni on mataw God ago dan titronta giqishunad ni hel diqmo gibilenaqta haqiy. Ni gamuk helta bilaq-nan a hi rabaqta haqiy. Na ezaqgo haqiy ni mataw gibin inaqta a hi girabunad gigomo a hi lehaqta haqiy. ¹⁷ Nazaq iyan ni i gibilen haqiy. Ni ninad ezaq emaq? haqiy. I gibabun Rom gigo king Sisa in i gituw bulsa i takis ugauqta na in daq dimun o daq meqin? haqiy. I Juda gigo maror ezaq bilamta? haqiy.

¹⁸ Haqan Yesus in mataw ginad meqinta na tuhurit. Ad in bilam, Ne mataw gimiileq meqin diqta ham. Nagaqgo ne ya ilum waqay? ham. ¹⁹ Mani takis zayayta na araq iqisihunid ya ahol waqiq ham. Haqan in mani araq a bolim tuqugiy. ²⁰ Ugan Yesus ahol waqad in mataw na tisusumun nag, Ka nog diq adulan teq ahol anan usaq? ham. ²¹ Haqan mataw na bilaqiy, Na Sismo agota haqiy. Haqan Yesus gibilan, Nazaq iyan Sisa ago nagah na ne Siso-mo ugiy ham. Ad God ago nagah na ne God-mo ugiy ham. ²² Haqan mataw na ginadnad emad Yesus hulosim tilehiy.

Sadyusi in mataw hodhodab eraq daqayta na ago Yesus ulum waqiy

(Mak 12.18-27; Luk 20.27-40)

²³⁻²⁴ Ari mataw aseseqta na tilehsa kam nabmo Sadyusi asor Yesus ago hib tuboliy. Mataw na ginad kazaq emayta. Mataw tumoqiyta hodhodab a hi eraq daqay haqayta. Na in bolim Yesus buloniy, Tisa

haqiy, Moses i gimen gamuk araq mar tonim in kazaq bilam haqiy. Mat araq aw waqeq amun a hi emsamo moqid in amikqan araq abab aqoburan na waqeq alulib abab ayon onmin tigiqemdaq haqad in bilam haqiy.

²⁵ Ari gamuk araq kazaq lahta haqiy. Mat araq amikqaniz nenaq 7 nazaq diq iyim i gilikmanib osiy haqiy. Osim in gibab na aw araq tuwam haqiy. Waqim inaq osad in ago amun haiqmo osimmo tumom haqiy. Moqan ama araq in abab aqoburan na tuwam haqiy. ²⁶ Waqim in nazaqmo amun haiqmo osim tumommo haqiy. Moqan ama ta araq in aw naqmo waqim in nazaqmo ton haqiy. Mat ezeq-manta na amun haiqmo moqan amagniz bunmo nazaqmo toniy haqiy. In nazaqmo emim emim le gima 7-ta na in nazaqmo tonmo haqiy. In bunmo aw amulik naqmo waqim amun araq a hi emimmo tumoq bugiy haqiy. ²⁷ Mataw na tumoq bugan abeb aw na tumommo haqiy. ²⁸ Nazaq iyan abeb mataw bunmo hodhod huloseq eraq daqayta nab teq maqbab 7 na gilikmanib aw na in nog awe tiqiyadaq? haqiy. Mataw na bunmo in aw amulik naqmo waqiyta haqiy.

²⁹ Haqan Jesus amenin emim gibilan, Ne God ago marib gamuk usaqta na ago ne ginad a hi em hasay ham. Teq ne God ago zaway a hi hurit kemaymo ham. Nazaq iyan ne gamuk menmen bilaqay ham. ³⁰ On mataw hodhodab eraq daqayta nab in an a ta hi waq daqay ham. In bilaqne God ago hib angelo osayta nazaq nogmo in os daqay ham. ³¹ Teq mataw tumoqiyta hodhodab eraq daqayta agamukan God nagta na ne ahol a hi waqiyta daqagya? ham. ³² Gamuk nab God bilam,

Abraham ago God, teq Aisak ago God, teq Jekob ago God na yaqmo haqad in bilam ham. *Kisim Bek 3.6, 15, 16*

Nazaq iyan God in mataw moqim kayeqmo osayta na gigo God iyim in gibiy muzaqta ham. Mataw moqim a hi hiqiyayta ham. ³³ Haqan mataw biyahta nab turiyta na in Jesus ago gamuk huritim gihol turuh nemiy.

*God ago gunun ameb diqta
(Mak 12.28-34; Luk 10.25-28)*

³⁴ Ari Jesus in Sadyusi gigo gamuk na amenin anononmo eman Sadyusi giqez tihiqiyim osiy. Ossa mataw ginan Farisi haqay na in nazaq huritad in bo Jesus aqerab humab tuwoliy. ³⁵⁻³⁶ Mataw na gilikmanib mat araq Moses ago gunun hurit kamta in nab osmo. Osim in Jesus ulum waqad susumun ugim bilam, Tisa

ham God ago maror Moses bilamta na aduganib gunun doqag diqta in gunun bunmo giquriyamim in ayah diqta? ham.

³⁷ Haqan Yesus bulonim bilam, God ago gamuk bilam,

Ne gigem, giqut, teq ginad bunmo amalib ne gigo Iyahta God anan ginad bi laqan haqad in bilam ham. *Lo 6.5*

³⁸ Gunun na in ayah diqta teq in ameb diqta ham. ³⁹ Haqad in bilam, Teq gigerta na in gunun ameba na nogmo ham. Na in kazaq bilam ham,

Ni nihol anan ninad bilaqaqta nazaqmo ni niyow anan ninad bilaqan haqad in bilam ham. *Wok Pris 19.18*

⁴⁰ Gunun giger na in God ago maror Moses mar tonta na teq God ago nantut gamuk mar toniyta na bunmo alulinmo diq ham.

*Krais ahol alulin ezaqta na ago Yesus Farisi susumun nag
(Mak 12.35-37; Luk 20.41-44)*

⁴¹⁻⁴² Ari Farisi Jesus agerab humab wolim os tutsa Yesus susumun negim bilam, Ne ginad ezaq emay? ham. Mat anan Krais haqayta na in nog atatin? ham. Haqan Farisi bilaqiy, In Devit atatin*

⁴³ Haqan Jesus bilam, Nazaq na teq ezaq haqad God ago Bugaw Dimunta in Devit anad ugsa Devit in Krais anan bilam, Yaqgo Iyahta haqad in bilam? ham. ⁴⁴ Devit gamuk araq mar tonim bilam, Iyahta in yaqgo Iyahta kazaq bulonim bilam ham. Ni ya iben iqabun ban kab ya imen emad ossa ya ningobab giqemid nisen ahagenib tiqiy bug daqay haqad in bilam ham. *Buk Song 110.1*

⁴⁵ Ari Devit in Krais anan bilam, 'Yaqgo Iyahta' haqad in bilam ham. Nazaq iyan ezaq toneq Krais in Devit ago Iyahta iyeq teq in Devit atatin a ta iydaq? ham.

⁴⁶ Haqan mat araq in Jesus ago gamuk na amenin emgo biyab haiq. In bunmo giqez tihiqiyiy. Nazaq iyan mataw bunmo rabad in Jesus ulum waqnan a ta hi susumun ug yaqay.

23

Yesus in mataw Moses ago gunun hurit kemiyyta na giyogniz Farisi nenaq gigo daq ginan bilam

(Mak 12.38-39; Luk 11.43, 46; 20.45-46)

¹⁻² Ari abeb Jesus in on mataw biyahta na teq inmo ago disaipel nenaq gamuk gibilenim bilam, Mataw Moses ago gunun hurit kemiyyta na giyogniz Farisi nenaq in Moses ago ban waqim Moses mataw suleq negayaqta nazaq in ne suleq negayta ham.

* ^{22:41-42:} Matyu 9.27 nab teq ni gamuk 'Devit atatin' ka alulin ahol waqdaq.' haqiy.

³Nazaq iyan in gamuk bunmo amalib suleq negayta na ne huritad muzmo muziniy ham. Ari in gigo daqmo teq ne hikidik muziniy ham. Na ezaqgo in suleq negayta na in gimo a hikidik muzinayta ham. ⁴In gunun kabemmo diq mataw negayta ham. Bilaqne in nagah afaqanta tuq tonim am wazim mataw gibebarib emayta nazaq nog ham. Eman mataw nagah afaqanta na sorad in giholtuw bulad luwayta ham. Luwsa ta mataw aseseqta na in gilumsihi giben amotin asit lo a hikidik wazayta ham.

⁵Mataw aseseqta na in gigo daq bunmo emsa mataw gibiyad gibin iluw daqay haqad in emayta ham. In God inaq gamuk emgo arin aseseqta gibenab teq gimaqbelaq emayta ham. Teq in God inaq gamuk emgo abalawun in gigo tubusan adekib emayta na in aburgan sisacmo wole giqusaqta ham. ⁶In humab adidaqan inaqtab ogib garuruhab osnan hulosmo diq hulosayta ham. Ad bit humab wolaytab nazaqmo in ban ulilibta nabmo osnan ginad bilaqaqta ham. ⁷In maked-ib luwsa mataw in ginan ‘mat ayah’ haqsa in ginad dimmiyaqta ham. Teq mataw in gibin iluwad ginan ‘tisa’ haqgo in ginad diq bilaqaqta ham.

⁸Ta teq negmo mataw giwasihsa in ne ginan ‘tisa’ hi bilaqy ham. Haidgam ham. Mat amulikmoqmo in ne gigo Tisa-ta ham. Sa ne bunmo maqbabmo osay ham. ⁹Ad ogib kab ne mat araq anan ‘kamam’ nazaq ne hi bilaqyham. Ne Gimam amulikmoqmo osaqta ham, Mat Heven-ib osaqta naqmo ham. ¹⁰Ad ne mataw giwasihsa in ne ginan ‘maror’ hi bilaqyham. Ne gigo Maror amulikmo osaqta ham, mat anan Krais haqayta naqmo ham.

¹¹Ne gilikmanib mat ayah diqta na in ne gigo kabibiy matmo iyeq osan ham. ¹²Mat aw nog in gimo gihol abin wazan eraqaqta na in gibin twoqdaq ham. Ad mat aw nog in gihol abin wazan woqaqta na in gibin tiqeraqdaq ham.

Yesus in mataw Moses ago gunun hurit kemiyyta na giyogniz Farisi nenaq ginad (Mak 12.40; Luk 11.39-52; 20.47)

¹³Haqad Yesus bilam, Ne mataw Moses ago gunun hurit kemiyyta na giyogniz Farisi nenaq ham ne timeqniyim osayta ham. Ne ginad emay ye? ham. Ne mataw gimiileq meqinta ham. On mataw God ago maror aduganib gwahtiqtan tonsa ne gidanin qwayayta ham. Negmo a hi gwahitiqayta ham. Ad on mataw God ago maror aduganib lo gwahtiqsamo ne giwasihayta ham.

[¹⁴Ne mataw Moses ago gunun hurit kemiyyta na giyogniz Farisi nenaq ham ne timeqniyim osayta ham. Ne ginad

emay ye? ham. Ne mataw gimiileq meqinta ham. Ne on waburta kat negad gigo bit samanmo waqayta ham. Ad ne mataw gimeb God inaq gamuk sisacmo bilaqim a lehaya ham, mataw gibiyad ginan dimun diqta haq daqay haqad ham. God hazizir ayahta emdaqta hab ne on mataw bunmo giquriyameq faq ayah diqmo tuwaq daqayta ham.]

¹⁵Ne mataw Moses ago gunun hurit kemiyyta na giyogniz Farisi nenaq ham ne timeqniyim osayta ham. Ne ginad emay ye? ham. Ne mataw gimiileq meqinta ham. Ne mat amulikmo emid ne gigo maror ahaqenib iyeq muzingo haqad ne giholtuw diq bulayta ham. Ne gihol anadin a hi emad ne kamis urotim lehim teq ne ogib dan pesanmo diq lehaya ham. Lehim ne mat na kat ugan in ne gigo maror ahaqenib iyim ne faqab leh daqayta nazaq nog in tiqiyaqmo ham. Teq ne mat na isihunan in ne giquriyamim daq meqinta kabemmo diq emaqta ham.

¹⁶Ne timeqniyim osayta ham. Ne ginad emay ye? ham. Ne gime haiqta ham. Ezaq teq ne mataw dan giqisihun daqay? ham. Ne kazaq bilaqayta ham. Mat Tempel abinib an adugan wazaqta na in nagah hel diq a hait haqayta ham. Ari mat Tempel-ib gol usaqta naqmo abinib an adugan wazaqta na in nagah hel diqta haqayta ham. Mat gol na abinib gamuk awaz meqin bilamta nazaqmo diq in tiqemdaq haqayta ham. ¹⁷Ne mataw agadanta gime haiqta ham. Nagah edo diq in God ameb ayah diqta? ham. Ne ginad emiy ham. Gol na amomo in abin haiqta ham. Gol na Tempel-ibmo usad iyan in abin inaqta ham. Nazaq iyan Tempel-mo in nagah ayah diqta ham.

¹⁸Ad ne kazaq bilaqyham. Mat Tempel-ib tamaz emgo abanan usaqta na abinib an adugan wazaqta na in nagah hel diq a hait haqayta ham. Ari mat in nagah tamaz emgo abanan usaqta naqmo abinib an adugan wazaqta na in nagah hel diqta haqayta ham. Mat tamaz na abinib gamuk awaz meqin bilamta nazaqmo diq in tiqemdaq haqayta ham. ¹⁹Ne gime haiqta ham. Nagah edo diq in God ameb ayah diqta? ham. Ne ginad emiy ham. Nagah tamaz emgo abanan usaqta na in abin haiqta ham. Nagah na in God ago tamaz em abanan usad iyan in abin inaqta ham. Nazaq iyan God ago tamaz em abanan naqmo in nagah ayah diqta ham.

²⁰Nazaq iyan ne ginad em haseq teq gamuk bilaqy ham. Mat tamaz em abanan na abinib hel diqtaqmo haqaqta na in ban na teq nagah ban amalib usaqta na inaqmo gibinib gamuk bilaqaqta ham. ²¹Ad mat Tempel abinib an adugan wazim hel diqtaqmo haqaqta na in Tempel teq bit na

anamren inaqmo gibinib gamuk bilaqaqta ham. ²² Ad mat Heven abinib hel diqtaqmo haqaqta na in God ago ban tawonta na teq ban na anamren inaqmo gibinib gamuk bilaqaqta ham.

²³ Ne mataw Moses ago gunun huri kemiya na giyogniz Farisi nenaq ham ne timeqniyim osayta ham. Ne ginad emay ye? ham. Ne gimileq meqinta ham. Kabiyan kwasin amikmikta ginan mint teq dil teq kumin haqayta na ne giwaqim gi huseran humab 10 nazaq iyan ne humab amulikmo God ugayta ham. Ta teq God ago maror aduganib daq aseseqta na ne tuhulos bugiy ham. Daq titnonta amilib mataw gilum kemayta na teq mataw ginad negayta na teq God anan helmo haqayta na ago ne gidek zizalan ne a ta hi emayta ham. Ne daq aseseqta nawa na gidek a hi zizalsa ne tiqem nagiyta ham. Emad ne daq amikmikta nagan tiqem nagiyomo ham. ²⁴ Ne mataw gime haiqta ne on mataw dan tigiqisihun daqay ye? ham. Ne daq amikmik didiqta ago bilaqad teq ne God ago daq aseseqta emgo ginad a hi emayta ham. Ne didaq neqsa taqorib honam amik diqta woqan ne ahol waqad waqim hunegayta ham. Ta teq karuw ayatha anan kamel haqayta na ne gigo taqorib woqan ne ahol a hi waqad taqor inaqmo tiloran gimuganib wolehaqta ham.

²⁵ Ne mataw Moses ago gunun huri kemiya na giyogniz Farisi nenaq ham ne timeqniyim osayta ham. Ne ginad emay ye? ham. Ne mataw gimileq meqinta ham. Ne gog teq deg asanmo suholayta ham. Teq aduganib nagah rin tongo adan teq negmo gihol anadin emgo adan ame gwylim usaqta ham. ²⁶ Ne Farisi ham, ne gime haiqta ham. Itureqmo ne gog adugan suholiy ham. Adugan suholid teq gog asan anumlan hiqiydaqmo ham.

²⁷ Ne mataw Moses ago gunun huri kemiya na giyogniz Farisi nenaq ham ne timeqniyim osayta ham. Ne ginad emay ye? ham. Ne gimileq meqinta ham. Ne bilaqne hodhod asan balaw tonan hus diq iyaqta nazaq nog ham. Balaw tonan hodhod ahol awaqtan dimun diqta teq aduganib mataw tumoqiyta giditin teq nagaq lilihta kabemmo usaqta ham. ²⁸ Ne nazaqmo diq osayta ham. Mataw ne gibiyad ginad emay. Mataw ko in God ago mataw dimdimunta haqay ham. Ta teq mataw kat neg ago adan teq God ago maror othas ago adan in ne giduganib ame gwylim usaqta ham.

²⁹ Ne mataw Moses ago gunun huri kemiya na giyogniz Farisi nenaq ham ne timeqniyim osayta ham. Ne ginad emay

ye? ham. Ne gimileq meqinta ham. Ne God ago nantut gimen hodhod abitan dimdimunta emayta ham. Ad ne mataw titnonta moqiyta gigo hodhod balaw tonayta ham. ³⁰ Ne bilaqay, I gisesan gigo kamub osta iyeq i gisesan God ago nantut ginolsa i gilumsiheq a hi ginol em nagta haqayta ham. ³¹ Gamuk nabmo ne gihol ulal tonim bilaqayta ham. Helmo ne mataw God ago nantut ginol eman moqiyta na ginaynayniza ham. ³² Nazaq iyan ne gisesan gisen muzineq ne nazaqmo God ago nantut bunmo ginol emiymo ham.

³³ Ne nagah ahulinaqta meqinta ham. Ne ured amidgotniz ham. God teq ne ginan bilaqid ne faqab tileh daqayta ham. Ezaq teq ne tuk daqay? ham. ³⁴ Nazaq iyan ne hurity ham. Ya teq mataw God ago nantut bilaq daqayta asor teq mataw ginad awaz meqinta asor teq mataw suleq neg daqayta asor giqemid in ne gigo hib tileh daqay ham. Lehsa ne asor ginol emid moqsa asor ne ayib dom wolid moq daqay ham. Ad asor ne bit humab wolaytab gusib ginol titay daqay ham. Teq asor ne gimuzsa in le uliq araqab ossa nab ne gimuzeq lehid in oseq eraqeq uliq ta araqab leh daqay ham. ³⁵ Nazaq iyid teq og kab ne gisesan mataw dimdimunta ginol eman ginedan womta na ago afaqan ne gigo hib tuqusdaq ham. Mebmebmo in mat titnonta anan Abel haqayta na wol eman moqan in anedan wom ham. An abeb diq in Tempel teq tamaz em abanan asan ban turaqta na gilikmib in Barekiya atatin Sekaraya na wol eman moqan in anedan wommo ham. Ne gisesan Abel akamnib mataw dimdimunta ginol emim bo bo Sekaraya ago akamnib tiqiyiham. ³⁶ An ya helmo ne gibileaiq ham. God in mataw dimdimunta ginedan womta na amenin bunmo on mataw muran og kab osayta na gigo hib tiqemdaq ham.

*Yesus uliq Jerusalem anan anad meqniy
(Luk 13.34-35; 19.41-44)*

³⁷ Haqad Yesus bilam, O Jerusalem, Jerusalem ham. Ningo mataw God ago nantut ginol emayta ham. Ad God in ago gamuk kabibiy mataw negim giqeman ningi hib lehayta na gimalib in gig hunegayta ham. Kam kabemmo ya ningi on mataw gituwal emnan inad bilamta ham. Bilaqne kurek anengab in amidgotniz aben gayik ahaqenib gituwal emim giqisihqata nazaq ham. Ta teq ne hulosiy ham. ³⁸ Nazaq iyan ne hurity ham. God ne gigo uliq hulosan in ne gibenab useq teq timeqniydaq ham. ³⁹ Ya ne gibileaiq ham. Ne ya a ta hi ibiy daqay ham. Ari ne ginad dimniysa bilaq daqay, Mat ka Iyahta abinib

* 23:39: Buk Song 118.26

bolan i ginad bilaq gigayinaq haq daqayta kam nab teq ne a ta ibiy daqay ham.*

24

Yesus bilam, Tempel teq meqniyidaq ham (Mak 13.1-2; Luk 21.5-6)

¹ Ari Yesus Tempel hulosim lehsa in ago disaipel Tempel abitan aseseqta nagan Yesus isihunnan haqad agerab tuboliy. ² Bolim isihunsa teq Yesus in gigo gamuk amenin emim gibilan, Ne bit ko bunmo ahol waqay ye? ham. Gig ko bunmo teq wolzizilayeq gihunegid tuwoq bug daqay ham. Ya helmo bilaqaiq ham. Gig an amalib usayta ko teq muruwoqeqlar tigmo bug daqayta ham.

Yesus bilam, Afaqan kabemmo teq gwahtiqaq ham

(Mak 13.3-13; Luk 21.7-19)

³ Ari Yesus garah anan Oliv haqaytab ossa ago disaipel gimomo in ago hib bolim bilaqiy, Ni i gibilen haqiy. Kam gineh teq nagah ni anan bilamta na tugwahtiqaq? haqiy. Naga daqin diq ameb gwahtiqa i ahol waqad ginad emam, Ni muleqeqlar tubolnan haqam? haqiy. Ad i ginad emam, Og ka hiqiydaqta akaman tugwahatqaq haqam haqiy.

⁴ Haqan Yesus amenin emim bilam, Ne gihol waziy ham. Luweq mat araq ne kat negdaq ham. ⁵ Mataw kabemmo teq boleq ya inan biyad bilaq daqay, Yaqmo Krais haq daqay ham. Haqad in on mataw kabemmo kat neg daqay ham. ⁶ Sa mataw bab emsa ne gihulhan huritad teq ta mataw pesanta bab emsa ne gibin hurit daqaymo ham. Huritad ne ginad haresmo emad hi rabiy ham. Daq nagan nazaq tugwahtiqaq daqta ham. Ta teq kam abebtanta na teqmo ham. ⁷ Mataw en araq eraqeqlar saw araqabta nenaq an wol daqayta ham. Sa king araq ago dahu nenaq eraqeqlar king ta araq ago dahu nenaq an wol daqaymo ham. Uliq saw amo amo zarow ayahta gwahtiqa og ahol woldaqta ham. ⁸ Daq nagan bunmo bilaqne aw agemab amun tubaysa loyinaq nazaq nog iydaq ham.

⁹ Kam nab teq mataw ne giwazeq sanctity neggo haqad bab gibenab giqem daqay ham. Ad in ne ginol emid moq daqay ham. Ya ihol abin ne giholib usaqta na ago on mataw en bunmo gigem meqinta neg daqay ham. ¹⁰ Kam nab teq on mataw kabemmo in gigo ginad helmota na hulos daqay ham. Hulosad in an anan gigem meqniy daqay ham. Ad in gimaqbaban giwageq bab gibenab giqem daqay ham.

¹¹ Sa nantut katiyta kabemmo eraqeqlar on mataw kabemmo gikat neg daqay ham.

¹² Mataw kabemmo gunun dimdimunta itiyanad daq meqintabmo os daqay ham.

Daq meqinta kuluwmo gwahtiqaq ban waq bugsata mataw kabemmo an anan ginad bilaqta na adan hulos daqay ham.¹³ Ari mat aw nog in zaway diq iyeq ossa le in gigo kam abebtanta gwahtiqaqta nab God in gilumsiheq ta giwaqdaq ham.¹⁴ Mataw God ago maror agamukan dimunta ka og saw bunmo a leheq on mataw gibilen adan hulos daqay ham. Gibilenad in bilaq daqay, God ne gimen gamuk kazaq bilamta haq daqay ham. Haqad in on mataw og saw bunmo God ago gamuk gibilen bugid nab teq kam abebtanta na tugwahtiqaq ham.

Yesus bilam, Jerusalem teq meqniyidaq ham

(Mak 13.14-23; Luk 21.20-24)

¹⁵ Teq nagah meqin diqta uliq saw meqin tonaqta na in Tempel aduganib tursa ne ahol tuwaq daqay ham, kwaziqmo God ago nantut Daniel anan bilamta nazaq ham. (Mat gamuk ka ahol waqad bilaqta na in anad em hasad bilaq sireqan.) ¹⁶ Kam nab on mataw saw Judiya-ib os daqayta na in tukeq garah ban gwalehiy ham. ¹⁷ Ad mat bit ahuquqinban osnntab osdaqta na in ogib hitiqeq tukeq lehanmo ham. Lehad in ago es nagah bit aduganib usaqta na anadin emad hi giwaqan ham. ¹⁸ Teq mat kabiyyab luwdaqta na in ago aholsihen waqnan uliqab muleqeq ta hi lehanmo ham. ¹⁹ Kam nab on gigem iyayta na teq on amun muturta sus ugayta na in timeqniy daqay ham. ²⁰ Nazaq iyan ne God susumun ugid ne tuk daqayta akaman na in urom akamnib teq no gigo lotu akamnib hi gwahtiqaq ham.

²¹ Kam nab mataw afaqan ayah diqta tisor daqay ham. Kwaziqmo God og saw bunmo gigemim bo muranmo afaqan araq nazaqta a hi gwahtimta ham. Teq abeb afaqan araq nazaqta a ta hi gwahtiqaqdaqmo ham. ²² Ari God kam meqinta na siqim diq a hi emid on mataw bunmo tihiqiy bug nagiy ham. Teq God in ago on mataw in gilumim aholyon giwamta na ginadin emad in kam na emid siqim tiqiydaqta ham.

²³ Kam nab mat araq ne gibileneq bilaqdaq, "Ahol waqiy, Krais kawa osaq" o "Krais kowa osaq" haqsa ne in aqez na hikidik huritiy ham. ²⁴ Na ezaggo krais katiyta teq nantut katiyta kabemmo tugwahtiqaq daqay ham. Gwahtiqaq in daq azawayin inaq aseseqta gigemad in kabiylar ul araq diqta amo amo gigem daqay ham. In nazaq emad teq in God ago on mataw in gilumim aholyon giwamta na gihureqnan diq ton daqay ham. ²⁵ Ne ginad em hasiy ham. Daq nagan a hi gwahtiqa kawa ya ne tigibileneq ham.

²⁶ Nazaq iyan abeb in ne gibileneq bilaq daqay, Ahol waqiy, Krais saw amatawun haiqta nab osaq haqsa ne nazaq ban hi lehiy ham. Ad in gibileneq bilaq daqay, Ahol waqiy, Krais bit ka aduganib osaq haqsa ne giqez hi hurityimo ham.²⁷ Kaitab mewlig hikliyam anuwan zeq gwalaqta ban oyim le zeq wolehaqta banmo iyaqta ham. Teq Mat Atatin muleeqe qta boldaqtanab in nazaqmo diq tiquyidaqta ham.²⁸ In boldaqtanab in mataw gime titoneq a hi boldaq ham. Ne gamuk araq mataw bilaqad luwayta ka anadin emiy ham. In bilaqay, Karuw tumomta asan lilihim usaqta nabmo tigaw bolim humab wolay haqayta ham.

*Mat Atatin teq ta boldaq
(Mak 13.24-27; Luk 21.25-28)*

²⁹ Ari kam nab afagan ayahta na tihiqiyidmo,

Zeq ame romriq iysa kalam a ta hi oydaq ham.

Sa kaitab ulig milheseq ogib tuwoq daqay ham.

Woqsa nagah aseseqta zawayta ulilib usayta nagan in gihol tuwol daqaymo ham.

³⁰ Kam nab teq Mat Atatin ta boldaqtatowun kaitab tugwahtiqaq ham. Gwah-tiqid teq on mataw en bunmo ahol waqad in gaq wazad bilaq daqay, Mat na i giyon hazizir emnan bolaq haq daqay ham. Haqad in gaq wazad osad Mat Atatin kaitab onqas amalib oseq ago zaway teq ahol anuwan ayahta inaq bolsa in ahol tuwaq daqay ham.³¹ Ahol waqsa taur atoranmo gayonsa Mat Atatin in ago angelo giqemid in og saw bunmo lehad inmmo ago on mataw in gilumim aholyon giwaqan osayta na giwaqeq giwaqeq a lehad teq in tigiwaq bug daqay ham.

*Ay fik kam ulum kemaqta
(Mak 13.28-31; Luk 21.29-33)*

³² Haqqad Yesus bilam, Ay fik ago hib teq ne ginad tiqem has daqay ham. Ay na aben hur tonad atitoqin mututra gwahtiqa ne ahol waqad ginad emay, Zeq akaman tiquy-nanaq haqayta ham.³³ Nazaqmo teq abeb nagah ya anan bilayta ka bunmo tugwahtiqa ne ahol waqad ginad kazaq emiy ham. Nagah Yesus anan bilamta na bolim sinsin tiquy haqiy ham, bilaqne mat dan ezab turad bit aduganib gwahtiqa tonaaq nazaq haqiy ham.³⁴ Ya helmo ne gibileneq ham. On mataw muran kam kab osayta ka a hi moq bugsa dag nagan bunmo tugwahtiqaq ham.³⁵ Kait og inaq teq tihiqiyidaqta ham. Ari yaqgo gamuk ka a hi hihiqyidaq ham.

*Mat araq diq Yesus ta boldaqta na aka-man a hi hurit
(Mak 13.32-37; Luk 17.26-30, 34-36)*

³⁶ Ari teq Mat Atatin kam gineh diq ta boldaqta na teq in zeq adulan ganimtab bo gwahtiqaqta na mat araq a hi hurit ham. Angelo Heven-ib osayta na teq God Atatin inaqmo in kam na a hi hurityimo ham. God amomo kam na ago tuhurit ham.³⁷ Nowa akannib mataw daq em yaqayta nazaqmo Mat Atatin ta boldaqta na akannib in em daqaytamo ham.³⁸ Uq ayahita na a hi gwahtiqaqta on mataw didaq neqad yuw uluwad an waqad ossa le Nowa muc aduganib tugwahtim ham.³⁹ In ginad a hi emad ossamo uq ayahita na hitiqim on mataw na bunmo gisormi giqad lehim tigineq bug ham. An Mat Atatin ta boldaqta na akaman in nazaqmo diq iydaq ham.⁴⁰ Kam nab mataw giger leheq kabiyyab luw daqay ham. Luwsa in araq waqad araq in hulosid nab tiluwsa ham.⁴¹ Teq on giger mel emayaq ago banwit anagin wolworad os daqay ham. Ossa in araq waqad araq in hulosid nab tuqos-daq ham.⁴² Nazaq iyan ne gihol asawan woltayad osiy ham. Ne gigo lyahita kam gineh boldaqta na ago ne a hi hurityayta ham.

⁴³ Ne gamuk ka huriteq teq ginad em hasiy ham. Bit anamren in mat rin tonaqta naga kannib boldaqta na ago huriteq teq in ago bit wamuzeq saw waqad ossa mat rin tonaqta na bo bit wolzilayeq a hi gwah-tiqdaq ham.⁴⁴ Nazaq iyan ne gihol asawan woltayad osiy ham. Ne bilaq daqay, Mat Atatin a hi boldaq haq daqayta nabmo diq in bo tugwahtiqaq ham.

*Kabibiy mat dimunta teq kabibiy mat meqinta gigo gamuk awowun
(Luk 12.42-46)*

⁴⁵ Ari naga matin in kabibiy mat dimunta nog? ham. Kabibiy mat dimunta in anad em hasad ago ayahta aqez muzinaqta ham. Aqez muzinad in kabibiy mataw bunmo giwamuzad didaq neq akannib in didaq negaqa ham.⁴⁶ Abeb ago ayahta na boleq in kwaziqmo bilamta nazaqmo ago kabibiy mat na emsa in ahol waqsa in ago kabibiy mat na tidimniyeq osdaq ham.⁴⁷ Ya helmo ne gibileneq ham. Mat ayahta na in ago kabibiy mat dimunta na emid in ago nagah bunmo tigiwamuzdaq ham.

⁴⁸ Ari kabibiy mat meqinta na in ahol buloneq bilaqdaq, Yaggo ayahta lehim sisagmo tiluwaq haqdaq ham.⁴⁹ Haqqad in ayoginz nenaq araqibmo kabiyy emayaq na haresmo tiginoldaq ham. Ad in mataw yuw atoranta uluwayta na nenaq didaq neqad yuw tuquluw daqay ham.⁵⁰ In nazaq emad ossamo ago ayahta bolsa in a hi hurityadaq

ham. Ad in ahol asawan a hi wastitaydaq ham.⁵¹ Sa mat ayahta na boleq in kabibiy mat na wazeq woltitayeq teq in mataw gimileq meqinta na gigo sawab hunegid wo tilehd़aq ham. Saw nab mataw ginad meqniya gaqad gite guruwad osayta ham.

25

On barasta gigo gamuk awowun

¹ Kam abebtanta nab God ago maror in bilaqne mat araq aw waqnan tonsa on barasta 10 nazaq adanin lehiya nazaq nog iydaq ham. Mat aw waqdaqta na in ago bitab tubolad luw ham. Bolad luwsa in awe na ayogniz on barasta na gigo lam miderim adanin lehiy ham. In le danib ahol waqad teq inaq ta bolnan haqad ham. ² On na gilikmanib abaynagin in ginad haiqta ham. Teq abaynagin in ginad inaqta ham. ³ On ginad haiqta na in gigo lam waqim a bolad teq in wel lam-ub teneq mider daqayta na a hi waqiy ham. ⁴ Ari on ginad inaqta na wel botol-ib tenim teq in lam inaq waqim a boliy ham.

⁵ Teq mat aw waqdaqta na hidmo a hi bol ham. Nazaq iyan on na bunmo gime rursa tuqusiy ham. ⁶ Ussa tarom alihanib mat araq lileyim bilam, Mat aw waqdaqta na kowa tubolaq haqad in bilam ham. Ne eraeq leheq ahol waqad waqeinq inaq boliy haqad in bilam ham. ⁷ Haqan on barasta na bunmo eraqim in gigo lam waqim timideriy ham. ⁸ Sa on ginad haiqta na in on ginad inaqta na gibileniy, Ne wel asor igiy haqiy ham. I gigo lam wel hiqiyim miynan tonaq haqiy ham. ⁹ Haqan on ginad inaqta na bilaqiq, Wel ka ayah diq a hajq haqiy ham. Luweq i wel ka asor negid i gigo lam timiydaqmo haqiy ham. Nazaq iyan negmo leheq mataw gigo wel inaq na gigo hib asor ne giholyon zayiy haqiy ham.

¹⁰ Hagan on ginad haiqta na wel zaynan tilehsamo mat aw waqdaqta na tubol ham. Bolan on ginad inaqta na in mat na waqim inaq bit aduganib gwahti tilehiy ham. Lehim in gihol adanin otim mat aw waqaqta na inaq didaq neqad tuqosiy ham. ¹¹ Ossa on ginad haiqta na wel zayim muleqim ta bolim in dan ezab turad teq in dan ez wol hamad bilaq yaqay, Iyahta, Iyahta haq yaqay ham. Ni i giyon dan hasid i gwahtiquq haq yaqay ham. ¹² Haqsa mat na in gigo gamuk amenim emim bilam, Ya helmo ne gibilenaiq haqad in bilam ham. Ya ne gigo a hi huriq haqad in bilam ham. ¹³ Haqad Yesus bilam, Nazaq iyan ne gihol asawan woltayad osiy ham. Kam gineh teq zeq adulan ganimtab ya ta boldaiqta na ne a hi huriity ham.

*Kabibiy mataw mani waqiyta gigo gamuk awowun
(Luk 19.11-27)*

¹⁴ Ari Yesus gamuk awowun ta araq gibilenim bilam, Kam abebtanta nab God ago maror in bilaqne mat ayahta araq saw pesantab lehnhan haqad ago kabibiy mataw gibenab kabiy amta nazaq nog iydaq ham. Mat na in ago kabibiy mataw gibilenan bolan in ago nagah bunmo gibenab am ham. ¹⁵ Emad in ago kabibiy mataw gilum kemim kabiy negad in kabibiy mat araq ago zaway teq anad aayah diqta na 5,000 kina nazaq ug ham. Teq araq ago zaway teq anad aayah nogta na in 2,000 kina nazaq ug ham. Ugad araq ago zaway teq anad amik nogta na in 1,000 kina nazaq ug ham. In mani na negim gihulosadmo tilah ham. ¹⁶ Lehsa mat 5,000 kina wamta na hidmo mani na amalib kabiy emim in 5,000 kina araqmo a ta wam ham. ¹⁷ Sa mat 2,000 kina wamta na nazaqmo mani na amalib kabiy emim in 2,000 kina araqmo a ta wam ham. ¹⁸ Ta teq mat 1,000 kina wamta na lehim ogib yay tayim in ago ayahta mani ugta na tuqulilam ham.

¹⁹ An mat aayah na lehim sisaqmo osim teq in muleqim ta bol ham. Bolim in ago kabibiy mataw mani nagta na ago agamukan wastitaynan haqad in gimen nan eman in agerab tuboliy ham. ²⁰ Bolim mat 5,000 kina wamta na in ago ayahta na bulonim bilam, Mat aayah ham ni 5,000 kina yagta na kawa ahol waq haqad in bilam ham. Ya amalib kabiy emim amenin 5,000 kina-mo a ta way haqad in bilam ham. ²¹ Haqan in ago ayahta bulon, Esey ham. Ni ya inad usta na em bugim ni kabibiy mat dimun diq haqad in bilam ham. Ni nagah asitmo anonon diqmo tuwamuzan ya nagah kabemmo nigid ni tuwamuzdaq haqad in bilam ham. Ni bolid ya ninaq ginad dimniya osuq haqad in bilam ham.

²² An mat 2,000 kina wamta na in bolmo ham. Bolim in bilam, Mat aayah ham ni 2,000 kina yagta na kawa ahol waq haqad in bilam ham. Ya amalib kabiy emim 2,000 kina-mo a ta way haqad in bilam ham. ²³ Haqan in ago ayahta bulon, Esey ham. Ni ya inad usta na em bugim ni kabibiy mat dimun diq haqad in bilam ham. Ni nagah asitmo na anonon diqmo tuwamuzan ya nagah kabemmo nigid ni tuwamuzdaq haqad in bilam ham. Ni bolid ya ninaq ginad dimniya osuq haqad in bilam ham.

²⁴ Ari mat 1,000 kina wamta na tubolmo ham. Bolim in bilam, Mat aayah ham ya ningko tuhurit haqad in bilam ham. Ni mat afanta kamolmol a hi emaqta haqad in bilam ham. Didaq ni a hi layta na anon ni niholyon waqaqta haqad in bilam ham. Ad mat araq ago kabiyab wit anagin

hunagta nab ni niholyon wit na anon tuwal emaqta haqad in bilam ham. ²⁵ Nazaq iyan ya rabad ning 1,000 kina ka ulileman us haqad in bilam ham. Ning mani na kawa haqad in bilam ham. ²⁶ Haqan in ago ayahta amenin emim bulon, Ni kabibiy mat meqin haqad in bilam ham. Ya inad usta na ni a hi am haqad in bilam ham. Ni nabag yaqgo tuhurit haqad in bilam ham. Didaq ya a hi leyla na anon ya iholyon waqaipta haqad in bilam ham. Ad mat araq ago kabiyab wit anagin hunagta na ago wit anon ya iholyon tuwal emaiqta haqad in bilam ham. ²⁷ Nagaqgo ni mataw mani abitnib osayta na gibenab yaqgo mani eman in akabiyan a hi emiy haqad in bilam? ham. Emid teq ya mule-qeq boleq yaqgo gimeq na amenin mani ayahmo inaqmo waqnaga haqad in bilam ham.

²⁸ Haqad in bilam, Ne mat na abenab 1,000 kina in wazaqta na waqeq mat ago 10,000 kina inaqta na uguy haqad in bilam ham. ²⁹ Na ezaqgo ya on mataw gigo nagah inaqta na bunmo nagah asor a ta negdaiq haqad in bilam ham. Teq ya mataw ginaghan haiqta na gibenab nagah asitmo in wazayta na walem bugdaq haqad in bilam ham. ³⁰ Ad ne kabibiy mat meqintab na muzid in asanib saw aromriq inaqtab lehan haqad in bilam ham. Saw nab mataw ginad meqniysa gaqad gite guruwad os daqayta haqad in bilam ham.

Mat Atatin teq on mataw bunmo giluwiydaq

³¹ Ari Jesus bilam, Abeb teq Mat Atatin king ayahta iyeq ago balaw anuwan oysa in angelo bunmo nenaq tuboldaq ham. Boleq in ago ban tawontab tuqos woqdaq ham. ³² Os woqeq ossa teq on mataw en bunmo boleq in anognib humab tuwol daqay ham. Humab woleq tursa in gihuserid dahu giger tiqiy daqay ham. Bilaqne mat sipsip teq memeq gihuseran sipsip kazaq bolsa memeq kozaq lehaya nazaq nog iy daqay ham. ³³ In ago sipsip aben aqabun ban giqemad teq memeq in aben anasaran ban giqemdaq ham.

³⁴ Teq king na in on mataw aben aqabun ban turayta na gibileneq bilaqdaq. On mataw haqdaq ya imam anal dimun diqta tinegaq haqdaq ham. Ne boleq ya imam ago maror aduganib gwahtiqeq ban dimdimunta waqeq ago nagah giwamuzeq osiy haqdaq ham. Kwaziqmo ya imam og eman a hi gwahtiqsamo in ne gimen ban dimdimunta na tigiwastitayan usaqta haqdaq ham. Ya imam nazaq ne tigidimum tonnan haqdaq ham. ³⁵ Na ezaqgo kwaziqmo ya igemnan moqad ossa ne ya didaq yagiy haqdaq ham. Ya yuwnan moqsa ne

yuw yagan ya uluw haqdaq ham. Ya mat begbegta iyim bolan ne ya iwajim ilowan toniy haqdaq ham. ³⁶ Ya ibe aholmo luwsa ne tubusan yagiy haqdaq ham. Ya moqad ussa ne ya iwamuzad osiy haqdaq ham. Ya iqirqruran ossa ne bolim ya ibiyiy haqdaq ham.

³⁷ Haqid teq on mataw dimdimunta na in ago gamuk amenin emeq bilaq daqay, Iyahta haq daqay kam gineh ni nigemnan moqad ossa i nibiyad didaq nig? haq daqay ham. Teq kam gineh ni yuwnan moqsa i yuwnan ni uluw? haq daqay ham. ³⁸ Kam gineh ni mat begbegta iyim bolsa i ni niwaqim nilowan ton? haq daqay ham. Teq kam gineh ni nibe aholmo luwsa i tubusan nig? haq daqay ham. ³⁹ Kam gineh ni moqad ussa teq ni niqirqruran ossa i bolim ni nibiy? haq daqay ham.

⁴⁰ Haqid teq king na amenin emeq bilaqdaq, Ya helmo ne gibilenaiq haqdaq ham. Nagah bunmo ne ya isenlul araq abin haiqta ago hib emad na ne yaqgo hib emiymo haqdaq ham.

⁴¹ Haqad in on mataw anasaran ban tuyayta na kazaq gibilendaq ham. On mataw haqdaq ya imam ne kusluw tinag haqdaq ham. Ne tukeq dan ko muzeq faq oyad a hi miyaqta kob lehiy haqdaq ham. Faq na kwaziqmo Satan ago angelo nenaq gimen tiqeman usaqta haqdaq ham. ⁴² Na ezaqgo kwaziqmo ya igemnan moqad ossa ne didaq a hi yagiy haqdaq ham. Ya yuwnan moqsa ne yuwnan ni uluw? haq daqay ham. ⁴³ Ya mat begbegta iyim bolan ne ya iwajim ilowan a hi toniy haqdaq ham. Ya ibe aholmo luwsa ne tubusan a hi yagiy haqdaq ham. Ya moqad ussa teq ya iqirqruran ossa ne bolim ya a hi ibiyiy haqdaq ham.

⁴⁴ Haqid teq mataw na in ago gamuk amenin emeq bilaqdaq, Iyahta haq daqay kam gineh ni nigemnan moqsa teq ni yuwnan moqsa teq ni begbeg iyim bolsa teq ni nibe aholmo luwsa teq ni moqad ossa teq ni niqirqruran ossa i ni a hi nilumsih? haq daqay ham.

⁴⁵ Haqid teq in on mataw na gigo gamuk amenin emeq bilaqdaq, Ya helmo ne gibilenaiq haqdaq ham. Ne ya isenlul ka gigo araq abin haiqta ago hib nagah na a hi emim na ne yaqgo hib a hi emiymo haqdaq ham.

⁴⁶ Nazaq iyid on mataw na leheq santitiy waqad tuqos daqay ham. Osad tuteqmo in gisan titiyyaq ham. Sa on mataw dimdimunta na in God ago maror aduganib gwahtiqeq ginad dimniysa kuluwa-kuluwmo tuqos daqay ham.

**Yesus santitiy sorim moqim
teq ta eram**

26

Mataw marorta Yesus wol emid moqgo an adugan waziy

(Mak 14.1-2; Luk 22.1-2; Jon 11.45-53)

¹⁻² Yesus gamuk na bilaq bugan tihiqiyin in ago disaipel gibilan, Kam giger le tihiqiyid teq i gigo lotu akaman ayahtha anan Pasova haqay na tugwahtiqaq ham. Na ne tuhuritiy ham. Kam na gwahtiqid teq in Mat Atatin bab gibenab emid in ayib dom tuwol daqay ham.

³ Ari kam nab mataw tamaz emayta gigo aseseqta na giyogniz Juda gigo mataw marorta na nenaq in tamaz mat danmebta anan Kayafas haqayta na ago bitab humab tuwoliy. ⁴ Humab wolum in on mataw gime titoneq Yesus wazeq wol emid moqdaqta na agamukan tibilaq yaqay. ⁵ Admo in bilaqiy, I Pasova akamnib Yesus ulalabmo a hi wazam haqiy. Luweq on mataw biyahta na gigem meqniysa bab araq ayahta wazid eraqdaq haqiy.

Aw araq Yesus afaqnib masil ahuran dimunta wazbalan wom

(Mak 14.3-9; Jon 12.1-8)

⁶ Ari Yesus uliq Betaniy-ib mat araq kwaziqmo aholib moq lepra usim tihiqiyta anan Saimon haqayta na ago bitab os. ⁷ Ossa aw araq Yesus ago hib tubol. In kagoh araq amikta gig anan alabasta haqay na sisqim emiya nab in masil ahuran dimunta anawun ayahmota tenim teq in wazim a bol. A bolim Yesus banab ossa in masil na Yesus afaqnib wazbalan tuwom. ⁸ Anmo Yesus ago disaipel daq na ahol waqim in gigem meqniysa bilaqiy, Nagaqgo in masil dimunta ko abu ulumaq? haqiy. ⁹ Masil ko i mat araq inaq zayeq mani ayahmo waq nagta haqiy. Waqeq i mataw ginaghan haiqta na ne nenaq osayta ham. Ari ya nenaq tuteqmo a hi osdaiqta ham. ¹² Aw ka iholib masil wazbalta ka in ya ihol wastitayeq hodhodab iqemgo haqad in amta ham. ¹³ Ya helmo ne gibilenaiq ham. Mataw edobya leheq ya iwagamun dimunta bilaqad in aw ka daq amta ka awagamun tibilaq daqaymo ham. Bilaqsa mataw huritad teq in aw ka anadin tiqem daqay ham.

Judas in Yesus waqeq Juda gigo mataw marorta gibenab emgo bilam

(Mak 14.10-11; Luk 22.3-6)

¹⁴ Ari kam nab disaipel 12 na gigo araq anan Judas uliq Kariyot-ib haqayta na in mataw tamaz emayta gigo aseseqta gigo

hib tilah. ¹⁵ Lehim in gibilan, Ya Yesus ne gibenab emid teq ne naga diq yag daqay? ham. Haqan mataw na Yesus ayon banzaw emim in mani silva 30 nazaq Judas tuquqiy. ¹⁶ Ugan nab Judas in Yesus waqeq mataw na gibenab emdaqta adanteqin araq dimunta tinagunyaq.

Yesus ago disaipel nenaq Pasova abebtanta neqiy

(Mak 14.12-21; Luk 22.7-14, 21-23; Jon 13.21-30)

¹⁷ Ari bret yis haiqmo neqayta na akaman tugwahtim. Gwahtiqan disaipel Yesus ago hib bolim tisusumun ugiy, Ni ninad i bit edob leheq ninmen nagah wastitayid teq ni Pasova adidaqan neqdaq? haqiy. ¹⁸ Haqan in gibilan, Ne le uliq kob gwahatiqeq mat araq ahol waqad teq ne kazaq buloniy ham. Iyatha bilam, Yaqgo kam na bolim sinsin tiqiy haqiy ham. Yaqgo disaipel nenaq ningo bitab Pasova adidaqan neqnan haqad ne buloniy ham. ¹⁹ Haqan Yesus gibilanta nazaqmo in lehim Pasova adidaqan neqgo abanan tuwastitayi.

²⁰ Ari imisor diq tiqyan Yesus in ago disaipel 12 na nenaq didaq neqnan banab tuqos woqiy. ²¹ Os woqim osad in didaq neqadmo Yesus gibilenim bilam, Ya helmo ne gibilenaiq ham. Ne gilikmanib teq mat araq ya iwaqeq bab gibenab iqemdaq ham. ²² Haqan disaipel gihol afaqan diq iysa in amulik-mulikmo Yesus susumun ugad bilaq yaqay, Iyatha yaqmo ye? haq yaqay. ²³ Haqsa Yesus amenin emim gibilan, Mat ya inaq degib aben eman womtanaqmo teq ya iwaqeq bab gibenab iqemdaqta ham. ²⁴ God ago mar Mat Atatin anan bilamta nazaqmo diq in dan muzeq tilehdajta ham. Teq mat in Mat Atatin bab gibenab emdaqta na timeqniy hasdaq ham. Mat na anen a hi em nagta in am ham. ²⁵ Haqan Judas mat Yesus waqeq bab gibenab emdaqta na bilam, Iyatha yaqmo ye? ham. Haqan Yesus bulon, Ninmo nawa tibilam ham.

Yesus in ago disaipel bret teq wain ayun inaq nag

(Mak 14.22-26; Luk 22.15-20; 1 Korin 11.23-25)

²⁶ Ari in didaq neqad osad Yesus bret asor waqim God esey ugim in orqayim ago disaipel negad gibilan, Ne bret ka waqeq neqiy ham. Ka ya inon ham.

²⁷ Haqad in wain agogin inaq waqim God esey ugim teq in negad gibilan, Ne bunmo ka waqeq uluwiy ham. ²⁸ Ka ya inedan God ago maror muturta na zaway ugdaqta ham. Ya ned ka on mataw kabemmo gigo daq meqinta giwalemgo wazbaldaqta ham. ²⁹ Ya ne gibilenaiq ham. Ya wain ayun ka a ta hi uluwdaq ham. Abet ya nenaq ya

imam ago maror muturta aduganib osad teq ya wain ayun ka a ta uluwdaiq ham.

³⁰ Admo in bunmo lotu ago bar araq wazim hulosadmo in uliq hulosim garah Oliv-ub tilehiy.

*Yesus bilam, Pita teq gileh yagdaq ham
(Mak 14.27-31; Luk 22.31-34; Jon 13.36-38)*

³¹ Ari Yesus in ago disaipel nenaq lehad gibilan, Tarom kab ya iholib afaqan araq meqin diq gwahtiqa ne bunmo ya ibiyad ne ginad ya inan helmo haqayta na hulosad gileh tiyag daqay ham. Na ezaqgo God ago marib gamuk araq kazaq bilam ham.

Ya mat sipsip giwamuzaqta na wol emsa in ago sipsip haresmo tukeq tileh daqay haqad in bilam ham. *Sekaraya 13.7*

³² Ari ya hodhodab eraeqeq teq ya ameb saw Galiliy-ib tilehdaiq ham.

³³ Haqan Pita gamuk na amenin enim bilam, Mataw ka bunmo in ni afaqan waqsa nibiyad in ginad helta hulosad gileh nigsya ya haiq ham. Ya ni ninan helmo haqaiqta na hulosad gileh a hi nigdaiq ham. ³⁴ Haqan Yesus bulon, Ya helmo nibilnaiq ham. Tarom kab kurek a hi gayonsamo ni nome ezeqmanmo gileh tiyagdaq ham. ³⁵ Haqan Pita bilam, Haiq ham. Mataw ya ninaq ginol emnan bilaqsa ya gileh a hi nigdaiq ham. Hikidik ham. Haqan disaipel bunmo nazaqmo bilaqiy.

*Yesus og Getsemaniyy-ib God inaq gamuk am
(Mak 14.32-42; Luk 22.39-46)*

³⁶ Ari Yesus ago disaipel nenaq og araq awaqan dimunta anan Getsemaniyy haqaytab tilehiy. Lehim in ago disaipel gibilan, Ne kab osiysa ya kob leheq God inaq gamuk emnan ham. ³⁷ Haqadmo in Pita teq Sebediy atatniz giger na giwajim nenaq tilah. Lehad in ahol afaqan iysa ahol meqin diq tiloyinyaq. ³⁸ Ad in gibilan, Ya ihol afaqan diq iysa tumoqnan tonaiq ham. Ya nenaq kab saw waqad osuq ham. ³⁹ Haqad in gihulosim asitmo ta leh nog iyim in anobun ban woqim usad God buloneq bilaqyaq, Ya imam haqyaq ya iholib afaqan ayahta ka aban emdaiqu adanteqin ussun teq ni ya iqisihun haqyaq. Ari ni ninad nazaq a hi usid teq ni ya inad ka hi muz haqyaq. Nimmo ninad muz haqyaq.

⁴⁰ Haqad in eraqim ago disaipel ezeqman na gigo hib muleqim ta lehim in ussa gibiy. Gibiyad in Pita bulon, Ezaq? ham. Ne asitmo ya nenaq saw waqad a hi osam e? ham. ⁴¹ Ne saw waqad God inaq gamuk emad osiy ham. Gamuk emad daq ne gilum waqdaqta na bo giholib gwahtiqa ne hi woqgo haqad buloniq ham. Helmo ne ya

inad muznan ginad bilaqqaqta teq ne gihol awaz meqin haiq ham.

⁴² Haqad in ame gigerta lehim God inaq gamuk emim bilam, Ya imam ham. Afagan ka ya iban a hi emid ari ni ninad usaq naqmo ya iholib gwahtiqaq ham. ⁴³ Haqad in muleqim ta lehim disaipel ezeqman na gime rursa ussa in gibiy.

⁴⁴ Gibiyad gihulosim ta lehim ame ezeqmantia in God inaq gamuk a ta am. Teko in gamuk bilamta nazaqmo in a ta bilaqton. ⁴⁵ Bilaqim tihiqiyen in disaipel gigo hib ta lehim gibilan, Ne ginamur emad us tutay ye? ham. Ahol waqiy ham. Muran in Mat Atatin waqeq mataw meqinta gibenab emdaqta na akaman tigiy ham. ⁴⁶ Ne eraqiyas i lehuq ham. Ahol waqiy ham. Mat ya iwaeqeq bab gibenab iqemdaqta na bo tugwahtim ham.

*Judas Yesus waqim bab gibenab am
(Mak 14.43-50; Luk 22.47-53; Jon 18.3-12)*

⁴⁷ Ari Yesus nazaq gamuk bilaqad tur-samo disaipel 12 na gigo araq anan Judas haqay na tubol. Bolsa mataw dahu biyatha baqir sebur wazim ad Judas inaq boliyimo. Mataw tamaz emayta gigo aseseqta na teq Juda gigo mataw marorta na in bab mataw na giteman bolitya. ⁴⁸ Ari mat Yesus bab gibenab emdaqta na in naga daqin emid in Yesus ahol waqad waz daqayta na ago in teko tigibilanta. In bilam, Ya leheq mat nog ya wazeq ilawundaiqta naqmo ne waziy ham. ⁴⁹ Nazaq iyan in hid naqmo Yesus ago hib loqimmo tibilam, Iyatha ham tarom dimun ham. Haqadmo in tiqilawun.

⁵⁰ Ilawunan Yesus bulon, Kadoy ham ni nagah emnan bolta na ni hidmo em ham. Haqsmo mataw na eraqim Yesus tuwaziy. ⁵¹ Wazsamo mataw Yesus inaq turiyta na gigo araq ago baqir hureq hasim wam. Waqim in tamaz mat danmepta ago kabibiy mat araq wolim adeksanmo qwatayan ogib tuwom. ⁵² Anmo Yesus bulon, Ninga baqir asanib ta sihen ham. Mataw baqirib an wolayta na baqiribmo tumoq daqayta ham. ⁵³ Ni a hi hurit daqayta ham. Ya imam susumun ugid in angelo kabemmo diq tiyagdaq ham. Angelo na ginulingqan in mataw bab emayta gidauhan 12 nazaq giturayam daqayta ham. ⁵⁴ Ta teq ya daq nazaq emeq ya God ago gamuk a hi wol net bugdaiq ham. Daq kagan bunmo ya iholib gwahtiqaqta aga-mukan God ago marib mar tonan usaqta ham.

⁵⁵ Haqadmo in mataw biyatha na gibilan, Ne baqir sebur wazim a bolitya ka ne mat rin tonaqta waznan boliy ye? ham. Kam kabemmo ya on mataw suleq negad Tempel-ib ossa ne ya a hi iwaziy ham.

⁵⁶ Teq daq ka bunmo agamukan God ago nantut mar tonan usaqta nazaqmo in ya iholib tugwahtiq bugaq ham. In nazaq haqanmo disaipel bunmo Yesus hulosim titukiy.

Mataw aseseqta Yesus amalib nan kabemmo emiy
(Mak 14.53-65; Luk 22.54-55, 63-71; Jon 18.13-14, 19-24)

⁵⁷ Ari mataw Yesus waziya na in waqim ad tamaz mat danmebta Kayafas ago hib tiliehiy. Bit nab mataw Moses ago gunun hurit kemiya na teq Juda gigo mataw marorta na in tekomo bo humab tuwolim osiyta. ⁵⁸ Teq mataw Yesus wazim a lehsa Pita in Yesus muzim lehad teq in pesan nog lehyaq. In lehim tamaz mat danmebta na ago bit aghelin aduganiib le gwahtiqaq in mataw Tempel-ib hurmey gan turayta na nenaq tuqos, in nagah teq gwahtiqaqta na ahol waggo haqad.

⁵⁹ Ari mataw tamaz emayta gigo aseseqta na teq Juda gigo kaunsel ayahta na amatawun bunmo in mat araq Yesus ago hib nan katiya bilaqid teq in wol emid moqgo na tinagun yaqay. ⁶⁰ Sa mataw kabemmo gwahtiqaq Yesus amalib nan katiya em yaqay. Ta teq mataw aseseqta na in gamuk araq amalib Yesus wol em daqayta na a hi hurit yaqay. Sa abeb diq mataw giger tugwahtiqaq. ⁶¹ Gwahtiqaq in bilaqiy, Mat ka bilam, Ya God ago Tempel wol inereq kam ezeqmanmo aduganiib ya wazid a ta eraqdaq haqad in bilamta haqiy.

⁶² Haqan tamaz mat danmebta na eraqim turad in Yesus bulon, Mataw ni ninan gamuk bilaqayta ka in ezaq diq? ham. Ni gamuk na araq amenin a hi emdaq e? ham. ⁶³ Haqan teq haiq. Yesus aqezmo hiqiyim tur. Sa tamaz mat danmebta na bulon, God kayeqmo osaqta na nibiysa ni hel diqtaqmo bilaq ham. Mat anan Krais haqayta na amatin nimmo ye? ham. Ni God atatin e? ham. ⁶⁴ Haqan Yesus bulon, Ninmo nawa tibilam ham. Ta teq ya ne gibileniq ham. Muran teq abeb Mat Atatin in God Awaz Meqin Digtta aben aqabun ban ossa ne ahol tuwaq daqay ham. Ahol waqsa in kaitab onqas amalib oseq bolsa ne ahol tuwaq daqaymo ham.

⁶⁵ Yesus nazaq bilaqanmo tamaz mat danmebta na era inmo aholib tubusan bulsireqim bilam, Mat ka God tibilawun ham. Mat araq in ayon nan araq ta hi bilaqan ham. In kawaqmo God bilawunum gamuk bilaqsa ne tuhurity ham. ⁶⁶ Ne in ago daq na ulum kemim ginad ezaq emay? ham. Haqan mataw na bilaqiy, Mat daq nazaq amta na in moq nagta haqiy. ⁶⁷⁻⁶⁸ Haqad in Yesus anobun kusluw ugad tuwol yaqay. Wolad asor amanmanan

wolad bulon yaqay, Ni ninan Krais haqayta ye? haq yaqay. Ni God ago nantut iyeq teq ni i gibilen haq yaqay. Nog diq kawa ninolaqta ka ni anan biysa i hurituq haq yaqay.

Pita Yesus gileh ug
(Mak 14.66-72; Luk 22.56-62; Jon 18.15-18, 25-27)

⁶⁹ Ari Pita asanib bit aqezab os. Ossa kabibiy aw araq in agerab loqim bilam, Ni inaqmo Yesus saw Galiliy-ibta na inaq osta ham. ⁷⁰ Haqan Pita mataw bunmo gimeb bilam, Haiqgam ham. Ya ni gamuk bilaqqaqta na inad a hi emaiq ham.

⁷¹ Haqad in lehim bit na agelin ago dan ezab tur. Tursa aw ta araq Pita ahol waqadmo in on mataw nab osiyta na gibilan, Mat ka in Yesus uliq Nasaret-ibta na inaq osta ham. ⁷² Haqan Pita ahol uilemim bilam, God Uilibita ibiysa ya helmo bilaqaiq ham. Ya mat na ago a hi huritta ham.

⁷³ Abet mataw nab turiyta na Pita agerab loqim buloni, Hel diqtaqmo haqiy. Ni mataw ko gigo araq haqiy. I ni niziyan alulin tuhurit kem haqiy. ⁷⁴ Haqan Pita bilam, God Uilibita ibiysa ya bilaqaiq ham. Ya mat na ago a hi huritta haqaiq ham. Ya helmo a hi haqid teq God ya inol eman ham. Haqanmo kurek tigayon. ⁷⁵ Gayonanmo Pita in Yesus gamuk bilamta na anadin tiqam. Yesus bilam, Kurek a hi gayonsamo ni nime ezeqmanmo gileh tiyagdaq ham. Pita gamuk na anadin emad in asan ban lehim gaq naqmo diq hiqiy.

27

Mataw Yesus wazim ad Pailat ago hib lehiy

(Mak 15.1; Luk 23.1-2; Jon 18.28-32)

¹ Ari saw tihastitayan mataw tamaz emayta gigo aseseqta na teq Juda gigo mataw marorta na bunmo in Yesus ayon dan emid Rom mataw in wol emid moqdaqta na ago in bilaqim teq in an adugan tuwaziy. ² An adugan wazim teq in Yesus irqurim wazim ad lehim Rom gigo maror saw Judiya wamuzim osta anan Pailat haqay na tuquqiy.

Judas mom
(Aposel 1.18-19)

³ Ari Judas mat Yesus bab gibenab amta na in mataw Yesus ayon hazizir emim anan bilaqiy, In moqan haqsa in tigibiy. Gibiyim in anad ta buliyim mani silva 30 na waqim ad mataw tamaz emayta gigo aseseqta na giyogniz mataw marorta na nenaq gigo hib a ta lah. ⁴ A lehim in gibilan, Ya daq meqinta tiqem ham. Ya mat dimunta bab gibenab eman in tumoqdaq ham. Haqan mataw aseseqta na buloni, Ni i gigo nagah

a haiq haqiy. Na ninmo ningo nagah haqiy. ⁵ Haqan Judas Tempel aqezab mani silva na hunegad in lehim amub yuk tonim inmo ahol anatguman hihiqim tumom.

⁶ Ari mataw tamaz emayta gigo aseseqta na in mani silva na waqim bilaqiy. Mani ka mat anedan anawunta haqiy. ⁷ Tempel-ib mani usaqta na inaq wastoneq na i gunun tiqityonam haqiy. ⁷ Haqad in an bulonim teq in mani na amalib og araq zayiy. Og na kwaziqmo mataw reb emayta na leheq og soskaq waq yaqayta asawun. Mataw aseseqta og na zayid in mataw Jerusalembul bolim begbeg osim moqayta gimen hod-hod iydaqta haqad in zayiyya. ⁸ Nazaq iyan mataw og na anan Ned Aqogin bilaqad luwim bo muran in bilaq tutayta. ⁹ Daq nazaq gwahtiqim kwaziqmo God in ago nantut Jeremaya aqezab gamuk bilamta na in tuwol net bug. Gamuk na bilam,

Isrel on mataw in mat na zaynan haqad in mani silva 30 nazaq anan bilaqiyta ham. Bilaqim in mat na zayim amenin nazaqmo tuwaqiy ham. ¹⁰ In mani na waqim a le mataw reb emayta na aqogin tizayiy ham. Iyatha ibilanta nazaqmo in emiy ham. *Jeremaya 32.6-9*

*Pailat Yesus susumun ug
(Mak 15.2-5; Luk 23.3-5; Jon 18.33-38)*

¹¹ Ari mataw Yesus wazim a lehim Pailat ameb eman tursa Pailat tisusumun ug. Ni Juda on mataw gigo king e? ham. Haqan Yesus bilam, Ninmo nawa tibilam ham. ¹² Haqan mataw tamaz emayta gigo aseseqta na teq Juda gigo mataw marorta na in Yesus amalib nab kabemmo em yaqay. Emsa teq Yesus gamuk araq amenin a hi emyaq. ¹³ Nazaq iyan Pailat bulon, Ni gamuk nimalib emayta ko a hi huritaq e? ham. ¹⁴ Haqan teq haiq. Yesus in Pailat ago gamuk amenin a hi emad in mataw nab kabemmo ug yaqayta na gigo gamuk araq diq amenin a hi bilammo. Nazaq iyan Pailat anadnad diq emyaq.

*Pailat bilam, Yesus ayib dom woliy ham
(Mak 15.6-15; Luk 23.13-25; Jon 18.38-19.16)*

¹⁵ Ari ulig bunmo Juda gigo lotu aka-man ayahta nab Pailat bit qiqirquran osayta nab mat araq hasid gwahtiqyaqta. Juda on mataw in mat araq anan bilaqid Pailat naqmo hasid in gigo hib lehyaqta. ¹⁶ Ari kam nab mat araq meqin diqta anan Barabas haqayta na irquran os. ¹⁷ Ossa on mataw bo humah tuwolim ossa Pailat gibilan, Ya nog diq hasid ne gigo hib lehgo ne ginad usaq? ham. Ya Barabas hasdaiq o haiq, ya Yesus, mataw anan Krais haqayta na has negdaiq? ham. ¹⁸ Na ezaqgo Pailat

anad tiqam, Yesus in Juda gigo mataw aseseqta na gibayan woqiyta na ago in gigem meqniysa amalib nan emay ham.

¹⁹ Ari Pailat in ago ban in mataw gigo afaqan huritim gilum kemaqta nab osad gamuk bilaqsa awe inmen nantut araq kazaq eman bolan in hurit. Ni mat titnonta na ago hib daq araq hi em ham. Taromab ya in asen an qwayim ya ihol afaqan diq iyaq ham.

²⁰ Ari mataw tamaz emayta gigo aseseqta na giyogniz mataw marorta na nenaq in gigo walmataw gamuk awaz meqinta gibilenad in ginad tubuliyyi. Ginad builiyan mataw biyatha na in Barabas hasad Yesus wol emid moqgo haqad Pailat tubulon yaqay. ²¹ Bulonsa Pailat a ta gibilan, Ya mataw giger ka gilikmanib nog diq hasid gwahtiqeq samanmo tiluwdaq? ham. Haqan in bilaqiy, Barabas haqiy. ²² Haqsa Pailat gibilan, Nazaq na teq ya Yesus mataw anan Krais haqayta ka ezaq ton ugdaiq? ham. Haqan mataw na bunmo bilaqiy, Ayib dom woliy haqiy. ²³ Haqan Pailat bilam, Nagaqgo? ham. Mat ka naga daqin meqinta am? ham. Haqsa teq haiq. Mataw na dedibmo lileyim a ta bilaq toniy, Ayib dom wolid moqan haqiy.

²⁴ Sa Pailat ago gamuk loyinan in amomiy. On mataw na in anad a hi muzad in bab ayahta wazid tiqeraqnan tonyaq. Nazaq iyan Pailat in on mataw bunmo gimeb yuw waqim aben suholad bilam, Mat ka anedan woqid na yaqgo afaqan a haiq ham. Na negmo gigo afaqan ham. ²⁵ Haqan on mataw na bunmo amenin emim bilaqiy, Afaqan ka i gigo hib teq i gigo onmin gigo hib tuboldaq haqiy. ²⁶ Nazaq iyan Pailat in Barabas hasan mataw gigo hib tilah. Lehsa in ago mataw gibilenan in warig waqim hiklaquwim amalib Yesus tuwoltayiy. Woltitayim hulosan Pailat Yesus ayib dom wolgo haqad ago mataw bab emayta na gibenab tiqam.

Rom gigo mataw bab emayta na Yesus bilawuniy

(Mak 15.16-20; Jon 19.2-3)

²⁷ Ari Pailat ago mataw bab emayta na in Yesus waqim ad le Pailat ago bit aduganib tugwahtiqiy. Gwahtiqim in giyogniz bunmo gibilenan bolim in Yesus lilut ugim turiy. ²⁸ Turad in Yesus ago tubusan hasad teq in tubusan araq sisqa kakaqta amalib ahol tiqisihiy. ²⁹ Isihim teq in am asasuqin inaqta tal tonim king ago balaw nogta afaqniib emiy. Ad in tuqir araq gwatuq nog haqad aben aqabniib emim teq in anognib gibakbakan ulum laquwim turad in bilawunim bulon yaqay, Mat ayah haq yaqay. Ni Juda gigo king-mo diq haq yaqay. ³⁰ Haqad in kusluw ugad teq in tuqir

abenab waqim afaqin wol yaqay. ³¹ Mataw na Yesus bilawunim hulosadmo in tubusan sisacqa na hasim waqad inmo ago tubusan na aholib ta em ugim teq in ayib dom wolnan haqad waqim ad tilehiy.

Mataw Yesus ayib dom woliy
(Mak 15.21-32; Luk 23.26-43; Jon 19.17-27)

³² Ari in Yesus waqim ad tilehad teq in mat araq uliq Sairin-ibta anan Saimon haqayta ahol tuwaqiy. Ahol waqad in mat na Yesus ago ay sorgo haqad abe yahan in ay na sorim ad mataw na nenaq tilehiy. ³³ Lehim in garah akululqan araq anan Golgota haqaytab tugwahtiqiy. Gamuk Golgota na alulin in ‘Gifaqin Agolgolan’ haqayta. ³⁴ In saw nab gwahtiqimmo bab mataw na wain ayun teq masil araq agon meqinta anan gal haqayta inaq buliyim Yesus uluwgo haqad ugiy. Ugan in uluw waqim teq in hulosim a ta hi uluw bug.

³⁵ An bab mataw na Yesus ayib dom tuwolim teq in gig amikmikta hunegad Yesus ago tubusan nagan iberim giholyon tuwaqiy. ³⁶ Waqim teq in saw nabmo os woqim Yesus wamuzim tuqosi. ³⁷ Ad Yesus naga daqin eman in ayib dom woliyta na ananin mar tonim afaqniib ulilib tuqotheni. Gamuk na in kazaq mar toniy.

Ka Juda gigo king Yesus

³⁸ Ad teq in Yesus agerab mataw rin tonayta gigermo ayib dom giwoliymo. Dom wolani araq Yesus aben aqabun ban tursa araq aben anasaran ban turyaq. ³⁹⁻⁴⁰ Sa on mataw bo lehad in Yesus ahol waqad bilawun yaqay. Bilawunad gifaqin lelad teq in bilaq yaqay, Mat Tempel wol inereq kam ezeqmanmo aduganib wazid a ta eraqdaqta na amatin ninmo haq yaqay. Nazaq iyan ni niwaz meqniyeq ninmo nihol ulumsih haq yaqay. Ni God atatin iyeq teq ni ay na huloseq gehitiq haq yaqay.

⁴¹⁻⁴² Sa mataw tamaz emayta gigo asesepta na teq mataw Moses ago gunun hurit kemiya na teq Juda gigo mataw marorta nagan in nazaqmo Yesus bilawuneq bilaq yaqay, In mataw asor gilumisihan a hi moqiyta haq yaqay. Ta teq inmo ahol ulumsih ago zaway haitqa haq yaqay. In Isrel gigo king daqag haq yaqay. Nazaq iyan in ay huloseq gehitiqan haq yaqay. Gehitiqid teq i anan helmo tihaqam haq yaqay. ⁴³ Mat ko bilam, Ya God atatin hamta haq yaqay. God teq tigilumsihdaq hamta haq yaqay. Ari God in mat ko anan anad bilaqid teq in ulumsihid hi moqan haq yaqay. ⁴⁴ Sa mataw giger girin inaqtta Yesus agerab ayib dom woliyta na in nazaqmo Yesus bilawun yaqaymo.

Yesus mom
(Mak 15.33-41; Luk 23.44-49; Jon 19.28-30)

⁴⁵ Ari zeq gabolim liqabmo tiquysa saw bunmo romriq iyad le 3 kilok imisor tiqiy. ⁴⁶ Ad 3 kilok imisor nazaq tiquyanmo Yesus dedibmo lileyim bilam, *Eli Eli lama sabaktany?* ham. Gamuk na in kazaq bilam, Yaqgo God Yaqgo God nagaqgo ni ya ihulosaq? ham. ⁴⁷ Haqanmo mataw asor nab turiyta na in Yesus aqez huritim bilaqiy, Ko Elaija lilewunaq haqiy. ⁴⁸ Sa hid naqmo in gigo araq sibim lehim tubusandek waqim tuqir amotniib am wazim teq in wain ayun agon iytta ulum turim Yesus ateb tiqam, in sisowdaq haqad. ⁴⁹ Samo mataw ta asor bilaqiy, Hulossa i ahol wagad teq haqiy. Elaija boleq ulumsihdaq o haiq? haqiy. ⁵⁰ Haqanmo Yesus dedibmo a ta lileyimmo tumom.

⁵¹ Moqanmo tubusan ayahta Tempel-ib othenan usta na ulilib liqabmo tartayim giger iyim bo ogibmo tuwom. Woqsmo og ahol wolsa gig asesepta timizilayimo. ⁵² Sa mataw moqiyta gigo hodhod gizez hassa God in ago on mataw tawonta kwaziqmo tumoqiyta na kabemmo giwazan tiqueriqiy. ⁵³ Eraqim abeb Yesus ta eraqan teq on mataw na hodhod hulosim le God ago uliq tawonta Jerusalem-ub gwahtiqsa mataw kabemmo tigibiyi. ⁵⁴ Ari bab mataw Yesus wamuzim osiyta na gigo ayahta inaq in daq nagan gwahtiqsa ahol waqad teq og ahol wolsa in loyinad in gihol rab naqmo diq hiqiy yaqay. Ad in bilaqiy, Helmo diq haqiy mat ko in God atatin haqiy.

⁵⁵ Sa on kabemmo pesanmo nog turad teq in nagah na ahol waqad turiy. On na Galiliy hulosim Yesus muzim inaq bolad in ulumsih yaqayta. ⁵⁶ In gilikmanib Mariya uliq Magdala-ibta na teq Jems ayow Josep inaq ginен anan Mariya haqayta na teq Sebediy atatniz giger na ginен in nab turiy.

Yesus moqan asan hodhodab a lehiy
(Mak 15.42-47; Luk 23.50-55; Jon 19.38-42)

⁵⁷ Ari imisor tiquyan uliq Arimatea-ib mat araq ago mani kabemota na tubol. In anan Josep haqayta. Teq in inaqmo Yesus anan helmo hamta amatin araq. ⁵⁸ In bo Pailat ago hib gwahtiqim in Yesus asan waqeъ a le yay tongo tisusumun ug. An Pailat in ago mataw bab emayta gibilenan in Yesus asan waqim Josep tuqugiy. ⁵⁹ Ugan in Yesus asan waqim tubusan husta anumlan haitqa amalib tigil ton. ⁶⁰ Il tonim in sorim a le inmo ago hodhod muturta na aduganib tiqam. Hodhod na in gig qwayim amta. Nab in Yesus asan emad teq in gig araq ayahta otbuliyim a le hodhod aqez ituqimmo in tilah. ⁶¹ Lehsa Mariya uliq

Magdala-ibta na ayow Mariya araq na inaq in giger hodhod ago dan ezab pesan nog tuqosiy.

Mataw bab emayta asor Yesus ago hodhod wamuzim osiy

⁶² Ari Juda gigo lotu ayon nagah wastiaytaya akaman na tihiqiy. Hiqiyan Juda gigo lotu akaman diq na tugwahtiqaq nab mataw tamaz emayta gigo aseseqta na giyogniz Farisi nenaq in le Pailat ago hib humab tuwoliy. ⁶³ Humab wolim in bilaqiy. Mat ayah haqiy mat akatiynaqta na osad in gamuk araq bilamta na i anadin emauq haqiy. In bilam, Kam ezeqmanmo tihiqiyid ya ta eraqdaiq hamta haqiy. ⁶⁴ Nazaq iyan ni bab mataw asor giqemid leheq in hodhod na wamuz naqmo diq hiqiysa le kam ezeqmanta nabmo iyan haqiy. Luweq mat na ago disaipel boleq asan rin toneq teq in on mataw gibilen daqay. In hodhodab tigeram haq daqay haqiy. In on mataw nazaq kat negid luweq on mataw bunmo mat akatiynaq na anan helmo haq daqay haqiy. Ad nan katyi abebta na in nan katyi kwaziqta na uriyamdaq haqiy. ⁶⁵ Haqan Pailat bilam, Ya bab mataw asor giqemid tileh daqay ham. Lehsa ne nenaqmo leheq gibilenid in mat momta na ago disaipel gitawanana osiy ham. ⁶⁶ Haqan mataw aseseqta na in bab mataw asor nenaq hodhodab lehim gig ayahta nab Pailat ananib tarin emim teq in bab mataw na giqeman in hodhod wamuzim tuqosiy.

28

Yesus hodhodab eram

(Mak 16.1-10; Luk 24.1-10; Jon 20.1-18)

¹ Ari Juda gigo lotu akaman tihiqiyan Sande tarommo saw tihaftitaynan tonsa Mariya uliq Magdala-ibta na ayow Mariya araq na inaq na hodhod ahol waqnan tilehiy. ²⁻³ Lehsa Iyatha ago angelo araq Heven hulosim bo ogib hitiqim in gig hodhod aqezab usta na otbuliyan lehan teq in gwalim amalib tuqos. Angelo na ahol awaqtan bilaqne mewlig hikliyanaqta nazaq nog iyyaq. Sa ago tubusan in hus didiq bilaqne onqas ahus gan nog. In gehitiqim nazaq emsamo kanawrigrig araq ayahta tsib. ⁴ Sibsa mataw bab emayta na in angelo na ahol waqad in rabunad gibensen harara nemsa in mataw moqiyta nogmo tiqiyi.

⁵ An teq angelo na in on giger na gibilan, Ne hi rabi ham. Ne Yesus mat ayib dom woliyta na nagunum boliyta na ya tuhurit ham. ⁶ Na in kab haiq ham. In tigeram ham. Kwaziqmo in bilamta nazaqmo ham. Ne giger boleq in usta asawan ka ahol waqiy ham. ⁷ Ahol waqad teq ne hidmo

leheq in ago disaipel gibileniy ham. Gibilenad ne kazaq bilaqiy ham. God Yesus hodhodab wazan tigeram haqiy ham. Er-raqim in ameb Galiliy-ib tilehaq haqiy ham. Nab teq ne in ahol tuwaq daqay haqad ne gibileniy ham. Ari yaqgo nan nawaqmo ham. Ya ne tigibilem ham.

⁸ Ari on giger na rabad teq in ginad tidimniyaqmo. Ginad dimniysa in hodhod hulosad Yesus ago disaipel gibilenan sibim tilehiy. ⁹ Lehsamo danib Yesus on giger na gibiyad in "Tarommo dimun" nag. Negan on giger na agerab loqim asen wazim ayon lotu tiqemiy.

¹⁰ Samo Yesus gibilenim bilam, Ne hi rabi ham. Ne giger leheq ya imaginiz gibilenid in Galiliy-ib lehiy ham. Nab teq in ya tiqibiy daqay ham.

Maror aseseqta Yesus hodhodab eramta na abin ulilemiy

¹¹ On giger na danib lehad luwsa bab mataw disaipel gitawanana osiyta na gigo asor uliq aduganib gwahtiqaq tilehiy. Lehim nagah bunmo gwahtimta na ago in mataw tamaz emayta gigo aseseqta na tigibileniy. ¹² Gibilenan tamaz mataw aseseqta na in Juda gigo mataw marorta na nenaq humab wolim in gamuk emim an adugan tuwaziy. An adugan wazim in bab mataw na mani kabemmo negiy. ¹³ Negad in gibileniy, Ne kazaq bilaqiy haqiy. Taromab i ussa Yesus ago disaipel bolim asan rin toniy haqad nazaq ne bilaqiy haqiy. ¹⁴ Ari Pailat ne gibin meqinta nazaq na huritid i tubulonam haqiy. Bulonsa ne gibin meqinta na ago afagan a hi waq daqay haqiy. ¹⁵ Haqan bab mataw na mani na waqim in mataw aseseqta na giqez tumuziniy. Nazaq iyan Juda on mataw wagam katiyta na huritim bilaqad luwim bo muran in bilaq tutayta.

Yesus in ago disaipel kabiy nag

(Mak 16.14-18; Luk 24.36-49; Jon 20.19-23; Aposel 1.6-8)

¹⁶ Ari disaipel 11 na saw Galiliy-ib lehad luwim le Yesus garah anan gibilenim bilam, Nab ne lehiy hamta nab in tugwah-tiqiy. ¹⁷ Gwahtiqaq in Yesus ahol waqad teq in ayon lotu tiqemiy. Lotu emad in gilikmanib asor ginad giger em yaqay. ¹⁸ Sa Yesus in gigerab bolim kazaq gibilan, God zaway bunmo yagan ya Heven-ib teq ogib kab nagah bunmo giwamuzim osaiqta ham. ¹⁹ Nazaq iyan ne ya ibin og saw bunmo ad leheq on mataw bunmo gibileniy ham. Gibilenad ne Gimam Iyatha teq in Atatin teq in ago Bugaw Dimunta ginanib ne mataw huz negiy ham. ²⁰ Huz negad ne gamuk bunmo ya tigibileta na asuleqin negsa in muzin bugiy ham. Ne nazaq on mataw giqemsa in yaqgo disaipel

iyiy ham. Ne hurity ham. Ya kam bunmo
ne nenaq ossa le og ka ago kam abebtanta
na tiquydaq ham.

Mak o Yesus awagamun Mak mar tonta Gamuk ameb lehaqta

Mak in on mataw Yesus ago nan huritad uliq ayahta Rom-ub osiyta na ginadin emad in Yesus awagamun dimunta ka mar tonta. Mataw na Yesus abin in giholib ussa in afaqan kabemmo sor yaqayta. Sa Mak in on mataw na gigem zaway ugid in giwaz meqniyeq ginad nad a hi em daqay haqad in gimen Yesus awagamun ka mar ton.

Mak in aposel araq a haiqta teq in Pita inaq luwsa Pita in Yesus awagamun on mataw gibilensa Mak tuhurit kamta. Hurit kemim in gamuk Pita aqezab wamta naqmo in ago wagam kab mar tonan usaqta.

Teq nagah ayah diqta Mak i qiqishunta na in kazaq. God in atatin Yesus-mo atowun emeq ago Bugaw Dimunta amalib balaw tonid in Amam ago on mataw bunmo gigo king iyeq osdaq haqad in eman bolta. Bolim in ago zaway inaqla iyim in on mataw gamuk awaz meqinta gibilenad teq in gigo bugaw meqinta gimuzad gigo moq kabemmo giwastitaya, mataw in anan helmo haq daqay haqad. Teq on mataw kabemmo Yesus anan ginad a hi em hasim in anan gigem meqniyasa banyuviyta. Na ezaqgo God anad am, Yesus in on mataw kabemmo giyon ahol nog huloseq ta giwaqeq teq in king ago ban uliliba na waqeq tuqos woqdaq ham.

Wagam ka abitanib (16.9) ni lain araq kazaq hureqan ussa ahol waqdaq. Mataw asor in Mak 16.9-20 na anan bilaqay, Mat araq in Mak ago wagam ka eman hiqiyta haqayta.

Yesus in God ago maror alulin on mataw gibilennan haqad bolta

Jon mataw huz negyaqta na in on mataw gamuk gibilensyaq

(Matyu 3.1-12; Luk 3.1-9, 15-17; Jon 1.19-28)

¹ Mar ka in Yesus Krais God atatin awagamun dimunta usaqta. ² Teq wagam ka alulin in kwazigmo God ago nantut Aisaya gamuk mar tonta nazaqmo tugwahtimta. Gamuk na bilam,

Ahol waqiy ham. Ya teq mat araq emid in yaqgo gamuk ad danmeb lehdaq ham. Leheq in ninmen dan tuwastitaydaq ham.

Malakay

3.1

³ Mat na aqez saw amatawun haiqtab lileyim bilaqaq, Ne Iyahta ayon dan balaw toniy haqaq ham. Ad ne in ayon dante na wastitayid titnonan haqaq ham. *Aisaya 40.3*

⁴ An abeb Aisaya mat anan bilamta na amatin gwahtiqaq saw amatawun haiqtab osad in on mataw tuhuz negyaq. In anan Jon haqayta. Ad in kazaq mataw gibilensyaq. Ne ginad buliyeq ne gigo daq teq ginad meqinta bunmo gileh ugiy haqyaq. Gileh ugad ne bolsa ya huz negiq haqyaq. Ne nazaq emsa teq God in ne gigo daq teq ginad meqinta na tigiwaleb bugdaq haqyaq. ⁵ Haqsa mataw saw Judiya-ibta teq uliq Jerusalem-ubta kabemmo in Jon ago gamuk huritnan agerab tubol yaqay. Bolad in gigo daq teq ginad meqinta ulum hassa Jon qiqad le yuw Jodan-ib tighiz negyaq.

⁶ Jon ago tubusan karuw anan kamel haqayta na asan ulim emitya. Teq in karuw asan asor am gan nog ahlilib am wazeq luwyatqa. Luwad in kasum teq garanab kubiq akokin neqad luwyatqa.

⁷ Ad in mataw kazaq gibilensyaq, Mat araq teq ya ibeb boldaqta na abin in ya ibin uriyamta haqyaq. Ya in ahaqenibta haqyaq. In yaqgo Iyahta haqyaq. Ya in ago kabibiy mat samanta haqyaq. ⁸ Ya ne yuwibmo huz negaiqta haqyaq. Ari mat ayahta na boleq teq in God ago Bugaw Dimunta amalib ne tuhuz negdaq haqyaq.

*Jon Yesus huz ug
(Matyu 3.13-17; Luk 3.21-22)*

⁹ Kam nab Yesus uliq Nasaret saw Galiliy-ibta hulosim bolan Jon yuw Jodan-ib in tuhuz ug. ¹⁰ Huz ugan Yesus hidmo yuw hulosim dubub gwaldromo ame ulilib gwalehim kait misireq nog iyim aqez hasim ussa in ahol wam. Ahol waqsa God ago Bugaw Dimunta ah husta nog iyim in amalib tige-hitim.

¹¹ Gehitiqan Heven-ib God aqez bilam, Ni ya itatin ham. Ya ni ninan inad bilaqsa ya igem dimun diq iyaqta ham.

*Satan Yesus ulum wam
(Matyu 4.1-11; Luk 4.1-13)*

¹² Ari God ago Bugaw Dimunta in Yesus eman saw araq amatawun haiqtab tilah. ¹³ Lehim saw nab in kam 40 nazaqmo didaq haiqmo os. Ossa Satan gwahtiqaq Yesus daq araq meqinta emdaq haqad tuqulum waqyaq. Saw nab Yesus amomo karuw kwasikta nenaq osyaq. Ossamo angelo bolim in tuqulumsih yaqay.

*Yesus saw Galiliy-ib ago kabiyl alulin am
(Matyu 4.12-17; Luk 4.14-15)*

¹⁴ Ari mataw in Jon wazim bit giqirquran osaytab eman ossa teq abeb Yesus saw

Galiliy-ib gwahtiqaq God ago gamuk dimunta on mataw tigibilenyaq. ¹⁵ In bilaqyaq, God kwaziqmo kam anan bilam teq gwahtiqaq hamta na muran tugwahtim haqyaq. Gwahtiqaq God ago maror bolim sinsin tiqiy haqyaq. Ne ginad bulyiad gigo daq meqinta gileh ugyi haqyaq. Ad ne God ago gamuk dimunta ka anan helmo haqiy haqyaq.

Yesus mataw aweweinqo gililewunan in muzim inaq lehiy

(Matyu 4.18-22; Luk 5.1-11)

¹⁶ Ari Yesus yuw-kurorgan Galiliy aqu-rumnib lehad luwim in Saimon amikqan Andru inaq dob hunegim nabiq waqad luwsa tigibiy. In giger kabiy naqmo em yaqayta amatawun.

¹⁷ Yesus mataw giger na gibiyad gibilan, Ne ya imuzeq boliy ham. Bolsa ya giqisihunid ne nabiq waqayta nazaqmo teq ne mataw tigiwaq daqay ham. ¹⁸ Haqan hidmo giger na dob hulosan ussa in Yesus muzim inaq tilehiy.

¹⁹ Yesus in giger na nenaq asitmo ta leh nog iyimmo in Sebediy atatniz giger Jems ama Jon inaq tigibiy. In nazaqmo tuyib osad dob wastitayad osiy. ²⁰ Ossa Yesus giger na gililewunan in gimam Sebediy ago kabibiy mataw nenaq gihulosan tuyib osa in Yesus muzim inaq tilehiy.

Yesus mat araq aholib bugaw meqinta muz

(Luk 4.31-37)

²¹ Ari Yesus mataw na nenaq le uliq Kapaneam-ub tugwahtiqi. Gwahtiqaq Juda gigo lotu akannib Yesus le Juda gigo bit humab wolaytab gwahtiqaq mataw suleq negad tuqosyaq. ²² Suleq negsa mataw huritad gihol turuh nem yaqay. Na ezaqgo Yesus ago gamuk in mataw Moses ago gunun hurit kemiya na gigo gamuk nog a hi iyyaq. In ago gamuk bilaqne God inmo abin ugan in suleq bilaqqaqta nazaq nog iyyaq.

²³⁻²⁴ Samo mat araq ago bugaw meqinta inaqta bolim bit na aduganib gwahtiqaq in lileyim bilam, Yesus Nasaret-ibta ham, ni i ezaq gitonnan bol? ham. Ni i gimeqin tonnan daqag ni bolya ham. Ya ningko tuhurit ham. Ni God ago mat tawon diqta naqmo ham. ²⁵ Haqsa Yesus wadim bulon, Ni niqez hiqiy ham. Bugaw meqinta ni mat na hulosad gwahtiqaq leh ham. ²⁶ Haqan bugaw meqinta na in mat na eman woqim abensen hunegsa bugaw na ek tonim gwahtiqaq tituk. ²⁷ Tukanmo mataw bunmo daq na ahol waqad ginadan emad teq in an bulon yaqay, I kwaziqmo nagah araq kazaqta ahol a hi wawta haq yaqay. Ka naga daqin diq? haq yaqay. Ka suleq muturta ago azawayin

inaqta haq yaqay. Mat ko bugaw meqinta gamukmo gibilsa in aqez huriyatya haq yaqay. ²⁸ Nazaq iyan mataw kabemmo in Yesus daq amta na abin eman saw Galiliy-ib uliq bunmo tuhuritiy.

Yesus Pita alen aqawun wastitayan dimniy

(Matyu 8.14-15; Luk 4.38-39)

²⁹ Ari Yesus bit na hulosim in Jems ama Jon inaq giwaqim nenaq Saimon ama Andru inaq gigo bitab tilehiy. ³⁰ Lehanmo mataw bit nabta Yesus buloniy, Saimon alen moq ayahta waqim asan afanfan iyad nawa banab usaq haqiy. ³¹ Haqan Yesus aw na agerab lehim abenab wazim wazan tigeram. Eraqim in asan afan iyim usta na tuhulos ug. Hulos uganmo in era lehim Yesus ago mataw na nenaq gimen didaq anaran usta na waqim a bolim tinag.

Yesus on mataw gigo moq inaqta kabe-mmo giwastitayan dimniyyi

(Matyu 8.16-17; Luk 4.40-41)

³²⁻³³ Ari teq zeq wolehsa imisor diq tiziyan on mataw uliq nabta na bunmo Yesus ago hib bolad teq in giyogniz asor gigo moq inaqta na teq asor giholib bugaw meqinta usaqta na in giwaqim nenaq boliy. Bolim in Yesus bit osaqta na aqezab humab wolum turiy. ³⁴ Tursa Yesus nazaq gibiyad in mataw giholib moq amo amo usta na giwastitayad in gigo bugaw meqinta na gimuzan titukiy. Bugaw meqinta na in Yesus ahol alulin in God atatin na ago tuhuritiya. Nazaq iyan Yesus ginadad gimuzad gibilenyaq, Ne giqezmo hiqiyeq lehiy haqyaq.

Yesus uliq asorib le luwad ago kabiy emyaq

(Luk 4.42-44)

³⁵ Ari Yesus usim tarom asor ussamo in bit na hulosim saw araq amatawun haiqtab tilah. Lehim in amomo God inaq gamuk emad tuqos. ³⁶ Ossa teq Saimon ayogniz nenaq Yesus nagunim tilehiy. ³⁷ Lehim ahol waqad teq in buloniy, Mataw kabemmo ninagunad luwuy haqiy. ³⁸ Haqan Yesus bilam, Nab iysa i uliq sinsin sinsin usayta kogabmo lehuq ham. Leheq ya God ago gamuk in tigibilendaiqmo ham. God ya iqeman ya kabiy naqmo emnan bolta ham. ³⁹ Haqad in saw Galiliy ago uliq bunmo tilehyaq. Lehad in mataw gigo bit humab wolaytab gwahtiqaq gamuk dimunta gibilenad teq in mataw gigo bugaw meqinta tigimuzyaq.

Yesus mat araq ago moq lepra inaqta wastitayan dimniy

(Matyu 8.1-4; Luk 5.12-16)

⁴⁰ Ari Yesus daq nazaq emad luwsa mat araq aholib moq lepra inaqta in agerab

tubol. Bolim in Jesus anognib abakbakan ulum laquwim turad kuh tonim in anad meqniysa bulon, Jesus ham ni ninad bilaqsa teq ni ya iwastitayid ya God ameb isan anumlan ka tihiqiydaq ham.⁴¹ Haqan Jesus anad meqniysa in aben itiwunim mat na wazad bulon, Ya inad bilaqaq ham. Ni nisanib ninumlan usaqta na hiqiyam ham.⁴² Haqan muran diq nawaqmo mat na ago moq lepra tihiqiy.⁴³ Hiqiyam Jesus mat na eman lehsa in adek wazim bulon,⁴⁴ Ni hurit ham. Daq muran kawa ya nihol lib emta ka ni mat araq hikidik bulon ham. Ni leheq mat tamaz emaqta naqmo nihol isihun ham. Ad Moses bilamta nazaqmo ni nihol dimniyta na anawun em ham. Emid teq mataw in ningo moq tihiqiyta na ago tuhurit daqay ham.⁴⁵ Teq haiq. Mat na lehim nagah bunmo in aholib gwahtimta na in mataw haresmo tigibilan. Nazaq iyan Jesus uliq-uliqgo lehad mataw gimeb a ta hi gwahtiqyaq, luweq ya in gimeb luwsa in bo ya iqisih net daqay haqad. Nazaq haqad in le saw amatawun haiqta nagab luw osyaqta. Ossa on mataw uliq saw bunmo in saw nabmo leheq Jesus ahol waq yaqayta.

2

*Jesus mat araq abensen aditin moq bugta wastitayan dimniy
(Matyu 9.1-8; Luk 5.17-26)*

¹ Ari kam asor le tihiqiyam Jesus uliq Kapaneam-ub a ta lah. Lehim ossa mataw Jesus bolim bitab osaqta na ago tuhuriti. ² Huritim mataw kabemmo bolim bit nab humab wolam ban tihiqiy bug. Bit aqezab nazaqmo ban haiq tiquymo. Na matawmo osan lah. Sa Jesus gamuk dimunta tigibilenyaq.³ Gibilenad ossa mataw awewe-qmo in mat araq moqaqta banab emim sorim a boliy. Mat na abensen aditin moqan in asit a hi luwyqata.⁴ Ari in mat na a bolan bit nab mataw ban tuwaq bugan in ad Jesus agerab loqgo dan haiq. Nazaq iyan in bit ahuqunib gwalehim Jesus osaq diqta nab in asor tihikneriy. Hiknerim in mat moqaqta na abanan inaqmo am emim Jesus osaqta nabmo eman tuwolah.⁵ Wolehan Jesus mataw na ginad helta ahol waqadmo in mat moqaqta na tubulon, Yaqgo amun ham ya ningo daq meqinta tigiwalem bug ham.

⁶ Haqan mataw Moses ago gunun hurit kemiyya na asor Jesus agerab osad in ginadibmo susumunim bilaqiy,⁷ Nagaqgo mat ka God ago ban waq nog iyim kazaq God bilawunaq?⁸ haqiy. Og kab mat araq mataw gigo daq meqinta walemdaqtta haiqgam haqiy. Naqmo God amulikmomo ago kabiyya haqiy.⁹ Mataw na nazaq

ginadib susumunsa Yesus giloyin kemim gibilan, Doq tonnan ne ginad haresmo nazaq emay? ham.⁹ Ya naga gamukin bilaqid teq ne nan a hi yag daqay? ham. “Ya ningo daq meqinta tigiwalem” haqdaiq o “Ni eraeqq ningo ban waqeq a leh” haqdaiq? ham.¹⁰ Teq Mat Atatin in og kab daq meqinta walemgoo azawayin aholib usaqta na ago ne hurit daqay haqad ya kazaq diq bilaqdaiq ham. Haqad in mat abensen moqan banab usaqta na tubulon,¹¹ Ya nibile-naiq ham. Ni eraeqq ningos us ban waqeq ad ningo bitab a leh ham.¹² Haqanmo mat na eraqim mataw na gimeb ago ban sorim ad ago bitab tilah. A lehsa mataw bunmo gihol ritensa in God abin iluwad bilaq yaqay, I nagah kazaqta kwaziqmo ahol a hi wawta haq yaqay.

*Yesus Liway bulonan in muzim inaq lah
(Matyu 9.9-13; Luk 5.27-32)*

¹³ Ari Jesus yuw-kurorqan Galiliy aqurumnib a ta lehan mataw kabemmo in agerab tuboliy. Bolan Jesus in God ago suleq tigibilenyaq.¹⁴ Gibilenad osim teq in era lehad luwim in Alfiyus atatin Liway ahol tuwam. Mat na takis abitnib ago kabiyy takis waqad ossa Jesus ahol waqad tubulon, Ni ya imuzeq bol ham. Haqanmo Liway eraqim Yesus muzim inaq tilah.

¹⁵ Ari abeb Jesus in Liway ago bitab didaq neqad tuqos. Ossa mataw gabin meqinta takis waqayta teq mataw daq meqinta emayta nenaq kabemmo bolim Jesus ago disaipel nenaq bit nab didaq neqad tuqosymo. Mataw naqanta kabemmo Yesus muzinad inaq luw yaqayta.¹⁶ In bunmo nazaq Yesus inaq didaq neqad ossa Farisi asor gibiyad osim in Jesus ago disaipel tigibilenyi, Nagaqgo Yesus in mataw daq meqint emayta ko teq mataw takis waqayta ko nenaq didaq neqad? haqiy.¹⁷ Haqsa Jesus huritim gibilan, Mataw gigo moq haiqta na in le dokta ahol a hi waqayta ham. Mataw gigo moq inaqta naqmo dokta ago hib lehayta ham. Ya on mataw titnonta gililewunnan a hi bol ham. Ya on mataw daq meqinta emad osayta naqmo gililewunnan bolta ham.

*Mataw didaq udinayta na ago Yesus bilam
(Matyu 9.14-17; Luk 5.33-39)*

¹⁸ Ari Jon mataw huz negyaqta na ago disaipel teq Farisi nenaq in tuteqmo didaq udin yaqayta. Nazaq iyan mataw asor bolim Yesus buloniy, Ezaqgo Jon ago disaipel na teq Farisi gigo disaipel na in udinsa ta ningo disaipel a hi udinayta? haqiy.¹⁹ Haqan Jesus gamuk awowun araq kazaq gibilan, Mat araq aw waqnan tonsa in ayoginiz boleq inaq osad in ginad meqniysa didaq udin daqay ye? ham. Haiqgam ham.

Mataw na giyow inaq osad iyan in didaq a hi udin daqay ham.²⁰ Ari abeb mataw asor boleq mat aw waqaqta na ayogniz gibenab tuwaq daqay ham. Kam na teq boldaqta ham. Bolid kam nab teq mat na ayogniz didaq tuqquqdaqta ham.

²¹ Haqad in bilam, Mataw tubusan mutura waqim amalib tubusan kwaziqta misiramta na inaq a hi initayta ham. In nazaq toneq abeb in tubusan kwaziqta na suholsa tubusan muturta na irnik toneq le amik iyadmo in tubusan kwaziqta na bulsireqid ayahmo diq a ta tartaydaq ham.

²² Teq mataw wain ayun muturta memeq asan kwaziqtab a hi tenayta ham. In nazaq tonid wain aqurin gwadal huhuw nemsia memeq asan kwaziqta na tartayid wain ayun mutbaleq ogib woqsa memeq asan na timeqniyidaqmo ham. Nazaq iyan mataw memeq asan muturtamo waqim wain ayun muturta tenayta ham.

*Mataw Juda gigo lotu akannib kabi y ahi emayta na ago Yesus bilam
(Matyu 12.1-8; Luk 6.1-5)*

²³ Ari teq Juda gigo lotu akaman araqab Yesus ago disaipel nenaq kabi y araq wit leyiyta aduganib gwahtiqim tileh yaqay. Lehad in ago disaipel gigem moqsa wit analgin asor tuguraq yaqay.²⁴ Guraqsa Farisi asor gibiyad in Jesus buloniy, Ni ko gibiy haqiy. Nagaggo in lotu akaman ago gunun ittiyonim kabi y wit tuguraq? haqiy.

²⁵ Haqan Yesus gibilan, Nabag ne Devit ago dahu nenaq in nagah osgo siqim iyim gigemnan moqad teq Devit daq amta na awagamun ne ahol a hi waqiy-ya ham.²⁶ Tamaz mat danmebita Abiyatar akannib Devit le God ago bit aduganib gwah-tiqim God ameb bret eman usta na waqim tinam ham. Bret na gunun emiyta ham. Mataw tamaz emayta naqmo gimomo bret na neqayta ham. Teq hajq ham. Devit agem moq titaysa neqad in bret tawonta na asor in ayogniz negan tineqiyimo ham. Ta teq in daq meqinta a hi emiy ham.

²⁷ Haqad in gibilan, God mataw gimeqin tonnan lotu akaman eman a hi gwahtim ham. Hajq ham. In mataw gidimum tonnan haqad lotu akaman eman gwahtimta ham.²⁸ Nazaq iyan Mat Atatin in lotu akaman anamrenmo diq iyim inmo mataw kam nab ezaq luw os daqayta na ago tigibilendaqta ham.

3

*Juda gigo lotu akannib Yesus mat araq aben meqinta wastitayan dimniy
(Matyu 12.9-14; Luk 6.6-11)*

¹ Ari kam araqab Yesus in Juda gigo bit humab wolaytab tilah. Lehan mat

araq aben akogan anedan mayim adit-inmo usaqta in nab os.² Ossa Yesus ago bab in Jesus wamuzim nab osiymo, Yesus i gigo lotu akaman kab mat ka wastitayid dimniyid i amalib nan emam haqad.³ Haqsa Yesus mat aben meqinta na tulbon, Ni boleq mataw ka gimeb tur ham.⁴ Haqad in mataw na tisumun nag, I Juda gigo maror ezaq usaqta? ham. Lotu akannib i mataw gidimum tonamta o i gimeqin tonamta? ham. Kam na i mat moqqaqta ulumsihamta akaman o i mat na aholib hiqiyid in moqdaqta akaman? ham. Haqan mataw na giqezmo hiqiyim osiy.

⁵ Ossa Yesus in mataw na bunmo ginad ahol waqim le bolsa in ginad soqotim us. Ussa Yesus ahol afaqan diq iyad in mataw na ginan agem timeqniy. Agem meqniysa in mat na bulon, Ni niben itiwun ham. Haqan mat na aben itiwunan aben akogan na tidimniy.⁶ Dimniyan Farisi na hidmo lehim in Herot ago dahu nenaq humab wolum osad in ezaq toneq Yesus wol emid moqdaqta na agamukan tibilaq yaqay.

Yesus in asenlul ago zaway giqishunsa teq in anan helmo a hi haqiy

*On mataw kabemmo yuw-kurorqan
Galiliy aqurumnib humab woliy
(Luk 6.17-19)*

⁷ Ari Yesus ago disaipel nenaq yuw-kurorqan Galiliy-ib tilehiy. Lehsa mataw kabemmo Yesus muzim inaq tilehiy. ⁸ Sa mataw saw Galiliy-ibta teq saw Judiya-ibta teq uliq Jerusalem-ubta teq saw Idumea-ibta teq mataw kabemmo yuw Jodan aqurumniba teq uliq giger Tair teq Saidon-ibta nagan kabemmo diq in kabi y daq bunmo Yesus emyagta na abin huritim in agerab tuboliy. ⁹ Bolan Yesus in ago disaipel gibilan, Ne yaqmen tuy araq ahol waqid teq usan ham. Luweq mataw ka ya iqisih daqay ham.¹⁰ Na ezaqgo Yesus in mataw kabemmo gigo moq tuwastitayan iyan biyatha na gigo asor gigo moq inaq na bunmo in agerabmo diq loq yaqay, i Yesus wazeq teq gihol tidimniydaq haqad.¹¹ Sa mataw gigo bugaw meqinta inaq na in Jesus ahol waqadmo in anognib woqeq usad lileyeq bilaq yaqay, Ni God atatin haq yaqay.¹² Haqsa in bugaw meqinta na atoran diqmo gibileneq bilaqyaq, Ne ya ihol abin na ulalab hi bilaqiy haqyaq.

*Yesus Aposel 12 na gitowun am
(Matyu 10.1-4; Luk 6.12-16)*

¹³ Ari kam araqab Yesus garah araqab tugwalah. Gwalehim in mataw asor in ginan anad bilaqqaqta naqmo gibilenan agerab tuboliy.¹⁴⁻¹⁵ Bolan in mataw 12 nazaq gitowun emim ginan Aposel haqad

tibiy. In anad mataw na in inaq ossa teq in giqemid in uliq-uliggo lehad inmo ahol abinib ago gamuk dimunta na gibilenad teq in bugaw meqinta gimuz daqay haqad in anad am.

¹⁶ Ari in mataw 12 giwamta na ginan kazaq: Saimon, Yesus anan araq Pita haqad biyim ucta. ¹⁷ Teq Sebediy atatiniz Jems ama Jon inaq. Yesus in maqbab giger na ginan araq Bowanerges haqad biyta. Nan Bowanerges na alulin mat ago daq atoranta kait ahulan iyaq nazaq nogta haqayta. ¹⁸⁻¹⁹ Teq Andru teq Filip teq Bartolomyu teq Matyu teq Tomas teq Alfiyus atatin Jems teq Tadiyus teq Saimon, mat Rom nenaq bab emyaqta amatin na teq Judas uliq Kariyot-ibta na. Mat naqmo Yesus waqim bab gibenab amta.

Mataw asor bilaqiy, Yesus bugaw meqinta Belsebul inaq kabiya emyaqta haqiy
(Matyu 12.22-32; Luk 11.14-23; 12.10)

²⁰ Ari Yesus bitab tilah. Lehan mataw in ahol waqnan haqad lehim bit nab humab a ta woliy. Humab wolim ossa Yesus ago disaipel nenaq in gikabiyan kabemmo emad didaq neqgo akaman haisq iy yaqay.

²¹ Sa Yesus asenlul huritim in Yesus waqnan haqad tuboliy, i gigo amun ahol agadan tiqiy daqag haqad.

²² Sa mataw Moses ago gunun hurit kemiyyta na asor Jerusaleme-ub osim gewoqim osad teq in bilaqiy, Bugaw meqinta gigo amepta Belsebul in Yesus aholib usaq haqiy. Ussa Yesus in Belsebul ago zaway amalib bugaw meqinta gimuzaqta haqiy. ²³ Haqan Yesus in mataw aseseqta na gibilenan agerab bolan in gamuk awowun araq kazaq gibilan, Ezaq teq Satan inmo ago dauhtha tigmuzdaq? ham. ²⁴ Kantri araq ago on mataw gihol husereq an gihar ugad an wolad osad in zaway iyeq a hi tur daqay ham. ²⁵ Teq bit araqab on mataw gihol husereq an gihar ugad an wolad osad in zaway iyeq a hi tur daqaymo ham. ²⁶ Ad nazaqmo Satan ago dauh nenaq gihol huserad an geg ugad Satan zaway iyeq a hi turdaq ham. In tihiqiydaq ham.

²⁷ Haqad in bilam, Mat araq in mat awaz meqinta ago bit aduganib samanmo gwah-tiqeq ago nagah a hi ginuwdaq ham. Haisq ham. In mat awaz meqinta na abensen irqureq teq in mat na ago bit aduganib gwah-tiqeq ago nagah tiginuwdaq ham.

²⁸ Ya helmo ne gibilenaq ham. God in on mataw gigo daq meqinta teq in bilawunayta na bunmo tigiwalem bugdaq ham.

²⁹ Ari on mataw God ago Bugaw Dimunta bilawunid God in gigo daq meqinta na a hi walemdaq ham. Haisq ham. Daq meqinta

na in giholib tuqus tutdaq ham. ³⁰ Na ezaqgo mataw aseseqta na Yesus anan bilaqiy, In aholib bugaw meqinta usaq haqiyta na ago Yesus nazaq gibilan.

Yesus anenan teq amagniz na gingan?
(Matyu 12.46-50; Luk 8.19-21)

³¹ Ari kam nab Yesus anen teq in amagniz bolim asanib turad in Yesus ayon nan eman tilah, in gigerab boldaq haqad. ³² Teq mataw kabemmo Yesus lilut ugim osiy. Osad in Yesus buloni, Ni ko gibiy haqiy.

Ni ninan teq ni nimagniz bolim asanib kowa turad in ni ninan saw waqay haqiy. ³³ Haqan Yesus amenin emim gibilan, Ya inen teq ya imaginiz gingan diq? ham.

³⁴ Haqad in on mataw lilut ugim osiyta na gibiyim le bolim bilam, Ne ahol waqiy ham. Ya inen teq ya imaginiz kawa osay ham.

³⁵ Mat aw nog in God anad muzad ago kabiya emayta naqmo in ya ima teq in ya ihiy teq in ya inen ham.

4

Mat araq kabiya wit anagin hunagta ago gamuk awowun
(Matyu 13.1-9; Luk 8.4-8)

¹ Ari kam araqab Yesus yuw-kurorqan Galilyaq aqurumniib mataw suleq a ta gibilenyaq. Gibilensa mataw kabemmo bolim Yesus agerabmo diq loqsa iyan in giban emim muy araqab gwalim yuwmeb tuqos. Ossa mataw bunmo yuw aqurumniib osiy. ² Ossa Yesus suleq kabemmo negad gamuk amo amo tibilenyaq. Gibilenad in kazaq bilam,

³ Ne huriyi ham. Mat araq ago kabiya wit anagin hunegnan tilah ham. ⁴ In lehim wit anagin hunegad luwsa asor dan adekib wogan ah bolim tineqiy ham. ⁵ Teq wit anagin asor saw agigin inaqtab og asitmo usaqta nab wom ham. Woqim og ayah diq haiqgam iyan wit hidmo tugwal ham. ⁶ An zeq gwalim oysa wit na aninin haiggam iyan in mayim tumom ham. ⁷ Teq wit anagin asor am asasuqin inaqta aduganib wom ham. Woqan am asasuqin inaqta na gwalad isihan wit na anon a hi am ham. ⁸ Teq wit anagin asor og dimuntab woqim ahokan gwalim anon tiqam ham. Wit anagin na asor anon 30 nazaq giqam ham. Sa asor anon 60 nazaq giqam ham. Teq asor anon kabemmo diq 100 nazaq giqam ham. ⁹ Haqad Yesus gibilan, Mat aw nog in gidek nan huriyg usaqta na in gamuk ka huriit kemiyy ham.

Yesus anad ezaq emad gamuk awowunno on mataw gibilenyaq
(Matyu 13.10-17; Luk 8.9-10)

¹⁰ Abeb mataw biyahta na haresmo tilehsa Yesus ago disaipel 12 na teq mataw

asor nenaq in Yesus lilut ugim osad gamuk awowun in bilaqyaqta nagan ago tis-usumun ugiy. ¹¹ Susumun ugan in gibilan, Negmo God ago maror aduganib osayta ham. Nazaq iyan ya God ago maror abe alulin ulilemim usaqta na bilaqsa ne huriyatya ham. Teq mataw God ago maror asan ban osayta na ya gamuk awowunmo amalib gibilenaiqta ham. Ya nazaq gitonsa,

¹² Mataw na gime saw waqad teq in nagaq araq ahol a hi waqayta ham. In gamuk huritad teq in ginad a hi em hasayta ham. Luweq in ginad em hasad ginad bulyiyid God in gigo daq meqinta na tigiwalem nag ham.

Aisaya 6.9-10

Mat kabyab wit anagin hunagta na ago alulin

(Matyu 13.18-23; Luk 8.11-15)

¹³ Haqad Yesus gibilan, Ne gamuk awowun ka ago ginad a hi em hasay ye? ham. Ne gamuk awowun ka alulin ginad em haseq teq ne yaqgo gamuk awowun bunmo ago ginad tiqem has daqaymo ham.

¹⁴ Ari ne hurity ham. Wit anagin na in God ago gamukmo ham. ¹⁵ Sa mataw asor in wit anagin dan adekib woqaqta na nog ham. In God ago gamuk hurityta nabmo Satan bolim God gamuk dimunta mataw na gigemab layta na ta walemaqta ham.

¹⁶ Teq mataw asor in wit anagin og agigin inaqtab woqaqta na nog ham. In God ago gamuk huritim in ginad bilaqsa hidmo waqayta ham. ¹⁷ Teq mataw na in bilaqne wit aninin haiqta nog ham. In God ago gamuk na gigemabmo diq a hi wazad in muzinad sisqmo a hi luwayta ham. Na ezaqgo in God muzayta na ago mataw in gimeqin tonad afagan amo amo negsa in God hulosayta ham.

¹⁸ Teq mataw asor in wit anagin am asasuqin inaqta amuganib woqaqta na nog ham. Mataw na God ago gamuk hurityta ham. ¹⁹ Teq in og ka ago nagah kabemmo anadin emsa mani-mo kat negad ginad hureqsa in nagah kabemmo diq utetayta ham. Ginad meqinta na ginadib bolad in God ago gamuk isihqata ham. Isihsa iyan gamuk na in gigemab anon a hi emaqta ham.

²⁰ Teq mataw asor in wit anagin og dimuntab woqaqta na nog ham. In God ago gamuk huritim in waqim wazayta ham. An gamuk na in gigemab anon emaqta ham. Mataw na asor gigemab God ago gamuk anon 30 nazaq giqemaqta ham. Sa mataw asor gigemab God ago gamuk anon 60 nazaq giqemaqta ham. Teq mataw na asor gigemab God ago gamuk anon kabemmo diq 100 nazaq giqemaqta ham.

Mataw lam miderim kuramab a hi si-henayta

(Luk 8.16-18)

²¹ Ari teq Yesus bilam, Mataw lam miderim kuramab a hi sihenayta ham. Ad in ban ahaqenib a hi emaytamo ham. In lam miderim ulilib othenan oyad usaqta ham. ²² Nazaq iyan nagah bunmo ulilemim usaqta na in teq ulal tigiyadaq ham. Teq nagah bunmo giqisihan usaqta na in teq saw anuwanib tugwahtiqaq ham. ²³ Mat aw nog in gidek inaq iyeq teq in gamuk ka hureeq ginad emiy ham.

²⁴ Haqad Yesus gibilan, Gamuk ne huriyatya ka ago ne ginad em hasiy ham. Mat God ago gamuk huritad anad a hi em hasaqla na, God in mat naqanta anad emid a hi hastityadaq ham. Ari mat God ago gamuk huritim anad em hasaqla na, God in mat naqanta anad emid ayahmo diq tihasitaydaq ham. ²⁵ Na ezaqgo God in on mataw gigo nagah inaqta na bunmo nagah asor a ta negdaq ham. Ad in mataw ginagahan haiqta na gibenab nagah asitmo wazayta na tigiwalem bugdaq ham.

Didaq ahokan gwalaqta ago gamuk awowun

²⁶ Haqad Yesus gamuk awowun araq kazaq ta bilam, God ago maror in bilaqne mat araq didaq anagin ogib hunegaq nazaq nog ham. ²⁷ Mat na taromab usad zeqab in luwsa ago didaq gwalim ezaq ayah iyaqta na ago in a hi huriqta ham. ²⁸ Og inmo didaq eman kabyab gwalaqta ham. Danmeb diq ahokan gwalaqta ham. Ahokan sisq iyim in azizorin emaqta ham. Ari abeb in anon emaqta ham. ²⁹ Anon na gihemeq ussa teq mat na baqir waqeq a le tigiqurotadaq ham. Na ezaqgo in didaq waqgo akaman tugwahtim ham.

Ay mastet anagin ago gamuk awowun
(Matyu 13.31-32; Luk 13.18-19)

³⁰ Haqad Yesus bilam, Ya naga diq atowun emeq bilaqid teq ne God ago maror anan ginad em daqay? ham. Teq ya naga gamukin amalib awowun hulsa ne huri kem daqay? ham. ³¹ Ari God ago maror na in bilaqne ay mastet anagin amulikmo nog ham. Mataw ay anagin na kabyab leyan in didaq anagin bunmo giquriyamim amilik didiq iyim usaqta ham. ³² Teq abeb in gwalim ayah iyim in kwasin-kwasan kabyabta na bunmo giquriyamim turaqta ham. In gwalim aben aseseqmo iyan ah bolim abenab giririn emim amurnib osayta ham.

Yesus gamuk awowunmo on mataw gibilenyaqta
(Matyu 13.34-35)

³³ Ari Yesus in on mataw God ago gamuk gibilenad in gamuk awowun kabemmo amalib nazaqmo gibilenyaqta. Gibilenad mataw naga gamukin hurit daqayta na in anad emadmo in gamuk awowun nazaqmo gibilenyaqta. ³⁴ Teq in gamuk araq diq alulin a hi gibilenyaq. Haiqgam. In gamuk awowunmo gibilenyaq. Ari in ago disaipelmo nenaq giholbinmo osad teq in gamuk alulin tigibilem kemyaqta.

*Yesus bilaqan tim ayahta kute nam
(Matyu 8.23-27; Luk 8.22-25)*

³⁵ Ari kam nabmo imisor Yesus in ago disaipel gibilan, I yuw urumun kozaq ban lehuq ham. ³⁶ Haqan disaipel in mataw biyahta na gihulosadmo in Yesus muy amalib osta nab le gwalim Yesus inaq tilehiy. Lehsa mataw asor gimuyin inaqta na Yesus muzim inaq tilehiy. ³⁷ Lehsa tim ayahta eraqad yuw eman sortukim muy amuganib woqad ate tugwalnan tonyaq. ³⁸ Ari na teko Yesus muy abe ban hartiý qwayim tuqus. Ussamo tim eraqsa ago disaipel bo bulonan in kayeq tigiq. Kayeq iyan in buloniy, Tisa haqiy, i tumoqnan tonauq haqiy. Ni i ginan ninad a hi meqniyiq e? haqiy. ³⁹ Haqan Yesus eraqim tim wadad teq in yuw atoranmo bulon, Muleqeq woq ham. Haqanmo tim hiqiya yuw midemim ahol a ta hi wol. ⁴⁰ An Yesus in ago disaipel gibilan, Ne nagaqgo kazaq rabay? ham. Ne ezaq tonim God anadin a hi emay? ham. ⁴¹ Haqan disaipel rabad in an tubulon yaqay. Mat ka nog diq? haq yaqay. Tim yuw inaq in aqez huriyatya haq yaqay.

5

Yesus mat araq aholib bugaw meqinta muz

(Matyu 8.28-34; Luk 8.26-39)

¹ Ari Yesus ago disaipel nenaq le yuw urumun kozaq ban tugwahtiqiy, uliq Gerasa gigo or saw ban. ² Gwahtiqim Yesus muy hulosim itiqsamo mat araq ago bugaw meqinta inaq luwaqta na hodhod hulosim in agerab tubol. ³⁻⁴ Mat na hodhodabmo luw osyaqta. Ossa mataw in wazan yo hiqiy yaqayta. In mat na aben amub am wazan haiq. Ad in sen-ib am wazan haiqmo. Kam kabemmo in abensem sen-ib am waz yaqayta teq in sen na gibultayad hankap asenab usta na wolzilayyaqtamo. In mat awaz meqin diqta. ⁵ Sirisirimo zeqab teq taromab in hodhodab teq garahab osad in ek tonad inmo ahol asan gigib qwatayyaqta.

⁶ Ari mat na Yesus pesammo bolsa ahol waqad in sibim bolim Yesus anognib abak-bakan ulum laquwim tur. ⁷ Turad in

dedibmo lileyim bilam, Yesus ham ni God Ulilibta atatin ham. Ni ya ezaq itonnan bol? ham. Ya God ameb nibilenaq ham. Ni santitiy hi yag ham. ⁸ Na ezaqgo Yesus tekomo tubulon, Bugaw meqin ham ni mat ka hulosad gwahtiq ham. ⁹ Haqad teq in susumun ug, Ni ninan ezaq? ham. Haqan in bilam, Ya inan Kuluwmo ham. Na ezaqgo i mataw kabemmo diq ham. ¹⁰ Teq mat na anad awaz meqin amalib ame kabemmo Yesus bulonyaq, Ni saw kab bugaw hi gimuz haqyaq.

¹¹ Haqsa bul gihumaban araq ayahta didaq neqad garah amanmanib sinsinmo turiy. ¹² Tursa bugaw meqinta nagan ginad meqniyisa Yesus buloniy, Ni i giqemid i bul ko gimuganib le woqiq haqiy. ¹³ Haqan Yesus bilam, Lehiy ham. Haqanmo mat aholib bugaw meqinta giqusiya na gwahtiqim le bul na gimuganib tuwoqiy. Woqanmo bul bunmo sibim wole garah asisibranih bayhilek tonim yuwmeb woqan yuw gineqanmo tumoq bugiy. Bul na bunmo gigo ginulinqan 2,000 nazaq.

¹⁴ Ari mataw bul giwamuzim osiyya na in daq na ahol waqad titukiy. Tukim lehad uliqab teq saw haresmo in nagah ahol waqiyta na awagamun tibilaqiy. Bilaqsa on mataw hurit in nagah na ahol waqan tilehiy. ¹⁵ Lehim in Yesus ago hib bolim mat kwaziqmo bugaw meqinta kabemmo amuganib usiyya na in ahol tuwaqiy. Mat na anad dimunta waqim tubusan wellim ossa in ahol waqad tirabiy. ¹⁶ Rabsa mataw gimeb daq ahol waqiyta na in mat kwaziqmo bugaw meqinta aholib usiyya na awagamun gibilenad teq in bul ago bilaq toniy. ¹⁷ Bilaqan mataw na Yesus abe yahad buloniy, Ni saw ka huloseq leh haqiy.

¹⁸ Haqan Yesus le muyib tugwalsa mat bugaw meqinta aholib usan in gimuzta na in inaqmo lehnar anad bilaqsa in anad awaz meqin amalib Yesus bulonyaq, Ya ninaq lehdaiq haqyaq. ¹⁹ Haqsa Yesus hulos. Hulosad in mat na bulon, Ni ningi uliqab nisenlul gigerabmo leh ham. Leheq teq Iyatha daq ayah diqmo em nigta na teq in ni ninan anad meqniyta na ni gibilen ham. ²⁰ Haqan mat na saw anan Dekapolis* haqayta nab lehim uliq bunmo luwad in nagah Yesus inmen amta na tibilaq bugyaq. Sa mataw bunmo hurit in gihol turuh nemyaq.

Yesus aw araq ned hunegaqta wasti-tayim teq in maror araq amiy tumomta wazan eram

(Matyu 9.18-26; Luk 8.40-56)

* 5:20: Nan Dekapolis ka alulin in 'Uliq 10' haqayta.

²¹ Ari teq Yesus ago disaipel nenaq yuwen kurorqan Galiliy urotim aqurumun kozaq ban ta lehiy. Lehan mataw kabemmo bolim Yesus agerab humab tuwoliy, yuwen na aqurumniib. ²² Humab wolum Yesus inaq nab ossa Juda gigo bit humab wolayta ago danmepta araq anan Jairus haqay na bolim Yesus asen agerab ahol hulosan wom. ²³ Ahol hulosan woqim usad in anad meqniysa ame kabemmo bulonyaq, Yaqgo amun aw amikta tumoqman diq tonaq haqyaq. Ni boleq niben aholib emeq wazid in ahol dimniyeq hi moqan haqyaq. ²⁴ Haqan Yesus in inaq ago bitab tilah.

Lehsa on mataw kabemmo Yesus muzim inaq lehad teq in aholib soqotim diq inaq leh yaqay. ²⁵ Lehsa aw araq moqad sirisrimo ned hunegyaqta na in Yesus muzim mataw na nenaq tilehyaqmo. Ulig 12 nazaq moq na aholib usta. ²⁶ Ussa mataw gime inaqta santityi ayahmo ug yaqayta, in ahol dimniydaq haqad. Teq haiq. Aw na ago mani kabemmo mataw na gigo hib hulos bugta teq in ago moq na asit a hi hiqiyqaq. Haiqgam. In aholib moq ayahmo diq iyyaq. ²⁷⁻²⁸ Ari aw na Yesus ahol awagamun huritim in anad tiqam, Ya iben Yesus ago tubusanmo wazeq teq ya ihol tidimniydaq ham. Haqad in bolim mataw biyahta na gilikmanib gwahtiqim nenaq lehad in Yesus abun ban loqimmo aben le in ago tubusan tuwaz. ²⁹ Wazimmo in ago ned muran diq nawaqmo tumay. Mayan aholib moq tihiqyan in ahol tiloyin. ³⁰ Loyinsa Yesus ago zaway asor tuhulos ugim lahta na ago in ahol tiloyinmo. Nazaq iyan in ahol bulyim bilam, Nog aben yaqgo tubusan waz ham? haqiy. ³¹ Haqan ago disaipel buloni, Ni mataw kabemmo soqot nigim ninaq lehayta ka a hi gibiyaq e? haqiy. Ni nagaqgo susumunim bilam, Nog aben yaqgo tubusan waz ham? haqiy. ³² Haqan teq haiq. Yesus saw waqim le bol, nog diq daq na amta na ago haqad. ³³ Sa aw na in nagah aholib gwahtimta na ago anad emad in tirabyaq. Rabad in bolim Yesus anognib abakkaban ulum laquwim turad nagah aholib gwahtimta na in tibilq bug. ³⁴ Bilaq bugan Yesus bulon, Ya imiy ham ni ya inan helmo hamta naqmo niqeman ni nihol tidimniy ham. Ningo moq tihiqyan ni le nigem dimniysa os ham.

³⁵ Ari Yesus gamuk bilaqad nab tursamo Jairus ago bitab mataw asor osim bolim in gigo mat ayahta na danib ahol waqad buloni, Ningo amun aw tumom haqiy. Nagaqgo i Tisa atuw a ta bulam? haqiy. ³⁶ Haqan Yesus gamuk na ago adek a hi emad in Jairus bulon, Ni hi rab ham. Ni God amomo anan helmo haq ham. ³⁷ Haqad teq in on mataw bunmo giwasihan nab tursa in Pita teq Jems ama Jon inaq naqmo gi-

waqim nenaq tilehiy. ³⁸ Lehim in Jairus ago bitab tugwahtiqiy. Gwahtiqim in mataw ek tonad gaq wazad ossa tigibiy. ³⁹ Gibiyad in lehim gibilan, Ne nagaqgo gaqad saw zunad osay? ham. Amun aw na a hi mom ham. In usaq ham. ⁴⁰ Haqan on mataw na bunmo in aqez tiyuquwuniy. Yuquwunsa Yesus gimuzan asanib gwahtiqsa in amun anen amam teq inmo ago disaipel ezeqman na giwaqim nenaq bit adugan amun usaqta nab le tugwahtiqiy. ⁴¹ Gwahtiqim in amun na aben wazim in Juda gigo nanib bulonim kazaq bilam, *Talita kumi* ham. Na in kazaq bilam, Amun aw amik, ni eraq ham. ⁴² Haqan hidmo in eraqim tiloq gelyaq. (Amun aw na ayah tiqy bugim in ago ulig 12 nazaq tiqiyta.) An amun anen amam in nagah na gimeb ahol waqim in gihol turuh nem naqmo diq hiqiy. ⁴³ Sa Yesus atoranmo gibilan, Nagah ka ago ne mat araq hikidik buloni ham. Haqad in amun didaq ugid neqgo gibilan.

6

On mataw uliq Nasaret-ibta Yesus gileh ugiy

(Matyu 13.53-58; Luk 4.16-30)

¹ Ari Yesus uliq na hulosim inmo ago uliq diq Nasaret-ib lehsa in ago disaipel muzim inaq tilehiy. ² Lehim Juda gigo lotu akamnib Yesus bit humab wolaytab gwahtiqim in mataw God ago gamuk tigibilenyaq. Gibilensa mataw kabemmo Yesus ago gamuk huritad in gihol turuh nemsia bilaq yaqay, Mat ko gamuk bilaqta na in edob diq wam? haq yaqay. In anad usaqta ko ezaq digta in wam? haq yaqay. In ezaq diq tonim anad emsamo nagah gwahtiqaq? haq yaqay. ³ Mat ko in igmo gisenlul araq haq yaqay. In bitmo emaqta amatin araqta haq yaqay. In anen Mariya teq in amagniz Jems teq Josep teq Judas teq Saimon kawa osay haq yaqay. Teq ahiyan kawa i nenaq osauqmo haq yaqay. In nazaq haqad Yesus anan gigem timeqni yaqay.

⁴ Gigem meqniysa Yesus gibilan, Mat God ago nantut bilaqta na abin uliq bunmo usaqta ham. Ari inmo ago uliqab teq in asenlilib teq in ago bitabmo diq in ahol abin haiqta ham.

⁵ Nazaq iyan in daq azawayin inaqta araq diq uliq nab a hi emyaq. In mataw gigo moq inaqta naqmo amulik-mulikmo giholib aben emim giwazsa in dimniy yaqay. ⁶ Teq mataw uliq nabta na in anan helmo a hi haqsa iyan in anadnad emyaq.

Yesus in ago disaipel ago zaway giqisihunsa teq in ago a hi hurit kem yaqay

*Yesus disaipel 12 na kabi nag
(Matyu 10.5-15; Luk 9.1-6)*

Ari Yesus saw nab uliq-uliggo luwad in God ago gamuk on mataw tigibilenyaq. ⁷ In nazaqmo emad luwim kam nab in ago disaipel 12 na gibilenan boliy. Bolan inmo ahol abinib bugaw meqinta gimuzgo azawayin in negim teq in giqeman giger giger tilehiy. ⁸ Lehsa in gibilan, Ne lehad es araq waqeq ad hi lehiy ham. Ne katekmo wazeq ulum ugeq a lehiy ham. Teq ne ziy araq es sihengo hi waqiy ham. Ad didaq araq neqqota ad hi lehiyimo ham. Teq mani araq ne giholib hi usanmo ham. ⁹ Ne gigo gisendugan gisenab tiqem daqay ham. Teq ne tubusan gigermo gihol siheneq hi lehiy ham.

¹⁰ Haqad in gibilan, Ne uliq araqab le tugwahtiqeq bitbitmo leheq hi osiy ham. Bit amulikmo ne os daqayta nabmo ne osiy ham. Oseq teq ne era uliq araqab lehiy ham.

¹¹ Ari ne le uliq araqab gwahtiqid mataw uliq nabta na in ne gibaymuzad gigo gamuk a hi huritsa teq ne uliq na huloseq uliq ta araqab lehiy ham. Lehad ne gisen aqogin uliq nab wolhamid woqan ham. Woqid teq mataw na in gigo daq na anadin tiqem daqay ham.

¹² Haqan disaipel lehim on mataw gibileneq bilaq yaqay, Ne ginad buliyeq gigo daq meqinta gileh ugiiy haq yaqay. ¹³ Haqad in bugaw meqinta kabemmo gimuzad teq in mataw gigo moq inaqa na giholib masil emad giwastitay yaqay.

Jon mataw huz negyaqta na wol eman mom

(Matyu 14.1-12; Luk 3.19-20; 9.7-9)

¹⁴ Ari mataw saw nabta gigo king Herot in Jesus abin tuhurit. Na ezaqgo Yesus abin saw bunmo lehim ayah tiqiy bug. An mataw asor in anan bilaq yaqay, Jon mataw huz negyaqta na moqan God hod-hodab wazan ta eram haq yaqay. Nazaq iyan in aholib zaway ayahimo usaqta haq yaqay. ¹⁵ Sa mataw asor bilaq yaqay, Ko Elaija haq yaqay. God mat emid bo lyahita ayon dan wastitaydaqta na amatin inmo haq yaqay. Teq mataw asor bilaq yaqay, Ko God ago nantut araq haq yaqay. Mataw kwaziqmo God ago nantut bilaq yaqayta naqanta araq haq yaqay.

¹⁶ Haqsa Herot gamuk na huritim bilam, Kwaziqmo ya bilaqan Jon mataw huz negyaqta na anat urot tayiyya ham. Ta teq God in hodhodab wazan ta eram daqagya ham.

¹⁷⁻¹⁸ Na ezaqgo kwaziqmo Herot in ama Filip awe Herodiyyas hureqim aholyon wam. In daq nazaq eman Jon tutimmo bulyonyaq, Ni God ago gunun ayahta itiyonim

ni nima awe wamta haqyaq. Haqsa teq Herot in ago mataw asor giqeman lehim in Jon wazim tiqirquq.

¹⁹ Irquran ossa Herot awe Herodiyyas agem meqin diq Jon ugad in anad emyaq, In moq nagta haqyaq. Haqad teq in wol emgo dan nagun yo hiqiyyaq. ²⁰ Na ezago aduw Herot in Jon rabunad alowan tonyaqta na ago. Herot anad emyaq, Jon in mat dimun diqta daq araq meqinta a hi amta haqyaq. Haqad in Jon gamuk bilaqsa huritad anad kabemmo emyaqta teq in huritnan anad bilaqyaqmo.

²¹ Ari abeb Herodiyyas aduw Herot anen iqamta na akaman tugwahtim. Gwahitiqan kam nab Herot humab araq ayahta tiqam. Emin in mataw aseseqta in nenaq gavman ago kabi y muzayta na teq mataw bab emaya gigo aseseqta na teq saw Galiliyib mataw marorta nagan in gibilenan bolan nenaq humab wolim didaq neqad tuqosiy. Ossa Herodiyyas gibiyad anad tiqam, Ari muran ya Jon wol emdaiqa adanteqin inaq tiqiy ham. ²² Haqad Herodiyyas in amiy eman lehim bit na aduganib gwahtiqid dorsi Herot ago mataw nenaq in amun aw na ahol waqad gime tisiriryaq. An abeb Herot aw barasta na bulonim bilam, Ni naga diq waqnan ninad bilaqaq? ham. Na ni ya ibilenid ya tinigdaiq ham. ²³ God ya ibiysa ya bilaqaq ham. Ni naga diq anan susumun yagid ya tinigdaiq ham. Ari ni ninad yaqgo og ya wamuzaqta na liqabmo uroteq asor nigdaiq haqid na dimunmo ya tinigdaiq ham.

²⁴ Haqan amun aw na asanib gwahtiqid lehim in anen tisusumun ug, Ya le naga diq anan bilaqdaiq? ham. Haqan anen bilam, Ni Jon mataw huz negyaqta naqmo afaqin waqgo bilaq ham. ²⁵ Haqan amun aw na hidmo lehim in Herot atoranmo bulon, Muranmo ni Jon mataw huz negyaqta na anat uroteq afaqin degib eme q a bo yag ham.

²⁶ In nazaq bilaqan Herot afaqan tiqiy. Na ezaqgo in ago mataw na gimeb helmo ulilib hamta na anadin emad in amun aw na aqez othasnan atuw tihiqiy. ²⁷ Ad hidmo in ago mat araq bab emaqta eman in Jon afaqin waqeq a bolnan tilah. Lehim in bit giqirquran osaytab gwahtiqid Jon anat urot tayim afaqin tuwam. ²⁸ Waqim in degib emim a bolim aw barasta na ugan in waqim a le anen tuqug. ²⁹ An abeb Jon ago disaipel in Jon wol emiya na ago huritim in bolim asan waqim a le hodhodab tiyay toniy.

*Yesus on mataw 5,000 nazaq didaq nag
(Matyu 14.13-21; Luk 9.10-17; Jon 6.1-13)*

³⁰ Ari Yesus ago mataw in giqeman uliqgø lehiyta na muleqmø ta bolim Yesus agerab humab tuwoliy. Humab wolim in lehim kabiy emiyta na teq gamuk bunmo in mataw gibileniya na awagamun in Yesus tuloniy.

³¹ Bulansa kam nabmo mataw kabemmo leh bolsa Yesus ago disaipel nenaq gikabiyen emad in didaq neq daqayta akaman hαιq iy yaqay. Nazaq iyan Yesus in ago disaipel gibilan, Bolsa i gimomo saw araq amatawun haiqtab leheq asitmo ginamur emuq ham. ³² Haqad in tuyib gwalim saw araq amatawun haiqtab in gimo tilehiy.

³³ Lehsa mataw kabemmo gibiyad ginad emiy, Ko in saw nabmo tilehay haqiy. Haqsa mataw uliq kabemmo era gisenab yuw adek muzim ameb lehim saw nab tugwahtiqiy. Gwahtiqim tuqossa teq Yesus ago disaipel nenaq tuyib abeb le gwahtiqiy.

³⁴ Gwahtiqim Yesus muy hulosad le dubub gwalimmo ame le on mataw kabemmo gibiyad in ginan anad timeqniy. Mataw na bilaqne sipsip ginamren haiqta os nog iy yaqay. Nazaq iyan Yesus suleq dimdimunta kabemmo tigibilenyaq. ³⁵ Gibilenad ossa zeq tuwolehnhan tonsa Yesus ago disaipel bolim tuloniy. Zeq tuwolehaq haqiy. Teq saw ka amatawun haiqta haqiy. ³⁶ Ni on mataw ka giqemid leheq kabiy uliq sinsin usayta kogab giholmen didaq zayeq neqiy haqiy.

³⁷ Haqan Yesus amenin emim gibilan, Negmo didaq negid neqiy ham. Haqan in bilaqiy, Sey haqiy, i gigo 200 kina* i a leheq bret kabemmo zayeq mataw biyahta ka negid neq daqayta na edowa? haqiy. ³⁸ Haqan Yesus tisusumun nag, Ta ne gigo bret ganim usaq? ham. Leheq ahol waqiy ham. Haqan in lehim ahol waqim bolim Yesus buloniy. I gigo bret abaynagin teq nabiq giger nazaqmo usaq haqiy.

³⁹ Haqan Yesus gibilan, Ne mataw gibilenid in humab ame ame emeq teq sisihun dimunta kogab osiy ham. ⁴⁰ Haqan in mataw gibilenan tuqosiy. Mataw humab asor 100 teq mataw humab asor 50 nazaq in osiy. ⁴¹ Ossa Yesus bret abaynagin na teq nabiq giger na waqim ame ulilib gwalsa in God esey ugim teq in bret na orqayim ago disaipel tinag. Negan in a le mataw negan tineqiy. Teq nabiq giger na Yesus nazaqmo orqayim mataw bunmo negan tineqiyomo. ⁴²⁻⁴³ Neqan tigiyuninan teq bret na nabiq inaq abeyan ayahmo ussa disaipel kuram 12 nazaqmo giwaqim gisihenat teq tuwoliy. ⁴⁴ Ari mataw didaq neqiyta na ginulinqan kabemmo diq 5,000 nazaq.

*Yesus yuw amalib bayim lah
(Matyu 14.22-33; Jon 6.16-21)*

⁴⁵ Ari Yesus in ago disaipel giqeman tuyib gwalim in ameb yuw-kurorqan Galiliy urotim aqurumun kozaq uliq Betsaida-ib tilehiy. Lehsa immo osim mataw dauh biyahta na giqeman giquliqab tilehiy. ⁴⁶ Lehsa Yesus gihulosim garahab God inaq gamuk emnan tugwalah. ⁴⁷ Gwalehim ossa imisor diq tikiysa ago disaipel gimuyin inaq yuwmeb liqabmo tikiyyi. Iysa Yesus wole yuw aqurumnib titur. ⁴⁸⁻⁴⁹ Tursa ago disaipel na tim ginobun ban bolsa in giholtuwan bulad luwsa in tigibiy. Gibiyad saw tihaustitaynan tonsa tarom asor ussamo in disaipel gigerab yuw bayim tilah. Lehim in disaipel gimeb gwahtiqeq bo lehdaiq haqsmo disaipel in Yesus yuw bayim lehsa ahol waqad in rabim ek tonim bilaqiy, Ko witag bo lehaq haqiy.

⁵⁰ Haqsmo Yesus hidmo gibilan, Ne giwaz meqniyyiham. Ka yaqmo lehaiq ham. Ne hi rabiy ham. ⁵¹ Haqad in tuyib gwalanmo tim timidam. Mideman disaipel gihol riten lamsa ginadnad tiqem yaqay. ⁵² Na ezaqgo in ginad gigem soqotim ussa in Yesus mataw didaq nagta na abe alulin anan ginad a hi em hasiy.

*Yesus uliq Genesaret-ib mataw moqayta kabemmo giwastitaytan dimniyyi
(Matyu 14.34-36)*

⁵³ Ari Yesus ago disaipel nenaq yuw-kurorqan Galiliy urotim lehim urum kozaq ban uliq Genesaret ago lan ezab tugwalay. Gwalim saw nab in tuyib am wazan us. ⁵⁴ Ussa Yesus muy hulosim hitiqsa mataw hidmo ahol tuwaq hasiy. ⁵⁵ Ahol waq hasad in saw nab uliq haresmo sibim lehad gibilenasa mataw bunmo Yesus edob osaqtan huritad in giyogniz gigo moq inaq na banab giqemim gisormi giqad tubol yaqay.

⁵⁶ Sa Yesus saw nabmo uliq aseseqtaw teq uliqben amikmktab in lehsa mataw in giyogniz gigo moq inaqta na giwaqeq maket-ib giqad leheq giqemid us yaqay. Usad in Yesus atoran diqmo bulon yaqay, Ni on mataw gigo moq inaqta ka gihulosid in giben ningi tubusan adekmo waziy haq yaqay. Haqsa on mataw Yesus ago tubusan adek waz yaqayta na bunmo gihol tidimniy yaqay.

7

*God ago maror i gisesan gigo gunun giquriyam
(Matyu 15.1-19)*

¹ Ari Farisi asor teq mataw Moses ago gunun hurit kemiyyta na asor in Jerusalem

* 6:37: 200 kina in bilaqne mat araq kalam 8 nazaq aduganib kam bunmo kabiy emdaqta na amenin nog.

hulosim bolim Yesus ago hib humab tuwoliy. ² Humab wolim osad in Yesus ago disaipel gisesan Juda gigo gunun a hi muzinim giben a hi suholimmo didaq neqsa in tigibiyiy.

³ Na Farisi teq Juda bunmo in gisesan gigo gunun muzinad in giben a hi suholim didaq a hi neqayta, luweq God ameb i gihol anumlan inaq iydaq haqad. ⁴ Teq mataw na maket-ib lehim muleqim a hi huzimmo in didaq a hi neqaytamo. Ad in gisesan gigo gunun naqanta kabemmo muzinayta. Muzinad in gigo reb, deg, gog teq þan gisuholaytamo.

⁵ Nazaq iyan Farisi giyogniz mataw Moses ago gunun hurit kemiya na nenaq in Yesus tisusumun ugiy, Ezaq tonim ningi disaipel in i gisesan Juda gigo gunun a hi muzinim in giben a hi suholimmo didaq tineqay? haqiy.

⁶ Haqan Yesus gibilan, Ne mataw gimileq meqinta ham. Kwaziqmo God ago nantut Aisaya in ne gilum kemim gamuk araq kazaq mar ton ham.

On mataw ka gizezabmo God abin iluwayta haqad in bilam ham. Teq in ginad gigem pesanmo God ago hib usaqta haqad in bilam ham.

⁷ Mataw na God abin samanta iluwayta haqad in bilam ham. In mataw og kabtaqmo gigo gunun anan bilaqay, God ago maror dimunta haqayta haqad in bilam ham. Ad in gunun naqmo mataw giqishunayta haqad in bilam ham. *Aisaya 29.13*

⁸ Ari Aisaya bilamta nazaq diqmo ne emad ne God ago gunun tuhulosim ne gisesan gigo gunun naqmo waz naqmo hiqiyayta ham.

⁹ Haqad Yesus bilam, Ne God ago gunun dimunta walemad ne gisesan gigo daq naqmo wazgo ne tuhurit kemiya ham.

¹⁰ Moses bilam, Ni ninen nimam giwazinad gilumsih haqad in bilam ham. Teq in bilam, Mat araq anen amam a hi qiqudinad gamuk meqinta amalib gibilawunid ne wol emid moqan haqad in bilam ham.

¹¹ Ta teq negmo kazaq bilaqayta ham. Mat araq in anen amam gilumsihgo ago nagah giqusdaqta teq in gibileneq bilaqdaq, Yaqgo nagah ka in *Korban* iyim usaqta haqdaq haqayta ham. (Hibrui nan *Korban* haqayta na alulin in kazaq. Nagah God abinib eman usaqta haqayta.) ¹² Mat na gamuk awaz meqinta nazaq gibileneq teq abeb in anad bulyeq ago nagah na amalib anen amam gilumsihgo haqsa ne wasihayta ham. ¹³ Nazaq iyan ne gisesan gigo gunun waqiyta naqmo ne muzinad ne God ago gamuk bayan woqim samanta usaq ham. Ad ne daq naqanta kabemmo emayta ham.

Yesus daq meqmeqinta mataw giqeman God ameb gihol anumlan inaq iyaqta na ginan bilam

(*Matyu 15.10-20*)

¹⁴ Haqad Yesus on mataw nab turiyta na a ta gibilenan bolan in gibilan, Ne bunmo yaqgo gamuk ka huriteq teq ne ginad em hasiy ham. ¹⁵ Nagah asanib usaqta na mat aduganib lehim in mat na ahol eman God ameb anumlan a hi iyaqta ham. Haiq ham. Nagah mat aduganib usaqta naqmo bo asanib gwahtiqim in mat na ahol eman God ameb anumlan inaq iyaqta ham. [

¹⁶ Mat aw nog in gidek nan huritgo usaqta na in gamuk ka hurit kemyi ham.]

¹⁷ Haqad Yesus ago disaipel nenaq mataw gihulosim bitab tilehiy. Lehimmo disaipel in Yesus gamuk awowun bilamta na ago tisusumun ugiy. ¹⁸ Susumun ugan Yesus gibilan, Ne mataw aseseqta ginad a hi em hasayta ko nog ne ham. Ne ginad a hi emay daqag ham. Nagah bunmo asanib usaqta na mat aduganib lehim in mat na ahol eman anumlan inaq a hi iyaqta ham. ¹⁹ Na ezaqgo nagah nazaqta na in mat agemab lehim aholib a hi usaqta ham. Haiq ham. Na mat abekoqib lehim le yayib wolehaqta ham. (Yesus nazaq haqad, in didaq bunmo anan dimunno ham.)

²⁰ Haqad in bilam, Nagah mat aduganib usaqta naqmo bo asanib gwahtiqim in mat na ahol eman God ameb anumlan inaq iyaqta ham. ²¹ Ari mataw giduganib daq meqinta gigemab gwahtiqad giqeman gihol anumlan inaq iyayta na kagzaq ham. Ni ninad meqmeqinta nigemab usaqta ham. Teq ni an a hi waqadmo an haresmo hureqim inaq usaqta ham. Teq ni rin tonaqta ham. Teq ni mat wol emaqta ham.

²² Teq ni an alulib hureqaqta ham. Teq ni mataw gigo nagah utetaqta ham. Teq ni daq meqinta amo amo emaqta ham. Teq ni nan katiya bilaqaqta ham. Teq ni yaqmo ag haqad daq daq emaqta ham. Teq ni mataw ginan nigem meqniyyata ham. Teq ni nihol abin wazan eraqaqta ham. Teq ni ninad a hi em hasadmo daq emaqta ham. ²³ Daq meqinta nawa nagan bunmo in mat aduganib usim bo asanib gwahtiqim in mat na eman God ameb ahol anumlan inaq iyaqta ham.

Aw araq Fonisiya-ibta Yesus anan helmo ham

(*Matyu 15.21-28*)

²⁴ Ari Yesus uliq na hulosim in uliq araq anan Tair haqaytab tilah. Lehim in bit araq aduganib gwahtiqim ulilemim os, mataw ya edob osaiqta na a hi hurit daqay haqad.

²⁵ Teq haiq. Amun aw araq aholib bugaw meqinta usaqta na anen in Yesus edob

osaqta na tuhurit. Huriitim in hidmo lehim Yesus anognib abakbakan ulum laquwim turad afaqin mulbunim ogib wom.

²⁶ Aw na in Juda aw a haiqta. In Grik nan bilaqyaqta teq in ago uliq diq Fonisiya saw Siriya-ibta. In lehim Yesus anogib abakbakan ulum laquwim turad tulubonyaq, Ni ya imiy aholib bugaw meqinta usaqta na muzid lehan haqyaq. ²⁷ Haqsa teq Yesus bulon, Ni hulossa yaqgo onmin didaq negid gyunin bugid teq ham. Luweq ya onmin gimen didaqta na waqeeq gaun negid neqsa yaqgo onmin gigemnan moq daqay ham. Daq nawa na in dimun a haiq ham.

²⁸ Haqan aw na amenin emim bulon, Mat Iyah ham ni helmo bilaqaq ham. Ta teq ningó onmin didaq neqsa aneglan ban ahaqenib woqsa gaun neqaytamo ham.

²⁹ Haqan Yesus bulon, Ni nazaq haqaq na ni muleeq leh ham. Bugaw meqinta na ni nimiy tuhulos ug ham.

³⁰ Haqan aw na muleqim aquliqab ta lehim bugaw meqinta na amiy tuhulos ugan amiy banab dimunmo ussa in ahol tuwam.

Yesus mat araq adek haiqta gamuk a hi emaqta wastitayan dimniy

³¹ Ari Yesus uliq Tair hulosim in uliq Saidon-ib tilah. Lehim uliq na hulosadmo in saw araq anan Dekapolis* haqaytab gwahtiqaq yuw-kurorqan Galiliy aqurum-nib tilah. ³² Lehan teq mataw in mat araq adek haiqta gamuk a hi emaqta waqim ad Yesus agerab tuboliy, in bulonid aben mat na aholib emeq wastitaydaq haqad. ³³ An Yesus mat na waqim mataw na gihulosad lehim in giholbinmo tituriy. Turad Yesus aben balaw-waz gigermo mat na adeksanib tiqam. Emim teq aben ta waqim abenab kusluwim in mat na amileqib tiqammo. ³⁴ Emadmo in ame ulilib gwalsa ahol aqurin ayahmo gwahtiqsa inmo ago nanib bilam, *Efata* ham. Na in kazaq bilam, Ni nidek hastitayan ham.

³⁵ Haqanmo mat na adeksan hastitaysa amileq abunbunan iyim usta na hulos uganmo in gamuk dimunmo tibilaqyaq. ³⁶ Sa Yesus mataw na gibilan, Ne nagah kawa ya emta ka ago ne mat araq hikidik buloniy ham. Teq haiq. Mataw na bilaqnan zaway diq iy yaqay. ³⁷ Sa mataw bunmo huriitim bilaqiy, Helmo haqiy. Mat na nagah bunmo dimunmo emaqta haqiy. In mataw gidek haiqta na giwastitaysa in gamuk tuhuritya haqiy. Ad in mataw giqez haiqta na giwastitaysa in gamuk tibi-laqytamo haqiy.

* 7:31: Mak 5.20 nab teq ni gamuk 'Dekapolis' ka alulin ahol waqdaq.

Yesus on mataw 4,000 nazaq didaq nag (Matyu 15.32-39)

¹ Ari kam nab mataw kabemmo Yesus agerab humab ta woliy. Humab wolim osad in didaq a boliyta na tineq bugiy. An Yesus in ago disaipel gibilenim bilam, ² Ya on mataw ka ginan inad timeqniyaq ham. Ya nenaq kam ezeqmanmo osan in gigo didaq tihiqiy ham. ³ Luweq in gigemnan moqad ossa ya qigemid lehad in gime sinsanid danib woq daqay ham. Mataw ka asor pesanmo boliyta ham. ⁴ Haqan in ago disaipel bilaqiy, Saw ka amatawun haiqta haqiy. I edob didaq waqeeq mataw ka negid neq daqay? haqiy. ⁵ Haqan Yesus tisusumun nag, Ta ne gigo bret ganim usaq? ham. Haqan in bilaqiy, Bret 7 nazaq diq usaq haqiy.

⁶ Haqan Yesus on mataw biyahta na gibilenan ogib tuqosiy. Ossa in bret 7 na waqim God esey ugim in orqayim teq in ago disaipel ibergo tinag. Negan in mataw gigo hib iberim iberim a tilehiy. ⁷ Ad in gigo nabiq amikmikta amulik-mulikmo usta na Yesus waqim God esey ugan in ago disaipel waqim tiqberiymo. ⁸ An mataw neqan tigiyunin bug. Giyunin bugan didaq abeyan asor osan disaipel kuraam 7 giwaqim amalib tigisiheniy. ⁹ Mataw na ginulinqan kabemmo diq 4,000 nazaq. An Yesus on mataw na gibilenan giquliq-uliqgo tilehiy. ¹⁰ Lehsa Yesus ago disaipel nenaq muy araqab gwalim saw anan Dalmantua haqaytab tilehiy.

Mataw Yesus daq araq azawayin inaqta emsa ahol waqnan bilaqiy (Matyu 16.1-4)

¹¹ Lehan teq Farisi asor Yesus agerab tuboliy. Bolim in Yesus ulum waqad buloniy, Ni God bulonid in daq araq azawayin inaqta em gwahtiqsa i ahol waqad teq i ni ninan helmo tihaqam haqiy. ¹² Haqan Yesus in Farisi gimugan meqinta na tiloyinim in ahol afaqan tiqiy. Ahol afaqan iyad ahol aqurin ayahmo gwahtiqsa in bilam, Nagaqgo mataw muran kam kabta ka in daq azawayin inaqta ahol waqnan bilaqay? ham. Ya helmo bilaqaiq ham. God daq araq azawayin inaqta mataw muran kam kabta gimen a hi em negdaq ham. Haiqmo diq ham.

Farisi giyow Herot inaq gigo gamuk awowun (Matyu 16.5-12)

¹³ Haqad Yesus ago disaipel nenaq in mataw na gihulosad muyib ta gwalim in yuw urotim aqurumun kozaq ban tilehiy.

¹⁴ Lehad disaipel gidek zizalan in bret kabemmo a hi waqiy. Bret amulikmo tuyib osta naqmo in a lehiy.

¹⁵ Lehad luwimmo Yesus era ago disaipel tigibilan, Ne Farisi teq Herot inaq gigo yis anan gihol waz naqmo hiqiyiy ham.

¹⁶ Haqan disaipel in gimo an bulonim bilaqiy, I bret haiqgam iyan daqag in bilaqaqya haqiy.

¹⁷ Haqsa Yesus huritad teq in gibilan, Ne nagaqgo "i bret haiq" haqad osay? ham. Ne gime haiqta iyim ginad a hi em hasay ye? ham. Ne ginad gigem soqotim usaq e? ham. ¹⁸ Ne gime inaqta teq ne nagah ahol a hi waqayta ham. Ne gidek inaqta teq ne gamuk huritim ginad a hi em hasayta ham. Ne gidek tizizal daqag ham. ¹⁹ Ya bret abaynaginmo orqayim mataw 5,000 negta na abeyan ne kuram ganim siheniy? ham. Haqan disaipel bilaqiy, Na i kuram 12 nazaqmo gisihen haqiy.

²⁰ Haqan Yesus bilam, Teq ya bret 7 na orqayim mataw 4,000 negta na abeyan ne kuram ganim siheniy? ham. An in bilaqiy, Na i kuram 7 nazaqmo gisihen haqiy. ²¹ Haqan Yesus gibilan, Kam gineh teq ne ginad em has daqay? ham.

Yesus in ago disaipel suleq nag

Yesus uliq Betsaida-ib mat araq ame haiqta wastitayan dimniy

²² Ari Yesus ago disaipel nenaq lehim uliq Betsaida-ib tugwahtiqiy. Gwahtiqan mataw in mat araq ame haiqta Yesus agerab a boliy, in Yesus bulonid in aben mat na aholib emeq wazid dimniydaq haqad. ²³ An Yesus mat na abenab wazim ad uliq asan ban le tugwahtim. Gwahtiqim in mat na ameqnagnib kusluwim aben emimmo tisusumun ug, Ni nagah araq ahol tuwaqaq e? ham. ²⁴ An mat na saw ahol waqad teq in bilan, Ya mataw loq gelsa gibiyaita ham. Teq ya gibiyisa in bilaqne ay nog iyim turay ham.

²⁵ Haqan Yesus aben mat na ameqnagnib a ta am. Eman mat na ameqnagin dimniyan in ame rireqim saw ahol tuwaq kemyaq. ²⁶ Sa Yesus mat na eman ago bitab lehsa in bulon, Ni bitab lehad uliq aduganib gwahtiqeq hi leh ham.

*Pita Yesus ahol alulin bilaq siram
(Matyu 16.13-20; Luk 9.18-21)*

²⁷ Ari Yesus ago disaipel nenaq eraqim saw Sisariya Filipay gigo uliq amilkmiktab tilehad luwiy. Lehad luwad teq Yesus in ago disaipel tisusumun nag, On mataw ya inan nog diq haqsa ne hurity? ham. ²⁸ Haqan disaipel bilaqiy, Mataw asor ni ninan Jon mataw huz negyaqta na amatin haqay haqiy. Sa asor ni ninan bilaqay, Ni

Elaija haqay haqiy. Sa asor bilaqay, God ago nantut kwaziqta na gigo araq daqag ni haqay haqiy. ²⁹ Haqan Yesus a ta susumun nag, Ta negmo ya inan nog diq haqay? ham. Haqan Pita amenin emim tibilam, Ni Krais ham. God mat emid bo i gilumsihdaqta amatin na ninmo ham. ³⁰ Haqan Yesus gunun negim gibilan, Ari ne yaqgo tuhurit kemiham. Teq ne ya ihol alulin na ulalab hi bilaqiy ham.

Jesus bilam, Ya moqeq teq ta eraqdaiq ham

(Matyu 16.21-28; Luk 9.22-27)

³¹ Haqad Yesus in ago disaipel suleq negim bilam, Mat Atatin teq santity ayahmo tisordaqta ham. Sa Juda gigo mataw marorta na teq mataw tamaz emayta gigo aseseqta na teq mataw Moses ago gunun hurit kemiya na in gileh tuqug daqay ham. Ugad teq in wol emid tumoqdaq ham. Moqeq kam ezeqmanmo useq teq in kayeq iyeq ta eraqdaq ham. ³² Yesus inmo moqdaqta na ahol alulin nazaq bilaq keman Pita waqim ad dan adek ban logimmo in tuwad. ³³ Wadan Yesus ahol biliyim ago disaipel bunmo gibiyad teq in Pita wadim bulon, Satan ni tukeq ya igilehun ban leh ham. Ni God anad a hi muzaq ham. Haiqgam ham. Ni mat og kabtaqmo anad muzaq ham.

³⁴ Haqad in mataw biyahita na gibilean agerab boliy, in ago disaipel na nenaq. Bolan in gibilan, Mat araq ya imuzeq bolnan haqad anad emeq in ahol wazid woqan ham. Ad ya afagan soraiqta nazaqmo in sornan anad bilaqsa in ago kruse sorid abetarib gwalan ham. In nazaq toneq teq in ya imuzeq bolan ham. ³⁵ Na ezaqgo mat nog inmo ahol anadin emad asan a lowan tonaqta na in ahol awitan tihik hulesdaq ham. Ari mat nog in yaqmo teq ya iwagamun dimunta na inaq ginadin emad ahol nog hulosaqta na in ahol awitan ulumsiheq kuluwa-kuluwmo tuqosdaq ham.

³⁶ Nagaqgo mataw og kab osad in giholyn nagah kabemmo diq rom tonayta? ham. Abeb in moqid in gigo nagah giholyn rom toniya na ezaq teq gilumsihdaq? ham. Na haid ham. In gihol awitan tihik hules daqay ham. ³⁷ Teq in nagah ogibta na amalib gihol awitan zayeq le os dimunta nab tugwahtiq daqay ye? ham. Na haid ham.

³⁸ Mataw muran kam kabta in God gileh ugad daq meqinta em bugayta ham. Sa mat aw nog in mataw meqinta na gimeb ya teq yaqgo gamuk inaq ginan gimebay woqatta na, abeb Mat Atatin in amam ago ahol anuwanib angelo tawonta kabemmo nenaq ta boleq in nazaqmo mataw na ginan amebay tuwoqdaqmo ham.

9

¹ Haqad Yesus gibilan, Ya helmo ne gibile-naiq ham. On mataw muran kam kab osayta ka gigo asor a hi moqadmo in God ago maror azawayin inaq og kab gwahtiqa ahol tuwaq daqay ham.

*Yesus ahol awaqañ lul araq diq iy
(Matyu 17.1-13; Luk 9.28-36)*

² Ari abeb kam 6 nazaq tihiqiyan Yesus in Pita, Jems teq Jon giwaqim nenaq garah araq sisarta abigmanib tugwalehiy. Gwalehim in gimomo nab giholbin tuqosiy. Ossa mataw na gimeb Yesus ahol bulyim awaqañ lul araq diq iy.³ Sa in ago tubusan hus diq zeq anuwan nog iymo. Mat araq og kabta ago tubusan suhol naqmo hiqiyan in nazaq hus diq a hi iyaqta.⁴ Ari disaipel in Yesus nazaq ahol waqad ossa Elaija ayow Moses inaq giwitam tugwahtiqiy. Gwah-tiqim in disaipel gimeb Yesus inaq gamuk bilaqad turiy.⁵ Tursa Pita in Yesus bulon, Tisa ham i kab osaupta ka in dimun diq ham. I baybay ezeqmanmo emuq ham. Araq ninmen teq araq Moses amen teq araq Elaija amen ham.⁶ Disaipel ezeqman na rab naqmo diq hiqiyad Pita anad a hi em hasadmo gamuk nazaq bilamta.

⁷ In gamuk nazaq bilaqad tursamo ongas hitiqim tigiqisih nat. Giqisih netan God aqez ongas na aduganib gehitiqim bilam, Ka ya itatin ham. Ya in anan inad bilaq naqmo hiqiyaqta ham. Ne in aqez huritiy ham.⁸ Haqanmo disaipel ezeqman na gihol bubuliyad saw waqim leh boladmo in Moses ayow Elaija inaq a ta hi gibiyiy. In Yesus amomo gigerab tursa ahol waqiy.

⁹ Ari in aweweinqmo garah na hulosim gewoqadmo Yesus disaipel ezeqman na gidek wazim gibilan, Ne nagah muran ahol waqiyta ka hikidik bilaqiy ham. Abeb ya hodhod huloseq eraqid teq ne nagah ka ago tibilaq daqay ham.

¹⁰ An in Yesus ago gamuk huritim gin-nadnad emad in gimo an bulonim bilaqiy, Yesus bilam, Ya hodhodab eraqdaq hamta ko in gamuk alulin ezaqta? haqiy.¹¹ Haqad in Yesus tisusumun ugyi, Ta ezaqta ago mataw Moses ago gunun hurit kemiyta na bilaqay, Elaija danmeb bolid teq Krais* abeb boldaq haqayta? haqiy.

¹² Haqan Yesus gibilan, Helmo ham. Elaija nagah bunmo wastitaynan haqad danmeb boldaqta ham. Teq gamuk araq kazaq usaqmo ham. Mat Atatin boleq sanctity ayahmo sorsa mataw gileh tuqug daqay ham.¹³ Ya ne gibilenaiq ham. Elaija tubol ham. Bolan mataw ginadibmo in aholib daqdaq emim timeqin toniy ham.

Kwaziqmo mat na anan gamuk mar toniyta nazaqmo in tiqemiy ham.

Yesus amun araq aholib bugaw meqinta muz

(Matyu 17.14-21; Luk 9.37-43)

¹⁴ Ari Yesus disaipel ezeqman na nenaq muleqim tigewoqiy. Gewoqim in disaipel ta asor na mataw kabemmo nenaq humab ayahta wolim ossa tigibiyiy. Sa mataw Moses ago gunun hurit kemiyta na asor in disaipel na nenaq an mugad osiy.¹⁵ Ossa mataw biyahta na in Yesus bolsa ahol waqad gihol turuh nemsia in sibim agerab lehim tubuloni, Yesus ni tigewom e? haqiy.¹⁶ Haqsa Yesus disaipel susumun negim bilam, Ne nagaggo mataw ka nenaq an mugay? ham.

¹⁷ Haqan mat araq biyahta na gilikmanib osim era Yesus tubulon, Mat Iyah ham ya igo amun matta ka a bol ham. In atenmosib bugaw ussa in gamuk a hi emaqta ham.¹⁸ Bugaw na amun aholib bolaqta nab in amun wazim ogib hunegan woqaqta ham. Woqim in ateb asabalbalin husta gwahtiqa in ate guruwad ahol baytunim usaqta ham. Ya ningko disaipel gibilinan in bugaw na muznan biyab a hi iyiham.

¹⁹ Haqan Yesus amenin emim gibilan, On mataw kam kabta ne God anan helmo a hi haqayta ham. Kam ganim teq ya nenaq a ta osdaiq? ham. Kam ganim teq ya ne ginad siqim iyaqta na ago a hi bilaqad ya ne gigo afaqan sordaiq? ham. Ari amun a boliy ham.²⁰ Haqan in amun na Yesus ago hib a boliy.

A bolsamo bugaw meqinta na in Yesus ahol waqad in amun na othasan ogib woqim ahol bubuliyad usad asabalbalin husta atenmosib gwahtiqaq.²¹ Sa Yesus amun amam tisusumun ug, Kam ganim amun aholib moq ka tuqusta? ham. Haqan amam bilam, In amun amik osadmo in kazaq emyaqta ham.²² Tutimmo bugaw meqinta na amun wol emnan tonad in faqab teq yuwmeb hunegan woqaqta ham. Ari ninmo ningko zaway ussun teq ni i ginan nadin meqniya gilumsih ham.

²³ Haqan Yesus bulon, Ni nagaqgo bilam, Ningko zaway ussun teq i gilumsih haqad ni bilam? ham. Nazaq ni hi bilaq ham. Mat nog in helmo Mat Atatin ago zaway inaqta haqid teq God in mat nazaqta na ayon nagah tiqem ugdaq ham.²⁴ Haqan hidmo amun amam dedibmo bilam, Ya helmo haqaiqta teq ya inad siqim iyaq ham. Ni ya ilumsih ham.

²⁵ Yesus in mataw kabemmo agerab bolsa gibiyad in bugaw meqinta na atoranmo bulon, Bugaw ni gamuk a hi emaqta nan a

* **9:11:** Gamuk Krais ka alulin "God mat emid bo i gilumsihdaqta na amatin" haqayta.

hi huritaqta ya ni nibilenaiq ham. Ni amun ka huloseq gwahtiqt ham. Gwahtiqt le in amuganib ta hi woq ham.²⁶ Haqan bugaw meqinta na ek tonim amun wol hasan woqim abensen hunegsamo in amun hulosim gwahtiqtum tituk. Tukim lehsa amun na bilaqne mat tumomta nog iy. Iyan mataw kabemmo bilaqiy, Amun ka tumom haqiy.²⁷ Teq haid. Jesus amun na abenab wazim wazan eraqim titur.

²⁸ Abeb Jesus bitab lehim in ago disaipel nenaq giholbinmo osad disaipel tisusumun ugiy, I ezaq iyim bugaw meqinta ko a hi muz? haqiy.²⁹ Haqan Jesus bilam, Ne nagah araq amalib bugaw naqanta a hi muz daqay ham. Haiq ham. Ne God amomo bulonad susumun ugeq teq ne bugaw naqanta tumuz daqay ham.

Jesus ame gigerta bilam, Ya moqeq teq ta eraqdaiq ham

(Matyu 17.22-23; Luk 9.43-45)

³⁰ Ari Jesus ago disaipel nenaq saw na hulosim le saw Galiliy-ib tugwahtiqt. Gwahtiqtum lehad in le edob osaqla na ago mat araq huritgo in hulos.³¹ Na ezaqgo in ago disaipel suleq negyaqta na ago iyan. Suleq negad in gibilenyaq, Mat araq teq Mat Atatin waqeq mataw gibenab tiqemdaq haqyaq. Emid teq in wol emid tumoqdaq haqyaq. Moqeq kam ezeqmanmo useq teq in kayeq iyeq ta eraqdaq haqyaq.³² In nazaq bilaqsa ago disaipel ginad a hi em has yaqay. Ad teq in Jesus susumun ugنان rab yaqay.

God ago maror aduganib nog in mat ayah diqta?

(Matyu 18.1-5; Luk 9.46-48)

³³ Ari in lehim uliq Kapaneam-ub tugwahtiqt. Gwahtiqtum in bitab lehim tuqosad teq Jesus in ago disaipel tisusumun nag, Ne danib naga gamukin an bulonim bulonim boliy? ham.

³⁴ Haqan disaipel gizezmo hiqiyim osiy. Na ezaqgo in danib bolad in gimo an bulonim bilaq yaqay, I gilikmanib nog diq in ayah diqta? haq yaqay.³⁵ An Jesus os woqim osad ago disaipel 12 na gibilenan agerab boliy. Bolan in gibilan, Mat aw nog in dammebta iyan haqad in ahol waqeq abeb diq emeq teq in mataw bunmo gigo kabibiy mat samanta iyan ham.³⁶⁻³⁷ Haqad in amun amikta araq waqim eman nob negim tursa in ay netim teq disaipel gibilan, Mat nog in amun kaqanta ya ibinib bolsa ahol waqad wazinaqta na in ya iwazinaqmo ham. Teq in ya imomo a hi iwazinaq ham. Haiq ham. In ya imam iqeman bolta na wazinaqmo ham.

† **9:42:** Mataw asor ginad emay, Jesus onmin amikmikta ginan bilamta na in ago disaipel ta asor gabin haiqta na ginan bilam haqay.

*Mat araq Yesus ananib bugaw meqinta gimuzsa disaipel wasihiy
(Luk 9.49-50)*

³⁸ Ari Jon in Jesus bulon, Tisa ham mat araq ni nibinib bugaw meqinta gimuzsa i luwim ahol waw ham. Teq mat na i inaq araqib a hi luwad iyan i wasihad bulon, Ni nazaq ta hi em haw ham.³⁹ Haqan Jesus bilam, Ne hi wasihiy ham. Mat araq ya ibinib daq azawayin inaqtameq in hidmo ya igilehnib nan meqinta a hi bilaqdaq ham.⁴⁰ Na ezaqgo mat geg a hi igaqta na in i giyowta ham.⁴¹ Ad mat aw nog in ne gibiy kemad bilaqdaq, Ka Krais ago mataw haqad teq in ne gimen yuw soqoreq negid uluw daqayta na, ya helmo ne gibilenaiq ham. Mat na inaqmo God abenab naw dimunta tuwaqdaqmo ham.

Yesus daq hiihq mataw ginad helta meqin tonaqta na ginan bilam

(Matyu 18.6-9; Luk 17.1-2)

⁴² Haqad Jesus bilam, Mat nog in onmin amikmikta ya inan helmo haqayta na gigo araq[†] baymuzsa in anad helta na hulosnan tonid mat daq nazaq emdaqta na in yaqqaq meqin diq tuwaqdaq ham. Na in kwaziqmo gig ayahta anatguminib am wazeq kamismeb huneg nagiyta ham. Hunegid mat na moqeq daq meqinta na a hi emeq in yaqqaq faq meqin diqta na a hi waq nagta ham.

⁴³⁻⁴⁴ Ari ni niben araq kat nigid ni ninad helta hulosnan tonad ni niben na uroteq hunegid lehan ham. Ni niben amulikmo inaq iyeq os dimuntab lehdaqta na in dimunmo ham. Ari ni niben giger inaq iyeq os meqintab lehdaqta na in meqin diq ham.

⁴⁵⁻⁴⁶ Teq ni nisen araq kat nigid ni ninad helta hulosnan tonad ni nisen na uroteq hunegid lehan ham. Ni nisen amulikmo inaq iyeq os dimuntab lehdaqta na in dimunmo ham. Ari ni nisen giger inaq iyeq os meqintab lehdaqta na in meqin diq ham.

⁴⁷ Teq ni nimeqnagin araq kat nigid ni ninad helta hulosnan tonad ni nimeqnagin na othaseq hunegid lehan ham. Ni nimeqnagin amulikmo inaq iyeq God ago maror aduganib gwahtiqtadaqta na in dimunmo ham. Ari ni nimeqnagin giger inaq iyeq os meqintab lehdaqta na in meqin diq ham.⁴⁸ Saw nab kadum gisan neqayta na a hi hiqiyayta ham. Teq nab faq oyad a hi miyaqtamo ham.

⁴⁹ Ne nazaq giholib ginad meqinta gwahatiqsa wolad gihol loyinsa in bilaqne faq ginoy nog iydaqta ham. Teq God in faq nazaqta amalib ne bunmo ginoy nog iysa

teq ne bilaqne kamis dimunta nog tiqiy daqay ham.

⁵⁰ Kamis in nagah araq dimunta ham. Teq kamis agon hiqiyid ni ezaq tonid teq in agon inaq a ta iyidaq? ham. Nazaq iyan ne gimugan bilaqne kamis dimunta nog iysa ne an ulumsihad an hi bayiq ham.

10

Yesus on mataw an tuwaqim teq an ta hulosayta na ginan bilam

(Matyu 19.1-12; Luk 16.18)

¹ Ari Yesus saw na hulosim le saw Judiya-ib gwahtiqim teq in le yuw Jodan wrotim aqurumun kozaq ban le luw. Luwsa mataw dauh kabemmo boleq agerab humab tuwol yaqay. Humab wolsa Yesus in ago daq muzim God ago suleq tigibilenyaq. ² Gibilensa Farisi asor Yesus ulum waqnar haqad agerab tuboliy. Bolim in Jesus tisusumun ugiy, I Juda gigo maror bilam, Mat in ago aw muznanz turnuzdaq hamta na in daq dimun o daq meqin? haqiy.

³ Haqan ta Yesus in susumun negim gibilan, Moses naga gununin ne nag? ham.

⁴ Haqan in bilaqiy, Moses gunun emim bilam,

Mat in aw muz agamukin mar toneq teq in ago aw tumuzdaq haqad in bilam haqiy. *Lo 24.1-4*

⁵ Haqan Yesus gibilan, Ne gigem soqotmin ussa ne God anad a hi muzinsa iyan Moses ne gimen gunun na mar ton nag ham. ⁶ Teq mebmebmo diq,

God nagah bunmo giqamta nab in on mataw matmatta teq onqonta in-aqmo giqam ham. *Jenesis 1.27; 5.2*

⁷ Daq alulin naqmo ago mat in anen amam gihuloseq in awe aholib tisoqotdaq ham. ⁸ Soqoteq in giger gihol amulikmo iyeq tuqos daqay ham. *Jenesis 2.24*

Nazaq iyan mat awe inaq in gihol giger a ta hi iyayta ham. Haiggam ham. In giger gihol amulikmo tiqiyim osayta ham. ⁹ Nazaq iyan nagah God am tuwazan usaqta na mat araq in ta hi urotan ham.

¹⁰ Ari abeb Yesus ago disaipel nenaq le bit aduganib gwahtiqim teq disaipel in gamuk na ago tisusumun ugiy. ¹¹ Susumun ugan Yesus gibilan, Mat awe muzad aw ta araq muturta waqaqta na in awe ameba na meqin tonad in bilaqne mat ta araq ago aw inaq luw nog iyaqta ham. ¹² Ad daq nazaqmo aw aduw hulosim le mat ta araq muturta waqaqta na in aduw ameba na meqin tonad in bilaqne aw ta araq ago mat inaq luw nog iyaqtamo ham.

Yesus onmin amikmikta gidimun tonad gibar ton

(Matyu 19.13-15; Luk 18.15-17)

¹³ Ari on mataw gigo onmin amikmikta Yesus agerab giqad tubol yaqay, Yesus giwazad gidimun tondaq haqad. Teq haq. In onmin giqad bolsa disaipel ginadat tigimuz yaqay. ¹⁴ Sa Yesus in disaipel nazaq tonsa gibiyad agem timeqniy. Agem meqniyisa in gibilan, Ne onmin gihulosisd yaqgo hib boliv ham. Ne hi giwasihiy ham. On mataw naqantaqmo God ago maror aduganib gwahtiqayta ham. ¹⁵ Ya helmo ne gibilenaiq ham. Mat aw nog in onmin gibin haiqta ka nogmo iyad God ago maror ahaqenib a hi oseq in God ago maror na aduganib le a hi gwahtiq daqay ham. ¹⁶ Haqadmo in onmin giqay netim aben giholib emim giwazad tigibar ton.

Mat araq ago nagah kabemmo usaqta na Yesus inaq gamuk bilam

(Matyu 19.16-30; Luk 18.18-30)

¹⁷ Ari Yesus eraqim danib lehad luwsa mat araq sibim bolim in anognib abakan ulum laquwim turad tulubon, Tisa dimunta ham, ya ezaq tonid teq God in ago os dimunta kuluwa-kuluwmo osayta na tiyagdaq? ham. ¹⁸ Haqan Yesus bulon, Ni ninad ezaq emad ya inan dimun haqaq? ham. God amomo in dimunta ham. ¹⁹ Haqad in mat na bulon, Gunun bunmo Moses bilamta na ago ni tuhurit ham. Ni mat araq wol emid hi moqan ham. Ni an alulib hureqeq inaq hi us ham. Ni hi rin ton ham.

Ni hazizirib mat araq hi kat ug ham. Ni mat araq kat ugeq ago nagah samanmo hi waq ham.

Ni ninenmaman giqez hurit ham. *Kisim Bek 20.12-16*

²⁰ Haqanmo mat na bulon, Tisa ham ya amunibmo osad gunun nagan bunmo muzim bolim muran ya mat ayah tiqiy ham. ²¹ Haqan Yesus mat na ahol waqad in anan anad bilam. Anad bilaqsa in bulon, Ni daq amulikmo em nagta a hi emaq ham. Ni leheq ningo nagah bunmo gizayedq amenin waqeet teq ni mataw ginaghan haiqta neg ham. Ni nazaq toneq teq Heven-ib ningo nagah kabemmo diq inaq iyadaq ham. Ad ni daq na emeq teq ni ya imuzeq bol ham. ²² Haqan mat na gamuk nazaq huritim in anobun iyim anad ayahmo meqniyisa tilah. Na ezaqgo in ago nagah dimdimunta kabemmo usta na ago iyan.

²³ Ari mat na tilehsa teq Yesus ahol buliyim in ago disaipel gibiyad gibilan, Mataw gigo nagah kabemmo inaqta na in God ago maror aduganib gwahtiqgo afaqan diq ham. ²⁴ Haqan disaipel gamuk na huritim gihol turuh nam. Samo Yesus a ta gibilan,

Yaqgo onmin ham mataw God ago maror aduganib gwahtiiggo in afaqan diq ham.²⁵ Haqad in gamuk awowun araq gibilenim bilam, Karuw ayulta anan kamel haqayta na in nidel akwiyaknib le tugwahtiqaq e? ham. Hikidik ham. Ad nazaqmo mat ago es kabemmo ginadin emaqta na in God ago maror aduganib le a hi gwahtiqaq ham.

²⁶ Haqan disaipel gihol turuh nemsia in an bulonim bilaqiy, Nazaq iyid teq mat araq diq God ago os dimun nab le a hi gwahtiqaq haqiy. ²⁷ Haqsa Yesus giblyad gibilan, Mataw in gimo gigo zawayib le a hi gwahtiqaq haqayta ham. Ari God in mat nog a haitq ham. Inmo mataw gilumsihsa teq in le tugwahtiqaq haqay ham. Na ezaqgo in nagah araq a hi emdaqta a haitq ham.

²⁸ Haqan Pita tubulon, Ni i gibiy ham. I nagah bunmo gihulosim i nimno nimuzim ninaq tilehauq ham.²⁹⁻³⁰ Haqan Yesus bilam, Ya helmo ne gibileniq ham. Mat aw nog in ya iwagamun huritim teq in ya imuzeq bolnan haqad in gigo bit teq gimaqbaban teq gihiyani teq ginennaman teq in gigo onmin teq in gigo og gihulosiyya, on mataw na bunmo og kab osad in gigo nagah gihulosiyya na amenin 100 nazaq tuwaq daqay ham. Waqad in gigo bit teq gimaqbaban teq gihiyani teq ginennaman teq gigo onmin kabemmo diq inaq iy daqay ham. Ta teq in ya imuzeq bolsa mataw in afaqan tineg daqaymo ham. Ad abeb kam muturta nab teq mataw na in God ago os dimuntab gwahtiqaq kuluwa-kuluwmo tuqos daqay ham.³¹ Kam nabmo mataw gabin inaq iyim osayta na kabemmo in gabin hiqiyad bo abeb tiqiy daqay ham. Sa mataw kabemmo og kab gabin haitqta na in gabin inaq iyeq le danmeh tiqiy daqay ham.

Jesus ame ezeqmanta bilam, Ya moqe q teq ta eraqdaiq ham

(Matyu 20.17-19; Luk 18.31-34)

³² Ari kam nab Yesus danib gwahtiqaq uliq Jerusalem-ub lehad in danmeh lehsa ago disaipel in abeb muzim inaq lehad teq in ginad haresmo em yaqay. Samo mataw ta asor in Yesus ago disaipel gibeb gimuzim nenaq lehad in gihol rabsa leh yaqaymo. Lehsa Yesus in ago disaipel 12 na giwaqiqm giqad le giholbinmo turad teq in aholib daq gwahtiqaqta na anan tigibilan.³³ In bilam, Ne huritiy ham. Muran i Jerusalem-ub tugwalehaq ham. Nab teq mat araq in Mat Atatin waqeq mataw tamaz emayta gigo aseseqta na giyogniz mataw Moses ago gunun hurit kemiyyta na nenaq gibenab tiqemdaq ham. Emid in ayon tibilaq daqay, Wol emid moqan haq daqay ham. Haqad in mataw en ta araq Juda a haitqta na gibenab

tiqem daqay ham.³⁴ Emid teq in Mat Atatin bilawunad kusluw ugad tuwoltitay daqay ham. Woltitayeq teq in wolemid tumoqdaq ham. Moqeq kam ezeqmanmo useq teq in kayeq iyeq ta eraqdaiq ham.

Jems ama Jon inaq maror iyeq osnan bilaqiy

(Matyu 20.20-28)

³⁵ Haqan teq Sebediy atatniz giger Jems ama Jon inaq in Yesus buloniy, Mat Iyah haqiy i giger nagah araq ago tisumun nignan haqiy. Nagah na ni i gimen tiqemdaqta haqiy.³⁶ Haqan Yesus gibilan, Ya ne giger gimen naga diq emdaiq? ham.³⁷ Haqan in bilaqiy, Abeb ni maror ayah diqta iyeq ni nibin saw bunmo lehsa teq ni i giger ban igid i ninaq tuqosam haqiy. I ni nigerab niqabun ban teq ninasaran ban ossa on mataw bunmo i gihaqenib os daqay haqiy.

³⁸ Haqan Yesus gibilan, Ne nagah anan susumunayta ka ago ne a hi hurit kemiyy ham. Gog ayuwun agan meqin diqta ya uluwdaqta na asor ne giger tuquluv daqaymo ye? ham. Teq santitiy ya iqish bugdaqta na in ne giqisihsa ne tisor daqay ye? ham.³⁹ Haqanmo giger na bilaqiy, I nazaq tiqemam haqiy. Haqan Yesus gibilan, Helmo ham. Ya gog ayuwun agan meqinta uluwdaqta na nogmo ne tuquluv daqaymo ham. Teq ya santitiy sordaiqta nazaq ne tisor daqaymo ham.⁴⁰ Ari nog diq ya iben iqabun ban osdaqta na teq nog ya iben inasaran ban osdaqta na in yaqgo nagah a haitq ham. God in mataw gingga gimen ban tuwastitayan usaqta naqmo in ban na tuwaq daqay ham.

⁴¹ Ari disaipel 10 na gamuk na huritim in Jems ama Jon inaq gigem meqinta tineg yaqay.⁴² Negsa Yesus gibilenan agerab bolan in gibilan, On mataw en ta asor Juda a haitqta nagan gigo maror aseseqta in gihol abin iluwad igmo ag haqad osayta ham. Ad in gigo walmataw giqemid in gimo ginad muzad gihaqenib iyeq osgo in giwaz meqniyyata ham. Na ago ne tuhuriyyta ham.⁴³ Teq ne in gigo daq na hikidik muziniy ham. Ne gilikmanib mat nog in mataw ayahta iyeq osnan haqad in ahol wazid woqsa in ne gilumsiheq gimen kabiy eman ham.⁴⁴ Ad mat nog in ne gigo mat ameba iyeq osnan haqad in ne gigo kabibiy mat samanta iyeq osan ham.⁴⁵ Na ezaqgo Mat Atatin in mataw giqemid inmen kabiy sorgo a hi bol ham. In mataw gigo kabibiy mat nog iyeq in gigo afaqan inmo ahol ugad teq in ahol amalib mataw kabemmo gizayeq bab gibenab ta giwaqgo haqad in bolta ham.

Yesus mat araq ame haiqta wastitayan dimniy

(Matyu 20.29-34; Luk 18.35-43)

⁴⁶ Ari Yesus ago disaipel nenaq teq mataw asor dauh biyahta nenaq in uliq ayahta Jerusalem-ub lehad luwim le uliq Jeriko-ib tugwahtiqiy. Gwahtiqim in uliq na hulosim lehsa Timeus atatin anan Bartimeus haqayta na in ame haiqta iyim dan adekib osad nagah anan sunad osyagta. ⁴⁷ Osad in Yesus mat Nasaret-ibta bolasq haqsa abin tuhurit. Huritim in dedibmo lileyeq bilaqyaq, Yesus haqyaq. Devit atatin* ⁴⁸ Haqsa mataw kabemmo mat na wadad buloni. Ni niqeziq haqiy haqiy. Teq haqiy. In dedibmo lileyeq a ta bilaqyaq, Yesus haqyaq. Devit atatin haqyaq. Ni ya inan ninad meqniyan haqyaq.

⁴⁹ Haqsa Yesus bolim turad in mat na aqez huritadmo bilam, Bulonid ya igerab bolan ham. Haqan mataw na in mat ame haiqta na bulonim bilaqiy, Kadoy haqiy ni ninad dimniy haqiy. In timibilenaq haqiy. Ni eraeq aqerab leh haqiy.

⁵⁰ Haqan mat ame haiqta na ago tubusan ahol isihim usta na hasim hulosan woqsa in hidmo eraqim Yesus aqerab tilah.

⁵¹ Lehan Yesus bulon, Ya ni ezaq nitondaiq? ham. Haqan mat ame haiqta na bilam, Mat Iyah ham ya saw ahol waqnan inad bilaqaq ham. ⁵² Haqan Yesus bulon, Ni leh ham. Ni ya inan helmo hamta naqmo niqeman ni nime tidimniy ham. Haqan muran diq nawaqmo mat na ame hastitayan in saw ahol tuwaqyaq. Saw ahol waqad in Yesus muzim inaq Jerusalem-ub tilah.

Yesus santitiy sorim moqim teq ta eram

11

Yesus king nog iyim le uliq Jerusalem-ub gwahtim

(Matyu 21.1-11; Luk 19.28-40; Jon 12.12-19)

¹ Ari Yesus ago disaipel nenaq le Jerusalem sinsin tuqugad in le uliq giger Betfage teq Betaniy gigerab tugwahtiqiy, garah Oliv asenab. ² Gwahtiqim Yesus in ago disaipel giger gigezman damneb lehsa in gibilan, Ne le uliq ginobun ban usaqta kob gwahtiqeqmo donki amidon araq amalib asit a hi luwiya nawa am wazan tursa ne ahol tuwaq daqay ham. Ahol waqeq ne haseq a boliy ham. ³ Sa mat araq gibileneq bilaqdaq, "Ne nagaqgo nazaq emay?" haqid ne kazaq buloni

* **10:47:** Isrel on mataw ginad em yaqay. God mat emid bo i gilumsihsaqtta amatin na in i gises Devit asenlulib tugwahtiqdaq haq yaqay. Haqad luweq Yesus in mat naqmo iydaq haqad teq mataw asor in anan Devit atatin haq yaqay." haqyaq. Ni ya inan ninad meqniyan haqyaq.

ham. Iyahta ago kabiy inaq iyan haqiy ham. Kabiy na higiyid teq in hidmo emid ta boldaq haqad ne buloni ham.

⁴ Haqan giger na lehim donki araq minminta bit araq aqezab am wazan tursa ahol tuwaqiy. Ahol waqad in donki na aqamun tihasi. ⁵ Hassa mataw nab turiya na tisusum negiy, Ne giger nagaqgo donki minminta na aqamun hasay? haqiy.

⁶ Haqan Yesus gibilanta nazaqmo in mataw na tigibileniy. Gibilanan mataw na 'dimunmo' haqanmo in donki amidon na tuwaqiy. ⁷ Waqim in Yesus aqerab a lehim in gigo tubusan asor hasim donki amalib emanmo Yesus donki amalib tuqos. ⁸ Osim lehsa mataw kabemmo in gigo tubusan hasim danib gihureniy. Gihurensa asor ay aben amikmikta giwaqim a bolim danib gihunegim giqad lehiy. ⁹ Dan balaw tonim hulosad teq mataw asor ameb lehad mataw asor abeb bolad in lileyim bilaq yaqay.

God abin soriy haq yaqay.
Mat ka Iyahta abinib bolan i ginad bilaq gigayinaq haq yaqay.

¹⁰ Teq kwaziqmo i gises Devit maror iyim osta na akaman diq a ta gwahtiqsa i ginad tidimniy hasaq haq yaqay.

I God abin sorid ulilibmo diq gwalan haq yaqay.

¹¹ Ari Yesus le uliq Jerusalem-ub gwahtiqim Tempel-ib tilah. Lehim Tempel ago gel aduganib gwahtiqim luwad in nagah bunmo ahol waqad luwsa tarom tiqiyinan tonsa in ago disaipel 12 na nenaq usnan haqad uliq Betaniy-ib muleqim ta lehiy.

*Yesus bilaqan ay fik araq may
(Matyu 21.18-19)*

¹²⁻¹³ Lehim usim tarommo in eraqim Betaniy hulosim Jerusalem-ub ta lehad luwimmo Yesus aqem moqsa in ay fik araq pesanmo tursa ahol waqad in anon waqan aqerab tilom. Loqim in anon araq ahol a hi wam. Haiqgam. Ananmo us. Na ezaqgo kam na in ay fik anon emgo akaman a haiq. ¹⁴ An Yesus ay na bulonim bilam, Ni ninon a ta hi emsa mataw ninon araq waqeq a ta hi neq daqay ham. Haqsa ago disaipel tuhuritity.

*Mataw Tempel-ib mani akabiyan emsa
Yesus gimuzan asan ban gwahtiqiy
(Matyu 21.12-17; Luk 19.45-48; Jon 2.13-22)*

¹⁵ Ari Yesus ago disaipel nenaq le Jerusalem-ub tugwahtiqiy. Gwahtiqim Yesus le Tempel agelin aduganib gwahtiqim in mataw nagah gizayad osiyya na gimuzan in tukim asan ban gwahti tileh

yaqay. Lehsa in mataw mani amo amo waqad amenin bit na ago mani negayta na gigo ban otbuliyan tuwom. Teq in mataw ah hushusta* God ayon tamaz emgo gizayata na gigo ban nagan inaqmo giqot buliyan woqymo.¹⁶ Sa mataw Tempel a hi wazinad in saw na agem siseyim nagah sorim leh bolad luwsa Yesus gibiyad in gunun emim gibilan, Ne Tempel ago saw ka wazinad nagah hareshmo sorad uliq gem ka siseyad hi luwiham.¹⁷ Haqad in mataw suleq negim kazaq gibilan, God ago marib in gamuk araq kazaq bilam ham.

Mataw yaqgo bit anan bilaq daqay, On mataw en bunmo God inaq gamuk emgo abitan haq daqay haqad in bilam ham.¹⁸ *Aisaya 56.7*

Ta teq ne bit ka eman in mataw rin tonayta gigo bit nog tiquy ham.

¹⁸ Ari mataw tamaz emayta gigo aseseqta na giyogniz mataw Moses ago gunun hurit kemiya na nenaq in Yesus ago gamuk nazaq huritim in wol emid moqqa adanteqin tinagun yaqay. Teq in Yesus rabun yaqaymo. Na ezaqgo on mataw bunmo Yesus ago suleq huritad gihol turuh nemsia in wazin yaqayta na ago iyan.

Mat helmo diq haqad God bulonsa in nagah ugaqta
(Matyu 21.20-22)

¹⁹ Ari imisor tiquysa Yesus ago disaipel nenaq Jerusalem hulosim tilehiy. ²⁰ Lehim usim eraqim tarommo in Jerusalem-ub ta lehad luwimmo in ay fik na a ahol ta waqiy. Ay na aninin, abeqar teq anan inaqmo tumay bugim tur. ²¹ Sa Pita in irimo Yesus gamuk bilamta na anadin emad in Yesus bulon, Iyahta ham ni ay ka ahol waq ham. Irimo ni ay fik anan bilam ‘meqniedydaq’ hamta ka tumay bug ham. ²² Haqan Yesus bilam, Ni ninad ayahmo God amomo ago hib usan ham. ²³ Ya helmo ne gibilenaiq ham. Mat anad amulikmo ussa in helmo God nagah yaqmen tiqem yagdaq haqqa, mat na garah ko bulonid in eraqeq sortukeq le kamismeb twoqdaq ham. ²⁴ Na alulin nazaq iyan ya ne gibilenaiq ham. Ni nagah araq anan God susumun ugad bilaqeq “Helmo God tiyagdaq” haqid God nagah na tinigdaq ham. ²⁵ Ari ni God inaq gamuk tiqemnan haqad luweq ni mat araq nimeqin tonta na anadin emdaq ham. Nazaq iyid danmeeb ni mat na ago daq meqinta na walemed anadin ta hi em ham. Ad teq ni Gimam Iyah Heven-ib osaqla na ninga gamuk bulon ham. Ni nazaq tonid teq God nazaqmo ninga daq meqinta giwalemad in ni niqez tuhuritdaq ham. [²⁶ Ari ni mat na ago daq meqinta a hi

walemid i Gimam Ulilib Osqa na in ninga daq meqinta a hi giwalemdaqmo ham.]

Mataw aseseqta in nog Jesus ahol abin ugta na anan susumun ugiy
(Matyu 21.23-27; Luk 20.1-8)

²⁷ Ari Yesus ago disaipel nenaq Jerusalem-ub a ta lehiy. Lehim Yesus Tempel agelin aduganib loq gelad luwsa mataw tamaz emayta na giyogniz mataw Moses ago gunun hurit kemiya na teq Juda gigo mataw marorta nagan in Yesus agerab tuboliy. ²⁸ Bolim in Yesus tisusumun ugiy, Ni nibin ezaqta iyim ni daq kagan emaq? haqiy. Teq nog diq nibin na nigan ni kazaq emaq? haqiy.

²⁹ Haqan Yesus gibilan, Ta ya nazaqmo nagah araq ago susumun negid ne amenin emiy ham. Ne yaqgo susumun ka amenin emid teq nog ibin yagan ya daq kagan emaiqta na ago ya tigibilendaiqmo ham.

³⁰ Ari Jon mataw huz negyaqta na ago kabiy Heven-ib bol o haq in matawmo gigo hib kabiy na wamta? ham. Ne yaqgo gamuk ka amenin bilaqid ya huritiq ham.

³¹ Haqan mataw aseseqta na in gimo an mugad bilaqiy, I bilaqam, Kabiy na God ago hib bolta haqid in tibilaqdaq, Ta nagaqgo ne Jon ago gamuk huritim anan helmo a hi haqiy? haqdaq haqiy. ³² Ari i bilaqam, Kabiy na matawmo gigo hib bolta haqid mataw biyatha ka eraqeq i ezaq giton daqayta na i a hi hurit haqiy. Na ezaqgo on mataw na bunmo Jon anan God ago nantut araqmo diq haqsa mataw marorta nagan in ginan tirab yaqay. ³³ Nazaq iyan in Yesus ago susumun na amenin emim buloniy, I a hi hurit haqiy. Haqan Yesus gibilan, Ya nazaqmo ham. Nog ibin yagan ya daq kagan emaiqta na ago ya a hi gibilendaiqmo ham.

12

Mataw meqinta am wain akabiyen emiyta gigo gamuk awowun
(Matyu 21.33-46; Luk 20.9-19)

¹ Haqad Yesus in mataw aseseqta na gamuk awowun araq gibilenim bilam, Mat araq am wain anagin kabemmo leyim in tigel ton ham. Gel tonim in yay araq wain anon em woqid bay ninaleq ayun waqgota na titay ham. Na tihiqyan in mat kabiy wa-muzdaqta ayon bit araq asen sisqta emim in kabiy na mataw asor gibenab tiqam ham. In anad mataw na in gimo giholyon kabiy emad wain anagin asor waqad asor in ya yag daqay haqad ham. Kabiy anamren anad nazaq emad gibilenim hulosad in era uliq araq pesantab tilah ham.

² Lehim ossa wain anagin waqgo akaman tugwahtiyan in ago kabibiy mat araq eman

* **11:15:** Ah na God ayon tamaz emgo gizay yaqayta.

mataw wain akabiyan emayta na gigerab tilah ham. In leheq kabibiy mataw na gibenab wain anagin asor tuwaqdaq haqad ham. ³ Teq haiq ham. Kabibiy mat na lehanmo mataw wain akabiyan emayta na in wazim woltitayim muzan samanmo muleqim tilah ham. ⁴ Lehan kabiy anamren in kabibiy mat ta araq eman tilah ham. Lehan in mat na afaqin wolturim meqin diq toniy ham. ⁵ Anmo in kabibiy mat araq eman a ta lah ham. Lehan in mat na wol eman tumom ham. Mogan kabiy anamren in ago kabibiy mataw kabemmo gigemjan leh yaqay ham. Lehsha mataw akabiyan emayta na in asor ginolad asor in ginol eman tumoqiy ham.

⁶ Ari kabiy anamren ago mat amulikmo ticiy ham. Na in atatinimo in anan anad bilaq naqmo hiqiyqahta ham. In anad am, Ya itatin em lehid teq mataw na in aqez tuhurit daqay haqad in eman abebtanta tilah ham. ⁷ Teq haiq ham. Mataw kabiy wamuzayta na in gimo an bulonim bilaqiy, Abeb mat ko amam moqid in amam ago ahuran nagah bunmo tuwaqdaqta haqiy ham. Bolsa i mat ko wol emid moqanno haqiy ham. Moqsa amam ago kabiy ka igmo waquq haqiy ham. ⁸ Haqadmo in mat na wazim wol eman moqan in asan waqim kabiy asan ban hunegan tilah ham.

⁹ Nazaq iyan kabiy anamren na ezaq ton-daq? ham. In boleq mataw wain akabiyan wamuzayta na ginol em bugad teq in ago kabiy na mataw ta asor bunta gibenab tigemdaq ham. ¹⁰ Haqad Jesus bilam, Ne God ago mar ahol a hi waqayta ye? ham. Mar nab gamuk araq kazaq bilam ham.

Tituq mataw anan bilaqiy ‘meqin’ haqiyta naqmo in awaz meqin diq turad bit anon bunmo soraq haqad in bilam ham. ¹¹ Iyahtaqmo nagah na eman gwahtiyan i ahol waqsa in dimun diq iyaq haqad in bilam ham. *Buk Song 118.22-23*

¹² Yesus nazaq haqan mataw aseseqta na ginad tigemiy. Yesus i gibin wazid woqgo haqad gamuk awowun na bilam haqiy. Haqad in Yesus waznan ginad bilaqsa teq in ta on mataw girabun yaqay. Nazaq iyan in Yesus hulosim tilehiy.

Mataw Sisa takis ugayta na ago in Yesus ulum waqiy
(Matyu 22.15-22; Luk 20.20-26)

¹³ Ari mataw aseseqta na lehim in Farisi asor teq Herot ago matawtaw asor nenaq gibilenan tilehiy, in leheq Yesus kat ugid in gavman gigo gunun araq itiyonad gamuk araq hi bilaqnanta bilaqid i tuwazam haqad. ¹⁴⁻¹⁵ In lehim Yesus buloniy, Tisa haqiy, i ningi tuhurit haqiy. Ni a hi katiyaqta haqiy. Ni mataw gibin inaqta a

hi girabunad gigomo a hi lehaqta haqiy. Ad ni on mataw God ago dan titnonta giqisihunad ni hel diqmo gibilenaqta haqiy. Ni ninad ezaq emaq? haqiy. I gibabun Rom gigo king Sisa in i gituw bulsa i takis ugauqta na in daq dimun o daq meqin? haqiy. I Juda gigo maror ezaq bilamta? haqiy. I tuqugam o hais? haqiy.

Haqan Yesus in gigo gamuk katiyta na tuhurit. In ya imeqin tongo adanin tigemay ham. Haqad in gibilan, Nagaqgo ne ya ilum waqay? ham. Ari mani araq waq a bolid ya ahol waqiq ham. ¹⁶ Haqan in araq a bolim tuqugiy. Ugan ahol waqad in tisusumun nag, Ka nog diq adulan teq ahol anan usaq? ham. Haqan in bilaqiy, Na Sisa-mo agota haqiy. ¹⁷ Haqan Yesus gibilan, Sisa ago nagah na ne Sisa-mo uguy ham. Ad God ago nagah na ne God-mo uguy ham. Haqan mataw na ginadnad emad tuqosiy.

Sadyusi in mataw hodhodab eraq daqayta na ago Yesus ulum waqiy
(Matyu 22.23-33; Luk 20.27-40)

¹⁸⁻¹⁹ Sa Sadyusi asor Yesus ago hib tuboliy. Mataw na ginad kazaq emayta. Mataw tumoqiyta hodhodab a hi eraq daqay haqiyta. Na in bolim Yesus buloniy, Tisa haqiy Moses i gimen gamuk araq mar tonim in kazaq bilam haqiy. Mat araq aw waqeq amun a hi emsamo moqid ago aw amomo ossa teq in amikqan araq abab aqoburan na waqeq alulib abab ayon onmin tigiqemdaq ham haqiy.

²⁰ Ari gamuk araq kazaq lahta haqiy. Mat araq amikqaniz nenaq ⁷ nazaq diq iyim osiy haqiy. Osim in gibab na aw araq tuwam haqiy. Waqim inaq osad in ago amun haiqmo osimmo tumom haqiy. ²¹ Moqan ama ta araq aw naqmo tuwam haqiy. Waqim in nazaqmo amun haiqmo osim tumommo haqiy. Ta in gima ezeq-manta na nazaqmo ton haqiy. ²² Na moqan in amagniz bunmo nazaqmo titoniymo haqiy. Mataw maqbab ⁷ na in aw amulik naqmo waqim amun araq eman a hi gwahtiqsamo in tumoq bugiy haqiy. An abeb aw na tumommo haqiy. ²³ Nazaq iyan abeb mataw bunmo hodhod huloseq eraq daqayta nab teq aw na in nog diq awe tiqiydaq? haqiy. Maqbab ⁷ na bunmo in aw amulik naqmo waqiyta haqiy.

²⁴ In nazaq haqanmo Yesus gibilan, Ne God ago mari^b gamuk usaqta na ago ginad a hi em hasay ham. Teq ne God ago zaway a hi hurit kemaymo ham. Na ago iyan ne gamuk menmen bilaqay ham. ²⁵ Ari on mataw hodhodab eraqeq in a ta hi waq daqay ham. In bilagne God ago hib angelo osayta nazaq nogmo in os daqay ham. ²⁶ Teq God mataw tumoqiyta giwazid hodhodab eraq daqayta na agamukan Moses

ago marib usaqta ham. Mar nab ne ay amikta faq oyad a hi oyworta awagamun na ne ahol a hi waqiyta daqagya ham. Wagam nab God in Moses bulonim bilam, Abraham ago God, teq Aisak ago God, teq Jekob ago God na yaqmo haqad in bilam ham. *Kisim Bek 3.6, 15, 16*

²⁷ Nazaq iyan God in mataw moqim kayeqmo osayta gigo God iyim in gibiy muzaqta ham. Mataw moqim a hi hiqiyayta ham. Ne gigo gamuk nawa na ne menmen diq bilaqiy ham.

*God ago gunun ameb diqta
(Matyu 22.34-40; Luk 10.25-28)*

²⁸ Ari mat araq Moses ago gunun hurit kamta na bolim Yesus Sadyusi nenaq gamukib an bayad tursa in tuhurit. Huritsa Yesus in gigo gamuk amenin dimun diqmo bilaqan mat na era Yesus tisusumun ug, God ago gunun doqag diqta in gunun bunmo giquriyamim in danmeh diqta? ham.

²⁹ Haqan Yesus bilam, Gunun ameb diqta na kazaq bilam ham.

Ne Isrel huritiy haqad in bilam ham. I gigo Iyahta God in amomo Iyahta iyim osaqa haqad in bilam ham. ³⁰ Sa ne gigem, giqutil, ginad, teq ne gigo zaway bunmo amalib ne gigo Iyahta God anan ginad bilaqan haqad in bilam ham. *Lo 6.4-5*

³¹ Teq gunun gigerta na in kazaq ham.

Ni nihol anan ninad bilaqaqta nazaqmo ni niyow anan ninad bilaqan haqad in bilam ham. *Wok Pris 19.18*

Gunun giger na in God ago daq dimdimunta bunmo giquriyamim in ameb diqta ham.

³² Haqan mat Moses ago gunun hurit kamta na in Yesus bulon, Mat Iyah ham helmo ni dimunmo bilam ham. God amomo in Iyahta iyim osaqa ham. God araq haiq ham. ³³ Ad i giqutilibmo teq i ginadibmo teq i gigo zawayibmo i God anan ginad bilaqdaq ham. Teq igmo gihol anan ginad bilaqaqta nazaqmo i on mataw bunmo ginad bilaqdaq ham. Daq giger na in mataw God ayon tamaz emad naw ugayta na bunmo giquriyamim in ameb diqta ham.

³⁴ In nazaq anad em hasim bilaqan Yesus huritim tubulon, Ni God ago maror sinsin diq ugim osaqa ham.

Ari Yesus in mataw na gigo susumun bunmo amenin anononmo eman mataw bunmo rabad in Yesus ulum waqnan a ta hi susumun ug yaqay.

Krais ahol alulin ezaqta na ago Yesus Farisi susumun nag
(Matyu 22.41-46; Luk 20.41-44)

³⁵ Ari Yesus Tempel agelin aduganib mataw suleq negad tuqos. Osad in bilam, Ezaq haqad mataw Moses ago gunun hurit kemiya na bilaqay, Krais in Devit atatin* haqayta? ham. ³⁶ Kwaziqmo God ago Bugaw Dimunta in Devit anad ugsa Devit in Krais anan bilam, Iyahta in yaqgo Iyahta kazaq bulonim bilam ham. Ni ya iben iqabun ban kab ya imen emad ossa ya ningbab giqemid nisen ahaqenib tiqiy bug daqay haqad in bilam ham. *Buk Song 11.1*

³⁷ Ari Devit-mo in Krais anan bilam, 'Yagdo Iyahta' haqad in bilam ham. Nazaq iyan ezaq toneq Krais in Devit ago Iyahta iyeq teq in Devit atatin a ta iydaq? ham. Hagan on mataw biyatha nab turiyta na in Yesus ago gamuk huritim ginad tidimniyyi. Na ezaqgo Yesus in mataw aseseqta na gigo gamuk adanan qway bugta na ago iyan.

Yesus in mataw Moses ago gunun hurit kemiya na gigo daq anan bilam
(Matyu 23.1-36; Luk 11.37-54; 20.45-47)

³⁸ Ari Yesus mataw na suleq negad osim gibilan, Ne mataw Moses ago gunun hurit kemiya na gigo ne gihol waz naqmo hiqiyiy ham. In tubusan dimun diqta giholib emim dan muzad luwayta ham. Luwsa mataw gibiyad ginan 'mat ayah' haqsa in ginad diq dimniyaqta ham.

³⁹ Mataw na bit humab wolaytab ban ulilibta nabmo osnan ginad bilaqaqta ham. Ad in humab adidaqan inaqtab ogib garuruhab osnan hulosmo diq hulosayta ham. ⁴⁰ Teq in on waburta kat negad gigo bit samamno waqayta ham. Ad in mataw gimeb God inaq gamuk sisaqmo bilaqim a lehaya ham, mataw gibiyad ginan dimun diqta haq daqay haqad ham. God hazizir ayahta emdaqta nab teq mataw na in on mataw bunmo giquriyameq faq ayah diqmo tuwaq daqayta ham.

Aw anaghan haiqta araq in God naw ug
(Luk 21.1-4)

⁴¹ Ari teq Yesus Tempel agelin aduganib osad mataw gigo naw hunegan mani emaya abanab woqsa in gibiyad os. Ossa mataw ginaghan inaqta na kabemmo boleq mani kabemmo giqem yaqay.

⁴² Sa teq aw waburta araq anaghan haiqta bolim mani amikmikta gigermo hunag. ⁴³ Hunegan Yesus ahol waqad in ago disaipel gibilenan agerab boliy. Bolan in gibilan, Ya helmo ne gibileaiq ham. Aw waburta ahol anaghan haiqta ko in

* ^{12:35:} Mak 10.47 nab teq ni gamuk 'Devit atatin' ka alulin ahol waqdaq.

mani amik diqta emim in on mataw mani kabemmo emiyta ko giquriyam bug ham.
⁴⁴ Na ezaqgo mataw ko bunmo in gigo mani kabemmo usaqta na ago asitmo emiyta ham. Ari aw ko hajiq ham. In aholib mani asitmo usta na bunmo em bugim in ago mani araq in didaq zayeq neqdaqta na hajiq tiqiy ham.

13

*Yesus bilam, Tempel teq meqniydaq ham
(Matyu 24.1-2; Luk 21.5-6)*

¹ Ari Yesus ago disaipel nenaq Tempel hulosim lehadmo disaipel araq in Yesus tubulon, Mat Iyah ham gig aseseqta amalib bit dimdimunta giqemiya ko ni gibiy ham.
² Haqan Yesus bilam, Ni bit aseseqta ko gibiyaq e? ham. Gig ko bunmo teq wolzilayeq gihunegid twoqo bug daqay ham. Gig an amalib usayta ko teq muruwoqeq tiqmo bug daqayta ham.

Yesus bilam, Afagan kabemmo teq gwahtiqaq ham

(Matyu 24.3-14; Luk 21.7-19)

³ Haqad in tilehiy. Lehim Yesus garah anan Oliv haqayta nab osad teq in ame lehim Tempel na ahol waqad osyaq. Ossa Pita, Jems, Jon teq Andru nazaqmo in agerab tuboliv. Bolim in tisusumun ugij,
⁴ Yesus haqiy ni i gibilen haqiy. Kam gineh teq nagah ni anan bilamta na tugwahtiqaq? haqiy. Naga daqin diq gwahtiqa i ahol waqad ginad emam nagah na tugwahtiqaq tonaq haqam? haqiy.

⁵ Haqan Yesus gibilenim bilam, Ne gihol waz naqmo hiqiy ham. Luweq mat araq ne kat negdaq ham. ⁶ Mataw kabemmo teq boleq ya inan biyad bilaq daqay, Mat naqmo ya kawa haq daqay ham. Haqad in mataw kabemmo kat negsa in ginan helmo haq daqay ham.

⁷ Ad mataw bab emsa ne gihulan huratad teq ta mataw pesanta bab emsa ne giben hurit daqaymo ham. Huritat ne ginad haresmo emad hi rabiy ham. Daq nagan nazaq tugwahtiqaqta ham. Ta teq kam abebtanta na teqmo ham. Afagan na bunmo gwahtiqaq le hiqiyet teq kam na tugwahtiqaq ham. ⁸ Na ezaqgo mataw en araq in eraeqq mataw saw araqabta nenaq an wol daqayta ham. Sa king araq ago dahu in king ta araq ago dauhta nenaq an wol daqaytamo ham. Saw haresmo og ahol woleq lehsa uliq saw asor zarow ayahta gwahtiqaqta ham. Daq nagan bunmo bilaqne aw agemab amun tubaysa loyinaqta nazaq nog iydaq ham.

⁹ Ari negmo gihol waz naqmo hiqiy ham. Mataw teq ne giwazeq kaunsel gibenab giqem daqay ham. Ad in bit humab wolayta nagab ne ginol titay daqay

ham. Ne ya inan helmo haqad imuzad luwayta na ago in ne giqemid ne king teq gavman aseseqta gimeb tur daqay ham. Turad teq ne nagah gimeb ahol waqiyta na awagamun tigibilen daqay ham.
¹⁰ On mataw ya iwagamun dimunta uliq saw bunmo a leheq gibilensa teq nagah ya anan bilayta na tugwahtiqaq ham.

¹¹ Ari in ne giwazeq giqad gavman gimeb lehid teq ne naga gamukin bilaq daqayta na ago ginadnad hi emiy ham. Gamuk bunmo ne bilaq daqayta na God tindegdaq ham. Kam nab in gamuk negdaqta nazaqmo ne bilaqiy ham. Nazaq iyan negmo diq gamuk na a hi bilaq daqay ham. Hajiq ham. God ago Bugaw Dimunta inmo gamuk na ne giqezab tibilaqdaq ham.

¹² Kam nab teq mataw in gimaqbaban giwaqeq bab gibenab giqemid in ginol emid tumoq daqay ham. Sa giman man in nazaqmo gigo onmin giwazeq bab gibenab giqem daqaymo ham. Ad onmin in nazaqmo ginemaman gihar negad bab gibenab giqemid in ginol emid tumoq daqaymo ham.
¹³ Ya ihol abin ne giholib usaqta na ago on mataw bunmo gigem meqinta neg daqay ham. Ari on mataw zaway diq iyeq ossa le in gigo kam abebtanta iydaqta nab teq God in gilumsiheq ta giwaqdaq ham.

Yesus bilam, Jerusalem teq meqniydaq ham

(Matyu 24.15-28; Luk 21.20-24)

¹⁴ Haqad Yesus bilam, Teq nagah meqin diqta uliq saw meqin tonaqta na in ban hi osnagta nab ossa ne ahol tuwaq daqay ham. (Mat gamuk ka ahol waqad bilaqqaqta na in anad em hasad bilaq sireqan.) Kam nab on mataw saw Judiya-ib os daqayta na in tukeq garah ban gwalehiy ham.
¹⁵ Sa mat bit ahuunib ban osnatab osdaqta na in ogib hitiqeq tukeq lehanom ham. In ago es nagah giwaqgo bit aduganib lo hi gwahtiqaq ham.
¹⁶ Teq mat kabiyyab luwdaqta na in ago aholsihen waqnan uliqab muleqeq ta hi bolanmo ham.

¹⁷ Kam nab on giqem iyayta na teq on amun muturta sus ugayta na in timeqniy daqay ham.
¹⁸ Nazaq iyan ne God susumun ugid in kam meqinta na emid urom akamnib hi gwahtiqaq ham.
¹⁹ Kam nab mataw afagan ayah diqmo tisor daqay ham. God nagah bunmo giqeman gwahtiqaqta nab iyim bo muran kam kabmo afagan araq nazaqta a hi gwahtiqaq ham. Teq abeh afagan araq nazaqta a hi gwahtiqaq ham.
²⁰ Ari Iyatha kam meqinta na siqim diq hi emid on mataw bunmo tihiqiy bug nagiy ham. Teq inmo ago on mataw in gilumim aholyon giwamta na ginadin emad in kam na emid siqim tiqiydaqta ham.

²¹ Kam nab mat araq ne gibileneq bilaqdaq, Ahol waqiy, Krais kawa osaq o Krais kowa osaq haqsa ne in aqez na hikidik hurity ham. ²² Na ezaqgo krais katiyta teq nantut katiyta kabemmo tugwahtiq daqay ham. Gwahtiqeq in daq azawayin inaqta kabemmo giqem in kabiylul araq diqta amo amo giqem daqayta ham. In nazaq emad teq in God ago on mataw in gilumim aholyon giwamta na gihureqnan diq ton daqayta ham. ²³ Ne gihol waz naqmo hiqiyiham. Daq nagan bunmo a hi gwah-tiqsa kawa ya ne tigibilen kemaiq ham.

*Mat Atatin teq ta boldaq
(Matyu 24.29-31; Luk 21.25-28)*

²⁴ Haqad Yesus bilam, Kam nab afaqan ayahta na tihiqiyid teq

Zeq ame romriq iysa kalam a ta hi oydaq ham.

²⁵ Sa kaitab ulig milheseq ogib tuwoq daqay ham.

Woqsa nagah aseseqta zawayta ulilib us-nya nagan gihol tuwol daqaymo ham.

²⁶ Kam nabmo Mat Atatin onqas amalib oseq ago zaway ayahta teq ahol anuwan inaqmo bolsa on mataw ahol tuwaq daqay ham. ²⁷ Sa in angelo asor giqemid in og saw bunmo lehad inmo ago on mataw in gilumim aholyon giwaqan osayta na giwaqeq giwaqeq a lehad teq in tigiwaq bug daqay ham.

*Ay fik kam ulum kemaqta
(Matyu 24.32-35; Luk 21.29-33)*

²⁸ Haqad Yesus bilam, Ay fik ago hib teq ne ginad tiqem has daqay ham. Ay na aben hur tonad atitoqin muturta gwahtiqsa ne ahol waqad ginad emay, Zeq akaman tiqy-nanaq haqayta ham. ²⁹ Nazaqmo teq abeb nagah ya anan bilayta ka bunmo tugwahtiqa ne ahol waqad ginad kazaq emiy ham. Nagah Yesus anan bilamta na bolim sinsin tiqiy haqiy ham, bilaqne mat dan ezab turad bit aduganib gwahtiqnan tonaq nazaq haqiy ham. ³⁰ Ya helmo ne gibilenaq ham. On mataw muran kam kab osayta ka a hi moq bugsa daq nagan bunmo tugwahtiqa ham. ³¹ Kait og inaq teq tihiqiydaqta ham. Ari yaqgo gamuk ka a hi hiqiydaq ham.

*Mat araq diq Yesus ta boldaqta na aka-man a hi huriit
(Matyu 24.36-44)*

³² Ari teq Mat Atatin kam gineh diq ta boldaqta na teq in zeq adulan ganimtab bo gwahtiqdaqta na mat araq a hi huriit ham. Angelo Heven-ib osayta na teq God Atatin inaqmo in kam na a hi huritymo ham. God amomo kam na ago tuhuritta ham.

³³ Nazaq iyan ne saw waqad gihol waz naqmo hiqiyeq osiy ham. In boldaqta

akaman na ne a hi hurity ham. ³⁴ Na in bilaqne mat ayahta araq ago uliq hulosim saw araq pesantab lehaqta nazaq nog iydaq ham. Mat na a hi lehadmo in kabiyl iberim ago kabibiy mataw amulik-mulikmo negad gibilenan in ago nagah wamuzayta ham. Sa mat ayahta na in mat dan ez wamuzim turaqta na bulonag, Ni dan ez wamuz naqmo hiqiyeq os haqaqta ham. Haqad in gihulosim tilehaqta ham.

³⁵ Haqad Yesus bilam, Nazaq iyan ne gihol waz naqmo hiqiyeq osiy ham. Kam gineh bit anamren ta boldaqta na ne a hi hurityta ham. In taromab o tarom alihanib o saw hastitaysa o tarommo in boldaqta na ne a hi hurityta ham. ³⁶ Luweq in hidmo boleq ne ussa in gibiyaq ham. ³⁷ Gamuk kawa ya ne gibilenaiqta ka ya on mataw uliq saw bunmo gibilenaiqmo ham. Ne bunmo gihol asawan woltayad osiy ham.

14

Mataw marorta in Yesus wol emid mo-gyo an adugan waziy

(Matyu 26.1-5; Luk 22.1-2; Jon 11.45-53)

¹ Ari abeb kam giger le tihiqiyid teq Juda gigo lotu akaman ayahta anan Pasova haqayta na teq bret yis haiqmo neqayta na akaman tugwahtiqa. Sa mataw tamaz emayta na teq mataw Moses ago gunun huriit kemiya na in mataw gime titoneq Yesus wazeq wol emid moqdaqta ago adanteqin tinagun yaqay. ² Na ezaqgo in bilaqiy, I Pasova akaminib Yesus ulalabmo a hi wazam haqiy. Luweq mataw biyahta na gigem meqniysa bab araq ayahta wazid eraqdaq haqiy.

Aw araq Yesus afaqinib masil ahuran dimunta wazbalan wom

(Matyu 26.6-13; Jon 12.1-8)

³ Ari Yesus uliq Betaniy-ib mat araq kwaziqmo aholib moq lepra usim tihiqiya anan Saimon haqayta ago bitab os. Osad in didaq neqsa aw araq tubol. Aw na kagoh araq amikta gig anan alabasta haqay na sisoqim emiyta nab in masil ahuran dimunta anan nard haqayta anawun ayahmota tenim teq in wazim a bol. A bolim in aqez orgayim Yesus afaqinib wazbalan tuwom. ⁴ Wazbalan woqsa mataw asor nab osiyta na gigem timeqniysa in ginadibmo bilaqiy, Nagaqgo aw ko masil dimunta ko abu ulumaq? haqiy. ⁵ I masil ko mat araq inaq zayeq 300 kina nazaq waq nagta haqiy. Waqeq i mataw ginaghan haiqmo osayta na neg nagta haqiy. Haqad in aw na tuwad yaqay.

⁶ Wadsa Yesus bilam, Ne hulosiy ham. Nagaqgo ne aw na afaqan ugay? ham. In ya ilowan tonad yaqmen daq dimun

diqta tiqem yag ham. ⁷ Tutimmo mataw ginaghan haiqta na ne nenaq osayta ham. Ossa ne gilumsih daqayta akaman kabemmo ham. Ari ya nenaq tuteqmo a hi osdaiqta ham. ⁸ Aw ka ya inadin emim in yaqmen emdaqta na kawa tiqem yag ham. In masil ya iholib amta ka in ya isan wastitayeq hodhodab iqemgo in kawa tiqam ham. ⁹ Ya helmo ne gibilenaiq ham. Mataw edobya leheq ya iwagamun dimunta bilaqad in aw ka daq amta ka awagamun tibilaq daqaymo ham. Bilaqsa mataw huritad teq in aw ka anadin tiqem daqay ham.

Judas in Yesus waqeet Juda gigo mataw marorta gibenab emgo bilam
(Matyu 26.14-16; Luk 22.3-6)

¹⁰ Ari kam nab disaipel 12 na gigo araq anan Judas uliq Kariyot-ib haqayta na in mataw tamaz emayta gigo aseseqta gigerab lehim gibilan, Ya Yesus waqeet ne gibenab tiqemdaiq ham.

¹¹ In nazaq bilaqan mataw aseseqta na huritum ginad tidimniyyi. Ginad dimniyya in Judas naw uggoo tubuloniy. Bulonan Judas huritum teq in Yesus waqeet mataw na gibenab emdaqta adanteqin araq dimunta tinagunyaq.

Yesus ago disaipel nenaq Pasova abeb-tanta neqiy
(Matyu 26.17-25; Luk 22.7-14, 21-23; Jon 13.21-30)

¹² Ari bret yis haiqmo neqayta na akaman tugwahtim. Kam nab in Pasova ayon sipsip amidon wol emayta. Nazaq iyan disaipel in Yesus tisusumun ugiy, Ni ninad i bit edob leheq ni Pasova adidaqan neqdaqta abanan wastitayam? haqiy. ¹³ Haqan Yesus in ago disaipel gigermo gibilan, Ne giger le uliq kob gwahtiqid teq mat araq reb ayuwun inaqta soreq a bo lehad in ne danib tigibiydaq ham. Mat naqmo ne muzeq inaq lehiy ham. ¹⁴ Leheq mat na bit edob gwahtiqaqta nab ne loqe bit na anamren kazaq susumun ugiy ham. Tisa bilam, Yaqgo disaipel nenaq Pasova adidaqan neqamta na ago bit adugan edowa? haqad ne buloniy ham. ¹⁵ Ne nazaq bulonid teq in bit adugan araq ayahta ulilib usaqta na tigisishundaq ham. Bit adugan nab didaq neqayta anaghan bunmo usaqta ham. Nab ne leheq i bunmo Pasova adidaqan neqamta abanan wastitayiham. Haqad Yesus in gjeman tilehiy.

¹⁶ Lehim uliq nab gwahtiqaq in Yesus nagaq bunmo ginan gibilanta nazaqmo ahol tuwaqiy. Ahol waqad in nab Pasova adidaqan neq daqayta abanan tuwastitayi. ¹⁷ An imisor diq tiqiyen Yesus ago disaipel 12 na nenaq didaq neqnan tilehiy. ¹⁸ Lehim in banab didaq neqad osad Yesus bilam,

Ya helmo ne gibilenaiq ham. Ne gilikmanib teq mat araq ya iwaqeet bab gibenab iqemdaq ham. Mat ya inaq araqib didaq neqauqta naqmo ham.

¹⁹ Haqan disaipel gihol afaqan tiqysamo in amulik-mulikmo Yesus tisusumun ug yaqay. Yaqmo ye? haq yaqay. ²⁰ Haqsa Yesus gibilan, Ne disaipel 12 gilikmanib mat ya inaq degib aben woqaq naqmo ham. ²¹ Helmo diq ham. God ago mar Mat Atatin anan bilamta nazaqmo diq in dan muzeq tilehdaqta ham. Teq mat in Mat Atatin bab gibenab emdaqta na timeqniy hasdaq ham. Mat na anen a hi em nagta in am ham.

Yesus in ago disaipel bret teq wain ayun inaq nag
(Matyu 26.26-30; Luk 22.15-20; 1 Korin 11.23-25)

²² Ari in didaq neqad osad Yesus bret asor waqim God esey ugim in orqayim ago disaipel tinag. Negadi in gibilan, Ne pret ka waqeet neqiy ham. Ka ya inon ham. ²³ Haqad in wain agogin inaq waqim God esey ugim teq in negan in bunmo tuquluiwy. ²⁴ Uluwan Yesus gibilan, Ka ya inedan God ago maror muturta na zaway ugdaqta ham. Ya ned ka on mataw kabemmo giwastitaynan haqad wazbaldaqta ham. ²⁵ Ya ne helmo gibilenaiq ham. Ya wain ayun ka a ta hi uluwdaq ham. Abeb ya God ago maror muturta aduganib osad teq ya wain ayun ka a ta uluwdaq ham.

²⁶ Admo in lotu ago bar araq wazim hulosadmo in uliq hulosim garah Oliv-ub tilehiy.

Yesus bilam, Pita teq gileh yagdaq ham
(Matyu 26.31-35; Luk 22.31-34; Jon 13.36-38)

²⁷ Lehad Yesus in ago disaipel gibilan, Ne bunmo ginad ya inan helmo haqayta na hulosad gileh tiyag daqay ham. Na ezaqgo God ago marib gamuk araq kazaq bilam ham.

Ya mat sipsip giwamuzaqta na wol emsa in ago sipsip haresmo tukeq tileh daqay haqad in bilam ham. *Sekaraya 13.7*

²⁸ Ari ya hodhodab eraqeq teq ya ameb saw Galiliy-ib tilehdaq ham.

²⁹ Haqan Pita bulon, Mataw ka bunmo in ginad helta na hulosad gileh nigsa ya haiq ham. ³⁰ Haqan Yesus bulon, Ya helmo nibilenaiq ham. Tarom kab kurek ame gigeria a hi gayonsamo ni nime ezeq-manmo gileh tiyagdaq ham.

³¹ Haqan Pita atoranmo bilam, Nab iyan ham. Mataw ya ninaq ginol emnan bilaqsa ya gileh a hi nigdaiq ham. Hikidik ham. Haqan disaipel bunmo gamuk nazaqmo bilaqiy.

Yesus og Getsemaniyy-ib God inaq gamuk am

(Matyu 26.36-46; Luk 22.39-46)

³² Ari Yesus ago disaipel nenaq le og araq awaqaan dimunta anan Getsemaniyy haqayta nab tugwahtiqaq. Gwahtiqaq Jesus in ago disaipel gibilan, Ne kab osiy ham. Sa ya leheq God inaq gamuk eman ham. ³³ Haqad in Pita, Jems teq Jon giwaqim nenaq tilah. Lehad in ahol afaqan diq iysa ahol meqin diq tiloyinyaq. ³⁴ Ad in gibilan, Ya ihol afaqan diq iysa ya tumoq-nan tonaiq ham. Ne kab saw waqad osiy ham.

³⁵ Haqad in asitmo ta leh nog iyim in ogib woqim usad God tubulonyaq. God anad bilaqid in afaqan ka ya iholib walemdaq haqad. ³⁶ In bilaqyaq. O kabay haqyaq ni ya imam haqyaq. Ni nagah araq a hi emdaqta a hais haqyaq. Ya iholib afaqan ayahta ka ni walem haqyaq. Teq ni ya inad ka hi muz haqyaq. Ninmo ninad muz haqyaq.

³⁷ Haqad in muleqim ta lehim disaipel ezeqman na ussa in gibiy. Gibiyad in Pita bulon, Saimon ham ni nagaqgo usaq? ham. Ni asitmo saw waqad a hi osdaq e? ham. ³⁸ Ne saw waqad God inaq gamuk emad osiy ham. Gamuk emad daq negilum waqdaqta na bo giholib gwahtiqaq ne hi woqgo haqad bulonyham. Helmo ne ya inad muznan ginad bilaqacta ham. Teq ne gihol awaz meqin a hais ham.

³⁹ Haqad in lehim a God ta bulon. Teko in God bulonta nazaqmo in a ta bulon ton. ⁴⁰ Bulonim in muleqim ta lehim disaipel gime rursa ussa in gibiy. Gibiysa in kayeq ta iyim in gamuk araq bilaq daqayta hiqiyam in giquezmo hiqiyim tuqosiy.

⁴¹ Sa Yesus ame ezeqmantu lehim teq ta bol. Bolim in gibilan, Ne ginamur emad us tutay ye? ham. Ne dimunmo tuqusiy ham. Ahol waqiy ham. Muran in Mat Atatin waqeq mataw meqinti gibenab em daqayta akaman tiqiy ham. ⁴² Ne eraqiyas i lehuq ham. Ahol waqiy ham. Mat ya iwaqeq bab gibenab iqemdaqta na bo tug-wantim ham.

Judas Yesus waqim bab gibenab am
(Matyu 26.47-56; Luk 22.47-53; Jon 18.3-12)

⁴³ Yesus nazaq gamuk bilaqad tursa hid naqmo disaipel 12 na gigo araq anan Judas haqayta na tubol. In bolsa mataw dahu biyatha baqir sebur wazim ad in inaq tuboliyo. Mataw tamaz emayta gigo aseseqta na teq Juda gigo mataw marorta na teq mataw Moses ago gunun hurit kemiyyta na in bolim humab tuwoliy. ⁴⁴ Ari mat Yesus waqeq bab gibenab emdaqta na in naga daqin emid in Yesus ahol waqad waz

daqayta na ago in tekotigibilanta. In bilam, Ya leheq mat nog ya wazeq ilawundaiqta naqmo ne wazeq bab mataw na gibenab emid in mat na wamuzeq ad lehiy ham.

⁴⁵ Nazaq iyan in hidmo Yesus agerab loqimmo tibilam, Tisa ham. Haqadmo in wazim tiqilawun. ⁴⁶ Ilawunanno mataw na eraqim Yesus tuwaziy. ⁴⁷ Wazsa mat araq Yesus agerab turta na ago baqir hureq hasim wam. Waqim in tamaz mat danmepta ago kabibiy mat araq wolim adeksanmo qwatayan ogib tuwom. ⁴⁸ An teq Yesus in bab mataw na gibilan, Ne baqir sebur giwaqim a bolitya ka ne mat rin tonaqta waznan boliy ye? ham ⁴⁹ Kam kabemmo ya ne suleq negad nenaq Tempel-ib ossa ne ya a hi iwaziy ham. Teq daq kagan bunmo gwahtiqaq in God ago mar tuwol net bugaq ham.

⁵⁰ Haqanmo disaipel bunmo Yesus hulosim titukiy.

Mat araq minminta tuk

⁵¹ Disaipel tukim lehsa mat araq minminta ago tubusan dimunta husta amta na in Yesus muzim inaq lehsa mataw na ahol waqad tuwaziy. ⁵² Wazan hais in giben lehasadmo ago tubusan gibenab hulosadmo in abe aholmo tukim tilah.

Mataw aseseqta Yesus amalib nan kabemmo emiy

(Matyu 26.57-68; Luk 22.54-55, 63-71; Jon 18.13-14, 19-24)

⁵³ Ari mataw na Yesus wazim ad tamaz mat danmepta ago bitab tilehiy. Lehan mataw tamaz emayta gigo aseseqta na teq Juda gigo mataw marorta na teq mataw Moses ago gunun hurit kemiyyta na in bolim humab tuwoliy. ⁵⁴ Sa Pita in Yesus muzim lehad teq in pesan nog lehyaq. Lehim in tamaz mat danmepta na ago bit agelin aduganib le gwahtiqaq in mataw Tempel-ib hurmey gan turayta na nenaq faq iterad tuqos. ⁵⁵ Ossa mataw tamaz emayta gigo aseseqta na teq Juda gigo kaunsel ayahta na amatawun bunmo in mat araq Yesus ago hib nan bilaqid teq in wol emid moqgo na tinagun yaqay. Ta teq in gamuk araq amalib Yesus wol em daqayta na ahol a hi waq yaqay. ⁵⁶ Mataw kabemmo bolim Yesus amalib nan katiyta em yaqayta. Teq hais in gigo gamuk katiyta na araqibmo a hi iyyaq.

⁵⁷⁻⁵⁸ Sa mataw asor turad in katiyim kazaq bilaq yaqay, Yesus kazaq bilaqsa i hurit haq yaqay. Yaqmo teq Tempel mataw gibenab emiyta ka wol inereq kam ezeqmanmo aduganib ya Tempel ta araq gibenab a hi em daqayta na wazid tiger-aqdaq haqad in bilamta haq yaqay. ⁵⁹ Teq gamuk in bilaq yaqayta na araqib diq a hi iyyaqmo.

⁶⁰ Anmo tamaz mat danmehta na eraqim liqabmo turad in Yesus tisumun ug, Mataw ka bolim ni ninan gamuk bilaqayta ka in ezaq diq? ham. Ni gamuk ka araq amenin a hi emdaq e? ham. ⁶¹ Haqanmo Yesus aqez hiqiyim in mat na ago gamuk amenin araq a hi bilam. Sa tamaz mat danmehta na a ta susumun ug, Mat Iyah Ulilib Diqta na atatin mataw anan Krais haqayta na ninmo ye? ham. ⁶² Haqan Yesus bilam, Eqe ham. Na yaqmo kawa ham. Teq Mat Atatin in God Awaz Meqin Diqta aben aqabun ban ossa ne ahol tuwaq daqay ham. Ahol waqsa in kaitab onqas inaq bolsa ne ahol tuwaq daqaymo ham.

⁶³ Haqanmo tamaz mat danmehta na era inmo aholib tubusan bulsireqim bilam, Mat araq in ayon nan araq ta hi bilaqan ham. ⁶⁴ Mat ka God bilawunsa ne tuhuritiy ham. Ne in ayon naga gamukin bilaq daqay? ham. Haqan mataw bunmo bilaqiy, Na in daq meqin diq haqiy. Mat daq nazaq amta na in moq nagta haqiy. ⁶⁵ Haqad mataw na gigo asor in Yesus tukusluw ug yaqay. Ad in tubusanib ame isihim wolad teq in bulon yaqay, Ni nantut iysun nog ninolaqta ka anan biy haq yaqay. Haqsa mataw tamaz emayta gigo hurmey na in Yesus waqim tuwoltitay yaqaymo.

Pita Yesus gileh ug

(Matyu 26.69-75; Luk 22.56-62; Jon 18.15-18, 25-27)

⁶⁶ Ari in Yesus nazaq tonsa Pita bit asisuranib ossamo tamaz mat danmehta na ago kabibiy aw araq tubol. ⁶⁷ Bolim Pita faq iterad ossa in ahol waninunadmo bulon, Ni Yesus Nasaret-ibta na inaq luwta ham. ⁶⁸ Haqan Pita bilam, Haiq ham. Ya ni gamuk bilaqaqta na inad a hi emaiq ham. Ni nog diq anan bilaqaq? ham. Haqad in asanib bit aqez ban le tugwahtim. [Gwahtiqsamo kurek araq tigayon.]

⁶⁹ An kabibiy aw na in Pita nab tursa ahol waqad in mataw nab turiyta na tigibilan, Mat ka in Yesus ago mat araq kawa ham. ⁷⁰ Haqan Pita a ta bilam, Na ya a haiq ham. Haqan mataw in agerab turiyta na asitmo ta tur nog iyim bilaqiy, Helmo diq haqiy ni mat Galiliy-ibta iyim iyan ni Yesus ago mat araq daqag haqiy. ⁷¹ Haqan Pita atoranmo bilam, God Ulilibta ibiysa ya helmo bilaqaq ham. Ya mat na ago a hi huriitta ne anan bilaqay ham.

⁷² Haqanmo kurek ame gigerta tigayon. Gayonamo Pita in Yesus gamuk bilamta na anadin tiqam. Yesus bilam, Kurek ame gigerta a hi gayonsamo ni nime ezeqmanmo gileh tiyadqay ham. Pita gamuk na anadin emad in anad meqniysa gaqad tuqos.

Mataw Yesus waqim ad Pailat ago hib lehiy
(Matyu 27.1-2, 11-14; Luk 23.1-5; Jon 18.28-38)

¹ Ari tarommo diq mataw tamaz emayta gigo aseseqta na teq Juda gigo mataw marorta na teq mataw Moses ago gunun hurit kemiya na teq Juda gigo kaunsel ayahta na amatawun bunmo in humab wolum an amugan tuwaziy. An amugan wazim in Yesus irqrurim wazim ad lehim Rom gigo maror saw Judiya wamuzim osaqta anan Pailat haqay na tuquqiy. ² Ugan Pailat Yesus tisumun ug, Ni Juda on mataw gigo king e? ham. Haqan Yesus bilam, Nawaqmo ni tibilam ham.

³ Haqanmo mataw tamaz emayta gigo aseseqta na in Yesus amalib nan kabemmo tiqem yaqay. ⁴ Emsa Pailat in Yesus a ta susumun ug, Ni gamuk araq amenin a hi emdaq e? ham. Ni hurit ham. Mataw ko nan kabemmo nimalib tiqemay ham. ⁵ Haqan Yesus gamuk amenin araq diq a ta hi bilam. Nazaq iyan Pailat anad kabemmo emyaq.

Pailat bilam, Yesus ayib dom woliy ham
(Matyu 27.15-26; Luk 23.13-25; Jon 18.39-19.16)

⁶ Ari ulig bunmo Juda gigo lotu akaman ayahta nab Pailat in mat araq irqruran ossa hasid gwahtiqaqta. Juda on mataw nog anan bilaq Pailat naqmo hasid in gigo hib lehyaqta. ⁷ Teq kam nab mat araq anan Barabas haqayta na irqruran os. Mat na in Rom gimuznana haqad ago dauh nenaq lehim Rom ginolad in mataw asor ginol amta amatin. Nazaq iyan Rom in mat na wazim a le mataw gigirqruran osayta na ne-naq eman osta. ⁸ Ari Juda mataw kabemmo Pailat agerab lehim tisumun ugiy, Pailat ago daq muzeq mat araq bit gigirqruran osaytab hasid gwahtiqaq haqad. ⁹ Susumun ugan Pailat in gigo gamuk amenin emim pilam, Ne ginad ya Juda gigo king na hasid ne gigo hib lehdaq e? ham. ¹⁰ Na ezaqgo Pailat anad tiqam, Yesus mataw tamaz emayta gigo aseseqta ka gibayan woqiyta na ago in gigem meqniysa amalib nan emay ham.

¹¹ Teq haiq. Mataw tamaz emayta gigo aseseqta na in mataw biyahta na gigem wazan eraqsa in Pailat buloni, Ni Barabas hasid i gigerab bolan haqiy. ¹² Haqan Pailat gibilan, Nazaq na teq mat ne anan bilaqay, Juda gigo king haqayta ka ya ezaq tondaiq? ham. ¹³ Haqan in lileyim bilaqiy, Ayib dom wolid moqan haqiy. ¹⁴ Haqan Pailat bilam, Nagaggo? ham. Mat ka naga daqin meqinta am? ham. Haqsa teq haiq. Mataw na dedibmo lileyim a ta bilaq toniy, Ayib

dom woliy haqiy. ¹⁵ Haqan Pailat in Juda mataw ginad emid dimniynan haqad in Barabas hasan in gigo hib tilah. Lehsa in ago mataw gibilenan in warig waqim hik-laquwim amalib Yesus tuwoltitayi. Woltitayim hulosan Pailat in Yesus ayib dom wolgo haqad ago mataw bab emayta na gibenab tiqam.

Rom gigo mataw bab emayta na Yesus bilawun

(Matyu 27.27-31; Jon 19.2-3)

¹⁶ Ari mataw bab emayta na in Yesus waqim ad Pailat ago bitab lehim in bit na ago gel aduganib ad tugwahtiyy. Gwah-tiyyim in giyogniz bunmo gibilenan bo humab tuwoliy. ¹⁷ Humab wolum in tubusan araq sisaqta kakaqta amalib Yesus ahol isihim teq in am araq asasuqin inaqtal tonim king ago balaw nogta afaqinib emiy. ¹⁸ Emim teq in eraqim Yesus buloneq bilaq yaqay. Mat ayah haq yaqay, ni Juda gigo king-mo diq haq yaqay.

¹⁹ Haqadmo in tuqir araq waqim afaqin wolad tukusluw ug yaqay. Kusluw ugad in gibakbakan ulum laquwim turad bilaq yaqay. Maror haq yaqay i ni nibin tisoraq haq yaqay. ²⁰ Ari in Yesus bilawunim hulosadmo in tubusan kakaqta na hasim waqad inmo ago tubusan na aholib ta em ugiy. Em ugim teq in ayib dom wolman haqad waqim ad tilehiy.

Mataw Yesus ayib dom woliy

(Matyu 27.32-44; Luk 23.26-43; Jon 19.17-27)

²¹ Ari in Yesus waqim a lehsa Aleksanda ayow Rufus inaq gimam Saimon uliq Sairin-ibta na in uliqab bolad luwsa bab mataw in abe yahad bulunan in Yesus ulumsihim ayon ay tisor ug. Yesus ago zawaythiqiyan bugan iyan. ²² Sa bab mataw na in Yesus waqim ad garah akululqan araq anan Golgota haqaytab tilehiy. Gamuk Golgota na alulin 'Gifaqin Agolgolan' haqayta. ²³ A lehim in wain ayun teq masil anan mir haqayta na inaq buliyim Yesus ugiy. Ugan teq haiq. Yesus tuhulos. ²⁴ Anmo in Yesus ayib dom tuwoliy. Dom wolum hulosad teq in nog Yesus ago tubusan waqdaqta na ahol waqnan haqad in gig amikmikta hunegad tubusan nagan iberim giholyon tuwaqiy.

²⁵ Ari tarommo 9 kilok nazaq in Yesus ayib dom woliy. ²⁶ Teq Yesus naga daqin eman in ayib dom woliyta na agamukan in mar tonim ulilib ay nabmo tuqotheniy. Gamuk na in kazaq mar toniy.

JUDA GIGO KING

²⁷ Teq Yesus agerab in mataw rin tonayta gigermo ayib dom giwoliymo. Dom wolam araq Yesus aben aqabun ban tursa araq aben anasaran ban turyaq. [²⁸ Nazaq iyan daq na in gamuk araq God ago marib

usaqta na tuwol net bug. Gamuk na bilam, In mat na anan mat gunun othasaqta araq haqiy ham.]

²⁹ Sa on mataw bo lehad in Yesus ahol waqad bilawun yaqay. Bilawunad gifaqin lelad teq in bilaq yaqay. Oyeq! haq yaqay. Mat Tempel wol inereq kam ezeqmanmo aduganib wazid a taraqdaqta na amatin ni haq yaqay. ³⁰ Nazaq iyan ni niwaz meqniyeq ninmo nihol ulumsiheq ay na huloseq gehitiq haq yaqay.

³¹ Sa mataw tamaz emayta gigo aseseqta na teq mataw Moses ago gunun hurit kemiya na in nazaqmo Yesus bilawunad in an bulonim kazaq bilaq yaqay. In mataw asor gilumsihan a hi moqita haq yaqay. Ta teq inmo ahol ulumsiheq ago zawaytaiqta haq yaqay. ³² Ari in Isrel gigo king anan Krais haqayta na iyeq teq in ay na huloseq gehitiqan haq yaqay. Gehitiqid teq i ahol waqad anan helmo tihaqam haq yaqay. Sa mataw giger Yesus inaq ayib dom woliyta na in inaqmo Yesus bilawun yaqaymo.

Yesus mom

(Matyu 27.45-56; Luk 23.44-49; Jon 19.28-30)

³³ Ari zeq gabolim liqabmo tiqiysa saw bunmo romriq iyad le 3 kilok imisor tiqiy. ³⁴ Ad 3 kilok imisor nazaq tiqiyano Yesus dedibmo lileyim bilam, *Eloy Eloy lama sabaktaniy* ham. Gamuk na in kazaq bilam, Yaqgo God yaqgo God nagaqgo ni ya ihulosaq? ham.

³⁵ Haqanmo mataw asor nab turiyta na in Yesus aqez huritim bilaqiy, Huriyyi haqiy. Ko in Elaija lilewunaq haqiy. ³⁶ Anmo mat araq sibim lehim turusandek waqim tuqir amotnib am wazim teq in wain ayun agon iytta na ulum turim Yesus ateb tiqam, in sisowdaq haqad. Emim teq in bilam, Sa i ahol waqad teq ham. Elaija boleq walemid tiqdaq o haiq ham.

³⁷ Haqanmo Yesus dedibmo ek tonimmo tumom. ³⁸ Moqanmo tubusan ayahta Tempel-ib othenan usta na ulilib liqabmo tartayim giger iyim bo ogibmo tuwom. ³⁹ Teq bab mataw gigo ayahta saw nab Yesus wamuzim turad in Yesus nazaq moqsa ahol waqad bilam, Helmo diq ham. Mat ko in God atatin ham.

⁴⁰ Sa on asor pesanmo turad teq in naghah na ahol waqad turiy. In gilikmanib Mariya uliq Magdala-ibta na teq Jems ayow Josep inaq ginen anan Mariya haqayta na teq aw araq anan Salome haqayta na in nab turiy. ⁴¹ Kwaziqmo Yesus saw Galiliyib ossa on na in muzad ulumsihad luw yaqayta. Teq on kabemmo Yesus inaq Jerusalem-ub boliyta na in nab turiyomo.

*Yesus moqan asan hodhodab a lehiy
(Matyu 27.57-61; Luk 23.50-55; Jon 19.38-42)*

⁴²⁻⁴³ Ari kam Yesus momta na in Juda gigo lotu ayon nagah wastitayta na akamnib in momta. Babeq na Juda gigo lotu aka man diq na tugwahtiqaqta. Nazaq iyan Yesus momta kam nab imisor tiqysi uliq Arimatea-ib mat araq anan Josep haqayta na bolim Pailat ago hib tilah. Mat na in Juda gigo mat marorta araq teq in abin inaqta. In inaqmo God ago maror og kab gwahtiqa in ahol waqnan haqad amen emyaqta. In awaz meqniyim lehim Yesus asan waqeqla le yay tongo Pailat tisusumun ug. ⁴⁴ An Pailat in Yesus momta na huritim anadnad am. Anadnad emim in ago mat bab emaqta araq bulonan bolan in tisusumun ug, Yesus tumom e? ham. Haqan mat na bilam, Yesus tumom ham. ⁴⁵ Pailat in mat na gamuk bilaqan huritad teq in Josep bulon, Ari ni Yesus asan tuwaqdaq ham. ⁴⁶ Haqan Josep le tubusan araq husta tizay. Zayim a lehim in Yesus asan walemim ogib eman ussa teq in tubusan husta na amalib tiqil ton. Il tonim a lehim mataw gig qwayan hodhod iytu na amuganib tiqam. Nab emim teq in gig araq otbuliyan bo hodhod aqez tiqitum. ⁴⁷ Sa Mariya uliq Magdala-ibta na ayow Josep ta araq na anen Mariya inaq in giger nab turad mat na Yesus asan hodhodab emsa in ahol tuwaqiy.

16

Yesus hodhodab eram

(Matyu 28.1-8; Luk 24.1-12; Jon 20.1-10)

¹ Ari Juda gigo lotu akaman na tihiqiyan Mariya uliq Magdala-ibta na teq Jems anen Mariya teq aw anan Salome haqqayta na in nagah asor ahuran dimun diqta tizayiy, in hodhodab a leheq Yesus asanib emnan haqad. ² Zayim Sande tarommo in hodhodab tilehiy. ³ Lehad in an bulonim bilaqiy, Nog teq i gilumsiheq hodhod aqezab git otbuliyyadaq? haqiy.

⁴ Haqadmo in gime lehim hodhodab gig ayatha na tuqotbuliyan hodhod adek ban lehim ussa in ahol waqiy. ⁵ Ahol waqad in lehim hodhod amuganib gwahtiqaqmo mat araq minminta aholib tubusan husta emim ossa in ahol waqiy. Ahol waqad in tirabiy.

⁶ Rabsa mat na gibilan, Ne hi rabiy ham. Ya tuhurit ham. Ne Yesus Nasaret-ibta mawat ayib dom wolam momta naqmo ahol waqnan boliv ham. Mat na tiqueram ham. In kab haq ham. In asan eman usta asawan ka ne ahol waqiy ham. ⁷ Ad ne leheq disaipel bunmo gibilenad ne Pita inaqmo buloniy ham. Yesus ameb Galiliy-ib

tilehaq haqiy ham. Ne nab leheq teq Yesus ahol tuwaq daqay haqiy ham. Kwaziqmo in ne gibilanta nazaq haqad ne gibileniy ham.

⁸ Haqan on na gihol ritenim harara nemsa in hodhod hulosim gwahtiqaqmo tukim tilehiy. Lehad in rab titayad mat araq a hi buloniy.

Mariya uliq Magdala-ibta na Yesus ahol wam

(Matyu 28.9-10; Jon 20.11-18)

⁹ Ari kam nab Sande tarommo Yesus hodhod hulosim in danmeb Mariya uliq Magdala-ibta na ago hib tugwahtim. Kwaziqmo Yesus in aw na ago bugaw meqinta 7 gimuzta. ¹⁰ An teq Mariya lehim mataw Yesus inaq luwiyyata na gaqad ginadnad emad ossa in gibilan, ¹¹ Yesus hodhodab eraqim ossa ya ahol tuway ham. Haqan mataw na Mariya ago gamuk huritim anan helmo a hi haqiy.

Disaipel gigermo danib Yesus ahol waqiy

(Luk 24.13-35)

¹² Abeb disaipel giger Jerusalem hulosim lehsa Yesus ahol awaqqan lul araq diq iyim in gigerab gwahtim. ¹³ Gwahtiqaq giger na muleqim ta lehim disaipel ta asor na gibilenan in helmo a hi haqlymo.

Yesus in ago disaipel kabiy nag

(Matyu 28.16-20; Luk 24.36-49; Jon 20.19-23; Aposel 1.6-8)

¹⁴ An abeb disaipel 11 na didaq neqad ossa Yesus in gimeb gwahtim. Gwahtiqaq in ginadad gibilan, Ne nagaqgo on mataw ya ibiyyita na in bo ne gibilensa ne ginad soqotim ussa ya inan helmo a hi haqiy? ham. ¹⁵ Haqad in gibilan, Ne og saw bunmo leheq ya iwagamun dimunta na on mataw bunmo gibileniy ham. ¹⁶ Mat ya ihol awagamun anan helmo haqad yuw huzdaqta na God in mat na waqid ingo tiqiyidaq ham. Ari mat ya inan helmo a hi haqdaqta na God in mat na emid saw meqintab tiledaq ham. ¹⁷ Sa God in mataw ya inan helmo haq daqayta na gibenab daq kazaq tiqemdaq ham. In ya inanib bugaw meqinta tigimuz daqay ham. Teq uliq amo amo gigo nan ginadib bolsa in gamuk tibilaq daqay ham. ¹⁸ In nagah ahulinaqta ahol a hi waqeqmo wazid gimugid a hi moq daqay ham. Ad in nagah uluwim moqayta na ahol a hi waqeqmo uluweq a hi moq daqaymo ham. Teq in mat moqaqta aholib giben emeq wazsa mat na goq moq tihiqiyadaq ham.

God Yesus waqim ad Heven-ib tugwalah
(Luk 24.50-53; Aposel 1.9-11)

¹⁹ Ari Iyatha Yesus gamuk na gibilen bugan tihiqiyan teq God in waqim ad Heven-ib tugwalah. Gwalehim eman in God aben aqabun ban tuqos wom. ²⁰ Os woqim ossa in ago disaipel og saw bunmo lehad in Yesus awagamun dimunta na on mataw gibileneq gibileneq tileh yaqay. In nazaq emad luwsa Iyatha in nenaq kabiy tiqemyaqmo. Sa disaipel Yesus awagamun bilaqsa God inmo daq azawayin inaqta emsa on mataw ahol waqad bilaq yaqay, Wagam na in hel diqtaqmo haq yaqay.

Luk o Yesus awagamun Luk mar tonta Gamuk ameb lehaqta

Luk in mat araq anan Tiyofilus haqay na ago anad helta ulumsihnan haqad Yesus awagamun dimunta ka mar ton ug. Luk ayow Tiyofilus inaq in Juda mataw a haitqa. Teq Luk anad am, Yesus in Juda on mataw teq on mataw en ta asor Juda a haitqa nagan inaqmo gilumsiheq ta giwaqnan haqad bolta ham. Nazaq iyan Tiyofilus in Yesus awagamun bunmo tuhurit kemdaq haqad in ayon wagam ka wastitayimmo mar tonta.

Teq Yesus awagamun asor Matyu ayow Mak inaq a hi mar toniyta na kabemmo Luk ago wagam kab gimar tonan usaqta. Yesus amunib ossa daq asor in aholib gwahtimta awagamun na teq aw danatabta araq Yesus asen suholta awagamun na teq mataw giger uliq Emeus gigo dan ban Yesus ahol waqyita awagamun na Luk amomo in wagam nag gimar tonta. Ad nazaqmo Yesus ago gamuk awowrun asor in bilamta na Luk amomo mar tonmo. Amun minminta amam hulosim lahta ago gamuk awowrun na teq Mat araq ago nagah kabemmo na ayow Lazarus inaq gigo gamuk awowrun na teq Samariya-ib mat araq in ago bab anan anad meqniyta ago gamuk awowrun nagan in Luk amomo ago wagam kab giqusacta.

Yesus ago kabiyl alulin tiqemnan haqad in on mataw kazaq gibilan, God ago Bugaw Dimunta ya iholib usad zaway yagsa ya God ago gamuk dimunta on mataw meqin diq osayta na gigo hib tibilaqnan ham (Luk 4:18-19 nab ni ahol waq). An helmo diq Luk ago mar kab on mataw afaqan haresmo sorsa Yesus in ginan anad meqniyta in gilumsihim gidimun tonta na agamukan kabemmo giqusacta.

Luk in Yesus awagamun dimunta ka mar tonim teq abeb in wagam ta araq Aposel Yesus Ago Kabiyl Emiyta Giwagamun na in mar tontamo.

Luk wagam ka Tiyofilus ayon mar ton

¹⁻² Mat ayah Tiyofilus, mebmehmo God in ago on mataw gimen daq aseseqta eman i gilikmanib gwahtiqsa mataw asor in gimeb ahol waq bugim teq awagamun bilaq yaqayta. Bilaqad in wagam na akabiyan emad luwad le in i on mataw abeb gwahtiwa i gigo hib wagam na tibilaqimo. Bilaqsa mataw ta asor kabemmo

in wagam anamreniz na giqez muzinim nagah na awagamun mar ton waqyita.

³ Nazaq iyan ya inaqmo wagam na tumar tondaiqmo haqad inad emta. Inad emim ya wagam na agamukan bunmo alulin ulum muzad sisqmo tiluw. Luwim ya daq bunmo gwahtiqyta na ago tuhurit kemim teq ya wagam ka wastitayimmo mar tonim ninmen eman nawa lehaq. ⁴ Wagam ka mataw nibilensa ni tuhuritta. Teq in wagam hel diqta nibileniya na ago ni hurit kemdaq haqad ya ninmen gamuk ka mar tonim nawa eman leh nigaq.

On giger Elisabet ayow Mariya inaq gigem iyim amun emiyta giwagamun

God ago angelo Sekaraya bulonim bilam, God teq amun matta araq tinigdaq ham

⁵ Ari king Herot saw Judiya-ib on mataw giwamuzim ossa kam nab mat araq God ayon tamaz emaqta anan Sekaraya haqayta in os. Mat na in tamaz mataw gidauhan araq anan Abiya haqayta na gigo araq. Sa in awe anan Elisabet haqayta. Aw na in tamaz mat aqen diqta anan Aron haqayta na anaynayin araq. ⁶ Sekaraya awe inaq in Iyahta ago maror agamukan bunmo teq in ago gunun bunmo muzinad in giholib daq araq ananin waq daqayta haiq iysa in God ameb titnonimmo os yaqayta. ⁷ Teq Elisabet in aw nignigta iyim iyan in aduw inaq gigo amun haiqmo os yaqayta. Ad in giger adinowan diq tiqiyimo.

⁸ Ari kam araqab Sekaraya ago dauhta na gigo kam tugwahtiqan Sekaraya uliq Jerusalem-ub lehim God ameb tamaz emgo akabiyan tiqemyaq. ⁹ Emad in ago dauh nenaq tamaz em ago adan muzinim in gig amikmikta hunegan Sekaraya anan gwatiqan in Iyahta ago bit adugan Tawonta nab le tugwahtim, in faq aqasin ahuran dimunta gwalaqta ulamat God ayon tamaz emnan haqad. ¹⁰ Sa faq aqasin ahuran dimunta ulamayta akaman nab on mataw kuluwmo asanib humab emim in God bulonad titur yaqay.

¹¹ Tursa Sekaraya Tempel aduganib ago kabiyl emad in Iyahta ago angelo araq faq aqasin ahuran dimunta gwalaqta abanan aqabun ger nab tursa in ahol tuwam. ¹² Ahol waqad in anadnad emsa rab tuqlum netyaq. ¹³ Samo angelo na bulonim bilam, Sekaraya ham ni hi rab ham. Ni amun araq waqnan haqad God susumun ugan in ni niqez tuhurit ham. Ni niwe Elisabet teq amun matta araq tiqemdaq ham. Emid teq ni anan Jon haqad biydaq ham.

¹⁴ Ni amun na ahol waqad ni ninad dimniysa nigem tidimniydaqmo ham. Sa on mataw kabemmo in ningon amun na anan ginad tidimniy daqaymo ham. ¹⁵ Na ezaqgo ham amun na in Iyahta ameb abin inaq iydaq ham. In wain ayun teq yuw atoranta nagan a hi uluwdaq ham. Teq in anen agemab ussamo God ago Bugaw Dimunta in aholib tuboldaq ham. ¹⁶ Bolid teq abeb in ayah iyeq in Isrel on mataw kabemmo ginad buliyid in gigo Iyahta God ago hib muleqeq ta leh daqay ham. ¹⁷ Teq in anad Elaija anad nog iyeq in Elaija ago zawayibmo Iyahta ayon dan wastitaynan ameb lehdaq ham. Lehad in onmin ginennmaman gigem buliyid in gigo onmin ginadin a ta em daqay ham. Ad in mataw God ago nan a hi huriyatna gigem buliyid in mataw titnonta gigo ginad dimdimunta tuhurit daqay ham. Ningon amun na in nazaq Iyahta ayon on mataw gidauhan araq gihumab wolid ossamo Iyahta boleq in nenaq ginad dimniysa tuqos daqay ham.

¹⁸ Haqan Sekaraya in angelo bulon, Ezaq teq ya ningon gamuk na anan helmo haqdaiq? ham. Ya mat nenqab tigiy ham. Sa ya iwe nazaqmo aw nenqab tigiyomo ham. ¹⁹ An angelo amenin emim bilam, Ya Gebriyel ham. Ya God anognib turaiqta ham. God-mo ya iqeman ya gamuk dimunta ka a bo ni tinibileniq ham. ²⁰ Ni huriit ham. Yaqgo gamuk ka akaman gwahtiqid teq in anon tigemdaq ham. Ta teq ni yaqgo gamuk ka anan helmo a hi bilam ham. Nazaq iyan muran diq kabmo ni niqez hiqiyeq ni gamuk a ta hi bilaqdaq ham. Ni nazaq niqez hiqiyeq gamuk a hi bilaqad ossa le gamuk ya nibilenta ka tugwahtiqid nab teq ni niqez inaq ta iydaq ham.

²¹ Ari on mataw asanib God inaq gamuk emad tur yaqayta na in Sekaraya amen eman haiq in ginad kabemmo tiqem yaqay. Sekaraya ezaq diq tonad Tempel aduganib sisqmo luwaq? haq yaqay. ²² In nazaq ginadnad emad tursamo Sekaraya bo asanib tugwahtim. Gwahtiqid in aqez tihiqiyin in gamuk araq gibilengo haiq. Nazaq iyan on mataw na ginad tiqemiy, Sekaraya naqagag lul araq diqta Tempel aduganib ahol tuwam haqiy. Samo Sekaraya aqez tihiqiyin in kabiykibmo on mataw na gibilyenaq.

²³ Ari Sekaraya ago kabiylakaman na tihiqiyin in ago uliqab muleqim ta lah. ²⁴⁻²⁵ Lehim in awe Elisabet inaq usan awe agem tigiy. Agem iyim in kalam abyagnimo ulilemim bit aduganib tuqos. Osad in bilaqyaq, Iyahta nob yagim tiqidimun ton haqyaq. Idimun tonim in ya imebay on mataw gimeb usta na tuwalam haqyaq.

Angelo Gebriyel Mariya bulon, Teq ni Yesus emdaq ham

²⁶ Ari Elisabet agem iyim ossa kalam 6 nazaq tihiqiyin God in angelo Gebriyel bulonan in saw Galiliy-ib uliq araq anan Nasaret haqaytab tilah. ²⁷ Lehim in aw araq barasta ago hib tugwahtim. Aw na anan Mariya haqayta. In Devit ago asenlulibta araq. Teq in mat anan Josep haqayta na tuwaqdaq haqad anan bilaqan osyata.

²⁸ Ossa kam nab angelo Gebriyel gwahatiqim Mariya bulon, Aw ni nawa osaq e? ham. Iyahta agem dimunta nigad in ni ninaq osaq ham. ²⁹ Haqan Mariya in angelo gamuk bilamta na huritum ahol riten lam. Ritenad in anadibmo bilam, Gamuk ka adugan ezaq diqta ago angelo bilam? ham.

³⁰ Haqan angelo bilam, Mariya ham ni hi rab ham. God agem dimun diqta ni nigaq ham. ³¹ Ni huriit ham. Ni nigm iyeq teq ni amun matta araq tigemdaq ham. Emeq ni anan Yesus haqad biydaq ham. ³² Amun na in mat abin ayah diqta iyeq osdaqta ham. Ossa mataw in anan God Ulilib Digtat atatin haq daqay ham. Iyahta God in amun na emid in ases Devit king iyim osta nazaqmo in king iyeq tuqosdaqmo ham. ³³ Osad in Jekob asenluliz Isrel on mataw giwamuzad in king kuluwakuluwmo tuqosdaqta ham. Osad in ago kam a hi hiqiydaqta ham.

³⁴ Haqan Mariya in angelo bulonim bilam, Nagah na ya iholib ezaq diq teq gwahtiqaq? ham. Ya mat araq a hi wayta ham. Ad ya mat araq asit inaq a hi ustamo ham. ³⁵ An angelo amenin emim kazaq bulon, God ago Bugaw Dimunta ningon hib tuboldaq ham. Sa God Ulilib Digtat ago zaway tiniqisih bugdaq ham. Niqisih bugid teq amun na ni nigmab tugwahtiqaq ham. Ningon amun tawonta na ahol alulin nazaq iyid teq mataw in anan bilaq daqay, God-mo atatin haq daqay ham. ³⁶ Ni ninad em ham. Ni ninedan araq Elisabet na in adinowan tigiyta teq muran amun matta araq in agemab usaq ham. Kwaziqmo mataw in anan bilaq yaqay, Aw nigmiga amun a hi emdaqta haq yaqayta ham. Teq haiq ham. Muran in agem tigiy ham. Agem iyim in ago kalam 6 nazaq tihiqiy ham. ³⁷ Nazaq iyan God in nagah araq a hi emdaqta a haiq ham. ³⁸ An Mariya bilam, Ni huriit ham. Iyahta ago kabiliy aw ya kawa osaq ham. Ni ya ibilanta nazaqmo in ya iholib tigemdaq ham. Haqan angelo huritadmo in Mariya hulosim tilah.

Mariya le Elisabet ahol wam

³⁹ Ari kam nabmo Mariya hidmo eraqim in Elisabet ahol waqnau haqad tilah. Lehim in saw Judiya-ib Elisabet

ago uliq garah ban usaqta nab tugwah-tim. ⁴⁰ Gwahtiqim in Sekaraya ago bit aduganib loqim awe Elisabet ahol waqad "Zeq dimun" tuqug. ⁴¹ Ugan Elisabet in Mariya aqez huritsamo amun agemab usta na tubaytun. Samo God ago Bugaw Dimunta in Elisabet aholib ayahmo tubol. ⁴² Bolan in lileyim atoranmo bilam, On bunmo gilikmanib God agem dimun diqta ninmo tinigaq ham. Ad amun nawa nigemab usaqta na God in agem dimunta tuqugaqmo ham. ⁴³ Ya aw dimun a haiq ham. Teq ni yaqgo Iyahta anen ham. Doq tonnan ni yaqgo hib ya ibiynan bol? ham. ⁴⁴ Ya ni niqez huritsamo ya igemab amun usaqta ka anad dimniysa tubaytun ham. Na ago ya ningyo tuhurit kemim kazaq nibileniqaq ham. ⁴⁵ Aw ni ninad am, Helmo Iyahta ibilanta nazaqmo in tiqem yagdaq haqad ni ninad am ham. Nazaq iyan ni tidimniyim osaq ham.

Mariya ago bar

⁴⁶⁻⁴⁸ Haqan Mariya bilam,
Ya God ago kabibiy awmo ham.
Ya ibin haiqta teq God agem dimunta yag
ham.
Nazaq iyan ya inad teq idugan bunmo
Iyahta abin tiqiluwaiq ham.
God ya ilumsihim iwaqan ya dimunmo
osad igemabmo diq ya in anan inad
tidimniyiq ham.
Muran teq abeb on mataw dauh bunmo
ya inan bilaq daqay,
Aw naqmo Iyahta in agem dimunta ugan
in tidimniyim osta haq daqay ham.
⁴⁹ God ago zaway ayahmo diq iyan in
yaqmen nagah ayahta tiqam ham.
In ago daq bunmo dimunmo iyim titnon-
immo lahta ham.
⁵⁰ On mataw God wazinad ahaqenib ossa
in ginan anad meqniyata ham.
Ad in mataw na gigo onminta teq onmin
na giduganib onminta na ginan anad
meqniysa in ago daq na nazaqmo tileh
tutdaqta ham.
⁵¹ In kabiyl awaz meqinta kabemmo
tiqamta ham.
Emad in mataw igmo ag haqayta na
gimuzan haresmo tilehiy ham.
⁵² Ad in king giwaz meqinta giwazan
woqsa in mataw gibin haiqta na giqe-
man in mataw gibin inaqtta na gigo ban
tuwaqiy ham.
⁵³ In nagah dimunta kabemmo mataw
ginaghan haiqta na negan giyuninsa
in ta mataw ginaghan kabemmota na
gimuzan samanmo tilehiy ham.
⁵⁴⁻⁵⁵ In i gisesan hel diqmo gibilenim
bilam,

Ya Abraham teq in ago dauh abeb bol
daqayta na tuteqmo ya inad tinegdaiq
haqad in bilamta ham.
Ad muran in gamuk bilamta na anadin a
ta emad in ago on mataw Isrel tigilum-
sihq ham.
In gamuk bilamta nazaqmo diq in
muzinim tiqem ham.
⁵⁶ Ari Mariya in Elisabet inaq kalam
ezeqman nazaqmo osim teq in ago uliqab
muleqim ta lah.

Elisabet in ago amun Jon am

⁵⁷ Ari Elisabet amun emgo akaman tug-
wahtiqan in amun matta araq tiqam.
⁵⁸ Eman Iyahta in Elisabet anan anad
ayahmo meeqniysa amun ugta na ago Elisabet
asenlul teq in ayogniz tuhuritiy. Hu-
ritim in Elisabet inaq ginad tidimniy yaqay.
⁵⁹ Sa abeb amun na ago kam 8 nazaq
tiqiyan teq mataw in amun ahol abatan
asan urotnan tuboliy. Bolim in amun ahol-
nan ugnan haqad in amun amammo anan
ugnan bilaqiy. ⁶⁰ Bilaqan teq amun anen
bilam, Haiqgam ham. In anan Jon-mo us-
daqta ham. ⁶¹ Haqan mataw na buloniy, Ni
nisenlul araq aholnan nazaqta haiq haqiy.
⁶² Haqad in ta amun amam kabiylakibmo
susumun ugiy, I amun ka anan doqagta
biyam? haqiy. ⁶³ Haqan amam kabiylakibmo
gibilenen in ay anabun araq teq
zamor asor ugan in gamuk kazaq mar ton.
In anan Jon ham. An mataw na gamuk
na ahol waqad gihol riten lam. ⁶⁴ Sa mu-
ran diq nawaqmo Sekaraya aqez hiqiyim
usta na hulos ugan in aqez inaq iyim
gamuk tibilaqad in God abin tiqiluwuyaq.
⁶⁵ Sa Sekaraya awe Elisabet inaq giyogniz
bunmo tirab yaqay. Ad in nagah gwah-
timta na abin eman saw Judiya-ib uliq
bunmo garah ban usaqta nab tileh bug.
⁶⁶ Lehan on mataw bunmo nagah gwah-
timta na ago huritim in anadin emad os
yaqay. Osad in Iyahta ago zaway Jon aholib
ussa ahol waqad bilaq yaqay, Amun ka
ayah iyeq teq in mat ezaq diqta iydaq? haq
yaqay.

Sekaraya ago bar

⁶⁷ Ari God ago Bugaw Dimunta in amun
amam Sekaraya aholib ayahmo bol. Bolan
God in Sekaraya anad ugan Sekaraya
aqezab gamuk gwahtiqsa in kazaq bilam,
⁶⁸ I Iyahta God abin iluwuq ham.
In ago on mataw Isrel nob negim in
gizayim in gigo bab gibenab tigiwaqaq
ham.
⁶⁹ In mat araq awaz meqinta eman in ago
kabibiy mat Devit asenlulib tugwahtim
ham.
Gwahtiqim in teq i gilumsiheq giwaqid i
dimunmo tuqosam ham.

⁷⁰ Kwaziqmo God in ago nantut tawonta nagan ginezab gamuk eman gwah-timta nazaqmo in tiqam ham.

⁷¹ In mat awaz meqinta na eman gwah-tiqim in i gilumsihsa i gibabun a hi gimeqin ton daqay ham.

Sa in mataw gigem meqinta igayta na gibenab i giwaqid i dimunmo osam ham.

⁷² Kwaziqmo God i gisesan hel diqmo gibilenim bilam,

Ya ne ginan inad meqniysa tigilumsih-daiq haqad in bilam ham.

Ad muran in ago gamuk na anadin emad in nazaqmo tiqemaq ham.

⁷³⁻⁷⁵ Kwaziqmo in i gises Abraham inaq an adugan wazim in hel diqtaqmo bulonim bilam,

Ni nisesan bab gibenab ossa ya gilumsi-heq ta giwaqdaq haqad in bilam ham.

An muran in i gimen dante nazaq diq tiqem igid i in ago kabibiy mataw tawonta iyeq osad i in ameb daq tit-nonta emad tuqosam ham.

Ossa kam dimunta na a hi hiqiydaq ham.

⁷⁶ Ari yaqgo amun ham mataw ni ninan God Ulilib Diqta ago nantut tihaq daqay ham.

Na ezaqgo ni ameb leheq Iyahta ayon dan tuwastitayaq ham.

⁷⁷ Wastitayah ni Iyahta ago on mataw gibilensa in gigo daq meqinta gileh ugsa Iyahta gilumsiheq ta giwaqdaq ham.

⁷⁸ I gigo God in i ginan anad meqniysa in i gilowan diq tonaqta ham.

Teq in ulilib osad i gilumsiheqta na in bliqne i gigo sawab zeq ahokan gwalsaw saw hastitayaq nazaq nog iyaq ham.

⁷⁹ Nazaq iysa teq i romriqab moqgo danteb osauqta na hulosad i le saw anuwanib tugwahtiqam ham.

Gwahtiqeq ossa Iyahta dan giqsisihuneq giqad lehsa i gigo hib bab hiqiyas i gigem kute nemsia tuqosam ham.

⁸⁰ Ari amun na ayah tiqiyim in anad teq ahol bunmo zilimim in ago zaway inaq tiqiy. Iyim in lehim saw amatawun haiqtab osad in Isrel gimeb ulalab gwahtiqdaqta na akaman amen tiqemyaq.

2

*Mariya in ago amun Yesus am
(Matyu 1.18-25)*

¹ Ari Elisabet Jon iqamta kam nagab Rom gigo maror ayah diqta anan Sisa Ogastus haqayta na in gamuk araq kazaq bilam, Yaqgo on mataw bunmo ginulinad teq ginan waqiy ham. ² Na in gime ameb diqta on

mataw ginuliniya. Mat anan Kviriniyuus haqayta na in on mataw saw Siriya-ibta giwamuzim ossa daq na gwahtimta. ³ Ari Sisa nazaq haqan on mataw bunmo in gigo uliq diqtab ginan emnan tilehiy.

⁴ Lehsa mat anan Josep haqayta na in Devit ago ned teq in asenlul araq iyim in uliq Nasaret saw Galiliy-ibta hulosim in Devit ago uliq Betlehem-ub saw Judiya-ibtab tilah. ⁵ Lehad in ayow Mariya waqim inaq tilahmo. Ad in Mariya inaq nanmo wastitayim an a hi waqadmo Mariya agem tiqiy. Agem tiqyan teq in giger ginan emnan haqad uliq Betlehem-ub tilehiy. ⁶ Lehim in uliq nab osad Mariya amun emgo akaman tiqiy. ⁷ Iyan in ago amun aqenta matta na tiqam. Emim in tubusanib isihim bulmakau didaq neqayta adegnib eman wo tuqus. Na ezaqgo bit bunmo ban haiq tiqyan in asanib karuw abitnibmo osiy.

Angelo asor mataw sipsip giwamuzayta na gigerab gehitiqiy

⁸ Ari saw nab mataw sipsip giwamuzayta na asor in uliq adek ban pesan nog osad teq in taromab gigo sipsip giwamuz yaqay. ⁹ Sa Iyahta ago angelo araq in gigerab tugwahtim. Gwahtiqanmo Iyahta ahol anuwan hitiqad mataw na tigiqisih nat. Giqisih netsa in tirab yaqay. ¹⁰ Rabsa angelo na gibilan, Ne hi rabiy ham. Ad ne hurituy ham. Ya gamuk araq dimun diqta on mataw bunmo gimen a bol ham. On mataw kabemmo gamuk ka huriteq teq in ginad tidimniy daqay ham. ¹¹ Muran diqmo aw araq in Devit ago uliqab amun tiqam ham. Amun na ayah iyeq teq in ne gilumsiheq ta giwaqdaqta ham. In anan Krais* ham. In ne gigo Iyahta ham. ¹² Ne leheq amun na kazaq ahol tuwaq daqayta ham. In tubusanib isihim bulmakau didaq neqayta adegnib eman woqim usaq ham.

¹³ Ari angelo na in nazaq haqad tur-samo God ago hib angelo kabemmo in agerab tugwahtiqiy. Gwahtiqim in God abin iluwad bilaqiy,

¹⁴ I God anan sorid ulilibmo gwaleh bugan haqiy.

Sa og kab on mataw God agem dimunta negaqlta na in ginad dimniysa gigem kute nemsia osiy haqiy.

¹⁵ Angelo nazaq haqadmo in mataw na gihulosad muleqim Heven-ib ta gwalehiy.

Mataw sipsip giwamuzayta na le Yesus ahol waqiy

Ari angelo gwalehsamo mataw sipsip giwamuzayta na an bulonim bilaqiy, I Betlehem-ub leheq nagah Iyahta anan bilamta ka i le ahol waquq haqiy. ¹⁶ Haqad

* ^{2:11:} Gamuk Krais ka alulin in “God mat emid bo i gilumsihdaqta na amatin” haqayta.

in hidmo tilehiy. Lehim in Mariya aduw Josep inaq ossa tigibiyiy. Ad amun bulmakau didaq neqayta adegnib ussa in ahol tuwaqiyimo. ¹⁷ In amun na ahol waqim teq in angelo amun anan gibilanta na ananin tutim tibilaqiy. ¹⁸ Bilaqsa mataw huritayta na bunmo in mataw sipsip giwamuzayta gigo gamuk na anan ginadnad emad gihol turuh nam. ¹⁹ Teq amun anen Mariya in gamuk na huritan gamuk na bunmo in anadib tuqus bugyaq. Ussa in gamuk na anadin emad teq in anadibmo bilaqyaq, Ka yaqgo amunmo anan bilaqiyta ka in gamuk adugan ezaq diqta bilaqiy? haqyaq. ²⁰ Teq mataw sipsip giwamuzayta na muleqim ta lehiy. Lehad angelo gamuk gibileniyta na teq in le nagah ahol waqiyta na bunmo ago in ginad dimniysa in God abin diq tiqiluw yaqay. Na ezaqgo angelo gibileniyta nazaqmo diq in le ahol waqiyta na ago iyan.

Mataw Yesus aholnan ugyi

²¹ Ari abeb kam 8 nazaq tihiqiyan teq mataw in amun ahol abatan asan tuqurotim teq in anan Yesus haqad tibiyiy. Amun anen agemab a hi gwahtiqsamo angelo anan bilaqan usta nazaqmo in tibiyiy.

Josep awe Mariya inaq amun Yesus ad Tempel-ib lehan Simeon teq Ana inaq ahol waqiy

²² Ari Mariya amun tiqemim in ahol udinim os. Osim tihiqiyan aw amun inaq gihol zaygo akaman tugwahtim, Moses ago marib gunun bilamta nazaq. Gwahtiqañ Josep awe Mariya inaq in gigo amun ad Jerusalem-ub tilehiy, in amun Iyahta abenab emgo haqad. ²³ Na ezaqgo Iyahta ago maror Moses mar tonta na in kazaq bilam,

Ne amun matta aqenta Iyahta ugid in agota iyeq tuqosdaq ham. *Kisim Bek 13.2, 12, 15*

²⁴ Nazaq iyan in Jerusalem-ub lehim Mariya amun emim ahol busirin iyta na ago tamaz ah amikmikta in tiqemiy. Na ezaqgo Iyahta ago maror in kazaq bilammo,

Ne muluk amidgot giger o ah husta amikmikta giger tiqem daqay ham. *Wok Pris 12.8*

²⁵ Teq mat araq anan Simeon haqayta uliq Jerusalem-ub os. In mat titnonta teq in God anadin diq emyaqta. In mat Isrel on mataw gilumsihid dimunmo os daqayta na amatin baq tunim osyaqta. Ossa God ago Bugaw Dimunta in aholib usyaqta. ²⁶ Usad tekomo in Simeon tubulon. Ni hidmo a hi moqdaq ham. Iyahta ago mat Isrel gilumsihdaqta na amatin gwahtiqid ni ahol waqeq teq ni moqdaq ham.

²⁷ Ari kam nab God ago Bugaw Dimunta Simeon abe yahsa in le Tempel agelin aduganib tugwahtim. Gwahtiqim luwsa Yesus anen amam in gigo amun ad Tempel-ib tuboliyomo. Giger na God ago gumnun Moses bilamta na muzinim in Yesus ayon naw emnan haqad boliy. ²⁸⁻²⁹ Bolan Simeon gibiyad in gibenab amun waqim wazad in God abin iluwim kazaq bilam,

Iyahta ham ya ning kabibiy mat ham. Muran ni ya iwaqid ya inad dimniysa tumoqdaiq ham.

Kwaziqmo ni ya ibilanta nazaq ham.

³⁰ Na ezaqgo ham mat ni emid bo i gilumsiheq ta giwaqdaqta na kawa ya ime anonabmo ahol tuwaqaiq ham.

³¹ Daq ka ni on mataw dauh bunmo gimeb eman tugwahtim ham.

³² Amun ka in on mataw en ta asor Juda a haiqta nagan giqemid in ning tuhurit daqay ham.

Bilaqne lam anuwan lehsa mataw saw ahol waq kemay nazaq ham.

Amun ka in Isrel on mataw giduganib gwahtiqañ iyan on mataw bunmo in Isrel gabin tiqiluw daqay ham.

³³ Haqan amun anen amam in Simeon ago gamuk in amun anan bilamta na huritim in gihol turuh nemyaq.

³⁴⁻³⁵ Sa Simeon gibar tonad in amun anen Mariya kazaq bulon, Ni hurit ham. Amun ka in Isrel on mataw kabemmo eraqim turayta na giqothasid tuwoq daqay ham. Ad in on mataw kabemmo woqim usayta na gizawid tiqeraq daqay ham. Amun ka tarin nog osdaqta ham. Ossa mataw kabemmo ahol waqad tubaymuz daqay ham. Bay muzsa ni ahol waqad ni ninad ayahmo meqniydaq ham. Bilaqne baqir niqutil ulum tayaq nazaq nog ham. Amun ka ayah iyeq teq in mataw kabemmo ginad ulilemim usaqta na giqemid in ginad na ulal tiqyidaq ham.

³⁶ Ari Simeon gamuk emim tihiqiyanmo aw araq anan Ana haqayta in gigerab tubol. Aw na in God ago nantut araq. In amam Fanuwel teq in ago gem anan Aser haqayta. Teq in aw adinowan diqta. Kwaziqmo in mat waqim inaq ulig 7 nazaqmo osta.

³⁷ Osim aduw tumoqan in wabur osad ago ulig 84 nazaq tiqiy. Aw na Tempel a hi hulosyaqta. Kam bunmo zeqab taromab inaqmo in God ayon lotu emad sirisirimo in didaq udinad teq in God inaq gamuk emyaqta. ³⁸ Yesus anen amam in amun wazim nab tursamo aw na gigerab bolim amun ahol waqad in God esey tuqugyaq. Esey ugad teq in mataw asor nab turiyta na amun anan gibilenum bilam, God mat emid boleq i gilumsihdaqta na amatin i amen emim osauqta na in kawaqmo tugwahtim ham.

*Josep ago aw amun nenaq muleqim
Nasaret-ib ta lehiy*

³⁹ Ari Josep awe Mariya inaq in nagah bunmo Iyahta ago marorib gunun bilamta na tiqem bugiy. Em bugim teq in muleqim gigo uliq Nasaret saw Galiliy-ibtab tilehiy.
⁴⁰ Lehan amun na ayah iyad in ago zaway inaq tiqiyayaq. Ad in anad awaz time-qniyyaqmo. Sa God agem dimunta ugad tidimum tonyaq.

Yesus amomo Tempel-ib lah

⁴¹ Ari ulig bunmo Yesus anen amam uliq Jerusalem-ub leh yaqayta, in Juda gigo lotu akaman ayahta anan Pasova haqay na ahol waqnan haqad. ⁴² Ad Yesus ago ulig 12 nazaq tiqiyan teq in anen amam gigo daq na muzinim in bunmo Jerusalem-ub tilehiy. ⁴³ Lehim Pasova akaman na tihiqiyan in muleqim giquliqab ta bol yaqay. Bolsa amun Yesus uliq Jerusalem-ub tuqos tut. Os tutsa anen amam in Yesus Jerusalem-ub osaqta na a hi hurityit. ⁴⁴ In giger ginad emiy, Yesus tabag on mataw ta asor na nenaq tilehaq haqiy. Haqad kam amulikmo in muleqim danmo ta lehad teq imisor tiqiyisa in gisenlul teq gikadoyniz gilikmanib amun tinagun yaqay. ⁴⁵ In amun nagunim le ahol a hi waqadmo in muleqim Jerusalem-ub amun nagim a ta lehiy.

⁴⁶ Lehim in bit ban bunmo amun nagunad luwad le kam ezeqmanta nab in Tempel ago gel aduganib amun ahol tuwaqiy. In gigo amun na in mataw Moses ago gunun asuleqin bilaqayta na gilikmanib osad in gigo gamuk huritad teq in gisusumun negiyaq. ⁴⁷ Sa mataw aseseqta na nazaqmo Yesus susumun ug yaqaymo. Susumun ugsa Yesus amenin emsa mataw nab osiyta na bunmo in Yesus anad awaz meqinta na teq in ago gamuk na huritad in ginad nad emad gihol turuh nemyaq. ⁴⁸ Samo Yesus anen amam nazaq in gigo amun ahol waqad in gihol ritan. Sa anen bulon, Ya itatin ham doq tonnan ni i giger kazaq giton? ham. Ya nimam inaq ginad meqniysa i ninagunad luwta ham. ⁴⁹ Haqan Yesus gibilan, Nagaqgo ne bit bitmo ya inagunad luwi? ham. Ya imammo ago bitab osdaiqta na ago ne a hi hurityit teq ne ya inagunad luwiye? ham. ⁵⁰ Haqan anen amam in Yesus ago gamuk na huritim in alulin ginad a hi emiy.

⁵¹ Samo Yesus eraqim anen amam ne-naq uliq Nasaret-ib tilehiy. Lehim nab in anen amam giqez huritad ginad muzad tiluwyaq. Sa daq nagan bunmo anen anadib us bugsaq in anadin emad osyaq.

⁵² Ari Yesus uliq nab osad ayah tiqiy bugim in anad teq ahol bunmo tizilim bug. Sa God teq on mataw bunmo in Yesus ahol waqad in gigem dimunta ug yaqay.

Jon Yesus ayon dante wastitayta na awagamun

3

Jon mataw huz negyaqta na in on mataw gamuk gibilenyaq

(Matyu 3:1-12; Mak 1:2-8; Jon 1:19-28)

¹ Ari mat anan Sisa Taiberiyas haqayta na in Rom gigo king iyim ossa ago ulig 15 nazaqmo tiqiy. Iyan kam nab Pontiyus Pilat saw Judiya wamuzyaq. Sa Herot saw Galiliy wamuza in amirkjan Filip saw gigermo Ituriya teq Trakonitis giwamuzim osyaq. Ossa mat anan Lisaniyas haqayta na saw Abilin wamuzad osyaqmo. ² Sa Isrel gimuganib mat anan Anaz haqayta na amam Kayafas inaq in tamaz mataw danmepta iyim os yaqay. Ossa kam nabmo Sekaraya atatin Jon gwahtiqim saw araq amatawun haiqtan ossa God ago gamuk in anadib tugwahtim. ³ Gwahtiqan in yuw Jodan aqurumnib uliq saw bunmo luwad in on mataw God ago gamuk tigibilenyaq. Gibilenad in bilaqyaq, Ne ginad buliyeq ne gigo daq teq ginad meqinta bunmo gileh ugiy haqyaq. Gileh ugad ne bolsa ya huz negiq haqyaq. Ne nazaq emsa teq God ne gigo daq teq ginad meqinta na tigiwalem bugdaq haqyaq.

⁴ Ari Jon gwahtiqim nazaq emad luwad in kwaziqmo God ago nantut Aisaya gamuk mar tonta na tuwol net bug. Aisaya bilam, Mat na aqez saw amatawun haiqtan lileyim bilaqaq, Ne Iyatha ayon dan balaw toniy haqaq ham. Ad ne in ayon dante na wastitayid titnonan haqaq ham.

⁵ Iyatha boldaqta kam nab garah bunmo aseseqta teq amikmikta inaqmo giqurotid woqid saw agemqanmo tiqiydaq haqaq ham. Ad akalhonan usaqta na bunmo ituq bugid in nazaqmo agemqan tiqiydaqmo haqaq ham. Dan kok tonim usaqta na bunmo tititnon bug daqay haqaq ham. Ad dan bunmo gig ate usaqta na wolid in ate tihiqiy bugdaq haqaq ham.

⁶ Kam nab God in ago on mataw gilumsihad giwastitaysa og kab on mataw bunmo tigibiy daqay haqaq ham. *Aisaya 40:3-5*

⁷ Ari on mataw kabemmo Jon i huz ig-daq haqad agerab tubol yaqay. Bolsa Jon gibilan, Ne ured amidgotniz ham. God teq ne ginan agem meqniysa gimeqin tondaqta na nog gibilenan ne tukim gigbeb leh nog iyay? ham. ⁸ Ne ginad meqniysa gigem buliyid teq ne gigo daq nazaqmo tubuliydaq ham. Luweq ne ginad kazaq em daqay ham. I Abraham asenlulibta haq daqay

ham. Nazaq iyan God anad dimunta igad a hi gimeqin tondaq haq daqay ham. Nazaq ne ginad hi emiy ham. Ya ne gibilenaiq ham. God gig kag gibilenid buliyeq Abraham asenlulniz iygo azawayin in aholib usaqta ham.⁹ Talgis ay abeqarib tuqusaq ham. Ay bunmo anon dimunta a hi emaqta na in qwayeq faqab hunegid le tuqoydaq ham.

¹⁰ In nazaq haganmo on mataw dauh biyahta na Jon tisumun uguy, I ezaq toneq teq i gigem tubuliya na mataw tigiqishunam? haqiy. ¹¹ Haqan Jon gibilan, Ne daq kazaq emiy ham. Mat ago tubusan giger usaqta na in araq mat ago tubusan haitqa na ugan ham. Sa mat ago didaq inaqtta na in nazaqmo eman ham.

¹² Haqsa mataw takis waqayta na asor in Jon huz igdaq haqad ago hib tuboliyomo. Bolim in Jon susumun uguy, Ta igmo teq ezaq tonam? haqiy. ¹³ Haqan Jon gibilan, Gavman gibilanta nazaqmo ne takis waqiy ham. Ad ne katiyeq mani asor samanmo ta hi waqiy ham. ¹⁴ Haqan ta mataw bab emayta asor nab turiyta na in susumunim bilaqiy, Ta i teq ezaq tonam? haqiy. Haqan Jon gibilan, Ne mataw tor negad giqutil ulumad gigo mani hi rin toniy ham. Ad ne hazizirib katiyad mataw gimalib nan emad gigo mani samanmo hi waqiy ham. Teq ne kabiy emayta na anawun waqad nan kabemmo hi bilaqiy ham.

¹⁵ Haqsa on mataw bunmo Jon ahol waqad giqutil eraq yaqay. Ad in ginadnad emad in gimo gihol buloneq bilaq yaqay, Luweq mat ko in Krais iydaq haq yaqay. ¹⁶ Haqsa Jon in bunmo gibilenim bilam, Ya ne yuwibmo huz negaiqta ham. Ari mat araq teq ya ibeb boldaqta na abin in ya ibin uriyamta ham. Ya in ahaqenibta ham. In yaqgo Iyahta ham. Ya in ago kabibiy mat samanta ham. In boleq nagah giger God ago Bugaw Dimunta teq faq inaq gimalib ne tuhuz negdaq ham.¹⁷ In abenab sabol wazim in ago wit wolayta asawnib wit tigiluwiynan ham. Giluwiyat in wit anagin dimunta na ginuweq ago wit abit-nib humab tuwoldaq ham. Humab wolad in wit asan meqinta na ginuweq faq a hi miyaqtah hunegid le tuqoydaq ham.

¹⁸ Haqad Jon gamuk naqanta kabemmo amalib on mataw ginad wazan eraqsa teq in God ago gamuk dimunta gibilenyaq.

Herot Jon irqrur

¹⁹⁻²⁰ Teq king Herot in ama awe Herodiyas hureqim waqan Jon tuwadyaq. Wadad in Herot daq meqinta kabemmo amta na ago tuwadyaqmo. Wadsa Herot ago daq meqinta kabemmo aholib usta na amalib in daq ta araq meqin diqta emim in Jon wazim tiqirqrur.

Jon Yesus huz ug

(Matyu 3.13-17; Mak 1.9-11)

²¹⁻²² Ari Herot in Jon a hi irqursamo Jon on mataw bunmo huz negad teq in Yesus tuhuz ugmo. Huz ugan Yesus God inaq gamuk emad tursa kait misireq nog iyim aqez hasan God ago Bugaw Dimunta ahol biliyim ah husta nog iyim Yesus amalib tigehitim. Gehitiqan Heven-ib God aqez bilam, Ni ya itatin ham. Ya ni ninan inad bilaqsa ya igem dimun diq iyaqta ham.

Yesus asesan ginan

(Matyu 1.1-17)

²³ Ari Yesus ago ulig 30 nazaq ticiyan teq in ago kabiy alulin tiqam. Teq on mataw in ahol alulin diq a hi huritim iyan in anan bilaq yaqay, Josep-mo atatin haq yaqay.

Teq Josep in Heli atatin.

²⁴ Sa Heli in Matat atatin.

Sa Matat in Liway atatin.

Sa Liway in Melki atatin.

Sa Melki in Janay atatin.

Sa Janay in Josep atatin.

²⁵ Sa Josep in Matatiyas atatin.

Sa Matatiyas in Amos atatin.

Sa Amos in Nahum atatin.

Sa Nahum in Esli atatin.

Sa Esli in Nagay atatin.

²⁶ Sa Nagay in Maqat atatin.

Sa Maqat in Matatiyas atatin.

Sa Matatiyas in Semen atatin.

Sa Semen in Josek atatin.

Sa Josek in Joda atatin.

²⁷ Sa Joda in Jowanan atatin.

Sa Jowanan in Resa atatin.

Sa Resa in Zerubabel atatin.

Sa Zerubabel in Sealtiyel atatin.

Sa Sealtiyel in Neri atatin.

²⁸ Sa Neri in Melki atatin.

Sa Melki in Adi atatin.

Sa Adi in Kosam atatin.

Sa Kosam in Elmadam atatin.

Sa Elmadam in Er atatin.

²⁹ Sa Er in Josuwa atatin.

Sa Josuwa in Eliyezer atatin.

Sa Eliyezer in Jorim atatin.

Sa Jorim in Matat atatin.

Sa Matat in Liway atatin.

³⁰ Sa Liway in Simeon atatin.

Sa Simeon in Juda atatin.

Sa Juda in Josep atatin.

Sa Josep in Jonam atatin.

Sa Jonam in Eliyakim atatin.

³¹ Sa Eliyakim in Melea atatin.

Sa Melea in Mena atatin.

Sa Mena in Matata atatin.

Sa Matata in Natan atatin.

Sa Natan in Devit atatin.

³² Sa Devit in Jesi atatin.

Sa Jesi in Obet atatin.

Sa Obet in Bowaz atatin.

Sa Bowaz in Salmon atatin.
 Sa Salmon in Nason atatin.
³³ Sa Nason in Aminadab atatin.
 Sa Aminadab in Atmin atatin.
 Sa Atmin in Arni atatin.
 Sa Arni in Hesron atatin.
 Sa Hesron in Peres atatin.
 Sa Peres in Juda atatin.
³⁴ Sa Juda in Jekob atatin.
 Sa Jekob in Aisak atatin.
 Sa Aisak in Abraham atatin.
 Sa Abraham in Tera atatin.
 Sa Tera in Nahor atatin.
³⁵ Sa Nahor in Serug atatin.
 Sa Serug in Rew atatin.
 Sa Rew in Pelek atatin.
 Sa Pelek in Eber atatin.
 Sa Eber in Sela atatin.
³⁶ Sa Sela in Kainan atatin.
 Sa Kainan in Arpaksat atatin.
 Sa Arpaksat in Siyem atatin.
 Sa Siyem in Nowa atatin.
 Sa Nowa in Lamek atatin.
³⁷ Sa Lamek in Metusela atatin.
 Sa Metusela in Enok atatin.
 Sa Enok in Jaret atatin.
 Sa Jaret in Mahalalel atatin.
 Sa Mahalalel in Kainan atatin.
³⁸ Sa Kainan in Enos atatin.
 Sa Enos in Set atatin.
 Sa Set in Adam atatin.
 Sa Adam in God atatin.

4

*Satan Yesus ulum wam
(Matyu 4.1-11; Mak 1.12-13)*

¹ Ari God ago Bugaw Dimunta Yesus aholib ayahmo diq tuqusyaq. Ussa Yesus yuw Jodan hulosim muleqim ta lehsa God ago Bugaw Dimunta in waqim ad saw araq amatawun haiqtab tilah.

² A lehan Satan kam 40 nazaqmo Yesus ulum waqad luwyaq. Luwsa kam nab Yesus didaq haiqmo osyaq. Ossa kam 40 na le tihiqiyan in agem tumoqyaq. ³ In agemnan moqad ossa Satan bolim tulon, Ni God atatin iyeq teq ni gig ka bulonid in bulyeq bret iyid ni neq ham. ⁴ Haqan Yesus amenin emim bulon, God ago marib gamuk araq kazaq bilam ham.

Bret amomo in mat eman kayeqmo a hi osaqta haqad in bilam ham. *Lo 8.3*

⁵ Haqan Satan in Yesus waqim garah araq abigmanib a gwalehim muran diq nawaqmo in kantri bunmo tigisihun bug. ⁶ Ishitun bugad in Yesus bulon, Ya kantri aseseqta kogan bunmo giqemid ni nihagenib iysa ni nibin ayahmo diq iydaqta ham. Nagah kogan bunmo ya ibenab ussa ya giwamuzaqta iyan ya mat araq ugnan inad bilaqid ya tuqugdaiq ham. ⁷ Nazaq iyan ni mulbuneq ya ibin iluwid teq nagah ko

bunmo in ningi tigiydaq ham. ⁸ Haqan Yesus amenin emim bulon, God ago marib gamuk araq kazaq bilam ham.

Iyahta in ningi God haqad in bilam ham. Ni in amomo abin iluwad ago kabiy emdaq haqad in bilam ham. *Lo 6.13*

⁹⁻¹¹ Anmo mat meqinta na in waqim ad uliq Jerusalem-ub tilah. A lehim in Tempel abigmanib Yesus eman tursa in bulon, God ago marib gamuk araq kazaq bilam ham.

God in ago angelo gibilenid in ni nitawanan emad tinibiy muz daqay haqad in bilam ham. Nibiy muzad in boleq gibenab tinisor daqay haqad in bilam ham. Luweq ni nisen gigib woltagdaq haqad in bilam ham. *Buk Song 91.11-12*

Nazaq iyan ni God atatin iyeq teq ni kab sortukeq woq ham. Woqsa ni nimam nilumsihsa ya nibiyiq ham. ¹² Haqan Yesus amenin emim bulon, Teq God ago marib gamuk araq kazaq bilammo ham.

Iyahta in ningi God haqad in bilam ham.

Nazaq iyan ni girerey emad in hi ulum waq haqad in bilam ham. *Lo 6.16*

¹³ Ari Satan daq nag bunmo amalib Yesus tuqulum waqim in hulosadmo tilah. Lehad in anad emyaq, Kam ta araqab teq ya a ta ulum waqdaiq haqyaq.

Yesus saw Galiliy-ib lehim in God ago Bugaw Dimunta ago zaway amalib kabiy tiqemyaq

*Yesus saw Galiliy-ib ago kabiy alulin am
(Matyu 4.12-17; Mak 1.14-15)*

¹⁴ Ari God ago Bugaw Dimunta Yesus aholib zaway diq iyim ussa in muleqim saw Galiliy-ib a ta lah. Lehim ossa in abin saw nab uliq bunmo tilehyaq. ¹⁵ Sa Yesus saw nab uliq-uliqgo luwad in ago daq muzineq tuteqmo in mataw gigo bit humab wolaytab gwahtiqeq suleq tinegyaq. Negsa on mataw bunmo in ago gamuk huritad abin tiqiluw yaqay.

On mataw uliq Nasaret-ibta Yesus gileh ugiy

(Matyu 13.53-58; Mak 6.1-6)

¹⁶ Ari Yesus saw nagab luwimmo in ago uliq diq Nasaret-ib tilah. Uliq nab in osad ayah iy bugta. In nab le osad Juda gigo lotu akannib in ago daq muzinim bit humab wolaytab le tugwahtim. Gwahtiqim osad teq in God ago gamuk bilaqnan haqad eraqim titur. ¹⁷ Tursa mat araq God ago gamuk nantut Aisaya mar tonta na waqim a bo Yesus tuqug. Ugan in hasim mar nagunim le ahol tuwaqim teq in kazaq bilam,

¹⁸ Iyahta ya itowun emim ibilan, Ni mataw ginaghan haiqta yaqgo gamuk dimunta tigibilendaq haqad in bilam ham. In ya inan nazaq haqad teq in ago Bugaw Dimunta yagan ya iholib tuqusaqta ham. Ussa Iyahta iqeman ya gamuk kazaq on mataw gibilennan tubol ham.

Mataw giqirqruran osayta na ya ne giqamun hasid ne samanmo tiluw daqay haqaiq ham. Teq mataw gime haiqta na ya ne gime wastitayid ne saw ahol tuwaq daqay haqaiq ham. Ne mataw afqaqan kabemmo gisorayta na ya ne gigo afqaqan giholib walemid ne gihol tisinamoldaq haqaiq ham.

¹⁹ Teq ya bilaqaiq, Iyahta in ago on mataw gidimun tondaqta na akaman tug-wahtiqaq haqaiq ham. *Aisaya 61.1-2*

²⁰ Yesus gamuk na bilaq bugim tihiqiyin in sansandek na tal tonim mat wamuzaqta na ugad in le tuqos wom. Os woqim ossa on mataw bit nab osiyta na bunmo in Yesus ahol tuwaninun yaqay. ²¹ Ahol waninunsa Yesus in gamuk bilamta na alulin emim gibilan, Muran mat araq God ago mar ne nawa tuhuriyita na wol net bugsa ne ahol tuwaqiy ham.

²² Ari on mataw uliq nabta na bunmo Yesus abin tiqiluw yaqay. Ad in Yesus aqezab gamuk dimunta gwahtiqaqta na huritad gihol turuh nemsat teq in bilaq yaqay, Ka Josep-mo atatin a haiq e? haq yaqay.

²³ Haqsa Yesus gibilan, Helmo ham. Ne teq kazaq ibilen daqay ham. Ni igimen daq araq a hi emaq haq daqay ham. Kapaneam-ub ni daq azawayin inaqlta eman i abin huritta naqanta araq ninmo ningi uliq kabmo emsa i ahol a hi waqauq haq daqay ham. ²⁴ Teq ya helmo ne gibilenaiq ham. God ago nantut ago uliqabmo diq in ahol abin haitqa ham.

²⁵ Ya ne gibilen kemaiq ham. Kwazigmoo Elaija ago kamub zarow araq ayah diqta saw bunmo gwahtim ham. Gwahtiqaq ulig ezeqman teq awewepta na asormo urom a hi wom ham. Kam nab Isrel-ib on waburta kabemmo osiyta ham. ²⁶ Ta teq God in Elaija eman ago on mataw Isrel gigo aw waburta araq ulumsihnan a hi lah ham. Haiq ham. In Elaija eman on mataw en ta araq Juda a haiqta naqmo gigo saw anan Saidon haqayta nab in lah ham. Lehim uliq anan Sarefat haqayta nabmo in aw waburta araq ulumsih ham.

²⁷ Ad nazaqmo ham. God ago nantut anan Elisa haqayta na ago kamub mataw gigo moq lepra inaqlta kabemmo Isrel-ib osiyta ham. Teq God in ago mataw Isrel na gilikmanib araq ago moq lepra wastitayan

a hi dimniy ham. Haiq ham. In mat anan Naman haqayta naqmo amomo ulumsihan ahol dimniy ham. Mat na in on mataw en ta araq Juda a haiqta ginan Siriya haqayta naqmo gigo araq ham.

²⁸ Yesus nazaq Isrel on mataw gabin wazan wogon bit nab mataw bunmo huritad gigem meqin diq iy. ²⁹⁻³⁰ Gigem meqniysa in eraqim Yesus muzan uliq asan ban gwahtim. Gwahtiqaq in waqim ad in gigo uliqab garah araq abigmanib saw ban meqintab usaqta nab in hunegid woqdaq haqad adek ban a lehiy. Teq haiq. Yesus mataw na gilikmanib gwahtiqaq gihulosad tilah.

Yesus mat araq aholib bugaw meqinta muz

(Mak 1.21-28)

³¹ Ari Yesus uliq Kapaneam saw Galiliy-ibtab tilah. Lehim Juda gigo lotu akamnib in on mataw suleq tinegyaq. ³² Suleq negsa on mataw in ago gamuk huritad gihol turuh nem yaqay. Na ezaqgo Yesus bilaqne God inmo abin ugan in suleq bilaq nog iyyaq. ³³⁻³⁴ Samo mat araq aholib bugaw meqinta usaqta na in Juda gigo bit humab wolayta nab osmo. Osim in dedibmo lileyim bilam, Sey! ham. Yesus Nasaret-ibta ham ni i ezaq gitonnan bol? ham. Ni i gimeqin tonnan daqag ni bolya ham. Ya ningi tuhurit ham. Ni God ago mat tawon diqta naqmo ham. ³⁵ Haqsa Yesus wadim bulon, Ni niqez hiqiy ham. Ad bugaw meqinta ni mat na hulosad gwah-tiqeq leh ham. Haqan bugaw meqinta na in mat na othasan le mataw gilikmanib woqsa in hulosad gwah-tiqim tilah. Lehad in mat na santitiy araq a hi ug. ³⁶ Anmo mataw bunmo gihol riten lamsa in an tubulon yaqay, Mat ka ago gamuk azawayin inaqlta ka in naga gamukin diq? haq yaqay. In bugaw meqinta gamukmo gibilensa in gwah-tiqim lehaya haq yaqay. Bilaqne in God ago zawayibmo bugaw gibilen nog iyaq haq yaqay. ³⁷ Mataw nazaq haqad bilaqlsa Yesus abin saw nab uliq bunmo tileh bugyaq.

Yesus Pita alen aqawun wastitayan dimniy

(Matyu 8.14-15; Mak 1.29-31)

³⁸ Ari Yesus eraqim bit humab wolayta na hulosad in Saimon ago bitab tilah. Lehan Saimon alen aqawun moq waqim asan afan meqin diq iyim banab ussa in Yesus tubuloni. ³⁹ Bulonan in loqim ban aw usaqta na ageraib turad gamuk atoranmo bilaqlsmo aw asan afan iyim usta na hulos ugim nabag tilah. Lehanmo in eraqim gimen didaq anaran usta na a bolim tinag.

Yesus on mataw gigo moq inaqtakabemmo giwastitayan dimniyiy

⁴⁰ Ari zeq tuwolehsa mataw in giyogniz gigo moq amo amo usaqta na giwaqim giqad Yesus ago hib tuboliy. A bolan Yesus mataw na amulik-mulikmo giholib aben emim giwazsa in tidimnii yaqay. ⁴¹ Sa bugaw meqinta on mataw kabemmo giholib usiyya na in gihuoseq lehad lileyeq bilaq yaqay. Ni God atatin haq yaqay. Haqsa Yesus ginadad gibilensa in gizezmo hiqiyeq leh yaqay. Na ezaqgo bugaw na in Yesus ahol alulin in Krais* na ago tuhuriyyita iyan.

Yesus uliq asorib le luwad ago kabiemyaq

(Mak 1.35-39)

⁴² Ari tarom iyim saw tihaustitayim bolsa Yesus uliq na hulosim saw araq amatawun haiqtab tilah. Lehan teq on mataw in tina-gun yaqay. Nagunim lehim ahol tuwaqim teq in tuwasih yaqay, luweq in i gihuoseq lehdaq haqad. ⁴³ Sa Yesus gibilan, Ne ya hi iwasihiy ham. Ya mataw kabta gibilenta nazaqmo ya uliq bunmo leheq God ago maror agamukan dimunta na in tigibilendaqmo ham. Ya kabiylaqmo emgo haqad God ya iqeman bolta ham. ⁴⁴ Haqad teq in saw Judiya-ib uliq bunmo luwad in Juda gigo bit humab wolaytab gwahtiqeq God ago gamuk tigibilenyaq.

5

Yesus bilaqan Pita nabiq kabemmo giwam

(Matyu 4.18-22; Mak 1.16-20)

¹ Ari kam araqab Yesus yuw Genesaret* aqurumniib tursa on mataw kabemmo God ago gamuk huritnan haqad in agerabmo diq loqim os yaqay. ² Ossa muy amikmikta giger kamis aqezab ussa Yesus tigibiy. Muy na ginamreniz muy hulosim in gigo dob nabiq waqayta na tsuhol yaqay. ³ Samo Yesus le muy na araqab gwalim tuqos. Na in Saimon ago muylimo gwal. Gwalim in Saimon bulon, Ni muy ulum hasid in lan ez asit hulos ugeq usan ham. Haqan Saimon nazaq eman Yesus muy nab osad on mataw gamuk tigibilenyaq.

⁴ Ari in gamuk gibilenim tihiqiyen in Saimon bulon, Muy hureqid kamismeb mayawabmo diq lehan ham. Lehid teq ne dob huneg woqid nabiq waqiy ham.

⁵ Haqan Saimon amenin emim bilam, Mat Iyah ham i tarom kab nabiq nagunad luwsamo saw tihaustitay ham. Sa i nabiq araq diq a hi waw ham. Ta teq ya na ago a hi bilaqad ya ni niqez muzineq le dob a ta

hunegeq teq saw ta waqdaiq ham. ⁶ Haqad in le dob a ta huneganmo nabiq kuluw diqmo dobub tuwoqiy. Woqan dob titartaynan tonyaq. ⁷ Nazaq iysa Pita ayogniz nenaq in gigo kadoyniz asor muy araqab osiyta na gililewunan bo tigelumsihiy. In bolim muy giger nab nabiq ginuwana woqsa muy ame tugwal. Ame gwalan muy giger na munannan toniy. ⁸⁻¹⁰ Samo Saimon Pita ayogniz nenaq muyib osad nabiq kabemmo diq waqiyta na gibiyad in gihol riten lamsa tirab yaqay. Rabsa Sebediy atatniz giger Jems ama Jon inaq in Pita inaq araqibmo kabiylaq em yaqayta na in muyta araq nab osad tirab yaqaymo. Sa Pita in Yesus anognib kuh tonim asen ulum laquwim turad bilam, Iyahta ham ni ya ihuoseq leh ham. Ya mat dimun a hain ham. Haqan Yesus bulon, Ni hi rab ham. Ni nabiq giwaqad luwaqta kazaqmo muran teq abeb ni on mataw nazaqmo tigiwaqdaq ham. ¹¹ Ari mataw na muy hureqim a le lan ezab emad teq in gigo nagah bunmo hulosad in Yesus muzim inaq tilehiy.

Yesus mat araq ago moq lepra inaqtawastitayan dimniy

(Matyu 8.1-4; Mak 1.40-45)

¹² Ari kam araqab Yesus le uliq araqab tuqos. Ossa mat araq ago moq lepra inaqtawolim Yesus ahol waqadmo in abakkaban ulum laquwim turad afaqin mulbunim ogib emim teq in tisusumun ug, Iyahta ham ni ninad bilaqsa teq ni ya iwastitayid ya God ameb isan anumlan ka tihiqiyadaq ham. ¹³ Haqan Yesus aben itiwunim matna wazad bulon, Ya inad bilaqaq ham. Ni nisanib ninumlan usaqta na hiqiyan ham. Haqan muran diq nawaqmo mat na ago moq lepra tihiqiy. ¹⁴ Hiqiyan Yesus atoranmo bulon, Ni leheq daq kawa ya nicholib emta ka ago ni mat araq hikidik bulon ham. Ni leheq mat tamaz emaqta naqmo nichol isihun ham. Ad Moses bilamta nazaqmo ni nichol dimniyta na anawun em ham. Emid teq mataw in ningi moq tihiqiyta na ago tuhurit daqay ham. ¹⁵ Teq haq. Daq na amalib Yesus abin ayah diqmo iyim saw bunmo tilehyaq. Lehsa on mataw dauh kabemmo in Yesus ago gamuk huritnan teq in giholib moq usaqta na wastitaygo haqad tubol yaqay. ¹⁶ Bolsa Yesus sirisirimo on mataw na gihuoseq saw amatawun haiqtab leheq God inaq gamuk tiqemyaq.

Yesus mat araq abensen aditin moq bugta wastitayan dimniy

(Matyu 9.1-8; Mak 2.1-12)

* **4:41:** Ni Luk 2.11 nab teq gamuk 'Krais' ka alulin ahol waqdaq.
* **5:1:** Yuw-kurorqan Galiliy anan araq 'Genesaret' haq yaqayta.

¹⁷ Ari kam araqab Yesus on mataw suleq negad tuqos. Ossa Farisi asor giyogniz mataw Moses ago gunun asuleqin bilaqayta na nenaq in nab osiyomo. Mataw aseseqta na in uliq bunmo saw Galiliy-ibta teq saw Judiya-ibta teq uliq Jerusalem-ub osim bolitya. Bolim nab ossa Iyahta ago zaway mataw giqemid dimmigyo Jesus aholib ayahmo usyaq. ¹⁸ Sa mataw asor in mat araq abensen aditin turnoq bugta abanan inaq sorim a boliy. A bolim in mat na soreq ad bit aduganib leheq Yesus agerab loqgo em yo hiqy yaqay. ¹⁹ Na ezaqgo on mataw kabemmo diq bolim ban tuwaq bugan in mat na ad Yesus agerab loqgo adanin haiq. Nazaq iyan in bit ahuqunib gwalehim asor tihikneriy. Hiknerim in mat na abanan inaqmo eman on mataw glikmanib wolehim Yesus anognib tuqus.

²⁰ Ussa Yesus in mataw na ginad helta ahol waqadmo in mat moqaqta na tubulon, Kadoy ham ya ningko daq meqinta tigiwalem bug ham. ²¹ Haqan mataw Moses ago gunun hurit kemiyya na giyogniz Farisi nenaq in Yesus ago gamuk na huritim in gimo an bulonad tisumun yaqay. Ko nog in nazaq God ago ban waq nog iyim God bilawunaq? haq yaqay. Og kab mat araq mataw gigo daq meqinta walemdaqta hajqgam haq yaqay. Naqmo God amomo ago kabiyyta haq yaqay. ²² Haqsa Yesus in gigo susumun na huritim gibilan, Doq tonnan ne ginad haresmo nazaq emay? ham. ²³ Ya naga gamukin bilaqid teq ne nan a hi yag daqay? ham. "Ya ningko daq meqinta tigiwalem" haqdaiq o "Ni eraeq loq gel" haqdaiq? ham. ²⁴ Teq Mat Atatin in og kab daq meqinta walemo azawayin aholib usaqta na ago ne hurit daqay haqad ya kazaq diq bilaqdaq ham. Haqad in mat abensen moqan banab usaqta na tubulon, Ya nibile-naiq ham. Ni eraeq ningko us ban waqeq ad ningko bitab a leh ham. ²⁵ Haqanmo mat na on mataw gimebi eraqim ago ban in amalib usta na sorim ad ago bitab tilah. Lehad in God abin tiqiluwyaq. ²⁶ Samo on mataw nab osiyta na bunmo ritenim in ginadnad tiqem yaqay. Ad in God abin iluwad bilaq yaqay. Muran i daq lul araq diqta ahol tuwaw haq yaqay.

*Jesus Liway bulunan in muzim inaq lah
(Matyu 9.9-13; Mak 2.13-17)*

²⁷ Ari abeb Yesus lehim in mat takis waqaqta araq anan Liway haqayta takis abitnib ossa ahol tuwam. Ahol waqad in tubulon, Ni ya imuzeq bol ham. ²⁸ Haqan Liway eraqim ago nagah bunmo hulosan ussamo in Yesus muzim inaq tilah.

²⁹ Abeb Liway in ago bitab Yesus amen didaq oyad humab araq ayahta tiqam. Emim in Yesus inaq banab didaq neqad

ossa mataw gibin meqinta takis waqayta na teq mataw ta asor kabemmo nenaq in Yesus inaq didaq neqad tuqosymo. ³⁰ Ossa Farisi asor teq in gigo mataw Moses ago gunun hurit kemiyya na asor nenaq gimot meqniysa in Yesus ago disaipel tigibileniy, Doq tonnan ne mataw takis waqayta na teq mataw daq meqinta emayta na nenaq garabmo didaq neqad yuw uluwad osay? haqiy. ³¹ Haqan Yesus in gigo gamuk amenin emim bilam, Mataw gigo moq hajqta na in le dokta ahol a hi waqayta ham. Mataw gigo moq inaqta naqmo dokta ago hib lehaya ham. ³² Ya on mataw titntona gililewunnan a hi bol ham. Ya on mataw daq meqinta emad osayta naqmo gililewunnan bolta ham. Gililewunid in ginad buliyeq gigo daq meqinta na gileh ug daqay haqad ham.

Mataw didaq udinayta na ago Yesus bilam

(Matyu 9.14-17; Mak 2.18-22)

³³ Haqan mataw aseseqta na in Yesus buloniy, Jon ago disaipel sirisirimo didaq udinad God inaq gamuk emayta haqiy. Ad Farisi gigo disaipel nazaqmo emayta haqiy. Ta teq ningko disaipel didaq a hi udinayta haqiy. In didaq neqad wain ayun uluwayta haqiy. ³⁴ Haqan Yesus gibilan, Mat araq aw waqnam tonsa in ayoginiz boleq inaq ossa ne in giqemid didaq udin daqay ye? ham. Hajqgam ham. ³⁵ Ari abeb mataw asor boleq mat aw waqaqta na ayoginiz gibenab tuwaq daqay ham. Kam na teq boldaqta ham. Bolid kam nab teq mat na ayoginiz didaq tuqudin daqayta ham.

³⁶ Haqad Yesus gamuk awowun ta araq kazaq gibilan, Mataw in gigo tubusan kwaziqta tartayan in gigo tubusan muturta asor hilksireqim tubusan kwaziqta na inaq a hi initayta ham. In nazaq tonid tubusan muturta na timeqniydaq ham. Ad tubusan asor muturta na in kwaziqta na inaq a hi iydaqmo ham. Muturta na a hi ulilemsa kwaziqta na awaq timeqniydaqmo ham.

³⁷ Teq mataw wain ayun muturta memeq asan kwaziqtab a hi tenayta ham. In nazaq tonid wain aqurin gwalad huhuw nemsia memeq asan kwaziqta na tartayid wain ayun na tumutbaldaq ham. Ad memeq asan na timeqniydaqmo ham. ³⁸ Mataw memeq asan muturtamo waqim wain ayun muturta tenayta ham.

³⁹ Haqad Yesus bilam, Mataw wain ayun kwaziqta tuquluwiya na bunmo in wain ayun muturta hulosayta ham. Hulosad in bilaqay, Wain kwaziqta naqmo aquluw dimunta haqayta ham.

6

*Mataw Juda gigo lotu akamnib kabyi a
hi emayta na ago Yesus bilam
(Matyu 12.1-8; Mak 2.23-28)*

¹ Ari Juda gigo lotu akaman araqab Yesus ago disaipel nenaq kabyi araq wit leyiyta aduganib gwahtiqtim tileh yaqay. Lehad Yesus ago disaipel wit anagin asor guraqim gibenab iworad tineq yaqay. ² Neqsa Farisi asor gibiyat bilaqiq. Nagadgo ne lotu akaman ago gunun itiyonim kabyab wit tugurraqay? haqiqy. ³ Haqan Yesus in gigo gamuk amenin emim gibilan, Nabag ne Devit ago dauh nenaq gigem moqsa Devit daq amta na awagamun ne ahol a hi waqiy-ya ham. ⁴ Devit le God ago bit aduganib gwahtiqtim God ameb bret eman osta na in waqim tinam ham. Bret na gunun emiyta ham. Mataw tamaz emayta naqmo gimomo bret na negayta ham. Teq hajq ham. Devit agem moq titaysa neqad in bret tawonta na asor in ayogniz negan tineqimo ham. Ta teq in daq meqinta a hi emiy ham. ⁵ Haqad in gibilan, Mat Atatin in lotu akaman anamrenno diq iyim inmo mataw kam nab ezaq luw os daqayta na ago tigibilendaqta ham.

*Juda gigo lotu akamnib Yesus mat araq
aben meqinta wastitayan dimniy
(Matyu 12.9-14; Mak 3.1-6)*

⁶ Ari Juda gigo lotu akaman ta araqab Yesus le Juda gigo bit humab wolayta araq aduganib gwahtiqtim in on mataw suleq tinegayaq. Negsa mat araq aben akogan aqabun ger anedan mayim aditinmo usaqta in nab os. ⁷ Ossa mataw Moses ago gunun hurit kemiya na giyogniz Farisi nenaq in Yesus ahol waq kemad nab osiymo, Yesus lotu akamnib mat aben meqinta na wastitayid dimniyid i amalib nan emam haqad. ⁸ Haqsa Yesus in ginad na tuhuritim in na ago a hi bilaqadmo in mat aben meqinta na tubulon, Ni eraqebo kab tur ham. Haqan mat na eraqim le nab titur. ⁹ Tursa Yesus mataw aseseqta na gibilan, Ya ne susumun negaiq ham. I Juda gigo maror ezaq usaq? ham. Lotu akamnib i mataw gidimun tonamta o i gimeqin tonamta? ham. Kam na i mat moqaqta ulumsihamta akaman o i mat na aholib hiqiyid in moqdaqta akaman? ham. ¹⁰ Haqad in ame le mataw na gibiy bugim teq in mat na bulon, Niben itiwun ham. Haqan mat na aben itiwunimmo in aben akogan na tidimniy. ¹¹ Dimniyan mataw Moses ago gunun hurit kemiya na giyogniz Farisi nenaq in Yesus anan gigem meqin diq iysa in gimo an bulonad in Yesus ezaq ton daqayta na ago tibilaq yaqay.

*Yesus Aposel 12 na gitowun am
(Matyu 10.1-4; Mak 3.13-19)*

¹² Ari kam nagab Yesus God inaq gamuk emnan haqad garah araq abigmanib tugwalah. Gwalehim tarom nab in God inaq gamuk emad ossa le saw tihaustitat. ¹³ Saw hastitayan tarommo zeq tugwalsamo Yesus in ago disaipel gililewunan agerab tuboliy. Bolan in gilikmanib mataw 12 nazaq in aholyon, gitowun emim in ginan Aposel haqad tibiy. ¹⁴⁻¹⁵ Na in ginan kazaq: Saimon, Yesus anan araq Pita haqad biyta. Teq Saimon amikqan Andru teq Jems ama Jon inaq teq Filip teq Bartolomyu teq Matyu teq Tomas teq Alfiyus atatin Jems teq Saimon ta araq mat Rom nenaq bab emyaqta amatin na ¹⁶ teq Jems atatin Judas teq Judas ta araq uliq Kariyot-ibta na. Mat naqmo anad bulyim Yesus waqim bab gibenab amta.

*Yesus on mataw suleq negad teq in kabemmo giwastitayan dimniy yaqay
(Matyu 4.23-25; Mak 3.7-12)*

¹⁷ Ari Yesus ago mataw na nenaq garhab gewoqim in le saw agemqantab ago disaipel dauh biyatha na nenaq tituriy. Tursa on mataw kabemmo saw Judiya-ibta teq uliq Jerusalem-ubta teq uliq giger Tair teq Saidon gigo lan ezabta na in bolim Yesus ago hib humab tuwoliy. ¹⁸ Mataw na Yesus ago suleq huriitna teq in gigo moq emid dimniynan haqad in boliyta. Bolan Yesus in gigo bugaw meqinta giholib usad gimeqin ton yaqayta na gimuzan lehsa in tidimniy yaqay. ¹⁹ Sa on mataw biyatha na bunmo Yesus asan waz waqnan ton yaqay. Na ezaqgo in aholib zaway gwahtiqtig le mataw gigo moq inaqta na bunmo giqemid dimniy yaqayta na ago iyan.

*Yesus on mataw tidimniyim osayta na
ginan bilam
(Matyu 5.1-12)*

²⁰ Ari Yesus ame gwalim ago disaipel gibiyat gibilan, Ne mataw ginaghan haiqta ham ne teq God ago maror aduganib gwahtiqtig anononomo tugas daqay ham. Nazaq iyan ne tidimniyim osayta ham. ²¹ Teq ne mataw gigemnan moqayta ham God teq nagah negid ne tigiyunindaq ham. Nazaq iyan ne tidimniyim osayta ham. Teq ne mataw gaqad osayta ham ne teq tiyuquw daqay ham. Nazaq iyan ne tidimniyim osayta ham. ²² Ne Mat Atatin muzinad inaq luwsa mataw ne ginan gigem meqniysa tigibaymuz daqay ham. Ad in ne gibilawunad gibilehunun tibilaq daqaymo ham. In nazaq ne gitonsa ne ginad dimniyan ham. Ne tidimniyim osayta ham. ²³ Mataw nazaq ne gitonsa ne gigem dimniysa ginad dimun dikan iyan ham. Na ezaqgo ne gigo naw ayahmo Heven-ib ne gibaq tunim usaqta

ham. Mataw ne gimeqin tonayta na gisesan in nazaqmo God ago nantut gimeqin ton yaqaymo ham.

²⁴ Ari ne mataw ginaghan kabemmo us-aqta ham ne timeqniyim osayta ham.

Nagah ne gigem emid dimniydaqta na ne muranmo tuwaqay ham.

Abeb teq ne God abenab naw araq dimunta a ta hi waq daqay ham.

²⁵ Teq ne mataw muran didaq negad gigem aseseqmo iyayta ham ne timeqniyim osayta ham.

Abeb teq ne gigemnan tumoq daqay ham.

Teq ne mataw muran yuquwayta ham ne timeqniyim osayta ham.

Abeb ne gaq wazad atoranmo tigaq daqay ham.

²⁶ Teq mataw og kabta bunmo in ne ginan dimunta haqsa ne gihol waziy ham. In nazaq ne gibin iluwsa ne timeqniyim osayta ham.

Kwaziqmo mataw na gisesan gibaqbaqniz in nantut katiyta na nazaqmo ginan dimunta haq yaqaytamo ham.

Ne gibabun ginan ginad bilaq ago adan (Matyu 5.38-48)

²⁷ Haqad Yesus bilam, Ne mataw ya iqezi huriyatya na ya ne kazaq gibilenaiq ham. Ne gibabun ginan ginad bilaqan ham. Ad mataw gigem meqinta negsa ne gilowan toniy ham. ²⁸ Mataw ne kusluw negsa ne gidimun toniy ham. Ad mataw ne gibilawunsa ne in gimen God susumun ugid gilumsihan ham. ²⁹ Mat araq nimanmanan asor ger wolid ni nimanmanan ta asor ger buliyid in wol tonanmo ham. Ad mat araq ningo saket waqsa ni ningon niholsihen ugid in waq tonanmo ham.

³⁰ Mat aw nog in ningon nagah anan sunid na ni neg ham. Ad mat araq ningon nagah araq waqid ni anan ta hi bilaq ham. ³¹ On mataw in ne ezaq gitonid ne ginad dimniydaqta nazaqmo ne in gigo hib daq emiymo ham.

³² Ari mataw ni ninan ginad bilaqsa ta ni in ginan ninad bilaqaqta na in nagah diq a haiq ham. Daq nazaqta na anawun araq ne God abenab a hi waq daqay ham. Mataw God gileh ugim daq meqintab osayta na in nazaqmo an anan ginad bilaqaqta ham.

³³ Ad mataw ni nidimun tonsa ta ni in gidimun tonaqta na in nagah diq a haiqmo ham. Daq nazaqta na anawun araq ne God abenab a hi waq daqaymo ham. Mataw daq meqintab osayta na in nazaqmo an dimun tonad osayta ham. ³⁴ Ad ne mataw ginaghan inaqta naqmo gibiyad nagah negaya na in nagah diq a haiqmo ham. Ne mataw naqanta nagah negad ginad

emay, In teq amenin tiqem daqay haqayta ham. Daq nazaqta na anawun araq ne God abenab a hi waq daqay ham. Mataw daq meqinta emayta na in nazaqmo amenin waqgo haqad nagah an ugayta ham.

³⁵ Ta teq negmo kazaq emiy ham. Ne gigo bab ginan ginad bilaqsa ne gidimun toniy ham. Ad ne gibabun nagah negad in amenin neg daqayta na ago ne ginad hi usan ham. God in mataw meqinta teq mataw igmo ag haqad osayta na gilowan tonaqta ham. Nazaq iyan ne daq nazaqmo emeq teq abeb ne God abenab naw ayahmo tuwaq daqay ham. Ad ne God Ulilib Digta atatnizmo diq iyeq tuqos daqay ham. ³⁶ Ne Gimam in mataw ginan anad meqniyaqta nazaqmo ne mataw ginan ginad meqniyanmo ham.

Ne on mataw gigo daq hi ulum kemyi (Matyu 7.1-5)

³⁷ Ari ne mataw gigo daq ulum kemad ginan meqin a hi bilaqid God ne gigo daq ulum kemad ne ginan meqin a hi bilaqdaqmo ham. Mataw ne gigo hib daq meqinta emsa ne daq meqinta na walemad anadin ta hi emiy ham. Ne nazaq emid teq God in ne gigo daq meqinta na giwalemad anadin a ta hi emdaqmo ham. ³⁸ Ne nagah asitmo mataw negid God amenin asitmo ne negdaq ham. Ari ne mataw nagah ayahmo negsa God amenin ayahmo tinegdaq ham. Nazaq iyan ne mataw nagah negiy ham. Negid teq God ne nagah tinegdaqmo ham. Helmo ham. In nagah ayahmo diq negid ne wazlilin ton daqay ham.

³⁹ Haqad Yesus gamuk awowun araq gibilenim bilam, Mat ame haiqta in mat ta araq ame haiqtamo dan isihuneq a lehdaq e? ham. Haiq ham. In nazaq toneq in giger garabmo le yayib tuwoq daqay ham. ⁴⁰ Ad nazaqmo disaipel araq in ago tisa uriyameq danmeb a hi lehdaqmo ham. Haiq ham. Ari disaipel na in suleq tuwaq bugeq teq in ago tisa nogmo tiquyidaq ham.

⁴¹ Haqad Yesus bilam, Nagaqgo ni niyow ameb rohroh amik diqta ussa ni ahol waqad ta nimmo nimeb ay anabun ayahta usaqta na ni ahol a hi waqaq? ham. ⁴² Ni ninad ezaq emad ni niyow bulonaq, Ya niyow haqaq rohroh nimeb usaqta na ya walemnan haqaq ham. Haqad ta nimmo nimeb ay anabun na ni ahol a hi waqaq ham. Ni nimileq meqin ham. Itureqmo nimmo nimeb ay anabun usaqta na ni walemeq nime saw anononmo ahol waqad teq ni le niyow ameb rohroh usaqta na walem ham.

Ay meqinta anon meqinta emaqta (Matyu 7.16-20; 12.33-35)

⁴³ Ay dimunta anon meqinta a hi emaqta ham. Ad nazaqmo ay meqinta anon

dimunta a hi emaqtamo ham. ⁴⁴ Mataw ay amulik-mulikmo ginon ahol waq kemim teq in ay ezaqta na ago ginad tiqem hasayta ham. Mataw ay fik anon waqnan haqad in am asasuqin inaqtab le a hi waqayta ham. Ad nazaqmo in wain anagin waqnan haqad le am asasuqin inaqtab a hi waqaytamo ham. ⁴⁵ Mat dimunta agemab anad dimunta kabemmo usaqta na in daq dimuntaqmo emaqta ham. Sa mat meqinta agemab anad meqinta kabemmo usaqta na in daq meqintaqmo emaqta ham. Nagaq mat agemab ayahmo usaqta naqmo in aqezab gwahtiqaqta ham.

*Bit emgo adan gigermo
(Matyu 7.24-27)*

⁴⁶ Doq tonnan ne ya inan Iyahta, Iyahta haqad teq ne yaqgo gamuk a hi muzinayta? ham. ⁴⁷⁻⁴⁸ Ari mat yaqgo hib bolim yaqgo gamuk huritim muzinaqta na ago ya ne tigibilennan ham. Mat naqanta in bilaqne mat bit awaz meqinta amta nazaq nog ham. Mat na bit waznan haqad iturimmo in og tayan sisaqmo wolehan gig tugwah-tiqan teq in tituq hunegan wom ham. Abeb uq araq ayahta hitiqim bit na dedibmo ulum has ham. Teq haiq ham. Bit na ahol asit a hikidik wol ham. Na ezaqgo mat na bit alulin dimunno amta ham.

⁴⁹ Ari mat yaqgo gamuk huritim teq a hi muzinaqta na in bilaqne mat bit atituqin haiqta ogibmo wazan eramta nazaq nog ham. Abeb uq hitiqim bo bit na wol haman bit na hidmo tuwom ham. Woqim timeqniy hasan in waz ta eraqgo haiq tiqiy ham.

7

*Yesus bab mataw gigo ayahta araq ago kabibiy mat wastitayan ahol tidimniy
(Matyu 8.5-13)*

¹ Ari Yesus on mataw gibilenim hu-losadmo in le uliq Kapaneam-ub tugwah-tim. ² Gwahtiqaq uliq nab mataw bab emayta gigo ayahta araq in os. Ossa in ago kabibiy mat araq in anan anad diq bilaqaqta na ago moq inaq iyim moqnan tonad usyaq. ³ Ussa bab mataw gigo ayahta na in Yesus bolim uliq nab osaqta na ago abin huritim in Juda gigo mataw marorta asor gigeman tilehiy, in Yesus bulonid boleq ago kabibiy mat na wastitayid dimniydaq haqad. ⁴ Mataw na le Yesus ago hib gwahtiqaq in ginad awaz meqin amalib buloniy, Mat ko in mat dimunta haqiy. Ni leheq tuqulumsihdaq haqiy. ⁵ In i Juda ginan anad bilaqaqta haqiy. Inmo i giyon bit humab wolyata araq waz igta haqiy.

⁶ Haqan Yesus era nenaq tilah. In le bit sinsin tuqugsamo bab mataw gigo ayahta na in ago kadoyniz asor gigeman bolim Yesus danib ahol waqad bulonim bilaqiy,

I gigo ameba na in ninmen gamuk kazaq bilam haqiy. Mat ayah ni niholtuw hi bul haqad in bilam haqiy. Ni yaqgo bit aduganib bo gwahtiqaqta na ago ya mat dimun a haiq haqad in bilam haqiy. ⁷ Ya nazaq haqad ya ningo hib lehim a hi nibilen haqad in bilam haqiy. Ya inad emaiq ni gamukmo bilaqid yaqgo kabibiy mat ka ahol tidimniydaq haqaiq haqad in bilam haqiy. ⁸ Na ezaqgo ya inaqmo yaqgo ameba ahaqenib osaiqta haqad in bilam haqiy. Ad yaqgo mataw bab emayta na in ya ihaqenib osaytamo haqad in bilam haqiy. Ossa ya araq bulonaiq, "Ni leh" haqsa in lehaqta haqad in bilam haqiy. Teq ya araq bulonaiq, "Ni bol" haqsa in bolaqtamo haqad in bilam haqiy. Ad yaqgo kabibiy mat bulonaiq, "Ni kabiy ka em" haqsa in kabiy na emaqta haqad in bilam haqiy. Nazaq iyan ya inad emaiq ni gamukmo bilaqid yaqgo kabibiy mat na ahol tidimniydaq haqaiq haqad in bilam haqiy.

⁹ Haqan Yesus gamuk na huritim ahol turuh nam. Ahol turuh nemsa in ahol buliyim on mataw dauh biyatha in muzim inaq boliyta na kazaq gibilan, Ya ne gibile-naiq ham. Mataw bab emayta gigo ayahta na in Juda mat a haiq ham. Teq in Juda mataw bunmo giquriyamim in ya inan helmo diq haqaqta ham. ¹⁰ An mataw marorta Yesus ago hib gigeman boliyta na in muleqim bitab ta lehim kabibiy mat na ahol tidimniyim ossa in ahol waqiy.

Yesus uliq Nain-ib mat minminta araq wazan eram

¹¹ Ari Yesus usim ta tiqim in uliq araq anan Nain haqaytab tilah. Lehsa in ago disaipel teq on mataw dauh biyatha in inaq tilehiyomo. ¹² Lehan uliq nab aw waburta araq os. Sa in atatin amulikmo osta na tumom. Moqan mataw in asan banab emim sorim hodhodab ad tilehsa uliqab on mataw biyahmo aw na inaq hodhodab tileh yaqaymo. ¹³ Lehsa Iyahta in aw waburta na ahol waqad in anan anad meqniysa bulon, Ni hi gaq ham. ¹⁴ Haqad in mat momta asan banab usaqta na agerab loqim in aben banab emim wazsa mataw mat aban inaq sorim a lehiyta na wasiham tituriy. Tursa Yesus bilam, Mat minminta ham ya tinibilenaiq ham. Ni eraq ham. ¹⁵ Haqanmo mat tumomta na kayeq iyim eraqim osad gamuk tibilqayaq. Na Yesus amun na waqim anen tuqug.

¹⁶ An on mataw na bunmo daq na ahol waqim tirab yaqay. Ad in God abin iluwad teq in bilaq yaqay, God ago nantut araq awaz meqin digta i gilikmanib tugwah-tim haq yaqay. Haqad in bilaq yaqay, God in ago on mataw tigilumsihnan haqad nob

tinegaq haq yaqay. ¹⁷ Ad in le Juda gigo og saw bunmo luwad Yesus daq amta na awagamun tibilaq yaqay.

*Jon mataw huz negyaqta na in ago disaipel giger giqeman Yesus ago hib lehiy
(Matyu 11.2-19)*

¹⁸⁻¹⁹ Ari Jon irquran ossa in ago disaipel bolim nagah bunmo Yesus giqamta na ago in Jon tubuloniy. Bulonan Jon in ago disaipel giger gibilenim giqeman Iyahta ago hib susumun ugnan tilehiy. Lehsa in gibilan, Ne leheq Yesus kazaq susumun ugiy ham. Ni i nibaq tunim osta naqmo amatin ni bol o hαιq mat ta araq teq abeb boldaqa i baq tunam? haqad ne buloniy ham. ²⁰ An mataw giger na le Yesus ago hib gwahtiqim tubuloniy, Jon mataw huz negyaqta na i giqeman i kawa tubol haqiy. Ad in i gibilenim bilam, Ne leheq mat na susumun ugiy haqad in bilam haqiy. Ni i nibaq tunim osta naqmo amatin ni bol o hαιq mat ta araq teq abeb boldaqa i baq tunam? haqad nazaq in bilam haqiy.

²¹ Ari kam nabmo Yesus in mataw gigo moq amo amo inaqtta na giwastitaysa tidimniy yaqay. Ad in bugaw meqinta mataw giholib usaqta na gimuzta tileh yaqay. Teq in mataw gime haiqta na giwastitaysa in gime rireqim nagah ahol tuwaq yaqay. In kabiy nagan emsamo Jon ago disaipel giger na susumun ugnan boliy.

²² Nazaq iyan Yesus in giger na gigo gamuk amenin emim gibilan, Ko gibiyiy ham. Mataw gime haiqta saw ahol tuwaqay ham. Mataw gisen meqinta tiloq gelay ham. Mataw gigo moq lepra inaqtta gisanib ginumlan usta na tihiqiyaq ham. Teq mataw gidek haiqta gamuk tuhuritay ham. Mataw tumoqiyya kayeq iyim ta eraqay ham. Ad mataw ginaghan haiqta God ago gamuk dimunta tuwaqay ham. Ne muleeq leheq nagah ne gimeb kawa ahol tuwaqiyta ka bunmo ne Jon buloniy ham. ²³ Mat ya ibiyad anadnad a hi emad teq in ya inan helmo diq haqaqta, mat na tidimniyim osaq ham.

²⁴ Ari Jon ago mataw giger na tilehsa teq Yesus in on mataw biyahta nab turiyta na Jon anan gibilenim bilam, Kwaziqmo ne nog diq ahol waqnan saw amatawun haiqtab lehiy? ham. Ne mat araq bilaqne tuqir tim retsa ahol wolad ahulan iysa ne ahol waqnan lehiy ye? ham. ²⁵ Teq ne nog diq ahol waqnan saw nab lehiy? ham. Ne mat araq tubusan dimunta welim ossa ahol waqnan lehiy ye? ham. Haiggam ham. Mataw ginaghan kabemota tubusan dimdimunta giholib emim diqaq dimdimunta neqayta na in king gigo bit aseseqtabmo osayta ham. ²⁶ Ne ya

ibilieny ham. Ne nog diq ahol waqnan lehiy? ham. Ne God ago nantut araq ahol waqnan lehiy ye? ham. Helmo ham. Mat na in God ago nantut araq ham. Teq mat nawa na in God ago nantut bunmo giquriyamta ham. ²⁷ Mat naqmo God ago marib ananin mar tonan usaqta ham. Gamuk na bilam ham. Ahol waqiy ham, ya teq mat araq emid in yaqgo gamuk ad danmeb lehdaq haqad in bilam ham. Leheq in nimen dante tuwastitaydaq haqad in bilam ham. Wastitayid teq ni lehdaq haqad in bilam ham. *Malakay 3.1*
²⁸ Ya ne gibilenaq ham. Jon in mataw og kabta na bunmo giquriyamim in abin ayah diqta ham. Ta teq mat aw nog God ago maror aduganib gibin amik diq usaqta na in Jon tuquriyamiya ham.

²⁹ Ari on mataw nab turiyta na bunmo kwaziqmo in Jon ago hib lehan Jon tuhuz nagta, mataw takis waqayta na inaqmo. Nazaq iyan in Yesus ago gamuk na huritim bilaqiy, Helmo haqiy God daq titnonta emaqta haqiy. ³⁰ Ta teq Farisi giyogniz mataw Moses ago gunun hurit kemiyyta na nenaq in ginad a hi bilaqan in Jon huz neggo hulosiyta. Hulosad in God anad in gigo hib usta na othasim God in giyon dante dimunta amta na in gileh tuqugiy.

³¹ Ari Yesus gamuk bilaq tutim a lehad in gibilan, Ya on mataw kam kabta gigo daq anan bilaqnan teq ya gamuk awowun ezaq diqta amalib bilaqdaiq? ham. Teq in on mataw ezaq diqta? ham. ³² In bilaqne onmin maket-ib an bulonad osayta nazaq nog ham. In bilaqay,

I ne gimen kadug ulamsa ne ginad dimniyya a hi doray haqayta ham.

Teq i gaq wazsa ne ginad meqniyya a hi gaqay haqayta ham.

³³ Ari Jon mataw huz negyaqta na bolim didaq amo amo a hi neqad wain ayun a hi uluwyayta ham. Sa ne in anan bilaq yaqay. Bugaw meqinta aholib usaqta haq yaqay ham. ³⁴ Ta teq Mat Atatin bolim didaq neqad wain uluwsa ne bilaqay, Mat ko meqin haqayta ham. In didaq kabemmo neqad wain ayun ayahmo uluwaqta amat-in haqayta ham. In mataw giben meqinta takis waqayta na teq mataw daq meqinta emayta na giyowmo diq haqayta ham. ³⁵ O tob iyan ham. Mataw ginad em hasim daq emayta na bunmo in God ago anad awaz meqinta eman ulal iyaqta ham.

Aw araq danatabta Yesus asen suhol

³⁶ Ari Farisi araq Yesus bulonim inaq ago bitab didaq neqnan tilah. Lehan Yesus in Farisi na ago bitab didaq neqad tuqos. ³⁷ Ossa uliq nab aw araq danatabta in Yesus bo Farisi na ago bitab didaq

neqaqta na abin tuhurit. Huritim in kagoh amikta gig anan alabasta haqay na sisoqim emiya araq waqim aduganib masil ahuran dimunta tenim teq in wazim a bol.³⁸ A bolim Yesus ahol wol emim banab us nog iyad didaq neqsa aw na lehim abun ban asen agerab turad teq in tigaqyaq. In gaqad ameqil woqsa ameqil ayunib Yesus asen suholad teq in aqensanib bayan tumay. Mayan in Yesus asen ilawunad teq in masil ahuran dimunta na wazbalan Yesus asenab tuwom.

³⁹ Samo Farisi Yesus bulunan ago bitab bolta na in daq nazaq ahol waqadmo anad kazaq am. Mat ka in God ago nantut diq iyeq teq aw ka in naga awun diqta na ago in tuhurit nagta ham. Ad in aw ka baymuzid in asan a hi waz nagna ham. Aw ka daq meqinta emad luwaqta ham.⁴⁰ Mat na anad nazaq emsa Yesus anan biyim bulon, Saimon ham ya gamuk araq tinibilennan ham. Haqan Saimon bilam, Tisa ham ningo gamuk bilaqsa ya huriitiq ham.

⁴¹ Haqan Yesus bilam, Ari ni nidek em ham. Mataw giger mat araq ago hib mani waqiyta ham. Mat na araq 500 kina nazaq wam ham. Sa araq na 50 kina nazaqmo wam ham.⁴² Waqim abeb in mani waqiyta na amenin emgo in giholib gimeq araq diq a hi us ham. Nazaq iyan mani anamren na in mataw giger na ginan anad meqniysa in ago mani amenin giholib usta na tuwalam ham. Ari ya susumun nignan ham. Mataw giger na gilikmanib nog in mani anamren na anan anad ayahmo diq bilaqdaq? ham.⁴³ Haqan Saimon bilam, Ya inad emaiq mat ago mani amenin ayahmo usan in walama naqmo in mani anamren na anan anad ayahmo diq bilaqdaqta haqaiq ham. Haqan Yesus bulon, Na ni ulum kemim dimunmo tibilam ham.

⁴⁴ Haqad in ahol buliyim aw na ahol waqadmo in Saimon bulon, Ni aw ka ahol waqaq e? ham. Ya ningi bitab bolan ni yuw yagan ya isen a hi suhol ham. Teq aw ka ameqil ayunib isen suholim in aqensanib bayan tumay ham.⁴⁵ Ya ningi bitab bolan ni ya a hi ilawun ham. Teq ya ningi bit aduganib gwahtiqim ossa bo muran kawa aw ka ya isen tiqilawunaq ham.⁴⁶ Ni ya ifaqinib masil ahuran dimunta wazbalan a hi wom ham. Teq aw ka ya isen amalib masil ahuran dimunta wazbalan tuwom ham.⁴⁷ Nazaq iyan ya ni nibilenaq ham. Aw ka in daq meqinta kabemmo amta ham. Teq in ya inan anad ayahmo bilaqqaqta ham. Na ezaqgo ya in ago daq meqinta na tigiwalem bugta na ago iyan ham. Ari mat bilaqaq, Ya iholib daq meqinta kabemmo haiq haqaqta na in ya inan anad asitmoqmo bilaqqaqta ham.

⁴⁸ Haqad in aw na bulon, Ya ningi daq meqinta na tigiwalem bug ham.⁴⁹ Haqan mataw Yesus inaq garab banab didaq neqad osiyya na in gimo an bulonim bilaqiy, Ka naga matin diq? haqiy. In mataw giholib daq meqinta usaqta na inaqmo giwalemaqta haqiy.⁵⁰ Haqsa Yesus aw na bulon, Ni ya inan helmo hamta naqmo in nawa nilumsihan ni niholib daq meqinta usta na tihiqiy ham. Ni leheq nigem dimniysa os ham.

8

On asor Yesus muzeq inaq leh yaqay

¹ Abeb Yesus uliq aseseqta amikmikta inaqmo kabemmo gigo hib leheq luwad in God ago maror agamukan dimunta tigibilenyaq. Sa disaipel 12 na in Yesus inaq tiluw yaqay.² Teq kwaziqmo on asor Yesus in giholib bugaw meqinta gimuzad gigo moq eman hiqiyya na in Yesus inaq tileh yaqaymo. On na gilikmanib araq anan Mariya uliq Magdala-ibta haqayta. Kwaziqmo Yesus in aholib bugaw meqinta 7 nazaq gimuzta.³ Teg araq anan Jowana haqayta. Aw na aduw anan Kusa. Mat na King Herot ago bit wamuzim osyaqta. Teq aw araq anan Susana haqayta. Sa on asor kabemmo in Yesus muzeq inaq leh yaqaymo. On nagan in gimo gigo nagahta amalib Yesus ago disaipel nenaq glumsih yaqayta.

Mat araq kabyab wit anagin hunagta ago gamuk awowun

(Matyu 13.1-9; Mak 4.1-9)

⁴⁻⁵ Ari uliq saw bunmo on mataw kabemmo in Yesus ago hib bolim humab twoliy. Humab wolim ossa Yesus gamuk awowun araq gibilenim bilam, Mat araq ago kabyab wit anagin hunegnan tilah ham. In lehim wit anagin hunegad luwsa asor danib wom ham. Woqan mataw loq gelad gisenab bay ninalsa ab holeq tineq yaqay ham.⁶ Sa didaq anagin asor saw agigin inaqtab wom ham. Woqim wit anagin na gwalad og na ayuwun haiqgam iyan in tumay ham.⁷ Sa wit anagin asor am asasuqin inaqta gilikmanib wom ham. Woqan am asasuqin inaqta na inaq araqibmo gwalad in wit na isih bugan abesbesan iy ham.⁸ Sa wit anagin asor og dimuntab wom ham. Woqim in gwalim alulin amulik-mulikmo anon kabemmo diq 100 nazaq am ham. Ad Yesus bilam, Mat aw nog in gidek nan huriito usaqta na in gamuk ka huriit kemiham.

Yesus anad ezaq emad gamuk awowunmo on mataw gibilenyaq
(Matyu 13.10-17; Mak 4.10-12)

⁹ Ari Yesus ago disaipel gamuk awowun na alulin hurit kemnar haqad in Jesus tisusumun ugiy. ¹⁰ Susumun ugan Jesus gibilan, Negmo God ago maror aduganib osayta ham. Nazaq iyan in ago maror abe alulin ulilemim usaqta na in negmo tigiqishunaq ham. Ari on mataw asan banta na ya gamuk awowun hulim gibilenilaq ham. Ya nazaq gitonsa teq,

Mataw na gime saw waqad teq in nagah araq ahol a hi waq daqay ham. Ad in gamuk huritad teq in ginad a hi em has daqay ham. *Aisaya 6.9*

Mat kabyab wit anagin hunagta na ago alulin

(*Matyu 13.18-23; Mak 4.13-20*)

¹¹ Ari gamuk awowun na alulin in kazaq ham. Wit anagin na in God ago gamuk ham. ¹² Teq mataw asor in wit anagin danib womta na nog ham. Mataw na God ago gamuk huritan teq abeb Satan bolim gigemab gamuk na ta walemaqta ham. Satan anad emaq, Luweq mataw na God anan helmo haqsa God in aholyon tigiwaqdaq haqad in mataw na gigemab God ago gamuk walemaqta ham.

¹³ Teq mataw asor in wit anagin saw agigin inaqtab womta na nog ham. Mataw na God ago gamuk huritim in ginad bilaqsa wazayta ham. Teq mataw na in wit aninin haiqta nog ham. In God ago gamuk gigemabmo diq a hi wazayta ham. Kam asitmomo in helmo haqsa teq gilumwaq akaman bolsa in ginad helta na hulosayta ham.

¹⁴ Teq mataw asor in wit anagin am asasuqin inaqtab womta na nog ham. Mataw na God ago gamuk huritim in waz naqmo hiqiyayta ham. Ad in gigem titnonimmo ussa in daq helta emayta ham. In afaqan sorad gituw a hi hiqiyayta ham. In giwaz meqniyim ossa God ago gamuk na in gigemab anon giqemaqta ham.

¹⁵ Ari mataw asor in wit anagin og dimuntab womta na nog ham. Mataw na God ago gamuk huritim in waz naqmo hiqiyayta ham. Ad in gigem titnonimmo ussa in daq helta emayta ham. In afaqan sorad gituw a hi hiqiyayta ham. In giwaz meqniyim ossa God ago gamuk na in gigemab anon giqemaqta ham.

Mataw lam miderim kuramab a hi sihenayta

(*Mak 4.21-25*)

¹⁶ Ari mataw lam miderim kuramab a hi sihenayta ham. Ad in ban ahaqenib a hi emaytamo ham. Haiqgam ham. In lam miderim ulilib othenan oyad usaqta ham. Ussa mataw lam anuwan ahol waqad in bolim bit aduganib gwahtiqayta ham.

¹⁷ Nazaq iyan nagah bunmo ulilemim usaqta na in teq ulal tiqiydaq ham. Ad nagah bunmo giqisihan usaqta na in teq saw anuwanib gwahtiqid mataw ahol tuwaq daqay ham. ¹⁸ Nazaq iyan ne ginad em hasad yaqgo gamuk hurityi ham. Na ezaqgo God in on mataw gigo nagah inaqta na bunmo nagah asor a ta negdaq ham. Ari mataw ginaghan haiqta gihol kat ugad bilaqay, I gigo nagah inaq haqayta na God in gibenab nagah asitmo in wazayta na tigiwalem bugdaq ham.

Yesus anenen teq amagniz na gingan?

(*Matyu 12.46-50; Mak 3.31-35*)

¹⁹ Ari kam nabmo Yesus anen teq in amagniz in ago hib tuboliy. Bolim teq haiq on mataw kabemmo humab wolum ossa in Jesus agerab loqgo dan haiqgam. ²⁰ Samo mataw asor Yesus tubuloni, Ni ninen teq ni nimagniz bolim in nibiyan haqad kowa asanib turay haqiy. ²¹ Haqan Yesus amenin emim gibilan, Ôn mataw God ago gamuk huritad muzinayta naqmo in ya inen teq in ya imaginiz ham.

Yesus bilaqan tim ayahta kute nam

(*Matyu 8.23-27; Mak 4.35-41*)

²² Ari kam araqab Yesus ago disaipel nenaq muyib gwalim osad Yesus gibilan, I yuw urumun kozaq ban lehuq ham. Haqad in tilehiy. ²³ Lehadmo Yesus ame rursa tuqus lah. Ussa tim ayahta eraqim bolad yuw eman muyib gwalsa muy ame tugwalnan tonyaq. Sa disaipel timeqniyntan yaqaymo. ²⁴ Ad in le Yesus wazan eraqanmo tubuloni, Iyahta, Iyahta haqiy i tumoqnan tonauq haqiy. In nazaq haqan Yesus eraqim tim yuw inaqmo ginadan tim moqim hiqiyasa yuw kute nemim ahol a ta hi wolyaq. ²⁵ Sa Yesus disaipel gibilan, Ne ginad God anan helmo haqayta na edowa? ham. Haqan disaipel rabad gihol turuh nemsia bilaq yaqay. Ka naga matin diq? haq yaqay. In tim yuw inaqmo gibilensa aqez hurityata haq yaqay.

Yesus mat araq aholib bugaw meqinta muz

(*Matyu 8.28-34; Mak 5.1-20*)

²⁶ Ari Yesus ago disaipel nenaq muyib yuw urotim le uliq Gerasa gigo og saw ban tugwahtiqiy. Uliq na yuw urumun kozaq ban ussa saw Galiliy yuw urumun kazaq ban usaqta. ²⁷ Yesus muy hulosim lan ezab hitiqanmo uliq nab mat araq aholib bugaw meqinta giqusaqta in agerab tubol. Mat na kam sisagmao abe aholmo tubusan haiqmo luwyatqa. In bitab asit a hi osad in hodhodabmo luw osyaqta. ²⁸ In Jesus ahol waqad ek tonim anognib asen agerab woqim usad bilam, Yesus ham ni God Ulilibta atatin ham. Ni ya ezaq itonnan bol?

ham. Ya inad meqniysa nibilenaq ham. Ni santitiy hi yag ham. ²⁹ Na ezaqgo Yesus tekomo bugaw meqinta na mat huloseq lehgo gibilanta na ago iyan in nazaq Yesus bulon. Tuteqmo bugaw meqinta na in mat na anad wamuzyaqta. Wamuzsa mataw sen teq hankap amalib in irquireq waz waq yaqayta. Teq hajiq. Mat na sen nagan bul titaysa bugaw meqinta abe yahsa in saw amatawun haiqtab le luwyaqta.

³⁰ Ari Yesus mat na tisusumun ug, Ni ninan ezaq? ham. Haqan in bilam, Ya inan Kuluwmo ham. Na ezaqgo bugaw meqinta kabemmo diq mat na aholib ussa in ahol anan nazaq biyim bilam. ³¹ Teq bugaw meqinta nagan ginad meqniysa gime kabemmo Yesus bulon yaqay, Ni i gimuzid i yay abe milhasta aromriq inaqtat nab hi lehuq haq yaqay.

³² Sa bul gihumaban araq ayahta garah nab didaq neqad turiy. Tursa bugaw meqinta nagan ginad meqniysa Yesus bulonya, Ni i giqemid i bul ko giduganib lehuq haqiy. Haqan Yesus bilam, Lehiy ham. ³³ Haqan bugaw meqinta nagan in mat na hulosad gwahtiqim le bul na giduganib tuwoqiy. Woqanmo bul bunmo sibim wole garah asibsibranib bayhilek tonim yuwmeb woqan yuw gineqanmo tumoq bugiy.

³⁴ Sa mataw bul giwamuzim osiyya na in daq na ahol waqad in tutkim uliqab teq saw haresmo lehad in nagah ahol waqiyta na awagamun tibilaqiy. ³⁵ Bilaqsa on mataw nagah na ahol waqnan tilehiy. Lehim in Yesus ago hib tubolim in mat aholib bugaw meqinta gwahtiqim lehiyta na ahol waqiy. Mat na anad dimunta waqim tubusan welim Yesus asen agerab ossa in ahol waqad tirab yaqay. ³⁶ Sa mataw gimeb daq ahol waqiyta na in mat aholib bugaw meqinta usan Yesus gimuzan lehiyta na awagamun on mataw biyahta na tigibilen yaqay. ³⁷ Gibilensa uliq Geresa ago saw ban on mataw bunmo rabad bo Yesus bulonyi, Ni i gihuloseq leh haqiy. Haqan Yesus muiyib ta gwalim in muleqim ta lah.

³⁸⁻³⁹ Lehsa mat aholib bugaw meqinta gwahtiqim lehiyta na in Yesus inaq lehnan haqad anad awaz meqin amalib bulonyaq, Ya ninaq lehdaiq haqyaq. Haqsa Yesus hulos. Ad in mat na eman ago uliqab muleqim ta lehsa in bulon, Ni ningko uliqab muleqeq ta leh ham. Leheq God daq ayahta em nigtta na awagamun ni on mataw gibilen ham. Haqan mat na muleqim lehim in uliq nab bitbitmo luwad Yesus ayahmo ulumsihta na ago in on mataw tigibilenyaq.

Jesus aw araq ned hunegaqta wastitayim teq in maror araq amiy tumomta

wazan eram

(Matyu 9:18-26; Mak 5:21-43)

⁴⁰ Ari Yesus muleqim ta bolanmo on mataw biyahta saw nab in amen emim osiyya na in Yesus ahol waqad ginad tidimniyyi. ⁴¹ Samo mat araq anan Jairus haqayta tubol. Mat na in Juda gigo bit humab wolayta ago danmeba araq. In bolim Yesus asen agerab ahol hulosan ogib woqim usad Yesus in ago bitab bolgo haqad in anad meqniysa ame kabemmo tubulonya. ⁴² Mat na amiy amulikmoqmo osta na tumoqnan tonsa iyan in bolim Yesus nazaq bulonyaq. Amun aw na ago ulig 12 nazaqta. Ari mat na nazaq Yesus bulonan in inaq tilehsa on mataw dahu biyahmo Yesus aholib soqotim diq inaq tileh yaqaymo.

⁴³ Lehsa aw araq ulig 12 nazaq moqad ned hunegad luwyaqta na in mataw na gilikmanib tilehyaqmo. Mataw kabemmo in aw na ago moq wastitay waqiyta. Teq hajiq. In ago moq asit a hi hiqiyqaq. ⁴⁴ Ari aw na Yesus abun ban muzim inaq lehadmo in agerab diq loqim ago tubusan adek tuwaz. Wazim muran diq nawaqmo in aholib ned usta na tihiqiy.

⁴⁵ Anno Yesus tisusumun, Nog ya iwaz? ham. Haqan on mataw bunmo bilaqiy, I asit a hi niwaz haqiy. Haqsa Pita bilam, Iyahta ham on mataw dahu biyahta ka bunmo nililut nigad soqot nigim ninaq lehayta ham. ⁴⁶ Haqan Yesus bilam, Haiq ham. Ne gilikmanib guyaqag diq ya iwaz ham. Iwazan yaqgo zaway asor ihulos yagim lehsa ya ihol loyin ham.

⁴⁷ Yesus nazaq bilaqsa aw na anad tiqam, Ya daq emta ka ulal tiqiyaq ham. Haqad in ahol harara nemsamo bolim Yesus anognib ahol hulosan ogib tuwom. Woqim usad on mataw na bunmo gimeb in anad ezaq emad Yesus wazta na teq in wazanmo ahol tidimniyya na ago in tibilaq bug. ⁴⁸ Bilaq bugan Yesus bulon, Ya imiy ham ni ya inan helmo hamta naqmo niqeman ni nihol tidimniyy ham. Ni nigem dimniyya leh ham.

⁴⁹ Ari Yesus gamuk bilaqad nab tursa Jairus ago bitab mat araq osim bolim in ago mat ayahta na danib ahol waqad tubulon, Ningko amun aw tumom ham. Nazaq iyan ni Tisa atuw ta hi bul ham. ⁵⁰ Haqan Yesus gamuk na huritim in Jairus bulon, Ni hi rab ham. Ni God amomo anan helmo haqid teq ni nimiy tidimniyya ham.

⁵¹⁻⁵³ Haqad in Jairus ago bitab tubol. Bolim on mataw kabemmo amun aw na anan gaq wazad ossa Yesus gibilan, Ne hi gaqiy ham. Amun aw na a hi mom ham. In usaq ham. Haqan on mataw na bunmo in aqez tiyuquwuniy. Na ezaqgo amun tumoq hasta na ago in tuhuritiyya iyan. Yuquwunsa Yesus in on mataw biyahta in

inaq boliyta na bunmo giwasihan asanib tursa in Pita teq Jems ama Jon inaq teq amun na anen amam naqmo giwaqim ne-naq bit aduganib tugwahtiqaq.

⁵⁴ Gwahtiqaq Yesus lehim amun aw na aben wazim in lilewunim bulon, Yaqgo amun ham ni eraq ham. ⁵⁵ Haqanmo amun aw na awitan muleqim asanib ta woqanmo in hidmo tiqueram. Eraqan Yesus amun didaq ugid neeqgo tigibilan. ⁵⁶ Sa amun aw momta na kayeq ta iyan anen amam in ahol waqad in gihol riten lamyaq. Sa Yesus in gidek wazim gibilan, Kawa ya daq emta ka ago ne mat araq hikidik buloniy ham.

9

Yesus disaipel 12 na kabiy nag (Matyu 10.5-15; Mak 6.7-13)

¹ Ari Yesus in ago disaipel 12 na gibilen an agerab bolan inmo ahol abinib bugaw meqinta bunmo gimuzgo azawayin teq moq amo amo wastitaygo azawayin tinag. ² Negad teq in disaipel gigeman in God ago maror agamukan mataw gibilenad gigo moq giwastitaynan tilehiy. ³ Lehsa Yesus gibilan, Ne lehad es araq waqeet ad hi lehiy ham. Teq katek ulum ugayta na ne hi waqymo ham. Ne ziy araq es sihengi hi waqad didaq danib neq daqayta na ne ad hi lehiyimo ham. Ad mani araq ne giholib hi usanmo ham. Ne gigo tubusan amulik giholib usaqta naqmo ne a lehad araqmo ta hi waqiy ham.

⁴ Ari ne le bit aqez araqab gwahtiqaq in ne gihol buloniid teq ne loqeet bit nabmo osiy ham. Osad kabiy hiqiyid teq ne eraqeq bit na huloseq lehiy ham. ⁵ Ari uliq edob ne lehid mataw ne gibaymuzsa ne uliq na huloseq lehiy ham. Lehad ne gisen aqogin wolhamid uliq nab woqan ham. Woqid teq mataw na in gigo daq na anadin tiqem daqay ham. ⁶ Yesus nazaq haqan disaipel tilehiy. Lehad in uliq bunmo God ago gamuk dimunta gibilenad teq in on mataw gigo moq inaqtta na giwastitaysa gihol tidimniy yaqay.

King Herot Yesus abin hurit (Matyu 14.1-12; Mak 6.14-16)

⁷ Ari saw Galiliy-ib king Herot in kabiy daq bunmo Yesus emyaqta na abin tuhurit. Huritim in anadnad diq emyaq. Na ezaqqo mataw asor bilaq yaqay, Jon mataw huz negyaqta na moqan God hodhodab wazan ta eram haq yaqay. ⁸ Sa asor bilaq yaqay, Elaija a ta gwahtim haq yaqay. Sa asor bilaq yaqay, God ago nantut kwaziqta araq kayeq ta iyim luwaq haq yaqay. ⁹ Mataw nazaq haqsa Herot bilam, Ya bilaqan Jon anat tuqurot tayiyya ham. Ta teq na naga matin ya abin kazaq diq huritaiq? ham.

Haqad in Yesus ahol waqnan dan tinagun-yaq.

*Yesus on mataw 5,000 nazaq didaq nag
(Matyu 14.13-21; Mak 6.30-44; Jon 6.1-13)*

¹⁰ Ari Yesus ago disaipel kabiy emad luwiyya na muleqim Yesus ago hib tuboliy. Bolim in kabiy bunmo emiya na awagamun tubuloniy. Bulonim tihiqiyan Yesus in giwaqim nenaq in gimomo uliq anan Betsaida haqayta nab tilehiy.

¹¹ Lehim ossa on mataw in Yesus ago disaipel nenaq uliq Betsaida-ib lehiyya na ago huritim in ginagunim tilehiy. In le Yesus ago hib tugwahtiqaq Yesus in gibiyad anad tidimniy. Anad dimniya in God ago maror asuleqin tigibilenyaq. Ad in mataw gigo moq inaqtta na giwastitaysa tidimniy yaqay.

¹² In nazaq emad ossa imisor diq tiqiy. Iysa disaipel 12 na bolim tubuloniy, Ni on mataw ko giqemid in uliq saw kogab haresmo lehad in usgo ban nagunad teq in gigemyon naguniyimo haqiy. Saw i osauqta ka amatawan haqta haqiy. ¹³ Haqan Yesus gibilan, Negmo didaq negid neqiy ham. Haqan disaipel bilaq, I gigo didaq kabem a hajiq haqiy. Bret abaynagin teq nabiq gigermo kawa usaq haqiy. Ni ninad i leheq humab ka gimen didaq zayedq teq negam haqqaq e? haqiy. ¹⁴ Na mataw 5,000 nazaq ossa iyan disaipel nazaq bilaqiyta. An Yesus in ago disaipel gibilan, Ne mataw gibilenid in humab 50 nazaq giholbin giholbin emeq osiy ham. ¹⁵ Haqan disaipel in aqez muzinim in on mataw bunmo gibilenan in nazaqmo tiqemiy. ¹⁶ In nazaq emir ossa Yesus bret abaynagin na teq nabiq giger na waqim ame ulilib gwalsa in God esey ugim teq in orgayim ago disaipel negan in on mataw tinegiy. ¹⁷ Negan in neqan tigiyunin. Giyuninan abeb disaipel le didaq abeyan ginuwim kuram 12 nazaqmo ta gisiheni.

Pita Yesus ahol alulin bilaq siram (Matyu 16.13-19; Mak 8.27-29)

¹⁸ Ari kam araqab Yesus amomo God inaq gamuk emad ossa ago disaipel agerab tuboliy. Bolan in tisusumun nag, On mataw ya inan nog diq haqsa ne huritay? ham. ¹⁹ Haqan disaipel amenin emim bilaqiy, Mataw asor ni ninan Jon mataw huz negyaqta na haqay haqiy. Sa asor ni ninan bilaqay, Ni Elaija haqay haqiy. Sa asor bilaqay, Ni God ago nantut kwaziqmo moqiyta na gigo araq tugwahtimya haqay haqiy. ²⁰ Haqan Yesus a ta susumun nag, Ta negmo ya inan nog diq haqay? ham. Haqan Pita amenin emim tibilam, Ni Krais ham. God mat emid bo i gilumsihdaqta amatin na ninmo ham.

Yesus bilam, Ya moqe q teq ta eraqdaiq ham

(Matyu 16.20-28; Mak 8.30-9.1)

²¹ Pita nazaq haqan Yesus in ago disaipel bunmo gunun negim gamuk awaz meqinta kazaq gibilan, Ne ya ihol alulin na mat araq hikidik buloniy ham. ²² Haqad in gibilan, Mataw marorta na teq mataw tamaz emayta gigo aseseqta na teq mataw Moses ago gunun hurit kemiya na in Mat Atatin gileh ugad sanctity ayahmo tuqug daqay ham. Ugad teq in wol emid tumoqdaq ham. Moqeq kam ezeqmanmo usid teq God in wazid ta eraqdak ham.

²³ Haqad in on mataw bunmo gibilenim bilam, Mat araq ya imuzeq bolnan haqad anad emeq in ahol wazid woqan ham. Ad ya afaqan soraiqta nazaqmo in sornan anad bilaqsa kam bunmo in ago kruse sorid abetarib gwalan ham. In nazaq toneq teq in ya imuzeq bolan ham. ²⁴ Na ezaqgo mat nog inmo ahol anadin emad asan alowan tonaqta na in ahol awitan tihik hulesdaq ham. Ari mat nog in ya inadin emad ahol nog hulosdaqta na in ahol awitan ulumsihid kuluwa-kuluwmo tuqosdaq ham. ²⁵ Nagaqgo mataw og kab osad in giholyon nagah kabemmo diq rom tonayta? ham. Mataw na gihol awitan hik hulesid nagah in giholyon rom toniyta na ezaq teq gilumsihdaq? ham. Na hajq ham. ²⁶ Abeb Mat Atatin maror ayahta iyeq inmo ago ahol anuwan inaq ta bolad in amam teq amam ago angelo tawonta na nenaq gihol anuwanib tuboldaqta ham. Bolad mat aw nog in og kab osad ya teq yaqgo gamuk inaq ginan gimebay womta na kam nab Mat Atatin in mataw na ginan amebay twoqdaqmo ham. ²⁷ Ya helmo ne gibilenaiq ham. On mataw muran kam kab osayta ka gigo asor a hi moqadmo in God ago maror og kab gwahtiqa ahol tuwaq daqay ham.

*Yesus ahol awaqan lul araq diq iy
(Matyu 17.1-13; Mak 9.2-13)*

²⁸ Ari Yesus gamuk na tiqemim abeb kam 8 nazaq tihiqiyen in Pita teq Jems ama Jon inaq giwaqim nenaq garah araq abigmanib God inaq gamuk emnan tugwalehiy. ²⁹ Gwalehim Yesus God inaq gamuk emad ossa in anobun buliyim lul araq diq iy. Iysa ago tubusan inaqmo buliyim hus diq iymo. ³⁰ Sa mataw giger Moses ayow Elaija inaq giwitan gwahtiqa Yesus inaq gamuk bilaqad tituriy. ³¹ In giger God ago anuwan inaq Yesus agerab gwahtiqa in Yesus Jerusalem-ub leheq ago kabiy emid hiqiyyid in og ka huloseq gwa tilehdaqta na ago ananin in Yesus inaq bilaqad tur yaqay. ³² Tursa Pita ayogniz giger na nenaq gime sahuq iysa tuqusiy. Usim kayeq ta iyim in

Yesus ahol anuwan inaq mataw giger na giwitan nenaq tursa tigibiyiy. ³³ Gibiysa mataw giger na Yesus huloseq tilehnan tonsamo Pita era Yesus tuluron, Mat ayah ham i kab osauqta ka in dimun diq ham. I baybay ezeqmanmo emug ham. Araq ninenmen teq araq Moses amen teq araq Elaija amen ham. Pita anad a hi em hasadmo gamuk nazaq bilamta. ³⁴ In gamuk nazaq emad tursamo onqas tihitim. Hitiqim in Yesus ayogniz giger Moses ayow Elaija inaq giqisih netim ussa disaipel ezeqman na gibiyad tirab yaqay. ³⁵ Rabsa God aqez onqas na aduganib gehitiqim bilam, Ka ya itatin ham. Ya inmo atowun eman in osaqta ham. Ne in aqez hurity ham.

³⁶ God aqez na tihiqiyen disaipel Yesus amomo tursa ahol waqiy. Ad abeb in gewoqim luwad giqezmo hiqiyyim tiluwiy. In nagah ahol waqiyta na mat araq diq a hi buloniy.

Yesus amun araq aholib bugaw meqinta muz

(Matyu 17.14-21; Mak 9.14-29)

³⁷ Ari Yesus ago disaipel ezeqman na ne naq usim tarommo in eraqim garah na hulosisim tigewoqiy. Gewoqanmo mataw dahu biyahta Yesus amen emim osiyya na in ahol tuwaqiy. ³⁸ Ahol waqadmo mat araq gilikmanib era turad in lileyim bilam, Tisa ham ya inad meqniysa nibilenaiq ham. Ni ya itatin ka nob ugad ulumsih ham. Ka yaqgo amun amulikmota ham. ³⁹ Kam buntab bugaw meqinta araq in yaqgo amun ahol waqsa in ritenad ek tonaqta ham. Sa bugaw na amun wazim uelsa anosnosin ateb gwahtiqaqta ham. Ad in amun woltiayad in hulos ugnan atuw diq hiqiyyaqta ham. ⁴⁰ Ya ningko disaipel bugaw meqinta na muzgo haqad susumun negan in muznan biyab a hi iyiy ham. ⁴¹ Haqan Yesus bilam, On mataw kam kabta ne God anan helmo a hi haqayta ham. Ad ne ginad titnonim diq a hi usaqta ham. Kam ganim teq ya nenaq og kab osad ya ne ginad siqim iyaqta na ago a hi bilaqad ya ne gigo afaqan sordaiq? ham. Ningko amun a bol ham. ⁴² Haqan amun na Yesus agerab lehsamo bugaw meqinta na amun wazim hunegan woqan in tuqleyaq. Uelsa Yesus bugaw meqinta na wadim teq in amun ahol wastiyan tidimniy. Dimniyan in amun na waqim amam tuqug. ⁴³ An on mataw bunmo God ago zaway na ahol waqim gihol riten lamiy.

Yesus ame gigerta bilam, Ya moqe q teq ta eraqdaiq ham

(Matyu 17.22-23; Mak 9.30-32)

Mataw biyahta na in Yesus daq amta na anan ginadnad emad an bulonsa Yesus in ago disaipel gibilan, ⁴⁴ Ne gidek tih nemeq

gamuk ka huritad gidek hi zizalan ham. Mat araq teq Mat Atatin waqeq mataw gibenab tiqemdaq ham. ⁴⁵ Haqan teq haiq. Yesus ago disaipel gamuk na alulin ago ginad a hi em hasiy. Gamuk alulin na ulilemim ussa in ahol a hi waqiy. Ad teq in Yesus susumun ugnan rab yaqay.

God ago maror aduganib nog in mat ayah diqta?

(Matyu 18.1-5; Mak 9.33-37)

⁴⁶ Ari disaipel in gimo an mugad in gilikanib nog diq in ayah diqta na ago tibilaq yaqay. ⁴⁷ Sa Yesus in disaipel ginad nazaq emsa huritim in amun amikta araq waqim inmo agerab eman titur. ⁴⁸ Tursa Yesus gibilan, Mat nog in amun kaqanta ya ibinib bolsa ahol waqad wazinaqta na in ya iwazinaqmo ham. Ad nog ya iwazinaqta na in mat ya iqeman bolta na wazinaqmo ham. Nazaq iyan ne gilikmanib mat ahol abin haiqta na in ne bunmo giquriyamim in mat ayahta iyim luw osapta ham.

Mat araq Yesus ananib bugaw meqinta gimuzsa disaipel wasihiy

(Mak 9.38-40)

⁴⁹ Haqan Jon bilam, Iyahta ham mat araq ni nibinib bugaw meqinta gimuzsa i luwim ahol waw ham. Teq mat na i inaq araqib a hi luwad iyan i wasihad bulon, Ni nazaq ta he im haqad i bulon ham. ⁵⁰ Haqan Yesus bilam, Ne hi wasihiy ham. Na ezaqgo mat geg a hi negaqla na in ne giyowta ham.

Yesus ago disaipel nenaq uliq Jerusalem-ub lehiy

Samariya-ib on mataw Yesus baymuziy

⁵¹ Ari God Yesus waqeq ad Hevenib gwalehgo akaman bolim sinsin tiqiy. Sinsin iysa Yesus uliq Jerusalem-ub lehnhan anad awaz diq timeqniy. ⁵² Samo in mataw asor ameb leheq ago dan wastitay daqayta na gigeman tilehiy. Lehad luwim in Yesus ayon bit in usdaqta na wastitaynan haqad saw Samariya gigo uliqben araqab le tug-wahtiqiy. ⁵³ Teq haiq. Mataw uliq nabta in Yesus Jerusalem-ub lehaqta na ago huritim in Yesus waqeq inaq gigo bitab osnan tuhulosiy. ⁵⁴ Hulosan Yesus ago disaipel giger Jems ama Jon inaq in daq na ahol waqad Yesus tubuloni. Iyahta haqiy ni ninad bilaqid teq i God bulonid in kaitab faq emid hitiqeq mataw ka ginoy em bugan haqiy. ⁵⁵ Haqan Yesus ahol buliyim giger na ginadim gibilan, Ne nazaq hi bilaqiy ham. ⁵⁶ Haqad in ago disaipel nenaq uliq ta araqab tilehiy.

Yesus muzeq inaq lehgo adan

(Matyu 8.19-22)

⁵⁷ In danib lehad luwsa mat araq Yesus bulon, Uliq saw edob ni lehdaqta nab ya

nimuzeq ninaq tilehdaiqmo ham. ⁵⁸ Haqan Yesus bulon, Ni ninad em haseq teq ya imuzeq bol ham. Gaun kwasikta kuduqib osayta ham. Ah in gigo rir inaqla ham. Ari Mat Atatin in ago us osad anamur emdaqta abanan araq diq haiqgam ham.

⁵⁹ Haqad Yesus mat ta araq bulonim bilam, Ni ya imuzeq bol ham. Haqan mat na bilam, Iyahta ham ni ya ihulossa ya leheq imam tumomta na yay tonad teq ya boleq nimuzeq ninaq tilehdaiq ham. ⁶⁰ Haqan Yesus bulon, Nab iyan ham. Mataw giwitan moqim usad God anadin a hi emayta na in gimo an wamuzad an yay toniy ham. Ari ninmo leheq God ago maror agamukon an mataw gibilenad luw ham.

⁶¹ Sa mat ta araq in Yesus bulon, Iyahta ham ya nimuzeq ninaq lehdaiqta ham. Teq ni ya ihulosisid ya leheq isenlul giben wazeq teq ya ta boleq nimuzeq ninaq tilehdaiq ham. ⁶² Haqan Yesus bilam, Mat dante dimunta tuwaqim teq sirisirimo in ame agilehun ban ta lehaqta, mat na God ago maror aduganib le a hi gwahtiqaqta ham.

10

Yesus mataw 72 nazaq giqeman ago kabiy emnan lehiy

¹ Ari abeb Iyahta in mataw 72 nazaq gitowun emim gigeman in giger giger uliq saw bunmo Yesus abeb teq lehdaqta nabmo in danmeb tilehiy. ² Lehsa Yesus gibilan, Kabiyab didaq kabemmo tizilimim giqusaq ham. Teq kabibiy mataw kabem diq a haq ham. Nazaq iyan ne kabiy anamren inaq gamuk emad bulonsa in kabibiy mataw kabemmo gigemid boleq in ago didaq na giwaq ugij ham.

³ Teq ne ginad em haseq lehiy ham. Ya ne gigeman ne sipsip amidgotniy gaun kwasikta gilikmanib leh nog iiyay ham. ⁴ Ne lehad mani araq giholib hi usan ham. Ad ne ziy araq hi bideqiy ham. Teq ne gisendugan hi emiymo ham. Ne lehad on mataw danib gibiyad nenaq gamuk sisaoqmo emad hi turiy ham.

⁵ Ne leheq bit araqab gwahtiqaq osnan haqad itureqmo ne kazaq gibileniy ham. On mataw bit kabta ne gigem dimniyya osiy haqiy ham. ⁶ Haqid mat araq dimunta bit nab osid teq ne gigem dimunta ugiyta na le mat na ago hib tuqusdaq ham. Ari mat araq dimunta nazaqta bit nab a hi osid teq ne gigem dimunta na ne gigo hib muleqebo ta usdaq ham.

⁷ Bit amulko ne os daqayta nabmo ne osiy ham. Ossa in didaq teq yuw negsa ne gihol afagan hi iiyay ham. Ne negmo neqiy ham. Na ezaqgo kabibiy mat mataw gimen kabiy emsa in amenin tuqug daqay ham. Teq ne haresmo bitbitmo hi luwiy ham.

⁸ Ne leheq uliq araq aduganib gwahtiqid in ne giwazinad nenaq osad didaq negsa ne neqad nan kabemmo hi bilaqiy ham. ⁹ Ad ne uliq nab on mataw gigo moq inaqta giwastitayid dimniysa ne gibileneq bilaqiy, God ago maror ne gigo hib sinsinmo tubol haqiy ham.

¹⁰ Ari ne le uliq araqab gwahtiqid in ne gibaymuzsa ne uliq na agemab turad kazaq gibileniy ham. ¹¹ Ne gigo uliq ka aqogin i gisenab soqotim usaqta ka i wolilaman ne gigo hib ta lehaq haqiy ham. Na ago teq ne afaqan tisor daqay haqiy ham. Teq ne ginad em hasiy haqiy ham. God ago maror ne gigo hib sinsinmo bolan ne gileh ugiy haqiy ham. ¹² Ya ne gibilenaq ham. Kam abebtanta nab uliq Sodom afaqan waq daqayta nazaq nog in afaqan a hi waq daqay ham. Uliq ne gibaymuz daqayta na in Sodom giquriyameq afaqan ayah diqta tuwaq daqay ham.

*On mataw ginad gigem a hi buliayta na oseq timeqniy daqay
(Matyu 11.20-24)*

¹³ Haqad Jesus bilam, Uliq Korasin teq uliq Betsaida ham ne teq timeqniy daqay ham. Kwaziqmo mat araq leheq daq azawayin inaq ya ne gigo hib emta nazaq in uliq giger Tair-ib teq Saidon-ib emid on mataw na ginad tubuliy nagiy ham. Ginad buliyeq in gigo daq teq ginad meqinta gileh ugad in tubusan asorqan abiayornaqta weleq butbutmeh tuqos woq nagiy ham. Teq ne yaqgo daq azawayin inaqta na ahol waqim ne ginad buliyim gigo daq meqinta gileh a hi ugiy ham. ¹⁴ Nazaq iyan abeb God hazizir ayahta emdaqta nab Tair teq Saidon afaqan waq daqayta nazaq nog ne a hi waq daqay ham. Ne in giquriyameq afaqan ayah diqta tuwaq daqay ham.

¹⁵ Teq uliq Kapaneam ham ne gibin iluwid Heven-ib gwalehdan e? ham. Haiqgam ham. In ne gihunegid ne mataw tumoqtiya gigo sawab tuwoleh daqay ham.

¹⁶ Haqad in ago disaipel gibilenim bilam, Mat ne giqez huritaqta na in ya iquez huritaqmo ham. Ad mat ne gibaymuzaqta na in ya ibaymuzaqmo ham. Ad mat ya ibaymuzaqta na in mat ya iqeman bolta na tubaymuzaqmo ham.

Jesus mataw 72 giqeman kabiyl emnan lehiyta na muleqim ta boliy

¹⁷ Ari abeb mataw 72 Jesus giqeman lehiyta na in ginad dimniysa muleqim ta boliy. Bolim in Jesus buloni, Iyahta haqiy i ni ninan biysa bugaw meqinta inaqmo i gihagenib iyim in i gigo gamuk huritad muziniy haqiy. ¹⁸ Haqan Jesus gibilan, Ne le yaqgo kabiyl emad luwsa Satan ulilibmo diq osim in mewlig hikliyan nog iyim ogib woqsa ya ahol way ham. ¹⁹ Ne huritiy

ham. Ya nagah meqmeqinta gibayid woqgo azawayin tineg ham. Negan ne nagah ahulinaqta teq kahkah nagan tigibay daqay ham. Teq ne ya ibinib luwad ne gigo bab na ago zaway bunmo ne wazid tuwoq bugdaq ham. Sa nagah araq diq a hi gimeqin tondaq ham. ²⁰ Ta teq bugaw meqinta ne giqez muzinayta na ago ne ginad hi dimniyan ham. Haiqgam ham. Ne giholnan God ago uliq Heven-ib tumar tonan usaqta naqmo ago ne ginad dimniyan ham.

*Yesus anad dimniysa God esey ug
(Matyu 11.25-27; 13.16-17)*

²¹ Ari kam nabmo diq God ago Bugaw Dimunta Yesus aholib ayahmo bolan in anad diq dimniysa bilam, O ya imam ham, Heven-ib teq og kab inaqmo ni Iyahta iyim osaqla ham. Ni mataw ginad awaz meqinta na teq mataw gimaqbel inaq iyim igmo ag haqad osayta na ni yaqgo kabiyl alulin a hi giqisihunata ham. Haiq ham. On mataw gihol wazan woqsa in onmin gibin haiqta os nog iyayta naqmo ni yaqgo kabiyl alulin tigiqisihunata ham. Ya imam ham ni ninad nazaqmo usan ni tiqam ham. Nazaq iyan ya esey nigaiq ham.

²² Haqad Jesus ta bilam, Ya imam in ago kabiyl bunmo ya ibenab tiqam ham. Mat araq diq in yaqgo a hi hurit ham. Ya imam amomo in yaqgo huritta ham. Teq mat araq ya imam ago a hi huritmo ham. Ya in atatin iyim ya imomo in ago huritta ham. Ad on mataw ya inad bilaqsia imam giqisihunaiqta naqmo in ya imam ago huritaytamo ham.

²³ Haqad in ahol buliyim ago disaipel gibiyad in gidekib kiskismo gibilenim bilam, Nagah ne ahol waqayta ka ago ne ginad dimniyan ham. ²⁴ Ya ne gibilenaq ham. Kwaziqmo God ago nantut kabemmo teq Isrel gigo king kabemmo in nagah ne muran ahol waqayta ka in ahol waqnan ginad diq bilaq yaqayta ham. Teq in moqim ahol a hi waqiyta ham. Ad gamuk kawa ne huritayta ka in huritnan ginad bilaq yaqaytamo ham. Teq in moqim a hi huritiyta ham.

Samariya-ib mat araq in ababun Juda mat anan anad meqniy

²⁵ Yesus nazaq gamuk bilaqsamo mataw na gilikmanib mat araq Moses ago gunun hurit kamta na in eraqim Yesus ulum waqad tisusumun ug. Tisa ham ya ezaq toneq teq kayeqmo kuluwa-kuluwmo tuqosdaiq? ham. ²⁶ Haqan Yesus bulon, God ago maror Moses bilamta na aduganib gamuk ezaq diqta mar tonan usaq? ham. Ni gamuk na ahol waqim ninad ezaq emaq? ham. ²⁷ Haqan mat na bilam, Gamuk na kazaq bilam ham.

Ne gigem, ginad, giwitan, teq ne gigo zaway bunmo amilib ne gigo Iyahta God anan ginad bilaqan ham.

Ad ni nihol anan ninad bilaqaqta nazaqmo ni niyow anan ninad bilaqan ham.
Lo 6.5; Wok Pris 19.18

²⁸ Mat na nazaq bilaqan Jesus bulon, Ni gamuk amenin dimunmo tibilam ham. Ni nazaq toneq teq ni kayeqmo kuluwakuluwmo tuqosdaq ham.

²⁹ Teq mat na inmo ahol abin iluwnan haqad in Jesus bulonim bilam, Ta ya iyowta na nog? ham. Haqan Jesus bilam, Gamuk araq kazaq lahta ham. Ni hurit ham. ³⁰ Juda mat araq uliq Jerusalem hulosim in uliq Jeriko-ib tuwolehad luw ham. Wolehad luwsamo mataw meqmeqinta danib ahol waqim wazim wolim ago nagah bunmo giwaqim in tukim tilehiy ham. Lehsa mat na moqnan tonad danib tuqus ham.

³¹ Ussa kam nab Juda gigo mat tamaz emaqta araq in dan naqmo muzim wolehad luwimmo mat na ussa in ahol tuwam ham. Ahol waqad in aban emim dan adek ban loqim uriyamad lehmo tilah ham. ³² An nazaqmo Juda gigo gem Liway anaynayn araq Tempel-ib kabiy emaqta na in dan nab bolim mat na ahol waqad in aban emim uriyamad tilahmo ham.

³³ Lehsa mat na ababun araq Samariyabit in dan nabmo bolim bo mat na agerab tugwahtim ham. Gwahtiqliq mat na ahol waqad in anan anad timeqniy ham. ³⁴ Anad meqniysa agerab loqim in oliv amasilan teq wain ayun mat na asulanib emim teq in tinat ham. Ad in mat na sorim inmo ago donki amilib emim in ad tilah ham. A lehim in bit araq mataw zayim usayta abitan nab eman ussa in wamuzim tuqus ham. ³⁵ Usim eraqim tilehnhan haqad in mani ameta gigermö bit na anamren ugad bulon, Ni mat ka wamuz ham. Ya muleqeç ta boleq teq mani ganim ni mat ka ayon hulosta na ya amenin tinigdaq haqad in bilam ham.

³⁶ Haqad Jesus in mat Moses ago gunun hurit kamta na tisusumun ug, Ni ninad ezaq emaq? ham. Mataw ezeqman na glikmanib nog diq in mat woliyta na ayowmat nog iyim ulumsih? ham. ³⁷ An mat na bilam, I gibabun Samariya-ibta bolim mat na anan anad meqniysa ulumsihta naqmo ham. Haqan Jesus bulon, Ari ni leheq Samariya mat daq amta nazaq ni asen muzeq em ham.

Jesus le Marta amikqan Mariya inaq gibiyad os

³⁸ Ari Jesus ago disaipel nenaq lehad luwim le uliq araqab tugwahtiqiy. Gwah-tiqan aw araq anan Marta haqayta na

in Jesus wazinad bulonim inaq ago bitab tilah. ³⁹ Lehan teq Marta ama anan Mariya haqayta na in eraqim le Iyahta anognib os woqim osad in ago suleq huritad osyaq. ⁴⁰ Ossa Marta amomo in Jesus ago disaipel nenaq gimen didaq oyad kabiy kabemmo anadin emad anad timeqniyaq. Anad meqniysa in bolim Jesus tubulon, Iyahta ham ya ima ihulosim bo ni ninad ossa ya imomo didaq oy akabiyan emaiq ham. Ni ya inan ninad a hi meqniyaq e? ham. Ni ya ima bulonid in boleq ya ilumsihan ham.

⁴¹ Haqan Iyahta bulon, Marta, Marta ham ni kabiy kabemmo na ginadin emad nihol afaqan iyaq ham. Teq kabiy amulikmo emnanta usaq ham. ⁴² Kabiy dimunta na ni nima kawa ahol tuqug ham. Ugan i in aholib kabiy dimun diqta na a hi walemam ham.

11

*I God inaq gamuk emamta ago adan
(Matyu 6.9-15; 7.7-11)*

¹ Ari kam araq Jesus le saw araqab God inaq gamuk emad tuqos. In God inaq gamuk bilaqim tihiqiyamno ago disaipel araq bolim tubulon, Iyahta ham i ezaq God inaq gamuk emamta na ni i giqisihun ham, Jon in ago disaipel giqisihunta nazaq ham. ² Haqan Jesus disaipel bunmo gibilan, Ne God inaq gamuk bilaqnan haqad ne kazaq bilaqiy ham.

I Gimam Iyah,

Ni on mataw bunmo giqemid in ni ninan wazinij.

Ad ni ningo maror emid og kab gwah-tiqan.

³ Kam amulik-mulikmo ago didaqta ni ig.

⁴ Teq mataw i gigo hib daq meqinta emsa i walemad anadin a ta hi emauqta nazaqmo ni i gigo daq meqinta walemad anadin ta hi emmo.

Ad nagah i gilum waqdaqta na ni wasihid i giholib hia gwahtiqlan.

⁵ Yesus nazaq gibilenim teq in bilam, Gamuk araq kazaq lahta ham. Ne huritiy ham. Tarom alihanib mat araq in ago kadoy ago bitab bolim bulon ham. Kadoy ni bret ezeqmanno yag haqad in bulon ham. ⁶ Ya iyow araq dan pesamno bolad luwim bo yaqgo bitab tugwahtiqan ya didaq araq ugdaiqta na haiqgam haqad in bulon ham. ⁷ Haqan mat bit aduganib osta na bilam, Ni ya ituw hi bul haqad in bilam ham. Ya dan otim yaqgo onmin nenaq tuqusd iyan ya eraqeç nagah na a hi nigdaq haqad in bilam ham. ⁸ Ari ya ne gibilenaiq ham. Mat bit aduganib osaqta na in ayow anadin a hi emaqta ham. Ta teq luweq inmo ahol abin timeqniydaq haqad in eraqeç nagah ayow ago siqim iyaqta na tuqug bugdaq ham.

⁹ Ad i God inaq gamuk bilaqgo adan nazaqmo usaqta ham. Teq God atuw a hi hiqiyaqta ham. Ne nagah araq anan susumun ugid teq in tinegdaq ham. Ne nagah araq naguneq teq ne ahol tuwaq daqay ham. Ne dan ez wolhamsa teq God ne giyon dan tihas negdaq ham. ¹⁰ On mataw nagah anan God susumun ugaya naqmo in nagah na waqayta ham. Teq on mataw nagah nagunayta naqmo in nagah na ahol waqayta ham. Ad on mataw dan ez wolhamsa teq God in giyon dan tihas negdaq ham.

¹¹ Teq ne gilikmanib amun araq nabiq neqnan haqad amam bulonsa amam in nagah ahulinaqta gimugaqta araq waqeq ugdaq e? ham. Haiq ham. ¹² Teq amun na kurek akokin anan bilaqsa amam in kahkah araq waqeq ugdaq e? ham. Na haiqmo ham. ¹³ Ne mataw ginad meqinta usaqta ham. Teq ne gigo onmin nagah dimdimdala neggo ne tuhurit kemiyta ham. Ari i Gimam Heven-ib osaqtta na in nazaq ago on mataw a hi gitondaqmo ye? ham. Haiq ham. On mataw Gimam Iyah inaq gamuk bilaqad bulonsa in ago Bugaw Dimunta tinegdaq ham.

Mataw asor bilaqiy, Yesus bugaw meqinta Belsebul inaq kabiya emaqta haqiy
(Matyu 12.22-30; Mak 3.20-27)

¹⁴ Ari Yesus in mat araq aholib bugaw meqinta ussa gamuk a hi emyaqta na tu-muz. Muzan lehsa mat aqez hiqiyim luwta na gamuk tibilayqaq. Bilaqsa on mataw ahol waqad in gihol riten lamyaq. ¹⁵ Sa mataw asor bilaq yaqay, Yesus in bugaw meqinta gigo danmehta Belsebul ago zaway amalib bugaw meqinta gimuzaqta haq yaqay. ¹⁶ Sa mataw ta asor Yesus ulum waqad susumun ug yaqay, Ni God bulonid in Heven-ib daq araq azawayin inaqta emid gehitiqsa i ahol waqad teq i ni ninan helmo tibaqam haq yaqay.

¹⁷ Teq Yesus mataw na ginad hurit kemim gibilan, Kantri araq ago on mataw gihol husereq an gihar ugad an wolad oseq in tiliqiy bug daqay ham. Ad bit araqab on mataw gihol husereq an gihar ugad teq in an tirabun daqay ham. ¹⁸ Ad nazaqmo Satan ago dauh nenaq gihol husereq an gihar ugad an wolad Satan ago zaway hiqysa in ago kabiya tuwoqdaq ham.

Ne ya inan bilaqay, In Belsebul ago zaway amalib bugaw meqinta gimuzaqta haqay ham. ¹⁹ Ta teq ya Belsebul ago zaway amalib bugaw meqinta gimuzid ari ne gigo gisenlul asor na in nog diq ago zaway amalib bugaw meqinta gimuzayta? ham. Nazaq iyan ne ya ibilawunayta na negmo gigo gisenlul naqmo in tuqlum kem daqay ham. Ulum kemeq in bilaq daqay, Gamuk

nawa ne bilaqayta na ne katiyay haq daqay ham. ²⁰ Ari God-mo ago zaway ilumsihsa ya bugaw meqinta gimuzsa teq ne ginad emiy ham. God ago maror ne gilikmanib tubol haqiy ham.

²¹ Ne ginad em hasiy ham. Mat araq awaz meqinta em sebur inaq wazim ago bit wazim ossa in ago nagah bunmo bitab dimunmo usaqta ham. ²² Ta teq mat araq zaway diqta boleq bit anamren na inaq an woleq tuquriyamdaqta ham. Uriyameq in bit anamren abenab em sebur in wazim ago zaway inaq iyim osta na waqad in bit anamren ago nagah bunmo giwaq bugeq a le ago walmataw gigo hib tiqiberdaq ham.

²³ Ne ginad emiy ham. On mataw ya inaq kabiya hi emayta na in ya ibabun ham. Teq on mataw ya inaq yaqgo dauh a hi girom tonayta na in yaqgo mataw gimuzan hares-haresmo lehayta ham.

Bugaw meqinta muleqim ta bol
(Matyu 12.43-45)

²⁴ Haqad Yesus bilam, Bugaw meqinta araq mat hulos ugim gwahiqim haresmo saw ayuwun haitqtab lehim luwqta ham. Luwad in ban araq anamur emad osdaqta na nagunaqta ham. Teq haiq ham. In ban araq nazatta ahol a hi waqqaqta ham. In ban araq ahol a hi waqim teq in ahol bulonim bilaqqaq. Bit kwaziqmo ya osta nab ya muleqeq ta lehdaiq haqqaqta ham. ²⁵ Haqad in bit nab muleqim ta lehim bit na asawun wolrironim anaghan bunmo wastitayim abanab eman ussa in ahol waqqaqta ham. ²⁶ Ahol waqim teq in lehim bugaw meqin diqta 7 nazaq in daq meqinta emgo uriyamiya na gililewunim giwaqim nenaq ta bolim in bit nab gwahiqim osayta ham. Mebmebmo bugaw amulikmo mat na aholib ussa in ahol meqin dimun nog osyaqta ham. Ari muran teq bugaw 8 nazaq bolim mat na aholib ussa in ahol timeqniy hasim osaqtta ham.

Mataw tidimniyeq os daqayta adan

²⁷ Yesus gamuk na bilaqsamo mataw dauh biyatha na gilikmanib aw araq lileyim bulon, Aw niqemim sus nigta naqmo tidimniyim osaqtta ham. ²⁸ Haqan Yesus bilam, Haiggam ham. Mataw God ago gamuk huritad muzinaya naqmo tidimniyim osayta ham.

Mataw asor daq azawayin inaqta ahol waqnan bilaqiy
(Matyu 12.38-42; Mak 8.12)

²⁹ Ari on mataw teko bolim osiyta na os tutsumo mataw bunta in gigerab tubol yaqay. Bolsa Yesus gibilan, On mataw muran kam kab osayta ka in meqin diq ham. In daq azawayin inaqta naqmo ahol waqnan bilaqayta ham. Teq God daq araq

azawayin inaqta a hi em negdaq ham. Daq Jona aholib gwahtimta naqmo in ahol tuwaq daqay ham. ³⁰ Kwaziqmo Jona uliq ayahta anan Niniwe haqayta nab gwah-tiqim on mataw gibilanta ham. Gibilenad in bilaqne God Niniwe on mataw hazizirib giqemeq gigo daq meqinta amenin negdaqta atowun in gigo hib os nog iyaq ham. Ad nazaqmo Mat Atatin in bilaqne God on mataw kam kabta hazizirib giqemeq gigo daq meqinta amenin negdaqta atowun in gigo hib os nog iyaqmo ham.

³¹ Abeb God hazizir ayahta emdaqta nab teq aw marorta kwaziqmo saw araq pesantab osta na in eraeqq on mataw muran kam kabta nenaq God ameb turad in mataw kam kabta gigo daq meqinta emid ulal tiquydaq ham. Na ezaqgo aw marorta na uliq pesan diqtab osim Solomon abin huritim ago gamuk dimunta huritnan haqad ago hib tubol ham. Teq ne ahol waqiy ham. Mat araq Solomon uriyamta na in kawa ne gilikmanib osaq ham. Ta teq ne in ago gamuk dimunta huritnan gituw hiqiyayta ham.

³² Teq God hazizir ayahta emdaqta nab uliq Niniwe on mataw na eraeqq mataw muran kam kabta nenaq God ameb turad in mataw kam kabta gigo daq meqinta emid ulal tiquydaqmo ham. Na ezaqgo on mataw Niniwe-ibta na in Jona ago gamuk huritim in ginad buliyim gigo daq meqinta gileh ugiyta ham. Teq ne ahol waqiy ham. Mat araq Jona uriyamta na in kawa ne gilikmanib osaq ham. Ta teq ne in ago gamuk huritim ginad a hi buliyayta ham.

I gihol anuwan agamukan (Matyu 5.15; 6.22-23)

³³ Ari mataw lam miderim bit aqirad-nib eman a hi usaqta ham. Ad in lam miderim kuramab a hi sihenaytamo ham. Haiqgam ham. In lam miderim ulilib othenan oyad usaqta ham. Oyad ussa mataw lam anuwan na ahol waqad bolim bit na aqezab lo tugwahtiqayta ham. ³⁴ Ad nazaqmo ni nimeqnagin nihol bunmo anuwan ugaqta ham. Ni nime dimun iyid ni nihol bunmo anuwan inaq tiquydaq ham. Ari ni nime meqin iyid ni nihol bunmo aromriq inaq tiquydaq ham. ³⁵ Nazaq iyan ni nihol waz naqmo hiqiy ham. Luweq ni ninad emdaq. Ya idugan anuwan inaqta haqdaq ham. Teq haiq. ni nidugan aromriqnaq usdaq ham. ³⁶ Ari ni nihol bunmo anuwan inaq iyad ni nihol anaghan araq romriqab a hi ussa teq ni nihol bunmo anuwan inaq tiquy hasdaq ham. Bilaqne lam taromab oysa ni anuwanib osad nihol bunmo anuwan inaq iyaqta nazaq nog ham.

Yesus in Farisi giyogniz mataw Moses ago gunun hurit kemiyyta na nenaq gigo daq ginan bilam

(Matyu 23.1-36; Mak 12.38-40; Luk 20.45-47)

³⁷ Ari Yesus gamuk bilaqim tihiqiyan Farisi araq Yesus waqeq ad ago bitab leheq inaq daqaq neqnan haqad tubulon. Bulonan Yesus mat na inaq lehim ago bit aduganib gwahtiqim banab tuqos. ³⁸ Osad in aben a hi suholimmo didaq neqsa Farisi na ahol waqad anadnad tiqemyaq. ³⁹ Sa iyahta bulon, Ne Farisi ham ne gog teq deg gisanmo suholayta ham. Teq ne giduganib rin tongo adan teq daq meqinta amo amo ate gwalim usaqta ham. ⁴⁰ Ne mataw agadanta ham. Mat ne gisan amta na in ne gimugan amtamo ham. ⁴¹ Nazaq iyan nagah ne gimuganib usaqta na ne wasti-tayid dimniyid teq ne daq dimdimunta God anan anad bilaqaqta naqmo emiy ham. Ne nazaq emsa teq nagah bunmo ne giwazayta na anumlan tihiqydaq ham.

⁴² Ne Farisi ham ne timeqniyim osayta ham. Ne gigo kabiyyab kwasin amik diqta anan mint haqayta na teq gunay teq kwasin-kwasan amikmipta amo amo ne giwaqim gihuseran humab 10 nazaq iyan humab amulikmo ne God ugaya ham. Ta teq daq titnonta amalib mataw gilum kemayta na teq God anan ginad bilaqayta na ago ne gidek zizalan ne a hi emayta ham. Ne daq aseseqta nawa na gidek a hi zizalsa ne tiqem nagiyta ham. Emad ne daq amikmipta na tiqem nagiymo ham.

⁴³ Ne Farisi ham ne timeqniyim osayta ham. Ne bit humab wolaytab ban ulilibta nabmo osnan ginad bilaqaqta ham. Ad ne maket-ib luwsa mataw ne gibiyad ginan ‘mat ayah’ haqsa ne ginad diq dimniyayta ham. ⁴⁴ Ne timeqniyim osayta ham. Ne bilaqne hodhod agelin haiqta nog ham. Gel haiqgam iyan mataw hodhod usaqta na ahol a hi waqadmo gwahtiqim loq gelad luwayta ham.

⁴⁵ Haqan mataw Moses ago gunun hurit kemiyyta na gigo araq in Yesus ago gamuk amenin emim bilam, Tisa ham ni nazaq Farisi ginan bilaqad ni igmo gigin inaqmo meqin tonaqmo ham. ⁴⁶ Haqan Yesus bilam, Ne mataw Moses ago gunun hurit kemiyyta na ham ne timeqniyim osaytamo ham. Ne gunun kabemmo diq on mataw negayta ham. Bilaqne ne nagah afaqanta on mataw gibetarib eman in sorgo gi-holtuw diq bulayta nazaq ham. Teq ne giben akurgan araq diq loqim gilumsihad asit a hi sor negayta ham.

⁴⁷ Ne timeqniyim osayta ham. Ne gisesan God ago nantut kabemmo ginol emiyta ham. Ginol eman abeb ne nantut na gimen hodhod abitan dimdimunta giqemiyta

ham. ⁴⁸ Ne gisesan God ago nantut ginol eman moqiyta na ago ne ginad dimniyyi daqagya ham. Ginad dimniyya ne in gilum-sihad mataw ginol emiyta na gimen hod-hod abitan na giqemiyta ham.

⁴⁹ God anad awaz meqin diqta iyim iyan in ne gilum kemimmo ginan kazaq bilam ham. Ya Aposel asor teq yaqgo nantut asor giqemid in yaqgo on mataw gigo hib leh daqay haqad in bilam ham. Lehid teq yaqgo on mataw na in gibaymuzad asor in ginol em daqay haqad in bilam ham. ⁵⁰ God og ka mutur amta nab iyim bo murammo mataw in ago nantut kabemmo ginol eman moqiyta ham. Teq nantut na bunmo ginedan womta na in mataw kam kab osayta ka gigo afaqan ham. Nazaq iyan in ginedan womta na aqenin God in on mataw muran kam kabta gigo hib tuwaqdaq ham. ⁵¹ Mebmbebmo mataw Abel wol eman moqan in anedan wom ham. An abeb diq in Tempel teq tamaz em abanan Tempel asan ban turaqta na gilikmanib in Sekaraya wol eman moqan in anedan wommo ham. Ne gisesan Abel akam-nib mataw dimdimunta ginol emim bo bo Sekaraya ago akamnib tiqiyi ham. An ya helmo ne gibileniq ham. God in mataw dimdimunta ginedan womta na giqenin on mataw muran kam kab osayta na gigo hib tuwaqdaq ham.

⁵² Haqad Yesus bilam, Mataw Moses ago gunun hurit kemiyyta na ham ne time-qniyim osayta ham. On mataw God ago hurit kemnan haqad susumun negsa ne in gidanin qwayayta ham. Negmo diq God ago a hi hurit kemayta ham. Ad mataw ta asor na in God ago hurit kemnan tonsa ne giwasihayta ham.

⁵³ Admo Yesus bit na hulosim le asanib tugwahtim. Gwahtiyan teq mataw Moses ago gunun hurit kemiyyta na giyogniz Farisi nenaq in Yesus anan gigem meqin diq iysa in ulum waqad nagah haresmo anan susumun tuqug yaqay. ⁵⁴ Susumun ugid in gamuk araq hi bilaqnanta bilaqid teq i tuwazam haqad in baynetim tur yaqay.

12

Yesus bilam, Ne Farisi gigo yis anan gihol waziy ham
(Matyu 10.26-27)

¹ Ari Yesus gamuk na bilaqad tursamo on mataw kuluw diqmo in agerab humab emim an ger ger diq turad in an asen tubay yaqay. Sa Yesus iturimmo inmo ago disaipel gibilenim bilam, Ne Farisi gigo yis anan gihol waz naqmo hiqiyi ham. Ari ya Farisi gigo yis haqad bilayta na ya in gigo daq in gimileq iyayta naqmo anan bilayta

ham. ² Nagah bunmo mataw giqisihan usaqta na abeb teq God hasid mataw bunmo ahol tuwaq daqay ham. Ad nagah bunmo mataw gikasnaknib usaqta na abeb God emid ulalab tugwahtiqaq ham. ³ Nazaq iyan gamuk bunmo ne mataw gime titonim romriqab bilaqiyta na abeb mataw gamuk na saw anuwanibmo bilaqsa on mataw bunmo tuhurit daqay ham. Ad ne uilemim bit aduganib gamuk kiskismo an adekib bilaqiyta na bunmo abeb mataw bit ahuqunib gwale turad teq in dedibmo lileyeq tibilaq daqay ham.

On mataw nog diq rabun daqayta?
(Matyu 10.28-31)

⁴ Ya ikadoyniz ham ya ne gibileniq ham. Mataw ne gisanmo wol em daqayta ham. Gisan wol emeq in ne gigo hib daq araq emgo in gigo zaway haiqta ham. Nazaq iyan ne mataw hi girabuniy ham. ⁵ Ari ne mat rabun daqayta na ago ya tigibilendaiq ham. In ago zaway kazaq usaqta ham. In ne ginol emeq teq in ne gihunegid saw faq oyad a hi miyaqtan tuwoleh daqayta ham. Helmo ya ne gibileniq ham. Ne mat naqmo rabuny haqaiq ham.

⁶ Mataw mani asit diqmo hulosim ah amikmikta abaynaginmo gizayayta ham. Teq God in ah amikmikta na gigo araq diq anan adek a hi zizalaqta ham. ⁷ Ad in ne gibiy kemad ne gifaqinib giqensan na in ginulinim ganim diq usaqta na in tuhurit bugta ham. Nazaq iyan ne hi rabiy ham. Ne ah amikmikta nog a haiq ham. Ne ah amikmikta na ayahmo giquriyamiya ham.

I Yesus abin bilaqo gimebay hi woqan
(Matyu 10.32-33; 12.32; 10.19-20)

⁸ Ya ne gibileniq ham. Mat aw nog in mataw gimeb bilaqdaq, Ya Yesus-mo ago iyim osaiqta haqdaqta na abeb Mat Atatin nazaqmo God ago angelo gimeb turad in mat na anan bilaqdaq. In yaggota tihaqdaqmo ham. ⁹ Ari mat nog in on mataw girabunad gimeb gileh yagid ya nazaqmo God ago angelo gimeb mat na gileh tuqgundaiqmo ham.

¹⁰ On mataw Mat Atatin bilawunayta na bunmo God in gigo daq meqinta na tuwalemdaq ham. Ari mat araq God ago Bugaw Dimunta bilawunid God in ago daq meqinta na a hi walemdaq ham.

¹¹ Abeb mataw ne giqad Juda gigo bit humab wolaytab leheq mataw marorta gimeb teq gavman gimeb giqemid tursa ne hi rabiy ham. Ad ne mataw aseseqta na gigo gamuk amenin emeq ne naga gamukin bilaq daqayta na ago ne ginadnad hi emiymo ham. ¹² Kam nabmo diq teq God ago Bugaw Dimunta in gamuk ne bilaq daqayta na tigiqisihundaq ham.

Mat ago es kabemmo ussa anad a hi em hasta ago gamuk awowun

¹³ Ari mat araq on mataw dauh biyatha na gilikmanib eraqim turad in Yesus bulon, Iyahta ham ni ya ibab bulonid in i gimam tumomta na ago ahuram nagah husereq asor ya yagan ham. ¹⁴ Haqan Yesus bulon, Kadoy ham. Nog diq ya iqeman ya ne gigo jas o megistret iyim ya ne gimen midiyens wazdaiq? ham. ¹⁵ Haqad in on mataw bunmo gibilenim bilam, Ne gihol asawan woltayad osiy ham. Luweq ne amota gigo nagah utet daqay ham. Ne giholyon nagah kabemmo tuwal emgo og kab a hi osayta ham.

¹⁶ Haqad in gamuk awowun araq kazaq gibilan, Mat ago es kabemmo inaqta araq ago kabiyyab didaq gwalim anon kabemmo diq giqam ham. ¹⁷ Sa mat na ahol bulonim bilam, Ya teq ezaq tondaiq? haqad in bilam ham. Yaqgo bit araq ayatha yaqgo didaq tuwal emid osdaqta na hajq haqad in bilam ham. ¹⁸ Haqad in anad tiqemim bilam, Ya kazaq tiqemdaiq haqad in bilam ham. Yaqgo didaq abitan amikmikta na giqiner tiqsa teq ya gisawnib bit muturta aseseqta tigiwazdaiq haqad in bilam ham. Giwazeq yaqgo wit anagin teq yaqgo es bunmo bit na giduganib tuwal em bugdaiq haqad in bilam ham. ¹⁹ Tuwal emid ussa teq ya ihol buloneq bilaqdaiq, Ya matmo diq haqdaiq haqad in bilam ham. Yaqgo nagah dimdimunta ulig kabemmo agota usaq haqdaiq haqad in bilam ham. Ya kabiyy araq a ta hi emdaiq haqdaiq haqad in bilam ham. Ya inamur emad didaq neqad yuw uluwad inad dimniyu tuqosdaiq haqdaiq haqad in bilam ham. ²⁰ Haqan teq hajq ham. In ahol nazaq bulonad ossamo God tubulon, Ni mat agadanta haqad in bilam ham. Muran tarom kabmo ni tu-moqdaq haqad in bilam ham. Moqid ni nagah niholyon tuwal emad osta na nog teq waqdaq? haqad in bilam ham. ²¹ Haqad Yesus bilam, Mataw asor in giholyon es nagah kabemmo tuwal emayta ham. Teq God ago hib in gigo nagah araq dimunta a hi usaqta ham. Mataw naqanta gigo hib teq daq nawa ya anan bilayta na tugwahtiqaq ham.

*Yesus mataw ginad meqniysa ginad kabemmo emayta na ginan bilam
(Matyu 6.25-34)*

²² Haqad Yesus in ago disaipel gibilan, Nazaq iyan ya ne gibilenaiq ham. Ne gigo luw os anan ginad haresmo hi emiy ham. Ad “I teq naga neqam?” o “I teq naga amalib i gihol sihenam?” haqad nazaq ne ginad hi emiyham. ²³ Ne didaq neqgomo og kab a hi osayta ham. Ad ne gihol in tubusanib sihengomo a hi usaqta

ham. ²⁴ Ne ah ginadin emiy ham. In didaq a hi leyayta ham. Ad in didaq a hi tayaytamo ham. In gigo didaq abitan in giholyon didaq tuwal em daqayta na haiqmo ham. God-mo didaq negsa neqayta ham. Teq ne ah nog a haiq ham. Ne ah ayahmo giquriyamiya ham.

²⁵ Ne gilikmanib nog diq inmo ahol anan anad meqniysa in ahol moqdaqta akaman na ulum riyawuneq asitmo a ta osdaq? ham. Na haiqgam ham. ²⁶ Ne nagah amik diqta na a hi em daqayta iyan nagaqgo ne nagah aseseqta na ginan ginad meqniyaq? ham. ²⁷ Ne mazrewrew kabiyyabta na anadin emiy ham. In aholyon kabiyy araq a hi emaqta ham. Ad in aholyon tubusan a hi initaqtamo ham. Teq ya ne gibilenaiq ham. Kwaziqmo Isrel gigo king Solomon in ago balaw dimdimunta aholib emyaqta ham. Ta teq in ago balaw araq dimun diqta mazrewrew nogta haiqgam ham.

²⁸ Mazrewrew na muran usid babeq mataw ureoteq faqab ginuwid gwaldaq ham. Teq God nagah samanta na dimun diqmo balaw tonaqta ham. Nazaq iyan in ne tubusan tinegdaqmo ham. On mataw ham ne ginad God anan helmo haqayta na in amik diq ham. Ne ginad em hasiy ham. ²⁹ Ginad em haseq ne nagah neq daqayta na teq ne nagah uluw daqayta na ago ne gituw bulad hi luwiy ham. Ad negmo gihol anan ginad hi meqniyan ham. ³⁰ Og kab on mataw en bunmo in nagah osgota na waqgo giholtuw bulad luwayta ham. Teq ne nagah osgota na a hi waqeq ne meqin os daqayta na ago ne Gimam Iyahta na tuhuritta ham. ³¹ Nazaq iyan ne og ka ago nagah na waqgo gituw hi buliy ham. Hajq ham. Ne God ago maror aduganib gwahtiqaq giholtuw bulad luwiy ham. Ne nazaq emsa teq God nagah osgota na bunmo inaqmo tinegdaq ham.

*Mataw Heven ago nagah dimunta gi-holyon humab emgo Yesus bilam
(Matyu 6.19-21)*

³² Haqad Yesus bilam, Ne mataw zaway hajqta ne hi rabiy ham. Ne Gimam anad bilaqan in ne giqeman ne in ago maror aduganib tugwahtiqaq ham. ³³ Nazaq iyan ne gigo nagah bunmo gizayeq amenin waqad teq ne mataw gina hajqta nagan negiy ham. Negeq teq ne mani aziyan a hi tartaydaqta araq ne giholyon nayiy ham. Nayeq teq ziy nab ne giholyon nagah dimdimunta Heven-ib tuteqmo usdaqta na tuwal emid usan ham. Uliq nab mataw nagah rin tonayta a hi luwayta ham. Sa bidbid nagah a hi meqin tonaytamo ham. ³⁴ Ne ginad emiy ham. Uliq edob ne gigo nagah dimdimunta usdaqta nabmo teq ne ginad ayahmo tuqusdaqmo ham.

Kabibiy mataw dimunta gigo gamuk awowun

(Matyu 24.42-44)

³⁵ Ne gihol wastitayeq lam miderid oysa ne saw waqad osiy ham. ³⁶ Bilaqne kabibiy mataw gigo ayahta an waq ahumabun araqab oseq bolsa in amen emayta nazaq nogmo ne osiy ham. Kabibiy mataw na saw woltayad ossa in gigo ayahta na bo dan ez wolhamsamo in hidmo era ayon dan tihas daqayta ham. ³⁷ Kabibiy mataw na gime a hi rursa in saw waqad ossa in gigo ayahta na boleq nazaq gibiyid kabibiy mataw na tidimniyeq os daqay ham. Ya ne helmo gibilenaq ham. Mat ayahta na ahol wazid woqsa in ago kabibiy mataw na gigo kabibiy mat nog tiquyidaq ham. Iyeq in ago kabibiy mataw na giqemid banab ossa teq in gimen didaq a bo negid in tineq daqay ham. ³⁸ Mat ayahta na tarom alihanib o tarommo saw tihaustaynan tonsa in boleq ago kabibiy mataw na a hi usad saw waqad ossa in gibiyid, kabibiy mataw na tidimniyeq os daqay ham.

³⁹ Ari ne gamuk ka huriteq teq ne ginad em hasiy ham. Bit anamren in mat rin tonaqta naga kamnib boldaqta na ago huritad teq mat rin tonaqta na bo ago bit wolzilayeq a hi gwahtiqaq ham. ⁴⁰ Ad nazaqmo ne saw waqad osiy ham. Ne bilaq daqay, Mat Atatin a hi boldaq haq daqayta nabmo diq in bo tugwahtiqaq ham.

Kabibiy mat dimunta teq kabibiy mat meqinta gigo gamuk awowun

(Matyu 24.45-51)

⁴¹ Haqan Pita bilam, Iyahta ham gamuk awowun na ni i disaipel gimomo gibile-naq o haiq ni mataw bunmo gibilenaq? ham. ⁴² Haqan Iyahta bilam, Naga matin in kabibiy mat dimunta nog? ham. Kabibiy mat dimunta in anad em hasad ago ayahta aqez muzinaqta ham. Aqez muzinad in kabibiy mataw bunmo giwamuzad didaq neq akamnib in didaq negaqla ham. ⁴³ Abeb ago ayahta boleq in kwaziqmo bilamta nazaqmo ago kabibiy mat na emsa in ahol waqsa in ago kabibiy mat na tidimniyeq osdaq ham. ⁴⁴ Ya helmo ne gibilenaq ham. Mat ayahta na in ago kabibiy mat dimunta na emid in ago nagah bunmo tigiwamuzdaq ham.

⁴⁵ Ari luweq kabibiy mat na ahol buloneq bilaqdaq, Yaggo ayahta lehim sisagmo luwad in hidmo a hi boldaq haqdaq ham. Haqad in kabibiy on mataw ta asor giwamuzaqta na haresmo tiginoldaq ham. Ad in didaq neqad yuw uluwad ahol agadan iysa osdaq ham. ⁴⁶ In nazaq emad ossamo ago ayahta bolsa in a hi huritdaq ham. Ad in ahol asawan a hi wastitaydaq ham. Sa mat ayahta na boleq in kabibiy mat na wazeq

woltitayeq teq in mataw nan a hi huritayta na gigo sawab hunegid wo tilehdaq ham.

⁴⁷ Haqad Yesus bilam, Kabibiy mat araq in ago ayahta anad huritdaqta ham. Huritad teq in ahol a hi wastitayad ago ayahta anad na a hi muzdaq ham. Abeb ago ayahta na in ago mataw gibilenid in kabibiy mat meqinta na woltitay naqmo diq hiqiqi daqay ham. ⁴⁸ Ari kabibiy mat ta araq in ago ayahta anad a hi huritdaqta ham. Ad teq in daq a hi em nagta tiqemdaq ham. Abeb mataw in kabibiy mat na asitmoqmo wol daqay ham. Ari mataw God ago hib nagah kabemmo tuwaqiyta na God in gigo hib amenin ayahmo waqdaqta ham. Ad God in mataw gibenab kabiy ayahmo amta na gibilenid in amenin emad in nagah asor bunda amalib emeq tuqug daqaymo ham.

Yesus on mataw gihuernan bol

(Matyu 10.34-36)

⁴⁹ Ari Yesus bilam, Ya og kab faq araq ayahta ulamnan haqad bol ham. Ad ya inad emaiq faq na tekomo tigeraq nagta haqaiq ham. ⁵⁰ Teq haiq ham. Santitiy araq ayahta ya tiqiqisih bugid teq faq na tiqeraqdaq ham. Sa muran ya santitiy na a hi loyinadmo ihol afaqan diq tiquyiq ham. ⁵¹ Ne ginad emay ya og kab on mataw bunmo giqemid zib alowab osgo haqad ya bolta haqay ye? ham. Haiqgani ham. Ya ne gibilenaq ham. Ya on mataw gihuernan bol ham. ⁵² Abeb on mataw abaynagin in bit araqab osad teq in gihol husereq dahu gigermo iy daqay ham. Iyeq mataw ezeqman na ya inan helmo haqsa mataw giger na in haiq ham. Nazaq iyid teq in an gihar tuqug daqay ham. ⁵³ In nazaq emad,

Onmin matmatta in gimaman gihar negsa gimaman in gitatniz gihar neg daqaymo ham.

Ad nazaqmo onmin onqonta in ginenan gihar negsa ginenan in gimigniz gihar neg daqaymo ham.

Sa on in gidugniz ginenan gihar negsa gidugniz ginenan in gilenan na gihar neg daqaymo ham.

Nagah teq gwahtiqaqta na ago hurit kemo adan

(Matyu 16.2-3)

⁵⁴ Ad Yesus in on mataw dahu biyatha na gibilenil bilam, Zeq wolehaqta ban kait dub iyeq bolsa ne ahol waqad bilaqay, Ka urom tuwoqdaq haqayta ham. An helmo urom woqqaqta ham. ⁵⁵ Ad tim ayahta sibim bolsa ne ahol waqad bilaqay, Ka zeq afan meqin diq iyaqdaq haqayta ham. An helmo in nazaqmo iyaqta ham. ⁵⁶ Ne mataw gimileq meqinta ham. Ne og kait inaq giwaqan ahol waqad nagah teq gwahtiqaqta na ago ne ginad em hasayta ham. Ari nagaqgo

muran kam kab nagah ne gimeb gwahtiqa
ne ahol waqad ginad a hi em hasay? ham.

*Yesus an anobun wastitay ago bilam
(Matyu 5.25-26)*

⁵⁷ Nagaqgo ne ginad a hi em hasad daq dimunta teq daq meqinta na a hi gilum kemay? ham. ⁵⁸ Mat araq ni niqad hazizirib leheq nan nignan tonsa ni inaq danib lehad hidmo gamuk na wastitayiham. Luweq in nihureqeq niqad le megistret ameb gwatiqdaq ham. Gwahtiqid megistret niwaqeq hurmey gibenab niqemid hurmey niwazeq bit giqirquran osaytab nihuneg daqay ham. ⁵⁹ Ya ni nibilenaiq ham. Ni bit na hidmo a hi hulosdaq ham. Ni bit nab osad ningo daq meqinta amenin zay bugeq teq ni asanib gwahtiqaq ham.

13

Yesus bilam, Ne gigo daq meqinta gileh a hi ugeq ne tumoq has daqay ham

¹ Ari kam nabmo mataw asor osim Yesus buloniy, Mataw Galiliy-ibta asor God amen tamaz emad ossa Pilat ago mataw gieman lehim in mataw na ginol em bugiy haqiy. Ginol em bugan mataw na ginedan woqim karuw tamaz emnan haqad anat urotiyya na anedan inaq wastonim tamaz em abanab gicus haqiy. ² In nazaq haqan Yesus amenin emim gibilan, Luweq ne ginad em daqay. Mataw ginol emiyta na gigo daq meqinta in Galiliy-ib on mataw bunmo gigo daq meqinta giquriyaman iyan in moqiy haq daqay ham. ³ Haiqmo diq ham. Ari ya helmo gibilenaiq ham. Ne gigo daq meqinta giholib usaqta na ne gileh a hi ugeq ne bunmo nazaqmo tumoq daqaymo ham.

⁴ Haqad in bilam, Kwaziqmo uliq Jerusalem-ub yuw akurorqanta anan Silowam haqayta nab bit araq ayahta sisqomo gwalalha na woqim mataw 18 nazaq giqisihan moqiy ham. Ne luweq ginad em daqay. Mataw moqiyta na gigo daq meqinta in Jerusalem-ub on mataw bunmo gigo daq meqinta giquriyaman iyan in moqiy haq daqay ham. ⁵ Haiqgam ham. Ya helmo gibilenaiq ham. Ne gigo daq meqinta giholib usaqta na ne gileh a hi ugeq ne bunmo nazaqmo tumoq daqaymo ham.

Ay anon a hi emaqta ago gamuk awowun

⁶ Haqad Yesus gamuk awowun araq kazaq gibilan, Mat araq ay fik amagin araq ago wain akabiynib tilay ham. Leyim abeb in bolim ay fik na anon araq a hi ussa ahol wam ham. ⁷ Ad in ago mat kabiya wamuzaqta na bulon, Ni hurit haqad in bilam ham. Ya ay fik ka leyan in ulig ezeqmanmo titur

haqad in bilam ham. Tursa ya bo anon anan saw waqaiqta teq in anon araq diq a hi emaq haqad in bilam ham. Ni qwayid woqan haqad in bilam ham. ⁸ Haqan kabibiy mat na bilam, Iyahta ham i ay ka hulosid in ulig kab a ta turan haqad in bilam ham. Tursa ya abegarib og tayeq bulmakau abekoq tiqemdaiq haqad in bilam ham. ⁹ Luweq ulig araq kob teq in anon emdaqta hi waqan us haqad in bilam ham. Ari ulig nab in anon a hi emsa teq ya tuqwaydaiq haqad in bilam ham.

Juda gigo lotu akamnib Yesus aw araq wastitayan dimniy

¹⁰ Ari Juda gigo lotu akaman araqab Yesus Juda gigo bit humab wolaytab on mataw sulek tinegyaq. ¹¹ Suleq negsamo aw araq bit nab bo tugwahtim. Aw na aholib bugaw meqinta usad ulig 18 nazaq in moq ugad usyaqta. Ussa aw na kor toneq luwad in akorkoran itiwuneq titnoneq turgo hiqiyqa. ¹² Sa Yesus aw na ahol waqad bulonan agerab bolan in bulon, Neng ham ya niholib moq usta na waleman tihiqiy ham. Muran ni samanmo titnoneqmo tiluwdaq ham. ¹³ Haqad in aben aw na aholib emim wazan hid naqmo in titnonimmo titur. Turad in God abin tiqiluwyaq.

¹⁴ Yesus aw na eman dimniyta na in lotu akamnib daq na amta. Nazaq iyan bit humab wolayta ago danmebta na in Yesus anan agem timeqniy. Agem meqniysa in on mataw gibilan, I kabiya emgo kam 6 nazaq usaqta ham. Kam nab teq ne gigo moq wastitaynan boliy ham. Ari lotu akamnib ne gigo moq walemanhi boliy ham.

¹⁵ Haqan Iyahta amenin emim bulon, Ne mataw gimiqliq meqinta ham. Lotu akamnib ne bunmo lehim ne gigo bulmakau teq donki giqirquran gibitnib turayta na giqamun hasim giqad lehan in yuw uluwayta ham. ¹⁶ Aw ka in Abraham asenlilibta ham. Teq Satan sisaq diqmo ulig 18 nazaq in irquran osta ham. Ta nagaqgo ya lotu akamnib in aqamun na a hi hasdaiqmo? ham. ¹⁷ Yesus nazaq ago bab gabin wazan woqan in gimebay tuwom. Gimebay woqsa on mataw dahu biyatha na bunmo in daq dimdimunta Yesus emyaqta na ahol waqad in ginad tidimniy yaqay.

*Ay mastet anagin ago gamuk awowun
(Matyu 13.31-32; Mak 4.30-32)*

¹⁸ Haqad Yesus ta gibilan, God ago maror in naga diq nog? ham. Ya naga diq atowun emeq bilaqid teq ne ginad em has daqay? ham. ¹⁹ God ago maror in bilaqne ay mastet anagin amik diqta amulikmo mat araq ago kabiya layta na nog ham. Leyan in gwalim ay nog iyim ayah tiqiy bug ham.

An teq ah bolim giholyon rir emim tuqos yaqay ham.

*Yis ago gamuk awowun
(Matyu 13.33)*

²⁰ Haqad Yesus ta bilam, Ya God ago maror atowun emnan haqad ya naga diq atowun emeq bilaqid teq ne ginad tiqem has daqay? ham. ²¹ God ago maror in bilaqne yis nogta ham. Aw araq yis na waqim mel deg ezeqman nazaq inaq buliyan yis ulilemim ussa mel na bunmo huhuw tinam ham.

*Ne dan ez amikta nab le gwahtiqaq
(Matyu 7.13-14; 7.21-23)*

²² Ari Yesus uliq Jerusalem-ub wolehadmo in uliq aseseqta teq uliqben amikmikta nagab on mataw suleq negim negim tilehyaq. ²³⁻²⁴ Lehad luwsa mat araq Yesus tisusumun ug, Iyahta ham ni ya ibilen kem ham. God teq mataw amulik-mulikmo giqemid ago maror aduganib gwahtiqaq daqay o haiq in mataw kabemmo giqemid gwahtiqaq daqay? ham. Haqan Yesus mataw nab turiyta na bunmo gibilan, Ne zaway diq iyeq dan ez amikta nabmo le gwahtiqaq ham. Mataw kabemmo dan ez amikta nab le gwahtiqaq yo hiqiyyata ham.

²⁵ Abeb bit anamren eraeqq bit ago dan ez amikta na tuqotdaq ham. Otid teq ne boleq dan ezab turad dan ez wol hamad ne kazaq bilaq daqay ham. Iyahta haq daqay ni i giyon dan has haqad ne bilaq daqay ham. Haqid in ne gigo gamuk amenin emeq kazaq gibilendaq ham. Ne mataw edob boliya na ya a hi huriit haqdaq ham.

²⁶ Haqid ne tubulon daqay ham. Haiq haq daqay ham. I ni ninaq didaq neqad yuw uluwad osta haq daqay ham. Teq ni i gigo uliqab bolim suleq igtah daqay ham. ²⁷ Haqid in ne a ta gibilendaq ham. Haiq haqdaq ham. Ne edob diq boliya na ya a hi huriit haqdaq ham. Ne mataw daq meqin emayta ne bunmo kozaq lehiy haqdaq ham. ²⁸ Ad in ne gimuzid ne le in ago maror asan ban gwahtiqaq tuqos daqay ham. Osad ne Abraham teq Aisak teq Jekob teq God ago nantut bunmo in God ago maror aduganib ossa ne tigibiy daqay ham. Gibiyad ne ginad meqniysa gaqad gite guruwad tuqos daqay ham. ²⁹ Teq og saw bunmo gigo on mataw amo amo kabemmo boleq God ago maror aduganib didaq neqad tuqos daqay ham. ³⁰ Nazaq iyan ne ginad em hasiy ham. Mataw kabemmo og kab gibin haiqmo osayta na in le danmeh tiqiy daqay ham. Sa mataw og kab gibin inaqla nagan gibin hiqiysa in abeb tiqiy daqay ham.

*Yesus uliq Jerusalem anan anad meqniy
(Matyu 23.37-39)*

³¹ Ari kam nabmo diq Farisi asor bolim Yesus buloni, Ni uliq ka huloseq saw araqab leh haqiy. Herot ninol emnan bilaqaq haqiy. ³² Haqan Yesus gibilan, Ne leheq gaun kwasikta na buloni ham. Ni huriit haqad buloni ham. Muran teq babeq ya bugaw meqinta gimuzad mataw gigo moq inaqla giwastitaysa dimniy daqay haqad ne buloni ham. Ad misireq ya igo kabiy tuwol hasdaiq haqad ne buloni ham. ³³ Ari ya kam ezeqman na aduganib dan ahulib Jerusalem-ub wolehad ya dimunmo tiluwdaq ham. Na ezaqgo God ago nantut saw haresmo a hi ginol emayta ham. In Jerusalem-ubmo ginol eman moqayta ham.

³⁴ Haqad Yesus bilam, O Jerusalem, Jerusalem ham. Ninga mataw God ago nantut ginol emayta ham. Ad ne God ago kabibiy mataw in gigeman ne gigo hib lehayta na gimalib gig hunegayta ham. Kam kabemmo ya ninga on mataw gituwal emnan inad bilamta ham. Bilaqne kurek anenqab aben gayik ahaqenib amidgotniz gituwal emim giqisihqaqta nazaq ham. Ta teq ne hulosiy ham. ³⁵ Nazaq iyan ne huriity ham. God ne gigo uliq hulosim tilah ham. Ya ne gibileniq ham. Ne ya a ta hi ibiy daqay ham. Ari ne ginad dimniysa bilaq daqay, Mat ka Iyahta abinib bolan i ginad bilaq gigayinaq haq daqayta kam nab teq ne ya a ta ibiy daqay ham.

14

Yesus mat araq ahol umta wastitayan dimniy

¹ Ari Juda gigo lotu akaman araqab Yesus in Farisi gigo danmehta araq ago bitab didaq neqnan tilah. Lehim ossa mataw gibin inaqla nagan in Yesus anonomo diq wirinad os yaqay. ² Sa mat araq ahol umta Yesus anognib os. ³ Ossa Yesus mat na ahol waqad in mataw Moses ago gunun huriit kemiya na giyogniz Farisi nenaq tisusumun nag, I gigo lotu akamnib i mat ago moq inaqla na wastitayid dimniyidaq o haiq? ham. I Juda gigo maror ezaq usaqta? ham. ⁴ Haqan mataw aseseqta na giqezmo hiqiym osiy. Nazaq iyan Yesus mat na wazim wastitayan ago moq dimniyan in eman tilah. ⁵ Mat na tilehsa teq Yesus mataw aseseqta na gibilan, Ne gilikmanib mat araq ago amun o ago bulmakau araq lotu akamnib yuw yayibtab woqid tobag mat na hidmo hureqid a hi gwaldagya ham. ⁶ Haqan mataw aseseqta na in Yesus ago gamuk na amenin araq a hi emiy.

Mat ahol wazid woqgo adan

⁷ Ari Yesus humab nab osad in mataw didaq neqnan boliya na gibilisa in ban uliliba nabmo osnan ginad bilaqyaq.

Nazaq iyan in gamuk awowun araq kazaq gibilan,⁸ Mat araq aw waqnan tonad in ni nibilenid ni ago humabub leheq itureqmo ni le ban ulilibtab hi os ham. Luweq humab na anamren mat ta araq in abin ni nibin uriyamta na lilewundaqmo ham.⁹ Nazaq iyid teq humab anamren ne giger glilievwunon bolitya na in ni nigerab boleq nibileneq bilaqdaq. Ningo ban dimunta na ni mat ayahta ka ug haqdaq ham. Id teq ni nimebay woqsa leheq ogib garuruhab tuqosdaq ham.¹⁰ Nazaq iyan mat araq nibilewunid ni didaq neqnan leheq ni le ogib garuruhabmo os ham. Ni nazaq emid teq humab na anamren boleq nibilendaq, Kadoy haqdaq ni bo leheq ban ulilibta kob os haqdaq ham. In nazaq nibilenid on mataw ninaq didaq neqad osyata na bunmo in ni nibin tiqiluw daqay ham.¹¹ On mataw in gimo gihol abin iluwayta na bunmo gibin tuwoqdaq ham. Sa on mataw gihol abin wazan woqaqta na gibin tiqeraqdaq ham.

¹² Haqad Yesus humab na anamren bulon, Ni humab araq a ta emnan haqad ni niyogniz teq nimaqbaban teq nisenlul teq ningo uliq araqibta gigo es kabemmo inaqtta na ni hi gililewun ham. Luweq abeb in ni nibilewunid ni le in gigo bitab didaq neqsa in ningodidaq neqiyta na amenin nig daqay ham. Nigid teq ni God ago hib amenin araq dimunta a ta hi waqdaq ham.¹³ Ni nazaq hi em ham. Ni humab araq tiqemnan haqad ni mataw ginaghan haiqta teq mataw gibensen ayqayta teq mataw gisen meqinta teq mataw gime haiqta naqmo gililewun ham.¹⁴ Ni nazaq tonid teq God tinidimun tondaq ham. Na ezaqgo ham mataw nazaqta na in ningodidaq amenin a hi em daqayta ham. Abeb God-mo teq ningodidaq dimunta na amenin tinigdaq ham, kam mataw dimdimunta hodhodab eraq daqayta nab ham.

Maror araq atatin aw waqnan tonsa ayon didaq ayahta oyta ago gamuk awowun (Matyu 22.1-10)

¹⁵ Ari mataw didaq neqad osiyta na gilikmanib mat araq gamuk na huritim in Jesus tubulon, On mataw God ago maror aduganib teq didaq neqad os daqayta na in muran tidimniyim osyata ham.¹⁶ Haqan Jesus bulon, Wagam araq kazaq lahta ham. Mat araq didaq ayahta oynan haqad mataw kabemmo gimen nan am ham.¹⁷ Nan eman teq abeb humab na ago kam diq tugwahtim ham. Gwahtiqan mat na in ago kabibiy mat bulonan in le mataw tanabmo gibilanta na a ta gibilan ham. Ne boluy haqad in bilam ham. Nagah bunmo neqgomo tiqiyim usaq haqad in bilam ham.¹⁸ Haqan mataw na bunmo gituw thihiyyiy

ham. Gituw hiqiysa araq bilam, Ya le og araq muturta zayta na ahol tuwaqnan ham. Nazaq iyan ya humab nab a hi lehdaiq haqad in bilam ham.¹⁹ Sa mat araq bilam, Ya bafalo 10 nazaqmo tigizay ham. Gizayim ya giqad leheq kabiyyah og tuwol waqnan ham. Nazaq iyan ya humab nab a hi lehdaiq haqad in bilam ham.²⁰ Sa mat araq bilam, Muran diq kawa ya aw tuway ham. Nazaq iyan ya humab nab a hi lehdaiq haqad in bilam ham.

²¹ Haqan kabibiy mat na muleqim lehim in ago ayahta nagah na bunmo ago tubulon bug ham. Bulon bugan bit anamren na agem meqniysa in ago kabibiy mat na bulon, Ni hidmo uliq aduganib kob ta leheq mataw ginaghan haiqta teq mataw gibensen kok tonta teq mataw gime haiqta teq mataw gisen meqinta edob edob osyata na ni giwaq buqe qyaqgo bit aduganib giqad bol haqad in bilam ham.²² An abeb kabibiy mat na bolim bilam, Iyahta ham ya ni niqez na tumuz bug ham. Teq ban asor samanno usaq haqad in bilam ham.²³ Haqan mat ayahta na in kabibiy mat na bulon, Ni uliq asan ban leheq dante haresmo saw waq ham. Saw waqe q ni mataw gibiyad gibe yahed gihureeqeq giqad bo gwahtiq haqad in bilam ham. Gwahitiqid yaqgo bitab mataw ban waqmo bugiy haqad in bilam ham.²⁴ Ya nibilenaq ham. Ya mataw mebmebmo gililewunan a hi bolitya na gigo araq diq in yaqgo didaq aneglan asit a hi neq waq daqay haqad in bilam ham.

Mat anad em haseq teq in bo Yesus asen muzan

(Matyu 10.37-38)

²⁵⁻²⁶ Ari on mataw dauh biyahmo Yesus muzim inaq tileh yaqay. Lehsa Yesus ahol bulyim gibilan, Mat nog ya imuzeq bolnan haqad in yaqmo imomo inan anad ayahmo bilaqan ham. Ari mat in anenmaman teq ago aw amun teq amaqbaban teq ahiyan ginadin emad teq inmo ahol anadin diq emaqta, mat naqanta in yaqgo disaipel a hi iydaq ham. Na ezaqgo in ya iqeman ya abeb iyaiq na ago ham.²⁷ Teq mat in ago kruse sorim ya imuzim a hi bolaqta na in yaqgo disaipel a hi iydaqmo ham.

²⁸ Ne ginad emiy ham. Ne gilikmanib mat araq bit tuwaznan haqad itureqmo in osad ago mani tinulindaq ham. Luweq ago mani siqim iyid in bit a hi waz bugdaq haqad ham.²⁹ Ari mat na anad a hi em haseq in bit ago tituq teq kalik emeqmo tuhulosdaq ham. Huloseq in bit na a ta hi waz bugdaq ham. Sa mataw bunmo ahol waqad in mat na tibilawun daqay ham.³⁰ Ad in bilaq daqay, Mat kaqmo atuw haiqta haq daqay

ham. In bit wazan eramta teq in a ta hi em bug haq daqay ham.

³¹ Teq king araq in le king ta araq inaq bab tiqemnan haqad itureqmo in osad anad ulumad tuqosdaq ham. Osad in anad emeq bilaqdaq, Yaqgo mataw bab emayta na in 10 tausen nazaq haqdaq ham. Ta yaqgo bab ko in ya iquriyamim in ago bab mataw 20 tausen nazaq haqdaq ham. Ya maror ko ago dauh nenaq bab emeq tiginol bugdaq o haiq? haqdaq ham. ³² Haqad in ago zaway loyinsa biyab a hi iyid in ago bab na danib pesanmo bolsa in amen gamuk emid ameb lehid in bulondaq, Bab o tob iyan haqdaq ham. Ya ezaq tonid teq bab ka hiqiysi a zib alowab osam? haqdaq ham.

³³ Ad Yesus bilam, Na nazaqmo ham. Ne gigo nagah bunmo gileh a hi ugeq ne yaqgo disaipel a hi iy daqay ham.

*Kamis agon hiqiya ago gamuk awowun
(Matyu 5.13; Mak 9.50)*

³⁴ Kamis in nagah araq dimunta ham. Teq in agon tihiqiyyid i ezaq tonid teq kamis na agon inaq ta iydaq? ham. ³⁵ Kamis agon hiqiya na akabiyan haiqta ham. I kabiyan hunegid in didaq emid anonon a hi gwaldaq ham. Ad i bulmakau abekoq inaq biliyeq ay abeqarib emid in ay na emid anon a hi emdaqmo ham. Kamis nazaqta akabiyan haiqta na i hunegan lehaqta ham. Mat aw nog in gidek nan huriitgo usaqta na in gamuk ka huriit kemiy ham.

15

*Sipsip araq nabag lahta ago gamuk awowun
(Matyu 18.12-14)*

¹ Ari kam ta araqab mataw takis waqayta na teq mataw daq meqinta emayta na kabemmo in Yesus ago gamuk huriitnan haqad agerab tubol yaqay. ² Bolsa Farisi giyogniz mataw Moses ago gunun huriit kemiyyta na nenaq in nazaq gibiyad in Yesus wadad anan bilaq yaqay, Mat ko in mataw daq meqinta emayta kogan agem dimunta negad nenaq didaq neqaqta haq yaqay.

³ In nazaq haqsa Yesus gamuk awowun araq kazaq gibilan, ⁴ Ne gilikmanib mat araq in ago sipsip 100 nazaq giwamuzad luwsa ta araq nabag lehid teq mat na le a hi nagundaq e? ham. Haiq ham. In ago sipsip 99 na gihulosid nab tursa in sipsip amulikmo nabag lahta na naguneq tilehdag ham. Nagunad luweq le in ahol tuwaqdaq ham. ⁵ Ahol waqad in waqeq abetarib emeq in anad dimniyya soreq ad tuboldaq ham. ⁶ A boleq in ayogniz bunmo gibilenid bo humab woleq ossa teq in gibilendaq, Yaqgo sipsip araq nabag lehan ya nagunim le tuway haqdaq ham. Ne bolid ya nenaq ginad dimniyya osuq haqdaq ham.

⁷ Teq ya ne gibileniq ham. Daq nazaq Heven-ib usaqtamo haqaiq ham. Mat daq meqinta emad luwaqta amulikmoqmo in anad buliyeq ago daq meqinta na gileh ugsa Heven-ib God ago dauh nenaq in mat na anan ginad ayahmo dimniyyata ham. Ari on mataw kabemmo ginad emay, I giholih daq araq meqinta i gileh ugamtai haiqgam haqayta na God ago dauh nenaq in mataw kabemmota na ginan ginad a hi dimniyyata ham.

Mani nabag lahta ago gamuk awowun

⁸ Ari ne gilikmanib aw araq ago mani silva 10 nazaq usid in araq nabag huneqe teq in a hi nagundaq e? ham. Haiq ham. Aw na lam midereq in ago bitab saw wolrironad mani na nagunad luweq le in ahol tuwaqdaq ham. ⁹ Ahol waqeq in ayogniz teq in ago uliq araqibta bunmo gibilenid bo humab woleq ossa teq in gibilendaq, Yaqgo mani araq nabag tuhuneg hayta na ya nagunim le ahol tuway haqdaq ham. Ne bolid ya nenaq ginad dimniyya osuq haqdaq ham.

¹⁰ Teq ya ne gibileniq ham. Daq nazaq Heven-ib usaqtamo haqaiq ham. Mat daq meqinta emad luwaqta amulikmoqmo in anad buliyeq ago daq meqinta na gileh ugsa Heven-ib God ago angelo in mat na anan ginad ayahmo dimniyyata ham.

Amun minminta amam hulosim lahta na ago gamuk awowun

¹¹ Haqad Yesus bilam, Mat araq atatniz giger nenaq tuqosiy ham. ¹² Osad atatin araq amikta na in amam bulon, Kabay ham abeb ni tumoqid ya ning nagah asor ya ibab inaq waqamta na muranmo ni yaqmenta na yag ham. Haqan amam in ago nagah bunmo huserim atatniz giger na tinag ham. ¹³ Negan sisqaq haiq atatin amikta na in ago nagah bunmo giwaqim a lehim saw araq pesantab tuqos ham. Osad in daq haresmo emad ago mani haresmo tuhunegyaq ham.

¹⁴ In nazaq emad luwsa ago nagah bunmo tihiqiy bug ham. Hiqiy bugan teq zarow ayahta saw nab tugwahtim ham. Gwahtiqan in aholib nagah araq diq haiqgam iyan in agemnan tumoqyaq ham. ¹⁵ Nazaq iyan in lehim mat araq saw nabta ago hib kabiya wam ham. Waqan kabiya anamren mat na eman lehim in ago bul gelibta giwamuzad osyaq ham. ¹⁶ Osad in agem moqsa anad tiqemyaq, Bul itez neqayta ko asor ya neq nagta hagyaq ham. Haqsa teq haiq ham. Mat araq in ulumsiheq didaq araq a hi ugyaq ham.

¹⁷ In nazaq meqin diq osad anad emwirad osim teq in tibilam, Ya imamgo kabibiy mataw gigo didaq kabemmo iysa in a hi neq bugayta haqad in bilam ham. Sa

ya kab osad igemnan tumoqaiq haqad in bilam ham.¹⁸ Nab iysa ya eraqeç muleqeç imam ago hib ta lehdaiq haqad in bilam ham. Leheq ya imam bulondaiq. Kabay haqdaiq ya daq meqinta ningo hib emim ya God ago hib em tonmo haqdaiq haqad in bilam ham.¹⁹ Ya ning amun dimunta a hαιq haqdaiq haqad in bilam ham. Muran ni ya inan 'yaqgo amun' haqad ta hi bilaq haqdaiq haqad in bilam ham. Ni ya iqemid ya ningo kabiliby matmo araq iyiq haqdaiq haqad in bilam ham.

²⁰ Haqad in eraqim amam ago hib muleqim ta lah ham. Lehsa amam osim atatin pesanmo danib bolsa in ame le ahol tuwam ham. Ahol waqad in ago amun anan anad ayahmo diq meqniysi in sibim lehim atatin wazim ay netim tiqilawun ham.²¹ Flawunan ago amun na bilam, Kabay ham ya daq meqinta ningo hib emim ya God ago hib em tonmo haqad in bilam ham. Ya ning amun dimunta a hαιq haqad in bilam ham. Muran ni ya inan 'yaqgo amun' haqad ta hi bilaq haqad in bilam ham.

²² Haqan haiqgam ham. Amam era ago kabiliby mataw gibilenim bilam, Ne yaqgo tubusan dimun diqta naqmo waq a boleq ya itatin ka ayon wel ugiy haqad in bilam ham. Ad ring araq aben akurganib em ugad teq gisendugan asenab em uyigimo haqad in bilam ham.²³ Em ugeq teq ne le bulmakau amidon anom ayahta naqmo waq a boleq wol emeq oyiy haqad in bilam ham. Oyid i inaq neqad ginad dimniysi osuq haqad in bilam ham.²⁴ Na ezaqgo ham yaqgo amun ka tumomta teq muran in kayeq ta iy haqad in bilam ham. In nabag tilhaq teq muran i ahol a ta waqauq haqad in bilam ham. Haqad in atatin na ayon humab ayahta tiqemiy ham.

²⁵ In humab emim ossa mat na atatin ayahta na kabiyy luwim tubol ham. Bolim bit agerab tugwahtiqadmo in mataw itiy wolad dorsa gihulan tuhurit ham.²⁶ Huritad in kabiliby mat araq bulonan bolan tisusumun ug ham. Ko ezaq tonay? haqad in bilam ham.²⁷ Haqan kabiliby mat na bulon, Ni nimikqan muleqim tubol haqad in bulon ham. Bolan ni nimam bulmakau amidon anom ayahta na wol emim oy haqad in bilam ham. Na ezaqgo ham in ago amun nabag lahta na in a ta wam haqad in bilam ham. Waqan in ago amun na afaqan araq a hi waqim in dimunmo osaq haqad in bilam ham.

²⁸ Kabiliby mat nazaq haqan atatin aqenta na agem timeqniy ham. Agem meqniysi in bit aduganib lo gwahtiqtan atuw tihiqiy ham. Atuw hiqiysi in bit asan ban tursa amam asanib gwahtiqtan anad waqad gamuk dimunta tubulonyaq ham.²⁹ Bulonsa in amam ago gamuk amenin

emim bilam, Ulig kabemmo ya iholtuw bulad ningo kabiib emad teq ya amenin araq ahol a hi way haqad in bilam ham. Ya kam araq diq niqez a hi othasta haqad in bilam ham. Ta teq ni memeq amidon araq diq yagan yaqmo igo kadoyniz nenaq oyim humab wolim i ginad dimniya a hi os haqad in bilam ham.³⁰ Ari ningo amun na in ningo nagah bunmo on danatabta gigo hib huneg bugim tihiqiy in muleqim ta bolan ni ninad ugad bulmakau amidon anon ayahta na tuwol em ug haqad in bilam ham.

³¹ Haqan amam bulon, Ya itatin ham tutimmo i giger araqibmo osauqta haqad in bilam ham. Ad yaqgo nagah bunmo in ningota haqad in bilam ham.³² Teq muran i humab woleq ginad dimniysi tuqosamta haqad in bilam ham. Na ezaqgo ham ni nima ka tumomta teq in kayeq ta iy haqad in bilam ham. I bilaw in nabag tilah hawta teq in muleqim ta bolan i ahol a ta waqauq haqad in bilam ham.

16

Kabiliby mat kabiyy meqin amta na ago gamuk awowun

¹ Ari Yesus in ago disaipel gibilan, Mat araq ago es nagah kabemmeta in os ham. Ossa in ago kabiliby mat gibunibta araq ago kabiliby mataw giwamuzyaqta na in osmo ham. Ossa mataw asor bolim mat ayahta na tubulonyi ham. Ningo kabiliby mat gibunibta na in ningo nagah abu ulumaq hagiq ham.² Haqan mat ayahta na in ago kabiliby mat gibunibta na lifewunan agerab bolan in bulon, Ya nibin huritta na alulin in ezaq diq? haqad in bulon ham. Ni leheq yaqgo nagah bunmo nibenab usaqta na mar ton bug haqad in bilam ham. Mat ni yaqgo kabiib a ta hi wamuzdaq haqad in bilam ham. Ya ning kabiib na nibenab tuwalemaiq haqad in bilam ham.

³ In nazaq haqan kabiliby mat gibunibta na anadibmo bilam, Yaqgo ayahta kabiyyab ya tiqimuzaq haqad in bilam ham. Ya teq ezaq tondaiq? haqad in bilam ham. Ya kabiib afaqanta emgo igo zaway haiqgam haqad in bilam ham. Ad ya didaqnan sunnan imebay woqaq haqad in bilam ham.

⁴ In anad nazaq emwirad osim teq in bilam, Ari ya inad tiqem haqad in bilam ham. Ya iholyon dante wastitayid teq yaqgo ayahta imuzid mataw asor gigem dimunta yagad in gigo bitab iqad tileh daqay haqad in bilam ham.

⁵⁻⁶ Nazaq haqad in mataw in ago ayahta ago hib nagah waqan amenin in gigo hib usaqta na amulik-mulikmo gililewunan tubol yaqay ham. Bolsa mat araq ameb bolan in tisusumun ug, Ni yaqgo ayahta ago

nagah wamta na amenin ganim diq ningohib usaq? haqad in bilam ham. Haqan mat na bilam, Masil arebnaq aseseq diqta na 100 nazaq usaqta haqad in bilam ham. Haqan kabibiy mat gibunibta na bulon, Ni nagah wamta ago sansandek waqeek hidmo 100 na suholeq abanab ni 50 nazaqmo mar ton haqad in bilam ham.

⁷ An abeb mat ta araq bolan in susumun ug, Ni nagah wamta na amenin ganim ningohib usaq? haqad in bilam ham. Haqan mat na bilam, Wit azinyaq 100 nazaq usaqta haqad in bilam ham. An kabibiy mat gibunibta na bulon, Ni nagah wamta ago sansandek waqeek 100 na suholeq 80 nazaqmo ni mar ton haqad in bilam ham.

⁸ Ari abeb mat ayahta na in daq na ago tuhuritim in ago kabibiy mat amileq meqinta na abin tiqiluw ham. Na ezaqgo kabibiy mat na anad emim aholyon dante dimunta wastitayta na ago ham.

Haqad Yesus bilam, Mataw og ka ago daq muzinayta na in on mataw God ago saw anuwanib osayta na giquriyamad in giyogniz nenaq gihol adanteqin anononmo wastitayta ham. ⁹ Nazaq iyan ya ne gibilenaiq ham. Ne og ka ago mani-ta amalib on mataw asor giqemsa in ne giyognizmo diq iyih ham. Iyid teq abeb mani wazgo akaman hiqiyid ne giyogniz na in gigem dimunta negsa ne nenaq dimunumo kuluwa-kuluwmo tuqos daqay ham.

¹⁰ Mat nagah amikmikta anononmo wamuzaqta na in nagah aseseqta anononmo tuwamuzdaqmo ham. Ari mat nagah amikta akabiy ananonmo a hi emaqta na in nagah ayahta akabiy ananonmo a hi emdaqmo ham. ¹¹ Ne og ka ago mani anonon a hi wamuzid ta nog in nagah helta negid ne wamuz daqay? ham. ¹² Ad ne mat araq ago nagah anonon a hi wamuzid ta nog in nagah araq negid ne gigo diq iydaq? ham.

¹³ Kabibiy mat araq in mataw aseseqta giger giqez a hi muzdqaqta ham. In nazaq tonad luweq in araq agem meqinta ugad araq in agem dimunta ugdaq ham. Teq in araq anadin diq emad araq in gileh ugdaq ham. Nazaq iyan ne mani anadin diq emad ne God aqez a hi muzin daqaymo ham.

¹⁴ Ari mataw ginan Farisi haqayta na in mani anan ginad diq bilaq yaqayta. Nazaq iyan in gamuk bunmo Yesus bilamta na huritim in Yesus tibilawun yaqay.

¹⁵ Bilawunsa Yesus gibilan, Ne mataw kat negad gimeb daq titnonta emsa in ne ginan mataw dimunta haqayta ham. Teq God ne gimugan tuhurit kamta ham. Og ka ago nagah on mataw anan diq moqayta na in God ameb bilaqne nagah lilihad ahuran meqin diq iyad usaqta nazaq nog ham.

*God ago maror Moses bilamta na le saman a hi iydad
(Matyu 11.12-13)*

¹⁶ Haqad Yesus ta bilam, God ago maror Moses mar tonta na teq God ago nantut gamuk bilaqiyta na in kwaziqmo usim bo Jon mataw huz negyaqta na ago kamubmo iy ham. Teq Jon ago kamub iyim bo muran kawa ya God ago maror agamukan dimunta bilaqsa on mataw tuhuritay ham. Huritad in God ago gamuk kwaziqta na anadin a ta hi emad in bunmo God ago maror aduganib ginadibmo gwahtiqliqo giwaz diq timeqniyay ham. ¹⁷ Teq ya kazaq ne gibilenaiq ham. Kait og inaq anadibmo tihiqiyadaq e? ham. Haiggam ham. Ad nazaqmo God ago maror Moses mar tonta na ago asit diq araq samanta iyeq a hikidik usdaqmo ham.

*Yesus on mataw an tuwaqim teq an ta hulosayta na ginan bilam
(Matyu 5.31-32; 19.9; Mak 10.11-12)*

¹⁸ Haqad Yesus bilam, Mat ago aw muzim aw ta araq muturta waqaqta na in bilaqne mat ta araq ago aw inaq luw nog iyaqta ham. Ad mat in aw araq kwaziqmo aduw muzan osta na waqeek na nazaqmo in bilaqne mat araq ago aw inaq luw nog iyaqtamo ham.

Mat araq ago nagah kabemmota na ayo Lazarus inaq giwagamun

¹⁹ Haqad Yesus bilam, Kwaziqmo mat araq ago nagah kabemmota in osyaq ham. Osad kam bunmo in tubusan dimdimunta kakaqta aholib emad in didaq dimdimunta neqyaqta ham. ²⁰ Sa in ago bit aqezab mat araq anaghan haiqta in osyaqmo ham. Mat na anan Lazarus ham. In ahol bunmo na asulanmo usyaqta ham. ²¹ Ad in agemnan moqad in mat anaghan inaqta na didaq neqsa didaq aneglan ban ahaqenib woqsa ahol waqad anad emyaq, Ya didaq aneglan na asor neq nagta haqyaq ham. In nazaq anad emad ossa teq gaun boleq asulan mideq yaqayta ham.

²² Ari mat anaghan haiqta na nazaq emad osimmo tumom ham. Moqan God ago angelo waqim a le Abraham aqerab eman tuqos ham. Ossa mat ago nagah kabemmota na inaqmo moqan titiyay toniy ham. ²³ Yay tonan in le mataw tumoqiyta gigo ban meqintab ahol titiysa osad in ame gwalehim Lazarus Abraham inaq pesanmo ossa tigibiy ham.

²⁴ Gibiyad in lileyim bilam, Ya imam Abraham ham ni ya inan ninad meqniyan haqad in bilam ham. Ninad meqniysa ni Lazarus emid boleq aben akurgan yuw ulum tureq in yuw asitmo ya imileqib emid muditinan haqad in bilam ham. Ya faq kab

santitiy ayahmo waqaiq haqad in bilam ham.

²⁵ Haqan Abraham bilam, Amun ham ni ogib kayeqmo osad ni nagah dimdimunta niholyon giwaq bugyaqta haqad in bilam ham. Giwaqsa Lazarus nagah meqeqinta waqyaqta haqad in bilam ham. Ari muran saw kab Lazarus anad dimniyasa ossa ta ni nab osad ni nihol titiysa osaqtta haqad in bilam ham. ²⁶ Teq nagah araqmo ham. Saw ni osaqtta na teq saw kawa i osaqtta ka gilikmanib akalhonan araq sisqta abe milhasta usaq haqad in bilam ham. Nazaq iyan mataw kab osayta ka in nab lehgo dan hajqgam haqad in bilam ham. Ad mataw nabta na in kab bolgo dan hajqmo haqad in bilam ham.

²⁷ Haqan mat na bilam, Ari ya imam ham nazaq iyan ni Lazarus emid muleqeq in ya imam ago uliqab ta lehan haqad in bilam ham. ²⁸ Leheq in ya imaqbaban abayganimmo osayta na gidek wazad gamuk awaz meqinta gibilenan haqad in bilam ham. Luweq in ginad a hi buliyeq in inaqmo saw santitiy ayahmo usaqta kab tubol daqaymo haqad in bilam ham.

²⁹ Haqan Abraham bilam, Ni nimaqbaban na in God ago maror Moses bilamta na teq God ago nantut gamuk mar toniyta na in wazaya haqad in bilam ham. In gamuk naqmo huriteq teq in ginad bulyiy haqad in bilam ham.

³⁰ Haqan mat na bilam, Ya imam Abraham ham na hajqgam iydaq ham. Ya imaqbaban gamuk na huritad anan helmo a hi haqayta haqad in bilam ham. Ari mat momta araq hodhodab eraqeq le gibilenid teq in ginad buliyeq gigo daq meqinta gileh tuqug daqay haqad in bilam ham.

³¹ Haqan Abraham bulon, Ni nimaqbaban Moses ago gamuk teq God ago nantut gigo gamuk na huritad anan helmo a hi haqeq in mat araq hodhodab eraqdaqta na ago gamuk anan helmo a hi haq daqaymo haqad in bilam ham.

17

Yesus daq hiiq mataw ginad helta meqin tonaqta na ginan bilam

(Matyu 18:6-9, 21-22; Mak 9:42)

¹ Ari Yesus ago disaipel gibilan, Daq hiiq on mataw ginad hureqsa in ginad helta hulosayta na teq gwahtiqdaqta ham. Teq on mataw daq hiiq nazaq em daqayta na timeqniy has daqay ham. ² Ya ne gibilenaiq ham. Mat naqanta in yaqgo onmin amikkimka no gigo araq* emid in anad ya inan helmo haqqaqta na hulosnan tonid mat na in yaqgo faq meqin diq tuwaqdaq ham. Na

in kwaziqmo gig araq ayahta anatgumnib am wazeq kamismeb huneg nagiyta ham. Hunegid mat na moqeq daq meqinta na a hi emeq in yaqgo faq meqin diqta na a hi waq nagta ham.

³ Haqad Yesus bilam, Ni nimaqbab araq daq meqinta emid ni wad ham. Wadsa in anad buliyeq ago daq meqinta na gileh ugid ni ago daq meqinta na walemad anadin ta hi em ham. ⁴ Ari ni nimaqbab na kam amulikmo aduganib ame 7 nazaq nimeqin tonad teq in ame 7 nazaq ningihib boleq ninaq an aben wazgo nibilensa ni hi hulos ham. Ni ago daq meqinta na bunmo walemad anadin ta hi em ham.

Ni God anan helmo haqgo adan

⁵ Ari disaipel in Iyatha bulonim bilaqiy, Ni i ginad God anan helmo haqauqta na emid ayahmo iyan haqiy. ⁶ Haqan Iyatha gibilan, Ne ginad helmo haqayta na in amik diq ay mastet anagin nog ussa teq ne ay araq buloneq bilaq daqay, Ni nibeqar teq nininin bummo titeqeq ad leheq kamismeb woq haqid in nazaqmo ne giqez na tumuzindaq ham.

Yesus kabibiy mat anad ezaq emad kabiymedaqta na ago bilam

⁷⁻⁸ Haqad Yesus bilam, Ne gilikmanib mat araq agó kabibiy mat in kabiyyab og wolad luweq o in sipsip giwamuzad luweq in muleqeq bitab ta bolid ago ayahta na buloneq bilaqdaq, Ni sibeqmo bo osad didaq neq nazaq in a hi bulondaq ham. Hikidik ham. Mat ayahta na in ago kabibiy mat na kazaq bulondaq ham. Ni yaqmen didaq oy haqdaq ham. Ad ni nihol wastitayeq ya ibaq tunsa ya didaq neqeq yuw uluwid teq ningo abeb neq haqdaq ham. ⁹ Ne ginad ezaq emay? ham. Kabibiy mat na in anamren aqez muz bugid anamren in abin tiqiluwdaq haqad ne ginad emay ye? ham. Hajqmo diq ham. ¹⁰ Ad ne nazaqmo God ne gibenab kabiyy amta na ne em bugeq teq ne ginad kazaq emiy ham. I kabiyy mataw gibin hajqta haqiy ham. I gigo kabiyy i emamta naqmo kawa i tiqem haqiy ham.

Yesus mataw 10 nazaq gigo moq lepra inaqta giwastitayan dimniyiy

¹¹ Ari Yesus uliq Jerusalem-ub wolehad luwim in saw giger Samariya teq Galiliy gilikmanib tugwahtim. ¹²⁻¹³ Gwahtiqim in danib lehad luwim le uliq araqab tugwah-tiqanmo mataw 10 nazaq gigo moq lepra inaqta bolad luwim in Yesus danib bolsa ahol tuwaqiy. Ahol waqad in pesanmo turad lileyim bilaqiy, Yesus haqiy ni mat ayah diqta haqiy ni i ginan ninad meqniyan haqiy. ¹⁴ Haqan Yesus gibiyad gibilan, Ne

* **17:2:** Mataw asor ginad emay, Yesus onmin amikkimka ginan bilamta na in ago disaipel ta asor gibin hajqta na ginan bilam haqay.

gihol ad leheq mataw tamaz emayta na giqisihuniy ham. Haqan in Yesus aqez muzim danib tecmo lehadmo in bunmo gihol tidimniyyat.

¹⁵ Gihol dimniyan in gilikmanib mat amulikmo ahol loyinim in muleqim Yesus agerab ta bol. Bolad in dedibmo God abin tiqiluwyaq. ¹⁶ In bolim Yesus asen agerab ahol hulosan ogib woqim usad teq in Yesus esey tuqugyaq. Ari mat muleqim bolta na in saw Samariya-ib matta araq. ¹⁷ Sa Yesus mat amulik naqmo ahol waqad bilam, Ya bilay mataw 10 nazaqmo gihol tidimniyyat hayta ham. Mataw ta asor na edowa? ham. ¹⁸ Nagaqgo yaqmo isenlul araq diq muleqim bolim God esey a hi ugaq? ham. Sa mat saw araqabta kaqmo bolim God esey ugaq ham. ¹⁹ Haqad in mat na bulon, Ni eraqeq leh ham. Ni ya inan helmo hamta naqmo niwastitayan ni tidimniyyat.

Mat Atatin teq ulal iydaq

(Matyu 24.23-28, 37-41)

²⁰ Ari kam araqab Farisi asor Yesus susumun ugim bilaqiy, Kam gineh teq God ago maror boldaq? haqiy. Haqan Yesus amenin emim bilam, Muran God ago maror ayawalan inaq bolsa on mataw gimeb ahol a hi waqayta ham. ²¹ Teq in bolsa mataw ahol waqad bilaq daqay, "God ago maror kab usaq" o "God ago maror kob usaq" haq daqay nazaq a haiqmo ham. Na ezaqgo ham God ago maror ne gilikmanib tubolim usaq ham.

²² Haqad in ago disaipel gibilan, Abeb ne sirisirimo gihol buloneq bilaq daqay, Mat Atatin hidmo ta bolid i inaq ta osuq haq daqay ham. Teq hajiq ham. Ne kam na hidmo ahol a hi waq daqay ham. ²³ Mataw ne gibileneq bilaq daqay, Kazaq bo saw waqy haq daqay ham. Kozaq le saw waqy haq daqay ham. Haqsa ne gimuzeq nenaq hi lehiy ham. ²⁴ Na ezaqgo Mat Atatin in mataw gime titoneq a hi boldaq ham. In ta boldaqa na in bilaqne mewlig kaitab hikiliyani anuwan saw bunmo waqajta nazaq nog in boldaqa ham.

²⁵ Ari nagah na hidmo a hi gwahtiqaqdaqta ham. Hajiq ham. Nagah na a hi gwahtiqaqdaqta Mat Atatin sanctity waqsa mataw muran kam kab osayta ka gileh tuquq daqay ham. Gileh ugid kam abebag teq nagah na tugwahtiqaqdaq ham. ²⁶ Nowa akam-nib mataw daq em yaqayta nazaqmo Mat Atatin ta boldaqa na akamnib daq nazaq usdaqmo ham. ²⁷ Nowa akamnib mataw didaq neqad yuw uluwad an waqad ossa le Nowa muy aduganib tugwahtim ham. Gwahtiqaq uq ayatha na hitiqim on mataw na bunmo gimeqin ton ham. ²⁸ Ari Lot ago kamub mataw nazaqmo em yaqayta ham. In didaq neqad yuw uluwad nagah gizayad

kabiyab didaq leyad uliqab bit gicemad os yaqayta ham. ²⁹ Ossa Lot uliq Sodom hulosim lehsa kam nabmo faq gig afanfanta inaq kaitab urom nog woqim on mataw na ginoyan tumoq bugiy ham.

³⁰ Ari Mat Atatin ulalab ta boldaqa nab daq nazaqmo diq tugwahtiqaqdaqta ham. ³¹ Kam nab mat bit ahuqunib ban osnanta nab oseq in ogib hitiqeq tukeq lehad in ago es bit aduganib usaqta na le hi waqan ham. Ad nazaqmo mat kabiyab luwdaqta na in muleqeq ago bitab ta hi lehanmo ham. Luweq ne uliqabmo ossa afaqan ayatha na gwahtiqaq mataw gadgadmo osayta na gimeqin tonad in ne inaqmo gimeqin ton-daqmo ham.

³² Ne Lot awe awagamun anadin emiy ham. ³³ On mataw og ka ago es nagah waz naqmo hiqiyata na in nazaqmo timeqniy daqay ham. Ari on mataw og ka ago nagah na hulosad anadin diq a hi emayta na in dimunmo tuqos daqay ham. ³⁴ Ya ne helmo gibilenaiq ham. Taromab mataw giger ban amulikmo garabmo us daqay ham. Ussa in araq waqad araq in hulosid nab usdaq ham. ³⁵ Ad on giger wit anagin wolworad mel emad os daqay ham. Ossa in araq waqad araq in hulosid nab osdaq ham. [³⁶ Ad mataw giger leheq kabiyab luw daqay ham. Luwsa in araq waqad araq in hulosid nab luwdaq ham.]

³⁷ Haqan disaipel Yesus tisumun ugij, Iyatha haqiy daq na uliq edob diq gwah-tiqdaq? haqiy. Haqan Yesus gibilan, Kam nab daq na gwahtiqaqda na a hi nagun daqay ham. Ne gamuk araq mataw bilaqdaq luwayta ka anadin emiy ham. In bilaqdaq, Karuw tumomta asan lilihim usaqta nabmo tirkaw bolim humab wolay haqayta ham.

18

Aw araq megistret bulunan ulumsihta ago gamuk awowun

¹ Ari Yesus in ago disaipel gibilenid in kam bunmo God inaq gamuk emad gituw a hi hiqiy daqay haqad in gamuk awowun araq kazaq gibilan, ² Uliq araqab megistret araq os ham. Osad in God anan a hi rabad teq in on mataw ginadin diq a hi emyagtamo ham. ³ Sa uliq nab aw araq waburta in osad teq tuteqmo in megistret na ago hib boleq bulonyaq. Yaqgo bab samanta imeqin tonaq haqyaq ham. Ni hazizirib teq yaqgo afaqan sorad yaqmen daq titnonta em yag haqyaq ham. ⁴ Haqsa megistret hulosyaq ham. Hulossa aw na sirisirimo bulonsa iyan abeb megistret na inmo ahol bulonim bilam, Ya God anan a hi rabaiqta haqad in bilam ham. Ad ya on mataw ginadin diq a hi emyagtamo haqad in bilam ham. ⁵ Ta teq aw waburta ka kam

bunmo ya ituw bulsa ya inamur asit a hi emaiq haqad in bilam ham. Nazaq iyan ya hazizirib ulumsiheq daq titnonta tiqem ugdaiq haqad in bilam ham. Luweq kam bunmo tuteqmo in bolad ya ituw bulsa ya ihol a hi bilaqdaq haqad in bilam ham.

⁶ Haqad Iyahta bilam, Ne megistret meqinta na ago gamuk hurit kemiy ham.
⁷ God ago on mataw in gilumim aholyon giwamta na in zeqab teq taromab inaqmo God bulonsa in giqez huritad gimen daq titnonta a hi em negdaq e? ham. Haiqgam ham. Teq God in ago on mataw tigilumsi-hnan haqad agudan emdaq e? ham. Na haiqmo ham.
⁸ Ya ne gibilenaiq ham. God hidimo ago on mataw gimen daq titnonta tiqem negdaqta ham. Ari teq abeb Mat Atatin og kab ta boldaqta kam nab in on mataw asor God anan helmo haqad ossa gibilidaq o haiq, on mataw naqanta nabag thiqiy bug daqay? ham.

Farisi araq ayow mat takis waqaqta na inaq gigo gamuk awowun

⁹⁻¹⁰ Ari kam nab mataw asor ginad em yaqay. Igmo gimomo God ameb titnonim luw osauqta haq yaqay. Haqad in bilaq yaqay. Mataw ta asor ko in i nog a haiq haq yaqay. In nazaq ginad emsa Yesus gamuk awowun ka gibilenim bilam, Mataw giger God inaq gamuk emnan haqad Tempel-ib tugwalehiy ham. Mat araq na in Farisi ham. Teq araq na in mat abin meqinta takis waqaqta amatin ham.

¹¹ Farisi na aholbin turad in God bulonim bilam, O God ham ya mataw asor ko nog a haiq haqad in bilam ham. Ya a hi rin tonaiqta teq ya daq meqinta a hi emaiqta haqad in bilam ham. Ad ya aw tuwaqim teq ya aw araq inaq a hi luwaiqta haqad in bilam ham. Ya mat takis waqaqta ko nog a haiqmo haqad in bilam ham. Nazaq iyan ya esey diq tinigaiq haqad in bilam ham.
¹² Wik amulik-mulikmo ya ime gigermo ninadin emad didaq udinaiqta haqad in bilam ham. Ad ya nagah bunmo waqaiqta na huseran le humab 10 nazaq iyan ya humab amulikmo ni nigaiqta haqad in bilam ham.

¹³ Ari mat takis waqaqta na le pesanmo turad in ame Heven-ib a hi gwalehyaq ham. In afaqin kuh tonim turad anad meqniysa in aban wolis bilam, O God ham ya mat daq meqinta emaiqta haqad in bilam ham. Ni ya inan ninad meqniysa ilumsih haqad in bilam ham.

¹⁴ Haqad Yesus bilam, Ya helmo ne gibilenaiq ham. Mataw giger na Tempel-ib osim gwahtiqaq in gigo bitab tilehad in gilik-manib mat takis waqaqta naqmo in God ameb mat titnonta iy ham. Ari Farisi na teq haiq ham. Na ezaqgo on mataw in gimo

gihol abin iluwayta na bunmo God in gibin wazid tuwoodaq ham. Sa on mataw gihol abin wazan woqaqta na God in gibin wazid tiqeraqdaq ham.

Yesus onmin amikmikta gidimun tonad gibar ton

(Matyu 19.13-15; Mak 10.13-16)

¹⁵ Ari on mataw gigo onmin amikmikta teq susibta inaqmo giqad Yesus ago hib tubol yaqay, Yesus giwazad gidimun ton-daq haqad. Teq haiq. In onmin giqad bolsa disaipel gibiyad ginadad tigimuz yaqay.
¹⁶ Sa Yesus onmin na gibilenan agerab bolsa teq in ago disaipel gibilan, Ne onmin gihulosid yaqgo hib boliy ham. Ne hi giwasihiy ham. On mataw naqantaqmo God ago maror aduganib gwahtiqa yata ham.
¹⁷ Ya helmo ne gibilenaiq ham. Mat aw nog in onmin gibin haiqta ka nogmo iyad God ago maror ahaqenib a hi oseq in God ago maror na aduganib le a hi gwahtiq daqay ham.

Mat araq ago nagah kabemmo usaqta na Yesus inaq gamuk bilam

(Matyu 19.16-30; Mak 10.17-31)

¹⁸ Ari mat marorta araq bo Yesus susumun ugim bilam, Tisa dimunta ham ya ezaq tonid teq God in ago os dimunta kuluwa-kuluwmo osayta na tiyagdaq? ham.
¹⁹ Haqan Yesus bulon, Ni ninad ezaq emad ya inan dimun haqaq? ham. God amomo in dimunta ham.
²⁰ Haqad in mat na bulon, Gunun bunmo Moses bilamta na ni tuhurit ham.

Ni an alulib hureqeq inaq hi us ham.

Ni mat araq wol emid hi moqan ham.

Ni hi rin ton ham.

Ni hazizirib mat araq hi kat ug ham.

Ni ninenmaman giqez hurit ham. *Kisim Bek 20.12-16*

²¹ Yesus nazaq haqan mat marorta na bilam, Ya amunibmo osad gunun nagan bunmo muzim bolim muran ya mat ayah tiqiy ham.
²² Haqan Yesus gamuk na huritim in mat na bulon, Ni daq amulikmo emnanta a hi emaq ham. Ningo nagah bunmo gizayeq amenin waqeq teq ni mataw ginaghan haiqta gigo hib ibereq neg ham. Ni nazaq toneq teq Heven-ib ningo nagah kabemmo inaq iydaq ham. Ni daq na emeq teq ni ya imuzeq bol ham.
²³ Haqan mat marorta na ago nagah kabemmo diq giqusta iyan in Yesus ago gamuk na huritim ahol afaqan tiqiy.

²⁴ Anmo Yesus mat na ahol waqad bilam, Mataw gigo nagah kabemmo inaqta na in God ago maror aduganib gwahtiqaqo afaqan diq ham.
²⁵ Haqad in bilam, Karuw ayahta anan kamel haqayta na in nidel akwiyaknib le tugwahtiqaq e? ham. Hikidik ham. An nazaqmo mat ago es

kabemmo ginadin emaqta na in God ago maror aduganib le a hi gwahtiqaqmo ham. ²⁶ Yesus nazaq haqan on mataw nab turiya na huriitim bilaqiy, Nazaq iyid teq mat araq diq le God ago os dimunta nab a hi gwahtiqaqmo haqiy. ²⁷ Haqan Yesus gibilan, Mataw gigo zawayibmo le a hi gwahtiqaqdaqya ham. Teq nagah mataw emgo biyab a hi iyayta na God inmo emid tugwahtiqaq ham.

²⁸ Haqan Pita bulon, Ni i gibiy ham. I gigo og nagah bunmo gihulosim i nimmo nimuzim ninaq tilehauq ham. ²⁹⁻³⁰ Haqan Yesus in ago disaipel bunmo gibilan, Ya helmo ne gibilenaiq ham. Mat God ago maror aduganib gwahtiqaqnaq haqad in ago aw teq amaqbaban teq anenmaman teq ago onmin gihulosta, mat naqanta og kab osad amenin ayah diqmo tuwaqdaq ham. Ad abeb kam muturta nab teq in God ago os dimuntab gwahtiqaq kayeqmo kuluwku kuluwmo tuqosdaqmo ham.

Jesus ame ezeqmanta bilam, Ya moqeq teq ta eraqdaiq ham

(Matyu 20.17-19; Mak 10.32-34)

³¹ Ari Yesus in ago disaipel 12 na giwaqim giqad giholbinmo lehim teq in gibilan, Ne huriity ham. Muran i Jerusalem-ub tugwalehauq ham. Gwalehid teq kwaziqimo God ago nantut Mat Atatin anan bilaqad gamuk mar toniya na adan bunmo in aholi tugwahtidaq ham. ³² Mataw in Mat Atatin wazeq mataw en ta araq Juda a haiqta na gibenaq tiqem dagay ham. Emid teq in Mat Atatin bilawunad kamolmol ugad tukusluw ug daqay ham. ³³ Kusluw ugad in wazeq woltitayad teq in wol emid tumoqdaq ham. Moqeq kam ezeqmanmo useq teq in kayeq iyeq ta eraqdaiq ham. ³⁴ Yesus nazaq bilaqan in ago gamuk na disaipel ginadib ulal a hi iyyaq. Gamuk na alulin ulilemim usta iyan disaipel ginad a hi em has yaqay.

Jesus mat araq ame haiqta wastitayan dimniy

(Matyu 20.29-34; Mak 10.46-52)

³⁵ Ari Yesus danib lehad in uliq ayahta anan Jeriko haqayta na sinsin tuquqim lehsa mat araq ame haiqta dan adekib nagah anan sunad osyaq. ³⁶ Ossa on mataw dahu biyatha bo lehsa in gihulan huriitat tisusumun nag, Ne gingan lehay? ham. ³⁷ Haqan in buloni, Yesus uliq Nasaretribta na bo tilehaq haqiy. ³⁸ Haqan in dedibmo bilam, Yesus ham Devit atatin* ham. Ni ya inan ninad meqniyan ham. ³⁹ Haqan mataw danmeb leh yaqayta na in

mat ame haiqta na wadad buloniy, Ni niqez hiqiy haqiy. Haqsa haiq mat ame haiqta na dedibmo lileyeq a ta bilaqyaq, Devit atatin haqyaq. Ni ya inan ninad meqniyan haqyaq.

⁴⁰⁻⁴¹ Haqsa Yesus ahol wasihim nab titur. Turad in gibilan, Mat na waqeq ya igerab a boliy ham. Haqan in mat na Yesus agerab a bolan Yesus tisusumun ug, Ya ni ezaq nitondaiq? ham. Haqan in bilam, Iyahta ham ya saw ahol waqnan inad bilaqaq ham. ⁴² Haqan Yesus bulon, Ni nime hastitayan ham. Ni ya inan helmo hamta naqmo niqeman ni nime tidimniy ham. ⁴³ Haqan muran diq nawaqmo mat na ame hastitayan in saw ahol tuwagyaq. Saw ahol waqad in Yesus muzim inaq lehad in God abin tiqiluwuyaq. Sa on mataw bunmo daq na ahol waqim in God abin tiqiluw yaqaymo.

19

Sakiyus awagamun

¹ Ari Yesus le uliq Jeriko-ib tugwahtim. ² Uliq nab mat araq anan Sakiyus haqayta in os. Mat na in mataw takis waqayta gigo amebta teq in ago mani kabemmo diq usta. ³ Ari Yesus uliq nab gwahtiqaq lehsa Sakiyus in ahol waq kemnan haqad turan haiq. On mataw kabemmo nab tursa in mat siqim diq iyim in Yesus ahol a hi waqyaq. ⁴ Nazaq iyan in sibim ameb lehim ay fik araq regim teq ame woqsa tuqos. In anad am, Yesus dan kaqmo muzeq boldaqla ham. ⁵ Haqad in ay alonib ossa Yesus bolad luwimmo in ame gwalim ahol waqadmo tubulon, Sakiyus ham ni hidmo gehitiq ham. Muran ya le ningko bitab ninaq tuqosdaq ham. ⁶ Haqan Sakiyus hidmo gehitiqim in Yesus waqim inaq anad dimniya ago bitab tilah.

⁷ Lehsa mataw gibiyad in bunmo gigem meqniya bilaqiy, Mat ko abin dimun a haiqta haqiy. Nagaqgo Yesus inaq osnan haqad ago bitab tilehaq? haqiy.

⁸ Ari Sakiyus Yesus inaq bitab lehim osad teq in eraqim turad Iyahta tulubon, Iyahta ni huriit ham. Muran yaqgo nagah bunmo ya liqabmo uroteq asor na ya mataw ginaghan haiqta tinegdaiq ham. Ad ya mataw kat negim gigo nagah samanmo wayta na bunmo amenin nazaqmo ime aweweqmo tinegdaiq ham. ⁹ Haqan Yesus bulon, Ni Abraham asen muzim ni inaqmo God anan helmo haqan iyan muran God tiniwam ham. ¹⁰ Haqad in bilam, Mat Atatin in mataw God gileh ugim ginadibmo

* **18:38:** Isrel on mataw ginad em yaqay, God mat emid bo i gilumsihdaqta amatin na in i gises Devit asenlulib tugwahtiqaq haq yaqay. Haqad luweq Yesus in mat naqmo iydaq haqad teq mataw asor in anan Devit atatin haq yaqay.

haresmo nabag luwayta naqmo ginaguneq ta giwaqnan haqad bolta ham.

Kabibiy mataw mani waqiyta gigo gamuk awowun
(Matyu 25.14-30)

¹¹ Ari Yesus le uliq Jerusalem sinsin diq tuqugsa iyan mataw biyahta na ginad tiqem yaqay. Muran diq kam kabmo God ago maror ulal tiqiy bugdaq haq yaqay. Nazaq iyan mataw na Yesus ago gamuk huritad ossamo in gamuk awowun ta araq kazaq gibilan. ¹² Mat ayahta araq saw araq pesantab king ayah diqta ago hib lehnhan anad tiqam ham. In leheq maror na abenab zaway waqeq teq in muleqeq ta boleq king na aqumnib in ago walmataw tigiwamuzdaq haqadmo in tilah ham. ¹³ Lehad in ago kabibiy mataw 10 nazaq gibilenan bolan in mat amulik-mulikmo 20 kina nazaq tinag ham. Negim in gibilan, Ya le luwsa igilehnib ne mani ka amalib kabiy emsa le ya muleqeq ta boldaiq haqad in bilam ham. Haqadmo in tilah ham.

¹⁴ Lehsa mat ayahta na ago on mataw uliqabta na in mat na anan ginad a hi bilaqan in mataw asor gigeman uliq pesanta nab sibim ameb lehim in king na tubuloniy, Mat na i giwamuzgo i hulosauq haqiy ham.

¹⁵ Ari mat ayahta na abeb lehim king abenab zaway tuwaqim teq in muleqim ta bol ham. Bolim in ago kabibiy mataw na gimen nan eman tilah, in mani nagta na akabiyan emim amenin ganim amalibmo a ta waqiyta na in huritnan haqad ham. ¹⁶ Haqan kabibiy mat araq ameb bolim bilam, Iyahta ham ni mani yagta na amalib ya kabiy emim 200 kina nazaq a ta way haqad in bilam ham. Nazaq iyan ya uliq 10 nazaq nigid ni in gigo maror iyeq tigiwamuzdaq haqad in bilam ham.

¹⁸ An kabibiy mat ta araq bolim bilam, Iyahta ham ni mani yagta na amalib ya kabiy emim 100 kina nazaq a ta way haqad in bilam ham. ¹⁹ Haqan ago ayahta bulon, Ari ya uliq abaynagin nazaq nigid ni in gigo maror iyeq tigibiy muzdaq haqad in bilam ham.

²⁰⁻²¹ An kabibiy mat ta araq bolim bilam, Iyahta ham ni mani yagta na kawa haqad in bilam ham. Ya ningtu tuhuritta haqad in bilam ham. Ni mat afanfanta kamolmol a hi emaqta haqad in bilam ham. Nagah ni akabiyan a hi amta naqmo ni niholyon waqaqta haqad in bilam ham. Ad didaq ni a hi layta naqmo ni niholyon tayim

anon waqaqta haqad in bilam ham. Nazaq iyan ya nirabunim ning mani tubusanib il tonim eman us haqad in bilam ham.

²² Haqan in ago ayahta bulon, Ni kabibiy mat meqin diq haqad in bilam ham. Ni ya inan bilam, Ni mat afanfanta haqad ni bilam ham. Ad ni ya inan bilam, Nagah ni akabiyan a hi amta na ni niholyon waqaqta haqad ni bilam ham. Ni bilam, Didaq ni a hi layta na ni niholyon tayaqta haqad ni nazaq ya inan bilam ham. Ni gamuk nawa bilamta naqmo amalib ya ning daq tuqulum kemdaiq haqad in bilam ham. ²³ Doq tonnan ni yaqgo nazaq huritim teq ni yaqgo gimeq na mani abitnib eman a hi us? haqad in bilam ham. Usid teq ya muleqeq boleq yaqgo gimeq na amenin mani ayahmo inaqmo waq nagta haqad in bilam ham.

²⁴ Haqad mat ayahta na in mataw nab turiyta na gibilan, Ne mat atuw haiqta na abenab 20 kina in wazaqta na waqeq mat ago 200 kina inaqta na uguy haqad in bilam ham. ²⁵ Haqan mataw na bilaqiy, Iyahta haqiy mat na ago 200 kina inaq tiqiy haqad in bilaqiy ham. I mani araq na a ta ug tonam e? haqad in bilaqiy ham. ²⁶ Haqan mat ayahta na bilam, Ya ne gibilenaiq haqad in bilam ham. Ya on mataw gigo nagah inaqta na bunmo nagah asor a ta negdaiq haqad in bilam ham. Teq ya mataw ginaghan haiqta na gibena nagah asitmo in wazayta na walem bugdaiq haqad in bilam ham.

²⁷ Teq ya ibabun mebmebmo ya inan bilaqiy, Mat ka i giwamuzgo hulosauq haqiyta na ne giwaqeq giqad kab boleq ya imeb ginol emid moq bugiy haqad in bilam ham.

Jesus le uliq ayahta Jerusalem-ub gwahtiqim teq in Tempel-ib on mataw suleq negaq

Yesus king nog iyim le uliq Jerusalem-ub gwahtim
(Matyu 21.1-11; Mak 11.1-11; Jon 12.12-19)

²⁸ Ari Yesus gamuk na bilaqim thihiqian in saw na hulosim ago disaipel nenaq uliq Jerusalem-ub tugwalehiy. ²⁹⁻³⁰ Gwalehad in uliq giger Betfage teq Betaniy gigerab garah Oliv asenab tugwatiqiy. Gwahtiqim Yesus in disaipel giger giqeman danmeh lehsa in gibilan, Ne le uliq kob gwahtiqeqmo donki amidon araq am wazan tursa ne ahol tuwaq daqay ham. Donki na mat araq in amalib asit a hi luwta ham. Na ne haseq kab a boliy ham. ³¹ Sa mat araq na ago susumun negeq bilaqdaq, “Nagaqgo ne donki na aqamun hasay?” haqid ne kazaq

buloniy ham. Iyahta ago kabiy inaq iyan haqad ne buloniy ham.

³² Haqan in giger lehim nagah bunmo Yesus anan bilamta nazaqmo in ahol tuwaqiy. ³³ Ahol waqad in donki na aqamun hassa donki anamreniz tisusumun negiy, Ne giger nagaqgo donki na aqamun hasay? haqiy. ³⁴ Haqan in bilaqiy, Iyahta ago kabiy inaq iyan haqiy. ³⁵ Haqad in donki waqim ad Yesus ago hib muleqim tuboliy. Bolim in gigo tubusan asor donki amalib emim teq in Yesus bulonan donki amalib tuqos. ³⁶ Ossa on mataw gigo tubusan danib gihurensa teq Yesus donki amalib osim tubusan na bayim bayim tilah.

³⁷ In le Jerusalem sinsin tuqugad dante garah Oliv ban gewoqayta nab in tugwahtiqiy. Gwahtiqanom on mataw dauh biyahta Yesus muzim inaq leh yaqayta na in Yesus daq azawayin inaq emyaqta nagan ginadin emad in ginad dimniya dedibmo God abin tiqluw yaqay. ³⁸ Iluwad in bilaq yaqay,

I gigo king ka Iyahta abinib bolan i ginad bilaq gigayinaq haq yaqay.

Muran God nob igsa i dimunmo afaqan haiqmo tuqosam haq yaqay.

I God abin sorid ulilibmo diq gwalehan haq yaqay.

³⁹ Haqsa Farisi asor on mataw biyahta na gilikmanib turim in Yesus buloniy, Tisa haqiy ningos disaipep gibilenid giqez hiqiyiy haqiy. ⁴⁰ Haqan Yesus amenin emim gibilan, Ya ne gibilenaiq ham. I nagah ka ulilemamta abanan haiq ham. Mataw ka giqez hiqiyid gig haresmo kagab usayta ka in giqez inaq iyeq tililey daqay ham.

⁴¹ Haqad Yesus bo Jerusalem-ub tugwahtiqnan tonad in uliq na ahol waqad tigaqyaq. ⁴² Gaqad in uliq na anan bilam, On mataw Jerusalem-ubta ham ne gime haiqta ham. God ne nenaq an anobun wastitaynan tonsa ne ahol a hi waqay ham. Na ne ahol waqeq teq ne dimunmo os nagiy ham. Teq muran nagah na ulilemim ussa ne ahol a hi waqay ham. ⁴³ Helmo diq ham. Abeb teq kam ta araq tugwahtiqdaq ham. Gwahtiqid ne gigo bab boleq gel ne gigo uliq lilut ugim turaqa nab in og tayeq humab emeq in og na bayeq bayeq gwaleheq ne gigo uliqab tugwahtiq daqay ham. Gwahtiqadmo in gigo asor gililut negad saw bunmo ne gitawan'an tur daqay ham. ⁴⁴ Turad in ne teq ne gigo onmun nenaqmo tiginol em bug daqay ham. Ad in ne gigo uliqab gig an amalib usayta na wolzizilayid tiq bug daqaymo ham. Na ezaqgo God ne gigo hib bolim nenaq osta na ne ginad a hi em hasiyya na ago ham.

Mataw Tempel-ib mani akabiyan emsa

Yesus gimuzan asan ban gwahtiqiy
(Matyu 21.12-17; Mak 11.15-19; Jon 2.13-22)

⁴⁵ Ari Yesus lehim Tempel agelin aduganib gwahtiqim in mataw nagah gizayad osiy na gimuzan in tukim asan ban tileh yaqay. ⁴⁶ Lehsa in gibilan, God ago marib in gamuk araq kazaq bilam ham. Yaqgo bit in ya inaq gamuk emgo abitan iyydaq haqad in bilam ham. *Aisaya 56.7*

Ta teq ne bit ka eman in mataw rin tonayta gigo bit nog tiqiy ham.

⁴⁷ Ari kam bunmo Yesus Tempel agelin aduganib mataw suleq tinegyaq. Sa mataw tamaz emayta gigo aseseqta na giyogniz mataw Moses ago gunun hurit kemyita na nenaq teq Juda gigo mataw marorta na in bunmo Yesus wol emid moqgo adantequin tinagun yaqay. ⁴⁸ Teq haiq. On mataw bunmo Yesus ago gamuk huritnan zaway diq iysa mataw aseseqta na dante araq ahol a hi waq yaqay.

20

Mataw aseseqta in nog Yesus ahol abin ugta na anan susumun ugyi

(Matyu 21.23-27; Mak 11.27-33)

¹ Kam araqab Yesus le Tempel agelin aduganib osad in on mataw God ago gamuk tigibilenyaq. Gibilensa mataw tamaz emayta gigo aseseqta na teq mataw Moses ago gunun hurit kemyita na teq mataw marorta asor in Yesus ago hib tuboliy. ² Bolim in Yesus susumun ugyi, Ni i gibilen haqiy. Ni nibin ezaqta iyim ni daq kagan emaq? haqiy. Teq nog diq nibin na nig? haqiy.

³ Haqan Yesus amenin emim gibilan, Ta ya nazaqmo nagah araq ago ne tisusumun negnan ham. Ne ya ibileniy ham. ⁴ Jon mataw huz negyaqta na ago kabiy Heven-ib bol o haiq in matawmo gigo hib kabiy na wamita? ham.

⁵ Haqan mataw aseseqta na in gimo an bulonim bilaqiy, I bilaqam, Kabiy na Heven-ib bolta haqid in bilaqdaq, Ta nazaqgo ne Jon ago gamuk huritam anan helmo a hi haqiy? haqdaq haqiy. ⁶ Ari i bilaqam, Kabiy na matawmo gigo hib bolta haqid on mataw bunmo i gimalib gig tuhuneg daqay haqiy. Na ezaqgo in bunmo ginad awaz timeqniyim Jon anan bilaqay, Hel diqtaqmo in God ago nantut araq haqayta haqiy. ⁷ Nazaq iyan in Yesus ago susumun na amenin emim bilaqiy, I a hi hurit haqiy. ⁸ Haqan Yesus gibilan, Ya nazaqmo ham. Nog ibin yagan ya daq kagan emaiqta na ago ya a hi gibilendaiqmo ham.

*Mataw meqinta am wain akabiyen
emiyya gigo gamuk awowun
(Matyu 21.33-46; Mak 12.1-12)*

⁹ Ari Yesus on mataw gamuk awowun ka gibilenim bilam, Mat araq am wain anagin kabemmo og araqab tilay ham. Leyim in wain na akabiyen mataw asor gibenaq tıqam ham, in gimo giholyon kabiy emad teq in wain anagin asormo ya yag daqay haqad ham. In kabibiy mataw gibilenim hulosad era uliq araq pesantab lehim kam sisagmo in nab tuqos ham. ¹⁰ Osad wain anagin waqgo akaman tugwahtiqaq in ago kabibiy mat araq eman mataw wain akabiy emaya na gigo hib tilah ham. In lehid mataw na yaqmən wain anaginta na tuqug daqay haqad ham. Teq haiq ham. Kabibiy mat na lehan mataw wain akabiyem emaya na in wazim woltitayim munuz samanno muleqim tilah ham.

¹¹ Lehan kabiy anamren in kabibiy mat ta araq eman tilah ham. Lehan na nazamqo in wazim woltitayad nan meqinta ugad teq in muzan samanno tilahmo ham. ¹² An in kabibiy mat ezeqmanta eman lehan na in wazim wolcan anedan woqsa in kabiy asan ban hunegan tilahmo ham.

¹³ In nazaq eman kabiy anamren bilam, Teq ya ezaq tondaiq? haqad in bilam ham. Ya itatin amulikmoqmo ya anan inad diq bilaqqaqta naqmo ya emid tilehdag haqad in bilam ham. Nabag in lehid teq kabibiy mataw na in aqez tuhurit daqay haqad in bilam ham. ¹⁴ Haqad in eman lehan mataw kabiy wamuzayta na in bolsa ahol tuwaqiy ham. Ahol waqad in gimo an bulonim bilaqiy, Abeb mat ko amam moqid in amam ago ahuran nagah bunmo tuwaqdaqta haqiy ham. In bolid i wol emuq haqiy ham. Wol emid teq amam ago kabiy ka igmo gigota tqiydaq haqiy ham. ¹⁵ Haqad in mat na wazim kabiy asan ban hunegan lehan in wol eman tumom ham.

Nazaq iyan kabiy anamren in mataw wain akabiyen wamuzayta na ezaq gitondaq? ham. ¹⁶ In boleq mataw kabiy wamuzim osayta na ginol em bugad teq in ago kabiy na mataw ta asor gibenaq tıqemdaq ham. Haqan mataw nab turiyta na ginad emim bilaqiy, Haiq kidik! haqiy. Kabiy anamren nazaq hi eman haqiy. ¹⁷ Haqan Yesus gibiyad gibilan, Ne ginad nazaq emay ye? ham. Ta gamuk araq God ago marib usaqta ka alulin ezaqta? ham. Gamuk na bilam,

Tituq mataw anan bilaqiy ‘meqin’ haqiyta naqmo in awaz meqin diq turad bit anon bunmo soraq haqad in bilam ham. *Buk Song 118.22*

¹⁸ An ya ne gibilenaiq ham. Mat aw nog tituq na amalib woqeinq in giditin bunmo tuwlöbiyay daqay ham. Ari tituq naqmo

in mat araq amalib woqeinq in mat na tuwol ninal bugdaq ham.

¹⁹ Haqan mataw Moses ago gunun hurit kemyita na teq mataw tamaz emaya gigo aseseqta na in ginad tiqem hasiy. Yesus i giben wazid woqgo haqad gamuk awowun ka bilam haqiy. Haqad muran diq nabmo in Jesus wazeq irqurgo ginad emad teq in ta on mataw girabun yaqay.

Mataw Sisa takis ugayta na ago in Yesus ulum waqiy

(Matyu 22.15-22; Mak 12.13-17)

²⁰ Nazaq iyan mataw aseseqta na in Yesus wamuz naqmo diq hiqiy yaqay. Ad in mataw asor giqeman lehim in katiyad Yesus ago gamuk huritnaq haqad teq in wirinad luw yaqay. I Yesus kat ugid in gavman gigo gunun araq itiyyonad nan araq hi bilaqnant bilaqid teq i gavman abenab emid in hazizirib titurdaq haqad. ²¹ In nazaq haqad Yesus tubuloniy, Tisa haqiy i ningi tuhurit haqiy. Ni gamuk hel diqta amalib on mataw sulep negaqta haqiy. Ni mataw gibin inaqta a hi girabunaqta haqiy. Ad ni on mataw God ago dan titronta giqisihunad ni gamuk hel diqmo gibileqta haqiy. ²² Ni ninad ezaq emaq? haqiy. I gibabun Rom gigo king Sisa in i gituw bulsa i takis ugauqta na in daq dimun o daq meqin? haqiy. I Juda gigo maror ezaq bilamta? haqiy.

²³⁻²⁴ Haqan Yesus anad tiqam. Mataw ka titak yagay ham. Haqad in gibilan, Mani araq iqisihunid ya ahol waqiq ham. Haqan in mani araq ugan ahol waqad bilam, Ka nog diq adulan teq ahol anan mani kab usaq? ham. Haqan in bilaqiy, Na Sisamo agota haqiy. ²⁵ Haqan Yesus gibilan, Nazaq iyan Sisa ago nagah na ne Sisamo ugij ham. Ad God ago nagah na ne God-mo ugij ham.

²⁶ Ari Yesus ago gamuk bunmo dimunmo iyan mataw aseseqta na in on mataw gimeb Yesus waz daqayta ago adanteqin haiqqam tiqiyiy. Ad in Yesus ago gamuk huritnaq ginadnad emad giqezmo hiqiyim tuqosiy.

Sadyusi in mataw hodhodab eraq daqayta na ago Yesus ulum waqiy

(Matyu 22.23-33; Mak 12.18-27)

²⁷ Ari Sadyusi asor Yesus ago hib tuboliy. Mataw na ginad kazaq emaya. Mataw tumoqiyta hodhodab a hi eraq daqay haqayta. ²⁸ Na in bolim Yesus buloniy, Tisa haqiy, Moses i gimen gamuk araq mar tonim in kazaq bilam haqiy. Mat araq aw waqeinq amun a hi emsamo moqid ago aw amomo ossa teq in amikqan araq abab aqoburan na waqeinq alulib abab ayon onmin tigiqemdaq ham haqiy.

²⁹ Ari gamuk araq kazaq lahta haqiy. Mat araq amikqaniz nenaq ⁷ nazaq diq iym osiy haqiy. Osim in gibab na aw araq tuwam haqiy. Waqim inaq amun araq a hi emimmo in tumom haqiy. ³⁰ Moqan ama ta araq in abab aqoburan na wam haqiy. Waqim in amun haiqmo osim tumommo haqiy. ³¹ An gima ezeqmanta na in aw naqmo wammo haqiy. Nazaqmo mataw maqbab ⁷ na in aw naqmo waqim amun araq eman a hi gwahtiqa in tumoq bugiy haqiy. ³² An abeb aw na tumommo haqiy. ³³ Nazaq iyan abeb mataw bunmo hodhod uloseq eraq daqayta nab teq aw na in nog diq awe tiziyydaq? haqiy. Maqbab ⁷ na bunmo in aw amulik naqmo waqiyta haqiy.

³⁴ Haqan Yesus gibilan, Muran on mataw og kab osayta na in an waq agamukan wastitayim teq in an waqayta ham. ³⁵ Ari on mataw God in gibiyan titnonta iyitta na God in giwazid hodhodab eraeq in ago maror aduganib gwahtiqa tuqos daqay ham. Osad nab in an a ta hi waq daqay ham. ³⁶ Na ezaqgo in a ta hi moq daqayta na ago ham. In angelo nogmo iyeq tuqos daqay ham. God in hodhodab giwazan eraqan iyan in God atatniz tiqiyiy ham.

³⁷ Teq God mataw tumoqiyta giwazid hodhodab eraq daqayta na ago Moses ne tigiqisihummo ham. In ago marib ay amikta araq faq oyad a hi oyworta awagamun nab in gamuk kazaq mar tonim bilam ham.

Iyahta in Abraham ago God, teq Aisak ago God, teq Jekob ago God haqad in bilam ham. *Kisim Bek 3.6, 15, 16*

³⁸ Nazaq iyan God in mataw moqim kayeqmo osayta gigo God iym in gibiy muzaqta ham. Na ezaqgo mataw tumoqiyta teq mataw a hi moqayta inaqmo in God ameb kayeqmo osayta ham.

³⁹⁻⁴⁰ Yesus nazaq bilaqan mataw bunmo rabad in Yesus ulum waqnan a ta hi susumun ug yaqay. Nazaq iyan mataw Moses ago gunun huriit kemiyta na asor in Yesus buloniy, Tisa haqiy ni gamuk amenin bunmo dimunmo bilam haqiy.

Krais ahol alulin ezaqta na ago Yesus Farisi susumun nag

(Matyu 22.41-46; Mak 12.35-37)

⁴¹ Ari Yesus on mataw nab turiyta na gibilan, Ezaq haqad mataw bilaqay, Krais in Devit atatin* haqayta? ham. ⁴²⁻⁴³ Devit Buk Song-ib gamuk araq mar tonim bilam, Iyahta in yaqgo Iyahta kazaq bulonim bilam ham. Ni ya iben iqabun ban kab ya imen emad ossa ya ningob bab gjemid nisen ahaqenib tiqiy bug

daqay haqad in bilam ham. *Buk Song 11.1*

⁴⁴ Ari Devit in Krais anan bilam, 'Yaqgo Iyahta' haqad in bilam ham. Nazaq iyan ezaq toneq Krais in Devit ago Iyahta iyeq teq in Devit atatin a ta idyadq? ham.

Yesus in mataw Moses ago gunun huriit kemiyta na gigo daq ginan bilam
(Matyu 23.1-36; Mak 12.38-40; Luk 11.37-54)

⁴⁵⁻⁴⁶ Haqad Yesus in on mataw bunmo gimeb ago disaipel gibilenim bilam, Ne mataw Moses ago gunun huriit kemiyta na ginan gihol waz naqmo hiqiyiy ham. In tubusan sisapta giholib emeq mataw gimeb luwnan ginad bilaqatqa ham. Ad in maket-ib luwsa mataw gibiyad ginan 'mat ayah' haqsa in ginad diq dimniyata ham. Mataw na bit humab wolaytab ban ulilibta nabmo osnan ginad bilaqatqa ham. Ad in humab adidaqan inaqtab ogib garuruhab osnan hulosmo diq hulosayta ham.

⁴⁷ Teq in on waburta kat negad gigo bit samanno waqayta ham. Ad in mataw gimeb God inaq gamuk sisapmo bilaqim a lehaya ham, mataw gibiyad ginan dimun diqta haq daqay haqad ham. God hazizir ayahta emdaqta nab teq mataw na in on mataw bunmo giquriyameq faq ayah diqmo tuwaq daqayta ham.

21

Aw anaghan haiqta araq in God naw ug
(Mak 12.41-44)

¹ Ari on mataw gigo nagah kabemmo inaqta asor Tempel agelin aduganib bo gwahtiqa gigo naw hunegan mani emayta abanab woqsa Yesus in gibiyad os. ² Ossa aw waburta araq anaghan haiqta bolim mani amikmikta giger hunegsa in ahol tuwam. ³ Ahol waqad in ago disaipel gibilan, Ya helmo ne gibilenaiq ham. Aw waburta ahol anaghan haiqta ko in mani amik diqta emim in on mataw bunmo gigo nawta na giquriyam bug ham. ⁴ Na ezaqgo mataw bunmo in gigo mani kabemmo usaqta na ago asitmo emiyta ham. Ari aw kohaiq ham. In ago mani in didaq zayeq neqdaqta na tiquem bug ham.

Yesus bilam, Tempel teq meqniydaq ham
(Matyu 24.1-2; Mak 13.1-2)

⁵⁻⁶ Ari mataw asor Tempel anan bilaqiy, Bit ko haqiy mataw gig dimdimunta amalib emim teq in mataw God naw ugiyta na anawun waqim amalib balaw tonan in awaqan dimun diq iyaq haqiy. Haqan Yesus bilam, Ne nagah dimdimunta ahol waqayta ko ago akaman gwahtiqa teq gig ko bunmo wolzizilayeq gihunegid tuwoq

* 20:41: Luk 18.38 nab teq ni gamuk 'Devit atatin' ka alulin ahol waqdaq.

bug daqay ham. Gig an amalib usayta ko teq muruwoqeq tiqmo bug daqay ham.

*Yesus bilam, Afaqan kabemmo teq gwahtiqaq ham
(Matyu 24.3-14; Mak 13.3-13)*

⁷ Haqan disaipel Yesus tisumsum ugiy, Iyahta haqiy kam gineh teq nagah ni anan bilamta na tugwahtiqaq? haqiy. Naga daqin ameb gwahtiqa i ahol waqad ginad emam, Nagah na gwahtiqaq akaman sinsin tiqy haqam? haqiy.

⁸ Haqan Yesus gibilan, Ne gihol waz naqmo hiqiyeq osiy ham. Luweq mataw asor boleq kat neg daqay ham. Mataw kabemmo teq boleq ya inan biyad bilaq daqay, Mat naqmo ya kawa haq daqay ham. Ad in bilaq daqay, Kam abebtanta na sinsin tiqy haq daqay ham. In nazaq haqsa ne helmo haqad gimuzeq nenaq hi lehiy ham.

⁹ Abeb mataw bab emsa ne gihulan huri-tad teq ta saw haresmo mataw eraeq gav-man gigo maror othassa ne in gibrin hurit daqaymo ham. Huritad ne hi ninoriy ham. Daq nagan danmeh tugwahtiqaqta ham. Teq kam abebtanta na in bab na muzeq hidmo a hi gwahtiqaq ham. ¹⁰ Haqad in gibilan, Mataw en araq eraeq leheq mataw saw araqabta nenaq an wol daqayta ham. Sa king araq ago dauh nenaq eraeq king ta araq ago dauhta nenaq an wol daqaymo ham. ¹¹ Kanawrigrig aseseqta sibad og ahol wolsa saw asor moq aseseqta teq zarow meqin diqta tugwahtiqaq ham. Teq nagah arab inaqta amo amo teq daq hares lul araq diqta kaitab gwahti daqay ham.

¹² Ari daq nagan a hi gwahtiqa-samo mataw asor ne giwazeq gimeqin ton daqay ham. Ad in ne giqad bit humab wolaytab leheq ne gimen hazizir emad teq in ne tigiqirqur daqay ham. Ya ihol abin ne giholib usaqta na ago in ne giqad gav-man gigo aseseqta na gimeb leh daqay ham. ¹³ Kam nab ne nagah gimeb ahol waqiyta na awagamun bilaqgo adanteqin inaq tiqy daqay ham. ¹⁴ Teq muranmo ne naga gamukin amalib gihol adanin qway daqayta na ago ne ginadnad hi emiy ham. ¹⁵ Yaqmo teq inad dimunta negad gamuk ne bilaq daqayta na yaqmo ne giqezab emid tugwahtiqaq ham. Gwah-tiqa mataw ne gimeqin ton daqayta na in ne gigo gamuk amenin em yo hiqiyad in ne gigo gamuk bayid a hikidik woqdaq ham.

¹⁶ Kam nab ne ginemaman teq ne gimaqbaban teq ne gisenlulniz teq ne giyogniz in ne giwaqe qbab gibenab tigiqem daqay ham. Ad in ne gilkmanib asor ginol emid ne tumoq daqay ham. ¹⁷ Ya ihol abin ne giholib usaqta na ago on mataw bunmo

gigem meqinta neg daqay ham. ¹⁸⁻¹⁹ Teq God ne giwamuzsa ne gifaqinib gigensan araq diq a hi milhesdaq ham. Ne giwaz diq meqniyeq oseq teq abeb ne le os dimunta kuluwa-kuluwmo osayta nab gwahtiqaq ne anononmo tuqos daqay ham.

*Yesus bilam, Jerusalem teq meqniyidaq ham
(Matyu 24.15-21; Mak 13.14-19)*

²⁰ Ari abeb bab bo Jerusalem lilut ugeq tur-sa ne gibiyad teq ne ginad em daqay, Uliq meqniyidaqta akaman na tugwahtim haq daqay ham. ²¹ Kam nab mataw saw Jidiya-ib os daqayta na in tukeq garah ban gwalehiy ham. Ad on mataw uliq Jerusalem-ub os daqayta na in uliq na hulosad saw asor ban lehiyham. Teq mataw garanab luw daqayta na in muleqe q le uliqab ta hi gwahtiqaq ham. ²² Kam nab God in on mataw daq meqinta emad luwiya na amenin tinegdaqta ham. In nazaq emeq in ago gamuk mar tonan us-aqta na bunmo tuwol net bugdaq ham. ²³ Kam nab on gigem iyayta na teq on amun muturta sus ugayta na in timeqniy daqay ham. Na ezaqgo afaqan na ayah diqmo og kab gwahtiqaqta ham. Gwahtiqa-dimo God ago agem meqniy in on mataw na tigimeqin diq tondaq ham. ²⁴ Sa mataw en Juda a haiqta nagan boleq Juda on mataw nenaq bab emeq in Juda kabemmo baqirib tiginol em daqay ham. Ginol emad asor in giwazeq giqad in gigo ogib ta leheq giqemid tuqos daqay ham. Mataw en Juda a haiqta nagan bo Jerusalem meqin tonad luwsa le God kam nagta na tihiqiyid teq in muleqe q in gigo uliqab ta leh daqay ham.

*Mat Atatin teq ta boldaq
(Matyu 24.29-31; Mak 13.24-27)*

²⁵ Ari Yesus bilam, Kaitab zeq teq kalam teq ulig in gihol buliyeg giwaqan lul araq diq iy daqay ham. Sa ogib kab on mataw dauh bunmo nagah na gwahtiqa ahol waqad in ginadnad emad rabad tuqos daqay ham. Kamis eraeq woleq bolsa ahulan ayahmo iysa on mataw huritad in tirab naqmo diq hiqiy daqay ham. ²⁶ Teq in nagah aseseqta zawayta ulilib usayta nagan gihol wolsa gibiyad in ginad em daqay, Og ka timeqniyana tonaq haq daqay ham. Haqsa rab meqin diqta gilum netsa in gime sinsanid ogib woqeq moq nog iyeq tuqos daqay ham. ²⁷ Ussamo Mat Atatin kaitab onqas amalib oseq ago zaway teq ahol anuwan ayahta inaq bolsa in ahol tuwaq daqay ham. ²⁸ Nazaq iyan abeb daq nagan tugwahtiqa-samo ne eraeq gime ulilib gwalehsa usan ham. Ussa mat ne gizayeq bab gibenab giwaqdatta na gehitiqsa ne ahol tuwaq daqay ham.

*Ay fik kam ulum kemaqta
(Matyu 24.32-35; Mak 13.28-31)*

²⁹ Ad Yesus in ago disaipel gamuk awowun araq gibilenim bilam, Ne ay fik teq ay bunmo inaqmo gibiyiy ham. ³⁰ Ay nagan gihokan muturta gwahtiqa ne ahol waqad ginad emay, Zeq akaman tiqynan tonaq haqayta ham. ³¹ Nazaqmo teq abeb daq ya anan bilayta nagan bunmo tugwahtiqa ne ahol waqad ginad kazaq emiy, God ago maror bolim sinsin tiqiy haqiy ham. ³² Ya helmo ne gibilenaq ham. On mataw muran kam kab osayta ka a hi moq bugsa daq nagan bunmo tugwahtiqa ham. ³³ Kait og inaq teq tihiqydaqta ham. Ari yaqgo gamuk ka a hi hiqiydaq ham.

Jesus in ago disaipel gibilan, Ne gihol waziy ham

³⁴ Ari ne gihol waz naqmo hiqiyiy ham. Luweq ne daq haresmo emad yuw atoranta uluwad ginad agadan iyad os daqay ham. Ad ne og ka ago afaqan amo amo loyinad ne ginad meqniyadaqmo ham. Daq nazaqta na ne gime isihid Iyahta ago kam na gwahtiqa ne riten daqay ham. Bilaqne karuw dobub woqim ritenaq nazaq ham. ³⁵ Mat Atatin ta boldaqta na akaman in on mataw og saw bunmo gigo hib tugwahtiqa ham. ³⁶ Nazaq iyan ne tuteqmo gihol asawan woltayad osiy ham. Ad sirisirimo ne God inaq gamuk bilaqsa in ne zaway negan ham. Zaway negid ne giwaz meqniyeq osad daq nawa ya anan bilayta na in ne gigo hib gwahtiqa ne dimunmo tuqos daqay ham. Oseq abeb ne Mat Atatin anognib turad ne gimebay a hi woqdaq ham.

³⁷ Ari Yesus kam bunmo Tempel ago gel aduganib le gwahtiqaq in on mataw suleq negyajta. Ad taromab in le garah anan Oliv haqayta nab usyaq. ³⁸ Sa on mataw bunmo tarom naqmo saw a hi hastitaysamo in eraeqq Yesus ago gamuk huriitman haqad Tempel-ib tileh yaqay.

22

*Judas in Yesus waqeq Juda gigo mataw marorta gibenab emgo bilam
(Matyu 26.1-5, 14-16; Mak 14.1-2, 10-11;
Jon 11.45-53)*

¹ Ari bret yis haiqmo neqayta akaman anan Pasova haqayta na bo sinsin tiqiy. ² An mataw tamaz emayta gigo aseseqta na teq mataw Moses ago gunun huriit kemiyta na in on mataw ginan rabad iyan in gime titoneq Yesus wol emid moqdaqta na ago adanteqin tinagun yaqay.

³ In Yesus wol emgo adanteqin nagunad luwsa Satan in Yesus ago disaipel gigo araq Judas uliq Kariyot-ibta na aholib tugwal. ⁴ Gwalan in lehim mataw tamaz emayta

gigo aseseqta na teq mataw Tempel-ib hurmey osayta gigo aseseqta na nenaq gamuk tiqemiy. Gamuk emad Judas ezaq toneq Yesus waqeq mataw na gibenab emdaqta na ago agamukan tuwastitayi. ⁵ Mataw aseseqta na ginad diq dimniysa in Judas inaq an adugan wazim buloniy, I ni nizayeq mani tinigam haqiy. ⁶ Haqan Judas gamuk na huriitum bilam, Na dimunmo ham. Haqadmo in kam araq dimunta on mataw dauh biyahmo a hi ossa in gime titoneq Yesus waqeq mataw na gibenab emdaqta na akaman tinagunyaq.

Disaipel giger le Pasova adidaqan neqgo abanan wastitayi

(Matyu 26.17-25; Mak 14.12-21; Jon 13.21-30)

⁷ Ari bret yis haiqmo neqayta na akaman tugwahtim. Kam nab Juda on mataw God ayon tamaz emad in Pasova ayon sipsip amidgot wol emayta. ⁸ Nazaq iyan Yesus in Pita ayow Jon inaq giqeman lehsa in gibilan. Ne leheq i Pasova adidaqan neqamta na abanan wastitayid teq i leheq nequq ham. ⁹ Haqan giger na Yesus buloniy, I bit edob diq leheq Pasova adidaqan neqamta na abanan wastitayam? haqiy. ¹⁰⁻¹¹ Haqan Yesus gibilan, Huriity ham. Ne uliq ayahta nab le gwahtiqa mat araq reb ayuwun inaqta soreq a bo lehad in ne danib tigibiydaq ham. Ne mat naqmo muzeq inaq leheq bit edob in gwahtiqaqta nab ne bit na anamren kazaq susumun ugyi ham. Tisa bilam, Yaggo disaipel nenaq didaq neqamta na ago bit adugan edowa? ham haqad ne buloniy ham. ¹² Bulonid teq mat na bit adugan araq ayahta ulilib usaqta na tigiqishundaq ham. Bit adugan nab didaq neqayta anaghan bunmo usaqta ham. Nab ne leheq i Pasova adidaqan neqamta na abanan wastitayi ham. ¹³ Haqan giger na tilehiy. Lehim Yesus nagah bunmo ginan gibilanta nazaqmo in ahol tuwaqiy. Ahol waqad in Pasova adidaqan neq daqayta na abanan tuwastitayi.

Yesus in ago disaipel bret teq wain ayun inaq nag

(Matyu 26.26-30; Mak 14.22-26; 1 Korin 11.23-25)

¹⁴ Ari imisor didaq neqgo akaman tiqiy Yesus ago disaipel nenaq humab wolum banab osad didaq tineq yaqay. ¹⁵ Neqad teq Yesus in ago disaipel gibilan, Ya nenaq Pasova adidaqan ka neqeq teq ya santitiy sordaiq haqad ya inad awaz meqin usta ham. ¹⁶ Teq ya kazaq ne gibilenaiq ham. Abeb ya nenaq Pasova adidaqan ka a ta hi neqdaiq ham. Ari i gigo Pasova ka anon diq tugwahtiqid kam nab teq ya nenaq God ago maror aduganib osad Pasova adidaqan ka a ta neqdaiq ham.

¹⁷ Haqad in wain agogin inaq waqim God esey ugim gibilan, Ka ne waqeinq an ugeq uluwiy ham. ¹⁸ Ad in bilam, Ya ne gibilenaiq ham. Ya wain ayun ka a ta hi uluwdaiq ham. Abeb God ago maror og kab tugwaqtqid nab teq ya wain ayun ka a ta uluwdaiq ham.

¹⁹ Haqad in bret asor waqim God esey ugim in orqayim tinag. Negad in gibilan, Ka ya inon ne giyon hulosdaiqta ham. Abeb ne ya inadin emad kazaq em daqay ham. ²⁰ Ari in didaq tineqim hulosad Yesus wain agogin inaq waqim in emim bilam, Gog kab ya inedan God ago maror muturta na zaway ugdajta usaq ham. Ya ned ka ne giwastitaynan wazbaldaiqta ham.

²¹ Ari ne ahol waqiy ham. Mat ya iwaqeinq bab gibenab iqemdaqta na in ya inaq humab kab osaq ham. ²² God kwaziqmo Mat Atatin ayon bilaqan usaqta nazaqmo in dan muzeq tilehdaq ham. Ta teq mat bab gibenab Mat Atatin emdaqta na timeqniy hasdaq ham. ²³ Yesus nazaq bilaqan disaipel bunmo in gimo an tisusumun ug yaqay, Nog diq teq daq na emdaq? haq yaqay.

Yesus santitiy sorim moqim teq ta eram

Disaipel gilikmanib nog diq in ayah diqta na ago in an mugiy

²⁴ Ari disaipel eraqim nog diq in gilikmanib mat ayah diqta iydaqta na ago in an tumug yaqay. ²⁵ An mugsu Yesus gibilan, On mataw en ta asor Juda a haiqta nagan gigo maror aseseqta na in igmo ag haqad gihol wazan eraqqaqta ham. Sa in gigo walmataw in gihaqenib osayta na in maror na gabin iluwad bilaqay, I gigo maror ka i gilumsihan i dimunmo osauqta haqayta ham. ²⁶ Ari ne nazaq hi emiy ham. Ne gilikmanib mat ayahta na in ahol wazid woqsa in mat minminta abin haiqta nog iyan ham. Ad ne gigo mat danmebta na in ne gigo kabibiy mat samanta nog iyan ham. ²⁷ Ne ginad emiy ham. Mat banab ossa inmen didaq a bolim anognib emayta na in abin inaq o haiq kabibiy mat didaq iberim a lehaqta naqmo in abin inaqta? ham. Mat banab ossa didaq a bolim ugayta naqmo in mat ayah diqta ham. Teq ya nazaq a hi emaiqta ham. Ya ne gilikmanib osad ya ne gigo kabibiy mat nog iyim ne gilumsihad osaqta ham.

²⁸ Kwaziqmo mataw afaqan yagad ibay-muzsa negmo a hi ihulos yaqay ham. ²⁹ Nazaq iyan ya imam ibenab maror amta nazaqmo ya ne gibenab maror tiqemaiqmo ham. ³⁰ Abeb yaqgo maror aduganib teq ne maror iyeq osad ne yaqgo banab didaq neqad yuw tuquluw daqay haqad ya ne

gibenab maror ka emaiq ham. Kam nab teq ne yaqgo maror aduganib marorgo banab osad ne Isrel gigo gem 12 na tigibiy muz daqay ham.

*Yesus bilam, Pita teq gileh yagdaq ham
(Matyu 26.31-35; Mak 14.27-31; Jon 13.36-38)*

³¹ Haqad Yesus in Pita bulon, Saimon, Saimon ham ni hurit ham. Satan ne bunmo giwaqeinq wit nog giqiwornan haqad atoranmo tibilamta ham. ³² Teq ya God inaq gamuk emim ninmen tubulon ham. In nilumsihid ni ninad helmo haqajta na a hi woq hasdaq haqad ya tubulonta ham. Abeb ni ninad buliyeq yaqgo hib ta bolad teq ni nimaqbaban zaway negad in gigo ginad helta na ni wazid ta eraqan ham. ³³ Haqan Pita bulon, Iyahta ham, ya ninaq bit giqirquran osayta nab tilehgo ham. Ningo bab in ya ninaq garabmo ginol emgo bilaqsa ya a hi rabdaiq ham. ³⁴ Haqan Yesus bulon, Pita ham ya nibilenaq ham. Tarom kab kurek a hi gayonsamo ni nime ezeqmanmo gileh tiyagdaq ham.

Yesus in ago disaipel gidek waz

³⁵ Ari Yesus in ago disaipel gibilenim bilam, Kwaziqmo ya giqeman ne yaqgo kabiy emman lehad ne mani aziynaq teq kuram teq baqir a hi soriy ham. Ad ne gisendugan gisenab a hi emiymo ham. Kam nab ne nagah araq ago siqim iyyiye? ham. Haqan disaipel bilaqiy, Haiq haqiy. ³⁶ Haqan Yesus gibilan, Ari muran ya kazaq ne tigibilenaq ham. Ne gigo mani aziynaq ussun ne waqiy ham. Ad ziy araq ne gigo es siheneq a luw daqayta na ne waqiyomo ham. Ne baqir haiqta iyeq ne gigo giholsi-hen mat araq ago hib zayeq amenin waqeinq ne giholyon baqir zayiham. ³⁷ Ya helmo gibilenaiq ham. Daq araq teq ya iholib gwahtiqaqta na in God ago marib gamuk araq ya inan bilamta na tuwol net bugdaq ham. Gamuk na bilam,

In mat na anan mat gunun othasaqta araq haqiy ham. *Aisaya 53.12*

Daq na teq ya iholib tugwahtiqaq ham. ³⁸ Haqan disaipel bilaqiy, Iyahta haqiy i gigo baqir giger kawa haqiy. Haqan Yesus pilam, Na dimunmo tiqiy ham.

*Yesus garah Oliv-ub God inaq gamuk am
(Matyu 26.36-46; Mak 14.32-42)*

³⁹ Ari Yesus eraqim uliq hulosim lehad in ago daq muzinim garah Oliv-ub tilah. Lehsa ago disaipel muzim inaq tilehymo.

⁴⁰ Lehim saw nab tugwahtiqaq teq Yesus tigibilan, Ne God inaq gamuk emad osiy ham. Osad ne God bulonid in ne gilumsihid daq ne gilum waqdaqta na ne giholib gwahtiqaq ne hi woqgo haqad buloniham. ⁴¹ Haqadmo in disaipel gihulosim

asitmo ta leh nog iyim in abakbakan ulum laquwim turad God inaq gamuk tiqemyaq. ⁴² In bilaqyaq. Ya imam haqyaq ni ninad bilaqsun iyid teq ni ya iholib afaqan ka walem haqyaq. Teq ni ya inad ka hi muz haqyaq. Ninmo ninad muz haqyaq. [⁴³ Sa Heven-ib angelo araq gehitiqim Jesus ulumsihad zaway tuqugyaq. ⁴⁴ Zaway ugsa Jesus aholib afaqan ayah diqta loyinad in anad awaz meqin amalib God inaq a gamuk ta emyaq. Emsa ahol qwal wolad ned nog ogib tiqyaq.]

⁴⁵ Ari in God inaq gamuk tiqemim hulosad in eraqim ago disaipel gigerab muleqim ta lah. Lehim disaipel gihol afaqan diq iyad ussa in gibiy. ⁴⁶ Gibiyad in gibilan, Ne ezaq haqad usay? ham. Ne eraqeq God inaq gamuk emad osiy ham. Gamuk emad daq ne gilum waqdaqta na bo giholib gwahtiqa ne hi woqgo buloniy ham.

Judas Yesus waqim bab gibenab am
(Matyu 26.47-56; Mak 14.43-50; Jon 18.3-11)

⁴⁷ Yesus nazaq gamuk bilaqad tursamo mataw dahu biyahmo tuboliy. Bolad Yesus ago disaipel 12 na gigo araq anan Judas haqay na in mataw na dan giqisihunim ameb bol. Bolim in Yesus agerab loqimmo tiqilawun. ⁴⁸ Ilawunana Yesus bulon, Judas ham ni daq kaqmo amalib Mat Atatin bab gibenab emaq e? ham. ⁴⁹ An disaipel Yesus inaq turiyta na in daq na ahol waqad ginad emim bilaqiy, Iyahta haqiy i baqirib tignolam e? haqiy. ⁵⁰ Haqadmo in gigo araq eraqim tamaz mat danmebta ago kabibiy mat araq baqirib wolim adeksan aqabun ger qwatayanmo ogib twom. ⁵¹ Anmo Yesus bilam, Daq na hulosiy ham. Haqad in mat na adeksan usta asawnib aben emim wazanimo in tidimini.

⁵² Ari mataw tamaz emayta gigo aseseqta na teq mataw Tempel-ib hurmey osayta na teq Juda gigo mataw marorta asor in Yesus waznan bolan Yesus gibiyad gibilan, Ne baqir sebur wazim a boliyta ka ne mat rin tonaqta waznan boliv ye? ham. ⁵³ Kam kabemmo ya nenaq Tempel-ib ossa ne a hi iwaziy ham. Teq muran kam ka in ne gigo kamta ham. Muran romriq awaz meqniyim in saw anuwan tiqisih bugaq ham.

Pita Yesus gileh ug
(Matyu 26.57-58, 69-75; Mak 14.53-54, 66-72; Jon 18.13-14, 19-24)

⁵⁴ Ari mataw na Yesus wazim ad tamaz mat danmebta ago bitab tilehiy. Lehsa Pita gimuzim lehad in gibeb pesan nogomo lehyaq. ⁵⁵ Mataw na bit nab lehim gel aduganib gwahtiqa bit aqezab faq ulamim iterad tuqosiy. Ossa Pita gigerab lehim nenaq faq iterad tuqosmo. ⁵⁶ In

faq iterad anuwanib ossa kabibiy aw araq Pita ahol waninunadmo tibilam, Mat ka in Jesus inaq luwtamo ham. ⁵⁷ Haqan Pita bilam, Neng ham ya mat na ago a hi hurittu ham. ⁵⁸ Haqad in asitmo ta osanmo mat ta araq Pita ahol waqad tubulon, Ni inaqmo mataw na gigo gisenlul araq ham. Haqan Pita bilam, Mang ham na ya a haitq ham. ⁵⁹ Haqad in asit sisaq nog ta ossamo mat ta araq awaz meqniyim tibilaqyaq, Helmo diq haqyaq mat ka in mat Galiliy-ibta iyim iyan in Jesus inaq luwta daqag haqyaq. ⁶⁰ Sa Pita bilam, Mang ham ni gamuk bilaqqaqta na ago ya inad a hi emaiq ham. In nazaq bilaqanmo kurek tigayon. ⁶¹ Gayonan Iyahta ahol buliyim Pita ahol tuwam. Ahol waqsa Pita in Iyahta gamuk bulonta na anadin tiqam. Kurek a hi gayonsamo ni nime ezeqmanmo gileh tiyagdaq ham. ⁶² Pita gamuk na anadin emadmo in gel asan ban gwahtiqa lehim gaq naqmo diq hiqiy.

Mataw Yesus wolad yuquwun yaqay
(Matyu 26.67-68; Mak 14.65)

⁶³ Ari mataw Yesus waz yaqayta na in Yesus woltitayad teq in tibilawun yaqay. ⁶⁴ Ad in tubusan waqim Yesus ame isihim teq in wolad bulon yaqay, Ni God ago nantut iyeq teq nog kawa ninolaqta ka anan biysa i hurituq haq yaqay. ⁶⁵ Ad in gamuk meqmeqinta kabemmo amalib Yesus bilawun yaqay.

Mataw aseseqta Yesus ayon hazizir emiy
(Matyu 26.59-66; Mak 14.55-64; Jon 18.19-24)

⁶⁶⁻⁶⁷ Ari abeb zeq tigabolan Juda gigo mataw marorta nagan humab tuwoliy. Mataw tamaz emayta gigo aseseqta na teq mataw Moses ago gunun hurit kemiyya na bo humab wolim ossa teq mataw Yesus waqim a bolim ginognib eman titur. Tursa mataw aseseqta na Yesus tubuloniy, Ni mat anan Krais haqayta na iyeq teq ni i gibilen kem haqiy. Haqan Yesus gibilan, Ya ne gibilenid ne helmo a hi haq daqay ham. ⁶⁸ Ad ta ya ihol alulin anan ne susunun negid ne amenin a hi ibilen daqaymo ham. ⁶⁹ Teq ya kazaq bilaqdaq ham. Muran teq abeb Mat Atatin in God Awaz Meqin Diqta na aben aqabun ban tuqosdaq ham. ⁷⁰ Haqan mataw na bunmo bilaqiy, Nazaq iyan ni God atatin e? haqiy. An Yesus gibilan, Nawaqmo ne tibilaq sireqiy ham. ⁷¹ Haqan mataw na bilaqiy, I naga gamukin a ta huritam? haqiy. Inmo aqezab aholyon bilaqan i tuhurit haqiy.

23

Mataw Yesus waqim ad Pailat ago hib lehiy

(Matyu 27.1-2, 11-14; Mak 15.1-5; Jon 18.28-38)

¹ Ari Juda mataw aseseqta na bunmo eraqim in Jesus waqim ad Pailat ago hib tilehiy. ² A lehim in Jesus amalib nan emad bilaqiy, Mat ka i gigo on mataw bunmo kat negad ginad buliysa in i gigo maror a ta hi muzinayta haqiy. Ad i Sisa takis ugnan bilaqa in i gidanin qwayqa ta haqiy. Teq in bilaqaq, Mat anan Krais haqayta na yaqmo kawa haqaqta haqiy. Ad inmo aholnan bilaqaq, Yaqmo king haqaqta haqiy.

³ Haqan Pailat Yesus tisusumun ug, Ni Juda gigo king e? ham. Haqan Yesus amenin emim bilam, Ni nawaqmo tibilam ham. ⁴ Haqan Pailat in mataw tamaz emayta gigo aseseqta na teq on mataw biyatha na bunmo gibilan, Ya mat ka ago afaqan araq nagunim ahol a hi way ham. ⁵ Haqan mataw na atoranmo bilaq yaqay, Mat ka saw Galiliy-ib ago kabiy alulin emim in mataw suleq negad luwim bo saw Judiya-ibmo iyim bo uliq kabmo tiqiy haq yaqay. In mataw gamuk gibilenad giqutil wazan eraqsa in ginad haresmo tiqemay haq yaqay.

⁶ Ari Pailat gamuk na huritim in mataw nab turiyta na tisusumun nag, Ka Galiliy-ib mat araq e? ham. ⁷ Haqan mataw na Pailat bulonan in anad tiqam, Yesus in og saw Herot wamuzaqta na amatinta ham. Nazaq iyan in Yesus eman Herot ago hib tilah. Kam nab Herot in saw Galiliy hulosim bolim in uliq Jerusalem-ub tuqosyaq.

⁸ Ari Pailat Yesus eman Herot ago hib lehan Herot ahol waqad anad tidimniy. Kam sisqmo in Yesus abin huritad in ahol waqnan anad usta, Yesus daq araq azawayin inaqta emsa ya ahol waqdaiq haqad. ⁹ Teq in nagah kabemmo ago Yesus tisusumun ugyaq. Susumun ugsa Yesus gamuk araq amenin a hi emyaq. ¹⁰ Sa mataw tamaz emayta gigo aseseqta na teq mataw Moses ago gunun hurit kemiyya na in bo sinsin diq turad Yesus amalib nan kabemmo emad gamuk atoran diqmo bilaq yaqay. ¹¹ Bilaqsa Herot ago mataw bab emayta na nenaq in inaqmo Yesus kamol-mol ugad bilawun yaqaymo. Bilawunad in tubusan araq sisqta awaq dimunta waqim Yesus aholib emim teq in eman Pailat ago hib muleqim ta lah. ¹² Ari kam nab Herot Pailat inaq yow tiqemiy. Kwaziqmo in giger an gihar ugad os yaqayta.

Pailat bilam, Yesus ayib dom woliy ham
(Matyu 27.15-26; Mak 15.6-15; Jon 18.38-19.16)

¹³ Ari Pailat in mataw tamaz emayta gigo aseseqta na teq Juda gigo mataw marorta na gigo on mataw asor nenaq gibilenan boliy. ¹⁴ Bolan in gibilan, Ne mat ka waqim yaqgo hib a bolim bilaqiy, Mat ka on mataw gihereqsa ginad agadan iysa in gisesan gigo gunun a ta hi muzinayta haqiy ham. Haqan ya ne gimeb gamuk na ulum muzad ya mat ka tisusumun ug ham. Susumun ugim ya in ago hib daq araq meqinta ahol a hi way ham. Ne gigo hazizir ka alulin haiqta ham. ¹⁵ Ad ya Herot ago hib eman lehan Herot nazaqmo alulin araq ahol a hi waqad in mat ka eman yaqgo hib muleqim ta bol ham. Helmo ham. Mat ka daq araq meqinta i wol emid moqdaqta na a hi amta ham. ¹⁶ Nazaq iyan ya mataw gibilenid in gusib woltitayid teq ya hasid tilehdaq ham.

[¹⁷ Ari ulig bunmo Pasova akamnib Pailat ago daq in mataw giqirqruran osayta na gigo araq hasid gwahtiqyaqta.] ¹⁸ Nazaq iyan in Yesus woltitayeq hulosid lehgo bilaqan on mataw bunmo araqibmo dedibmo bilaqiy, Mat na wol emiy haqiy. Ad ni Barabas-mo hasid i gigo hib bolan haqiy. ¹⁹ Mat anan Barabas haqayta na in Rom gimuznan haqad nenaq bab emim gigo mataw asor ginol amta na ago in irquran osta. ²⁰ Ari mataw nazaq bilaqan Pailat in Yesus hasid gwahtiqnan haqad a ta gibilan. ²¹ Gibilenan haqiq. On mataw na dedibmo a ta bilaq yaqay, Ayib dom wolid moqan haq yaqay. Ayib dom wolid moqan haq yaqay. ²² Haqsa Pailat ame ezeqmanta a ta gibilan, Nagaqgo? ham. Mat ka naga daqin meqinta am? ham. Ya in ago hib daq araq meqinta ya wol emid moqdaqta na ahol a hi way ham. Nazaq iyan ya woltitayeqmo hasid tilehdaq ham. ²³ Teq haiq. Mataw na zaway diq iyim lileyad in ayib dom wolgo atoran diqmo bilaq yaqay. Ad in giqez na Pailat ago gamuk bayan tuwom. ²⁴ Nazaq iyan Pailat bilam, On mataw dauh biyatha ka ginad usaqta nazaqmo tiqiydaq ham. ²⁵ Haqad in giqez muzinim in mat Rom nenaq bab emim mataw ginol eman bit giqirqruran osaytab eman osta na hasan lehsa in Yesus ayib dom wolgo tibilam.

Mataw Yesus ayib dom woliy
(Matyu 27.32-44; Mak 15.21-32; Jon 19.17-27)

²⁶ Ari in Yesus waqim ad tilehad teq in mat araq anan Saimon haqayta uliq Sairin-ibta ahol waqadmo tuwazi. Mat na uliq Jerusalem ban bolad luwsa in wazim Yesus ay soryaqta na ugan in ay na sorim Yesus muzim inaq tilah. ²⁷ Lehsa on mataw dauh biyaho Yesus muzim inaq lehad in gilikmanib on asor giban wolad gaq wazim leh yaqay. ²⁸ Sa Yesus ahol buliyyim on na gibilan, Ne Jerusalem on ham ne ya

inan hi gaqiy ham. Negmo giholnan teq ne gigo onmin ginan ne gaqiy ham.²⁹ Ne huriitiy ham. Abeb kam araq meqin diqta tugwahtiqaq ham. Gwahtiqid kam nab ne bilaq daqay, On nignigta onmin giqemim sus a hi negiyta na in tidimniyim osayta haq daqay ham. Na ezaqgo in gigo amun araq moqsa in ahol a hi waqayta haq daqay ham.³⁰ Kam meqinta nab mataw garah gibileneq bilaq daqay, Ne i gimalib woqe eq giqisihiy haq daqay ham. Giqisihid bab bo i a hi ginol em daqay haq daqay ham.³¹ Ne ginad emiy ham. Kam dimunta kab mataw ya iholib daq meqinta kazaq emid kam meqinta nab daq timeqniy hasdaq ham.

³² Ari in mataw daq meqin emiyta gigermo Yesus inaq ginol emnan giqad lehiyomo. ³³ Giqad lehim in le garah akululqan araq anan Gifaqin Agolgolan haqayta nab tugwahtiqaq. Gwahtiqid saw nab in Yesus ayib dom tuwolri. Ad mataw meqinta giger na inaqmo ayib dom giwoliyomo. Dom wolani mat araq Yesus aqabun ban tursa araq anasaran ban turyaq. [³⁴ Sa Yesus bilam, Ya imam ham mataw ya imeqin tonayta gigo daq meqinta ka ni walemad anadin ta hi em ham. In ginad a hi em hasadmo daq ka emay ham.] Ari mataw Yesus ayib dom wolum hulosad teq in ago tubusan nagan ibereq giholyon waqgo haqad gig amikmikta tuhuneg yaqay.

³⁵ Sa on mataw Yesus aholmo waqad turiy. Tursa Juda gigo mataw marorta na in Yesus bilawuneq bilaq yaqay, In mataw asor gilumsihan a hi moqiyta haq yaqay. In mat God atowun emim kabi yugta anan Krais haqayta na iyeq teq in awaz meqniyeq inmo ahol ulumsiheq hi moqan haq yaqay. ³⁶ Haqsa mataw bab emayta na nazaqmo Yesus bilawun yaqaymo. Bilawunad in agerab loqim wain ayun agon iytia ugnan ton yaqay. ³⁷ Ad teq in bulon yaqay, Ni Juda gigo king iyeq teq ni nimmo nihol ulumsiheq hi moq haq yaqay. ³⁸ Teq in Yesus ayib dom woliyta na ago ananin mar tonim afaqinib othenan us. Gamuk na in kazaq mar toniy.

KA JUDA GIGO KING

³⁹ Ari mataw daq meqinta emiyta giger Yesus agerab giqotheniya na gigo araq in Yesus bilawunim bilam, Ni mat anan Krais haqayta ye? ham. Ni mat na iyeq teq nimmo nihol ulumsihad ni i giger gilumsiheq ham. ⁴⁰ Haqan ta araq na in gamuk na huriit in araq na wadim bulon, Ni in afaqan waq nogmo ni waqaq ham. Ni God anan a hi rabaq e? ham. ⁴¹ I giger ginol emid moqamta na dimunmo ham. I daq meqinta emad luwta na ago afaqan i kawa tisorauq ham. Ari mat ka daq araq meqinta a hi amta ham. ⁴² Haqad in Yesus

bulon, Yesus ham abeb ni king iyeq teq ni ya inadin em ham.⁴³ Haqan Yesus bulon, Ya helmo nibilenaq ham. Muran ya ninaq i giger Paradais-ibmo tuqosam ham.

Yesus mom

(Matyu 27.45-56; Mak 15.33-41; Jon 19.28-30)

⁴⁴ Ari zeq gabolim liqab tikiysa saw bunmo romriq iyad le 3 kilok imisor tikiy. ⁴⁵ Kam nab zeq anuwan hiqiyamo tubusan ayahta Tempel-ib othenan usta na aliqabmo tartayim gigermo iy. ⁴⁶ Samo Yesus dedibmo lileyim bilam, Ya imam ham ya iwtitan eman ni nibenab tilehaq ham. Haqadmo in tumom. ⁴⁷ Moqanno bab mataw gigo ameba na in daq nazaq ahol waqad in God abin iluwad bilam, Helmo diq ham. Mat ko aholib daq araq meqinta a hi usta ham. ⁴⁸ An on mataw biyatha mareren bolitya na in daq nagan bunmo ahol waqim in muleqim ta lehad giqutl tartaysa in giban wazim gigo uliqab tilehiy. ⁴⁹ Lehsa Yesus ayogniz bunmo teq Galiliy-ib on Yesus muzim inaq bolitya na inaqmo in pesan nogmo turad nagah na bunmo gwahtiqa in ahol tuwaqiy.

Yesus moqan asan hodhodab a lehiy

(Matyu 27.57-61; Mak 15.42-47; Jon 19.38-42)

⁵⁰⁻⁵¹ Ari Juda gigo uliq anan Arimatea haqayta na amatin araq anan Josep haqayta in Jerusalem-ub tubolim os. Mat na in Juda gigo mat marorta araq teq in mat dimunta ago daq titnonimmo usta. Juda gigo maror bunmo in Yesus wol emid moqgo an adugan wazsa Josep asor a hi bilamta. Teq in God ago maror og kab gwahtiqa ahol waqnan haqad amen emyaqta. ⁵² Mat naqmo Pailat ago hib lehim Yesus asan waqe q a le yay tongo tisusum ug. ⁵³ Susumun ugim in lehim Yesus asan ayib walemim ogib eman ussa in tubusan husta araq amalib il tonim hodhod aduganib tiqam. Hodhod na gig araq ayahta adugan qwayim emiya. Teq kwaziqmo in mat araq momta asan hodhod nab eman a hi usta.

⁵⁴ Ari kam Yesus momta na in Juda gigo lotu ayon nagah wastitayata akaman. Kam nab imisor zeq tuwolehsa Juda gigo lotu akaman diq na tugwahtiqaq tonyaq.

⁵⁵ Samo Galiliy-ib on Yesus muzim inaq bolitya na in Josep muzim inaq hodhodab tilehiy. Lehim in hodhod na ahol tuwaqiy. Ahol waqad Josep Yesus asan wastitayim hodhodab emsa in ahol waqyimo. ⁵⁶ Ahol tuwaqim teq in muleqim in gigo bitab tilehiy. Lehim in masil nagah amo amo ahuran dimunta Yesus asanib em daqayta na tuwastitayi. Wastitayim eman ussa lotu

akaman na tugwahtiqan in ginamur emad tuqosiy, God ago gunun bilamta nazaq.

24

Yesus hodhodab eram

(Matyu 28.1-10; Mak 16.1-8; Jon 20.1-10)

¹ Ari Sande tarommo saw hastitay inaq on na in masil nagah ahuran dimdimunta tanabmo wastitayan usta na giwaqim ad hodhodab tilehiy. ² Lehim gig hodhod aqez ituqim usta na otbulyian le ussa in ahol tuwaqiy. ³ Ahol waqad in le hodhod aduganiň gwahtiqim Yesus asawanmo ahol waqiy. ⁴ Ahol waqad in ginadnad emad nab tursamo mataw giger gigo tubusan oy gigayinsa in gigerab tugwahtiqiy. ⁵ Gwahtiqanmo on na rabad ginobun mulbunim ogib woqim usiy. Ussa mataw giger na gibileniň, Ne ezaq haqad mataw turnoqita gigo sawab mat kayeqmo osaqta na nagunay? haqiy. ⁶ Mat na kab hajq haqiy. In tigeraq haqiy. In a hi moqadmo saw Galiliy-ib osad gamuk gibilanta na ne anadin emiy haqiy. ⁷ In ne gibilan, Mat araq in Mat Atatin mataw meqinta gibenab tiqemdaq haqad in bilam haqiy. Gibenab emid in ayib dom tuwol daqay haqad in bilam haqiy. Dom wolid kam ezeqmanta nab in ta eraqdaq haqad in bilam haqiy.

⁸ In nazaq haqanmo on na in kawziqmo Yesus gamuk bilamta na anadin a ta emiy. ⁹ Ad in hodhod hulosim muleqim tilehiy. Lehim in disaipel 11 na teq mataw asor disaipel nenaq osiyta na bunmo in giholib daq gwahtimta na awagamun tigibilen bugiy. ¹⁰ Mariya uliq Magdalaliba na teq Jowana teq Jems anen Mariya teq on asor in nenaq luwiyya naqmo in Aposel gibileniy. ¹¹ Gibilenan mataw na in gigo gamuk huritim in ginadibmo bilaqiy, Gamuk na samanta alulin hajqta haqiy. Haqad in on na gigez anan helmo a hi haqiy. [¹² Ta teq Pita eraqim hodhodab sibim tilah. Lehim in kuh tonim wiliyanum ame loqim tubusan husta na amomo ussa in ahol tuwam. Ahol waqim in muleqim bitab ta lehad teq in daq gwahtimta na ago anadnad diq tiqemyaq.]

Mataw giger uliq Emeus gigo dan ban Yesus ahol waqiy

(Mak 16.12-13)

¹³ Ari kam nabmo disaipel gilikmanib mataw giger eraqim uliq araq amikta anan Emeus haqaytab tilehiy. Dan Jerusalem hulosim le Emeus-ib gwahtimta na in 11 kilomita nazaq. ¹⁴ In giger danib lehad daq bunmo Jerusalem-ub gwahtimta na anan in an bulonim leh yaqay. ¹⁵ In gamuk emad an bulonim lehsa Yesus-mo in gigerab gwahtiqim nenaq tilehyaq. ¹⁶ Lehsa

giger na nagah araq gime ituq nog iyan in Yesus ahol a hi waq has yaqay.

¹⁷ Sa Yesus gibilan, Ne giger naga diq ago bilaqim lehay? ham. In nazaq bilaqan giger na wasihim ginad meqniysi tituriy.

¹⁸ Turad araq anan Kliyopas haqayta na in Yesus ago gamuk amenin emim bilam, Mataw kabemmo uliq saw bunmo uliq Jerusalem-ub bolim osad in daq gwahtimta na ago tuhuritiyya ham. Ta teq ni edob luwim ni nimomo nagah na ago a hi hrittay? ham. ¹⁹ Haqan Yesus tisusumun nag, Na naga? ham. An in buloniy, Yesus uliq Nasaret-ibta na ago hib daq gwahtimta naqmo haqiy. Mat na in God ago nantut araq haqiy. In God teq on mataw bunmo gimeb kabiy awaz meqin diqta emad in gamuk dimdimunta bilaqyaqtta haqiy. ²⁰ Sa mataw tamaz emayta gigo aseseqta na teq i gigo mataw marorta na in mat na wazim gavman gibenab emiy haqiy. Eman gavman gamuk emim anan bilaqiy. In moqan haqad bilaqiy haqiy. Haqad in ayib dom wolum othenan tumom haqiy. ²¹ Teq kwaziqmo i ginad emyauq, Mat naqmo Isrel on mataw bunmo gizayeq gibabun gibenab giwaqeç ban dimuntab giqemid in dimunmo tuqos daqay haqyauqta haqiy.

Teq ta nagah araqmo haqiy. Daq na gwahtimta ago akaman ezeqmanta muran tiqiy haqiy. ²² An muran i gisenlulib on asor in i gigeman i gihol turuh nam haqiy. Tarom naqmo in hodhodab lehiy haqiy. ²³ Lehim in Yesus asan asawanmo ahol waqiy haqiy. Ad in muleqim ta bolim kazaq bilaqiy haqiy. I God ago angelo asor gibiy haqad in bilaqiy haqiy. Gibiysa angelo bilaqiy, Yesus hodhodab eraqim kayeqmo osaq haqiy haqad in i gibileniy haqiy. ²⁴ Haqan i gilikmanib mataw asor hodhodab tilehiymo haqiy. Lehim on bilaqiyta nazaqmo in gimeb nagah ahol tuwaqiy haqiy. Teq in Yesus-mo ahol a hi waqiy haqiy.

²⁵ Haqan Yesus gibilan, Ne giger ginad siqim diq ham. Ne God ago nantut gamuk bilaqan usta na anan helmo haqgo ne gemig soqotim usaq ham. ²⁶ Gamuk na ezaq bilam? ham. In bilam, Krais boleq afaqan nagan bunmo sorad sanctity waqeq teq in abin ayahta inaq iyeq ago ban ulilibta nab tuqos woqdaq haqad in bilam ham. Nazaq a haq e? ham. ²⁷ Haqad in Moses teq God ago nantut inmo ananin mar toniyta na bunmo gibilenad in gamuk na alulin bilaq hasyaq.

²⁸ Ari in lehim mataw giger na gigo uliqab tugwahtiqim Yesus in gihuloseqmo lehnhan ton. ²⁹ Sa mataw giger na Yesus wasihim buloniy, I ninaq osam haqiy. Zeq tuwolehsa tarom tiqynan tonaq haqiy. In

nazaq haqan Yesus le nenaq bitab gwah-tiqim tuqosiy. ³⁰ Osim abeb in didaq tineggo haqad banab tuqosiy. Osad Yesus bret waqim God esey ugim in orqayim mataw giger na tinag. ³¹ In nazaq tonammo giger na gime tihasitaysa in ginad tiqem hasiy. Ka Yesus-mo haqiy. Haqsamo hais muran diq nawaqmo Yesus in gime titonim nabag lehan in ahol a ta hi waqiy. ³² Ad in an bulonim bilaqiy, I mat na inaq danib bolsa in suleq igad God ago gamuk alulin gibilensa i giqutil bilaqne faq oy nog iyyaqta haqiy. Naqmo Yesus-mo i gamuk gibilenyaq haqiy.

³³ In nazaq bilaqad kam nabmo in eraqim Jerusalem-ub a muleqim ta lehiy. Lehim in disaipel 11 na giyogniz asor nenaq humab wolum ossa gibilay. ³⁴ Gibiysa in bilaq yaqay, Helmo diq haq yaqay. Iyahta ticeram haq yaqay. Saimon ahol tuwan haq yaqay. ³⁵ Haqsa teq ta giger na danib luwsa daq bunmo giholib gwahtimta na ago agamukan bunmo in tigibilenymo. Ad in bilaqiy, In bret orqayim iga nab i ahol tuwaq has haqiy.

*Disaipel Yesus ahol waqiy
(Matyu 28.16-20; Mak 16.14-18; Jon 20.19-23; Aposel 1.6-8)*

³⁶ Ari in gamuk na bilaqad ossamo Yesus gilikmanib gwahtiqim titur. ³⁷ Tursa in ahol waqad gihol riten lamsa rabad ginad emiy, Ka i mat momta awitan daqag ahol waqaquq haqiy. ³⁸ Haqsa Yesus gibilan, Dog tonnan ne gihol riten lamsa ginadnad tiqemay? ham. ³⁹ Ne ya ibensen ahol waqiy ham. Ka yaqmo ham. Ne giben ya isanib emeq iwaz waqiy ham. Mat momta awitan in asan teq aditin kazaq haiqta ham. [⁴⁰ In nazaq gibilenim teq in aben asen tigiqisihun.] ⁴¹ Giqisihun disaipel ginad dimniysa teq in helmo haqgo ginad siqim iysa in ginadnad em yaqay. Sa Yesus gibilan, Ne gigo didaqaq usaq e? ham. ⁴² Haqan in nabiq oyiyta asor tuqugiy. ⁴³ Ugan in waqim neqsa in ahol tuwaqiy.

⁴⁴ Ahol waqsa Yesus gibilan, Kwaziqmo ya nenaq osad gibilenyaq ham. God ago maror Moses mar tonta nab ya inanin usaqta haqyaiq ham. Teq God ago nantut kwaziqta na gigo marib in yaqmo inan bilaqiyta haqyaiq ham. Sa Buk Song-ib bar usaqta nab ya ibin usaqtamo haqyaiq ham. Gamuk na bunmo adidaqan teq gwahtiqdaq haqyaiqta ham. ⁴⁵ Haqad in disaipel na ginad eman hastitayan in God ago mar na ginad tiqem hasiy.

⁴⁶ Sa Yesus ta gibilan, God ago marib gamuk kazaq bilam ham. Krais santiyyi tisordaq haqad in bilam ham. Soreq

kam ezeqmanta nab in hodhodab ticeraqdaq haqad in bilam ham. ⁴⁷ Eraqid teq mataw in abin ad leheq on mataw en bunmo tigibilen daqay haqad in bilam ham. Gibileeq in bilaq daqay, Ne Krais anan helmo haqad ginad bulyeq ne gigo daq teq ginad meqinta bunmo tigiwalem bugdaq haq daqay haqad in bilam ham. Daq na uliq Jerusalem-ub danmeb gwahtiqeq in og saw bunmo tuwaqdaq haqad in bilam ham. ⁴⁸ Negmo gime anonabmo daq nagan bunmo ahol tuwaqim iyan ne awagamun tibilaq daqay ham. ⁴⁹ Ne huritiy ham. Ya imam in ago Bugaw Dimunta negnan hel diqmo bilamta na muran ya emid tubol negdaq ham. Ne uliq ayahta kabmo osiy ham. OSSA ulilib zaway na bo ne gimalib tuwoqid teq ne yaqgo kabiy na tiqem daqay ham.

*God Yesus waqim ad Heven-ib tugwalah
(Mak 16.19-20; Aposel 1.9-11)*

⁵⁰ Ari Yesus in ago disaipel giwaqim nenaq uliq Betaniy-ibmo tilehiy. Lehim in aben giger wazan eraqan in ago disaipel gidimun tonad tigibar ton. ⁵¹ Gibar tonsamo God Yesus waqim ad Heven-ib tugwalah. ⁵² Gwalehsamo disaipel gibak-bakan ulum laquwim turad in Yesus abin tiqiluwiy. Abin iluwim hulosadmo in muleqim ginad ayahmo dimniysa Jerusalem-ub tilehiy. ⁵³ Lehim osad kam bunmo in Tempel-ib leheq God abin tiqiluw yaqay.

Jon o Yesus awagamun Jon mar tonta Gamuk ameb lehaqta

Jon in Yesus awagamun dimunta ka mar tonim in kazaq bilam, Yesus in God ago gamuk nog ham. In mat diq iyim i gilikmanib osad in Amam God ago gibilan kamta ham. Jon nazaq haqad in Yesus abin kazaq i giqisihun. Yesus in God atatin diqta. Teq God in mat atowun emim eman on mataw gilumsihnan bolta amatin na Yesusmo. Jon anad on mataw Yesus awagamun ka hurit kemad teq in abin nazaq diqta anan helmo haq daqay haqad in wagam ka mar tonta. In anad am, On mataw Yesus anan helmo haqeç teq in kayeqmo kuluwa-kuluwmo tuqos daqay ham (Jon 20.31 nab ni ahol waq). Na ezaqgo Yesus inmo ahol anan bilam, Ya bilaqne bret dimunta Heven-ib usim hitimta na nog ham. On mataw ya iwaqeç inon neq daqayta na in gigemman a ta hi moq daqay ham (Jon 6.32-35).

Mataw ezeqman Matyu, Mak teq Luk in gigo wagam mar tonan abeb ulig asor le tihiqiyen teq Jon in wagam ka mar ton. Teq Yesus ago gamuk kabemmo mataw ezeqman na a hi mar toniyta na Jon amomo wagam kab mar tonta.

Teq Jon 7.53 nab ni lain araq kazaq hureqan ussa ahol waqdaq. Mataw asor in 7.53-8.11 na anan bilaqay, Jon gamuk na a hi mar ton daqagya haqayta. Naqmo mat araq mar tonta haqayta.

God ago gamuk in mat diq iyim bo on mataw gilikmanib gwahtiqim os

God ago Gamuk on mataw giqeman kuluwa-kuluwmo osayta na in mat diqmo iyim og kab gwahtim

¹ Kwaziq diqmo God ago Gamuk in tuqosta. Gamuk na God inaq osad teq Gamuk na in God-mo. ² Nagah bunmo og kab a hi gwahtiqsamo mebmehmo diq Gamuk na God inaq osta. ³ Gamuk naqmo in nagah bunmo giqamta. Nagah araq diq dante araqab a hi gwahtimta. Haiqgam. ⁴ Teq on mataw kayeqmo kuluwa-kuluwmo osayta na alulin Gamuk nabmo usaqta. Gamuk na in saw anuwan nog iyad on mataw bunmo gimalib worireqaqta. ⁵ Teq saw anuwan na romriqab oysa romriq in saw anuwan na a hi wolmiyaqta.

⁶ Ari God in mat araq eman bol. In anan Jon haqayta. ⁷ Jon saw anuwan na anan

bilaq kemnan bolta. In on mataw gibilenid in bunmo saw anuwan na anan helmo haq daqay haqad in bolta. ⁸ Inmo saw anuwan na a haiqta. Haiqgam. In saw anuwan na anan on mataw gibilenan haqad bolta.

⁹ Saw anuwan hel diqta on mataw bunmo gimalib worireqaqta na in og kab tugwahtiqyaq. ¹⁰ Gwahtiqadmo in on mataw og kabta gilikmanib tuqos. Inmo nagah bunmo og kab gigeman gwahtiqiyta. Teq on mataw og kabta in mat na ahol waqdad in ahol a hi waq hasiy. ¹¹ Mat na asenlulmo diq gigo hib bolta teq in asenlul na baymuzim a hi waziniy. ¹² Ari on mataw mat na ahol waq hasim waziniyta na bunmo, mat na in giqeman in God ago onminimo diq tiqiyi. Na ezaqgo on mataw na in anan helmo haqiyta na ago iyan. ¹³ Teq on mataw God ago onmin iyiya na in mataw og kabta gilulib a hi gwahtiqiyta. Teq in og ka ago daqib a hi gwahtiqyimo. Mataw ginad bilaqsa giqohan amun emayta nazaq in a hi gwahtiqiy. Haiqgam. God-mo in on mataw na giqeman in ago onmin tiqiyiyya.

¹⁴ Ari God ago gamuk na in mat diq iyim i gilikmanib osta. Ossa i in ahol anuwan ahol tuwawta. I in ahol anuwan ahol waqdad in bilaqne God atatin amulikmo osaqtta naqmo ahol anuwanta ahol waq bog iy. Teq i ahol waqsa in agem dimunta igaqta na teq in gamuk heltaqmo bilaqqaqta na in aholib ate gwalim ussa i ahol tuwaw.

¹⁵ Teq Jon in mat naqmo anan on mataw gibilenad in lileyim kazaq gibilan, Ya mat naqmo anan gibilenad kazaq bilayta ham. Mat ya ibeb boldaqta na in yaqgo damebta hay ham. Na ezaqgo hay ya a hi gwahtiqsamo in tuqosta na ago iyan haqad ya bilayta ham.

¹⁶ Teq mat nawa Jon anan bilamta na in agem dimunta igad gamuk helta gibilenaqta na aholib ame gwaldad usim wazbalim i gimalib woqaqta. Woqsa in aholib daq dimdimunta usaqta na amalib in i bunmo tigidimun tonaq. Gidimum tonsa i daq dimdimunta na loyinsa in nagah mebmehmo God igtta na uriyam bugaq. ¹⁷ Na ezaqgo God ago maror in mebmehmo igtta na Moses abenab bolan i wawta. Ari God agem dimunta igaqta na teq in ago daq helta nagan bunmo Yesus Krais-mo abenab bolta. ¹⁸ Mat araq ame anonab God asit ahol a hi wamta. Haiq diqmo. God atatin amulikmo osaqtta naqmo in God giqisihunta. Inmo God diqta teq in Amam abuknibmo osaqtta. In amomo God eman i gimeb ulal iysa i ahol waqauqta.

*Jon mataw huz negyaqta na in on
mataw gamuk gibilenyaq
(Matyu 3.1-12; Mak 1.2-8; Luk 3.15-17)*

¹⁹ Ari Juda mataw aseseqta na in mataw tamaz emayta gigo asor teq Liway mataw Tempel-ib kabiy emayta gigo asor gigeman in Jerusalem hulosim Jon ago hib bolim tis-usumun ugiy, Ni nog diq? haqiy. ²⁰ Haqan Jon gibilen kam. Gibilen kemad in ahol alulin na a hi isihyaq. Haiq. In gamuk bilaq sireqimmo kazaq bilam, Ya Krais a haiq ham. ²¹ Haqan mataw na a ta susumun ugiy, Ta ezaq? haqiy. Luweq ni Elaija iydaq haqiy. An Jon bilam, Haiq ham. Haqan in bilaqiy, Luweq i God ago nantut amen emad osauqta na ninmo iydaq haqiy. Haqan Jon bilam, Na haiqmo ham. ²² Haqan in buloniy, Ni nog? haqiy. I muleqeet ta leheq mataw i gigeman bolta na naga gamukin gibilenam? haqiy. Ta ninmo nihol anan ezaq haqaq? haqiy. ²³ Haqan Jon bilam,

Mat aqez saw amatawun haiqtab lileyim bilaqaq, Ne Iyahta ayon dan wasti-tayiq haqaqta na yaqmo kawa ham.

Aisaya 40.3

Kwaziqmo God ago nantut Aisaya bilamta nazaq ham.

²⁴ Ari mataw ginan Farisi haqayta naqmo in mataw na gigeman Jon agerab boliyya. ²⁵ An Jon in gigo susumun amenin nazaq eman mataw na buloniy, Ni bilaqaq, Ya Krais a haiq haqaq haqiy. Ad ya Elaija a haiqmo haqaq haqiy. Teq ya God ago nantut na a haiqmo haqaq haqiy. Nazaq iyan teq ni nagaqgo mataw huz negaq? haqiy. ²⁶ Haqan Jon amenin emim bilam, Ya mataw yuwibmo huz negaiqta ham. Ari ne gilkmanbi mat araq nawa turaq ham. Teq ne in ago a hi huriyatya ham. ²⁷ Mat na ya ibeb nawa bolaqta ham. In abin ya ibin uriyamta ham. Ya in ahaqenibta ham. In yaqgo Iyahta ham. Ya in ago kabibiy mat samanta ham.

²⁸ Jon yuw Jodan aqurumun kozaq ban uliq anan Betaniy haqayta na agerab luwad mataw huz negsa daq na gwahtimta.

Jesus in God ago Sipsip Amidon

²⁹ Ari tarom iyim saw tihaustitayan Jesus Jon ago hib bolsa in ahol tuwam. Ahol waqadmo in on mataw nab turiyta na gibilemim bilam, Ne ahol waqiy ham. God ago Sipsip Amidon* kawaqmo tubol ham. In teq on mataw og saw bunmo gigo daq meqinta tigiwalemdaq ham. ³⁰ Ya kwaziqmo mat kaqmo anan bilayta ham. Ya bilay, Mat araq ya ibeb boldaqta na in yaqgo danmepta hay ham. Na ezaqgo hay ya a hi gwahtiqsamo in tuqosta na ago iyan hay ham. ³¹ Yaqmo in ago a hi huriitta ham. Teq ya bolim on mataw huz negaiqta ka alulin in kazaq ham. Ya on

mataw huz negsa mat ko Isrel gimeb ulal iydaq haqad ya kazaq emaiqta ham. ³² Jon nazaq haqad teq in kazaq gibilan, God ago Bugaw Dimunta ah husta nog iyim Heven hulosim gehitiqim mat ko aholib soqotim ossa ya ahol way ham. ³³ Yaqmo in ago a hi huriitta ham. Teq mat ya iqeman ya bolim mataw yuwub huz negaiqta na in ya ibilenim bilam, Yaqgo Bugaw Dimunta gehitiqeq mat araq aholib soqoteq ossa ni ahol waqad teq ni ninad emdaq, Mat God ago Bugaw Dimunta amalib on mataw huz negdaqta na amatin nawaqmo haqdaq haqad in ya ibilan ham. ³⁴ An ya daq na ahol tuway ham. Ahol waqim ya bilaqaiq, Mat ko in God atatin haqaiq ham.

Yesus disaipel gigermo giwam

³⁵ Ari tarom iyim saw tihaustitayan Jon ago disaipel giger nenaq saw nab a ta turiy.

³⁶ Tursa Yesus bo lehsa Jon ahol waqad tibilam, Ne ahol waqiy ham. God ago Sipsip Amidon kowaqmo tilehaq ham. ³⁷ Haqan disaipel giger na nazaq huritadmo in Jesus muzim inaq tilehiy. ³⁸ Lehsa Yesus ahol buliyim giger na muzim bolsa gibiyad in gibilan, Ne naga nagunay? ham. An in buloniy, *Rabbi* haqiy ni edob osaqtta? haqiy. (Hibru nanib gamuk ‘rabbi’ na alulin in ‘tisa’ haqayta.) ³⁹ An Yesus gibilan, Ne boleq ahol waqiy ham. Haqan giger na lehim Yesus ago bit in osaqtta na ahol tuwaqiy. Ahol waqad luwsa in 4 kilok imisor nazaq iysa iyan in Yesus inaq tuqosiy.

⁴⁰ Mataw giger Jon ago nan huritum Yesus muzim inaq lehiyta na gigo araq na anan Andru haqayta. In abab anan Saimon Pita.

⁴¹ Abeb Andru muleqim ta bolim iturimmo in le abab Saimon nagunim ahol waqadmo tubulon, I Mesaya ahol tuwaw ham. (Hibru nanib gamuk ‘Mesaya’ na alulin in ‘Krais’† haqayta.) ⁴² Andru nazaq bilaqim teq in Saimon waqim ad Yesus ago hib tilah. A lehan Yesus in Saimon ahol waqad bulon, Ni Jon atatin Saimon ham. Abeb ni ninan Sifas haqad biy daqay ham. (Hibru nanib gamuk ‘Sifas’ haqayta na alulin in ‘Pita’ haqayta.)

Yesus Filip ayow Nataniyel inaq gililewun

⁴³ Ari tarom iyim saw tihaustitayan Jesus saw Galiliy-ib lehgo anad tiqam. Anad emim in lehadmo mat araq anan Filip haqayta na ahol waqim tubulon, Ni ya imuzeq bol ham. ⁴⁴ Filip in uliq Betsaida-ibta. Uliq na in Andru abab Pita inaq gigo uliqta. ⁴⁵ Ari Jesus nazaq Filip bulonan in eraqim le mat araq anan Nataniyel haqayta nagunim ahol waqad tubulon, Moses in

* **1:29:** † **1:41:** Gamuk ‘Krais’ ka alulin in kazaq: “God mat emid bo i gilumsihdaqta na amatin” haqayta.

God ago maror agamukan aduganib mat ananin mar tonta na amatin gwahtiqañ i ahol tuwaw ham. I ginad emauq, God ago nantut kwaziqmo mat ananin mar toniyta amatin nawaqmo tubol haqauq ham. Na in Josep atatin Yesus uliq Nasaret-ibta ham.⁴⁶ Haqan Nataniyel bilam, Uliq Nasaret abin meqinta ham. Daq araq dimunta nazaq uliq nab a hi gwahtiqañ daqag ham. Haqan Filip bilam, Nab iysa ni bo ahol waq ham.

⁴⁷ Ari Yesus in Nataniyel bolsa ahol waqadmo in anan bilam, Mat ko ahol waqiy ham. Ko Isrel gigo mat diqmo araq ham. In aholib nan katiyta araq a hi usaqta ham.⁴⁸ Haqanmo Nataniyel tisusumun ug, Ni ezaq tonim yaqgo tuhurit? ham. Haqan Yesus amenin emim bilam, Filip a hi nililewunsa ni ay fik ahaqenib ossa ya nibiyta ham.⁴⁹ Haqanmo Nataniyel bilam, Tisa ham ni God atatin ham. Ni Isrel gigo king ham.⁵⁰ Haqan Yesus bilam, Ya bilay, Ni ay fik ahaqenib ossa ya nibiy haya na ago ni ya inan helmo haqaq e? ham. Na in nagah amik ham. Teq ni yaqgo daq aseseqta tigibiydaq ham.⁵¹ Haqad in bulon, Ya helmo nibilenaiq ham. Abeb kait misireq nog iyeq aqez hassa angelo asor Mat Atatin ago hib gewoqad Heven-ib gwalehsa ni tigibiydaq ham.

Yesus in ahol abin teq in ago zaway emid ulal iygo haqad in daq azawayin inaqtä giqemyaq

2

Yesus yuw diq buliyan wain ayun iy

¹ Ari kam gigermo tihiqyan ezeqmanta nab saw Galiliy-ib uliq araq anan Kana haqayta nab mat araq awe inaq an waqsa ahumbabun tuwoliy. Sa Yesus anen humab nab os.² Ossa mataw nabta na in Yesus ago disaipel nenaq gimen nan eman in humab nab bolim osiymo.³ Ossa mataw wain ayun uluw bugan tihiqiy. Hiqiyan Yesus anen lehim atatin tulon, Mataw gigo wain ayun tihiqiy bug ham.⁴ Haqan Yesus amenin emim bulon, Kanen ham ya inad usaq nazaq nogmo ni ninad a hi usaq ham. Ya ihol ulal tondaiqta akaman teqmo ham.⁵ Haqan anen in kabibiy mataw nab turiyta na gibilan, Ya itatin ezaq gibilenid ne emmo emiy ham.

⁶ Ari bit nab reb gigib sisoqiya aseseqta 6 nazaq giturta. Reb na mataw yuw soqoreq a bo gitenid ussa teq in Juda gigo gunun muzinad huz yaqayta arebun. Reb

na amulik-mulikmo aduganib yuw ayahmo 100 lita nazaq tenid osyacta.

⁷ Ari Yesus in kabibiy mataw asor gibilenim bilam, Reb ko bunmo yuw soqoreq a boleq gitenid ame gwal bugan ham. Haqan mataw na le yuw soqorim a bolim reb na gitenan amemo gwal bug.⁸ An in gibilan, Ari ne yuw teniyyta na asor reb amiktab soqoreq a leheq mat didaq wamuzaqta na ugyi ham. Haqan kabibiy mataw yuw na asor soqorim a lehim mat didaq wamuzaqta na tuqugiy.⁹ Ugan in uluw waqan yuw diq na in wain ayunmo tiqiy. Teq in wain ayun na edob waqiyta na ago in a hi hurit. Kabibiy mataw yuw soqoriyta naqmo hurityta. Nazaq iyan mat didaq wamuzaqta na in mat aw waqqaqta na bulonan agerab tubol.¹⁰ Bolan in bulon, Mataw bunmo iturimmo gigo mareren wain ayun dimunta negan uluwayta ham. Uluwim in ginad dimunta hulos nog iysa teq in wain agon inaqtä negan uluwayta ham. Ta ni nazaq a hi amta ham. Wain meqinta tuquluw bugan teq ni wain ayun dimun diqta ka abeb a bol ham.

¹¹ Na kam ameb diqta Yesus daq azawayin inaqtä am. In uliq Kana-ib saw Galiliy-ibta nab daq na amta. Emim in ahol abin ulileman usta na tuqulat ton. Ulal tonan in ago disaipel ahol waqad anan helmo tihaqi.

¹² Ari daq na tihiqyan Yesus in anen teq in amagniz teq in ago disaipel nenaq uliq Kapaneam-ub tuwolehiy. Wolehim in uliq nab kam asor tuqosiy.

*Mataw Tempel-ib mani akabiyan emsa Yesus gimuzan asan ban gwahtiqañ
(Matyu 21.12-13; Mak 11.15-17; Luk 19.45-46)*

¹³ Ari Juda gigo lotu akaman ayahta anan Pasova haqay na bolim sinsin tiqiyamo Yesus uliq Kapaneam hulosim Jerusalem-ub tugwalah.¹⁴ Gwalehim in Tempel ago gel aduganib mataw bulmakau teq sipsip teq ah* gizayad amenin waqad ossa in tigibiy. Ad mataw saw haresmo gigo mani waqad amenin Tempel ago mani negayta na in gigo kabiy emad ossa Yesus tigiblymo.¹⁵ Gibiyad in yuk abatan asor giwaqim tuq tonim in mataw na gigo bulmakau teq sipsip bunmo ginolad gimuzan le Tempel hulosim gel asan ban tugwahtiqañ yaqay. Gwahtiqañ in mataw mani akabiyan emad osiyya na gigo mani wazbalan woosa gigo ban inaqmo wazim tuwazbilbalmo.¹⁶ Ad in mataw ah gizayad osiyya na gibilan, Ne nagah na bunmo giwaqeq asanib a lehiy ham. Ne ya imam ago bit emid in maket abitan nog hi iyan ham.¹⁷ Haqsa in ago

* **2:14:** Karuw nagan in God ayon tamaz emgo gizay yaqayta.

disaipel gamuk araq God ago marib usaqta na anadin tiqemiy. Gamuk na bilam, Ya ning bit ka inad diq ugsa ananin bilaqaiq ham.

Buk Song

9.9

¹⁸ Ta teq Juda mataw aseseqta asor daq na ahol waqad in Yesus buloni, Ni naga daqin azawayin inaqta gigisihunid i ahol waqad ginad emam, Ni daq kazaq emgo ni nibin inaq haqam? haqly. ¹⁹ Haqan Yesus gibilan, Ne Tempel ka wol inerid kam ezeqmanmo aduganib ya wazid a ta eraqdaq ham. ²⁰ Haqanno Juda mataw aseseqta na bilaqiy, Ulig 46 nazaq aduganib mataw Tempel ka wazan eraqsa teq kabiy a hi hiqiyaq haqiy. Ta ni kam ezeqmanmo aduganib wazid a ta eraqdaq e? haqiy. ²¹ Naqmo Yesus inmo ahol anan bilaqad in bilam, Tempel ham. ²² Nazaq iyan abeb Yesus hodhod hulosim ta eramta nab in ago disaipel gamuk nawa in bilamta na anadin tiqemiy. Anadin emad in God ago gamuk anan helmo haqad teq in Yesus ago gamuk na anan helmo tihaqymo.

Yesus mataw bunmo gigo huritta

²³ Ari Yesus uliq Jerusalem-ub Pasova ago ahumabun ayahta nab osad in daq azawayin inaqta emsa on mataw kabemmo ahol waq yaqay. Ahol waqad in Yesus anan helmo tihaq yaqay. ²⁴ Ta teq Yesus in mataw na ginan helmo a hi haqyaq. Ad inmo ahol mataw na giholib a hi emyaqmo. Na ezaqgo in mataw bunmo gigo tuhurit bugta. ²⁵ Teq mat araq Yesus bulonan teq in mataw na gigo huritta nazaq a haiq. Haiqgam. Inmo anadibmo mataw bunmo gimugan ezaq usaqta na ago in tuhurit bugta.

3

Yesus Nikodemus inaq gamuk bilam

¹ Ari Farisi araq anan Nikodemus haqayta in osyaq. Mat na in Juda gigo mat marorta araq. ² In taromab bolim Yesus tubulon, Tisa ham i ningtu tuhurit ham. God ni ninaq osaqla ham. In ninaq a hi osid teq ni daq azawayin inaq emaqta nagan a hi em nag ham. Nazaq iyan i ginad emauq. God-mo niqeman ni bolim i suleq igaqta haqauq ham. ³ Hagan Yesus amenin emim bilam, Ya helmo nibilenaq ham. Mat aw nog in zaway ulilibta na amalib gime gigerta mutur a ta hi gwahtiqaq in God ago maror aduganib le a hi gwahtiqaq daqay ham.

⁴ Haqan Nikodemus bilam, Mat nengab tiqiyta ezaq toneq ame gigerta mutur a ta gwahtiqaq? ham. In anen agemab a ta lehid anen a ta emdaq e? ham.

⁵ Haqan Yesus bilam, Ya helmo nibilenaq ham. On mataw yuw teq God ago Bugaw

ago zaway gimalib mutur a hi iyeq in God ago maror aduganib le a hi gwahtiqaq daqay ham. ⁶ On mataw og kabta in onmin in gimo gihol nogta giqemaya ham. Sa God ago Bugaw in onmin inmo nogta giqemaya ham. ⁷ Ya nibilenim bilay, Ni zaway ulilibta na amalib nime gigerta mutur a ta hi gwahtiqaq ni God ago maror aduganib le a hi gwahtiqaq hayta na ago ni ninadnad hi em ham. ⁸ Tim anadibmo saw bunmo lehaqta ham. Lehsha ni ahulanmo huritaqta ham. Huritad in ezaq bolta na teq in ezaq lehaqta na ago ni a hi huritaqta ham. Ari God ago Bugaw bolim mataw giqeman gimugan mutur iyayta na in nazaqmo ham.

⁹ Haqan Nikodemus bilam, Daq nazaqta na ezaq teq i giholib gwahtiqaq? ham.

¹⁰ An Yesus bulon, Na ta ezaq? ham. Ni Isrel gigo tisa araq ham. Ezaq tonim ni nagah ka ago ninad a hi em hasaq? ham. ¹¹ Ya helmo nibilenaq ham. I nagah ginad tiqem hasta naqmo agamukan bilaqauq ham. Bilaqad i nagah gimeb ahol tuwawta naqmo ago i ne gibilenaq ham. Teq ne i gigo gamuk na gileh ugayta ham. ¹² Ya nagah og kabta ago gibilensa ne anan helmo a hi haqayta ham. Ta ezaq teq ya nagah Heven-ibta na ago gibilensine ne anan helmo haq daqay? ham. ¹³ Mat araq Heven-ib a hi gwalahta ham. Haiq ham. Mat Atatin Heven hulosim hitimta naqmo amomo Heven ahol wamta ham.

¹⁴ Teq Moses kwaziqmo saw samantab nagah ahulinaqta adulan wazan eramta nazaqmo mataw in Mat Atatin wazid eraqeq titurdaqmo ham. ¹⁵ Eraqeq tursa teq on mataw in ahol waqad anan helmo haq daqayta na bunmo in kayeqmo kuluwmo tuqos daqay ham.

¹⁶ Ari God in on mataw og saw bunmo ginan anad bilaqsa iyan in atatin amulikmo osta na tinag. In atatin negid mat aw nog atatin na anan helmo haq daqayta na bunmo a hi moq hasad in kiaeqmo tuteqmo tuqos daqay haqad in nazaq amta.

¹⁷ Na ezaqgo in atatin on mataw gilum kemeq giyon bilaqid moq daqay haqad in eman og kab a hi bol. Haiqgam. In anad am, Ya atatin leheq on mataw gimen dante wastitayid ya gilumsiheq giwaqid a hi moq daqay haqad in atatin eman bolta.

¹⁸ Nazaq iyan on mataw God atatin anan helmo haqayta na bunmo in God ameb dimunmo osayta. God in giyon bilaqan in moq hasgo a hi osayta. Ari on mataw God atatin anan helmo a hi haqayta na God in giyon tibilaqan in moq hasgo tiqiyim osayta. Na ezaqgo in God atatin amulik na anan helmo a hi haqayta na ago iyan.

¹⁹ Teq God on mataw gilum kemim gigo daq amenin negaqla na alulin in kazaq. Saw anuwan og kab tugwahtim. Gwahtiqaq teq

on mataw saw anuwan na anan ginad a hi bilam. Haiqgam. On mataw na gigo daq bunmo meqin iyim iyan in romriqmo anan ginad bilam. ²⁰ Na ezaqgo on mataw daq meqinta emayta na in saw anuwan anan ginad a hi bilaqsa in saw anuwanib a hi gwahtiqayta, luweq in gigo daq meqinta nagan ulal iydaq haqad. ²¹ Ari on mataw daq helta emayta na in saw anuwan ahol waqad bolayta. In God anad muzinim daq emayta nagan ulal iydaq haqad in saw anuwanib nab bo tugwahtiqayta.*

Jon mataw huz negyaqta na in Yesus anan bilaq siram

²² Ari daq na tihiqiyan Yesus ago disaipel nenaq saw Judiya gigo og araqab tilehiy. Lehim in saw nab luw osad teq in on mataw tuhuz negyaq. ²³⁻²⁴ Sa Jon saw nagab on mataw tuhuz negyaqmo. Saw anan Ainan haqayta saw Selim agerab usaqta nab yuw ame ayatha usaqta iyan Jon nab luwyatqa. Kam nab Jon a hi irqursamo on mataw kabemmo bolsa in tuhuz negyaq.

²⁵ Teq Jon ago disaipel asor in Juda mat araq inaq an tumug yaqay. Na in Juda gigo daq araq in gihol huz ugim God ameb gihol abusirinan hiqiyaqta na ago ananin bilaqad an mug yaqay. ²⁶ Ad teq in bunmo Jon ago hib bolim tubuloni, Tisa haqiy. Mat ni ninaq yuw Jodan aqurumun kozaq ban ossa ni anan bilamta na in on mataw tuhuz negaqmo haqiy. Sa on mataw bunmo inmo ago hib tilehay haqiy. ²⁷ Haqan Jon gibilan, God mat abenab kabiyl amta naqmo amomo in tiqemdaqta ham. ²⁸ Ya kwaziqmo ne gibilenim bilay, Ya Krais a haiq hay ham. God ya iqeman ya Krais ago danmeb bolta haqad ya bilay ham. Ya nazaq bilaqsa ne tuhuritiy ham. ²⁹ Mat aw wamta naqmo in aw na aduw diq ham. Teq mat na ayow in adek emim turad in ayow aw wamta na aqez huritad in anad ayahmo diminiyaq ham. Nazaq iyan muran ya inad tidimniy hasaq ham. ³⁰ Mat ko abin ayah tiqiydaq ham. Sa ya ibin amik iydaq ham.

³¹ Ari Mat ulilib osim bolta naqmo in nagah bunmo gigo Iyahta iyim osaqla. Teq mat abe alulin og kab usaqta na in og kabta iyim iyan in og kaqmo ago nagahta anan bilaqaqta. Ari mat Heven-ib osim bolta na in nagah bunmo gigo Iyahta iyim osaqla. ³² Osad in nagah ameb ahol wamta na teq in gamuk huritta naqmo in i gibilenaqta. Ta teq mataw in ago gamuk na anan helmo a hi haqayta. ³³ Ari on mataw in ago gamuk huritim anan helmo haqayta na in

kazaq i gibilenay. God gamuk heltaqmo bilaqaqta haqay. ³⁴ Na ezaqgo God in ago Bugaw Dimunta ayahmo mat na ugim teq in eman bolim in God ago gamukmo diq bilaqaqta. ³⁵ Amam in atatin na anan anad diq bilaqsa in zaway bunmo atatin abenab tiqam. ³⁶ Nazaq iyan on mataw God atatin anan helmo haqayta na in kayeqmo kuluwa-kuluwmo tuqos daqay. Ari mat God atatin ago gamuk othasaqta na in kayeqmo kuluwa-kuluwmo a hi osaqdaq. Haiqgam. God in mat naqanta agem meqinta ugsa in osaqla.†

4

Yesus saw Samariya-ib aw araq inaq gamuk bilam

¹⁻³ Ari Farisi gamuk kazaq hurityi. Yesus mataw kabemmo yuwub gihuz negsa in ago disaipel tiqiyay haqiy. Sa Jon haiqgam haqiy. (Teq Yesus-mo mataw a hi gihuz negyaqta. Haiqgam. In ago disaipel naqmo mataw gihuz neg yaqayta.) Ari Yesus anad am, Mataw kabemmo yaqgo disaipel tiqiyita na ago Farisi tuhuritiy ham. Haqad in saw Judiya na hulosadmo in muleqim saw Galiliy-ib ta lah. ⁴ Lehad dan in lehyaqta na saw Samariya-ib gwah-tiqim lahta. ⁵ Nazaq iyan in dan na muzim lehim in Samariya gigo uliq araq anan Sikar haqayta na agerab tugwahtim. Uliq na in Jekob atatin Josep og ugta na agerab usaqta. ⁶ Teq saw nab yay araq kwaziqmo Jekob yuw waqgo haqad yay tayta in nab usaqta. Sa Yesus bolad luwim zeq ayahtab 12 kilok nazaq tiqiy in yuw yayibta nab gwahtiqim ahol husisiqsa anamur emad tuqos.

⁷ Ossa Samariya aw araq yuw soqornan tubol. Bolan Yesus bulonim bilam, Yuw soqoreq asitmo yagid uluwiq ham. ⁸ (Na Yesus ago disaipel bunmo uliq Sikar-ib diqaq zaynan tilehiy.) ⁹ Ari in bilam, Yuw yag uluwiq haqan Samariya aw na bulon, Ni Juda mat araq ham. Sa ya Samariya-ib awta ham. Ta ezaqgo ni bilaqaq, Yuw asit yagid ya uluwiq haqad? ham. (Na ezaqgo Juda in Samariya nenaq an gihar ugad in garab a hi luw osayta iyan aw na nazaq bilam.) ¹⁰ In nazaq haqan Yesus amenin emim bilam, Ni God ago naw na ago a hi hurit kemaq ham. Teq mat kawa yuw uluwgo susumun nigqaqta ka ago ni ninad a hi em hasaqmo ham. Ni nagah giger na ago huritta iyeq teq ni susumun ugid in yuw dimunta tutimmo gwahtiqad usaqta na nigid ni tuquluw nag ham.

* ^{3:21:} Mataw kabemmo ginad emay, Gamuk ka in Jesus aqez a haiq haqayta. Ka Jon-mo gamuk amta haqayta.

† ^{3:36:} Mataw kabemmo ginad emay, Gamuk ka in Jon wagam mar tonta naqmo aqez usaqta haqayta. Ka Jon mataw huz negyaqta gamuk bilamta a haiq haqayta.

¹¹ In nazaq haqan aw na bulon, Mat Iyah ham, ni nagah araq amalib yuw soqoreq yagdaqta na haiqgam ham. Ta yay ka sisaq diqmo ham. Ni yuw dimunta tutimmo gwahtiqaq usaqta na edob waqdaq? ham. ¹² I gises Jekob-mo yuw yayibta ka tay igtat ham. Ad inmo ago onmin teq ago sipsip, bulmakau nenaqmo in yuw ka uluw yaqayta ham. Ta teq ni in uriyamaq e? ham.

¹³ Haqan Yesus amenin emim bulon, Mataw yuw yayibta ka uluwim teq in yuwnan a ta moqayta ham. ¹⁴ Ari mat aw nog in yaqgo yuw ya negdaiqta na uluweq in yuwnan a ta hi moq daqay ham. Haiqgam ham. Ya yuw negdaiqta na in bilaqne yuw og aduganib tutimmo gwahtiqaqta nazaq nog in giholib usdaq ham. Yuw na mataw giduganib useq gwahtiqaq gigemsa in kuluwa-kuluwmo tuqos daqay ham. ¹⁵ Haqan aw na bulon, Mat Iyah ham, ni yuw na yagid uluwiq ham. Uluweq teq abeb ya yuwnan a ta hi moqad ya yuw sogornan kab a ta hi boldaiq ham.

¹⁶ Haqan Yesus bulon, Ni le niduw buloneq inaq kab muleqeq ta boliy ham. ¹⁷ Haqan aw na amenin emim bilam, Ya iduw haiqta ham. An Jesus bulon, Ni bilam, Ya iduw haiq hamta na ni dimunno bilam ham. ¹⁸ Kwaziqmo ni mataw abaynagin nazaq giwamta ham. Giwaqim teq ta mat muran ni inaq osaqla na in ni niduw diq a haiq ham. Ningo gamuk na in hel diqtaqmo ham.

¹⁹ Haqan aw na bilam, Mat Iyah ham, muran ya ningi tuhurit ham. Ni God ago nantut araq ham. ²⁰ I gisesan kwaziqmo garah kabmo humab woleq lotu em yaqayta ham. Ta teq ne Juda bilaqay, Uliq mataw lotu em daqayta na Jerusalem-mo haqayta ham. ²¹ An Jesus bulon, Neng ham ya heltaqmo nibilenaiq ham. Abeb ne garah kab Gimam Iyahta ayon lotu a ta hi em daqay ham. Ad ne Jerusalem-ub leheq lotu a hi em daqaymo ham. Kam na tugwahtiqaq tonaq ham. ²² Ne on mataw Samariya-ibta, ne nog diq ayon lotu emayata na ago ne ginad a hi em hasayta ham. Ari i Juda on mataw God ayon lotu emgo i ginad em hasauqta ham. Na ezagaq ham God in on mataw gilumsiheq ta giwaqnan haqad in kabiy na alulin i Juda gigo hib eman gwahtiqaq ham.

²³ Abeb on mataw Gimam Iyah ayon lotu hel diqta tiqemnan haqad teq in God ago Bugaw Dimunta ago hib zaway waqeq daq helta amalib lotu tiqem daqay ham. In nazaqmo Gimam Iyah ayon lotu emsa in ginan anad tibilaqdaqta ham. Kam na gwahtiqaq tonad teq in tugwahtimta nog

tiqiyaq ham. ²⁴ God in bugawta ham. Nazaq iyan mataw in ayon lotu emnan haqad in ago Bugaw Dimunta ago hib zaway waqeq teq in daq helta amalib lotu tiqem daqay ham. ²⁵ Haqan aw na bulon, Mesaya* teq boldaqta na ago ya tuhurit ham. Mataw in anan Krais haqayta na ham. In boleq nagah bunmo ago i tigibilendaq ham. ²⁶ Haqan Yesus bilam, Mat naqmo kawa ni ninaq gamuk tibilaqaq ham. Na yaqmo ham.

²⁷ In nazaq bilaqsa ago disaipel didaq zaynan lehiyta na muleqim ta boliy. Bolimmo Yesus aw na inaq gamuk bilaqsa in gibiyad ginadnad tiqem yaqay. Ta teq in Yesus susumun ugim bilaqiy, “Aw ka naga waqnan?” teq “Nagaggo ni aw ka inaq gamuk emaq?” nazaq in a hi susumun ugiy.

²⁸⁻²⁹ Ari aw na in ago yuqsan nab hulosan ussamo in muleqim aquliqab tilah. Lehim in mataw tigibilan, Ne bo leheq mat ko ahol waqiy ham. Ya kwaziqmo daq giqemta nagan bunmo ago in ya tiqibilen bug ham. Luweq mat na in Krais-mo iydaq ham. ³⁰ Haqan mataw bunmo era uliq na hulosadimo in Yesus ahol waqnan ago hib tilehiy.

³¹ Ari aw na le ago walmataw gibilenad luwsa disaipel Yesus buloniy, Tisa haqiy ni didaq ka araq neq haqiy. ³² Haqan Yesus gibilan, Yaqgo didaq inaq ham. Teq ne yaqgo didaq na ago ginad a hi em hasay ham. ³³ In nazaq haqan disaipel an bulonim bilaqiy, Nabag mat araq in ayon didaq a bolim tuqeq daqagya haqiy. ³⁴ Haqan Yesus gibilan, Yaqgo didaq na in kazaq ham. Ya mat igeman bolta na anad muzad ago kabiy emid hiqiy bugdaqta naqmo in yaqgo didaqla ham.

³⁵ Ne bilaqay, Didaq kabiyab teqmo zilimaq haqay ham. Kalam aweweinqmo hiqiyid teq i tayam haqay ham. Ta teq yaqmo kazaq gibilendaq ham. Ne gime rireeqeq saw ahol waq kemiy haqaiq ham. Didaq kabiyab tizilim bugim usaq ham.

³⁶ Mat didaq anon tayaqta na in kabiy emad anawun waqaqta ham. Teq in didaq anon ginuwan osayta na dimunno kuluwa-kuluwmo tuqos daqay ham. Ossa mat didaq layta na teq mat didaq taya na in giger gigo kabiy anon na gibiyad in araqibmo ginad dimniyasa osayta ham. ³⁷ Nazaq iyan gamuk araq mataw bilaqad luwayta na in heltaqmo ham. In bilaqay, Mat araq didaq leyaqta haqay ham. Leyan ta mat araq bolim didaq na tayaqta haqay ham. ³⁸ Ya ne gigeman ne didaq anon gitaynan lehiyta ham. Didaq na ne akabiyan a hi emiyta ham. Haiqgam ham.

* 4:25: Ni Jon 1.41 nab teq gamuk ‘Mesaya’ ka alulin ahol waqdaq.

Mataw ta asor kwaziqmo didaq na akabiyan tiqemiyta ham. Eman ne mataw na gigo kabiya ahaqenib lehim ne in gigo kabiya asor tiqemaymo ham.

³⁹ Ari aw na bilam, Mat na yaqgo daq bunmo ya emad luwta na ago tigibilen bug ham. Haqsa Samariya on mataw uliq nab osiyya na kabemmo in aw na ago gamuk huritim Jesus anan helmo tihaqiy. ⁴⁰ Haqad in Jesus ago hib lehim in ne-naq osgo haqad buloniy. Bulunan Jesus uliq nab kam gigermo a ta os. ⁴¹ Ossa mataw kabemmo Jesus ago gamuk huritim in helmo diq tihaq yaqay. ⁴² Haqad in aw na bulon yaqay, Mebmehmo ninmo mat ka ago gamuk huritim a bolim gibilenan i huritim anan helmo hawta haq yaqay. Ari muran igmo diq in ago gamuk huritim i in ago tuhurit kemauq haq yaqay. Hurit kemad i ginad emauq, Mat on mataw bunmo gilumsiheq gimen dante emdaqta na amatin diq kawaqmo tubol haquaq haq yaqay.

Jesus maror araq ago amun aholib moq usta na wastitayan dimniy

⁴³ Ari Jesus Samariya on mataw na ne-naq kam gigermo osim tihiqiyan in uliq na bulosadmo saw Galiliy-ib tilah. ⁴⁴ (Na ezaqgo Jesus inmo tekomo tibilam, God ago nantut ago uliqabmo diq in ahol abin haiqta hamta na ago.) ⁴⁵ Ari in le saw Galiliy-ib tugwahtiqan Galiliy-ib mataw na Jesus abru waqad in gigem dimunta ugad tuwaziniy. Mataw na Jerusalem-ub Pasova ahumabun ayatha nab lehim in Jesus kabiya daq bunmo emsa ahol waqiyta. Nazaq iyan Jesus in gigo hib bolan in ginad tidimniyyi.

⁴⁶ Sa teq Jesus eraqim le uliq Kana saw Galiliy-ibta nab a ta gwahtim. Uliq nabmo in yuw diq bulyian wain ayun iyt. Ari kam nab king ago gavman mat araq uliq Kapaneam-ub os. Ossa in ago amun matta araq moqad us. ⁴⁷ Ussa mat na Jesus saw Judiya hulosim saw Galiliy-ib bolta na ago huritim in Jesus ago hib tilah. Lehim in Jesus waqe q inaq Kapaneam-ub leheq ago amun wastitaygo haqad tubulonyaq. Na ezaqgo in ago amun tumoqman diq tonyaqta na ago iyan. ⁴⁸ Sa Jesus bulon, Ne daq azawayin inaqta amo amo ahol a hi waqe q ne ya inan helmo a hi haq daqay ham. ⁴⁹ Haqan mat marorta na bilam, Iyatha ham ni hidmo gewoq ham. Luweq yaqgo amun moqdaq ham. ⁵⁰ Haqan Jesus bulon, Ni muleqe q ta leh ham. Ning amun kayeqmo dimunmo osaq ham. Haqan maror na Jesus ago gamuk anan helmo haqadmo in muleqim tilah. ⁵¹ Lehad in ago uliqab le a hi gwahtiqsamo ago kabibiy mataw bolim danib ahol waqadmo

buloniy, Ning amun kayeqmo dimunmo osaq haqiqy. ⁵² Haqan mat marorta na tisusunun nag, Zeq adulan ganim diqtat amun ahol hastitay nog iy? ham. Haqan in bilaqiy, Irimo zeq ayahtab wan kilok nazaq asan afanfan iyyaqta na ahol tiyuh haqiqy. ⁵³ Haqan amun na amam anad tiqam, Irimo zeq adulan nabmo diq Jesus bilam, Ning amun kayeqmo dimunmo osaq haqad in bilamta ham. Haqad in Jesus anan helmo tiham. Haqsamo ago on mataw in inaq osiyya na bunmo Jesus anan helmo tihaqiymo.

⁵⁴ Na Yesus in saw Judiya hulosim bo saw Galiliy-ib osad in daq azawayin inaq ame gigerta amta.

Yesus in ago kabiya emad teq in Juda gigo lotu akaman aseseqta nagab on mataw suleq negyaq

5

Yesus mat araq yuw akurorqanta anan Betesda haqayta aqurumnib wastitayan dimniy

¹ Daq na abeb Juda gigo lotu akaman araq ayahta tugwahtim. Gwahtiqan Jesus uliq Jerusalem-ub tugwalah.

² Teq uliq Jerusalem agelin ago dan ez araq anan Sipsip Gigo Dan Ez haqayta na agerab yuw akurorqanta araq usaqta. Hiru nanib in yuw na anan Betesda haqayta. Teq yuw na aqurumnib baybay abaynagin nazaqmo turyaqta. ³ Baybay nagab mataw gigo moq inaqta kabemmo gime haiqta teq gisen meqinta teq gibensen tumomta nagan in nab os yaqayta. [⁴ Ossa Iyatha ago angelo boleq yuw na amalib hitiqeq yuw baysa ahol wolyaqta. Ahol wolsa mat nog danmeb yuw nab hitiqeq huzad teq inmo amomo ago moq hiqiysa in ahol tidimniyyaqt.]

⁵ Teq mat araq ago moq ulig 38 nazaqmo aholib usta in nab tuqos. ⁶ Ossa Yesus bolim mat na ahol waqad anad tiqam, Mat ka kam sisaoqmo diq moqad osta ham. Haqad in bulon, Ni nihol dimniyyan nad bilaqaq e? ham. ⁷ Haqan mat moqqaqta na bilam, Mat ayah ham yuw ahol wolsa mat araq hidmo ya iwaeq iqad yuwub hitiqdaqta na haisqgam ham. Nazaq iyan ya kiskismo tiqad luwsamo mat araq iquriyam hidmo le danmeb yuwub hitiqaqta ham. ⁸ Haqan Jesus bulon, Ni eraqe q ningos ban soreq a leh ham.

⁹ Haqan muran diq nawaqmo mat na ahol tidimniyyan in era ago us ban sorim ad tilah. Ari kam na in Juda gigo lotu akaman. ¹⁰ Nazaq iyan mat ahol dimniyya na ago us ban sorim ad tilehsa Juda mataw aseseqta

asor tubuloniy, Muran i gigo lotu akaman haqiy. Nagadgo ni ningus ban na sorim a lehaq? haqiy. Ni kam ka ago gunun tikitityonaq haqiy.

¹¹ Haqan mat na amenin emim bilam, Mat ya ihol wastitayan dimniyta naqmo ibilenim bilam, Ningus ban soreq a leh haqad in bilam ham. ¹² Haqan Juda mataw na tisusumun ugyi, Mat ni nibilenim bilam, Ningus ban soreq a leh hamta na nog diq? haqiy. ¹³ Haqan mat ahol dimniyta na in nog diq dimun tonta na a hi hurit. Na ezaqgo mataw kabemmo nab tursa Yesus daq na tiqemimmo in gilikmanib gwahatiqad tilahta na ago iyan.

¹⁴ Abeb Yesus mat na Tempel-ib ossa ahol waqad bulon, Ahol waq ham. Ni nihol tidimniy ham. Muran ni daq meqinta araq ta hi em ham. Luweq daq ta araq meqin diqta niholib gwahtiqaq ham. ¹⁵ An mat na lehim in Juda mataw asesepta na gibilenim bilam, Mat ya iwastitayta na in Yesus-mo ham.

¹⁶ In nazaq haqan Juda mataw asesepta na Yesus muzad luwad in wadad nan tuqug yaqay. Na ezaqgo Yesus in Juda gigo lotu akamnib daq nazaqta emyaqta na ago iyan. ¹⁷ Sa Yesus gibilan, Ya imam kam bunmo kabiyl emim emim bo muran kawa in tiqem tutaq ham. Emsa ya inaqmo kabiyl tiqemaiqmo ham. ¹⁸ In nazaq haqan Juda mataw asesepta na ginad emiy, Mat ka in God anan ya imam haqiq haqiy. Bilaqne in God-mo nog haqiy. Haqad in Yesus lotu akaman ago gunun itiyonsa ahol waqad teq in Yesus ago gamuk na huritad in Yesus wol emid moqgo adanteqin tinagun naqmo hiqiy yaqay.

God atatin ago zaway ayahmo amalib kabiyl emaqta

¹⁹ Ari Yesus in Juda mataw na gibilan, Ya helmo ne gibilenaiq ham. Mat Atatin anadibmo daq araq a hi emaqta ham. In amam daq emsa ahol waqad in daq naqmo emaqta ham. Na ezaqgo amam daq emsa in Atatin daq nazaqmo emaqtamo ham. ²⁰ Amam in Atatin anan anad bilaqsa in kabiyl daq bunmo emaqta na in atatin isihunaqta ham. Nazaq iyan in daq asesepta atatin tiqishundaqmo ham. Isihunid Atatin in daq asesepta na emsa ne ahol waqad gihol riten lamdaq ham. ²¹ Amam in mataw tumoqiya giwazan eraqsa in giqeman kayeqmo osayta ham. Ad nazaqmo diq Atatin in anadibmo on mataw in ginan anad bilaqqa na giqeman kayeqmo osaymo ham. ²² Amam in mat araq ago daq a hi ulum kemaqta ham. Haiqgam ham. In kabiyl na Atatin abenab eman Atatinmo on mataw gilum kemaqta ham. ²³ Nazaq iyan mataw Amam wazinayta nazaqmo in

Atatin tuwazin daqaymo ham. Amam in Atatin eman bolta ham. Nazaq iyan on mataw Atatin a hi wazinayta na in Amam a hi wazinaymo ham. ²⁴ Ya helmo ne gibilenaiq ham. Mat yaqgo gamuk huritim teq in mat ya iqeman bolta na anan helmo haqqaqtta, mat naqanta in os kayeqmo tutimmo osayta na tuwaqim osaq ham. Osad in teq God ago hazizirib turad nan araq a hi waqdaq ham. Haiqgam ham. In moqdaqta atowun tuhulosim in kayeqmo dimunmo osaqta ham.

²⁵ Ya helmo ne gibilenaiq ham. On mataw tumoqiya na in teq God Atatin aqez tuhurit daqay ham. Huritad in gilikmanib mataw in aqez waz daqayta na bunmo eraqeq kayeqmo tuqos daqay ham. Kam na tugwahtiqaq tonaqta teq in tugwahtimta nog tiqiy ham. ²⁶ Amam in mataw giqemid kayeqmo osgo azawayin inaqtah ham. Teq in zaway na atatin ugan in nazaqmo mataw giqemid kayeqmo os daqaymo ham. ²⁷ Teq atatin na in Mat Atatin iyim iyan Amam in zaway ugan in Amam abinib mataw gilum kemeq gigo daq amenin tinegdaq ham. ²⁸⁻²⁹ Ya kazaq bilaqsa ne ginadnad hi emiy ham. Abeb mataw hodhodab usayta na bunmo God Atatin aqez tuhurit daqay ham. Huritadmo in hodhod huloseq tugwahtiqaq daqay ham. Mataw daq dimdimunta emad osiyta na eraqeq kayeqmo kuluwa-kuluwmo tuqos daqay ham. Sa mataw daq meqmeqinta emad osiyta na eraqeq hazizirib turad in gigo daq na amenin tuwq daqay ham.

³⁰ Ya daq araq inadibmo emgo haiq ham. Ya imam ibilensa ya mataw gigo daq gilum kemaiqta ham. Gilum kemad ya a hi katiyad mataw ginan titnonimmo bilaqaiqta ham. Na ezaqgo yaqmo inad muzinim kabiyl na a hi emaiqta ham. Ya mat iqeman bolta naqmo anad muzinad mataw gilum kemaiqta ham.

Nagah asor Yesus ahol alulin bilaq sireqyta giqusaymo

³¹ Ya imomo ihol anan gibilendaiqta na in daq helta a haiq ham. ³² Teq mat ta araq ya ibin gibilenaqta na in nawa osaq ham. Ya inad emaiq, Mat na inan helmo diq bilaqqa haqqaq ham. ³³ Kwaziqmo ne mataw giqeman in Jon ago hib lehiy ham. Lehan Jon in ya inan gamuk helta gibilanta ham. ³⁴ Helmo, ya matmo ago hib ibin waqgo hulosaiqta ham. Teq ne Jon ago gamuk na anadin emad ne ginad buliyeq a hi moq daqay haqad in ya inan bilamta na ago ya ne gibilenaiq ham. ³⁵ Jon in bilaqne lam araq oyad anuwan ayahmo leh nog iyyaqta ham. Sa ne Jon ahol anuwanib kam asor ginad dimniysa osnan ginad bilamta ham.

³⁶ Ari teq nagah araq Jon ago gamukuriyamta na in ya inan ne gibilen sireqaqmo ham. Na in kabiy God ya ibenab amta naqmo ham. Ya kabiy na emid hiqiy bugdaq haqad ya imam ibenab amta ham. Eman ya kabiy na emsa kabiy naqmo ya ihol alulin eman ulal iyaq ham. Kabiy na ya inan bilaqaq. Gimam Iyah ya iqeman bolta haqaq ham.

³⁷ Teq ya imam iqeman bolta na in inaqmo ya inan tibilammo ham. Ne in aqez asit a hi huritim ne in anobun asit ahol a hi waqymo ham. ³⁸ Teq in ago gamuk ne gigemab a hi usaq ham. Na ezaqgo in mat ne gigo hib eman bolta na ne anan helmo a hi haqiyta na ago ham. ³⁹ Ne ginad emay, God ago mariib gamuk usaqta na in i giqemid i dimunmo kuluwa-kuluwmo tuqosam haqayta ham. Haqad ne gamuk na ahol waqad alulin nagunaya ham. Ta teq mar naqmo in ya inan ne gibilen sireqaqta ham. ⁴⁰ Gibilen sireqsa teq hajiq ham. Ne yaqgo hib boleq God ago os dimunta waqnai hulosmo diq hulosayta ham.

⁴¹ Mataw ya ibin iluwsa ya hulosaiqta ham. ⁴² Teq ya ne gigo tuhurit ham. Ne God anan ginad a hi bilaqaqta ham. ⁴³ Ya imam abinib bolan ne ya ibaymuzayta ham. Ari mat ta araq inmo ahol abinib bolid ne waqeeq inaq tuqos daqay ham. ⁴⁴ Ne an abin iluwad ginad dimniysa osayta ham. Osad ne gibin dimunta God amulikmo osaqta na ago hib waqnan ginad a hi emayta ham. Nazaq iyan ezaq teq ne yaqgo gamuk anan helmo haq daqay? ham. ⁴⁵ Ya teq imam anognib turad ne gimalib nan emdaiqta nazaq ne ginad hi emiy ham. Mat ne gimalib nan emdaqta na in Moses-mo ham. Ne Moses anan bilaqay, In God ago hazizirib i gisen baysiheq tigilumsihdaq haqayta ham. Teq hajiq ham. Mat naqmo teq ne gimalib nan tiqemdaq ham. ⁴⁶ Ne Moses ago gamuk anan helmo haqeq ne yaqgo gamuk anan helmo tihaq nagiyimo ham. Na ezaqgo in gamuk mar tonta na in ya inan bilamta ham. ⁴⁷ Ne gamuk Moses ya inan mar tonta na anan helmo a hi haqeq, ezaq teq ne yaqgo gamuk anan helmo haq daqay? ham.

6

*Yesus on mataw 5,000 nazaq didaq nag
(Matyu 14.13-21; Mak 6.30-44; Luk 9.10-17)*

¹ Ari gamuk na tihiqiyan abeb Yesus yuw-kurorqan Galiliy aqurumun kozaq ban tilah. Yuw akurorqan na anan araq

* **6:1:** Yuw Galiliy aqurumun zeq wolehaqta ban nab uliq araq anan Taiberiyas haqayta usta (Jon 6.23 nab teq ni ahol waq). Nazaq iyan mataw asor uliq na ananib yuw na anan Taiberiyas-mo haq yaqayta. † **6:7:** 200 kina in bilaqne mat araq kalam 8 nazaq aduganib kam bunmo kabiy emdaqta na amenin nog.

Taiberiyas* haqayta. ² Lehsa on mataw dauh biyahmo in muzim inaq tilehiy. Na ezaqgo Yesus mataw moqayta gigo hib daq asesepta emsa in ahol waq yaqayta na ago iyan. ³ Teq Yesus le garah araqab gwalehim in ago disaipel nenaq nab tuqos. ⁴ Kam nab Juda gigo lotu akaman ayah diqta anan Pasova haqayta na bolim sinsin tiqiy.

⁵ Ari Yesus osim ame wole mataw dauh biyahtha na agerab gabolsa in tigibiy. Gibiyad in Filip bulon, I teq edob didaq gizayeq on mataw ko negid neq daqay? ham. ⁶ Na in Filip ulum waqad nazaq bulon. Inmo daq ezaqta emdaqta na in tekomo anad tiqam. ⁷ An Filip amenin emim bilam, I bret 200 kina ago zayid in on mataw dauh biyahtha ko inaq diq a hi iydaq ham.†

⁸⁻⁹ Haqsa Yesus ago disaipel ta araq Simon Pita amikqan Andru in era Yesus tubulon, Amun araq ago bali bret abaynaginmo teq nabiq gigermo inaq kawa osaq ham. Teq didaq asitmo na in on mataw kuluwmo kozaq ko inaq a hi iydaq ham. ¹⁰ In nazaq haqan Yesus bilam, On mataw gibilenid in os woqeq osiy ham. Saw nab sisihun dimunta amalib osgo asawan dimunta usta. Nazaq iyan mataw na bunmo nab tuqos woqiy. Teq mataw biyahtha na in kabemmo diq 5,000 nazaq.

¹¹ On mataw na os woqim ossa teq Yesus in bret waqim God esey ugim in mataw na tinag. Negad in nabiq giger na waqim nazaqmo ton. An on mataw bunmo ginadibmo didaq na neqan tigiyunin bug. ¹² Mataw na didaq dimunmo tineqan teq Yesus in ago disaipel gibilan, Bret asugin abeyanta na bunmo ginuweq tuwal emiy ham. I abu hi ulumuq ham. ¹³ Haqan disaipel lehim bali bret abaynagin on mataw neqim abeyan hulosiyya na in tuwal emim kuram 12 nazaqmo tigisiheni.

¹⁴ Kam nab on mataw daq azawayin inaqta na ahol waqim bilaqiy, Helmo haqiy, God ago nantut og kab boldaqta na amatin kawaqmo tubol haqiy.

¹⁵ Haqsamo Yesus in ginad na huritim in anad tiqam, On mataw ka giwaz meqniyeq boleq in ya iwazeq in gigo king iqem daqay haqad in amomo garah abigmanib tug-walah.

Yesus yuw amalib bayim lah

¹⁶⁻¹⁷ Ari imisor diq ni nog ya nog tiqiyan Yesus ago disaipel yuw-kurorqan Galiliyib wole tihitiqi. Hitiqim saw romriq tiqiyan Yesus in gigerab a hi gwah-tiqsamo in muyib gwalim yuw urotim uliq

Kapaneam-ub tilehiy. ¹⁸ Lehad luwsa tim ayahta eraqad kamis wolsa ayahmo tiqueragyaq. ¹⁹ Eraqsa disaipel giholtuw bulad muy hureqim le 5 o 6 kilomita nazaq tiquyanmo Yesus yuw amalib bayim bayim muy agerab bolsa in ahol tuwaqiy. Ahol waqadmo in tirab yaqay. ²⁰ Rabsa Yesus gibilan, Ne hi rabiy ham. Ka yaqmo lehaq ham. ²¹ Haqan disaipel ginad dimniysa Yesus waqim muyib emad hid naqmo in uliq leh yaqayta nab tugwahtiqiy.

On mataw Yesus naguniy

²² Ari tarom iyim saw thastitayan on mataw Yesus gihulosan yuw aqurumun kozaq ban osiyta na in Yesus asawan waqad teq in ginad tiqemiy, Irimo muy amulikmoqmo kab usta haqiy. Teq Yesus ago disaipel muy nabmo gwalsa Yesus a hi gwal haqiy. Disaipel gimonoo muyib gwalim tilehiy haqiy. ²³ In nazaq haqad ossamo mataw ta asor uliq Taiberiyasibta na gimuyin inaq bolim Iyatha bret waqim God esey ugan mataw neqiyta na asawnib tugwahtiqiy, mataw biyatha na gigerab. ²⁴ Gwahtiyan on mataw nab osiyta na in Yesus ago disaipel nenaq saw nab a hi gibiyad in Taiberiyas gigo muy nagab gwalim Yesus nagunim uliq Kapaneam ban tilehiy.

Bret diq Heven-ib gehitimta na in Yesusmo

²⁵ Lehim in yuw urum kozaq ban Yesus ahol tuwaqiy. Ahol waqad in tuloniy, Tisa haqiy ni gineh diq kab bol? haqiy. ²⁶ Haqan Yesus gibilan, Ya helmo gibilehaiq ham. Ya irimo daq emta na alulin diq ne ahol waq kemim teq inagunaya nazaq a hi haq ham. Ne bret neqim gigem aseseq iyiya naqmo ago ne ya inagunay ham. ²⁷ Ne didaq lilihaqta na akabiy an hi emiy ham. Ne didaq mataw neqim kuluwa-kuluwmo osiyta naqmo akabiy an ne emiy ham. Didaq na Mat Atatin inmo teq tinegdaq ham. Na ezaqgo amam God in Mat Atatin na anan bilam, Mataw bunmo gilikmanib ya ni nibiysa ni nimomo yaqgo kabiya na tiqem bugdaq haqad in bilam ham. Nazaq iyan Mat Atatin inmo teq didaq a hi lilihaqta na tinegdaq ham. ²⁸ Haqan on mataw na tisusumun ugii, Ta i ezaq toneq teq God ago kabiya na emam? haqiy. ²⁹ Haqan Yesus gibilan, Ne mat God eman bolta naqmo anan helmo haqiy ham. God ago kabiya nawaqmo ham. ³⁰⁻³¹ Haqan mataw na buloniy, Kwaziqmo i gisesan saw samantab osad in manna bret neq yaqayta haqiy. God ago marib gamuk nazaq bilam haqiy. In bilam,

God Heven-ib bret eman woq negan in neqiy ham haqiy. *Buk Song 78.24*

Ta teq ni i gimen naga kabiyan diq tiqem igaq? haqiy. Ni naga daqin azawayin inaqtta emid i ahol waqeq teq i ni ninan helmo haqam? haqiy. ³² Haqan Yesus bilam, Ya heltaqmo ne gibilehaiq ham. Moses-mo bret diq Heven-ib hitimta na a hi nag ham. Ya imammo in Heven-ib bret diqta na eman woq negaqta ham. ³³ Bret diq God ago hib bolaqta na in Heven hulosim gewoqan on mataw neqad in gihol kayeq iyad kuluwa-kuluwmo osiyta ham. ³⁴ Haqan mataw na buloniy, Mat Iyah haqiy bret naqmo tuteqmo ig haqiy.

³⁵ Haqan Yesus gibilan, Bret diq on mataw neqad gihol kayeq iyim kuluwa-kuluwmo osiyta na in yaqmo ham. Mat aw nog in yaqgo hib bolayta na in gigemnan a ta hi moq daqay ham. Ad mat aw nog ya inan helmo haqayta na in yuwnan a ta hi moq daqaymo ham. ³⁶ Ya ne gibilenim bilay, Ne ya tiqibiyitta teq ne ya inan helmo a hi haqay haqad ya bilay ham. ³⁷ On mataw ya imam giyagta na in yaqgo hib tubol bug daqay ham. Bolsa ya a hikidik gimusdaiq ham. ³⁸ Na ezaqgo yaqmo inad muznan haqad ya Heven hulosim a hi gewoy ham. Ya imam iqeman bolta naqmo anad muznan haqad ya gewoya ham. ³⁹ Teq mat ya iqeman bolta na ago anad in kazaq ham. Ya on mataw in giyagta na gigo araq diq a hi hulosad kam abebtanta nab ya on mataw na bunmo giwazid tigeraq daqay haqad in anad usaq ham. ⁴⁰ Ya imam anadmo diq on mataw in atatin ahol waqad anan helmo haqayta na bunmo in os dimunta kuluwa-kuluwmo osiyta na giholyon tuwaq daqay haqaq ham. Teq kam abebtanta nab ya in giwazid tigeraq daqay ham.

⁴¹ Ari Yesus bilam, Bret diq Heven-ib gewomta na in yaqmo haqan Juda mataw aseseqta na in anan gigem meqniysa nan kabemmo kazaq bilaq yaqay, ⁴² Mat ka in Josep-mo atatin Yesus a haq e? haq yaqay. I in anen amam gigo tuhuritta haq yaqay. Ta ezaqgo in bilaqqaq, Ya Heven hulosim ogib gewoya haqaq? haq yaqay.

⁴³ Haqsa Yesus gibilan, Ne an bulonad nan kabemmo hi bilaqiy ham. ⁴⁴ Mat araq anadibmo yaqgo hib a hi boldaq ham. Ya imam iqeman bolta naqmo in on mataw gihureqsa teq in yaqgo hib tubol daqay ham. Bolid teq kam abebtanta nab ya in giwazid tigeraq dagay ham. ⁴⁵ God ago nantut gamuk araq kazaq mar toniy ham. Gamuk na bilam,

God-mo teq on mataw bunmo suleq tinegdaq haqad in bilam ham. *Aisaya 54.13*

Nazaq iyan on mataw ya imam ago hib suleq waqad ago nan huritayta na bunmo in yaqgo hib bolayta ham.

⁴⁶ Mat araq diq Gimam Iyah ahol a hi wam ham. Mat God ago hib osim bolta naqmo in ahol tuwamta ham. ⁴⁷ Ya helmo gibilenaiq ham. Mat aw nog ya inan helmo haqayta na in os kayeqmo kuluwa-kuluwmo osayta na tuwaqim osayta ham. ⁴⁸ Bret mataw neqim kayeqmo kuluwa-kuluwmo osayta na yaqmo ham. ⁴⁹ Kwaziqmo ne gisesan saw samantab luw osad in manna bret neq yaqayta ham. Neqad teq in oseqmo tumoq yaqayta ham. ⁵⁰ Ari bret Heven hulosim ogib gewomta na in lul araq diqta ham. Mataw bret na neqeq in a hi moq daqay ham. ⁵¹ Bret mataw neqim kuluwa-kuluwmo osayta na yaqmo ham. Ya Heven-ib osim og kab gewoysta ham. Gewoqan mat aw nog bret na neqeq in kayeqmo kuluwa-kuluwmo tuqos tut daqay ham. Ari bret ya on mataw og kabta negid in neqeq kuluwa-kuluwmo os daqayta na in ya inon ham.

⁵² Yesus nazaq haqan Juda mataw aseseqta na in gimo an mugad in gamuk na alulin nagunad kazaq an bulon yaqay, Mat ko ezaq toneq teq in anon igid i neqam? haq yaqay. ⁵³ Haqsa Yesus gibilan, Ya helmo ne gibilenaiq ham. Ne Mat Atatin anon a hi neqeq teq ne in anedan a hi uluweq ne kayeqmo kuluwa-kuluwmo a hi os daqay ham. ⁵⁴ On mataw ya inon neqad teq in ya inedan uluwayta na in os kayeqmo kuluwa-kuluwmo osayta na tuwaqim osayta ham. Ossa kam abebtanta nab ya in giwazid tigeraq daqay ham. ⁵⁵ Na ezaqqo ya inon in didaqmo diq ham. Teq ya inedan in nagah uluwoq diqtamo ham. ⁵⁶ On mataw ya inon neqad teq in ya inedan uluwayta na in yaqgo hib ossa ya in gigo hib osaiqmo ham. ⁵⁷ Ya imam kayeqmo osaqta na iqeman bolta ham. Bolim ya imam ago zawayib kayeqmo osaqta ham. An nazaqmo mat ya inon neqeq in yaqgo zaway amalib kayeqmo tuqosdaqmo ham. ⁵⁸ Ya bret negdaiqta na in Heven hulosim gehitimta ham. Kwaziqmo i gisesan bret kaitab womta na neqiy ham. Neqim teq in osimmo tumoqiyta ham. Ari ya bret negdaiqta na in bret kwaziqta na nog a hais ham. Mat yaqgo bret na neqeq in kayeqmo kuluwa-kuluwmo tuqosdaq ham.

⁵⁹ Ari Yesus uliq Kapaneam-ub Juda gigo bit humab wolayta nab osad in on mataw suleq negim gamuk kawa ka gibilan.

Kayeqmo kuluwa-kuluwmo osayta agaman Yesus amomo ago hib usaqta

⁶⁰ Ari Yesus ago disaipel kabemmo gamuk na huritim bilaq yaqay. Gamuk na in afaqan dig haq yaqay. Nog teq gamuk na huritdaq? haq yaqay. ⁶¹ Haqsa Yesus anad tiqam, Yaqgo disaipel gamuk na huritim nan kabemmo bilaqay ham.

Haqad in tisusumun nag, Ne yaqgo gamuk na huritim ne ginad helta hulosnan tonay ye? ham. ⁶² Nazaq iyid teq abeb Mat Atatin in kwaziqmo ulilib ostab nab muleqeet ta gwalehsa ne ahol waqad teq ne ginad ezaq em daqay? ham. ⁶³ I giwitan in i gisan zaway ugsa i kayeqmo osauqta ham. I gisan in i giwitan ulumsihiq zaway haiqgam ham. Gamuk kawa ya negaiqta ka in ne giwitan ulumsihsa ne kayeqmo osayta ham. ⁶⁴ Teq ne gilikmanib mataw asor ya inan helmo a hi haqayta ham.

Yesus mebmebmo ago kabiy alulin tigeend in mataw helmo a hi haqayta na gigo tuhurit. Teq mat in waqeet bab gibenab emdaqta na ago in tuhuritmo. Na ago in bilam, Ne gilikmanib mataw asor ya inan helmo a hi haqayta ham. ⁶⁵ Haqad in bilam, Ne gilikmanib mataw asor ya inan helmo a hi haqayta naqmo ago ya gibilenim bilay, Ya imam mat araq anad emid a hi hastitayid mat na yaqgo hib a hi boldaq hayta ham.

⁶⁶ In nazaq bilaqan mataw kabemmo Yesus muzeq inaq leh yaqayta na gihol buliyim in muleqim gigo uliqab tilehiy. Lehim in Yesus inaq a ta hi luw yaqay. ⁶⁷ Nazaq iyan Yesus in ago disaipel 12 na gibilan, Ne inaqmo ya ihuloseq leh daqaymo ye? ham. ⁶⁸ Haqan Saimon Pita amenin emim bulon, Iyahta ham i ni nihuloseq nog ago hib leham? ham. Ninmo ningi gamuk amomo in mataw giqeman kayeqmo kuluwa-kuluwmo osayta ham. ⁶⁹ I ningi tuhurit i ginad emauq, Helmo ni God ago mat tawon diqta naqmo haqaq ham. ⁷⁰ Haqan Yesus nan na amenin emim gibilan, Yaqmo ne mataw 12 na iholyon gilumim giwayta ham. Ta teq ne gilikmanib araq in bilaqne Satan nog osaq ham. ⁷¹ Na in Saimon uliq Kariyot-ibta atatin Judas ayon gamuk na bilam. Mat na in disaipel 12 na gigo araqta. Teq abeb in Yesus waqeet bab gibenab emdaqta na ago Yesus in anan nazaq bilamta.

7

Yesus amikqaniz in anan helmo a hi haqiy

¹ Abeb Yesus saw Galiliy-ibmo tiluwyaaq. Na ezaqqo Juda mataw aseseqta na in Yesus wol emid moqnan ginad emad adanteqin nagunsa iyan Yesus saw Judiya gigo saw ban luwnan atuw hiqiyyaq.

² Ari Juda gigo lotu akaman araq ayahta anan Gisesan Baybay Emim Osiya haqayta na akamun bolim sinsin tigiy. ³ Nazaq iyan Yesus amikqaniz in Yesus bulonim bilaqiy, Ni uliq ka huloseq saw Judiya-ib leh haqiy. Leheq ni kabiy emsa ningi disaipel ahol waq kemiyy haqiy. ⁴ Mat ahol abin emid

ayah iynan anad bilaqaq na in ulilemim ago kabiy a hi emaqta haqiy. Ni kazaq daq amo amo emnan ninad bilaqsun ni leheq on mataw bunmo gimeb emsa in ahol waqiy haqiy.⁵ (Na Yesus amikqaniz inaqmo in Yesus anan helmo a hi haqad iyan in nazaqmo bilawuniy.)

⁶ In nazaq haqan Yesus gibilan, Ya inadibmo a hi luwaiqta ham. Ya ibin ayahta waqdaiqta akaman teqmo bolaq ham. Ari ne ginadibmo luw daqayta akaman tutimmo usaqta ham. ⁷ On mataw God gileh ugayta na in gigem meqinta ne a hi negayta ham. Ari ya mataw na gigo daq anan meqin haqsa in gigem meqinta ya yagayta ham. ⁸ Negmo leheq humab ayahta na ahol waqiy ham. Yaqgo kam a hi gwahtiqa iyan ya humab nab a hi lehdaiq ham. ⁹ In nazaq haqad saw Galiliy-ibmo tuqos.

¹⁰ Ossa in amikqaniz lotu akaman ayahta na ahumabni tlehiy. Lehsa Yesus osim abeb teq tilahmo. Lehim in ulalab mataw gimeb a hi gwahitim. Haiqgam. In le ulilemadmo luwyaq. ¹¹ Luwsa Juda mataw aseseqta na in humab nab Yesus nagunad bilaq yaqay, Mat na edowa? haq yaqay. ¹² Sa on mataw biyahta na in gimo an bulonad gamuk kabemmo bilaq yaqay. Asor bilaq yaqay, Mat na in dimunta haq yaqay. Sa asor bilaq yaqay, Haiq haq yaqay. In on mataw kat negaqta haq yaqay. ¹³ Haqad teq mat araq diq Yesus anan ulalab a hi bilaqaq, in Juda mataw aseseqta na girabunad iyan.

¹⁴ Ari humab ayahta na le liqabmo tiquyan teq Yesus Tempel-ib lehim on mataw suleq tinegyaq. ¹⁵ Samo Juda gigo mataw aseseqta na Yesus ago gamuk huriitm in gihol turuh nemsu bilaqiy, Mat ka i gigo hib suleq a hi wamts haqiy. In ezaq tonim gamuk awaz meqin kazaq ka in anadib usaq? haqiy. ¹⁶ In nazaq haqsa Yesus in gigo gamuk amenin emim gibilan, Ya gamuk gibilenaita ka in yaqgo gamuk a haiq ham. Mat ya iqeman bolta naqmo ago gamukta ya ne gibileniq ham. ¹⁷ On mataw God anad muznan giwaz meqnityaya na in yaqgo gamuk ka huritad in ginad tiqem has daqay ham. Ginad em haseq in ya inan bilaq daqay, Mat na anadibmo gamuk a hi bilaqaqta haq daqay ham. In God-mo ago hib gamuk waqim teq bilaqaqta haq daqay ham. ¹⁸ Mataw in gimo gihol abinib gamuk bilaqaqta na in gihol abin emid ayah iygo haqad in bilaqaqta ham. Ari mat in mat ta araq in eman bolta naqmo abin emid ayah iygo haqad gamuk bilaqaqta, mat naqmo in gamuk helta bilaqaqta ham. Mat naqanta aholib daq katiyta araq a hi usaqta ham.

¹⁹ Kwaziqmo Moses in God ago maror waqim ne nagta ham. Teq ne gilikmanib mat araq diq maror na ago gunun a hi muzin bugaqta ham. Nagaqgo ne ya inol emnan ginad emay? ham. ²⁰ Haqan on mataw biyahta na bilaqiy, Nog ninol emnan bilaqaq? haqiy. Bugaw meqinta niholib ussa ni nazaq bilaqaqya haqiy. ²¹ Haqan Yesus gibilan, Ya daq azawayin inaqta amulikmoqmo eman ne bunmo ginad kabemmo emay ham. ²² Moses ne gihol abatan asan urotgo adan giqisihunta ham. Helmo daq na in Moses ago hib a hi gwahitim ham. Na in i gitormagniz gigo hib gwahitimta ham. Teq Moses ago marorib daq na agamukan ussa ne muzinad lotu akannibmo ne amun matta asan urotayta ham. ²³ Moses ago gunun aduganib gamuk bilam, Amun matta gwahtiqid ago kam 8 nazaq tiliqiyid teq ne ahol abatan asan tuqrot daqay haqad in bilamta ham. An muran ne gigo amun matta araq gwahitiqim ossa ago kam 8-ta na lotu akannib tugwahtiqaq ne lotu akaman ago gunun na anadin a hi emad ne amun asan urotmo urotayta ham. Luweq ne Moses maror nagta na itiyon daqay haqad ne nazaq emayta ham. Ari ne lotu akannib amun asan urotayta ham. Ta teq doh haqad ya lotu akannib mat moqad osta na ahol bunmo wastitayan ne gigem meqinta yagay? ham. ²⁴ Ne gimebmo daq ahol waqad hid naqmo ne ulum kemim anan meqin haqayta ham. Ne nazaq hi emiy ham. Ne ginad em haseq teq yaqgo daq anononmo ulum kemiyy ham.

Yesus in naga matin diq?

²⁵ On mataw Jerusalem-ubta asor osim in Yesus gamuk bilaqsa huritad bilaqiy, Mataw aseseqta in mat wol emnan bilaqaqta na amatin kawaqmo daqagya haqiy. ²⁶ Ahol waqiy haqiy. In mataw aseseqta ko gimeb gamuk bilaqsa in nan araq a hi bulonay haqiy. Nabag mataw aseseqta ko in ago tuhuritim ginad emay, In Krais haqay daqagya haqiy. ²⁷ Ta teq mat ko uliq edob bolta na ago i tuhurit haqiy. Ari Krais helmo boldaqta nab mat araq diq in uliq edob osim bolta na ago a hi huritdaq haqiy.

²⁸ In nazaq haqsa iyan Yesus Tempel ago gel aduganib mataw suleq negad osimmo in lileyim bilam, Ne yaqgo tuhuritiy ye? ham. Ad ya edob bolta na ago ne ginad emay ye? ham. Ya inadibmo a hi bol ham. Mat araq ya iqeman bolta ham. In gamuk helta bilaqaqta ham. Teq ne in ago a hi huritayta ham. ²⁹ Ya mat na inaq osta ham. Ossa inmo ya iqeman ya bolta ham. Nazaq iyan ya in ago tuhurit ham. ³⁰ Yesus nazaq haqanmo mataw na asor in

irqurnan haqad tuwaznan ton yaqay. Teq haiq. Yesus bab gibebab osdaqta na aka-man teqmo bolsa iyan mataw na a hi waziy. ³¹ Sa mataw biyahta na gigo asor kabemmo in Yesus anan helmo tihaq yaqay. Ad in bilaq yaqay, Mat ko daq azawayin inaqta kabemmo tiqamta haq yaqay. Mat araq boleq mat ko a hi uriyam nagta haq yaqay. Nazaq iyan inmo Krais daqagya haq yaqay.

Juda mataw aseseqta asor hurmey giqe-
man Yesus waznan lehiy

³² Ari mataw biyahta na Yesus anan gamuk kabemmo bilaqsa Farisi tuhuritiy. Huritsa mataw tamaz emayta gigo aseseqta na giyogniz Farisi nenaq in hurmey asor giqeman Yesus wazeq irqurnan tilehiy. ³³ Lehan teq Yesus tibilam, Ya nenaq kam asitmo a ta osdaiq ham. Oseq teq ya muleeq mat ya iqeman bolta na agerab ta lehdaiq ham. ³⁴ Lehid teq ne ya tiqinagun daqay ham. Ta teq ne ya a hi ibiy daqay ham. Uliq ya le osdaiqta nab ne a hi leh daqay ham. ³⁵ Haqan Juda mataw aseseqta na in gimo an bulonim bilaqiy, Na in edob lehid i naguneq ahol a hi waqam? haqiy. Luweq in Grik mataw gigo sawab leheq i gisenlul asor nab osayta na nenaq osdaq haqiy. Osad in Grik mataw na suleq negdaq haqiy. ³⁶ Haqad in bilaqiy, Mat na bilam, Ne ya inagunad teq ne ya a hi ibiy daqay ham haqiy. Teq in bilam, Uliq ya le osdaiqta nab ne a hi leh daqay ham haqiy. Gamuk na alulin ezaq diq? haqiy.

Yesus yuw dimunta anan bilam

³⁷ Ari humab ayahta na ago kam abeb-tanta na in kam ayah diqta. Kam nab Yesus eraqim turad in lileyim bilam, On mataw yuwnan moqayta na in yaqog hib boleq yuw uluwiy ham. ³⁸ On mataw ya inan helmo haqsa teq God ago mar bilamta nazaq in giholib gwahtiqaq ham. In gigemab yuw dimunta gwahtiqaq in tute-qmo nazaq sibad tuqusdaq ham. ³⁹ Yesus in God ago Bugaw Dimunta anan gamuk na bilam. Abeb on mataw Yesus anan helmo haqeet teq in Bugaw na tuwaq daqay. Ari Yesus gamuk bilamta kam nab in ahol abin ayahta waqim amam agerab a hi gwalehsa God ago Bugaw Dimunta og kab a hi gewoqyaq.

On mataw gihol huserim dauh giger iyiy

⁴⁰ On mataw na Yesus ago gamuk na huritim asor bilaq yaqay, God ago nantut boldaqta na amatin diq kawaqmo tubol haq yaqay. ⁴¹ Sa asor bilaq yaqay, Ka Krais-mo haq yaqay. Haqsa ta asor bilaq yaqay, Haiq haq yaqay. Krais saw Galiliy-ib a hi gwahtiqaqta haq yaqay. ⁴² God ago gamuk bilam, Krais in Devit ago uliq Betlehem-ub Devit asenlul gimuganib

gwahtiqaqta haqad in bilam haq yaqay.

⁴³ Nazaq iyan mataw na ginad giger iyan in gimo gihol huserim dauh gigermo tiqiyiy. ⁴⁴ Sa mataw na gigo asor Yesus wazeq irqurnan ginad bilaqsa teq haiq. In nazaq a hi toniy.

Mataw aseseqta Yesus anan helmo a hi
haqiy

⁴⁵ Nazaq iyan hurmey na muleqim mataw tamaz emayta gigo aseseqta na giyogniz Farisi nenaq gigo hib ta lehiy. Lehan mataw aseseqta na tisusum negiy, Ne nagaqgo mat na wazim ad a hi boliy? haqiy. ⁴⁶ Haqan hurmey na bilaqiy, Mat ko ago gamuk in lul araq diq haqiy. Kwaziqmo i mat araq gamuk nazaq bilaqsa a hi huriitta haqiy. ⁴⁷ Haqan Farisi bilaqiy, Mat na ne inaqmo kat negan ne in anan helmo haqaymo daqagya haqiy. ⁴⁸ Mataw marorta bunmo mat na anan helmo a hi haqayta haqiy. Sa Farisi bunmo in nazaqmo mat na anan helmo a hi haqaytamo haqiy. ⁴⁹ Mataw biyahta na ginad haiq haqiy. In God ago maror Moses igtta na ago a hi huri kemayta haqiy. Nazaq iyan God kusluw negan in oseq teq timeqniy daqay haqiy.

⁵⁰⁻⁵¹ Haqan Farisi gigo araq anan Nikodemus, mat kwaziqmo Yesus ago hib lahta na, in osim gibilan, I mat araq samanta nam ugam nazaq i gigo maror a hi bilam ham. Mat na i gimeb turad in naga daqin diq emaqta na ago bilaqsa i huriteq teq i in ago daq ulum kemam ham. Nazaq a haq e? ham. ⁵² Haqan mataw na amenin emim buloniy, Ni inaqmo saw Galiliy-ibta daqagya haqiy. Ni leheq God ago marib gamuk usaqta na ahol ta waq kem haqiy. Ahol waq kemeq teq ni ninad em hasdaq haqiy. God ago nantut araq saw Galiliy-ib gwahtiqaq nazaq in a hi usaq haqiy. Hikidik haqiy.

[⁵³ Ari gamuk na tihiqiyan mataw bunmo gibit gibileq tilehiy.]

8

Aw aduw hulosim mat ta araq hureqsa
in ad Yesus agerab boliy

¹ Mataw bunmo gibit gibileq tilehsamo Yesus garah anan Oliv haqayta nab tilah.

² Lehim usim tarommo diq in eraqim Tempel-ib a ta lah. Lehan nab on mataw bunmo in ago hib bolan in os woqim osad suleq tineqyaq. ³ Suleq negsa mataw Moses ago gunun hurit kemiyya na asor giyogniz Farisi asor nenaq in aw araq wazim a boliy. Aw na aduw ame titonim le mat araq inaq ussa in ahol waqad waziyya. Wazim a bolim in liqabmo on mataw bunmo gimeb eman titur. ⁴ Tursa mataw aseseqta na

Yesus buloniy, Tisa haqiy, aw ka aduw ame titonim le mat araq inaq ussa i ahol waqadmo i wazim ning hib a bol haqiy.
⁵ God ago maror Moses igta na bilam, Aw kazaqta ka amalib gig hunegid in moqan haqad in bilam haqiy. Ari teq nimmo ezaq haqdaq? haqiy.

⁶ Mataw na Yesus ulum waqnan haqad nazaq buloniy, Yesus daq na agamukan bilaq kireh tonid teq in nan na ginuwid amalib gwaldaq haqad. Teq haiq. Yesus ahol holosan woqan abakkaban ulum laquwim in abenab mar ogib tiqemyaq.
⁷ Emsamo mataw aseseqta na Yesus a ta susumun ug yaqay. Susumun ugsa Yesus eraqim turad tigibilan, Ne gilikmanib nog diq in aholib daq meqinta haiqta naqmo in ameb diq aw ka amen gig hunegan ham.
⁸ Haqad in ahol holosan ta woqan in ogib mar a ta emyaq.

⁹ Emsa mataw na in ago gamuk na huriitim in amulik-mulikmo hulosadmo tileh yaqay. Mataw marorta na ameb lehsa ta biyahta na abeb lehiy. In tileh bugan teq aw na amomo Yesus anognib tur.
¹⁰ Tursa Yesus eraqim turad tubulon, Neng ham mataw nimalib nan emiya na edowa? ham. Mat araq nimalib nan emdaqta kabag turaq e? ham.
¹¹ Haqan aw na bilam, Mat Iyah ham araq diq kab a hi turaq ham. An Yesus bilam, Ya inaqmo nan a hi nigdaiqmo ham. Ni leh ham. Ad abeb ni daq meqinta na ta hi em ham.]

Og ka ago saw anuwan Yesus-mo

¹² Ari Yesus in on mataw ta gibilenim in kazaqbilam, Yaqmo og ka ago saw anuwan ham. Mat ya imuzeq boldaqta na in rom-riqab a hi luwdaq ham. Haiq ham. In ya inuwanib luwad in kayeqmo tuqosdaq ham.
¹³ Haqan Farisi gamuk na huriitim in Yesus buloniy, Ni nimomo nihol anan bilaqaq haqiy. Mat araq nisen baysihim gamuk a hi emaq haqiy. Nazaq iyan ning gamuk na in helta a hi haiq haqiy.

¹⁴ Haqan Yesus amenin emim gibilan, Helmo ham ya imomo ihol anan bilaqaqta ham. Ta teq yaqgo gamuk ka in heltaqmo ham. Na ezaqgo ham, ya uliq edob bolta na ago ya tuhurit kem ham. Teq uliq edob ya lehdaiqta na ya tuhuritmo ham. Ari ne yaqgo uliq diqmo ago a hi huriitya ham. Ad ya edob lehdaiqta na ne a hi huriitymo ham.
¹⁵ Ne mataw og kabta gigo ginadta amalib mataw gilum kemayta ham. Yaqmo mat araq a hi ulum kemaiqta ham.
¹⁶ Ari teq ya mat araq ulum keminan haqad na ya imomo mat na anan a hi bilaqdaiq ham. Haiq ham. Ya imam iqeman bolta na inaq i araqibmo nan na bilaqamtta ham. Nazaq iyid i gigo nan in heltaqmo iydaq ham.

¹⁷ Negmo gigo maror bilam, Mataw giger an ulumsiheq nan amulikmo bilaqid teq nan na in heltaqmo ticiydaq haqad in bilam ham.
¹⁸ An nazaqmo ya iholyon gamuk bilaqsa ya imam iqeman bolta na in ya iyon gamuk bilaqaqtamo ham.

¹⁹ Haqanmo Farisi buloniy, Ta ni nimam edob osaq? haqiy. Haqan Yesus bilam, Ne yaqgo a hi huriitim iyan ne ya imam ago a hi huriitymo ham. Ari ne yaqgo hureiteq teq ne ya imam ago tuhurit daqaymo ham.
²⁰ Yesus Tempel-ib bit adugan mani eman usta nab osad in on mataw suleq negim gamuk na gibilanta. Gibilensa mat araq diq bolim Yesus wazim a hi irqrur. Na ezaqgo Yesus ago kam a hi gwahtiqla iyan na ago in a hi waziy.

Yesus bilam, Ya lehdaiqta nab ne a hi leh daqay ham

²¹ Ari Yesus a ta gibilenim bilam, Ya ne gihuloseq tilehdaiq ham. Lehid teq ne ya inagunad tiluw daqay ham. Luwad ne gigo daq meqinta ne giholib soqoteq ussamo ne inaq tumoq daqay ham. Moqeq ya lehdaiqta nab ne a hi leh daqay ham.

²² Ari Juda mataw aseseqta na in gamuk na huriitim in gimo an bulonim bilaqiy, Ezaqgo in i ginan bilam, Ya uliq lehdaiqta nab ne a hi leh daqay ham? haqiy. Luweq inmo ahol wol emid moqdaqta na ago in bilaqdaq haqiy.

²³ Haqsa Yesus gibilan, Ne mataw og kabta ham. Teq ya ulilibmo osim gehitiyya ham. Ne gibe alulin og kab usaqta ham. Teq ya ihol alulin og kab a hi usaq ham.
²⁴ Ya ne gibilenim bilay, Ne gigo daq meqinta ne giholib soqoteq ussamo ne inaq tumoq daqay hayta ham. Na ezaqgo ne ya inan helmo a hi haqeq teq ne gigo daq meqinta ne giholib ussa ne inaq tumoq daqayta na ago ya nazaq gibilenta ham.

²⁵ Haqan mataw na susumun ugim buloniy, Ni nog? haqiy. Haqan Yesus gibilan, Ya kabiy alulin emim gibilenim gibilenim bolta naqmo ham.

²⁶ Yaqgo gamuk kabemmo ya ne ginan bilaqdaiqta usaq ham. Ad ya ne gigo daq meqinta kabemmo gilum kemeq ginan bilaqdaiqta usaqmo ham. Ta teq mat ya iqeman bolta na in gamuk helta bilaqaqta ham. Nazaq iyan ya in ago hib nan huriita naqmo amalib ya on mataw og kabta gibileniq ham.

²⁷ Ari Yesus in amam anan gibilenim mataw na ginad a hi em has yaqay.

²⁸ Nazaq iyan Yesus gibilan, Ne Mat Atatin wazid eraqeq tursa teq ne yaqgo tuhurit kem daqay ham. Ya daq araq inadib a hi emaiqta ham. Ya gamuk bilaqaqta ka ya imammo isihunan ya bilaqaqta ham.
²⁹ Mat ya iqeman bolta na in ya inaq osauqta ham. Osad ya tutimmo in anad muzim daq emaiqta ham. Nazaq iyan in ya

iħulosan ya imomo a hi osaq ham.³⁰ Yesus gamuk na bilaqan on mataw kabemmo huriġim anan helmo tihaqy.

Gamuk helta naqmo in on mataw giga-mun hasid in samanmo tiluw os daqay

³¹ Ari Yesus in Juda on mataw in anan helmo haqiyta na gibilenim bilam, Ne gituw a hi hiċijsa yaqgo gamuk muzinad teq ne yaqgo disaipel-mo diq tiqy daqay ham.³² Ad ne yaqgo nan helta na ago ginad tiġem has daqaymo ham. Ginad em hassa nan helta naqmo ne giqamun hasid ne samanmo tiluw os daqay ham.³³ Haqan mataw na amenin emim bilaqy, I Abraham ago anaynayniz asor kawa haqiy. I mat araq ago kabibiy mataw samanta a hi osauq haqiy. Ni ezaq haqad i ginan bilam, Ne giqamun hasid samanmo tiluw os daqay ham? haqiy. Ni nazaq bilaqsa i ginad a hi em hasauq haqiy.

³⁴ Haqan Yesus in gigo gamuk amenin emim gibilan, Ya helmo ne gibilenaiq ham. Mat daq meqinta emaqtä na in daq meqinta naqmo ago kabibiy mat samanta iyim osaqta ham.³⁵ Kabibiy mat in ago ayahta ago bitab tuteqmo a hi osdaqta ham. Ari mat ayahta na atatin teq in amam ago bitab tuteqmo tuqosdaqta ham.³⁶ Nazaq iyan Mat Atatimmo ne giqamun hasid teq ne saman diqmo tiluw os daqay ham.³⁷ Ne Abraham ago anaynayniz osayta na ya inad emaiq ham. Ta teq yaqgo gamuk ne gigemab usdaqta na abanan hajq ham. Nazaq iyan ne ya inol emid moqgo adanteqin nagunay ham.³⁸ Ya imam ago hib osad nagah ahol wayta naqmo ago ya bilaqaiqta ham. Sa nazaqmo negmo gimam gibilanta nazaq ne daq emaytamo ham.

³⁹ Haqan Juda mataw na amenin emim bilaqy, I gimam Abraham-mo haqiy. Haqan ta Yesus gibilan, Ne Abraham atatniz diq iyeq teq Abraham daq emayaqtä nazaq ne em nagiyom ham.⁴⁰ Ya God ago hib gamuk helta huriġta naqmo gibilensta ne ya inol emid moqgo adanteqin tinagunay ham. Daq nawa na in Abraham ago daqta nog a hajq ham.⁴¹ Ne gimam diq ago daq ne muzayta ham. Haqan mataw na buloniy, I ginenan in danatab mataw ginaq daq meqinta emad luwim i a hi giqemiy haqiy. I gimam amulikmo na God-mo haqiy.

⁴² Haqan ta Yesus gibilan, God in ne gimam diq iyid teq ne ya inan ginad bilaq nagiy ham. Na ezaqgo ya God inaq osim teq ya bolim kawa osaiq ham. Inno ya iqeman bolta ham. Ya inadibmo a hi bol ham.⁴³ Ne ginad soqotim ussa ne yaqgo gamuk anan helmo a hi haqayta ham. Nazaq iyan ne yaqgo gamuk ka huriġim ginad a hi em hasay ham.⁴⁴ Ne gimam Satan alulibmo

ne gwahtiqiyya ham. Nazaq iyan ne gimam na daq emaqtä nazaqmo ne emnan ginad emayta ham. Kwaziq diqmo Satan mutur gwahtimta nab in mataw ginol emim emim bo muran kawa tiqiyaq ham. In daq helta a hi muzinaqta ham. Na ezaqgo in aholib daq araq helta haqgħam ham. In nan katyiatna qaqmo anamren ham. In aholib nan katyiatmo ussa iyan in nan katyiatna qaqmo bilaqad luwaqta ham.⁴⁵ Nazaq iysa iyan ya nan helta gibilensta ne anan helmo a hi haqayta ham.⁴⁶ Yaqgo daq meqinta edowa? ham. Ne għilkmanu biegħi bilaqda? ham. Ari ya nan helta bilaqsa teq ta nagaqgo ne yaqgo nan na anan helmo a hi haqay? ham.⁴⁷ On mataw God alulib gwahtiqiyya na in God ago gamuk huriġitayta ham. Ta ne God alulib a hi gwahtiqiyya na ago ne God aqez a hi huriġitayta ham.

Yesus bilam, Abraham a hi gwahtiqiyya ya tuqosta ham

⁴⁸ Ari Juda mataw aseseqta na in Yesus ago gamuk amenin emim bilaqy, I bilaqaq, Ni i gibabun Samariya-ibta gigo araq niholib bugaw meqinta usaq haqauqta na in helmo diq haqiy.⁴⁹ Haqan ta Yesus amenin emim bilam, Ya bugaw meqinta haqgħam ham. Ya imammo abin wazinad iluwaqta ham. Ta teq ne ya iħol abin bilaqunaiqta ham.⁵⁰ Yaqmo iħol abin ayah iydq haqad ya kabiġi a hi emaiqta ham. Mat araq ya ibin emid ayah iż-żyan anad bilaqsa nawa osaqta ham. Mat naqmo teq i tigilum kemdaq ham.⁵¹ Ya helmo ne gibilenaiq ham. On mataw yaqgo gamuk muzin daqayta na in a hikidik moq daqay ham.

⁵² Haqan Juda mataw na buloniy, Mu-ran i ningi tuhurit kemauq haqiy. Hel diqtaqmo ni niholib bugaw meqinta usaq haqiy. Abraham tumomta haqiy. Teq God ago nantut bunno tumoq bugiymo haqiy. Ta teq ni bilam, On mataw yaqgo gamuk muzin daqayta na a hikidik moq daqay ham haqiy.⁵³ Ezaq? haqiy. I gimam Abraham tumomta haqiy. Teq ni Abraham uriyamaq e? haqiy. God ago nantut bunno tumoq bugiymo haqiy. Ni nihol anan ezaq diq haqad nazaq bilaqqaq? haqiy.

⁵⁴ Haqan Yesus bilam, Yaqmo iħol abin iluwid teq ya ibin na ayah a hi iydq ham. Ta teq ya imam inmo ya ibin iluwaqta ham. Mat ne anan bilaqay, I gigo God haqayta naqmo in ya ibin iluwaqta ham.⁵⁵ Ta teq ne ya imam ago a hi huriġitayta ham. Ari yaqmo in ago tuhurit kemta ham. Ya in ago a hi huriġta nazaq ya a hi bilaqdaq ham. Ya nazaq bilaqeq ya mat katyiatna qaqmo tiqiyagħi ham. Teq ya God ago huriġitayta ya in ago gamuk muz bugiatiqta ham.

⁵⁶ Ne gises Abraham in yaqgo kam ka ahol waqnan anad ayahmo bilamta ham. Ad in yaqgo kam ka ahol tuwaqim in agem dimun diq iyaq ham. ⁵⁷ Yesus nazaq bilaqanmo Juda mataw aseseqta na tuloniy. Ningo ulig 50 nazaq a hi iyaq haqiy. Ni ezaq tonim Abraham ahol wam? haqiy. ⁵⁸ Haqan Yesus gibilenim bilam, Ya helmo ne gibilenaiq ham. Abraham a hi gwahtiqa yaqmo tuqosta ham. ⁵⁹ In nazaq haqan mataw na gig waqim Yesus amen hunegeq wolnan tonsamo in gimeb ulilemim Tempel ago gel asan ban gwahatiqim tilah.

9

Mat ame haiqta na awagamun

¹ Ari Yesus lehad luwimmo in mat araq ame haiqta ahol tuwam. Mat na anen agemab nazaqmo gwahtimta. ² Ahol waqsa in ago disaipel era tisusumun ugiy, Tisa haqiy nog diq daq meqinta eman mat ka anen agemab usadmo ame hiqiy? haqiy. Mat kaqmo daq meqinta am o hqiq in anen amam daq meqinta emiy? haqiy. ³ Haqan Yesus amenin emim gibilan, Mat ka daq meqinta a hi am ham. Ta in anen amam daq meqinta a hi emiyimo ham. Haiqgam ham. Mat ka aholib God ago kabiy emid ulal iysa on mataw ahol waq kem daqay haqad in ame hiqiyta ham. ⁴ Muran saw tihaftayim usaq ham. Sa i mat ya iqeman bolta na ago kabiy saw anuwanibmo emuq ham. Tarom teq tiqiydaq ham. Iyid teq mataw kabiy araq a ta hi em daqay ham. ⁵ Ya og kab osad ago saw anuwan iyim osaigta ham.

⁶ Haqadmo in ogib kusluwim og inaq buliyim in waqim mat ame haiqta na ameqnagnib tiqam. ⁷ Emadmo in bulon, Ni leheq yuw akurorqanta anan Silowam haqayta nab ni nome suhol ham. (Gamuk Silowam na alulin in kazaq, ‘Eman lah’ haqayta.) In nazaq bulonan mat ame haiqta na lehim ame tisuhol. Suholim ame tihaftaytan in saw ahol waq kemadmo muleqim ta bol.

⁸ Bolan ago uliqab walmataw teq mataw kwaziqmo in mani anan sun negsa ahol waqiyta na tibilaqiy, Ezaq? haqiy. Mat danib mani anan sunad osyaqta na amatin kawaqmo daqag haqiy. ⁹ Haqsa asor ‘Eqe’ haq yaqay. Ka mat naqmo daqag haq yaqay. Sa asor ‘Haiqgam’ haq yaqay. Ka in mat naqmo nogta teq ka in mat ta araq haq yaqay. Haqsa mat na bilayaq, Ka yaqmo haqyaq. ¹⁰ Haqsa teq mataw na tisusumun ugiy, Ta ni ezaq tonim nome na dimniy? haqiy. ¹¹ Haqan in gibilan, Mat anan Yesus haqayta na ogib kusluwim og inaq buliyim in waqim ya imeqnagnib am ham.

Emin in ya ibilan, Ni leheq yuw Silowam ub nime suhol haqad in bilam ham. In nazaq ibilinan ya le ime suholan tidimniy ham. An muran ya saw ahol tuwaqaiq ham. ¹² Haqan mataw na buloniy, Ta mat na edowa? haqiy. Haqan in bilam, Yowo ham. Ya a hi hurit ham.

¹³ Haqanmo mataw na in mat ame hiqiyim osta na waqim ad Farisi gigo hib tilehiy. ¹⁴ (Na Yesus ogib kusluwim og inaq buliyim in waqim mat na ameb eman ame hastitayta na in Juda gigo lotu akamnib kabiy na amta.) ¹⁵ Nazaq iyan Farisi in mat na tisusumun ugiy, Ni nome ezaq diq tonim dimniy? haqiy. Haqan in gibilan, Mat na ogib kusluwim og inaq buliyim in waqim ya imeb am ham. Eman ya le ime suholim ya saw ahol tuwaqaiq ham. ¹⁶ Haqanmo Farisi asor bilaqiy, God mat na eman a hi bolta haqiy. In i gigo lotu akaman ago gunun a hi muzinaqta haqiy. Haqsa ta asor bilaqiy, Ezaq teq mat aholib daq meqinta usaqta na in anad emsamo daq azawayin inaq kazaq gwahtiqaq? haqiy. Farisi nazaq haqad in gimo gihol huserim dahu giger tiqiyiy. ¹⁷ Nazaq iyan Farisi in mat ame hiqiyim osta na a ta susumun ugiy, Ni mat nome eman hastitayta na anan ninad ezaq emaq? haqiy. Haqan in bilam, Mat na in God ago nantut araq ham.

¹⁸ Ari Juda mataw na in mat na ame haiqmo osim teq ame dimniyta na anan helmo a hi haq yaqay. Nazaq iyan in mat ame dimniyta na anen amam gimen nan eman in tuboliy. ¹⁹ Bolan in susumun negim gibileni, Ka ne giger gitatin e? haqiy. Ka ne ame haiqmo emiya ye? haqiy. Ezaq tonim in saw ahol tuwaqaq? haqiy. ²⁰ Haqan in anen amam gamuk amenin emim bilaqiy, Ka i giger gigo amunta haqiy. Teq in ame haiqmo i emta haqiy. ²¹ Ta teq muran in ezaq tonim ame saw ahol tuwaqqa na ago i a hi hurit haqiy. Ad nog diq in ame eman hastitayta na i a hi huritmo haqiy. Ne inmo susumun ugiy haqiy. In mat ayah tiqiyta haqiy. Inmo aholmen gamuk tibilaqdaq haqiy. ²² Mat na anen amam in Juda mataw aseseqta na ginan rabad iyan in nazaq bilaqiy. Na ezaqgo Juda mataw na tekomo an adugan wazim bilaqiy, Mat araq Yesus anan Krais haqid teq na i bit humab wolaytab muzid in i ginaq lotu a ta hi emdaq haqad in bilaqiy. ²³ Nan asen naqmo ago mat na anen amam bilaqiy, In mat ayah tiqiyta haqiy. Ne inmo susumun ugiy haqiy.

²⁴ Nazaq iyan Farisi in mat ame hiqiyim osta na gime gigerta bulonan bolan in buloniy, Ni God amomo abin wazid eraqsa teq ni gamuk heltaqmo i gibilen haqiy. I mat na ago tuhurit haqiy. In daq meqinta emaqta haqiy. ²⁵ Haqan mat ame dimniyta

na in gigo gamuk amenin emim gibilan, Mat na daq meqinta emaqta o haiqta na ya a hi hurit ham. Ya nagah amulikmo ago huritta na in kazaq ham. Kwaziqmo ya ime haiqmo osta teq muran ya saw ahol tuwaqaq ham. ²⁶ Haqan mataw na buloniy, Mat na ezaq diq nitonan teq ni nime hastitat? haqiy. ²⁷ Haqan in gibilan, Ya tigibilenta teq ne huritnan gituw hiqiyaq ham. Ne ginad ezaq diq emad ne a ta huritnan bilaqay? ham. Ne inaqmo ingo disaipel iynan haqad ne susumun yagay ye? ham. ²⁸ Haqan Farisi in mat na bilawunim buloniy, Nimmo in ago disaipelta haqiy. Ari igmo Moses ago disaipelta haqiy. ²⁹ God in Moses-mo gamuk bulonta naqmo ago i tuhuritta haqiy. Ta teq mat nawa na in edob bolta na i a hi hurit haqiy.

³⁰ Haqan mat na in Farisi gigo gamuk amenin emim gibilan, Ne gigo gamuk nawa ne bilaqayta na in lul araq diq ham. Mat na edob bolta na ago ne a hi hurityata teq in ya ime eman thastitat ham. ³¹ God in mataw daq meqinta emayta giqez a hi huritaqta ham. Na ago i bunmo tuhuritta ham. Ari mat God abin wazinad anad muzinsa teq God in aqez tuhuritdaq ham. ³² Kwaziq diqmo og mutur gwahtimta nab iyim bolim bo muran kam kab aw araq amun ame haiqta eman teq abeb mat araq in ame eman hastityata na awagamun araq diq i a hi huritta ham. ³³ Ari God in mat na emid a hi bolta iyid in daq araq a hi em nagta ham. ³⁴ Haqan mataw aseseqta na amenin emim buloniy, Ni ninen niqamta nab ni daq meqinta emad luwim bo muranmo haqiy. Ni mat nazaqta iyim osadmo ni i suleq igaq e? haqiy. Haqadmo in mat na baymuzan tilah.

Mataw Yesus anan helmo a hi haqayta na in bilaqne mataw gime haiqta nog

³⁵ Ari Farisi mat na baymuzan lahta na ago Yesus huritim in mat na nagunim le ahol waqad tubulon, Ni Mat Atatin anan helmo haqqad e? ham. ³⁶ Haqan mat na bilam, Mat ayah ham. Mat Atatin na nog? ham. Ni ya ibilenid teq ya in anan helmo tihqdaiq ham. ³⁷ Haqan Yesus bulon, Ni mat na ahol tuwam ham. Mat na muran ni ninaq gamuk emaq kaqmo ham.

³⁸ Haqan mat na bilam, Iyatha ham ya ninan helmo tihqaiq ham. Haqad in abakkalan ulum laquwim turad Yesus abin tiqiluw. ³⁹ An Yesus bilam, Ya mataw gilum kemnан haqad og kab bolta ham. Gilum kemsа mataw gime haiqta na saw ahol tuwaq daqay ham. Sa mataw bilaqay, I saw ahol tuwaquaq haqayta na in gime thihiqiydaq ham.

⁴⁰ Haqsa Farisi asor Yesus agerab turad gamuk na tuhuritiy. Huritim in Yesus buloniy, Ezaq? haqiy. I inaqmo gime hiqiyyim osauqta ye? haqiy. ⁴¹ Haqan Yesus gibilan, Ne mataw gime haiqta iyeq teq ne gigo daq meqinta na amenin a hi waq nagly ham. Ta teq ne bilaqay, I gime saw waqauqta haqayta ham. Nazaq iyan ne gigo daq meqinta na giholib us tutsa ne teq amenin tuwaq daqay ham.

10

Sipsip ginamren dimunta na Yesus-mo

¹ Ari Yesus bilam, Hel diqtaqmo ya ne gibilenaiq ham. Mat sipsip gigo gel ago dan ezab le a hi gwahtiqaqta na in mat arin inaqta ham. Mat naqanta in gel asan ban luwad gel itiyonim adugan ban gwahtiqaqta ham. Nazaq iyan in bilaqne mat mataw gigo bit wolim gigo nagah rin tonaqta na nog iyaqta ham. ² Ari mat dan ezabmo lo gwahtiqaqta naqmo in sipsip ginamrenmo diq ham. ³ Kabibiy mat gel ago dan ez wamuzim osaqta na in sipsip ginamren diq bolsa ahol waqad in ayon dan tihas ugaqta ham. Teq sipsip in ginamren na aqez hurityata ham. Sipsip ginamren na in sipsip amulik-mulikmo ginan biyim gililewunad giqad asanib lehaqta ham. ⁴ In ago sipsip bunmo giqad asanib lehad inmo danmeb lehaqta ham. Lehsa sipsip in mat na aqez hurit kemim in muzim inaq lehayta ham. ⁵ Sipsip na in mat amota a hi muz daqayta ham. Haiqgam ham. In mat amota na rabunad tulq daqayta ham. Na ezaqgo in ginamren amomo aqez hurityata na ago ham. ⁶ Yesus gamuk awowun ka amalib Farisi nagan giblanta teq in gamuk awowun na alulin diq ginad a hi em hasiy.

⁷ Nazaq iyan Yesus ta gibilan, Ya helmo ne gibilenaiq ham. Sipsip gigo gel ago dan ez na yaqmo ham. ⁸ Mataw bunmo ya a hi bolsa in ameb bolitya na in mataw girin inaqta teq in mataw danib giwazim ginolim gigo nagah samanmo waqiyta amatawun ham. Teq sipsip in mataw na giqez a hi huritiy ham. ⁹ Yaqmo gel ago dan ezmo diq ham. Mat aw nog yaqgo hib boleq yaqgo gel aduganib gwahtiqid God in gilumsiheq tigiwaqdaq ham. Giwaqid teq on mataw na lo gwahtiqaq ge gwahtiqaq loq gwagelad didaq waqad tiluw daqay ham. ¹⁰ Mat arin inaqta na in sipsip girin toneq gimegin tonad ginol emid moqgo haqad in bolaqta ham. Mat naqanta in kabiya araq ago a hi bolaqta ham. Ta teq ya sipsip giqemid in kayeqmo dimurno osgo haqad bolta ham. Ya giqemid kayeqmo ossa yaqgo os dimunta na in giholib ame gwaleq tuqusdaq ham.

¹¹ Yaqmo sipsip ginamrenmo diq ham. Nazaq iyan yaqgo sipsip anonon diqmo giwamuzaqta ham. Mat sipsip anononmo giwamuzaqta na in ago sipsip ginadin emad in gimen ahol nog hulosaqta ham. ¹² Ari kabibiy matmo teq in sipsip giwamuzaqta ago anawun waqaqta naqmo in anadin emaqta ham. In sipsip ginadin diq a hi emaqta ham. Na ezaqgo in sipsip ginamren a haiqta ham. In mani-mo anadin emad luwsa gaun kwasikta bolsa in ahol waqadmo in ago sipsip gihulosad tukaqta ham. Tuksa gaun kwasikta na sipsip gimug ninalad gimuzan hareshmo lehayta ham. ¹³ Mat nazaq emaqta na in ago sipsip ginadin a hi emad in mani-mo anadin emaqta ham.

¹⁴⁻¹⁵ Ari yaqmo sipsip ginamrenmo diq ham. Ya anonon diqmo giwamuzaqta ham. Ya imam in yaqgo huritsa ta yaqmo ya imam ago huritaiqtamo ham. Ad nazaqmo ya igo sipsip gigo huritsa ta yaqgo sipsip in yaqgo huritaytamo ham. Ad teq ya igo sipsip ginadin emad ya in gimen ihol nog hulosdaiq ham.

¹⁶ Yaqgo sipsip ta asor saw araqab luway ham. In yaqgo sipsip gihumaban kab luwayta ka gigo asor a haiqta ham. Ya sipsip en ta araq na gililewunid in ya iquez huriteq yaqgo hib bolsa ya giwaqeq giqad yaqgo gel aduganib le tugwahtiqdaiq ham. Gwahtiqid teq yaqgo sipsip bunmo in en amulikmo iysa sipsip ginamren na amulikmo tiqiyadaqmo ham.

¹⁷ Yaqgo sipsip ginadin emad ya in gimen ihol nog hulosdaiqta ham. Nazaq iyan ya imam in ya inan anad diq bilaqqaqta ham. Ya sipsip gimen ihol nog huloseq teq ya kayeq ta iydaiq ham. ¹⁸ Mat araq anadibmo a hi inol emidaq ham. Haiqgam ham. Yaqmo inadibmo ihol nog tuhullosdaiq ham. Ya inadibmo ihol nog huloseqta na ago zaway ya iholib usaqta ham. Teq ya inadibmo kayeq ta iydaiqta na azawayin yaqgo hib usaqtamo ham. Ya daq nazaq emgo haqad ya imam ibilanta ham.

¹⁹ Ari Juda mataw aseseqta na Yesus ago gamuk na huritim in ginad giger iyan in gimo gihol huserim humab giger tiqiyiy, teko in emiyta nazaq. ²⁰ Iyim mataw na asor kabemmo Yesus anan bilaq yaqay, Bugaw meqinta aholib ossa in anad agadan iyaq haq yaqay. Nagaggo i ago gamuk huitam? haq yaqay. ²¹ Sa asor bilaq yaqay, In gamuk bilaqqaqta na in mat ago bugaw meqinta aholib ussa gamuk bilaqqaqta na nog a hi iyaq haq yaqay. Mat ago bugaw meqinta aholib usaqta na in ezaq mat ame haiqta wastitayid ame hastitaydaq? haq yaqay.

Juda mataw Yesus gihar ug yaqay

²² Ari kam nagab uliq Jerusalem-ub humab araq ayahta ago akaman tugwahtim. Kam na kwaziqmo Tempel meqniyan Juda gisesan wastitayim asirin tonim adanin hasiyya na anadin emgo akaman. Ulig bunmo saw amuditqan diq iyyaqla na akannib kam na gwahatiqta. ²³ Kam nab Yesus Tempel ago gel aduganib gwahtiqim le veranda sisqaqta anan Solomon ago veranda haqayta nab gwalim in leh bolad tiluwyaq. ²⁴ Luwsa Juda mataw aseseqta na Yesus agerab bolim litut ugim turadmo in bulonim bilaqiy, Kam gineh teq ni i gibilen kemdaq? haqiy. Ni Krais iyeq teq ni bilaq sireqeqlmo i gibilen haqiy.

²⁵ Haqan Yesus in gigo gamuk amenin emim bilam, Ya ne tigibilenta ham. Teq ne helmo a hi haqiy ham. Kabiy ya imam abinib emaqta na in ya ihol alulin ago ne gibilen kemaqta ham. ²⁶ Teq ne ya inan helmo a hi haqayta ham. Ne yaqgo sipsip a haiqta ham. Nazaq iyan ne ya inan helmo a hi haqayta ham. ²⁷ Yaqgo sipsip ya iquez huritayta ham. Teq ya in gigo huritsa in ya imuzim inaq bolayta ham. ²⁸ Ya igo sipsip giqemid in kuluwa-kuluwmoo osad a kidikid moq daqay ham. Sa mat araq yaqgo sipsip ya ibenab a hi giwaqdaq ham. ²⁹ Ya imam inmo yaqgo sipsip na giyagta ham. Teq in og ka ago zaway bunmo giquriyamim osaqla ham. Nazaq iyan mat araq ya imam abenab yaqgo sipsip na a hi giwalemdaq ham. ³⁰ Ya imam inaq i mat amulikmoqmo iyim osauqta ham.

³¹ Yesus nazaq haqanmo Juda mataw aseseqta na gig waqim Yesus amen a ta hunegnan toniy. ³² Sa Yesus bilam, Ya Gimam Iyahta ago kabiy dimdimunta kabemmo tigiqisihun ham. Kabiy dimdimunta na gilikmanib edo diq ago ne yaqmen gig tuhunegnan tonay? ham. ³³ Haqan mataw na bilaqiy, I kabiy araq dimunta ago ninmen gig a hi hunegauq haqiy. Haiq haqiy. Ni God bilawunaqta naqmo ago i ni ninolnan ginad emauq haqiy. Ni mat diqmo araqta teq ni bilaqqaq, Yaqmo God haqqaq haqiy. Na ago i ninmen gig tuhunegnan haqiy. ³⁴ Haqan Yesus gibilan, God ago maror Moses mar tonta nab gamuk araq kazaq usaq ham. Gamuk nab God kazaq bilam ham.

Yaqmo ne ginan bilay, Ne god-mo hay ham.
Buk Song 82.6

³⁵ God ago marib in on mataw God ago gamuk waqiyta na ginan 'god' haqan usaqta ham. Ussa mat araq diq in God ago mar na emid samanta iygó biyab a haiq ham. ³⁶ Ari ya imam in ya itowun emim aholyon tiqwamta ham. Iwaqim iqeman ya og kab bolta ham. Nazaq iyan ya ihol anan bilaqdaiq, Ya God Atatin nazaq ya

a hi bilaqdaiq e? ham. Nagaqgo ne ya imalib nan emim bilaqay, Ni God bilawunaq haqay? ham.

³⁷ Ya imam ago kabiy diq a hi emsa teq ne ya inan helmo hi haqiy ham. ³⁸ Ari ne yaqgo gamuk anan helmo haqnan ginadnad emad teq ne ya imam ago kabiy ya emaiqa naqmo ne ahol waq kemad teq ne ya inan helmo haqiy ham. Ne yaqgo kabiy ahol waqad ya inan helmo haqeq teq ne ginad tigem has daqay ham. Ginad em haseq ya imam yaqgo hib ossa ya in ago hib osaqtä na ago ne tuhurit daqay ham. ³⁹ Haqanno mataw na Yesus wazeq irqurnan tonsa in qiquriyamim tilah.

⁴⁰ In muleqim ta lehad in yuw Jodan urotim saw kwaziqmo Jon in mataw huz negyaqta nab in gwahtiqim tuqos. ⁴¹ Ossa mataw kabemmo in ago hib tubol yaqay. Bolad in bilaq yaqay, Jon in ago gamuk ulumsihad daq araq azawayin inaqta emsa i ahol a hi waw haq yaqay. Ta teq gamuk bunmo in mat ka anan bilamta na in helmo diq haq yaqay. ⁴² Ad saw nab mataw kabemmo Yesus anan helmo tihaqiy.

Yesus uliq Jerusalem saw Judiya-ibta nab lehan Juda gigo mataw marorta na in wol emnan ginad emiy

11

Lazarus moqan Yesus lilewunan ta eram

¹ Ari mat araq anan Lazarus uliq Betaniyibta na moqad us. Uliq na in Mariya abab Marta inaq gigo uliqta. ² Teq aw masil ahuran dimunta wažbalan Iyahta asenab woqan in aqensanib bayta na Mariya-mo.* Sa mat moqad usta na in Mariya ahiy. ³ Ari mat na moqad ussa in ahiyan giger na nan eman Yesus ago hib lehan in bilaqiy, Iyahta haqiy mat ni anan ninad bilaqaqta na tumoqqaq haqiy. ⁴ Haqan Yesus nan na huritim bilam, Moq na in mat moq hasdaqta a haiq ham. Moq na on mataw giqemid in God abin iluw daqayta ham. Iluwsa daq na amalib God Atatin abin ayah tiqiydaqmo ham.

⁵ Yesus in Marta ama inaq teq in gihiy Lazarus inaq ginan anad diq bilaqaqta. ⁶ Nazaq iyan in Lazarus moqad usaqta na huritim in kam gigermo a ta os, uliq in osta nab. ⁷ Osim teq in ago disaipel gibilan, I muleqeq saw Judiya-ib ta lehuq ham. ⁸ Haqan disaipel buloniy, Tisa haqiy muran kawa Juda mataw aseseqta na in ni nimalib gig hunegeq ninol emnan haqad ginad usaq haqiy. Teq ni nab a ta lehnanaq bilaqaq e? haqiy. ⁹ Haqan Yesus gibilan,

Saw hastitayim le imisor iyaqta nab zeq humrad usaqta ham. Ussa mat zeqab luwad a hi woqqaqta ham. In og ka anuwan ahol waqad dimunmo luwaqta ham. ¹⁰ Ari mat taromab luwaqta na in woqnan woqnan tonad luwaqta ham. Na ezaqgo in ame romriq iysa in saw ahol a hi waqqaqta ham.

¹¹ In nazaq bilaqim teq in gibilan, I gigo kadoy Lazarus tuqusaq ham. Sa ya leheq wazid tigeraqnan ham. ¹² Haqan in ago disaipel buloniy, Iyahta haqiy in usmo usaqta iyeq in teq tidimniydaq haqiy. ¹³ Na Yesus in Lazarus tumom haqad bilamta teq disaipel ginad a hi emiy. In ginad emiy, In us diq usaq haqiy. ¹⁴ Nazaq iyan Yesus gibilen hasim bilam, Lazarus tumom ham. ¹⁵ Ad in moqsa ya inaq a hi osta na in dimun diq ham. Ya ne ginadin emad ya inad tidimniyaq ham. Muran ne ya inan helmo tihaq daqay ham. Ari i mat na ago hib lehuq ham. ¹⁶ Haqan Tomas, anan araq Didimus haqayta na, in disaipel ta asor na gibilan, O tob iysa i inaq leheq inaq moquq ham.

On mataw moqiyta teq eraq daqayta na alulin Yesus-mo

¹⁷ Ari Yesus le uliq Betaniyib gwah-tiqim Lazarus kam aweweqmo hodhodab tuqusta na ago in tuhurit. ¹⁸ Uliq Betaniy in Jerusalem agerabmo usaqta. In pesan diq a haiq, 3 kilomita nazaq in usaqta. ¹⁹ Nazaq iyan Juda on mataw kabemmo uliq ayahta nab osim in Marta ayow Mariya inaq gigerab boliy, on giger na gihiy amatqanta moqan in ginad waqnan haqad. ²⁰ Ari Marta in Yesus bolaqta na abin huritad in eraqim adanan tilah. Sa Mariya bitabmo os. ²¹ Ossa Marta lehim Yesus tulon, Iyahta ham ni kab osta iyid ya ihiy a hi moq nag ham. ²² Teq ya inad emaiq ham. Ni God inaq gamuk emad nagah araq ago susumun ugid in tigem nigdaq haqaiq ham. ²³ Haqan Yesus bilam, Ni nihiy teq tigeraqdaq ham. ²⁴ Haqan Marta bilam, Kam abebtanta nab teq in eraqdaqta na ago ya tuhurit ham, kam on mataw bunmo hodhod huloseq eraq daqayta nab ham. ²⁵ Haqan Yesus bulon, Mataw hodhodab eraq daqayta na alulin yaqmo ham. Teq mataw kayeqmo kuluwa-kuluwmo osayta alulin na yaqmo ham. Mat ya inan helmo haqad osim moqqaqta na in teq kayeq ta iydaq ham. ²⁶ Teq on mataw og kab kayeqmo osad ya inan helmo haqayta na in moqeq a hi moq has daqay ham. In kayeqmo kuluwa-kuluwmo tuqos daqay ham. Ni yaqgo gamuk ka anan helmo haqaiq e? ham. ²⁷ Haqan Marta bulon, Eqe ham, Iyahta ham. Ya inad emaiq, Ni Krais haqaiq ham. Ni God

* **11:2:** Jon 12.1-8 nab teq ni Mariya Yesus asenab masil wazbalta na awagamun ahol waqdaq.

atatinmo haqiq ham. God mat emid og kab bolnan anad usta na amatin ninmo ham.

Yesus Lazarus anan anad meqniysa gam

²⁸ Marta gamuk na tibilaqim in muleqim ta lehim in amikqan Mariya waqim ad adek ban loqim kiskismo bulon, Tisa tubolim osad in ni ninan susumunaq ham. ²⁹ Haqan Mariya gamuk na huritum in hidmo eraqim Yesus ago hib tilah. ³⁰ Yesus uliqab a hi gwahtiqad in saw Marta lehim ahol wamtta nab luwsa Mariya in agerab lah. ³¹ Lehsa on mataw Mariya anad waqad inaq bitab osiyta na in Mariya hidmo eraqim asanib lehsa ahol waqad in muzim inaq tilehiy. In ginad emiy, Aw ka hodhodab gaq waznan lehaq haqiq. ³² Haqsa Mariya Yesus agerab bolim ahol waqad anognib abakkaban ulum laquwim turad teq in bilam, Iyahta ham ni kab osta iyid ya ihiy a hi moq nag ham.

³³ Haqan Yesus in Mariya gaqsa ahol waqad teq Juda on mataw Mariya inaq boliyya na inaqmo gaqsa in gibiyad in ahol afaqan iyad anad timeqniyyaqmo. ³⁴ Anad meqniysa in bilam, Mat na asan edob emiy? ham. Haqan in buloni, Iyahta haqiq, bo leheq ahol waq haqiq. ³⁵ Haqan Yesus lehim ahol waqad in tigam. ³⁶ Gaqsa Juda mataw nab turiyta na bilaqiy, Ahol waqiq haqiq. Mat ko in mat momta na anan anad diq bilaqyaqta haqiq. ³⁷ Haqan teq ta asor bilaqiy, Mat ko in mat ame haitqa na wastitayan in ame hastitaya haqiq. Ta nagaqgo in mebmebmo bolim mat momta ka moqad kayeqmo banab ussa a hi ulumsih? haqiq.

Yesus Lazarus bulonan hodhodab eram

³⁸ Ari Yesus ahol afaqan iysa in hodhod agerab tilom. Hodhod na in gigib yay emim aduganib mat asan emim teq in gig ayahta ulum buliyan loqim yay aqez ituqim usta. ³⁹ Teq Yesus hodhod agerab loqimmo tibilam, Ne yay aqezab gig usaqta na walemiy ham. Haqan mat momta na ahiiy Marta bilam, Iyahta ham in asan kam aweweEqmo hodhodab tuqusim ahuran tiqiy ham. ⁴⁰ Haqan Yesus bulon, Ya tinibilem ham. Ni ya inan helmo haqeq teq ni God ago zaway ahol tuwaqdaq hay ham. Na ni anadin a hi emaq e? ham. ⁴¹ In nazaq haqanmo mataw yay aqezab gig usta na tuwalemiy. Waleman Yesus ame ulilib gwalsa in bilam, Ya imam ham ni ya iquez tuwazta na ago ya esey nigaiq ham. ⁴² Ni tutimmo ya iquez wazaqta na ya tuhurit ham. Teq ya on mataw kawa turayta ka ginadin emad ya in gimeb ni ninaq gamuk kawa tibilaqaiq ham. Bilaqsa teq ni ya iqeman bolta na ago in anan helmo haq daqay haqad ham. ⁴³ In gamuk

na tibilaqim teq in lileyim bilam, Lazarus ham ni bo gwahtiq ham. ⁴⁴ Haqanmo mat momta na abensenab tubusan hiksireqim amalib net muziyta nagan teq tubusan araq anobun isihan usta na inaqmo in bo asanib tugwahtim. Gwahtiqan Yesus in mataw nab turiyta na gibilan, Hasid in luwan ham.

Mataw marorta Yesus wol emid moqgo an adugan waziy

(Matyu 26.1-5; Mak 14.1-2; Luk 22.1-2)

⁴⁵ Ari Juda on mataw Mariya inaq bolim hodhod agerab turiyta na in Yesus daq amta na ahol tuwaqiy. Ahol waqad kabemmo in anan helmo tibaqiy. ⁴⁶ Ta teq in gigo asor Farisi gigo hib lehim Yesus daq amta na ago tigibileniy. ⁴⁷ Gibilanan mataw tamaz emayta gigo aseseqta na giyogniz Farisi nenaq in Juda gigo kaunsel ayatha na amatawun bunmo gibilanan bolim humab tuwolij. Humab wolim in bilaqiy, Teq i ezaq tonam? haqiq. Mat na daq azawayin inaqta kabemmo emaqta haqiq. ⁴⁸ I mat na adanin a hi qwayid in nazaq em tutsa mataw bunmo in anan helmo tibaqay daqay haqiq. Sa teq Rom huriteq in boleq i gigo Tempel wol inerad in i gimuzid i og ka hulosad haresmo leheq mataw ta asor gigo ogib begbegta iyeq osam haqiq.

⁴⁹ Haqsa in gigo araq anan Kayafas haqayta in ulig nab tamaz mat danmebta iyim osta na in eraqim tigibilan, Ne ginad haiq ham. ⁵⁰ I bunmo hinqi bugamta na in meqin ham. Ari mat amulikmo i gimen moqid i bunmo dimunmo osamta na in dimun ham. Na ne ginad a hi emay ye? ham. ⁵¹ Na in anadibmo gamuk na a hi bilamta. Haiqgam. In ulig nab tamaz mat danmebta iyan God-mo anad ugan in Jesus Juda on mataw gimen moqdaqta na ago bilamta. ⁵² Teq Yesus in Juda on mataw giminomo gimen moqdaqta nazaq a haiq. In God ago onmin og saw bunmo osayta na girom tonid in mataw en amulikmo iy daqay haqad in bunmo gimen moqdaqta. ⁵³ Ari Kayafas nazaq haqan nab mataw aseseqta na in Yesus wol emid moqgo adateniqin tinagun yaqay.

⁵⁴ Nazaq iyan Yesus in Juda gimeb ulalab a ta hi luwyaq. In saw na hulosim le uliq abebtanta anan Efrayim haqayta nab in ago disaipel nenaq tuqosiy. Uliq na abun ban saw saman diqta aquqliqin haiqta usaqta.

⁵⁵ Ari Juda gigo kam ayah diqta anan Pasova haqayta na akaman bolim sinsin tiqiy. Iyan kam na a hi gwahtiqsamo Juda mataw kabemmo in gihol udineq gihol wastitayid teq kam ayahta na gwahtiqan haqad in uliq Jerusalem-ub tugwalehiy. ⁵⁶ Gwalehim in Yesus anan saw waqad

teq in Tempel ago gel aduganib gwahtiqa turad in an tisusumun ug yaqay, Ne ginad ezaq emay? haq yaqay. Yesus humab kab a hi boldaq daaqgya haq yaqay.⁵⁷ Na mataw tamaz emayta gigo aseseqta na giyogniz Farisi nenaq in tekomo mataw gibilenim bilaqiy, Ne Yesus edob osaqtu na ago hureteq teq ne bo i gibilenid i tuwazam haqiy.

12

Mariya masil ahuran dimunta Yesus asenab wazbal

(Matyu 26.6-13; Mak 14.3-9)

¹ Ari abeb kam 6 nazaq le tihiqiyid teq Juda gigo lotu akaman ayahta anan Pasova haqay na tugwahtiqaqta. Kam nab Yesus muleqim Lazarus ago uliq Betaniy-ib ta lah. Mat naqmo moqan Yesus hodhodab wazan eramta. ² Lehan uliq nab in amen didaq tuqoyiy. Oyim Marta didaq soqoreq a bolsa Lazarus in mataw nenaq didaq neqad os yaqay. ³ Ossa Mariya in masil anan nard haqayta anawun ayahmota na asor wazim a bo Yesus asenab wazbalan woq bugan teq in aqensanib tubayyaq. In nazaq emsa masil na ahuran dimun digta bit adugan tuwaleq ton bug.

⁴⁻⁵ Sa ta Yesus ago disaipel araq Judas uliq Kariyot-ibta na bilam, Nagaqgo i mataw ginaghan haiqta gihulosauq? ham. I masil ahuran dimunta na mat araq inaq zayeq 300 kina nazaq waqeq mataw ginaghan haiqta na neg nagta ham.* Mat naqmo teq Yesus bab gibenab emdaqta na amatin. ⁶ Teq in mataw gina haiqta na ginadin emad nazaq a hi bilam. Haiqgam. In mat rin tonaqta iyim in nazaq bilamta. Na ezaggo in Yesus ago disaipel nenaq gigo hululut mani emayta na wamuzyaqta amatin. Ad hululutib mani usta na asor in hikrinad aholyon waqyaqta. ⁷ Ari Yesus nan na huritim bilam, Ne aw ka hulosiy ham. Ya moqid mataw iyay ton daqayta nab aw ka masil ahuran dimunta na ya iholib emgo haqad in zayan usta ham. ⁸ Tutimmo mataw ginaghan haiqta na ne nenaq osayta ham. Ari yaqmo ne nenaq tuteqmo a hi osdaiq ham.

Juda gigo mataw aseseqta Lazarus wol emgo bilaqiy

⁹ Juda mataw biyahmo Yesus uliq Betaniy-ib osaqtu na huritim in ahol waqnan tuboliy. Teq mataw na Yesus amomo ahol waqnan a hi boliy. Haiqgam. In Lazarus mat Yesus hodhodab wazan eramta na inaqmo ahol waqnan haqad boliy. ¹⁰⁻¹¹ Juda mataw kabemmo in Lazarus moqim ta eramta na ago huritim in mataw tamaz emayta gigo aseseqta na

gihulosad in Yesus ago hib bolad anan helmo tihaq yaqay. Nazaq iyan mataw tamaz emayta gigo aseseqta na in Lazarus inaqmo wol emid moqgo ginad emiy.

Yesus king nog iyim le uliq Jerusalem-ub gwahtim

(Matyu 21.1-11; Mak 11.1-11; Luk 19.28-40)

¹² An tarom iyim saw tihastitayan Yesus eraqim Jerusalem-ub tilah. Lehsa on mataw dahu kabemmo Pasova ahumabun ahol waqnan haqad Jerusalem-ub bolim osiyta na in Yesus bolsa abin tuhuritiy. ¹³ Huritim in ay anan det haqayta na aben giwaqim teq in Yesus ahol waqnan adanin tilehiy. Lehad in bilaq yaqay,

God abin soriy haq yaqay.

Mat ka Iyahta abinib bolan iyan i ginad bilaq gigayinaq haq yaqay.

Mat kaqmo in Isrel gigo king haq yaqay.

¹⁴ Haqsa Yesus donki minminta araq ahol waqim in amalib osim tilehyaq. God ago marib gamuk usaqta nazaqmo in am. ¹⁵ Gamuk na bilam,

Ne on mataw uliq Sayon-ibta ham ne hi rabiy ham. Ahol waqiy ham. Ne gigo king nawa donki amidon amalib osim bolaq ham. *Sekaraya 9.9*

¹⁶ Kam nabmo Yesus ago disaipel gamuk na alulin ago ginad a hi em hasiy. Abeb God Yesus abin ayahta turugan teq in daq na anadin a ta emiy. Anadin emad in ginad emiy, God ago marib gamuk Yesus anan bilamta nazaqmo diq on mataw in ayon em ugiy haqiy.

¹⁷ Teq Yesus Lazarus lilewunan hodhodab ge gwahtiqa on mataw kabemmo hab turad ahol waqiyta. Ahol waqim in nagah gimeb ahol waqiyta na tekomo uliq-uliqgo tibilaqiy. ¹⁸ Bilaqsa on mataw biyahta na in Yesus daq azawayin inaq amta na ago huritim in ahol waqnan adanin lehiyta. ¹⁹ Lehsa Farisi gibiyad in gimo an bulonim bilaqiy, I ginad emuq haqiy. I mat ko adanin qwaygo akamun tihiqiy haqiy. I ko gibiyuq haqiy. On mataw bunmo in anan helmo haqad muzim inaq tilehay haqiy.

Grik mataw asor Yesus ahol waqnan boliy

²⁰ Ari on mataw biyahmo Juda gigo lotu akaman ayahta na ahol waqnan bolsa in gilikmanib Grik mataw asor nenaq tuboliy. ²¹ Bolim in Filip ago hib lehiy. Filip in uliq Betsaida saw Galiliy-ibta amatin. Nazaq iyan mataw na Filip ago hib lehim tisusumun ugiy. Mat ayah haqiy i Yesus ahol waqnan bol haqiy. ²² Haqan Filip le Andru bulonim teq in giger le Yesus

* **12:4-5:** 300 kina na in bilaqne mat araq ulig amulikmo aduganib kam bunmo kabiy emdaqta amenin nog.

tubuloniy. ²³ Bulunan Yesus in gigo gamuk amenin emim gibilan, Mat Atatin ahol abin ayahta waqdaqta na akaman muran tug-wahtim ham. ²⁴ Ya helmo ne gibileniaq ham. Wit anagin ogib woqeinq a hi moqeinq na in anon a hi emdaq ham. In amulikmoqmo usdaq ham. Ari wit anagin na ogib woqeinq moqeinq teq in ahokan gwaleq anon kabemmo tiqemdaq ham. ²⁵ On mataw in gimo gihol anadin diq emayta na in gihol awitan tihik hules daqay ham. Ari on mataw og kab osad in gihol anadin a hi emayta na in kuluwa-kuluwmo tuqos daqay ham. ²⁶ Mat aw nog yaqgo kabiy emnan ginad bilaqaqta na in ya imuzeq tubol daqay ham. Ad uliq ya osaiqta nab in tuqos daqaymo ham. Osad in yaqmen kabiy emsa Gimam Iyah in gabin tiqiluwdaq ham.

Mat Atatin aqayin inaq wazid eraeqq titurdaq

²⁷ Haqad Yesus bilam, Muran ya ihol afaqan diq iyaq ham. Ta teq ya ezaq haqdaiq? ham. Ya imam ni ya iholib daq gwahtiqnan tonaqta ka walem haqdaiq e? ham. Haiqgam ham. Ya nazaq a hi bilaqdaiq ham. Daq naqmo ya iholib gwahtiqgo ya og kab bolta ham. ²⁸ Haqad in bilam, Ya imam ham ni nibin emid ayah iyan ham. Haqsamo God aqez Heven-ib gehitiqim bilam, Ya ihol abin eman ayah tiqiy ham. Teq ya emid in ayahmo diq ta iydaq ham. ²⁹ Haqan on mataw nab turiyta na huritum bilaqiy, Kait ahulan iyaq haqiy. Sa asor bilaqiy, Angelo araq bulonsa i aqez hurit haqiy.

³⁰ Haqsa Yesus gibilan, Gamuk na ya ilumsihgo a hi gwahtim ham. Haiqgam ham. Gamuk na negmo gilumsihgo gwah-timta ham. ³¹ Muran God in on mataw og kabta hazizirib giqemim gigo daq tigilum kemaq ham. Muran in mat meqinta og ka wamuzim osaqla na muzid tilehdaq ham. ³² Ari yaqmo teq mataw ya iwazid eraeqq og huloseq gwale turad teq ya on mataw bunmo gihureqid yaqgo hib tubol daqay ham. ³³ Na Yesus in dante ezaqtal moqdaqta na ago in nazaq bilam. ³⁴ In nazaq haqan on mataw na amenin emim bilaqiy, God ago marib gamuk araq kazaq bilaqsa i huritta haqiy. Gamuk na bilam, Mat anan Krais haqayta na og kab gwahtiqeq osad in ago os a hi hiqiydaqta haqad in bilam haqiy. Nagaqgo ni bilam, Mataw in Mat Atatin wazid eraeqq gwale turdaq ham? haqiy. Teq ni Mat Atatin anan bilamta na in nog diq? haqiy. ³⁵ Haqan Yesus gibilan, Saw anuwan asitmo ne nenaq a ta usdaq ham. Saw anuwan na oysa ne saw waqad lehiy ham. Luweq ne le God ago maror aduganib a hi gwahtiqsamo romriq tigiqisihdaq ham. Mat romriqab luwad

in ezaq lehaqta na ago in anad a hi em hasaqla ham. ³⁶ Muran saw anuwan na oysa ne anan helmo haqiy ham. Ne helmo haqeq teq ne saw anuwan na ago onmin tiqiy daqay ham.

Ari Yesus gamuk na bilaqim tihiqiyan in on mataw na gihulosad lehim gimeb tuqulilam.

Juda mataw kabemmo Yesus anan helmo a hi haqiy

³⁷ Yesus kabiy azawayin inaqla kabemmo on mataw gimeb amta teq in anan helmo a hi haqiy. ³⁸ On mataw na daq nazaq emim in God ago nantut Aisaya gamuk bilamta na tuwol net bugiy. Aisaya bilam,

Iyahta ham nog i gigo gamuk anan helmo haqqaqt? ham. Teq ni kabiy awaz meqin diqta emsa nog ahol waqad anad em hasaqla? ham. *Aisaya 53.1*

³⁹ On mataw na Yesus anan helmo haqgo ginad soqotim diq usyaqta. Teq Aisaya daq na alulin bilaqad in gamuk araq kazaq bilammo. ⁴⁰ In bilam, God in mataw na gimeqnagin eman in saw a hi waqayta ham. Ad in ginad eman soqotim diq usaqla ham.

Luweq in gime nagah ahol waqad in ginad em haseq teq in ginad buliyeq God ago hib ta bol daqay haqad ham. Bolid teq God in giwastitayid dimniy daqay haqad ham. *Aisaya 6.10*

⁴¹ Aisaya in Yesus ago zaway teq in ahol anuwan ahol waqim teq in Yesus-mo ananib gamuk na bilaqan usta. ⁴² Helmo Juda gigo mataw marorta kabemmo in Yesus anan helmo haqiyta. Teq in Farisi ginan rabad in ulalabmo Yesus anan helmo a hi bilaq yaqay. Luweq Farisi gimuzid in Juda gigo bit humab wolaytab mataw nenaq lotu a ta hi em daqay haqad. ⁴³ Na ezaqgo mataw na in gigo walmataw gigo hib gabin dimunta waqnan ginad bilaqad teq in God ago hib gabin dimunta waqnan giqtil a hi eraqyaq.

Yesus ago gamuk helta naqmo teq on mataw gilum kendaqta

⁴⁴ Ari Yesus lileyim bilam, On mataw ya inan helmo haqayta na in ya imomo inan helmo a hi haqayta ham. Na in mat ya iqeman bolta na anan helmo haqaymo ham. ⁴⁵ Ad on mataw ya ibiyayta na in mat ya iqeman bolta na ahol waqaymo ham.

⁴⁶ Ya og ka ago saw anuwan ham. On mataw ya inan helmo haqayta na romriqab a ta hi os daqay haqad ya bolta ham.

⁴⁷ Ari on mataw yaqgo gamuk hurit teq in a hi muzinayta na yaqmo diq in gigo daq na a hi ulum kemdaiq ham. Ya og kab on mataw giyon hazizir emeq gigo daq ulum kemnan a hi bol ham.

Ya on mataw gilumsiheq ta giwaqeq ban dimuntab giqemid osnan haqad ya bolta ham. ⁴⁸ Ari on mataw gileh yagad yaqgo nan a hi huritsa nagah araq teq in giyon hazizir emdaqta nawa usaq ham. Na yaqgo gamuk ya bilayta naqmo ham. Yaqgo gamuk naqmo in kam abebtanta nab on mataw na gigo daq tuqulum kemdaqta ham. ⁴⁹ Na ezaqgo ya inadibmo gamuk na a hi bilayta ham. Gimam Iyah ya iqeman bolta naqmo in gamuk awaz meqinta na yag ham. Yagad ya ezaq haqad gamuk bilaqdaiqta na inmo iqishunan ya nazaqmo bilayta ham. ⁵⁰ Ad ya inad emaiq, God ago gamuk awaz meqinta na in mataw giqemid kayeqmo kuluwa-kuluwmo tuqos daqay haqaq ham. Nazaq iyan gamuk nawa ya bilaqaiqta na ya imammo ibilanta nazaqmo diq ya ne gibelenaiq ham.

Yesus in disaipel gihuloseq Amam ago hib ta lehdaqta na ago in gibilan

13

Yesus in ago disaipel gisen suhol

¹ Ari Pasova ago kam ayahta na bolim sinsin diq tiqiysa Yesus anad tiqam, Ya og ka huloseq imam ago hib lehdaiqta na akaman sinsin tiqiyaq ham. Yesus in ago on mataw og kabta na ginan anad bilaqsa osta. Osad in ginan anad bilaqsa osim le in gimen ahol nog tuhulos.

² Ari imisor Yesus ago disaipel nenaq didaq neqad tuqosiy. Ossa Satan tekomo anad meqinta Judas ugan in Yesus waqeq bab gibenab emgo anad tiqemyaq. Mat na in Saimon uliq Kariyot-ibta atatin. ³ Samo Yesus anad emyaq. Ya imam zaway bunmo ya ibenab tiqam haqyaq. Haqad in God ago hib osim bolim ta God ago hib in muleqim ta lehaqta na in tuhuritmo. ⁴ Huritim in didaq neqim hulosad in eraqim turad ago aholsihen sisqaqta hasim emad teq in giholbay araq waqim ahulib tuhuram. ⁵ Hureqim in yiwi waqim deg araqab wazbalan woqan in deg na waqim disaipel gisen tisuholyaq. In araq asen yuwub suholeq teq in giholbay ahulib hureqan usta na amalib asen tubayyaq.

⁶ In nazaq emim emim a lehim le Saimon Pita ago hib tubol. Bolan Pita tubulon, Iyahta ham ni ya isen tisuholnan e? ham. ⁷ Haqan Yesus bilam, Muran daq kawa ya emaiqta ka ago ni ninad a hi em hasaq ham. Abeb teq ni ninad tiqem hasdaq ham. ⁸ Haqan Pita bulon, Ni ya isen a hikidik suholidaq ham. Haiq digmo ham. Haqanmo Yesus bilam, Ya nisen a hi suholid ni yaqgo disaipel a hi iydaq ham. ⁹ Haqan Saimon Pita bilam, Iyahta

ham, nazaq na ni ya isen amomo hi suhol ham. Ni ya isen suholad ya iben teq ifaqin inaqmo ni suhol ton ham. ¹⁰ Haqan Yesus bilam, Mat tuhuzta na asen suholeqmo in ahol bunmo anumlan haiqmo tiqiydaq ham. In ahol bunmo a ta hi suholidaq ham. Ari ne bunmo gihol anumlan haiqta ham. Teq ne gilikmanib mat amulikmoqmo ahol anumlan inaqta osaq ham. ¹¹ Na ezaqgo mat nog Yesus waqeq bab gibenab emdaqta na ago in tuhurit. Nazaq iyan in bilam, Ne gilikmanib mat amulikmoqmo ahol anumlan inaqta osaq ham.

¹² Ari Yesus in gisen tisuholim in ago aholsihen ta emim teq in le abanab a ta os. Osad in disaipel gibilan, Ya ne gigo hib daq tiqemta ka ago ne ginad tiqem hasiy? ham. ¹³ Ne ya inan giger Tisa teq Iyahta haqad biyayta ham. Na ne dimunmo bilaqayta ham. Ya mat nazaqtaqmo ham. ¹⁴ Ya ne gigo Iyahta teq ya ne gigo Tisa-mo ham. Teq ya ne gisen tisuhol ham. Nazaq iyan ne nazaqmo an asen tisuhol daqaymo ham. ¹⁵ Ya daq na tigiqishun ham. Giqishunna ne ya isen muzeq ya ne gimen daq emta nazaq ne tiqem daqaymo ham. ¹⁶ Ya helmo gibelenaiq ham. Kabibiy mat in ago ayahta a hi itiyondaq ham. Ad mat nantut waqim a lehaqta na in nan na anamren a hi uriyamdaqmo ham. ¹⁷ Ne daq ka ago ginad em hasay? ham. Ne ginad em hasad daq kawa ya emta kazagmo ne emsa teq God ne ginan anad tidimniydaq ham.

¹⁸ Ya mataw iholyon gilumim giwayta na gigo tuhurit kemta ham. Teq gamuk kawa ya gibelenaiqta ka ya ne bunmo ginan a hi bilaqaiq ham. Haiq ham. Ne gilikmanib mat araq yaqgo a haiqta osaq ham. Mat na teq God ago marib gamuk araq usaqta na twul net bugdaq ham. Gamuk na bilam, Mat ya inaq garab didaq newta na in asenab tiqibay has haqad in bilam ham. *Buk Song 41.9*

¹⁹ Teq daq na a hi gwahtiqsamo ya kawa ne tigibelenaiq ham. Abeb daq na gwahtiqsamo ahi waqad ya inan bilaq daqay, Helmo gamuk God ago marib usaqta na in yaqmo inan bilamta haq daqay haqad muran ya ne ginadib tiqemaiq ham. ²⁰ Ya helmo gibelenaiq ham. Mat araq in yaqgo kabibiy mat ya eman in ago hib bolta na ahol waq hasad wazinaqta na in yaqgo kabibiy mat na amomo a hi wazinaq ham. In ya iwaziqmawazinaqmo ham. Teq in ya imomo a hi iwazinaq ham. In mat ya iqeman bolta na inaqmo tuwazinaqmo ham.

Judas teq Yesus waqeq bab gibenab emdaq
(Matyu 26.20-25; Mak 14.17-21; Luk 22.21-23)

²¹ Yesus nazaq bilaqim teq in ahol afaqan iyad anad timeqniyyaq. Anad meqniysa in bilam, Ya helmo gibilenaiq ham. Ne gilik-manib mat araq teq ya iwaqe qbab gibenab iqemdaq ham. ²² Haqanmo disaipel an anobun ahol tuwaq yangay, Yesus nog diq anan bilamta haqad. ²³ Sa Yesus ago disaipel araq in anan anad diq bilaqaqta na in

banab ahol wol emim Yesus anognib us.

²⁴ Ussa Saimon Pita afaqin ugad kabiya-kibmo bulon, Ni susumun ug ham. In nog diq anan bilaqaq? ham. ²⁵ An disaipel na Yesus anogib usadmo in afaqin Yesus abanibmo emim tisusumun ug, Iyahta ham ni nog diq anan bilaqaq? ham. ²⁶ Haqan Yesus bilam, Ya bret anabun asor waqe q degib taqor ulum tureq mat doqag ya ug-daiqta na nawaqmo ham. Haqadmo in bret waqim taqor ulum turim Saimon uliq Kariyot-ibta atatin Judas-mo tuqug. ²⁷ Ugan Judas waqsamo Satan aholib tubol. Anno Yesus in Judas bulon, Ni daq emnan ninad emaqta na hidmo le em ham. ²⁸ Haqsa disaipel bunmo gamuk na huritim in ginad a hi em hasiy. ²⁹ Asor ginad emiy, Judas mani wamuzaqta iyan Yesus Pasova ahumbabun emgo anaghan zaygo bulonaq haqiy. Haqsa ta asor ginad emiy, Yesus in mataw gina haiqta nagah neggo Judas bulonaq haqiy. ³⁰ Anno Judas bret na tuwaqim hidmo in eraqim bit na hulosad asanib gwahtiqim tilah. Sa tarom tiqiy.

Yesus gunun araq muturta disaipel giqisihun

³¹ Judas tilehsa teq Yesus bilam, Muran Mat Atatin abin ayah tiqiy ham. Ayah iysa in God abin eman ayah tiqiyimo ham. ³² Ari Mat Atatin God abin emid ayah iysa God inmo ahol abin Mat Atatin ugid in abin ayah tiqiydaqmo ham. Teq in muran diqmo Mat Atatin abin emid ayah iydaq ham. ³³ Onmin ham ya nenaq asitmo a ta oseq teq ya tilehdaiq ham. Lehid teq ne ya tiqinagun daqay ham. Ya Juda mataw gibilenta nazaqmo ya ne tigibilenaiq ham. Ya uliq lehdaiqta nab ne a hi leh daqay haqaiq ham. ³⁴ Ya gunun araq muturta tinegaiq ham. Ne an anan ginad diq bilaqsa osiy ham. Ya ne ginan inad bilaqaqta nazaqmo ne an anan ginad bilaqsa osiy ham. ³⁵ Ne an anan ginad bilaqsa ossa teq on mataw bunmo ne gibiyad ginad tiqem daqay, Yesus ago disaipel kowaqmo haq daqay ham.

Yesus bilam, Pita teq gileh yagdaq ham (Matyu 26.31-35; Mak 14.27-31; Luk 22.31-34)

³⁶ Haqan Saimon Pita in Yesus bulon, Iyahta ham ni edob lehnar? ham. Haqan Yesus bilam, Muran ya uliq lehdaiqta nab

ni ya imuzeq a hi lehdaiq ham. Abeb teq ni ya imuzeq boldaq ham. ³⁷ Haqan Pita bulon, Iyahta ham ezaggo ya muran ni nimuzeq ninaq a hi lehdaiq? ham. Ya nilumsihad ihol nog huloseq ninmen tumoqdaiqta ham. ³⁸ Haqan Yesus gamuk na amenin emim bilam, Ni ya ilumsiheq moqgo bilaqaq e? ham. Ya helmo nibile-naiq ham. Kurek a hi gayonsamo ni nime ezeqmanmo gileh tiyagdaq ham.

14

Yesus bilam, On mataw God ago hib leh daqayta na adanteqin yaqmo ham

¹ Ari Yesus in ago disaipel bunmo gibilenim bilam, Ne gihol afaqan iysa ginadnad hi emiy ham. Ne God anan helmo haqad ne ya inan helmo haqiyimo ham.

² Ya imam ago bit adugan kabemmo usaqta ham. Nazaq iyan ya leheq ne gimen ban wastitaynan ham. Ya nazaq emnan inad a hi usta iyid ya ne gimen ban wastitaynan haqad nazaq a hi gibilen nagta ham. ³ Ya leheq ne gimen ban wastitayeq teq ya muleqe qta boldaiq ham. Boleq ya ne giwaqe qiqad yaqgo sawab tilehdaiq ham. Giqad lehid uliq ya osdaiqta nab ne tuqos daqaymo ham. ⁴ Teq ya uliq lehdaiqta na ago dante ne tuhuritiy ham.

⁵ Haqan Tomas bilam, Iyahta ham ni edob lehdaiqta na i a hi hurit ham. I ezaq toneq teq dante na ago hurit kemam? ham.

⁶ Haqan Yesus bulon, Dante ya imamgo hib lahta na yaqmo ham. Ya gamuk helta alulinmo diq ham. Teq yaqmo on mataw giqeman kayeqmo kuluwa-kuluwmo osayta ham. On mataw dante amulikmo ya gimen emdaiqta naqmo muzineq teq in le ya imam ago hib tugwahtiq daqay ham. Dante amo amo haiqgam ham. ⁷ Ne yaqgo huriteq teq ne ya imam ago tuhurit daqaymo ham. Ari muran ne in ago tuhuritat teq ne in ahol tuwaqaymo ham.

⁸ Haqan Filip bulon, Iyahta ham ni nimam i giqisihun ham. Gigisihunid i ahol waqad teq i ginadnad a ta hi emad i nagah araq ago a hi susumunam ham. ⁹ Haqan Yesus bulon, Filip ham ya nenaq kam sisagmo tuqos ham. Ta teq ni yaqgo a hi huritaq e? ham. Mat ya ibiyaqta na in ya imam ahol waqaqmo ham. Ezaq haqad ni bilaqaq, "Ni nimam i giqisihun" haqiq? ham. ¹⁰ Ya imam ago hib ossa in yaqgo hib osaqmo ham. Na ne anan helmo a hi haqay e? ham. Ya gamuk gibilenaiqta ka ya inadibmo a hi bilaqaiq ham. Ya imam ya iholib osad ago kabiyl emaqta ham. ¹¹ Ya bilay, Ya imam ago hib ossa in yaqgo hib osaq hayta na ne anan helmo haqiy ham. Ari ne yaqgo gamuk na anan helmo a hi

haqeq teq ne yaqgo kabi y naqmo anadin emad ya inan helmo haqiy ham.

¹² Ya helmo gibilenaiq ham. Mat ya inan helmo haqaqta na in ya kabi y emaiqta nazaqmo in kabi y tiqemdaqmo ham. Teq in kabi y ayahmo diq emad in ya kabi y emta na tuquriyamdaq ham. Na ezaqgo ya imam ago hib lehdaiqta na ago ham. ¹³ Lehid teq ne ya ibinib nagah anan susumunsa ya tiqem negdaiq ham. Nazaq iyid teq Gimam Iyah in Atatin ago hib abin ayahta tuwaqdaq ham. ¹⁴ Ne ya ibinib nagah araq ago susumun yagsa ne ginad usaqta nazaq ya tiqem negdaiq ham.

Yesus God ago Bugaw Dimunta emid bolgo bilam

¹⁵ Ari Yesus bilam, Ne ya inan ginad bilaqsa teq ne yaqgo gunun ya giqisihunta na bunmo ananon diqmo tumuzin daqay ham. ¹⁶ Teq ya imam susumun ugid in ne giteqsor araq awaz meqinta tinegdaq ham. Negid in ne nenaq tuteqmo tuqosdaq ham. ¹⁷ Mat ne gilumsihdaqta na in God ago Bugaw gamuk helmo bilaqqaqta naqmo ham. Og kab on mataw God gileh ugrayta na in God ago Bugaw ahol a hi waqad teq in ago a hi hurititya ham. Nazaq iyan in Bugaw na a hi waq daqay ham. Ari negmo teq Bugaw na ne gilikmanib osaqta ham. Osad in teq ne giduganib tuqosdaqmo ham. Nazaq iyan ne in ago tuhuritayta ham.

¹⁸ Ya ne gihulosid ne onmin gininemaman haiqta nog a hi os daqay ham. Haiq ham. Ya teq ne gigo hib ta boldaiq ham. ¹⁹ Sisaq haiq og kab on mataw God gileh ugrayta na a ta hi ibiy daqay ham. Ari negmo teq ya tiqbiby daqay ham. Ya kayeqmo osaqta ham. Nazaq iyan ne kayeqmo tuqos daqaymo ham. ²⁰ Kam nab teq ya imam ago hib osaqta na ago ne tuhurit daqay ham. Teq ne yaqgo hib ossa ya ne gigo hib osaqta na ago ne tuhurit daqaymo ham. ²¹ On mataw yaqgo gunun giqaqim muzinayta na in ya inan ginad bilaqayta ham. Teq in ya inan ginad bilaqsa ya imam in ginan anad bilaqdaqmo ham. Sa ya nazaqmo mataw na ginan inad bilaqsa ihol tigiqishi-hundaiq ham. ²² Yesus nazaq haqsimo Judas ta araq, in mat uliq Kariyot-ibta na a haiqta, in Yesus kazaq bulon, Iyahita ham ezaqta ago ni nihol i gimo giqisihundaq? ham. Ad ni og kab on mataw ta asor na bunmo nihol a hi giqisihundaq? ham.

²³ Haqan Yesus bilam, Mat ya inan anad ayahmo bilaqqaqta na in yaqgo gamuk tu-muzdaq ham. Sa ya imam in mat na anan anad ayahmo tibilaqdaq ham. Ad ya imam inaq boleq i mat na inaq kuluwa-kuluwmo tuqosam ham. ²⁴ Ari mat ya inan anad a hi bilaqqaqta na in yaqgo gamuk a hi muzinaqta ham. Teq ya gamuk negaiqta

ka in yaqgota a haiq ham. Gamuk na in ya imam iqeman bolta naqmo ago gamukta ham.

²⁵ Ya nenaq osad gamuk nawa na bunmo tigibilenta ham. ²⁶ Ari ya imam teq ya ibinib inmo ago Bugaw Dimunta na emid tuboldaq ham. Ne giteqsor na boleq teq in ne gilumsihad nagah bunmo ago asuleqin tinegdaq ham. Ad in ne ginad enqenunid eraqsa ne yaqgo gamuk bunmo ya negta na anadin a ta em daqay ham. ²⁷ Ya ne giqemid ne gigem kute nemsa os daqay ham. Yaqmo igem kute nemim usaqta nazaq nogmo ya negid ne gigem kute tinemdaqmo ham. Teq on mataw og kabta gigem kute nemsa osayta nazaq nog ya a hi negdaiq ham. Ne gihol afagan iysa ginadnad hi emiy ham. Ad ne hi rabiy ham.

²⁸ Ari ya gibilenim bilay, Ya ne gihuloseq leheq teq ya ne gigo hib a ta boldaiq haqsa ne tuhuritity ham. Ne ya inan ginad bilaqid teq ya bilay, Ya imam ago hib lehaiq haqsa ne huritad ginad tidimniy nagiy ham. Na ezaqgo ya imam ago zaway in yaqgo zawayta uriyamim usaqta ham. ²⁹ Daq nawa ya teko anan bilayta na a hi gwahtiqa ya anan kawa ne tigibilenta ham. Abeb daq na gwahtiqa ne ahol waqad teq ne ya inan helmo haq daqay haqad ya muran kawa ne tigibilenaq ham. ³⁰ Ya nenaq nan sisaqmo bilaqad osgo akamun haiq tiqiyaq ham. Na ezaqgo mat meqinta og ka wamuzim osaqta na tubolaq ham. Teq in anadibmo ya imeqin tongo in ago zaway haiqta ham. ³¹ Ya imam ibilanta nazaqmo ya emaiqta ham. Ya nazaq emad teq ya imam anan inad bilaqqaqta na ulal iysa on mataw og kabta bunmo tuhurit daqay ham. Ari ne eraqiysa i lehuq ham.

15

Yesus bilam, Ya am wain-mo diq ham

¹ Yaqmo am wain-mo diq ham. Sa ya imam in am wain na anamren ham. ² Teq ya imam in ya iben anon a hi emayta na bunmo giqurotim hunegaqta ham. Ad in ya iben anon emayta na bunmo gisawan emad in ya iben samanta dimunta giqisih ugim usayta na giqurotim hunegsa iben dimunta na anon kabemmo emayta ham.

³ Ari ya gamuk tigibilenta naqmo in ne gisuholan ne giholib ginumlan haiq tiqiyita ham. ⁴ Ne ya iholib soqoteq inaq ossa teq ya ne gigo hib tuqosdaqmo ham. Am wain aben ahlilib a hi soqoteq anon a hi emdaqta ham. Ad nazaqmo ne yaqgo hib a hi soqoteq ne ginon a hi em daqaymo ham. ⁵ Am wain na yaqmo ham. Sa ne ya iben ham. On mataw yaqgo hib ossa ta ya in gigo hib osaqta na in ginon kabemmo emayta ham. Na ezaqgo ne ya ihulos yageq

ne ginon araq a hikidikmo em daqay ham. ⁶ Ya imam in on mataw yaqgo hib soqotim a hi osayta na giqurot tayan in miliyawim may bugayta ham. Bilaqne mataw ay aben samanta urot tayim hunegan lehim mayaqta nazaq ham. Mataw am aben naqanta ginuwim faqab eman oyaqta ham. ⁷ Nazaq iyan ya ne gigo hib ossa yaqgo gamuk ne gigemab ussa ne nagah ginad usaqta na ago susumun yagsa ya ne gimen tiqem negdaiq ham. ⁸ Ya ne gibilenaiq ham. Ne yaqgo disaipel iyeq ginon kabemmo emiy haqiqi ham. Na ezaqgo ya imam daq naqmo ago hib abin ayahta waqaqta ham.

⁹ Ya imam ya inan anad bilaqaqta nazamko ya ne ginan inad bilaqaqmo ham. Nazaq iyan ya ne ginan inad bilaqsa ne hi ihulosiy ham. ¹⁰ Ne yaqgo gunun ya tinegta na muz bugsa teq ya ne ginan inad bilaqsa ne a hi ihulos daqay ham. Ya imam ago gunun muz bugsa in ya inan anad bilaqsa ya in a hi hulosaiqta nazaqmo ham.

¹¹ Yaqgo inad dimniy in ne gigemab ayahmo usdaq haqad ya gamuk ka gibilenaiq ham. ¹² Teq yaqgo gunun na in kazaq ham. Ya ne ginan inad bilaqaqta nazamko ne an anan ginad bilaqanmo ham. ¹³ Mat araq ayogniz ginadin emad gilumsihad gimen ahol nog hulosdaqta na, daq na in an anan ginad bilaqgo adan bunmo giquriyamim in ameb diqta ham. ¹⁴ Ne yaqgo gunun ya nawa tigibilenta na muz bugad teq ne ya iyognizmo diq tiqiy daqay ham.

¹⁵ Kabibiy mat ago ayahta daq emsa in daq na alulin a hi hurit kemaqta ham. Teq ne nazaq a hait ham. Ya imam ago hib gamuk bunmo huritta na ya ne tigibilem bug ham. Nazaq iyan ya ne ginan yaqgo kabibiy mataw nazaq a ta hi bilaqdaiq ham. Muran ya ne ginan ya iyognizmo diq tibilaqaiq ham. ¹⁶ Ne ya inan ni i gigo haqan ya a hi osaiqta ham. Hail ham. Yaqmo ne ginan yaqgo haqan ne osayta ham. Ne yaqgo kabiy emgo haqad ya ne gitowun tiqem ham. Emad ya bilay, Ne leheq yaqgo kabiy emsa ne gigo kabiy na anon eman hay ham. Anon emid teq anon na tuqus tutdaq haqad ya bilay ham. Nazaq iyan ne ya ibinib nagah araq anan Gimam Iyah bulonid in tinegdaq ham. ¹⁷ Ya gunun kazaqmo ne negaiq ham. Ne an anan ginad bilaqsa osiy ham.

Jesus bilam, On mataw og kabta teq gigem meqinta yaqgo disaipel neg daqay ham

¹⁸ Og kab on mataw God gileh ugayta na gigem meqinta negsa teq ne ginad emiy ham. Mebmbemmo in gigem meqinta ya yagymo haqiqi ham. ¹⁹ Helmo ne og kabta iyid teq on mataw og kabta ne ginad ginad

bilaq nagiy ham, in gimo an anan ginad bilaqsa osayta nazaqmo ham. Teq hait ham. Ya on mataw og kabta bunmo gilikmanib ne giluwiyim giwaqan ne og kabta a ta hi iyay ham. Nazaq iyan on mataw og kabta gigem meqinta ne negayta ham. ²⁰ Teq on mataw God gileh ugayta na in ya ibaymuzad imeqin toneq in ne gibaymuzad gimeqin ton daqaymo ham. Ari on mataw yaqgo gamuk huriteq in ne gigo gamuk tuhurit daqaymo ham. Nazaq iyan ya mebmbemmo ne gibilenim bilay, Kabibiy mat in ago ayahta a hi itiyondaq hayta na ne anadin emiy ham.

²¹ Mataw og kabta na in mat ya iqeman bolta na ago a hi huritayta ham. Nazaq iyan ya ibin ne gigo hib ussa in ne gibaymuzad gimeqin ton daqay ham. ²² Helmo ya mataw na gigo hib boleq a hi gibilenita iyid in daq meqinta emayta na ananin a hi waq nagiy ham. Teq ya bolim tigibilem ham. Nazaq iyan in daq meqinta emayta na ananin tuwaq daqay ham. Ananin waqad in gamuk araq bilaq daqayta hait tiqiy daqay ham. ²³ Mat agem meqinta ya yagad in agem meqinta God ugaqtamo ham. ²⁴ Mat araq boleq ya kabiy emta nazaq in a hi em nag ham. Nazaq iyan ya og kab boleq kabiy a hi emta iyid mataw og kabta in daq meqinta emayta na ananin a hi waq nagiy ham. Teq hait ham. Ya og kab bolim kabiy emsa in ahol tuwaq kemiham. Ahol waqad in gigem meqinta ya yagad in ya imam tuqugaymo ham. ²⁵ In gigo daq nawa na in gamuk araq in gigo marorib mar tonan usaqta na tuwol net bug ham. Gamuk na bilam,

Mataw na gigem meqinta samanta yagiy haqad in bilam ham. *Buk Song 35.19; 69.4*

²⁶ Ari ya imam ago hib leheq teq ya ne giteqsoz na emid ne gigo hib tuboldaq ham. Na in God ago Bugaw Dimunta gamuk helta bilaqaqta ham. In Gimam Iyah inaq osaqta ham. In boleq ya mat ezaq diqta na ago ne tigibilendaq ham. ²⁷ Teq kwaziqmo ya og kab kabiy alulin emsa ne ya ibiyad osim bo muran kawa tiqiy ham. Nazaq iyan ne nagah gimeb ahol waqiyta na ago ne on mataw gibilenymo ham.

16

¹ Ne ginad ya inan helmo haqayta na hi ihulosiy haqad ya gamuk ka gibilenaiq ham.

² Abeb mataw ne gibaymuzsa ne in ginaq bit humab wolaytab humab a ta hi wol daqay ham. Helmo kam nab

mataw na ginad em daqay, I Yesus ago mataw ka ginol emad i bilaqne God ayon tamaz em nog iyaq haq daqay ham.

³ Mataw na ya imam ago a hi huritayta ham. Ad in yaqgo a hi huritaymo ham.

Nazaq iyan in ne nazaq tigiton daqay ham.
⁴ Abeb mataw nazaq ne gimeqin tonsa ne yaqgo gamuk ka anadin a ta em daqay haqad ya muran kawa ne tigibilenaiq ham.

God ago Bugaw Dimunta boleq kabiy emdaqta na ago Yesus bilam

Kwaziqmo ya nenaq luw osad nagah kagan ago ya ne a hi gibilenta ham. Na ezaqgo ya nenaq osad iyan ham. ⁵ Ari muran ya muleqim ya imam iqeman bolta na ago hib ta lehaiq ham. Ta teq ne gigo araq diq ibileneq bilaqaq. Ni edob lehaq? nazaq in a hi susumun yagaq ham. ⁶ Ad muran ya gamuk ka gibilensa ne huritad ginad a hi em hasad ne gigem afaqan diq iyaq ham. ⁷ Ya helmo ne gibilenaiq ham. Ya ne gilumsihnan haqad ya gihulosim imam ago hib tilehaiq ham. Ya nab a hi lehid teq ne giteqsor na ne gigo hib a hi bolnag ham. Nazaq iyan yaqmo leheq teq mat na emid ne gigo hib tuboldaq ham. ⁸ In og kab boleq on mataw God gileh ugayta na bunmo giqisihunsa in daq meqinta emay na ago gihol tiloyin daqay ham. Ad in giqisihunsa in ezaq toneq God ameb titnonta iy daqayta na ago tuhurit daqay ham. Ad in giqisihunsa in teq hazizirib tursa God in gigo daq gilum kemdaqta na ago in ginad tiqem has daqay ham. ⁹ On mataw God gileh ugayta bunmo in ya inan helmo a hi haqayta ham. Nazaq iyan ne giteqsor na boleq in on mataw na giqisihunsa in daq meqinta emay na ago gihol tiloyin daqay ham. ¹⁰ Teq ya imam ago hib lehid ne a ta hi ibiy daqay ham. Nazaq iyan ne giteqsor na in on mataw og kabta na giqisihunsa in ezaq toneq God ameb titnonta iy daqayta na ago tuhurit daqay ham. ¹¹ Teq God in mat meqinta og ka wamuzim osaqa na hazizirib emim ayon tibilamta ham. Nazaq iyan ne giteqsor na in on mataw God gileh ugayta bunmo giqisihunsa in teq nazaqmo hazizirib tursa God in gigo daq gilum kemdaqta na ago in ginad tiqem has daqay ham.

¹² Yaqgo gamuk kabemmo ne gibilendaiqta usaq ham. Teq ne muran huriqo ginad siqim iyaq ham. ¹³ Ari abeb God ago Bugaw gamuk helta bilaqaqta na boleq in ne ginad wamuzsa ne gamuk helta bunmo alulin tuhurit daqay ham. Teq in anadibmo gamuk a hi gibilendaiqta ham. In yaqgo hib gamuk huriqta naqmo tigibilendaq ham. Ad in nagah abeb teq gwahtiqaqta na ago tigibilendaqmo ham. ¹⁴ God ago Bugaw na in ya ibin emid ayah iydaq ham. Na ezaqgo in yaqmo igo gamuk waqeeq ne gibilendaq ham. ¹⁵ Ya imam ago nagah bunmo in yaqgota ham. Nazaq iyan ya bilay, God ago Bugaw in yaqmo igo gamuk waqeeq gibilendaq hay ham.

Yesus bilam, Ne gigem afaqan iyaqta na hiqysa teq ne ginad tidimniydaq ham

¹⁶ Kam asitmo tihiqiyid teq ne a ta hi ibiy daqay ham. Ad kam asitmo loq nog iyeqmo ne a ta ibiy daqay ham. ¹⁷ Haqan in ago disaipel asor an bulonim bilaqaq, In bilaqaq, Kam asitmo tihiqiyid teq ne a ta hi ibiy daqay haqaq haqiy. Ad kam asitmo loq nog iyeqmo ne a ta ibiy daqay haqaq haqiy. Teq in bilaqaq, Na ezaqgo ya imam ago hib lehaiqta na ago haqad in bilaqaq haqiy. Gamuk ko alulin ezaq diqta in i gibilenaq? haqiy. ¹⁸ Haqadmo in bilaqaq, Kam asitmota nawa in anan bilamta na in naga diq anan bilaqaq? haqiy. Nan kowa in bilaqaqta ko alulin ago i ginad a hi em hasauq haqiy.

¹⁹ Haqsa Yesus anad tiqam, Yaqgo disaipel in nan na ago susumun yagnan ginad emay ham. Haqad in gibilan, Ya bilay, Kam asitmo tihiqiyid teq ne a ta hi ibiy daqay hay ham. Ad kam asitmo loq nog iyeqmo ne a ta ibiy daqay hay ham. Nan nawa ya bilayta na ago ne an bulonad osay ye? ham. ²⁰ Ya helmo ne gibilenaiq ham. Ne gaqad gaq ayahmo tuwaz daqay ham. Sa on mataw God gileh ugayta na in ginad diq tidimniydaq ham. Ne ginad ayahmo meqniydaq ham. Ta teq ne ginad meqniydaqta na hiqysa ne ginad tidimniydaq ham. ²¹ Aw amun baysa anad meqniyqaqta ham. Na ezaqgo in amun emdaqta akaman tugwahtim ham. Ari in amun tiqemimmo in santitiy na anadin a ta hi emaqa ham. Na ezaqgo in ago amun mutrura og kab tugwahtimta na ago in anad tidimniyq ham. ²² Ad nazaqmo muran ne ginad ayahmo meqniyq ham. Teq abeb ya bo ne ta gibiydaiqta nabmo ne ginad a ta dimniydaq ham. Ginad dimniysa mataw ne gigo ginad dimniy na walemgo biyab a hi iy daqay ham. ²³ Kam nab ne nagah araq ago a ta hi susumun yag daqay ham. Ya helmo gibilenaiq ham. Ne nagah araq ago ginad emad ya ibinib imam bulonsa in tinegdaq ham. ²⁴ Kwaziqmo ne nagah araq waqgo haqad ya ibinib a hi susumuniya ham. Ari muran ya ne gibilenaiq ham. Ne susumuneq teq ne tuwaq daqay haqaiq ham. Waqeeq ne ginad dimniy hassa osad ne nagah araq ago ginad a hi meqniydaq ham.

Yesus bilam, Ya og ka ago zaway tuquriyam bug ham

²⁵ Gamuk kawa ya bilaqaqta ka ya gamuk awowunmo bilaqaqta ham. Ari abeb teq ya gamuk awowun amalib a ta hi gibilendaiq ham. Kam na tugwahtiqnan tonaq ham. Gwahtiqid teq ya imam abin anononmo bilaq sireqe eqmo tigibilendaq ham. ²⁶ Kam nab ne ya ibinibmo Gimam

Iyah tisusumun ug daqay ham. Ya ne gimen Gimam Iyah susumun ugid in ne gilumsihdaq nazaq ya a hi bilaqdaiq ham. Na ezaqgo negmo teq Gimam Iyah tubulon daqay ham.

²⁷ Ne ya inan ginad bilaqsa osiyta ham. Ad ya imam ago hib osim bolta na ne anan helmo tihaqymo ham. Nazaq iyan Gimam Iyah ne ginan anad bilaqaqta ham. ²⁸ Kwaziqmo ya imam inaq osim teq ya hulosim og kab bolta ham. Ta muran ya og ka hulosad ya imam ago hib ta lehailq ham.

²⁹ Haqan in ago disaipel bilaqiy, Muran ni nan tibilaq sireeqaq haqiq. Bilaq siredaq ni gamuk awowun a ta hi bilaqaq haqiq. ³⁰ Muran i ginad tiqem hasauq haqiq. Ni nagah bunmo ago tuhurit kamta haqiq. Mataw gigo susumun ginadib ussa in a hi bilaqsamo ni amenin emaqta haqiq. Nazaq iyan i ginad emauq, Ni God-mo agerab osim bolta haqaq haqiq. ³¹ Haqan Yesus amenin emim bilam, Muran ne helmo tihaqay ye? ham. ³² Ne hurityi ham. Mataw ne gimusza ne hares iyad giqiliqab tukeq tileh daqay ham. Lehad ne ya ihulosid ya imomo tuqosdaiq ham. Kam na tugwah-tiqnan tonad teq in tugwahtimta nog tiqiq ham. Ta teq ya imomo diq a hi osdaiq ham. Na ezaqgo ya imam in ya inaq osaqta ham. ³³ Ne ya iholib soqoteq inaq osad ne gigem kute nemdaq haqad ya gamuk ka gibilenaiq ham. Ne og kab ossa afaqan teq ne gigo hib tugwahtiqaq ham. Teq ne giwaz meqniyyiy ham. Ya og ka ago zaway tuquriyam bugta ham.

17

Yesus in ago disaipel gimen God bulon

¹ Jesus gamuk nawa na tibilaqim teq in ame ulilib Heven-ib gwalsa bilam, Ya imam ham, ya ibin ayah iydaqta na akaman tugwahtim ham. Nazaq iyan ni nitatin abin emid ayah iyan ham. Ayah iyid teq in ni nibin emid ayah tiqiydagmo ham. ² Ni og kab on mataw bunmo giqeman in ni nitatin ahaqenib tiqiyiy ham. Ad ni nitatin zaway ayahmo tuqugumo ham. Zaway ugan in mataw ni ugtu na giqemid in tuteqmo kuluwa-kuluwmo tuqos daqay ham. ³ Teq os dimunta ahiciq haiqta na alulin in kazaq ham. On mataw God diqmo ago tuhurit daqay ham. Huritad in Yesus Krais mat ni eman bolta na ago tuhurit daqaymo ham. Mataw na i gigo nazaq diq huriteq teq in os dimunta kuluwa-kuluwmo osayta na tuwaq daqay ham. ⁴ Ni kabiy yagta na ya eman tihiqiy bug ham. Ya nazaq emim nibin eman og kab ayahmo diq tiqiy ham. ⁵ Kwaziqmo og ka a hi gwahtiqsamo ya ibin ayahta inaq ni nimeb osyaiqta ham. Ari muran ni ya ibin ayahta na a ta yagid

kwaziqmo ya nimeb osyaiqta nazaqmo ya ta osiq ham.

⁶ Ni on mataw og kabta asor giyagan ya in gigo hib ni nibin eman ulal tiqiy ham. Mataw na in ningota ham. Teq ni mataw na tigiyag ham. Yagan ya ningo gamuk gibilenan in tumuz bugay ham. ⁷ Muran in ginad emay, Ni nagah bunmo yagta na in ninmo ningo hib bolta haqay ham. ⁸ Na ezaqgo ya gamuk bunmo ni yagta na tigibilen bug ham. Teq ya ninaq osan ni ya iqeman bolta na ago in huritim anan helmo tihaqaymo ham.

⁹ Ni yaqgo on matawmo diq gilumsihdaq haqad ya kawa ni tinibilenaiq ham. Ya og kab on mataw gileh nigayta na gimen a hi nibilenaiq ham. Haiq ham. Ni on mataw giyaga naqmo ni gilumsihdaq haqad ya nibilenaiq ham. Na ezaqgo mataw naqmo in ningota ham. ¹⁰ Yaqgo on mataw in ningota ham. Ad ningon mataw in yaqgo ham. Nazaq iyan yaqgo on mataw na gigo hib ya ibin ayahta tuway ham. ¹¹ Muran ya og kab a ta hi osdaiq ham. Ta teq yaqgo on mataw ka og kab tuqos tut daqayta ham. Os tutsa ya gihuloseq ningo hib tihedaiq ham. Ya imam dimun diqta ham, ni nibin ayah diqta na tiyag ham. Nazaq iyan ni yaqgo mataw ya ibinib osayta ka giwamuz ham. Giwamuzsa in ginad gigem amulikmo iyeq osiy ham. Ya ninaq ginad gigem amulikmo iyim osauqta nazaq ham. ¹² Ni nibin ayahta na tiyag ham. Yagan ya mataw ya ibinib osayta ka giwamuzsa in dimunmo osayta ham. Ya in giwamuzsa in gigo araq diq nabag a hi iy ham. Ari mat amulikmo ni anan bilam, In teq meqniyyadaq hamta naqmo amomo in nabag iyta ham. Iyan daq na in ningo marib mat na ananin usaqta na tuwol net bug ham.

¹³ Muran ya ningo hib tihedaiq ham. Teq yaqgo inad dimniy in yaqgo on mataw gigemab ayahmo usdaq haqad ya og kab nenaq osad gamuk kagan bunmo tigibilen bug ham. ¹⁴ Ya og kabta a haiq ham. Ad nazaqmo ya ningo gamuk yaqgo on mataw tinegan in ya isen muzim in og kabta a haiqmo ham. Nazaq iyan on mataw og kabta in yaqgo on mataw gigem meqinta negayta ham. ¹⁵ Ni yaqgo on mataw giwaqid in og kab a ta hi os daqay haqad nazaq ya a hi nibilenaiq ham. Yaqgo on mataw og kab ossa ni giwamuzsa mat meqinta na hi gimeqin tonan haqad ya nibilenaiq ham. ¹⁶ Ya og kabta a haiq ham. Ad nazaqmo yaqgo on mataw in og kabta a haiqmo ham. ¹⁷ Ningo gamuk in helmo diq ham. Nazaq iyan ningo gamuk helta na in yaqgo on mataw gigemab kabiy emsa ni giqemid in ningo on matawmo diq iyiy ham. ¹⁸ Ni ya iqeman ya on mataw og

kabta gigo hib bolta nazaqmo ya igo on mataw ka gigeman in on mataw na gigo hib tilehaymo ham. ¹⁹ Yaqgo on mataw ka in ningi gamuk helta huriteq teq in gihol bunmo nigad in ningi kabiyl amomo emgo os daqay haqad ya nazaqmo ihol bunmo tinigim ya ningi kabiyl amomo emgo tuqosaiq ham.

²⁰ Ari ya mataw kawa nenaq osaqtal ka gimomo ginan a hi nibilenaiq ham. Haiq ham. Mataw ka leheq on mataw ta asor gibelenid helmo haq daqayta na inaqmo ya ginadin emad gamuk ka nibilenaiq ham. ²¹ Nibilenid ni yaqgo on mataw na bunmo giqemid in ginad gigem amulikmo iyeq os daqay haqad. Ya imam ham ni yaqgo hib ossa ya ningi hib osaqtal nazaqmo yaqgo on mataw in i gigo hib osiy haqad ya inad emaiq ham. Ossa on mataw ni gileh nigayta na in nazaq gibiyad in ya inan bilaq daqay, Helmo God in mat na eman bolta haq daqay ham. ²² Ni ya ibin eman ayahmo tiqiy ham. An yaqgo mataw ya ibinib gigem ginad amulikmo iyeq os daqay haqad ya ihol abin ayahta na in tineg ham. Negid ya ni ninaq gigem amulikmo iyim osaqtal nazaqmo in tuqos daqaymo haqad ham. ²³ Ya in gigo hib ossa ni yaqgo hib tuqosdaq ham. Nazaq iyid teq yaqgo on mataw ka gigem amulikmo tiqiy haseq os daqay ham. Ossa og kab on mataw ni gileh nigayta na in gibiyad ginad em daqay, Helmo haq daqay, God-mo Yesus eman bolta haq daqay ham. Haqad ni ya inan ninad bilaqaqtal nazaqmo ni yaqgo on mataw ginan ninad bilaqaqtal na ago in tuhurit daqaymo ham.

²⁴ Ya imam ham, uliq ya osdaiqta nab ya on mataw ni giyagta na nenaq osnan inad bilaqaqtal ham. Ya nenaq ossa in ya ibin ayahta teq ya ihol anuwan ni giyagta na ahol tuwaq daqay ham. Kwaziq diqmo og ka a hi gwahtiysamo ni ya inan ninad bilaqsa osta ham. Na ago ni nagah aseseqta na tiyag ham. ²⁵ Ya imam ham, ni daq titnontal emaqtal ham. Og kab on mataw gileh nigayta na in ningi a hi huritayta ham. Teq ya ningi tuhuritta ham. Sa ni ya iqeman bolta na ago yaqgo on mataw ka tuhuriyimo ham. ²⁶ Ya nibin eman yaqgo on mataw gigo hib ulal tiqiyta ham. Teq ya nibin emid in gigo hib ulal tiqiy hasdaq ham. Ulal iy hassa teq ni ya inan ninad bilaqaqtal na ago adan in gigo hib ussa ya in gigo hib tuqosdaiqmo ham.

Yesus santitiy sorim moqim teq ta eram

18

*Judas Yesus waqim bab gibenab am
(Matyu 26.47-56; Mak 14.43-50; Luk 22.47-53)*

¹ Yesus gamuk na bilaqim tihiqiyin in ago disaipel nenaq lehim yuw anan Kidron haqay na asarqan tuqurotiy. Yuw na aqurumun kozaq ban uzaq araq gel tonan usta. In yuw asarqan na urotim lehim in uzaq na agelin aduganib le tugwahtiwy. ² Teq Judas mat Yesus bab gibenab emdaqta na in saw na ago hurittamo. Na ezaqgo kam kabemmo Yesus ago disaipel nenaq uzaq nabmo leheq humab wol yaqayta na ago. ³ Nazaq iyan Judas in mataw tamaz emayta gigo aseseqta na giyogniz Farisi nenaq gigo hurmey asor teq Rom gigo bab mataw asor giwaqim in dan giqisihunim giqad saw nab tuboliy. Bolad mataw na em sebur giwaqim teq in lam sul mideran oysa in giwazim giqad boliy.

⁴ Bolan Yesus daq bunmo aholib gwahtiqaqtal na ago tuhurit in mataw biyahta na gigerab loqim tisusumun nag, Ne nog diq nagunay? ham. ⁵ Haqan mataw na bilaqiy, I Yesus uliq Nasaret-ibta nagunim bol haqiy. Haqan Yesus bilam, Na yaqmo kawa ham. Haqsa Judas mat Yesus bab gibenab emdaqta na in nab turmo. ⁶ Ari Yesus bilam, Na yaqmo kawa haqanmo mataw na hureq hasim ta lehim ogib woqim tuqusiy. ⁷ Sa Yesus a ta gibilan, Ne nog diq nagunay? ham. Haqan mataw na bilaqiy, Yesus Nasaret-ibta haqiy. ⁸ Haqan Yesus bilam, Ya ne tigibileta ham. Yaqmo kawa haqaiq ham. Ari ne yaqmo inagunsun teq ne yaqgo mataw ka gihulosid lehiy ham. ⁹ In nazaq bilaqadmo in tekoh God bulonim bilam, Ya mataw ni giyagta na giwamuzsa in gigo araq diq nabag a hi iy hamta na in tuwol net bug.

¹⁰ Yesus nazaq haqanmo Saimon Pita baqir araq asanib sihenim a bolta na tuhureq has. Hureq hasimmo in mat araq adeksan aqabun ger qwatayanmo ogib tuwom. Mat na anan Malkus haqayta. In tamaz mat danmepta ago kabibiy mat araq. ¹¹ Anmo Yesus in Pita bulon, Ni baqir asanib ta sihen ham. Ni ninad ezaq emaq? ham. Ya imam gog yagan ya ayuwun a hi uluw bugdaiq e? ham.

Mataw Yesus waqim Anaz ago hib a lehiy

¹² Ari bab mataw gigo amebta inaq teq Juda gigo hurmey na in Yesus wazim warigib am tuwaziy. ¹³ Am wazim danmeb in waqim ad Anaz ago hib lehiy. Anaz in mat anan Kayafas haqayta na alen. Teq ulig nab Kayafas in tamaz mat danmepta iyim osta. ¹⁴ Mat naqmo kwaziqmo Juda mataw gibelenim bilam, Mat amulikmo on mataw bunmo gimen moqdaqta na in dimunmo hamta amatin.

Pita Yesus gileh ug
(Matyu 26.69-70; Mak 14.66-68; Luk 22.55-57)

¹⁵ Sa Saimon Pita ayow disaipel araq inaq in Yesus muzim inaq tamaz mat danmehta na ago bitab tilehiy. Lehan mat ayahta na in disaipel araq na ago tuhuritta iyan disaipel naqmo Yesus muzim inaq bit na ago gel aduganib le tugwahtim. ¹⁶ Sa Pita dan ezab asanibmo titur. Tursa tamaz mat danmehta na in disaipel araq na ago huritta iyan disaipel na bolim aw dan ez wamuzim turaga na bulonad teq in Pita waqim inaq aduganib le ta gwahtim. ¹⁷ Gwahtiqa sa aw na Pita susumun ugim kazaq bulon, Luweq ni inaqmo mat ko ago disaipel iydaq ham. Haqan Pita bilam, Ya in ago disaipel a huiq ham. ¹⁸ Teq saw amuditqan iyim tim ginolsa kabibiy mataw asor humrey nenaq faq ulaman tuqoyta azamorin kiskismo oysa in iterad nab turiy. Tursa Pita le mataw na nenaq faq iterad nab turmo.

Tamaz mat danmehta na Yesus ayon hazizir am

(Matyu 26.59-66; Mak 14.55-64; Luk 22.66-71)

¹⁹ Ari Yesus tamaz mat danmehta na ameb tursa mat na in Yesus ago disaipel ginan susumun ugim teq in Yesus ago suleq in bilaqyata na anan tisusumun ugmo. ²⁰ Susumun ugan Yesus amenin emim bilam, Ya on mataw bunmo ulalabmo gibilenyaiq ham. Sirisirimo Juda on mataw bo bit humab wolaytab teq Tempel ago gel aduganib humab woleq ossa ya suleq negyaiq ham. Ya gamuk araq ulilemimmu a hi bilaqyaiq ham. ²¹ Nagaqgo ni susumun yagaq? ham. Ya mataw suleq negta naqmo ni susumun neg ham. In yaqgo gamuk hurit kemiya ham. ²² In gamuk nazaq bilaqanmo humrey araq nab turta na era Yesus amanmanan wolimmo bulon, Nagaqgo ni nazaq gamuk atoranmo bilaqad ni tamaz mat danmehta ka ago gamuk amenin emaq? ham. ²³ Haqan Yesus bilam, Edowa ya nan meqinta bilay? ham. Ni muran kawa mataw ka gimeb bilaqsa ya huritiq ham. Huiq iyid ta nagaqgo ya gamuk helta bilaqsa ni ya inolaq? ham. ²⁴ Anmo Anaz in Yesus aben aqamun inaqmo eman tamaz mat danmehta Kayafas ago hib tilah.

Pita a ta bilam, Ya Yesus ago a hi hurit ham

(Matyu 26.71-75; Mak 14.69-72; Luk 22.58-62)

²⁵ Sa Saimon Pita mataw na nenaq faq iterad tursa in susumun ugim buloni, Luweq ni mat na ago disaipel araq iydaqmo haqiy. Haqan in bilam, Ya in ago

disaipel a huiq ham. ²⁶ An tamaz mat danmehta ago kabibiy mat araq in uzaq nab Pita in ago asenlul araq adeksan urotan in ahol wamta iyan in bilam, Ninmo daqag uzaq aduganib in inaq ossa ya nibiy ham. ²⁷ Haqan Pita a ta bilam, Na ya a huiq ham. Haqanmo kurek tigayon.

Mataw Yesus wazim ad Pailat ago hib lehiy

(Matyu 27.1-2, 11-14; Mak 15.1-5; Luk 23.1-5)

²⁸ Ari tarommo diq Juda mataw aseseqta na in Yesus wazim Kayafas ago bit hulosim in waqim ad Pailat ago hib tilehiy. Lehim in gavman amepta na ago bit aduganib le a hi gwahtiqiy. In ginad emiy, Luweq i God ameb gihol anumlan inaq iyid i Pasova akaruwun a hi neqam haqiy. ²⁹ Haqad in asanib Pailat amen emim tursa Pailat gigerab bolim tisusumun nag, Mat na ezaq tonan ne amalib nan emnan a boliy? ham. ³⁰ Haqan mataw na amenin emim bilaqiy, Mat ka daq meqinta a hi emid i ningohib ad a hi bol nag haqiy. ³¹ Haqan Pailat gibilan, Ne mat na waqeq a leheq negmo gigo maror amalib ago daq ulum kemeq wastitayiham. Haqan Juda mataw na bilaqiy, Ne Rom gunun ayahta eman igmo ginadib mat araq wol emid moqgo aza-wayin haiqgam haqiy. ³² In nazaq bilaqad kwaziqmo Yesus in naga daqin amalib moqdaga anan bilamta na in tuwl net bugiy.

³³ Ari mataw na nazaq bilaqan Pailat ahol buliyim le ago bit ayahta na aduganib ta gwahtim. Gwahtiqim in Yesus lilewunan bolan tisusumun ug, Ni Juda on mataw gigo king e? ham. ³⁴ Haqan Yesus bilam, Ninmo ninad emad gamuk na bilaqaq o huiq mat araq nibilenan ni nazaq ya inan bilaqaq? ham. ³⁵ Haqan Pailat amenin emim bilam, Ya Juda mat a huiq ham. Ninmo ningohwalmataw teq ninmo ningoh mataw tamaz emayta gigo aseseqta naqmo in ni niwazim yaqgo hib a boliy ham. Ni daq ezaq diqta am? ham.

³⁶ Haqan Yesus bilam, Yaqgo maror in og kabta a huiq ham. Ari yaqgo maror og kabta iyid teq yaqgo kabibiy mataw eraqeby ya ibabun nenaq an wolsa mat araq ya iwaqeby bab gibenab a hi iqem nag ham. Ta teq yaqgo maror in og kabta a huiq iyan yaqgo mataw nazaq a hi emay ham.

³⁷ Haqan Pailat bulon, Ni bilaqaq, Yaqgo maror in og kabta a huiq haqsa ya inad emaiq, Ni king araqagyha haqaiq ham. Haqan Yesus bilam, Ni ya inan bilaqaq, Ni king araq haqaiq ham. Teq ya kawa ni timibilem kemaq ham. Ya gamuk helta bilaqaiqta naqmo in yaqgo kabiy ham. Ya inen iqeman ya kabiy naqmo emgo og kab gwahtiyta ham. Gwahtiqim ya gamuk helta

bilaqsa mataw gamuk helta muzinayta na bunmo in ya iqez huriitya ham.³⁸ An Pailat susumun ugim bilam, Naga gamukin in gamuk helta? ham.

Pailat Yesus hulosid lehgo bilaqan Juda mataw hulosiy

(*Matyu 27.15-31; Mak 15.6-20; Luk 23.13-25*)

Pailat nazaq bilaqim teq in asanib Juda gigerab le a ta gwahtim. Gwahtiqim in kazaq gibilan, Ya mat ko ago afaqan araq nagunim ahol a hi way ham.³⁹ Teq ne gigo daq ne ulig bunmo Pasova akannib mat araq irquran osaqa atowun emim ibilenan ya hasan gwahtiqaqta ham. Nazaq iyan ne ginad ya Juda gigo king ko aqamun hasid ne gigo hib lehdaq e? ham.⁴⁰ Haqan mataw na dedibmo bilaqiy, Nawa na hajiq haqiy. Ni Barabas-mo hulosid bol igan haqiy. Mat anan Barabas haqayta na in gunun othasad mataw haresmo ginol titayad gigo es nagah giwaqyaqta amatin.

19

Pailat bilam, Yesus ayib dom woliy ham

¹ Ari teq Pailat in Yesus waqim ago bab mataw gibenab eman in tuwolitayiy.² Woltitayim teq in am asasuqin inaqta waqim tal tonim king ago balaw nogta afaqinib tiqemiy. Emimi teq in tubusan araq kakaqta waqim aholib emiy.³ Emim in agerab loqeql bulon yaqay, Ni Juda gigo king-mo diqta haq yaqay. I nibin wazan ulilibmo gwalehaq haq yaqay. Haqadmo in amanmanib tuwol yaqay.

⁴ Sa teq Pailat bit asanib gwahtiqim Juda mataw na a ta gibilan, Ne huriity ham. Ya mat na ago daq meqinta araq ahol a hi way ham. Nazaq iyan ya waqeet ad asanib tubolnan ham.⁵ Haqanno Yesus afaqinib am asasuqin inaqta na teq tubusan kakaqta na aholib ussa in asanib mataw biyatha na gimebe bo tugwahtim. Gwahtiqan Pailat gibilan, Mat ka ahol waqiy ham.⁶ Haqan mataw tamaz emaya gigo aseseqta na giyogniz hurmey na nenaq in Yesus ahol waqad dedibmo bilaqiy, Mat na ayib dom woliy haqiy. Ayib dom woliy haqiy. Haqan Pailat gibilan, Negmo waqeq a le ayib dom woliy ham. Ya in ago daq meqinta araq ahol a hi way ham.⁷ Haqan Juda mataw aseseqta na amenin emim bilaqiy, I gigo maror aduganib gunun araq ayahta usaq haqiy. Sa mat na i gigo gunun na ittiyonim bilam, Ya God atatin ham haqiy. In nazaq haqan i gigo gunun na bilam, In moqan ham haqiy.

⁸ Haqan Pailat gamuk na huriitim in rab naqmo hiqiyqaq.⁹ Ad in Yesus waqim inaq ago bit aduganib a ta gwahtiqim in susumun ugim bilam, Ni edob bolta? ham.

Teq haiq. Yesus gamuk amenin araq a hi bilam.¹⁰ Anno Pailat bulonim bilam, Ni yaqgo gamuk amenin a hi emdaq e? ham. Ya niqamun hasid ni samanmo gwahtiqgo azawayin ya iholib usaq ham. Teq ya ni ayib dom wolgo azawayin ya iholib usaqmo ham. Na ni ninad a hi emaq e? ham.¹¹ Haqan Yesus bilam, Mat ulilib osaqa naqmo in zaway na nigta ham. In zaway na a hi nigid ni daq araq ya iholib emgo nibin hiqiy nag ham. Nazaq iyan mat ya iwaqim ni nibenab amta na in ni niquriyamim in daq meqin diqta am ham.

¹² Yesus nazaq bilaqan nab Pailat in Yesus hulosid lehgo adanteqin tinagunyaq. Ta teq Juda mataw na lileyim bilaqiy, Mat na bilaqaq, Yaqmo king araq haqad in Sisa ago babmo diq iyim luwaq haqiy. Ni hasid lehid teq ni Sisa ayow a hi iydaq haqiy.

¹³ Haqan Pailat gamuk na huriitim in Yesus waqim ad asanib a ta gwahtim. Gwahtiqim in ago ban in mataw gigo daq gilum kemad osaqa nab in tuqos wom. Ban na in bit ago veranda araq anan Gig Rireniy haqaytab usta. Hibru nanib in veranda na anan Gabata haqayta.¹⁴ Teq kam na in Pasova ayon nagah wastitayata akaman. Ari kam nab zeq ayahtab 12 kilok nazaq Pailat ago ban nab tuqos woqim osad in Juda mataw na gibilan, Ahol waqiy ham. Ne gigo king kawa turaq ham.¹⁵ Haqan Juda mataw na lileyim bilaqiy, Wol emid moqan haqiy. Wol emid moqan. Ayib dom wolid in moqan haqiy. Haqsa Pailat tisusumun nag, Ya ne gigo king ka ayib dom woldaiq e? ham. Haqan mataw tamaz emaya gigo aseseqta na bilaqiy, Sisa amomo in i gigo king haqiy. I gigo king araq haqiy haqiy.¹⁶ In nazaq haqan teq Pailat in giqez muzinim in Yesus waqim ayib dom wolgo bab mataw gibenab tiqam. Eman in Yesus waqim ad tilehiy.

Mataw Yesus ayib dom woliy

(*Matyu 27.32-44; Mak 15.21-32; Luk 23.26-43*)

Ari in Yesus waqim ad tilehiy.¹⁷ Lehsa Yesus inmo ago ay na sorim ad tilehyaq. Lehad in uliq ayahta na hulosim garah akululqan araq anan Gifaqin Agolgolan haqayta nabmo in tugwalehiy. Hibru nanib garah akululqan na anan Golgota haqayta.¹⁸ In garah nab tugwalehim saw nab teq in Yesus ayib dom tuwoliy. Wolad in mataw gigermo Yesus inaq ayib dom giwoliymo. Araq Yesus aqabun ban tursa araq anasaran ban turyaq. Sa Yesus in gilikmanib liqabmo turyaq.¹⁹ Dom tuwolan teq Pailat mataw gibilean in Yesus ayib dom woliyta na ananin mar tonim afaqinib tuqotheniyl. Gamuk na in kazaq mar toniy.

**JUDA GIGO KING YESUS ULIQ
NASARET-IBTA**

²⁰ Teq saw Yesus ayib dom woliyta na in Jerusalem agerab usaqta. Teq in gamuk mar tonim ay afaqinib emiya na in Hi-bru gigo nanib teq Rom gigo nanib teq Griek gigo nanib mar toniyta. Nazaq iyan Juda on mataw kabemmo leh bolad luwad in gamuk na ahol tuwaq yaqay. ²¹ Sa teq Juda gigo mataw tamaz emayta gigo aseseqta na lehim Pailat bulonim bilaqiy, Ni gamuk "Juda gigo king" nazaq ni a hi mar ton nagta haqiy. "Mat ka bilam, 'Ya Juda gigo king hamta'" nazaq ni mar ton nagta haqiy. ²² Haqan Pailat bilam, Nab iyan ham. Ya gamuk tumar tonta na in dimunmo ham. Nazaq usan ham.

²³ Ari mataw bab emayta na in Yesus ayib dom tuwolim teq in ago tubusan giwaqim huseran humab aweweq nazaqmo iy. Iyan in amulik-mulikmo giholyon humab amulikmo waq yaqay. Ad in Yesus ago aholsi-hen araq waqymo. Tubusan na in laplap urotim a hi initiyta. Na in ahol amulik-moqmo atutan haitqta. ²⁴ Nazaq iyan bab mataw na an bulonim bilaqiy, I tubusan ka hi hiksirequq haqiy. I gig amikmikta hunegad mat nog ameb iyeq in tuwaqdaq haqiy. In nazaq bilaqim in gamuk araq God ago marib usaqta na tuwol net bugiy. Gamuk na bilam,

In yaqgo tubusan giwaqim an huserim giholyon waqiy ham. Ad in gig amikmikta hunegim yaqgo iholsihen waqymo ham. *Buk Song 22.18*

Gamuk nazaq usta iyan in daq nazaqmo tiqemiy.

²⁵ Ari Yesus anen diq teq in anen amikta teq mat anan Klopas haqay na awe anan Mariya haqayta na teq Mariya araq uliq Magdala-ibta na in bunmo ay Yesus dom wolani turaqta na asenab turiy. ²⁶ Tursa Yesus anen teq in ago disaipel in anan anad bilaqaqta na in giger ay agerab diq tursa Yesus ame wo tigibiy. Gibiyadmo in anen bulonim bilam, Kanen ham ni nitatin nawa turaq ham. ²⁷ Haqad in ago disaipel na bulonim bilam, Ni ninen nawa ham. Haqan kam nab disaipel na in Yesus anen waqim inmo anen nog iyan in wamuzad inaq tuqosyaq.

Yesus mom
(Matyu 27.45-56; Mak 15.33-41; Luk 23.44-49)

²⁸ Daq na tihiqiyan Yesus anad tiqam, Yaqgo kabi yunno tihiqiy ham. Haqad in gamuk araq God ago marib usaqta na tuwol net bugnan haqad in bilam, Ya yuwnan moqaiq ham. ²⁹ Teq deg araq wain ayun agon iytate gwalim usta nab os. Ossa Yesus bilam, "Ya yuwnan moqaiq"

haqanmo mataw nab turiyta na in ay anan hisop haqayta aben araq waqim amotni tubusandek am wazim wain ayun na ulum turim Yesus ateb tiqemiy. ³⁰ Eman Yesus sisowim hulosadmo in bilam, Kabiy tihiqiy ham. Haqadmo in afaqin runan woqanmo in ahol awitan hulosanmo tilah.

Bab mat araq Yesus azawarnib ulum

³¹ Ari kam mataw Yesus ayib dom woliyta na in Juda gigo lotu ayon nagah wastitaygo akaman. Kam na hiqiyid babeq Juda gigo lotu akaman ayahta na tugwahtiqaqta. Nazaq iyan Juda mataw aseseqta na in mataw moqiyta gisan hulosid lotu akaman ayahta nab ayib usgo gituw hiqiy. Nazaq iyan in le Pailat tuluboni, Ningo mataw giqemid leheq mataw ayib usayta na gisen wolbiyayid in hidmo moqiy haqiy. Moqid teq in gisen ayib walemiy haqiy. ³² Haqan mataw bab emayta na lehim in Yesus agerab mataw giger dom wolani turiyta na gisen tuwolbiyayi. ³³ Gisen wolbiyayim teq in Yesus ago hib loqiy. Loqim Yesus tekomo tumoqim ussa in ahol waqiy. Nazaq iyan in asen a hi wolbiyayi. ³⁴ Ta teq bab mataw na gigo araq in ago em waqim Yesus azawarnib tuqulum. Ulumanmo anedan yuw inaqmo gwahtiqaq woqayaq. ³⁵ Ari mat wagam ka mar tonta na in ame anonab daq na ahol wamata. Ahol waqim ne huriteq Yesus anan helmo haq daqay haqad in gamuk ka mar ton. Mat na ago gamuk ka in hel diqtaqmo. Ad inmo anad emaq, Ya gamuk mar tonta ka in helmo diq haqaq. ³⁶ Ari bab mat na daq nazaq emim in God ago marib gamuk araq usaqta na tuwol net bug. Gamuk na bilam,

In aditin araq a hi wolbiyay daqay ham. *Buk Song 34.20*

³⁷ Ad gamuk ta araq God ago marib usaqta na in kazaq bilam,

In mat ulumiya na ahol tuwaq daqay ham. *Sekaraya 12.10*

Yesus moqan asan hodhodab a lehiy
(Matyu 27.57-61; Mak 15.42-47; Luk 23.50-56)

³⁸ Ari daq na bunmo tihiqiyan teq Josep uliq Arimatea-ibta na lehim Pailat bulonim bilam, Ya Yesus asan waqeq a le yay tonnan ham. Mat na in Yesus ago disaipel araqtam. Teq in Juda gigo rabad in ahol ulilemyaqta. In Pailat nazaq bulonan Pailat bilam, Dimunmo ham. Haqan Josep le Yesus asan ayib tuwalam. ³⁹ Samo Nikodemus mat kwaziqmo taromab Yesus ago hib lahta na in bolmo. Bolad in masil ahuruan dimunta giger mir teq alow inaq buliyyita na in waqim ad bol. Masil na ago afaqan in 30 kilo nazaqta. ⁴⁰ Ari giger na Juda gigo daq mat moqan yay tonayta na

adan muzinim in Yesus asan waqim masil ahuran dimunta na asanib hunegim teq in tubusanib net muzim a lehiy.

⁴¹ In kabiyl na eman tihiqiyen ari saw Yesus ayib dom woliyta nab uzaq araq dimunta usta. Teq hodhod araq muturta aduganib mat araq momta asan eman a hi usta in uzaq nab usmo. ⁴² Nazaq iyan Pasova ahumabun ayon nagah wastayayta akaman na tihiqiyyan tonsa in lotu akaman ago gunun awaz meqinta na anadin emad in hodhod sinsin usta nabmo Yesus asan eman tuquus.

20

Yesus hodhodab eram

(Matyu 28.1-8; Mak 16.1-8; Luk 24.1-12)

¹ Ari Sande tarom naqmo saw a hi hastiay bugsa Mariya uliq Magdala-ibta hodhod tilah. Lehim gig ayahta hodhod aqez ituqim usta na ulum buliyan lehan hodhod aqez hasim ussa in ahol tuwam. ² Ahol waqad in sibim le Saimon Pita teq disaipel araq Yesus in anan anad diq bilaqaqta na gibilenim bilam, Iyahta nabag hodhodab tuwaqiy ham. Waqim in a le edob emiyya na i a hi hurit ham.

³ Haqan Pita ayow disaipel araq na inaq eraqim uliq hulosad in hodhodab tilehiy. ⁴ In sibim lehad teq disaipel araq na in Pita uryiamim sibtitayimmo lehim in ameb hodhodab tugwahtim. ⁵ Gwahtiqim asanib turad in kuh tonim wiliyanim ame hodhod aduganib loqim tubusanmo ussa in ahol wam. Teq in hodhod aduganib lo a hi gwahtim. ⁶ Samo Saimon Pita abeb bolimmo in hodhod aduganib le tugwahtim. Gwahtiqim in tubusan samanmo ussa ahol tuwam. ⁷ Ahol waqad tubusan amalib Yesus afaqin irquryita na anonnomo ayim aholbin eman ossa in ahol waq ton. ⁸ Sa disaipel hodhodab iturim le gwahtimta na inaqmo hodhod aduganib le gwahtiqim in nagah nagan ahol tuwammo. Ahol waqad nabmo in helmo Yesus hodhodab tigern ham. ⁹ Disaipel giger na in Yesus moqe teq ta eraqdaqta na ago agamukan God ago marib ahol waq yaqayta teq in gamuk na alulin diq ginad a hi em has yaqay.

¹⁰ Admo in muleqim in gigo uliqab ta lehiy.

Mariya uliq Magdala-ibta na Yesus ahol wam

(Matyu 28.9-10; Mak 16.9-11)

¹¹ Ari Mariya hodhod aqezab asan ban turad in tigaqyaq. Gagadmo in wiliyanim hodhod aduganib ame tilom. ¹² Loqimmo Yesus moqan asan eman usta nab angelo giger gigo tubusan husta inaqta nab ossa in tigibiy. Araq Yesus afaqin usta asawnib ossa araq Yesus asen usta asawnib os.

¹³ Osad in giger Mariya kazaq buloniy, Aw, ni nagaqgo gaqaq? haqiq. Haqan in bilam, Yaqgo Iyahta nabag tuwaqiy ham. Waqim in a le edob emiyya na ya a hi hurit ham.

¹⁴ Mariya nazaq bilaqim in ahol buliyimmo Yesus nab tursa ahol tuwam. Ta teq Yesus-mo turaq nazaq in anad a hi am. ¹⁵ Samo Yesus susumun ugim bilam, Neng, ni nagaqgo gaqaq? ham. Ni nog nagunaq? ham. Haqan Mariya anad am. Uzaq ka anamren daqag ham. Haqad in bulon, Mat ayah ham ni mat momta na asan waqeq a lehsun iyid teq ni edob amta na ibilenid ya le waqnan ham. ¹⁶ An Yesus in Mariya anan biyim bulon, Mariya ham. Haqanmo Mariya ahol buliyim in Hibrui nanib bilam, Rabonay ham. Gamuk 'rabenay' na alulin tis'a haqayta. ¹⁷ Haqanmo Yesus bulon, Ni ya hi iwaz ham. Ya ulilib imam ago hib a hi lehaq ham. Teq ni ya imaqbaban gigo hib leheq kazaq gibilen ham. Yesus inmo amam teq ne gimam inaqmo ago hib tilehaq haqad ni gibilen ham. In ago God teq ne gigo God inaqmo ago hib lehaq haqad ni gibilen ham. ¹⁸ An Mariya uliq Magdala-ibta na lehim disaipel gibilenim bilam, Ya Iyahta ahol tuway ham. Haqad Yesus gamuk bulonta na in tigibilem bug.

Disaipel Yesus ahol waqiy

(Matyu 28.16-20; Mak 16.14-18; Luk 24.36-49)

¹⁹ Ari Sande imisor diq disaipel in Juda mataw ginan rabad bit aduganib gihol adanin otim tuqosiy. Ossa Yesus bo in gilik-manib turad gibilen, Ne gigem kute neman ham. ²⁰ In nazaq bilaqim teq in ahol aben teq azawaran tigiqishun. Gigiqishunsa in Iyahta ahol waqad ginad ayahmo dimniy yaqay. ²¹ Ginad dimniysa Yesus a ta gibilen, Ne gigem kute neman ham. Ya imam igeman bolta nazaqmo ya ne gigemid ne tileh daqaymo ham. ²² In nazaq bilaqim teq in ahol aqurin ulam hasan in gigo hib lehsa in gibilen, Ne God ago Bugaw Dimunta waqiy ham. ²³ Ne mataw gibileneq bilaq daqay, God ne gigo daq meqinta tigiwalam haqsa in gigo daq meqinta giholib hiqysiya tuqos daqay ham. Ari ne gibileneq bilaq daqay, God ne gigo daq meqinta a hi walemaq haqid in gigo daq meqinta na giholib soqoteq ussa in tuqos daqay ham.

Tomas Yesus ahol wam

²⁴ Ari Yesus disaipel gigerab gwahtimta nab disaipel araq anan Tomas haqayta na in nenaq a hi os. Tomas anan araq Didimus haqayta. ²⁵ Abeb Tomas bolan disaipel buloniy, I Iyahta ahol tuwaw haqiq. Haqan Tomas bilam, Ya in abenab dom woliyta na asawan ahol waqad ya iben le dom woliyta na abatlan teq emub ulumiyya na abatlan waz waqeq teq ya helmo tihaqdaiq

ham. Muran ya helmo a hi haqdaiq ham. Haqmo diq ham.

²⁶ Ari Sande ta araq nab Yesus ago disaipel bit nab a humab ta woliy. Humab wolum ossa Tomas in nenaq tuqos. Mataw na gihol adanin bunmo otim bit aduganib ossa Yesus in gilikmanib bo a ta gwahtim. Gwahtiqim turad in gibilan, Ne gigem kute neman ham. ²⁷ Haqadmo in Tomas tubulon, Ni niben akurgan araq ya ibenab dom woliyta asawnib kab emeq teq ni ya iben ahol waq kem ham. Ahol waqad ni niben emid bo ya izawaran ka waz waqanmo ham. Ad ni ninad haresmo emaqta na o tob iysa ni ya inan helmo haq ham.

²⁸ Haqan Tomas amenin emim bulon, Ni yaqgo Iyahta ham. Ni yaqgo God ham. ²⁹ Haqan Yesus bulon, Ni nime anonab ya ibiyim teq ni ya inan helmo tiham ham. Ari mataw ya a hi ibiyadmo inan helmo haqayta na in tidimniyim osay ham.

Jon gamuk ka mar tonta alulin

³⁰ Ari Yesus daq azawayin inaqtqa kabemmo disaipel gimeb giqamta. Teq ya bunmo wagam kab a hi mar ton. ³¹ Ya Yesus awagamun asormo kawa ya tumar tonta ka ne ahol waqad ne Yesus anan Krais haqad teq ne in anan God atatin tihaq daqaymo haqad ya gamuk ka mar tonta. Ne Yesus abin nazaq diqta anan helmo haqeq teq ne kayeqmo kuluwa-kuluwmo tuqos daqay.

Yesus hodhodab eraqim ame gigerta disaipel gimeb a ta gwahtim

21

Disaipel 7 nazaq Yesus ahol waqiy

¹ Ari abeb Yesus disaipel gimeb a ta gwahtim, yuw akurorqanta anan Taiberiyas* haqayta na ago lan aqezab. Teq in ago mataw gimeb gwahtimta na awagamun kazaq. ² Kam araqab Yesus ago disaipel asor humab wolum osiy. Mataw na ginan kazaq: Saimon Pita teq Tomas anan araq Didimus haqayta na teq Nataniyel uliq Kana saw Galiliy-ibta na teq Sebediy atatinz giger na teq disaipel ta asor gigermo in bunmo araqibmo osiy. ³ Ossa Saimon Pita gibilan, Ya le dob hunegeq nabiq waqan ham. Haqan in ayogniz na buloniy, I ninaqmo leham haqiy. Haqad in le muy araqab gwalim tilehiy. Lehim tarom nab in nabiq araq diq a hi waqiy.

⁴ An tarommo saw tihaustitaya Yesus bolim lan ezab titur. Tursa disaipel ahol a hi waq hasiy. ⁵ Sa Yesus gibilan, Onmin ham ne nabiq araqag waqiy ye? ham. Haqan in bilaqiy, Haiq diq haqiy. ⁶ Haqan

Yesus gibilan, Ne dob hunegid muy aqabun ban woqid teq ne nabiq asor tigiwaq daqay ham. Haqan in dob hunegan woqan nabiq kabemmo diq dobub tuwoqiy. Woqan in dob hureq yo hiqiy yaqay, nabiq kuluw diqmo iyan. ⁷ Sa disaipel araq Yesus in anan anad bilaqaqta na in Pita bulon, Ko Iyahtaqmo ham. Haqan Saimon Pita in "Ko Iyahta" haqan huritim in kabiy eman haqad ago aholsihen hasim eman usta na waqim aholib ta emim in yuwmeb sortukim woqim Yesus ago hib amim tilah. ⁸ Lehsa disaipel ta asor na muyib osad dob anabiqnaq wazim hureqim ad lan ezab tuboluy. Na ezaqgo in lan ezab sinsinmo 90 mita nazaq osiy.

⁹ Disaipel na bolim lan ezab tuwoqimmo faq araq ulaman tuqoyta azamorin kiskismo oysa in ahol waqiy. Teq faq azamornib nabiq oyad ussa bret faq agerab ossa in ahol waqiyomo. ¹⁰ Samo Yesus gibilan, Ne nabiq muran waqiyya na asor a boliy ham. ¹¹ Haqan Saimon Pita le muyib gwalim dob anabiqnaq na kamisib ussa in wazim hureqan yuw adekib tigal. Nabiq aseseqta kabemmo diq 153 nazaqmo dobub woqim usta. Teq dob a hi tartay. ¹² An Yesus gibilan, Ne boleq didaq neeqiy ham. Haqsa disaipel araq diq in "Ni nog?" nazaq a hi susumun ug yaqay. Na ezaqgo in bunmo ginad tigemiy, Ka Iyahtaqmo haqiy. ¹³ An Yesus eraqim bolim bret waqim tinag. Negad teq in nabiq waqim nazaqmo ton.

¹⁴ Ari ka Yesus ame ezeqmanta in disaipel gimeb gwahtimta, in hodhodab ta eraqim teq.

Yesus ayow Pita inaq an anobun wasti-tayiy

¹⁵ Ari disaipel didaq tineqan abeb Yesus in Saimon Pita tubulon, Jon atatin Saimon ham nabag ni mataw kagan giqurryamim ni ya inan ninad diq bilaqaq e? ham. Haqan Pita bilam, Eqe Iyahta ham. Ya ninan inad diq bilaqaqta na ni tuhurit ham. Haqan Yesus bulon, Ni yaqgo sipsip amidgotniz didaq neg ham.

¹⁶ Haqad Yesus ame gigerta a ta bulon, Jon atatin Saimon ham ni ya inan ninad diq bilaqaq e? ham. Haqan Pita bulon, Eqe Iyahta ham. Ya ninan inad bilaqaqta na ni tuhurit ham. Haqan Yesus bulon, Ni yaqgo sipsip gibiyruz ham.

¹⁷ Teq Yesus ame ezeqmanta a Pita ta bulonim bilam, Jon atatin Saimon ham ni ya inan ninad bilaqaq e? ham. Haqan Pita nab afaqan tiqiy. Na ezaqgo Yesus ame ezeqmanmo susumun ugim bilam, Ni ya inan ninad bilaqaq e? hamta na ago iyan. Haqan Pita bulon, Iyahta ham ni nagah

* **21:1:** Yuw akurorqanta na anan araq Galiliy haqayta. Ni Jon 6.1 nab teq ahol waq.

bunmo ago tuhuritta ham. Ya ninan inad bilaqaqta na ni tuhuritmo ham. Haqan Yesus bulon, Ni yaqgo sipsip didaq neg ham. ¹⁸ Ya helmo nibilenaiq ham. Ni minmin osad ni nihol wastitayim nihulib am hurorim ni edob lehnan ninad usta nab ni lehmo tilehyaqta ham. Ari abeb ni adinowan tiqiyeq teq ni niben wazid eraqsa mat araq nihulib am huroreq in niwaqeeq saw ninad a hi usaqtan niqad tilehdaq ham. ¹⁹ Na Pita daq ezaqta amalib moqdad in God abin emid ayah iydaqta na ago in Pita nazaq bulonta. Haqad in bulon, Ni ya imuzeq bol ham.

Yesus in ago disaipel anan anad bilagaqta na anan bilam

²⁰ Ari Pita ahol bulyim disaipel Yesus in anan anad bilaqaqta na gimuzim nenaq lehsa in ahol tuwam. Mat naqmo kwaziqmo Yesus ago disaipel nenaq didaq neqad in banab ahol wol emim Yesus anognib us nog iyad in afaqin Yesus abanib emim bulon, Iyatha ham nog niwaqeeq bab gibenab niqemdaq? hamta na amatin. ²¹ Pita in disaipel na ahol waqad teq in Yesus bulon, Iyatha ham mat ko teq ezaq iydag? ham. ²² Haqan Yesus bulonim bilam, Ya inad mat na ossa ya muleqeeq ta boldaiq haqid na in ningos nagah a haiq ham. Ni ya imuzeq bol ham. ²³ Teq Yesus nazaq haqan abeb gamuk na Yesus ago on mataw gigo hib le ayahmo diq iyta. Iyan mataw na ginad em yaqay, Disaipel na a hi moqdaqta haq yaqay. Ta teq Yesus bilam, Mat na a hi moqdaq nazaq in a hi bilam. Haiqgam. In bilam, Ya inad mat na ossa ya muleqeeq ta boldaiq haqid na in ningos nagah a haiq haqad in Pita bulonta.

²⁴ Ari disaipel naqmo in daq nagan bunmo amebmo ahol waqim in awagamun mar tonta. An i mat na ago tuhurit. In a hi katiyad gamuk heltaqmo mar tonta.

²⁵ Ta teq Yesus kabiy daq kabemmo diq giqeman mat na asormo mar ton. In Yesus daq amta na bunmo awagamun mar ton bugta iyid ya inad emaiq, Amarin gwahtiqeq osdaqta na abanan og kab hiqiy nagta haqaiq.

Aposel

o

Aposel Yesus ago kabiy emiya giwagamun Gamuk ameb lehaqta

Wagam ka in Yesus ago Aposel kabiy emiya giwagamun Luk-mo mar tonta usaq. Teq wagam ka in Yesus awagamun dimunta Luk mar tonta na tutim lehaqta. Yesus in Amamgo hib muleqeq tilehnan haqad in ago disaipel kazaq gibilan, God ago Bugaw Dimunta ne giholib bolid teq ne zaway diq iyeq ya ihol awagamun uliq Jerusalem-ub tibilaq daqay ham. Bilaqad teq ne saw giger Judiya-ib teq Samariya-ib wagam na bilaqad teq ne og saw bunmo leheq luwad ya iwagamun na tibilaq daqaymo ham. Haqan Luk ago wagam ka in nazaq diq lahta. God ago Bugaw Dimunta Aposel giholib bolan danmeeb in uliq Jerusalem-ub Yesus abin tibilaqiy (Aposel 1.1-8.3). Bilaqad teq in saw giger Judiya teq Samariya gigo saw ban lehad in Yesus awagamun bilaqim bilaqim a lehiy (Aposel 8.4-12.25). An abeb Pol gwahtiqim in Yesus ago gamuk a lehim og saw kabemmo bilamta (Aposel 13.1-28.31).

Teq wagam ka in daq araq ayahta giqis-hunaqta na kazaq. Aposel in gigo zawayib Yesus ago kabiy a hi em yaqay. Haiqgam. Yesus bilamta nazaq diq Bugaw Dimunta in giholib bolim zaway negsa in Yesus ago kabiy emad luw yaqayta.

Luk ago kamub mataw kabemmo in Yesus ago on mataw gimalib nan emeq bilaq yaqay, Uliq saw edob Krais ago on mataw osayta nab bab eraqaqta haq yaqay. On mataw na in gigo suleq amalib mataw ginad walebolad gigem wizsa in an wolad saw garak ayahmo emayta haq yaqay. Teq Aposel giwagamun kab i daq na alulin ahol waq kemauqta. Na in kazaq. Mataw kabemmo Yesus anan helmo haqsa Juda mataw in gibiyad gigem timeqniyyaq. Gigem meqniysa in gimo bab na eman eraqyaqta, Yesus ago on mataw gidanin qwaygo haqad.

Teq kam nagab mataw asor era Pol anan bilaq yaqay, In Aposel diq a hait haq yaqay. Haqsa Luk in Pol adanan qwaynan haqad Pol ezaq tonim Aposel iytana awagamun in ame ezeqmanno wagam kab mar tonta. Ameb diq Pol in Yesus muzinad a hi luwta. Haiqgam. In zaway diq iyeq Yesus ago on mataw giwazid woq yaqayta. Teq abeb Yesus in Pol lilewunim waqim eman in ago kabibiy mat dimunta iyim ago kabiy tiqemyaqta.

Aposel Yesus ago gamuk uliq Jerusalem-ub bilaqiy

Yesus teq God ago Bugaw Dimunta emid boldaqtta na abin in bilam

¹⁻² Mat ayah Tiyofilus, ya wagam danmeeb mar tonta nab Yesus in ago kabiy alulin tiqemim ago kabiy daq emad teq in ago suleq on mataw gibilenad luwsa le God in waqim ad Heven-ib gwalahta na awagamun bunmo ya mar ton nigta. Teq in a hi gwalehadmo in ago Aposel inmo gilumim giwamta na gigo hib gwahtiqim in God ago Bugaw Dimunta ago zaway amalib mataw na kabiy negad gamuk awaz meqinta gibilan. ³ Yesus sanctity sorim mogim kayeeta iyim teq in Aposel gigo hib gwahtiqinta. Gwahtiqim in gimen daq azawayin inaqtakabemmo giqeman gwahtiqsa Aposel ginad tiqemiy, Helmo Yesus hodhodab tiqeramta haqiy. Sa kam 40 nazaq aduganib Yesus tuteqmo mataw na gimeb gwahtiqad in God ago maror agamukan gibilenyaq. ⁴ Ad in nenaq osad in atoranmo kazaq gibilan, Ne uliq Jerusalem huloseq hi lehiy ham. Ne uliq kab osad nagah ya imam negnan hel diqmo bilamta na ne amen emad osiy ham. Kwaziqmo ya nagah na anan ne tigibilenta ham. ⁵ Ya bilay, Jon yuwibmo on mataw huz negyaqta hay ham. Ari babeq misireqaq teq God in ago Bugaw Dimunta ne tinegdaq hay ham.

⁶ An abeb Aposel bo Yesus ago hib humab wolim tisusumun ugiy, Iyatha haqiy, Luweq muran kam kab ni Isrel gigo maror woqim usaqta na waz ta eraqid in gigo king inaq a ta iy daqay-ya? haqiy. ⁷ Haqan Yesus gibilan, Ya imam inmo ago zawayib daq bunmo gwahtiqdaqta na akamun tibilaqan usaqta ham. Nagah na ne gigo a haiqta iyan ne kam na ago a hi hurit daqay ham. ⁸ Ta teq God ago Bugaw Dimunta ne giholib ayahmo tuboldaq ham. Bolid teq ne zaway waqeq nagah ne gimeb ahol waqiyta na teq ya iwagamun bunmo ne uliq Jerusalem-ub tibilaq daqay ham. Bilaqad teq ne leheq saw Judiya-ib teq saw Samariya-ib uliq bunmo luwad nab ne yaqgo gamuk na on mataw tigibilen daqaymo ham. Gibilenad teq ne saw giger na gihuloseq og saw bunmo lehad on mataw gibilensa in tuhurit daqaymo ham.

*God Yesus waqim ad Heven-ib tugwalah
(Mak 16.19-20; Luk 24.50-53)*

⁹ Yesus gamuk na bilaqim tihiqiyan Aposel ahol waqad tursamo God Yesus waqim ad kaitab tugwalah. Gwalehsa ongas tiqim Yesus il tonan Aposel ahol a ta hi waqiy. ¹⁰ Ad in gime kaitab gwalehad tursamo mataw giger tubusan husta emiya in gigerab gwahtiqim tituriy. ¹¹ Turad in

bilaqiy, Galiliy-ib mataw haqiy nagaqgo ne turad kaitab gime gwalehaq? haqiy. Muran God in mat anan Yesus haqayta ka ne gibenab walemim in waqim ad Heven-ib tugwalah haqiy. Teq in Heven-ib gwalehsa ne ahol waqiyta nazaqmo in muleqeq ta gewoqdaqta haqiy.

Mat araq Judas ago ban waqgo Aposel anan bilaqiy

¹² Ari Aposel garah anan Oliv haqayta na hulosim in muleqim Jerusalem-ub wo tilehiy. Garah Oliv na in Jerusalem agerab sinsinmo usaqta, kilomita amulikmo nazaq. ¹³ In garah na hulosim le uliq Jerusalem-ub gwahtiqaq bit in os yaqayta nab tilehiy. Lehim in bit na adugan ulilib osayta nab gwalehim tuqosiy. Mataw na ginan kazaq: Pita, Jon, Jems, Andru, Filip, Tomas, Bartolomyu, Matyu, teq Alfiyus atatin Jems teq Saimon mat Rom nenaq bab emyaqta amatin na teq Jems ta araq atatin Judas. ¹⁴ Mataw na bunmo teq on asor Yesus muzeq inaq leh yaqayta na teq Yesus anem Mariya teq Yesus amagniz inaqmo bunmo in gigem amulikmo iyad tuteqmo in bit adugan nab humab woleq God inaq gamuk emad os yaqayta.

¹⁵ Ari kam araqab on mataw Yesus anan helmo haqad maqbab iyim osiyta 120 nazaq humab wolim ossa Pita in gilikmanib eraqim turad kazaq gibilan, ¹⁶ Ya iyoqni ham kwaziqmo God ago Bugaw Dimunta Devit aqezab gamuk araq eman gwahtiqa in Judas-mo anan bilamta ham. An God ago gamuk bilamta nazaqmo Judas ago hib tugwahtim ham. Mat na a hi gwahitiqa Bugaw Dimunta in anan tibilaqan usta ham. Ussa teq mat na gwahtiqaq gamuk na muzinim in mataw dan giqishunim giqad lehan in Yesus waziyyat ham. ¹⁷ Na ezaqgo in i giyow mat araq iyim in i inaq garabmo kabiy ka wamta ham.

¹⁸ (Teq Judas ago daq meqinta na anawun mani silva waqim a lehim in og araq tizay. Zayim in lehim og nab ban araq meqintab woqim agem muturan in agembekoq bunmo mutbalim gwahtim. ¹⁹ An abeb mataw Jerusalem-ub osiyta na bunmo in daq na ago huritim in gigo nanib in saw na anan Akeldama tihaqiy. Na in 'og anednaqta' haqad in og na anan nazaq biyyi.)

²⁰ Ari Pita bilam, Gamuk araq Buk Song-ib mar tonan usaqta na kazaq bilam ham. In ago bit samanmo usan haqad in bilam ham. Ussa mat araq diq bit nab hi osan haqad in bilam ham. *Buk Song 69.25*

Teq buk nab gamuk araq kazaq bilammo ham.

Mat ta araq in ago ban waqeq kabiy eman haqad in bilam ham. *Buk Song 109.8*

²¹ Nazaq iyan muran i mat araq Judas ago ban waqdaqta na tinagunam ham. Naganad i mat araq kazaqta waqam ham. Iyahta Yesus i gililewunim giwaqim ginaq leh bolad luwyaqta kam nab mat na in luw osta ham. ²² Teq Yesus Jon ago hib lehan Jon huz ugsa mat na in ahol wamta ham. Ad Yesus ago kabiy alulin emsa in ahol wamtamo ham. Teq God i gibenab Yesus waqim ad gwalehsa in nab turtamo ham. Mat araq naqanta in daq nagan bunmo ahol wamta naqmo i ulum kerneq waquq ham. Id teq Yesus hodhodab eraqan in ameb ahol wamta na agamukan in i inaq garabmo tibilaqam ham.

²³ Pita nazaq bilaqan mataw nab osiyta na in mataw gigermo ginan tiqemiy. Araq na anan Josep haqayta. In anan giger Barsabas teq Justus haqaytamo. Teq ta araq na anan Matiyas haqayta. ²⁴ In mataw giger na ginan emim teq in kazaq God buloniy. Iyahta haqiy, ni mataw bunmo gigo gigem tuhuritta haqiy. Ni mataw giger ka gilikmanib mat dogag diq ni wamta na ni i giqishun haqiy. ²⁵ Giqishunid teq mat na Judas ago ban waqeq in Aposel araq iyeq kabiy ka asor in tisordaqmo haqiy. Judas kabiy ka tuhulosim in moqim saw in osdaqta nab tilah haqiy. ²⁶ Haqad in God inaq gamuk nazaq bilaqim tihiqyan in gig amikmikta giwaqim mataw giger na ginan mar tonim teq hunegiy. Hunegan Matiyas-mo anan tugwahtim. Gwahtiqaq in Matiyas waqim Aposel 11 na nenaq tigiwastoniy.

2

God ago Bugaw Dimunta gehitimta awagamun

¹ Ari Juda gigo lotu akaman ayahta anan Pentikos haqayta na tugwahtim. Gwahitiqaq mataw Yesus anan helmo haqayta na bit araqab humab wolim tuqosiy. ² Ossa nan saw haiqmo nagah araq ahulan bilaqne tim atoranmo sibaqta ahulan nog Heven-ib hitiqad bit in osiyta na tuwaleq ton bug. ³ Samo nagah araq faq amileq nog in gimeb gwahtiqaq in tartayad le on mataw amulik-mulikmo gigo hib us. ⁴ Ussa God ago Bugaw Dimunta mataw na giholib ayahmo bolan uliq amo amo gigo nan gin nadib bolsa in tibilaq yaqay.

⁵ Ari kam nab Juda on mataw God ayon lotu em yaqayta kuluwmo uliq saw bunmo hulosim bolim lotu akaman ayahta na ahol waqnan haqad uliq Jerusalem-ub tuqos yaqay. ⁶ Osad in nagah na ahulan iysa huritad in kabemmo bolim bit nab humab tuwoliy. Humab wolim tursa Yesus ago on

mataw na in God ago gamuk bilaqsa mataw biyahta na in gimi gimo gigo nanibmo tuhurit yaqay. Huritad in ginadnad diq tiqem yaqay. ⁷ Ad in gihol turuh nemsä ginadnad emad turad bilaqiy, Ka ezaq diq? haqiy. Mataw kawa gamuk emayta ka in bunmo saw Galiliy-ibtaqmo haqiy. ⁸ Ta ezaq iyan in God ago gamuk bilaqsa i gimi gimo gigo uliq diq ago nanibmo gamuk tuhuritaq? haqiy.

⁹⁻¹¹ I mataw uliq amulikmo a hi bolta haqiy. I asor kantri Partiya-ibta teq kantri Midiya-ibta teq kantri Elam-ubta haqiy. Teq i asor saw Mesopotemiya-ibta teq saw Judiya-ibta haqiy. Teq i asor saw Kapadosiya-ibta teq saw Pontus-ibta teq saw Esiya-ibta haqiy. Teq i asor saw Frigiya-ibta teq saw Pamfiliya-ibta teq kantri Isip-ubta teq i asor saw Libiya-ib uliq Sairin agerab osauqta haqiy. Teq i asor uliq Rom-ubta haqiy. I asor Juda matawmo diqta teq asor in mataw en amo amo i Juda gigo maror ahaqenib iyim muzinayta haqiy. Teq i asor nud Krit-ibta teq kantri Arebiya-ibta haqiy. Mataw gamuk emayta ko in God kabiy awaz meqinta amta na anan bilaqsa i amulik-mulikmo gigo nanibmo tuhuritaq haqiy.

¹² Haqad in bunmo gihol riten lamsa ginad kabemmo emad teq in an tubulon yaqay. Nagah ka alulin ezaq diq haq? yaqay. ¹³ Haqsa ta mataw na asor in hilhil emad bilaq yaqay. Mataw ko wain ayun muturta ayahmo uluwim in gihol agadan iay daqag haq yaqay.

Pita in Bugaw Dimunta bolta na ago alulin anan bilam

¹⁴ Ari Pita in Aposel 11 na nenaq eraqim turad in dedibmo lileyim on mataw na kazaq gibilan, Ne Juda mataw teq ne mataw Jerusalem-ub bolim osayta na bunmo ham ne gidekemeq yaqgo gamuk huriteq teq ne daq kawa gwahtimta ka ago alulin ne ginad em hasiy ham. ¹⁵ Ne ginad emay, "Mataw ka yuw atoranta uluwim gifaciqin hulosiyta daqagya" haqay ham. Haiqqam ham. Mataw in 9 kilok tarommo kam kazaqtan yuw atoranta ayahmo uluwim gihol agadan a hi iyayta ham. ¹⁶ Teq daq kawa gwahtimta ka kwaziqmo God ago nantut Joel kam anan bilamta naqmo ham. In kazaq bilam ham.

¹⁷ God bilam, Kam abebtanta na bo sinsin tiziysa teq ya igo Bugaw Dimunta wazbalid on mataw bunmo gimalib tuwoqdaq haqad in bilam ham. Woqsa ne gigo onmin matmatta teq onqonta in yaqgo nantut tibilaq daqay haqad in bilam ham. Teq ya daq lul araq diqta ne gigo mataw minminta na tigiqisihundaiq

haqad in bilam ham. Sa ne gigo mataw asesepta sen qwayeq nagah amo amo ahol tuwaq daqay haqad in bilam ham. ¹⁸ Kam nab ya igo Bugaw Dimunta wazbalid yaqgo kabibiy mataw bunmo onqonta teq matmatta inaqmo gimalib tuwoqdaq haqad in bilam ham. Woqsa yaqgo kabibiy on mataw na yaqgo nantut tibilaq daqay haqad in bilam ham.

¹⁹ Daq nawa teq gwahtiqaqta nagan gitowun kazaq gwahtiqa ne ahol tuwaq daqay haqad in bilam ham. Ya daq asor lul araq diqta kaitab ulilib kob emad teq og kab ya inad emsamo nagah amo amo tugwahtiqaqdaq haqad in bilam ham. Ned teq faq teq faq aqasın ayahmo gwahtiqaqta haqad in bilam ham. ²⁰ Teq ya zeq emid in ahol buliyeq aromriq-naq iysa ya kalam buliyid in kakaqta iyeq ned nog tiqiyidaq haqad in bilam ham. Iyahta ago kam ayahta abin inaqla na bo tugwahtiqaqton samo daq nagan bunmo tugwahtiqaqdaq haqad in bilam ham.

²¹ Kam nab God in on mataw Iyahta ahagenib iyim lilewunayta na bunmo gilumsiheq tigiwaqdaq haqad in bilam ham. *Joel 2.28-32*

²² Haqad Pita bilam, Isrel-ib on mataw ham ne gamuk ka hurityiham. Ya Yesus uliq Nasaret-ibta anan tigibilennan ham. God inmo Yesus eman bolta na ago in ne giqishunnan haqad in Yesus zaway ugsa in ne gilikmanib daq azawayin inaqla amo amo giqeman gwahtiqa in kabiay awaz meqinta kabemmo giqemyaq ham. Na ago ne tuhuritiya ham. ²³ God in matnaqmo ne gibenab eman ne mataw God ago maror asan ban osayta na gibe yahan in mat na ayib dom wolam tumom ham. Ne nazaq emim ne bilaqne negmo gibenab wol eman momta nog tiqiyiham. Kwaziqmo daq na bunmo a hi gwahtiqa God anad emim adan tuwastitayan usta ham. ²⁴ Teq in Yesus aholib moqgo sanctityi meqinta wamta na walemad in Yesus wazan ta eram ham. Na ezaqgo moq in tuteqmo Yesus wazgo ago zaway biyab haiqta na ago iyan ham. ²⁵ Teq kwaziqmo Devit in Yesus anan nazaq bilamtamo ham. In bilam,

Iyahta tutimmo ya imeb ossa ya ahol waqaiqta haqad in bilam ham. In ya iben iqabun ban osad zaway yagsa ya iwaz meqniyad a hi tukdaiq haqad in bilam ham. ²⁶ Nazaq iyan ya igem dimiysi Iyahta abin iluwaiqta haqad in bilam ham. In teq tiqidimun tondaq haqad ya og kab kayeqmo osad ya isan moqdaqta na ago ya inad a hi meqniyadta

haqad in bilam ham. ²⁷ Na ezaqgo ham ya moqid teq ni ya ihulosid ya mataw tumoqiyta gigo sawab kuluwa-kuluwmo a hi osdaiq haqad in bilam ham. Teq ni ningi mat tawon diqta na hulosid in asan hodhodab a hi lilihdaq haqad in bilam ham.

²⁸ Ni dante dimunta mataw muzim le os dimunta kuluwa-kuluwmo osaytab gwahtiqayta na ni ya tiqiqisihun haqad in bilam ham. Ad ni teq ya iwaqid ya ningi hib inad dimniysa ninaq tuqosdaiq haqad in bilam ham.

Buk Song 16.8-11

²⁹ Haqad Pita bilam, Ya imaqbaban ham, ya i gises Devit anan kazaq ne gibilendaq ham. In kwaziqmo tumomta ham. Moqan in tiyay toniyya ham. In ago hodhod na i gilikmanib usim bo muran kawa in us tutsa i ahol waqauqta ham. ³⁰ Teq God gamuk awaz meqinta Devit bulonad in Devit anaynayin araq emid in ago ban waqeinq king araq immo nogta iyeq tuqosdaiq haqad in bulonta ham. Haqan Devit in God ago nantut araq iyim iyan in gamuk na alulin anad tiqem has ham. ³¹ Nazaq iyan in God ago gamuk na anadin emad in nagah abeb teq gwahtiqdaqta na ahol kemad in Krais teq moqeinq teq eraqdaqta na ago in bilamta ham. In bilam, Krais moqid teq God hulosid mataw tumoqiyta gigo sawab a hi us tutdaq haqad in bilam ham. Teq in bilam, God in asan hodhodab hulosid a hi lilihdaq haqad in bilamtamo ham.

³² An muran kawa ya ne tigibilen kemaiq ham. God in mat anan Jesus haqayta na wazan tiqueram haqaq ham. I bunmo ahol tuwawta iyim i anan bilaqauqta ham. ³³ Jesus hodhodab eraqan teq God in abin emid ayah iy bugnan haqad in Jesus eman immo aben aqabun ban tuqos wom ham. Os woqim in Amam ago hib Bugaw Dimunta tuwam ham. Amam kwaziqmo ugnan hel diqmo bulonta nazaq ham. Waqim muran in God ago Bugaw Dimunta wazbalan on mataw kawa i osauqta ka gimalib woqan ne daq kaway ka ahol waqad teq ne gidekib gamuk ka tuhuritay ham. ³⁴⁻³⁵ Ne ginad em hasiy ham. Devit ulilib kaitab a hi gwalahta ham. Teq immo bilam, Iyahta in yaggo Iyahta kazaq bulon haqad in bilam ham. Ni ya iben iqabun ban kab ya imen emad ossa ya ningi bab giqemid nisen ahaqenib tiqiy bug daqay haqad in bilam ham.

Song 110.1

³⁶ Nazaq iyan ne Isrel on mataw bun diqmo gamuk ka hurit kemeq ginad em hasiy ham. God in Jesus, mat ne ayib dom

woliyta na eman in i bunmo gigo Iyahta teq i gigo Krais* tiqiy ham.

On mataw kabemmo gigem bulyim yuw huziy

³⁷ Ari Pita nazaq gibilenan gamuk na mataw giqutil tuqulum. Uluman in Pita ayogniz nenaq kazaq susumun negiy, I gimaqbaban haqiy, teq i ezaq tonam? haqiy. ³⁸ Haqan Pita gibilan, Ne bunmo ginad bulyeq ne gigo daq teq ginad meqinta na gileh ueqeq teq ne Yesus Krais ananib yuw huziy ham. Id teq God in ne gigo daq meqinta na bunmo giwalemad anadin a ta hi emdaq ham. Ne nazaq tonsa teq God in ago Bugaw Dimunta samanmo naw nog tindegdaq ham. ³⁹ Na ezaqgo ham God in ago Bugaw Dimunta mataw negnan hel diqmo bilamta na in ne teq ne gigo onmin teq on mataw God ago hib pesanmo osayta na bunmo inaqmo gimen gamuk na bilamta ham. I gigo Iyahta God in on mataw gililewunid agerab bol daqayta na bunmo in ago Bugaw Dimunta tindegdaq ham. ⁴⁰ Haqad Pita gamuk naqanta kabemmo amalib atoranmo gibilyeq. Ad in bilagyaq, Ne God lilewunid in ne gilumsiheq ta giwaqan hagyaaq. Giwaqid teq ne mataw meqmeginta muran kam kab osayta na nenaq araqibmo a hi meqniy daqay hagyaaq. ⁴¹ In nazaq bilaqan teq on mataw kabemmo diq 3,000 nazaq in Pita ago gamuk huritim anan helmo thiqadmo yuw tuhuziy. Yuw huzim in le Yesus ago on mataw na nenaq an tuwastoniy.

On mataw helmo haqiyta na gigem amulikmo iyim osiy

⁴² Ari on mataw helmo haqiyta na in Jesus ago on mataw na nenaq an wastonim tuteqmo in Aposel gigo suleq huritad teq in an ulumsihad teq in humab woleq garab didaq neqad teq in God inaq gamuk tiqem yaqay. ⁴³ Sa God in Aposel gibenab daq azawayin inaqta amo amo kabemmo emsa on mataw bunmo ahol waqad teq in God rabunad abin tuwazin yaqay. ⁴⁴ Sa on mataw helmo haqiyta na bunmo gigem amulikmo iyim os yaqay. Osad in ginad em yaqay, I gimi gimo gigo es nagah bunmo i wazauqta ka in i bunmo gigota haq yaqay. ⁴⁵ Haqad in gigo og teq in gigo es nagah nagan mataw ta asor gigo hib zayeq amenin waqeinq in gigo mataw nagah osgo siqim iyayta nagan gilumsihad tindeg yaqay. ⁴⁶ In bunmo gigem amulikmo iyad kam bunmo in le Tempel-ib humab tuwol yaqay. Teq in gigo bit araq araqab humab woleq Jesus abinib bret orqayeq tineq yaqay. Neqad in an alowan tonad ginad dimniysa zib allowabmo tuqos yaqay.

* 2:36: Gamuk Krais ka alulin "God mat emid bo i gilumsihadqta na amatin" haqayta.

⁴⁷ Osad kam bunmo in God abin tiqiluw yaqay. Sa uliqab on mataw bunmo in Yesus ago on mataw na ginan gigem tidimniy yaqay. Teq kam bunmo Iyahta in on mataw ta asor muturta gililewunad tigiwaqyaq. Giwaqsa on mataw helmo haqayta na gigo dauh kabemmo diq tiqiy yaqay.

3

Pita ayow Jon inaq in mat araq asen meqinta wastitayan dimniy

¹ Ari kam ta araqab 3 kilok imisor Juda mataw God inaq gamuk emayta akamnib nab Pita ayow Jon inaq Tempel-ib tilehiy. ² Lehim in mataw mat araq asen meqinta sorim a bolsa tigibiyiy. Mat na anen agemab nazaqmo hitimta. Kam bunmo mataw mat na soreq a le Tempel agelin ago dan ez anan Awaq Dimun haqayta nab emid osyaqta. Ossa on mataw boleq gel na aduganib logsa in mani nagah aman sunyaqta.

³ Ari Pita ayow Jon inaq le Tempel agelin aduganib lo gwahtiqnan haqsamo mat na mani anan tisun nag. ⁴ Sun negan Pita ayow Jon inaq gihol wasihim turad in mat na ahol waninunadmo Pita in tubulon, Ni nime kazaq boleq i giger gibiy ham. ⁵⁻⁶ Haqan mat asen meqinta na anad am, Mataw ka nagah tiyagnan haqad in ahol bulyim giger na tigibisa Pita bulon, Ya mani hajq ham. Teq nagah ya inaq naqmo ya tinignan ham. Yesus Krais Nasarettibta na abinib ya ni nibilenaq ham. Ni eraeq loq gel ham. ⁷ Hagad in mat na aben aqabnib wazim wazan tiqueram. Eraqim hid naqmo in asen aditin bunmo awaz timeqniy. ⁸ Awaz meqniyan in ahol loyinadmo in dedibmo eraqim turad tilog gelyaq. Samo Pita ayow Jon inaq Tempel agelin aduganib lo gwahtiqsa mat na in nenaq lehad in sor tiktukad teq in God abin wazan tiqeraqyaq.

⁹⁻¹⁰ Sa on mataw bunmo in mat na log gelad God abin wazan eraqsa ahol waqad ginad tiqemiy. Mat ko tutimmo Tempel agelin ago dan ez anan Awaq Dimun haqayta nab osad mani nagah anan sunyaqta naqmo amatin haqiy. Haqad in mat asen meqinta na tidimniyan ahol waqad in gihol riten lamsa ginadnad diq tiqem yaqay.

Pita Tempel agelin aduganib turad mataw gamuk gibilan

¹¹ Ari mat na Tempel ago veranda anan Solomon ago veranda haqayta nab in Pita ayow Jon inaq giwazim giqay netsa on mataw bunmo gihol turuh nemsa in gigerab sibim bolim humab tuwoliy.

¹² Humab wolim tursa Pita gibiyad kazaq gibilan, Ne Isrel-ib mataw ham, nagaqgo

ne nagah ka ago ginadnad emad ne i giger gibiy ninunay? ham. Ne towa ginad emay, I gigo zaway inaqta iyim i mat ka wastitay haqay-ya ham. Teq ne ginad emay, I giger God ago mataw dimun diqta iyim i mat ka wastitayan in tiloq gelaq haqay-ya ham. Na hajqgam ham. Ne ginad nazaq hi emiy ham. ¹³ I gisesan Abraham, Aisak teq Jekob gigo God inmo daq kawa ne ahol tuwaqay ka amalib in ago kabibiy mat Yesus abin wazan tiqeraqqaq ham. Mat ne waqim bab gibenab emiyya naqmo ham. Pailat in mat na hulosid lehgo bilamta teq hajq ham. Ne mat na gileh ugad bilaqiy. In i gigo a hajq haqad ne bilaqiy ham. ¹⁴ Mat nawa na in God ago mat tawon diqta iyim in God anad muz bugta teq in ago daq bunmo titnon diqtamo ham. Ta teq ne in gileh ugad ne mat ta araq mataw ginol emaqta naqmo waqnan haqad Pailat bulunan in hulosan ne gigo hib lah ham. ¹⁵ Lehsha ne mat i gyon os kayeqmo kuluwu-kuluwmo osyata adanteqin wastitay igta na wol eman tumomta ham. Moqan God hodhodab wazan ta eram ham. Eraqim kayeqmo ossa i giger gimeb in ahol tuwawta iyim iyan i agamukan bilaqauqta ham. ¹⁶ I Yesus anan helmo diq haqauqta ham. Nazaq iyan Yesus aholnan naqmo in mat ka asen eman awaz timeqniy ham. Ne mat ka ahol waqad ne in ago tuhurit kemayta ham. Teq i Yesus anan helmo haqsa Yesus-mo ne bunmo gimeb mat ka ahol wastitayan tidimniy bug ham.

¹⁷ Ya imaqbaban ham. Ya inad emaiq, Ne ginad a hi em hasadmo Yesus ago hib daq meqinta na emiyya haqaiq ham. Sa ne gigo mataw aseseqta nazaqmo in ginad a hi em hasiymo ham. ¹⁸ Kwaziqmo God in ago nantut giqezab bilam, Yaggo Krais teq sanctity sordaq haqad in bilam ham. Haqad teq in ne gigo daq meqinta na amalib in ago gamuk bilaqan usta na tuwol net bug ham.

¹⁹ Nazaq iyan ne gigo daq teq ginad meqinta na ne gileh ugad ginad bulyiy ham. Ad ne muleqeq God ago hib ta boly ham. Id teq God ne gigo daq meqinta na giwalemad anadin a ta hi emdaq ham. ²⁰ Ad in kam dimunta negid ne Iyahta ago hib osad ne gigem hastitaysa gihol tisimoldaq ham. Sa abeb in Yesus emid ne gigo hib tuboldaq ham. God in mat naqmo ne giulmihgo haqad atowun eman osaqta ham. ²¹ Mat na muran Heven-ib tuqosaq ham. Kwaziqmo God ago nantut tawonta na bilaq yaqay, Kam abebtanta nab teq God in nagah bunmo giqemid mutur tiqiydaq haq yaqay ham. An muran Yesus kam na amen emim osaqta ham. Kam na bo gwahtiqsa teq in muleqeq ta boldaq ham.

²² Kwaziqmo Moses bilam, Iyahta God teq ne gilikmanib ne gimaqbab araq emid gwahtiqeq in ago nantut

ya nogmo iyeq osdaq haqad in bilam ham. Osad in ne gamuk gibilensa ne in aqez huritiy haqad in bilam ham.

Lo 18.15-16

23 Ad in bilam,

On mataw in aqez a hi hurit daqayta na bunmo God in gimuzid giben tihiqidaq haqad in bilam ham. Giben hiqiysi in God ago on mataw nenaq a ta hi os daqay haqad in bilam ham.

Lo 18.19

24 Teq God ago nantut bunmo in gamuk naqanta bilaq tonymo ham. Samuel teq God ago nantut Samuel muzim gwahtiqiyta na bunmo in kam muturta ka anan blaqtya ham.

²⁵ Ari God ago nantut nagan gisesan negmo osayta ham. Ossa God kwaziqmo ne gisesan nenaq an amugan wazim nagah negnan gibilanta na muran negmo tuwaqayta ham. God Abraham inaq an adugan wazim bulon,

Ni nises abeb teq gwahtiqdaqta na amalib ya on mataw en bunmo tigidimun tondaq haqad in bilam ham. *Jenesis 22.18; 26.4*

26 Nazaq iyan muran God ne gilikmanib ago kabilib mat na eman gwahtiqim in danmeb ne gigo hib tubol ham. In anad mat na ne gidimun tonad ginad biliysa ne bunmo ginad biliyeq gigo daq meqinta gileh ug daqay haqad in mat na eman ne gigo hib bolta ham.

4

Pita ayow Jon inaq giqirquiy

¹ Ari Pita ayow Jon inaq in on mataw gamuk gibilenad tursamo mataw tamaz emayta na asor teq mataw Tempel-ib hurmey osayta gigo mat danmepta na teq Sadyusi asor in bo tugawtiqiy. ² Gwahtiqim tursa Pita ayow Jon inaq mataw suleq negad gibilen yaqay, Yesus moqim ta eram haq yaqay. Nazaq iyan on mataw Yesus anan helmo haqayta na moqeinq in hodhodab tiqeraq daqaymo haq yaqay. Haqsa mataw aseseqta na in giger gigo gamuk na huritad in ginan gigem timeqniy yaqay. ³ Gigem meqniysi in giger na giwazim giqad lehim bit giqirquran osayta nab giqem tuqosiy. Na ezaq zeq tuwolehsa imisor diq tiqiyen in babeq teq in giyon hazizir emgo haqad. ⁴ Ta teq on mataw kabemmo God ago gamuk na huritim in helmo tihaqiy. Nazaq iyan mataw helmo haqiyta na gigo dauh kabemmo diq iyim in ginulingan gwalim 5,000 nazaqmo iy.

Mataw aseseqta Pita ayow Jon inaq hazizirib giqemiy

⁵ Ari usim ta eraqim Juda gigo mataw marorta na teq mataw aseseqta na teq mataw Moses ago gunun hurit kemiyta nagan bo uliq Jerusalem-ub humab tuwoliy. ⁶ Humab wolim ossa tamaz mat danmepta anan Anaz haqayta na teq Kayafas teq Jon teq Aleksanda teq tamaz mat danmepta na asenlul matmatta bunmo in humab nab osiymo. ⁷ Osad in Pita ayow Jon inaq giqeman ginognib tursa teq in kazaq tisusumun negiy, Ne zaway ezaqta waqiy? haqiy. Ne nog anan biyad daq na emiy? haqiy.

⁸⁻⁹ Haqan God ago Bugaw Dimunta Pita aholib ayahmo bolan Pita era tigibilan, Ne Isrel-ib mataw aseseqta teq ne mataw marorta ham i giger mat araq asen meqinta ulumsihta na ago ne susumunay ye? ham. Ad ne mat na ahol ezaq dimniyya na ago ne hurit kemnay e? ham. ¹⁰ Ari ne bunmo gidek emeq hurit kemiy ham. Sa Isrel on mataw bunmo hurit kemiyham. Yesus Kris Nasaret-ibta na abinibmo mat ka ahol dimniyan in kawa ne gimeb tituraq ham. Ne Yesus ayib dom wolitya ham. Teq God hodhodab wazan ta eramta ham. ¹¹ Ne bilaqne mataw bit emayta nog iysa ta mat na in bilaqne tituq nog osaqta ham. Sa ne tituq na ahol waqim hunegad anan ‘meqin’ haqiyta ham. Ta teq muran tituq na zaway diq iyim in bit anon bunmo tisor bugaqta ham.

¹² Mat araq i gilumsihaqta na haiqgam ham. Og kab on mataw bunmo gilikmanib God in mat amulikmoqmo eman gwahatiqim in amomo i gilumsiheq ta giwaqdaqta ham. Na Yesus-mo ham.

¹³ Haqsa mataw aseseqta na in Pita ayow Jon inaq gibiyen in uliqabmo matawtu suleq a hi emiyta nog iyiy. Ta teq in giger a hi rabad nan atoranmo bilaqsa in gibiyad gihol turuh nemsia ginad em yaqay, Mataw giger ko Yesus inaq luw osiyta haq yaqay. ¹⁴ Haqad in mat ahol tidimniyyta na Pita ayow Jon inaq gigerab tursa ahol waqad in Pita aqez amenin emgo gamuk haiqgam tiqiyiy.

¹⁵ Nazaq iyan in Pita ayogniz nenaq gimuzan le kaunsel bit asan ban gwahtiqsa teq in gimo osad kazaq an tubuloni. ¹⁶ I mataw giger ko ezaq gitonam? haqiy. In daq azawayin inaq lul araq diqta tiqemiy haqiy. Eman Jerusalem-ub on mataw bunmo daq na ago tuhuriyi haqiy. I hajq haqamta adanteqin tihiqiy haqiy. ¹⁷ Luweq daq ka agamukin haresmo on mataw og saw bunmo gigo hib tileh tutdaq haqiy. Nazaq iyan i giger ko gidek wazad gamuk awaz meqinta gibilenid in Yesus ananib mataw gamuk ta hi gibileniy haqiy.

¹⁸ Haqad in Pita ayow Jon inaq gililewunan ta bolan in gamuk araq o suleq araq Yesus ananib ta hi emgo atoranmo

gibileniy. ¹⁹ Gibilenan Pita ayow Jon inaq amenin emim gibileniy, Ne ginad ezaq emay? haqiy. I God anad othasad i negmo gigo gamuk muzinamta na in God ameb daq dimun o daq meqin? haqiy. Daq na negmo ulum kemeq teq ginad emiy haqiy. ²⁰ Teq i giqez mugneto haiq haqiy. I nagah ahol tuwawta teq i gamuk tuhuritta na ago i tibilaq sireqam haqiy.

²¹⁻²² Haqan mataw marorta na in Pita ayow Jon inaq gigo hib daq meqinta alulin araq ahol a hi waqim in gamuk atoranmo a ta gibilenim teq in gihulosan tilehiy.

Ari mat aholib daq azawayin inaq gwah-tiqan in asen tidimniyta na ago ulig in 40 nazaq uriyamta. Nazaq iyan mataw aseseqta na in on mataw ginadin emad in Pita ayow Jon inaq santitiy araq negnan rabiy. Na ezaqgo on mataw bunmo in daq na ago God abin tiqiluw yaqay.

Yesus ago on mataw in Yesus awagamun bilaqgo azawayin waqnan haqad God buloniy

²³ Ari mataw aseseqta na in Pita ayow Jon inaq gihulosan giger na in giyogniz gigo hib muleqim ta lehim in mataw tamaz emayta gigo aseseqta na teq mataw marorta na giqez titutiy. ²⁴ Giqez tutan giyogniz na bunmo huritim in ginad amulikmo iyad God inaq gamuk kazaq emiy. Iyahta haqiy ni kait teq og teq kamis teq saw nagab nagaq bunmo giqusaya na inaquo ni giqam bugta haqiy. Giqem bugim ni nagah nagan bunmo gigo anamren iyim ni giwamuzad osaqa haqiy. ²⁵ Kwaziqmo ningko Bugaw Dimunta in i gises Devit aqe zab gamuk araq eman gwahtimta haqiy. Gwahtiqa ningo kabibiy mat na bilam, Nagaqgo mataw en ta asor Juda a haitqa nagan gigem meqniyay? haqad in bilam haqiy. Nagaqgo in daq samanta anon a hi emdaqta hareshmo emnan ginad emay? haqad in bilam haqiy.

²⁶ Og kab king bunmo in Iyahta inaq bab emnan gihol tuwastitayi haqad in bilam haqiy. Gihol wastitayim in Iyahta teq in ago Krais inaq gibaymuzad giwazid woqnan haqad humab woliyta haqad in bilam haqiy. *Buk Song 2.1-2*

²⁷ Helmo haqiy. Ningko kabibiy mat tawon diqta ni ninad muz bugta na Yesus-mo haqiy. Na in ningo on mataw gilumsi-heq ta giwaggo haqad ni ulumim wamta haqiy. Teq Herot ayow Pontiyus Pailat inaq teq mataw en ta asor Juda a haitqa nagan teq Isrel on mataw na in Yesus baymuznan haqad uliq kab humab woliy haqiy. ²⁸ Teq in ginadibmo daq na a hi emiy haqiy. Kwaziqmo ni ningo zawayibmo in

gimen dante tuwastitayta haqiy. Wastiyan mataw aseseqta na in ni ninad kwaziqmo ni eman usta naqmo muzinim daq na emiy haqiy. ²⁹ Iyahta haqiy muran mataw aseseqta i gimeqin tonnan bilaqsa ni gibiy haqiy. I ningo kabibiy matawta haqiy. Ni i gilumsihsa i zaway diq iyeq ningo gamuk atoranmo bilaquq haqiy. ³⁰ Bilaqad i ningo kabibiy mat tawonta Yesus anan biysa ni niben itiwuneq mataw moqayta na giwastitayad ni daq azawayin inaqtam amo amo giqemid gwahtiqa haqiy.

³¹ Ari in gamuk na bilaqim thihiqyan bit in humab wolim osiyta na dedibmo ahol wolsa God ago Bugaw Dimunta in giholib ayahmo tubol. Bolan mataw na zaway iyim God ago gamuk atoranmo tibilaq yaqay.

On mataw Yesus anan helmo haqayta na an ulumsih yaqay

³² Ari mataw helmo haqayta na bunmo gigem ginad amulikmo tiqiy yaqay. Sa in gigo araq ago nagah ahol waqad "Ka yaqgo diqomo" haqad in nazaq a hi bilagyaq. Haiqgam. In bunmo gigo nagah araqibmo tuwaz yaqay. ³³ Sa Aposel in Iyahta Jesus hodhodab eraqan in ahol waqiyta na agamukan mataw tigibilen yaqay. Gibilensa in gigo gamuk na azawayin ayahta inaq iyyaq. Sa God aqem dimunta ago on mataw na negsa in bunmo ginad dimniyasa dimun diqmo tuqos yaqay. ³⁴⁻³⁵ In gilikmanib mat araq diq in nagah osgo siqim a hi iyyaq. Na ezaqgo mat nog in ago og o in ago bit inaq na in mataw ta asor gigo hib zayad amenin waqe in mani na a boleq Aposel tinegyaq. Negsa in gilikmanib nog nog in nagah araq ago woqsa Aposel ahol waqad in mani na asor uroteq tuqos yaqay.

³⁶ Sa in gigo mat araq anan Josep haqayta os. Aposel in anan araq Barnabas haqad ugiya. Teq nan Barnabas na alulin mat mataw gigem zaway negaqla haqayta. Mat na in Juda gises Liway anaynayin araq teq in nud Saiprus-ibta. ³⁷ In ago og araq mat araq ago hib zayim in mani na waqim a bolim Aposel tinag.

5

Ananayas awe Safaira inaq giwagamun

¹ Ari mat araq anan Ananayas haqayta na in awe Safaira inaq in gigo og araq mat araq ugad amenin waqiy. ² Amenin waqim aduw mani na asor ulilemsa awe huritim anad bilam. Sa aduw mani na asormo waqim a bolim Aposel negad in bilam, Ya og zayim mani wayta na bunmo kawaqmo ham. Sa in awe nagah na ago tuhuritta.

³ In nazaq hagan Pita tulalon, Ananayas ham ezaq tonim ni Satan hulosan in ni ninad wamuzad nibe yahsa ni ningo og na zayim amenin asor ulilam? ham. Ulilemad

ni God ago Bugaw Dimunta tikat ugaq? ham. ⁴ Og na ni a hi zaysamo in ni nibinib tuqusta ham. Ad ni og na zayim amenin wamta na in ninmo ninad muzgo usta ham. Nagaqgo ni daq meqin kazaq emnan ninad am? ham. Ni matmo diq a hi kat ug ham. Haiqgam ham. Ni God-mo tikat ug ham. ⁵ Haqanmo Ananayas gamuk na huritim in ogib woqimmo tumom. Moqan mataw daq na abin huritiyta na bunmo tirab naqmo diq hiqiy yaqay. ⁶ Sa mataw minminta asor bolim Ananayas momta na asan tubusanib il tonim sorim a le tiyay toniy.

⁷ Ari mataw na os tutsa zeq adulan ezeqman nazaq le tihiqyan ta Ananayas awe bo tungwahtim. In aduw momta na ago abin a hi huritimmo in gadgadmo bol. ⁸ Bolan Pita bulon, Ezaq? ham. Ne giger og na zayim mani kazaqmo waqiy ye? ham. An aw na bilam, Eqe ham i giger mani nazaqmo wawta ham. ⁹ Haqan Pita bulon, Nagaqgo ne giger Iyatha ago Bugaw Dimunta ulum waqnan an adugan waziy? ham. Ni hurit ham. Mataw niduw yay toniyta na bo dan ezab tituray ham. Teq in ni nisoreq niqad tileh daqaymo ham. ¹⁰ Haqan nawaqmo aw na Pita anognib woqimmo tumom. Moqan mataw minminta na bo gwahtiqtim in aw na moqan ahol tuwaqiy. Ahol waqad in sorim a lehim aduw agerab tiyay toniy. ¹¹ Nazaq iyan Yesus ago on matawtu na bunmo tirab titay yaqay. Sa on mataw God ago maror asan ban osiyta na nazaqmo in daq na abin huritad tirab yaqaymo.

*Aposel daq azawayin inaq amo amo
gigeman gwahtiqtig yaqay*

¹² Ari Aposel in on mataw gilikmanib daq azawayin inaqta amo amo kabemmo gigeman gwahtiqtig yaqay. Sa Yesus ago on mataw na bunmo gigem amulikmo iyim in Tempel ago veranda anan Solomon ago veranda haqayta nab sirisrimo humab twol yaqay. ¹³ Sa on mataw asan banta na in Yesus ago dauh na gibin tiqiluw yaqay. Ta teq in girabunad in bo nenaq humab a hi em yaqay. ¹⁴ Sa God in on mataw kabem diqmo gigeman in Iyatha anan helmo haqad ago dauh na giduganib tubol yaqay.

¹⁵ Nazaq iyan mataw in giyogniz gigo moq inaqta gisoreq gigad leheq dan adek ban garuruh hureneq teq in harisharesmo gigemid us yaqay. In ginad em yaqay, Pita loq gelad luwsa zeq bo aholib worireqsqa adulan le mataw moqayta ka giwazid diminji daqay haq yaqay. ¹⁶ Sa on mataw kabemmo uliqben amikmikta Jerusalem agerab osiyta nagan inaqmo Aposel gigo hib tubol yaqaymo. Bolad in mataw gigo moq inaqta na teq mataw gigo

bugaw meqinta inaqta nagan gigad bolsa on mataw na bunmo gihol tidimniy yaqay.

*Aposel gigirquran bitab ossa angelo
araq bolim gidanin has nag*

¹⁷ Daq nazaq gwahtiqa tamaz mat danmepta na ayogniz Sadyusi nenaq in Aposel gigem meqinta tineg yaqay. ¹⁸ Gigem meqinta negad in eraqim Aposel giwazim gigad le gavman gigo bit gigirquran osayta nab tigiqemiy. ¹⁹⁻²⁰ Gigeman ossa taromab Iyatha ago angelo araq bolim bit na adanin hasim in Aposel gigad asanib gwahtiqtim teq in gibilan, Ne leheq Tempel ago gel aduganib gwahti turad ne os muturta ka ago adan agamukan bunmo on mataw gibileniy ham. ²¹ Haqan Aposel gamuk na huritim tarommo saw hastitaya in Tempel-ib lehim on mataw gamuk tigibilen yaqay.

Ari tamaz mat danmepta na ayogniz Sadyusi nenaq bolim nan eman Juda gigo kaunsel ayatha na gigo hib lehan Isrel-ib mataw marorta na bunmo bo humab tuwoliy. Humab wolum osad teq in kabibiy mataw asor gigeman in Aposel gigirquran osayta na giwaqeq gigad mataw aseseqta na gimeeb ta bolnan haqad tilehiy. ²² Lehim bit gigirquran osayta nab in Aposel giawan tuwaqiy. Gisawan waqim in muleqim ta lehim mataw aseseqta na tigibileniy. ²³ In bilaqiy, I bit nab lehim dan ez bunmo giqot bugan giwaz meqniyim ussa i ahol waw haqiy. Sa mataw dan ez wamuzayta nagan in dan ez buntab tituray haqiy. Ta teq i dan hasim mat araq aduganib ossa i ahol a hi waw haqiy.

²⁴ Haqan mataw Tempel-ib hurmey osayta gigo mat danmepta na teq mataw tamaz emayta gigo aseseqta na in gamuk na huritim in ginadnad emad bilaqiy. Mataw na ezaq tonim nabag lehiy? haqiy. ²⁵ Sa mat ta araq bo gwahtiqtim gibilan, Huritiy ham. Mataw ne gigirquriyta na in muran Tempel agelin aduganib turad on mataw gamuk tigibilenay ham. ²⁶ Haqan hurmey gigo mat danmepta na ago mataw asor nenaq lehim in Aposel na amidemqammo giwazim gigad ta boliy. Na ezaqgo in rabad ginad em yaqay, Luweq i mataw ka ginolid on mataw biyatha ko i gimen gig hunegad tiginol em daqay haq yaqay.

*Aposel kaunsel ginognib gamuk bilaq
nan a hi rabiy*

²⁷⁻²⁸ Mataw na Aposel gigad bolim Juda gigo kaunsel ayatha na ginognib gigeman tituriy. Tursa tamaz mat danmepta na gibilan, Ne mat na abinib on mataw ta hi gibilengo haqad i atoran diqmo gibilenta ham. Ta teq ne gigo suleq na ayah iyim in uliq Jerusalem tuwaleq ton bugaq ham. Sa

mat na wol eman momta agamukan ne i gimalib emnan tonay ham.

²⁹ Haqan Pita ayogniz Aposel bunmo nenaq in amenin emim bilaqiy, I God-mo aqez muzinamta haqiy. I mataw giqez a hi muzinam haqiy. ³⁰ Ne Yesus atoranmo wazim ayib dom wolad ne wol eman tumomta haqiy. Ta teq i gisesan gigo God in wazan ta eram haqiy. ³¹ Eraqan God in abin ayahta ugim teq in waqim eman ulilibmo inmo aben aqabun ban tuqos woqim osaq haqiy. Osad in Maror Iyah diqta on mataw gilumsiheq ta giwaqdagaqtta amatin tiqiy haqiy. Iyim in Isrel on mataw ginad wazid eraqsa in ginad buliyad gigo daq meqinta gileh ugsa in gigo daq meqinta na tigiwalemdaq haqad in osaqta haqiy. ³² God daq nagan bunmo emsa i gimebmo ahol tuwaqim on mataw gibilenauqta haqiy. Sa God in on mataw inmo aqez huritayta na in ago Bugaw Dimunta tinegan Bugaw na in daq nagan ago bilaqaqtamo haqiy.

Mat anan Gamaliyel haqay na bilam, I Aposel gigo hib kisksi iyuq ham

³³ Ari mataw aseseqta na in Aposel gigo gamuk na huritim gigem diq meqniysa in Aposel ginol emnan ginad tiqem yaqay. ³⁴ Sa Farisi gigo araq Juda gigo kaunsel ayahta nab osim in eraqim titur. Mat na anan Gamaliyel* haqayta. In God ago maror Moses bilamta na asuleqin bilaqaqta amatin araq. Sa on mataw bunmo in mat na wazinad ago gamuk hurit yaqayta. Ari mat na eraqim turad in Aposel gimuzid asanib lehgo tibilam. ³⁵ Bilaqan Aposel asanib tilehsa teq in mataw aseseqta na kazaq gibilan, Ne Isrel mataw ham ne ginad em haseq teq mataw ko giholib daq emiy ham. ³⁶ Na ezaqgo kwaziq nogmo mat anan Teudas haqayta na eraqim bilam, Ya mat ayahta ibin inaqta haqad in bilam ham. In nazaq haqan mataw 400 nazaq muzinad inaq luw yaqayta ham. Luwsa gavman mataw asor bolim mat na wol eman in ago mataw in anan helmo haqiyta na haresmo tuksa ago kabiy na tuwom ham. ³⁷ Teq daq na abeb gavman in on mataw ginan waqad ginuliniytta nab mat ta araq anan Judas saw Galiliy-ibta na eraqim on mataw asor giqutil wazan eraqsa in gihuram ham. Teq mat na tumommo ham. Moqan ago mataw in anan helmo haqiyta na bunmo tukim hares tiqiy bugiy ham. ³⁸ Nazaq iyan ya ne gibilenaiq ham. Ne mataw ko ginan asit rabad giholib daq araq hi emiy ham. Ne gihulosidmo luwiham. Nagah ka alulin matawmo gigo hib ussa teq in anadibmo thihiqyidaqta ham. ³⁹ Ari

nagah ka alulin God-mo ago hib usid teq ne mataw ko a hi giwasih daqay ham. Luweq ne nazaq emad ne God inaq an tuwol daqay ham.

Ari Gamaliyel nazaq haqan mataw aseseqta na aqez tumuziniy. ⁴⁰ Muzinim in Aposel gililewunan bolan in gusib tigititu ninaliy. Ad in Jesus ananib gamuk araq ta hi emgo atoranmo gibileniy. Gibilenim giulosan asanib tugwahtiqiy. ⁴¹ Gwahtiqim in Juda gigo kaunsel ayahta na hulosad ginad dimniysa tilehiy. Na ezaqgo God agem dimunta negad in Jesus abin eman in gigo hib ayahmo iyan in Jesus abinib mebay soriyta na ago in God ago hib ginad ayahmo dimniyyi. ⁴² Ginad dimniysa kam bunmo in Tempel-ib teq on mataw gigo bit amo amo-ib leheq suleq negad bilaq yaqay, God mat emid bo i gilumsihaqta amatin anan Krais haqayta na in Jesus-mo haq yaqay. Haqad in giwaz meqniyim gamuk na bilaqad in gigo daq na a hi hulos yaqay.

6

Yesus ago on matawta na in mataw 7 nazaq Aposel gilumsiheq gitowun emiy

¹ Kam nab on mataw kabemmo diq disaipel tiqiy yaqay. Sa in gigo asor Grik nan bilaqayta na eraqim in disaipel Hibrudan bilaqayta na tiginad yaqay. Ginadad in bilaq yaqay, Kam bunmo ne on mataw didaq nagah ago siqim iyayta na gilumsihad ne i gigo on waburta gihulosad ginadin a hi emayta haq yaqay. ² Afaqan nazaq gwahtiqan Aposel 12 na in disaipel biyatha na bunmo gililewunan bolan in gibileniy, I God ago gamuk akabiyan hulosad didaq iberamta na in dimun a hajq haqiy. ³ Nazaq iyan i gimaqbaban haqiy ne gilikmanib mataw 7 nazaq ginaguniy haqiy. Mataw na in on mataw gigo hib gibin dimunta usaqta teq God ago Bugaw Dimunta in giholib ayahmo usaqta teq in ginad awaz meqinta, mataw naqanta ne ginaguniy haqiy. Id teq i mataw 7 na gijemid in kabiy na tuwamuz daqay haqiy. ⁴ Wamuzsa igmo kam buntab God inaq gamuk emad teq i on mataw God ago gamuk gibilenad i gihol bunmo emid kabiy nab lehdqata haqiy.

⁵ Haqan on mataw bunmo gamuk na huritim in ginad tibilam. Ginad bilaqsa in mat araq anan Stiven haqayta na anan bilaqim waqiy. Stiven in mat anad helta ayahmo usyaqta. Ussa God ago Bugaw Dimunta in aholib ayahmo usyaqtamo. Teq in Filip teq Prokorus teq Nikanor teq Timon teq Parmenas teq Nikolas ginan bilaqim

* ^{5:34:} Pol Yesus anan helmo a hi haqadmo in mat anan Gamaliyel haqayta naqmo ago hib Farisi asuleqin wamta. Aposel 22.3 nab teq ni ahol waq.

giwaqimo. Nikolas in mat uliq Antiyokibta. In Juda mat a haiqta teq kwaziqmo in Juda gigo maror ahaqenib iyim muzinyaqta. ⁶ In mataw 7 na giwaqim Aposel ginognib giqeman tursa Aposel God inaq gamuk tiqemim teq in giben mataw na giholib emim giwazad kabiyl tinegij.

⁷ Ari God ago gamuk le ayah iysa uliq Jerusalem-ub on mataw kabemmo gamuk na anan helmo haqsa disaipel ginulinqan kuluwmo diq tiqiy yaqay. Sa Juda gigo mataw tamaz emayta na kabemmo in nan huritad helmo tihaq yaqaymo.

Juda mataw asor Stiven hazizirib emiy

⁸ Ari God agem dimunta teq zawayin ayahmo Stiven ugsa in daq azawayin inaqta aseseqta amo amo on mataw gilikmanib giqemyaq. ⁹ Emsa mataw asor eraqim Stiven inaq an tumugiy. Mataw na in Juda gigo dauh araq anan Friman^{*} haqayta na gigo asor. Na in uliq Sairin-ibta teq uliq Aleksandriya-ibta teq saw giger Silisiya-ibta teq Esiya-ibta. ¹⁰ In Stiven inaq an mugsa God ago Bugaw Dimunta Stiven anad dimunta ugsa mataw na Stiven ago gamuk bayan yo hiqiy yaqay.

¹¹ Nazaq iyan in ulilemim le mataw ta asor mani negan in katiyad bilaqiy, Stiven in Moses teq God inaq gibilawunsa i hurit haqiy. ¹² In nazaq haqad in Juda gigo mataw marorta na teq mataw Moses ago gunun hurit kemiyyta na teq Juda on mataw kabemmo inaqmo gigem wazan eraqsa in Stiven anan gigem timeqniyyaq. Gigem meqniysa in le Stiven wazim ad Juda gigo kaunsel ayahta na gigo hib tilehiy. ¹³ Lehim in mataw asor Stiven amalib nan katiyta em daqayta humab nab giqem toniyomo. An mataw gimileq iyayta nagan in Stiven anan bilaqiy, Tutimmo mat ka God ago bit tawonta ka teq God ago maror Moses bilamta na inaqmo gibayan woqayta haqiy. ¹⁴ Haqad in bilaqiy, Mat ka bilam, Mat anan Yesus uliq Nasaret-ibta haqay na in teq Tempel wolinerad in i gigo maror Moses iga na tubulyidaqmo haqsa i huritta haqiy. ¹⁵ Haqan mataw kaunsel ayahta nab osiyta na bunmo in gime le Stiven atoranmo ahol waqsa Stiven anobun angelo anobun oy nog iysa in ahol waqiy.

7

Kaunsel mataw aseseqta Stiven gamuk ugsa in ahol adanin qway

¹ Ari tamaz mat dammepta na in Stiven susumun ugim bilam, Gamuk nawa ni nimlib emayta na in helmo ye? ham.

* **6:9:** Mataw ginan 'Friman' haqayta na in kabibiy mataw samanta iyim osiyta teq abeb in gihol zayim samanmo luw os yaqayta.

² Haqan Stiven bilam, Ya imaman teq ya imaqbaban ham ne huritiy ham. Kwaziqmo i gises Abraham uliq Haran-ib a hi lehadmo in saw Mesopotemiya-ib osyaq ham. Ossa God uliq Heven-ib abin teq ahol anuwan ayahta inaq osaqla na in Abraham ameb tugwahit ham. ³ Gwahtiqim in Abraham bulon, Ni ningi og teq nisen-lul bunmo gihulosad og araq ya tiniqisi-hundaiqta nab ni leh haqad in bulon ham.

⁴ Haqan Abraham eraqim Kaldiya gigo og in osta na hulosad uliq Haran-ib tilah ham. Lehim ossa amam nab tumom ham. Moqan God in Abraham eman bolim in og muran i Juda osauqta kab in tuqos ham. ⁵ Ossa kam nab God in og ka ago asit diq araq Abraham aholyon waqgo a hi ug ham. Teq in hel diqmo haqad Abraham kazaq bulon, Abeb teq ya og ka nigid ni teq ni nitatniz nenaq giholyon tuwaq daqay haqad in bilam ham. Abraham amun haiqmo ossa God in nazaq bulonta ham. ⁶ Teq God kazaq bulonmo ham.

Ni nisesan abeb teq gwahtiq daqayta na in le mataw asor gigo ogib begbeg iyeq tuqos daqay haqad in bilam ham. Ossa og anamreniz na in ni nisesan giqemid in gigo kabibiy mataw samanta iysa in gimeqin tonad kabiyl afaqanta tineg daqay haqad in bilam ham. Negsa ni nisesan nazaq meqin diq ossa le ulig 400 nazaq tiqiydaq haqad in bilam ham.

⁷ Sa ni nisesan in mataw na gimen kabiy emsa ya mataw na gilum kemad gigo daq amenin negsa in ni nisesan gimuzid og na huloseq tugwahit daqay haqad in bilam ham. Gwah-tiqeq in boleq og kabmo yaqmen lotu tiqem daqay haqad in bilam ham.

Jenesis 15.13-14

⁸ God nazaq bulonim teq in Abraham inaq an adugan wazim bulon, Abraham ham ni nihol abatan asan tuqurot daq haqad in bilam ham. Na in Abraham inaq an adugan wzata na atowun Isrel mataw bunmo gisanib usdaq haqad in maror na ugta ham. Nazaq iyan abeb Abraham ago amun Aisak gwahtiqim in ago kam 8 nazaq tiqiyan Abraham in asan tuqurot ham. An abeb Aisak in Jekob amam iyim in nazaqmo ton ham. An Jekob in i gisesan 12 na gimam iyim in atatniz na gigo hib daq nazaq amtamo ham.

⁹ Teq i gisesan Jekob atatniz na in gimikqan Josep anan gigem meqniysa in waqim mataw ta asor gigo hib tizayiy ham. Zayan mataw na Josep waqim ad Isip-ub tuwolehiy ham. Ta teq God in Josep a hi

hulosad in inaq luw os tutyaq ham. ¹⁰ Ad in Josep ulumsihim in ago afaqan bunmo givalam ham. Walemim teq in Josep zaway ugsa Josep in Isip gigo king Fero ameb mat dimun diqta anad awaz meqinta amatin tiquy ham. Nazaq iyan king na in Josep ban ugan in gavman gigo mat danmebta iyim in Isip bunmo giwamuzaq teq in king Fero ago kabiq nagah bunmo inaqmo tigwamuzyaqmo ham.

¹¹ Abeb zarow araq ayahta Isip teq Kenan gigo og saw bunmo tugwahtim ham. Gwah-tiqan on mataw saw nagab bunmo afaqan ayahmo yaqay ham. Sa i gises Jekob atatniz nenaq in didaq ago siqim tiquiyimo ham. ¹² Sa Jekob in Isip-ub didaq usaqta na agamukan huritim in i gisesan gigeman in gime danmebta tuwolehij ham. ¹³ Teq in gime gigerta a ta lehan Josep in ababan gimeb ahol tuqujal ton ham. Ulal tonan teq Fero in Josep asenlul na gigo tuhurit kam ham. ¹⁴ An teq Josep in amam Jekob amen nan emim lilewunan in amam teq in amaqbaban qigonan gigo onmin nenaqmo bunmo in ago hib tuwolehij ham. Wolehim Josep asenlul na bunmo in on mataw 75 nazaq iyim tuqosiy ham.

¹⁵ Ari Jekob Isip-ub tuwolah ham. Wolehim osad abeb in tumom ham. Sa i gisesan na bunmo osim tumoqiyomo ham. ¹⁶ Moqsa mataw in gisan gisoreq qiqad Sekem-ub leheq giyay ton yaqay ham. Kwaziqmo Abraham uliq Sekem-ub Hamor atatniz gigo hib mani silva negad gigo og asor zayta nab in hodhodab giyay toniyta ham.

¹⁷ Giyay tonan ulig kabemmo le tihiqyan teq abeb God in Abraham asesan og negnan hel diqmo bilamta na akaman tugwahtiqlan tonyaq ham. Gwahtignan tonsa Jekob abaqaqniz na Isip-ub osad in qwabiyyayad on mataw kabemmo diq tiquy yaqay ham. ¹⁸ Sa kam nab mat araq gwahtiqlan Isip gigo king iyim os ham. Mat na in Josep ago a hi huritad in abin a hi wazinyaqta ham. ¹⁹ In i gisesan gikat negad gimeqin tonyaqta ham. Gimeqin tonad in gibe yahsa in gigo onmin ginen mutur giqemsamo in giwaqeq asanib giqemid useq tumoq yaqayta ham.

²⁰ Sa kam nab Moses anen in ago amun Moses tiqam ham. Eman God amun na ahol waqad ame bilaq naqmo hiqiyaq ham. Sa Moses anen amam in bitabmo amun alowan tonad ossa le kalam ezeqmanmo tihiqiy ham. ²¹ Hiqiyian in amun waqim asanib eman ussa Fero amiy in amun na warinim inrmo ago amun nog alowan titonyaq ham. ²² Sa Moses ayah iyim in Isip gigo ginad dimunta na bunmo asuleqin waqim in ago gamuk teq in ago kabiq bunmo azawayin inaq tiquy ham.

²³ Ad abeb in ago ulig 40 nazaq tiquyan in leheq amaqbaban Isrel gibiygo haqad anad tiqam ham. ²⁴ Anad emim in lehim luwsa Isip mat araq eraqim anadibmo Isrel mat araq meqin tonsa in tigibiy ham. Isip mat na in mat ago zaway haiqta na meqin tonsa Moses gibiyadmo in lehim ayow ago zaway haiqta na ulumsihad in aqenin waqim Isip mat na wol eman tumom ham. ²⁵ Moqan Moses anad am, Muran ya imaqbaban ya inan ginad em daqay, God in Moses abenab i tigilumsihaq haq daqay haqad in anad am ham. Teq haiq ham. In ginad a hi emiy ham.

²⁶ Ari Moses usim ta tiquim in lehim Isrel mataw giger an wolsa gibiyad in gigerab tilom ham. Loqim in giger na ginobun wastitayid in an a ta hi wolgo haqad gibilenim bilam, Mataw ham ne maqbab haqad in bilam ham. Nagaqgo ne kazaq an meqin tonay? haqad in bilam ham.

²⁷ Haqan giger na gigo araq in daq na anamren iytta na in Moses ulum hasan lehan bulon, Nog bilaqan ni i gigo maror iyim ni i gigo daq ulum kemaq? haqad in bilam ham. ²⁸ Irimo ni Isip mat na wol eman momta nazaqmo ni ya inol emdaqmo ye? haqad in bilam ham. ²⁹ In nazaq bilaqanmo Moses tituk ham. In tukim lehim Midiya gigo ogib begbeg iyim osyaq ham. Osad teq in aw waqim in ago onmin matmatta giger inaq tiquy ham.

³⁰ An ulig 40 nazaq le tihiqyan teq Moses le og araq amatawun haiqta garah Sainay agerab usaqta nab luwsa angelo araq in ameb tugwahtim ham. Angelo na faq ay amikta oysa in faq na ameb gwahtiqlan tur ham. ³¹ Sa Moses faq na ahol waqad anad nad diq emyaq ham. Ad in anononmo ahol waqgo haqad ay agerab loqanmo Iyatha kazaq tubulon ham. ³² Ya ni nisenan Abraham teq Aisak teq Jekob gigo God haqad in bilam ham. Haqan Moses abensen harara nemsa in ahol waqnan rabyaq ham. ³³ Sa Iyatha bulon, Og kawa ni turaqta ka in tawon diqta haqad in bilam ham. Nazaq iyan ni nisenab nisendugan na haseq tur haqad in bilam ham. ³⁴ Ad teq in bilam, Isip-ub og anamreniz in yaqgo on mataw afaqan kabemmo negsa ya daq na bunmo tigibiy bug haqad in bilam ham. Yaqgo on mataw gaqsa ya huritim muran ya in gilumsiheq giholib afaqan na walemgo haqad tigewoy haqad in bilam ham. Nazaq iyan ni eraqeq bo leh haqad in bilam ham. Ya ni Isip-ub niqemid lehnar haqad in bilam ham.

³⁵ Ari kwaziqmo Isrel mataw giger na in Moses baymuzim buloniy, Nog bilaqan ni i gigo maror iyim ni i gigo daq ulum kemaq? haqad in buloniy ham. Ta teq mat baymuzyita naqmo in ay amikta agerab

tursa angelo gwahtiqa bulonan in God ago on mataw gigo maror iyeq gilumsi-heq gigo bab gibenab giwaqnana haqad lahta ham. ³⁶ Lehim in Isrel on mataw giwaqim qiqad le Isip hulosim tugwah-tiqy ham. Mat na in Isip-ub daq azawayin inaqta kabemmo giqamta ham. Teq in lehim yuw akurorganta anan Kamis Kakaqta haqayta na agerab daq azawayin inaqta asor giqammo ham. Teq Isrel in og amatawun haiqtab ulig 40 nazaq luw ossa nab Moses daq azawayin inaqta kabemmo tigiqemyaqmo ham. ³⁷ Mat naqmo Isrel gibilenim bilam,

God teq ne gilikmanib ne gimaqbab araq emid gwahtiqa in ago nantut ya nogmo iyeq osdaq haqad in bilam ham.

Lo 18.15

³⁸ Mat Isrel on mataw nenaq og amatawun haiqtab osta na Moses-mo ham. Mat naqmo in gisesan nenaq osta ham. Garah anan Sainay haqayta nab angelo in Moses-mo gamuk bulonta ham. Mat God ago gamuk dimunta mataw giqeman kayeqmo kuluwa-kuluwmo osayta na waqim i iga na Moses-mo ham.

³⁹ Ta teq i gisesan na in Moses aqez huritnun gituw hiqiyiham. Gituw hiqiyisa in Moses aqez otherasid in Isip-ub muleqeq ta lehnanaq emiy ham. ⁴⁰ Ginad emad in Aron buloniy, Ni i giyon god asor giqem ig haqiy ham. Id teq god nagan danmeh lehad in i giwamuzeq qiqad leh daqay haqiy ham. Na ezaqgo mat i giwaqim qiqad Isip hulosim bolta na in nabagag lehim ezaqag titon haqiy ham. ⁴¹ Haqad kam nab in bulmakau amidon araq adulan emim teq in anognib karuw araq anat urotim faqab wizim in ayon tamaz em ugij ham. Ad in god katiyta in gibenab emiyta na ahol waqad in ginad tidimniya yaqay ham. ⁴² Nazaq iyan God in gileh negad gihulosan in nagah amo amo kaitab usayta na giyon lotu tiqem yaqay ham. God ago nantut gamuk mar toniyta nazaqmo diq in em yaqay ham. Gamuk na bilam,

Ne Isrel-ib mataw ham kwaziqmo ne og amatawun haiqtab ulig 40 nazaq osiyta haqad in bilam ham. Osad ne bulmakau teq sipsip ginat urotim faqab giwiz yaqayta haqad in bilam ham. Na ne yaqmen tamaz em yagnan haqad ne nazaq em yaqay ye? haqad in bilam ham. Haiqgam haqad in bilam ham.

⁴³ Ne ya gileh yagad ne god katiyta Molek ago lotu abitan emim teq ne ulig anan Refan haqayta na adulan emiy ham. Emim ne nagah giger na wazim saw haresmo ne luw yaqayta nab ne sorad a luw yaqay haqad in bilam ham. Ne god katiyta naqmo

giyon tamaz em negnan haqad ne in gidulan emiya haqad in bilam ham. Nazaq iyan ya ne gigo ogib gimuzid ne pesanmo saw Babiloniya-ib le tuqos daqay haqad in bilam ham.

Amos 5.25-27

⁴⁴ Kwaziqmo God in Moses bit araq adulan ishunim bulon, Ni yaqmen bit araq kazaqta waz yag haqad in bulon ham. Haqan i gisesan og amatawun haiqtab luw osad kam nab in Tempel karuwsanibta na tiqemiy ham, God Moses bulonta nazaq ham. In bit na emim ahol waqad ginad em yaqay, Muran God i inaq tuqosauq haq yaqay ham.

⁴⁵ Ari abeb i gisesan in Josuwa inaq og kawa i osauqta ka anamreniz gimuzeq gigo og waqnan haqad tuboliy ham. Bolan God i gisesan gimeb mataw nagan gimuzan lehsa gigo og ka in waqim i gisesan tinag ham. Kam nab i gisesan lotu abitan karuwsanibta na og kab a bolim in duq tonan tursa le Devit ago kamubmo tiqy ham. ⁴⁶ An God agem dimunta Devit usga Devit loyinad in God bulonim bilam, Ni ya ises Jekob ago God haqad in bilam ham. Ni ya inan ninad dimniya teq ya ninyon bit diq araq em niqiq haqad in bilam ham.

⁴⁷ Teq haiq ham. Devit in mat bab emad mataw kabemmo ginol amta iyim in bit na a hi am ham. Devit atatin Solomon teq in God ayon bit diq na tiqamta ham.

⁴⁸ Ta teq God Ulilib Diqta na in bit mataw gibenab emiyta nab a hi osaqua ham, God ago nantut bilamta nazaq ham. In bilam,

⁴⁹ Yaqmo Iyatha ya kazaq bilaqaiq haqad in bilam ham. Ya Heven-ib yaqgo ban tawontab osad nagah bunmo giwamuzaqta haqad in bilam ham. Teq og ka in ya isen abanan iysa ya isen emim osaqa haqad in bilam ham. Nazaq iyan bit ezaqta ne yaqmen em daqay? haqad in bilam ham. Teq ogib saw araq ayahta ya woqequeq usad inamur emdaiqta na edowa? haqad in bilam ham. ⁵⁰ Yaqmo ibenab nagah kagan bunmo a hi gigepta ye? haqad in bilam ham. *Aisaya 66.1-2*

⁵¹ Ne mataw gifaqin atoran diqta ham. Ne gigem soqotim ussa gideksan nan a hi huritaqta ham. Tutimmo ne God ago Bugaw Dimunta baymuzayta ham. Ne gisesan gisen muzinad in daq emiyta nazaq ne emaymo ham. ⁵² Kwaziqmo ne gisesan God ago nantut bunmo afaqan negad gimeqin ton yaqayta ham. Sa nantut na asor in mat titnonta teq boldaqta na agamukan bilaqsa ne gisesan na in ginol em yaqayta ham. An muran mat titnonta na gwahtiqa ne waqim bab gibenab eman in tuwol emiy ham. Na in bilaqne negmo gibenab wol emiyta nog tiqiy ham. ⁵³ Ne God ago maror

Moses bilamta na angelo gibenab waqiyta teq ne maror na wazinad a hi muzinayta ham.

Mataw gigib Stiven wol eman mom

⁵⁴ Ari mataw aseseqta na in Stiven ago gamuk huritsa gamuk na giqitul tuqulum. Uluman in gite guruwad Stiven anan gigem diq timeeqni yaqay. ⁵⁵ Sa God ago Bugaw Dimunta Stiven aholib ayahmo bolan in ame Heven-ib gwalehim turad in God ahol anuwan oysa ahol waqad teq in Jesus God aben aqabun ban eraqim tursa ahol tuwammo. ⁵⁶ Ahol waqad in bilam, Ne ahol waqy ham. Kait misireq nog iyim aqez hassa ya Mat Atatin God aben aqabun ban kowa tursa ahol tuwaqaiq ham.

⁵⁷ Haqanmo hajiq mataw na dedibmo ek tonad gideksan ituqad in garabmo eraqim sibim le Stiven tuwaziy. ⁵⁸ Wazim in othishasim ad uliq asan ban lehim in amalib gig tuhuneg yaqay. Sa mataw iturimmo Stiven amalib nan emiya nagan in daq na anamreniz iyim iyan in gigo giholsihen hasim mat minminta araq anan Sol haqayta anognib humab tuwoliy. ⁵⁹ Humab wolum teq in gigibmo Stiven tuwolsa Stiven bilam, Iyahta Jesus ham ni ya iwitan waq ham. ⁶⁰ Haqad in abakkalan ulum laquwim turad in dedibmo lilay, Iyahta ham ni mataw ka gigo daq meqinta ka walemad anadin ta hi em ham. Haqadmo in tumom.

8

¹ An mataw Stiven wol eman momta na in mat araq anan Sol haqayta na anadib dimun diqmo iy.

Sol in Jesus ago on matawta na gimeqin tonyad

Ari Stiven momta kam nab Yesus ago on mataw uliq Jerusalem-ub osiyta na gigo hib bab meqin diqta tugwahtim. Gwahtiqaq in bunmo haresmo tukim saw giger Judiya teq Samariya gigo saw ban le tuqosiy. Ari Aposel teq in uliq Jerusalem-ub os tutad a hi tukiy.

² Teq Stiven moqan mataw asor God anadin diq emayta na in Stiven asan waqim a le tiyay toniy. Yay tonim in ginad meqniysi gaq ayah waziy.

³ Sa Sol in Yesus ago on matawta na atoranmo tigimeqin tonyaq. Ad in bit bitmo luwad aduganib gwahtiqaq in mataw on inaqmo giwazeq gihureqeq giqad le bit giqirquran osayta nab tigiqeymaq.

Aposel Yesus ago gamuk saw

Judiya-ib teq saw Samariya-ib a lehiy

Aposel asor saw Samariya-ib Yesus awagamun dimunta bilaqy

⁴ Ari afaqan nazaq gwahtiqa Yesus ago on mataw saw haresmo tukim le osad in Yesus awagamun dimunta on mataw tigibilen yaqay. ⁵ Sa Filip eraqim saw Samariya gigo uliq araqab wolehim in mataw na gibileneq bilaqyaq, Yesus in Krais haqyaq. ⁶ Haqsa on mataw uliq nabta na in ago gamuk huritad teq in daq azawayin inaqla emsa ahol waqad in bunmo araqibmo gidek tih nemeq ago gamuk tuhurit naqmo hijiq yaqay. ⁷ Na ezaqgo in gigo on mataw kabemmo giholib bugaw meqinta usiyta na in on mataw na gihuloseq gwahtiqaq in ek toneq tileh yaqay. Sa mataw kabemmo gibensen tumomta teq gisen meqinta nagan in gihol tidimniy yaqay. ⁸ Nazaq iyan uliq nab on mataw ginad ayahmo diq dimnni yaqay.

⁹ Ari uliq nab mat araq anan Saimon haqayta in os. Kwaziqmo in liqiy emad bar hares meqinta giwazyaqta. In nazaq emsa saw Samariya-ib on mataw bunmo gihol riten lamsa in ginadnad diq em yaqay. Sa mat na inmo ahol abin iluwad bilqyaq, Ya asittaqmo haqyaq. ¹⁰ Haqsa on mataw bunmo gibilettaq teq gibin hajita inaqmo in Saimon ago gamuk tuhurit naqmo hijiq yaqayta. Ad in mat na anan bilaq yaqay, God ago zaway ayahta na in aholib usaqta haq yaqay. ¹¹ Saimon ame kabemmo daq lul araq diqta giqemsa iyan mataw ahol waqad gihol riten lamsa in ago gamuk bunmo hurit yaqayta.

¹² Ari Filip bolim God ago maror agamukan dimunta bilaqad teq in Yesus Krais abin gibilensa kam nab on mataw na kabemmo gamuk na anan helmo haqsa Filip giqad le yuwub tigihuz nag. ¹³ Sa Saimon inaqmo helmo tihammo. Haqan Filip in huz ugan in Filip inaq soqoteq diq inaq tiluwyaq. Luwsa Filip daq azawayin inaqta amo amo giqemsa Saimon ahol waqad ahol turuh nemuyaq.

¹⁴ Ari Aposel Jerusalem-ub osiyta na in Samariya-ib on mataw God ago gamuk anan helmo haqiyta na gibin tuhuritiy. Hurit in Pita ayow Jon inaq giqeman Samariya gigo hib tuwolehiy. ¹⁵ Wolehim osad in Samariya-ib on mataw helmo haqiyta na gimen God tubulon yaqay, God in ago Bugaw Dimunta negdaq haqad.

¹⁶ Na ezaqgo on mataw na Iyahta Yesus abinib yuw huziyta teq God ago Bugaw Dimunta in gigo hib a hi bolyaqta na ago iyan. ¹⁷ Ari in giger God bulonim teq in on mataw na gifaqinib giben emsa in God ago Bugaw Dimunta tuwaq yaqay.

¹⁸⁻¹⁹ Teq Aposel giger na giben on mataw gifaqinib emsa in God ago Bugaw Dimunta waqsa Saimon tigibiy. Gibiyad teq in mani

waqim giger na gigo hib a bolim gibilan, Ne giger zaway na ya yag toniy ham. Yagid ya nazaqmo iben mat araq afaqinib emsa in God ago Bugaw Dimunta tuwaqdaqmo ham. ²⁰ Haqan Pita bulon, Ni ninad emaq, God ago naw in samanmo igaqta na ya mani-mo amalib tizaydaiq haqaq e? ham. Ni ninad nazaq emad ni ningi mani inaq garabmo tihiqyidaq ham. ²¹ I God ago kabiy emauqta ka aduganib ni a hi loqdaq ham. Haiq diqmo ham. Ni nigem God ameb dimun a hais ham. ²² Nazaq iyan ni nigem bulyeq ninad meqinta na gileh ug bug ham. Ad ni Iyahta bulon waq ham. Yowo ham. In ni nigemab ninad meqinta na walemdaq o haiq? ham. ²³ Ya nibiysa ni nigem meqniysa ninad meqinta na nihol bunmo wamuzsa ni daq araq dimunta a hi emaq ham. ²⁴ Haqan Saimon amenin emim bilam, Ne giger yaqmen Iyahta bulonsa in ya ilumsihan ham. Id teq daq nawa ne anan bilaqyata na in ya iholib hi gwahtiqaq ham.

²⁵ Ari Aposel giger na in Iyahta awagamun teq nagah bunmo Iyahta emsa in gimeb ahol waqiyta na atoranmo gibilenim hulosad in muleqim Jerusalem-ub tugwalehiy. Gwalehad in Samariya gigo uliq amikmikta nagab lehad in Jesus awagamun dimunta na gibilenim gibilenim tilehiy.

Filip in Itiyopiya-ib mat araq Yesus awagamun dimunta bulon

²⁶ Ari Iyahta ago angelo araq Filip bulon, Ni eraeq saw Saut bantab leh ham. Dan Jerusalem hulosad uliq Gaza ban wolehaqta naqmo ni muzeq leh ham. (Dan na saw amatawun haiqtab usaqta.) ²⁷ Angelo nazaq bilaqan Filip eraqim tilah. Lehad danibmo in Itiyopiya mat araq akayogin ayiyta* ahol tuwam. Mat na in Itiyopiya gigo aw marorta anan Kandasi haqiyata na ago mat ayahta araq iyim in maror awta na ago mani bunmo wamuzyaqta. Mat na uliq Jerusalem-ub God ayon lotu emnan bolta. ²⁸ Bolim in ago wilka-ib muleqim ta lehad teq in God ago nantut Aisaya gamuk mar tonta na ahol tuwaqyaq. ²⁹ Samo God ago Bugaw Dimunta in Filip bulorium bilam, Ni wilka agerab loqeq inaq leh ham. ³⁰ Haqan Filip sibim agerab lehim in mat na Aisaya ago nan asor ahol waqad bilaqsa tuhurit. Huritadmo in bulon, Ni marib nawa gamuk ahol waqad bilaqyata na alulin asit ni towa hurit e? ham. ³¹ An mat na wilka wazim teq in Filip bulon, Mat araq gamuk ka alulin a hi ibilenid ya ezaq teq inad em hasdaiq? ham. Haqad in Filip bulon, Ni gvalid ya ninaq osuq ham.

* **8:27:** Mat ka in maror awta na ago bitabmo osad kabiy emdaqta iyan in akayogin ayiyta.

³² Ari mat na God ago marib gamuk ahol waqad bilamta na in kazaq.

Mataw sipsip wol emnan haqad wazim a bolayta nazaqmo in mat na wazim a boliy ham. Teq mataw sipsip amidon wazim ahulgeng urotsa in a hi gayon-agaq nazaqmo mat na ate akim a hi ek ton ham.

³³ Mataw daq titontab mat na ago hazizir a hi emiyta ham. In mat na mebay ugad bayan diq wom ham. Ezaq teq mataw in mat na asesan ginulin daqay? ham. In amun a hi emsamol wol eman moqim in og kab ahol amagin titartay ham. *Aisaya 53.7-8*

³⁴ Ari mat na in Filip bulon, Ya susumun nigaiq ham. God ago nantut nog anan bilaqad gamuk ka am? ham. Inno ahol anan bilam o haiq in mat ta araq anan bilamta? ham. ³⁵ Haqan Filip in God ago mar asitmo ahol wamta naqmo amalib gamuk alulin emim in Yesus awagamun tubulon bug.

³⁶ Ad teq giger na lehad luwimmo in yuw araqab tugwaliq. Gwahtiqaqmo mat na in Filip bulon, Ahol waq ham. Yuw kowa usaq ham. Naga diq ya idanin qwaysa ni ya a hi huz yagdaq? ham. [³⁷ An Filip bilam, Ni nigemabmo diq helmo haqeq teq ni tuhuzdaq ham. Haqan mat na amenin emim bilam, Ya helmo diq haqaq ham. Yesus Krais in God atatin ham.]

³⁸ Haqadmo in bilaqan wilka tuwasih. An Filip in mat na inaq yuwub hitiqim in mat na tuhuz ug. ³⁹ Huz ugim teq in giger yuw hulosad dubub tugwaliy. Gwalim tursa nan saw haiq Iyahta ago Bugaw in Filip waqim ad saw araqab tilah. Lehan mat ayahta na in Filip ahol a ta hi wagyaq. Admo in anad dimniysa tilah.

⁴⁰ Ari Filip ame rireqim in anad tiqam, Ka ya uliq Asdot-ibmo tubol ham. Haqadmo in eraqim lehad saw nab uliq bunmo in on mataw Yesus awagamun dimunta gibilenim gibilenim tilehyaq. Lehad luwim abeb in le uliq Sisariya-ib tugwahitim.

9

Sol anad bulyim Yesus anan helmo ham

¹ Ari kam nab Sol agem meqniysa tibilaqyaq, On mataw Yesus anan Iyahta haqiyata na giwazeq ginol emid moq bugiy haqiyaq. Haqad in tamaz mat danmepta na ago hib tilah. ² Lehim bulunan mat ayahta na in sansandek asor mar tonim tuqug. Sol sansandek na giwazeq a leheq uliq Damaskus-ib mataw aseseqta Juda gigo bit humab wolayta giwamuzim osayta na amulik-mulikmo tindegdaq haqad. Teq

sansandek nab in bilaqiy, Sol i gibileb luwaq haqiy. Mat aw nog dante muturta na muzinsa Sol in gibiyeq giwazeq giqirqureq giqad Jerusalem-ub tuboldaq haqiy. Mataw on inaqmo in tigiwazdaqtahaqiy.

³ An Sol sansandek na wazim uliq Damaskus-ib tilah. In lehad luwim sinsin tiqiyasamo Heven-ib faq anuwan hikliyanim tiqim Sol amalib tuwol huram. ⁴ Samo Sol ogib woqim usad in mat araq aqez kazaq bulonsa tuhurit. Sol, Sol ham. Nagaqgo ni ya imeqin tonaq? ham. ⁵ Haqan Sol bilam, Iyahta ham ni nog? ham. Haqan in bilam, Mat ni meqin tonaqta naqmo ham. Ya Yesus-mo ham. ⁶ Ari ni eraqeqlar uliq kob le gwahtiq ham. Gwahtiqid mat araq teq ni ezaq tondaqta na ago tinibilendaq ham. ⁷ Haqsa mataw Sol inaq bolitya na gigez hiqiyimmo nab turiy. Turad in mat aqez huritiya teq in mat na anon ahol a hi waqiy.

⁸ Sa Sol ogib usim eraqim turad in ame rireqim saw ahol waqad teq ame aromriq inaq iyyaq. Nazaq iyan mataw in abenab wazim ad le uliq Damaskus-ib tugwahtiqiy. ⁹ Gwahtiqan Sol kam ezeqmanmo ame hiqiyim os. Osad in yuw didaq haiqmo osyaq.

¹⁰ Ari Juda mat araq disaipel iytan anan Ananayas haqayta na in uliq Damaskus-ib os. Osad in nagah araq sen qwayim ahol waqayta nazaq nogta ahol waqsa Iyahta in ameb gwahtiqim anan biyim bilam, Ananayas ham. Haqan Ananayas bilam, Iyahta ham ya kawa osaig ham. ¹¹ An Iyahta bulon, Ni eraqeqlar dan anan Titnonta haqayta nab ni leh ham. Leheq Judas ago bitab ni mat araq uliq Tarsus-ibta anan Sol haqayta na anan susumun ham. In nauva God inaq gamuk emad osaq ham. ¹² Mat na sen qwayim in mat araq anan Ananayas haqayta bo gwahtiqim aben giger aholib emim wazsa in ame hastitayta na ahol tuwam ham.

¹³ Haqan ta Ananayas amenin emim bilam, Iyahta ham mat na in ningon mataw tawonta uliq Jerusalem-ub osayta na gigo hib daq hihiq emad ayahmo gimeqin tonta ham. Mataw kabemmo nazaq bilaqsa ya huritiya ham. ¹⁴ Ad in mataw tamaz emayta gigo aseseqta na gigo hib zawayay ayahmo waqim in uliq kab on mataw ni nihagenib iyim ninan biyayta na giqirquanan haqad bolta ham. ¹⁵ Haqan haiq. Iyahta kazaq bulon, Ni leh ham. Ya mat na ulumim waqan in yaqgo kabibiya mat tiqiy ham. In leheq on mataw en ta asor Juda a haiqta nagan teq maror aseseqta teq Isrel on mataw inaqmo gigo hib in ya inan tigibilendaq ham. ¹⁶ Teq in ya ibinib yaqgo kabibiya emsa mataw santitiy

teq afaqan kabemmo ug daqayta na ago ya tiqishundaiq ham.

¹⁷ Ari Ananayas eraqim tilah. Lehim bit aduganib gwahtiqim in Sol aholib aben emim wazad bulon, Imaqbab Sol ham, ni danib bolsa Iyahta Yesus ningi hib gwah-timta naqmo in ya iqeman bol ham. Ni nime hastitayid saw ahol waqsa teq God ago Bugaw Dimunta ni niholib ayahmo boldaq haqad in ya iqeman ya kawa tubol ham. ¹⁸ Haqanmo naqagag nabiq atiblalan nogta Sol ame isihim usta na muruwoqim tihitim. Hitiqanmo in ame anuwan tiqiyan in saw ahol tuwaqyaq. Ad in eraqim yuwub lehan Ananayas tuhuz ug. ¹⁹ Huz ugan abeb Sol didaq waqim neqad in ahol awaz ta meqniy.

Sol uliq Damaskus-ib Yesus awagamun mataw gibilan

Ari Sol kam asor disaipel nenaq uliq Damaskus-ib tuqos. ²⁰ Osad in Juda gigo bit humab wolaytab leheq Yesus awagamun tigibilenyaq. In bilaqyaq, Yesus in God atatin haqyaq. ²¹ Haqsa mataw Sol ago gamuk huritiya na bunmo gihol turuh nemsa bilaq yaqay, Mat ko uliq Jerusalem-ub on mataw Yesus anan helmo haqayta na gimeqin diq tonad luwyatqa haq yaqay. Ad in nazaqmo tonim in i gigo on mataw Yesus anan helmo haqayta na giqirqureq giqad mataw tamaz emayta gigo aseseqta na gimeb gwahtiqgo haqad in uliq kab boltamo haq yaqay. ²² Teq haiq. Sol ago zaway ayah digmo iysa in bilaqyaq, Mat i gilumsiheq ta giwaqdaqta amatin i anan Krais haqaupta na in Yesus-mo haqyaq. Haqsa uliq Damaskus-ib Juda mataw na in Sol ago gamuk amenin eman yo hiqiy yaqay. Sa Sol anad em hasad gamuk bilaqsa Juda mataw na in ago gamuk bayid woqgo ginadnad diq em yaqay.

Juda mataw Sol wol emgo bilaqsa in tuk

²³ Ari kam kabemmo le tihiqiyana Juda mataw asor humab wolim osad in Sol wol emid moqgo an amugan tuwaziy. ²⁴ An amugan wazan teq in gigo gamuk na Sol adekib tuwom. Sa Juda mataw na zeqab taromab inaqmo uliq adekib gel ayah nenanta turaqta na ago dan ez bunmo baynetim tur yaqay, Sol bo asanib gwah-tiqsa i wazeq wol emid tumoqdaq haqad. ²⁵ Sa tarom araqab Sol ago disaipel in Sol waqim ad gel abigimanib gwalehim teq in bulonan in kuram araq ayahta aduganib wo ossa in ago disaipel am emim siney tonim sorim hulosan kiskismo wolehanmo Sol uliq asan ban ogib hitiqim tituk.

Sol uliq Jerusalem-ub os

²⁶ Abeb Sol le Jerusalem-ub tugwahtiqim osad in disaipel uliq nabta na nenaq wa-stoneq osgo emsa teq haiq. Disaipel bunmo in Sol disaipel ihta na anan helmo a hi haqqad in Sol tirabun yaqay. ²⁷ Rabunsa mat anan Barnabas haqayta na in Sol waqim ad Aposel gigo hib tilah. A lehim in Sol danib Iyatha ahol waqan Iyatha gamuk ugta na awagamun bunmo tigibilan bug. Teq Sol uliq Damaskus-ib Yesus ananib gamuk atoranmo bilaqyaqta na ago in gibilanmo. ²⁸ Nazaq iyan Sol in Jesus ago on mataw na nenaq osad in anadibmo uliq Jerusalem aduganib leh bolad tiluwyaq. Luwad in a hi rabad in Iyatha abin bilaqgo awaz diq timeqniyyaq. ²⁹ Teq in Juda mataw Grik nan bilaqayta nagan nenaq nan bilaqad in nenaq an mugyaq. An mugsa mataw na in Sol wol emid moggo adanteqin tina-gun yaqay. ³⁰ Nagunsa Sol ayogniz in nagah na ago tuhuritim in Sol waqim ad uliq Sisariya-ib tuwolehiy. Wolehim in Sol eman uliq Tarsus-ib tilah.

³¹ Kam nab saw Judiya-ib teq saw Galiliy-ib teq saw Samariya-ib on mataw Yesus ago nan huriyatna in kam dimunta waqim anonommo tuqos yaqay. Ossa bab araq in gigo hib a hi gwahtiqa in giwaz timeqniyy yaqay. Giwaz meqniysa in Iyatha abin wazinad anad muz bugsa God ago Bugaw Dimunta in gigem zaway tinegyaq. Sa on mataw kabemmo bo in giduganib tugwah-tiq yaqay.

Pita in Ainiyas dimun ton

³² Ari Pita uliq saw bunmo gigo hib lehad luwim in le uliq araq anan Lida haqaytab tugwahtim. Gwahtiqa in God ago on mataw tawonta na nenaq tuqosyaq. ³³ Osad uliq nab in mat araq anan Ainiyas haqayta ahol tuwam. Mat na abensem aditin bunmo mogan in ulig 8 nazaqmo banab usta. ³⁴ Ari Pita in mat na ahol waqad tubulon, Ainiyas ham muran Yesus Krais niqeman nihol tidimniyyaq ham. Ni eraqeñ ningo us ban wastitay ham. Haqanmo mat na hidmo tiqeram. ³⁵ An on mataw uliq Lida-ibta na teq uliq Saron-ibta na bunmo in Ainiyas ahol waqad in ginad buliyad Iyatha anan helmo tihaq yaqay.

Pita in Tabita wazan ta eram

³⁶ Ari uliq Jopa-ib aw araq anan Tabita haqayta in osyaq. Aw na in Yesus ago disaipel araq. Teq Grik nanib in anan Dorkas haqayta. In daq dimdimunta kabemmo emad teq in sirisirimo on mataw ginaghan haiqta nagan gilumsihyaqta. ³⁷ Kam nab in moq waqimmo tumom. Moqan mataw in asan suholim a le bit adugan araq ulilibtab tiqemiy. ³⁸ Teq uliq Lida na in Jopa agerab sinsin usaqta. Nazaq iyan disaipel Jopabta na in Pita uliq Lida-ib osaqla na abin

huritim in mataw giger giqeman Pita ago hib lehim in kazaq buloni, Ni hidmo i gigo hib bol haqiy. ³⁹ Haqan Pita eraqim mataw giger na nenaq tilah. In le uliq Jopa-ib tugwahtiqanmo mataw in waqim inaq bit adugan ulilibtab aw asan usaqta nab tugwalehiy. Gwalehan on waburta nagan in Pita agerab gaq wazad tur yaqay. Turad in tubusan amo amo Dorkas in ne-naq osad gimen giqamta na in waq a bo Pita tiqisihun yaqay. ⁴⁰ Sa teq Pita on mataw bunmo gimuzan asanib tilehsa in abakbakan ulum laquwim turad God inaq gamuk tiqam. Gamuk emim hulosad in eraqim aw na asan nob ugim turad tubulon, Tabita ham ni eraq ham. Haqanmo aw na ame rireqim Pita ahol waqad in eraqim tuqos. ⁴¹ Ossa Pita aw na abenab wazim wazan in eraqim titur. Tursa Pita in God ago on mataw tawonta na gigo on waburta nenaq gililewunan bolan in gibilan, Ne giyow kaiyek tiqiyim kawa turaqta ka ne ahol waqiy ham.

⁴² An uliq Jopa-ib on mataw bunmo daq na awagamun tuhuritiy. Huritim kabemmo in Iyatha anan helmo tihaqiy. ⁴³ Sa Pita kam asor uliq Jopa-ib mat araq inaq tuqos. Mat na in bulmakau asan waqim wastitayaqta anan Saimon haqayta na ago bitab in inaq osyaqta.

10

Angelo araq gwahtiqa Korniliyus gamuk bulon

¹ Ari mat araq anan Korniliyus haqayta in uliq Sisariya-ib osyaq. In mataw bab emayta gidauhan araq 100 nazaq gigo danmebla. Mat na ago bab mataw dauh biyatha na nenaq in gigo kantri Italiy hulosim bolim uliq Sisariya-ib os yaqayta. ² Teq mat na God diq anadin emad ahaqenib osyaqta. Ad in asenlul nenaq bunmo God abin wazinad ahaqenib os yaqaytamo. Mat na Isrel on mataw ginaghan haiqta na gilumsihad nagah kabemmo negyaqta. Ad tuteqmo in God inaq gamuk emyaqta.

³ Ari kam araqab 3 kilok imisor nazaq tiqiyen Korniliyus in nagah araq sen qwayim ahol waqayta nazaq nogta ahol wam. Ahol waqsa God ago angelo araq ulalabmo agerab boladmo in Korniliyus anan biyim bulon, Korniliyus ham. ⁴ Haqan Korniliyus atoranmo angelo na ahol waqad in ahol rab naqmo diq hiqiysa bilam, Mat ayah ham, ezaq? ham.

Haqan angelo bulon, Ni tutimmo God bulonaqta na teq ni on mataw ginaghan haiqta gilumsihad nagah negaqla na in bilagne faqasin ahuran dimunta nog iyim gwalehim God amotgub tuwom ham.

Woqsa God ni ninadin emad nob tinigaq ham. ⁵⁻⁶ Muran ni mataw asor giqemid uliq Jopa-ib leheq mat araq anan Saimon haqayta naguniy ham. Mat na anan araq Pita haqayta ham. In mat ta araq anan Saimon haqayta mat bulmakau asan wastitayaqta na ago bitab osaq ham. Teq in ago bit na kamis agerab lan ezab turaqta ham. Ninga mataw le mat na ahol waqad teq in buloneq inaq ta boliy ham.

⁷ Ari angelo nazaq bilaqadmo tilah. Lehsa Korniliyus ago kabibiy mataw giger gililewunan boliy. Bolsa in ago bab mataw asor in ago bitab kabiy emayta na gilikmanib araq God diq anadin emaqta na inaqmo bulonan in kabibiy mataw giger na nenaq tuboliymo. ⁸ Bolan Korniliyus aholib daq gwahtimta na awagamun bunmo anononmo gibilenim giqeman in uliq Jopa-ib tilehiy.

Pita nagah araq sen qwayim ahol waqayta nazaq nogta ahol wam

⁹ Mataw ezeqman na lehad luwim in tarom amulikmo danib usim teq in lehim uliq Jopa sinsinmo tuquqiy. Sinsin ugsamo Pita bitab osim zeq ayahatab 12 kilok nazaq in God inaq gamuk emnan haqad bit ahuqunib ban osnanta nab tugwahal. ¹⁰ Gwalehim osad agem moqsa in didaq neqnan anad tiqemyaq. Sa mataw teqmo didaq oysa Pita nab osad in nagah araq sen qwayim ahol waqayta nazaq nogta in ahol tuwam. ¹¹ Ahol waqsa kait misireq nog iyim aqez hasanmo naqagag tubusan ayahta nog ulilib usim gewoqyaq. Tubusan na ago abeqil aweweinqo am emim teq hulossa hulossa ogib gewoqsa in ahol waqyaq. ¹² Sa tubusan na aduganib karuw aneq haiqta nag teq nagah ahulinaqtak gibanibmo luwayta na teq ah amo amo kaitab melayta na inaqmo giquisy. ¹³ Sa liley araq mat aqez nogta in Pita bulonim bilam, Pita ham ni eraqeqlaruw na gihunogeq neq ham. ¹⁴ Haqan Pita bilam, Iyahta ham hikidik ham! Ya karuw gineq haiqta gihol abusirinan inaqtag nag a hikidik neqaqta ham. ¹⁵ Haqan mat aqez na ame gigerta kazaq bilam, Nagah God suholan abusirinan hiqiyta na ni anan abusirinan inaq nazaq ni hi bilaq ham. ¹⁶ Mat aqez na ame ezeqmanmo nazaq Pita bulonsa Pita ame ezeqmanmo amenin nazaqmo bilam. Bilaqim tihiqiytan tubusan na akaruwun inaq hidmo kaitab ta gwalah.

¹⁷ Gwalehan Pita anadnad emad bilam, Ya nagah sen qway nog iyim ahol wayta na alulin ezaq diq? ham. In nazaq anadnad emad ossamo Korniliyus mataw giqeman boliyta na in bo uliq nab tugwahitiqy. Gwahtiqim in Saimon ago bit anan susumunim susumunim bolim in bit na ago

dan ezab tituriy. ¹⁸ Turad in lileyim bilaqiy, Saimon nabag osaq e? haqiy. In anan araq Pita haqad biyata na haqiy.

¹⁹ Haqan Pita sen qway nog iyim nagaq ahol wamta na anadin emad os tutsa God ago Bugaw Dimunta bulon, Ni ko gibiy ham. Mataw ezeqman ni ninagunim tuboliy ham. ²⁰ Ni eraqeqlaruw ogib hitiqeq nenaq leh ham. Ni ninadnad hi em ham. Na yaqmo giqeman boliyta ham.

²¹ An Pita mataw na gigerab hitiqim gibilan, Mat ne nagunayta na yaqmo kawa ham. Ne ezaq haqad boliy? ham.

²² Haqan in bilaqiy, Mat araq anan Korniliyus haqayta i giqeman bol haqiy. Mat na in bab mataw gidauhan 100 nazaq gigo danmepta haqiy. In mat dimunta teq in God abin wazinad ahaqenib osaqta haqiy. Sa Juda on mataw bunmo in anan mat dimunta haqayta haqiy. God ago angelo tawonta araq Korniliyus bulonim bilam, Ni Pita bulon boleg in gamuk asor nibilenan haqan i ni nibilened ni lehgo haqad i bol haqiy. ²³ In nazaq haqan Pita gibilenan in bit aduganib tugwahitiqy. Gwahtiqan Pita ban negan tarom nab in tuqusiy. Usim sawti hastitayan in eraqim Pita waqim inaq tilehiy. Lehsa Yesus ago mataw uliq Jopa-ib osiyya na asor in nenaq tilehiyomo.

Pita Korniliyus ago bitab lah

²⁴ In lehim tarom amulikmo danib usim teq in le uliq Sisariya-ib tugwahitiqy. Sa Korniliyus tekomo asenlul teq ayogniz dimdimunta gililewunan in bo humab tulowim teq in Pita-nen gimen emim osiy.

²⁵ Ossa Pita bolim bit aduganib tugwahitiqsmo Korniliyus era le dan ezabmo Pita anognib ahol hulosan woqim usad in Pita abin soran tugwalyaq. ²⁶ Sa Pita hidmo Korniliyus wazan eraqan in bulon, Ni eraq ham. Ya mat ni nogtamo ham. ²⁷ Haqan in eraqim Pita inaq gamuk emim emim lo bit aduganib tugwahitiqy. Gwahtiqim Pita on mataw kabemmo humab wolim ossa tigibiy. ²⁸ Gibiyad in gibilan, Ne i Juda gigo maror tuhurit kemiya ham. I gigo gunun awaz meqinta usaq ham. Juda mat in mataw en ta asor Juda a haiqta nagan nenaq yow a hikidik emdaqta ham. Teq in mataw na gigo bitab le a hi gwahitiqdaqtamo ham. Ta teq God kazaq ya tiqiqishun ham. Ya mat araq anan meqin ago busirin inaqta nazaq ya a hi bilaqdaiq ham. ²⁹ Nazaq iyan ni yaqmen nan eman ya a hi otheras ham. Ya ne giqez huritimmo tubol ham. Ari muran ya ne tisusumun negaiq ham. Nagaqgo ne ya ililewuniy? ham.

³⁰ Haqan Korniliyus bilam, Daq araq ya iholib gwahtimta na muran ago kam aweweqlaruw ogib hitiqeq nenaq ham. Na in kazaq ham. Ya

igo bitab osim 3 kilok imisor nazaq ya God bulonad os ham. Kam kazaq diqtat ham. Ya God bulonad ossa mat araq ago tubusan hikiliyanaqta ya inognib gwahtiqa tur ham. ³¹ Turad in bilam, Kornilius ham, God ningam gamuk tuhurit haqad in bilam ham. Ad ni mataw ginaghan haiqta gilumsihad nagah neqaga na in anadin emaqmo haqad in bilam ham. ³² Nazaq iyan ni mataw gigemid uliq Jopa-ib leheq Saimon bulonid in ningi hib bolan haqad in bilam ham. Mat na anan araq Pita haqayta haqad in bilam ham. In Saimon ta araq bulmakau asan wastitayaqta na ago bitab osaq haqad in bilam ham. Bit na kamis agerab lan ezab turaqta haqad in bilam ham. ³³ Nazaq iyan hid naqmo ya mataw asor gigeman ningi hib tilehiy ham. Lehan dimun diq ni kawa tubol ham. Ari muran Iyahta gamuk nigta na ni bilaqsa i bunmo huritanim haqad bolim kawa God ameb tuqosauq ham.

³⁴ Haqan Pita gamuk alulin emim bilam, Hel diqtaqmo ham. Kwaziqmo ya inad emyaiq, God in Juda mataw giminomo ginnadin emaqta haqyaiq ham. Ari muran ya inad tigem ham. God in mataw en amulikmo gigo a hi lehaqta ham. ³⁵ Mataw en bunmo gigo hib mat aw nog in God abin wazinad daq titnonta emsa God in ginan anad bilaqacta ham. ³⁶ God in ago gamuk eman Isrel gigo hib bolta na ne tuhurity ham. Gamuk na bilam, Jesus Krais in on mataw bunmo gigo Iyahta haqad in bilam ham. Inmo i gimen dante wastitayan muran i God inaq gigem amulikmo iyeq tuqosam haqad in bilam ham. ³⁷ Teq Jon saw Galiliy-ib mataw gihu neggo gibilenyaqta nab daq ayah diqta gwahitiqim le saw Judiya-ib uliq bunmo waq bugta na ago ne tuhuritymo ham. ³⁸ Na in kazaq ham. God in ago Bugaw Dimunta teq in ago zaway ayahmo Jesus uliq Nasaretibta na ugtu ham. Ugan Jesus uliq-uliqgo luwad in on mataw gidimun tonad teq in mataw Satan gigeman meqin os yaqayta nagan gilumsihad giwastitayqa ham. Na ezaqgo God in inaq osyaqta ham. ³⁹ In Juda gigo og saw bunmo teq uliq ayahta Jerusalem-ub daq giqanta nagan bunmo i gimeb ahol waq bugim i awagamun bilaqauqta ham. Mataw in mat na ayib dom wolim wol eman momta ham. ⁴⁰ Ta teq kam ezeqmanta nab God wazan ta eraqan in ahol alulin tuqlul ton ham. ⁴¹ Teq in Juda mataw bunmo gigo hib Jesus a hi ulal ton ham. Haiqgam ham. God kwaziqmo i mataw asormo gitowun emim giwaqan i in ago gamuk bilaqgo osta naqmo gigo hib in Jesus ulal ton ham. An Jesus hodhod hulosim eraqan teq igmo in inaq garab didaq neqad yuw uluwta ham. ⁴² Teq inmo gamuk awaz meqinta amalib kabiy igad

gibilenan i on mataw bunmo gidek wazad kazaq atoranmo gibilenauqta ham. God in Yesus-mo atowun eman in teq boleq on mataw tumoqiyta teq a hi moqayta inaqmo gigo hazizir tiqemdaq haqauqta ham. ⁴³ God ago nantut bunmo Yesus-mo anan bilaqiyta ham. In bilaqiy, Mat aw nog in anan helmo haqayta na bunmo God in gigo daq meqinta mat na abinib tigiwalem bugdaq haqad in bilaqiy ham.

Kornilius ago mataw nenaq God ago Bugaw Dimunta waqy

⁴⁴ Ari Pita gamuk nazaq bilaqad tur-samo God ago Bugaw Dimunta in mataw gamuk huritad osiyta na gimalib tigehitim. ⁴⁵⁻⁴⁶ Gehitigan uliq amo amo gigo nan gihadib bolsa in amalib God abin tiqiluw yaqay. Sa Juda mataw gihol abatan asan tuqurotim teq Yesus anan helmo haqiyta na asor in Pita inaq bolim nab turiyta. Turad in daq na ahol waqad gihol riten lamsa bilaqiy, God in ago Bugaw Dimunta on mataw en ta asor Juda a haiqta nagan inaqmo tineqaqmo haqiy. ⁴⁷ An Pita bilam, Nog bilaqid teq i mataw ka giqad yuwub leheq a hi gihuz neg nag? ham. In God ago Bugaw Dimunta i waq nogmo in tuwaqymo ham. ⁴⁸ Haqad in Kornilius ago mataw nenaq gibilan, Ne Yesus Krais abinib yuw tuhuz daqay ham. Haqan abeb mataw na Pita bulonim bilaqiy, I ginad i kam asor ni ninaq a ta osam haqiy.

11

Pita uliq Jerusalem-ub lehim Kornilius ago walmataw nenaq gigo hib daq gwahitimta na awagamun bilam

¹ Ari Aposel teq Yesus ago on mataw saw Judiya-ib osiyta na bunmo in on mataw en ta asor Juda a haiqta nagan gigo asor God ago gamuk huritum anan helmo haqiyta na giben tuhurity. ² An abeb Pita Jerusalem-ub gabolan God ago mataw asor gihol abatan asan urotgo giwaz meqniyatna in Pita tuwadiy. ³ Wadad in buloni, Naqaggo ni mataw gisan a hi urotayta na gigo bitab lehim nenaq didaq nam? haqiy.

⁴⁻⁵ Haqan Pita eraqim in aholib daq gwahitimta na awagamun wastitaymmo kazaq gibilan, Ya uliq Jopa-ib God bulonad os ham. Osad ya nagah araq sen qwayim ahol waqayta nazaq nogta ahol way ham. Naqagag na in bilaqne tubusan araq ayahta kaitab usim tiqsa ya ahol way ham. Sa tubusan na ago abeqil awewe-qmo giwazim teq hulossa hulossa yaqgo hib gewoqyaq ham. ⁶ Ya nagah nagan ahol waq kemgo haqad ya ime tubusan na aduganib woqyaq ham. Ime woqsa ya og kab karuw gihurorayta amo amo teq karuw kwasikta amo amo teq nagah

ahulinaqta amo amo teq ah hares kaitab melayta amo amo nagan ya tigibiy ham.

⁷ Ya nagah nagan gibiysa mat araq aqez ibilensa ya hurit ham. In bilam, Pita ham ni eraeq karuw ko gihunogeq neq haqad in bilam ham. ⁸ Haqan ya bilay, Iyahta hay ya nazaq a hi emdaiq hay ham. Ya karuw gineq haitga gihol abusirinan inaqtag na ya a hikidik neqaqta hay ham. ⁹ Anmo mat aqez Heven-ib bolta na in ame gigerta ya ibilan, Nagah God suholan abusirinan hiqiyya na ni anan meqin nazaq ni hi bilaq haqad in bilam ham. ¹⁰ Ari mat aqez na nazaq diq ame ezeqmanno ibilenanmo nagah tubusan nogta na akaruwun inaqmo muleqim kaitab ta gwalah ham.

¹¹ Gwalehsa mataw ezeqman bolim i bit osta nab tugwahtiqiy ham. Na uliq Sisariya-ib mat ayahta araq in mataw na giqem yanqgo hib bolitya ham. ¹² Bolan God ago Bugaw Dimunta ya ibilenim bilam, Ni mataw amota na gileh hi negad nenaq leh haqad in bilam ham. Haqan ya imaqbab ⁶ ka nenaq i mat ayahta na ago bitab lehim aduganib tugwahtiw ham. ¹³ Gwahiqan mat na i gibilenim bilam, Ya angelo araq yanqgo bit aduganib tursa ahol way haqad in bilam ham. Ahol waqsa angelo na bilam ham, Ni mataw giqemid Jopap-ib leheq Saimon anan araq Pita haqayta na bulonid bolan ham haqad in bilam ham. ¹⁴ In teq gamuk asor tinibilendaqta ham haqad in bilam ham. Sa God in gamuk na amalib ni teq ningo mataw ni nenaq bitab osayta na gilumsiheq tigiwaqdaq ham haqad in bilam ham.

¹⁵ In nazaq bilaqan ya era gamuk alulin tiqemim bilaqsamo God ago Bugaw Dimunta in mat na ayogniz nenaq gimalib tigewom ham. Bilaqne iturimmo in i giholib gewomta nazaq nogmo diq ham. ¹⁶ Anmo ta ya Iyahta ago gamuk na anadin tiqem ham. In bilam, Jon yuw diqmo amalib on mataw gihuq nagta haqad in bilam ham. Ari ne teq God in ago Bugaw Dimunta amalib tuhuz negdaq haqad in bilam ham. ¹⁷ Nazaq iyan mataw na in Iyahta Jesus Krais anan helmo haqan God ago Bugaw Dimunta i iga nazaqmo in mataw na tinagmo ham. Negan ta ya ibin ezaqta iyim ya God adanin qwaydaiq ham.

¹⁸ Pita nazaq bilaqan mataw in wadiyta na amenin emgo gamuk haiq tiqiyi. Ad in ginad buliyim God abin iluwad bilaqiy, Nazaq iyan God in on mataw en ta asor Juda a haitga nagan ginad eman buliyan in gigo daq meqinta gileh ugim in os kayeqmo kuluwa-kuluwmo osayta na giholyon tuwaqymo haqiy.

On mataw asor uliq Antiyok-ibta na in

Krais anan helmo haqan mataw in ginan Kristen haqiy

¹⁹ Ari Stiven wol eman momta nab afaqan ayahta Yesus ago on mataw gigo hib tugwahtim. Gwahtiqa on mataw Yesus anan helmo haqayta na in tukim on mataw en ta asor gigo saw haresmo lehad in saw Fonisiya-ib teq nud Saiprus-ib teq uliq Antiyok-ib tilehiy. Lehim in God ago gamuk dimunta Grik mataw saw nagab osiyta na a hi gibilen yaqay. Haiqqam. In Juda on mataw gimomo gamuk na gibilen yaqay. ²⁰ Ta teq mataw na gilikmanib asor nud Saiprus-ibta na teq uliq Sairin-ibta na in le uliq Antiyok-ib gamuk tibilaq yaqay. Bilaqad in Grik on mataw nenaqmo Iyahta Yesus awagamun dimunta na tigibilen yaqay. ²¹ Sa Iyahta ago zaway in gigo hib ussa iyan Grik on mataw na kabemmo helmo haqad in ginad gigem bulyim Iyahta ago hib tisoqotiy.

²² Ari Yesus ago on mataw Jerusalem ub osiyta na in nagah na ago agamukan huritim in Barnabas eman Antiyok-ib tilah.

²³ Lehim in God agem dimunta mataw na negsa gibiyad in anad diq dimniy. Anad dimniya in on mataw na bunmo giwaz meqniyeq tuteqmo Iyahta tumuzin daqay haqad in ginad wazan tiqeraqyaq. ²⁴ Barnabas in mat dimunta. Teq God ago Bugaw Dimunta in aholib ayahmo ussa in anad helmo haqatqa na awaz meqniyeq usyaqmo. Teq kam nab on mataw dauh biyahmo in Iyahta ago hib tubol yaqay.

²⁵ Sa Barnabas in Sol nagunim uliq Tarsus-ib tilah. ²⁶ Lehim in Sol ahol tuwaqim in waqim inaq Antiyok-ib ta boliy. Bolim ulig amulikmo in giger uliq nab Yesus ago on mataw na nenaq tuqosiy. Osad in on mataw kabemmo God ago gamuk gibilenad teq in gamuk na asuleqin tineg yaqay. Sa uliq Antiyok-ib nab mataw in gime ameb diqta Yesus ago disaipel ginan Kristen haqad biyyi.

²⁷ Ari kam nab God ago nantut asor Jerusalem hulosim Antiyok-ib tigewoqiy.

²⁸ Gewoqim in gigo araq anan Agabas haqayta na eraqim gilikmanib turad God ago Bugaw Dimunta anad ugsa in zarow araq ayahta abeb teq og saw bunmo gwahitiqdaqta na ago tibilam. Bilaqan abeb Rom gigo king anan Klodius haqayta na gwahiqan ago kamub zarow ayahta na gwahitimta. ²⁹ Nazaq iyan disaipel Antiyok-ibta na ginad tiqemiy, I bunmo gigo mani asor tuqurotam haqiy. Nog in anaghan kabemnota na in mani ayah nog eman haqiy. Sa nog in anaghan asitmota na in mani asitmota eman haqiy. Emeq teq i mani na emid i gimaqbaban saw Judiya-ib osayta nagan gigo hib leheq gilumsihan haqiy. ³⁰ Haqad in nazaq tiqemim teq in

Barnabas ayow Sol inaq giceman in mani na waqim ad saw Judiya-ib Yesus ago on mataw gigo aseseqta na gigo hib tilehiy.

12

Herot in Jems wol eman moqan teq in Pita irqr

¹ Kam nab King Herot in Yesus ago on matawtu na gigo asor gimeqin tonnan haqad in giwazim tigiqirquryaq. ² Ad in Jon abab Jems wazim baqirib wol eman tumom. ³ In Jems wol eman moqan Juda mataw ginad diq bilaqsa iyan in Pita wazim tiqirqurmo, Juda on mataw ya inan ginad ayahmo dimniydaq haqad. Teq in Juda gigo lotu akaman ayahta bret yis haiqmo neqayta na akamniib daq na amta. ⁴ In Pita wazim eman mataw bab emayta aweweinqmo gibenab lehan in bit giqirquran osaytab tuwamuz yaqay. Bab mataw aweweinq na gigo kam hiqiyid mataw muturta aweweinqmo boleq gigo ban waq yaqay. Teq bab mataw gidauhan aweweinqmo in nazaq an ulumsiheq zeqab taromab inaqmo in Pita wamuz yaqayta. Herot anad emyaq. Bret yis haiqmo neqayta akaman ka tihiqiyid teq ya Pita wazeq on mataw gimeb a leheq wol emid tumoqdaq haqayq. ⁵ Nazaq iyan Pita bit giqirquran osayta nab ossa bab mataw na tuwamuz yaqay. Sa tuteqmo Yesus ago on mataw in ginad awaz meqin amalib Pita amen God tubulon yaqay, God teq Pita ulumsihdaq haqad.

Angelo araq bolim Pita aqamun hasan in asanib le gwahtim

⁶ Ari Herot in Pita ad hazizirib gwahtiqgo akaman tugwahtiqnan tonsa tarom nabmo Pita sen giger amalib irquran bab mataw giger gilikmanib tuqus. Ussa bab mataw ta asor na in dan ez baynetim wamuzim turiyomo. ⁷ Ari Pita ussa Iyahta ago angelo araq bo gwahtiqanmo bit adugan in usta na anuwan tigiy. Sa angelo na in Pita azawarnib wolim enqenunan eraqan in bulon, Ni hidmo eraq ham. Haqanmo sen abenab am wazan usta na milhesim ogib tuwom. ⁸ Wogonmo angelo na Pita bulon, Nihol wastitayeq nisendugan waqeq em ham. Haqan Pita nazaq tonan angelo bulon, Ning niholsihen emeq ya imuzeq bol ham. ⁹ Haqan Pita bit adugan na hulosim angelo na muzim inaq tilah. Lehad in anad emyaq, Kaqmo ya sen qwayim nagah ahol waqayta nazaq nogmo ya angelo ka ahol waqaiq haqayq. In angelo daq hel diqta emaqta nazaq in anad a hi emyaq. ¹⁰ Ad in angelo muzim inaq lehad in bab mataw Pita wamuzim osiyta na giquriyamim le bab mataw bit aqez wamuzim turayta na tigiquriyamimo. Giquriyamim asanib

gwahtiqim in le bit na agelin ago dan ez ain-ibta uliq ban usaqta nab tugwahtiqiy. Gwahtiqanmo dan ez na anadibmo tihas. Hasan giger na asan ban gwahtiqim dan araq muzim tilehiy. Lehad hid naqmo angelo na Pita hulosadmo tilah.

¹¹ Lehsa teq Pita anad tihastitayan in bilan, Muran ya inad tiqem hasaq ham. Iyahtaqmo in ago angelo araq eman yaqgo hib bol ham. Bolim in Herot abenab ya tiquwalam ham. Ad in nagah bunmo Juda mataw ya iholib emnan haqad ginad emiya na in adanin tuqway bug ham.

¹² Pita nagah na anadin tiqemim teq in Jon anen Mariya ago bitab tilah. Jon na anan araq Mak haqayta. Teq kam nab mataw kabemmo bit nab humab wolim God bulonad osiy. ¹³ Ossa Pita bit nab lehim asanib dan ez wol hamad tursa kabibiy aw araq anan Roda haqayta in dan hasgo haqad tubol. ¹⁴ Bolim Pita aziyan tuhurit hasim in anad diq dimniysa dan a ta hi has ug. In bit adugan ban sibim ta lehim mataw na gibilan, Pita kowa dan ezab turaq ham. ¹⁵ Haqan mataw na buloniy, Ni agadan iyaq haqiy. Teq aw na awaz diq meqniyad pilayqaq, Haiqgam haqayq. Hel diqfaqmo in asanib turaq haqayq. Haqsa mataw na bilaqiy, Na in ago angelo bo turaq daqagya haqiy.

¹⁶ Samo Pita dan ez wolhamad tur tutyaq. Tursa mataw na le dan hasim Pita ahol waqad in gihol turuh nam. ¹⁷ Sa Pita kabiyakibmo gibilan, Ne giquez hiqiyiy ham. An in giquez hiqiyan Iyatha in Pita waqim a bo asanib gwahtimta na awagamun in tigibilan. Ad in bilam, Ne Jems teq i gimaqbaban bunmo nagah ka ago gibileniy ham. Haqad in gihulosad bit ta araqab tilah.

¹⁸ Ari tarommo saw tihastitayan bab mataw na le Pita asawan tuwaqad in gihol riten lamsa bilaq yaqay, Pita ezaq tilah? haq yaqay. ¹⁹ Haqsa Herot huritim in mataw gibilenan Pita tinagun yaqay. Teq haiq in ahol a hi waqy. Nazaq iyan Herot in bab mataw Pita wamuzim turiyta na hazizirib gicemim susumun kabemmo negsa in amenin araq dimunta a hi emsa Herot in ginol emid moqgo tibilam. Ad abeb in saw Judiya hulosim uliq Sisariyab wolehim tuqos.

Herot mom

²⁰ Ari abeb Herot in uliq giger Tair teq Saidon gigo on mataw ginan agem timeqniyyaq. Agem meqniysa uliq giger na in garabmo an wastonim in Herot anobun wastitaynan haqad ago hib tuboliy. Na ezaqgo mataw na in Herot ago ogib didaq zay yaqayta na ago iyan. Teq mataw na Herot ago hib a hi bolad iturimmo in le Balastus

mat king ago bit wamuzaqta amatin na inaq nan na tuwastitayi.

²¹ Wastitayan abeb Herot in mataw kam nagta nab in ago es balaw dimdimun diqta na giqemim teq in ago ban in mataw gigo gamuk huritad ulum kemaqta nab in os woqim osad in mataw na gamuk tigibilenyaq. ²² Gibilensa on mataw na Herot soysoy ugad in lileyeq bilaq yaqay, Ka mat aqez nog i a hi huritaq haq yaqay. Ka god araq aqez i hurit nog iyauq haq yaqay. ²³ Haqsa Herot in on mataw giqez na huritad in ta God abin iluwgo anad a hi am. Nazaq iyan hid naqmo Iyahta ago angelo lehim Herot wolan moq meqinta aholib gwalan kadum amikmiktag agembekoq mugtitaysa in tumom.

²⁴ Teq Iyahta ago gamuk na ayah iysa on mataw og saw kabemmo huritad anan helmo tihaq yaqay.

²⁵ Ari Barnabas ayow Sol inaq gigo kabiy uliq Jerusalem-ub tihiqiyán in giger muleqim Antiyok-ib ta boliy. Bolad teq in Jon, anan araq Mak haqayta na, waqim inaq bolimyo.

Pol in Yesus ago gamuk a le og saw kabemmo bilam

13

Yesus ago on mataw Barnabas ayow Sol inaq giqeman in Yesus ago kabiy emnan lehiy

¹ Ari uliq Antiyok-ib Yesus ago on matawta na gilikmanib nantut teq tisa asor osiy. Mataw na ginan kazaq: Barnabas teq Saimon anan araq Niger* haqayta na teq Lusiyus uliq Sairin-ibta na teq Manayen in King Herot ayowta iyim luwta na teq Sol-mo. ² Sa kam araqab Yesus ago on matawta na in didaq udinim osad Iyahta abin iluwsa God ago Bugaw Dimunta gibilenim bilam, Ne Barnabas ayow Sol inaq ya yagiy ham. Yagid teq in yaqgo kabiy em daqay haqad ya gililewunta nab in lehiy ham. ³ Haqan on mataw na didaq udinad God inaq gamuk tiqemim teq in giger na giholib giben emim giwazad teq in giqeman tilehiy.

Barnabas ayow Sol inaq nud Saiprus-ib Yesus awagamun dimunta bilaqiy

⁴ Ari God ago Bugaw Dimunta in giger na giqeman lehad teq in uliq Selusiya-ib tuwolehiy. Wolehim in muyib gwalan muy giqad nud Saiprus-ib tilah. ⁵ Lehan in nud na ago lan ez uliq Salamis-ib zeq gwalaqta ban usaqta nab tugwahtiqiy. Gwahtiqim in le Juda gigo bit humab wolayta nab mataw

God ago gamuk tigibilen yaqay. Sa Jon Mak in giger na nenaq gilumsihgo turyaq.

⁶ In ezeqman nud Saiprus ago saw bunmo luw bugiy. Luwad in le uliq Pafos-ib zeq wolehaqta ban tugwahtiqiy. Gwahtiqim uliq nab in mat araq liqiy emad bar amo amo emaqta amatin anan Barjisas haqayta ahol tuwaqiy. Mat na in Juda mat araq God abinib nantut katiya bilaqyaqta.

⁷ Teq in gavman ameba anan Sergiyus Polus haqayta na inaq osyaqta. Sergiyus Polus in mat anad inaqta. Teq in God ago gamuk huritnan haqad in Barnabas ayow Sol inaq gibilenan agerab boliy. ⁸ Ari mat liqiy emad bar haresmo emaqta na anan araq Grik nanib in Elimas haqayta. Teq Barnabas ayow Sol inaq bolim Sergiyus Polus gamuk bulonsa Elimas in gigo gamuk na bayan woqyaq, luweq gavman ameba na in gigo gamuk anan helmo haqdaq haqad. ⁹⁻¹⁰ In nazaq emsa Sol, in anan araq Pol haqayta na, in God ago Bugaw Dimunta ago zaway aholib ayah diqmo loyinad in Elimas ahol waninunadmo tubulon, Satan atatin ham ni daq dimunta ababun ham. Daq katiya bunmo teq daq meqinta bunmo ni niholib oy soqotim giqusaqta ham. Tutimmo ni Iyahta ago dan titnonta na eman kok tonaq ham. Teq ni daq na a hi hulosdaq e? ham. ¹¹ Ari ni hurit ham. Muran Iyahta aben ninolid ni nime tihiqidaq ham. Nime hiqiyid kam sisaqmo ni zeq ahol a hi waqadmo tuqosdaq ham.

Pol nazaq haqanmo hidmo nagah araq bilaqne onqas aromriqnaq nogta hitiqim Elimas ame tigil ton. Il tonan in mat araq aben wazeq bulonid dan isihungo haqad saw tihiknagunyaq. ¹² Sa gavman ameba na in Iyahta ago gamuk huritim ahol turuh nemsia teq in nagah Elimas aholib gwah-timta na ahol waqad in Iyahta ago gamuk anan helmo tiham.

Pol ayow Barnabas inaq le uliq Antiyok saw Pisidiya-ibtab kabiy emiy

¹³ Ari Pol ayogniz nenaq uliq Pafos hulosim muyib gwalan muy giqad uliq Perga saw Pamfiliya-ib tilah. Lehan teq Jon uliq nab gihulosad in muleqim Jerusalem-ub ta lah. ¹⁴ Lehsa Pol ayow Barnabas inaq in uliq Perga hulosim le uliq Antiyok saw Pisidiya-ibtab tugwahtiqiy. Gwahtiqim osad Juda gigo lotu akannib in le Juda gigo bit humab wolaytab gwahtiqim banab tuqos woqiy. ¹⁵ Os woqim ossa mataw God ago maror Moses mar tonta na agamukan asor bilaqim teq in God ago nantut gigo mar agamukan asor tibilaqymo. Bilaqim tihiqiyán teq bit humab wolayta na ago mataw danmehta nagan in Pol-nen ban tinieggi. Negad in bilaqiy, I gimaqbaban

* **13:1:** Rom gigo nanib Niger ka alulin in 'Dubta' haqayta.

haqiy ne gigo gamukag on mataw ka gigem zaway uggo ussun teq ne boleq gibileniy haqiy.

¹⁶ Haqan Pol eraqim turad in abenabmo giqez hiziqygo gibilenim teq in bilam, Ne Isrel mataw ham teq ne mataw dauh ta asor God abin wazinad ahaqenib osayta ham ne gidek emiy ham. ¹⁷ Isrel gigo God in kwaziqmo i gisesan gilumim aholyon giwamta ham. Giwaqim giqeman in Isip-ub begbeg iyim ossa God giqeman in dauh biyahta tiqiyiy ham. Iyan teq God inmo ago zawayib i gisesan giqeman in Isip hulosim tugwahtiqa ham. ¹⁸ Gwahtiqim in og amatawun haiqta nab ulig 40 nazaq luwad daq hihiq emsa God in gigo afaqan sorad atuw a hi hiciyyaq ham. ¹⁹ Ad abeb in saw Kenan-ib on mataw dauh 7 nazaq gimeqin tonim teq in mataw na gigo og waqim i gisesan negan og na in gimo gigo tiqiyta ham. ²⁰ I gisesan Isip-ub wolehim osad teq in Isip hulosim bolim God abenab og waqiyta nab ulig 450 nazaq tihiqy ham. An abeb God in mataw marorta i gisesan giwamuzeq os daqayta na tinag ham. Negan mataw marorta na in i gisesan giwamuzad giqad bolim bo God ago nantut Samuel ago kamubmo tiqiyiy ham.

²¹ Kam nabi i gisesan in king waqgo haqad God tubulony ham. Bulonan God in i gises Bensamin anaynayin araq Kis atatin Sol na waqim tinag ham. Negan Sol ulig 40 nazaq king iyim osta ham. ²² Ossa teq God Sol muzad Devit ban ugan in i gisesan gigo king iyim tuqos ham. Sa God in anan kazaq bilam ham. Ya Jesi atatin Devit ahol waqsa ya inad usaqta nazaq nogmo in anad usaq haqad in bilam ham. Nazaq iyan in ya inad bunmo tumuzin bugdaq haqad in bilam ham. ²³ Ari God in mat naqmo asenlulib mat araq i gilumsiheq ta giwaqdaqta na eman Isrel gilikmanib tugwahtim, kwaziqmo in i gisesan hel diqmo gibilanta nazaq ham. Mat na anan Jesus-mo ham.

²⁴ Teq in a hi bolsamo Jon gwahtiqim Isrel on mataw ginad buliyeq gigo daq meqinti gileh ugeq yuwub hugzo haqad tigibilyeq ham. ²⁵ Ad in ago kabiy emid hiqiyinan tonsa in kazaq bilayqaq ham. Nabag ne ginad emay, Mat boldaqta na yaqmo haqay haqyaq ham. Ya mat ne amen emaya na a hais haqyaq ham. Teq ne huriyi haqyaq ham. Mat araq nawa ya ibeb bolaqta na abin ya ibin uriyamta haqyaq ham. Ya in ahaqenibta haqyaq ham. In yaqgo Iyahta haqyaq ham. Ya in ago kabibiy mat samanta haqyaq ham.

²⁶ Ari ne mataw Abraham asenlulibta ham, teq ne mataw dauh ta asor God abin wazinad ahaqenib osayta ham, ne bunmo ya imaqbaban iyim ne yaqgo gamuk ka

hurit kemyi ham. God in mataw gilumiheq ban dimuntab giqemgo adanteqin tuwastitay ham. Wastitayan nagah na agamukan in i bunmo gimen kawa tubol ham.

²⁷ Mataw Jerusalem-ub osayta na gigo aseseqta nenaq in Jesus ago a hi hurit kemyi ham. Ad in God ago nantut gigo gamuk mataw tutimmo lotu akamni bilaqayta na huritim ginad a hi em hasiymo ham. Nazaq iyan in Jesus hazizirib emim wol emgo bilaqy ham. Ta teq in gigo daq naqmo in nantut gigo gamuk na wol net bugta ham.

²⁸ Mataw aseseqta na in Jesus ago daq araq meqinta ahol a hi waqad in samanta wol emid moqgo haqad Pailat buloniy ham.

²⁹ In nazaq emad in nantut gigo gamuk mar tonan usta na bunmo muzinim tiqem bugiy ham. Em bugim tihiqiy in Jesus asan ayib walemim a le hodhodab tiyay toniy ham. ³⁰ Yay tonan teq God in hodhodab wazan ta eram ham. ³¹ Eraqim in le mataw in nenaq Galiliy hulosim Jerusalem-ub bolitya na gigo hib tugwahtim ham. Gwahtiqim in kam kabemmo nenaq tuqos ham. An muran mataw naqmo in Jesus awagamun on mataw tigibilenay ham.

³² Kwaziqmo God i gisesan gidimun tonan hel diqmo gibilanta ham. An muran i gamuk araq dimun diqta kazaq ne gimen a bol ham. ³³ God i gisesan gibilanta na tuwol net bugim in mataw na gigo onmin kawa i osauqta kaqmo in ago amun tiqig ham. In nazaq emnan haqad Jesus wazan hodhodab eram ham. Buk Song-ib bar gigerta nab gamuk nazaqmo mar tonan usaqta ham. Gamuk nab God bilam, Ni ya atatin haqad in bilam ham. Muran ya ni tiniqulal tonaiq haqad in bilam ham.

Buk Song 2.7

³⁴ God in Jesus waz eraqid in asan hodhodab usad a hi lilihdaqta na ago in kwaziqmo bilamta ham. In bilam,

Teq yaqgo nagah tawon diqta ya tinegdaiq haqad in bilam ham. Hel diqtaqmo ham. Kwaziqmo ya Devit asesan gidimun tongo bilayta nazaqmo diq ya tiqem negdaiq haqad in bilam ham.

Aisaya 55.3

³⁵ Nazaq iyan Buk Song-ib gamuk ta araqab in kazaq bilammo ham.

Ni ningo mat tawonta na hulosid in asan hodhodab usad a hi lilihdaq haqad in bilam ham.

Buk Song 16.10

³⁶ Ari Devit in ago on mataw gilikmanib gwahtiqim osad in God anad muz bugad osim tumom ham. Moqan mataw sorim a le asesan gigerab tiyay toniy ham. Yay tonan in asan tilih ham. ³⁷ Teq God mat wazan hodhodab eramat amatin na a hi liliham. ³⁸⁻³⁹ Nazaq iyan ya imaqbaban ham, ya Iyahta ago gamuk kazaq diq tigibilennan ham. Ne mat moqim ta eramta

na anan helmo haqid teq God ne gigo daq meqinta walemad anadin a ta hi emdaq ham. God ago maror Moses bilamta na in ne gigo daq meqinta a hi walemad in ne giqeman ne God ameb mataw titnonta a hi iyayta ham. Ari muran on mataw Yesus anan helmo haqsa God in gigo daq meqinta na bunmo givalemad in ginan mataw titnonta haqaqta ham.⁴⁰ Nazaq iyan ne gihol waz naqmo hiqiyiy ham. Luweq God ago nantut kwaziqmo bilamta nazaq ne gigo hib tugwahtiqaq ham. Nantut na bilam,
⁴¹ Ne mataw ya ibilawunayta ham ya daq emsa ne ahol waqiy haqad in bilam ham. Ahol waqad ne ginadnad emad gihol riten lamsa ne moqiy haqad in bilam ham. Ya ne gigo kamub daq araq diq tigemaiq haqad in bilam ham. Emsa mat araq in daq na ago ne gibilenid ne anan helmo a hi haq daqayhaqad in bilam ham. *Habakuk 1.5*

⁴² Ari Pol ago gamuk tihiqiyian in ayow Barnabas inaq asanib le gwahtiqsa on mataw dedibmo kazaq gibilen yaqay, Lotu akaman araq kob teq ne giger gamuk na a i ta gibilen ton daqay haq yaqay. ⁴³ Sa humab na tihiqiyian mataw hares tiquysa Juda mataw kabemmo teq mataw en ta asor Juda a haiqta nagan gigo asor God diq anadin emad Juda gigo lotu adan muzin yaqayta na in Pol ayow Barnabas inaq gimuzim nenaq tilehiy. Lehsa Pol ayow Barnabas inaq in mataw na ginad wazan eraqsa gibilen yaqay, God agem dimunta tinegaaq haq yaqay. Negsa ne hulosad dante ta araq hi muziniy haq yaqay.

⁴⁴ Ari lotu akaman araq na tubolan on mataw uliq nabta na kuluw diqmo Iyahta ago gamuk huritnan haqad tuboliy. ⁴⁵ Sa Juda mataw ta asor in mataw kabemmo Pol ayow Barnabas inaq gigo gamuk huritnan bolsa gibiyad in giger na ginan gigem timeqniyyi. Gigem meqniysi in Pol ago gamuk walebolad teq in Pol tibilawun yaqay. ⁴⁶ Nazaq iyan Pol ayow Barnabas inaq in gamuk awaz meqinta kazaq gibileniy, Helmo haqiy, i God anad muzinim iturimmo i in ago gamuk ne Juda gigo hib bilawta haqiy. Teq ne gamuk na gileh tuqugum haqiy. Ne bilaqne negmo gihol tuquulum kemim bilaqay, I os kayeqmo kuluwa-kuluwmo osayta na waqgo i mataw dimun a haiq haq nog iyay haqiy. Nazaq iyan ne huritiy haqiy. Muran i ne gihuloseq mataw en ta asor Juda a haiqta nagan gigo hib tilehnhan haqiy. ⁴⁷ Na ezaqgo Iyahta in i kazaq gibilanta haqiy. Ni lam anuwan nog iyeq mataw en ta asor Juda a haiqta nagan yaqgo daq dimunta tigiqishundaq haqad in bilam haqiy. Ni og saw bunmo

leheq ya mataw gilumsihim gimen dante tuwastityata na agamukan ni tigibilendaq haqad in bilam haqiy. Kabiy naqmo ni emdaq haqad ya ni niqeman ni osaqla haqad in bilam haqiy.

Aisaya 49.6

⁴⁸ Ari on mataw en ta asor Juda a haiqta nagan in gamuk na huritnum gihad tidimniy naqmo hiqiy yaqay. Ad in Iyahta ago gamuk abin tiqiluw yaqaymo. Sa on mataw God in ago os kayeqmo kuluwakuluwmo osayta na negnan anad mebmebmo tiqamta na bunmo in God ago gamuk anan helmo tihaqiy.

⁴⁹ Sa Iyahta ago gamuk saw na tuwaleq ton bug. ⁵⁰ Ta teq uliq nab Juda mataw asor eraqim in on aseseqta God diq anadin emad Juda gigo lotu adan muzin yaqayta nagan teq mataw marorta asor nenaq gigem wazan eraqsa on mataw aseseqta na in Pol ayow Barnabas inaq ginan gigem meqniysi tigimeqin ton yaqay. Gimeqin tonad in gigo uliqab tigmuziy. ⁵¹ Nazaq iyan Pol ayow Barnabas inaq in gisenab og usta na wol lilaman ogib tuwom, mataw na gigo daq meqinta ago mebay na in gimo giholib tuqusdaq haqad. Ad in mataw na gihulosim uliq Aikoniym-ub tilehiy. ⁵² Lehsa uliq Antiyok-ib on mataw disaipel iyiyya na ginad dimniysi gigem dimunta ossa God ago Bugaw Dimunta in giholib ayahmo diq usyaq.

14

Pol ayow Barnabas inaq uliq Aikoniym-ub kabi emiy

¹ Ari in giger uliq Aikoniym-ub lehim daq Antiyok-ib emiyta nazaqmo in emim in Juda gigo bit humab wolaytab le gwah-tiqim God ago gamuk on mataw tigibileniy. Gibilenad in gamuk wizwazimmo bilaqan on mataw dauh biyahmo Juda teq Grik inaqmo helmo tihaqiy. ² Teq Juda asor helmo a hi haqiyta na in eraqim on mataw en ta asor Juda a haiqta nagan gigem wazan eraqsa in on mataw Yesus anan helmo haqad maqbab iyim osiyya na ginan gigem timeqniyy yaqay. ³ Nazaq iysa iyan Pol ayow Barnabas inaq kam sisaqmo Aikoniym-ub tuqosiy. Ossa mataw gimeqin tonsa in a hi rab yaqay. In ginad em yaqay, Iyahta teq i tigilumsihdaq haq yaqay. Haqad in on mataw gibilenad in Iyahta agem dimunta on mataw negim gilumsihta na agamukan bilaqmo tibilaq yaqay. Sa Iyahta inmoo ago gamuk na ulumsihad in Pol ayow Barnabas inaq gibenab daq azawayin inaqla amo amo giqemyaq. ⁴ Sa teq on mataw uliq nabta na gihol huserim dauh giger tiqiyi. Iyim asor Juda nenaq iysa asor Aposel giger na nenaq tiqiyi.

⁵ Abeb Juda mataw na giyogniz mataw en ta asor Juda a haiqta na nenaq teq in gigo mataw aseseqta na nenaqmo wastonim in Pol ayow Barnabas inaq gimeqin tonad gimen gig hunegnan haqad an amugan tuwaziy. ⁶ Sa Pol ayow Barnabas inaq in mataw na ginad huritim in tukim saw Likoniya-ib tilehiy. Lehim in saw na ago uliq giger Listra teq Derbe haqayta na teq uliqben amikmikta nagab in tiluw os yaqay. ⁷ Luw osad in uliq nagab Yesus awagamun dimunta on mataw tigibilen yaqay.

Pol ayow Barnabas inaq uliq Listra-ib God ago gamuk bilaqiy

⁸ Ari uliq Listra-ib mat araq asen meqinta osyaq. Mat na anen agemab nazaqmo asen meqniyan hitiqim in asit a hiluwta. ⁹ Sa Pol gamuk bilaqsa mat na huritad os. Ossa Pol in ahol waninunad loyinan mat na anad in ahol teq dimniydaqta na ago in helmo tihamta. ¹⁰ Nazaq iyan Pol atoranmo bulon, Ni eraqeq tur ham. Haqan mat na hidmo eraqim turad in tiloq gelyaq.

¹¹ Pol daq na eman on mataw kabemmo anhol tuwaqiy. Ahol waqim in Likoniya gigo nanib lileyeq bilaq yaqay, I gigo god giger mataw diq gisan waqim i gigerab tigehtiqiy haq yaqay. ¹² Haqad in Barnabas anan Zeus haqiy. Ad Pol in mat gamukta iyan in anan Hermes haqiy. ¹³ Ari mataw na gigo god Zeus ago lotu abitan uliq na agerab turta. Sa bit na ago mat tamaz emaqta na in bulmakau matmatta teq balaw dimdimunta giwaqim uliq na ago dan ezab tubol, in ago on mataw nenaq giger na gimen tamaz emnan haqad.

¹⁴⁻¹⁵ Sa Aposel giger Barnabas ayow Pol inaq daq na ago huritim in ginad meqniysa gigo tubusan wazim tubulsireqiy. Bulsireqim in sibim on mataw na giduganib lehim in lileyim bilaqiy, Mataw haqiy doq tonnan ne kazaq emay? haqiy. I giger mataw diq ne nogmo haqiy. I God ago gamuk dimunta ne gibilenauqta haqiy. Ne daq samanta ka gileh ugad gihol buliyeq God kayeqmo osaqta na agerab leh daqay haqad i gibilenann bolta haqiy. God naqmo in kait teq og teq kamis teq saw nagab nagah bunmo usayta inaqmo in giqamta haqiy. ¹⁶ Helmo haqiy, kwaziqmo in on mataw en bunmo gihulosan in ginadibmo luw os yaqayta haqiy. ¹⁷ Ta teq in ne gimeb a hi uilem hasta haqiy. Haiq haqiy. In ne gidimum tonad kaitab urom eman woq negaqta haqiy. Ad in ne gigo kabiyab didaq dimunta eman gwalaqta haqiy. In nazaq ne gitonsa didaq dimunta teq ginad dimniy ne guyuninsa ne ginad gigem dimniysa osayta haqiy. ¹⁸ In giger gamuk nazaq gibileniyta teq on mataw biyatha na

in tamaz emnan ginad usta na hidmo a hi hulosiy. Sa Pol ayow Barnabas inaq gime kabemmo gibilen teq in tuhulosiy.

Mataw Pol ayon gig hunegiy

¹⁹ Teq abeb Juda mataw asor uliq Antiyok-ibta teq uliq Aikoniyam-ubta na tuboliy. Bolim in on mataw Listra-ibta na ginad ta buliyiy. Ginad buliyan mataw na gigem meqniysa Pol gigibmo tuwoliy. Wolim bilaqiy, In tumom haqiy. Haqad in hureqim ad gel asan ban a le tuhunegiy.

²⁰ An disaipel uliq nabta na lehim Pol agerab bolim lilut ugim turiy. Tursa Pol eraqim uliq aduganib le a ta gwahtim. Gwahtiqim in le usim ta tiqim in Barnabas inaq uliq Derbe-ib tilehiy.

Pol ayow Barnabas inaq luwad in on mataw Yesus anan helmo haqayta na gigem zaway neg yaqay

²¹ In giger uliq Derbe-ib lehim Yesus awagamun dimunta on mataw tigibilen yaqay. Gibilenad in on mataw kabemmo giqeman Yesus ago disaipel ticiqiy. An abeb in giger muleqim uliq Listra-ib teq uliq Aikoniyam-ub teq uliq Antiyok-ib a ta lehiy. ²² Lehad uliq nagab in disaipel gigem zaway tineg yaqay. Zaway negad in gamuk atoranmo kazaq gibilen yaqay, Ne helmo haqad giwaz meqniyeq osiy haq yaqay. I afqaq kabemmo soreq teq i le God ago maror aduganib tugwahtiqama haq yaqay. ²³ Haqad uliq bunmo in lehiyta nab in Yesus ago on mataw gilikmanib mataw danmehta asor gitowun tiqem yaqay. Gitowun emim teq in didaq udinad God inaq gamuk bilaqim teq in disaipel na bunmo Iyahta abenab tigiqem yaqay, in Iyahta anan helmo haqan in tigiwamuzdaq haqad. Ad in nazaq emim emim tilehiy.

Pol ayow Barnabas inaq muleqim uliq Antiyok saw Siriya-ibtab ta lehiy

²⁴ Abeb in giger saw Pisidiya-ib gwahatiqim tilehiy. Lehim in saw na hulosim le saw Pamfiliya-ib tugwahtiqiy.

²⁵ Gwahtiqim in uliq Perga-ib lehim on mataw God ago gamuk dimunta tigibileniy. Gibilenim hulosad in uliq Ataliya-ib tuholehiy. ²⁶ Wolehim uliq nab in muyib gwanal muy giqad Antiyok-ib tilah. Kwaziqmo uliq nabmo Yesus ago on mataw in Pol ayow Barnabas inaq God abenab giqemiya, God agem dimunta negsa in leheq ago kabiy tiqem bug daqay haqad. Nazaq iyan in giger kabiy na tiqem bugim in muleqim uliq nab ta lehiy.

²⁷ In le uliq nab tugwahtiqim in Yesus ago on mataw na bunmo gihumab tuwoliy. Gihumab wolim in kabiy bunmo God inaq emiyya na awagamun tigibileniy. Gibilenad in bilaqiy, God in on mataw en ta asor

Juda a haiqta nagan giyon dan has negan in inaqmo Yesus anan helmo tihaqay haqiy. ²⁸ Ad in giger kam sisaqmo disaipel uliq nabta na nenaq tuqosiy.

15

Yesus ago on mataw humab araq ayahtha Jerusalem-ub emiy

¹ Ari mataw asor saw Judiya-ibta na in uliq Antiyok-ib gewoqim Yesus ago on mataw gibilenm bilaqiy, Ne God ago maror Moses bilamta na muzinad gihol abatan asan a hi urotid God ne giwaqeq ago os dimuntab a hi qigemdaq haqiy. ² Mataw na nazaq bilaqan Pol ayow Barnabas inaq huritim in ginad a hikidik dimniyyi. Ginad a hi dimniyya in mataw na nenaq an ayahmo tumugiy. Nazaq iyan Antiyok-ib mataw na bilaqiy, Pol ayow Barnabas inaq muleqeq uliq Jerusalem-ub ta lehsa ne asor eraqeq in ginaq lehiy haqiy. Leheq uliq nab in Aposel teq Yesus ago on mataw gigo danmepta nagan nenaq gamuk ka wastitayiy haqiy.

³ Nazaq iyan Yesus ago on mataw uliq Antiyok-ib osiyta na in mataw na gigeeman Pol-nen nenaq tilehiy. Lehim in saw Fonisiya-ib gwahtiqim lehad in saw na hulosim saw Samariya-ib gwahtiqim tileh yaqay. Lehad in Yesus ago on mataw saw giger nab osiyta na gibilenad God in on mataw en ta asor Juda a haiqta nagan gigem eman bulyiyyita na ago awagamun in wastitayeqmo gibilen yaqay. Gibilensa Yesus ago dauhata nagan bunmo huritim in ginad dimniy naqmo diq hiqiy yaqay.

⁴ Ari in le uliq Jerusalem-ub tugwahtiqiy. Gwahtiqan Yesus ago on mataw teq Aposel teq mataw danmepta na bunmo gibiyad in giwazinim qiqad gigo bitab tilehiy. Lehan God in Pol ayow Barnabas inaq gimalib kabiyl emiyta na awagamun in mataw na tigibilen bugiy. ⁵ Bilaq bugim tihiqiyen Farisi gigo dauhibta asor Yesus anan helmo haqiyyta na in eraqim bilaqiy, Mataw en ta asor Juda a haiqta helmo haqiyyta na in gihol abatan asan tuqurot daqay haqiy. Sa ne gibilenid in God ago maror Moses bilamta na aduganib gunun bunmo tumuz bug daqaymo haqiy.

⁶ In nazaq haqan Aposel teq Yesus ago on mataw gigo aseseqta nagan in gamuk na wastitaygo haqad humab twoliy. ⁷ Humab wolim in gamuk kabemmo tibilaqan teq Pita eraqim gibilan, Ya imaqbaban ham, kwaziqmo God i gilikmanib yaqmo itowun emim bilam, Ni leheq on mataw en ta asor Juda a haiqta nagan Yesus awagamun dimunta gibilen haqad in bilam ham. Gibilenid in huritad anan helmo tihaq daqay haqad in ya ibilanta

ham. Na ago ne tuhuritiyya ham. ⁸ An ya le on mataw na gibilenan in helmo tihaqiy ham. Ne ginad emiy ham. God in on mataw bunmo gimugan ahol waq kemaqta ham. Nazaq iyan in mataw na gimugan ahol waqan in ginad helta usan iyan in ago Bugaw Dimunta i iga nazaqmo in mataw na nag ham. Negid mataw bunmo daq na ahol waqad ginad em dagay, Helmo God in mataw en ta asor na inaqmo tigiwam haq dagay haqad in ago Bugaw nagta ham. ⁹ God i Juda giyon daq araq emad in ta on mataw en ta asor na giyon daq araq a hi emaqta ham. Haiq ham. In i bunmo giyon daq araqibmo emaqta ham. In i gigo daq meqinta walamta nazaqmo in mataw na gigo daq meqinta suholan in gigem anumlan haq ticiqiyimo ham. ¹⁰ Nazaq iyan ta nagaqgo ne Yesus ago disaipel muturta na gibetarib God ago maror Moses bilamta na a ta emnan tonay? ham. Ne nazaq emad ne God ulum waq nog iyay ham. Moses maror igta na in afaqan diq ham. I gisesan afaqan na soran yo hiqiy yaqayta ham. An i nazaqmo afaqan na sorgo biyab a hi iyaqmo ham. ¹¹ I nazaq hi emuq ham. I ginad emauq, Iyahta Yesus agem dimunta igad gilumsihsa God i ta giwaqaqta haqauq ham. Giwaqad in daq amulik naqmo amalib on mataw en ta asor Juda a haiqta nagan ta giwaqaqmo haqauq ham.

¹² Pita nazaq bilaqan mataw biyatha na bunmo gigez hiqiyim tuqosiy. Ossa Barnabas ayow Pol inaq eraqim God in gibenab daq azawayin inaqtak kabemmo on mataw en ta asor Juda a haiqta nagan gilikmanib eman gwahtimta na awagamun in tibilaqiy. Bilaqsa mataw na tok nemim huritadmo tuqosiy. ¹³ Sa giger na gamuk bilaqim tihiqiyen ta Jems eraqim bilam, Ya imaqbaban ham, ne gidek emeq yaqgo gamuk ka hurity ham. ¹⁴ God ame ameb diqta on mataw en ta asor Juda a haiqta nagan gilikmanib asor inmo aholyon giwamta na awagamun Saimon i gibilenan i tuhurit ham. ¹⁵ An Saimon ago gamuk na in nantut gigo nan kwaziqmo mar toniyta na nogmo ham. Gamuk na kazaq bilam ham.

¹⁶ Iyahta bilam, Abeb teq ya tuboldaiq haqad in bilam ham. Boleq ya Devit ago maror woqim usaqta na wazid a ta eraqdaq haqad in bilam ham. Nagah timeqniyim usaqta na ya wastitayid a ta dimniyyidaq haqad in bilam ham. Dimniyyid ya maror na wazid ta eraqdaq haqad in bilam ham. ¹⁷⁻¹⁸ Eraqeque ussa on mataw ta asor na bunmo in Iyahta tinagun daqay haqad in bilam ham.

Helmo ham on mataw en ta asor Juda a haiqta nagan yaqmo ihol ananib in gitowun tiqemta nagan bunmo in ya tiqinagun daqay haqad in bilam ham. Yaqmo Iyahta kwaziqmo ya nagah abeb teq gwahtiqaqta kagan eman ulal iysa bo muranmo haqad in bilam ham. Yaqmo kazaq tibilay haqad in bilam ham. *Amos 9.11-12*

¹⁹ Haqad Jems bilam, God ago gamuk nazaq bilaqan ya inad kazaq tiqem ham. On mataw en ta asor Juda a haiqta nagan gigo asor ginad buliyim God ago hib bollaqna in God ago maror Moses bilamta na ago gunun bunmo muz daqayta nazaq i a hi gibilenam ham. ²⁰ Haiq ham. I gilumsihad in gimen gamuk araq mar toneq emid lehan ham. Lehsa i kazaq gibilenuq ham. Tamaz akarawan mataw god katiyta naw nog negaya na ne hi waziy haquq ham. Ad ne an waq meqin tonad an haresmo hi hureqiy haquq ham. Ne karuw anatguman huroran momta na hi neqiy haquq ham. Ad ne ned hi neqiyimo haquq ham. ²¹ I ginad emuq ham. Kwaziqmo bolim bo muran kam kab uliq bunmo aduganib mataw asesepta in God ago maror Moses bilamta na asuleqin bilaqsa in gigo walmataw bunmo huriyatya ham. Ad lotu akaman buntab in Moses ago gamuk na bilaqaytamo ham.

Aposel in on mataw en ta asor Yesus anan helmo haqiyta na giyon sansandek eman lah

²² Ari Aposel teq on mataw Yesus ago nan huriyatna na gigo asesepta nenaq bunmo eraqim an amugan tuwazi. An amugan wazim in bilaqiy, I mataw asor giqemid in Pol ayow Barnabas ginaq leheq i gimaqbaban Antiyok-ibta na gibileniy haqiy. Haqad in mataw giger Judas in anan araq Barsabas haqayta na teq Sailas inaq ginan bilaqan in Pol ayow Barnabas ginaq tilehiy. Yesus ago mataw Jerusalem-ub osayta na gilikmanib Judas ayow Sailas inaq in gibin inaqta. ²³ Ari in mataw na giqeman lehsa in sansandek araq negiy. Sansandek na kazaq bilam,

I Aposel giyogniz mataw danmepta na nenaq i sansandek ka mar tonim eman i gimaqbaban on mataw en ta asor Juda a haiqta nagan uliq Antiyok-ibta teq saw Siriya-ibta teq saw Silisiya-ibta na gigo hib tileh negaq haqiy. Zeq dimun i gimaqbaban haqiy.

²⁴ I gamuk kazaq tuhurit haqiy. I gigo mataw asor ne gigo hib lehim gamuk bilaqan ne ritemin ginadnad tiqemay haqiy. Teq in ne gibileniyta nazaq i a hi bilawta haqiy. ²⁵⁻²⁶ Mataw na in ne gigo hib lehim nazaq tonan i huriitim i an

adugan wazim gigem amulikmo tiqiyim i bilaw, I mataw asor ginan bilaqeq giqemid in i giyogniz dimun digta Pol ayow Barnabas inaq ne gigo hib tileh daqay haw haqiy. Giger na in i gigo Iyahta Yesus Krais abin on mataw gibilenad in gihol nog hulosayta haqiy.

²⁷ Nazaq iyan i Judas ayow Sailas inaq giqeman in giger na nenaq nawa ne gigo hib tilehiy haqiy. In gimo teq gamuk kawa i mar tonta ka ne tigibilen daqay haqiy. ²⁸ I ginad emauq, I gunun kabemmo negid ne gihol afaqan hi iyan haquaq haqiy. Sa God ago Bugaw Dimunta in anad nazaq emaqmo haqiy. Gunun awweq kaqmo ne muzinad a hi hulos daqayta haqiy. Na in kazaq haqiy.

²⁹ Mataw god katiyta ayon tamaz emayta na akarawan ne hi waziy haqiy. Ad ne ned hi negad ne karuw ginatguman huroran moqiyta na hi neqiyomo haqiy. Teq ne an waq meqin tonad an haresmo hi hureqiy haqiy. Ne gihol asawan woltayad nagah awweq na aban diq emiy haqiy. Ne nazaq toneq teq ne dimunmo tugsaydaqay haqiy. Ari zeq dimun i gimaqbaban bunmo haqiy.

³⁰ In sansandek nazaq mar tonim mataw awweq na negim giqeman in Antiyok-ib tuwolehiy. Wolehim in Yesus ago on mataw uliq nabta na gihumab wolim sansandek na tinegiy. ³¹ Negan in gamuk na ahol waqim tihiqiyam gamuk na gilumihiqdaqta haqad in ginad tidimniy yaqay.

³² Sa Judas ayow Sailas inaq in God ago nantutta iyim in Yesus ago on mataw uliq nabta na gamuk dimdimunta kabemmo gibilenad gigem zaway tineg yaqay. ³³ In giger kam kabemmo uliq Antiyok-ib tuqosan teq mataw nabta na gigem dimunta negad in giqeman ginad dimniya uliq Jerusalem-uba lehiy, mataw in giqeman uliq Antiyok-ib boliya na gigerab. [³⁴ Teq Sailas anad emyaq, Ya Antiyok-ib asitmo ta oseq teq lehdaq haqayq] ³⁵ Sa Pol ayow Barnabas inaq in Antiyok-ib tuqos tutiy. Osad in mataw asor kabemmo nenaq Iyahta ago gamuk on mataw gibilenad teq in gamuk na alulin giqisihun yaqay.

Pol ayow Barnabas inaq an gihar ugij

³⁶ Abeb kam asor le tihiqiyam Pol in Barnabas tubulon, Bolsa i uliq bunmo Iyahta ago gamuk gibilenta nagab muleqeet ta lehad i gimaqbaban helmo haqayta na a ta gibiyuq ham. I nazaq toneq teq in dimunmo osay o haiq na i tuhurit kemam ham. ³⁷ Haqan Barnabas in Jon anan araq Mak haqayta na waqeq inaq lehnan bilam.

³⁸ An Pol' bilam, Kwaziqmo mat na uliq Pamfiliya-ib i gihulosta ham. Gihulosan i inaq kabiy a ta hi emta ham. Nazaq

iany i waqeinq inaq hi lehuq ham. ³⁹ Haqad in Barnabas inaq nagah na ago an ayah tumugiy. An mugim in giger garab kabiy a ta hi emiy. Barnabas in Mak waqim inaq muyib gwalim nud Saiprus-ib tilehiy. ⁴⁰ Sa Pol in Sailas wam. Waqan Jesus ago on matawna in gibilenim bilaqiy, Iyahta agem dimunta negsa ne lehiy haqiy. ⁴¹ Haqan in giger saw Sireya-ib teq saw Silisiya-ib luwad in Jesus ago on mataw gidauhan bunmo gigem zaway tineg yaqay.

16

Timoti Pol inaq kabi emnan lah

¹ Ari Pol ayow Sailas inaq uliq Derbe-ib lehim teq in le uliq Listra-ib tugwahtiqiy. Uliq nab disaipel araq anan Timoti haqayta in os. In anen Juda aw araq Jesus anan helmo hamta. Sa amam in Grik mat araq. ² Ari Jesus ago on mataw uliq Listra-ibta teq uliq Aikoniyam-ubta na in Timoti anan bilaq yaqay. In mat dimun diqta haq yaqay. ³ Haqsa Pol in Timoti inaq lehgo anad tibilagyaq. Nazaq iyan in Timoti waqim ahol abatan asan tuqrot. Na ezaqgo in anad emyaq. Juda mataw kabemmo saw kab osayta haqyaq. Sa Timoti amam in Grik mat na ago in bunmo tuhuritiya haqyaq. Luweq mataw na nan kabemmo bilaq daqay haqad in daq na amta.

⁴ Ari mataw ezezman na Pol teq Sailas teq Timoti in uliq-uliqgo luwad gunun aweweqmo Aposel giyogniz mataw aseseqta Jerusalem-ub osayta na nenaq an amugan wazim emiya na in Jesus ago on mataw tigibilen yaqay. Gibilend in bilaq yaqay. Ne gamuk ka muziniy haq yaqay. ⁵ Nazaq iyan on mataw Jesus ago nan huriyatya gidauhan uliq nagab osiyta na giwaz meqniyim God ago gamuk anan helmo diq tihaq yaqay. Sa kam bunmo on mataw muturta bo giduganib gwahtiqaq nenaq an tuwaston yaqay.

Pol sen qwayim saw Masedoniya-ib mat araq ahol wam

⁶ Ari God ago Bugaw Dimunta in saw Esiya-ib gamuk hi emiy haqad Pol-nen ginadib eman in saw Esiya aban emim saw giger Frigiya teq Galesiya agem siseyim tilehiy. ⁷ Lehim saw Misiya-ibmo tiquiyim in saw Bitiniya-ib le tugwahtiqnan tonsa teq hain. Jesus ago Bugaw tigiwasihyaq. ⁸ Nazaq iyan in saw Misiya hulosim uliq Trowas-ibmo tuwolehiy. ⁹ Wolehim taromab Pol uliq nab osad in nagah araq sen qwayim ahol waqayta nazaq nogta ahol wam. Ahol waqsa mat araq saw Masedoniya-ibta gwahtiqaq turad in Pol lilewunim bulonyaq. Ni kamis uroteq saw Masedoniya-ib kab boleq i gilumsih haqyaq. ¹⁰ Pol nagah na ahol waqan hidmo

i Masedoniya-ib lehgo dan tinagunyauq. Na ezaqgo i ginad tiqem. I Jesus awagamun dimunta saw nab a leheq on mataw gibilengo haqad God i tigililewunaq haw.

Aw Lidiya in Krais anan helmo ham

¹¹ Nazaq iyan uliq Trowas-ib i tuyaraqab gwalan tuy na eraqim nud Samotres-ib wolsireqimmo tilah. Lehim usim kam ta araq nab i uliq Neapolis-ib tileh. ¹² Lehim i uliq na hulosim le uliq Filipay-ib tugwahtiw. Uliq na Rom gigo maror ahaqanib ussa Rom mataw in giwamuz yaqayta. Teq uliq na in saw Masedoniya ago uliq ameb diqta. I uliq nab gwahtiqaq kam asor tuqos. ¹³ Osad Juda gigo lotu akamnib i God inaq gamuk emnan haqad uliq na ago gel asan ban le gwahtiqaq yuwub tuwoleh. Wolehad i ginad tiqemyauq. Yuw na aqurumnib mataw God inaq gamuk emaya asawan usaq daqagya haqyauq. Haqad i yuw na aqurumnib wolehim on asor humab wolum ossa i tigibiy. Gibiyad i gigerab lehim os woqim osad i nenaq gamuk emad tuqos. ¹⁴ Ossa aw araq uliq Tayataira-ibta anan Lidiya haqayta in nab os. Aw na God anadmo diq muzad luwyaqta. Teq in tubusan kakaqta emim zayad mani akabiyan emyaqta. In Pol ago gamuk huritad ossa Iyahta in anad eman hastitayan in gamuk na anan helmo tiham. ¹⁵ In helmo haqim teq in yuwub huzsa in asenlul teq ago kabibiy on mataw ago bitab os yaqayta na bunmo yuwub tuhuziyimo. Ad abeb aw na i gibilan, Ne ya ibiysa ya Iyahta anan helmo diq haqaiq e? ham. Ne nazaq ginad emsun teq ne boleq yaqgo bitab osiy ham. Ad in i giwaqeq giqad ago bitab lehgo awaz diq meqniyisa i in aqez muzinim inaq tileh.

Pol ayow Sailas inaq uliq Filipay-ib giqirquryi

¹⁶ Kam araqab i God inaq gamuk emaya asawan nab a ta woleh. Wolehsa kabibiy aw araq danib i tigibiy. Aw na aholib bugaw araq meqinta usyaqta. Usad in aw na aqezab nagah abeb teq gwahtiqaqta agamukan emid gwahtiqaq in bilaqyaqta. Nazaq iyan on mataw haresmo boleq aw na anamreniz mani negsa aw na in nagah ulilemim usaqta na anan bilaq sireqyaqta. Sa in anamreniz na mani ayahmo waq yaqayta. ¹⁷ Aw na i gibiyadmo in Pol teq i bunmo inaqmo gimuzad tiluwyaq. Gimuzad luwad teq in kazaq lileyed bilagyaq. Mataw ka in God Ulilib Diqta ago kabibiy matawtu haqyaq. God ne gilumsiheq ta giwaqdaqta na ago dante agamukan in ne gibilen kemaya haqyaq. ¹⁸ Kam kabemmo aw na nazaq emsa Pol atuw tihiqiy. Atuw hiqiysa in ahol buliyim

bugaw meqinta na kazaq bulon, Yesus Krais abinib ya ni tinibilenaiq ham. Ni aw ka huloseq gwahtiqaq leh ham. In nazaq bilaqanmo bugaw na aw hulosim gwahtiqaq tilah.

¹⁹ Lehsa kabibiy aw anamreniz na in mani waqayta alulin titukan ahol waqad in Pol ayow Sailas inaq giwazim gihureqim giqad uliq gemab lehim in mataw aseseqta ginognib tigiqemiy. ²⁰ In giqad lehim maror midiyesin wazayta na ginognib giqemim teq in bilaqiy. Mataw giger ka in Juda matawta haqiy. In i gigo uliqab on mataw giqeman ginad agadan iyay haqiy. ²¹ Mataw ka in i gigo on mataw daq asor muturta giqisihunayta haqiy. Teq i Rom matawta iyim iyan i daq nagan emeq i Rom gigo gunun tiqityonam haqiy. ²² Haqsa on mataw dahu biyatha nab turiyta na inaqmo in giger na gamuk tineg yaqaymo. Sa mataw aseseqta na eraqim Pol ayow Sailas inaq gigo tubusan tihasiy. Hasim teq in yukib ginolgo bilaqiy. ²³ Bilaqan mataw yukib tiginol titayi. Ginol titayim hulosad in giwaqim giqad le bit giqirqruran osaytab tigiqemiy. Giqemad in mat bit na ago dan ez wamuzim turaqta na gamuk awaz meqin kazaq buloniy. Ni giger ka gisawan diq woltayad tur haqiy. ²⁴ Haqan mat dan ezab turaqta na in gamuk awaz meqin nazaqta huritim in Pol ayow Sailas inaq giwaqim giqad le bit amuganibmo diq giqam. Giqemim in giger na gisen ayib kah tonan in nab tuqosiy.

²⁵ Osad tarom alihanib Pol ayow Sailas inaq in God bulonad bar wazad God abin iluwad tuqos yaqay. Ossa mataw giqirqruran osiyta na bunmo in giger na giqez tuhurit yaqay. ²⁶ Huritsamo kanawrigrig araq ayahta tiqueram. Eraqsa bit na ahol dedibmo wolyaq. Wolsa bit ago dan ez bunmo has bugsa mataw nab osiyta na bunmo gibensenab sen usta na milhesim tihitim. ²⁷ Sa mat bit wamuzaqta na usim kayeq iyim in eraqim dan ez bunmo tihas bugim ussa ahol waqad in anad tiqam, Mataw giqirqruran osiyta na tituk bugiy ham. In anad nazaq emad aben le ago baqir tuwam, inmo ahol tuwol emgo haqad. ²⁸ In nazaq emsa Pol ahol waqadmo in atoranmo bulonim bilam, Sey! ham. Ni nihol hi meqin ton ham. I bunmo kawa osauq ham. ²⁹ Haqan mat bit wamuzaqta na in lam waq a bolgo tillay. Lileyim in lam araq tuwaqim in sibim bit aduganib le tugwahtim. Gwahtiqaq in rabad ahol harara nemsia in Pol ayow Sailas inaq gisen agerab ahol hulosan tuwom. ³⁰ Woqim usim teq in eraqim giger na giwaqim giqad asanib le tugwahtim. Gwahtiqaq in gibilan, Mataw aseseqta ham ya naga diq

emid teq God ya ilumsiheq ta iwaqdaq? ham.

³¹ Haqan in giger mat na bulonim bilaqiy, Ni Iyahta Yesus anan helmo haq haqiy. Haqid teq God in ni teq ning aw amun inaqmo gilumsiheq tigiwaqdaq haqiy. ³² Haqad in mat na asenlul bunmo nenaq Iyahta ago gamuk tigibileniy. ³³ Gibilenen tarom nabmo mat na in Pol ayow Sailas inaq giwaqim giqad le gisulan tisuhol. Suholim hidmo in asenlul bunmo nenaq yuwub lehan Pol ayow Sailas inaq tuhuz negiy. ³⁴ Huz negan mat na in Pol ayow Sailas inaq giwaqim giqad ago bitab lehim in didaq negan tineqiy. Neqsa mat na anad diq dimniyaq. Na ezaqgo in teq asenlul bunmo nenaqmo God anan helmo tihqiyya na ago iyan.

³⁵ Ari saw tihaustayan mataw marorta nagan in hurmey asor giqeman tuboliy. Bolim in bilaqiy. Ni mataw giger na gihasid in lehiy haqiy. ³⁶ Haqan mat bit giqirqruraya wamuzaqta na in le Pol ago hib gamuk na tutim bilam, Mataw marorta na in ne giger gihasid lehgo tibilaqiy ham. Nazaq iyan ne bo gwahtiqaq gigem dimniya lehiy ham. ³⁷ Haqan Pol in mataw aseseqta na gigo gamuk amenin emim bilam, I giger gibin Rom-ub usaqta ham. Teq in wastitayimmo i hazizirib giqemim naga daqin i emta na in a hi hurit kemiham. Haiq ham. In on mataw gimeb i samanta ginol titayi ham. Ginolim in i giwaqim giqad le tigiqirqruriy ham. Ad muran in ulilemeqmo i giger giqemid lehgo bilaqay ye? ham. Hikidik ham. In gimo boleq i giwaqeq giqad le gwahtiqaq ham.

³⁸ Haqan hurmey na mataw marorta gigo hib muleqim ta lehim in Pol aqez titutiy. Tutan mataw aseseqta na in Pol ayow Sailas inaq gibin Rom-ub usaqta na ago huritim in tirab yaqay. ³⁹ Ad in polim midemqanmo diq susumun negad in kiskismo gibilen yaqay, Ne uliq ka huloseq saw araqab lehiy haq yaqay. ⁴⁰ Haqsa Pol ayow Sailas inaq in bit giqirqruraya na hulosim tugwahtiqiy. Gwahtiqaq in aw anan Lidiya haqayta na ago bitab tilehiy. Lehim in gimaqbaban Yesus ago on matawta na gibiyad in gamuk dimunta gibilenad gigem zaway negad teq in gihulosad tilehiy.

17

Tesalonaika mataw Pol ayow Sailas inaq ginolnan toniy

¹ Ari Pol ayow Sailas inaq le uliq Amfipolis-ib gwahtiqaq in uliq na hulosim le uliq Apoloniya-ib tugwahtiqiy. Gwahtiqaq uliq na hulosim in le uliq Tesalonaika-ib tugwahtiqiy. Uliq nab Juda gigo bit humab wolayta araq turta. ² Sa

Pol ago daq muzinim in bit humab wolayta nab leheq nenaq tuqosyaq. Juda gigo lotu akaman ezeqmanmo in nenaq osad in God ago marib gamuk amo amo giqisihunad teq in mataw na ginad buliyo tigibilenyaq.³ In God ago gamuk alulin bilaq siredaq mat anan Krais haqayta na in God-mo anad muzeq boleq santiyt soreq teq in moqeq ta eraqdaqta na ago in giqisihunyaq. Ad in gibilenyaq, Mat anan Yesus kawa ya anan ne gibilenaiqta naqmo in Krais haqyaq.⁴ In nazaq bilaqsa Juda on mataw nab osiyta na gilikmanib asor in ginad bulyim helmo haqad Pol ayow Sailas inaq gigo hib tuboliy. Sa Grik on mataw God diq anadin emad Juda gigo lotu adan muzin yaqayta na kabemmo teq on gibin inaqtakabemmo in giger na gigo hib tuboliy.

⁵ Sa Juda mataw asor in on mataw kabemmo Pol ayow Sailas inaq gigo gamuk anan helmo haqsa gibiliyad in gigem timeqniyyaq. Gigem meqniysa in le mataw asor maket-ib luw maleyanta luwayta na tigawaqiy. Giwaqim gibilenan in lehim mataw kabemmo girom tonim gigem wazan eraqsa in gigem meqniysa hares haresmo ek toneq lehad teq in bab tiqemnan ton yaqay. Bab emnan tonad in mat araq anan Jeson haqayta ago bitab lehim in Pol ayow Sailas inaq giwaqeq asanib on mataw gimeb giqad gwahtiqaq tibilaq yaqay.⁶ Teq haiq. In bit nab lehim Pol ayow Sailas inaq a hi gibilayi. Nazaq iyan in Jeson-mo teq Yesus ago on mataw asor nab osiyta na inaqmo giwazim uliq na ago mataw gibin inaqtak gigerab giqad lehiy. Lehim gigeman tursa in lileyim bilaqiy. Mataw ka daq meqinta og saw bunmo eman gwahtiqaqta haqiy. An muran in uliq kab bolim tuqosay haqiy.⁷ Sa Jeson in gilowan tonad giwaqim giqad ago bitab lehim nenaq osaqta haqiy. Mataw ka gidauhan nenaq bunmo in Sisa ago maror gihar ugaya haqiy. Ad in bilaqay, King araq anan Yesus haqayta osaq haqayta haqiy.⁸ Mataw na nazaq haqsa on mataw biyahta nab turiyta na teq mataw aseseqta na in gamuk na huritum gigem meqniysa gamuk kabemmo tibilaq yaqay.⁹ Ad teq mataw aseseqta na in Jeson ago dahu nenaq gibilenan in mani emiy, in Pol ayow Sailas inaq anononomo giwamuzsa in daq araq hi emgo haqad. In mani eman teq mataw aseseqta na gihulosan tilehiy.

Pol ayow Sailas inaq uliq Beriya-ib kabi emiy

¹⁰ Ari tarom nabmo Yesus ago on mataw uliq Tesalonaika-ibta na in Pol ayow Sailas inaq gigeman uliq Beriya-ib tilehiy. Lehim uliq nab gwahtiqaq in le Juda gigo bit humab wolayta nab tugwahtiqaq.¹¹ Teq Juda mataw Beriya-ib osiyta na in mataw

dimdimunta. In Juda mataw Tesalonaika-ibta na giquriyamim in Jesus awagamun huritnan diq ginad bilaqyaqta. Ginad bilaqsa kam bunmo in God ago mar ahol waq kemad giger na gigo gamuk tuqulum kem yaqay, Pol ayow Sailas inaq gamuk helta i gibileny o haiq? haqad.¹² Nazaq iyan uliq nab Juda on mataw kabemmo helmo tihaqiy. Sa Grik on mataw gibin inaqtakabemmo helmo tihaqiy.

¹³ An abeb Juda mataw uliq Tesalonaika-ibta na in Pol uliq Beriya-ib God ago gamuk bilaqqaqta na ago tuhuritiy. Huritum in uliq nab bolim in gimo gigo uliqab daq emiyta nazaqmo in uliq Beriya-ib tiqemnimo. In on mataw kabemmo ginad walebolad giqutil wazan eraqsa in bab araq ayahta tiqemnan toniy.¹⁴ Nazaq iyan Yesus ago on mataw uliq nabta na in hidmo Pol waqim eman lan ez ban tilah. Lehsa Sailas ayow Timoti inaq in Beriya-ib os tutiy.¹⁵ Sa Beriya-ib mataw asor Pol waqim ad danib lehad in uliq Atens-ib tiqiyim teq in Pol hulosan ossa in muleqim giquliqab ta lehiy. Lehsa Pol in Sailas ayow Timoti inaq gimen nan emim mataw na gibilan, Ne muleqeq leheq giger na gibilenid in yaqgo hib hidmo boliy ham.

Pol uliq Atens-ib God ago gamuk on mataw gibilan

¹⁶ Ari Pol uliq Atens-ib mataw giger na gimen emad tuqos. Osad in uliq nab god katiyta gidulan kabemmo gibiliyad anad ayahmo meqniyyaq.¹⁷ Nazaq iyan in Juda gigo bit humab wolaytab le gwahtiqaq in Mataw teq Grik mataw God diq anadin emad Juda gigo lotu adan muzin yaqayta na nenaq gamuk tiqemyaq. Ad kam bunmo in maket-ib leheq on mataw nab osiyta na nenaq gamuk tiqemyaqmo.¹⁸ Teq mataw suleq amo amo bilaqayta asor ginan Epikuriyan haqayta na teq asor ginan Stowik haqayta na in Pol inaq gamukib an tubay yaqay. An baysa asor bilaq yaqay, Mat gamuk haresmo bilaqqaqta ka in naga gamukin diq bilaqqaq? haq yaqay. Haqsa ta asor bilaq yaqay, In uliq asor gigo god ginan bilaqqaq daqagya haq yaqay. Na ezaqgo Pol in Yesus awagamun teq mataw moqeq hodhodab eraq daqayta na ago gibilensa iyan in nazaq ginadnad em yaqay.

¹⁹ Ari mataw na Pol waqim inaq in gigo saw araq gamuk emaya anan Areopagus haqaytab tugwalehiy. Gwalehim in buloni. Ni gamukag muturta on mataw gibilenaqta na i huritnan haqiy.²⁰ I ningko gamuk na huritan in lul araq diq iyaq haqiy. Nazaq iyan i gamuk na alulin hurit kemnan haqiy.²¹ Na mataw uliq Atens-ibta na teq mataw uliq pesammo osim Atens-ib bolim osayta na nenaq in bunmo gamuk

muturta bilaqad huritad osnan ginad bilaq naqmo hiqiy yaqayta. In kabiyl daq araq emgo ginad a hi emad in daq naqmo emad os yaqayta.

²² Ari Pol saw Areopagus-ib eraqim kaunsel gimeb turad in bilam, Ne mataw Atens-ibta ham ya ne gibisya ne lotu ago daq bunmo emgo giwaz diq meqniyayta ham. ²³ Ya ne gigo uliq ka aduganib luwad ne lotu emayta anaghan kabemmo gibiy ham. Gibiyad ya ban araq tamaz emgota ahol waymo ham. Ban nab gamuk kazaq mar tonan ussa ya ahol way ham. Gamuk na bilam, Ka in god i ago a hi huritaqtu na ayon tamaz emgo abanan usaqta haqad in bilam ham. Ari ham God nawa ne ago a hi huritad ayon lotu samanta emayta na ham muran ya God na abin ne tigibilennan ham.

²⁴ God na in kait og inaq teq nagah bunmo saw nagab giqusayta na giqamta ham. Heven-ib teq og kab inaqmo in Iyatha iyim osaqta ham. Nazaq iyan in lotu abitan mataw gibenab emayta na aduganib a hi osaqta ham. ²⁵ Sa mataw gibenab in ulumsihad nagah osgo ug daqayta in nazaq a haiqta ham. Na ezaqgo in nagah araq ago siqim a hi iyaqta ham. Inmo mataw giqeman kayeqmo osayta teq in on mataw bunmo nagah osgo bunmo negaqla ham. ²⁶ In mat amulikmo alulib on mataw en bunmo gigeman gwahtiqiya ham. Teq in on mataw en bunmo gigo kam in os daqayta na teq in gigo og ayawalan usdaqta na in tuwastitay bugta ham. Wastitay bugan on mataw en amulik-mulikmo gwahtiqsa in giqeman in le og saw bunmo waqim tuqosay ham. ²⁷ In anad mataw bunmo saw hikmizmuzeq inagunad teq tiqibiy daqay haqad in nazaqmo giqeman osayta ham. Teq in i gihulosim le pesanmo a hi osaqta ham. ²⁸ In og saw bunmo osaqta ham. Inmo i giqeman i kayeqmo osauqta ham. Teq inmo i gilumsihsa i luwauqta ham. Ne gigo mataw bar emayta na in nazaqmo bilaqiyta ham. In bilaqiy, I bunmo inmo alulib gwahtiwta haqiy ham. ²⁹ Ari ham i God ago onmin iyeq teq i ginad em hasuq ham. Mataw ginad emad gibenab nagah gidulan gol-ib teq silva-ib teq gigib giqemayta ham. Teq nagah na in God a haiq ham. I God ago onmin iyim i kayeqmo osauqta ham. Nazaq iyan i gimam God in kayeqmo osaqmo ham. In gig nog a haiq ham.

³⁰ Kwaziqmo mataw God ago a hi hurit kemad in daq haresmo em yaqayta ham. Emsa God in gigo daq meqinta na amenin hidmo a hi emyaq ham. Ari muran teq God in on mataw uliq saw bunmo gamuk awaz meqinta tigibileqa ham. In bilaqaq, Ne ginad buliyeq gigo daq teq ginad meqinta na gileh ugiy haqaq ham. ³¹ Na ezaqgo

in teq hazizir ayahta emdaqta na akaman tibaqan usaqta ham. Hazizir nab teq in daq titnonta amalib on mataw bunmo gigo daq tuqulum kemdaq ham. Teq in mat araq anan bilaqan osaqta naqmo hazizir akabiyan na tigemdaq ham. Mat na moqan God hodhodab wazan ta eramta ham. Eraqan daq na amalib mat na in God ago hazizir wamuzdaqta amatin dimun diq tiqiy hasta na ago God in i bunmo tigiqisi-hunaqta ham.

³² Ari mataw nab osiyya na in mat moqim hodhodab ta eramta na ago huritum asor yuquwad Pol tibilawun yaqay. Sa asor bilaq yaqay, Kam araqab teq ni nagah ka ago bilaqsa i a ta huritamta haq yaqay.

³³ Haqsa Pol gihulosim tilah. ³⁴ Lehsa on mataw asor Pol inaq iyim ago gamuk anan helmo tihaqiy. Mataw na gigo araq anan Diyonisius haqayta. In kaunsel Areopagus-ibta na gigo araq. Teq aw araq anan Damaris haqayta in helmo hamtam. Teq on mataw asor nenaqmo.

18

Pol uliq Korin-ib kabiyl am

¹ Ari daq na abun ban Pol uliq Atens hulosim uliq Korin-ib tilah. ² Lehim uliq nab in Juda mat araq saw Pontus-ibta anan Akwila haqayta ahol tuwam. Mat na kwaziqmo ago saw Pontus hulosim le uliq Rom kantri Italiy-ibtab osyaqta. Osim ilatow nogmo in awe Prisila inaq kantri Italiy hulosim uliq Korin-ib bolitya. Na ezaqgo Rom gigo king anan Klodiyus haqayta na in Juda on mataw gimuzad ginan bilam, Juda on mataw bun diqmo i gigo uliq ayahta Rom huloseq saw araqab tileh bug daqay ham. Haqan Akwila awe Prisila inaq eraqim uliq Korin-ib bolim tuqosiy.

Ossa teq Pol in giger na gigo hib tubol. ³ Bolan Akwila awe inaq bit karuwsanibta akabiyan emad os yaqayta. Sa Pol kabiyl naqmo emaqta amatin iyim in giger na nenaq tuqos. ⁴ Osad lotu akamnib in Juda gigo bit humab wolaytab leheq Juda mataw teq Grik mataw nenaqmo Yesus anan tigibilenyaq, mataw na ginad buliyeq Yesus anan helmo haq daqay haqad.

⁵ Teq abeb Sailas ayow Timoti inaq saw Masedoniya hulosim Pol ago hib tige-woqiy. Gewoqan Pol bit akabiyan hulosad kam bunmo in God ago gamukmo mataw gibilenad tuqosyaq. In Juda mataw gamuk atoranmo gibileneq bilaqyaq, Yesus in Krais haqyaq. ⁶ Haqsa Juda mataw na in Pol geg ugad tibilawun yaqay. In nazaq emsa Pol ago tubusan ulelan bit na arohro-hun ogib woqsa gibilan, Ne moqeq hiqiy daqayta na in negmo gigo afaqan ham. Afaqan na ya iholib a hi usdaq ham. Muran

ya on mataw en ta asor Juda a hajqta nagan gigo hib tilehnhan ham. ⁷ Haqad in humab wolayta abitan na hulosim le mat araq anan Titiyus Jastus haqayta na ago bitab tilah. Mat na God diq anadin emad abin iluwyaqta. Teq in ago bit Juda gigo bit humab wolayta na agerab turyaqta.

⁸ Ari Juda gigo mat ayahta bit humab wolayta wamuzaqta anan Krispus haqayta na in ago aw amun nenaq bunmo Iyahta anan helmo tihaqiy. Sa Korin on mataw kabemmo in nazaqmo Pol ago gamuk huritim helmo haqad yuw tuhuzyimo.

⁹ Sa tarom araqab Pol osad nagah araq sen qwayim ahol waqayta nazaq nogta aholib gwahtiqa in Iyahta ahol tuwam. Ahol waqsa Iyahta tubulon, Ni hi rab ham. Ni niqezi hi mug netad yaqgo gamuk gibilenmo gibilen ham. ¹⁰ Ya nenaq ossa mat araq eraqeq a hi nimeqin tondaq ham. Yaqgo on mataw kabemmo uliq kab osayta ham. ¹¹ Iyahta nazaq Pol bulunan in uliq Korin-ib ulig amulikmo teq kalam 6 nazaqmo tuqos. Osad in on mataw God ago gamuk asuleqin tigibilenyaq.

¹²⁻¹³ Ari abeb Rom in mat anan Galiyo haqayta na eman in saw nab gavman amepta iyim tuqos. Ossa kam nab Juda bunmo eraqim Pol gihar tuqug yaqay. Gi-har ugad in Pol wazim ad hazizirib lehim tibilqiq. Mat ka ago soysoy amalib on mataw gihureqsa in i gisesan gigo maror hulosad dante lul ta araq diqta amalib God ayon lotu emayta haqiy. ¹⁴ Haqan Pol ate akim gamuk amenin emdaiq haqsamo haiq. Galiyo era tigibilan, Ne Juda matawta ham ne huriyi ham. Mat ka in Rom gigo gunun araq itiyonid o in daq araq meqinta emid ari ya ne gigo gamuk na tuhurit nag ham. ¹⁵ Teq ne bolim gamuk amikmikta teq mataw giholnan teq negmo gigo gunun agamukan naqmo ago ne susumun yagay ham. O tob iyan ham. Negmo leheq gamuk na wastitayiy ham. Ya nagah naqanta agamukan huriytan ya hulos ham. ¹⁶ Haqad in mataw na hazizirib gimuzan tilehiy. ¹⁷ Lehsa mataw biyahta nab turiyta na bunmo eraqim Juda gigo mat ayahta bit humab wolayta wamuzaqta anan Sostenes haqay na wazim Galiyo anognib tuwoltitay yaqay. Woltitaysa teq haiq Galiyo daq na ago asit a hi bilam.

Pol muleqim uliq Antiyok saw Siriya-ibtab ta lah

¹⁸ Ari Pol uliq Korin-ib kam kabemmo a ta os. Osim abeb in Jesus ago dauh uliq nabta na gihulosim uliq Senkriya-ib tilah. Lehsa Prisila aduw Akwila inaq in Pol inaq tilehiyimo. Lehim uliq Senkriya-ib Pol aqensan tuqurot. Na ezaqgo kwaziqmo in daq araq emgo haqad God inaq an adugan

wazta iyan. An adugan wazim in aqensan a hi urotad luwsa le nagah na akaman tihiqiyen teq in aqensan tuqurot. Aqensan urotan teq in bunmo moy araqab gwalmi saw Siriya-ib tilehiy. ¹⁹ Lehim uliq Efesus-ib tugwahtiqa in Pol in Akwila awe Prisila inaq gihulosan nab ossa in amomo le Juda gigo bit humab wolaytab gwahiqim nenaq gamuk tiqam. ²⁰ Gamuk eman Juda mataw na Pol buloni, I ni ninaq asit sisaq nog a ta osamta haqiy. Haqan Pol bilam, Haiq ham. Ya nenaq sisaqmo a hi osdaiq ham. ²¹ Haqad in gihulosadmo gibilan, Ne bo kab ta osiy ham. God anad bilaqid teq ya muleqeq ne gigo hib ta boldaiq ham. Haqad in tuyib gwalmi Efesus tuhulos. ²² Muy na le uliq Sisariya-ib woqan Pol muy hulosim le uliq Jerusalem-ub Yesus ago on matawta na tigibiy. Gibiyad in gihulosim uliq Antiyok-ib tuwolah. ²³ Wolehim in Antiyok-ib sisaq nogmog tuqos. Osim teq in eraqim le disaipel saw giger Galesiya-ib teq Frigiya-ib osayta na gibiyim gibiyim tilehyaq. Lehad in gigez zaway tinegyaq.

Apolos uliq Efesus-ib mataw gamuk gibilenyaq

²⁴ Ari Juda mat araq uliq Aleksandriya-ibta anan Apolos haqayta bolim uliq Efesus-ib osayaq. In mat araq gamuk anonomo bilaqqaqta amatin iysa mataw in ago gamuk huritad gidek diq sirir yaqayta. Teq in God ago marib gamuk bunmo alulin anad tiqem hasta. ²⁵ Anad em hasad in Iyahta ago dante muturta na ago huri kemad in Iyahta muzgo agem awaz meqin diqta. Ad in on mataw Yesus awagamun gibilenad in Yesus daq amta na ago wastitayeqmo gibilenyaqta. Ta teq in Yesus abinib yuw huzgo a hi huriitta. In Jon ago suleq naqmo huriitm yuw huzta. ²⁶ Mat na Juda gigo bit humab wolaytab leheq on mataw gamuk atoranmo gibilenad in a hi girabunyaqta. Sa Prisila aduw Akwila inaq in Apolos gamuk bilaqsa tuhuritiy. Huritim in giger Apolos waqim a le giholbin osad teq in God ago dante muturta na anan wastitayimmo tubulon sireqiy.

²⁷ An abeb Apolos saw Akaya-ib lehgo anad tiqam. Anad emsa Yesus ago on mataw uliq Efesus-ibta na ginad tibilammo. Ginad bilaqsa in disaipel saw Akaya-ibta na gimen sansandek mar tonim kazaq bilaqiy, Ne Apolos wazinad waqeq inaq osiy haqiy. An Apolos le saw Akaya-ib gwahiqim in on mataw God agem dimunta negan in Yesus anan helmo tihaqiyta na ayahmo tigilumsihaq. ²⁸ Gilumshad in ulalabmo Juda mataw nenaq gamuk emad gigo gamuk bayan woqsa in amenin em yo hiqiy yaqay. Sa Apolos in God ago marib gamuk giqisihun naqmo hiqiyad

gibilenyaq, Mat anan Krais haqayta na amatin Yesus-mo haqayaq.

19

Pol uliq Efesus-ib God ago gamuk bilam

¹ Ari Apolos uliq Korin-ib ossa kam nab Pol garan adugan saw agarahin inaqtä na urotim bolim uliq Efesus-ib tugwahtim. Gwahtiqim nab in disaipel asor tigibiy. ² Gibiyad in tisusumun nag, Kwaziqmo ne Yesus anan helmo haqiyta kam nab ne God ago Bugaw Dimunta waqiy ye? ham. Haqan in bilaqiy, Haiq haqiy. I God ago Bugaw osaqtä na akaziran asit i a hi huriitta haqiy. ³ Haqan Pol gibilan, Nazaq iyan ne naga suleqin muzinim yuw huziyya? ham. Haqan in bilaqiy, I Jon-mo ago suleq muzinim yuw huzta haqiy.

⁴ Haqan Pol bilam, Kwaziqmo Jon on mataw huz negad gibilenyaq. Ne ginad buliyeq gigo daq meqinta gileh ugsa teq ya ne yuviib huz negiq haqayaq ham. Ad ne mat ya igilehnib boldaqta na anan helmo haqiy haqayaq ham. Ari mat Jon agilehnib bolta na in Yesus-mo ham. ⁵ Haqan mataw na gamuk na huritim in Iyahta Yesus ago suleq muzinim abinib yuw tuhuziy. ⁶ Huzan Pol aben in giholib emim giwazsa God ago Bugaw Dimunta giholib tubol. Bolan uliq amo amo gigo nan mataw na ginadib bolsa in God ago nantut tibilaq yaqay. ⁷ Teq mataw na bunmo ginulinqan in 12 nazaq.

⁸ Ari Pol uliq nab osad kalam ezeq-manmo aduganib in le Juda gigo bit humab wolayta nab gwahtiqeq in a hi rabad Yesus awagamun dimunta tigibilenyaq. Mataw na ginad buliyeq helmo haq daqay haqad in God ago maror asuleqin negad in nenaq gamuk atoranmo bilaqyaq. ⁹ Teq mataw na gilikmanib asor in helmo haqnan gituw hiqiysa gitupit a hi ritenyaq. Ad in on mataw gimeb Iyahta ago dante muturta na anan meqin haq yaqay. Nazaq iyan Pol eraqim gihulosad in mataw disaipel tiqiyita naqmo giwaqim nenaq lehim mat araq anan Tiranus haqayta na ago suleq abitnib tilehiy. Lehim kam bunmo Pol in God ago gamuk atoranmo tigibilenyaq. ¹⁰ Ad in ulig gigermo nazaq emad tuqos. Nazaq iyan saw Esiya-ib on mataw bunmo Juda teq Grik inaqmo in Iyahta ago gamuk tuhuritiy.

Sikewa atatniz giwagamun

¹¹ Ari Pol uliq nab ossa God in abenab daq azawayin inaqtä lul araq diqta kazaq giqemeyaq. ¹² Mataw Pol ago tubusan adek amikmikta teq in ago tubusan bunta nagan in aholib emeq a luwyaqta na in giwaqeq a leheq mataw moqayta giholib tiqem yaqay. Emsa in gigo moq hiqiysa bugaw meqinta giholib usiyya na tituk yaqaymo.

¹³ Ari kam nab Juda asor saw haresmo luwad in on mataw gigo bugaw meqinta gimuzad anawun waq yaqayta. Teq mataw na gigo asor in bugaw meqinta muznan haqad in Iyahta Yesus anan biyad bilaq yaqay, I Yesus mat Pol abin bilaqqaqtä na abinib i atoranmo ne gibilenauq haq yaqay.

¹⁴ Sa Juda gigo mataw tamaz emayta gigo ayahta araq anan Sikewa haqayta na in atatniz 7 nazaqmo osiy. Osad in bugaw meqinta gimuzad daq nazaqmo em yaqayta. ¹⁵ Emad teq kam araqab in bugaw meqinta araq nazaq bulonan bugaw na amenin emim gibilan, Ya Yesus ago tuhurit ham. Teq ya Pol ago tuhuritmo ham. Ta teq negmo gingan didiq? ham. ¹⁶ Haqad mat aholib bugaw meqinta usaqta na eraqim sortukim mataw na gibunib gwalim ginol titayad gisan hiksoqorad gigo tubusan bul titayan hitiqmo bug. Hitiq bugan mataw 7 na in bit na hulosad ginedan woqsa gibe aholmo tukim tilehiy. ¹⁷ An uliq Efesus-ib on mataw bunmo daq na ago tuhuritiy, Juda teq Grik inaqmo. Huritim in rabad teq in Iyahta Yesus abin wazid tigeraqyaq. ¹⁸ Sa on mataw Yesus anan helmo haqiyta na gilikmanib kabemmo bolim in gigo daq kwaziqmo in ulilemeq em yaqayta na ulum hasan gwahtiqsa in tibilaq bugiy. ¹⁹ Ad on mataw asor liqiy em yaqayta na in mataw bunmo gimeb in gigo liqiy agamukan mar toniyta na bulsireqim ginuwani faqab gwalim tuqoyyaq. Liqiy agamukan kabemmo faqab oyiyta na anawun in nulinan le 50,000 mani silva nazaqmo iy. ²⁰ Sa Iyahta daq azawayin inaqtä nazaq emsa in ago gamuk saw bunmo ayah iyad awaz meqin diq tiqiyqaq.

Efesus on mataw Pol nan ugyi

²¹ Daq nagan tihiqiy aneb God ago Bugaw Dimunta in Pol anad wamuzsa Pol anad tiqam, Ya saw giger Masedoniya-ib teq Akaya-ib leheq teq ya Jerusalem-ub tilehdaiq ham. Ad in bilam, Ya Jerusalem-ub leheq teq ya le Rom ahol tuwaqdaiqmo ham. ²² Haqad in mataw in ulumsih yaqayta na gilikmanib mataw giger Timoti ayow Erastus inaq giwaqim giqemaw saw Masedoniya-ib ameb tilehiy. Lehsa Pol amomo saw Esiya-ib asitmo a ta os.

²³ Ossa kam nab uliq Efesus-ib mataw asor eraqim Iyahta ago dante muturta na geg ugad bab araq ayahta wazan tiqeram. ²⁴ Teq daq na alulin in kazaq. Mat araq silva akabiyan emaqta anan Demitriyus haqayta uliq nab os. Osad in god katiyya araq awta anan Artemis haqayta na adulan amikmikta silva-ib giqemsa mataw gi-holyon zay yaqayta. Mat na silva akabiyan na emad in ago kabibiy mataw

Artemis adulan giqem yaqayta na gimen mani ayahmo waqyaqta.

²⁵ Ari kam araqab Demitriyus in ago kabibiy mataw na teq mataw ta asor kabiy naqanta emayta na girom tonim gibilan, Ya iyogniz ham ne tuhuritiy ham. I gigo naw dimunta kabiy kaqmo amalib gwahtiqaqta ham. ²⁶ Teq mat anan Pol haqayta na in on mataw kabemmo gihureqan in ginad buliyim i gigo kabiy ka anan ginad a ta hi bilaqaq ham. Na ne ahol waqim ne tuhuritiyta ham. Teq mat na in uliq Efesus-mo gimen a hi amta ham. Haiq ham. In saw Esiya asor ayahmo nazaqmo gimen amtamo ham. In bilaqaq, God katiya amo amo mataw gibenab emayta na in god diq a haiq haqayta ham. ²⁷ Ne ginad emiy ham. On mataw saw Esiya-ib teq og saw bunmo in Artemis abin wazinayta ham. Teq luweq in Pol ago gamuk na huriteq in i gigo mani akabiyan ka anan meqin haq daqay ham. Ad in ginad em daqay, I gigo god Artemis ago lotu abitan in nagah amikta haq daqay ham. Nazaq iyid luweq Artemis abin ayahta uliq saw bunmo usaqta na tihiqiydaq ham.

²⁸ Haqan mataw na gamuk na huritim in gigem timeeqniyaq. Gigem meqniysa in atoranmo lileyeq bilaq yaqay, Efesus gigo god Artemis in danmeh diq haq yaqay. ²⁹ Haqsa on mataw bunmo huritad ginad nad emad in samanmo hares haresmo tiqek ton yaqay. Ek tonad in araqibmo eraqim sibim saw humab wolaytab tilehiy. Lehad in saw Masedoniya-ib mataw giger Gayus ayow Aristarkus inaq gihureqim ne-naq leh toniyomo. Mataw giger na Pol inaq luw yaqayta. ³⁰ Sa Pol le on mataw biyatha na gibileng bilaqan disaipel tuwasihiy. ³¹ Sa saw Esiya-ib mataw marorta asor uliq nab osiyta na in Pol ayogniza iyim in amen nan emim in ginad awaz meqin amalib bulonim bilaqiy. Pol haqiy ni le saw humab wolayta nab hi gwahtiq haqiy.

³² Sa on mataw biyatha na ginad agadan tiqiy bug. Mataw asor gamuk araq lileyeq bilaqsa ta asor in gamuk ta araq lileyeq bilaq yaqay. Na ezaqgo on mataw bolim humab woliya na kabemmo in bab na alulin a hi huritiyta na ago iyan. ³³ Teq Juda mataw in gigo mat araq anan Aleksanda haqayta na ulum hasim ad gwahtiqsa biyatha na ahol waqad ginad emiy, Mat kaqmo haqiy. Haqsa Aleksanda aben wazan tiqeram, in humab na alulin gibilen kemgo haqad. ³⁴ Teq haiq. Mataw biyatha na Aleksanda ahol tuwaq hasan in Juda matmo iyan in giqez amulikmo iyim dedibmo a ta liley yaqay. I Efesus gigo god Artemis haq yaqay in danmeh diq haq yaqay. In nazaqmo lileyad ossa zeq adulan gigermo tihiqiy

³⁵ Hiqiyan gavman gigo mar em araq Efesus-ib osta na in eraqm on mataw giqez wasihim teq gibilan, Ne mataw Efesus-ibta ham ne ginad emiy ham. Ayahta Artemis ago lotu abitan uliq Efesus-ib kab tursa ne wamuzayta na abin og saw bunmo ussa on mataw bunno in ne gigo tuhuritiyta ham. Ad ne Artemis ago gig kaitab womta wamuzayta na ago in tuhuritiytamo ham.

³⁶ Mat araq ne gibin na othasdaqta ago zaway haiq ham. Nazaq iyan ne giqez hiqiy ham. Ad ne hidmo daq araq emgo ne ginad hi emiy ham. ³⁷ Mataw giger ne giqad boliyta ka in i gigo lotu abitnib nagah araq a hi rin toniy ham. Ad in i gigo god awta na a hi bilawunyimo ham. ³⁸ Nazaq iyan Demitriyus ago kabibiy mataw nenaq in gigo gamuk inaq iyid ari i hazizir emauqta akamun inaq ham. Ad i gigo megistret osaymo ham. In daq dimunta muzinad in gigo afaqan haziziribmo teq wastitayiham. ³⁹ Teq ne gigo gamuk ta asor ussun ari kaunsel humab wolayta akaman nab teq ne bilaqiy ham. ⁴⁰ I afaqan araq ayahta tuwaqnan diq tonauq ham. Daq ka alulin haiqgam iyan luweq Rom huriteq bilaq daqay, Mataw ko ginadibmo bab wazan eramta haq daqay ham. Haqad in an wol ka ago sumusun igid i gamuk araq bilaqamtaihaiq ham. ⁴¹ Mat na nazaq gibilenim hulosadmo in on mataw na gibilenan gibitab tilehiy.

20

Pol saw Masedoniya-ib teq saw Grik-ib luw

¹ Ari nan ayah eramta na le muleqim tuwoqan Pol disaipel gililewunan in bo humab tuwoliy. Humab wolana Pol gamuk dimunta gigem zaway neggo gibilenim giben wazad teq in tighulos. Gihulosim in saw Masedoniya-ib tilah. ² In saw nab lehim luwad in Yesus ago on mataw gamuk dimdimunta kabemmo gigem zaway neggo gibilenim teq abeb in saw Grik-ib le tug-wahtim. ³ Gwahtiqim in saw nab kalam ezeqman nazaqmo tuqos. Osim in muleqeq uliq Jerusalem-ub ta lehnant haqad in muy waqeq saw Siriya-ib lehgo anad tiqam. Anad emsa Juda mataw asor in wol emgo an amugan wazsa Pol tuhurit. Huritim in anad buliyim in muleqeq saw Masedoniya agem siseyeq leheq teq in muy waqeq uliq Jerusalem-ub lehgo anad am. ⁴ Teq mataw asor Pol inaq lehiya na ginan kazaq: Pirus atatin Sopater mat uliq Beriya-ibta na, teq mataw giger uliq Tesalonaika-ibta Aristarkus ayow Sekundus inaq, teq Gayus uliq Derbe-ibta na, teq Timoti teq mataw giger saw Esiya-ibta Tikikus ayow Trofimus inaq in bunmo Pol inaq lehiyta. ⁵ Mataw na

ameb lehim uliq Trowas-ib i gimen emiy.
⁶ Sa igmo osim Juda gigo lotu akaman bret
 yis haiqmo neqayta na le tihiqiyan teq i
 muyib gwalim uliq Filipay hulosim tileh.
 Lehad kam aweweinqmo hiqiyan abaynag-
 inta nab i le Trowas-ib tugwahtiwi. Gwah-
 tiqim uliq nab i kam 7 nazaqmo tuqos.

⁷ Osim Sande taromab i Krais ago
 on matawta nenaq bret orqayeq Iyatha
 anadin emad neqamta haqad humab
 tuwol. Humab wolum osad Pol in on mataw
 gamuk tigibilenyaq. Gamuk gibilenad in
 babeq lehdagaqta iyan in gamuk hureqim
 a le tarom alihanibmo tiqiy. ⁸ Sa i bit
 adugan ulilibtab humab wolta nab lam
 kabemmo oyyaq. ⁹ Teq mat araq minminta
 anan Yutikus haqayta in tim bolaqta ago
 dan aqezab os. Ossa Pol gamuk ayahmo
 bilaqeq a lehyaq. Sa Yutikus ame rursa
 in usnan tonad osimmo tuqus lah. Us
 lehim in bit ago ategtegan ezeqmanta
 ulilibta nab us hilesim woqim le ogibmo
 tuwom. Woqan mataw hitiqim le tuwaziy.
 Wazan haiq in tumom. ¹⁰ Sa Pol ulilib osta
 tihitimmo. Hitiqim le amun na agerab ahol
 hulosan woqan in aynetim teq bilam, Ne
 ginadnad hi emiy ham. In awitan asanib
 kawa usaq ham. ¹¹ Haqad in bit adugan
 ulilibta nab gwa ta lah. Gwalehim in bret
 orqayim mataw na nenaq Iyatha anadin
 emad tineqiy. Negim hulosad in mataw
 nenaq gamuk sisaqmo bilaqad ossa le
 saw tihastitay. Saw hastitayan Pol eraqim
 tilah. ¹² Lehsa mataw in mat minminta na
 kayeqmo ossa in waqim ad gigem ayahmo
 dimniysa ago bitab tilehiy.

Pol uliq Trowas hulosim uliq Miletus-ib lah

¹³ Ari Pol era i tigibilan, Ne muyib lehsa
 ya isenabmo Asos-ib tilehdaiq ham. Haqan
 in bilamta nazaqmo i tiqem. I ameb lehim
 muyib gwalim uliq Asos-ib tileh, i leheq
 Asos-ib Pol ahol waqeq teq i waqeq ad
 muyib leham haqad. ¹⁴ Lehim Asos-ib
 gwahtiqim ossa teq Pol bo i tigibiy. Sa i
 in waqim muyib inaq tileh, uliq Mitilin-
 ib. ¹⁵ Lehim i uliq na hulosim muyib lehad
 luwsa kam na tihiqiyan kam ta araq nab i le
 nud Kiyos agerab tugwahtiwi. Gwahtiqim
 lehsa kam na tihiqiyan kam ta araq nab i le
 nud Samos agerab tiqiy. Iyim teq i nud
 Samos hulosim kam ta araq nab i le uliq
 Miletus-ib tuwow. ¹⁶ Ari Pol uliq Efesus
 uriyameq lehgo haqad in tanabmo anad
 tiqamta. Nazaq iyan in muyib lehad in
 uliq Efesus hulosim wolsireqimmo le uliq
 Miletus-ibmo womta. Na ezaqgo in hidmo
 leheq Jerusalem-ub lotu akaman ayatha
 anan Pentikos haqayta na ahol waqnan
 haqad in saw Esiya-ib kam asor hulosnan
 atuw hiqiy.

*Pol uliq Efesus-ib Yesus ago on mataw
 gigo aseseqta na giben wazadmo in gihu-
 losim lah*

¹⁷ Ari i uliq Miletus-ib tugwahtiqim Pol
 nan eman uliq Efesus-ib tilah, Yesus ago
 on mataw gigo danmepta nagan bo in ahol
 waqgo haqad. ¹⁸ An mataw danmepta
 nagan bo Pol agerab tugwahtiqaq teq in
 gibilenim kazaq bilam,

Iturimmo ya saw Esiya-ib gwahtiqim
 ne nenaq osad ezaq ya os luwyaiqta na
 negmo tuhuritiy ham. ¹⁹ Ya ihol abin
 wazid woqsa Iyatha ago kabiy emyaiqta
 ham. Emsa Juda mataw ya ilum waqad
 ibayid woqgo bilaqsa ya ihol afaqan diq
 iysa imeqil woqyaqta ham. ²⁰ Teq ya ne
 gilumsihad Iyatha ago gamuk dimdimunta
 bunmo gibilenan a hi rabyaiqta ham. Ya
 ne gigo humabub osad teq ya ne gigo
 bit bitmo luwad ya suleq negyaiqta ham.
²¹ Ya Juda on mataw teq Grik on mataw
 nenaqmo gamuk atoranmo gibilenad bi-
 laqyaiq, Ne gigo daq teq ginad meqinta
 gileh ugad ne gihol buliyeq God ago hib
 boliy haqyaiqta ham. Ad ne i gigo Iyatha
 Yesus anan helmo haqiy haqyaiqta ham.
²² Ari muran ne gidek emiy ham. God ago
 Bugaw Dimunta ya ibe yahsa ya Jerusalem-
 ub tilehaiq ham. Lehid teq nab naga daqin
 diq ya iholib gwahtiqdqafta na ya a hi hurit
 ham. ²³ Teq uliq edob edob ya lehailqta
 nab God ago Bugaw Dimunta in gamuk
 atoranmo kazaq ya ibilenaq ham. Mataw
 nigrqrud afaqan nig daqayta nawa ni
 nibaq tunim osay haqayta ham.

²⁴ Teq ya ihol eman danmehb a hi iyaq
 ham. Ya moqnan a hi rabaiqta ham. Haiq
 ham. Ya dan muzaiqta naqmo ya tumuz-
 daiq ham. Ya inad amulikmo usaqta na ya
 Iyatha Yesus kabiy yagta na tiqem bugnan
 haqaiq ham. Teq yaqgo kabiy na ya God
 agem dimunta on mataw negim in gimen
 dante amta naqmo ago ya bilaqad luwaiqta
 ham.

²⁵ Ne huritiy ham. Kwaziqmo ya ne
 gilikmanib osad ya God ago maror aga-
 mukan gibilenaiqta ham. An muran ya
 inad emaiq, Abeb ne ya inobun ahol a ta
 hi waq daqay haqaiq ham. ²⁶ Nazaq iyan
 ya kawa ulalabmo ne tigibile sireqaq
 ham. Ne gilikmanib araq moqeq meqniy
 hasid na in yaqgo afaqan a hi iydaq ham.
²⁷ Na ezaqgo ya God ago anad bunmo ne
 gibilenad ya rabim ihol a hi hureq has ham.
²⁸ Negmo gihol asawan woltayad osiy ham.
 Ad ne gigo sipsip na ne giwamuz naqmo
 hiqiyiham. God ago Bugaw Dimunta ne
 giqeman ne mataw danmepta iyim ne gigo
 on mataw na God inmo atatin anedan amalib
 in gizayta ham. Nazaq iyan ne giwaz
 meqniy God ago on mataw Yesus ago nan

huritayta na anononmo giwamuziy ham. ²⁹ Ya inad kazaq emaiq ham. Ya ne gihu-loseq lehsa abeb gaun kwasik meqin diqta ne giduganib tubol daqay ham. Boleq in ne gigo sipsip kabemmo gimeqin ton daqay ham. ³⁰ Sa negmo giduganib mataw asor eraqeç gamuk katiya tibilaq daqaymo ham. Ad in ne gilikmanib disaipel asor gi-hureqid in gimuzgo haqad gikat neg daqay ham. ³¹ Nazaq iyan kam bunmo ne gihol asawan woltagad osiy ham. Ulig ezeq-man taromab zeqab inaqmo ya ne amulik-mulikmo gidek wazad osta ham. Ya imeqil woqsa suleq negyaiqta na ne anadin emiy ham.

³² Muran ya ne giceman Iyahta abenab tuqosay ham. Teq God agem dimunta negaqla ago agamukan na in ne tigelumsih-daqmo ham. Gilumsihsa ne gamuk na muz bugad teq ne giwaz meqniyeq tuqos daqay ham. Ossa abeb God in ago on mataw tawonta na bummo ago os dimunta negsa ne os dimunta na tuwaq daqaymo ham.

³³ Ya ne gigo mat araq ago silva teq gol teq tubusan araq diq a hi utet ham. ³⁴ Yaqmo ibenab kabiyl awaz meqinta emad ya nagah ago siqim iyyaigta na yaqmo iholyon zayyaiqta ham. Teq mataw ya nenaq bolta na yaqmo giwamuzyaiqtamo ham. Na ne tuhuritiy ham. ³⁵ Ya kabiyl bunmo tigiqisihunta ham. Nazaq iyan ne ya isen muzinad ne giholtuw bulad mataw gigo zaway haiqta na gilumsihiy ham. Ad ne lyatha Yesus gamuk bilamta na anadin emiy ham. In bilam, Ni mat araq ulum-sihad nagah ugeq teq ni ninad ayahmo dimniydaqta haqad in bilam ham. Ad ni ninad dimniydaqta na in mat ning nagah waqim anad dimniyta na tuquriyamdaq haqad in bilam ham.

³⁶ Ari Pol gamuk na emim tihiqiyan in abakbakan ulum laquwim turad teq in mataw aseseqta na nenaq God inaq gamuk tiqemiy. ³⁷ Sa mataw na bunmo ayahmo tigaq yaqay. Ad in Pol wazim ay netad tiqlawun yaqay. ³⁸ Teq Pol bilam, Ne ya inobun ahol a ta hi waq daqay hamta naqmo ago in gihol afaqan diq tiqiy yaqay. Gihol afaqan iysa in Pol ad muyib tilehiy.

21

Pol muyib gwalim Jerusalem-ub lah

¹ Ari i mataw na gihulosad muyib gwalan muy aben tuhulos ug. Hulos ugan i eraqad nud Kos-ib tileh. Lehim nab i usim eraqim nud ta araq anan Rodes haqaytab tileh. Lehim Rodes hulosad i uliq araq lanib usaqta anan Patara haqaytab tu-wow. ² Woqim uliq nab i muy araq saw Fonisiya-ib lehgo emsa ahol waqad i muy nab gwalim tileh. ³ Lehad nud Saiprus

agerab iyim ahol waqad i ginasaran ban tuquriyam. Uriyamad le saw Siriya-ib gwahtiqad i uliq Tair-ibmo tuwow. Na ezaqgo in muyib es asor emid uliq nab tiqgo haqad. ⁴ Sa i inaqmo hitiqim le disaipel ginagunim tigibiy. Gibiyad i kam 7 nazaqmo uliq nab tuqos. Ossa God ago Bugaw Dimunta disaipel na ginadib gamuk emsa in Pol kazaq bulon yaqay. Ni Jerusalem-ub hi leh haq yaqay. ⁵ Sa i uliq nab osan kam lehgota na tugwahtiyan i uliq hulosad gisen dan tuqug. Ugim lehsa mataw na gigo aw amun nenaqmo in i giwaqim giqad uliq asan ban tilehiy. Lehim kamis aqurumbib i bummo gibakbakan ulum laquwim turad God inaq gamuk tiqem. ⁶ Emim hulosad i eraqim tursa in bo i giben wazad bilaqiy, Bo ta lehiyyo haqiy. Sa i nazaqmo in giben wazad bilaw, Bo kab ta osiyyo haw. Haqad i muyib gwalsa in giquliqab muleqim ta lehiy.

Uliq Sisariya-ib nantut araq anan Agabas haqayta na in Pol anan bilam

⁷ Ari i muyib gwalim uliq Tair hulosad le uliq Tolemes-ib tuwow. Woqim nab i le Krais ago on mataw asor gibiyad giben tuwaz. Giben wazim i nenaq kam amulikmo tuqos. ⁸ Osim i Tolemes hulosad uliq Sisariya-ib tileh. Lehim i mat anan Filip haqayta na ago bitab tugwahti. Filip in mat araq Yesus awagamun dimunta on mataw gibilen kemyaqa amatin araq. Teq kwaziqmo in mataw 7 uliq Jerusalem-ub Aposel gilumsih yaqayta na gigo araq iyim osta. Ari i mat na ago bitab gwahtiqim inaq tuqos. ⁹ Sa in amigniz awweweqmo mat a hi waqiyta na in gimam inaq bit nab os yaqayta. Osad teq in God ago nantut iyim ago gamuk bilaq yaqayta.

¹⁰ I uliq Sisariya-ib kam asor tuqosan teq God ago nantut anan Agabas haqayta na saw Judiya hulosim tigewom. ¹¹ Gewoqim i gigerab bolim in Pol ahulib am hurorun usta na waqim inmo ahol abensen irqurim bilam, God ago Bugaw kazaq bilaqiq ham. Juda mataw Jerusalem-ubta na in am ka anamren kazaq irqureq mataw en ta araq Juda a haiqta na tineg daqay haqiq ham.

¹² Haqanmo i gamuk na huritim i teq on mataw uliq nabta na nenaq i bummo ginad awaz meqin amalib Pol kazaq bulonyauq, Ni Jerusalem-ub hi gwaleh haqyauq. ¹³ Haqsa Pol amenin emim bilam, Nagaqgo ne gaqad ya iqutil eman tartaynan tonaq? ham. Juda mataw ya iqirqr daqayta na ago ya a hi rabaiq ham. Ya Jerusalem-ub lehid in ya inol emid moqdaiqta na ago ya a hi rabaiqmo ham. In nazaq ya itonsa Iyahta Yesus abin ayah iydaq ham. Nazaq iyan ya uliq Jerusalem-ub tilehgomo iyim osaiq ham. ¹⁴ In nazaq haqsa i anad

buliyan yo hiqiyauq. Nazaq iyan i gamuk na hulosad bilaw, Naqmo Iyahta ago anad haw. In anad emaqta nazaqmo in emid tugwahtiqdaq haw.

Pol uliq Jerusalem-ub irquran ossa mataw amen hazizir emiy

Pol le uliq Jerusalem-ub gwahtim

¹⁵ Ari kam asor le tihiqiyani i gihol wastayim uliq Sisariya hulosim Jerusalem-ub tugwalehad luw. ¹⁶ Luwsa Sisariya-ib disaipel asor i nenaq lehad in i giwaqim giqad nud Saiprus-ib mat araq anan Nas-nan haqayta ago bitab tilehiy, i mat na inaq osgo haqad. Mat na kwaziqmo Yesus anan helmo tihamta. ¹⁷ Ari i mat na inaq osim teq i eraqim le uliq Jerusalem-ub tugwahti. Gwahtigan i gimaqbaban Krais ago on matawtana in gigem dimunta igad in i giwazinim giqad in gigo bitab tilehiy.

¹⁸ Lehim usim era tarommo i Pol inaq Jems ahol waqnan tileh. Lehim i Yesus ago on mataw gigo aseseqta na in Jems inaq ossa i tigibiy. ¹⁹ Gibiyad Pol ago zeq dimun negad giben tuwaz. Giben wazim teq God in amalib on mataw en ta asor Juda a haiqta nagan gigo hib kabiyaq daq emyaqta na awagamun in tigibilenyaq.

Mataw aseseqta Pol Tempel-ib lehgo buloni

²⁰ Gibilenan mataw aseseqta na huritum God abin tiqiluw yaqay. Ad in Pol buloniy, I gimaqbab haqiy ni hurit haqiy. Juda gilikmanib on mataw kuluwmo diq Yesus anan helmo tihaqiyta haqiy. Ad in bunmo God ago maror Moses bilamta na adan muznan giwaz diq meqniyyayta haqiy. ²¹ Teq mataw na ni nibin kazaq huritiyta haqiy. Ni bilaqaq, Juda mataw Yesus anan helmo haqad og saw haresmo mataw en ta asor Juda a haiqta nagan gilikmanib osad in God ago maror Moses bilamta na gileh ugad anadin a ta hi em daqay haqaq haqiy. Ad ni bilaqaq, Juda mataw na in gisesan gigo daq bunmo a ta hi muzinad in gigo onmin gihol abatan asan a ta hi urot daqay haqaq haqiy. Mataw nazaq ni niwigamun huritiyta haqiy.

²² Teq i ezaq tonam? haqiy. Ni tubolka ta in nabag tuhurit bugiy haqiy. ²³ Nazaq iyan i ni nibilenid ni kazaq em haqiy. I gigo hib mataw aweweinqmo God inaq an amugan wazim in gihol udinim osayta haqiy. ²⁴ Ni mataw na giwaqeinq nenaq leheq in gihol wastitaygo adan bunmo ni nenaq em bug haqiy. Ad in giqensan urot daqayta na ago anawun ninmo zay neg haqiy. Nazaq ni emid teq mataw bunmo ginad tigem daqay, Gamuk ni nibinib emiyta na alulin haiqta haq daqay haqiy. Ni God ago maror

Moses bilamta na ago gunun muzinad ni maror na wazan a hi woqaqta haq daqay haqiy. ²⁵ Ari on mataw en ta asor Juda a haiqta nagan gigo asor Yesus anan helmo haqiyta na i kwaziqmo an amugan wazim in gimen nan eman lehan i kazaq bilawta haqiy. Mataw god katiyta ayon tamaz emad karuw wol emiyta na in hi neqiy haw haqiy. Ad in ned hi neqad teq in karuw ginatguman huroran moqiyta na hi neqymo haw haqiy. Teq in an haresmo hureeqeq inaq hi usiy haw haqiy.

²⁶ Mataw aseseqta na nazaq Pol bulonan Pol usim era mataw aweweinq na giwaqim nenaq lehim in God ameb gihol abusirinan hiqiygo akabiyian tigemim teq in Tempel-ib tilehiy. Lehim in gihol God ameb dimniy has daqayta na akaman kam gineh teq gwahtiqdaqta na ago in mataw tamaz emayta tigibileniy, kam 7 nazaq le tihiqiyid teq in bunmo ta boleq giholyon tamaz tigem daqay haqad.

Juda mataw Pol Tempel-ib waziy

²⁷ Ari gihol abusirinan hiqiy hasdaqta akaman 7 na le tihiqiyann tonsa Pol Tempel-ib tilah. Lehim luwsa Juda gisenlul ta asor saw Esiya-ib osim boliyta na in nab luwad Pol ahol tuwaqiy. Ahol waqad in on mataw nab luwiyta na bunmo gigem wazan eraqsa in Pol tuwaziy. ²⁸ Wazad in atoranno lileyim bilaqiy, Isrel matawta haqiy ne boleq i gilumsihiy haqiy. Mat kaway ka in i gigo dauh teq i gigo maror teq i gigo lotu abitan ka gibayid woqgo haqad in mataw uliq bunda gibilen bugaqta haqiy. Teq in daq naqmo amomo a hi emaqta haqiy. In Grik mataw asor giwaqim giqad Tempel-ib bolim in saw gununta ka eman anumlan inaq tigiy haqiy. ²⁹ Juda mataw na in tekomo Pol ayow mat araq anan Trofimus uliq Efesus-ibta na inaq uliq aduganib luwsa in gibiyiyta. Nazaq iyan abeb Pol le Tempel agelin aduganib luwsa in ahol waqad ginad emiy, Pol Efesus mat na waqim ad Tempel aduganib gwahtimta daqagya haqiy.

³⁰ Mataw nazaq lileyeq bilaqsa Jerusalem-ub on mataw bunmo tiriteniy. Ad in bunmo sibim bo humab wolim in Pol wazim hureqim ad asan ban a lehim teq hidmo in Tempel agelin ago dan ez bunmo tuqot bugiy.

Rom gigo mataw bab emayta asor Pol waziy

³¹ Ari kam nab bab mataw gigo dambetta araq ago bab mataw 1,000 neqaq uliq Jerusalem-ub osiy. Ossa mataw biyahta na Pol wol emnan tonsa bab mat dambetta na gamuk kazaq hurit. Jerusalem mataw bunmo humab wolim gamuk haresmo bilaqad bab ayahta wazan

tigeraaq haqiy. ³² Nazaq iyan hidmo in bab mataw gigo aseseqta in ahaqenibta na asor gigo bab mataw nenaqmo giwaqim in bunmo sibim mataw wagayta na gigerab tuwolehiy. Wolehan Juda in bab mat danmehta na ago mataw kabemmo nenaq bolsa gibiyad in Pol wol yaqayta na tuhulosiy. ³³ Hulosan bab mat danmehta na bolim Pol tuwaz. Wazim in ago bab mataw gibilan, Sen giger waq a boleq amalib mat ka am waziy ham. Haqad in mataw nab turiyta na tisusumun nag, Ka nog? ham. In ezaq ton? ham. ³⁴ Haqsa on mataw biyahta na gigo asor gamuk araq bilaqsa asor gamuk ta araq bilaq yaqay. In saw garak ayahmo emsa bab mat danmehta na in gamuk alulin huriitgo eman haiq. Nazaq iyan in ago bab mataw gibilenan in Pol waqim ad in gigo bitab tilehiy. ³⁵⁻³⁶ A lehsa on mataw dauh biyahta na gimuzim lehad in atoranmo lileyim bilaq yaqay, Wol emid moqan haq yaqay. Haqsa bab mataw na Pol wazim ad lehim bit na ago kaban asenab gwahtiqsamo Juda mataw na Pol wol emgo giwaz meqin diq iysa iyan bab mataw na Pol sorim ad tugwalehiy.

Pol anad ezaq emad ago kabi yemyaqtan ago in Juda mataw gibilan

³⁷ Bab mataw na Pol waqeq ad in gigo bit aduganib a lehgo haqsamo Pol in gigo mat danmehta na tubulon, Ya gamuk araq nibilennan ham. Haqan mat na bilam, Ni Grik nan bilaqaqta ye? ham. ³⁸ Ya bilay ni Isip-ub mat ilatow gavman giqez othasad mataw tagumta 4,000 nazaq giqad saw amatawun haiqtab lahta naqmo hay ham. ³⁹ Haqan Pol bilam, Ya Juda mat araq ham. Ya uliq Tarsus saw Silisiya-ibta ham. Yaqgo uliq na abin ayahta usaqta ham. Ni ya ihulosid ya on mataw ko gibilennan ham. ⁴⁰ An bab mat danmehta na dimunmo haqan Pol nab kaban afaqinib turad in aben wazan eraqan on mataw giqez tihiqiyiy. Giqez hiqiyen in Hibru nanib gibilenim kazaq bilam,

22

¹ Ya imaqbaban teq ya imaman ham ne gidek emiy ham. Ya ne gigo gamuk amenin emeq ihol adanin tuqwaynan ham. ² Pol Hibru nanib gamuk emsa iyan mataw nab turiyta na gidek sirirsa in giqez hikidik iyim tok nemim turiy. Tursa Pol kazaq bilam,

³ Ya Juda mat araq ham. Ya inen uliq Tarsus saw Silisiya-ibtab iqamta ham. Teq ya uliq ayahta kabmo osim ayah iytu ham. Ad ya mat anan Gamaliyel haqayta na ago hib suleq emta ham. Mat naqmo i gisesan gigo maror asuleqin yagta ham. Nazaq iyan ya God aqez muzgo iwaz diq meqniyyaiq ham,

muran ne emayta nazaq ham. ⁴ Kwaziqmo mataw dante muturta kawa ya muzaqta ka in muzinsa ya gimeqin tonad afaqan negsa in moq yaqayta ham. Mataw on inaqmo ya giqirqureq giqad le bit giqirquran osaytab giqemayiqta ham. ⁵ Tamaz mat danmehta na teq i gigo mataw marorta na bunmo in yaqay tuhuritayta ham. Ne susumun negid in ya iwagamun nazaq diq ne tigibilen dagay ham. Mataw aseseqta naqmo in i gimaqbaban uliq Damaskus-ib osayta na gimen nan mar tonim yagan ya waqim ad Damaskus-ib tileh ham. Ya leheq on mataw dante muturta muzinayta na giwazeq giqirqureq giqad Jerusalem-ub ta bolid in gigo daq na amenin faq neg dagay haqad ya lehta ham.

Pol in Jesus anan helmo hamta na ananin tut

⁶ Ari ya Damaskus-ib lehad luwim zeq ayahtab 12 kilok nazaq ya uliq sinsin tiqiyasmo saw anuwan araq ayahta kaitab hikliyanim hitiqim tiqililut yag ham. ⁷ Sa ya ogib woqim usad mat araq aqez kazaq ibilensa ya huriit ham. Sol, Sol ham naqaqgo ni ya imeqin tonaq? haqad in bilam ham. ⁸ Haqan ya amenin emim bilay, Iyahta hay ni nog? hay ham. An in ya ibilan, Ya Jesus Nasaret-ibta haqad in bilam ham. Mat ni meqin tonaqta naqmo haqad in bilam ham. ⁹ Sa mataw ya nenaq lehta na in saw anuwan na ahol waqiy ham. Teq in mat aqez ya ibilanta na a hi huriity ham.

¹⁰ An ya bilay, Iyahta hay, teq ya ezaq tondaiq? hay ham. An Iyahta ibilan, Ni eraeq Damaskus-ib leh haqad in bilam ham. Uliq nab mat araq teq kabi y aqez ya ninmen tuwastitayan usaqta na ago tini-bilen bugdaq haqad in bilam ham. ¹¹ Teq saw anuwan ayah diqta na ya ime ulum-woran ya nagah araq ahol waqgo huiq ham. Nazaq iyan mataw ya nenaq lehta na in ya iben wazim iqad Damaskus-ib tilehiy ham.

¹² Lehan Damaskus-ib Juda mat araq anan Ananayas haqayta nab os ham. In God anadin diq emad ago maror Moses bilamta na adan muz naqmo hiqiyaqta amatin araq ham. Teq uliq nab Juda on mataw bunmo in anan bilaqay, In mat dimunta haqayta ham. ¹³ Mat na ya igerab bolim turad ibilan, Ya imaqbab Sol ham ni nimeqnagin hastitayan haqad in bilam ham. Haqan muran diq nawaqmo ya ime tihastitayan ya mat na ahol tuway ham. ¹⁴ An in bilam, I gisesan gigo God in ni nilumim tiniwam haqad in bilam ham. Ni God-mo anad huriitgo teq ni Mat Titnonta na ahol waqgo teq ni Mat na aqezab gamuk gwahitimta na huriitgo haqad in tiniwam

ham. ¹⁵ Mat Titnonta na in ni niqemid ni leheq nagah ni ahol tuwamta na teq gamuk ni tuhuritta na ni on mataw bunmo tigibilendaq haqad in bilam ham. ¹⁶ Ari ta nagaqgo ni nab osmo osaq? haqad in bilam ham. Ni eraqeq mat na nilumsi-hgo lilewunad anan biy haqad in bilam ham. Anan biyad yuw huzsa in ningodaq meqinta nagan gisuholid hiqiy bugan haqad in bilam ham.

God Pol eman in on mataw en ta asor Juda a haiqta nagan gigo hib lahta awagamun

¹⁷ Abeb ya Jerusalem-ub ta bolim Tempel-ib lehim God inaq gamuk emad tuqos ham. Nab osad ya nagah araq sen qwayim ahol waqayta nazaq nog ya ahol way ham. ¹⁸ Ahol waqsa Iyahta ya imeb turad in kazaq ibilan ham. Hidmo ni Jerusalem huloseq leh haqad in bilam ham. Ni ya iwagamun uliq ayahta kab bilaqsa mataw a hi hurit daqay haqad in bilam ham. ¹⁹ Haqan ya bilay, Iyahta hay haiqgam hay. Mataw kabta in yaqgo tuhurit kemiya hay ham. Kwaziqmo ya Juda gigo bit humab wolaytab leheq ya on mataw ni ninan helmo haqayta na giqirqrad ginol titayyaqta haqad ya bilay ham. ²⁰ Teq ningo kabiliby mat Stiven ni nihol awagamun bilaqsa mataw wol eman moqsa kam nab yaqmo in gigerab turad ya inad diq dimniya hay ham. Mataw Stiven wol emsa ya in gigo tubusan wamuzim turta haqad ya bilay ham. ²¹ Haqan in kazaq ya ibilan ham. Ni leh haqad in bilam ham. Ya niqemid ni on mataw en ta asor Juda a haiqta nagan uliq pesantab osayta na gigo hib tilehdaq haqad in bilam ham.

Pol abin uliq Rom-ub usaqta na ago in bab mataw gibilan

²² Ari Juda mataw na Pol ago gamuk huritad ossa le in bilam, Iyahta ya iqeman ya on mataw en ta asor Juda a haiqta nagan gigo hib lehta haqan nabmo in gigem timeqniysa in atoranmo lileyim bilaqiy, Wol emid moqan haqiy. Mat nazaqta na in og kab kayeqmo ta hi osan haqiy. ²³ In haresmo ek tonad in gigo tubusan asor hasim haresmo hunegad in honhon hiksoqorim hunegan gwalyaq. ²⁴ Mataw biyahta na nazaq emsa bab mat danmepta na bilaqan in ago mataw Pol waqim ad in gigo bitab tilehiy. A lehan teq in ago mataw na gibilenim bilam, Ne Pol wolad susumun ugeq on mataw nagaqgo amalib ek tonayta na ago ne hurit kemiya ham. ²⁵ Haqan bab mataw na Pol a lehim aben am wazim sorqenan tursa teq Pol in gigo mat ayahta araq nab turta na bulon, Mat abin uliq Rom-ub usaqta na ne kazaq hazizirib a hi

emadmo tuwoltitay daqay ye? ham. Ne gigo maror nazaq bilamta ye? ham.

²⁶ Haqan mat na Pol ago gamuk huritim in lehim bab mat danmepta na bulon, Ni nazaq hi em ham. Mat ko abin Rom-ub usaqta ham. ²⁷ An bab mataw gigo danmepta na lehim Pol tisusum ug, Ni ya ibilen kem ham. Helmo ni nibin Rom-ub usaqta ye? ham. An Pol bilam, Eqe ham. ²⁸ An bab mat danmepta na bilam, Ya naw ayahmo hulosim ya ibin Rom-ub emta ham. An ta Pol bilam, Ya haitq ham. Ya inen iqeman ya ibin Rom-ub usaqta ham. ²⁹ Pol nazaq haqanmo bab mataw in wolad susumun ug daqayta na rabunim le pesanmo turiy. Sa in gigo mat danmepta na tirabmo. Na ezaqgo in mat abin Rom-ub usaqta na samanta sen-ib irqurta na ago iyan.

Pol Juda gigo kaunsel ginognib turad gamuk bilam

³⁰ Ari usim eraqim tarommo bab mat danmepta na in Pol naga daqin diq eman Juda mataw nan ugiyta na hurit kemnan haqad in Pol hulosan asanib gwahtim. Gwahtiqsa teq in mataw tamaz emayta gigo aseseqta na teq Juda gigo kaunsel ayahta na amatawun bunmo gimek nan eman in bo humab tuwoliy. Humab wolim ossa bab mat danmepta na in Pol waqim ad hitiqim eman kaunsel ginognib titur.

23

¹ Ari Pol Juda gigo kaunsel ayahta na gimek turad in atoranmo gibilek kazaq gibilan, Ya imaqbaban ham ya og kab osad ya God anad muz bugad osim bo muran kawa ya in anad tumuz tutaiq ham. Ya igem dimunno diq ussa ya iholib daq araq meqinta a hi loyinaiq ham. ² In nazaq bilaqan tamaz mat danmepta anan Ananayas haqayta na in mataw Pol agerab turiyta na gibilan, Ne atenmos woliy ham. ³ Haqanmo Pol bulon, God teq ninmo tininoldaq ham. Ni bilaqne bitgo kadug hiran adahuran tiqiyta na nog ham. Bit anamren kadug na balaw tonan hus diq iyan mataw ahol waqad anan bilaqay. Dimunta haqayta nazaq nog ni ham. Ni i gigo gunun itiyonim ya inolgo tibaqaq ham. Ezaq teq ni hazizir ka ago gunun titnoneqmo muzinad yaqgo daq tuqulum kemdaq? ham.

⁴ An mataw Pol agerab turiyta na buloni, Ni God ago tamaz mat danmepta na nazaq bilawunaq e? haqiy. ⁵ An Pol bilam, Ya imaqbaban ham mat ko in tamaz mat danmepta na ya a hi hurit ham. Ya huritta iyeq ya nazaq a hi bulon nag ham. Na ezaqgo God ago mar bilam,

Ningo mat marorta anan meqin hi bilaq
haqad in bilam ham. *Kisim Bek*
22.28

⁶ Ari mataw dauh gigermo humab nab
osiy. Dauh araq in Sadyusi teq araq na
in Farisi. Na ago Pol tuhurit. Nazaq iyan
in Juda gigo kaunsel ayahta nab turad in
lileyim bilam. Ya imaqbaban ham ya Farisi
araq ham. Teq ya imaman in Farisi-mo
ham. Ya inad emaiq, Hel diqtaqmo mataw
moqeq teq in hodhodab tiqeraq daqayta
haqaiq ham. Ya gamuk amulik naqmo waz
naqmo hiciysa iyan muran in hazizir kab
ya ticiqemay ham.

⁷ Pol nazaq bilaqanmo an mug araq
ayahta Farisi teq Sadyusi gilikmanib
tigeram. Eraqan mataw na gihol huseran
dauh gigermo tiqiy. ⁸ Na ezaqgo Sadyusi
ginad kazaq emayta. Mataw tumoqiyta
na hodhodab a ta hi eraq daqay haqayta.
Teq angelo haiqgam haqayta. Teq bugaw
haiqmo haqayta. Ari Farisi in nagah nagan
bunmo ginan helmo haqayta. ⁹ Nazaq
iyan kaunsel bunmo era haresmo tiqek
ton yaqay. Sa Farisi gigo asor ginan mataw
Moses ago gunun hurit kemiyta haqay na
in eraqin gamuk atoranmo kazaq bilaqiy,
I mat ko ahol waqan in gunun araq a hi
itiyon haqiy. Luweq angelo araq o bugaw
araq in mat ko bulonta daqag iydaq haqiy.
¹⁰ Haqsa bab ayah diqmo in gilikmanib
tugwahtiqlan tonsa bab mat danmepta na
tirab, luweq dauh giger na Pol kozaq kazaq
wazeq hureq ugad aliqabmo bultayid in
tumoqdaq haqad. Nazaq iyan in ago
bab mataw gibilenim bilam, Ne woleheq
mataw na ginolad gibenab Pol waqeq ne
gigo bitab a lehiy ham.

¹¹ Ari kam nab taromab Iyahta bo Pol
agerab gwahtiqlan turad bulon, Ni niwaz
meqniyeq tur ham. Ni yaqgo gamuk kab
uliq Jerusalem-ub atoranmo bilamta kazaq
mo ni Rom-ub leheq yaqgo gamuk tibilaq-
daqmo ham.

Juda mataw asor Pol wol emgo an amu- gan waziy

¹² Ari saw tihaustayan Juda mataw asor
ulilemim osad an adugan wazim bilaqiy, I
didaq hi negad yuw hi uluwuq haqiy. I
nazaq gihol udinad le i Pol wol emuq haqiy.
Hel diqtaqmo haqiy. Pol kayeqmo ossa i
didaq a hi negad yuw a hi uluwam haqiy.
Ari i gigo araq gamuk ka itiyonid Mat Iyah
in wol eman haqiy. ¹³ Mataw ulilemim
an adugan waziyta na in kabemmo diq
ginulinqan 40 uriyamiyta. ¹⁴ In an adugan
tuwazim teq in tamaz mataw aseseqta
giyogniz Juda gigo mataw marorta nenaq
gigo hib lehim bilaqiy, I Mat Iyah ameb
an adugan atoran diqmo wazim bilaw, Hel
diqtaqmo i Pol tuwol emam hawta haqiy.

I Pol a hi wol emad i nagah araq diq giteb
emeq a hi neqam haw haqiy. I gamuk ka
itiyonid Mat Iyah i ginol eman haw haqiy.
¹⁵ Nazaq iyan ne teq Juda gigo kaunsel
ayahta na amatawun bunmo nenaq gamuk
emid bab mat danmepta na amen lehan
haqiy. Lehid ne buloniy, I Pol ago gamuk
alulin tuhuritnan haqad ne buloniy haqiy.
Ne nazaq bulonid in Pol emid ne gigo hib
hitiqan haqiy. I gihol asawan tuwastitay
haqiy. Pol bo ne gigo hib a hi gwahtiqlamo
i tuwol emam haqiy.

¹⁶ Ari mataw na nazaq danib ulilemep
tureq Pol bolsa in wol emgo an adugan
waziya na ago Pol awaw matta araq tuhu-
rit. Huritim in le bab mataw gigo bitab
gwahtiqlan Pol tubulon. ¹⁷ Bulonan Pol in
bab mataw gigo mat ayahta araq bulonan
bolan in bulon, Amun minminta ka waqeq
inaq ne gigo mat danmepta na ago hib
hidmo a leh ham. In gamuk ulilemabta
araq bulondaqta a bol ham. ¹⁸ Haqan mat
na amun waqim ad ago danmepta ago hib
tilah. A lehim in bulon, Mat irquran osaqtta
anan Pol haqay na in ya ibilenaq ya amun
minminta ka waqim ningi hib a bol ham.
In ago gamuk ulilemabta araq nibilengo
iyan ham.

¹⁹ An bab mat danmepta na amun aben
wazim ad adek ban a lehim in gimo giger
osad teq in tisusumun ug, Ni ya naga
gamukin diq ibilennan bol? ham. ²⁰ Haqan
amun minminta na bilam, Juda mataw an
amugan tuwazim in ni susumun nigid ni
babeq Pol emid Juda gigo kaunsel ayahta
na gigo hib gelitiqdaq haqad in bilaqiy
ham. In katifeq nibilen daqay, I Pol ago
gamuk alulin hurit kemnan haq daqay
ham. ²¹ Teq ni in gigo gamuk na hi muzin
ham. Na ezaqgo in gigo hib mataw asor
gidauhan 40 nazaq bilaqiy, Hel diqtaqmo i
yuw didaq udineq luweq i Pol tuwol emam
haqad in bilaqiy ham. I gigo araq gamuk
ka itiyonid Mat Iyah in wol eman haqad in
bilaqiy ham. In gihol asawan tuwastitayim
ni ege nemdaq naqmo in amen emad osay
ham. ²² Amun na ago gamuk tihiqiyan bab
mat danmepta na eman lehsa adek wazim
bulon, Gamuk kawa ni ya ibilanta ka ni mat
araq hikidik bulon ham.

Bab mat danmepta na Pol eman gavman amepta Feliks ago hib lah

²³ Ari bab mat danmepta na in mataw
bab emayta gigo aseseqta giger giliwunan
bolan in gibilan, Ne leheq bab mataw 200
nazaq giwaqd ne mataw hos-ib luwayta
70 nazaq giwaqiyom ham. Teq mataw em
wazayta 200 nazaq ne giwaq toniyom ham.
Giwaqeq ne uliq Sisariya-ib lehgo gihol
wastitayeq osiy ham. Oseq teq taromab 9
kilok nazaq ne tileh daqay ham. ²⁴ Teq ne

Pol ayon hos araq in amalib oseq lehdaqta na ne waqeq inaq lehiy ham. Ad ne mat na anononmo wamuzeq gavman ameba Feliks ago hib a lehiy ham. ²⁵ Haqad in mataw na gibilenim hulosad in sansandek araq kazaq mar ton.

²⁶ Yaqmo Klodiyus Lisiyas ham. Ya gamuk ka mar tonan gavman ameba mat ayah Feliks ning hib lehaq ham. Zeq dimun ham. ²⁷ Juda mataw mat ka wazim tuwol emnan tonsa yaqgo mataw nenaq lehim gibenab waw ham. Mat ka abin Rom-ub usaqta na ago ya huritta iyim ya ulumsih ham.

²⁸ Teq ya gamuk alulin in ugiyta na hurit kemnan haqad ya waqim ad Juda gigo kaunsel ayahta na gigo hib hitiy ham. ²⁹ Hitiqim ya in gigo gamuk huritim teq inad tiqem ham. In gimo gigo maror agamukan naqmo amalib in mat ka nan ugayta ham. Mat ka daq araq meqinta i wol emamta o i irqrurama na hajiq ham.

³⁰ Teq Juda mataw asor ulilemim an adugan wazim in mat ka wol emgo bilaqiyta na ago ya huritim hidmo ya mat ka ning hib eman lehaq ham. Ad ya mataw nan ugayta na tigibilen ham. Mat ka ezaq tonan in nan ugayta na in gimo leheq ni ninognib bilaqsa ni huritdaq haqad ya gibilen ham. Nawaqmo ham.

³¹ An teq mataw bab emayta na in gigo danmebta na aqez muzinim taromab in Pol waqim ad uliq Antipatris-ib tilehiy. ³² A lehim saw tihastitayan teq bab mataw gisenab boliyta na bunmo muleqim in gigo bitab ta lehiy. Lehsa mataw hos-ib luwayta naqmo in Pol waqim ad uliq Sisariya-ib tilehiy. ³³ In le Sisariya-ib tugwahtiqaq in sansandek na gavman gigo ameba na ugad teq in Pol a bolim anognib eman titur. ³⁴ Tursa gavman ameba na sansandekib gamuk bunmo ahol tuwaq bugim teq in Pol tisusumun ug, Ni saw edobta? ham. An Pol bilam, Ya saw Silisiya-ibta ham. ³⁵ Haqan gavman ameba na bilam, Ari ham mataw ni nimalib nan emayta na in bo gwahtiqid nab teq ya ning hazizir tuhuritdaq ham. Haqad in bilam, Gavman gigo bit Herot wazan eramta nab ne Pol emid osan ham.

24

Juda gigo mataw aseseqta na Pol hazizirib nan ugyi

¹ Abeb kam abaynagin le thihiqyan tamaz mat danmebta Ananayas in Juda gigo mataw marorta asor teq Juda mat araq Rom gigo maror hurit kamta anan Tertulus

haqayta na giwaqim nenaq uliq Sisariya-ib tithiqiy. Hitiqim in gamuk Pol hazizirib uggo boliyta na gavman ameba na bulonsa in tuhurit. ² Huritim in Pol lilewunan bolan Tertulus eraqim Pol amalib nan tiqemyaq. Ad in bilam, Mat ayah Feliks ham, ni i Juda on mataw gilumsihsa i wastitayimmo afaqan hajqmo os-augta ham. An wol nagah na hajq ham. Ning ninad dimunta na amalib ni nagah kwaziqmo i gimeqin tonyaqta na wastiyan i gigo os tidimniy ham. ³ Og saw bunmo ning kabiy daq bunmo dimun diq iysa i ahol waqad i gigem dimdikan iysa esey diq nigauq ham.

⁴ Luweq ya gamuk sisaqmo hureqsa ni nituw tihiqiydaq ham. Nazaq iyan ya tisusumun nigaiq ham. Ni nigem dimunta igad i gigo gamuk asimqanta ka i bilaqsa ni hurit ham. ⁵ I mat ka ahol waqan in daq meqinta kabemmo emaqta ham. Uliq bunmo Juda osayta nab in ar mug teq an wol ayahmo eman Juda gilikmanib gwahitiqaqta ham. Teq in mataw lotu katiyta emayta ginan Nazarin* haqayta na gigo mat ameba araq ham. ⁶⁻⁸ Teq naqmo amomo a hajq ham. Mat ka Tempel ago gunun araq ayahta bay tuwaqnan diq ton ham. In nazaq emnan tonsa i tuwaz ham. An muran ninmo nagah ka bunmo ago ni mat ka susumun ugeq teq i hazizirib emauqta ka alulin ni inmo aqezab tuhuritdaq ham. ⁹ Haqan Juda mataw nab osiyta na in Tertulus ulumsihnan haqad era Pol amalib nan emad bilaq yaqay, Gamuk Tertulus bilamta na bunmo in heltaqmo haq yaqay.

Pol in Feliks gamuk bulon

¹⁰ Ari gavman ameba na Pol ahol waqad afaqin ugan in eraqim Juda mataw na gigo gamuk amenin emim tibilam, Mat ayah ham ulig kabemmo ni Juda on mataw gigo megistret iyim tuqos ham. Nazaq iyan ya inad dimniysa mataw ko gigo gamuk amenin emad ihol adamin tuqwaynan ham. ¹¹⁻¹² Ilatow kam 12 nagzaq ya Jerusalembul lotu emnan tileh ham. Lehim Tempel-ib teq bit humab wolayta nagab teq uliq aduganib ya mat araq inaq an mugsia in a hikidik ibiyiy ham. Ad ya on mataw gigem wazan eraqsa in bab emiyta na hajqmo ham. Ni mataw ko susumun negid teq gamuk kawa ya bilaqaiqta ka in gimo teq tinibilen daqay ham. ¹³ Gamuk nawa in amalib ya iwaqim hazizirib iqemayta na in alulin hajq ham. Mataw ko gamuk araq alulin helta ni ninad em hasdaqta na emid a hi gwahtiqaq ham.

* ^{24:5:} Gamuk Nazarin ka alulin in kazaq. On mataw na in Yesus muzad inaq luw yaqayta iyan in Yesus ago uliq Nasaret abinib gina nazaq biy yaqayta.

¹⁴ Ari in gamuk helta amulikmo ya inan bilaqiyta na in kazaq ham. Helmo ya dante muturta in anan lotu katiyta haqayta na ya muzaiqta ham. Ya dante na muzad ya i gisesan gigo God ayon kabiy emaiqta ham. Ad God ago maror Moses bilamta na teq God ago nantut gamuk mar toniyta na agamukan bunmo ya anan helmo haqaiqta ham. ¹⁵ Ad God in mataw dimdimunta teq meqmeqinta nenaqmo giwazid hodhodab eraq daqayta na ya anan helmo diq haqad amen emaiqta ham. Mataw nan yagayta ko in nazaqmo gamuk nawa ya bilayta na bunmo anan helmo haqad in waz naqmo hiqiyatamo ham. ¹⁶ Nazaq iyan God ameb teq on mataw gimeb ya igem dimunno iysa iholib daq araq ananin waqdaiqta na ya a hi loyinaiq ham.

¹⁷ Ari ya uliq-uliqgo luwsa ulig asor le tihiqiy ham. Hiqiyan abeb ya muleqim Jerusalem-ub ta leh ham. Yaqgo dauh asor ginaghan haiqta nagan gimen mani a bolta na ya negad teq ya God ayon tamaz emnan haqad ya lehta ham. ¹⁸ Ya nazaq emad luwim teq ya Tempel-ib lehnhan haqad God ameb ya ihol abusirinan hiqiygo akabiyan tiqem ham. Emim ya ihol God ameb tidimniyan teq ya Tempel agelin aduganib gwahtiqim luwsa in ya ibiyiy ham. Kam nab ya mataw biyahta nenaq a hi luwad ya saw garak araq a hi em ham. ¹⁹ Teq Juda mataw asor saw Esiya-ibta in osiy ham. Mataw na gigo gamukag ussun in boleq kab ni ninognibmo nan yag nagiy ham. ²⁰ Haiq iyan ari mataw kowa turayta ko in gimo teq bilaqiy ham. Ya Juda gigo kaunsel ayahta na gimeb tursa in naga daqin meqinta ya iholib ahol waqiyta na in gimo bilaqsa ni hurit ham. ²¹ Nabag ya in gigo kaunsel gimeb turad lileyim bilay, Mataw moqeq teq in hodhodab tiqeraq daqay hayta naqmo ago muran in hazizir kab ya imalib nan tiqemay-ya ham.

²² Ari Feliks in Krais ago dante muturta na ago tuhurit kamta. Nazaq iyan in Juda mataw na gibilan, Ne ya imen asitmo ta emiysa ham. Abeb bab mat danmepta Lisiyas hitiqid teq ya nenaq afaqan ka tuwasitaytan ham. ²³ Ad in mataw bab emayta gigo mat ayahta araq nab turtu na bulon, Ni Pol a leheq bit giqirquran osaytab emid osan ham. Teq ni hi irqr ham. In samanmo ossa ayogniz nagah a bo ugsa ni hi gimuz ham.

Feliks Pol hulosan in ulig giger irqruran os

²⁴ Ari kam asor le tihiqiyan Feliks awe Drusila inaq tuboliy. Aw na in Juda awta araq. Teq in giger bolim Feliks in Pol lilewunan bolan in ago gamuk asor huritad osiy. Ossa Pol in Krais Yesus anan helmo

haq ago adan tigibilanyaq. ²⁵ Ad in God ameb daq titnonta em ago adan teq gihol wamuz ago adan teq abeb God on mataw bunmo hazizirib giqemdaqta na ago agamukan gibilensa in tuhuriyimo. Huritad Feliks tirabyaq. Rabad in bilam, Dimunmo tiqiy ham. Ni leh ham. Abeb ya kam inaq iyeq teq ya a ta nillewundaiq ham. ²⁶ Teq Feliks anad araq ustamo. In anad emyaq, Pol mani araq yagid teq ya hulosid lehdaq haqyaq. Nazaq iyan sirsirimo in Pol bulonid bolid in inaq gamuk emyaqta.

²⁷ Teq haiq. Ulig giger le tihiqiyan Por-sius Festus bolim Feliks ago ban tuwam. Waqan Feliks uliq na hulosin lehad in Juda mataw ginad dimniyan haqad Pol hulosan bit giqirquran osaytab nab tuqos tut.

25

Pol bilam, Sisa-mo yaqgo hazizir huritadag ham

¹ Ari Festus bolim saw Judiya-ib Rom gigo gavman amebta tiqiyim in kam ezeqman nazaq osim teq in uliq Sisariya hulosim Jerusalem-ub tugwalah. ²⁻³ Gwalehan mataw tamaz emayta gigo aseseqta na teq Juda gigo mataw marorta asor bolim Pol agilehunan Festus tubulon yaqay. Bulonad in Festus kat ugim abe yahad bilaq yaqay, Ni i gilumsiheq mat na ayon nantut em lehid in kab Jerusalem-ub boleq hazizirib turan haq yaqay. Na in danib ulilemec oseq Pol tuwol emnan haqad in Festus nazaq buloniya. ⁴ In nazaq haqan Festus amenin emim bilam, Pol Sisariya-ib irqruran osaq ham. Teq ya Sisariya-ib lehdaiqta akamun sinsin tiqiyaq ham. ⁵ Nazaq iyan ne gigo mataw aseseqta na bolid ya nenaq tuwoleham ham. Woleheq mat na aholib daq meqinta usid teq in hazizirib tiqem daqay ham.

⁶ Haqad Festus in nenaq kam 8 o 10 nazaq nab a ta osim teq in Sisariya-ib tulolah. Wolehim kam ta araq nab tarommo in ago ban in mataw gigo gamuk huritad ulum kemajta nab in tuqos wom. Os woqim osad in Pol waq a bolgo bilam. ⁷ An Pol tubolan ari Juda mataw Jerusalem hulosim gewoqiyya na in Pol agerab diq turad gamuk afaqan meqin diqta amalib tiqem yaqay. Ta teq in gigo gamuk na alulin haiq iyyaq. ⁸ Sa Pol inmo ahol adanin qwayim tibilam, Ya daq araq meqinta a hi em ham. Ya Juda gigo maror aduganib gunun araq a hi itiyonta teq ya Tempel a hi meqin tonmo ham. Ad ya Sisa aqez a hi othasmo ham.

⁹ Haqan Festus in Juda mataw aseseqta na gilumsihid in ginad dimniy daqay haqad in Pol tubulan, Ni Jerusalem-ub gwalehid ya ningi hazizir huritog ni ninad bilaqaq

e? ham. ¹⁰ Haqan Pol bilam, Ya ning hazzizir em abanab kab turad ya Sisa-mo ago maror ahaqenib turaiqta ham. Na in dimunmo ham. Gavman teq yaqgo hazzizir huritad ulum kemdaqta ham. Ya Juda gigo hib daq araq meqinta a hi em ham. Na ni tuhurit kam ham. ¹¹ Ari gavman anadib ya daq araq meqinta moqdaiqta emsun na dimunmo ham. Ya tumoqdaiq ham. Teq Juda mataw ko gigo gamuk ya imalib emayta ko in alulin haiqgam iyan ni ya iwaeq in gibenab a hikidik iqemdaq ham. Ya Sisa-mo ago hib lehnan ham. Sisa-mo yaqgo hazzizir ka huritdaq haqaiq ham. ¹² Pol nazaq haqan Festus in ago mataw ginad awaz meqinta ugayta na nenaq an bulonim an amugan tuwazim teq in Pol bulon, Ari ham ni Sisa ago hib lehnan bilaqan ya niqemid ni Sisa-mo ago hib tilehdaq ham.

King Agripa Pol ago gamuk asor huritan bilam

¹³ Ari kam asor le tihiqiyan king Agripa ahiy Bernaisi inaq in Festus wazineq aben waznan haqad Sisariya-ib tuboliy. ¹⁴ Bolim in giger Sisariya-ib kam kabemmo tuqosiy. Ossa kam araqab Festus in king Agripa Pol anan tubulon. Bulonim in bilam, Kwaziqmo Feliks mat araq wazim bit giqirquran osayta kab eman osta ham. Ossa Feliks tilehad in mat na hulosan in nab tuqos tutaq ham. ¹⁵ Sa ya Jerusalem-ub ossa Juda gigo mataw marorta na teq mataw tamaz emayta gigo aseseqta na nenaq in yaqgo hib bolim mat na awagamun ibileniya ham. Ad ya mat na ayon bilaqid in moqan haqad in susumun yagiy ham. ¹⁶ Teq ya in gigo gamuk amenin emim kazaq gibilen ham. I Rom gigo daq nazaq a hi usaqta hay ham. I mat araq afaqan samanta a hi ugauqta hay ham. Mat nan ugayta na in ago bab nenaq hazzizir turad an anobun ahol waqad teq mat na in ago bab gigo gamuk amenin emaqta hay ham. Eman teq i in ago daq ulum kemim amenin ugauqta hay ham. Nazaq iyan ya ne ginad muzad mat na ayon bilaqid in a hi wol em daqay hay ham.

¹⁷ Ya nazaq gibilenan Juda mataw na kabmo tigewoqiy ham. Gewoqim humab tuwolim ossa ya agudan a hi em ham. Usim era tarommo ya le hazzizir emayta abanab os woqim osad teq ya mat na waq a bolgo bilay ham. ¹⁸ An mat na bolan in ababun eraqim turad nan kabemmo amalib emiy ham. Ya inad emyaiq. Mat na daq araq meqin diq amta daqag haqyaiq ham. Teq hajiq ham. Juda mataw na in mat na aholib daq araq meqinta anan a hi bilaqiy ham. ¹⁹ Naqmo in gigo lotu ago in bilaqad teq in mat araq tumomta anan Jesus haqayta

na anan an mug yaqay ham. Pol mat na anan bilaqaq. In kayeqmo osaq haqaqta ham. ²⁰ Sa ya in gigo gamuk wastitaygo inadnad eman hajiq ya Pol susumun ugim bilay, Ni Jerusalem-ub gwaleheq hazzizirib turnan ninad bilaqaq e? hay ham. ²¹ An Pol bilam, Ya bit giqirquran osayta kab osad ya Sisa-mo amen emdaq haqad in bilam ham. Sisa teq ya iholib afaqan ka tuwastitaydaq haqad in bilam ham. Nazaq iyan ya bilay, In bit giqirquran osayta nab ossa le ya emid Sisa ago hib lehgo akaman gwahtiqan hay ham. ²² An Agripa in Festus bulon, Ya inaqmo mat na ago gamuk asor hurit nagta ham. Haqan Festus bilam, Babeq teq ni tuhuritdaq ham.

²³ Nazaq iyan in usim eraqim tarommo Agripa ahiy Bernaisi inaq in gigo balaw dimdimunta wazim teq in bo bit adugan hazzizir emayta nab tugwahtiqiy. Teq bab mataw gigo gifaqin danmehta na asor teq uliq na ago mataw marorta na inaqmo in humab nab tuboliy. Bolan Festus bilaqan in Pol waqim a boliy. ²⁴ A bolan Festus in king Agripa bulon, King Agripa ham teq ne mataw aseseqta bummo ham ne mat ka ahol waqiy ham. Uliq Jerusalem-ub teq uliq kabmo Juda mataw bummo in yaqgo hib bolim mat ka anan ibilenim bilaqiy, Ni wol emid moqan haqiy ham. In kayeqmo ta hi osan haqiy ham. ²⁵ Teq in moqdaqta ago daq araq alulin meqinta ya ahol a hi way ham. An inmo Sisa ago hib lehnan bilaqan ya inad emaiq. Ya Sisa ago hib emid tilehdaq haqaiq ham. ²⁶ Teq naghah amulikmo ago hib ya ulum hamaiq ham. Ya naga gamukin mar toneq mat ka inaq emid Ayahta Sisa ago hib lehdaqta na ya inad a hi em hasaiq ham. Nazaq iyan King Agripa ham ya mat ka ninmo ningi hib teq ne bummo gigo hib a bol ham. I ingo gamuk ulum muzeq alulib emeq teq ya naga gamukin mar tondaiqta na inad em hasdaiq haqad ham. ²⁷ Na ezaqgo ham ya mat irquryita araq em lehsa ago naga daqin in eman hazzizirib emiyta na agamukan araq ya mar toneq emid inaq a hi lehdaqta na ya loyinan in dimun a hajiq ham.

26

Pol king Agripa anognib turad gamuk bilam

¹ An Agripa in Pol bulon, Ari ham. I ban tinigauq ham. Ni ningi nan bilaq ham. Haqan Pol aben wazan eraqan in ago bab gigo gamuk amenin emim bilam, ² King Agripa ham muran yaqgo dante dimun diqta inaq tiqiyim ya Juda mataw gamuk yagiyya na amenin ni ninognib bilaqnan inad tidimniyaq ham. ³ Na ezaqgo i Juda gigo maror teq i gigo gunun amo amo i

anan an mugauqta nagan ni tuhurit kamta ham. Nazaq iyan ya tisusumun nigaiq ham. Ni yaqgo gamuk huritad ni hidmo nituw hi hiqiyan haqaiq ham.

⁴ Kwaziqmo yaqmo igo uliqab teq Jerusalem-ub ya amun luw osad ayah tiqiy bugta ham. Kam nab ya ezaq luw osyaiqta na Juda mataw bunmo in yaqgo tuhurit kemiya ham. ⁵ Teq ya kam sisaqmo Farisi gigo daq awaz meqin digta nagan muz bugta na ago in tuhuriyimo ham. In ya iwagamun kawa ya ni nibilennaiqta ka in ni nibilennan haqeq in ya inan kazaq diq ni tinibilen nagiyta ham.

⁶ Teq muran kawa in ya hazizirib tiqimey ham. Kwaziqmo God i gisesan gilumsiheq ta giwaqman haqad hel diqmo giblanta ham. An ya God aqez na anan helmo haqad amen emaiqta naqmo ago in ya hazizirib iqemay ham. ⁷ Ta teq Juda on mataw bun diqmo God aqez nawna na anan helmo haqad in amen emad osaytamo ham. Nazaq iyan zeqab taromab inaqmo in ginad awaz meqin amalib God ayon kabiy emayta ham. King Agripa ham God teq i gilumsiheq ta giwaqdaqta na ya anan helmo haqad amen emaiqta naqmo ago Juda mataw ko ya igilehunan bilaqad imalib nan tiqemay ham. ⁸ Nagaqgo ne bunmo ginad emay, God mataw tumoqiyta giwazid hodhodab eraq daqayta na in gamuk helta a haiq haqay? ham.

⁹ Ari ya Farisi gigo daq muz bugad ya Yesus Nasaret-ibta na abin huritim inad kazaq em ham. Ya mat na abin bayid woq hasdaq hay ham. Haqad ya in ago on mataw na geg negad daq kabemmo gihol emyaqta ham. ¹⁰ Ad ya uliq Jerusalem-ub nazaqmo emad ya mataw tamaz emayta gigo aseseqta na gigo hib zaway tuwaqim teq ya God ago on mataw tawonta na kuluwmo giwazeq bit gijirqruran osaytab tigiqemyaiq ham. Sa mataw God ago on mataw na ginol emnan bilaqsa ya asor bilaqyaiqtamo ham. ¹¹ Ya mataw na sanctity negnan haqad ime kabemmo bit humab wolaya bunmo luwad ginagunyaiqta ham. Ginagunim gibiyad ya in gibe yahsa in gigo Iyahta na abin bilawun yaqayta ham. Ad ya in ginan igem ayahmo meqniysa ya gimuzad gimeqin tonad luwad uliq persantab inaqmo tilehyaiqta ham.

Pol Krais anan helmo hamta awagamun

¹² Ya nazaq emad luwsa kam araqab mataw tamaz emayta gigo aseseqta na in zaway yagan ya in gibenib uliq Damaskus-ib kabiy in yagiya na emnan tileh ham. ¹³ Lehsa zeq gabolim liqabmo tiqysiya ya danib lehad luw ham. King Agripa ham hel diqmo ya nibilennaiq ham. Ya lehad luwsamo Heven-ib saw anuwan araq

gehitiqim ya iyogniz nenaq gililut igim atoranmo oysa ya ahol way ham. Anuwan na in zeq uriyamim oy naqmo hiqiyyaq ham. ¹⁴ Oysa i bunmo ogib wojim tuqus ham. Sa mat araq aqez Hibru nanib kazaq ibilensa ya hurit ham. Sol, Sol ham nagaqgo ni ya imeqin tonaq? haqad in bilam ham. Ni ay ame inaqta na nisenab bay ronad ni ninmo nihol sanctity ugagaqta haqad in bilam ham. ¹⁵ An ya bilay, Iyahta hay ni nog? hay ham. An Iyahta bilam, Ya Yesus haqad in bilam ham. Mat ni meqin tonaqta na yaqmo haqad in bilam ham. ¹⁶ Teq ni eraqeq tur haqad in bilam ham. Ya ni nitowun eman ni yaqgo kabibiy mat tiqiy haqad in bilam ham. Nazaq iyan nagah ni yaqgo hib ahol tuwamta ka teq nagah ya abeb teq niqishundaiqta na agamukan ni tibilaqdaq haqad in bilam ham. Ya niqemid ni kabiy nazaq emdaq haqad ya ni nigerab kawa tugwahtiy haqad in bilam ham. ¹⁷ Teq ya nilumsihsa Juda mataw a hi nimeqin ton daqay ham. Ad nazaqmo ya niqemid ni on mataw en ta asor Juda a haiqta nagan gigo hib lehid ya nilumsihsa in a hi nimeqin ton daqaymo haqad in bilam ham. ¹⁸ Ni mataw na gigo hib leheq gime emid tihastitaydaq haqad in bilam ham. Gime hastitaysa in romriq gileh ugad saw anuwanib gwahtiyeq tuqos daqay haqad in bilam ham. Ad in Satan ago maror hulosad in God ago maror aduganib bo tugwahtiq daqay haqad in bilam ham. Sa ya in gigo daq meqinta tigiwalemdaiqmo haqad in bilam ham. Giwalemad ya in giqemid in yaqgo on mataw ya inan helmo haqan ya iholyon tigiwayta na gimuganib tugwahtiq daqaymo haqad in bilam ham.

Pol in God ago kabiy amta na awagamun king Agripa bulon

¹⁹ Nazaq iyan King Agripa ham ya nagaq sen qwayim ahol waqayta nazaq nogta ya ahol tuwaqim ya mat Heven-ib osim ibilanta na aqez a hi othas ham. ²⁰ Haiq ham. Iturimmo ya uliq Damaskus-ib lehim mataw nabta na gamuk gibilen ham. Gibilenim abeb teq ya on mataw Jerusalem-ubta na gibilenmo ham. Na abeb ya saw Judiya ago uliq saw bunmo on mataw gibilenad teq ya lehim on mataw en ta asor Juda a haiqta nagan tigibilenyaiqmo ham. Gibilenad ya gamuk kazaq bilaqyaiq ham. Ne ginad buliyeq gigo daq meqinta gileh ugad God ago hib boliy haqayiham. Bolad ne gigem tubulbiyyita nazaqmo ne gigo daq buliyid dimniyanmo haqayiham. ²¹ Ya kabiy nazaq emyaqta naqmo ago Juda mataw Tempel-ib ya iwazim inol emnan toniy ham. ²² Teq haiq ham. Kwaziq iyim bo

27

*Mataw in Pol Rom-ub lehgo haqad
muyib emiy*

muran kawa God ilumsihsa ya tuqos tutaiq ham. Osad ya mataw gibin inaqta teq mataw gibin haiqta inaqmo gamuk amulikmo gibilenaiqta ham. Kwaziqmo God ago nantut teq Moses in nagah abeb teq gwahtiqaqta agamukan bilaqiyta naqmo amomo ya gibilenad ya gamuk araq diq a hi negaiqta ham.²³ Nantut nagan kazaq bilaqiy ham. Krais boleq sanctity tisordaq haqiy ham. Sanctity soreq moqeinq teq in mat ameb diqta hodhodab ta eraqdaq haqiy ham. Eraqeq in God ago gamuk dimunta Juda on mataw teq on mataw en ta asor Juda a haiqta nagan inaqmo gibilensa gamuk na in ginadib bilaqne saw anuwan oy nog iysa in huriteq ginad em has daqay haqad in bilaqiy ham.

Pol in king Agripa bulon, Ni Krais anan helmo haq ham

²⁴ Pol nazaq ahol adarin qwayim bilaqsa Festus huritad osimmo in dedibmo bilam, Pol ham ni ninad agadan tiqy ham. Ni suleq ayahmo amta naqmo niqeman ni nimaqbel agadan tiqiyaq ham.²⁵ An Pol bilam, Mat ayah Festus ham. Ya agadan a hi iyaiq ham. Haiq ham. Ya inad em hasad gamuk heltaqmo bilaqaiq ham.²⁶ King Agripa nawa huritad osaqta na in nagah kawa ya anan bilaqaiqta ka ago in tuhurit bugta ham. Nazaq iyan ya bilaqnau a hi rabaiq ham. Ya inad emaiq ham, King Agripa in nagah ka bunmo ahol tuwamta haqaiq ham. Na ezaqgo ham nagah ka uilemim a hi gwahtimta ham.²⁷ King Agripa ham ni God ago nantut gigo gamuk anan helmo haqaq e? ham. Ya inad emaiq, Ni helmo haqaqta haqaiq ham.

²⁸ Haqan Agripa in Pol bulon, Ni ezaq? ham. Kam asimqan diq kabmo ni ya iqemid ya Krais ago mat araq gwahtiqdaiq e? ham.²⁹ Haqan Pol bilam, Kam siqim o kam sisaq na ago ya a hi bilaqdaq ham. Nagah amulikmo ago ya God bulonaiqta na in kazaq ham. Ni teq on mataw muran ya iquez huritad osayta na nenaq ne bunmo ya nogmo iyeq osiy haqaiq ham. Teq in sensib ya iqirquriya kazaq in ne hi giqirquriya haqaiq ham.

³⁰ Pol nazaq bilaqan King Agripa tigeraq. Eraqsa gavman ameba Bernaisi teq Mataw king inaq osiyta na bunmo eraqymo.³¹ Eraqim le asanib tugwahtiqaq teq in gimo an bulonim bilaqiy, Mat ko daq araq meqinta irqur daqayta o wol emid moqdaqta a hi amta haq yaqay.³² Haqsa Agripa in Festus bulon, Mat ko Sisa ago hib lehnau a hi bilaqid i hulosid samanmo leh nagta ham.

Pol uliq Rom-ub lah

¹ Ari gavman aseseqta na in i giqemid i muy araq waqeqliliq Rom kantri Italiyibtab lehgo tibilaqiy. Bilaqim teq in Pol teq mataw giqirquriya ta asor giwaqim mataw bab emayta gidauhan 100 nazaq gigo ayahta anan Juliyus haqayta na abenab tigiqemiy. Juliyus ago bab mataw nenaq gigo dauh anan Sebastes* haqayta.² Ari i uliq Adramitiyum gigo muy araq saw Esiya ago lan ez ban uliq asorib lehnau haqad usta nab i tugwal. Gwalim i saw na hulosim muyib tileh. Lehad Aristarkus uliq Tesalonaika saw Masedoniya-ibta na i inaq lehmo.³ Lehad luwim tarommo i uliq Saidon-ib tugwahtiw. Gwahtiqaq Juliyus aqem dimunta Pol ugad hulosan lehim ayogniz gibilayd gigo hib didaq nagah asor tuwam.⁴ An abei i muyib ta gwalim uliq Saidon hulosim tileh. Lehsa tim i gisor hasyaq. Nazaq iyan i nud Saiprus agileun ban lan agerab lehyauq.⁵ Lehad i saw giger Silisiya teq Pamfiliya gigo saw ban kamis urotim lehad luwim i uliq Maira saw Lisiya-ibtab tuwow.

⁶ Wogaq uliq nab bab mataw gigo ayahta na in uliq Aleksandriya gigo muy araq Italiy-ib lehnau tonsa ahol tuwam. Ahol waqad in i giwaqim giqad muy nab tilah.⁷ Lehim gwalim lehsa muy kiskismo kam asor kamismeb sibad tuqusyaq. Na ezaqgo tim eraqad i ginobun ban bolyaqta na ago iyan. Sa muy ago kabibiy mataw in muyib giholtuw bulad gihol bibiyowunsa i le uliq Nidus agerab tugwahtiw. Gwahtiqaq nab tim i tigiwasih. Giwasihan i nazaq ta lehgo hiqiyim i nud Krit agileun ban tileh, uliq Salmone ager ban.⁸ I gihol bibiyowunim lehim Krit ago lan ez muzim lehad luwim uliq anan Lan Ez Dimunta haqayta nab i tugwahtiw. Uliq na in uliq Lasea agerab usaqta.

⁹ Ari i uliq nab bolad luwsa kam kabemmo tihiqiy. Teq Juda gigo lotu akaman ayahta in didaq udinayta na akamun i teko tuhulosmo. Nazaq iyan kamisib tim akamun gwahtiqaq kamis meqin diq iysa iyan Pol eraqim tibilam,¹⁰ Mataw ham muran i leheq teq i afaqan araq ayahta anobun tuqwayam ham. Ya inad emaiq ham nagah kagan kabemmo timeqniy hasdaq haqaiq ham. I gigo es teq muy ka inaqmo timeqniydaq ham. Meqniysiya muy ka amatawun kabemmo tumoq daqaymo ham.¹¹ Haqan teq haiq. Bab mataw gigo ayahta na in Pol ago nan a hi huritad in mat muy wamuzaqta na ayow muy anamren

* 27:1: Nan Sebastes ka alulin in 'Sisa-mo ago bab matawta' haqayta.

inaq ginez tumuz.¹² Teq muy tim akamnib lan ez nab usdaqta in saw dimun a haiqmo. Nazaq iyan muyib mataw kabemmo bilaqiy, I uliq ka huloseq uliq Finiks-ib leh waqquq haqiy. I leheq uliq nab ossa teq tim akamun hiqiydaq haqiy. Na ezaqgo uliq Finiks na in nud Krit ago lan ezab kamis abeqil amta nud abe ban zeq wolehaqta ban usaqta na ago iyan in nazaq bilaqiy.

Tim eraqad kamis eman ayahmo eram

¹³ Abeb tim araq Ray nogta na midemqanmo eraqsa in ahol waqad ginad emiy, I dimunno tisibam haqiy. Haqad in anka hureqan gwalan in Krit ago kamis adek diq muzim tilehiy. ¹⁴ Teq haiq. In asitmo leh nog iyanmo tim atoranta ticeram. Tim araq Taleo nogta naqmo in nud Krit ban eraqim bolyaq. ¹⁵ Bolad in muy othassa muy leh yo hiqiyyaq. Nazaq iyan i muy ahol buliyan tim i gigothassa i tim anad muzim lehmo tilehyauq. ¹⁶ Lehad i nud araq amikta anan Kauda haqayta agilehun ban lehyauq. Lehsa tim asit tihiqiy nog iysa i giholtuw bulim muy ago dindi hureqan muy agerab bol. ¹⁷ Bolan in dingi hureqan muyib tugwalan teq in warig awaz meqinta waqim muy ahilib hurorim am waz naqmo hiqiyyi. In tirab yaqay. Luweq in leheq kantri Afrika gigo kamisib sarte anan Sirtis haqayta nab ror daqay haqad. Nazaq iyan in muy abe ban anka araq hunegan woqan in kamis amalib tim gigothassa tileh yaqay. ¹⁸ Lehsa tim ayow kamis inaq atoranmo i gilum hishassa tarom tiqiy. Tarom iyim saw tihastitayan tim a hi hiqiyya iyan mataw es nagah muyib giqusta na kamismeb tuhuneg yaqay. ¹⁹ Ad kam ezeqmanta nab in gimo gibenab muy ago rigen asor hunegan kamismeb tuwommo. ²⁰ Kam kabemmo i zeq teq ulig ahol a hi waqyauq. Sa tim ayahta na kam bunmo i gigothassa i ginamur asit a hi emyaauq. Haiqgam. Kam bunmo tim i gilum hishasyaq. Nazaq iysa iyan kiskismo i ginad araq gimaqbelab tugwahtiqaq. Kamis i gineqid i wastitayeq saw araq dimuntab le a hi gwahtiqaqta haqyauq.

²¹ Teq muyib matawta na kam kabemmo didaq a hi neqimmo osan Pol in gilikmanib eraqim tibilam, Mataw ham teko ne yaqgo gamuk huriitta iyid i nud Krit a hi hulosad nab useq i afagan kazaq ahol a hi waq nag ham. Ad i gigo es nagah bunmo a hi huneg nagmo ham. ²² Ari muran ya ne kazaq diq tigibilendaiq ham. Ne giwaz meqniyiham. I gilikmanib mat araq diq a hi moqdaq ham. Muymo teq timeqniydaq ham. ²³⁻²⁴ Ya God ago matta iyim ya in ago kabiy emaiqta ham. Inmo ago angelo araq irimo taromab ya igerab gwahtiqaq ham.

turad kazaq ibilan ham. Pol ham ni hi rab haqad in bilam ham. Ni leheq Sisa anognib titurdaq haqad in bilam ham. Ad ni hurit ham. Mataw bunmo ni nenaq muyib osayta na ham God tinigan kamis gineqid a hi moq daqay haqad in ya ibilan ham. ²⁵ Nazaq iyan mataw ham ne zaway iyeq osiy ham. Ya God anan helmo haqaiq ham. In ya ibilanta nazagmo in tiqemdaq ham. ²⁶ Teq muy ka leheq nud araqab sarteb tirordaq ham.

²⁷ Ari i sibad luwsa kam 14 nazaq tihiqiy. Hiqiyan i kamis anan Meditereniyan haqayta nab sibim lehad tarom alihanib muy ago kabibiy mataw ginad emiy, Muy lan ez araq sinsin tuqugaqya haqiy. ²⁸ Haqad in kamismeb tow waqnan am hunegan tuwom. Woqan in ahol waqan 40 mita nazaq iy. An i asitmo ta leh nog iyim in tow a ta waqan tow bilam 30 mita ham. ²⁹ An in tirab yaqay, luweq i leh tuteq sarteb tuququm woram haqad. Nazaq iyan in muy abe ban anka aweweinqmo hunegan kamismeb wom. Woqan mataw na zeq amen emad in God bulonim bilaq yaqay, Saw emid hidmo hastitayan haq yaqay. ³⁰ Sa muy ago kabibiy mataw na in muy huloseq tukgo dan tinagun yaqay. Nazaq iyan in dingi aqamun hasan dingi kamismeb titihim. Hitiqan in katiyim bilaqiy, I dingi-ib leheq muy anobun ban anka asor hunegnan haqiy. ³¹ Haqsa Pol in bab mataw gigo ayahta na ago bab mataw nenaq gibilan, Mataw ko muy kab a hi osid ne bunmo kamis gineqid tumoq daqay ham. ³² Haqanmo bab mataw hidmo le dingi aqamun urotan kamis sorim ad tilah.

³³ Ari zeq gabolgo sinsin tiqysi Pol in mataw na bunmo didaq neq daqay haqad gibe yahad gibilan, Kam 14 nazaq ne rabad samanno tuqosiy ham. Osad ne didaq araq diq a hi neqiy ham. ³⁴ Nazaq iyan ya ne atoranmo gibilenaiq ham. Ne didaq neqiy haqaiq ham. Didaq neqeq ne zaway iyeq a hi moq daqay haqaiq ham. Ne huritiy ham. Ne giqensan araq diq milheseq a hi woqdaq ham. Haiq ham. Ne bunmo dimunmo tuqos daqay ham. ³⁵ Haqad in bret waqim ginognib God esey ugim teq in orqayim tinam. ³⁶ Neqsa mataw bunmo ahol waqad ginad tidimniya in nazaqmo didaq waqim tineqimo. ³⁷ I mataw kabemmo muyib osta, 276 nazaq diq. ³⁸ Teq mataw na bunmo didaq dimunmo tineqim in muy afagan hiqiydaq haqad wit anagin muy aduganib osta na hunegan kamismeb tuwom.

Muy meqniy

³⁹ Ari saw tihastitayan in lan ez araq ahol tuwaq yaqay. Teq in saw ezaqta ago lan ez na a hi huritiy. In saw

na ahol waqad kamis abeqil araq loleh titayta aqiburan dimun diqta usaqta na ahol tuwaqiy. Ad in ginad emiy, I muy ad leheq lan ez dimun diqta kob gwalam haqiy. ⁴⁰ Haqad in anka aqamun urotan kamismeb woq bugsa in kwaziqmo stia am waziyya na tihasiy whole. Hasim in tim waqgo haqad muy agel sel wazan eraqanno muy amidemqanmo sibim lan ez nab tilogyaq. ⁴¹ Loqadmo hajq muy sarteb tugwal. Gwladmo muy anobun ror naqmo hiqiyim nab tuqus. Ussa kamis muy abe wolad othassa muy timizilay. ⁴² Tabiyaysa bab mataw na in mataw giqirqruran osiyya na ginol emgo ginad tiqem yaqay, luweq in ameq leheq tituk daqay haqad. ⁴³⁻⁴⁴ Teq in gigo ayahta na Pol ulumsihnan haqad in ago mataw na giwasihan in nazaq a hi emiy. Ad in mataw amayta na gibilan, Ne sortukeq woqeq ameq lehiya ham. Lehsa mataw a hi amayta na in ay anabun teq muy asor milhasta nagan wazeq ameq lehiy whole. Haqan mataw nazaq emim in bunmo wastitayimmo le lan ezab tugwal bugiy.

28

Pol nud Malta-ib os

¹ Mataw bunmo wastitayimmo lan ezab twoqiy. Woqim teq i nud na anan Malta haqayta na tuhurit. ² Teq mataw uliq nabta na gigem dimunta igad in i tigidimun toniy. Kam nab urom bolsa saw amuditqan diq iyyaq. Sa mataw na gigem dimunta igad in i giwaqim giqad lehim i gimen faq ayahta ulaman i faq iterad tuqos. ³ Ossa Pol ay aben amikmikta ruqotim faqmey emsamo nagah ahulinaqta meqinta araq ayib ulilemim usta na in faq afan loyinadmo bo tugwahtim. Gwahtiqim in Pol abenab tumug. ⁴ Mуган on mataw nabta na in nagah ahulinaqta Pol aben mugim yuk tonim ussa ahol waqad bilaqiy. Mat ka in mat araq wol eman momta daqagya haqiy. An kamis neqan a hi moqan bugaw daq meqinta amenin emaqta na in Pol tuwol am haqiy. ⁵ Teq hajq. Pol nagah ahulinaqta na hures laman le faqmey woqan in asan asit a hi titiyyaq. ⁶ Sa mataw na ginad tiqem yaqay, In teq ahol umdaqta haq yaqay. Umeq hidmo in woqeq tumoqdaqta haq yaqay. Haqad in sisqamo amen emad osan teq hajq. Pol ezaqag a hi ton. Nazaq iyan in ginad buliyim tibilaq yaqay, In god araq haq yaqay.

⁷ Ari og i osta na in mat araq anan Publiyus haqayta na ago og araq. Mat na in nudib on mataw na gigo maror ayah diqta. Nazaq iyan in i giwaqim giqad ago bitab tilah. Lehim kam ezeqmanmo in i giwamuzad os. ⁸ Ossa Publiyus amam moq naqmo diq hiqiyad asan afan iyad

urad usyaq. Ussa Pol in ago hib lehim ayon God bulonim teq in aben aholib emim wazanmo in ago moq tihiqiy. ⁹ In daq nazaq eman abeb nud nab mataw ta asor gigo moq inaqta na bunmo in Pol ago hib bolsa Pol giwastitaysa in tidimniy yaqay. ¹⁰ Nazaq iyan mataw na in i bunmo giwazinad tigidimun diq ton yaqay. Ad abeb i lehgo tiqysi in nagah ago i siqim iytta na bunmo a bolim muyib tiqem igiy.

Pol le uliq Rom-ub gwahtim

¹¹ Teq i nud Malta-ib kalam ezeqmanmo tuqos. Osim teq abeb muy araq nab usim lehnan tonsa i muy nab tugwal. Muy na in uliq Aleksandriya-ibta teq tim meqinta akamnib iyan in nud nab usta. Teq muy na anobun ban Rom gigo god giger ginin araqibmo giqamta na gidulan turtta. Ari i muy nab gwanan muy aben hulos ugan i tileh. ¹² Lehad luwim i le uliq Sirakyus-ib tugwahtiw. Gwahtiqim nab i kam ezeqmanmo tuqos. ¹³ Osim i uliq na hulosim le uliq Regiyum-ub tugwahtiw. Gwahtiqim kam ta araq nab tim Ray nogta na eraqan i uliq na hulosim lehad kam gigertab nab i uliq Puteoli-ib tugwahtiw. ¹⁴ Gwahtiqim uliq nab i gimaqbaban Yesus ago on mataw asor tigibiy. Gibiysa in bilaqan i nenaq kam 7 nazaqmo os. Osim gihulosad i uliq Rom-ub tileh. ¹⁵ Lehsa Krais ago on mataw Rom-ub osiyya na in i gigo huritim gidanin tulobiy. Bolim in gigo asor maket saw Apiyus-ib usaqta nab danib i gibiyad nenaq muleqim ta lehsa asor uliq anan Ginamur Em Abitan Ezeqman haqayta nab i gibaq tunim ossa i tigibiy. Gibiyad Pol agem inayat muturta waqad in God esey tuqug.

¹⁶ Ari i le uliq Rom-ub tugwahtiqan gavman in Pol hulosan in aholbin bit araqab bab mat amulikmo inaq tuqos. Ossa bab mat na bitab Pol asawan woltayad tuqosyaq.

Pol Yesus awagamun dimunta Rom-ub bilam

¹⁷ Ari kam ezeqman le tihiqiyen Pol in Juda gigo mataw aseseqta uliq Rom-ub osiyya na gililewunan bo humab tuwoliy. Humab wolim ossa Pol kazaq gibilan, Ya imaqbaban ham ya daq araq meqinta Isrel on mataw gigo hib a hi emta ham. Teq ya i gisesan gigo gunun araq a hi othasmo ham. Ta teq in Jerusalem-ub ya iwazim Rom gibenab tiqiqemiy ham. ¹⁸ Igeman Rom in yaqgo hazir emim in yaqgo daq araq meqinta inol em daqayta ahol a hi waqim in ya ihulosnan bilaqiy ham. ¹⁹ Bilaqan Juda gamuk kabemmo bilaqsa ya dante araq haiggam iyan ya Sisa-mo ago hib lehnan bilay ham. Teq yaqmo isenlul na ya nan neggo haqad ya Sisa a hi lilewun ham. ²⁰ Ya gamuk kaqmo ago ne gililewunan

ne bolan ya nenaq kawa gamuk tiqemaiq ham. Isrel bunmo in God teq gilumsih-daqta na anan helmo haqad amen emayta ham. Sa ya bilaqaq. Mat i amen emad osta na tubol haqsa iyan in ya sen-ib iqirquriy ham.

²¹ An mataw na Pol buloniy, Saw Judiya-ibta mat araq ni nihol awagamun mar tonim eman kab a hi bol haqiy. Ad mataw saw Judiya-ib osim kab bol yaqayta na in ni ninan i a hi gibilenad in ni ninan gamuk meqinta araq a hi bilaqymo haqiy.

²² Juda on mataw uliq saw bunmo in suleq muturta i Juda gilikmanib gwahtimta na anan meqin haqayta naqmo i tuhurit haqiy. Nazaq iyan i ninmo niqezab ni suleq ezaqta bilaqaqta na i huriitnaq haqiy.

²³ Haqad abeb Juda mataw aseseqta na giyogniz kabemmo nenaq in Pol kam ugiyt nab a ta bolim bit Pol osaqta nab in humab ta woliy. In tarommo diq humab alulin emim ossa le imisor diq ni nog ya nog tiqiy. Sa Pol in Moses ago gunun agamukan na teq God ago nantut gamuk mar tonitya na giqisihunad in gamuk na alulin tibilaq sireqyaq. Ad in mataw na ginad buliyid in Jesus anan helmo haq daqay haqad in God ago maror og kab gwahtimta na agamukan gibilenyaq. ²⁴ Gibilensa asor in ago gamuk anan helmo haqsa ta asor in anan helmo a hi haq yaqay. ²⁵ In nazaq an geg ugadmo in Pol hulosim tilehiy. Lehsa Pol gamuk abebtanta kazaq gibilan, God ago Bugaw Dimunta in ne gisesan gibilenad in gamuk heltagmo Aisaya aqezab bilam ham. In bilam,

²⁶ Ni on mataw na gigo hib leheq kazaq gibilen haqad in bilam ham. Ne gamuk huritad teq ne ginad a hi em has daqay haqad in bilam ham. Ne gime saw waqad teq ne nagah araq ahol a hi waq daqay haqad in bilam ham. ²⁷ Na ezaqgo on mataw ka gigem soqotim usaqta haqad in bilam ham. Sa in gideksan ituqim us-aqtamo haqad in bilam ham. Mataw ka gime miyim osayta haqad in bilam ham.

God nazaq gigeman luweq in gime nagah ahol waqad teq in gidek nan huritad in ginad em has nagiyta haqad in bilam ham. Ginad em hasad gigem buliyeq God ago hib ta bolid God giwastitayid tidimniy nagiyta haqad in bilam ham. *Aisaya 6.9-10*

²⁸ Nazaq iyan ne gamuk ka huritad ginad em hasiy ham. God on mataw gimen dante emim in gilumsihim ta giwaqaqta agamukan na in eman on mataw en ta asor Juda a haiqta nagan gigo hib tilehaq ham. Mataw naqmo teq gamuk na tuhurit daqayta ham. [²⁹ Pol gamuk na eman

tihiqiyan Juda mataw na Pol hulosim lehad in an ayahmo mug yaqay.]

³⁰ Ari ulig giger Pol in mat araq ago bit waqim osad in zayad osyaq. Ossa mataw Pol ahol waqnan bolsa in agem dimunta negad nenaq tuqosyaq. ³¹ Osad in God ago maror asuleqin gibilenad in Iyahta Jesus Krais anan tigibilenyaqmo. Gibilenad in ulalabmo bilaqsa mat araq in aqez a hi wasiyyaq. Nawaqmo.

Rom

Sansandek Pol mar tonan uliq Rom-ub lahta Gamuk ameb lehaqta

Uliq Rom in kantri Italiy ago uliq danmeh diqta. Teq Pol le Jesus ago on mataw uliq nabta na nenaq osad Jesus awagamun dimunta gibilen kemnan haqad in gimen sansandek ka mar ton nag (Rom 1.15). In anad am, Ya le Rom nenaq oseq teq ya eraeq qantri Spen-ib Yesus awagamun dimunta bilaqnan lehsa Rom matawta na ilumsiheq iqemid ya tilehdaiq ham (Rom 15.24). Nazaq iyan in aholyon dante wastayad in naga gamukin diq bilaqad luwaqta na in Rom mataw gibilen kemnan haqad in gimen sansandek ka mar tonta.

Pol kazaq bilam, Juda on mataw teq on mataw en ta asor Juda a haiqta na bunmo inaqmo in daq meqinta ahaqenib giqirquran ossa God in ginan agem meqniyaqta ham. Teq mataw in gigo zawayib og ka ago gunun araq muzineq God ameb gihol dimniy daqayta na hajqgam ham. Nazaq iyan God in ginan anad meqniysi in gihureqid in ago hib ta bolnan haqad in gimen dante araq dimunta samammo tiqem nag ham. Eman on mataw Yesus Krais anan helmo haqsa God in ginan mat titnonta haqad in giwaqim nenaq osaqta ham. Ad Pol bilam, I Krais aholib soqotim inaq ossa God ago Bugaw Dimunta zaway igad dan giqisihunsa i lehauq ham. Lehsa nagah araq diq i gidanin qwaydaqta hajq iysa i le God ago os dimunta ahiqiy haiqta na tuwaqam ham.

Teq nagah araq ayahta in anan bilamta na kazaq. Juda on mataw muran Krais gileh ugim osayta ham. Ossa God in on mataw en ta asor Juda a haiqta nagan giqeman in ago maror aduganib tubolay ham. Teq abeb God in Juda on mataw na giqemid in ginad buliyeq Krais anan helmo haqad in God ago dauh giduganib le tungwahtiq daqaymo ham.

Gamuk na tihiqiyan Pol ago gamuk abeb-tanta nab in on mataw Krais anan helmo haqayta na gigo luw os anan bilamta. In bilam, On mataw Yesus ago nan huritayta na in ago gamuk bunmo muzinad in an anan ginad bilaqsa an alowan tonad os daqay ham. Haqad gamuk na abeb in kabiy emnan anad usta na ago bilaqim teq in Rom on mataw na ago zeq dimun nag.

I God anan helmo haqauqta naqmo i giqeman i God ameb

on mataw titnonta iyim osauq

*Pol in Aposel akabiyan emaqta na ago
anarin tut*

¹ Yaqmo Pol, ya Krais Yesus ago kabibiy mat araq. Inmo ililewunan ya Aposel gwahtiyya. Teq in on mataw gimen dante amta agamukan dimunta na ya bilaqdaiq haqad in ya itowun eman ya God ago gamuk naqmo bilaqgo iyim osaqa.

² Kwaziqmo God gamuk dimunta na eman ago nantut ginadib bolsa in God ago mar tawonta nab mar toniyta. Mar tonan God hel diqmo bilamta nazaqmo tugwah-tim. ³ Gamuk dimunta na in God atatinmo anan bilamta. Teq God atatin na King Devit asenlul giduganib gwahtiyyim in mat diq iytta. ⁴ Iyim in moqim hodhodab ta eraqan daq azawayin inaqta na amalib in ahol alulin in God-mo Atatin Diqta na ulal tiqiy. Na i gigo Iyahta Yesus Krais-mo. ⁵ Teq ya Yesus Krais anan helmo haqsa God agem dimunta yagad Aposel akabiyan ya ibenab amta. In anad ya kabiy na emsa on mataw en bunmo gilikmanib kabemmo God anad muzinad Yesus anan helmo haqsa Yesus abin ayahmo diq iyadaq haqad in ya iwaqim kabiy nab iqamta. ⁶ An teq on mataw na gilikmanib God in ne inaqmo gililewunan ne Yesus Krais ago on mataw tiqiyimo.

⁷ Ne God ago on mataw uliq Rom-ub osayta na ya ne gimen sansandek ka mar tonim eman leh negaq. God ne ginan anad bilaqsa gililewunan ne in ago tawonta iyim osayta.

I Gimam God teq Iyahta Yesus Krais inaq in gigem dimunta negad ne gigem emid midemeqmo usan.

Pol le Rom gibiygo haqad anad am

⁸ Danmeh diq ya kazaq gibilendaiq, Ne ginad God anan helmo haqayta na awaz meqin diq iysa og saw bunmo mataw in ne ginan nazaq bilaqayta haqdaiq. Nazaq iysa iyan ya igo God inaq gamuk emad ya Yesus Krais abinib ne bunmo gimen in esey ugaiqta. ⁹⁻¹⁰ Ya God ago kabibiy mat iyim ya in atatin Yesus awagamun dimunta akabiyan emad ya kabiy na ihol bunmo ugaiqta. God ya ibiysa ya helmo bilaqaiq. Tutimmo ya ne ginadin emad ne gimen God bulonaiqta. Bulonad sirisirimo ya susumun ugaiq. Ni ninad bilaqid teq ni yaqyon dan wastayid ya Rom gigo hib lehiq haqaiq. ¹¹ Na ezaqgo ya iholib naw usaqta ka amalib ya ne giwitan gilumsihid ne zaway iyeq tur daqay haqad ya ne gigo hib lehnhan inad diq bilaqatqa. ¹² Teq ya inad kazaq usaqmo. Ya ne gigo hib lehid ne ginad helta na ya ilumsihsa ta ya inad helta na ne tigilumsihsidaqmo haqaiq. I nazaq

an ulumsihad teq i bunmo ginad God anan helmo haqauqta na awaz meqniysa i gigem zaway tiquydaq haqaiq.

¹³ Ya imaqbaban, ya gamuk ka gibilensa ne huritiy. Yaqgo kabiyl in on mataw en ta asor Juda a haitqa nagan bunmo gigo hib anon tiquamta. Ad ya inad yaqgo kabiyl anon asor ne gigo hib usdaqmo haqad ya ime kabemmo ne gigo hib lehnant inad emyaqta. Teq haiq, daq hares gwahatiqad ya idanin qwayyaq. ¹⁴ Teq God ayahmo ilumsihta na amenin ya emad ya nazaqmo on mataw bunmo God ago gamuk dimunta amalib gilumsihaiqtarno. Gilumsihad ya on mataw en ta asor Juda a haitqa nagan bunmo, Grik mataw teq mataw yabyabta inaqmo God ago gamuk gibilenaiqta. Mataw na asor ginad inaqta teq asor ginad a hi emayta. Teq ya na ago a hi bilaqad ya mataw na bunmo God ago gamuk negaiqta. ¹⁵ Nazaq iyan ya uliq Rom-ub nab leheq ne inaqmo Yesus awagamun dimunta gibilenann ya iqutil diq eraqaqta.

Yesus awagamun dimunta na in God ago emayta

¹⁶ Yesus awagamun dimunta naqmo in God ago zaway awaz meqinta in amalib on mataw gilumsihim giwaqim ban dimuntab giqemaqta. Nazaq iyan ya Yesus awagamun dimunta na bilaqad imebay a hi woqqaqta. Wagam na Juda on mataw gimen danmeb gwahtiqliq teq in ta on mataw en ta asor Juda a haitqa nagan inaqmo gimen gwahitintamo. ¹⁷ God on mataw giqeman titnonta iyayta na adan Yesus awagamun nabmo ulal iyim usaqta. Na in kazaq. I God anan helmo haqauqta naqmo amomo i giqeman i God ameb on mataw titnonta iyauqta. God ago marib gamuk nazaqmo bilaqan usaqta. Gamuk na bilam,

On mataw God aqez anan helmo haqan in
ginan titnonta hamta naqmo in God
inaq dimunmo tuqos daqayta ham.
Habakuk 2:4

On mataw bunmo God gileh ugayta

¹⁸ On mataw og kabta bunmo God gileh ugad in gigo daq meqinta amalib gamuk helta bayan woqqaqta. Woqsa God Hevenib osad mataw na ginan agem meqniysa in gigo daq meqinta nagan amenin ulalabmo negaqla. ¹⁹ Na ezaqgo God in mat ezaq diqta na ago in on mataw bunmo giqishunsa ahol waqayta. ²⁰ Ad kwaziqmo in og kab nagah bunmo giqamta nabmo iyim bo muran kam kabmo on mataw in nagah God giqamta nagan ahol waqayta. Ahol waqsa nagah naqmo in God ulilemim osaqla na eman gimeb ulal tiquyiq. Ulal iysa in God ago zaway tutimmo usaqta na ahol waqad

in God ulilib osad nagah bunmo giwamuzaqta na ago ginad em hasayta. Nazaq iyan mat araq bilaqdaq, Ya God ago a hi hurit haqdaqta na haiqmo diq.

²¹ On mataw God ago tuhuritayta teq in abin wazinad esey a hi ugayta. In daq samanta kabemmo diq anadin emad ginad agadan iysa in romriqab os nog iyad daq helta a hi loyin kemayta. ²² In bilaqay, I gimaqbel inaq haqayta. Teq haiq. In ginad ayemyemqan iyim osayta. ²³ God abin ayah diqta inaq iyim in kuluwa-kuluwmo osaqla. Ta teq on mataw God gileh ugad abanab in nagah osim moqayta gidulan giqemayta. Giqemad in mat adulan teq ah adulan teq karuw amo amo gidulan teq nagah ahulinqta nagan gidulan naqmo giyon lotu emayta.

On mataw daq amo amo meqinta emayta

²⁴ On mataw daq meqinta nazaq emsa God in giholib hiqiyani in ginad meqinta giqemab usaqta na muzinad daq anumlan inaqta emayta. Emad in an mebay ugad an meqin tonayta. ²⁵ God nagah bunmo giqeman gwahtiqliq. Hel diqtaqmo in abin ayahta na nazaqmo kuluwa-kuluwmo tuqusdaqta. Ta teq on mataw gamuk helta nawa God anan bilamta na hulosan ussa abanab in gamuk katiyta waqim muzinayta. Muzinad in mat nagah bunmo giqamta na gileh ugad in ago nagah in giqamta naqmo giwazinad gibin iluwayta.

²⁶ In nazaq emsa iyan God gileh negan in gihol eraqsa daq amebay inaqta naqmo emad osayta. In gigo on an waq adan dimunta na hulosad in daq hi emnanta emayta. ²⁷ Ad mataw nazaqmo in aw waqeq inaq wastitayeqmo osgo adan na hulosad in gimo an ahol waqad gihol eraqaqta. Gihol eraqsa mat in matmo inaq daq amebay inaqta emayta. Emsa daq meqinta na in gimo giholib anon emsa in amenin meqinta waqayta.

²⁸ On mataw God gileh ugad abin a hi iluwsa God gihulosan in gimo ginad samanta naqmo muzinad daq hi emnanta emad luwayta. ²⁹ Luwad in giholib daq meqinta naqmo ame gwalim ussa in an meqin tonayta teq in nagah utetayta teq in an bab ugayta teq in mat ago nagah kabemmota anan gigem meqniyayta teq in mataw ginol emayta teq in an mugayta teq in katiyayta teq in mataw gimeqin tonayta teq in an agilehunan bilaqayta. ³⁰ Teq in mataw gibilawunayta teq in gigem meqinta God ugayta teq in mataw haresmo ginolayta teq in igmo ag haqayta teq in gimo gihol abin wazan eraqaqta teq in ginadibmo daq meqinta haresmo

muturta eman gwahtiqaqta teq in ginennaman gigez othasayta.³¹ Teq in ginad hi emta adan emayta teq in nan bilaqad adan a hi emayta teq in an anan ginad a hi bilaqaqta teq in mataw ginan ginad a hi meqniyayta.³² On mataw God gunun amta na ago tuhuritayta. Gunun na bilam, Mataw nawa daq meqinta nazaq emayta na tumoq bug daqay ham. Ta teq in gunun na a hi rabunad daq meqinta nagan emmo emayta. Emad in mataw ta asor daq meqmeqinta na emsa gibiyad in esey haqad gisen baysihayta.

2

God hazizir titnonimmo emaqta

¹ Nazaq iyan ni nog ni mat araq ago daq ulum kemad anan meqin haqaqta na ni nimmo nihol adanin qwayaq. Na ezaqgo, in daq am nogmo ni emaqtamo. Nazaq iyan ni mat na ago daq ulum kemim amalib nan emad ni niholyon bilaqaqtamo.² God in on mataw daq meqinta emayta na bunmo anononmo gilum kemad in gigo daq ahunibmo amenin negaqa. Na i bunmo tuhuritta.³ Ta teq ni mataw daq meqinta emay na gilum kemad ginan meqin haqad teq ni daq meqinta nagan emaqtamo. Ni ninad ezaq emaq? God ningko daq meqinta na ulum kemeq amenin nignan tonsa ni aban emeq tukdaq haqad ni ninad emaq e? Na haiqgam.⁴ Ni ninad em. God nilowan diq tonad in sisagmo nibaq tunim osaqla. Osad in ningko daq meqinta amenin hidmo a hi emaqta. Ni God ago daq dimun digita na ahol waqsa in nagah amikta iyaq e? God anad ni ninad buliyeq ningko daq meqinta gileh ugdaq haqad in nazaq nilowan tonaqta. Na ago ni ninad a hi emaq e?⁵ Ni nigem soqotim ussa ninad a hi bulyisa God ago agem meqniy asor ayahmo ni nibinib eman in ni nibaq tunim nawa usaqta. Abeb God agem meqniysa daq meqinta bunmo amenin emdaqta akaman nab teq in ningko daq anononmo ulum kemim ninyon tibilaqan usta na ulal iysa ni in ago faq tuwaqdaq.

⁶ Kam nab God in on mataw bunmo gigo daq ahunibmo amenin tinegdaq.⁷ On mataw asor gibin dimunta waqeey God inaq kayeqmo tuteqmo osnan haqad in daq dimunta emad gituw a hi hicqiyatqa. God teq on mataw naqanta giwazinad ago os ahicqy haiqta na tinegdaq.⁸ Ari on mataw asor in gimo gihol anadin emad in gamuk helta na gileh ugad daq meqintaqmo muzinayta. God teq on mataw naqanta ginan agem meqniysa atoranmo tigimeqin tondaq.⁹ Gimeqin tonad in on mataw daq meqinta emayta na bunmo afaqan asesepta teq santitiy ayah diqmo

tinegdaq. Negsa Juda mataw in giyonta na danmeb waqsa ta on mataw en ta asor Juda a haiqta nagan bunmo in giyonta na tuwaq daqaymo.¹⁰ Ad nazaqmo God in on mataw daq dimunta emayta na bunmo agem dimunta negad in giwazinad gibin dimunta tinegdaq. Negsa Juda mataw in giyonta na danmeb waqsa ta on mataw en ta asor Juda a haiqta nagan in giyonta na tuwaq daqaymo.¹¹ Na ezaqgo God in on mataw en araqmo gigo a hi lehaqta.

¹² Mataw God ago maror Moses bilamta na asan ban osad daq meqinta emayta na in maror na haiqmo oseq tihiqiy daqayta. Sa mataw God ago maror na ahaqenib osad daq meqinta emiyta na, maror naqmo in gigo daq meqinta ulum kemid in amenin tuwaq daqay.¹³ Na ezaqgo on mataw God ago maror gidekmo huritayta na in God ameb titnonta a hi iy daqay. Haiqgam. On mataw maror na huritim ago gunun muzin bugayta naqmo teq God in ginan titnonta tihqaqdaq.¹⁴ Mataw en ta asor Juda a haiqta nagan bunmo in God ago maror Moses bilamta na a hi waqiyta. Teq in gihol loyinad ginadibmo maror na ago gunun muzinayta. In God ago maror na a hi waqiyta teq in gimo gisesan gigo maror aduganib God ago gunun ussa in gigo maror na bilaqne God ago maror Juda gigo hib usaqta na nogmo.¹⁵ Mataw na daq emad gihol loyin kemaya. Loyin kemad kam asor in gigem afaqan iysa kam asor in gigem dimunmo iyaqta. In nazaq emsa God ago maror agamukan mataw na gigemab mar tonan usaqta na ulal tiqiyaq.¹⁶ Nazaq iyan abeb God mataw bunmo gigo daq gigemab ulilemim usaqta na gilum kemsia mataw na gigo gunun naqmo in giyon bilaqid in gigo daq amenin tuwaq daqay. Kam nab God in Yesus Krais abenab mataw gilum kemgo akabiyana na emid inmo tiqemdaqta. Ya Yesus awagamun bilaqaiqta na nazaq lehaqta.

Juda mataw ginad emay, God ago maror Moses bilamta naqmo teq i gilumsihdaq haqayta

¹⁷ Ari mat ni bilaqaq, Ya Juda matta haqaq. God hazizir ayatha emdaqta akam-nib nab teq in ago maror Moses bilamta naqmo tiqilumsihdaq haqaq. Teq ni nihol abin iluwad bilaqaq. Yaqmo God ago dauhibta haqaq.¹⁸ Ad ya God ago anad tuhurit kemta haqaq. Ya God ago maror na asuleqin tuwaq bugim ya God ago daq helta na ago inad tiqem hasta haqaq.¹⁹ Haqad ni ninad emaq, Ya mataw gime haiqta dan giqisihunaiqta haqaq. Giqisihunad ya bilaqne mataw romriqab osayta na gigo saw anuwan nog osaiqta haqaq.²⁰ Ya mataw ginad haiqta giwastitayan in ginad tiqem

hasay haqaq. Teq ya onmin amikmikta suleq negaiqta haqaq. Haqad ni ninad emaq, I Juda on mataw God ago maror waqan maror na amuganib ginad dimunta alulin teq gamuk helta alulin gicus bugaqtta haqaq.

²¹ Ari ya kazaq diq nibilendaiq. Ni on mataw asor suleq negad ta ninmo nihol suleq a hi waqaqtta? Ni bilaqaq. On mataw hi rin toniy haqad teq ninmo towa a hi rin tonaqta ye? ²² Ad ni bilaqaq. On mataw an tuwaqiyta na in an alulib hureqeinq inaq hi usiy haqad teq ninmo towa nazaq a hi emaqta ye? Ni god katyta ginan ninad a hi bilaqad teq ni towa mataw en ta asor God abin a hi huritiya na gigo lotu abitnib nagah rin tonim a hi wazayta ye? ²³ Ni nihol abin iluwad bilaqaq. Ya God ago maror Moses bilamta na tuhurit haqaqta. Teq ninmo towa maror na ago gunun itiyonad ningdaq meqinta na amalib God abin wazar a hi woqaqta ye? ²⁴ God ago marib gamuk araq bilamta kazaq ni a hi emaqta ye? Gamuk na bilam,

Negmo daq meqinta emsa iyan on mataw en ta asor na ne gibiyad in God bilawunad abin bayan woqaqta ham.

Aisaya 52.5

Gihol abatan asan urotayta na ago alulin diq

²⁵ Ni nihol abatan asan uroteq God ago maror Moses bilamta na muzin bugsa teq ni nisan urotta na tinilumsihdaq. Ari ni nisan urotim teq ni maror na ago gunun itiyonad luwad na ni bilaqne mat asan a hi urotta nog iyaq. ²⁶ Ad nazaqmo mat asan a hi urotad teq in God ago maror aduganib daq titnonta usaqta na muzinad, mat na bilaqne mat asan urotta nog iyaq. ²⁷ Ne Juda mataw nagah giger God ago maror Moses mar tonta na teq gisan urot ago adanta na ne wazayta. Teq ne maror na ago gunun itiyonayta. Nazaq iyan mataw gisan a hi urotad God ago maror muzinayta na in eraqeinq ne Juda gigo daq meqinta nagan ginan ulalabmo tibilaq daqay. ²⁸ Na ezadgo, Juda matmo diqta abin na in gisango nagah a haiqta. Ad gisan urot adan diq na in giholmo ago a hi bilaqaqtamo. Haiqgam. ²⁹ Juda matmo diqta abin na in mat agemab teq anadib usaqta. Ad gisan urotmo diq adan na in mat agemab gwahtiqaqta. Nazaq iyan mataw gisanmo wastitayim in Juda gisenlul a hi iyayta. Haiqgam. God ago Bugaw Dimunta inmo mat eman in abin Juda matmo diqta na inaq iyim osaqta. Mat nazaqta in mataw gigo hib ahol abin a hi waqaqta. Haiqgam. In God-mo ago hib abin dimunta na waqaqta.

3

Daq meqinta in daq dimunta bayid a hi woqdaq

¹ Ari nazaq iysa iyan Juda on mataw ezaq tonim in mataw en bunmo giquriyamim danmeh iyim osayta? Teq gisan urot adan na in Juda mataw giqeman gibin ezaq diq usaqta? ² Mataw! Juda on mataw in nagah bunmo gigo hib on mataw en bunmo giquriyam bugim osayta. Ameb diqta na in kazaq. God in ago gamuk negan in gimo wamuzayta. ³ Helmo Juda asor gamuk na anan helmo a hi haqayta. Teq i ezaq haqam? Juda mataw na God ago gamuk a hi muzinsa God in ago gamuk na a hi muzindaqmo haqam e? ⁴ Haiq kidik! Mataw bunmo katiysa God teq nazaq a hi emdaq. In daq helta tumuzin tutdaq. God ago marib gamuk araq bilamta nazaq. Gamuk na bilam, God ham ni on mataw gilum kemim ginan hel diqtaqmo bilaqaqta ham. Sa mataw ni nilum kemad nimalib nan emsa ni in ginez na wazid woqsa ningdo gamuk helta naqmo tuqus tutdaq ham.

Buk Song 51.4

⁵⁻⁶ Ari teq ezaq? I gigo daq meqinta in God ago daq titnonta emid ulal iysa ta i ezaq haqam? I bilaqam, God i ginan agem meqinya faq igaqta na in daq titnonta a haiq haqam e? Haiq kidik! Gamuk nawa na in mataw og kabta gigo ginadta. God daq meqinta a hi emaqta. In daq meqinta emad ezaq teq in on mataw bunmo gigo daq tuqulum kem nag? ⁷ Teq luweq mat araq bilaqdaq, Mataw gigo daq katiya naqmo in God ago gamuk helta eman ulal iysa God abin ayahmo diq iyaqta haqdaq. Nazaq iyan ta doq ton in mataw na ginan meqinta haqad in giyon bilaqan in ameb timeqniyim osayta haqdaq? ⁸ Gamuk nawa na bilaqne gamuk ta araq meqinta mataw bilaqayta kazaq nog. In bilaqay, I daq meqinta emuq haqayta. I daq meqinta emsa God ago daq dimunta ulal iy hasaq haqayta. Mataw asor gamuk nawa na igmo ginezab emad in i gibin meqin diq tonayta. Teq in nazaq i gibin meqin tonim in giholyon dante eman God in giyon bilaqan in timeqniyim osayta.

Mat araq daq dimunta emad osaqta haiqgam

⁹ Ari teq ezaq? I Juda on matawta, i on mataw en bunmo giquriyamim God ameb dimunmo osauq e? Hikidik. Ya teko tibilay. Daq meqinta in Juda mataw teq mataw en ta asor Juda a haiqta nagan bunmo nenaqmo tigiwaleq ton bug hay. ¹⁰ Teq God ago marib gamuk araq nazaq bilammo. Gamuk na bilam,

Mat araq daq dimunta emaqta haiq ham. ¹¹ Teq mat araq anad em hasaqta haiqmo ham. Mat araq diq anadibmo God a hi nagunaq ham. ¹² Bunmo dan titnonta tuhulosiyta ham. Bunmo araqibmo mataw meqin diqta iyim osayta ham. In gigo araq diq daq dimunta emad osaqta na haiqgam ham. Haiqmo diq ham. *Buk Song 14.1-3*

¹³ In gitenmos bilaqne hodhod aqez hasan ussa alilihan ahuran gwahtiqaqta nazaq nog ham. *Buk Song 5.9*

Teq in giqezaq gamuk katiyta kabemmo gwahtiqaqta ham. In giteb nan meqin diqta gwahtiqaqta ham, bilaqne nagah ahulinaqta ago ate afan nog ham. *Buk Song 140.3*

¹⁴ Teq in gitenmosib an kusluw ug agamukan teq nan meqinta ate gwalim usaqta ham. *Buk Song 10.7*

¹⁵ In mat araq wol emid moqgo ginadnad a hi emayta ham. ¹⁶ Teq in leh bolad luwad in on mataw afaqan negad gimeqin diq tonayta ham. ¹⁷ In mataw nenaq zib a lowab osgo a hi huriyatya ham. *Aisaya 59.7-8*

¹⁸ Ad in God anan asit a hi rabayta ham. *Buk Song 36.1*

¹⁹ God ago maror Moses bilamta na in on mataw maror na ahaqenib osayta naqmo gibilenaqta. Na i bunmo tuhuritta. Nazaq iyan i Juda on mataw teq on mataw og saw bunmo inaqmo i bunmo God ameb i gigo afaqan inaq iyim i gihol adanin qwayamta dan haiqgam. ²⁰ Mat araq diq God ago maror agununin muzin bugeq in ameb mat titnonta iydaqta na haiqgam. Na ezaqgo on mataw bunmo maror na ago gunun itiyonsa in gigo daq meqinta ulal tiqiy bugaqta.

Mat Yesus Krais anan helmo haqaqta naqmo abin God ameb titnonim usaqta

²¹ Teq muran God i ginan on mataw titnonta haqdaqta adanteqin araq ulalabmo tugwahtim. Dante na God ago maror Moses bilamta nab a hi lahta. Ta teq God ago maror kwaziqta na tec God ago nantut gamuk bilaqita na inaq giduganib dante muturta na agamukan usaqta. ²² Dante na in kazaq. God in on mataw Yesus Krais anan helmo haqayta na bun diqmo ginan on mataw titnonta tihaqqa. Ad in on mataw asormo gigo a hi lehaqta. ²³ Na ezaqgo on mataw bunmo daq meqinta emim in God ago uliqab inaq osgo gibin timeqniyim usaqta. ²⁴ Ta teq Krais Yesus in on mataw gigo daq meqinta na amenin tizay bug. Zay bugan muran mat aw nog in Yesus anan helmo haqsa God agem dimunta samanmo naw nog negad in ginan

on mataw titnonta haqqa. ²⁵ Teq in on mataw bunmo gimen daq amulikmo emaqta na in emid ulal iydaq haqad in Yesus eman bolim in on mataw gimeb moqim anedan tamaz nog wazbalan wom. Woqan mat aw nog in anedan na anan helmo haqsa God in ginan agem a ta hi meqniyqa. Daq alulin naqmo ago kwaziqmo Yesus a hi moqsa on mataw daq meqinta emsa God ahol wasihad amenin a hi negyaq. ²⁶ Teq muran kam kab Yesus tumoqan God daq amulik naqmo emad in on mataw Yesus anan helmo haqayta na ginan titnonta haqad in gigo daq meqinta na amenin a hi negaqtamo. In nazaq emad in on mataw bunmo gimen daq amulikmo emaqta na ulal tiqiy hassa in inaqmo mat titnonta iyaqtamo.

²⁷ Nazaq iyan nog teq inmo ahol abin iluwad bilaqdaq, Yaqmo igo zawayibmo God ameb mat titnonta iyim osaqa haqdaq? Na haiqgam. Teq naga daqin diq i gidanin qwaysa i gihol abin nazaq a hi iluwamta? I God ago maror Moses bilamta muzinauqta ago adan naqmo i gidanin qwaysa i gibin a hi iluwam e? Haiqgam. I Yesus anan helmo haqgo adan naqmo i gihol abin iluwgo adanteqin qwayim usaqta. ²⁸ Na ezaqgo mat God ago maror Moses bilamta na ago akabiyana a hi emad in Yesus anan helmo haqsmo God in anan mat titnonta haqqa. Ya nazaqmo diq bilaqdaiq.

²⁹ Teq ezaq? God in Juda gimomo gigo God daqag? Ad in towa mataw en ta asor Juda a haiqta nagan gigo God a haiq daqag? Haiqgam. In on mataw en bunmo gigo God-mo. ³⁰ God amulikmoqmo osaqta. Sa mataw gihol abatan asan urotayta na in Yesus anan helmo haqsa God in ginan mataw titnonta haqqa. Teq mataw gisan urotgo adan a hi muzinayta na in Yesus anan helmo haqsa God in ginan mataw titnonta haqqa. ³¹ Teq luweq i ginad emam, Yesus anan helmo haqgo adan na in God ago maror Moses bilamta na eman samanta iyim usaqta haqam. Haiq kidik! I gigo ginad helta naqmo in maror kwaziqta na asen baysihsa in awaz meqniyim usaqta.

4

God Abraham anan mat titnonta ham

¹ Teq i Juda gises Abraham anan ezaq bilaqam? Abraham in God ago hib daq ezaqta ahol wam? ² Abraham kabiy daq dimdimunta emad abin titnonta waqeinq in matawmo gigo hib abin iluw nagta. Teq in God ago hib abin a hi iluw nag. ³ Na ezaqgo God ago gamuk kazaq usaq.

Abraham God aqez anan helmo haqan God in anan mat titnonta ham. *Jenesis 15.6*

⁴ I ginad emuq. Mat kabi y emaqta na in ago kabi y amenin samanmo naw nog a hi waqaqta. Haiqgam. In naw na akabiy an emim teq waqaqta. ⁵ Teq God in mataw daq meqinta emaya na ginad helta naqmo ahol waqim in gabin titnonta samanmo naw nog nega qta. Nazaq iyan mat kabi y araq a hi emad in God aqezmo anan helmo haqa qta, God in mat naqantaqmo anan titnonta haqa qta. ⁶ Teq Devit gamuk nazqa qta bilammo. Devit anadib mat kabi y a hi emsa mo God in anan mat titnonta samanmo haqa qta naqmo in tidimniyim osa qta. ⁷ Na ago Devit kazaq bilam, On mataw God in gigo daq meqinta wale mad anadin a ta hi emaqta naqmo in tidimniyim osa yta ham. God in mataw na gigo daq meqinta gisuhol bugim ahol a ta hi waqaqta ham.

⁸ Helmo ham, Iyatha in mat araq ago daq meqinta nulinad amenin a hi emsa mat naqmo tidimniy hasim osa qta ham. *Buk Song 32.1-2*

⁹ Teq Devit in mataw gihol abatan asan urotayta naqmo ginan gamuk dimunta na bilam e? Ad in mataw gisan a hi urotayta na ginan a hi bilam e? Haiqgam. Teko ya tibilay, Abraham God aqez anan helmo haqanno God in anan mat titnonta ham hay.

¹⁰ Teq Abraham ezaq iyim ossa God in anan mat titnonta ham? In asan tuqurotan teq God in anan mat titnonta ham o haiq, in asan a hi urotsamo God in anan mat titnonta ham? In asan a hi urotsamo God in anan mat titnonta haqad tibilamta.

¹¹ Bilaqim abeb teq in Abraham daq gisan urotayta na ugan in wam. Daq na in Abraham helmo haqim mat titnonta iytana atowun nog in asanib usdaq haqad God in daq na ugta. Abraham asan a hi urotadmo in God anan helmo haqan God in anan mat titnonta ham. Daq na amalib Abraham in mataw gisan a hi urotad God anan helmo haqayta na gigo gises gibaqbaq tiqiy. Mataw naqanta God aqezmo anan helmo haqsa in ginan mataw titnonta haqa qta. ¹² Teq Abraham in mataw gisan a hi urotayta na gimo gigo gises gibaqbaq a haiq. Haiqgam. Mataw gisan urotayta na in Abraham asen muzad Abraham asan a hi urotadmo God anan helmo hamta nazaqmo in God anan helmo haqsa Abraham in mataw naqanta gigo gises gibaqbaq tiqiyatamo.

God on mataw gidimun tonnan bilamta agamukan na in on mataw God anan helmo haqayta naqmo gigota

¹³ Kwaziqmo God in Abraham og bunmo ugnan gamuk hel diqmo bulonta. Bulonan gamuk na Abraham asesan bunmo gigo hib lahtamo. Teq Abraham in God ago maror Moses bilamta na ahaqenib lehim tuqossa teq God in og agamukan ugta nazaq a haiq. Haiqgam. Abraham God anan helmo haqan God in anan mat titnonta tihaqim teq in gamuk na ugta. ¹⁴ Ari mataw God ago maror Moses bilamta muzinayta naqmo in God ago os dimunta waq daqayta iyid mataw God aqezmo anan helmo haqayta na in le daq samanta tiqiy nag. Ad God gamuk hel diqmo bilamta na anon araq a hi gwatiq nagmo. ¹⁵ Na ezaqgo on mataw God ago maror Moses bilamta na ahaqenib osad gunun itiyonsa God in ginan agem meqniyaqta. Ari mataw samanmo maror haiqmo osad in gunun itiyonayta na ago afaqan a hi waqayta.

¹⁶ I God ago maror Moses bilamta na ahaqenib iyim itiyonad afaqan waqauqta. Nazaq iyan i God aqezmo anan helmo haqauqta naqmo amomo i giqeman i in ameb titnonim osauqta. God anadibmo agem dimunta samanmo igad gidimun tonqta. Daq alulin nazaq iysa iyan God in Abraham asesan gidimun tonnan gamuk hel diqmo bilamta na in Abraham anaynayniz bun diqmo gigo hib anon tiqemdaq. Gamuk na in mataw God ago maror Moses bilamta ahaqenib osa yta na gimo gionta a haiq. Haiqgam. Gamuk na in on mataw ginad helta Abraham anad nogta na bunmo gionta. Na ezaqgo Abraham in on mataw helmo haqayta na bunmo gigo gises gibaqbaqta. ¹⁷ God ago marib gamuk araq nazaq bilaqan usa qta. Gamuk nab God in Abraham bulonim bilam, Ya niqemid ni on mataw en kabemmo gises tiqiyadaq ham. *Jenesis 17.5*

God in mataw tumoqiyta giqeman kayeqta iyyata teq in nagah a hi usa qta anan bilaqsa in tugwaqta. Nazaq iyan Abraham God aqez na anan helmo haqan God in anan bilaqan in i bunmo gigo gises gibaqbaqtiqiy.

¹⁸⁻¹⁹ Kam nab Abraham ago ulig 100 nazaq tiqiy in ahol azawayin tihiqiy bugta. Teq in awe nignig amun a hi emyaqtamo. Abraham nagah na ahol waqyaqta teq in anad God anan helmo hamta na a hi woqad awaz meqniyim us. God tanabmo Abraham bulonim bilam, Teq nisesan gidauhan kuluwmo diq tug wahti qdaqay ham. *Jenesis 15.5*

Haqan Abraham in on mataw en kabemmo gigo gises gibaqbaq tiqiyadaq haqad in God anan helmo diq haqad amen emad anad nad a hi emyaq. ²⁰ In anad emyaq, God ya idimun tonnan hel diqmo bilamta haqad in

anad giger a hi emad in anad helta na a hi hulosyaq. Ad in anad helta naqmo ahol zaway ugsa in God abin tiqiluwyaq.²¹ Nazaq iyan in anad emyaq, God hel diqmo bilamta nazaqmo in tiqemdaq haqyaq.²² In nazaq God aqez anan helmo haqan God in anan mat titnonta ham.

²³ Teq Abraham amomo helmo haqan God anan mat titnonta hamta nazaq God ago marib a hi usaqta. Haiqgam.²⁴ Gamuk na i on mataw God anan helmo haqauqta na bunmo gimen usaqtamo. God in i gigo Iyatha Yesus hodhodab wazan ta erama na ago i anan helmo haqsa in i ginan mataw titnonta haqaqta.²⁵ God i gigo daq meqinta walemnan haqad in Yesus waqim mataw gibenab eman in wol eman momta. Teq God i ginan on mataw titnonta haqnar haqad in Yesus hodhodab wazan ta eram.

I Yesus inaq moqim teq i inaq kayeqmo osauqta

5

God i ginan mataw titnonta haqaqta na alulin

¹ Nazaq iyan i gigo Iyatha Yesus Krais i gilumsihan i in anan helmo haqan God i ginan titnonta thiam. Nazaq iyan i God inaq gigem amulikmo tiqiyim i inaq an gihar ugyauqta na tihiqiy.² Yesus Krais-mo i gimen dante wastitayan muran God agem dimunta igsa i giwaz meqniyim turauq. Ad i ginad emauq, God teq i giwaqid i in ago os dimunta nab le gwahtiqeq inaq dimunmo osamta haqaq. Haqad i in amen emad ginad dimniyisa osauq.³ Teq i naqmo amomo ago ginad a hi dimniyiq. Haiqgam. I afagan sorad gihol titiyaqta na ago i ginad tidimniyiqmo. Na ezaqgo afagan nazaqta na i giqeman i gigem awaz meqniyisa gituw a hi hiqiqyaqta.⁴ Ad i gigem awaz timeqniyisa i Yesus ago on matawmo diq tiqiyim i ta a hi woqaqta. I Yesus ago on mataw nazaq diqta tiqiyim osad in teq boleq i gilumsiheq ta giwaqdaqta na i anan helmo diq haqad i amen emad osauqta.⁵ Teq i Yesus amen emim osad i samanmo a hi osauqta. Haiqgam. God in ago Bugaw Dimunta igan in i giholib bolim ussa i God agem dimunta igaqta na i gigemabmo diq tiloyinauq.

⁶ Na in kazaq. Igmo gihol ulumsihg zaway hiqiyim ossa, kam God anad usta nabmo Krais in i on mataw daq meqinta emauqta na gimen tumom.⁷ Ne ginad emiy. Nagaqgo mat araq in ta mat araq God ameb titnonim osaqta na ago ban waqeq amen moqdaqta? Na haiqgam. Ari mat araq in ago walmataw tuteqmo gidimun tonsa teq nabag mat ta araq in awaz meqniyeq mat dimunta na ago ban

waqeq amen tumoqdaq daqag.⁸ Ta teq God nazaq a hi amta. I bunmo daq meqinta emad ossa in Krais eman bolim i gimen tumomta. Moqan daq na amalib God i ginan anad bilaqaqta na ulal iysa i ahol waq kemauqta.⁹ Krais moqan anedan woqim i gigo daq meqinta tisuholan muran God i ginan on mataw titnonta tihaqaq. Nazaq iyan abeb God in on mataw gileh ugayta na ginan agem meqniyisa Krais i giwaqeq ban dimuntab giqemid i tidimniy haseq osamta.¹⁰ Na ezaqgo, i God ababunmo diq iyim ossa kam nabmo in atatin moqim i gimen dante eman i God inaq an anobun tuwastitay. Teq in atatin na kayeq ta iyim osaqta. Nazaq iyan i muran God inaq an anobun tuwastitayim ossa abeb in atatin i gilumsiheq ta giwaqid i tidimniy haseqmo tuqosam.¹¹ Teq i abeb dimunmo osamta naqmo amomo anan i ginad a hi dimniyiq. Haiqgam. I gigo Iyatha Yesus Krais i gimen dante eman muran i God inaq an anobun tuwastitayim osad i God anan ginad tidimniyiqmo.

*Adam moq eman gwahtiyan Yesus in os
kayeqmota eman gwahtim*

¹² Mat amulikmo God aqez othasan daq meqinta emgo adan og kab gwahtimta. Gwahtiyan daq meqin emgo adan na in ta moq eman gwahtintamo. Gwahtiyan moq in on mataw bunmo giwam. Na ezaqgo on mataw bunmo daq meqinta emiyta na ago iyan.¹³ God ago maror Moses bilamta na a hi gwahtiqsamo daq meqin emgo adan og kab tugusta. Teq God ago maror na haiq iysa God in mataw gigo daq meqinta nulinnad amenin a hi emaqta.¹⁴ Ta teq Adam ago kamub iyim bo Moses ago kamub nab moq in on mataw bunmo giwazan woq yaqayta. Mataw na Adam gunun itiyonta nazaq in a hi emiyta teq in bunmo moq bug yaqayta.

Ari Adam in mat abeb teq gwahtiqaqta na nog.¹⁵ Ta teq Adam ago daq meqin in amta na in God ago naw in samanmo igaqta na nog a haiq. Hikidik. Mat amulik naqmo God aqez othasan on mataw kuluwmo moqiyta. Ari God agem dimunta on mataw negad in mat ta araq amulikmo Yesus Krais-mo eman tubol. Bolim in inaqmo agem dimunta negad in samanmo naw nog on mataw kabemmo ayahmo diq tigilumsihta.¹⁶ Teq Adam ago daq meqin anon amta na in God samanmo naw nog i gilumsihta na nog a haiqmo. Mat aqenta na in God aqez othasad daq meqinta amulikmo eman on mataw bunmo timeqniy God in gilum kemim giyon bilaqan in moq daqayta tiqiyim osayta. Ari God ago naw dimunta na in kazaq. Daq meqinta kuluwmo diq tugwahtiyan teq God on mataw

giqemid titnonta iyoq adanteqin na in samanmo naw nog eman gwahtimtam.

¹⁷ I ginad emuq. Mat amulikmo God aqez othasan moq in daq meqinta naqmo amalib gwahtiçim in on mataw bunmo gigo danmehta iyim giwazan woq bugiyta. Ari Yesus Krais on mataw gilumsihim gimen dante amta na in moq ago zaway ayahmo uriyamta. Dante naqmo amalib God agem dimunta ayahmo on mataw negad gibin titnonta samanmo naw nog tinag. Negan on mataw na kayeqmo osad in nagah zawayta bunmo giquriyamim gigo danmehta tiqiyim osayta.

¹⁸ Nazaq iysa iyan mat amulikmo God anad othasad daq meqin amta na amalib on mataw bunmo gibin meqniyan God in giyon bilaqan in God ago faq waqeç moq daqayta tiqiyim osayta. Ad nazaqmo mat amulikmo God anad muzinim daq dimunta eman on mataw in anan helmo haqayta na bunmo gibin titnonta tuwaqim in kayeqmo kuluwa-kuluwmo os daqayta tiqiyim osaytamo. ¹⁹ Mat amulikmo God aqez othasan daq na amalib on mataw kuluwmo timeqniyim in daq meqinta emayta tiqiyiyya. Ad nazaqmo mat amulikmo God aqez muzinan on mataw kuluwmo tidimniyeq titnonta tiqiy daqaytamo.

²⁰ Ari God ago maror Moses bilamta na abeb gwahtiçan mataw gigo daq meqin kuluwmota na ulal tiqiy bug. Ta teq daq meqin kuluwmo diq iysa God agem dimunta igaqta na in daq meqinta nagan giquriyamim ayahmo diq iya. ²¹ Na in kazaq. God agem dimunta on mataw negad in i gigo Iyahta Yesus Krais eman bolim in gimen dante tuwastitay. Wastitayan on mataw dante na muzinad in God ameb titnonim osayta. Nazaq iysa iyan daq meqinta in on mataw gigo mat danmehta iyim giwamuzsa in moqayta. Ad nazaqmo muran God ago agem dimunta in on mataw gigo mat danmehta iyim giwamuzsa in kayeqmo kuluwa-kuluwmo osayta.

6

I Krais inaq garibmo tumowta

¹ Daq alulin nazaq ussa iyan muran teq i naga gamukin bilaqam? I bilaqam, I daq meqinta emutsa God agem dimunta na ayahmo i gigo hib bol tutanmo haqad luwan e? ² Haiq kidik! I tumoq nog iyim daq meqinta ahaqenib a ta hi osauqta. Nazaq iyan ezaq teq i daq meqinta emad a ta luwan? ³ I Krais Yesus aholib soqotim yuw tuhuza. Daq na amalib i Krais inaq tumowta nog tiqiy. Na ne ginad a hi emay ye? ⁴ I yuw huzta nab i Krais inaq moq nog iyim i inaq hodhodab tuqusta nog iy. Sa God ago zaway ayahta mataw ahol waqad

abin iluwayta na amalib in Krais hodhodab wazan eramta nazaqmo in i giwazan i tigerawmo. Eraqim i os muturta lul araq diqta na tuwaqim osauqta.

I teq Krais inaq kayeqmo osamta

⁵ I Krais aholib soqotim in momta nazaq nog i tumowmo. Nazaq iyan i in aholib tisoqotim osad in moqim eramta nazaq nog i tigeraqamtamo. ⁶ Ka ago ne ginad em hasiy. I gigem kwaziqta na Krais inaq ayib dom wolam tumomta. Moqan daq meqinta i ginad hureqgo ago zaway alulin i gigemab usta na thihiqiy. Hiqiyan muran i daq meqinta ago kabibiy on mataw a ta hi osauqta. ⁷ Na ezaqgo daq meqinta in mat tumomta na anad hureqgo ago zaway thihiqiy.

⁸⁻⁹ I Krais inaq tumowta. Teq God Krais hodhodab wazan eraqim in a ta hi moqdaqta tiqiy. Moq in Krais wazid a ta woqdaqta ago zaway thihiqiy. Na i bunmo tuhuritta. Nazaq iyan i ginad emauq, Krais hodhodab eraqim kayeqmo ossa i in inaq kayeqmo tuqosammo haqauq. ¹⁰ Na ezaqgo, Krais ame amulikmo moqim in daq meqinta ago zaway meqin tonan daq meqinta in Krais anad hureqgo biyab haiqta. Ari Krais kayeq ta iyim osad in God anad muzingo osaqta. ¹¹ Nazaq iyan ne ginad kazaq emiy. I Krais Yesus inaq moqan daq meqinta i ginad hureqgo azawayin thihiqiy haqiy. Ad i Krais Yesus inaq kayeq ta iyim i God anad muzingo osaqta haqiy.

¹² Daq meqinta in ne gigo mat danmehta iyeq in ne gisan moqdaqta na hi wamuzan. Luweq daq meqinta ne ginad wamuzsa ne gihol bilaqgo adan naqmo ne tumuzin daqay. ¹³ Ad ne gibensen gitenmos nagan gihulosid in daq meqinta ago kabibiy mataw iyeq daqdaq hi emiymo. Ne bilaqne on mataw hodhodab tigeraqim kayeqmo osayta nog. Nazaq iyan ne gihol anaghan na bunmo giqemid in God ago kabibiy mataw iyeq in ago daq titnonta naqmo giqemiy. ¹⁴ Muran ne God ago maror Moses bilamta na ahaqenib a ta hi osayta. Ne God ago agem dimunta naqmo ahaqenib osayta. Nazaq iyan daq meqinta in ne gigo ayahta iyeq a hi giwamuzdaqta.

I daq titnonta ago kabibiy on matawta iyeq osuq

¹⁵ Ari i God ago maror Moses bilamta na ahaqenib a ta hi osad teq i ezaq tonam? Muran i God ago agem dimunta ahaqenib osad daq meqinta haresmo tiqemam daqay? Haiq kidik! ¹⁶ Ne gihol mat araq ahaqenib emeq aqez muzinad teq ne mat naqmo ago kabibiy matawta iyeq os daqay. Na ne ginad a hi emay ye? Nazaq iyan ne daq meqinta ago kabibiy matawta iyid in ne giwamuzsa ne tumoq

daqay. Ari ne God aqez muzinad teq ne in ameb on mataw titnonta tiqiy daqay. ¹⁷ Hel diqtaqmo kwaziqmo ne daq meqinta ago kabibiy mataw iyim osiyta. Teq muran God ne giqeman ne in ago gamuk ahaqenib lehim ne gihol bunmo amalib in aqez na tumuzinayta. Daq naqmo ago i God esey diq uguq. ¹⁸ Kwaziqmo daq meqinta ne giqirquran os yaqayta. Teq God ne giqamun na hasim in ne giqeman ne daq titnonta ago kabibiy mataw tiqiyim osiyta. ¹⁹ Yaqgo gamuk ka ya mataw gigo daq muzinim gamuk awowunmo huiqqa. Na ezaqgo ne yaqgo gamuk adugan diqta na huritgo ginad siqim iydäq haqad. Kwaziqmo ne gibensen eman daq anumalan inaqla ago kabibiy mataw iysa ne daq meqinta haresmo ayahmo diq em yaqayta. Ad nazaqmo muran ne gibensen na emid in daq titnonta ago kabibiy mataw iysa ne God ago on mataw tawon diqta iyeq osiy.

²⁰ Kwaziqmo ne daq meqinta ago kabibiy mataw iyim ossa daq titnonta in ne ginad wamużgo azawayin haiqta. ²¹ Teq ne daq meqinta ago kabiy em yaqayta na anon araq dimunta edowa ne waqiy? Na huiqgam. Muran ne gigo daq kwaziqta na anadin emad ne gimebey horwazimmo woqqaqta. Na ezaqgo daq meqinta ago kabiy amenin na moqmo. ²² Ari muran God ne giqamun na tihasan ne daq meqinta ahaqenib a ta hi osay. God ne giqeman ne inmo ago kabibiy on mataw tiqiyim ne in ago kabiy emad anon dimunta tuwaqay. Teq God ago kabiy amenin na in kazaq. Muran ne God ago on mataw tawon diqta iyim osiyta. Teq abeb ne os kayeqmo kuluwa-kuluwmo osiyta na tuwaq daqay. ²³ Na ezaqgo daq meqinta anawun na moqmo. Ari God ago naw in samanno igaqta na in kazaq. In i giqeman i gigo lyahta Krais Yesus aholib soqotim inaq osad i inaq kayeqmo kuluwa-kuluwmo tuqosamta.

7

Muran i giqem muturta amalib kabiy emuq

¹ Ya imaqbaban, ne bunmo God ago maror Moses bilamta na tuhurit kemiyya. Nazaq iyan ya kazaq gibilendaiq. Mat maror na ahaqenib osad a hi moqsamo maror na in mat na wamuzaqta. Ari mat na moqid teq maror na in a ta hi wamuzdaq. Na ago ne ginad a hi emay ye? ² Ad nazaqmo aw in mat tuwaqeq in an waq ago gunun ahaqenib osad in mat ta araq inaq a hi luwdaq. Ari aw na aduw tumoqid teq gunun na in aw na a ta hi irqurdaq. ³ Nazaq iyan aw aduw kayeqmo ossa awé in aduw hulosad mat ta araq waqid in anan bilaq daqay, Aw haresmo luwaqta tihäq daqay.

Ari aduw tumoqid teq aw na in an waq ago gunun na ahaqenib a ta hi osdaq. In mat ta araq waqid mataw in anan aw haresmo luwaqta nazaq a hi bilaq daqay.

⁴ Ad nazaqmo ya imaqbaban, ne Krais aholib soqotan in moqsa ne inaq tumoqiyimo. Moqim ne God ago maror Moses bilamta na ahaqenib a ta hi osad ne bilaqne aw aduw moqan in mat ta araq muturta wamta na nog tiqiyiy. Iyim muran ne mat hodhodab ta eramta na tuwaqim inaq osiyta. God anad i in ago kabiy emsa kabiy na anon kabemmo tisorqendaq haqad in mat na igan i inaq tuqosauqta. ⁵ I giqem kwaziqta muzinad osta nab i God ago maror Moses bilamta na huritad i othasnam gihol atorandom eraqsa i daq meqinta emyuauqta. Emsa daq meqinta i giholib anon emsa i moqgomo iyim osyuauqta. ⁶ Ari muran i Krais inaq tumoqim i God ago maror kwaziqta na ahaqenib a ta hi ossa maror na in a ta hi giqirquraq. Kwaziqmo Moses in God ago maror na mar tonan mar naqmo i gibe yahsa i God anad muzinyauqta. Ari muran God ago Bugaw Dimunta in i gimugan eman mutur iyan i ginad bilaqsa God anad muzinad tiluwaqta.

Daq meqinta naqmo i gimeqin tonaqta

⁷ Ari God ago maror Moses bilamta aduganib gunun giqusaqta na in i ginad meqinta emid eraqsa teq i ezaq haqam? God ago gunun na in meqin haqam e? Haiq kidik! Gunun na a hi usta iyid ya daq meqinta ago a hi hurit nagta. Kwaziqmo ya mat araq ago nagah utetad ya daq meqinta emaiq nazaq ya ihol a hi loyinyaqta. Teq God ago maror aduganib gunun usaqta na bilam, Ni mat araq ago nagah hi utet ham. Haqanmo ya huritim nagah utetyaqta na loyinan in daq meqinta tiqiy. ⁸ Ya gunun na ago inad em hasta nab daq meqinta in dante inaq tiqiyim in nagah utet adan eman ya igemab gwahtiqa ya nagah haresmo tuqutetyaqta. Helmo, God ago maror huiqgam iysa daq meqinta moq nog iyim ago zaway hiqiyim usaqta. ⁹ Nazaq iyan God ago marorib gunun giqusaqta na in ya inadib a hi bolsa ya kayeqmo osyaiqta. Ossa teq gunun na ya inadib tubolamno daq meqinta kayeq iyim tigeram. ¹⁰ Eraqanmo ya tumoy. Moqim nab ya daq kazaq ahol way. God ago gunun Moses bilamta na in ya ilumsihid ya kayeqmo kuluwa-kuluwmo os nagta. Teq huiq. In ya iqeman ya moq hasgo tiqiyim osyaiqta. ¹¹ Na ezaqgo gunun na bilaqan daq meqinta in dante inaq tiqiyim in ya ikat yagad inol eman ya tumoy. ¹² Nazaq iyan God ago maror Moses bilamta na in meqin a huiq. Na in God-mo ago hib bolim in tawon diqta. Ad maror na aduganib

gunun gicusayta na inaqmo in tawonta teq in titnonta teq in dimun diqta.

¹³ Teq ezaq? Towa God ago gunun ya ilumsih nagta na in ya inol eman moyta daqagya? Haiq kidikmo! Daq meqin naqmo in gunun dimunta na amalib ya inol eman moyta. Nazaq iyan daq meqinta in God ago gunun dimdimunta na giwazbuliyad gimalib i ginolsa i ginad emauq. Daq meqinta naqmo in nagah meqin diqtaqmo haqaucq.

Daq meqinta i ginad wamuzsa i daq hi emnanta emauqta

¹⁴ God ago maror Moses bilamta na God-mo ago hib bolim in i ginadmo bulonaqta. Na i bunmo tuhuritta. Teq ya isan ka in og kabta iyim iyan daq meqinta iqirqruran ya in ago kabibiy mat samanta iyim osaigta. ¹⁵ Nazaq iyan yaqgo daq ya emaiqta na in ya inad a hikidik muzaqta. Ya daq dimunta emnan inad bilaqaqta na ya a hi emaiqta. Teq ya daq emnan inad a hi bilaqaqta naqmo ya tutimmo emaiqta. ¹⁶ Ari ya daq inad a hi bilaqaqta naqmo emad ya inadmo in God ago maror Moses bilamta na inaq rirensa ya igemabmo diq maror na anan dimunta haqaiqta. ¹⁷ Nazaq iyan yaqmo diq daq hi emnanta na a hi emaiqta. Haiqgam. Daq meqinta adan ya isanib usaqta naqmo in daq na emaqta haqaiq. ¹⁸ Ya daq dimunta emnan inad bilaqaqta na ya a hi emaiqta. Ad ya daq meqinta inad a hi bilaqaqta naqmo ya tutimmo emaiqta. ¹⁹ Ari ya daq inad a hi bilaqaqta tutimmo emad ya inad kazaq emaiq. Yaqmo diq daq na a hi emaiqta haqaiq. Haiqgam. Daq meqinta adan ya isanib usaqta naqmo in daq na emaqta haqaiq.

²⁰ Nazaq iyan daq kazaqta ya iholib ussa ya ahol waqaiqta. Ya daq dimunta emnan inad emsamo daq meqinta adan ya isanib usim eraqad in ya inad dimunta na walebolaqta. ²¹ Ya igemabmo diq God ago maror Moses bilamta na anan inad bilaqaqta. ²² Teq daq araq diq ya iholib ussa ya ahol waqaiqta. Daq na in ya inad God ago maror muzgota na inaq an wolaqta. An wolad daq meqinta adan ya isanib usaqta na in ya iqirqrud in ya ihol bunmo wamuzaqta.

²³ Mataw! Ya timeqniy! Nog teq ya ilumsihad in ya isanib daq meqinta adan ka walemid in ya ihulos yagad a hi inol emdaq? ²⁴ Ya God esey ugaiq. I gigo Iyahita Jesus Krais inmo teq tiqilumsihdaqta.

Ari daq alulin nazaq ussa iyan ya inadmo in God ago maror na ahaqenib ussa ta ya isan ka in daq meqinta ahaqenib usaqta.

8

Krais daq meqinta walemim God ago Bugaw Dimunta igan i God anad muzingo tiqiy

¹ Ari muran teq on mataw Krais Jesus aholib soqotim inaq osayta na in God ago maror Moses bilamta na ahaqenib a ta hi ossa maror na ago gunun in giyon bilaqsa in a ta hi meqniy daqay. ² Na ezaqgo muran ya Krais Jesus inaq soqotim ossa Bugaw Dimunta ya inad wamuza ya kayeqmo osaigta. Osad ya daq meqinta adan isanib usaqta na a ta hi muzinad ya moq hasgo adanteqin na tuhulosim luwaiqta. ³ Na in kazaq. I gisan ka in God ago maror Moses bilamta na ago gunun muzgo ago zaway haiqta. Nazaq iyan gunun na i gigo daq meqinta walemgo azawayin haiqta. Ari maror kwaziqta na i gilumsihdaqta ago zaway hiqiyen God-mo i tigiwastitay. In atatin eman bolim in i mataw daq meqinta emauqta gisan waqim tugwahtim. Gwah-tiqan God in i daq meqinta emauqta ago mebay na inmo atatin aholib em bugim teq in atatin ayon bilaqan in daq meqinta na amenin bunmo sorimmo tumom. ⁴ God atatin i gigo ban waqim moqan muran i gigemabmo diq God ago maror wazad i muz bugnan ginad tibilaqqaq. Ginad bilaqsa i gigem kwaziqta na anad a ta hi muzinauq. Haiqgam. Muran God ago Bugaw Dimunta anad igsia daq emauqta.

⁵ Mataw gigem kwaziqta anad muzinad in ginad bunmo gigem kwaziqta ago daq meqmeqinta emgo usaqta. Ari mataw Bugaw Dimunta anad muzinad luwayta na in ginad bunmo Bugaw Dimunta ago daq emgo usaqta. ⁶ Mat agem kwaziqta anad muzinaqta na in oseq teq tumoqdaqta. Ari mat Bugaw Dimunta anad muzinaqta na in os dimunta kuluwa-kuluwmo osayta na waqeq agem kute nemsat tuqosdaqta. ⁷ Na ezaqgo mat agem kwaziqta anad muzinad in God ago maror ahaqenib a hi osad in God geg ugaqta. Mat nazaqta na in God ago maror muzgo ago zaway haiqgam iyan in maror na muzan yo hiqiyqata. ⁸ Nazaq iyan mataw gigem kwaziqta anad muzinayta na in daq God anan anad bilaqaqta na emgo biyab a hi iyayta.

⁹ Ari God ago Bugaw Dimunta in helmo ne giholib tuqussa teq ne gigem kwaziqta anad a ta hi muzin daqay. Haiqgam. Ne Bugaw Dimunta anad naqmo tumuzin daqay. Mat aholib Krais ago Bugaw a hi usaqta na in Krais ago mat a haiqta. ¹⁰ Ne ginad emiy. Daq meqinta adan ne gisanib

usaqta na ago ne tumoq daqay. Ta teq Krais ne giholib ossa ne giwitan kayeqmo tuqos tut daqay. Na ezaggo Krais ne giholib ossa God ne gibiysa ne mataw titnonta iyim osayta.¹¹ Na in kazaq. God in Krais Jesus hodhodab wazan tigeram. Nazaq iyan in ago Bugaw Dimunta ne gimuganib ussa teq God Jesus wazan hodhodab eramat nazaqmo in ago Bugaw ne giholib usaqta na ago zaway amalib ne gisan moqdaqta na giqemid kayeq ta iy daqaymo.

God ago Bugaw Dimunta i giqeman i God ago onmin iyuauqta

¹² Nazaq iyan ya imaqbaban, God i gilumsihaqta na amenin ayahmo i gigo hib usaqta. Ussa i giqem kwaziqta na anad eraqsa i daq meqinta adan gisanib usaqta na a ta hi muzinam. Haiqmo diq. ¹³ Na ezaqgo ne giqem kwaziqta na anad muzinad oseq ne tumoq has daqay. Ari ne giqem kwaziqta anad ginadib bolsa ne Bugaw Dimunta ago zawayib wol emad oseq teq ne kayeqmo tuqos tut daqay.

¹⁴ Mataw God ago Bugaw anad muzinaya naqmo in God ago onminta. ¹⁵⁻¹⁶ Na in kazaq. God in ago Bugaw Dimunta negan Bugaw na ne giqemid ne God rabunad ago kabibiy mataw samanta iyeq osgo haqad in ne giholib a hi usaqta. Haiqgam. Ne Bugaw Dimunta na waqan in ne giholib ussa ne God ago onminmo tiqiyim osayta. Ossa Bugaw Dimunta naqmo in i giwitan bulonса i God ago onmin iyim osauqta na tiloyin kemad i God lilewunim bilaqaq, O kabay haqaq ni i gimam haqaqta. ¹⁷ Teq i God ago onmin tiqiyim iyan abeb i Gimam ago os dimunta na tuwaqamtta. I gibab ayahta Krais in Amam ago os dimunta na tuwaqim osaqa. An abeb in waq nogmo i tuwaqamtmo. Ta teq muran i kayeqmo osad Krais afaqan son nogmo i tisorammo. I Krais inaq araqibmo afaqan soreq teq abeb i inaq araqibmo God ago os dimunta nab osad in abin ayah iysa i gabin ayah tiqiydaqmo.

Abeb teq i os dimunta Heven-ib waqam

¹⁸ Muran i afaqan soraqta. Teq ya inad emaiq, Abeb i os dimunta nab le tugwahitiq i gibin God ago onmimmo diqta na ulal tiqiy hasdaq haqaq. Haqad ya daq ayah diqta na anadin emsa i gigo afaqan i muran kam kab soraqta ka in ya inadib nagah amik diq iyaq. ¹⁹ Nagah bunmo God giqeman ogib kab teq Heven-ib giqusayta nagan in God ago onmin ulal iy has daqayta na akaman amen emad in gihol husisiqsa usayta. ²⁰⁻²¹ Na ezaqgo nagah bunmo God giqeman gwahtiqim dimunmo usiyya na in muran timeqniyim giqusayta. Teq nagah nagan in ginadibmo a hi meqniyiyta.

Haiqgam. God inmo anad am, Yaqgo onmin gibin ayahta waq daqayta nab teq nagah ya giqemta kagan bunmo inaqmo tidimniy daqaymo haqad in nagah nagan giqeman in muran timeqniyim usayta. Usad God ago onmin tidimniy daqayta nab teq nagah bunmo muran meqniyim usayta na in inaqmo tidimniy has daqaymo.

²² Nagah bunmo God giqamta na gihol titiysa in giholnan emad usayta. Bi-laqne aw amun emnan aholnan ek tonaqta nazaq. Na i bunmo tuhuritta. ²³ Teq nagah nagan gimomo in giholnan emad a hi usayta. Haiqgam. I inaqmo giholnan emad gaqauqtamo. Na ezaggo God ago Bugaw Dimunta i gimuganib ussa i ginad emauq, Abeb Gimam Iyah i giwaqid i in ago diq tiqiy hasamta na atowun kawa i gimuganib tuqusaq haqauqta. Haqad Gimam Iyah i giwarinid i in ago tiqiy hasamta na akaman i amen emad i giholnan emad osauqta. I in ago onmin tiqiy hasamta nab teq in i gisan moqqaqta ka wastitayid i tidimniyam.

²⁴ God i gilumsihim giwaqan i ginad emad osauq, Abeb teq in i giwarinid i in ago onminmo diq tiqiy hasamta haqauq. Haqad daq nawa na a hi gwahtiqsamo i amen emauqta. Ari daq na tugwahitiqid i ahol waqeet teq i amen a ta hi em nag. Na ezaqgo nagaqqa mat nagah tuwaqim ahol waqaqta na in nagah na a amen ta emdaq? ²⁵ Ari i teq nagah ahol a hi waqaqta na tuwaqam haqad i baq tunim giqem kute nemsia osauqta.

²⁶ Osad i God inaq gamuk emgo ginadnad emad gigo zaway hiqysa God ago Bugaw Dimunta i gilumsihaqta. I God anad muzeq naga diq anan bulonamta na i ginad siqim iyaqta. Teq Bugaw Dimunta na in gamuk a hi bilaqadmo ago gaq naqmo amalib in i gimen God bulonaqta. ²⁷ Bulonsa God in mataw bunmo giqem ahol waq kemad in Bugaw Dimunta anad hurit kemaqmo. Na ezaqgo Bugaw Dimunta in God anadmo diq huritad in anad usaq nazaqmo in God ago on mataw tawonta na gilumsihgo bulonqata.

²⁸ Teq i ginad kazaq emauq. God in on mataw gidimun tonnan haqad gililewunaqta haqaq. Gililewunim in ago on mataw in anan ginad bilaqayta na giwamuzsa in giholib daq bunmo gwahtiqaqta na in gidimun tongo gwahtiqaqta. ²⁹ Na in kazaq. On mataw na a hi gwahtiqsamo God in gigo tuhuritum aholyon gitowun tiqamta. Gitowun emim on mataw na bunmo gimugan bulyeq inmo atatin nog gwahtiq daqay haqad in ginan tibilaqan usaqta. On mataw na God atatin Jesus nog gwahtiqid teq Jesus amagniz kabemmo iysa Yesus in gibab ayahta iydaq haqad in nazaq ginan

bilamta. ³⁰ Ad God on mataw ginan tibilaqan usaqta na bunmo in gililewunaqta. Teq in on mataw gililewunaqta na bunmo giqeman in on mataw titnonta iyayta. Teq in on mataw giqeman titnonta iyayta na bunmo gibin ayahta negaqla.

Nagah araq God anad igaqta na a hi qwaydaq

³¹ Nazaq iyan i God ago daq na bunmo anadin emad teq i ezaq haqam? I kazaq tibilaqam, God i gilumsihsa mat araq diq geg igad gidanin a hi qwaydaq haqam. ³² God in atatin na a hi wasihsin in i gilumsihsan haqad eman bolta. Nazaq iyan God in atatin igad in ago nagah bunmo inaqmo tiqigdaqmo.

³³ Nog diq God ago on mataw in gilumim aholyon giwamta na gimalib nan emdaq? God-mo i ginan mataw titnonta haqqaqtan. ³⁴ Ad nog diq i gilum kemeq ginan meqin haqad God ago hib i gibaymuzdaq? Na haiqmo. Krais Yesus moqan God wazan eraqim in God aben aqabun ban osad in i gilumsihsu haqad God susumun ugad osaqta. ³⁵ Krais i ginan anad bilaqsa nog diq in anad na adanin qwaydaq? Nagah araq Krais agem dimunta igaqta na adanin a hi qwaydaqta. Afaqan i giholib gwahtiqdaqta na, teq i santitly soramta na, teq mataw i gimusad gimeqin ton daqayta na, teq i gigemnan moqamta na, teq i nagah osgo siqim iyamta na, teq i dan ahulib daq meqinta anobun ayamta na, teq mataw bab ig daqayta na, daq nagan bunmo in Krais agem dimunta igaqta na adanin a hikidik qway daqayta. ³⁶ Helmo, God ago marib gamuk bilamta nazaqmo daq meqinta nagan i giholib gwahtiqdaqta. Gamuk na bilam,

Ni nibin i giholib usaqta na ago mataw gigem meqinta igad ginol emgo bilaqayta ham. In i gibiyasa i bilaqne sipsip ginol emid moqgo ticiyim osauqta ham.

Buk Song

44.22

³⁷ Ta teq Krais i ginan anad bilaqsa in i gilumsihsa i afaqan nagan bunmo giquriyam ameb diq ticiyuqta.

³⁸⁻³⁹ I gigo Iyatha Krais Yesus aholib soqotim inaq ossa God i ginan anad bilaq naqmo hiqiyaqta. Nazaq iyan ya inad emaiq, Nagah araq diq God agem dimunta igaqta na adanin a hi qwaydaq haqaiq. I moqauqta na, teq i kayeqmo osauqta na, teq angelo dimdimunta na, teq bugaw aseseqta zaway amo amo wazayta na, teq daq muran gwahtiqdaqta na, teq daq abeb gwahtiqdaqta na, teq nagah zawayta amo amo nagan, teq nagah ulilibmo diq useq gewoqdaqta na, teq nagah og aduganibmo diq useq gaboldaqta na, teq nagah bunmo

God giqamta nagan gigo araq diq in God agem dimunta igaqta na adanin a hikidik qway daqay.

God in Isrel on mataw giyon daq amta na ago Pol bilam

9

Pol Isrel on mataw ginan anad diq meqniy

¹⁻³ Teq tutimmo ya isenlul Juda on matawta na ginadin emad ya inad ayahmo meqniy ihol afaqan diq iyaqta. Ya inad ayahta emaiqta na in kazaq. Ya Krais susumun ugid in ya gileh yageq imuzid ya le saw meqintab ossa in ya isenlul na giwaqid in yaqgo ban waqeq dimunmo os daqay haqad ya inad emaiqta. Heltaqmo ya bilaqaiq. Ya Krais ago mat iyim ya a hi katiyaiq. Teq God ago Bugaw Dimunta ya inad wamuza ya igemab inad araq a hi loyinaiqmo. ⁴ Yaqgo mataw na in Isrel on matawta teq mebmebmo God in gililewunim giwaqan in ago onmin ticiyiyta. Ad in God ahol anuwan teq ago zaway in gime anonaabmo ahol waqiyta. Teq God in Isrel on mataw na gidimun tonnan haqad tuteqmo in gisesan nenaq an adugan waqyata. Ad teq in ago maror Moses bilamta na tinagmo. Negan Isrel mataw gimomo in God ayon tamaz emgo adan na waqiyta. Teq God in mataw naqmo gidimun tonnan haqad gamuk hel diqmo gibilanta. ⁵ Isrel mataw gisesan aqen diqta na gabin ayah diqmo usaqta. Teq Krais in mat diq iyim Isrel-mo gisenlul giduganib gwahtiqim in ginedan araq iyim osta. Krais in nagah bun diqmo gigo danmebta iyim in giwamuzim osaqta. Ossa God agem dimunta ugsa in nazaqmo kuluwa-kuluwmo tuqosdaqta. Hel diqtaqmo.

God Isrel gimen daq amta na ago Pol bilam

⁶ Tutimmo ya isenlul na Krais gileh ugsa ya in ginan inad diq meqniyqaqta. Teq ya inad emaiq, God Isrel on mataw gidimun tonnan bilamta agamukan na le saman diq a hi iyaqta haqaiq. Na ezaggo Isrel bunmo in God ago on matawta iyim a hi osayta. ⁷ Ad on mataw Abraham alulib gwahtiqiyta na bunmo in Abraham ago anaynayniz diq iyim a hi osaytamo. Kwaziqmo God in Abraham bulonim bilam,

Ni nitatin Aisak-mo ago onminta naqmo ginan Abraham asenlulibta haq daqay ham.

Jenesis 21.12

⁸ Gamuk na alulin in kazaq. God ago onmin in matmo araq alulib a hi gwahtiqiyta. Haiqgam. On mataw God gamuk hel

digmo bilamta agamukan na alulib gwah-tiqayta naqmo in ginan Abraham asen-lilibta haqaqta. ⁹ Na ezaqgo God in Abraham hel digmo bulonim kazaq bilam, Ulig araq kob kam kazaqtan ni niwe Sara amun tiqemid teq ya muleeq ta boldaiq ham. *Jenesis 18.10*

¹⁰ Teq gamuk ta araq usaqmo. Rebeka ago onmin giger araqibmo gigamta na in mat amulikmo alulib gwahtiqiyta. Teq mat na in i gises Aisak-mo. ¹¹⁻¹² Ta teq on-min giger na ginen agemab usad daq araq dimunta meqinta a hi emsa God anad emad amun amikta na ulum kemim aholyon waqan usta. Ad in anad amta nazaqmo diq tugwahtiqdaq haqad in Rebeka bulonim onmin giger na ginan kazaq bilam, Amun danmeb hitiqdaqta na in amikqan ago kabibiy mat tiqiydaq ham. *Jenesis 25.23*

Onmin na kabiyl daq emsa teq God gibiyad ginan nazaq a hi bilamta. Haiqgam. God anadibmo mataw giluwiyim gililewunaqta. ¹³ Na ago iyan God ago marib in gamuk kazaq bilam,

Ya Jekob anan inad bilaqsa ya Iso anan inad a hi bilamta ham. *Malakay 1.2-3*

¹⁴ God daq nazaq emsa teq i ezaq haqam? God mataw giluwiyim giwaqaqta na in daq meqinta emaq haqam e? Haiq kidik! ¹⁵ God in Moses kazaq bulon,

Ya on mataw ginan inad meqniyin anad usaqta naqmo ya ginan inad meqniyaqta ham. Ad ya on mataw gilowan tonnan inad usaqta naqmo ya gilowan tonaiqta ham. *Kisim Bek 33.19*

¹⁶ Nazaq iyan God in on matawmo ginad muzinim a hi gilowan tonaqta. Teq on mataw gigo zawayibmo God anad hureqsa in ginan anad a hi meqniyata. Haiqgam. In anadibmo on mataw ginan anad meqniyis gidimun tonaqta. ¹⁷ Ne ginad emiy. God ago marib in Isip gigo king Fero bulonim bilam,

Yaqgo zaway ningi hib ulal iy hasdaq haqad yaqmo niqeman ni king iyim ban ulilibta nab osaqta ham. Yaqgo zaway ningi hib ulal iysa teq on mataw og saw bunmo ya ibin tuhurit daqay ham. *Kisim Bek 9.16*

¹⁸ Nazaq iyan God in mat araq anan anad meqniyin anad bilaqsa in mat na anan anad timeqniyata. Ad in mat araq agem emid soqotnan anad bilaqsa in anadibmo nazaq tiqemagtamo.

¹⁹ Teq luweq ne gigo araq kazaq ya ibilidaq, God nazaq emsun ta nagaqgo mataw daq meqinta emsa in nan negaqta haqdaq? In on mataw ginan bilamta nazaq in gigo hib gwahtiqsa araq diq God anad na othasgo ago zaway haiqta haqdaq. ²⁰ Mat

ni nazaq God wadaqta na ni naga matin diq? Kagoh araq in mat kagoh emaqta na susumun ugeq bilaqdaq, Nagaggo ni kazaq ya iqam haqad in nazaq bilaqdaq e? ²¹ Mat kagoh emaqta na in og soskaq waqeq amalib kagoh giger tiqemdaq. In araq kabiyl dimunta emgo emad teq in araq kabiyl meqinta emgo tiqemdaq. Emid teq nog in mat kagoh gigamta na bulondaq, Ni daq meqin emaq haqdaq? Na haiqgam. Mat na anadibmo nazaq emgo inmo aholib usaqta.

²² Ad nazaqmo God kagoh asor gimeqin tongo tigiwastitayan osaymo. Abeb in kagoh na ginan agem meqiniysi gibay zilayad in ago zaway teq in ago agem meqniyi na on mataw bunmo tigiqishundaq. In nazaq haqad kagoh meqinta na gimeqin osayta. Teq in kagoh meqinta na hidmo a hi gimeqin tonad in gihu-losan sisaqmo tuqosiy. ²³ Na ezaqgo in kagoh asor dimdimunta inmo abin dimunta teq in ago os dimunta negnan haqad tigiwastitayan osaymo. In anad emaq, Ya kagoh dimdimunta na ginan inad meqniyis yaqgo nagah dimdimunta nagan ayhamo diq negsa on mataw en bunmo tigibiy daqay haqad. ²⁴ Ari kagoh dimdimunta na in i on mataw God tigililewunan osauqta naqmo. Teq in on mataw gililewunad in Juda on mataw gimo a hi giwamta. Haiqgam. In on mataw en ta asor Juda a haiqta nagan gigo asor inaqmo tigiwammo. ²⁵ Nantut Hosea bilamta nazaqmo in tiqam. Hosea God aqez tutim bilam,

Ya on mataw yaqgo dauhib a haiqta na ginan yaqgo dauh tihaqdaiq ham. Ad ya on mataw ginan inad a hi bilamta na ginan ya iquilmu diq tihaqdaiq ham. *Hosea 2.23*

Haqad in kazaq ta bilammo.

²⁶ Teq uliq saw ginan bilaq yaqay, Ne God ago dauh a haiq haq yaqayta nab in gibin God kayeqmo osaqta na ago onminta tuqusdaq ham. *Hosea 1.10*

²⁷ Ari teq Aisaya in Isrel on matawta na ginan atoranmo kazaq bilam, Isrel gigo on mataw in kabemmo diq bilalaqne kamisib ibur nog iyim osayta ham. Ta teq Iyahta in mataw na gilikmanib amulik-mulikmo gilumsiheq tigiwaqdaq ham.

²⁸ Na ezaqgo in og kab on mataw meqinta giyon bilamta na adan emad in agudan a hi emdaq ham. Ad in on mataw na bunmo gigo daq amenin negad in araq diq a hi hulosdaq ham. *Aisaya 10.22-23*

²⁹ Haqad Aisaya ta bilam, Bab mataw Heven-ib osayta gigo Iyahta na in Isrel gigo asor gihu-losid a

hi oseq in gihol amagin tartay nagta ham. Uliq giger Sodom ayow Gomora inaq gigo on mataw bunmo tihiqiy bugiyta nazaq in tihiqiy bug nagimyo ham. *Aisaya 1.9*

An Aisaya bilamta nazaqmo diq tugwah-tim.

Isrel on mataw helmo a hi haqim iyan in God ameb titnonta a hi iyiy

³⁰ Ari teq i ezaq haqam? I kazaq diq bilaqam. On mataw en ta asor Juda a haiqta nagan in giholtuw bulad God ameb titnonta a hi iyiy haqam. In God aqez anan helmo haqsmo God in ginan titnonta tiham haqam. ³¹ Ari Isrel on mataw na in God ago maror Moses bilamta na muzinad in giholtuw diq bulad luwayta. Ta teq in maror na ago gunun a hi wol net bugad in God ameb titnonta a hi iyayta. ³² Nagaqqa in God ameb titnonta a hi iyayta? In God aqezmo anan helmo haqid God in ginan titnonta haqdaq nazaq in ginad a hi emayta na ago iyan. In ginad emay, I God ago maror Moses igtta na ahagenib iyeq ago gunun muz bugeq teq i God ameb titnonta iyam haqayta. Ta teq in dante na muzad luwsa gig gisen woltaydaqta na gisen woltaysa in tuwoqayta. ³³ God ago mar bilamta nazaqmo in emayta. Gamuk na bilam,

Ahol waqiqy ham. Ya uliq Sayon-ib gig araq mataw gisen woltayid woq daqayta na eman tuqusaq ham. On mataw gig na ahol a hi waqadmo lehsa gig na gisen woltayid in tuwoq daqay ham. Ari on mataw gig na anan helmo haqayta na bunmo in ya imeb turad gimebay a hi woqdaq ham. *Aisaya 8.14; 28.16*

10

Isrel on mataw God ago daq a hi huri-kemyi

¹ Ari ya imaqbaban, ya inad ayah diqta ussa ya tutimmo God bulonaiqta na in kazaq. God ni Isrel gilumsiheq ta giwaq haqad ya bulonaiqta. ² Teq ya Isrel on mataw ginan kazaq diq bilaqdaiq. In God anad muznan ginad bilaq naqmo hiqiyaqta haqdaiq. Ta teq in ginad a hi em hasadmo God ago gamuk muzinayta haqdaiq. ³ Mataw na in God ameb gibin titnonta waqgo adan diq a hi huriyatya. Ad in dante ta araq in gimo ginadibmo giholyon emiya naqmo muzinad in ginad emay, I God ameb titnonimmo osaqa haqay. Ta teq in nazaq emad in God ago nan othasad in ameb gibin titnonta waqgo adanteqin diq na a hi muzinay. ⁴ Na ezaqko Krais amomo God ago maror Moses bilamta na tuwolnet bugta. Wolnet

bugan muran on mataw Krais anan helmo haqayta na bunmo in Krais-mo aqumniib God ameb titnonim osayta. ⁵ I ginad emuq. Moses ago marib in mat God ameb abin titnonta waqnan haqad maror agamukan muzaqta na anan kazaq bilaqaq,

In God ago maror aduganib gunun giqusaqta na muzin bugeq teq in God inaq dimunmo tuqosdaq haqaq. *Wok Pris 18.5*

⁶ Ari mat God aqezmo anan helmo haqad abin titnonta waqqaqta na amen gamukta in kazaq bilaqaq.

Lueq ni nihol buloneq bilaqdaq. Nog diq Heven-ib gwaleheq dante dimunta na waqeq i gimen a gewoqdaq? haqdaq haqaq. Ni nazaq hi bilaq haqaq. *Lo 30.12*

(Mat nazaq bilaqdaqta na in bilaqne in aholtuw bulad gwaleheq Krais waqeq ad ogib hitiq nog iydaqta.)

⁷ Ad gamuk na bilaqaq, Teq luweq ni kazaq bilaqdaq haqaq. Nog diq mataw tumoqiyta gigo uliqab woleheq dante dimunta na waqeq i gimen a gaboldaq? haqdaq haqaq. Ni nazaq hi bilaqmo haqaq. *Lo 30.13*

(Mat nazaq bilaqdaqta na in bilaqne in aholtuw bulad mataw tumoqiyta gigo uliqab woleheq Krais waz ta eraqid in waqeq ad gabol nog iydaqta.)

⁸ Teq gamuk nawa na in i naga daqin diq emgo haqad gibilenaq? Gamuk na bilaqaq, Dante dimunta agamukan na in ne gigerabmo diq usaqta haqaq. In ne gitensmosib teq ne gigemab usaqta haqaq. *Lo 30.14*

(Teq i on mataw gibilenim bilaqauq, Ne Krais anan helmo haqiy haqauqta naqmo anan dante dimunta agamukan haqayta.)

⁹ Nazaq iyan ni niqezabmo Yesus anan 'Iyahta' haqad teq ni nigemabmo diq bilaqeq, "Helmo God in Yesus Krais hod-hodab wazan ta eramta" haqid teq God in ni nilumsiheq tiniwaqdaq. ¹⁰ Na ezaqko i gigemabmo diq God anan helmo haqsa God i ginan on mataw titnonta haqaqta. Ad i ginad helta gigemab usaqta na ulum hasan giqezab gwahtiqa God i ta giwaqaqta. ¹¹ God ago gamuk nazaqmo bilamta. In bilam,

On mataw in anan helmo haqayta na bunmo in ameb turad gimebay a hi woqdaqta ham. *Aisaya 28.16*

¹² Nazaq iyan Juda on mataw teq on mataw en ta asor Juda a haiqta nagan nenaqmo in God ameb araqibmo osayta. Na ezaqko Iyahta amulikmo naqmo in on mataw bunmo gigo Iyahta iyim osaqa. Ossa on mataw Iyahta lilewunad gilumsihgo bulonsa in aholib nagah dimdimunta usaqta

na tineg bugaqta. ¹³ God ago gamuk nazaqmo bilamta. In bilam,

Mat aw nog in Iyahta gilumsihgo haqad anan biyeq lilewunsa in gilumsiheq tigawaq bugdaq ham. *Joel 2.32*

¹⁴ Ta teq on mataw in mat na anan helmo a hi haqeet ezaq teq in lilewunid in gilumsiheq ta giwaqdaq? Ad mataw na in Iyahta abin a hi huriteq ta ezaq teq in anan helmo haq daqay? Ad mat araq leheq on mataw na Iyahta abin a hi gibilenid ta ezaq teq in abin hurit daqay? ¹⁵ Ad mataw ta asor in mat araq Iyahta abin bilaqdaqta na emid a hi leheq ta ezaq teq mat na leheq on mataw na Iyahta abin gibilendaq? Na haiq iyid ezaq teq daq araq God ago gamuk anan bilamta na in on mataw Iyahta abin a hi huritiya na gigo hib gwahtiqaq? Gamuk na bilam,

Mataw gamuk dimunta a luwayta na bolsa mataw in gibiyad ginad tidimniyaq ham. *Aisaya 52.7*

Isrel on mataw Yesus awagamun dimunta na huritim asor kabemmo a hi muzinayta

¹⁶ Ta teq Isrel on mataw in Yesus awagamun dimunta na tuhuritiya teq in gigo asor kabemmo wagam na a hi muzinayta. In gamuk Aisaya bilamta nazaq diq emayta. Gamuk na bilam,

Iyahta ham, i ningi gamuk bilaqsa mat araq diq anan helmo a hi haqaqta ham. *Aisaya 53.1*

¹⁷ God ago gamuk naway na nazaq bilaqan i ginad emauq. Mataw God ago gamuk huritim teq in anan helmo haqayta haqaquq. Ad gamuk in huritim anan helmo haqayta na in Krais awagamun mataw bilaqad luwayta naqmo.

¹⁸ Teq ya kazaq susumunaiq. Isrel towa gamuk dimunta na a hi huritiy daqagy? haqaq. Haiggam. In tuhuritiya. God ago gamuk bilam,

Yaggo nantut gizeq og saw bunmo tilah ham. Lehan uliq bunmo in yaqgo gamuk tuwaqiy ham. *Buk Song 19.4*

¹⁹ Ad ya a ta susumunaiq. Isrel towa gamuk na alulin ago ginad a hi emiy daqagyhaqaiq? Haiggam. In ginad emiyta. Iturimmo Moses in God aqez tutim in Isrel kazaq gibilan,

Teq ya og saw bunmo dahu haresmo gidimun tonsa ne gigem timeqnuy daqay ham. Ad ya on mataw en ta asor ginad haiqta na giwaqsa nab ne gigem meqin diq iy daqay ham. *Lo 32.21*

²⁰ An teq Aisaya a hi rabad in God aqez tutim gamuk kazaq atoranmo bilam,

Mataw ya a hi inaguniya na in ya tiqibiyiy ham. Ad mataw ya inan a hi susumuniya na gimeb ya ihol tuqulal ton ham. *Aisaya 65.1*

²¹ Teq in ta Isrel ginan kazaq bilam, Kam bunda ya on mataw na nenaq an ben wazgo haqad iben negsa in ya gileh yagad yaqgo nan othasayta ham. *Aisaya 65.2*

11

God in Israel on mataw asor gilowan ton

¹ Ari teq ya kazaq ne susumun negdaiq. God in ago on mataw Isrel na gileh tineg bug e? Haiq kidik! Ya inaqmo Isrel-ib mat araqta. Ya Abraham anaynayin araq iyim ya Bensamiin ago dauhibta araq. Teq God gileh a hi yagta. ² Ad in ago on mataw Isrel gileh a hi nagmo. Haiggam. On mataw na a hi gwahtiqa God in gigo tuhuritim in aholyon gitowun tiqamta. Towa ne Elaija awagamun God ago marib usaqta na ne a hi huritiy-ya. Elaija in Isrel on mataw bunmo gimalib nan emad in God bulonim bilam,

³ Iyahta ham, Isrel on mataw ningi nantut bunmo tiginol em bugiy ham. Teq in ningi tamaz em abanan bunmo tigiwolworijimo ham. Ad muran ya imomo ossa in ya inol emgo tiqinaganunay ham. *1 King 19.10,*

¹⁴

⁴ Haqan God amenin emim in ezaq bulon? In bilam,

Ya on mataw 7,000 nazaq iholyon gitowun eman osayta ham. Mataw na in god katiyya Baqal anognib gibakkaban ulum laquwim abin a hi iluwiyta ham. *1 King 19.18*

⁵ Ad nazaqmo muran kam kab God in Isrel on mataw asor agem dimunta negad aholyon gitowun eman in nawa osaymo. ⁶ God in mataw na agem dimunta samanmo naw nog negsa in ago diqta iyim osayta. Teq mataw na in God ago maror kwaziqtta na ago gunun muzin bugan teq God giwamta nazaq a haiq. In nazaq iyid teq ya God agem dimunta samanmo naw nog nagta nazaq ya a hi bilaq nag.

⁷ Nazaq iyan teq i ezaq haqam? I kazaq bilaqam, Isrel on mataw God ago dauhib gwahtiiggo adanteqin nagunad luwim teq in dante na ahol a hi waqim in le a hi gwahtiqa haqam. Ari God in Isrel mataw asormo gilumim aholyon giwamta naqmo tugwahtiqa. Teq in gigo asor kabemmo na God in gigem eman soqotsa in le a hi gwahtiqa. ⁸ Nazaq iyan God ago marib gamuk araq kazaq bilam, God in mataw na gigeeman in gihol sahuq diq iyayta ham. In gimeqnagin eman

in saw ahol a hi waq hasayta ham.
Ad in gidek eman in nan a hi hu-
ritayta ham. Mataw na nazaqmo
osim bo muran kawa in nazaq tuqos
tutayta ham. *Lo 29.4*

⁹ Sa ta Devit in mataw na ginan kazaq
bilam,

In gigo neqwaq ahumabun nab in ginad
dimniysa ossa in gibabun bo tawan
emeq osiy ham. Tawan emid teq bul
dobub woqaq nazaq nog in gibabun
gibenab woqymo ham. Teq in gigo
kam dimunta na buliyeq in gigo
daq meqinta amenin waqad woq
daqayta akaman iyan ham. ¹⁰ Sa in
gime aromriq inaq iyid in saw ahol
hi waq hasiy ham. Ad in gikorko-
ran mulbunid in nazaqmo kuluwa-
kuluwmo kok tonad turiy ham. *Buk
Song 69.22-23*

*God on mataw en ta asor Juda a haiqta
nagan giwam*

¹¹ Nazaq iyan ya tisusumun negnan. Isrel
woqim in towa tuwoq hasim osay-ya? Haiq
kidikno! Ta teq Isrel on mataw God gileh
ugsa iyan in ahol buliyim on mataw en ta
asor Juda a haiqta nagan nob negim tig-
wam. In mataw na giwaqsa Isrel gibiyad
in gigem meqniysa ginad tubuliy daqay
haqad in nazaq amta. ¹² Isrel on mataw
God ago nan othasan God ahol buliyim on
mataw og kabta bunmo ginadin emad in
aholib nagah dimdimunta usaqta na tineg
bugaq. Teq Isrel gibin God ameb tihiqiy
nog iyan God in on mataw en ta asor Juda
a haiqta nagan nob negad in ayah diqmo
tigidimun tonaq. Nazaq iyan abeb Isrel
gigo asor kabemmo God gileh ugim osayta
na in muleqeq ta bol bugid nab teq God
ago on mataw bunmo tidimniy haseq tuqos
daqay.

¹³ Ari muran ya ne on mataw Juda a
haiqta na tigibilennan. God ya igeman
ya on mataw en ta asor Juda a haiqta
nagan gigo Aposel ihta. Iyim in kabiya
ya ibenab amta na abin ya tutimmo iluwaiqta.
¹⁴ Ya ne gilikmanik kabiya emaiqta na abin
iluwsa yaqmo igo matawta na huritad
utetsa ya in gigo asor inaqmo giwaqdaiq
haqad ya nazaq emaiqta. ¹⁵ Na ezaqgo
God in Isrel gibaymuzim in ahol buliyim
og kab on mataw en ta asor na bunmo
nenaq an anobun tuwastityata. Nazaq iyan
ya inad emaiq, abeb God in Isrel ta giwaq
bugdaqta kam nab teq daq tubuliy hasdaq
haqaiq. Buliy hasid on mataw tumoqiyta
na bunmo hodhodab tiqeraq daqay haqaiq.
¹⁶ Ne ginad emiy. Mataw kabiya didaq
ameta na God ugan tawon iysa, kabiya
didaq bunmo tawonta iyim usaqmo. Teq

ay abeqar tawon iysa ay na aben bunmo
tawon iyaytamo.

¹⁷ Ari Isrel on mataw in bilaqne ay oliv
dimun diqta na nog. An ne on mataw Juda
a haiqta na ne bilaqne ay oliv kwasikta nog.
God ay oliv dimunta na aben asor orqayim
hunegan lehsa in ne giwaqim ay dimunta
na aholib aben orqayta na asawnib titgit.
An muran ne ay oliv ago didaq dimunta ay
aben diq waqayta nazaq nog ne waqad ne
dimunmo osayta. ¹⁸ Nazaq iyan ne luweq
ginad em daqay, I dimun dikan iyim i ay
dimunta aben diq na giquryamim osauqta
haq daqay. Ne ginad nazaq ussun ne ginad
diq em hasiy. Ay aben in abeqar yuw a
hi ugaqta. Haiqgam. Ay abeqar naqmo in
aben yuw ugaqta.

¹⁹ Ari teq ne luweq kazaq bilaq daqay,
God in ay dimunta na aholib i gitutnan
haqad in ay dimunta aben diq na asor
giqorqay haq daqay. ²⁰ Helmo God in naza-
qmo amta. Isrel on mataw God anan helmo
a hi haqan iyan God in giqorqayta. Teq ne
God anan helmo haqayta naqmo amomo
in ne giqeman ne ay dimunta na aholib
soqotim osayta. Nazaq iyan ne gihol abin
hi iluwad ne God-mo rabuniy. ²¹ Ne ginad
emiy. God ay aben diqta na giqorqayta. Ad
nazaqmo ne nan a hi huritid in ne giqorqay
tondaqmo.

²² God in mataw asor gilowan tonad ta
asor in daq afanfanta negaqta na ne ahol
waqiy. Isrel mataw osim woqiyta na in
God ago daq afanfanta na ahol tuwaqayta.
Ari negmo teq God ne tigilowan tonaqta.
Ad ne in ago gamuk muz tutsa teq in ne
gilowan titon tutdaq. Ari ne in aqez othasid
in ne tigiqurot taydaq. ²³ Teq ay aben
giqorqayta na in ginad buliyeq God ago
gamuk anan helmo haqid teq God in gi-
waqeq ay dimunta na aholib a ta gitutdaq.
Na ezaqgo God in ta gitutdaqta na azawayin
inmo aholib usaqta. ²⁴ Kwaziqmo ne
ay oliv kwasikta aben nog osiyta. Teq God
ne giqurotim in ay oliv dimunta negmo diq
gigo a haiqta na aholib gitutan ne osayta.
Nazaq iyan abeb God ay dimunta aben diq
giqorqayta na giwastitayeq ay dimunta na
aholib a ta gitutnan haqad in ahol a hi
bibiyyowundaqta.

*God in ago daq dimunta on mataw
giqishungo anad emaqta*

²⁵ Ari ya imaqbaban, ne gamuk
ulilembata ka huritgo ya inad emaiq.
Luweq ne ginad a hi em haseq igmo ag haq
daqay haqad. Na in kazaq. God in Isrel
on mataw asor giqeman in gigem soqotim
usaqta. Ussa on mataw en ta asor Juda
a haiqta nagan gigo asor ganim God in
giwaqdaqta na in teqmo God ago maror
aduganib tugwahtiq bugay. On mataw na

le tugwahtiq bugid nab teq Isrel in ginad tubuliy daqay. ²⁶ Ginad buliysa God in bunmo ta giwaqdaq, God ago marib gamuk bilamta nazaq. Gamuk na bilam,

Mat Isrel gilumsiheq ta giwaqdaqta na amatin in uliq Sayon-ib oseq boldaqta ham. Boleq in daq amo amo God anan anad a hi bilaqaqta na muz bugid lehsa teq daq nagan in Jekob asenlul Isrel gigo hib tihiqiy bugdaq ham. ²⁷ Kam nab ya in gigo daq meqinta tigiwalemnan haqad ya in nenaq an adugan wazeq nazaq diqmo tigibilendaiq ham. *Aisaya 59.20-21*

²⁸ Muran Isrel on mataw in Yesus awagamun dimunta na anan helmo a hi haqad in God ago bab nog iyim osayta. Ossa God in ne on mataw Juda a haiqta na ginadin emad gilumsihaqta. Ta teq kwaziqmo God in Isrel gisesan gilumim aholoyan giwamta. Nazaq iyan in Isrel gisesan na ginadin emad in Isrel on mataw bunmo ginan anad bilaqaqta. ²⁹ Na ezaqgo God in on mataw gidimun tonnan haqad gitowun emeq teq in anad na in gigo hib nazaqmo tuqus tutdaq. Us tutsa in anad bulyiad anad ta araq muturta a hi em negdaq.

³⁰ Daq alulin nazaq ussa iyan ne ginad emiy. Kwaziqmo ne God ago gamuk othas yaqayta. Teq muran Isrel on mataw God aqez othassa God ne ginan anad meqniyaqta nazaqmo teq in Isrel ginan anad a ta meqniydaqmo. ³¹ Na ezaqgo God in on mataw bun diqmo araqibmo ginan anad meqniyinan haqad in on mataw dahu bunmo giqeman in nan othas adan muzinayta.

I God abin iluwuq

³³ Mataw! God ago daq dimdimunta teq in anad awaz meqinta na in ayahmo diq, bilaqne kamis ame ayahta sisaoqmo wolahta nazaq nog! In mataw gilum kemim gimen daq em negaqtta na alulin ulilemim ussa i ahol a hi waq kemauqta. Ad i in ago daq lul araq diqta nagan ulum muzeq alulib emgo i ginad siqim diq iyaqta.

³⁴ God ago gamuk bilam,

Nog in Iyahta anad bunmo huritta? ham.
Ad nog diq in Iyahta bulansa in anad muzta? ham *Aisaya 40.13*

³⁵ Nog diq in ago nagah araq samanmo God ugan God ahol afaqan iyim amenin am? ham. Mat araq diq daq nazaq a hi amta ham. *Job 41.11*

³⁶ Na ezaqgo nagah bunmo alulin God-mo. Inmo nagah bunmo giqeman gwahtiqiyta. Ad inmo nagah bunmo anamrenta. Nazaq

iany i tuteqmo in abin iluwuq. Hel diqtaqmo.

Pol in on mataw Krais anan helmo haqayta na gigo luw os anan bilam

12

I gihol tamaz nog God uguq

¹ Ya imaqbaban, God ne ginan anad meqniyaqta. Nazaq iyan ya inad awaz meqin amalib ne gibilenaiq, Ne kayeqmo osad gihol tamaz nog God uguy haqaiq. Ne God-mo ago on mataw tawonta iyeq osad gihol tamaz nog God ugsa in ne gigo naw na anan anad diq bilaqdaq. Ne nazaq toneq teq ne gigo luw os bunmo bilaqne God ayon lotu emayta nazaq nog iydaq. ² Teq og kab on mataw God gileh ugayta na gigo kabiyaq daq em nogmo ne hi emiy. Haiq. God in ne ginad bulyian mutur iysa ne gigo luw os in bulyi buganmo. Ne nazaq emad teq God anad ne gigo hib usaqta na ne tuqulum kem daqay. Ulum kemad naga daqin diq in dimunta teq in God anad muzaqta teq in God ameb titnonim usaqta na ago ne ginad tiqem has daqay.

I God naw igtta na akabiy an emuq

³ Nazaq iyan God anad dimunta yagad itowun eman ya ingo kabiya emaiqta na ya anadin emad ya ne bunmo kazaq gibilehaiq. Ne gihol kat ugad gabin samanta hi iluwiy haqaiq. Ne ginad em haseq God naga kabiyan ngata naqmo ago towubmo ne gihol abin iluwiy. ⁴ I ginad emuq. I gihol anaghan kabemmo diq usaqta teq in gikabiy an araqibmo a haiqta. ⁵ Ad nazaqmo i on mataw kabemmota teq i bilaqne Krais ahol amulikmo nog i osauqta. Osad i bilaqne mat ahol amulikmo anaghan amo amo us nog iyad i bunmo an ulumsihgo osauqta.

⁶ Teq God agem dimunta igad naw amo amo samanmo igsaa i amulik-mulikmo gigo naw inaq iyaqta. Nazaq iyan mat in naga nawun wamta nazaqmo in akabiy eman. Mat araq God ago nantut bilaqgo anawun waqeinq in God anan helmo diq haqad nantut agamukan na bilaqan. ⁷ Teq mat araq in on mataw giholyon kabibiy emgo anawun waqeinq in kabiya na em naqmo hiqiyen. Ad mat araq in God ago gamuk asuleqin bilaqgo anawun waqeinq in anad em haseq suleq anonommo bilaqan. ⁸ Teq mat araq in mataw gigem zaway neggo anawun waqeinq in mataw gigem teq ginad ulumsih naqmo hiqiyen. Ad mat araq in on mataw gi-naghahan haiqta gilumsihgo anawun waqeinq in ago nagah na anad hi wazsa in ayahmo negan. Teq mat araq in on mataw giwanuzgo anawun waqeinq in ahol anad bunmo

bilaqsa kabiy na eman. Ad mat araq in mataw ginan anad meqniygo anawun waqeinq in anad dimniyysa gilumsihan.

I gimaqbaban gigem dimunta neguq

⁹ Ari ne an hi kat ugad an anan ginad bilaqsa osiy. Osad ne daq meqinta bunmo gileh ugad ne daq dimdimunta naqmo waz naqmo hiqiyiy. ¹⁰ Teq ne an anan ginad bilaqsa an alowan tonad osiy. Osad ne gihol abin wazid woqsa ne an abin iluwgo giwaz meqniyiy. ¹¹ Teq ne God anad muznan ginad diq bilaqsa ne gituw hi hiqiyyan. Sa God ago Bugaw Dimunta zaway negsa ne giwaz meqniyey turiy. Ad Iyahta kabiy negsa ne emiy. ¹² In teq ne gidimun tondaqta na ne amen emad ginad dimniyysa osiy. Ginad dimniyysa osad afaqan ne giholib gwahtiqsa ne tok nemeq nan kabemmo hi bilaqiy. Ad kam bunmo ne God inaq gamuk emiy. ¹³ Teq God ago on mataw tawonta na in nagah ago siqim iysa ne gilumsihiiy. Ad in ne gigo bitab bolsa ne giwaqeq gilowan toniy.

¹⁴ Teq mataw ne gimeqin tonsa God in gilumsihgo haqad ne buloniy. Bulonad in mataw na gimeqin tongo ne hi buloniy. ¹⁵ Ne gigo asor ginad dimniyysa ne nenaq ginad dimniyysa osiy. Ad ne gigo asor gaqsa ne nenaq gaqad osiy. ¹⁶ Ne zib alowab osad an ahaqenib iyeq osiy. Osad ne gihol abin wazid hi eraqsa ne mataw gabin haiqta na nenaq araqibmo osiy. Osad ne yaqmo ag hi haqiy.

¹⁷ Mataw daq meqinta negsa ne amenin nazaqmo hi emiy. Ne on mataw bunmo gimeb daq dimdimuntaqmo emgo ginad emiy. ¹⁸ Ad ne an wad teq an wol aban diq emiy. Tuteqmo negmo gihol wamuzad ne on mataw bunmo nenaq midemqanmo osiy. ¹⁹ Ya iyognizmo diq, mataw daq meqinta negsa ne amenin hi emiy. Godmo teq in ginan agem meqniyysa amenin tinegdaqta. God ago marib gamuk araq kazaq bilam,

Iyahta bilam, Daq meqinta aqenin waqgo na yaqgo kabiyta ham. Yaqmo teq daq meqinta amenin tiqemdaq ham. *Lo 32.35*

²⁰ Nazaq iyan negmo kazaq emiy.

Ni nibabun agemanan moqsa ni didaq ugid neqan. Ad in yuwnan moqsa ni yuw ugid uluwan. Ni nibabun nazaq dimun tonsa teq in amebay tuwoqdaq. Bilaqne ni faq azamorin ginuweq in afaqinib emid oywordaqta nazaq nog in ahol loyinad in amebay ayahmo tuwoqdaq. *Gutpela Sindau* *25.21-22*

²¹ Daq meqinta nilum waqad nimeqin tonnan tonsa ni hi woq. Haiqgam. Daq

naqanta nilum waqsa ni daq dimuntaqmo amalib bayid woqan.

13

I gavman gihagenib osuq

¹ Ari ne bunmo gavman gihagenib osiy. Na ezaqgo God inmo bilaqan gavman bunmo gwahtiqim giqosayta. Osad gavman araq diq in gimo gigo zawayib a hi osayta. Haiqgam. Gavman bunmo gigo zaway God-mo ago hib bolaqta. ² Nazaq iyan mat nog gavman gigo nan othasad na in God anad othasaqmo. Mat naqanta teq hazizirib turad ago daq na amenin tuwaqdaqta. ³ Na ezaqgo on mataw daq dimunta emayta na in gavman a hi girabunayta. Ari mat daq meqinta emaqta naqmo in gavman girabundaqta. Nazaq iyan ni gavman ginan hi rabnan haqad ni daq dimuntaqmo emad luw. Luwsa gavman nibin tiqiluw daqay. ⁴ Na ezaqgo gavman in God ago kabibiy matawta. In ni niwamuzsa ni wastitayeqmo osgo haqad God in giqeman osayta. Ari ni daq meqinta emad teq ni rab. Gavman in baqir samanta a hi wazayta. In God ago kabibiy matawta. Mataw daq meqinta emsa gavman in God abinib gigem meqniyysa amenin emayta. ⁵ Nazaq iyan i gavman giwazinad gihagenib osuq. Teq i daq meqinta emid in i ginan gigem meqniyysa amenin ig daqayta naqmo amomo ago i rabad gihagenib hi osuq. Haiqgam. Luweq i gavman giqez othaseq i God-mo ameb gihol meqin loyinam haqad i gavman gihagenib osuq.

⁶ Ad daq alulin naqmo ago ne takis zayytamo. Na ezaqgo gavman in God ago kabibiy mataw iyim in kabiy naqmo gihol bunmo ugaya. Ugad in kabiy ta araq gihol ulumsihgo anadin diq a hi emayta. ⁷ Nazaq iyan ne nagah gavman neg daqayta na ne negiy. Ad mataw takis amo amo waqad luwsa ne takis zay daqayta na bunmo in negiy. Ad ne mataw girabunnanta na girabunad teq ne mataw gabin inaqtta na giwaziniy.

I on mataw ginan ginad bilaqan

⁸ Ari ne gigo nagah araq amenin mat araq ago hib hi usan. Haiqgam. Ne an ago hib amenin usdaqta amulikmo na in kazaq. Ne an anan ginad bilaqsa os daqayta naqmo. Na ezaqgo mat in ayow anan anad bilaqad in God ago maror Moses bilamta na ago gunun tuwolnet bugaq. ⁹ Maror na aduganib gunun kazaq giqusqata,

Ni an alulib hureeqeq inaq hi us.

Ni mat araq hi wol em.

Ni hi rin ton.

Ni mat araq ago nagah hi utet. *Kisim Bek* *20.13-15, 17*

Ta teq gamuk ta araq amulikmo usaqta na in gunun naway na teq gunun ta asor usayta na bunmo inaqmo giqriyamim wol net bugaqta. Gamuk na bilam,
Ni nihol anan ninad bilaqaqta nazaqmo ni niyow anan ninad bilaqan ham.

Wok Pris 19.18

¹⁰ Mat in ayow anan anad bilaqsa in a hi meqin tondaqta. Nazaq iyan on mataw an anan ginad bilaqsa osad in God ago maror Moses bilamta na tuwolnet bugayta.

I wastitayeqmo luw osuq

¹¹ Teq ne kam ezaqta ago ne osayta na ago ne ginad em hasad daq nawa nagan bunmo muzinad osiy. Na ezaqgo ne mebmeblo Yesus anan helmo haqiyya nab God ne gilumsiheq ta giwaqdaqta na akaman in pesan nog usyaqta. Ari muran teq kam na bolim sinsin nog tiqiy. Nazaq iyan kam kawa ne osayta kab ne us hulosad eraqeql gihol asawan woltayad osiy. ¹² Ne ginad emiy. Tarom asor ayahmo i gibun ban lehan sawan tihastitaynan tonaq. Nazaq iyan i romriq ago daq bunmo hulosuq. Hulosad saw anuwan ago daq dimdimunta nagan in bilaqne bab emgo giholsihen awaz meqinta nazaq nog i giholib usan. ¹³ I mataw zeqabta iyim iyan i wastitayeqmo luw osuq. Osad i yuw atoranta uluwad haresmo ek tonad saw garak hi uguq. Teq i on haresmo nenaq luwad sawzun meqmeqinta nenaq hi emad i haresmo an mugad an anan gigem hi meqniyanmo. ¹⁴ Ne Iyahta Yesus Krais ago daq giwaqeq giholsihen nog giholib emiy. Ad ne gigem kwaziqta eraqad nagah haresmo utetsa ne hi muziniy.

14

I gimaqbaban gigo daq hi ulum kemuq

¹ Ari ne gigo mat araq in Iyahta anan helmo haqad teq in anad helta na a hi zilimsa na ne alowan toniy. Alowan tonad daq amikmikta ago ne mat na inaq an hi mugiy. ² Mat araq anad helta usaqta na in didaq haresmo neqaqta. Sa mat anad helta a hi zilimaqta na in didaq samanmo akaruan haimqo neqaqta. ³ Ari mat didaq bunmo neqaqta na in ta mat karuw a hi neqaqta na abin wazid hi woqan. Sa mat karuw a hi neqaqta na in ta mat didaq bunmo neqaqta na ago daq ulum kemad anan meqin hi bilaqanmo. Na ezaqgo God in mat didaq bunmo neqaqta na agem dimunta ugad inaq osaqtamo. ⁴ Nagaqgo ni mat araq ago kabibiy mat ulum kemad nan meqinta ugaq? Mat na inmo ago Iyahta ameb tursa in anan dimun o megin haqaqta. Haqsa mat na in ago Iyahta ameb turaq o haiq in woqaq na in ago Iyahta amomo ago nagahta. Teq mat na

a hi woqdaq. Haiqgam. Iyahta in mat na wamuzad ulumsihsa in awaz meqniyeq titurdaq.

⁵ Mat araq kam ulum kemim in kam asor anadin emad udinaqta. Sa mat araq bilaqaq, Kam bunmo in araqibmo haqaqta. Nazaq iyan ne amulik-mulikmo ginad emad ne naga daqin diq em daqayta na ago ne ginad amulikmo gigemab us-samo ne daq nazaq emiy. ⁶ Mat kam asor anadin emad udinaqta na in Iyahta anadin emad kam na udinaqta. Teq mat didaq bunmo neqaqta na in Iyahta anadin emad didaq na neqaqtamo. Na ezaqgo in God esey ugim teq didaq na neqaqta. Sa mat didaq bunmo a hi neqaqta na in nazaqmo Iyahta anadin emad didaq asor udinaqta. Udinad in ago didaqta na neqad in God esey ugaqtamo.

⁷ Igmo gihol anad muzinim gwahtiqim a hi osauqta. Ad igmo gihol anad muzinim i a hi moquaqtamo. ⁸ Haiqgam. I kayeqmo osad i Iyahta anad muzog osauqta. Ad i moqad i Iyahta anad muzim moquaqtamo. Nazaq iyan i kayeqmo osauqta na teq i moquaqta na i Iyahta agota iyim i in anad muzaauqta. ⁹ Na ezaqgo Krais in mataw tumoqiyta teq mataw kayeqmo osayta na inaqmo gigo Iyahta iyeq osdaq haqad in moqim ta eraqim kayeqmo osaqtta.

¹⁰ Teq nagaqgo ni nimaqbab ago daq ulum kemad anan meqin haqaqta? Ad nagaqgo ni nimaqbab ninad meqinta ugaqta? I bunmo teq God ago hazizirib tituramta. ¹¹ God ago marib gamuk araq nazaq bilamta. In bilam,

Yaqmo Iyahta ham ya tutimmo osaqtta ham. Ya heltaqmo bilaqaq ham. On mataw bunmo teq ya inognib gibakkaran ulum laquweq titur daqay ham. Turad teq in bunmo ya ibin iluwad bilaq daqay. Ni nimomo Godmo diq iyim osaqtta haq daqay ham. *Aisaya 45.23*

¹² Nazaq iyan hazizir na gwahtiqid i bunmo God ameb turad i ginad ezaq diq emad i daq emyuauqta na ago alulin bunmo i tubulonamta.

I gimaqbaban kat negsa in daq meqintab hi woqiy

¹³ Nazaq iyan i gimaqbaban gigo daq ulum kemad ginan meqin haqaqta na i hulosuq. Ad i gihol wasihad i gimaqbaban ginognib gig araq gisen woltayid woq daqayta na emad gidanin hi qwayuqmo. ¹⁴ Iyahta Yesus ya inad eman hastitayan ya inad emaiq, Nagah bunmo God ameb anumlan haiqta haqaq. Ta teq nagah araq in mat araq anadib anumlan inaqta iyeq, nagah na in mat na aholib anumlan inaq tqiyyadaq. ¹⁵ Nazaq iyan luweq

ni didaq araq nimaqbab a hi neqaqta na neqsa in nibiyad in a hi neqdaqta luweq in tineqdaqmo. Neqeinq God ameb ahol afaqan tiquydaq. Ni daq nazaq emad ni nimaqbab anan ninad bilaqgo adan tuhulosim lehaq. Teq Krais in nimaqbab na inaqmo amen momta. Nazaq iyan ning didaq neq amalib ni nimaqbab ago anad helta na hi meqin ton.¹⁶ Ni ninad em haseq teq daq em. Luweq mataw in nagah ni ninadib dimunta usaqta na anan meqin dig haq daqay.¹⁷ God ago maror aduganib didaq neq teq yuw uluw in nagah diq a haiqta. Haiqgam. God ago maror aduganib daq titntona teq gigem kiskista teq ginad dimniy God ago Bugaw Dimunta eman gwahtiqtaqta naqmo in nagah hel diqta.¹⁸ Mat anad nazaq ussa in Krais amen kabiya emsa God in anan anad dimniyata. Sa mataw bunmo in mat na anan dimunta haqaytamo.

¹⁹ Nazaq iyan i garab zib alowab osgo adan muzinuq. Ad i an ulumsihsa i ginad helta usaqta na ayah iyad in zilim bugan.²⁰ Ni didaq amomo anadin emad God ago kabiya hi meqin ton. Helmo, didaq bunmo in neqgo dimumota. Ta teq ni didaq haresmo neqsa mat araq nibiyad in anadib didaq hi neqanta na in neqgo anad eraqsa in twoqdaq. Woqsa ning daq dimunta na in mat na ago hib daq meqinta tiquydaq.²¹ Nazaq iyan ni nimaqbab araq karuw a hi neqaqta o in wain ayun a hi uluwaqta o in daq araq a hi emaqta na ni anadin emad ni nihol wasiheq daq nagan hi emmo. Luweq ni nimaqbab na nibiyad in ningi daq na amalib tuwoqdaq.²² Ni ninad helta ninadib usaqta na in ni God inaq gigo nagah iyeq usan. Mat didaq bunmo anan dimun haqad teq in neqad ahol afaqan a hi iyaqta, mat na tidimniyim osaqla.²³ Ari mat anad giger iysa didaq neqaqta na in God ameb ahol loyinsa in daq meqinta em nog iyaqta. Na ezaqgo daq na in anad helta inaq rirensa in a hi emaqta. Nazaq iyan daq bunmo ni ninad helta inaq diq a hi riranta na in ni niholib daq meqinta iyaqta.

15

I Krais ago daq teq in anad dimunta na inaqmo muzinuq

¹ Ari i mataw ginad helta tizilimta na i mataw ginad helta teqmo zilimaqta na gigo gunun ahaqenib iyeq gilumsihad i ginadibmo hi luwuq.² Haiqgam. I bunmo i giyogniz gigo gunun ahaqenib iysa in i ginan ginad dimniyasa in ginad helta na zilim bugan.³ Na ezaqgo Krais anadibmo a hi luwta. Haiqgam. God ago marib gamuk araq bilamta nazaqmo in amta. Gamuk na bilam,

Mataw ni ninadad gamuk meqinta nighiya na agamukan yaqmo waqim ihol ug bug ham. *Buk Song 69.9*

⁴ God ago gamuk kwaziqmo mar toniyta na bunmo in i suleq iggo mar toniyta. Mar tonan i gamuk na anadin emad gigem zaway iysa afaqan sorad i gituw a hi hiqiyaqta. Gituw a hi hiqiya God teq i gidimum tondaq haqad i amen emim osauqta.⁵ Teq ya inad ayahta ne gigo hib kazaq usaq. God zaway igsa i gituw a hi hiqiyaqta na inmo ne gigemed ne bunmo ginad amulikmo Krais Yesus anad nog iyeq ne araqibmo osiy haqaiq.⁶ Osad ne bunmo giqez araqibmo rom toneq ne i gigo Iyahta Jesus Krais amam God-mo abin iluwad osiy haqaiq.

Krais in Juda mataw teq mataw en ta asor Juda a haiqta nagan nenaqmo gilumsihta

⁷ Nazaq iyan ne Krais asen muzeq in agem dimunta negad nenaq osaqla nazaqmo ne bunmo an alowan tonad osiymo. Ad ne daq nazaq emad ne God abin emid ayah iyan.⁸ Ne yaqgo gamuk ka hurit kemiy. Kwaziqmo God in Juda gisesan gidimum tonnan haqad hel diqtaqmo giblanta. Gibilenan teq Krais in God ago gamuk helta na emid anon inaq iyaq haqad in Juda gigo kabibiy mat nog gwah-timta.⁹ Teq in on mataw en ta asor Juda a haiqta nagan God ago anad meqniy giqisi-hunid in God abin tiqiluw daqay haqad in gwahtimtam. God ago marib gamuk bilamta nazaq. Gamuk na bilam, Ya on mataw en ta asor Juda a haiqta nagan gilikmanib osad ya nabin tiqiluwdaiq ham. Ad ya bar wazad niholnan wazid tiqeraqdaqmo ham. *Buk Song 18.49*

¹⁰ Ad God ago mar ta bilam, Ne on mataw en ta asor Juda a haiqta na ham ne God ago on mataw nenaq ginad dimniyasa osiy ham. *Lo 32.43*

¹¹ Teq in a ta bilam, Ne on mataw en ta asor Juda a haiqta nagan bunmo Iyahta abin iluwiy ham. Ad on mataw en bun diqmo God abin sorid ulilibmo gwalehan ham. *Buk Song 117.1*

¹² Teq ta Aisaya bilam, Jesi asenlulib king araq tugwahtiqaq ham.

Gwahtiqeq in on mataw en bunmo tigiwamuzdaq ham. Giwamuzsa on mataw en ta asor Juda a haiqta nagan in king naqmo ago hib gihol bunmo emad in ginad em daqay, God teq mat kaqmo amalib i gidimum tondaq haq daqay ham. *Aisaya 11.10*

¹³ God nazaq ne gidimum tonnan bilaqan ya in inaq gamuk emad ya ne gimen kazaq

bulonaiq. God haqaiq, Rom mataw na in ni ninan helmo haqad nibaq tunim ossa ni in giwamuz haqaiq. Giwamuzsa in gigem kute nemsia ginad dimniysa osayta na in giholib ate gwaleq usan haqaiq. Ussa in ningko Bugaw Dimunta ago zaway amalib nibaq tunad in giwaz meqniyeq osihaqaiq.

Pol inmo ago kabiy agamukan emim teq in Krais ago on mataw Rom-ub osayta na ago zeq dimun nag

Pol Aposel akabiyen emaqta na ago in anad dimniy

¹⁴ Ya imaqbaban, ya igemabmo diq ne ginan inad kazaq emaiq. Ne daq dimdimunta emad osayta teq ne nagah bunno ago ginad em hasayta teq ne an suleq uggo azawayin ne giholib ayahmo usaqta haqaiq. ¹⁵ Teq ya a hi rabad ya ne giyon gamuk mar tonta kab ya ne ginad enqenungo haqad gamuk asor awaz meqinta kawa tumar ton. Na ezaqgo God agem dimunta yagad in ya itowun eman ya in ago kabiya nazaq atoranmo emgo iyim osaiqta. ¹⁶ In ya itowun eman ya Krais Yesus ago kabiib mat iyim ya on mataw en ta asor Juda a haiqta nagan gilikmanib in ago kabiya emaiqta. Kabiya emad ya on mataw en amo amo na gigo mat tamaz emaqta nog iyim ya in gigo hib God i gimen dante amta agamukan dimunta na gibilenaiqta. Gibilensa Bugaw Dimunta in on mataw na asor giqemid in God ago on mataw tawon diqta iyid teq ya in giwaqeq tamaz nog God ugid in gibiyad anad tidimniydaq haqad ya kabiya emaiqta.

¹⁷ Ya Krais Yesus-mo aholib soqotim inaq osad ya God ayon kabiya na emaiqta. Nazaq iyan ya ihol abin iluwad bilaqaiq, Yesus-mo yaqgo kabiya ka balaw tonsa anon emaqta haqaiq. ¹⁸ Ya kabiya araq yaqgo zawayib emta na agamukan araq a hi bilaqdaiq. Haiqgam. Krais ya imalib kabiya emsa on mataw en ta asor Juda a haiqta nagan in yaqgo gamuk huritad teq in yaggo daq ahol waqad in God anad muzinim Krais anan helmo haqayta naqmo amomo ya bilaqdaiqta. ¹⁹ Teq Bugaw Dimunta daq azawayin inaqta amo amo ya ibenab emad in yaqgo kabiya zaway ugaqtamo. In nazaq emsa ya uliq Jerusalem-ub Krais awagamun dimunta na bilaqim teq ya le og saw bunno luwad gamuk naqmo ya on mataw bunno gibilenim gibilenim le saw Ilirkum-ubmo tiqiy. ²⁰ Yaqgo inad ayahya usaqta na ya leheq uliq edob Krais abin a hi usaqta nabmo ya Yesus awagamun

gibilendaiq haqaiqta. Na ezaqgo ya mat araq tituq tilayta na amalib bit waznan ituw hiqiyaq. ²¹ Ya God ago marib gamuk araq bilamta nazaqmo ya emnan inad bilaqaiq. Gamuk na bilam,

On mataw mat na awagamun asit a hi huriitya na in mat na ahol tuwaq daqay ham. Ad on mataw in abin asit a hi huriitya na in ago tuhurit kem daqay ham. *Aisaya 52.15*

Pol le Rom mataw gibiyad teq in kantri Spen-ib lehnhan bilam

²² Nazaq iyan yaqgo kabiya kabemmo na tuteqmo iwasihsa ya le ne a hi gibiyaiqta. ²³ Teq muran ya kabiya emdaiqta abanan saw kab tihiqiy. Hiqiyen ya ulig kabemmo ne gibiygo inad emyaiqta nazaqmo ya inad a ta emaiq. ²⁴ Inad emad ya kantri Spen-ib lehad ya le ne gibiyad teq Spen-ib tilehdaiq haqaiq. Ya le ne gibiyad osid teq ne ya ilumsihad iqemid ya inad dimniysa Spen-ib tilehdaiq haqaiq.

²⁵ Ta teq muran ya uliq Jerusalem-ub leheq God ago on mataw tawonta asor kam meqinta waqim osayta na tigelumsihnan.

²⁶ Na ezaqgo Yesus ago on mataw saw Masedoniya-ibta na teq saw Akaya-ibta na in an amugan wazim mani asor humab tuwoliy. Humab wolim in God ago on mataw tawonta uliq Jerusalem-ub osay na gilikmanib asor nagah ago siqim iyayta na gilumsihiq haqad. ²⁷ Mataw na ginad diq bilaqsa mani na emiyta. Na ezaqgo Juda on mataw gigo amenin ayahmo in gigo hib usaqta. On mataw en ta asor Juda a haiqta nagan in Juda gigo hib giwitango nagah dimunta samanmo waqiyta.* Nazaq iyan on mataw na in gimo gigo nagah giholgota na amalib in Juda mataw gina haiqta na tigelumsih daqay.

²⁸ Ari ya mani na ad Jerusalem-ub leheq mataw na gibenab emeq kabiya na tihiqiyid teq ya ihol bulyeq Spen-ib tilehad nab teq ya le ne tigibiydaiq. ²⁹ Ad ya inad emaiq. Ya ne gigo hib gwahtiqdaiqta nab Krais anad dimunta i gimalib tuwoq bugdaq haqaiq.

³⁰ Ari ya imaqbaban, i araqibmo i gigo Iyaqiba Yesus Krais anan helmo haqauqta. Sa Bugaw Dimunta i ginad wamuzsa i an anan ginad bilaqsa osauqta. Nazaq iyan ya inad awaz meqin amalib kazaq ne gibilenaiq. Ne ya ilumsihad yaqmen God buloniy haqaiq. ³¹ Bulonsa in Juda mataw in ago gamuk othasayta na gibenab ya iwaqid mataw na hi imeqin toniy haqaiq. Ad ne bulonsa ya uliq Jerusalem-ub God ago on mataw tawonta gina haiqta na gilumsihad mani na ibersa in yaqgo kabiya na anan ginad bilaqanmo haqaiq. ³² Nazaq iyid teq

* **15:27:** Pol in Juda mataw gigo hib giwitango nagah dimunta anan bilamta na in Yesus-mo anan bilam.

ya God anad muzinad luwad le ne gigo hib tugwahtiqaq ya nenaq ginad dimniya osad ya igem hastitaysa zaway muturta ta waqdaiq haqaiq.

³³ Ari God i gigem eman midemimmo usaqta na in tuteqmo ne nenaq osan. Hel diqtaqmo.

16

Pol in on mataw kabemmo ago zeq dimun nag

¹ Ari i gihiy Fibi le ne gigo hib tugwahtiqaq teq ne alowan toniy. Muran in uliq Senkriya-ib Yesus ago on matawta na gilumsihad osaqa. ² In inaqmo Iyahta ago hib soqotan ne God ago on mataw tawonta bunmo giwazinayta nazaqmo ne in waziniyomo. Ad in nagah araq ago siqim iysa ne ulumsihymo. Na ezaqgo in on mataw kabemmo gilumsihad in ya ilumsihtamo.

³ Ad ne Prisila aduw Akwila inaq yaqgo zeq dimun negiy. Ya giger na nenaq i araqibmo Krais Yesus ago kabiy emauqta.

⁴ In ya ilumsihad gihol nog hulosnan toniyta. Nazaq iyan yaqgo esey diq in gigo hib lehaq. Teq ya imomo haiq. On mataw en ta asor Juda a haiqta nagan gilikmanib Yesus ago on mataw gidauhan bunmo in mat na awe inaq esey diq negaytamo. ⁵ Teq Yesus ago on mataw bo giger na gigo bitab humab wolayta na ne yaqgo zeq dimun in negiyomo.

Ad ne ya iyowmo diq Epainetus yaqgo zeq dimun ugiy. Saw Esiya-ib on mataw bunmo gilikmanib in danmeb diq Krais anan helmo hamta.

⁶ Teq ne Mariya yaqgo zeq dimun ugiy. In ne giyon kabiy ayahmo amta.

⁷ Teq ne Andronikus ayow Juniyas inaq yaqgo zeq dimun negiy. In giger yaqgo isenlulta teq ya nenaq araqibmo bit giqrqruran osaytab osta. Aposel gilikmanib in giger gabin inaqtamo. Teq ya Krais anan helmo a hi haqsamo in giger danmeb Krais ago hib soqotiyta.

⁸ Teq ne Ampliyatus yaqgo zeq dimun ugiy. In Iyahta inaq soqotim osad in ya iyowmo diq.

⁹ Teq ne Urbanus yaqgo zeq dimun ugiy. Mat na i inaq Krais ago kabiy araqib emauqta.

Ad ya iyow dimunta Stakis yaqgo zeq dimun ugiyomo.

¹⁰ Teq ne Apeles yaqgo zeq dimun ugiy. In Krais aholib soqotim ossa God in anan anad dimniyaqta.

Ad Aristobulus asenlul nenaq yaqgo zeq dimun negiyomo.

¹¹ Teq ne Herodiyon yaqgo zeq dimun ugiy. In yaqgo isenlulta araq.

Ad Narsisus asenlul gilikmanib on mataw Iyahta ago hib soqotim osayta na ne yaqgo zeq dimun ka in negiyomo.

¹² Teq ne on giger Trifina ayow Trifosa inaq yaqgo zeq dimun negiy. In Iyahta ago kabiy emayta.

Ad ne ya ihiy dimunta Persis yaqgo zeq dimun ugiyomo. Aw na in Iyahta ago kabiy emad aholtuw diq bulad luwaqta.

¹³ Teq ne Rufus yaqgo zeq dimun ugiy. In Iyahta ago mat araq dimun diqta. Ad ne Rufus anen yaqgo zeq dimun ugiyomo. In ya inen nogmo iyim osta.

¹⁴ Teq ne Asinkritus teq Flegon teq Hermes teq Patrobas teq Hermas teq i gimaqbaban in nenaq osayta na yaqgo zeq dimun negiy.

¹⁵ Teq ne Filologus ayow Juliya inaq teq Nereus ahiy inaq teq Olimpas teq God ago on mataw tawonta in nenaq osayta na bunmo yaqgo zeq dimun negiy.

¹⁶ Ari God ago on mataw gigo daq titronta na amalib ne an zeq dimun ugiy. Teq Krais ago on mataw gidauhan bunmo in gigo zeq dimun ne negaymo.

Mataw asor in Yesus ago on mataw gihuserayta

¹⁷ Ari ya imaqbaban, ya inad awaz meqin diq amalib ne gibilenaiq. Ne God ago suleq tuwaqiyta na waz naqmo hiqiyad osiy haqaiq. Osad mataw suleq na geg ugad in ne gilikmanib an mug eman gwahtiqa in ne gihuserad gigo ginad helta na wazan wognan tonsa ne gibiy kemiy haqaiq. Gibiy kemad ne mataw naqanta giholib hiqiqeq pesanmo luwiy haqaiq. ¹⁸ Mataw nazaq emayta na in i gigo Iyahta Krais ago kabibiy mataw a haiqta. Haiqgam. Mataw na in giholmo anad ago kabibiy matawta iyim osayta. Osad in gamuk ahurit dimunta haresmo bilaqad in gigo soysoy amalib on mataw ginad sosilta na kat negad gihureqayta.

¹⁹ Ne God ago gamuk muzinayta na gabin uliq saw bunmo tilahta. Nazaq iyan ya ne ginan inad diq dimniyaq. Ta teq ya inad ne gigo hib usaqta na in kazaq. Ne daq dimunta emgo ginad em hasad ne daq meqinta emgo gidek zizalsa osiy haqaiq. ²⁰ Ossa kam sisak haiq God i gigem eman midemim usaqta na in ne giqemid ne gisenab Satan tubay ninal daqay.

Ari i gigo Iyahta Yesus agem dimunta negsa ne osiy.

Mataw asor gigo zeq dimun eman Romub lah

²¹ Ari yaqgo mangteqsor Timoti ya inaq garab kabiy emauqta na in ago zeq dimun eman ne gigo hib nawa lehaq.

Ad yaqmo isenlulniz Lusiyus teq Jeson teq Sosipater in inaqmo gigo zeq dimun eman nawa lehaqmo.

²² Teq yaqmo Tertiyus ya Pol aqezab gamuk waqim ne giyon kawa sansandekib kab mar tonta. Iyahta abinib ya ne zeq dimun negaiqmo.

²³⁻²⁴ Teq yaqmo Pol bilaqaiq, Ya iyow Gayus in ago zeq dimun eman ne gigo hib lehaq haqaiq. Mat na ya iwaqim inaq ago bitab osauqta. Teq in Yesus ago on mataw kab osayta ka gibilenan in ago bitab humab wolaytamo.

Teq uliq ka ago mat gavman gigo mani wamuzaqta anan Erastus haqayta na teq i gimaqbab Kwartus inaq in giger gigo zeq dimun eman nawa lehaqmo.

I tuteqmo God abin iluwam

²⁵ Ari i God abin iluwuq. Ne yaqgo gamuk dimunta Yesus Krais awagamun ya bilaqaiqta na anan helmo haqsa teq God ne giqemid ne gamuk na amalib zaway iyeq titur daqay. Gamuk na in God ago anad ulilemabta agamukan naqmo. Teq gamuk na ulilemim kam sisäq diqmo usta.

²⁶ Gamuk na sisäqmo ulilemim usta teq muran God kuluwa-kuluwmo osaqta na bilaqan in ago nantut gigo marib gamuk ulilemabta na ulal tipiy bug. Ulal iy bugan mataw en bunmo gamuk na tuhuritayta. Huritad in gilikmanib on mataw kabemmo God anad muzinim in gamuk na anan helmo tihaqay.

²⁷ Ari God amomo anad awaz meqin diqta. In Yesus Krais ago kabiyl amalib i gimen dante amta na i anadin emad i in abin tuteqmo kuluwa-kuluwmo iluwuq. Hel diqtaqmo.

1 Korin

o

Sansandek amebta Pol mar tonan uliq Korin-ib lahta Gamuk ameb lehaqta

Pol ago kamub uliq Korin in saw Akaya gigo uliq danmеб usta. Teq on mataw na god katiya haresmo gibin iluwad in daq meqinta amo amo em yaqayta. Sa Pol in mat danmеб diqta Korin-ib Yesus awagamun dimunta bilamta. Bilaqad in uliq nab on mataw Yesus ago nan huriyatna na gidauhan araq alulin amta. Ta teq Pol gihulosim saw araqab kabiу emnan lehsa Korin-ib on mataw na gilikmanib ginad katiya haresmo gwahtim. Nazaq iyan Pol in ginad meqinta na wastitaynan haqad in anad dimdimunta kabemmo sansandek kab mar ton nagta.

Pol in Krais ago on mataw Korin-ibta na ginan anad meqniy, luweq in ginad helta na sosil iysa in dante titnonta na tuhulos daqay haqad. Nazaq iyan mataw na gihol huserim an bakikiyan ugsa Pol gamuk awaz meqinta nag. Teq in gigo daq asor meqinta an haresmo hureqim inaq usayta na teq an hazizirib emayta na ago in ginadim in ginad meqinta na wastitay nag. Ad in an waq ago adan dimunta na ago gibilenim teq in mataw god katiya gimen tamaz akarawan neqayta na ago asor in bilammo. Bilaqim tihiqyan teq in God ayon lotu em daqayta ago adan dimunta na ago bilaqim teq in Bugaw Dimunta ago naw amo amo na asuleqin nag. Negim hulosad in mataw tumoqiyta teq hodhodab eraq daqayta na ago agamukan gibilan kammo. Korin on mataw nagah kagan bunmo anan ginad a hi em hasad in daq haresmo em yaqayta. Teq Pol in gamuk dimun diqta God anad ezaq usaqta na gibilen siram.

Teq nagah araq ayahta Pol anan bilamta na in kazaq. Ni on mataw bunmo ginan ninad bilaqdaqta na in naw ameb diqta God in ago on mataw negaqa. Gamuk na ni 1 Korin 13 nab naguneq teq ahol waqdaq.

Krais ago on mataw an a hi mugad gihol abin wazid a hi eraqdaqta

Pol in Korin on mataw Yesus anan helmo haqayta na gimen gamuk ka mar tonta

¹⁻² Ari yaqmo Pol, God-mo anad bilaqan in ya ililewunan ya Krais Yesus ago Aposel iyi. Ya imaqbab Sostenes inaq i giger sansandek ka mar tonim ne God ago on mataw uliq Korin-ib Yesus ago nan huriyatna

osayta na gimen eman leh negaq. God ne giwaqid ne in ago on mataw tawonta iyeq os daqay haqad in ne gililewunata. Gililewanan ne Krais Yesus ago hib soqotim osad God ameb ne tawon diq iyim osayta. Teq ne gimomo a haiq. Og saw bunmo on mataw 1 gigo Iyahta Yesus Krais in gilumsiго lilewunayta na bummo in ne nenaqmo God amomo ago diqta iyim osayta. Na ezaqgo Yesus in on mataw en ta asor na gigo Iyahta iyim osad in i gigo Iyahta iyim osaqtamo.

³ I Gimam God teq i gigo Iyahta Yesus Krais inaq in gigem dimunta negad in ne gigem emid kiskismo usan.

Pol anad dimniysa God esey diq ug

⁴ Kam bunmo ya ne ginadin emad God esey diq ugaiqta. Na ezaqgo ne Krais Yesus aholib soqotim inaq ossa God agem dimunta negad in ne gilowan diq tonaqta.

⁵ Na in kazaq. Ne Krais aholib soqotim ossa in ago nagah dimdimunta kabemmo na ne gigo tiqiyam gamuk dimunta teq ginad dimunta bummo ne gigo hib ate gwalim giusaqta. ⁶ Teq nagah dimunta nawa na ne giholib ayahmo ussa ne Krais awagamun i ne gibilenita na adan tiqemay.

⁷ Nazaq iyan ne Bugaw Dimunta ago naw araq diq aq siqim a hi iyad ne i gigo Iyahta Yesus Krais teq ulalab muleeqeq ta boldaq haqad amen emad ne gihol husisiqa osayta. ⁸ Sa inmo zaway negsa ne giwaz meqniyeq ossa le ne gigo kam abebanta tiqiydaq. Nazaq iyid teq i gigo Iyahta Yesus Krais ago kam ayahta nab ne giholib daq araq ananin waq daqayta na haiq iyadaq.

⁹ God bilamta nazaqmo diq in emaqta. Nazaq iyan in ne gililewunum giqeman ne in atatin i gigo Iyahta Yesus Krais inaq gigem araqibmo iyim osayta.

Uliq Korin-ib Krais ago on mataw gihol huserim humab amo iyi

¹⁰ Ya imaqbaban, i gigo Iyahta Yesus Krais abinib ya atoranmo kazaq ne gibileni. Ne bunmo araqibmo osad gamuk araqibmo bilaqad gihol uroteq amo amo hi iyiy haqaiq. Ad ne ned amulikmo os nog iyad gigem ginad amulikmo iyeq osiy haqaiq. ¹¹ Ya imaqbaban, aw anan Klowe haqayta na ago walmataw asor bolim kazaq ibilenim bilaqiy, Ne gilikmanib an mug ayahmo usaq haqiy. ¹² Ne gigo mataw asor bilaqay, I Pol ago dauhibta haqay. Sa asor bilaqay, I Apolos ago dauhibta haqay. Sa asor bilaqay, I Pita ago dauhibta haqsa asor bilaqay, I Krais ago dauhibta haqay. Nazaq iysa ya bilaqaiq.

¹³ Krais in mataw dauh amo amo gilulin eman ne gamuk nazaq bilaqay ye? Teq yaqmo Pol ne gimen ayib ihol nog hulosim moqan ne nazaq bilaqay ye? Ad ne yaqmo

Pol inanib yuw huziy ye? ¹⁴ Ne gilik-manib mataw giger Krispus ayow Gayus inaq naqmo ya yuwub huz negta. Teq mataw asor na ya a hi huz negta. Ya ne kabemmo a hi gihuz negta na ago ya inad tidimniyiq. ¹⁵ Na ezaqgo mataw in ne ginan bilaq daqay, Korin on mataw Pol-mo abinib yuw huziyyata nazaq in a hi bilaq daqay. ¹⁶ Helmo ya on mataw Stefanas ago bitab osayta na yuwub huz negtamo. Teq ya ne gigo mataw ta asor gihuz negmo o haiq na ya inad a hi em hasaiq. ¹⁷ Krais ya iqeman ya on mataw gihuz neggo a hi luwaiqta. Haiqgam. Ya Yesus awagamun dimunta naqmo on mataw gibilengo haqad in ya iqeman bolta. Teq ya mat inad awaz meqinta iyim gamuk wizwazimmo gibilenaiqta nazaq ya ihol anan a hi bilaqdaiq. Na ezaqgo luweq ya nazaq gamuk wizwazeq bilaqsa mataw gidek sirirsa in ya iqeziy anan helmo haqad teq in Krais ago kruse anadin a hi emad ago zaway asit a hi loyin daqay na ago iyan.

God ago zaway na Krais-mo

¹⁸ On mataw God ago maror asan ban osayta na in timeqriyim moqgo danteq osayta. Nazaq iyan ya Yesus awagamun dimunta gibilensa in Krais ayib momta na agamukan huritsa in gamuk agadanta nog iyaq. Sa i on mataw God i gilumsihim giwaqaqta na i gamuk na huritsa in God ago zaway awaz meqin diqta in amalib i giwaqaqta na nog iyaq. ¹⁹ God ago marib in gamuk araq kazaq bilam,

Ya mataw gigo ginad awaz meqinta na bayid woqsa ya mataw gimaqbel in-aqta na ginad tuwaleboldaiq ham.

Aisaya 29.14

²⁰ Nazaq iyan mat anad awaz meqinta na in ezaq haqqad? Ad mat suleq kabemmo amta na in naga gamukin bilaqdaq? Ad mataw gamukib an wolgo hurit kemiyya na in gamuk ezaqta i gibilen daqay? God in og ka ago mataw ginad awaz meqinta nagan bunmo giqeman in mataw ginad haiqta nog tiqiyay.

²¹ God-mo anad awaz meqin diqta. In anad em hasimmo mataw gidanin qwayan in ginad awaz meqinta amalib God nagun yo hiqiyayta. Na ezaqgo God in on mataw gimen dante kazaqta emnan anad bilam. In i kabibiy mataw giqeman i in ago gamuk ahuritan araq diqta na amalib on mataw gibilensa in huritad anan helmo haqsa God in gilumsihim giwaqaqta. ²² Ne ginad emiy. Juda on mataw daq azawayin inaqta ahol waqnan atoranmo bilaqayta. Sa ta Grik on mataw in og ka ago nagah bunmo alulin nagunayta. ²³ Ta teq i gamuk kazaq on mataw na bunmo gibileauq. Krais ayib dom wolam momta haqauq. I nazaq

gibilensa daq nawa na in daq zawayta nog a hi iysa Juda on mataw i gigo gamuk na anan helmo haqnan ginadnad diq emayta. Sa Grik on mataw gamuk na huritsa in bilaqne gamuk agadanta nog iyaq. ²⁴ Ari God on mataw gililewunta na bunmo, Juda on mataw asor teq Grik on mataw asor inaqmo, in i gigo gamuk na huritum ginad emay, God ago zaway teq in anad awaz meqinta na Krais-mo ago hib ulal tiqiy bugaqla haqay. ²⁵ Na ezaqgo God ago gamuk ahuritan agadan nogta na in mataw gigo ginad awaz meqinta uriyamaqta. Sa God ago daq azawayin haiqta nog na in mataw gigo zaway uriyamaqtamo.

²⁶ Ya imaqbaban, kwaziqmo God ne gililewunan ne in ago maror aduganib gwahtiqiyta na ne anadin ta emiy. Kam nab og ka ago mataw marorta na teq mataw ginad awaz meqinta na teq mataw gabin inaqta na kabemmo ne nenaq a hi gwahtiqiy. ²⁷ Na ezaqgo God in og ka ago mataw ginad awaz meqinta mebay negnan haqad in mataw ginad awaz meqin haiqta nagan gilumim giwam. Ad in og ka ago mataw zawayta na mebay negnan haqad in mataw giwaz meqin haiqta na gilumim giwammo. ²⁸ God in on mataw og kab gabin haiqta teq mataw ginan Meqinta haqayta teq ginan Samanta haqayta naqmo gilumim aholyon giwamta. Daq na amalib in mataw gabin inaqta na giqeman in bilaqne mataw samanta gabin haiqta nog tiqiyay. ²⁹ Nazaq iyan mat araq in yaqmo ag haqad God ameb ahol abin a hi iluwdaq. ³⁰ Haiqgam. God-mo ne giqeman ne Krais Yesus ago hib soqotim osayta. Ossa Yesus-mo in anad awaz meqinta igsa i ginad inaq iyim osauqta. Teq Yesus-mo i gizayan i God agota iyim osauqta. ³¹ Nazaq iyan God ago marib gamuk araq bilamta nazaq i emuq. In bilam, Mat inmo ahol abin tiqiluwnan haqad teq Iyahta in ulumsihta naqmo ago in ahol abin iluwan ham. *Jeremaya 9.24*

2

Pol in Korin gigo ginad helta na anan bilam

¹ Ari ya imaqbaban, ya ne gigo hib lehim God ago gamuk alulin ulilemim usta na gibilenad kam nab ya inad awaz meqinta amalib gamuk akamoymoyin inaqta a hi neg. ² Kam nab ya inad awaz meqinta kabemmo gibilennan ituw hiqiyya. Ya Yesus Krais ayib dom wolam momta naqmo amomo gibilendaiq haqad ya inad emta. ³ Inad emim ya gamuk na ne gibilendaiq haqad ne gigo hib lehim ya igo zaway

haiqmo osad ya rabad ihol harara nem naqmo hiqiyyaqtta. ⁴ Ad ya Yesus Krais awagamun dimunta na gibilenad yaqmo igo zaway teq ya inad awaz meqinta amalib ya ne ginad eman a hi buliy. Haiqgam. Ya God ago Bugaw Dimunta ago zaway naqmo amalib gibilenta. ⁵ Nazaq iyan ne matmo araq ago anad awaz meqinta huritim ginad buliyim Yesus anan helmo a hi haqiy. Haiqgam. God anad ne inmo ago zaway naqmo ahol waqad Yesus anan helmo haq daqay haqad in ago zaway nazaq ne giqishunata.

God ago Bugaw Dimunta naqmo i ginad eman hastitayaqta

⁶ Helmo, God ago on mataw gihol awaz meqniya gina in i gigo gamuk huritsa i bilaqne mataw ginad awaz meqinta gamuk bilaq nog iyauqta. Ta teq i gigo gamuk na in og ka agota a hajiq. Ad in og ka ago mataw marorta gamuk bilaqayta nazaq nog a haiqmo. Mataw marorta bunmo in osim tihiqiyayta. ⁷ I God ago anad awaz meqinta naqmo i bilaquaqtta. Na in kazaq. Kwaziqmo God og ka a hi emadro in i gimen dante emid i inaq dimunmo osata haqad in anad amta. Anad emim in anad awaz meqinta na ulileman mataw a hi hurit yaqay. ⁸ Nazaq iyan og ka ago mataw aseseqta bunmo in God ago anad awaz meqinta na ago ginad a hi em hasiy. Haiqgam. Mataw aseseqta nagan in God anad ulilemabta na alulin hurit kemeq teq in Mat Iyatha abin teq ahol anuwan ayahta inaq uliq Heven-ib osim bolta na waqeq ayib dom a hi wol nagiy.

⁹ God ago marib gamuk araq kazaq bilam,

On mataw God anan ginad bilaqayta na God in gimen os araq dimun diqta tuwastitayan usaq ham. Teq mat araq diq in ameb os dimunta na asit ahol a hi wamta ham. Ad mat araq diq os dimunta na ago anad a hi em hastamo ham. *Aisaya 64.4*

¹⁰ Ta teq God in ago Bugaw Dimunta eman bolim nagah mataw gimeb ulilemim usaqta nagan in i tigiqishunaqta. Na ezaqgo Bugaw Dimunta in nagah bunmo ulilemim usaqta na ahol waqaqta. Ahol waqad in God ago anad awaz meqinta akasnaknib ulilem naqmo hiqiyyim usaqta na inaqmo in ahol waqaqtamo. ¹¹ Na in kazaq. Mat araq anad emsamo mat ta araq in anad na huritdaq e? Na haiqgam. Mat na awitan amuganib usaqta naqmo in anad na huritaqta. Ad nazaqmo God anad emsa mat araq diq in anad na a hi huritaqtamo. God ago Bugaw Dimunta naqmo in God anad huritaqta. ¹² Ne ginad emiy. I bugaw araq og kab osim bolaqta na a hi wawta.

Haiqgam. I Bugaw Dimunta God ago hib osim bolaqta naqmo i tuwawta. Waqan in i ginad eman hastitayan i God ago os dimunta in samanmo igaqta na ago tuhurit kemauqta. ¹³ Hurit kemim i God ago os dimunta naqmo agamukan on mataw gibilenauqta. Teq gamuk dimunta nawa i bilaquaqtta na i og kab mataw ginad awaz meqinta gigo hib a hi wawta. Haiqgam. Bugaw Dimunta inmo anad dimunta na igsia i God ago os dimunta na agamukan bilaquaqtta. Bilaqsa mataw giduganib Bugaw Dimunta usaqta naqmo in huritim ginad em hasayta.

¹⁴ Mataw giholib Bugaw Dimunta a hi usaqta na in ginad soqotim usaqta. In ginad a hi hastitaysa in God ago nagah dimdimunta na anan helmo a hi haqayta. In nagah nagan agamukan huritsa in bilaqne gamuk agadanta alulin haiqta nog iyaq. Mataw na in Bugaw Dimunta giholib haiqgam iyim in gamuk na a hi ulum kemim ginad a hi em hasayta. ¹⁵ Ari mataw giholib Bugaw Dimunta usaqta na in nagah bunmo ulum kemim ginad em hasayta. Sa mataw God ago Bugaw Dimunta inaq a hi luwayta na in mataw ginad em hasayta na a hi gilum kem daqay. ¹⁶ Na ezaqgo God ago marib gamuk araq kazaq bilam, Nog diq Iyatha ago anad bunmo tuhurit kemim teq in soleq ta araq muturta ugta? ham. *Aisaya 40.13*

Teq Bugaw Dimunta in i Krais anad gibilensa i hurit kemauqta.

3

Mat Yesus ago on mataw gimen kabiym emaqta na in God-mo ago kabiyy mat

¹ Ari ya imaqbaban, kwaziqmo ne Krais aholib soqotim inaq ossa ya ne gibiysa ne God ago Bugaw Dimunta anad muzinayta nazaq nog ya a hi giviyyaiq. Nazaq iyan ya ne gamuk gibilenta na bilaqne mataw gigem kwaziqta anad muzinayta ya gibilen nog iy. Kam nab ne gigem kwaziqtab os tutad ne Krais ago daq dimunta emgo ne bilaqne onminta nog iyim ginadnad emad os yaqay. ² Ossa ya ne didaq atoranta negsa ne a hi neq yaqay. Haiqgam. Ne didaq atoranta neggo hiqiysa ya sus negsa ne neq yaqay. Ad muran kam kab ne didaq atoranta neggo gigem awaz a hi meqniyaqmo. ³ Na ezaqgo ne gigem kwaziqta ago daq na ne muz tutsa iyan. Ne gilikmanib mataw an anan gigem meqniya an wadayta. Daq nawa ne emayta na in gigem kwaziqta naqmo agota. Teq ne gigem kwaziqta ago anadta naqmo ne muzinad ne mataw ogibta daq em nog tiqiyay. Nazaq a hajiq e? ⁴ Ad mat araq bilaqaq, Ya Pol ago dauhibta haqaq. Sa mat araq

bilaqaq, Ya Apolos ago dauhibta haqaq. Daq nazaq ne emad ne bilaqne og ka ago matawta nog a hi iyay ye?

⁵ Ne ginad em hasiy. Apolos in naga matin? Ad yaqmo Pol ya naga matinmo? Yaqyow Apolos inaq i giger God ago kabibiy mataw samanta. Iyahta kabiy i gibenab amta naqmo i emsa ne Krais anan helmo haqiyta. ⁶ Ya God ago didaq amagin kabiyab leyan teq Apolos bolim yuw ugta. Teq God-mo didaq na eman in kabiyab gwalim anon amta. ⁷ Nazaq iyan mat didaq amagin kabiyab leyaqta na abin haiqta. Sa mat didaq ahokan gwalisa yuw ugaqta na abin haiqtamo. God inmo didaq kabiyab eman gwalim anon emaqta. Nazaq iyan inmo amomo abin inaqta. ⁸ Mat didaq amagin kabiyab leyaqta na teq mat didaq amagin yuw ugaqta na in giger ginad amulikmo iysa in garabmo God ago kabiy emayta. Teq abeb in gigo kabiy na amenin waqad in bunmo gigo kabiy ahunibmo naw na tuwaq daqay. ⁹ Na ezaqgo i God ago kabibiy mataw kabiy garabmo emauqta. Sa ne bilaqne God ago kabiyab didaq leyan gwalaqta nazaq nog. Ad ne bilaqne God aholyon bit wazan eramta nazaq nogmo.

Mat Yesus ago on mataw gimen kabiy emaqta na in bilaqne mat bit emaqta nazaq nog

¹⁰ God agem dimunta yagad in ya iqeman ya ne gigo hib lehim Yesus awagamun anonommo gibilen, bilaqne mat bit emaqta wizwazimmo bit alulin emaq nazaqmo. Ya bit alulin na tiqeman teq mat araq lehim yaqgo kabiy na amalib bit anon wazan tiqeraqaq. Teq mataw bit akabiyian emayta na bunmo ginad em haseq teq in yaqgo kabiy na amalib bit anon emiy. ¹¹ Na ezaqgo mataw bit alulin amo amo a hi em daqayta. Haiqgam. Bit alulin amulikmo usaqta na Yesus Krais-mo. ¹² Teq bit alulin amulikmo nab mataw asor gol amalib bit anon wazayta. Sa asor silva amalib bit anon emsa asor gig dimdimunta anawun ayahmota gimalib bit anon wazayta. Teq asor ay amalib bit anon emsa asor rey amalib bit anon wazayta. Sa asor tuqir amikmikta amalib bit anon emayta.

¹³ Ari abeb Iyahta ta boldaqta akannib nab mataw bunmo gigo kabiy ulal tiqiydaq. Kam nab faq in mataw gigo kabiy bunmo oysa in naga kabiyana diq emiyta na ulalab tugwahtiqaq. Faq naqmo kabiy bunmo oyworsa noggo kabiy tuteqmo usdaqta na teq nog kabiy samanta amta na ulal iysa i ahol tuwaq kemam. ¹⁴ Mat araq bit alulin na amalib bit anon awaz meqinta emid teq faq na a hi oydaqta. Ad in kabiy dimunmo amta na ago amenin dimunta tuwaqdaq. ¹⁵ Ari kabibiy mat araq bit alulin na amalib

bit anon awaz meqin haiqta emid teq faq na bo oy bugid mat na ago kabiy bunmo tihiqiy bugdaq. Teq mat na a hi moqdaq. Bilaqne mat ago bit faq oysa in eraqim ago nagah bunmo hulosim asan ban tukim lehim a hi moqarta nazaq nog.

God ago bit diq na negmo

¹⁶ Ne bunmo bilaqne God ago bit nog ne osayta. Sa God ago Bugaw Dimunta bolim ne giduganib osaqta. Na ago ne ginad a hi em hasay ye? ¹⁷ God ago bit na tawon diqta. Nazaq iyan mat araq God ago bit na meqin tonid God in mat na timeqin tondaqmo. Teq God ago bit na negmo.

I mataw og kabta gabin hi iluwuq

¹⁸ Ne gihol hi kat ugiy. Ne gilikmanib mat aw nog bilaqaq, Ya og ka ago daq bunmo ago tuhurit kemta haqaqta na in anad em hasan. In anad awaz meqinta na asit a hi ulumsihdaq. Ari in anad buliyeq Yesus awagamun anan helmo haqsa ta mataw og kabta in anan agadan haqsa nab teq in mat anad awaz meqinta tiqiydaq. ¹⁹ Na ezaqgo og kab mataw ginad awaz meqinta na bunmo in God ameb mataw agadanta nog iyayta. God ago marib gamuk araq kazaq bilam,

Mataw ginad awaz meqinta na gimileq iyad God aban emeq tuknan tonsa teq hqiq ham. God in mataw na gigo daq katiya naqmo amalib gidanin qwayim giwazaqta ham. *Job 5.13*

²⁰ Teq God ago gamuk kazaq bilammo. Og ka ago mataw ginad awaz meqinta na in giholyon dante wastitaynan haqad ginad emsamo Iyahta in ginad na hurrataqta ham. Huritad in anad emaq, Mataw aseseqta ginad na in saman diqta haqaq ham. In ginad na anon araq a hi emdaq haqaq ham. *Buk Song 9.41*

²¹ Nazaq iyan ne og kab mataw aseseqta gabin hi iluwuq. Na ezaqgo God ago nagaq dimdimunta bunmo in ne bunmo gigo tiqiyim usaqta. ²² Yaqmo Pol ya ne bunmo gigota. Sa mataw giger Apolos ayow Pita inaq in nazaqmo ne bunmo gigotamo. Teq og ka bunmo teq ne kayeqmo os daqayta na teq ne moq daqayta na teq daq muran kam kab gwahtiqaqta na teq daq abeb teq gwahtiqaqta nagan bunmo in ne bunmo gigo tiqiyim usaqta. ²³ Sa ne bunmo Krais agota iysa Krais in God ago iyaqtamo.

4

Iyahta inmo ago kabibiy mataw gilum kemaqta

¹ Ne i ginan ginad kazaq emiy. I Krais ago kabibiy matawta haqiy. Teq i gigo kabiy na i God ago gamuk alulin uilemim

usta na wamuzad i wastitayimmo mataw gibilenauqta haqiy. ² Teq kabibiy mat dimunta daq kazaq emaqta. In ago ayahta anad usaqta na tiqem bugaqta. ³ Ya Krais ago kabibiy mat araq nazaqta teq yaqmo ihol a hi ulum kemaiqta. Nazaq iyan ne yaqgo daq ulum kemaya na ya inadib nagah amikta iyaq. Ad mataw og kabta in hazizirib yaqgo kabiy ulum kemsya ya daq na loyinsa in nagah amiktamo. ⁴ Ya ihol loyinsa ya daq araq ananin waqdaiqta haiqgam. Teq yaqmo ihol anan mat tittonta haqad nazaq ya a hi bilaqdaiq. Iyahtaqmo teq ilum kemeq inan bilaqdaiqta. ⁵ Teq in on mataw hazizirib gilum kemdaqta na akamun teqmo. Nazaq iyan Iyahta a hi bolsamo ne yaqgo kabiy hi ulum kemi. Iyahta boleq teq in nagah bunmo ulilemim romriqab usaqta na waqeinq saw anuwanib emid ulal tigiy bugdaq. Ad in mataw bunmo ginad ulilemim usaqta na emid ulalab tungwahtiqaqmo. Kam nab God in on mataw kabiy dimunmo emiyta na giben tiqiluwdaq.

*On mataw uliq Korin-ibta na in gimo
gihol abin iluw yaqay*

⁶ Ya imaqbaban, ya ne gilumsihnan haqad ya Apolos anan teq yaqmo ihol anan nawa ne tigibilenta. Ne i gigo hib suleq waqad ne God ago gamuk mar tonan usaqta na itiyoneq daq ta asor muturta inaqmo a hi em daqay haqad ya nazaq bilayta. Ne nazaq emad teq ne mat araq abin iluwad mat ta araq abin wazid a hi woqdaq. ⁷ Ya iyogniz, ne ezaq diq? Ne i mataw bunmo nog a haiqta ye? Ne gigo nagah bun diqmo God abenab a hi waqiy ye? Helmo, nagah bunmo ne wazayta na ne God abenab waqiyta. Nazaq iyan nagaggo ne gihol abin iluway? Ne gigo nagah dimunta nagan negmo gigo zawayib waqiyta ye? Haiqgam. God nagah nagan samanno ne nagta.

⁸ Ne God ago nagah dimdimunta na tekowagan in tigiyunin bug daqagya. Ad nagah bunmo ne amalib dimunmo os daqayta na ne gigo inaq tigiyiy daqagya. I ne a hi gilumsihna ne gimbomo gigo zawayibmo king nog tigiyim osay-ya. Sa i haiqgam daqag. Helmo, ya inad ne king diq iyeq os nagiyta haqaiq. Osad teq ne i giqemid i inaqmo king iyeq ne nenaq os nagtamo haqaiq. ⁹ Teq haiqgam. On mataw og kabta teq angelo inaqmo in Aposel gibiyad i afagan amo amo meqin diq sorsa in i gibiy ninunad gifaqin hunegayta. Nazaq iyan ya inad emaiq, God in i Aposel giqeman i abeh diq iyim osauqta haqaiq. I bilaqne mataw gigo hazizir meqniyan in ginol emgomo iyim osayta nazaq nog i osauqta haqaiq. ¹⁰ I Aposel Krais abin

sorad a luwsa mataw i ginan agadanta haqay. Teq negmo Krais aholib soqotim osad ne bilaqne mataw ginad awaz meqinta daqagya. I Aposel gigo zaway haiqta. Teq negmo gigo zaway ayahmo daqagya. Mataw i Aposel gibilenawunad giben wazan woqsa in negmo giwazinad giben iluwuya daqagya. ¹¹ I Aposel mebmebmo kabiy waqim bo muranmo i gigemnan moqad giziyan maysa i osauqta. I gigo tubusan misiramta naqmo amalib i gihol sihenim luwauqta. Sa mataw i hareshmo ginolsa i begbeg nog iyim uliq saw bunmo luwauqta. ¹² I giholtuv bulad kabiy ayahmo emsa i gihol husisigaqta. Sa on mataw i gibilenawunsa i amenin emim nan dimdimunta amalib gidimun tonauqta. In i gimuzad gimeqin tonsa i gizezmo hiqiyim afaqan nagan bunmo sorad a luwauqta. ¹³ Mataw i gigilehunan bilaqsa i amenin emim kiskismo gibilenauqta. On mataw i gibiyi saman diqta bilaqne didaq asan a le ban meqintab hunegayta nazaq nog iyauqta. I mebmebmo kabiy wawta nab iyim bo muranmo mataw bunmo gimeb i bilaqne nagah meqinta anumlan inaqla nog iyim osauqta.

*Korin on mataw Pol asen muzad daq
emgo in gibilan*

¹⁴ Teq ya mebay negad gamuk nawa na a hi mar ton. Ne yaqgo onminmo diq haqad ya ne ginan inad bilaq gigayinsa ya ne ginad wastitayn gamuk teq na mar ton. ¹⁵ Ne ginad emiy. Ne gigo hib Krais ago mataw 10,000 nazaq ne giwamuz daqayta iyid teq in gilikmanib ne gimam araq ya nogta haiq iyeq. Helmo, Krais Yesus aduganib ya ne gimam nog iyim osaiqta. Ya Yesus awagamun dimunta gibilenan ne helmo haqim yaqgo onmin tigiyiyta. ¹⁶ Nazaq iyan ya atoranom kazaq ne gibilenaiq. Ne ya isen muzad ya daq em nogmo ne emiy haqaiq. ¹⁷ Daq alulin naqmo ago ya Timoti eman ne gigo hib lahta. Ya in inaq Iyahta aholib soqotim osad in yaqgo amun nog iysa ya in anan inad diq bilaqqaqta. Teq in Iyahta anad muzin bugad ago kabiy anonnommo emaqta. Timoti leheq ne ginad waz eraqsa ya Krais Yesus aholib soqotim in anad muzinad daq dimdimunta emaiqta na ago ne anadin a ta em daqay haqad ya in eman ne gigo hib lahta. Yaqgo daq na ya on mataw Yesus ago nan hurityata na gidauhan bunmo giqisihunad asuleqin gibilenaiqta.

¹⁸ Ne gigo asor ya inan ginad emay, Pol bo a ta hi gibiydaq haqay. Haqad in igmo ag haqad ya iquez tugothasay. ¹⁹ Teq haiqgam. Iyahta anad bilaqid ya ne gigo hib hidmo tilehdaiqta. Teq ya mataw gihol abin iluwuya na gigo nan huritnan a hi

lehdaiq. Haiqgam. Ya bole mataw na gigo zaway ahol waq kemgo haqad ya nawa lehdaiqta. ²⁰ Na ezaqgo God ago maror in gamukmo amalib og kab gwahtiqim a hi usaqta. Haiqgam. In God ago zawaymo amalib gwahtiqim usaqta. ²¹ Ari ya ne gigo hib leheq ya ezaq ne gitondaiq haqad ne ginad emay? Ya yuk wazeq a lehdaiq e? O haiq, ya ne ginan inad bilaqsa ne giyon daq kiskista emdaiq?

Krais ago on matawt gilikmanib daq meqinta gwahtiqsa in tuwastitay daqay

5

Daq araq abin meqin diqta Krais ago on mataw uliq Korin-ibta na gilikmanib gwah-tim

¹ Ari ya ne gigo wagam araq mataw bo ibilenaq ya kazaq hurit. Daq an haresmo hureqim inaq usayta na ne gilikmanib usaq haqsa ya hurit. Huritim ya ihol dedibmo ritan. Teq ne gigo hib daq usaqta na abin meqin diq issa on mataw en ta asor Juda a haiqta nagan in daq nawa ne gilikmanib usaqta na emnan gituw hiqiyayta. Na in kazaq. Mat araq in amam awe waqim inaq usaqta haqiy. ² Ta teq ne igmo ag haqad daq na anamren alowan tonayta. Ne giqutl tartaysa gaq wazad os nagiyta. Sa ne daq anamren na muzid in ne gilikmanib a ta hi os nagta.

³⁻⁴ Helmo, ya inon kab pesanmo osaqta teq ya iwitan in bilaqne ne ginaq osaqta nog iyaq. Ya ne ginaq os nog iyad mat na ago daq meqinta tuqulum kemim ya Iyahta Yesus abinib mat na ayon tibilay. Nazaq iyan ne on mataw Yesus ago nan huriyatya na bunmo humab araq emiy haqaiq. Humab emeq ossa ya iwitan ne ginaq ossa i gigo Iyahta Yesus ago zaway i gilikmanib tuqusdaqmo. ⁵ Sa ne daq anamren na waqeq Satán abenab emiy. Emid in sanctity waqad osad teq anad tubulyidaq. Anad buliyid abeb Iyahta ta boldaqta akamnib nab mat na awitan dimunmo tuqosdaq.

Korin on mataw mat daq meqinta amta na baymuzid nenaq ta hi osan

⁶ Ne igmo ag haqad gihol abin iluwatyata na in dimun a haiq. Yis asitmo mel deg ayahta inaq buliyan mel na bunmo huhuw nemaqta. Na ago ne ginad a hi emay ye? ⁷ Pasova akamnib mataw sipsip amidon wol emayta nazaq nog Krais i gimen ahol tamaz nog emim tumomta. Moqan ne bilaqne bret ago yis haiqta mataw Pasova akarwan inaq neqayta nazaq nog ne tiqiyim osayta. Nazaq iyan ne gilikmanib yis kwaziqta usaqta na suholid

lehan. Lehid teq ne bret yis haiqta mutur buliyyita nazaq nog iyeq osiy. ⁸ Pasova akamnib Isrel on mataw in gigo humab na emnan haqad gigo bitab yis kwaziqta usaqta na ginuwim tuhuneg bugayta. Nazaq iyan in daq emayta nazaq nog i emuqmo. God i gidimun tonta na ago i anadin emad i giholib yis kwaziqta na muzad i gigo daq meqinta nagan gileh negad ginad meqinta na i muzid lehanmo. Lehid teq i bret ago yis haiqta nog osad i gimileq a hi iyad gamuk helta adam emad osuq.

⁹ Ya ne gimen sansandek araq mar tonta nab ya kazaq tibilay. Ne on mataw an haresmo hureqim inaq usayta na giholib hiqiyeq nenaq hi osiy haqad ya bilayta. ¹⁰ Teq ne og kab mataw an haresmo hureqayta na teq mataw nagah haresmo uteytaya na teq mataw nagah rin tonayta na teq mataw god katiyta gimen lotu emayta nagan bunno giholib hiqiyiy nazaq ya a hi bilay. Haiqgam. Ne og kab mataw daq meqinta emayta bunmo giholib hiqiyeq osnan haqad teq ne og ka huloseq ulilib gwaleheq os nagiy.

¹¹ Ari ya gamuk kawa ne gimen mar tonaiqta kab ya kazaq ne tigibilem sireqaq. Mat bilaqaq, Ya ne gimaqbab Krais aduganibta haqad teq in an alulib hureqim inaq usaqta o in mat araq ago nagah ahol waqad utetaqta o in god katiyta gimen lotu emaqta o in mataw gigilehunan bilaqaqta o in tutimmo yuw atoranta uluwaqta o in mataw gigo nagah rin tonaqta, mat nazaq amileq iyaqta na ne aholib hiqiyeq inaq araqib hi osiy haqaiq. Osad ne mat na inaq araqib didaq hi neqymo haqaiq. Haiqmo diq. ¹² Nagaqgo ya mataw God ago maror asan ban osayta na gigo daq ulum kemdaq? Na yaggo kabiya a haiq. Ari on mataw God ago maror aduganib osayta naqmo gigo daq ne ulum kemeq giwastitay daqayta. ¹³ On mataw God ago maror asan ban osayta na God-mo teq in gigo daq tuqulum kemdaq. Ari negmo teq God ago gamuk bilamta kazaq ne emiy. Gamuk na bilam,

Mat meqinta ne gilikmanib osaqta na ne muzid asan ban lehan ham. *Lo 17.7*

6

Krais ago on matawt na maqbab iyeq an hazizirib hi emiy

¹ Ne gilikmanib mat araq in ayow nan tuqugad in ta nagaqgo mataw God ago maror asan ban osayta nagan gimeb gamuk na wastitayay? Dog ton in God ago on mataw tawonta na gimeb afaqan na a hi wastitayay? Mat daq nazaq emaqta na amebay haiqta daqag iyim in daq na emaq. ² Abeb teq God ago on mataw tawonta na in on mataw God gileh ugayta na bunmo

hazizirib giqemad gigo daq tuqlum kem daqay. Na ne ginad a hi emay ye? Ne teq on mataw God gileh ugayta na bunmo gigo daq meqinta bunmo tuqlum kem daqayta. Ta ezaq haqad negmo gigo afaqan amikmikta nagan gwahtiqa ne ulum kemim a hi wastitay? ³ Abeb teq i angelo hazizirib giqemad gilum kemamta. Na ago ne ginad a hi emay ye? Nazaq iyan i kayeqmo og kab osad i gigo afaqan amikmikta na gwahtiqa igmo ulum kemeq wastitayuq.

⁴ Nazaq iyan ne gilikmanib afaqan an mug nazaqta gwahtiqa ta ezaq haqad ne mataw Krais ago dahuib gibin haiqta na gitowun eman in ne gigo afaqan na ulum kemayta? ⁵ Ne daq nazaq emnan gimebay a hi woqaq e? Teq ezaq? Ne mataw Krais anan helmo haqayta na gilikmanib gimaqbab giger an mugsu ne gigo mat araq anad awaz meqinta afaqan na ulum kemeq wastitaydaqta haiq e? ⁶ Ta teq ne nazaq a hi emayta. Mat araq in amaqbab araq hazizirib emad nan tuqugaqta. Teq daq na amomo a haiq. Mat na in amaqbab na waqim ad le mataw Krais anan helmo a hi haqayta na gimeb hazizirib emaqta!

⁷ Ne gilikmanib mataw asor in giyogniz nan negad hazizirib giqemsa ya ne ginan inad emaiq, Ne Krais ago daq dimunta na hulosim tuwoq hasiy haqqaiq. Ne kazaq em nagiy. Mataw ne giholib daq meqinta emsa ne afaqan na hi sor nagiy. Ad in ne gigo nagah rin tonsa ne ananin hi bilaq nagiy. ⁸ Teq haiq. Ne an meqin tonad an ago nagah rin tonad luwayta. Teq ne mataw asan ban osayta na gigo hib daq meqinta nazaq a hi emayta. Haiqgam. Negmo maqbabmo nazaq an meqin tonayta.

⁹ Mataw daq meqinta emad luwayta bunmo le God ago maror aduganib a hi gwahtiqa daqay. Na ago ne ginad a hi emay ye? Ne gihol hi kat ugiy. On mataw an haresmo hureqim inaq usayta na teq mataw god katiya ayon lotu emayta na teq mataw an alulib hureqim inaq usayta na teq mataw in gimo gihol zayim mataw ta asor gihol negayta na teq mataw in matawmo an ahol waqad gihol eraqaqta na ¹⁰ teq mataw rin tonayta na teq mataw nagah haresmo utetayta na teq mataw yuw atoranta uluwim gifaqin hulosayta na teq mataw an agilehunan bilaqayta na teq mataw gimileq iyad nagah samanno waqayta na, on mataw naqanta bunmo le God ago maror aduganib a hikidikmo gwahtiqa daqayta. ¹¹ Kwaziqmo ne asor nazaq diq luw yaqayta. Teq God ne gigem tisuhol. Suholim in ne gigeman ne in ago on mataw tawonta tiqiyiy. I gigo God in ne giwaqim Iyahta Yesus Krais ago kabiy aduganib giqemim in ago Bugaw Dimunta

negan ne gabin on mataw titnonta tiqiyim usaqta.

I gihol in God ago Bugaw Dimunta ago bit

¹² Gamuk araq mataw bilaqad luwayta na in kazaq. "I daq bunmo giqemamta na agununin haiqgam" haqayta. Gamuk na in helta teq daq na asor a hi nilumsihdaqta. Helmo ya daq bunmo giqemdaqta na agununin haiqta teq ya daq araq diq hulosid in yaqgo ayahta nog iyeq inad a hi hureqdaq. ¹³ Teq gamuk araq mataw bilaqayta na in kazaq. "Didaq bunmo i gigemab woqgomo usaqta" haqayta. "Teq i gigem in didaq bunmo ago abanan iyim usaqtamo" haqayta. Gamuk nawna na in helmotat teq God in didaq bunmo emid hiqysi in i gigem emid thihiqyidaqmo. I gihol in an haresmo hureeq inaq usgo a haiqta. Haiqgam. I gihol in Iyahta anad muzingo usaqta. Sa Iyahta in i gihol wamuzgo osaqtamo. ¹⁴ God inmo ago zaway amalib Iyahta hodhodab wazan eramta. Nazaqmo teq in i giwazid i tigeraqamtamo.

¹⁵ I gihol in bilaqne Krais abensen nog iyim usaqta. Na ne ginad a hi emay ye? Nazaq iyan i Krais abensen na waqeq a leheq aw danatabta na inaq tuwastonam e? Haiq kidik! ¹⁶ Ne ginad emiy. Mat aw danatabta inaq usaqta na in aw na inaq gihol amulikmo tiqiyayta. God ago marib gamuk usaqta nazaq. Gamuk na bilam, In giger gihol amulikmo iyeq tuqos daqay ham.

Genesis 2.24

¹⁷ Ad nazaqmo mat in Iyahta inaq soqotaqta na in giger ginad gigem amulikmo tiqiyaytamo.

¹⁸ An haresmo hureqim inaq usayta na ne aban diq emeq tukiy. Na ezaqgo daq meqinta bunmo mat ahol asan ban gwahtiqa in mat ta araq meqin tonaqta. Ari mat an haresmo hureqim inaq usaqta na inmo ahol meqin tonaqta. ¹⁹ I gihol in bilaqne God ago Bugaw Dimunta ago bit nog iyim usaqta. Na ne ginad a hi emay ye? God in ago Bugaw Dimunta negan in ne giduganib tuqosaqta. Nazaq iyan ne gihol in negmo gigo a haiq. ²⁰ Haiqgam. God naw ayahmo amalib ne gizayan ne in agota tiqiyiy. Nazaq iyan ne gihol bunmo God ugad ne gigo daq amalib in abin iluwid ulilibmo gwalan.

Krais ago on mataw an waqayta ago adan anan Pol bilam

daq dimun haqayta. ² Ta teq an haresmo hureqim inaq usayta na ayahmo diq iysa iyan yaqmo inad kazaq emaiq. Mataw samanmo osayta na bunmo in gigo aw inaq iyyi haqaiq. Sa on samanmo osayta na in gigo mat inaq iyimo haqaiq. ³ Teq aw aduw in awe inaq usnan bulonsa awe ahol hi wasihan. Sa aw na in aduw inaq usnan bulonsa aduw ahol hi wasihanmo. ⁴ Aw na ahol inmo agota a haiq. In ahol na aduw agota. Ad nazaqmo mat na ahol inmo agota a haiqmo. In ahol na awe agota.

⁵ Mat awe inaq usnan haqsa awe hi hulosan. Sa aw aduw inaq usnan haqsa aduw hi hulosanmo. Ari in giger God amomo anadin emad inaq gamuk emnan haqad an adugan wazeq teq in gihol tuwasih daqay. Wasiheq osad in an kam ugiyta na le tihiqiyid in araqib a ta us daqay. Luweq in gihol sisamo wasiheq luwsa Satan bo tigilum waqdaq. Gilum waqsa in gihol atoranmo eraqsa in Satan aqez othasgo biyab a hi iy daqay. ⁶ Teq ya ne gibe yahad ne mataw bun diqmo on giwaqiy nazaq ya a hi bilaqaiq. Naqmo ne asor gihol wasiheq samanmo osgo biyab a haiqta haqad ya an waqgo ne gibilenaiq. ⁷ Ya inad ya samanmo osaiqta kazaq ne bunmo os nagiya haqaiq. Teq God in mataw naw amo amo negsa mataw bunmo giholib God ago naw araq araq usaqta. Mat araq naw araq waqsa ta araq in naw araq waqqaqta.

⁸ Ari on mataw an a hi waqayta na teq on waburta na ya kazaq gibilenaiq. In an a hi waqad samanmo ya nogmo os daqayta na in dimun diq haqaiq. ⁹ Ta teq in gihol eraqsa in wasiho gigo zaway hiqiyatqa na in an tuwaq daqay. Mat aw inaq an waqayta na in daq dimunta. Ari in samanmo osad gihol atoranmo eraqdaqta na meqin.

¹⁰ Teq on mataw an tuwaqiyta na ya kazaq ne gibilenaiq. Ad yaqgo gamuk ka ya inadibmo a hi gibilenaiq. Iyahtaqmo gunun bilamta na ya ne gibilenaiq. Aw mat tuwamta na in aduw hi hulosan haqaiq. ¹¹ Ari in aduw huloseq le samanmo osad in mat ta araq muturta hi waqan. Teq in samanmo os haiq in muleqeq le aduw inaq an anobun wastitayeq araqibmo a ta osiy. Ad nazaqmo mat in awe a hi muzdaqmo.

¹² Ari on mataw ta asor na bunmo ya kazaq diq ne gibilenaiq. Teq gamuk kawa ya bilaqdaiqta ka in Iyahta aqez a haiq. Ka yaqmo inadta ya bilaqnau. Krais ago mat araq awe in Iyahta anan helmo a hi haqqaqta teq in aduw inaq osnan anad bilaqsa, mat na in aw na hi muzan. ¹³ Ad nazaqmo aw araq aduw in Krais anan helmo a hi haqqaqta teq in awe inaq osnan anad bilaqsa, aw na in aduw hi hulosan. ¹⁴ Ne ginad emiy. Mat helmo a hi haqqaqta na in awe helmo haqqaqta na inaq ossa

God ago gunun in giger giqitiyonim usaq. Ad nazaqmo aw helmo a hi haqqaqta na in aduw helmo haqqaqta na inaq ossa God ago gunun in giger giqitiyonim usaqmo. Na haiggam iyid ne gigo onmin God ameb gibusirinan inaq iy nagiya. Teq haiq. In God ago gunun ahaqenib iyim tuqosaymo.

¹⁵ Ari mat helmo a hi haqqaqta na in awe hulosnan in tuhulosdaq. Sa aw helmo a hi haqqaqta na in aduw huloseq lehnar in tilehdaqmo. Afaqan na on mataw helmo haqayta na gigo afaqan a haiqta. In gunun a hi itiyyonayta. Teq God anad mat awe inaq zib alowab os daqay haqad in ne gililewunan ne in ago maror aduganib gwahtiqliyta. ¹⁶ Aw ni ninad a hi emaq. Ni ningi mat daq kiskista isihunsa in Yesus anan helmo haqid God ulumsiheq ta waqdaq o haiqta na ago ni a hi huritmo.

God i giqeman osauqta nazaqmo i os tutuq

¹⁷ God i bunmo giyon bilaqan i os araq araq waqim osauqta. Nazaq iyan i ezaq iyim ossa Iyahta i gililewunta nazaqmo i osuq. Guniun ka ya Yesus ago on mataw gidauhan bunmo gigo hib emaiqta. ¹⁸ Mat araq ahol abatan asan tuqurotan teq God lilewunta ye? In asari urotta na hi ulileman. Teq mat araq asan a hi urotsamo God lilewunta ye? Mat na asan urotog anad ta hi eman. ¹⁹ Mataw gisan urotayta ago adan na in nagah diq a haiq. Teq mataw gisan a hi urotayta na in nagah diq a haiqmo. Ari mataw bunmo God ago gunun muzin bug daqayta naqmo in heltaqmo. ²⁰ On mataw bunmo ezaq iyim ossa God gililewunta nazaqmo in tuqos tut daqay.

²¹ Ni kabibiy mat samanta iyim ossa God nililewunta ye? Ni na ago afaqan hi iy. Ari ni nimmo nihol anawun emeq ni samanmo dimunmo osdaqta ago adanteqin araq ahol waqeq teq na ni muz.

²² Teq mat nog in kabibiy mat samanta iyim ossa God lilewunta, mat nazaqta na in Iyahta ago mat tiqiyim in ameb samanmo tiluw osaqla. Ad nazaqmo mat dimunmo samanmo luwsa God in lilewunta, mat nazaqta na in Krais ago kabibiy mat tiqiyim osaqla. ²³ God naw ayahmo diq amalib ne gizayta. Nazaq iyan ne ginadibmo mataw ta asor gihaqenib gihol emeq in gigo kabibiy mataw samanta nog iyed hi osiy. ²⁴ Ya imaqbaban, ne ezaq diq iyim ossa God gililewunta nazaqmo ne in ameb os tutiy.

Pol in on mataw an a hi waqayta na gimen gamuk bilam

²⁵ Ari on mataw an a hi waqayta na, ya iholib Iyahta ago gunun araq gibilendaiqta

haiqgam. Teq Iyahta ya inan anad meqniysa ban yagan ya in ago mat gamuk helta bilaqaiqta iyim iyan ya inadta ka tigibilennan.²⁶ Muran kam kab afaqan aseseqta gwahtiqla iyan ne an a hi waqad samanno osayta na in dimunmo. Ne nazaqmo os tutiy.²⁷ Ari ni aw tuwaqsun ni muzgo ninad hi em. Teq ni aw a hi wamata na ni aw nagungo ninad hi emmo.²⁸ Mat ni aw tuwamta na ni daq meqinta a hi emaq. Ad aw ni mat tuwamta na ni daq meqinta a hi emaqmo. Teq on mataw an tuwaqiyta na in afaqan aseseqta giholib tiloyin daqay. Nazaq iyan ya inad afaqan na ne gihobil hi gwahtiqla haqad ya kazaq ne gibilenaiq.

²⁹ Ya imaqbaban, yaqgo gamuk naway na alulin in kazaq. Kam in siqim tigiq. Nazaq iyan ne kam muturta teq gwahtiqla qta na anadin emsa og ka ago daq amo amo na ne ginad hi wamuzan. Haiqgam. Muran teq abeb on mataw an tuwaqiyta na in bilaqne an a hi waqiyta nog iyeq osiy.³⁰ Teq mataw gaq wazayta na in bilaqne a hi gaqayta nog iyeq osiy. Sa mataw ginad dimniyayta na in bilaqne mataw ginad meqniysa osayta nog iyeq osiy. Sa mataw nagah kabemmo gizayayta na in bilaqne mataw ginaghan haiqta nog iyeq osiy.³¹ Sa mataw og ka ago kabiyl amo amo emayta na in bilaqne mataw og ka ago nagah anadin a hi emayta nog iyeq osiy. Na ezaqgo og ka awaqtan i gimeb ahol waqauqta ka hiqiyim lehaqta.

³² Og ka ago daq amo amo ne ginad hureqsa ne ginad meqniyldaqta na ya ituw hiqiyaq. Mat aw a hi waqqaqta na in Iyahta ago kabiyl naqmo emgo anad bunmo usaqta. Ad in Iyahta qmo anad emid dimniyigo emaqta. ³³ Ari mat aw tuwamta na in og ka ago daq amo amo ginadin emaqta. Ad in ago aw anad emid dimniyigo anad usaqta. ³⁴ In nazaq emad in anad giger iyaqta. Teq on gidugtun haiqta teq on baras-barasta nagan in Iyahta ago kabiyl naqmo emgo ginad bunmo usaqta. Usad in gisan gimugan inaqmo bunmo Iyahta uged in amomo agota iyeq osnan ginad bilaqsa osayta. Ari aw aduw inaqta na in og ka ago daq amo amo ginadin emaqta. Ad in aduw anad emid dimniyigo anad usaqta. ³⁵ Ya ne gilumsihgo haqad gamuk ka bilaqaiq. Ya ne gidanin a hi qwayaiq. Haiqgam. Ne wastitayeqmo osad gihobil bunmo Iyahta ago kabiyl uguy haqad ya gibilenaiq.

³⁶ Ari mat araq in aw inaq yow tiqemim teq a hi waqqaqta na luweq in anad emdaq, Ya aw ka hidmo a hi waqqaqta ka in daq dimun a haiq haqdaq. Ari mat na in aw waqgo anad ayahmo eraqsa in dante araq ahol a hi waqad teq in anad na tumuzindaq. Muzineq in giger an tuwaq daqay. Na daq meqinta a haiq.³⁷ Teq mat araq in aw inaq yow tiqemim teq in hi waqgo haqad

anad amulikmo ussa mat na ahol in anad a hi wamuzdaqta. Ad in ahol eraqqaqta na wasihad in anad emdaq, Ya aw ka inaq yow tiqemta teq ya hidmo a hi waqdaq haqdaq. Aw ka in ya iyow nogmo iyeq tuqos tutdaq haqdaq. Haqad in anad na a ta hi bulyidaq. Mat nazaqta na in daq dimunta emaqta. ³⁸ Nazaq iyan mat in ayow na waqad in daq dimunta emaqta. Teq mat in ayow na a hi waqad in daq dimun digta emaqta.

³⁹ Ari aw aduw a hi moqsamo aw na in bilaqne aduw inaq am giwazan os nog iyaya. In aduw na huloseq le mat araq a hi waqdaq. Ari in aduw na tumoqid teq aw na anadibmo samanno tiluwdaq. In mat araq waqnan anad bilaqeq in mat tuwaqdaq. Teq in mat helmo a hi haqqaqta araq hi waqan. Haiqgam. In mat araq Iyahta anan helmo haqqaqta naqmo waqan. ⁴⁰ Teq yaqmo inad kazaq emaqta. Aw aduw tumomta na in mat araq a hi waqeq in anad ayahmo dimniyiso tuqosdaq haqaiq. Ad ya inad emaqta, God ago Bugaw Dimunta anad yagsa ya gamuk ka bilaqaiq haqaiq.

Krais ago on mataw god katiyta gimen tamaz akaruwan na tineq daqay o haiq?

8

Pol god katiyta giyon karuw tamaz emin teq neqayta na anan bilam

¹ Ari mataw god katiyta giyon tamaz wazim teq akaruwan neqayta na ago ya tibilaqnan. I bunmo ginad inaqta na ago i tuhurit. Ta teq mataw asor in God ameb daq dimunta emgo ginad tiqem hasim in igmo ag haqad gigo walmataw ginad a hi em hasayta na giwazan woqayta. Ari mataw an anan ginad bilaqgo ginad tiqem hasayta na in an ulumsihad an agem zaway ugsa in giwaz meqniyim osayta. ² Mat nog bilaqqaq. Ya nagah bunmo ago inad tiqem hasta haqqaqta, mat na ahol kat ugad in anad a hi diq em hasaqtta. ³ Ari mat nog God anan anad bilaqqaqta na God in mat na ago tuhurit kemaqta.

⁴ Nazaq iyan mataw asor god katiyta giyon tamaz akaruwan nedqayta na ago ya kazaq ne gibilendaiq. Mataw god katiyta gidulan emayta na in nagah hel diqta gidulan a hi emayta. Na i bunmo tuhuritta. Ad God amulikmogmo osaqta na ago i bunmo ginad tiqem hasaqtamo. ⁵ Helmo, mataw in nagah amo amo kaitab usayta na teq nagah amo amo ogib luwayta na ginan 'I gigo god' haqayta. Haqsa og kab mataw gigo god kabemmo diq iysa on mataw kabemmo in gihagenib iyim ginan 'I gigo aseseqta'

haqayta. ⁶ Ari igmo teq i gigo God amulikmoqmo osaqta. God naqmo in i Gimam iyim in nagah bunmo osayta na gilulin. Sa i in amomo anad muzgomo iyim osauqta. Teq i gigo Iyahta amulikmo osaqtamo. Na Yesus Krais mat nagah bunmo giqamta amatin. Inmo i giqeman i kayeqmo osauqta.

⁷ Ta teq Yesus ago on mataw asor in gamuk nawa ya bilayta na ago ginad a hi em hasayta. On mataw na in kwaziqmo god katiyta nagan ginan helmo haqad os yaqayta. Nazaq iyan muran in tamaz akarwan na neqad ginad emay, Ka god katiyta gigo tamazmo diq i tineqauq haqayta. Haqad in ginad a hi zilimsamo neqad iyan in ginad meqniysa God ameb gihol afaqan iyaqta. ⁸ Teq nagah i neqauqta na in i giqemid i God agerab a hi loqam. Haiqgam. I karuw na udinad gihol a hi meqin tonauqta. Ad i neqauqta na in i ahi gilumsihaqtamo.

⁹ Teq ne asor ginad em hasim osayta na ne gihol waziy. Didaq karuw bunmo neqqomo haqad ne ginad tiqem hasim gunun haiqmo luwayta. Teq luweq ne nagah haresmo neqsa mataw giqutil hidmo tartayaqta na ne gibiyad in ne gisen muzinad teq in God ameb gihol meqin loyin daqay. ¹⁰ Ni nog ninad tiqem hasta na ni god katiyta ago lotu abitib leheq didaq neqad ossa luweq mat araq aqutil hidmo tartayaqta na tinibiydaq. Nibiysa ni god katiyta ago tamaz adidaqin neqsa in neq nagtamo anad a hi emdaq e? ¹¹ Nazaq iyid teq ni ninad awaz meqinta na in bliqne gig nog nimaqbab asen tuwoltaydaq. Woltyad ni nimaqbab aqutil hidmo tartayaqta na le tuwoqdaq. Teq Krais in mat na inaqmo amen momtamo. ¹² Ni nazaq nimaqbab aqutil hidmo tartayaqta na ago anad helta meqin tonad ni nimaqbab na ago hib daq meqinta tiqemaq. Ad ni nimaqbab ago hib daq meqinta emim ni Krais ago hib daq meqinta emaqmo. ¹³ Nazaq iyan yaggo didaq neq ya imaqbab emid anad helta hulosnan tonsa ya karuw naqanta a ta hikidik neqdaiqta. Luweq ya imaqbab na ameb didaq na neqsa in ya isen muzinad teq in anad helta usaq na tuhulosnan tondaq.

9

Pol Aposel akabiyan emad anawun a hi waqaqta na ago in anad dimnuyaq

¹ Ne ya inan ginad ezaq emay? Ya samanmo inadib a hi luwaiqta ye? Ya Aposel a hiaqta ye? Ya i gigo Iyahta Yesus ahol a hi wayta ye? Iyahta ago kabiy ya emaiqta na ne giholib anon a hi amta ye? ² Mataw asor ya inan i gigo Aposel nazaq in a hi bilaqayta. Teq negmo yaqgo

tuhurit kemim ne ya inan i gigo Aposel nazaq ne a hi bilaq daqay ye? Ya ne gigo hib Aposel akabiyan emsa ne Iyahta ago dauhib gwahtiqiyta. Nazaq iyan ya Aposel iym osaiqta atowun na negmo.

³ Ari mataw asor yaqgo kabiy ulum kemad inan helmo diq a hi haqsa ya ihol anadin qwayad kazaq diq gibilendaq. ⁴ Ya iyow Barnabas inaq i Aposel akabiyan emad mataw gigo didaq yuw samanmo waqamta nazaq i gibin a hi usaq e? ⁵ Ad i giqonan helmo haqayta na giwaqeq nenaq uliq-uliqgo luwamta nazaq i gibin a hi usaqmo ye? Aposel asor teq Iyahta Yesus amagniz na teq Pita in giqonan nenaq luwayta nazaq i a hi emam e? ⁶ God ago kabibiy mataw bunmo kabiy emsa mataw didaq nagah negayta. Ta teq ya iyow Barnabas inaq i gimomo teq God ago kabiy emad i ta gihol ulumsihsog akabiyan inaqmo emammo ye? ⁷ Ne ginad emiy. Gavman gigo bab mataw in gigo kabiy amulik naqmo emsa gavman didaq nagah negsa in osayta. Osad in giholyon kabiy araq a hi emayta. Teq mat am wain akabiyan emaqta na inmo ago kabiy na anon waqim neqqaqta. Teq mat sipsip giwamuqta na inmo sipsip gisus waqim uluwaqta.

⁸ Teq ya matawmo gigo daq anadin emad bilaqaiq e? Haiqgam. God ago maror Moses bilamta na in gamuk nazaq bilaqaqmo. ⁹ Maror na aduganib gamuk araq kazaq mar tonan usaq.

Bulmakau wit akabiyan emad wit bay nialsa ne atenmos am hi waziy ham.
To 25.4

God in bulmakau-mo ginadin emad gamuk na bilamta daqagy. ¹⁰ Haiqgam. In i matawmo ginadin emad gamuk na bilamta. Nazaq a hiae e? Helmo, gamuk na i matawmo gimenta usaq. Daq alulin nazaq iysa iyan mat og wolqaqta na teq mat wit anon giluwuyaqta na in ginad emay, Kabiy kawa i emad giholtuw bulauqta ka i teq anon waqeq tineqam hagad in kabiy na emayta. ¹¹ Ari i ne gigemab God ago gamuk didaq anagin nog leyan in gwalim ne giwtan tigilumsihaq. Ta teq nagaqgo i ne gigo hib kabiy enta na anon waqgo ne hulosad ne i gihol ulumsihsog adidaqan diq ignan nan kabemmo bilaqay? ¹² Mataw ta asor ne gilumsihsa ne in giwazinad gilumsihayta. Ari igmo gibin mataw na gibin uriyaman iyan ne i ayahmo tigilumsih nagiytamo.

Teq i le ne nenaq osad i gibin nazaq a hi iluwad i ne gigo nagah araq a hi wayta. Haiqgam. I nazaq emeq i Krais ahol awagamun dimunta na adanin qwayam haqad i gihol ulumsihsog akabiyan na bunmo igmo emyauqta. ¹³ Mataw Tempel-ib lotu akabiyan emayta na in bit nabmo didaq waqim neqayta. Teq mataw tamaz

em abanab tamaz akabiyan emayta na in tamaz akarawan asor waqim neqaytamo. Na ne ginad a hi emay ye? ¹⁴ Teq Iyahta gunun emim nazaq tibilammo. In bilam, Mataw yaqmo ihol awagamun dimunta na akabiyan emsa in gigo walmataw nagah gihol ulumsihgo naw nog negiy haqad in bilam.

¹⁵ Helmo ya ibin nazaq usaqta. Teq ya adan diq a hi emaiqta. Ad ne ya ilumsih daqay haqad ya gamuk ka a hi mar tonaiqmo. Haiqgam. Ya God ago gamuk dimunta mataw samanmo negnan inad bilaqaqta. Nazaq iyan ya God ago kabiy na emad ya ne gigo nagah araq diq a hi waqdaiq. Ad ya moqsun o tob ya moqmo tumoqdaiq. Luweq ya ne gigo nagah waqad teq abeb ya God ago gamuk samanmo negta nazaq ya ibin a ta hi iluwdaiq haqad. ¹⁶ Teq ya Yesus awagamun dimunta mataw giblenaiqta na ago ya mat asittaqmo haqad ihol abin a hi iluwdaiq. God-mo kabiy na yagan ya in aqez otheraso biyab a haisqta. Ya kabiy na a hi emeq ya timeqniydaiq. ¹⁷ Na ezaqgo ya inad bilaqsa kabiy emeq ya naw dimunta tuwaqdaiq. Ari ya ituw hiqysi teq ya kabiy na hulosdaiq e? Haiqgam. God-mo kabiy na yagan ya ihol anadin a hi emad ya inmo anad muzinad kabiy na emmo tiqemdaiq. ¹⁸ Nazaq iyan ya kabiy na emad naw kazaqmo waqaiqta. Ya Yesus awagamun dimunta on mataw samanmo negaiqta naqmo ya anan yaqgo naw dimunta haqaiqta. Ya nazaq emad ya ihol abin a hi iluwad ya mataw gigo nagah araq samanmo a hi waqaiqta.

Pol in on mataw bunmo gigo kabibiy mat nog iyim osaqa

¹⁹ Mat araq ya izaysa ya in ago kabiy emad a hi osaqa. Yaqmo inadibmo luwad kabiy emaiqta. Ta teq ya on mataw bunmo gilumsihnan haqad ya in gigo maror ezaqya in muzayta na ahaqenib lehad ya in gigo kabibiy mat samanta nog iyim osaqa. Ya on mataw kabemmo gihureqid in Yesus anan helmo haq daqay haqad ya daq nazaq emaiqta. ²⁰ Nazaq iyan ya Juda nenaq osad ya in ginogmo iyim osaqa, ya in gigo asor gihureqid in Yesus anan helmo haq daqay haqad. Ad ya mataw God ago maror Moses bilamta na ahaqenib osayta na nenaq osad ya inaqmo maror na ahaqenib os nog iyaiqta. Helmo ya maror kwaziqta na ahaqenib a ta hi osaqa. Teq ya mataw maror na ahaqenib osayta na gihureqgo haqad ya nenaq osad in daq em nogmo ya emaiqta. ²¹ Ad ya mataw God ago maror Moses bilamta a hi waqiyta na nenaq osad in maror na anadin a hi emayta nazaq nogmo ya osaqa. Teq ya God ago maror araq haiqmo diq a hi

osaiqta. Krais ago maror in bilamta na ya anadin emad ya maror naqmo ahaqenib osaqa. Osad ya mataw nawa God ago maror haiqmo osayta na nenaq osad ya in inaqmo giwaqgo haqad in os nogmo ya osaqa. ²² Ad ya mataw ginad helta a hi zilimnaq gitqut hidmo tartayaqta na nenaq osad ya nazaqmo iqutil hidmo tartayaqta nog iyim osaqa. Ya mataw na ginad helta emid awaz timeqniydaq haqad ya daq nazaq emaiqta. Ya on mataw en bunmo gigo asor kabemmo giwaqdaiq haqad ya in gigo gunun ahaqenib iyim osad ya in gigo maror ezaqta na ya muzmo muzinaqta. ²³ Yesus awagamun og saw bunmo awaz meqniyeq usdaq haqad ya iholtwu bulad mataw bunmo gigo kabibiy mat nog iyim osaqa. Abeb on mataw Yesus awagamun dimunta anan helmo haqad osim moqiyta na in God ago os dimunta waqsa ya naw dimunta na iholyon tuwaqdaiqmo haqad ya nazaq emaiqta.

I atoranmo sibeq le towub iyeq God ago naw dimunta na i giholyon waqua

²⁴ Ne ginad emiy. Mataw sibim le towub gwahtiqayta na gilikmanib amulikmoqmo in le naw dimunta na waqaqta. Nazaq iyan ne bunmo nazaqmo God ago naw dimunta waqgo haqad atoranmo sibiy. ²⁵ Mataw og kab sibaya na bunmo naw araq meqniydaqta naqmo waqgo haqad in gihol udinayta. Ari igmo teq i naw a hi meqniydaqta na ago i gihol udinayta. ²⁶ Nazaq iyan ya atoranmo sibad ime haresmo a hi lehaqta. Ad ya ibabun inaq an wolad ya iben hune-gad a hi wol kireh nemaiqta. ²⁷ Haiqgam. Ya ihol in ya inadmo muzdaq haqad ya ihol wazan woqsa in yaqgo kabibiy mat samanta nog iyayta. Luweq ya Yesus awagamun on mataw kabemmo gibilenid in le naw na waqsa ta ya le liqabmo woqeq naw dimunta na ya a hi waqdaiq haqad.

10

Daq meqinta gilum waqsa i hi woquq

¹ Ya imaqbaban, ne Moses ago kamub daq gwahtimta na anadin ta emiy haqad ya gibilenaiq. God in i Juda gisesan bunmo giwaqim teq in onqas eman gehitiqim dan giqisihunsa in lehiyta. Teq in bunmo kamis ayahta na urotsa God in gimen dan emsa in lehiytamo. ² Mataw na Moses ago hib soqotim aqez huritad in onqas na muzim lehim le kamis ayahta na tuqurotiy. In nazaq emim in bilaqne Moses-mo abinib yuw huzim ago dauhibta nog tiqiyi. ³ On mataw na bunmo didaq God ago Bugaw Dimunta eman Heven-ib gehitimta na neqiyta. ⁴ Teq in bunmo yuw Bugaw Dimunta nagta na in uluiy-tamo. Saw edob in leh yaqayta nab Bugaw

Dimunta yuw emid gigib gwahtiqa in uluw yaqayta. Nazaq iyan gig naqmo in Krais i giqeman i kayeqmo os tutauqta na atowun in gigo hib usta.⁵ Ta teq God in mataw na gigo asor kabemmo ginan anad a ta hi bilaqsa in ginol eman gisan hares hares saw amatawun haiqtab nagab giqusiy.

⁶ Daq nagan bunmo i ahol waqeq ginad em hasgo in gwahtimta. I ahol waqad ginad em haseq teq mataw na nagah meqmeqinta utetiya nazaq i a hi emam haqad.⁷ Mataw na gigo asor god katiya giyon lotu emiyta nazaq ne hi emiy. God ago marib gamuk araq kazaq bilam,
Mataw na humab wolum didaq neqad yuw

uluwim teq in eraqim on nenaq saw zunad osiyta ham. *Kisim Bek* 32.6

⁸ Teq mataw na asor an haresmo hureqim nenaq usiyta nazaq ne hi emiyimo. Mataw na nazaq eman God in kam amulikmo on mataw kuluwmo diq 23,000 nazaq ginol eman moqiyta.⁹ Teq mataw na asor Iyahta ulum waqiyta nazaq i hi emuq. Mataw na Iyahta ulum waqan nagah ahulinaqta gigo liqiy inaqla kabemmo gwahtiqaqim gimugan in tumoqiy.¹⁰ Teq mataw na asor gimot meqniysa nan kabemmo bilaqiyta nazaq ne hi emiyimo. In nazaq emsa angelo mataw ginolaqta na lehim mataw na tig-nol em bug.

¹¹ Daq meqinta nagan mataw kwaziqta na giholib gwahtiqaq muran i in ginadin emad i ginad tiqem hasauqta. Teq i on mataw kam kab osauqta i gihol asawan woltayed osam haqad in mataw kwaziqta na giwagamun mar ton igiyta. Na ezaqgo nagah bunmo God ago gamuk anan bilaamta na in muran kam kab anon tiqemim usaqta.¹² Nazaq iyan mat aw nog bilaqaq, Ya iwaz meqniyim turaiq haqaqta na in ahol waz naqmo hiqiyani. Luweq in woqdaq.¹³ Daq gilum waqgo ne giholib gwah-tiqaqta nagan in i on mataw bunmo giholib gwahtiqaqta. Teq God bilamta nazaq in tiqemidaq. In ne gisen baysilha daq gilum waqqaqta na ne giwazid a hi woq daqay. Haiqgam. Daq nazaqta ne giholib gwah-tiqsa God ne gimen dante araq giqisihunid ne muzad giwaz meqniyeq dimunmo tuqos daqay.

I God diq ayon lotu emad teq i god katiya giyon lotu hi emuq

¹⁴ Nazaq iyan ya iyognizmo diq, ne god katiya girabunad tukeq le pesanmo luwiy.¹⁵ Ne on mataw ginad inaqla iyan ya ne gibileniq. Yaqgo gamuk ka negmo huriteq ulum kemiyl.¹⁶ I gog wazim God esey ugim uluwauqta na i Krais anedan i giwasti-tayaqta na ahaqenib lehauqta. Teq i bret orqayim an ugim neqauqta na i Krais anon

i gilumsihaqta na ahaqenib loquaqtamo.¹⁷ I on mataw kabemmo bret amulikmo araqib neqad i bunmo gihol amulikmo nog iyim osauqta. Na ezaqgo i bret anabun amulikmo naqmo i bunmo neqauqta.¹⁸ Ne Isrel on mataw gigo daq anadin emiy. In God ayon tamaz emiyta na akaruwun neqad in daq naqmo ahaqenib lehaya.

¹⁹ Teq luweq ne ginad em daqay, Pol anadib god katiya giyon tamaz emiyta na in daq helta daqag haq daqay. Ad god katiya na in nagah hel diqtaqmo haq daqay.²⁰ Haiqgam. Ya kazaq bilaqaiq, Mataw God abin a hi hurityta na in god katiya giyon tamaz emad in naw na God helta a hi ugayta haqaiq. In bugaw meqmeqinta tamaz na negayta haqaiq. Nazaq iyan ne bugaw meqinta na gihaqenib lehgo ya hulosmo diq hulosaiqta.²¹ Ne Iyahta ago gogib yuw uluwad teq ne bugaw meqinta gigo gogib yuw hi uluwiyomo. Teq Iyahta ne giwastitayta na adidaqan ne neqad teq ne bugaw meqinta gigo gunun ahaqenib hi loqiyimo.²² Ne Iyahta emid agem meqniyidaq haqad ne nazaq kamolmol ug daqay ye? Teq ne gigo zaway in ago zaway uriyaman ne in ago hib daq nazaq em daqay ye?

Tuteqmo i God abin iluwuq

²³ Mataw asor bilaqay, "I daq bunmo giqemamta na agununin haiqgam" haqayta. Gamuk na in helta teq daq na asor a hi nilumsihdagta. Helmo ya daq bunmo giqemdaiqta na agununin haiqta teq ya daq na asor emsa mataw ibiyad in gigo ginad helta na awaz a hi meqniyidaq.²⁴ Nazaq iyan negmo gihol amomo anadin hi emiy. Haiqgam, ne gigo mataw ta asor na gilumsihgo haqad ne in ginadin emiyimo.

²⁵ Karuw bunmo maket-ib emiyta na ne zayeq tineq daqay. Teq ne karuw na tizaynan ne hi susumuniy. Luweq karuw edob bolta na ago ne susumuneq teq ne ginad meqniyidaq haqad ne giqezmo hiqiyeq zayeq neqiy.²⁶ Na ezaqgo, Og ka teq nagah bunmo ogib giqusayta na inaqla in Iyahta agota. *Buk Song 24.1*

²⁷ Mat Jesus anan helmo a hi haqaqta araq in ni didaq neqgo nililewunid ni ninad bilaqsun ni lehmo leh. Leheq in naga didaqin nigdaqta na ni neqad hi susumun. Luweq ni susumuneq ninad meqniyidaq.²⁸ Ari mat araq nab oseq era nibileneq bi-laqqdaq. Ka tamaz katiya akaruwun haqid teq ni mat na anadin emad karuw na ni hi neq. Ni mat na anadin a hi emadmo karuw na tineqid mat na nibiysa ni daq meqinta em nog iysa in tinibiyidaq.²⁹ Ta teq ne tamaz katiya akaruwun neqeq negmo giqem God ameb meqniysa ne loyin daqay

nazaq ya a hi bilaqaiq. Haiqgam. Luweq ne karuw na neqsa mat ananin bilamta naqmo in ne ginan meqin haqdaq haqad ne hi neqiy haqaiq.

Teq mat karuw ananin nazaq bilaqdaqta araq ya inaq humabub a hi osid ari ya inadibmo karuw na tineqdaiq. Doh haqad mat na a hi ossamo ya in anad muzinad karuw agununin haiqta na a hi neqdaiq? Haiqgam. Ya tineqdaiqta. ³⁰ Ya God esey ugeq teq karuw na neqsa ta nagaqgo mat araq ya inan meqin bilaqdaq? Didaq na ya God esey a hi ugimmo neqaiqta ye? ³¹ Nazaq iyan ne yuw uluw daqayta na teq ne didaq neq daqayta na teq kabiy daq bunmo ne em daqayta na ne God abin wazid eraqgo haqad ne emiy. ³² Ne Juda on mataw teq Grik on mataw teq God ago on mataw Krais ago nan huriyatya na bunmo ginadin emad ne gigo daq amalib ne in gigo araq diq wazid hi woqan. ³³ Daq ya emaiqta nazaqmo ne emiy. On mataw bunmo ya inan ginad dimniy daqay haqad ya emaiqta. Yaqmo ihol dimun tongo adanteqin ya a hi muzinaiqta. Haiqgam. Ya on mataw kabemmo gilumsihsa in kayeqmo kuluwa-kuluwmo os daqay haqad ya inad em hasimmo pc daq bunmo emaiqta.

11

¹ Nazaq iyan ya Krais asen muzinim daq emaiqta nazaqmo ne ya isen muzineq daq dimdimunta na ne emiy.

Pol in God ayon lotu emgo adan agamukan bilaqad teq in God ago Bugaw Dimunta ago naw amo amo ginan bilammo

*On gifaqin isihim teq God inaq gamuk
emayta na ago Pol bilam*

² Tutimmo ne ya inadin emad suleq bunmo ya negta na ne waz naqmo hiqiyim osayta. Nazaq iyan ya inad dimniysa ne gibin diq iluwaiq. ³ Teq suleq araq ne ginad em has daqayta na in kazaq. Mataw bunmo gifaqin na Krais-mo. Sa aw afaqin na in aduwmo. Ad Krais afaqin na God-mo. ⁴ Mat afaqin isihim God bulonaqta na in ago afaqin Krais mebay ugaqta. Ad nazaqmo in afaqin isihim God ago nantut bilaqad na in ago afaqin na mebay ugaqtamo. ⁵ Teq aw afaqin a hi isihim samanmo turad God bulonad in aduw mebay ugaqta. Ad in afaqin a hi isihim God ago nantut bilaqad na nazaqmo in ago afaqin na mebay ugaqtamo. Daq nawa na bilaqne in aqensan urot bugim afaqin ureqan mataw ahol waqad gime a hi bilaqaqta nazaq nog iyaq. ⁶ Nazaq iyan aw araq afaqin isihnan atuw hiqiysa teq in aqensan urot bugeq

mat nog iyan. Teq aw na aqensan urotid siqim diq iyid in amebay a hi woqdaq e? Ad in afaqin ureqid abigman ulal iyeq ussa mataw ahol waqad gituw a hi hiqiy daqay ye? Nazaq iyan aw na afaqin isiheq teq God inaq gamuk emsa mataw gime bilaqan.

⁷ God mat eman inmo nog gwahtiqim in God ago zaway teq abin dimunta na atowun nog iyim osaqlta. Nazaq iyan mat in afaqin a hi isihdaq. Ari aw in matmo abin dimunta atowun nog iyim osaqlta. ⁸ Na ezaqgo aw in mat alulin a haiqta. Haiqgam. Matmo in aw alulinta. ⁹ Ad God in aw anadin emad mat a hi amta. Haiqgam. In mat anadin emad aw amta. ¹⁰ Daq alulin nazaq iysa iyan on in mataw gihagenib osayta na atowun in gifaqin isih daqayta. Teq in angelo ginadin emad in nazaq em daqaytamo.

¹¹ Ta teq Iyahta ago dahu giduganib aw mat inaq giholbin giholbin iyim a hi osayta.

¹² Na ezaqgo mebmebmo diq aw in mat ahol asor amalib gwahtimta. An muran mat in nazaqmo aw agemab gwahtiqaqtamo. Teq God in on mataw bunmo gigo gilulin. ¹³ Negmo daq na ulum kemiy. Aw afaqin a hi isihim samanmo God bulonaqta na in daq dimunta ye? ¹⁴ I on mataw og kabta gigo daq kazaqmo usaqlta. Mat aqensan sisamqo on giqensan nog iysa mataw ahol waqad gime a hikidik bilaqayta. ¹⁵ Ad i ginad emauq. Aw aqensan sisapta na bilaqne in ago balaw dimunta afaqinib usaqlta haqauq. Na ezaqgo God inmo on gifaqin isihgo haqad giqensan sisamota na nagta. ¹⁶ Ari ne gigo araq gamuk kawa ya bilayta ka geg ugnan haqad in ya iquez ka huriit keman. Ya iyogniz nenaq i on gibilensa in gifaqin isihim teq God inaq gamuk emayta. Sa Krais ago on mataw gidauhan bunmo nazaqmo in dante amulik kaqmo muzinaytamo.

*Korin on mataw in Yesus anon anedan
inaq neqayta adan diq a hi muzin yaqay*

¹⁷ Ari muran ya gunun asor ne muzaqayta ka ago gibilenad ya ne gibin a hikidik iluwdaiq. Na ezaqgo tutimmo ne bo humab tuwolim osad ne an alowan a hi tonayta. Haiqgam. Ne an meqin tonayta. ¹⁸ Ne gigo daq meqinta ya dambel bilaqdaiqta na in kazaq. Ne Yesus ago dahuibta na ne bo in abinib humab tuwolim osad nab ne gihol huserim dahu amikmikta iyim giholbin giholbin osayta. Ya ne gibin meqinta nazaq huritim ya inad emaiq. Nabag helmo daqag haqaiq. ¹⁹ Nabag ne ginad emay, I kazaq gihol husereq giholbin iyeq ossa teg dahu doqag diqta God in ginan anad dimniyaqta na ulal tiqiydaq haqad ne nazaq emayta. ²⁰ Ne daq nazaq emsa iyan ne Iyahta anadin

emad adidaqin neqnan humab wolayta na le saman iyaqta.²¹ Na ezaqgo ne gigo humabub mataw asor hid naqmo didaq waqim neqsa ta asor gigem moqsa osayta. Sa asor yuw atoranta ayahmo uluwad gifaqin hulosayta.²² Ne gigo bit haiqgam daqag iyan ne God ago dauh ahumabni bolum nazaq didaq neqad yuw uluwayta. Ne nazaq God ago dauh gibin emid samanta iydaq e? Ne nazaq Yesus ago on mataw gina haiqta na mebay neg daqay ye? Ya naga gamukin gibilendaiq? Ne nazaq emsa ya ne gibin ulwdaiq e? Hikidik.

²³⁻²⁴ Na ezaqgo mebmebmo ya daq Iyahta ago hib wayta naqmo ya ne gibilenta. Mat Yesus waqeq bab gibenab emdaqta kam nab taromab Iyahta Yesus bret waqim God esey ugim teq in orgayim bilam, Ka ya inon ne giyon hulosdaiqta ham. Abeb ne kazaq emad ya inadin emiy ham.²⁵ Ad nazaqmo in didaq neqim hulosad in gog waqim emim bilam, Gog kab ya inedan God ago maror muturta na zaway ugdajta usaq ham. Abeb ne yuw ka uluw daqayta akamnib ne kazaq emad ya inadin emiy ham.²⁶ Iyahta nazaq bilaqan muran ne bret na neqad yuw na ne uluwad ne Iyahta i gemen momta na abin eman ulal tiqiyaq. Ne nazaq tuteqmo emad ossa teq in abin na mataw gimeb ulal iyeq ussa le in muleqeq ta boldaq.

I bunmo ginad em haseq teq Yesus anon anedan inaq nequq

²⁷ Daq alulin nazaq iysa iyan mat aw nog in Iyahta ago bret na teq in ago gog ayuwun inaq na a hi giwazinad neqeqmo in bilaqne Iyahta wol eman momta nog iyid daq na ago mebay in giholib tuqusdaq.²⁸ Nazaq iyan ne gigo daq ne emayta na ulum kemeq teq ne bret na neqad gog na ne uluwiy.²⁹ Mat nagah na a hi giwazinad neqad uluwaqta na in Iyahta anon na ahol a hi waq kemaqta. In nazaq emad in aholyon God ago faq hureqan aholib tubolaq.³⁰ Afaqan alulin naqmo ago ne gigo asor kabemmo moqad gigo zaway hiqiysa ta asor tumoqiyta.³¹ Ari i gihol ulum kemad daq wastitayeqmo emsa teq God i gilum kemeq ago faq a hi ig nagta.³² Teq Iyahta i gigo daq ulum kemad in i giwastitaynan haqad faq igaqta. In nazaq i giwastitayeq abeb in on mataw gileh ugiyta na giyon bilaqad gigo daq meqinta amenin negsa i nenaq a hi meqniyam haqad.

³³ Nazaq iyan ya imaqbaban, ne zip tonnan haqad bo humab tuwoleq osad mataw asor teqmo bolsa ne gibaq tuniy.³⁴ Ad mat agem moqaqta na abitabmo didaq neqeq teq in humab nab bolan. Ne nazaq emid teq ne gigo humab na God ameb dimunmo

iysa abeb ne ago afaqan araq a hi sor daqay.

Ari ya ne gigo hib leheq teq gamuk ka ago asor usaqta na tigibilen bugdaiq.

12

Pol Bugaw Dimunta ago naw amo amo ginan bilam

¹ Ari ya imaqbaban, muran ya Bugaw Dimunta ago naw amo amo ginan tibilaqnan. Luweq ne nagah na ago ginad a hi em has daqay haqad.² Kwaziqmo ne God abin a hi huritad osiyta kam nab mataw god katiya giqez haiqta nagan ginan gibilensa ne gimuzinad nenaq lehmo leh yaqayta. Na ago ne tuhuritiy.³ Nazaq iyan ya gamuk ka gibilensa ne ginad em hasiy. God ago Bugaw Dimunta mat araq aholib usad anad dimunta ugsa mat na bilaqdaq, "Yesus meqniyeq abin og kab hiqiyani" haqad in nazaq a hikidik bilaqdaq. Ad mataw ginadibmo Yesus anan 'Iyahta' nazaq in a hi bilaq daqaymo. Haiqgam. Mat aholib Bugaw Dimunta usad anad dimunta ugaqta naqmo in nazaq bilaqqaqta.

⁴ Bugaw Dimunta ago naw amo amo giqusaqta. Teq naw na bunmo anamren amulikmo Bugaw Dimunta osaqla.⁵ Sa Iyahta ago kabiyy amo amo mataw negsa in emayta. Teq kabiyy na bunmo anamren amulikmo Iyahtaqmo osaqla.⁶ Mataw gigo zaway amo amo amilib God ago kabiyy emayta. Sa God amulikmo naqmo in kabiyy na emgo azawayin mataw bunmo giholib emsa in amilib kabiyy amo amo na giqe-mayta.

⁷ Bugaw Dimunta Yesus ago on mataw bunmo giholib zaway emsa in an ulumsihad an dimun tongo osayta.⁸ Bugaw Dimunta in mat araq zaway ugsa in ago anad dimdimunta ago walmataw gibile-naqta. Teq Bugaw Dimunta amulik naqmo in mat ta araq zaway ugsa in God ago nagah amo amo alulin bilaqqaqta.⁹ Teq Bugaw naqmo mat ta araq zaway ugsa in God anan helmo diq haqqaqta. Ad Bugaw amulik naqmo mat ta araq zaway ugsa in mataw gigo moq inaqta na giwastitaysa dimniyayta.¹⁰ Teq mat ta araq zaway waqad in daq azawayin inaqta emaqta. Teq mat ta araq zaway na amilib God ago nantut bilaqqaqta. Teq mat ta araq bugaw amo amo gilum kemgo azawayin waqqaqta. Teq mat ta araq uliq amo amo gigo nan anadib bolsa in gamuk bilaqgo azawayin waqqaqta. Sa mat ta araq nan amo amo na huriteq bulyigo azawayin waqqaqta.¹¹ Naw na bunmo Bugaw amulik naqmo eman gwahtiqqaqta. In ago on mataw bunmo gilum kemad in naga nawun diq waq daqayta nazaqmo in negaqla.

I bunmo mat amulikmo ahol anaghan amo amo nog iyim osauqta

¹² Mat ahol in amulikmota. Teq in ahol na anaghan kabemmo. Ad in ahol anaghan amo amo kabemmo gicusayta na wastonim in mat ahol amulikmo iyayta. Sa Krais ago hib daq nazaq usaqtamo. ¹³ I Yesus abinib yuw huzaqta nab God ago Bugaw Dimunta amulikmo osaqta na in i bunmo giqeman i mat amulikmo ahol nog iyim osauqta. Juda mataw teq Grik mataw teq kabiliby mataw samanta teq og anamreniz ginadibmo samanmo luwayta na nenaq i bunmo God abenab Bugaw Dimunta amulikmo naqmo waqim i mat amulikmo tiqiya.

¹⁴ Na ezaqgo mat ahol anaghan in amulikmo a haiqta. In ahol anaghan kabemmo gicusayta. ¹⁵ Ari mat na asen bilaqdaq, Ya mat ka aben a haiq haqdaq. Nazaq iyan ya mat ka ahol asor a haiqta haqdaq. In nazaq bilaqdaqta teq in ago gamuk na helta a haiq. In mat na ahol asor iyeq tuqus tutdaq. ¹⁶ Teq mat na adeksan bilaqdaq, Ya mat ka ameqnagin a haiq haqdaq. Nazaq iyan ya mat ka ahol asor a haiqta haqdaq. In nazaq bilaqdaqta teq haiq. In mat na ahol asor iyeq tuqus tutdaqmo. ¹⁷ Mat na ahol bunmo ameqnagin amomo iyeq ezaq teq in gamuk huritdaq? Ad in ahol bunmo adeksan amomo iyeq ezaq teq nagah ahuran wolsa in huritdaq? ¹⁸ Teq mat ahol anaghan nazaq amulikmo iyim a hi gicusayta. Haiqgam. God inmo anad muzinim in mat ahol anaghan ezaq diq giqus daqayta nazaqmo in giqeman usayta. ¹⁹ Mat ahol anaghan bunmo in araqibmo iyeq kabi y amulik naqmo emad useq in mat ahol bunta nog a hi iy daqay. Haiqgam. In bilaqne mat ahol anaghan amulikmo nog iyeq giqus daqay. ²⁰ Teq mat ahol nazaq a hi usaqta. Haiqgam. Mat ahol anaghan amo amo kabemmo na an wastonim in bilaqne mat ahol bunta nog iyim gicusayta.

²¹ Teq mat ameqnagin in aben buloneq bilaqdaq, Ya ninan inad a hi bilaqsa ya imomo tuqusdaiq nazaq in a hi bilaqdaq. Ad mat na afaqin in asen buloneq bilaqdaq, Ya ninan inad a hi bilaqsa ya imomo tuqusdaiq nazaq in a hi bilaqdaqmo. ²² Haiqgam. I gihol anaghan asor giwaz meqin haiqta teq in i giholib hiqiyid i gihol bunmo dimunmo a hikidik usdaq. ²³ Ad i gihol anaghan asor gime a hi bilaqqaqta na i giwazinad gibalaw tonsa in gibin inaq nog iyayta. Teq i gihol anaghan amebay inaqta na i anonomo giqisihan in giwaqan dimun diq iyaqta. ²⁴ Sa i gihol anaghan asor amebay haiqta na i hulosan ulalab usayta. God anad emad in i gihol anaghan bunmo nazaq giqeman ussa asor gibin

haiqta na i ayahmo giwazinauqta. ²⁵ In daq nazaq eman i gihol anaghan haresmo milhesim lehim a hi gicusayta. Haiqgam. I gihol anaghan araqib an soqotim usad in an ulumsihad gicusayta. ²⁶ Nazaq iyan i gihol anaghan araq titiya i gihol bunmo titiyaqtamo. Sa i gihol anaghan araq abin dimunta waqsa i gihol anaghan bunmo inaqmo ginad dimniyyaytamo.

²⁷ Ne bunmo Krais anon nog iyim osad ne in ahol anaghan amo amo nog iyim osayta. ²⁸ Sa Yesus ago on mataw na gilikmanib God in mataw kazaqta gitowun eman osay. Danmeb in Aposel giqam. Gigerta na in mataw God ago nantut bilaq daqayta na giqam. Ad ezeqmanta na in mataw suleq bilaq daqayta na giqam. Ad teq ta araqmo in mataw daq azawayin inaq giqem daqayta na giqam. Ad teq in mataw gigo naw in mataw moqayta giwastitayta na giqam. Teq mataw in ta mataw asor gilumsih daqayta na in giqam. Teq in mataw marorta amo amo giqam. Teq mataw uliq amo amo gigo nan ginadib bolsa gamuk bilaqayta na in giqammo. ²⁹ Mataw bunmo Aposel iyim osayta ye? Mataw bunmo God ago nantut iyim osayta ye? Mataw bunmo on mataw suleq negad osayta ye? Mataw bunmo daq azawayin inaqta emayta ye? ³⁰ Mataw bunmo in mataw gigo moq wastitayta ye? Mataw bunmo uliq amo amo gigo nan ginadib bolsa gamuk bilaqayta ye? Mataw bunmo nan amo amo na huritim buliyayta ye? Na haiqgam. ³¹ Ari ne God ago naw na waqnan haqad teq ne naw aseseqta dimdimunta naqmo ne waqgo giwaz diq meqniyyiy. Teq ya Yesus ago on mataw gilumsihgo adanteqin danmeb diqta na ne tigiqishunnan.

13

I on mataw bunmo ginan ginad bilaqsa gilowan tonuq

¹ Ari uliq amo amo gigo nan inadib bolsa gamuk bilaqdaiqta ago anawun na ya iholib usdaqta. Teq ya angelo gigo nanib gamuk tibilaqdaiqmo. Naw nagan ya iholib usdaqta teq ya ta mataw ginan inad a hi bilaqsa ya gamuk amo amo na bilaqad ya bilaqne belo samanta wolayta ahulan teq zoq samanta iyayta ahulan nazaq nog ya tigiydaiq. ² Teq ya God ago nantut bilaqgo anawun ya iholib ussa ya nagah God ago hib ulilemim usaqta na teq nagah bun diqmo ago ya tuhurit kemdaiqta. Ad ya God anan helmo diq haqad garah araq bulonid in ago ban huloseq saw ta araqab le tuqosdaq. Ya mat nazaqta iyeq teq ya ta mataw ginan inad a hi bilaqsa ya God ameb mat saman diqta tigiydaiq. ³ Teq ya

mataw gina haiqta na yaqgo nagah bunmo tinegdaiq. Ad ya ibin iluweq bilaqdaiq, Ya God ago kabiy emad ihol nog hulosta haqdaiq. Ya mat nazaq diqta iyeq teq ya ta mataw ginan inad a hi bilaqsa yaqgo daq dimdimunta na a hi ilumsihdaq.

⁴ Mat in mataw bunmo ginan anad bilaqqa na in kiskismo osad ago walmataw a hi ginadaqta. In on mataw bunmo gilowan tonaqta. Teq in mataw gigo nagah kabemmo inaqla na ginan agem a hi meqniyaqta. Ad in ahol abin a hi iluwad in yaqmo ag a hi haqaqta. ⁵ Mat nazaqta girerey haresmo emad a hi luwaqta. Ad inmo ahol anadin diq a hi emad in agem hidmo a hi meqniyatqamo. Mataw in aholib daq meqinta emsa in na ago anadin a hi emad adek zizalaqta. ⁶ Teq mat nazaqta in mataw daq meqinta emsa gibiyad ame a hi bilaqqa. Ari mataw gamuk helta an bulonsa gibiyad in ginan anad diq dimniyaqta. ⁷ Mat mataw ginan anad bilaqqa na in afaqan sorad atuw a hi hiqiyaqta. Teq in God ago gamuk bunmo anan helmo haqaqta. Tutimmo in ahol bunmo God ago hib emad God teq dimun tondaqta na ago in baq tunim osaqta. Teq kam bunmo in awaz diq meqniyim afaqan sorad nan kabemmo a hi bilaqqa.

⁸ Mataw ginan ginad bilaqgo akaman na a hi hiqiydaq. Ari God ago nantut bilaqgo akaman tihiqiydaq. Sa mataw uliq amo amo gigo nan ginadib bolsa gamuk bilaqayta na giqez in tihiqiydaqmo. Teq mataw nagah bunmo ago ginad em hasayta na in ginad na akabiyan tihiqiydaqmo. ⁹ Na ezaqgo muran i God ago nagah asor asormo ago i huritauqta. Ad i God ago nantut bilaqauqta na i asor asormo bilaqauqta. ¹⁰ Ari abeb nagah bunmo tidimniy has daqayta kam nab i daq bunmo asor asormo a ta hi emam. Haiqgam. I daq bunmo anonon tiqem bugamta.

¹¹ Ya amunibmo osad ya amun gamuk em nog iyad yaqgo daq teq inad bunmo amun nogmo iyim usyaqta. Teq muran ya mat ayah tiqiyim ya onmin gigo daq na bunmo tuhulos bug. ¹² Muran i God ago nagah asor asormo ago tuhuritauqta. Bilaqne i galas-ib gihol asormo ahol waqaqta nazaq. Abeb nagah bunmo tidimniy has daqayta nab teq i God inaq an anobun ahol tuwaq kemamta. An anobun ahol waqad teq God i gigo tuhurit kemim osaqta nazaqmo i God ago tuhurit kemamtamo.

¹³ Ari muran daq aseseqta ezeqman ka tuqus tutdaqta. I God anan helmo haqaqta na teq God i gidimun tondaq haqad i amen emim osaqa na teq i mataw bunmo ginan ginad bilaqqa na, daq ezeqman ka in tuqus tutdaqta. Teq daq ezeqman na gilikmanib i mataw bunmo ginan

ginad bilaqqa naqmo in danmeb diq iyim usaqta.

14

Ne God ago nantut bilaqgo ginad diq bilaqan

¹ Ne mataw bunmo ginan ginad bilaqgo adan nawa ya tibilayta na muzinad teq ne Bugaw Dimunta ago naw na giwaqgo giwaz meqniyyiy. Ad naw amo amo na gilikmanib ne God ago nantut bilaqgo anawun naqmo ne waqgo ginad diq bilaqan. ² Na ezaqgo mat uliq amota gigo nan anadib bolsa bilaqqa na in gamuk na amalib inmo ago walmataw a hi gibilenaqta. Haiqgam. In gamuk na amalib God amomo bulon-aqta. Na ezaqgo mat nazaqta na in Bugaw Dimunta ago zawayib nan lul araq diqta na amalib God ago nagah ulilemba anan bilaqsa in ago walmataw na huritad ginad a hi em hasayta.

³ Ari mat God ago nantut bilaqqa na, in ago gamuk na amalib mataw gigem zaway negsa in gigo ginad helta na awaz meqniyaqta. Ad in mataw ginad meqniya osayta na ginad waqsa in ginad dimniyaqta. ⁴ Mat uliq ta asor gigo nan anadib bolsa bilaqqa na inmo agem zaway ugaqta. Ari mat God ago nantut bilaqqa na in Yesus ago on mataw bunmo gigem zaway negaqa. ⁵ Ne bunmo uliq ta asor gigo nanib gamuk bilaqgo ya inad bilaqqa. Teq ya inad ayah diqta ne God ago nantut bilaq nagiy haqaiq. Mat God ago nantut bilaqqa na in on mataw ayahmo gilumsihaqta. Sa mat uliq ta asor gigo nan anadib bolsa bilaqqa na in amomo ahol ulumsihaqta. Ari mat araq oseq nan lul araqta na bulyeq Yesus ago on mataw bunmo gibilensa nab teq mat nan lul araq bilaqqa na in ago walmataw ayahmo tigilumsihdaqmo.

⁶ Ya imaqbaban, ne ginad em hasiy. Ya ne gigo hib leheq uliq amota gigo nan inadib bolsa ya gibilenad ezaq teq yaqgo gamuk na ne gilumsihdaq? Haiqgam. Ya ne gilumsihaq teq ya God ago gamuk alulin araq God iqisihunta naqmo ya gibilendaq. Teq ya God ago nagah asor ago inad em hasta agamukan araq o God ago nantut agamukan araq o God ago suleq agamukan araq ya ne gibilendaq. ⁷ Ne kadug ayow gita inaq ginadin emiy. Nagah giger na kayeq a hi usayta. Teq mat kadug anonon a hi ulamsa on mataw ezaq teq bar ago ginad em has daqay? Ad mat gita ago akabananan diq a hi muzinad wolsa on mataw bar anatan ezaq teq hurit daqay? ⁸ Ad mat zoq iyaqta na in babzoq anonon a hi iyid nog teq bab emgo ahol wastitaydaq? Na haiqgam.

⁹ Daq nazaqta ne gigo hib usaqmo. Ne uliq ta asor gigo nanib ne gigo walmataw gibilensa ezaq teq in ne gigo gamuk na alulin hurit kem daqay? Ne gigo gamuk na ne saman diqta bilaq daqay. ¹⁰ Helmo og kab mataw gigo nan amo amo giqusayta. Ad nan amo amo na ginamreniz in gimi gimo gigo gamuk huritim ginad em hasayta. ¹¹ Ta teq mat araq inmo ago nanib gamuk ibilensa ya huritad inad a hi em haseq teq ya in anan bilaqdaiq. Mat ko asen tob bolta haqdaiq. Sa in ya iloyinsa ya in ago hib nazaqmo isen tob bolta nog iydaiqmo. ¹² Ad luweq ne gilikmanib daq nazaqmo gwahtiqaq. Nazaq iyan ne Bugaw Dimunta ago naw giwaqnan ginad diq bilaqsa iyan ne naw Yesus ago on mataw giqemid in ginad em hasad zaway iyeq tur daqayta anawun naqmo giwaqgo ne God susumun ugyi.

Yesus ago on mataw uliq amo amo gigo nan ginadib bolsa bilaqayta na ago adan agamukan

¹³ Daq alulin naqmo ago mat uliq ta asor gigo nan anadib bolsa bilaqatna na in ago gamuk na buliyeq ago walmataw gibilengo anawun inaqmo waqgo haqad in God susumun ugan. ¹⁴ Ne ginad emiy. Ya uliq amota gigo nanib God bulonad ya naga gamukin diq bilaqaiqta na ago ya inad a hi em hasaiqta. Na ezaqgo ya iwitanmo God inaq gamuk emaq. ¹⁵ Nazaq iyid teq ya ezaq tondaiq? Ya iwitan God inaq gamuk emsa ya inad em hasnan inad bilaqaq. Ad nazaqmo ya iwitan God abin iluwad amen bar wazsa ya inad em hasnan inad bilaqaqmo.

¹⁶ Ari ni niwitanmo God esey ugsa ta ni nisan a hi huritsa mat araq ningi daq a hi loyinta na in ni niqezab gamuk gwahtiqaqta na huritad in anad a hi em hasdaqmo. Anad a hi em haseq ezaq teq in ningi gamuk na ulumsihad 'hel diqtaqmo' tihaqdaq? In ningi gamuk na huriteq anad a hi em hasad in 'hel diqtaqmo' a hi nemdaq. ¹⁷ Nazaq iyan ni gamuk dimunta amalib God esey ugsa ta mat araq na anad a hi em hasad oseq in ago anad helta na samanmo usad awaz a hi meqnイヤq. ¹⁸ Ya ne giquriyamim uliq ta asor gigo nan ya inadib bolsa sirisirimo ya God bulonaiqta. God naw na ya yagan ya esey diq ugaiqta. ¹⁹ Ta teq ya Yesus ago on mataw nenaq humab woleq ya in gimeb eraeq uliq ta asor gigo nanib God inaq gamuk sisaqmo bilaqnan ituw hiqiyaq. Na ezaqgo ya naga gamukin bilaqaiqta na in ginad a hi em daqay. Ari ya humab nab eraeq suleq agamukan asitmoqmo bilaqnan ya inad diq bilaqaq. Na ezaqgo ya inad emad gamuk

na bilaqsa mataw na huriteq ginad em hasdaqayta na ago iyan.

²⁰ Ya imaqbaban, ne onmin ginad em nog hi iyiy. Haiqgam. Ne kazaq ginad emad osiy. Mataw aseseqta ginad em hasim daq emaya nazaq ne ginad emiy. Ad amun sositla daq meqinta emgo anad a hi emaqta nazaq nog ne ginad usammo. ²¹ God ago maror Moses mar tonta na aduganib Iyatha in kazaq bilam,

Ya mataw gisen tob bolta na giqemid in giqezab nan amo amo gwahtiqa in yaqgo on mataw ka yaqgo gamuk tindegdaiq ham. Teq yaqgo on mataw na gihol a hi ritensa in ya iquez na huritna gituw hiqiy daqay ham.
Aisaya 28.11-12

²² Nazaq iyan uliq ta asor gigo nanib gamuk bilaqgo anawun na in on mataw Yesus anan helmo a hi haqayta naqmo gilumsihgo usaqta. Nan lul araq diqta na ne giqezab gwahtiqa God in mataw asan banta na ago zaway giqishunaqta. Naw naway na in Yesus ago on mataw gilumsihgo a hi usaqta. Ari God ago nantut bilaqgo anawun na in Yesus ago on matawt gimen usaqta. Na in mataw Yesus anan helmo a hi haqayta na guyon a haiqta.

²³ Nazaq iyan ne Yesus ago on matawt na, ne bo humab woleq tugosad teq luweq ne bunmo eraeq uliq amo amo gigo nan ginadib bolsa tibilaq daqay. Bilaqsa mataw ne gigo daq a hi loyiniya na teq mataw Yesus anan helmo a hi haqayta na in ne gibliyad bilaq daqay, Ne gifaqin hulosim agadan tiqiyi daqag haq daqay. ²⁴ Ari ne gigo humab nab ne bunmo God ago nantut bilaqsa mat Yesus anan helmo a hi haqqaqta na teq mat ne gigo daq a hi loyinta na in ne nenaq osad ne gigo gamuk na bunmo tuhurit daqay. Huritsa ne gigo gamuk bunmo in mataw na gilum kemsä in gigo daq meqinta na ago gihol tiloyin kem daqay. ²⁵ Ad in ginad bunmo ulilemim gigemab usaqta na ulal tiqiy bugsa in gihol hulosid ogib woqeq usad in God abin iluwad bilaq daqay, Helmo God ne gilikmanib nenaq osaqta haq daqay.

Lotu aduganib daq bunmo titnoneqmo lehan

²⁶ Nazaq iyan ya imaqbaban, ne teq ezaq ton daqay? Ne lotu tiqemnan haqad bo humab woleq osad ne daq kazaq emiy. Mat araq lotu ago bar ginadin emsa gwahtiqaq. Sa araq suleq agamukan anadin emeq bilaqan. Sa araq gamuk alulin God isihunta araq bilaqan. Sa araq uliq amota gigo nan anadib bolsa bilaqan. Sa araq gamuk na buliyeq walmataw gibilenan. Teq ne lotu akabiyan nagan bunmo emad ne Yesus ago on mataw gigem zaway neggo haqad

ne emiy. ²⁷ Nazaq emad ne gigo mataw kabemmo uliq ta asor gigo nan ginadib bolsa in hi bilaqiy. In giger ezeqman nazaq amulik-mulikmo eraqeqla bilaqsa ta bunmo giqez hiqiyed osiy. Sa mat araq in giqez na bulyeq walmataw gibilenammo. ²⁸ Ari mat gamuk bulyydaqta araq a hi osid teq mat uliq amota gigo nanib gamuk bilaqdaqta na in Yesus ago on mataw gilikmanib tok nemeq osad inmo ahol kiskismo bulonad God inaq gamuk eman.

²⁹ Teq mataw God ago nantut bilaqayta giger ezeqman nazaq eraqeqla gamuk bilaqsa walmataw bunmo in gigo gamuk na ulum kemyi. ³⁰ Teq mat araq eraqeqla God ago nantut tibilaqsa ta God in ago gamuk alulin araq mat araq isihunid mat bilaqdaqta na aqez wasihad in araq na ban ugsa bilaqan. ³¹ Ne dante dimunta na muzinad teq ne bunmo ban inaq iyeq God ago nantut ginadib bolaqta na tibilaq daqay. Bilaqsa on mataw bunmo soleq dimunta na huritad in gigem zaway tiqiydaq. ³² Mataw God ago nantut bilaqgo anawun giholib usaqta na in gigo naw na anononmo tuwamuz daqay. Naw na in mataw na ginad a hi wamuzdaq. ³³⁻³⁴ Na ezaqgo God in mataw giqeman ginad agadan iysa garak ayahmo a hi emayta. In mataw giqeman gigem kute nemsia in wastitayimmo osayta.

Ari uliq bunmo God ago on mataw tawonta na gidauhan bunmo in lotu tiqemnan haqad bo humab tuwolim ossa in gigo on giqezmo hiqiyim osayta. Nazaq iyan ne gunun na tumuzin daqaymo. Ne on giwasihid in eraqeqla ne gigo humab aduganib gamuk hi bilaqiy. In mataw gihagenibmo iyeq osiy, God ago maror Moses mar tonta bilamta nazaq. ³⁵ Teq in gamuk araq alulin huritan haqad in gribitab leheq teq gidugnizmo susumun negeq hurit kemyi. Na ezaqgo Yesus ago on mataw in abinib humab wolsa aw eraqeqla mataw bunmo gimeb gamuk bilaqdaqta na in daq amebay inaqta.

³⁶ God ago gamuk in ne Korin gimomo gigo a haiqta. In ne gigo hib danmeh a hi gwahtimta. Teq in og kab gwahtiqim ne gimomo gigo hib a hi lahtamo. Nazaq iyan ya gunun kagan gibilensa ne geg hi yagi. ³⁷ Mat aw nog in God ago nantut bilaqdaqta amatin diqta iyeq teq in yaqgo gamuk ka huriteq ginad emeq bilaq daqay, Gamuk nawa na Pol anadibmo a hi bilamta haq daqay. Iyahtaqla bulonan in i gunun na gibilenaq haq daqay. Teq mataw bunmo giholib God ago naw usaqta na in ginad nazaq tiqem daqaymo. ³⁸ Ari mat araq gamuk ka gileh ugsa ne mat na gileh ugymo.

³⁹ Nazaq iyan ya imaqbaban, ne God ago nantut bilaqgo anawun waqgo giwaz diq

meqniyyi. Sa ne gigo asor uliq amo amo gigo nan ginadib bolsa ne hi giwasihiyom. ⁴⁰ Teq daq ayah diqta ne em daqayta na in kazaq. Ne gigo lotu aduganib kabiy daq bunmo wizwazeqmo emsa in titnoneqmo lehan.

On mataw tumoqiyta na teq tiqeraq daqay

15

Krais moqim teq ta eram

¹ Ya imaqbaban, ne Yesus awagamun dimunta na anadin a ta em daqay haqad ya kazaq ne tigibilennan. Wagam dimunta na ya mebmebmo lehim ne gibilenan ne waqim amalib giwaz diq meqniyim tituray. ² Ad ne Yesus awagamun dimunta ya gibilenta na waz naqmo hiqiyid teq God ne giilumsiheq tigiwaqdaq. Ari ne wagam na bunmo a hi waz bugid teq ne Yesus anan helmo haqayta na le saman tiqiydaq.

³ Teq ya Krais ago hib gamuk ayah diqta waqim gibilenta na in kazaq. Krais i gigo daq meqinta na bunmo giwalemnar haqad in momta, God ago mar bilamta nazaq. ⁴ Moqan in hodhodab tiyay toniy. Yay tonan kam ezeqmanta nab God hodhodab wazan ta eram, God ago mar bilamta nazaq. ⁵ Hodhodab eraqim danmeh in Pita ameb gwahtim. Gwahtiqim teq in ago disaipel ta asor na bunmo gimeb gwahtim. ⁶ Ad abeb in i gimaqbaban kabemmo diq 500 uriyamita nazaq gimeb gwahtiqan in araqibmo ahol waqiy. Mataw na gigo asor kabemmo muran os tutsa asormo tumoqiy. ⁷ An teq in Jems ameb gwahtiqim teq in Aposel bunmo gimeb gwahtimmo.

⁸ An abeb diq in yaqmo imeb gwahtimtamo. Bilaqne aw amun emnan haqad ago kam ulum riyawunim in kam asor a ta osim teq amun emaqta nazaq. ⁹ Nazaq iyan Aposel bunmo gilikmanib ya ihol abin amik diqta. Ya ibin Aposel a hi us nagta usaq. Na ezaqgo kwaziqmo ya God ago on mataw Yesus ago nan huritayta na gimuzad gimeqin diq tonyaiqta na ago. ¹⁰ Ta teq God agem dimunta yagan ya kawa ibin tidimniyim osaiqta kazaq ya tuqos tutaiq. Ad God agem dimunta yagta na le saman a hi iy. Haiqgam. Ya Aposel bunmo giqiriyameq kabiy atoran diqmo emyaiqta. Teq yaqmo igo zawayib kabiy na a hi emyaiq. God agem dimunta yagad ago zaway yagsa ya kabiy emyaiqta. ¹¹ Ari teq yaqmo Yesus awagamun dimunta ne gibilenta ohaiq Aposel ta asor na gibileniya na ago i ananin kabemmo hi bilaquq. I bunmo wagam amulikmo Yesus moqim teq hodhodab ta eramta na ago i bilaqauqta. Bilaqsa ne wagam amulik naqmo huritim anan helmo haqiyta.

Abeb on mataw tumoqiyta na bunmo hodhodab ta eraq daqayta

¹² Ari mataw Yesus hodhodab eramta na awagamun bilaqsa ta nagaqgo ne gilikmanib mataw asor bilaqay, I moqe q a ta hi eraqam haqayta? ¹³ On mataw tumoqiyta hodhodab a hi eraq daqayta iyid, God in Krais hodhodab wazid a hi eraq nagtamo. ¹⁴ Teq God Krais hodhodab wazan a hi eramta iyid i Yesus awagamun gibilenta na alulin haiq iy nagmo. Sa ne wagam na huriitim anan helmo haqiyta na in samanta alulin haiqta tiqiy nagmo.

¹⁵ Teq ta nagah araqmo. I Aposel bilaqauq, God Krais wazan eraqan i gimeh ahol tuwawta haqauq. Ari God mataw tumoqiyta giwazid a hi eraq daqayta iyid in Krais wazid a hi eraq nagmo. Sa i bilaqauq, I Krais ahol tuwaw haqauqta na i katiyad God daq a hi amta na i anan in tiqam haq nag. ¹⁶ Na ezaqgo God mataw tumoqiyta na giwazid a hi eraq daqayta iyid, in Krais wazid a hi eraq nagmo.

¹⁷ Teq God Krais wazan a hi eramta iyid ne ginad helmo haqayta na in ne a hi gilumsih nag. Ad ne gigo daq meqinta amebay na ne giholib tuqus tut nag. ¹⁸ Us tutsa ne gigo asor Yesus anan helmo haqad osim moqiyta na in nabagag timeqniyad os nagiy. ¹⁹ I og kab kayeqmo osad ginad emauq, God Krais amalib i tigidimum tondaq haqad i baq tunim osauqta. Ari God Krais wazan a hi eramta iyid i moqe q tiliqiy nag. Ad i a hi moqad i gihol kat ugad saman diqmo God amen emeq os nag. Ossa mataw i gibiyat bilaq nagiy. On mataw bunmo gilikmanib mataw koqmo gihol kat ugad ossa i ginad diq negaq haq nagiy.

²⁰ Teq in nazaq a haiq. Helmo diq Krais moqan God wazan ta eramta. Mataw tumoqiyta na gilikmanib Krais danmehmo diq eraqim kayeqmo osaqta. Bilaqne mat ago kabi yame waqaqta nazaq nog God Krais wazan in danmeh eramta. ²¹ Na ezaqgo matmo araq on mataw gimen dan eman in bunmo moqayta. Nazaq iyan mat ta araqmo on mataw gimen dante wastitayan in hodhodab eraqe q kayeqmo kuluwa-kuluwmo tuqos daqayta. ²² Na in kazaq. Adam asenlul bunmo moqayta. Sa Krais asenlul bunmo hodhodab eraqe q kayeqmo kuluwa-kuluwmo os daqayta. ²³ Teq on mataw bunmo garabmo diq a hi eraq daqay. Krais dammeh tigeramta. An in ta boldaqta nab teq in asenlul bunmo tiqeraq daqaymo.

²⁴ Eraqid nab teq og kab nagah bunmo giqusayta na gikaman tiliqiydaq. Kam nab Krais in mataw marorta gibin inaq iyim nagah bunmo giwamuzad osayta na bunmo giwazid woqsa in gigo zaway tiliqiy bugidaq. Hiqiy bugid teq Krais ago maror

in wazaqta na in Amam God tuqugdaq. ²⁵ Muran Krais maror iyim osad in ago bab bunmo giwazid woq bugid nab teq in og ka wamuzgo agwatuqin in wazim osaqta na eronid Amam abenab tilehdaq. ²⁶ Lehid teq Krais ago bab abebtanta in meqin tonid hiqiydaqta na moqmo. ²⁷ God ago marib gamuk araq kazaq bilam, God nagah bunmo giqeman in ahaqenib giqusayta ham. *Buk Song 8.6*

Teq gamuk na bilam “nagah bunmo in ahaqenib giqusayta” hamta na i huriitim ginad emauq, God nagah nagan bunmo giqeman in Atatin Krais ahaqenib iysa inmo ahol eman Atatin ahaqenib a hi iyaqta haqauq. ²⁸ God teq nagah bunmo giqemid Atatin ahaqenib tiqiy daqayta. In nagah bunmo giqemid Atatin ahaqenib tiqiy bugid nab teq in Atatin na inmo ahol emid God ahaqenib tiqiydaqmo. Iyid teq kam nab God in nagah bun diqmo gigo Iyahta iyeq tuqosdaq.

²⁹ Ne ginad emiy. Mataw asor in giogniz yuw a hi huzimmo moqiyta na gigo ban waqim in gibinib yuw huzayta. Ari mataw tumoqiyta na a hi eraq daqayta iyid nagaqgo in giyogniz daq na emayta? In daq na samanta em nagiy. ³⁰ Teq i moqe q a hi eraqamta iyid ta ezaq haqad tutimmo i bab giteb God ago kabi y emad luwauqta? ³¹ Ya imaqbaban, ya negmo gigo hib ibin nazaq waqim bilaqaiqta. Ne yaqgo tuhuritiy. Ya le ne gigo hib kabi y emad ya bab gitebmo diq kabi y na emyaiqta. Teq yaqmo igo zawayib ya kabi y a hi emta. Haiqgam. I gigo Iyahta Krais Yesusmo zaway yagsa ya nazaq emyaiq. Nazaq iyan ya bilaqaiq. Kam bunmo ya moqgo tow waqim luwaiqta haqaiq. ³² Teq ya og kab yaqmo ihol ulumsiheq dimunmo osnan haqad kabi y emaiqta iyid nagaqgo ya uliq Efesus-ib karuw kwasikta na ginaq an wolta? On mataw tumoqiyta na a hi eraq daqayta iyid nagaqgo i afaqan nazaqta sorauqta? I gamuk araq mataw asor bilaqad luwuya nazaqmo i em nagta. Gamuk na bilam,

Babeq i moqe q i ginad dimniysa osamta akaman tiliqiydaq ham. Nazaq iyan muran i ginad dimniysa didaq neqad yuw uluwad osuq ham. *Aisaya 22.13*

³³ Teq ne mataw ginad katiyta nawa bilaqayta na hi muziniy. Ad ne gamuk araq mataw bilaqad luwuya kaqmo ne anadin emiy. Gamuk na bilam, Mat dimunta mataw meqmeqinta nenaq luwad in gigo daq meqinta na in tiqemdaqmo ham.

³⁴ Ne ginad agadanta na hulosad ne ginad dimunta a ta waqad ne gihol anononmo wamuzad osiy. Osad ne gamuk katiyta na hulosad daq meqinta na a ta hi emiy.

Nagaqgo ya kazaq bilaqaiq? Ne gigo mataw asor God ago a hi huriit kemim in gamuk katiyta mataw hodhodab a hi eraq daqayta na ago bilaqsa iyan ya kazaq ne gibilenaiq. Gibilensa ne na ago gimebay a hi woqaq e?

I hodhodab eraqe q gisan lul araq diqta waqam

³⁵ Ari ne gigo mat araq kazaq susumuneq bilaqdaq, God ezaq teq on mataw tumoqiyta na giwazid hodhodab eraq daqay? haqdaq. Teq in eraqe q gisan mutura ezaq diqta waq daqay? haqdaq. ³⁶ Ni agadan hi iy. Ni didaq amagin kabiyyab leyaqta na in og aduganib moq nog iyim usim teq a in kayeq ta iyaqta. ³⁷ Ni wit anagin teq didaq asor amagin kabiyyab tileyad ni anon waqe q neqdaqta nazaq nog ni a hi leyaqta. Haiqgam. Ni didaq na amaginmo leyaqta. ³⁸ Leyan teq God inmo didaq amagin na anon negaqla. Didaq amagin bunmo anon ezaq giqemeq us daqayta na God-mo in gitowun tiqamtta. ³⁹ Nazaq iyan nagah bunmo kayeqmo og kab luwayta na gisan awaqaq araqib a haiqta. Mataw gisan awaqaq lul araqta. Sa karuw gisan awaqaq lul araqta. Sa ah gisan awaqaq lul araq iysa nabiq gisan awaqaq lul araqtamo. ⁴⁰ Nagah bunmo kaitab ulilip oyad turayta na gihol lul araq inaqla. Sa nagah bunmo og kab giqusuyaq nagan gihol lul araq inaqtamo. Teq nagah kaitab ulilip turayta na gihol awaqaq in araq. Sa nagah ogibta na gihol awaqaq in araqmo. ⁴¹ Zeq ahol awaqaq araq iysa ta kalam ahol awaqaq araq iyaq. Sa ulig gihol awaqaq araq iyaqmo. Teq ulig bunmo gihol awaqaq araqib a haiqmo. In giholbin amulik-mulikmo turad in gihol awaqaq nazaqmo araq araq iyaqtamo.

⁴² Teq mataw hodhodab eraq daqayta na gigo hib daq nazaq tugwahtiqaqmo. I gisan a le yay tonayta na lilihim meqniyaqta. Teq i gisan eraqdaqta na a hi lilihdqta. ⁴³ I gisan a le yay tonayta na abin meqinta. Teq i gisan eraqdaqta na abin dimun diqta. I gisan yay tonayta na ago zaway haiqta. Teq i gisan eraqdaqta na ago zaway inaqla. ⁴⁴ I gisan yay tonayta na in og ka agota. Teq i gisan eraqdaqta na in Heven agota.

Ok ga ago gisanta inaqla. Sa Heven ago gisanta inaqtamo. ⁴⁵ God ago marib gamuk araq kazaq bilam,

God in mat aqenta Adam eman in kayeq iyim osta ham. *Jenesis 2.7*

Ari God in Adam ta araq abeb gwah-timta na eman in ago Bugaw Dimunta amalib on mataw giqeman kayeq iyim osayta. ⁴⁶ Teq os dimunta i giwitan kuluwmo Heven-ib osamta na i danmеб a hi waqauqta. I gisan diq waqim og kab osauqta naqmo i danmеб waqauqta. Waqim

osim abeb teq i os lul araq diqta na waqe q i giwitan kayeqmo kuluwa-kuluwmo osamta. ⁴⁷ God og waqim amalib Adam danmepta na eman gwahtimta. Ari Adam gigerta na in Heven-ib osim gehitimta. ⁴⁸ On mataw og kabta bunmo in mat aqenta og amalib amta naqmo nogta. Ad nazaqmo mataw Heven-ib osayta nagan in mat Heven-ib osim gewomta na nogmo iyayta. ⁴⁹ Nazaq iyan i gihol awaqaq mat aqenta og amalib amta na awaqaq nog iyim osaugta nazaqmo teq i gihol mat Heven-ib osim gewomta na ahol awaqaq nog iyeq tuqosamtamo.

⁵⁰ Ya kazaq gibilensa ne ginad emay ye? Mat asan ogibta na Heven-ib leheq in God ago maror aduganib a hi gwahtiqdaqta. Ad in asan osim moqaqta na le os dimunta tuteqmo os daqayta nab gwah-tiqeq kuluwa-kuluwmo a hi osdaqtamo. ⁵¹ Ne gidek emeq gamuk araq ulilemim usta ka ya bilaqsa ne hurity. I bunmo a hi moqamta. Ta teq i bunmo gisan buliyeq lul araq diq iyaqta. ⁵² Nagah na nan saw haiq hid naqmo taur abebtanta gayonsamo tugwahtiqaq. Taur na gayonid on mataw tumoqiyta na eraqe q gisan a hi lilihdqta na waqsa i bunmo gisan tubuliydqmo. ⁵³ I gisan lilihaqta ka buliyeq a hi lilihdqta tiqiydaq. Ad i gisan moqaqta ka buliyeq a hi moqdaqta tiqiydqmo. ⁵⁴ I gisan buliyeq nazaq diq iysa kam nab daq na God ago marib gamuk araq usaqta ka tuwol net bugdaq. Gamuk na bilam,

God bab bunmo giquriyamim in moq inaqmo eman thihiqy ham. *Aisaya 25.8*

⁵⁵ Moq ni mataw ginol emid moqgo azawayin edowa? ham. Ad ningi em ni amalib mataw gilum eman moqayta na ni edob eman usaq? ham. *Hosea 13.14*

⁵⁶ Moq ago em na in daq meqinta naqmo. Sa daq meqinta ago zaway alulin God ago maror Moses bilamta nab usaqta. ⁵⁷ Teq i God esey diq uguq. In i gigo Iyahta Yesus Krais ago zaway amalib i giqeman i bab bunmo giquriyamaqta. ⁵⁸ Nazaq iyan ya imaqbaban dimunta, ne giwaz meqniyeq tursa mataw katiyta bo ne gilum waqad hi giqothasiy. Ad ne ginad kazaq emiy. I Iyahta ago kabiyy emauqta ka in le samanta a hi iydq haqiq. Haqad ne gihol bunmo Iyahta ago kabiyy ugad ne giholtuq diq bulad kabiyy na emiy.

**Pol kabiyy asor emnan anad
emyaqla na ago in bilam**

16

Pol in Krais ago on mataw Jerusalem-ub osayta na gimen mani emid lehgo bilam

¹ Ari ne God ago on mataw tawonta uliq Jerusalem-ub osayta na gimen mani humab wol daqayta na ago ya ne tigibilennan. Ya saw Galesiya-ib Yesus ago on mataw gidauhan bunmo gibilenta nazaq ne em daqaymo haqad ya ne gibilenaiq. ² Sande bunmo ne kazaq emiy. Mataw amulik-mulikmo in kabiy emim mani waqiyta na ago asor uroteq in gimi gimo gigo bitab mataw gina haiqta na giyon emid usan. Ne Sande bunmo daq nazaq emsa teq mani na kabemmo iyeq usan. Ussa ya ne gigo hib lehdaiqta nab ne mani a ta hi nagun daqay. ³ Teq ya le ne gigo hib tugwahtiqdaiqta nab ne mataw asor gabin dimunta gitowun tiqem daqay. Emid teq in mani a leh daqayta na ananin ya sansandekib mar toneq negad giqemid in naw na ad Jerusalem-ub tileh daqay. ⁴ Ari ya nenaq lehnan inad bilaqid teq ya in nenaq araqib i tileham.

Pol uliq Korin on mataw na gibiyman bilam

⁵ Teq danmeb ya le Yesus ago on mataw saw Masedoniya-ib osayta na gibiyeq gibiyeq lehad luweq teq ya le uliq Korin-ib ne tigibiydaiqmo. ⁶ Ya le ne nenaq asit sisaq nog osdaiq daqag. Ossa urom akaman tihiqiyid teq ya ne gihuloseq lehdaiqya haqad inad emaiq. Na ezaqgo ya nenaq oseq uliq araqab lehnan tonsa ne ya ilumsiheq nagah asor yagid teq ya lehdaiqta na ago iyan. ⁷ Daq alulin nazaq iysa iyan muran ya saw Masedoniya-ib lehad ya le ne nenaq asitmoqmo osnan inad a hi bilaqaq. Iyahta anad bilaqsun ya Masedoniya-ib leheq ihol buliyeq ta bolad teq ya le ne nenaq sisagma tuqosdaiq haqad ya inad emaiqta. ⁸ Teq ya saw Masedoniya-ib hidmo a hi lehdaiq. Ya uliq Efesus-ib kab osad Pentikos ago kam ayahta na ahol waqeq teq lehdaiq haqad ya inad emaiq. ⁹ Na ezaqgo God uliq kab yaqmen dante em yagan ya in ago kabiy emsa anon kabemmo diq tugwahtiqaqta na ago. Teq mataw kabemmo yaqgo kabiy na geg ugaytamo.

¹⁰ Ari Timoti le ne gigo hib gwahtiqid ne allowan tonsa in nagah araq anan hi rabad agem kute nemsa osan. Ya Iyahta ago kabiy emaiqta nazaqmo in kabiy emaq-tamo. ¹¹ Nazaq iyan ne gigo araq mat na hikidik baymuzan. Ad in muleqeq yaqgo hib ta bolsa ne ulumsihid in agem kiskistab yaqgo hib bolan. In i gigo maqbab asor nenaq boldaq haqad ya kawa in gibaq tunim osaита. ¹² Ari i gimaqbab Apolos anan ya kazaq ne gigo hib lehgo ya ime kabemmo bulonta. Bulonan in muran ne gigo hib lehnan anad a hi bilaqaq. Teq

abeb in dante dimunta inaq iyeq in ne gigo hib nawa tilehdaq.

Pol ago gamuk ta asor bilamta

¹³ Ne gihol asawan woltayad ginad helta na waz naqmo hiqiyeq osiy. Ad ne giwaz meqniyeq turad nagah araq hi rabuniy.

¹⁴ Teq ne gigo kabiy daq bunmo ne emayta na ne God teq on mataw bunmo ginad bilagaqsa ne emiy.

¹⁵⁻¹⁶ Ya imaqbaban, Stefanus asenlul ne naq saw Akaya-ib on mataw bunmo gilikmanib in danmeb Krais anan helmo haqiyya. Na ago ne tuhuritiy. In God ago on mataw tawonta na gilumsihnan haqad gimen kabiy emad in gihol bunmo kabiy nab eman lehaqta. Nazaq iyan ya imaqbaban, ya ne atoranmo kazaq gibilendaq. Ne mataw na gihagenib iyeq gilumsihiy. Ad mataw na giyogniz giholtuw bulad nenaq kabiy araqibmo emayta na bunmo inaqmo ne giwazinad gihagenib iyeq in bunmo gilumsihymo. ¹⁷ Teq ne gigo mataw ezeqman Stefanus, Fortunatus, teq Akaikus in yaqgo hib bolan ya gibiyad inad diq dimniy. Ya ne bunmo gibiy nagta na amenin ya in gibiyim igem tidimniyaq. ¹⁸ Na ezaqgo mataw na ne gigem eman hastitayan ne zaway muturta waqiyta nazaq in bolim ya igem eman ti-hastitaymo. Nazaq iyan ne mataw nazaqta giwazinad giben iluwiy.

¹⁹ Saw Esiya-ib Yesus ago on mataw gidauhan bunmo in gigo zeq dimun eman ne gigo hib nawa lehaq. Ad Akwila awe Prisila inaq teq Yesus ago on mataw in giger gigo bitab humab wolayta na bunmo nenaq in ne ginan ginad diq dimniya Iyahta abinib in gigo zeq dimun nawa ne gimen eman lehaqmo. ²⁰ Sa i gigo gimaqbaban kab osayta na bunmo in gigo zeq dimun eman ne gigo hib nawa lehaqmo. Ari God ago on mataw gigo daq titnonta na amalib ne an zeq dimun ugiy.

²¹ Yaqmo Pol, ya ibenab yaqgo zeq dimun kawa tumar tonaiq.

²² Ari mat aw nog Iyahta anan ginad a hi bilaqaqta na God kusluw negid in meqniy haseq osiy.

Iyahta ni bolmo bol.

²³ Ari i gigo Iyahta Yesus agem dimunta negsa ne osiy.

²⁴ Teq i bunmo Krais Yesus aholib sogaotim inaq osad iyan ya ne ginan inad bilaqaqta na ayahmo ne gigo hib eman nawa tilehaq. Nawaqmo.

2 Korin o Sansandek gigerta Pol mar tonan uliq Korin-ib lahta Gamuk ameb lehaqta

Yesus ago on mataw uliq Korin-ib osiyta na gilikmanib mataw asor eraqim Pol agilehunun kazaq bilaqiy, Pol amileq iyad in aposel diq a haiqta haqiy. Haqsa Korin on mataw girerey emad Pol hulosnан ton yaqay. Sa Pol afaqan na ahol waqad in mataw na giqez amenin emim gamuk araq awaz meqin digta sansandekib mar tonim uliq Korin-ib eman tilah. Teq sansandek na nabag iyan muran i a hi wazauqta. Ari Korin sansandek na waqim ahol waqan Pol ago gamuk giquid uluman in ginad ayahmo meqniy. Ginad meqniysa in nad buliyim Pol ago hib ta boliy. An Pol nazaq huriitim in anad dimniysa in gimen sansandek kaqmo mar tonim in aposel akabiyan alulin diq gibilen has (2 Korin 1.1–7.16).

Teq kam nab Yesus ago on mataw saw Judiya-ibta na meqin diq iyim ossa Yesus ago on mataw gidauhan asor saw Masedoniya-ibta na teq saw Akaya-ibta na in gimen mani humab tuwol yaqay. Sa tekomo Korin on mataw mani asor emnan tibilaqymo. Nazaq iyan sansandek kab Pol in Korin gigem wazid eraqsa in mebmebmo mani emnan bilaqiyta nazaq in tiqem daqay haqad in atoran nogmo gibilan (2 Korin 8.1–9.15).

Ari abeb Pol ago bab na a ta eraqim in Pol abin wazan diq wom. In bilaqiy, Pol ago zaway hajqgam haqiy. In gamuk anonon a hi bilaqaqta haqiy. In Krais ago a hi hurit kemad in Krais ago gamuk bilaqgo abin hajqta haqiy. Haqan Pol gamuk na huritim aqutil tartay. Sa in ahol adanin qwayad immo ahol abin iluwad in aposel akabiyan diq emaqta na awagamun tigibilen siram (2 Korin 10.1–13.10).

God Aposel gibenab kabiy amta na ago Pol bilam

¹ Ari yaqmo Pol. God-mo anad bilaqan ya Krais Yesus ago Aposel iyta. Ya imaqbab Timoti inaq i sansandek ka ne God ago on mataw Yesus ago nan huritad uliq Korin-ib osiyta na teq saw Akaya-ib God ago on mataw tawonta na bunmo gimen sansandek ka i mar tonim eman leh negaq.

² I Gimam God teq Iyahta Yesus Krais inaq in gigem dimunta negad in ne gigem emid kiskismo usan.

God Pol ulumsihta na ago Pol esey ug

³ Ari i God abin iluwuq. In i gigo Iyahta Yesus Krais ago God teq in Yesus Amamtamo. Teq i afaqan amo amo waqad ginad meqniysa ossa i Gimam God in i ginan anad meqniysa ginad waqaqta. ^{4–5} Afaqan nagan i giholib gwahtiqa in i ginad waqsa i gigem kiskismo usaqta. Na ezaqgo Krais santitiy ayahmo sorta na asor i giholib bolsa i sanctity kabemmo sorauqtamo. Ad nazaqmo i Krais aholib soqotim inaq ossa in agem kiskismo usaqta na ayahmo diq iyim in wazbalim i gigemab tubolaqtamo. Nazaq iyan God i gigem eman kiskismo usaqta nazaqmo i on mataw gigo afaqan amo amo usaqta na ginad waqsa in gigem kiskismo usaqmo. ⁶ I ne gilumsiheq gigemid ne bar dimuntab osad gigem kiskismo usadaq haqad i ne gimen afaqan sorad gihol afaqan diq iyaqta. Teq i afaqan sorsa God i ginad waqsa i gigem kiskismo usaqta. Sa ne nazaq i gibiyad i sanctity sor nogmo ne sorad naa kabemmo a hi bilaqsa God ne ginad waqad teq in ne gigem eman kiskismo usaqtamo. ⁷ I ginad emauq. I sanctity sor nogmo ne sorsa God i gilumsihad gigem eman kiskismo usaqta nazaqmo in ne gilumsihad ne gigem eman kute nemaqtamo. Nazaq iyan i ne ginan ginadnad a hi emad bilaqaq. Ne zaway diq iyeq turad a hi woq daqay haqauq.

⁸ Ya imaqbaban, ya saw Esiya-ib osad afaqan sorta na ago gibilensa ne huriitiy. Afaqan ayah diqta na ya iholib gwahtiqa sorgo biyab a hi iysa in yaqgo zaway bayan diq wom. Sa ya bilaqyaiq, Ya tu moqdaiq daqagya haqyaiq. ⁹ Helmo diq. Ya ihol loyinad ya bilaqne mat wol emid moqgo ayon bilaqiyta nazaq nog ya ihol loyinyaiq. Kam nab yaqmo ihol ulumsihiyo yaqgo zaway tihiqiy. Nazaq iyan ya ihol bunmo eman God mataw tumoqiyta giwazan ta eraqayta na ago hib usyaq. ^{10–11} Sa afaqan meqin diqta na ya inol eman moqnan tonsa God ya ilumsihim ta iwam. Ad nazaqmo in tiqilumsih tutdaqta. Ya inad bunmo God amomo ago hib eman usaqta. Nazaq iyan ya inad emaiq, Abeb afaqan araq meqinta imeqin tonnan tonsa ne ya ilumsihad imen God bulonsa in a ta ilumsihdaq haqaiq. Ne kabemmo nazaq emsa teq God ne giqez huriitat tiqidimum tondaq. Sa on mataw kabemmo God ya ilumsihta na anadin emad in God esey tuqug daqay.

Pol gamuk helta Korin on mataw gibilan

¹² Ari ya kazaq ihol abin iluwaiqta. God ya inad wamusza ya imileq a hi iyad on mataw bunmo gigo hib ya daq titnonta emad ya inad giger a hi iyaqta. Helmo, ya igem nazaq diq loyinad bilaqaiq. Teq yaqgo luw os na ya mataw og kabta ginad

muzinim a hi luwaiqta. Haiqgam. Godmo agem dimunta yagad dante dimunta na iqisihunata. Iqisihunan ya dante na muzad ya ne gigo hib mat nazaq diqta iyim yaqgo daq na ya ne ayahmo giqisihunaiqta.¹³⁻¹⁴ Giqisihunad ya ne gimen gamuk araq ne ginad a hi em has daqayta a hi mar tonaiq. Haiqgam. Gamuk ne ahol waqad alulin ginad em has daqayta naqmo ya ne gimen mar tonaiq. Teq ya inad emaq. Ya mat ezaqta na ago asormo ne tuhuritiya haqaq. Ad ya inad ayahta na ne yaqgo hurit kemeq ne ya inan ginad em hasiy haqaq. Ne yaqgo ginad em hasid teq Iyahta Yesus ta boldaqta nab ya in ameb turad ne gabin iluwdaiqta nazaqmo ne ya ibin tiqiluw daqaymo haqaq.

¹⁵⁻¹⁶ In nazaq diq tiqyidaq haqad ya ime gigermo ne gigo hib le gibiydaq haqad inad emta. Ya saw Masedoniya-ib lehad danmey ya le ne tigibiydaiq hay. Gibiyad teq ya gihulosad Masedoniya-ib le oseq teq ya muleqeq ta bolad a ta gibiy tondaiq hay. Gibiyad teq ne ya ilumsiheq iqemid ya saw Judiya-ib ta boldaiq hay. Ya nazaq ime gigermo ne nenaq ossa God ame gigermo ne gidimun tondaq hay.¹⁷ Teq ya inad bulyim nazaq a hi em. Nazaq iyan ne ya inan ginad ezaq emay? Ya ne gibiy-nan bilayta na ya inad a hi em hasimmo nazaq bilayta ye? Mataw og kabta giqez giger iyaqta nazaq ya emta ye? Mataw na bilaqay. Eqe ya tiqemdaiq haqayta teq in ginad hi emgo uilemmi usaqta. Ya mat nazaqta iyim gamuk haresmo gibilenta ye? Haiq diqmo.¹⁸ God in ago gamuk muzin bugaqta nazaqmo ya emaiqtamo. Ya iquez giger iyim ya eqe nemim teq a ya haiqgam ta nemaiqmo nazaq ya a hi gibileniqta.

¹⁹ Kwaziqmo i le God atatin Yesus Krais anan gibilenta nab yaqmo Pol teq ya iyo-gniz Sailas ayow Timoti inaq i giqez giger iysa i eqe nemad haiqgam a hi bilawmo. Haiqgam. Krais aqez giger a hi iyaqta. In aqez amulikmo egemo nemajta.²⁰ Na ezaqgo God i gidimun tonnan hel diqmo bilamta agamukan kabemmo giqusaqta na bunmo Krais ago hib anon tiqemim usaq. Nazaq iyan i Krais inaq soqotim osad God i gidimun tonnan bilamta ni anadin emad i gamuk na anan hel diqtagmo haqauqta. Haqsa God i gigo hib abin ayahta waqad. ²¹ Teq God inmo i nenaq araqibmo giqeman i bunmo Krais aholib soqotim inaq osad i giwaz diq meqniyim osauqta. Ossa God i gitowun eman i in amomo agota tiqiyim osauqta.²² I inmo ago iyeq osamta haqad in ago gunun i giholib emim teq in ago Bugaw Dimunta igan i giduganih usaqta. Ussa i ginad emauq, God ago os dimunta in ignan bilamta na ago atowun kawaqmo i tuwazauq haqauq.

Pol uliq Korin-ib hidmo a hi lah

²³ Ari ya ne gigo hib a hi lehta na alulin in kazaq. Ya afaqan araq ayahta a ta negid ne ginad ayahmo meqniyidaq haqad ya ne gigo uliq Korin-ib hidmo a hi leh. God ya ibiysa ya hel diqmo bilaqaiq.²⁴ Teq i ne ginad helta na wamuzad kazaq ne ginad emiy haqad nazaq i a hi emauqta. Haiqgam. Ne ginad helmota na awaz meqniyim ussa ne zaway iyim turayta. Nazaq iyan yaqmo Pol teq ya iyogniz nenaq i ne gigo kabiy araqibta iyim i ne ginad emid dimniyidaq haqad i ne nenaq garab kabiy emauqta.

2

¹ Nazaq iyan ya inad tiqem, Ya ne gigo hib muleqeq ta lehid ne gihol afaqan diq a ta iyaq haqad ya ne gigo hib hidmo a hi leh.² Ya ne gigem emid afaqan iyid teq nog ya igem emid dimniyidaq? Na haiqgam. Ne gimomo ya igem eman dimniyaqta.³ Na ago ya ne gigo hib a hi lehad ya inadta na bunmo sansandek ne gimen mar tonan lahta. Ne gimomo ya igem eman dimniyaqta. Nazaq iyan ya ne gigo hib leheq ihol afaqan iyeq osnan hulosyaiq. Ad ya inad emyaiq, Ne yaqgo sansandek na waqeq ahol waqad ne gigo afaqan na wastitayid dimniyid teq ya le tigibiydaiq haqyaiq. Gibiyad ya ne ginan inad dimniya ne ginad dimniy daqaymo haqyaiq.⁴ Helmo ya ne gimen sansandek araq na mar tonad ya inad meqniyis igem afaqan diq iysa ya ime kabemmo gaqyaiq. Teq ya ne gitut emid tartaydaq haqad gamuk na a hi mar ton. Haiqgam. Ya ne ginan inad ayahmo bilaqsa ya igem ne gigo hibmo diq usaqta na ago ya gibilen kemann haqad ya sansandek na ne gimen mar tonta.

Krais ago on mataw Korin-ib osayta na in giyow ago daq meqinta na walemad anadin a ta hi em daqay

⁵ Ari ne gigo hib mat afaqan eman gwah-timta na in ya imomo igem eman afaqan a hi iy. Teq ya daq na agamukan kabemmo atoranno bilaqnan ituw hiqiysa ya kazaq siqim bilaqdaiq, In ne asor kabemmo inaqmo gigem eman afaqan tiqymo haqdaiq.⁶ Teq ne gigo mataw kabemmo mat na wastitayad faq ugan in mat daq nazaq amta na ahunmo tiqy.⁷ Nazaq iyan ne amenin araq a ta hi ugad ne in ago daq meqinta na walemad anadin a hi emiy. Ad ne in anad waqsa agem kiskismo usan. Luweq in anad ayahmo diq meqniyis in afaqan na sorgo biyab a hi iyeq.⁸ Nazaq iyan ya ne gibilenaiq, Ne mat na a ta waqad ne in anan ginad bilaqqaqta na ago bulonid in hurit keman haqaiq.

⁹ Ne mat na ago daq wastitay daqay haqad ya sansandek araq na ne gimen mar tonta. Mar tonim ya ne gilum waqid ne yaqgo nan bunmo hurat daqay o haiq haqad ya mat na wastitaygo gibilenta. ¹⁰ Ari ne mat na ago daq meqinta walemad anadin a ta hi emsa ya nazaqmo daq meqinta na tuwalemdaiqmo. Helmo, mat na ya a hi imeqin tonta. Teq ya ne gilumsihnan haqad Krais ameb ya mat na ago daq inadib tuwalemai. ¹¹ I nazaq an asen baysihsa teq Satan kat igad i gidanin a hi qwaydaq. Haiqgam. I Satan ago daq bunmo tuhurit kemim i nazaq an tuqulum-sihamta.

Pol uliq Trowas-ib Taitus ahol a hi waqim anadnad am

¹² Ari ya Krais awagamun dimunta bilaqnan haqad uliq Trowas-ib le tugwhatiqan Iyatha yaqmen dan Hasan ya gamuk bilaqad anteqin inaq tiqiyta. ¹³ Ta teq ya imaqbab Taitus uliq nab ahol a hi waqim ya igem kiskismo a hi usyaq. Ya inad emyaiq, Ya Taitus ahol waqsa in ne ginan ibilenid teq ya igem kute nemdaq haqyaiq. Nazaq haqad ya Trowas on mataw gihulosim saw Masedoniya-ibmo tileh.

Aposel God ago zaway amalib bab giqriyamayta

¹⁴ Teq ya God esey diq ugaiq. In Krais eman bolim in ago bab bunmo ginolim tigiquriyam bugta. Giquriyam bugim in i bab gibenab giwaqan i Krais aholib tisogot. Soqotan teq God i giwaqim giqad on mataw bunmo gimeb lehad in damneb lehsa i muzim inaq lehaugta. In uliq saw bunmo i giqad lehsa i on mataw Krais anan gibilensa in huriyatay, bilaqne faq aqasin ahuran dimunta gwahtiqtaw saw bunmo waleq tonaqta nazaq nog. ¹⁵ Helmo Krais ago tamaz in God ugtu na ahuran nog igmo. Ad i gihuran na gwalad on mataw God gilumsihim giwaqqaqta na gimotgub woqad in mataw timeqniy hasayta na gimotgub tuwoqaqmo. ¹⁶ Mataw timeqniy hasayta na i gihuran huritsa in bilaqne nagah tumomta ahuran nog iyaqta. Iysa in moqeq meqniy has daqayta na ago in ginad emayta. Sa on mataw God gilumsihim giwaqqaqta na i gihuran huritsa in dimun diq bilaqne nagah tutimmo kayeqmo osaqfa ahuran nazaq nog iyaqta. Iysa mataw na tuteqmo kuluwa-kuluwmo os daqayta na ago in ginad emayta. Nazaq iyan nog diq inmo ago zawayib Aposel akabiyan ka tiqemdaq? ¹⁷ Mataw kabemmo God ago gamuk on mataw negad amenin mani waqayta nazaq i a hi emauqta. Haiqgam. God-mo i giqeman lehsa in i gibiy kemsa i in ago kabiy emauqta. Teq i Krais inaq

soqotim osad i God ago gamuk bilaqad gimiileq a hi iyauqta.

3

Aposel in God ago maror muturta na ago kabibiy matawta

¹ Ari ya gamuk tekoh bilaqim bolta nab ya iyogniz nenaq i gibin a ta iluwnan haqad ya bilayta ye? Helmo mataw pesanta ne gigo hib le God ago kabiy emnan bilaqsa in gigo walmataw asor in mataw na gibin dimunta sansandekib mar tonim negan in wazim a le ne giqishunayta. Teq ne ginad i gigo walmataw nazaqmo i gibin sansandekib mar toneq emid ne gigo hib lehid ne i gigo hurat kem daqaymo haqay e? Teq i le uliq araqab kabiy tiqemnan haqsa ne i gilumsi-heq i gibin dimunta sansandekib mar tonid i wazeq uliq nab a leheq mataw giqishunam haqad ne ginad emay ye? ² Haiqgam. Negmo bilaqne sansandek i gibin bilaqqaqta na nog iyim osayta. Sa gamuk na i gigemab mar tonan ussa on mataw bunmo gamuk na ahol waqad in i gigo tuhurit kemayta. ³ I gigo kabiy ne gigo hib anon eman ne bilaqne sansandek araq Krais i gibin mar tonim igan i a le on mataw giqishunauqta nazaq nog ne ulalabmo osayta. Teq Krais i gibin agamukan na zamor diq amalib a hi mar ton. In God kayeqmo osaqta ago Bugaw amalib gamuk na mar tonta. Ad i in ago kabibiy matawmo diqta agamukan na in gig alaplapantab a hi mar ton. Haiqgam. In on mataw gigemabmo gamuk na mar tonan usaqta.

⁴ Gamuk kawa ya bilayta ka alulin in kazaq. Krais-mo i Aposel giqeman i inmo abinib ago kabiy emauqta. Nazaq iyan inmo teq i gigo kabiy na emid dimniyadaq. ⁵ Helmo igmo gigo zawayib Aposel akabiyan ka a hi em nagta. Nazaq iyan i bilaqam, Igmo diq kabiy emauqta nazaq i a hi bilaqam. God-mo zaway igsia i kabiy emauqta haqam. ⁶ Inmo zaway igsia i in ago maror muturta naqmo akabiyan emauqta. Teq maror muturta na in God ago maror Moses mar tonta nab a hi usaqta. Haiqgam. Bugaw Dimunta naqmo mataw giqeman in God ago maror muturta aduganih gwatiqayta. Na ezaqgo God ago maror kwaziqta aduganib gunun amo amo mar toniyta na in mataw giyon bilaqsa in moqayta. Ari God ago Bugaw Dimunta mataw giqeman in kayeqmo osayta.

⁷ Ne ginad emiy. God gunun kwaziqta na agamukan gibig qwayta. Qwayim inmo abin ayahta na ulal tonad ahol anuwan atoranomo osya in gunun na Isrel gibilengi haqad Moses abenab tiqam. Eman Moses gig na waqim Isrel gimen ad gewoqim tinegad in anobun anuwan diq iysa Isrel on

mataw gime tih nemeq ahol waqgo biyah a hi iy yaqay. Sa abeb Moses ossa anobun anuwan na thihiqiyqa. Ari gunun kwaziqta na God anuwan ayahta inaq bolim iyan in abin inaqta. Ta teq gunun na in on mataw giwamuzsa in gigo daq meqinta ulal iysa in moqayta.⁸ Ari God ago Bugaw Dimunta mataw giwamuzsa in God ago maror muturta aduganib gwahtiqin kayeqmo osayta. Nazaq iyan Bugaw Dimunta akabiyen na abin in gunun kwaziqta akabiyen na abin ayahmo diq uriyamaqta.⁹ Gunun kwaziqta na in on mataw giydon bilaqsa in giben timeqniyqa. Gibin meqniuya in gigo daq meqinta amebay na sorim thihiqiyatta. Ta teq gunun na God ahol anuwan ayahta inaq bolim in abin ayahta. Ari God in on mataw giwastitayim ginan on mataw titnonta haqaqta na in nagah ayah diqmo iyim in abin ulilibmo diq gwale usaqta.¹⁰ Gunun kwaziqta na abin inaq usta teq abin na thihiq. Na ezaqgo Bugaw Dimunta akabiyen muturta na in gunun kwaziqta na abin wazan woqsa in uriyamim abin ayah diqmo iyaqta.¹¹ Gunun kwaziqta na God ahol anuwan inaq bolta teq in akaman thihiq. Ari Bugaw Dimunta akabiyen muturta na tuteqmo tuqusdaqta. Nazaq iyan kabiy muturta na abin ayah nenan diq iyim usaqta.

¹² Ari God ago Bugaw Dimunta on mataw gigemid in God ago maror muturta aduganib gwahtiqeq kuluwa-kuluwmo tuqos daqay haqad, i a hi rabad gamuk na ulalabmo gibilenad luwaquta.¹³ Teq Moses daq amta nazaq i a hi emauqta. In anobun anuwan na oyad a hi hiqiysamo in tubusan amikta waqeq anobun tiqisihyaq, isihid teq anobun anuwan na miyeq hiqiysa Isrel ahol a hi waq daqay haqad.¹⁴ Kam nab Isrel ginad soqotim usyaqta. Ad muran kam kab in God ago maror kwaziqta na agamukan huritad in alulin ginad a hi em hasad os tutayta, bilaqne tubusan amikta na ginad isih netim usaqta nazaq. Na ezaqgo mataw na Krais amomo aholib soqotid teq God tubusan amikta na tuwalemdaqta.¹⁵ Teq Jesus ago kamub iyim bo muran kam kabmo Isrel on mataw in God ago maror Moses bilamta na agamukan huritsa tubusan amikta na ginad isih netsa in ginad a hi emayta.¹⁶ Ari teq mat aw nog ginad buliyim Iyahta ago hib muleqim ta lehsa Iyahtaqmo tubusan ginad isih netim usaqta na walemaqta.¹⁷ Ya Iyahta anan bilaqad ya Bugaw Dimunta naqmo anan bilaqaiq. Inmo mataw ginad eman hastitayaqta. Nazaq iyan Iyahta ago Bugaw mat araq aholib kabiy na emsa mat na samanmo gunun haiqmo tiluw osaqta.¹⁸ Bugaw Dimunta nazaq emsa i bunmo ginobun

samanmo tubusan haiqmo usad Iyahta ahol anuwanib oyaqta, bilaqne mataw i gibilayd in Iyahta anobun galas-ib ahol waq nog iyaqta. Iyahta inmo Bugaw. Teq in nazaq i gihol buliysa i giwaqan bilaqne in awaqaqan nog iysa i gihol abin na inaqmo biliyad dimun diq tiqiyaqmo.

4

Aposel gisan moqaqta na in bilaqne kagoh nog

¹ God-mo i ginan anad meqniyan in Aposel akabiyen ka igtta. Nazaq iyan i kabiy na emad gidan sosil a hi iyaqta. Haiqgam. ² Daq amebay inaqta mataw ulilemim emayta na i gileh tuqug bug. I mataw kat negad ginad a hi hureqauqta. Teq i God ago gamuk buliyan le araq a hi iyaqta. Haiqgam. God ameb i gamuk heltaqmo ulalab bilaqauqta. I nazaq emsa mataw bunmo in gigemabmo diq i giloyinsa i mataw daq helta emad gamuk helta bilaqauqta.

³ Ari i on mataw asor Jesus awagamun gibilensa in ginad a hi em hasayta. On mataw naqanta saw meqintna ago danteb osad in hiqiynan tonayta. Nazaq iyan i gigo gamuk na alulin in gimeb ulilemim ussa in ahol a hi waqayta.⁴ Og ka ago god na in on mataw helmo a hi haqayta bunmo ginad eman romriq iyaqta. Romriq iysa in Krais ahol a hi waq kemayta. Krais in God adulanmo diq osaqta. Ta teq wagam dimunta Krais abin eman ulal iyaqta na in saw anuwan oy nog iysa mataw romriqab osayta na ahol a hi waqayta.

⁵ Mataw i giben iluwad gimuzingo aqad i a hi gibilenuqta. Haiqgam. I bilaqauq, Jesus Krais-mo in i bunmo gigo Iyahta haqauq. Ad Jesus-mo i gigeman i ne gigo kabibiy mataw iyim osaucta haqauq.⁶ Kwaziqmo God bilam, Romriq saw isihim usaqta nab saw anuwan gwahtiqeq oyan ham. Ad God naqmo in ago anuwan eman i gigemab tuqoyaqmo. Oysa i gime hastitayan i Jesus Krais anobun ahol tuwaqauq. Ahol waqsa in anobun God ahol anuwanib oysa i God abin teq in ago zaway na ago thuhurit kemauqta.

⁷ I Aposel giwaz meqin haiqta teq God ago kabiy dimun diqta na i giholib usaqta. I bilaqne kagoh araq aduganib nagaq dimunta tenan usaqta nazaq nog. On mataw i gibiyisa i mataw gihol awaz meqin haiqta nog iyaqta. Nazaq iyan i mataw zaway haiqta God ago kabiy atoran diqmo emsa God-mo ago zaway i giduganib usaqta na ulal tiqiy hasaq.⁸ Og ka ago afagan amo amo tutimmo i giholib gwahtiqeqta teq in i gidanin a hi qwayaqta. Kam kabemmo i kabiy emgo ginadnad emauqta teq i ginad

meqniysa kabi y a hi hulosauqta. ⁹ Bab kabemmo i gimuzad gimeqin tonayta teq God i a hi gihulosaqta. Bab na i gibayan diq woqauqta teq i a hi meqniy hasauqta. ¹⁰ I giholib sanctity ayahmo sorad a luwsa on mataw i gibiyad in Jesus momta adulan ahol waq nog iyayta. Teq i Yesus ago kabi y daq emsa Yesus hodhodab eraqim azawayin inaq osaqtta na i giholib ulal iysa in ahol waqaytamo. ¹¹ I kayeqmo osad Yesus abinib kabi y emsa mataw tutimmo i ginol emnan tonayta. Ginol emnan tonsa i moq ago dantebmo diq osad teq i a hi moqauqta. Nazaq iyan Yesus ago zaway i giqeman kayeqmo osaqtta na in i gisan moqaqta kab ulal tiqiy hasaq. ¹² Daq naqmo ago i bilaqaquq, Moqmo i Aposel giholib kabi y emaqua haqauq. Ta teq i Aposel gigo kabi y ne giholib anon emsa ne kayeqmo kuluwmo tuqos daqay haqauq.

¹³ Teq God ago marib gamuk araq bilamta nazaq i ginad usaqmo. Gamuk na bilam,
Ya God anan helmo haqad iyan ya bilaqaiq ham. *Buk Song 116.10*

An nazaqmo i God anan helmo haqad iyan i bilaqaquqta. ¹⁴ I ginad emauq, God in Iyahta Yesus hodhodab wazan eramta nazaqmo in inaqmo giwazid i tigeraqatamo haqauq. Eraqid teq in i ne nenaq araqibmo giqad lehid i bunmo in agerab tuqosam haqauq. I ginad nazaq emad gamuk bilaqaquqta. ¹⁵ Helmo afaqan nagan bunmo i soraquqta na i negmo gilumsihnan haqad soraquqta. Teq i afaqan nagan sorsa daq na amalib God ago agem dimunta le on mataw kabemmo gigo hib gwahtiqsa in God esey ugad abin wazan eraqaqta.

Aposel God anan helmo haqad zaway waq yaqayta

¹⁶ Nazaq iyan i God ago kabi y emad i gituw a hi hiqiyad gidan sosil a hi iyaqta. Helmo i afaqan sorsa i ginon ka thihiqyaq. Teq kam bunmo i giqem zaway muturta waqsa i ginad dimniysa osaqtta. ¹⁷ Na ezaqgo i afaqan ka sorad oseq teq amenin kazaq i waqamtta. Abeb God abin ayatha teq in ago os dimunta tiqigdaq. Igid i nagah aseseqta na loyinsa in nagah ahol afaqan meqin diqta kuluwa-kuluwmo usdaqta yidaq. Nazaq iyan i afaqan muran sorauqta ka loyinsa in nagah sinamolta kam asitmo usdaqta nazaq nog iyaq. ¹⁸ Na ago iyan i nagah gimeb ulal iyaqta na ahol waqad anan helmo diq a hi haqauqta. Haiqgam. Nagah i gimeb ulilemim usaqta naqmo i gime le ahol waq nog iyad i anan helmo haqauqta. Na ezaqgo nagah i gimeb ahol waqauqta na in kam asitmo usimmo thihiqyaqta. Ari nagah dimunta i gimeb ulal a hi iyaqta na in tuteqmo kuluwa-kuluwmo tuqusdaqta.

5

¹ I gisan ka bilaqne baybay nog iysa i og kab osaqtta. Ad baybay ka meqniyid teq God i gimen bit araq wastitayta na in tiqigdaq. Bit na mataw gibenab a hi emiyta. Haiqgam. In tuteqmo kuluwa-kuluwmo Heven-ib tuqusdaqta. Na i bunmo tuhuritta. ² Nazaq iyan i bit dimunta Heven-ib usaqta na waqeq tubusan nog i gihol sihennan ginad diq bilaqsa i giholnan ek tonad baybay kab osaqtta. ³ Na ezaqgo i baybay ka huloseq leheq i ginon muturta na waqeq gihol siheneq i giwitan samanmo gibe aholmo a hi luwam. ⁴ I baybay kab osad gihol afaqan iysa i giholnan ek tonauqta. Teq i moqeq gisan ka hulosad gibe aholmo osnan ginad bilaqaq nazaq i ginad a hi emauqta. Haiqgam. I gisan kwaziqta ka amalib gisan ta araq muturta na waqeq tubusan nog i giholib emnan ginad bilaqaq. Nazaq iyid teq i gisan moqdaqta ka ulilemsa i gisan kayeqmo us tutdaqta naqmo ulalab tuqusdaq. ⁵ Na God-mo anad i teq gisan muturta waqeq tuteqmo osamta haqad in i giwastitayim giqeman i osaqtta. Ad daq nazaq diqmo i giholib tugwahtiqaq haqad in ago Bugaw Dimunta tiqiq. Igan i ginon mutur iydaqta na atowun nog in i giholib usaqta.

⁶ Nazaq iyan i nagah na anadin emad i giwaz meqniyad a hi rabauqta. Teq i ginad emauq, I gisan ka i gigo baybay nog iyan i osaqtta haqauq. Ad i baybay kab osad i Iyahta inaq in ago uliqab a hi osaqtta haqauq. ⁷ Nazaq iyan nagah i gimeb ulal iyaqta na i anadin emad kabi y daq emauqta nazaq a haiq. Haiqgam. Nagah God anan gibilenan i anan helmo haqauqta naqmo i ginad wazsa i og kab luw osaqtta. ⁸ Ad i giwaz meqniyim a hi rabad og kab osaqtta. Osad i gisan ka hulosad leheq Iyahta inaq in ago uliqab osnan i ginad ayahmo bilaqaqta. ⁹ Teq i le i gigo uliq diqta nab osad o haiq i og kab Iyahta ago hib pesan nog osad i ginad amulikmo kazaq usaqta. I tuteqmo daq dimunta Iyahta anan anad bilaqaqta naqmo i emad osuq haqauqta. ¹⁰ Na ezaqgo i bunmo Krais anognib gwahtiqeq ago hazizirib tituramta. Turad i og kab osad daq emyaqta na ago ahunibmo naw tuwaqam. I daq dimunta o daq meqinta emeq i amenin nazaqmo tuwaqamta.

I on mataw gilumsihid in God inaq an anobun wastitay daqay haqad i kabi y emauqta

¹¹ I teq hazizirib turamta haqad i Iyahta anan rabad ahaqenib osaqtta. Osad on mataw bunmo ginad i ginad nog iyeq in Iyahta anan helmo haq daqay haqad i atoranmo gibilenauqta. God i gigeq ginad

tuhurit bugta. Sa ya ne ginan inad emaiq. Nabag ne gigemabmo diq i ginan helmo haqaytamo haqaq. ¹² Gamuk ka amalib igmo gibin dimunta gibilenid ne i ginan mataw dimunta haq daqay haqad i a hi gibilenauq. Haiqgam. Ne i gigo hurit kemeq teq ne mataw i gihar igayta na giqez amenin emeq i gibin iluw daqay haqad i kawa i gihol anan ne gibilen sirequaq. I gigo bab na gigo daq ulalabta naqmo amalib in gimo gibin iluwad teq in ginad gigemab usaqta na in isihayta. ¹³ Ad in i ginan bilaqay. Mataw ginad agadanta haqay. Teq i ginad agadan iyid na i God inaq gigo nagah. In mataw na gigo nagah a haid. Ari i ginad dimunta iyid na i ne nenaq gigo nagah. Na mataw na gigo nagah a haiqtamo. ¹⁴ Na ezaqgo Krais agem dimunta igaqta na i anadin emad i giqutil eraqsa i in ahol awagamun bilaqad i giqez wasihgo biyab a hi iyauqta. I ginad emauq. Mat amulikmo on mataw bunmo gigo ban waqim in gimen momta haqaquq. Nazaq iyan on mataw bunmo tumoqiymo haqaquq. ¹⁵ Teq mat na anad kazaq emad in on mataw bunmo giyon momta. Ya on mataw ya ibinib kayeqmo os daqayta na gimen moqeet ta eraqid teq on mataw na in gimo gihol anadin a ta hi em daqay ham. In yaqmo inadin emad inad muzinad os daqay ham.

¹⁶ Nazaq iyan muran teq abeb i Krais-mo anad muzinad i mataw og kabta ginad a ta hi muzinauq. Ad mataw og kabta mat asanmo ahol waqad ulum kemayta nazaq i a ta hi emauqmo. Helmo, kwaziqmo i og ka ago daq na amalib Krais ulum kemim anan mat diqmo araq haqyaquqta. Ari muran i daq na hulosim i Krais ulum kemim in ago tuhurit kemauqta. ¹⁷ Hurit kemim i ginad emauq. Mat aw nog Krais aholib soqotim inaq osayta na God in giqeman in mataw muturta tiqiyi haqaquq. In ginad gigem kwaziqta na tihiqiy bugan abanab in ginad gigem muturta tugwahtim haqaquq.

¹⁸ Teq mat mutur iyaqta na alulin Godmo. Kwaziqmo i in ago bab iyim ossa in Krais eman bolim i gimen dante wastitayan i God inaq an anobun tuwastitay. An anobun wastitaym in daq na agamukan i gibelenab eman i on mataw bunmo tigilibenauq. ¹⁹ Gamuk na i kazaq bilaqaquq. God in on mataw in gileh ugayta na gigo daq meqmeqinta nagan ago a hi bilaqad in Krais eman bolim on mataw na gigo ban waqim in gibinib God inaq an anobun tuwastitay haqaquq. Wastitayan God in daq nawna Yesus amta na agamukan i bilaqgo haqad i gibelenab tiqamta haqaquq. ²⁰ Eman i God aqez na waqim tutad Krais on mataw gilumsihta na ago bilaqad i God abinib on mataw gililewunad luwauqta. Nazaq

iyan i Krais aqez tutad atoranmo kazaq ne tigilibenauqmo, Ne God inaq an anobun wastitayeq inaq dimunmo osiy haqaquq. ²¹ Krais daq araq meqinta a hi amta. Teq God i gigo daq meqinta bunmo ginuwim Krais aholib eman in daq meqinta nagan bunmo anamren tiqiy. Ad nazaqmo muran i Krais inaq soqotim osad in God anad muzinim titnimmoo luwta nazaqmo i gibin tuqusaqtamo.

6

Aposel kabiy emad afaqan kabemmo soriy

¹ I God inaq kabiy emauqta iyan i gamuk awaz meqin diq kazaq ne gibilenauq. God agem dimunta negsa ne abu hi ulumiya haqaquq. Luweq ne in ago zaway na samanta waqeet akabiyan a hi em daqay. ² Na ezaqgo God ago marib in kazaq i gibilenaq,

Ya igem dimunta negdaiqta akaman ya inad bilamta nab ya idek emim ne giqez huritta haqaq. Ad ya ne gilumsiheq giwaqdaiqta akaman nabmo ya ne gilumsihim giwayta haqaq. *Aisaya 49:8*

Ne ginad em hasiy. God agem dimunta negdaqta akaman na muranmo gwahtiqim usaqta. In muranmo ne gilumsiheq tigawaqdajta.

³ Mataw i gigo kabiy ka abin meqin bilaqgo i hulosmo diq hulosauqta. Nazaq iyan i daq araq mataw ananin bilaq daqayta a hi emauq. ⁴ Haiqgam. I God ago kabibiy matawmo iyim osauqta. Nazaq iyan tutimmo i daq dimuntaqmo on mataw bunmo giqisihunauqta. Ad i God ago kabiy emad i gituw a hi hiqiysa afaqan amo amo soraugta. Sa daq hares i gimeqin tonnan tonsa i ginad meqniysa gihol bibiyowunad teq i a hi hureq hasauqta. ⁵ Mataw i ginolad in i giwazim giqirqrurayta. Ad in humab emim ek ton meqin i gimalib ek tonad in gigem eraqsa i ginol emnan tonayta. Sa i giholtuq diq bulad kabiy afaqanta emauqta. Tarom kabemmo i anononmo a hi usaqta. Ad kam asor i gigemnan moqad samanno osauqta. ⁶ Ad teq i daq anumlan inaqta aban diq emad i ginad dimuntaqmo on mataw gibilenauqta. Mataw afaqan igsia i nan kabemmo a hi bilaqad i mataw na gilowan tonauqta. Sa God ago Bugaw Dimunta i ginad wamusza i on mataw bunmo ginan ginad bilaqsa i gigemban ginad araq meqinta a hi usaqta.

⁷ I gamuk helta amalib on mataw gibilenauqta. Ad i God ago zawayib kabiy emad i gigo daq titnonta na bilaqne baqir nog i giben giqbun ban ussa amalib i gigo bab ginolauqta. Sa bab na in i ginolnan tonsa

i gigo daq titnonta na bilaqne dareq nog i giben ginasaran ban ussa amalib i gihol adanin qwayauqtamo.⁸ Mataw asor i gibin wazan eraqsa asor i gibin bayan woqaqta. Sa mataw asor i gigilehunan bilaqsa asor i ginan dimunta haqayta. Mataw asor i ginan ginad emay, Mataw gikatiy meqin haqad i in gibaymuzayta. Teq haiq i gamuk heltaqmo bilaqauqta.⁹ Mataw i gibisya i bilaqne mataw gibin haiqta nog iyauq. Teq haiq, i gibin uliq saw bunmo tilahta. I bilaqne mataw moqnan tonayta nog iyim teq haiq i kayeqmo osaucta. I sanctity ayahmo waqauqta. Teq sanctity na i ginol eman a hi moqauqta.¹⁰ I gihol gigem afaqan iyaqta teq kam bunmo i ginad dimniya osaucta. I mataw ginaghan haiqta os nog iyauqta teq i mataw kabemmo gilumsihan in ginaghan kabemmo inaq iyayta. Sa i bilaqne i gigo nagah haiqmo os nog iyauqta teq i nagah dimdimunta bunmo waz bugauqta.

¹¹ Ne Korin on mataw, i ulalabmo kawa ne gibilenad i gigemab ginad araq a hi usaqta. I gigem bunmo ne negauqta.¹² I gigem a hi wasihad i ne ginan ginad diq dimniyaqta. Ta teq ne gigem wasihad ne i ginan ginad a hi bilaqauqta.¹³ Muran ya bilaqne onmin giaman gibilen nog ne tigibilenaiq. I ne gimen daq emauqta nazaqmo ne i gimen emad ne gigem dimunta bunmo i igymo haqaiq.

I God ago bit iyim osaucta

¹⁴ Mataw God anan helmo a hi haqayta na in gihol lul araqta. Nazaq iyan ne in nenaq soqoteq kabiyl daq araqibmo hi emiy. Ezaq teq mat daq titnonta emaqta na in mat gunun othasaqta na inaq ginad amulikmo iyeq araqibmo os daqay? Ta ezaq teq saw anuwan romriq inaq araqibmo gwahtiqeq usdaq?¹⁵ Krais Satan inaq gigem araqibmo iyim osayta ye? Teq mat Krais anan helmo haqauqta na in mat Krais gileh ugaqta na inaq ginad araqibmo usdaq e?¹⁶ God ago bit in lul araqta. Sa god katiyta ago bit in lul araqtam. Ne ginadib bit giger na araqibmo ye? Ne ginad emiy. God kayeqmo osaucta na ago bit igmo. God nazaqmo diq bilamta. In bilam,

Ya igo on mataw nenaq osad teq ya in gilikmanib nenaq tiluwdaiq ham. Teq ya in gigo God iyeq ossa in yaqgo on mataw iyeq tuqos daqay ham. *Wok Pris 26.12; Jeremaya 32.38; Esekiel 37.27*

¹⁷ Nazaq iyan yaqmo Iyahta ya ne kazaq gibilenaiq ham. Ne mataw meqinta na gihulosad gwahtiqeq le giholbin iyeq luwiq haqaiq ham. Luwad ne nagah anumlan inaqta na hi waziy haqaiq ham. Ne nazaq wastitayeq

osid teq ya igem dimunta negad ne naq tuqosdaiq ham. *Aisaya 52.11*

¹⁸ Ad ya ne gimam iyeq ossa ne ya itatniz teq ya imigniz iyeq tuqos daqay ham. Yaqmo Iyahta ya zaway bunmo wazaiqta ham. Ya nazaqmo tibilay ham. *2 Samuel 7.8, 14*

7

¹ Ya iyognizmo diq, Gamuk nawa nab God i ginaq osnan haqad hel diqmo tigiblanta. Nazaq iyan i giholib daq meqinta bunmo muzid lehsa teq i gigemab ginad meqinta nagan bunmo hulos buguq. Hulos bugad i God ameb ginumlan hiqiysa i in ago on mataw tawon diqta iyeq osad i in abin wazinad ahaqenib osuq.

Korin on mataw ginad buliyan Pol in ginan anad dimniy

² Ne gigem dimunta igiy. I ne gigo mat araq a hi meqin ton. Ad i ne gigo mat araq hureqan dan titnonta a hi hulos. Teq i ne gigo mat araq kat ugim ago nagah asit diq a hi hurew.³ Gamuk ka ya ne giwazid woqgo a hi gibilenaiq. Haiqgam. Ya tekno ne ginan tibilaya. Ne i gitqutl anabun asormo diq hay. Nazaq iyan ne moqsa i ne nenaq araqibmo tumoqam. Ari ne kayeqmo ossa i ne nenaq kayeqmo tuqosammo.⁴ Ya ne ginan inad emaiq. Ne dante titnonta na a hikidik hulos daqay haqaiq. Haqad ya ne ginan inad diq dimniyaqta. Helmo diq, ya ne ginadin emad igem zaway iysa osaicta. Zaway iysa i giholib afaqan kabemmo gwahtiqaq teq haiq i ne ginadin emad i gigem dimun dikan iyaqta.

⁵ Teq ya Taitus adanin lehta na ne anadin ta emiy. Kam nab i le saw Masedoniya ib gwahtiqim kabiyl emad i ginamur asit a hi emayauqta. Saw nab afaqan amo amo i giholib gwahtiqyaq. Sa mataw i gisan ka meqin tonnan tonsa i giduganib rab gilum netyaqmo.⁶ Ta teq i gigo God on mataw ginad meqniysa ginad waqaqta na inmo Taitus eman i gigo hib bolan i ahol waqad ginad dimniya gigem kute tinam.⁷ Teq Taitus i gigo hib gwahtimta naqmo amomo ago i ginad a hi dimniy. Haiqgam. In le ne gibisya ne ginad buliym dimunmo osayta nazaq in ne gibiyad in agem kiskismo iy. Agem kiskis iyim ussa in bolim ne giwagamun na bilaqan God i gigem eman kiskis tiqimo. Ne ya ibiynan ginad ayahmo bilaqauqta na ago Taitus bilam. Ad daq meqin ne gigo hib gwahtimta na ago ne ginad meqniysa ne ya iqeziq muzinnan giwaz diq meqniyayta na ago in bilammo. Bilaqan ya huritim inad ayahmo dimniy.

⁸ Nabag ne yaqgo sansandek araq na waqim ahol waqad ne ginad timeqniy. Teq

ya sansandek na mar tonim eman ne gigo hib lahta na ago ya inad a hi meqniyaq. Helmo. Ne yaqgo sansandek na ahol waqim kam asitmo giqutil tartaysa osiyya na ago ya inad meqniyya. ⁹ Ari muran ya inad tidimniyaq. Teq ya ne giqeman ne ginad meqniyya na ago ya inad a hi dimniyaq. Haiqgam. Ne ginad meqniyya osim le ne ginad buliyita na ago ya inad dimniyaq. Ya inad emaiq, God-mo ne giwastitaynan haqad in afaqan na eman ne guyon gwahtimta haqaiq. Nazaq iyan i gigo sansandek na le ne a hi gimeqin ton.

¹⁰ God i giwastitaynan haqad in i ginad eman meqniyaqta. Teq i gigo ginad meqniyaqta na in i giholib anon emsa i ginad buliyim gigo daq meqinta gileh ugauqta. Dante nabmo God i gilumsihim giwaqaqta. Giwaqan abeb i ginad meqniyya osta na i anadin emad i gihol afaqan a ta hi iyauqta. Ari mataw God ago maror asan ban osyata na nazaq a hi emayta. Mataw na ginad meqniyya osad in gigo ginad meqniyya naqmo ayah iyim ginol eman moqayta. ¹¹ Ne ginad em hasiy. God ne giqeman ne ginad meqniyya osad gihol abin meqniyim usta na ne hidmo wastitaynan giqutil eramta. Eraqsa ne mat daq amta na anan gihol riten lamsa ne in anan gigem timeqniyyaq. Gigem meqniyyad giqutil inaqmo tartaynan tonsa ne afaqan na wastitaynan giwaz diq meqniyyi. Giwaz meqniyim ne mat na alowan a hi toniy. Sa ne afaqan na wastitayad daq bunmo ne emiyya na ago ya huritim inad em, Afaqan na ne bunmo gigota a haiq hay.

¹² Nazaq iyan ya ne gimen sansandek mar tonta na ya mat daq meqin amta na anadin emad ya a hi mar ton. Teq in mat ta araq meqin tonta na ya anadin emad sansandek mar tonta nazaq a haiqmo. Haiqgam. Ne i ginadin diq emad i ginad bunmo muzinayta na ulal iiyid ne ahol waq kemsa God ahol tuwaq kemdaqmo haqad ya ne gimen sansandek na mar tonta. ¹³ Daq alulin naqmo ago i ne ginad ginad dimniyya i gigem kute nemim usaqta.

Teq i gimonmo ne ginad ginad a hi dimniyya. Ne Taitus ago anad meqniyya na walemin ne in anad eman ayahmo dimniymo. An in muleqim ta bolan i in ago anad dimniyya na ahol waqad i inaqmo ginad diq tidimniyaqmo. ¹⁴ Ne nazaq eman ya kwaziqmo Taitus ameb ne gibin wazan eraqyaqta na ago ya imebay a hi woqaq. Haiqgam. Gamuk bunmo i ne gibilenka na i gamuk helta bilawta. Ad nazaqmo i Taitus ameb ne gibin iluwta na i gamuk helta in bulommo. ¹⁵ Taitus ne gigo hib lehan ne bunmo waqim inaq kiskismo osad ne in wazinad ago nan huritiyya. In ne gigo daq na anadin emad in agem ayahmo ne

negaqta. ¹⁶ Muran ya ne ginan inadnad a ta hi emaiq. Na ezaqgo ne dante titnonta na muzinad a hikidik hulos daqay haqad ya ne ginan inad tidimniyaq.

Krais ago on mataw uliq Korin-ib osayta na in gimaqbaban saw Judiya-ib osayta na gilumsihnan haqad gihol wastitayeq os daqay

8

*Krais ago on mataw in gimaqbaban na
gah ago siqim iyim osayta na gilumsih daqay*

¹ Ya imaqbaban, ya Krais ago on mataw gidauhan saw Masedoniya-ib osayta na ginan bilaqsa ne huritiy. God agem dimunta mataw na negad in gilikmanib daq araq ayahta tiqam. ² Na in kazaq. Mataw na gigo hib afaqan araq ayahta gwahtiqan in kam meqin diq waqiy. Teq haiq. In ginad ayahmo dimniyya osad in samanmo gina haiqmo os yaqayta na ago a hi bilaqiy. Haiqgam. Kam nab in Krais ago on mataw saw Judiya-ib gina haiqmo osayta na gilumsihnan haqad in gimen mani kabemmo humab tuwoliy. ³ Ya in gabin kazaq diq bilaqdaiq. Mataw na ginad bilaqsa in ginadibmo mani na emiyya haqdaiq. Teq in nagah em daqayta na tiqemim in na amilib in gimo giholyon nagahta na asor inaqmo a ta em toniy. ⁴ Em tonad in ginad awaz meqin amilib gime kabemmo i gibilen yaqay. Ne hi giwasihsa i inaqmo God ago on mataw tawonta gina haiqta ko tigilumsihnanmo haq yaqay. ⁵ Haqad in daq emnan bilaqiyta na uriyamim in daq dimun diqta emiy. Na in kazaq. Danmeb in gihol Iyaum teq in God anad muzinim in gihol i igiyimo.

⁶ In daq nazaq emsa i gibiyad teq i Taitus abe yahad bulon, Tekomo ni Korin gigo hib lehim gibilenan in mataw gina haiqta na gigem dimunta negad in gimen nagah emnan tibaqiyta haw. Nazaq iyan ni muleqeq ta leheq kabiy ni alulin tiqamta na wamuzad ni Korin on mataw na gilumsihsa in nagah emnan bilaqiyta na emmo emiy haw.

⁷ Ari muran God ago daq dimdimunta kabemmo ne gigo hib ate gwalim usaqta. Ne God anan helmo haqayta na teq ne gamuk anononmo bilaqayta na teq ne ginad amulikmo iysa ne gihol bunmo God ago kabiy ugayta na teq ne gigem dimunta ayahmo i igayta na, daq nagan bunmo ne gigo hib kabemmo diq iyim usaqta. Nazaq iyan i ginad daq dimunta nagan kabemmo ne giholib usaqta nazaqmo ne mataw gina haiqta ko ayahmo gilumsihimo haqauq.

⁸ Ya ne gibe yahsa ne daq emiy haqad ya a hi gibilenaiq. Haiqgam. Ne helmo on mataw ginan ginad bilaqaq ohaiq haqad ya ne gilummo waqaiq. On mataw asor kabiy ka emnan giwaz meqniyayta nazaq ne ginad usaq ohaiq haqad ya gamuk ka gibilenaiq. ⁹ I gigo Iyahta Yesus Krais agem dimunta on mataw negad gilumsihta na ago ne tuhuritiy. In ago nagah kuluwmo diq giqusta teq in nagah nagan anadin ahi emad in hulosim ne gilumsihnan bol. In mat ana haiqta os nog iysa ne God ago sawab nagah dimdimunta inaq tiqiy daqay haqad in nazaq amta.

¹⁰ Ari ya inadta ka bilaqsa ne kazaqmo emiy. Ulig le tihiqiyta nab ne danmeh diq mataw gina haiqta na gilumsihnan ginad eraqsa ne gigo nagah asor humab tiqemiyya. ¹¹ Ari muran ne kabiy na emid hiciyan. Kwaziqmo ne kabiy na hidmo emnan gigem eramta. Nazaq iyan muran ne ginad bilamta nazaqmo ne emiy. Emad ne gigo nagah usaqta naqmo amalib ne kabiy na emid hidmo hiciy bugan. ¹² Luweq ne ginad em daqay, I nagah emamta kabem ahaiq haq daqay. Ne ginad nazaq hi emiy. Mat in mataw gilumsihnan agem eraqaqta na in ago nagah asitmo in inaq diqta naqmo emsa God ahol waqad anad bilaqaqta. Anad bilaqsa mat na nagah kabemmo ahi amta na ago in ahi bilaqdaq.

¹³ Teq ne gihol ruguseq samanno ossata ne mataw gilumsih daqayta ko in nagah kabemmo inaq iyeq afaqan haiqmo osiy nazaq ya ahi bilaqaq. Haiqgam. Naqmo ne mataw ko gilumsihid in ne nenaq araqibmo os daqay haqad ya mataw na gilumsihgo ne gibilenaiq. ¹⁴ Kam kab ne gigo nagah kabemmo inaqta. Sa mataw ko siqim diq iyim osayta. Muran ne gigo nagah asor mataw na negid abeb ne nagah ago siqim iysa teq in ne gilumsiheq in gigo nagah asor ne tineg daqaymo. Nazaq iyid ne bunmo daq amulik naqmo emad ne araqibmo dimunmo tuqus daqay. ¹⁵ I an ulumsihad araqibmo osamta na agamukan araq God ago marib usaqmo. Gamuk na bilam,

Mataw gigo didaq kabemmo tayiyya na in gigo didaq na bitab ahi lilih ham. Sa mataw gigo didaq asitmo usta na in gigemnan ahi moqiy ham. *Kisim Bek 16.18*

Pol mataw asor giqeman uliq Korin-ib lehiy

¹⁶ Ya God esey diq ugaiq. In Taitus agem wazan eraqan ya ne gilumsihnan igem eraqaqta nazaqmo in agem loyinaqmo. ¹⁷ In ne gigo hib muleqe q ta lehdaq haqad i susumun ugan in dimunmo ham. Teq in

kabiy ka emnan agem eraqsa iyan inmo anadibmo ne gigo hib nawa lah.

¹⁸ Lehsa i gimaqbab araq eman in Taitus inaq lahmo. Mat na Yesus awagamun dimunta anonon diqmo bilaqaqta iyan on mataw Yesus ago nan huritaya na gidauhan bunmo gigo hib in abin usaqta. ¹⁹ Teq naqmo amomo ahaiq. Yesus ago on mataw gidauhan na bunmo in mat naqmo atowun eman in i inaq araqib naw na waqe q a leheq on mataw gina haiqta na gibenab tiqemam. I nazaq emeq teq i mataw na gilumsihnan ginad ayahmo bilaqaqta na ulal iysa mataw na Iyahta abin wazid ulilibmo tugwalehdaq. ²⁰ Teq i le naw ayahmo na akabiyem emad on mataw ko gilumsihsa mat araq i gimalib nan emnan i gituw hiciyaq. ²¹ I Iyahta ameb daq dimunta emsa i gigo daq na on mataw bunmo gimeb dimunta tiqiydaqmo haqad i ginad emauqta.

²² Teq i gimaqbab araq eman in giger na nenaq lehiyomo. I mat na ulum waqad kabiy amo amo ugsa in zaway diq iyeq kabiy na emsa i ahol waqyauqta. In ne ginan anad emaq, Ne nagah kabemmo diq mataw gilumsihgo tiqem daqay haqad in le nenaq kabiy na emnan agem diq eraqaq.

²³ Ari ne Taitus ago tuhuritiy. In ya iteqsor dimunta teq in ya inaq i araqibmo ne gilumsihad gimen kabiy emauqta. Teq i gimaqbaban giger teko ya ginan bilayta na in Yesus ago on mataw gidauhan bunmo gibinib kabiy emad in Krais abin eman ayah iyaqta. ²⁴ Nazaq iyan ne mataw ezeqman na gilowan tonsa on mataw Yesus ago nan huritaya na gidauhan bunmo in ne gibiyiy. Gibiyad ne mataw na ginan ginad bilaqaqta na ago in ahol waq kemad in ginad em daqay, Ne Korin gigo daq nazaq iysa iyan Pol ne gabin iluwaqta haq daqay.

9

Krais ago on mataw Korin-ib osayta na in gimaqbaban saw Judiya-ib osayta na gilumsihnan haqad naw em daqay

¹ Ne God ago on mataw tawonta gina haiqta na gilumsihgo anawun ne em daqayta na ago ne tuhuritiy. Nazaq iyan ya na ago agamukan sisaqmo ahi mar tondaiq. ² Ne kabiy na emnan gigem eraqaqta na ya tuhurit. Na ago ya on mataw saw Masedoniya-ib osayta na gimeb ne gabin tuteqmo iluwyaqta. Ad ya kazaq gibilenyaq. Ulig tihiqiyta nabmo Korin on mataw saw Akaya-ibta na in on mataw gina haiqta na gimen naw emnan gihol tuwasti-tayi hagyaiq. Haqsa ne kabiy na emnan gigem diq eraqaqta na ago in tuhurit in kabiy na emgo giqutil tiqeraqaqmo. ³ Teq

i ne giben iluwyaauqta na ago agamukan luweq samanta iydaq haqad i gimaqbaban ezeqman na giqeman ne gigo hib tilehiy. In leheq ne ginad enqenunid ya ne ginan bilayta nazaqmo ne naw na emgo gihol wastitayeq os daqay haqad. ⁴ Luweq ya Masedoniya mataw asor nenaq ne gigo hib lehid ne gihol a hi wastitayeq oseq ne gimebay tuwoqdaq haqad. Sa i ne ginan helmo hawta na ago i gimebay horwazeq tuwoqdaqmo. ⁵ Nazaq iyan ya i gimaqbaban ezeqman na gibilenad gibe yah nog iyan in nawa ne gigo hib tilehiy. In ne gigo hib danmeb leheq nenaq gamuk na wastitayid ne naw ayahmo emnan hel diqmo bilaqiyta na in gimo ginuweq emid tuqusdaq haqad. Nazaq iyid teq naw ayah na ne ginadibmo emiya nazaq nog tiqiydaq. Sa mataw ginad em daqay, Pol-nen lehim Korin gituw bulad gigo nagah hureqsa in naw na emiy nazaq in ginad a hi em daqay.

⁶ Gamuk ka ne hurituy. Mat ago kabiyyah didaq amagin amulikmo leyaqta na in didaq anon kabemmo a hi waqaqta. Teq mat didaq amagin kabemmo leyaqta na in didaq anon kabemmo waqaqta. ⁷ Ne amulik-mulikmo ginad tiqemiyta nazaqmo ne gigo nagah asor emiy. Luweq mat araq atuw hiqiysa ago nagah asor emad bilaqdaq, Mataw ko ituw bulsa ya nagah emaiq haqdaq. Haiqgam. Mat agem dimniysa ago nagah mataw negsa God in anan anad bilaqaqta. ⁸ Ne hurituy. God teq nagah kabemmo negid tigiyunindaq. Giyuninsa ne nagah osgo bunmo inaq iyeq ne gigo nagah kabemmo na amalib kabiyy dimdimunta bunmo tiqem daqay. ⁹ God ago marib gamuk araq nazaqmo bilamta. In bilam,

God in on mataw gina haiqta saw haresmo osayta na gilumsihad in ago nagah kabemmo hunegan in gigo hib lehaqta ham. Teq in ago daq titnonta na tutimmo usaqta ham. *Buk Song 112.9*

¹⁰ God-mo didaq amagin kabiyy anamren ugan in ago kabiyyab leyaqta. Teq inmo didaq na eman gwalmi anon eman mat na neqaqta. Ad God naqmo didaq amagin kabemmo diq negid ne gigo nagah kabemmo na amalib on mataw kabemmo tigilumsih daqay. Sa ne gigo daq titnonta na ne gimen anon kabemmo diq tisorgendaqmo. ¹¹ Ad God ne gigo kabiyy daq bunmo emid dimunmo lehsa ne on mataw gina haiqta na ayahmo tigilumsih daqay. Sa i ne gigo nagah kabemmo na waqeeq a le mataw gina haiqta na negid in ne ginadin emad God esey tuqug daqay. ¹² Nazaq iyan ne God ago on mataw tawonta gina haiqta na ginadin emad gilumsihsa in nagah ago siqim iyim osayta na tuwaq daqay. Teq na

amomo a haiq. Ne on mataw na nagah kabemmo negid in wazlilin tonad gime kabemmo God abin iluwad esey diq tuqug daqaymo. ¹³ Teq daq nawa ne in gilumsihgo em daqayta na in ne gihol alulin emid tugwahtiq hasdaq. Gwahtiq hasid mataw na ne gibiyad bilaq daqay, Ne Krais awagamun dimunta bilagayta na adamano diq emaya haq daqay. Haqad ne naw ayahmo negsa in ahol waqad teq ne on mataw ta asor inaqmo gilumsihsa in gibiyad in God anan sorid ulilibmo tugwalehdhaq. ¹⁴ Ad in ne ginan ginad em daqay, God agem dimunta ayahmo negid ginad enqenunsa ne daq na emay haq daqay. Haqad in ne ginan ginad bilaqsa God in ne gidimum tongo haqad in tubulon daqay. ¹⁵ Helmo. God i gilumsihim naw dimunta iga na in nagah ayah diqmo iyan i abin bilaq hasgo biyah a haiqta. Nazaq iyan i naw na anadin emad God esey diq uguq.

Mataw asor Pol abin wazan woqsa in Korin giqeman gigem meqinta Pol ugsa Pol inmo ahol adanin qway

10

Mataw asor Pol ago kabiyy bayan woqnan ton

¹ Ari mataw asor nan yagad kazaq bilaqay, Pol bolim i inaq osad in ahol wazan woqsa osaqta haqay. Teq in i gihulosim le pesanmo osad in i giyon gamuk atoran diqmo bilaqaqta haqay. Ta teq yaqmo Pol kazaq ne gibilenaiq. Krais inmo ahol wazan woqsa daq kiskista on mataw giyon emaqta nazaq ya ne kiskismo gibileniqmo. ²Gibilenad yaqgo gamuk kazaq ne gigo hib lehaq. Ne ginad buliyad midemeqmo osiy. Luweq ya le gwahtiqaq mataw gihar igayta na gamuk awaz meqin diqmo gibildenaiq. Mataw na ginad emay, Pol ayoginiz nenaq og kab gibin ayahta waqnan haqad kabiyy emaya haqay. Ari in ginad na a hi hulosid yaqmo leheq in giqez na emid tihiqiydaq. ³ Helmo, i mataw og kabtamo. Teq mataw og kabta an wolayta nazaq i an a hi wolauqta. ⁴ An wolgo anaghan i wazauqta ka in og ka ago nagahta a haiq. Haiqgam. Nagah nagan God ago zaway inaq iyim in i gibabun nan igayta ko gigo zaway bunmo tuwlbiyaydaqta. ⁵ Mataw igmo ag haqad gamuk katiya amalib God abin wazan woqsa i in ginad meqinta na bayan woq bugaqta. Woq bugsa i in ginad na eman Krais ahaqenib iysa in Krais ago nan huritayta. ⁶ I gihol tuwastitayim osauqta. Ossa ne Krais ahaqenib iyeq nan bunmo huritad muzinsa teq ne gilikmanib mataw nan othasayta na i faq tinegama.

⁷ Nagah ne gimeb usaqta na ne ahol waq kemeq teq ulum kemi. Ad ne Krais ago matawmo diq iyeq teq ne ginad kazaq emiy. I Krais agota iyim ossa nazaqmo Pol-nen in Krais agota iyim osaymo haqiy. ⁸ Iyahta i gihol abin ayahta igtak i ne giwazid woggo haqad in a hi igtak. I ne giqemid ne zaway iyeq turgo haqad in i gibin ka igtak. Nazaq iyan Aposel abin i giholib usaqta ka ya iluwad imebay a hi woqaqta.

⁹ Teq ne luweq ginad em daqay, Pol i gimen sansandek mar tonaqta kagan in i giritewunnan haqad mar tonaqta haq daqay. Haiqgam. Ne ginad nazaq hi emiy. ¹⁰ Teq nabag ne gigo hib nawa mataw asor ya inan kazaq bilaqay, Pol sansandekib gamuk afaqanta amo amo atoranmo gibile-naqta haqay. Ta teq inmo gwahtiqan i ahol waqsa in ago zaway haiq diqta iyim in gamuk bilaqgo adan sosil iyaqta haqay. ¹¹ Ari mataw nazaq bilaqayta na in i ginan ginad em hasiy. I pesanmo osad gamuk atoranmo sansandekib gibilenauqta nazaqmo i ne nenaq osad teq i tiqemam.

¹² Teq mataw asor ne gilikmanib osad in gimo gihol abin iluwawta nazaq i gihol anan a hi bilaqam. Ad “I mataw ko nogmo” nazaq i a hi bilaqammo. Ta teq mataw na in God ago gamuk anadin a hi emad in gimo an ahol waqad gihol ago daq ulum kemayta na in dimun a haiq. In nazaq an ago daq ulum kemayta na in ginad hi emta adan emay. ¹³ Ari i nazaq a hi erauqta. I ban God igtak na hulosad gibin samanta iluwunna in hulosauq. Hulosad God kabiy igtak naqmo i anadin emad i gihol abin nazaq bilaqauqta. Teq i gigo kabiy na ayawalin le ne gigo hib iytamo. ¹⁴ Nazaq iyan i kwaziqmo ne gigo hib lehta nab i mat araq ago kabiy aduganib a hi gwahtiwi. Na igmo kabiy emta na aduganib le gwahtiqim Krais awagamun dimunta ne gibilen.

¹⁵ I ban God igtak na hulosim mataw ta asor gigo kabiy aqumnib i gihol abin samanta a hi iluwauqta. Haiqgam. I ginad kazaq emauq. Ne ginad helmo haqayta na le ayahmo diq tiqysa teq i dante inaq iyeq ne gilikmanib kabiy kabemmo tiqemam haqauq. ¹⁶ Emeq teq or saw ne gigilehun ban usaqta nab i leheq Jesus awagamun dimunta in tigibilenammu haqauq. Na ezaqgo uliq saw mataw asor kabiy tiqemiyta nab i in giqumnib gihol abin samanta waqnan gituw hiqiyatka. ¹⁷ God ago marib gamuk usaqta ka i anadin emauq. Gamuk na bilam, Mat inmo ahol abin iluwunna haqad in Iyah-taqmo aqumnib ahol abin iluwunna ham. *Jeremaya 9.24*

¹⁸ Gamuk na alulin in kazaq. Mat inmo ago zawayib abin eman ayah iyaqta na in

Iyahta ago kabibiy mat a haiq. Ari Iyahta inmo mat asen baysihad ago kabiy balaw tonsa mat naqmo in Iyahta ago kabibiy matmo diqta.

11

Pol abin Aposel katyta nagan gihaqenib a hi usaqta

¹ Ari ne tok nemeq ginad emiya ya gamuk araq inad hi emta tibilaqnan. Bi-laqsa ne huritad asormo hi bilaqiy. ² God anad ne in amomo diq anan moqad ago hib soqoteq inaq os daqayta nazaq ya inad usaqmo. Na ezaqgo ya Krais inaq gamuk emim mataw aw barasta araq mat inaq asit a hi usta waqim aduw ugayta nazaq nogmo ya ne giwaqeq Krais tuqugdaiq haqad ya in hel diqmo tubulonta. ³ Teq ya rabaiq. Luweq nagah ahulinaqta na in hilhil ago hurit kemim Iv kat ugta nazaqmo mataw i gihar igyatka ko in ne ginad hureqsa ne ginad dimunta amulikmo Krais ago hib usaqta na tuhulos daqaymo. ⁴ Ya ne gigo daq tuhurit. Mat araq ne gigo hib lehim Yesus diqta i anan gibilenta na ago a hi bilaqad in Yesus ta araq katyta anan gibilensa ne huritmo huritya. Ad nazaqmo ne God ago Bugaw diqta mebmehmo waqiyta na hulosad bugaw ta araq katyta waqad ne nan kabemmo a hi bilaqaytamo. Teq mat araq Yesus awagamun dimunta ne mebmehmo waqim muziniyta na buliyad in Yesus awagamun lul ta araq diqta bilaqsa ne huritgomu iyim osayta.

⁵ Ne gilikmanib mataw asor in gimo gihol anan bilaqay, I Aposel bunmo giquriyamim danmebmo diq osauq haqayta. Teq ne huritiy. Ya mataw na gihaqenib a hi osaiqta. ⁶ Helmo ya mat gamuk a hi diq bilaqaiqta teq ya nagah kabemmo ago inad tiqem hasta. Ad i gigo kabiy daq bunmo amalib i ginad awaz meqinta na ulal iysa ne ahol tuwaq kemiyyta.

⁷ Ne ginad emiy. Ya God ago gamuk dimunta na ne gigo hib a lehim gibile-nad ya anawun araq anan a hi bilayta. Teq ya ne gibin wazan eraqsa ya ihol wazan womta na ya daq meqinta em e? ⁸ Haiqgam. Yesus ago on mataw gidauhan ta asor ya ibunib turad ilumsihsa ya ne gigo hib kabiy emyaqta. Na bilaqne ya in gigo hib nagah rin tonim amalib ne giiumsihiyaiqta nog. ⁹ Ya ne nenaq osad nagah araq ago siqim iyeq afaqan na ya a hi negyaqta. Kam nab ya imaqbaban asor saw Masedoniya hulosim bolim ya tiqilumsih yaqayta. Sa ya nenaq osad ya ihol wasihim ne yaqgo afaqan sorgo a hi gibilenyaiqta. Ad abeb teq ya afaqan araq a hi negdaiqmo. ¹⁰ Krais ago gamuk helta

na ya igemab ussa ya helmo diq kazaq bilaqaiq. Ya mataw gimen kabiy samanmo emaiqta na ago ya ibin iluwaiqta haqaiq. Ad ya ibin kazaq iluwsa ne gigo mat araq saw Akaya-ib ya iqeziq ka bayid a hikidik woqdaq.¹¹ Teq nagaqgo ya nazaq ne gimen kabiy emad ya ne gigo nagah araq a hi waqyaiqta? Ya ne ginan inad a hi bilaqsa nazaq emyaiqta ye? Haiqgam. Ya ne ginan inad diq bilaqqaqta na ago God tuhurit.

¹² Teq ya mataw gimen kabiy samanmo emaiqta na ya em tuteqmo a tilehdaiq. Na ezaqgo mataw asor gihol kat ugad bilaqay, I Pol kabiy em nogmo i emauqta haqay. Nazaq iyan ya God ago kabiy samanmo emad ya mataw na giqez adanin tuygaw bugaiq.¹³ Mataw nazaq in gimo gihol abin iluwayta na in aposel katiyta. In mataw kat negnan haqad kabiy emayta. Mataw na giholin awaqaq bilaqne Krais ago Aposel diqta giwaqan nogta teq in hel diq a haitqa. ¹⁴ Teq ya mataw na ginan nazaq bilaqsa ne ginadnad hi emiy. Satan ahol buliyim awaqaq bilaqne God ago angelo awaqaq nog iyaqtamo. ¹⁵ Nazaq iyan Satan ago kabibiy mataw nawa ne gilikmanib kabiy emayta na in gihol awaqaq bulyiad dante titnontu ago kabibiy mataw nog iysa daq na ago ne gihol hi ritenan. Abeb mataw na kabiy meqinta emayta nazaqmo in amenin meqinta tuwaq daqaymo.

Pol Aposel akabiyem emad afaqan kabemmo sor

¹⁶ Ya gamuk tibilayta nazaq ya a ta bilaq tonaiq. Ne ya inan mat agadanta hi bilaqiy haqaiq. Ari ne ya inan nazaq ginad emeq na dimunmo. Ne mat anad asorta hulosan gamuk haresmo bilaqqaqta nazaqmo ne ya ihulosid ya ihol abin asit iluwigmo. ¹⁷ Ya Iyahta anad muzinim gamuk ka a hi bilaqaiq. Haiqgam. Ya ihol abin iluwaiqta ka ya mat agadanta gamuk bilaq nog iyaqi. ¹⁸ Mataw kabemmo in og ka ago daq muzinad gihol abin wazan eraqqaqta. Nazaq iyan ya nazaqmo daq na muzineq ya ihol abin tiqiluwnanmo.

¹⁹ Nabag ne ginad emay, I ginad tiqem hasta haqayta. Nazaq iyan ne mataw agadanta gihulossa in gamuk haresmo bilaqsa ne gigem a hi meqniyaqta. ²⁰ Ad mat araq ne gigeman ne in ago kabibiy mataw samanta iyad ne nan kabemmo a hi bilaqayta. Sa in ne kat negad gigo nagah bunmo samanmo waqsa ne tok nemim kiskismo osayta. Ad in bilaqaq, Yaqmo mat ayahta haqad teq in ne gimanmanib hunegsa ne aholibmo hiqiyad nan araq a hi ugayta. ²¹ Ari i ne nenaq osta nab i daq atoranta nazaq a hi emyauqta. Teq ne ginad ezaq emay? I le ne nenaq kiskismo osta na towa ne ginadib i mataw diq a

haiqta daqagya haqay. Nazaq iyan yaqgo daq kiskista na ago ya anadin emad imebay tuwoqaq.

Ta teq aposel katiyta na in gimo gihol awagamun bilaqad gibin iluwsa ya nazaqmo ihol awagamun bilaqad yaqmo ihol abin tiqiluwdaiqmo. (Oyeq, ya mat agadanta gamuk bilaq nog tiqiyaiq.) ²² Mataw na in Hibru ginedan asor e? Ya Hibru ginedan araqmo. Teq in Isrel gigo God anan helmo haqay ye? Ya nazaqmo Isrel gigo God anan helmo haqaiqta. In Abraham anaynayniz asor e? Ya inaqmo Abraham anaynayn araqmo. ²³ In Krais ago kabibiy matawtu ye? Ya in giquriyamim Krais ago kabiy dimun diqmo emaiqta. (Ya mat agadan diqta gamuk bilaq nog tiqiyaiq.) Teq ya mataw na gigo kabiy uriyamim ya iholtuw bulad kabiy ayah diqmo emta. Ad ya mataw na giquriyamim ime kabemmo bit giqirquran osaytab osta. Teq mataw gime kabemmo inoliyta na in mataw na giquriyammo. Ad ya ime kabemmo moqnan tonta na in giquriyammo.

²⁴ Kam abaynaginmo Juda mataw ya iwazim gime 39 nazaq gusib ya inol titayi. ²⁵ Teq in gime ezeqmanmo yukib inoliy. Ad in gime amulikmo eraqim ya imalib giq hunegiymo. Ime ezeqmanmo ya muyib lehsa muy meqniyim kamismeh wolahta. Teq kam araqab muy meqniyan kam amulikmo taromab zeqab inaqmo ya kamis amalib al tonad luwta. ²⁶ Tutimmo ya uliq-uliqgo luwad inamur a hi emyaiqta. Ya yuw aseseqta urotim lehsa yuw ineqnan tonyagta. Teq mataw girin inaqta danib ibiyad inol emnan ton yaqayta. Sa yaqmo isenlulmo in ya inol emnan tonsa mataw ta asor Juda a haitqa nagan ya inol emnan ton yaqaymo. Uliq aseseqtab ya lehim ossa inol emnan ton yaqayta. Ad ya uliq huloseq danib lehad luwsa inol emnan ton yaqaymo. Ya kamismeh luwsa mataw inolnan ton yaqayta. Teq mataw asor katiyad "I ni nimaqbaban" haqad teq in ya inol emnan ton yaqaymo.

²⁷ Ya iholtuw bulad kabiy afaqanta emyaiqta. Sirisirimo taromab ya a hi usyaiqta. Ya didaqnan yuwanan moqad ime kabemmo didaq haitqmo osyaiqta. Ad tim inolsa ya nagah araq ihol sihendaiqta haitq iyaiqta. ²⁸ Teq yaqmo igo afaqan kawa ya tibilayta ka amomo ya a hi soryaiqta. Haiqgam. Kam bunmo ya Krais ago on mataw gidauwan uliq-uliqgo osayta na gigo afaqan inaqmo sorad ya ihol afaqan diq iyyaqta. ²⁹ Ne ginad emiy. Krais ago on mataw gilikmanib araq ago zaway hiqiyasa yaqgo zaway tihiqiyaqtamo. Teq in gigo araq daq meqintab woqsa ya ihol afaqan iysa inad timeqniyaqtamo.

³⁰ Ari ya dante araq haiqgam iyeq yaqmo ihol abin tiqiluwdaiq. Ta teq yaqgo zaway hiqiyan ya ihol ulumsihgo dan haiqmo osta naqmo ago ya ihol abin iluwdaiqta. ³¹ Helmo ya bilaqaiq. I Iyahta Yesus Amam God abin tuteqmo soramta na immo ya igem ahol waq kemad ya a hi katiyaiqta na ago in tuhuritaq. ³² Na in kazaq. Kwaziqmo ya uliq Damaskus-ib ossa King Aretas ago ahaqenibta na in uliq na wamuzad osim bilaqan uliq na ago dan ez bunmo tawan emiyya, in ya iwazeq iqirqurnan haqad. ³³ Teq hajq. Ya iyogniz asor ya iwaqim kararib igemim teq in gel asan ban ihulosan wole ogib hitiqim ya tukim lehsa mat na a hi iwaz.

12

Pol nagah araq mataw sen qwayim ahol waqayta nazaq nog ahol waqsa God gamuk awaz meqinta ug

¹ Ya ihol adanin qwaynan haqad dante araq haiqgam iyim ya ihol abin iluveq a tileh tutnan. Gamuk ka asit a hi ulumsihdaqta teq ya bilaqmo tibilaqdaiqta. Ad mat araq sen qway nog iyim Iyahta ago nagah asor gibilayd teq in gamuk ulilembata hurrutta na ago ya ne tigibilendaiq. ² Ya Krais ago mat araq abin kazaq hurrutta. Kwaziqmo God in mat na waqim ad ago uliq Heven-ibmo diq gwalaha. Teq in gwalaha na ago ulig 14 nazaq thihiqiy. Mat na asan inaqmo gwalaha o hajq in awitanmo gwalah o ya inad a hi emaiq. God amomo hurrutta. ³⁻⁴ Ari God in mat na waqim ad ago uliq Paradais-ib gwalaha naqmo ago ya hurrutta. Teq ya teko bilayta nazaq ya a ta bilaq tonaiq. In asan inaqmo gwalaha o hajq in awitanmo gwalah o ya inad a hi emaiq. God amomo hurrutta. Mat na gwalehim gamuk lul araq diqta hurit. Hurritim in bilaggo anad siqim iyaq. Sa gamuk na agununin ayah digmo iyan in bilaggo ago zaway hajqmo. ⁵ Ya mat naqanta abin tiqiluwdaiqta. Teq yaqmo kabiy emta na ago ya ihol abin iluwnan ituw hiqiyyaq. Ari tutimmo yaqgo zaway hiqiyan ya ihol ulumsihgo dan haiqmo osaiqta naqmo ago hib ya ihol abin tiqiluwdaiq.

⁶ Helmo ya ihol abin diq tiqiluwnan haqad ya mat agadanta gamuk bilaq nog a hi iydaiq. Na ezaqgo ya gamuk heltaqmo bilaqdaiqta. Teq yaqmo ihol washim ya ihol abin a hi iluwaiqta. Luweq mataw yaqgo gamuk teq yaqgo daq diqta na anadin a hi emad in yaqgo daq asor ahol a hi waqiyta na inaqmo bilaqad in ya ibin samanta iluwid ulilibmo diq gwalehdqa haqad.

Nagah araq sasuq nogta Pol asan ulum tayyaq

⁷ Helmo, ya God ago uliq nab gwalehan in ago nagah dimdimunta kabemmo iqisihunta. Teq ya nagah na anadin emad ya inad dimniysa ihol abin wazid eraqgo God hulos. Nazaq iyan in nagah araq bilaqne sasuq nogta eman bolim ya isan tuqulumaq, ya ihol wazid woqsa ihol abin a hi iluwdaiq haqad. Nagah na Satan ago hib osim bolim in bilaqne Satan ago nantut nog iyim ya iholib usaqta. ⁸ Ussa ya ime ezeqmanmo Iyahta inaq gamuk emad tubulon, in ya iholib nagah na walemdaq haqad. ⁹ Teq in ya kazaq ibilan. Ya a hi walemdaiq ham. Ya igem dimunta nigsa ni zaway diq iyeq afaqan na tisordaq ham. Na ezaqgo ham ya mat ago zaway hajqta na ulumsihad amalib kabiy emsa yaqgo zaway in aholib ulal tiqiy hasaqtä ham. Iyahta nazaq ibilenan muran ya mat yaqgo zaway hajqta nazaq ya ihol abin iluwnan inad diq bilaqqaqta. Ya nazaq emsa Krais ago zaway ayahmo ya iholib ussa ya loyin kemaiqta. ¹⁰ Nazaq iyan ya ihol loyinsa yaqgo zaway hiqiysa kam nab ya inad dimniysa tok nemim osaiqta. Krais abin ya iholib usaqta na ago mataw ibilawunad afaqan yagad teq in ya imeqin tonayta. In nazaq emsa ya God ago kabiy emad ihol bibiyowunaiqta. Teq daq nazaq iholib gwahtiqa ya igem kiskismo ussa nan kabemmo a hi bilaqaiqta. Na ezaqgo ya ihol loyinsa yaqgo zaway hiqiy nog iyaqta nab Krais ago zaway ya iholib bolsa ya iwaz timeqniyaiqta.

Pol in uliq Korin on mataw God anan helmo haqayta na zaway nag

¹¹ Ya mat agadanta gamuk bilaq nog tiqiy. Teq negmo ya igem wizan ya gamuk nawa na tibilayta. Negmo ya ibin dimunta na bilaq nagiyta. Teq ne a hi bilaqan iyan yaqmo ihol abin tibilay. Helmo ya mat ibin hajqta teq ya mataw nawa ne ginan Aposel danmeb diqta haqayta na gihaqenibta a hajq. ¹² Ya ne gilikmanib osad Aposel ago kabiyomo diqta emad ya ituw a hi hiqiyyaqa. Daq azawayin inaqta amo amo kabemmo teq kabiy aseseqtaqmo ya ne gigo hib giqemsa ya Aposel diqta na ago ne tuhurit kemiy. ¹³ Ya Krais ago on mataw gidauhan ta asor na gigo hib kabiy daq emta nazaqmo ya ne gigo hib tiqemtamo. Ari ya in gigo hib kabiy emta na araq ne gigo hib a hi emid ne bilaqsa ya huriq. Helmo daq araq ya in gigo hib emim teq ya ne gigo hib a hi emta na in kazaq. Ne daq nagah yaggo haqad ya a hi gibilenan ne ya iwamuzgo giholtuw a hi buliy. Yaqgo daq na ne ginadib meqniyid ne ginad dimunta yagad yaqgo daq meqinta na walemad anadin ta hi emiy.

¹⁴ Ari ya ime ezeqmanta ne gigo hib lehnar ihol tuwastitayim osaqt. Ya ne gigo hib leheq didaq nagah yaggo a hi gibilenid ne ya iwamuzad giholtuw a hi bul daqay. Na ezaqgo ya ne gigo nagah waqnan inad a hi bilaqaq. Ya negmo giwaqnan inad bilaqaqta. Ne ginad emiy. Onmin in ginenmaman gimen didaq nagah zaygo mani humab a hi wolayta. Haiqgam. Ginenmaman naqmo in gigo onmin gimen nagah zaygo mani humab wolayta. ¹⁵ Nazaq iyan ya inad dimniya yaqgo nagah bunmo ne gimen hulosad ya ihol nog inaqmo tuhulosdaq. Ya ne ginan inad ayahmo bilaqsa ta ne ya inan ginad asitmomo bilaqdaq e?

¹⁶ Ya nenaq osad afaqan a hi negta na ago ne ginad tiqem hasayta. Teq luweq ne ginad em daqay, Pol kat igad ago soysoy amalib i gihureqan i in aqez muzta haq daqay. ¹⁷ Ya mataw asor gigeman ne gigo hib lehiyta na in ne kat negad ne gigo nagah asor samanmo yaqmen waqiy ye? ¹⁸ Ya Taitus abe yahsa in ne gigo hib lahta. Lehsa i gimaqbab araq na ya eman in inaq lahmo. Lehim Taitus kat negad ne gigo nagah asor samanmo wam e? Teq in anad dimunta negad nenaq kiskismo osta nazaq i nenaq a hi ostamo ye? Ad in ne gilumsihnan kabiy dimunta ne gimen emyaqta nazaqmo i a hi em negtamo ye?

¹⁹ I gamuk kazaq bilaqsa nabag ne hurratad ginad emay, Pol ayogniz nenaq in gimo gihol ulumsihnan haqad gihol adanin qwayim gamuk ka i gibilenayta haqay. Haiqgam. God i gibiyas i Krais ago on mataw iyim i gamuk ka helmo ne gibile-nauq. I giyogniz dimun diqta, kabiy daq bunmo i emauqta na i negmo zaway negid ne giwaz meqniyeq tur daqay haqad i emauqta. ²⁰ Ya rabaiq. Luweq ya le ne gigo hib gwahtiqaq ya ne ginan inad emaiqta nazaq nog ne a hi iysa ta ne ya inan ginad emayta nazaq nog ya a hi iydaiqmo. Teq ya le ne gigo hib gwahtiqaq ne gilikmanib daq meqinta kagzaqta ahol waqdaiq haqad ya rabaiqmo. Ne an mugsa teq ne an agem meqinta ugsa teq ne gigem meqniya teq ne an rabunad giholbin giholbinmo ossa teq ne an agilehunan bilaqsa teq ne yuw alozin a luwsa teq ne girerey emsa teq ne ginad hi emta adan emad ginadibmo kabiy daq emsa luweq ne daq nagan emsa ya gibiydaiq haqad ya rabaiq. ²¹ Teq luweq ne gigo mataw asor kwaziqmo daq anumlan inaqtta em yaqayta na teq asor an haresmo hureeqe inaq us yaqayta na teq asor gihol bilaq adan ayahmo giholib ussa in muzin yaqayta nagan a hi bulyeq gigo daq meqinta nagan gileh a hi negsa ya gibiydaiq haqad ya rabaiqmo. In nazaq emad luwsa ya ne gigo hib a ta gwahtiqaq nab yaqgo God ne gimeb iwazid woqeq ya

iqutil tartaysa mataw nan a hi hurratayta na ginan gaq wazad tuqusdaq.

13

Korin on mataw Krais ago nan hurratayta na in ginad helmo haqayta na alowan ton daqay

¹ Muran ya ime ezeqmanta ka ne gigo hib leheq ya mataw nan a hi hurratayta na hazizirib tigiqemdaiq. Nazaq haqad ya God ago marib gamuk araq usaq na anadin tigenmaiq. Gamuk na bilam,
Mataw giger o ezeqman nazaq in giqez rom toneq gamuk araqibmo bilaqid teq in gigo gamuk na zaway iyeq nazaqmo tuqus tutdaq ham. *Lo 19.15*

² Ya ime gigerta le ne nenaq osad ya eraqim mataw kwaziqmo daq meqinta emiyta na giyogniz bunmo nenaq gidek wazim gibilen kem. Ad muran ya pesanmo osad ya kazaq in gidek wazim a ta gibilen tonaiq. Ya ne gigo hib muleqeq ta leheq teq ya mataw daq meqinta emay na gilowan a hi tondaiq haqaiq. ³ Na ezaqgo negmo ya igeem ulumad bilaqay. Ezaq teq Krais ni niqezab gamuk bilaqaqta na ago i hurrat kemam haqayta. Ari ne ginad emiy. Krais ne giwastitaynan haqad in ne girabunad daq kiskista a hi negaqt. Haiqgam. In ne gilikmanib kabiy awaz meqin diqta emaqta. Sa ya ne gigo hib leheq nazaqmo diq ya tiqemdaiqmo. ⁴ Helmo kwaziqmo Krais ago zaway haiqta nog iyan mataw in ayib dom woliyta. Teq muran in God ago zaway amalib kayeqmo luw osaqt. Ari i Krais inaq soqotim osad in og kab zaway haiqmo osta nazaq i osauqtamo. Teq i God ago zaway amalib Krais inaq kayeqmo osad i ne gilumsihad giwastitayaqta.

⁵ Krais ne giduganib usaqta na ago ne ginad a hi emay ye? Negmo gihol ulum kemad teq gigem loyin kemi. Ne Krais anan helmo haqad inmo anad muzinad osay o haiq? Ari ne gihol loyinsa ne gidugan samanmo usid nab ne ginad em daqay, Krais Jesus i giduganib a hi osaq haq daqay. ⁶ Ad ne i gilum kemiymo. Gilum kemeq Krais i giduganib ossa i in ago kabiy emauqta na ago ne hurrat kemi. ⁷ Teq God ne ginad wamusza ne i gilum kemad ginad meqinta araq hi waqiy haqad i ne gimen God bulonauqta. Ta teq Krais igmo giduganib osaqt na ulal iysa ne i ginan helmo haq daqay haqad nazaq i God a hi bulonauqta. Haiqgam. Luweq ne i gibiy kireh tonsa i mataw katiya nog iysa ne dan titntona tuhulos daqay haqad i nazaq ne gimen God bulonauqta. Teq i ginad ayahta ne gigo hib usaqta na in kazaq. Ne i ginan helmo haqay o haiq na

o tob iysa ne God-mo anad muzinad daq dimunta emiy haqauq. ⁸ Ne ginad emiy. I God ago gamuk helta bayid woqgo i giholib haiqgam. I gamuk helta na ulumsihgomu osauqta. ⁹ Daq alulin naqmo ago i gigo zaway hiqiysa ta ne giwaz meqniyim ossa nab i ginad tidimniyiq. Ad ne giwaz timeqniy haseq God anad bunmo tumuzin bug daqay haqad i ne gimen God bulonauqta. ¹⁰ Ya God ago on mataw gilumsihid in giwaz meqniyeq os daqay haqad Iyahita in ya ibin Aposel ka yagta. Ya mataw giwazid woqgo haqad in ya ibin ka a hi yag. Nazaq iyan ya nenaq nab a hi osad iyan ya sansandek ka mar tonim eman ne gigo hib lehaq. Ne gamuk ka ahol waqad gihol wastitaysa teq ya nawa lehdaiq haqad. Nazaq iyid teq ya leheq ne nenaq midemqanmo osad ya ibin ayahta ka amalib atoranmo a hi gibilendaq.

Pol ago zeq dimun eman Krais ago on mataw uliq Korin-ib osayta na gigo hib lah

¹¹ Ya imaqbaban, yaqgo gamuk bolim kawaqmo tihiqiy. Ne ginad dimniysa osiy. Ad ne wastitayeq anonon diqmo osnan haqad giholtuw bulad luwiy. Teq ya ne gigo os wastitaygo gibilenta ka ne huriyimo. Huriteq ne ginad amulikmo iysa zib allowabmo osiy. Ne nazaq emsa teq God i giceman i an anan ginad bilaqsa zib allowab osauqta na inmo ne nenaq tuqosdaq.

¹²⁻¹³ Ari God ago on mataw gigo daq titnonta na amalib ne an zeq dimun ugiy. Teq God ago on mataw tawonta kawa osayta ka bunmo in gigo zeq dimun ne negaymo.

¹⁴ Ari Iyahita Yesus Krais agem dimunta negsa ne osiy. Teq God ne ginan anad bilaqsa in ago Bugaw Dimunta ne bunmo nenaq usanmo. Nawaqmo.

Galesiya

Sansandek Pol mar tonan saw Galesiya-ib lahta Gamuk ameb lehaqta

Mataw en ameb diq Yesus anan helmo haqiyta na in Juda-mo. An teq abeb Yesus in Pol eman lehim in og saw bunmo on mataw en ta asor Juda a haiqta na gigo hib lehad in mataw na inaqmo Yesus awagamun dimunta gibilenyaq. Gibilensa on mataw na kabemmo bolim le Yesus ago asenlulib tugwahtiqa in Juda mataw helmo haqiyta na nenaq tuwastoni. Teq mataw en ta asor helmo haqiyta na in God ago maror Moses bilamta na anan uliq araq ago maror haqad in a hi muzin yaqayta, Juda em yaqayta nazaq. Nazaq iyan mataw na in maror na agamukan a hi muzinsa Juda mataw helmo haqiyta na in ginan bilaq yaqay. Mataw na in God ago on matawmo diq a hi iy daqay haq yaqay.

Afaqan nazaq gwahtiqan teq Juda mataw asor saw Galesiya-ib lehim Yesus ago dauh nab osiyya na suleq katiya gibilenad in ginad tuwalebol yaqay. Ad in giwaz diq meqniyeq mataw en ta asor helmo haqiyta na gigjemid in God ago maror Moses bilamta na muzinad gihol abatan asan urot-nan ton yaqay. In bilaq yaqay, Ne gisan a hi uroteq teq ne God ago maror aduganib le a hi gwahtiq daqay haq yaqay.

Hagsa Pol nagah na abin huritimmo in Galesiya ginan anad meqniysi in gimen sansandek ka mar tonim eman in gigo hib tilah, in ginad agadanta na tuwastitaynan haqad. In bilam, I Yesus Krais anan helmo haqauqta naqmo amomo i qigeman i God ameb on mataw titnonta kayeqmo kuluwa-kuluwmo osamta tigiyim osauq ham. Haqad in bilam, Yaqgo gamuk ka ya inadibmo a hi bilaqaiqta ham. Teq ya gamuk ka mat araq ago hib a hi wayta ham. Ya Yesus awagamun bilaqaiqta ka God-mo isihunan ya ne gibilenaiq ham. Nazaq iyan ne ginad katiya na hulosad gamuk hel diqta ya gibilenaiqta kaqmo ne waz naqmo hiqiyiy ham.

God inmo Pol atowun eman in Aposel akabiyan emaqta

¹ Yaqmo Pol, ya Aposel araq. Teq mat diq araq ya itowun eman ya Aposel gwahtiqim a hi luwaiq. Haiqgam. God Yesus Krais hodhodab wazan eraqim in Amam inaq kabiya na yagiyya. ² Yaqmo teq ya imaqbaban ya ginaq kawa osauqta ka, i bunmo

sansandek ka mar tonim saw Galesiya-ib on mataw Krais ago nan hurityata na gidauhan bunmo gimen eman leh negaq.

³ I Gimam God teq i gigo Iyahta Yesus Krais inaq in gigem dimunta negad in ne gigem emid kute neman. ⁴ Yesus Krais-mo i Gimam God anad muzinim bolim i gimen ahol nog hulosim i gigo daq meqinta nagan i ginad a ta hi wamuksa muran i samanmo tiluw osauqta. ⁵ Nazaq iyan kam bunmo i God abin iluwad osuq. Hel diqtaqmo.

Yesus awagamun amulikmoqmo usaqta

⁶ Mataw! Ya ne gibin araq diq huritim ihol turuh nam. Na in kazaq. Krais agem dimunta negad gilumsihan teq God ne gililewunim giwamta. Giwaqan sisaq huiq ne gihol buliyim Yesus awagamun lul araq diqta muzinad ne God gileh ug nog iyim tuqosay. Ya ne gibin nazaq huritim ya ritenim inadnad diq tiqemaiq. ⁷ Helmo, Yesus awagamun araq araq haiqgamta. Teq mataw asor ne giwazbalnan haqad in Krais ago wagam dimunta na wazbuliym ne gibilenayta. ⁸ Ta teq igmo gigo araq ne gigo hib leheq Yesus awagamun i mebmebmoo gibilenata na buliyeq wagam lul ta araq gibilenid God in kusluw ugid ban meqintab wolehan. Ari angelo araq Heven-ib gehitiq Yesus awagamun buliyeq wagam ta araq gibilenid God in kusluw ugid in nazaq ban meqintab wolehanmo. ⁹ Ya nawa tibilayta nazaq ya a ta bilaq tonaiq. Mat araq Yesus awagamun ne mebmebmoo huritim anan helmo haqiyta na buliyeq wagam ta araq gibilenid God kusluw ugid in ban meqinta nab wolehan.

¹⁰ Ya kazaq atoranmo bilaqid ne ya iwazineq inan dimun haq daqay haqad ya gamuk ka bilaqaiq e? Haiqgam. God-mo ya inan dimun haqdaq haqad ya gamuk ka bilaqaiqta. Ya matawmo gigemid ginad dimnni daqay haqad kabiya a hi emaiqta. Na ezaqgo ya mataw ginad muzinad kabiya emeq teq ya Krais ago kabibiy mat a hi idaiq.

Pol in Aposel gwahtimta awagamun

¹¹ Ya imaqbaban, ya ne hel diqtaqmo gibilenaiq. Yesus awagamun dimunta ya bilaqaiqta ka mat araq og kabta eman a hi gwahtimta. ¹² Wagam na ya mat araq ago hib a hi huriita. Teq mat araq wagam na asuleqin a hi yagtamo. Haiqgam. Yesus Krais-mo gamuk na iqisihunta.

¹³ Ne yaqgo tur os kwaziqta na awagamun tuhuritiya. Ya Juda gigo maror ahagenib osad ya God ago on mataw Krais ago nan hurityata na atoranmo gimeqin tonad giwalebolyaiqta. ¹⁴ Kam nab ya mat araq diq nazaqta ya luwyaiqta. Yaqgo

on mataw gilikmanib ya iyogniz kabemmo giqiriyamim ya ameb diq iyim i gisesan Juda gigo daq teq in gigo gunun bunmo ya muzin bugyaiqta.

¹⁵ Ta teq kwaziqmo ya inen a hi iqem-samo God agem dimunta yagad itowun tiqamta. Itowun eman ya tugwahtiyan teq ya in ago kaby emgo haqad in tigilewun.

¹⁶ Illelewunad in Atatin tiqiqisihun, iqishunid ya in Atatin awagamun na a leheq on mataw en ta asor Juda a haiqta nagan gibilendiq haqad. Ari God in Atatin tiqiqisihun ya teq ezaq tondaiqta na ago ya mat araq ago hib lehim a hi susumun ug. ¹⁷ Teq ya uliq Jerusalem-ub mataw ya iquriyamim danmee Aposel gwahtiqiyta na gigo hib a hilehmo. Haiqgam. Ya era hid naqmo saw Arebiya ban lehim tuqos. Osim abeb ya uliq Damaskus-ib muleqim ta leh. ¹⁸ Ad abeb ulig ezeqmanno tihiqyan teq ya Pita ahol waqnan haqad uliq Jerusalem-ub tugwaleh. Gwalehim ya Pita inaq wuk giger nazaq tuqos. ¹⁹ Osad ya Aposel asor bunmo a hi gibiyad ya Iyahta amikqan Jems amomo ahol way.

²⁰ (Gamuk kawa ya ne gimen mar tonaiqta ka God ibiysa ya hel diqmo bilaqaiq. Ya a hi katyaiq.)

²¹ Ari abeb ya saw giger Siriya ayow Silisiya inaq gigo saw ban lehim tiluwyaiq. ²² Luwsa kam nab Yesus ago on mataw gidauhan saw Judiya-ib osiyya na in ya inobun asit ahol a hi waqad in yaqgo a hi hurit kem yaqayta. ²³ Teq mataw ya iwagamun asitmo kazaq bilaqsa in hurit yaqay. Mat kwaziqmo i Yesus anan helmo haqsa in i gimeqin tonad luwyaqta amatin na muran in anad buliyim Yesus awagamun dimunta on mataw tigibilenaq haq yaqay. ²⁴ Haqsa Yesus ago on mataw saw Judiya-ibta na in ya iwagamun asitmo nazaq huitim in God abin tiqiluw yaqay.

2

Aposel bunmo Pol inaq gigem amulikmo iyiy

¹ Ari ulig 14 nazaq le tihiqyan ya Barnabas inaq uliq Jerusalem-ub tugwaleh. Gwalehad i Taitus waqim inaq gwalehmo. ² Teq ya gwalehta na God-mo ya inadib emim ibilenan ya gwalehta. Gwalehim ya Yesus ago on mataw gigo aseseqta na girom tonim nenaq humab tuwol. Humab wolim i gimbomo giholbin osad teq ya Yesus awagamun ezaq diqta on mataw en ta asor Juda a haiqta nagan gibilenad luwyaiqta na ago ya mataw aseseqta na tigibilen bug. Luweq ya wagam na wazbuliyeq bilaq kireh tonid teq ya iholtuw bulad luwta na saman iydaq haqad. ³ Teq in yaqgo gamuk araq diq a hi wastitayi. Ad in Grik mat ya inaq lehta

anan Taitus haqay na ahol abatan asan urotgo a hi bilaqiyomo. ⁴ Helmo, mataw asor urotgo bilaqiyta teq daq na a hi gwahtim. Mataw nazaq bilaqiyta na katiyim bilaqiy, I ne gimaqbaban haqiy. Ta teq hainq. Na in katiyad bo i giwirinad luw yaqay. Na ezaqgo Krais Yesus i giqamun hasan i God ago maror Moses bilamta na hulosim samanmo luw osauqta na ago in ahol waq kemnan haqad. Mataw na ginad em yaqay, I on mataw ka i gigo gunun amalib a ta giqirqrurid in i gigo kabiliy mataw samanta tuqos daqay haq yaqay. ⁵ Ta teq i ne ginadin emad i mataw na gihakenib iyim daq na a hi em. Haiqgam. Yesus awagamun dimunta na aduganib gamuk araq katyita hi usan haqad i mataw gimileq iyayta na giqez asit a hikidik muzinta.

⁶ Ari ya mataw aseseqta gibilenta na gibiyisa in bilaqne mataw giben inaq nogta teq in ginad asor muturta a hi yagi.

(Teq mataw na giben inaq o haiq na ya inadib nagah amik diq iyta. Na ezaqgo God on mataw bunmo gibiyisa in gibin araqibmo iyaqta. Iysa in asor gigomo a hi lehaqta.)

Ari ya Yesus awagamun bilagyaiqta na mataw aseseqta na gibilenan in asit a hi wastitayi. ⁷ In ginad kazaq emiy. God Pita atowun emim kabi yegan in mataw gihol abatan asan urotayta na Yesus awagamun gibilenaqta haqiy. Ad nazaqmo in Pol atowun eman in mataw gisan a hi urotayta na Yesus awagamun gibilenaqta haqiy. ⁸ (Na ezaqgo God ago zaway Pita aholib kabi emsa in Juda on mataw gigo Aposel iyta. Ad zaway naqmo ya iholib kabi emsa ya on mataw en ta asor Juda a haiqta nagan gigo Aposel iyta.) ⁹ Nazaq iyan mataw aseseqta na bunmo in God-mo kabi yagta na ago ginad tiqem hasiy. Ginad em hasad Jems teq Pita teq Jon in Yesus ago on mataw na gigo danmeba iyim in ya Barnabas inaq giben tuwaziy. Giben wazad in i gibileniy, I garabmo God ago kabi yiqem haqiy. Emad ne on mataw en ta asor Juda a haiqta nagan gigo hib lehsa i mataw gihol abatan asan urotayta na gigo hib tileham haqiy. ¹⁰ Haqad teq in gamuk amulikmo igiyta na in kazaq. I giger Krais ago on mataw gina haiqta na ginadin emad gilumsiham haqad in i gibileniy. Teq ya inad nazaq tekomo tuqusta iyan ya in giqez na muzinnan inad diq tibilam.

Pol in Pita ago daq meqinta eman ulal iy

¹¹ An teq abeb Pita uliq Antiyok-ib bolim osad in ago daq meqinta araq ulal iyan ya in inaq an nob ugim turadmo ya wad. ¹² Na ezaqgo Jems ago mataw asor uliq nab a hi bolsamo Pita in Krais ago on mataw Juda a haiqta na gigo bitab leheq

nenaq didaq neqyaqta. Ari abeb Jems ago mataw na bo gwahtiçim in Antiyok mataw Krais anan helmo haqiyta na gihol abatan asan urotgo giwaz timeqniy yaqay. Sa Pita in Jems ago mataw na girabunad in ayogniz Juda a haiqta na gihulosim giholib tiliqiyyaq.¹³ Samo Juda mataw Yesus anan helmo haqiyta na bunmo eraqim Pita asen muzim daq katiyta na inaq tiqem yaqaymo. Emsa in gigo daq katiyta na Barnabas anad tuhurammo.¹⁴ Ta teq ya mataw na gibiyisa in gigo daq na Yesus awagamun helta na inaq a hi rirensa ya in bunmo gimeb Pita kazaq bulon, Ni Juda matta hay. Teq ni uliq kab bolim osad ni on mataw Juda a haiqta kagan gigo daq muzinad in osayta nazaq ni osyaqta hay. Teq muran ezaq haqad ni ninad buliyim mataw Juda a haiqta ka gibe yahid in Juda gigo maror ahaqenib iyeq muzingo ni gibilenaq hay?

I Yesus anan helmo haqauqta naqmo amomo i giqeman i God ameb titnonta iyim osauqta

*On mataw Yesus anan helmo haqayta
naqmo in God ameb on mataw titnonta*

¹⁵ Helmo, ya iyogniz nenaq i Juda-mo gisenlulib gwahtiçim i giben Juda mat us-aqta. I on mataw en ta asor Juda a haiqta nagan gilulib a hi gwahtiçim in giben mataw God ago gunun itiyonayta nazaq i giben a hi usaqta.¹⁶ Teq i ginad kazaq emauq. God ago maror Moses bilamta na ago gunun in mat araq emid God ameb titnonta a hi iydaq haqauq. Mat Yesus Krais anan helmo haqauqta naqmo God in anan mat titnonta haqauqta haqauq. Haqad i Juda mataw asor i inaqmo Krais Yesus anan helmo haqid God i ginan mataw titnonta tihaqdaq haqad i Moses ago gunun na akabiyan hulosad i Krais-mo anan helmo tihawta. Na ezaqgo on mataw God ago maror Moses bilamta na ago gunun akabiyan emim teq in God ameb titnonta a hi iyayta na ago iyan.

¹⁷ Ari God i ginan mataw titnonta haq-daq haqad i in ago maror Moses bilamta na hulosad i Krais amomo anan helmo haqad inaq soqotim osauqta. Nazaq iyan on mataw en ta asor Juda a haiqta na in God ago maror ahaqenib a hi osayta nazaq nog i tiqiyim osauqta. Teq i ginad ezaq emam? Krais i giqeman i giben mataw God ago maror Moses bilamta na anadin a hi emad daq meqintay emayta nazaq nog i tiqiy haqam e? Haiq kidik!¹⁸ Ya Krais anan helmo tihaqim ya God ago maror Moses bilamta na wolzilay nog iyan in ago zaway ya inad wamuzgota na tihiqiy bug. Ari abeb nagah ya wolzilayan timta na ya waz

ta eraqid mataw ya ibiysa ya maror Moses bilamta na ahaqenib osad ago gunun itiyonaiqta amatin nog a ta iydaiq.¹⁹ Na ezaqgo kwaziqmo ya God ago maror na itiyonsa maror na ya iyon bilaqan ya moyta nog tiqiy. Moqim muran ya maror na ahaqenib a ta hi osaiqta. Ad teq ya kayeqta iyim ya maror na ago gunun anadin a ta hi emad ya God anadmo diq muzingo osaiqta. Na in kazaq. Ya Krais aholib tisoqotan mataw in ayib dom wolad ya inaqmo ayib dom wol nog tiqiyim.²⁰ An muran yaqmo diq kayeqmo a hi osaiqta. Haiqgam. Krais ya iduganib kayeq iyim osaqla. Inmo ya inan anad bilaqsa in ya imen ahol nog hulosim ilumsih. Ilumsihan muran ya og kab osad God atatin anan helmo haqsa inmo ya iqeman ya kayeqmo osaiqta.²¹ Nazaq iyan God agem dimunta on mataw negad gilumsihaqta na ya eman daq samanta a hi iyaq. Ari God ago maror Moses bilamta na in on mataw giqemid God ameb titnonta iyid teq nagaqgo Krais mom? In samanta moq nag.

3

*God ago maror Moses bilamta na adan
teq Yesus anan helmo haqgo adan*

¹ Ne Galesiya-ib matawti, ne God ago maror Moses bilamta na a ta muzinnan tonad ne ginad hi emta adan tiqemay. Nog ne kusluw negan ne ginad agadan iyaq? I Yesus Krais awagamun dimunta gibilensa ne bilaqne gime anonabmo Yesus ayib dom wolan ussa ahol waq nog tiqiyiyya.² Ya nagah araq ago tisusumun negnan. Ne God ago maror Moses bilamta na adan muzinim God ago Bugaw Dimunta waqiy o haiq ne Yesus awagamun dimunta na anan helmo tihaqim teq ne Bugaw Dimunta na waqiy?³ Ne agadan hi iyi. Mebmebmo diq ne God ago Bugaw Dimunta ago zawayib God ameb mataw titnonta iyiyya. Ari muran negmo gigo zaway amalib ne gihol emid God ameb tidimniy hasnan haqad ne ginad emay ye?⁴ Daq kabemmo ne giholib gwah-timta na samanta gwahtim e? Teq ya inad emaiq. Daq nagan ne samanta a hi loyiniy haqaiq.⁵ Nazaq iyan ne ezaq tonan God ne gilikmanib daq azawayin inaqta emad teq in ago Bugaw Dimunta negaqla? Ne God ago maror Moses bilamta na ago gunun muzinsa in nazaq gidimun tonaqta o haiq, ne Yesus awagamun huritim anan helmo haqiyta na ago in ne gigo hib daq aseseqta na giqemaq?

⁶ God ago marib Abraham abin kazaq usaqta. Abraham God aqez anan helmo haqan God in anan mat titnonta ham. *Jenesis 15.6*

⁷ Ad nazaqmo muran on mataw God anan helmo haqayta na in Abraham atatniz tiqiyaytamo. ⁸ Teq on mataw en ta asor Juda a haiqta nagan in inaqmo God anan helmo haqsa God in ginan titnonta haqaqtamo. Daq na agamukan kwaziqmo God ago marib mar tonan tuqusta. Ussa daq na a hi gwahiqsamo God in gamuk dimunta kazaq Abraham bulonim bilam,

Ninmo nimalib teq ya on mataw en bunmo tigidimun tondaiq ham. *Genes 12.3*

⁹ Nazaq iyan Abraham helmo haqan God dimun tonta nazaqmo diq God in on mataw helmo haqayta na bunmo gidimun tonaqtam. ¹⁰ Ari teq on mataw ginad emay, God ago maror Moses bilamta naqmo teq i tigilumsihdaq haqayta, mataw na oseq teq timeqniy has daqay. Na ezaqgo God ago marib gamuk araq mataw ginad nazaq usaqta na ginan kazaq bilam,

On mataw God ago maror Moses mar tonta na ahaqenib osad ago gunun bunmo a hi muz bugayta na, God in on mataw na bunmo kusluw negid in oseq timeqniy has daqayta ham. *Lo 27.26*

¹¹ Teq God ago gamuk kazaq bilammo, On mataw God aqez anan helmo haqan in ginan titnonta hamta naqmo in God inaq dimunmo tuqos daqayta ham. *Habakuk 2.4*

God ago gamuk nazaq bilaqan i ginad emauq. Mat araq God ago maror Moses bilamta na muzinim ahol eman God ameb titnonta iytu na hait diq haqauqta. ¹² God ago maror Moses bilamta ago adan na in i ginad helmo haqauqta na ago a haiqta. Haiqgam. Na in i giholtuw bul ago nagahta. God ago gamuk tibilam, On mataw God ago maror Moses bilamta na muzinad ago gunun akabiyen em bugid teq maror na gigemid in God inaq dimunmo tuqos daqay ham. *Lo 18.5*

¹³ Ta teq i bunmo God ago maror Moses bilamta na a hi muz bugim i bunmo timeqniyim osta. Teq i maror na itiyonim God ameb timeqniyim osta na ago mebay Krais inmo ahol ugim sorim i gizayan i God ago maror kwaziqta na ahaqenib a ta hi osauqta. Krais i gigo ban waqim in meqniy hasim osta. Na ezaqgo God ago gamuk bilam,

Mataw ayib giqothenan turayta na bunmo God in kusluw negan in ameb timeqniy hasim osayta ham. *Lo 21.23*

¹⁴ Nazaq iyan Krais Yesus afaqan ayahta on mataw gidanin qwayim usta na waleman God Abraham dimun tonta nazaqmo in muran on mataw en ta asor Juda a haiqta nagan tigidimun tonaqmo. Gidimun tonsa

i on mataw Yesus anan helmo haqauqta na bunmo i God ago Bugaw Dimunta waqauqta, kwaziqmo God ignan hel diqmo bilamta nazaq.

God ago maror Moses bilamta na gwahitiqim in God Abraham gamuk hel diqmo bulonta na a hi walam

¹⁵ Ya imaqbaban, ya mataw gigo daq araq anan tibilaqnan. I gilikmanib mat araq a hi moqadmo nog diq in ago ahuran nagah waqdaqta na agamukan bunmo in wastitayim mar tonaqta. Mar tonim tumoqan abeb mat araq diq gamuk na a hi othasad teq in anadibmo gamuk ta araq samanta a hi emaqtamo. ¹⁶ Ari kwaziqmo God in Abraham teq Abraham anaynayin araq abeb teq gwahitiqdaqta na inaq gidimun tonnan haqad in hel diqmo bilamta. Biлаqan gamuk na God ago marib tuqusaqta. Teq gamuk nab God bilam, 'Abraham anaynayiniz' nazaq in a hi bilam. In amun amulikmo anan bilaqad in 'Abraham anaynayinmo' ham. An Abraham anaynayin na Krais-mo.

¹⁷ Ari yaqgo gamuk nawa na alulin in kazaq. Mebmeb diqmo God in Abraham inaq an adugan wazim in hel diqmo bulonta. In gamuk na bilaqan abeb ulig 430 nazaq le tihiqyan teq God ago maror Moses bilamta na tugwahtim. Gwahitiqim maror na in God Abraham inaq an adugan wzata na eman samanta a hi iyaq. Haiqgam. Maror na in God ago gamuk ameba in hel diqmo Abraham bulonta na a hi walam. ¹⁸ Ari i God ago maror Moses bilamta na muzin bugeq ago os dimunta waqamta nazaq iyid teq i ginad kazaq em nag. God hel diqmo haqad ago os dimunta Abraham samanno ugnan bilamta na le saman tiqiy haq nag. Teq hait. God in ago os dimunta Abraham samanno ugnan haqad gamuk hel diqmo bulonta.

¹⁹ Ari nazaq iyan teq nagaqgo God ago maror Moses bilamta na gwahtim? Na in kazaq. God anad i gigo daq meqinta na ulal iydaq haqad in ago maror na agununin inaq abeb teq eman gwahtimta. Gwahitiqim gunun na nazaqmo usta le Abraham anaynayin in dimun tonnan hel diqmo bilamta na tugwahtiqaq haqad in anad amta. God ago gunun kwaziqta na angelo gizezab gwahtiqaq mat liqabmo turyaqua na waqim garahab gehitiqim teq ago wal-mataw nagta. ²⁰ Teq mat liqab turaqta na akabiyen kazaq. Mat na mataw giger gilikmanib turad in araq ago gamuk waqim teq in araq na ugaqta. Teq God amulikmo iyim in ago gamuk hel diqta na inmo Abraham ugtu. Nazaq iyan in Abraham gamuk ugtu na in maror kwaziqta na uriyamta.

*God ago maror Moses bilamta na in i
gimam giwarinta nog iyim in i giqad Krais
ago hib lehaqta*

²¹ Nazaq iyan God ago maror Moses bilamta na in God i gidimun tonnan hel diqmo bilamta agamukan na ago bab daqagya? Haiq kidik! God in gunun araq i muzeq kayeqmo osamta na igid teq i bilaq nag, I God ago gunun naqmo muzinad in ameb on mataw titnonta iyauq haq nag. Nazaq iyid teq gunun na in God samanmo gidimun tonnan hel diqmo bilamta agamukan na wazid woq nag. ²² Teq haiq. God ago gunun Moses bilamta na in on mataw bunmo giqirquran in daq meqintamo ahaqenib osayta. Nazaq iysa iyan God mataw gidimun tonnan hel diqmo bilamta agamukan na in maror kwaziqta na agurmammib a hi bolaqta. Haiqgam. Gamuk dimunta na i ginad helmo haqauqta agurmammib bolaqta. Bolim in on mataw Yesus Krais anan helmo haqayta naqmo gigo hib anon emaqta.

²³ Ari Yesus anan helmo haqgo akaman na a hi gwahtiqsamo God ago maror Moses bilamta na in i giqirquran ossa le Yesus anan helmo haqgo adanteqin na ulalab tugwahtim. ²⁴ Nazaq iyan God ago maror Moses bilamta na in i gimam giwarinta nog iyim in i giwamuzim ossa le Krais tugwahtim. Na ezaqgo God anad i Kraismo anan helmo haqsa teq in i ginan on mataw titnonta haqdag haqad in anad usta. ²⁵ Ari muran i Krais anan helmo haqamta adan na tugwahtiqan i gimam giwarinta na ahaqenib a hi osauq.

*I ginad helmo haqauqta naqmo i gique-
man i God atatniz iyim osauqta*

²⁶ Ne bunmo Krais Yesus aholib soqotim inaq osad ne God atatniz tiqiyim osayta. ²⁷ Na ezaqgo ne Krais abinib yuw huzim ago dahuhib gwahtiqiyta nab ne God atatin Krais waqim giholsihen nog giholib eman ne gisan awaqtan amo amo na tuqulilem nog iy. ²⁸ Nazaq iyan ne gilikmanib Juda mat haiq teq Grik mat haiqmo. Ad ne gilikmanib kabibiy mat samanta haiq teq mat samanmo luw osaqta haiqmo. Ne gilikmanib mat haiq teq aw haiqmo. Muran ne bunmo Krais Yesus ago hib soqotim ne bunmo gihol araqibmo tiqiyi. ²⁹ Ad ne Krais agota tiqiyim ne Abraham anaynaynizmo tiqiyim osaytamo. Nazaq iyan kwaziqmo God in Abraham anaynayniz nenaq gidimun tonnan hel diqmo bilamta agamukan na in ne gimen usaqtamo.

4

*I bugaw meqinta gigo kabibiy mataw
samanta nog ossa Krais gilumsihan i God
atatniz tiqiy*

¹ Ari yaqgo gamuk alulin diq na ya kazaq bilaqdaiq. Amun aqenta amam ago nagah bunmo giwaqeq giwamuzdaqta. Nazaq iyan amam ago nagah nagan bunmo in amun aqenta na ago diqta. Amun na abin nazaqta teq in amun osad in bilaqne amam ago kabibiy mat samanta nog osaq. ² Ossa mataw asor amun na wamuzad ginad dimunta ugsa in gihaqenib osad le amam kam anan bilamta nab in amam ago nagah na tigiwaqaqta.

³ Teq i nazaqmo amun nog ossa bugaw meqmeqinta og ka ago daq wamuzayta nagan in i giqeman i in gigo kabibiy mataw samanta iyim osta. ⁴ Ossa God kam anan bilaqan usta na tugwahtiqan kam nabmo in atatin eman tubol. Bolim in aw araq agemab gwahtiqan aw na eman in God ago maror Moses bilamta na ago akannib gwahtiqim maror na ahaqenib tuqos. ⁵ God anad in atatin leheq i on mataw maror kwaziqta na ahaqenib osauqta na gizayid i God atatniz diq iyeq osam haqad in atatin na eman og kab bolta.

⁶ Nazaq iyan ne God atatniz tiqiyim iyan God in Atatin ago Bugaw eman i ne nenaq gigemab bolim osad in God lilewunim anan kazaq biyaqta, “O kabay,” haqaq, “Ni ya imam” haqaqta. ⁷ Nazaq iyan ne kabibiy mataw samanta a ta hi iyay. Haiqgam. Ne God ago onmin tiqiyim osayta. Nazaq iyan God ago nagah dimdimunta in ago onmin diqta negdaqta na in ne inaqmo tinegdaqmo.

*Pol in Galesiya on mataw ginan anad
ayahmo meqniy*

⁸ Kwaziqmo ne God ago a hi huritsa og ka ago god katiyta nagan ne giqirquran ne in gihaqenib osad in gigo gunun akabananan kabemmo em yaqayta. Teq nagah nagan in god diq a haiqta. ⁹ Ari muran ne God diqta na ago tuhurit kemiy. Ta teq ya kazaq ne tigibilek kemnan. Danmeh God in ne gigo tuhuritan teq ne in ago hurityta haqaq. Nazaq iyan nagaqgo ne hureq hasim og ka ago bugaw na gigo hib muleqeq ta lehnantony? Bugaw meqinta nagan gigo zaway ayah diq haiqta teq in giholib nagah araq ne gilumshidaqta na haiqmo. Teq ta nagaqgo in ne a ta giqirqurid ne in gihaqenib osad gigo kabibiy a ta emnan ginad bilaqaq? ¹⁰ Muran ne Juda gigo maror muzinad ne kam teq kalam teq ulig nulinad teq ne zeq akaman teq urom akaman inaqmo anadin emad kam amulik-mulikmo na ago agununin bunmo ne muzin bugayta. Nabag ne ginad emay, I gunun muzinad God ameb titnonta iyauq haqay. ¹¹ Ne nazaq emsa ya inad emaiq, Ya ne gilikmanib kabiy samanta em haqaiq. Haqad ya ne ginan inad ayahmo meqniyaq.

¹² Ya imaqbaban, ya ne ginan inad meqniysa kazaq gibilenaiq. Ya osaiqta kazaq nogmo ne osiy haqaiq. Na ezaqgo kwaziqmo ya nenaq osad ya ne nogmo iyim osta. Ossa kam nab ne ya a hi imeqin toniy. ¹³ Ya nenaq osta na ne anadin ta emiy. Kam nab ya nenaq osnan inad a hi emta teq ya igo moq inaq iyim ya ime amepta ne nenaq osad Yesus awagamun dimunta gibilen. ¹⁴ Ya moqad ne gigo hib ossa ne ya iwamuzad giholtuw diq buliyya. Ta teq ne ya inan gituw a hi hiqysa gileh a hi yagiyya. Haiqgam. God ago angelo araq ne gigo hib lehid ne wazineq alowan ton nagiyta nazaq nogmo diq ne ya ilowan toniy. Helmo, Krais Yesus-mo ne gigo hib le gwahtiqid ne gigem dimunta ugad wazin nagiyta nazaqmo ne ya ilowan toniyta. ¹⁵ Kam nab ne ya inan ginad bilaq naqmo hiqiyqaqta. Teq muran ne gigo ginad dimniy na edowa? Kam ya nenaq moqad osta nab ya ihol dimniyan haqad negmo gimeqnagin araq othaseq ya imeqnagnib emnan bilaqiyta. Ya ne helmo ginan bilaqaiq. ¹⁶ Ari muran ya ne ginad wastitaynan gamuk helta kazaq gibilensa ne ya inan i gigo bab haqay ye?

¹⁷ Ne huritiy. Mataw ne gihureqnan haqad kagin negayta na in ne ginadin diq a hi emayta. Haiqgam. In ne gigel tonid ne ya gileh yagad teq ne in ginadin ernad gimen giholtuw bul daqay haqad in soysoy na negayta. ¹⁸ Helmo. Ya nenaq osad ya imomo ne gimen iholtuw bulad gilumsihdaiqta na in dimun diq a haiq. Ya nenaq a hi ossa mataw ta asor in inaqmo ne gidimum tonnan haqad giholtuw bul daqayta na in dimunmo diq. Teq mataw nawa ne ginad hureqayta na in negmo diq ginadin a hi emayta. ¹⁹ Yaqgo onmin, ya ne gibibiyowunad ihol titiyaq, bilaqne aw amun emnan ahol titiyaqta nazaq nog. Ne bilaqne God ago amun Krais nogmo diq tugwahtiq hasid nab teq ya ihol titiyaqta ka tihiqiydag. ²⁰ Ya ne ginan inadnad diq tiqemaiq. Ad ya kab pesanmo osad ya inad emaiq. Ya ne gigo hib nenaq osad teq ya gamuk awaz meqin ka hulosad kiskismo gibilen nagta haqaiq.

Hagar ayow Sara inaq gigo gamuk awowun

²¹ Ne mataw God ago maror Moses bilamta na ahaqenib osnan ginad bilaqatna ya susumun negid ne amenin emiy. Maror naqmo gibilensa ne hurit daqay ye? ²² God ago marib Abraham awagamun kazaq usaqta. In atatin giger osiyta na gigo araq anen kabibiy aw samanta. Sa araq na anen in aw samanmo anadibmo luw osyaqta. ²³ Teq kabibiy aw samanta atatin na in mataw og kabta gigo daq

amalib gwahtimta. Ari aw samanmo luw osyaqta na in aw nignigta iyan in ago amun na God ago gamuk hel diqta in Abraham ugt a naqmo amalib in gwahtimta. ²⁴ Wagam ka amuganib gamuk awowunta usaq. On giger na in God ago maror kwaziqta Moses wamta na teq gamuk helta God Abraham bulonta na gitowun emiyta. Kabibiy aw samanta anan Hagar haqayta na in God ago maror garah Sainay-ib gwah-timta na atowun. In kabibiy awta iyim iyan ago onmin in giqemajta na in kabibiy on mataw samanta iyim osaytamo. ²⁵ Hagar in garah Sainay kantri Arebiya-ib turaqta na atowun. Teq in uliq Jerusalem muran usaqta na atowuntamo. Aw na ago onmin nenaq in muran kabibiy on mataw samanta iyim osayta. ²⁶ Ari Jerusalem araq ulilib usaqta nab on mataw bunmo samanmo ginadibmo luw osayta. Uliq naqmo in i gineng diqta. ²⁷ Na ezaqgo God ago mar kazaq bilam,

Ni aw amun a hi emad nignig iyim osaqta na ni ninad dimniyan ham. Aw ni amun emgo sanctity a hi loyinaqta na ni ninad dimniysa bar waz naqmo hiqiy ham. Na ezaqgo aw samanmo osaqta na ago onmin kabemmo diq iyim in aw aduw inaqta na ago onminta giquriyamayta ham. *Aisaya 54.1*

²⁸ Ya imaqbaban, ne aw samanmo luw osyaqta na atatin Aisak nogta. God ago gamuk in hel diqmo bilamta naqmo amalib he in ago onmin tugwahtiqiyta. ²⁹ Teq kwaziqmo Abraham ago amun og ka ago daqib gwahtimta na in amun God ago Bugaw Dimunta ago zawayib gwahtimta na meqin tonyaqta. An muran ne daq naqata ahol tuwaqaymo. Mataw God ago maror Moses bilamta ahaqenib os tutayta na in ne afaqqan negayta. ³⁰ Teq God ago mar ezaq bilam? In bilam,

Kabibiy aw samanta na atatin inaq gimuzid lehiy ham. Na ezaqgo kabibiy aw samanta ago amunta na in aw samanmo luw osaqta ago amun na inaq gimango ahuran nagah araqibmo a hi waq daqay ham. *Jenesis 21.10*

³¹ Nazaq iyan ya imaqbaban, i kabibiy aw samanta ago onmin a haiq. Haiqgam. I aw samanmo luw osaqta ago onminta.

**I God ago maror Moses
bilamta na ahaqenib
giqirquran ossa Krais i
giqamun na hasan muran
God ago Bugaw Dimunta i
gigo tur os wamuzsa i daq**

dimdimunta gimaqbaban gigo hib emam

5

I God ago maror Moses bilamta na ahaqenib a ta hi osad i samanmo luw osuq

¹ Ari Krais anad i samanmo luw osamta haqad in i giwaqan i Moses ago gunun i giqirquran osta na ahaqenib a ta hi osauqta. Nazaq iyan ne zaway diq iyeq turiy. Ad mataw ne a ta giqirqurnan tonsa ne in giqez othasad giholbmo hiqiyiy.

² Yaqmo Pol kazaq diq gibilensa ne gidek emeq hurit kemiy. Mataw na gihol abatan asan urotgo gibilensa ne giqez hi muziniy. Haiqmo diq. Ne maror kwaziqta na anan helmo haqad gisan urotid teq Krais ne gimen kabi y amta na a ta hi gilumsihdaq. ³ Ne mataw gisan urotgo ginad emayta na ya ne bunmo a ta gibilen tonaiq. Ne nazaq ginad emad ne God ago maror Moses bilamta na ahaqenib tilehnhan tonay. Nazaq ne emad ne maror na ago gunun amikmikta na bunmo tumuzin daqaymo. ⁴ Ad ne ginad emay, I God ago maror Moses bilamta na ago gunun muzin bugeq teq i God ameb titnonta iyam haqayta na, ne bunmo gihol adanin qwayim Krais ago hib a ta hi soqotay. Ne God agem dimunta in samanmo negapta na tuhulosiy. ⁵ Na ezaqgo i Bugaw Dimunta ago zawaymo amalib Krais anan helmo tihaqim i God ameb mataw titnonta tigiy. Iyim God i gidimum tonnan bilamta nazaq diq in tiqemdaq haqad i baq tunim osad gihol husisiqaq. ⁶ Mat Krais Yesus inaq tisoqotta na anadib gisan urotayta na in nagah a haiq. Teq in anadib gisan a hi urotayta na in nagah a haiqmo. Mat na anadib mataw Krais anan helmo haqad teq in on mataw bunmo ginad bilaqaqta naqmo in daq hel diqta.

⁷ Kwaziqmo ne Krais asen muzad ne dimun diqmo sib yaqayta. Ta teq nog ne gigo dan qwayan ne gamuk helta na a ta hi muzinay? ⁸ God ne gililewunta na in ne ginad buliyan ne maror kwaziqta na a hi muznanz tonay. Haiqgam. ⁹ Ne gamuk araq mataw bilaqda luwayta ka anadin emiy. Yis asitmo naqmo bret araq ahol bunmo eman huuuw nemaqta. ¹⁰ Teq ya inad emaiq Iyahta ne ginad wamuzsa ya inad usaq nazaq ne ginad tuqusdaqmo haqaiq. Sa mat nog ne ginad eman agadan iyaqta na in ago daq na amenin naw meqin diqta tuwaqdaq haqaiq.

¹¹ Ya imaqbaban, kwaziqmo ya mataw gihol abatan asan urotgo gibilenyaigta. Teq muran ya nazaq a ta hi bilaqsa iyan Juda mataw bab yagayta. Ari ya gisan urotgo bilaq tutsa teq Juda mataw muran ya a hi

imeqin ton nagiy. Ad ya Jesus ayib dom wolam momta agamukan a hi gibilensa in ya inan gigem a hi meqniy nagiy. ¹² Mataw na ne gisan urotgo gibilenad in ne giritewu-nayta. Teq ya mataw na ginan inad kazaq emaiq. Mataw gisan urotgo giwaz meqniyayta na in gimo gihol abatan asan urotad in gihol abatan, gikayogin inaqmo uroteq huneg nagiyomo haqaiq!

¹³ Ya imaqbaban, God anad ne samanmo tiluw os daqay haqad in ne gililewunta. Teq luweq ne ginad em daqay. I gunun haiqmo osauq haqad ne giholmo anad tumuzin daqay. Haiqgam. Ne an anan ginad bilaqsa an ulumsihad osiy. ¹⁴ Na ezaqgo God ago marib gamuk amulik kaqmo in God ago maror Moses bilamta na agamukan wol net bugaqla. Gamuk na bilam, Ni ninmo nihol anan ninad bilaqaqta nazamo ni niyow anan ninad bilaqan ham.

Wok Pris 19.18

¹⁵ Ari ne an mugad an meqin tonad osad teq ne gihol waziy. Ne bunmo araqibmo tihiqiy daqay.

*God ago Bugaw Dimunta ago daq teq
gigem kwaziqta ago daq*

¹⁶ Teq yaqmo kazaq diq ne gibilenaiq. God ago Bugaw Dimunta dan giqisihunsa ne lehiy haqaiq. Ne nazaq emad teq ginad meqinta bolsa ne a hi muzin daqay. ¹⁷ Na ezaqgo i ginad meqinta gwahtiqaqta na in God ago Bugaw Dimunta anad nog a haiqta. Sa God ago Bugaw Dimunta anad in ne gigem kwaziqta na anad nog a haiqmo. In gigermo an geg ugsa ne daq asor emanin ginad bilaqaqta na a hi emayta. ¹⁸ Ari Bugaw Dimunta dan giqisihuneq giqad lehid teq ne God ago maror Moses bilamta na ahaqenib a ta hi os daqay.

¹⁹ Gigem kwaziqta ago adan na ulalab usaqta. Ni an haresmo hureqim inaq usaqta na teq ni daq anumlan inaq emaqta na teq ni nimebay haiqmo daq haresmo emaqta na, ²⁰ teq ni god katiyya muzinaqta na teq ni liqiy tagum emaqta na teq ni mataw bab negaqta na teq ni mataw ne-naq an mugaqta na teq mat araq ago os dimniyasa ni ahol waqad nigem meqniyayta na teq ni nigem meqinta mataw negaqta na teq ni ninmo nihol anadin emaqta na teq ni mataw bunmo gigo gamuk geg ugaqta na teq ni mataw gihuseraqta na, ²¹ teq ni mat araq ago nagah dimdimunta utetaqta na teq ni yuw atoranta uluwim nifaqin hulosaqta na teq ni niyogniz nenaq yuw uluwad daq hares emaqta na teq daq naqanta kabemmo i gigem kwaziqta na gigeman gwahtiqaqta. Kwaziqmo ya ne gidek wazta nazaqmo ya ne gidek a ta wazim kazaq ne gibilenaiq. On mataw daq meqinta nagan emayta na bunmo in God

ago maror aduganib le a hi gwahtiq daqay haqaqiq.

²² Ari God ago Bugaw Dimunta in daq kazaq eman i giholib gwahtiqaqta. Ni on mataw ginan ninad diq bilaqaqta na teq ni ninad dimniyasa osaqtta na teq ni nigem kute nemsat osaqtta na teq ni hidmo nigem a hi meqniyata na teq ni mataw gielowan tonaqta na teq ni daq dimunta emaqta na teq ni gamuk bilamta nazaqmo diq ni emaqta na,²³ teq ni mataw nenaq kiskismo osaqtta na teq ni ninad in nihol anononmo wamuzaqta na, daq nagan bunmo Bugaw Dimunta gigeman i giholib gwahtiqayta. Gunun araq diq daq nagan giwasihdaqta na haiqgam.²⁴ Teq Krais Yesus ago on mataw bunmo in gigo gigem kwaziqta na ayib dom wolam in ago zaway alulin tihiqyan. Hiqiyam mataw na ginad meqinta bolsa in daq meqinta haresmo emnan ginad em yaqayta na tihiqymo.

²⁵ God ago Bugaw Dimunta i gigeman i kayeqmo osauqta. Nazaq iyan Bugaw Dimunta dan gigisihunad giqad lehsa i muzineq inaq lehmo lehuq.²⁶ Lehad i gihol abin hi iluwuq. Ad i an agem hi ulumad i ango nagah hi utetuq.

6

Ni naga didaqin amagin leyaqta naqmo anon ni tuwaqdaq

¹ Ya imaqbaban, mat araq daq meqinta emid ne mataw God ago Bugaw Dimunta inaq luwayta na ahol waqad ne mat na inaq midemqanmo ago daq na wastitayim. Ad negmo gihol asawan woltayimo. Luweq mat na ago daq meqinta na ne gilum waqid ne inaqmo woq daqaymo. ² Ne nazaq an ulumsihad mat araq aholib afaqan gwah-tiqsa ne bunmo agerab loqeinqaq garabmo afaqan na soriy. Daq nazaq ne emad teq ne maror Krais igtta na tuwol net bug daqay. ³ Na ezaqgo i bunmo gigo zaway haiqta. Nazaq iyan mat nog anad emad bilaqaq, Ya asittaqmo haqaqta, mat na inmo ahol kat ugaqta. ⁴ Ningo kabiy daq ni emaqta na bunmo ni ulum kemad dimun meqin na ni ahol waq kem. Ahol waq kemad ni niyow ago kabiy hi ulum kem. Na ningah a haiq. Ni ninmo ningoh luw os anadin em. Ne bunmo nazaq emeq teq ne gihol abin iluw daqayta na alulin negmo giholib usdaq. ⁵ Na ezaqgo on mataw amulik-mulikmo gigo kabiy in em daqayta naqmo in tiqem daqay.

⁶ Mat God ago gamuk asuleqin waqaqta na in ago nagah dimdimunta inaq na asor husereq suleq anamren ugant.

⁷ Ne gihol hi kat ugiy. God in mat araq ago kamolmol a haiqta. Mat araq ago kabiyab naga didaqin leyaqta na in didaq

naqmo anon tayim waqaqta. ⁸ Mat agem kwaziqta anad muzinad daq emsa teq in ago daq na aholib anon emsa mat na ahol meqniyeq tumoqdaq. Ari mat God ago Bugaw Dimunta muzinad daq emsa teq Bugaw Dimunta mat na emid in kayeqmo kuluwa-kuluwmo tuqosdaq.⁹ Teq i kabiy dimunta emad gihol husisiqsa gituw hi hiqiyam. I kabiy dimunta emgo gidan sosil a hi iyid teq didaq waqgo akamnib i gigo kabiy dimunta na anon kabemmo tuwaqam. ¹⁰ Nazaq iyan kam bunmo i daq dimunta emgo adanteqin inaq iyadmo i on mataw bunmo gigo hib daq dimunta emuq. Ad i gimaqbaban helmo haqayta na ginadin emad gidimun tonuq.

Krais ayib dom wolam momta na ago Pol anadin emad anad ayahmo dimnyi

¹¹ Mar aseseqta yaqmo ihol abenab ne gimen mar tonta ka ne ahol waqiy.

¹² Mataw nawa ne gihol abatan asan urotinan bilaqayta na in nagaggo nazaq emay? In gihol abin ayahta waqgo haqad daq nazaq emayta. Ad in kazaq ginad emay. Luweq i Krais ayib dom wolam momta na adan diq muzinsa Juda mataw gisan urotayta na in afaqan ig daqay haqayta. ¹³ Mataw gisan urotayta na in God ago maror Moses bilamta na anonon ahi muzin bugayta. Ta teq in ne gisan uroteq ne giqumnbimo in gibin emid ayahmo iyidaq haqad in nazaq emayta. ¹⁴ Teq ya nagah araq ago hib ibin dimunta waqnan ituw hikidik iyaq! I gigo Iyahta Yesus Krais ayib dom wolam momta naqmo ago hib ya ibin dimunta waqgo inad bilaqaq. Ay nab og ka ago anad meqinta ya iholib usta na moqad in ya inad hureqgo azawayin na inaqmo tumommo. ¹⁵ Gihol abatan asan urotgo adan na in nagah diq a haiqta. Teq mat asan a hi urotaqta na nazaqmo in nagah diq a haiqtam. God i gigeman i mat muturta iyim osauqta naqmo in nagah heltaqmo. ¹⁶ Ya inad on mataw ginad ya inad nog usaqta na bunmo gigem kisksis iysa God in ginan anad meqniyan haqaiq. On mataw naqmo in God ago on mataw Isrel-mo diq iyim osayta.

¹⁷ Ya Yesus asen muzad ago kabiy emsa mataw ya inoliya na abatlan ya isanib kawa usaqta. Nazaq iyan muran teq abeb mat araq in afaqan araq ta hi yagan.

¹⁸ Ya imaqbaban, I gigo Iyahta Yesus Krais agem dimunta negsa ne osiy. Hel dictaqmo.

Efesus

o

Sansandek Pol mar tonan uliq Efesus-ib lahta

Gamuk ameb lehaqta

Pol bit giqirquran osaytab osad in sansandek ka mar tonta (Efesus 3:1; 4:1). Mar tonim in mat anan Tikikus haqay na ugan in waqim ad uliq Efesus-ib tilah (Efesus 6:21-22). Teq mataw asor gamuk ka anan ginad emay, Pol anad on mataw uliq Efesus-ibta na gamuk ka ahol waqeet teq in Jesus ago dauh uliq sinsin usayta nagab em lehid in ahol tuwaq daqaymo haqad in mar tonta haqay.

Sansandek ka ago asor gigerta na in kazaq: Efesus 1-3 teq Efesus 4-6. Asor danmepta nab Pol bilam, God in atatin Jesus Krais amalib Juda on mataw teq on mataw en ta asor Juda a haitqa nagan bunmo inaqmo ayahmo gidimun tonta ham. In Krais eman bolim in on mataw bunmo giyon ahol nog hulosan muran on mataw Krais aholib soqotim inaq osayta na bunmo in bilaqne on mataw en amulikmota tiqiyiy ham. In gilikmanib an geg ug na tihiqiyan in bunmo gigem araqibmo tiqiyim osay ham. Teq sansandek ka ago asor gigerta nab Pol kazaq bilam, Krais ago on mataw ginad amulikmo ussa in an alowan tonad teq in gigo os kwaziqta na gileh ugad in God ago daq titnonta naqmo tumuzin daqay ham.

Teq Pol in Krais ago on mataw ned amo amo na giqisihunat in en amulikmo tiqiyiyta na ago ginad em daqay haqad in gamuk awowun kazaq gibilan, God ago on mataw bunmo in God ago bit anon nog iysa Krais in tituq liqab diqta nog iyim bit na anon bunmo soraqta ham (Efesus 2:19-22). Sa on mataw na gihol amulikmo iysa Krais in gihol na ago afaqin ham (Efesus 4:1-16). Teq on mataw na bilaqne aw aduw ahaqenib os nog iysa Krais in aw na aduw nog osaq ham (Efesus 5:22-32).

God Krais eman bolim i gimen dante wastitayan i on mataw muturta tiqiy

¹ Ari yaqmo Pol. God-mo anad bilaqan ya Krais Jesus ago Aposel ihta. Ya sansandek ka God ago on mataw tawonta uliq Efesus-ib Krais Jesus ago nan huritad muzinayta na gimen mar tonim eman leh negaq.

² I Gimam God teq i gigo Iyahta Jesus Krais inaq in gigem dimunta negad in ne gigem emid kiskismo usan.

Krais i gimen kabiy amta na amalib God i ayahmo gidimun ton

³ I God abin iluwuq. In i gigo Iyahta Jesus Krais ago God teq in Jesus Amamtamo. In i giqeman i Krais aholib soqotim inaq ossa in i giwitan gidimun tonim ago os dimunta Heven-ib usaqta na tiqig bug. ⁴ Na in kazaq. Kwaziq diqmo God og ka a hi emadmo in i Jesus inaq soqoteq osamta na ago tibilaqan usta. In i ginan anad am, In Jesus inaq soqoteq teq in ya imeb yaqgo on mataw tawonta iyeq os daqay ham. Osad daq araq ananin waq daqayta in giholib haiq iysa in ya inan ginad diq bilaqsa os daqay ham. God i gimen daq nazaq diq tiqem igdaq haqad in aholyon i gitowun tiqamta. ⁵ Gitowun emim in Jesus Krais ago kabiy amalib i giwarinan i inmo ago onmin tugwahtiw, in kwaziqmo anad bilaqan usta nazaq. ⁶ God in atatin Jesus anan anad diq bilaqsa in agem dimunta ugaqta. Nazaq iyan i Jesus inaq soqotim ossa God agem dimunta atatin ugaqta nazaqmo in agem dimunta samanno naw nog i igaqtam. Igsa i in ago agem dimunta ayahmo igaqta na anadin emad i abin iluwauqta.

⁷ Yesus Krais inmo ahol anedan hulosim i gizayim giwamta. Giwaqan muran i in aholib soqotim inaq ossa in anedan na i gigo daq meqinta tisuhol bugan God in anadin a ta hi emaqta. God agem dimunta ignan haqad in nazaq i gimen dante dimun diqta na am. ⁸⁻⁹ Emad in agem dimunta nawa na ayahmo diq igan giyunin bugan i ginad tihaustay. Hastitayan God anad ulilemim usta na in i giqisihunan i ginad tiqem has. Na ezaqgo God i gilumsihnan anad bilamta na Krais ago hib ulal iysa i ahol waqim God anad ulilemabta na ago tuhurit. ¹⁰ Teq God anad na in kazaq. In nagah bunmo giwamuzad dan ugeq ugeq le in anad usaqta nazaqmo in tugwahtiq bugdaq. Gwahtiq bugid nab teq nagah bunmo Heven-ibta teq ogibta inaqmo in Krais ahaqenib iyeq wastitayeqmo tuqus bug daqay.

¹¹⁻¹² God nagah bun diqmo giwamuzad giqemsa in tekomo anad tiqamta nazaqmo diq in gwahtiqa. Ad kwaziqmo in anad am, Juda on mataw teq danmeb Krais anan helmo haqsa ya iholyon giwaqid in yaqgo on matawmo diq iyeq tuqos daqay ham. Osad ya in gidimun tonta na ago in anadin emad in tuteqmo ya ibin tiqiliw daqay ham. Nazaq iyan God in i Juda asor ginan anad amta nazaqmo in bilaqan i in anad na muzinim danmeb Krais anan helmo tihawta.

¹³ Ari ne on mataw Juda a haitqa na, ne inaqmo Jesus awagamun dimunta na tuhuritimo. Ne God ago gamuk helta na

huritim ginad emiy, God i inaqmo tigiwaqdaq haqad ne Krais anan helmo tihaqiy. Haqad ne Krais inaq soqotim ossa God in ago Bugaw Dimunta ne tinag, in ago on mataw bunmo negnan hel diqmo bilamta nazaq. Negan ne ginad emay, Helmo, i God ago on matawmo diq ticiyim osauqta haqay. ¹⁴ I Yesus anan helmo haqauqta na bunmo i God ago Bugaw Dimunta tuwawta. Waqim inaq osad i ginad emauq, God ago Bugaw i giholib usaqta ka in God ago os dimunta in teq igdaqta na atowun nog i giholib usaqta haqauq. God ago Bugaw Dimunta ka i giholib ussa le God i giwaqid i in ago on mataw ticiyim hasamta haqauq. Haqad God i gidimum tonta na i anadin emad abin tutimmo iluwauqta.

God Efesus on mataw ginad emid hastidaq haqad Pol in bulon

¹⁵ Ari mataw ne giben kazaq bilaqsa ya huritta. Ne Iyahta Yesus anan helmo haqad ne God ago on mataw tawonta na bunmo ginad bilaqaqta. ¹⁶ Ya ne giben nazaq huritim tutimmo ya God inaq gamuk emad esey ugaiqta. ¹⁷ I gigo Iyahta Yesus Krais ago God in i Gimam iyim uliq Heven-ib abin teq ahol anuwan ayahta inaq osaqta. Nazaq iyan ya in inaq gamuk emad ya ne ginadin emad kazaq bulonaiq, God haqaiq ni ninad dimunta Efesus on mataw na negsa in ginad awaz meqniyan haqaiq. Awaz meqniysa ni ningo gamuk aulin ulilemim usaqta na emid in gimeb ulal iysa in ningi hurit hasiy haqaiq. ¹⁸ Ad ni in ginad emid hastitayano haqaiq. Hastitaysa ni in giwaqeet gidimum tonnan haqad gililewunta na ago in ginad emiy haqaiq. Ginad emad in ningi os dimunta abin inaqta na ago huritiy haqaiq. Ningi on mataw tawonta bunmo in ningi os dimunta na twaqaqm in mataw ginaghan inaqta nog iyim osayta haqaiq. ¹⁹ Teq ya God kazaq bulonaiqmo, Efesus mataw na in ningi zaway awaz meqinta i on mataw ni ninan helmo haqauqta giholib kabiyaqta na ago in loyiniymo haqaiq. Loynad ningi zaway in nagah ayah diqmo iyan in a hi ulum kem daqayta na ago in ginad em hasiymo haqaiq.

²⁰ Zaway naqmo kwaziqmo Krais aholib kabiyaqta in hodhodab usim ta eramta. Eraqan God ago zaway naqmo Krais eman in Heven-ib gwalehim God aben aqabun ban tuqos woqim osaqta. ²¹ Osad muran in bugaw aseseqta zaway amo amo wazayta nagan teq angelo giwaz meqmeqinta maror nog iyim ulilib osayta nagan bunmo giquriyamim in ulilibmo diq osaqta. Osad in nagah aseseqta gibin inaqta nagan bunmo giquriyamad kam muturta teq gwahtiqaqta nab in abin nazaqmo

tuqos tutdaqtamo. ²² God in on mataw Krais ago nan hurityta na ginadin emad in nagah bunmo giqeman Krais ahaqenib ticiy bugsa in Krais eman nagah na bunmo gifaqin ticiy. ²³ Teq on mataw Krais ago nan hurityta na in Krais anon iyim in Krais ahol bunmo iyim osayta. Sa Kraismo in og kait inaq giwaleq ton bugim osaqtamo.

2

God i giqeman i Krais inaq kayeqmo osauqta

¹ Kwaziqmo ne God ago gunun itiyonad daq meqinta haresmo emsa ne gigo daq meqinta naqmo ne ginol eman ne giwitan God ameb tumoqim us. ² Kam nab ne og ka ago gunun haresmo muzinad ne bugaw meqinta kaitab ulilib luwayta gigo gifaqin na anad muzin yaqaytamo. Bugaw meqinta danmepta na ago zaway awaz meqinta in mataw nan a hi hurityta na gigemab kabiyaq emad gibe yahsa in God aqez othasaya. ³ Kwaziqmo i bunno nan a hi hurityad ginad meqinta gwahtiqa i muzmo muzinyauqta. Muzinad i giholmo i ginad wamuzsa i gigem kwaziqta naqmo ago adan muzinyauqta. I nazaq diq iyim ginernen gigemab hitiqan iyan God i ginan agem meqniyyaqa, in on mataw nan othasaya bunmo ginan agem meqniyyaqa nazaq.

⁴⁻⁵ Helmo i gigo daq meqinta naqmo i ginol eman i bilaqne mataw tumowta os nog iyyauqta. Teq God i ginan anad bilaq naqmo hiqiysa in i ginan anad ayahmo meqniyyaqa. Nazaq iyan in Krais eman kayeq iytu nab in i giqeman i Krais inaq kayeq ticiyimo. (Na God anadibmo agem dimunta negim in nazaq ne gilumsihim giwamta.) ⁶ Ari i Krais inaq araqibmo kayeq ticiy God in i Krais Yesus inaq giwazan tigeraw. Eraqan in i giqeman i Krais aholib soqotim inaq ulilib Heven-ib tuqos nog iyyauq. ⁷ God agem dimunta ayahmo igad in Krais Yesus ago kabiyaqmo amalib i gilowan diq tonta. In anad abeb kam muturta nab in ayahmo i gidimum tonta na in on mataw bunmo giqisihunnan haqad in nazaq amta. ⁸ Na in kazaq. God agem dimunta negan ne Krais anan helmo haqan in ne gilumsihim giwamta. Daq nawa na negmo gigo zawayib ne eman a hi gwahtimta. Haiqgam. God anadibmo samanno ne gilumsihim giwamta. ⁹ Teq ne giholtuw bulad kabiyaq daq dimdimunta emiya na ago amenin in ne gilumsihim giwamta nazaq a haiqmo. Nazaq iyan mat araq inmo ahol abin wazid

eraqdaqta adanteqin haiq tiqiy. ¹⁰ Godmo i giqeman i mataw muturta iyim osauqta. I in ago kabiy daq dimdimunta emad luwamta haqad in i giqeman i Krais Yesus aholib soqotim inaq tuqosauq. God anad i in ago kabiy dimdimunta na emad osamta haqad in kwaziqmo i gabinib kabiy na tuwastitayan usta.

Krais in Juda mataw teq mataw en ta asor Juda a haiqta nagan bunmo inaqmo giqeman in mataw en amulikmo tiqiyiy

¹¹ Ari ne on mataw Juda a haiqta na ne ginad emiy. Ne gisesan gilulib gwahtiqim ne in gigo maror ahaqenib osayta. Ari Juda matawta na nazaqmo in gisesan gigo maror ahaqenib osad in gihol abatan asan urotayta. Ad in ne gabin wazan woqsa ginan bilaqay, Mataw gisan a hi urotayta haqay. Teq daq na in gibenaabmo eman gisanib gwahtiqqaqt. ¹² Ad kwaziqmo ne Krais abin a hi hurit yaqayta na ne anadin emiyomo. Kam nab ne Krais ago hib pesan diqmo os yaqayta. Osad ne Isrel gigo maror aduganib a hi os yaqay. Ad God in Isrel gisesan nenaq an adugan wazad in giwamuzeq gidimur tonnari hel diqmo gibilensa ne asan ban os yaqay. Nazaq iyan God teq ne gilumsihdaqta nazaq ne ginad a hi em yaqay. Sa God ne giholib hiqiyan ne og kab dante haresmo samanta muzad luw yaqay.

¹³ Kwaziqmo ne God ago hib pesanmo diq osiyta. Ari muran Krais moqan anedan womta na amalib God ne giqeman ne Krais Yesus inaq soqotim osad ne God agerabmo diq tuqosayta. ¹⁴ Na in kazaq. Juda mataw in mataw en ta asor Juda a haiqta nagan bunmo nenaq an geg ugayta. An geg ugsa daq na gigel tonan in gimi gimo iyim araqibmo a hi osayta. Teq Krais inmo ahol anedan amalib gel na wolbiyyan mataw na gilikmanib bab usta na tihiqiy bug. Hiqiy bugan Krais in mataw na bunmo giwastonan in mataw en amulikmo tiqiyiy.

¹⁵ Krais i gimen ahol nog hulosta nab in God ago maror Moses bilamta na aduganib gunun amikmikta giqusta na gimusun maror kwaziqta na akaman tihiqiy. In nazaq emim in mataw en bunmo inmo aholib giwastonan in mataw en muturta amulikmo tiqiyim in bab hulosad araqibmo tuqosay. ¹⁶ Na in kazaq. Krais inmo ahol amalib on mataw en bunmo giwastonim in gigo ban wam. Waqan mataw ayib dom wol an moqim on mataw na bunmo gabinib God inaq an anobun tuwastitayi. In daq nazaq emim in mataw en bunmo gilikmanib an geg usta na wol eman tihiqiy. ¹⁷ Hiqiyan in ago kabibiy mataw giqeman in lehim bab tihiqiyta na agamukan ne mataw pesanmo

osiyya na gibilenad in mataw sinsin osiyta na tigibileniyimo. ¹⁸ Na ezaqgo Krais in i on mataw bunmo gimen dante wastitayan muran God ago Bugaw amulik naqmo i bunmo gilumsihsa i araqibmo Gimam Iyah agera loqauqta.

Krais ago on mataw bunmo in God ago bit noga

¹⁹ Nazaq iyan muran ne God ago maror asan ban iyim mataw begbegta og saw haresmo luw yaqayta nazaq ne a ta hi luway. Haiqgam. Ne God ago on mataw tawonta na bunmo nenaq araqibmo God ago maror aduganib tugwahtiqim ne in asenlulmo diq tiqiyim osayta. ²⁰ Ne bilaqne God aholyon bit amta nazaq nog. Sa God ago Aposel teq in ago nantut nagan in bilaqne tituq gan nog iysa God in gimalib ago bit na wazan tigeraqaq. Sa Krais Yesus in bit na ago tituq liqab diqta iyim in bit na anon bunmo tisoraq. ²¹ Sorsa bit na aditin bunmo Krais aholib soqotim ussa Iyatha Krais-mo in bit na ulum tutsa in ayah iyad God ago bit tawonta nog tiqiyaq. ²² Sa ne inaqmo Krais Yesus ago hib soqotan in ne giwaqim Juda on mataw na nenaq girom tonan ne bunmo God ago bit in ago Bugaw Dimunta bo osaqla na tiqiyiy.

3

Pol ago kabiy in Yesus awagamun dimunta on mataw en ta asor Juda a haiqta nagan gibilenaqta

¹ Daq alulin nazaq iysa iyan yaqmo Pol ya ne on mataw Juda a haiqta na gilumsihnan haqad Krais Yesus ago gamuk gibile-naiqta. Teq ya kabiy naqmo emsa mataw ya iwazim iqirqrana ya bit kab tuqosaiq. ² Nabag ne yaqgo tuhuritiyya. God on mataw en ta asor Juda a haiqta nagan inaqmo gilumsihta agamukan na in ya yagan ya gamuk na wamuzad ne gibilenaqta. ³ Gamuk na kwaziqmo ulilemim usta. Teq God eman yaqgo hib ulal iyan ya ago tuhurit. Huritim ya gamuk na asitmo nawa ne gimen mar tonan ne ahol tuwaqiy.

⁴ Krais boleq on mataw en bunmo gilumsihdaqta na agamukan ulilemim usta. Teq ya ne gimen gamuk nawa mar tonta na ne ahol tuwaqeq teq ya Krais ago kabiy alulin hurit kemta nazaq ne ginad tiqem has daqaymo. ⁵ Kwaziqmo God gamuk na ulileman ussa in mataw a hi gibilenyaq. Ari muran God ago Bugaw Dimunta in God ago Aposel tawonta na teq in ago nantut tawonta na gamuk ulilemabta na tigibilan. ⁶ Gamuk na kazaq bilam, On mataw en ta asor Juda a haiqta nagan in Juda mataw nenaq araqibmo Yesus awagamun dimunta tuwaqim in bunmo araqibmo Gimam God atatniz tiqiyim osayta ham. Osad

in bunmo mataw en amulikmo iyim in bunmo Krais anon amulikmo tiqiyimo ham. Iyan God in Krais Yesus amalib on mataw gidimun tonnan haqad hel diqmo bilamta agamukan na in muran Krais ago on mataw bunmo gigota tiqiy ham.

⁷ God ya itowun emim agem dimunta yagad in ago zaway ya iholib tiqam. Eman zaway na amalib ya Yesus awagamun dimunta na akabiyen emaiqta. ⁸ God ago on mataw tawonta na bunmo gilikmanib ya ibin amik diq usaqta. Ta teq God kabiy dimunta na samanmo naw nog yag. Kabiya na ya on mataw en ta asor Juda a haiqta nagan gibilenid Krais in gilumsihta na ago in hurit daqayta. Teq Krais i gilumsihta na in nagah ayah diqmo iyan i a hi ulum kemamta. ⁹ God nagah bunmo giceman osayta. Ad in on mataw en ta asor Juda a haiqta nagan gilumsihgo anad usta na in isihan kam sisaqmo diq ulilemim usta. Teq muran ya in anad ulilemim usta na ulalabmo bilaqsa on mataw en bunmo tuhurit kemayta. ¹⁰ Nazaq iysa iyan on mataw Yesus ago nan huritad abin sorsa God anad dimdimunta amo amo na in gigo hib ulal tiqiyaq. Ulal iysa Heven-ib angelo giwaz meqintar maror gan osayta na teq bugaw aseseqta gabin inaqtta nagan bunmo in tuhurit kemayta.

¹¹ Kwaziq diqmo God daq nazaq emnan haqad anad emad osta. Ossa muran i gigo Iyahta Krais Yesus gwahtiqim in God anad na tuwol net bug. ¹² I Krais anan helmo haqad aholib soqotim inaq osad i God agerab loqnan a hi rabauqta. Haiqgam. Muran i God anognib gwahtiqsa nagaq araq i gidanin a hi qwayqaq. ¹³ Nazaq iyan muran ya ne gibilenaiq. Ya ne gilumsihad sanctitiy soraiqta ka luweq ne ya ibiyad gidan sosil iydaq haqaiq. Haiqgam. Ne ya inan ginad dimniyan. Ya ne gimen afaqan ka sorsa God ago hib ne gabin inaq tiqiyay. Gabin inaq iyeq abeb teq ne le tugwahtiyeq dimunno tuqos daqay.

Krais ago on mataw Efesus-ib osayta na giwaz meqniyeq tur daqay haqad Pol in gimen God bulon

¹⁴ I Gimam Iyahta ne gilumsih naqmo hiqiyta na ya anadin emad ya in ayon ibakbakan ulum laquwaiqta. ¹⁵ In on mataw Heven-ib teq og kab osayta na bunmo Gimamta teq inmo bilaqan on mataw en bunmo in gimo gimaman og kabta gihaqenib osaytamo. ¹⁶ Ya in ayon ibakbakan ulum laquwim turad ya ne gimen kazaq God bulonaiqta. God haqaiq ni nibin teq ningi zaway ayahmo usaqta nazaqmo ni Efesus on mataw na ayahmo gilumsihmo haqaiq. Gilumsihad ni ningi Bugaw emid le in giduganib usad in ginad gigem inaq

emid awaz meqniyan haqaiq. ¹⁷ Awaz meqniysa on mataw na Krais anan helmo haqsa Krais in gimuganib osanmo haqaiq. Sa Krais in ginan anad bilaqaqta na in loyin nad giwaz meqniyeq turiy haqaiq. Bilaqne ay aninin og aduganib wolehim og waz naqmo hiqiyta ay na zaway iyim turaqta nazaq nog haqaiq. ¹⁸⁻¹⁹ Nazaq iyeq teq Krais agem dimunta negaqta na in loyin kemiya haqaiq, ningi on mataw tawonta bunmo loyinayta nazaq haqaiq. Loyinsa Krais i ginan anad bilaqaqta na in naga ahay diqmo iyim ago sisaq pesanmo lehaqta na ago in ginad emiy haqaiq. Teq nagah na ulilibmo diq gwalehim abeqar ogibmo diq wolehaqta na ago in hurit kemiymo haqaiq. Hurit kemeq Krais ago daq na ahay diqmo iyim i ginad bunmo uriyamta nazaq in ginad emiymo haqaiq. Efesus on mataw na in nazaq diqta iyid teq ningi daq teq ninad dimdimunta nagan bunmo in giholib ate gwaleq usan haqaiq.

²⁰ Ari God ago zaway i gigemab kabiya emaqta na amalib in i gidimun diq tonaqta. Teq i ginad emad susumun ugauqta na in i igad in nagah asor i anadin a hi emta inaqmo em igaqtamo. Igsa i nulingo biyab haq. ²¹ Nazaq iyan kam bunmo tuteqmo on mataw Krais ago nan huritayta na in God abin iluwiy. Sa God in Krais Yesus ago hib abin ayatha waqanmo. Waqsa daq na muran useq le on mataw gidauhau abeb teq gwahtiq daqay na gigo kamub iyeq in nazaqmo leh tutan. Hel diqtaqmo.

I Krais anon nog iyim osad God ago daq dimdimunta naqmo i emuq

4

Krais ago on matawta na bunmo in Krais anon

¹ Yaqmo Pol, ya Iyahta ago kabiya emaiqta na ago ya iqirqruran osaiqta. Osad ya atoranmo kazaq ne gibilenaiq. God ne gililewunan ne in agota tiqiyim osayta haqaiq. Nazaq iyan ne ananon diqmo luw osad ne gigo daq bunmo in God ago liley na inaq rireneqmo usan. ² Ne gihol wazid woqsa daq kiskistaqmo giyogniz gigo hib emiy. Emsa giyow araq ne gimeqin tonid ne gigem hidmo hi meqniyan. Haiqgam. Ne an alowan tonad an anan ginad bilaqsa osiy. ³ Sa God ago Bugaw Dimunta anad dimunta negsa ne gigem amulikmo iyeq osiy. Osad ne giholtuw bulad zib alobaw osgo adan muziniy. Muzinsa daq na bilaqne am nog ne giqirqrurid ne mataw en amulikmo iyeq osiy.

⁴ Krais anon amulikmo usaqta. Sa Bugaw Dimunta in amulikmo osaqtamo. Ad nazaqmo God ne gililewunan ne in ago on mataw bunmo nenaq wastonim ne bunmo araqibmo God teq gidimun tondaqta na amen emim osayta. ⁵ Teq i gigo Iyahta amulikmo osaqtamo. Ossa i bunmo God ago gamuk helmotu amulikmo wazad i bunmo daq amulikmo muzinim Krais abinib yuw huzaauqtamo. ⁶ Teq God amulikmoqmo osad in i bunmo Gimamta. In ago on mataw bunmo inmo ahaqenib iysa in giwamuzaqta. Giwamuzsa in gigo kabiq daq bunmo inmo anad muzinaqta. Sa in ago on mataw na bunmo gilikmanib in nenaq osaqtamo.

⁷ I bunmo God ahaqenib araqibmo iyim osauqta. Ta teq Krais in ago zaway araqibmo a hi igaqta. Haiqgam. In anad emad zaway ezaqta in igdaqta naqmo in i amulik-mulikmo naw nog samanmo tiqiq. ⁸ Na ago God ago marib gamuk araq kazaq bilam,

In bab emim mataw kabemmo giqirqurim teq in giqad ulilibmo tugwalah ham. Gwalehim in ago walmataw naw amo amo tinag ham. *Buk Song 68.18*

⁹ Teq gamuk nawa bilam, "In gwalah" hamta na alulin in kazaq. Danmеб in pesanmo ulilib osim ogib gewomta. ¹⁰ Teq mat pesanmo gewomta naqmo muleqim gwalehad in kait uriyamim ulilibmo diq a ta gwalah. Nazaq iyan in og saw bunmo tuwaleq ton bugim osaqta.

¹¹ Teq in ago on mataw naw amo amo kazaq nagta. Mataw asor in Aposel akabiyan nag. Sa asor in God ago nantut akabiyan nag. Sa asor in uliq-uliqgo luwad Yesus awagamun dimunta on mataw gibilengo akabiyan nag. Sa asor in God ago sipsip giwamuzgo akabiyan negad in mataw asor God ago gamuk asuleqin bilaqgo akabiyan nag. ¹² In ago on mataw tawonta na giwaz meqniyeq ago kabiq dimunimo tiqem daqay haqad in naw amo amo na nagta. Negan in kabiq amo amo na emsa Krais anon ayah iyaqta. ¹³ Ari i bunmo nazaq an ulumsihad kabiq amo amo na emad teq i bunmo ginad helta amulikmo ussa i God atatin ago tuhurit kemam. Hurit kemeq nab i gihol tizilimdaq. Zilimad teq i Krais anon wolnet bugid in bilaqne mat ahol bunmo usaqta nog iyad in anon afaqin inaq tirirendaq.

¹⁴ I nazaq diq tiqiyeq teq i amun amikta os nog a ta hi iyam. Sa mataw gimi-leq meqinta nagan gigo suleq katiyta bilaqsa i bilaqne muy kamisib lehsa tim bolad sorsa in haresmo lehaqta nazaq i a hi iyam. Mataw na gimileq iyad yuw hunegsa i huriteq a hi muzinam.

¹⁵ Haiqgam. I mataw ginan ginad bilaqsa gamuk heltaqmo gibilenam. I nazaq toneq teq i Krais anon nog iyeq ayah tiqiy bugamta. Ayah iy bugeq i gifaqin Krais ago towubmo tugwahtiqaq inaq diq tiso-qotamta. ¹⁶ Krais i gifaqin iyim ossa i in abensen ameqnagin teq in ahol anaghan bunmo iyim osauqta. Sa i gifaqin na zaway igsa i kabiq anononmo emauqta. Emad i bunmo an soqotim araqibmo diq osad i an anan ginad bilaqsa osauqta. I nazaq emad ossa Krais anon na ayah iyad in awaz diq timeqniyaq.

Krais ago on mataw loq gel muturtab luwiy

¹⁷ Ari i bunmo Iyahta ahaqenib iyim osad iyan ya gamuk ka atoranmo kazaq diq ne gibilenaiq. On mataw God abin a hi huri-tayta na gigo daq ne hi muziniy haqqaiq. On mataw na ginad agadanmo diq iysa in daq hi emnanta kabemmo emayta. ¹⁸ In ginad romriq iyan in ginad a hi em hasayta. Ad in gigem soqotim ussa in ginad dimunta araq a hi usaqta. Nazaq iyan in God ago maror asan ban osad in ago os dimuntab nab bo a hi gwahtiqaqta. ¹⁹ In daq meqinta emim gihol a hi loyinad gimebay a hi woqaqta. Sa ginad meqinta bolsa in a hi wasihad adan emmo emayta. Mataw nazaqta in daq meqinta anumlan inaqta bunmo emnan ginad diq bilaqyata.

²⁰ Ari ne Krais ago suleq waqiyta na in ne daq meqinta nazaq emgo a hi bilamta.

²¹ Ne Krais ago tuhuritiyta. Ad ne in ago suleq bunmo tuwaqiyta. Suleq na ne daq helta Yesus i giqisihunta naqmo asuleqin ne waqiyta. ²² Waqan suleq na bilam, Ne gigo os kwaziqta na gileh ugad ne ta hi muziniy ham. Na ezaqgo ne gigem kwaziqta na eraqad kat negsa ne negah haresmo utet yaqayta. Sa daq naqmo ne gihol meqin tonyaqta. Teq ne Krais ago suleq na huritim ne gigem kwaziqta na muzan tilah. ²³ Teq suleq na kazaq bilammo. Ne ginad buliyid muturta iyan ham. ²⁴ Ne ginad muturta iyid teq ne mat muturta ago daq waqeq tubusan nog giholib emiy ham. God-mo ne giqeman ne on mataw muturta gwahtiqaqta. Gwahtiqaq ne gigo daq God ago daqmo nog iyaq. Nazaq iyan ne mutur iyim daq titronta emad ne God ago on mataw tawon diqta iyim osayta.

²⁵ Nazaq iyan ne gamuk katiyta ago adan hulosiy. Hulosad i gimaqbaban Krais aduganibta na nenaq gamuk emad i nan heltaqmo an bulonad osuq. Na ezaggo i bunmo mat amulik naqmo ahol asor iyim osauqta. ²⁶ Teq ne gigem meqniysa ne gihol waz naqmo hiqiyeq daq meqinta hi emiy. Ad ne gigem meqniyidaqta na hulosid sisaqmo hi usanmo. Haiqgam. Zeq a hi

woleh bugsa ni hidmo leheq nimaqbab nog ni nigem meqinta ugta na inaq an anobun wastitayiy.²⁷ Luweq ne Satan ayon dan has ugid in ne gilikmanib gwahtiqaq ne gigo os timeqin tondaq.

²⁸ Teq mataw rin tonad luwayta na in ta hi rin toniy. Haiqgam. In Krais anan helmo tihaqim in daq titnonta muzinad in gimo gibenab kabiyy daq tiqem daqay. In nazaq emeq teq mataw nagah ago siqim iysa in gimo gigo nagah amalib tigilumsih daqay.

²⁹ Gamuk meqinta araq diq ne gizezab hi gwahtiqaq. Haiqgam. Gamuk dimunta mataw gilumsihid in giwaz meqniyeq os daqayta naqmo ne bilaqiy. Bilaqsa mataw ginad siqim iyayta na huritad in ginad tizilimdaq.

³⁰ Teq ne God ago Bugaw Dimunta emid ahol afaqan hi iyan. Bugaw na in God ne gizayan ne in ago on mataw tiqiyita na atowun nog ne giholib usaqta. Tow na ne giholib ussa le Yesus ta boldaqta akaman nab teq God ne giwaqid ne in ago tiqiy has daqay haqad in nagta.

³¹ Teq ne yuwlozin bilaqayta na adan hulos tayiy. Ad ne gigem meqniyaqta na teq ne an wadad haresmo an mugad an bilawunaya na ne hulos bugiyomo. Ad gigem meqniysi a meqin tonayta adan na ne aban diq emad luwi. ³² Ne an alowan tonad an agem dimunta ugad osiy. Osad ne gimaqbaban daq meqinta negsa ne walemad anadin ta hi emiy. Ne Krais aholib soqotan God ne gigo daq meqinta walemin anadin a ta hi emaqta nazaqmo ne emiy.

5

I saw anuwanib luwuq

¹ Ne God ago onmin iyan in ne ginan anad diq bilaqaqta. Nazaq iyan ne in asen muzeq in daq em nogmo ne emiy. ² Ad Krais i ginan anad bilaqsa in i guyon ahol nog hulosta nazaqmo ne an anan ginad bilaqsa osiyomo. Na ezaqgo Krais ahol tamaz nog God ugan God ameb in bilaqne tamaz ahuran dimunta nog iyan in huritim anad diq bilamta.

³ Teq ne an haresmo hureqeq inaq hi usiy. Ad ne daq anumlan inaqta bunmo hi emad mataw asor gigo nagah hi utetiymo. Daq nawa ya ginan bilayta na ne aban emsa in abin asit ne gilikmanib hi gwahitiqaq. I God ago on mataw tawonta iyim i nazaq wastitayeq osama. ⁴ Teq ne gamuk meqinta teq gamuk agadanta teq gamuk akamolmolin inaqta meqinta nagan ne hi bilaqiy. God ago on mataw gamuk naqanta a hi bilaqayta. Haiqgam. Ne gamuk meqinta na hulosad gamuk dimuntaqmo amalib God eseymo ugiy. ⁵ Ne gamuk ka

huriteq ginad diq em hasiy. On mataw an haresmo hureqim inaq usayta na teq mataw daq anumlan inaqta emayta na teq mataw nagah haresmo utetayta na in God ago maror aduganib gibin haiqta. Mat nagah haresmo utetaqta na in bilaqne god katiya abin iluwaqta nazaq nog iyaq. Mataw naqanta nagan bunmo in God ayow Krais inaq gigo os dimunta nab le a hi gwahtiqaq.

⁶ Ne gihol waz naqmo hiqiyiy. Luweq mat araq kat negad ago gamuk samanta gibilensa ne muzin daqay. Ne nazaq hi emiy. Mataw gamuk samanta muzinad God ago gunun othassa God in ginan agem meqniysi faq negaqta. ⁷ Nazaq iyan ne mataw naqanta giholib hiqiyad nenaq araqib hi luwi. ⁸ Kwaziqmo ne romriqab osiyta. Ari muran ne Iyatha aholib tisogtim ne inaq saw anuwanib tuqosay. Nazaq iyan ne on mataw saw anuwanib luwayta nazaq nog ne luwi. ⁹ Na ezaqgo ne saw anuwanib daq emsa saw anuwan naqmo in ne gigo daq dimdimunta teq ne gigo daq titnonta teq ne gigo daq helta nagan bunmo gigeman anon kabemmo tisorgenaqta. ¹⁰ Teq nagaq daqin ne emsa Iyatha anad dimniyaqta naqmo ne nagunad luwi. ¹¹ Mataw romriqab osad daq samanta emsa ne gilumsihad ginaq hi emiy. Haiqgam. Ne gigo daq dimunta naqmo amalib ne mataw gigo daq meqinta emid ulal iyan. ¹² Na ezaqgo daq hares mataw ulilemim emayta na in meqin diq iysa i gizezabmo bilaqnan gimebay woqaqta. ¹³ Ari nagah bunmo saw anuwanib gwahtiqammo ulal iyaqta. Nazaq iyan saw anuwan naqmo in daq bunmo alulin eman ulalab gwahtiqaqta. ¹⁴ Daq naqmo ago mataw bar wazad kazaq bilaqayta.

Mat ni usaqta na ni eraq haqayta.

Eraqeq ni hodhod huloseq asan ban gwahtiqaq haqayta.

Gwahtiqaq ni Krais ahol anuwanib os haqayta.

¹⁵ Nazaq iyan ne gihol wamuzad luwi. Ad ne mat anad haiqta luw nog hi iyi. Haiqgam. Ne bilaqne mat anad inaqta luw nog iyi. ¹⁶ Muran kam kab daq meqinta haresmo gwahtiqaq tlehaq. Nazaq iyan ne kam abu hi ulumad ne God ago kabiyy em naqmo hiqiyi. ¹⁷ Ad ne agadan hi iyd Iyatha anad ezaq usaqta na ago ne ginad em haseq nazaqmo ne emiy.

¹⁸ Teq ne yuw atoranta ayahmo uluwad gimaqbel hi hulosiy. Haiqgam. Yuw na mataw ginad wamuzsa in daq hi emnanta emad in gimo gihol meqin tonayta. Ari negmo teq ne God ago Bugaw Dimunta ban ugid in ayahmo ne giholib usad ne ginad wamuzan. ¹⁹ Sa ne gimaqbaban

nenaq humab woleq lotu abarin teq Buk Song-ib bar usaqta nag teq bar asor Bugaw Dimunta ne ginadib eman gwahtiqaqta nagan ne wazad osiy. Osad ne Iyahta ayon bar nagan wazad ne gigemabmo diq in abin iluwiy. ²⁰ Teq ne giholib daq bunmo gwahtiqaqta na ago ne i gigo Iyahta Yesus Krais abinib i Gimam God esey uguy.

On mataw an tuwaqiyya gimen gamuk

²¹ Krais ne gibiyimuzsa ne in wazinad ahaqenib iyeq osiy.

²² Teq ne on mat tuwaqiyya na, ne Iyahta ahaqenib iyim osayta nazaq ne gidugniz gihaqenib iyeq osymo. ²³ Na ezaqgo mat in awe afaqinta. Bilaqne Krais in on mataw inmo ago nan hurityta na gigo gifaqin iyim osaqta nazaq nog. Teq Krais in ago on mataw na gilumsihim giwagan in Krais anon nog iyim osayta. ²⁴ Ad Krais ago on mataw in ahaqenib iyim osayta nazaqmo on in gidugniz gihaqenib iyeq in ginad muzin bugiy.

²⁵ Sa ne mataw aw tuwaqiyya na, ne giqonan ginan ginad bilaqan. Krais in ago on mataw ginan anad bilaqsa in gilumsihnan haqad ahol nog hulosta nazaqmo ne giqonan ginan ginad bilaqan. ²⁶ Krais in ago on mataw na giqemid tawon diq iy daqay haqad in gimen ahol nog hulosta. In nazaq emim teq in ahol awagamun na in ago on mataw negan in tuhuritiya. Huritym in gamuk na anan helmo haqad yuw huzan Krais in gigem suholan in ameb ginumlan tihiqiy. ²⁷ Ginumlan hiqiyin in giwaqan dimun diqmo iyan Krais aholyon tigwami. Krais ago on mataw na giholib gibatlan araq hiqiyen gisan dimun diq iysa in gihol awaqqan dimunmo diq tiquy hasaqta. Nazaq iyan in Krais ago on mataw tawon diqta iyim in giholib daq araq ananin waq daqayta na a hi usaqta.

²⁸ An nazaqmo mataw aw tuwaqiyya na in gimo gihol anan ginad bilaqqaqta nazaqmo in giqonan ginan ginad bilaq daqaymo. Mat in awe alowan tonad na inmo ahol alowan tonaqtam. ²⁹ Mat araq diq inmo ahol bab ugad a hi meqin tonaqta. Haiqgam. Mataw bunmo in gimo gihol alowan tonad in gihol anonomo wamuzyata. Teq Krais in ago on mataw guyon nazaq emaqtam. ³⁰ Na ezaqgo i inmo ahol anaghan nog iyim ossa in nazaq i gidimun tonaqta.

³¹ Daq alulin naqmo ago mat in anem amam gihuloseq in awe aholib tisogotdaq ham. Soqoteq in giger gihol amulikmo iyeq tuqos daqay haqad in bilam ham. *Jenesis 2.24*

³² Mat awe inaq ezaq tonim gihol amulikmo iyayta na alulin ulilemmimo diq ussa i a hi ulum kemamta. Teq ya gamuk na

waqim Krais ago on mataw nenaq giholib emim ya in ginan bilaqaiq. ³³ Ari ne mataw amulik-mulikmo bunmo ne gihol anan ginad bilaqqaqta nazaqmo ne giqonan ginan ginad bilaqan. Sa aw aduw wazinad ahaqenib iyeq osan.

6

Pol in onmin ginenmaman nenaq gimen gamuk bilam

¹ Onmin, ne ginenmaman nenaq araqibmo Iyahta aholib soqotim inaq osayta. Nazaq iyan ne ginenmaman gigo gamuk hurityi. Daq na God ameb dimun diqta. ² Na ezaqgo God ago mar kazaq bilam,

Ni ninenmam giqez hurit ham. *Lo 5.16a* Ari God in ago gunun asor tibilaqim teq in gunun nawa na bilaqim abitanib in gamuk araq i gidimun tondaqta na tutim in kazaq hel diqmo bilam,

³ Ni ninenmam giqez huriteq teq ningos dimniysa ni og kab sisaqmo tuqos-daq ham. *Lo 5.16*

⁴ Ari onmin gimaman ne gigo onmin giqeqin tonsa in gigem hi meqniyyi. Haiqgam. Ne in giwamuzad gigo daq wasti-tayad Iyahta ago suleq dimunta amalib in gibileniy.

Kabibiy mataw gigo aseseqta na nenaq gimen gamuk

⁵ Ari ne kabibiy mataw samanta, ne ginamreniz og kabta na gihaqenib iyeq osad ne girabunad giqez hurit kemi. Ad ne Krais ago gamuk muzinayta nazaq ne in giqez muzinad ne ginad giger hi iyan.

⁶ Luweq ne ginad em daqay, I gigo aseseqta kawa osay haqad ne kat negad in gimebmo kabiy emsa in ne ginan ginad dimniy daqay. Haiqgam. Ne Krais ago kabibiy mataw iyim ne God anad muzinim mataw na gigo kabiy emayta. Nazaq iyan ne gihol bunmo kabiy ugad ne hi katiyad anonomo emiy. ⁷ Ne giholtuw bulad gigem dimniysa kabiy emiy. Na ezaqgo ne matawmo gigo kabiy a hi emay. Haiqgam. Ne Iyahta ago kabiy emayta. ⁸ Ad ne ginad kazaq emiy. Mataw samamno luw osayta na in gigo kabiy dimunmo emid Iyahta in amenin naw dimunta tinegdaq. Ad nazaqmo kabibiy mataw samanta na in gigo kabiy dimunmo emid Iyahta naw dimunta naqmo in tinegdaqmo.

⁹ Ari ne kabibiy mataw gigo aseseqta, ne gigo kabibiy mataw samanta gimen daq dimuntaqmo emiy. Ad ne tor negad ginol-nan tonsa in rabayta na ne hulosiy. Iyahta Heven-ib osaqta na in ne gigo Iyahta teq in kabibiy mataw samanta na gigo Iyahtamo. Ad in mataw gibin inaqta gigo a hi lehaqta.

Haiqgam. In mataw bunmo gimen daq amulikmo emaqta.

Krais ago on mataw in mataw bab emayta nog luwiy

¹⁰ Ari yaqgo gamuk ta asor usaqta na in kazaq. Ne Iyahta inaq soqoteq ago zaway waqad ne giwaz meqniyeq osiy. ¹¹ God bab emgo abalawun negapta na bunmo ne waqe q gihol sihenid. Gihol sihenid teq Satan ulilemq ne gimen kilek amidon hunegsa ne zaway iyeq titur daqay. ¹² Na ezaqgo i matmo inaq bab a hi emauqta. Haiqgam. I bugaw meqinta gigo aseseqta nag teq og ka ago bugaw marorta nagan teq nagah aseseqta giwaz meqin diqta kam aromriq inaq ka ago daq wamuzayta nag teq bugaw meqinta ulilib luwad mataw gimeqin tonayta nagan nenaq i an wolauqta. ¹³ Nazaq iyan God bab emgo abalawun bunmo negapta na ne waqe q giholib emiy. Giholib emeq teq kam araq bab meqinta boldaqta nab ne zaway iyeq tursa bab na bo ne ginolsa ne a hi woq daqay. Haiqgam. Ne gihol anononmo wastitayeq teq ne bab na inaq an wolad ne giwaz meqniyeq titur daqay.

¹⁴ Nazaq iyan ne gihol wastitayeq zaway iyeq turiy. Ne God ago gamuk helta waqe q let nog gihulib hureqid usan. Ad teq Krais ago daq titnota ne emayta na in bilaqne gibanisih ain-ibta na nog ne giholib usan. ¹⁵ Sa kam bunmo ne gihol wastitayeq God ago gamuk dimunta mataw gigem eman kute nemagta na ne bilaqqomo iyeq osiy. Ad ne God ago gamuk bilaqgo iyim osayta na ne bilaqne gisendugan nog gisenab emeq turiy. ¹⁶ Nagah na bunmo ne giholib emeq teq ne ginad helmo haqayta na dareq nog ne wazeq turiy. Tursa mat meqinta na ago kilek amidon faq oyaqta na ne gimen hunegsa ne dareq na amalib tuqot has daqay. ¹⁷ Ad God ne gilumsihim tigiwamta na agamukan in bilaqne hat ain-ibta ne gifaqin isihet us nog iyan. Sa ne Bugaw Dimunta ago baqir wazeq turiy. Baqir na in God ago gamuk naqmo.

¹⁸ Bugaw Dimunta ne ginad wamuzsa tuteqmo ne God inaq gamuk emad in ne gilumsihgo haqad ne buloniy. Ad tuteqmo ne gihol asawan woltayad osiy. Teq kam bunmo ne God ago on mataw tawonta na gimen God bulonad ne daq na hi hulosiy.

¹⁹ Teq ne yaqmen God bulonsa in ya ilumsihanmo. Ilumsihsa teq ya iteb inmo ago nantut gwahtiqa ya a hi rabad Yesus awagamun dimunta alulin ulilemim usta na tibilaq sireqdaiq. ²⁰ Ya God abinib gamuk na bilaqad luwsa iqirquriyta. Teq ya bit kab osad ya God ago nantut na bilaq tutaiqta. Nazaq iyan ne yaqmen God

bulonsa ya rab bayid woqsa ya God-mo anad muzinad ago gamuk na tibilaqdaiq.

Gamuk asor

²¹ Ari ya kab ezaq iyim osaiqta na teq ya naga emad osaiqta na ago Tikikus tigibilendaq. Tikikus in i gimaqbab araq dimun diqta. Teq in Iyahta kabi y ugta na emad atuw a hi hiqiyaqta. ²² Ya in eman nawa lehim i ezaq diq osauqta na ago teq in ne gibilensa ne gigem zaway tiqiyadaq.

²³ Ari i Gimam God teq Iyahta Yesus Krais inaq in ne on mataw Krais abin wazinayta na bunmo gilumsihsa ne gigem kute nemsia osiy. Osad ne ginad helmota na waz naqmo hiqiyad ne an anan ginad bilaqsa osiy. Nawaqmo.

²⁴ Ari on mataw tutimmo i gigo Iyahta Yesus Krais anan ginad bilaqqaqta na bunmo God in agem dimunta negsa in osiy. Nawaqmo.

Filipay

Sansandek Pol mar tonan uliq Filipay-ib lahta Gamuk ameb lehaqta

Pol ame amebta kamis urotim saw Masedoniya-ib gwahtimta nab in le uliq Filipay-ib Yesus awagamun dimunta na bilam (Aposel 16.8-15 nab teq ni ahol waq). Abeb in lehim uliq araqab ossa mataw in wazim irqruryi. Irqruran ossa Krais ago on mataw uliq Filipay-ibta na huriitim in Pol amen mani asor urotim mat anan Epafroditus ugan in waqim ad Pol ago hib tilah, Pol aholyon didaq nagah zydaq haqad. An Pol mani na waqim anad ayahmo dimniya in Filipay on mataw na esey negnan haqad gimen sansandek ka mar tonta (Filipay 1.5; 4.10-19).

Teq gamuk ka alulin ta asor kazaq usaqmo. 1) Pol ezaq iyim osaqta na ago in gibilan (Filipay 1.12-26; 4.10-19). 2) Teq in Filipay on mataw na ginad helta zaway ug, luweq Pol irqruran osaqta na ago in ginad meqniya in Krais abinib afaqan sornan gituw hiqiy daqay haqad (Filipay 1.27-30; 4.4). 3) Teq in Filipay ginad enqenunid in gihol wazid woqsa ginad amulikmo iyeq os daqay haqad in bilam (Filipay 2.1-11; 4.2-5). 4) Teq in Timoti ayow Epafroditus inaq gibin iluwmo, abeb mataw giger na le uliq Filipay-ib gwahtiqid Filipay mataw na in giwazineq gilowan ton daqay haqad (Filipay 2.19-30). 5) Teq in Filipay on mataw na gidek waz, in mataw gihol abatan asan urotgo bilaqayta na teq mataw gihol bilaqgo adan muzinayta na gigo in girabuneq gihol hiqiy daqay haqad (Filipay 3.1-4.1).

Filipay on mataw Pol inaq yow emim ayahmo ulumsihan Pol in ginan anad dimniy

¹ Yaqmo Pol ya iyow Timoti inaq i giger Krais Yesus ago kabibiy matawta iyim i sansandek ka mar tonim eman uliq Filipay-ib God ago on mataw tawonta Krais Yesus inaq soqotim osayta na teq in gigo mataw danmepta na teq in gigo kabibiy matawta nagan bunmo gigo hib lehaq.

² I Gimam God teq i gigo Iyahta Yesus Krais inaq in gigem dimunta negad in ne gigem emid kiskismo usan.

Pol God esey ug

³ Kam bunmo ya ne ginadin emad yaqgo God esey ugaiqta. ⁴ Esey ugad sirisirimo ya ne bunmo ginan inad dimniya ne gimen God bulonaiqta. ⁵ Na ezaqgo mebmebmo

ne Jesus awagamun huriitya nabmo ne ya inaq wastonim i araqibmo wagam dimunta na akabiyan emyauqta. Emad luwim bo muran i kabiy na garabmo tisor tutuaq. ⁶ God-mo kabiy dimunta na alulin ne gilikmanib amta. Emim inmo kabiy na wamuzad oseq le Krais Yesus ta boldaqta akannib nab teq in emid tihiqiy bugdaq.

⁷ God agem dimunta igad ago kabiy i gibebab eman ya nenaq i araqibmo kabiy na emauqta. Sa ya iqirqruran uliq kab ossa ne yaqgo afaqan na sorad ne bilaqne giqirqruran os nog iyaymo. Ad mataw Yesus awagamun geg ugsu ya amenin emad gibilen sireqsa ne ya ibunib turayta. Turrad ne ya ilumsihsa i araqibmo wagam dimunta na zaway ugsa in awaz time-qniyaq. Ya ne giloyinsa ne ya inan ginad diq bilaqaqta. Nazaq iyan ya kazaq inad dimun diqta ne bunmo negaiqta ka in daq dimunta. ⁸ God ameb ya helmo bilaqaq. Krais Yesus ne ginan anad bilaqaqta nazaqmo ya ne bunmo ginan inad bilaqsa ne ginadin diq emaiqta.

⁹ Ya ne gimen God bulonad kazaq bilaqaq, God haqaiq, ni mataw na gilumsihad ginad emid hastitaya in an anan ginad bilaggo ginad em hasiy haqaiq. Ginad em hassa daq na in gilikmanib ayahmo iyan haqaiq. ¹⁰ Ad in daq bunmo gilum kemad emnanta naqmo amomo in emad osiy haqaiq. In nazaq emad oseq le Krais ta boldaqta akaman nab in gigemab ginumlan hαιq diq iysa in giholib daq araq ananin waq daqayta hi usan haqaiq. ¹¹ Ad kam nab Yesus Krais abin titnonta naqmo amomo in giholib ayahmo usan haqaiq. In on mataw nazaq diqta iyid teq ni nibin ayatha in gigo hib waqsa on mataw bunmo ninmo nibin tiqiluw daqay haqaiq.

Pol irqruran osta na ago Yesus awagamun le ayahmo iy

¹² Ya imaqbaban, ne hurit kemyi. Daq kawa ya iholib gwahtimta ka in Yesus awagamun a hi wasihaq. Haiqgam. In leh tutaq. ¹³ Nazaq iyan uliq kab Sisa ago bab matawta na teq in ago gavman mataw bunmo teq on mataw ta asor na bunmo in yaqgo thururiti. Huriitim in ya inan ginad kazaq tiqemay, Pol Krais asen muzinad ago kabiy emaqta na ago in irqruran osaq haqay. ¹⁴ Teq uliq kab ya imaqbaban Iyahta ago on matawta na kabemmo in ya iqirqruran ossa ibiyad in zaway diq tiqiyay. Zaway iyad in a hi rabad God ago gamuk atoranmo bilaqayta.

¹⁵ Helmo, mataw na gigo asor ginad meqinta yagad in ya ibin wazid woqsa in gibin ayah iydäq haqad in Krais awagamun bilaqayta. Sa ta asor ginad dimunta yagad in Krais awagamun bilaqayta. ¹⁶ Mataw

ginad dimunta na in yaqgo tuhurit kemay. Ad in ginad emay, God-mo bilaqan Pol gavman matawtu na Yesus awagamun gibilen sireggo haqad in bit giqrquran osayta nab osaq haqay. Haqad in ya inan ginad bilaqsa in Krais awagamun bilaqayta.¹⁷ Ari mataw gihar yagayta na in on mataw gihureqid in ya ihuloseq in gigo hib lehnar haqad in Krais awagamun bilaqayta. In ginad dimunta ussa nazaq a hi emayta. Haiqgam. Ya iqirquran kab ossa in ya iholib afaqan ta araq emid ya inad ayahmo meqniydaq haqad in nazaq emayta.¹⁸ Teq ya inad a hi meqniyaq. Mataw asor na ginad meqinta ussa in Yesus awagamun bilaqayta. Sa asor na daq helta emayta. Teq in bunmo Krais awagamun bilaqsa on mataw kabemmo huriyatya. Nazaq iyan ya inad dimniysa osaiq.

Pol in Filipay gilumsihnan haqad in hidmo moqgo anad a hi amta

Teq ya inad dimniyaqta na a hi ihuloseq daiq.¹⁹ Haiqgam. Ya inad kazaq diq emaiq. Ne yaqmen God bulonua in Yesus Krais ago Bugaw Dimunta yagsa ya zaway iyeq osad a hi woqdaiq haqaiq. In ya ilumsihsa afaqan kawa ya iholib usaqta ka le tihiqiyid ya dimunmo God ameb tuqosdaiq haqaiq.²⁰ Ya inad emaiq. In ya ilumsihsa ya imebay asit a hi woqdaiq haqaiq. Ya zaway diq iyeq ossa Krais abin ayahta yaqgo hib tuwaqdaiq haqaiq. Nazaq iyid teq ya kayeqmo osdaiq o hajiq, mataw ya inol emid moqsa, daq bunmo ya iholib gwahtiqaqta na amalib ya Krais abin emid ayah tiquyidaq haqaiq. Haqad ya God amen emad ihol tuhusisiqaq.²¹ Na ezaqgo ya og kab kayeqmo osad na ya Krais inaq tisoqotim dimunmo osaiqta. Ari ya moqeq na ya tidimniy hasdaiq.

²² Teq ya isan ka kayeqmo osad ya God ago kabiy emad on mataw kabemmo gilumsihaiqta. Ya naga danteqin diq muzindaiq? Dante giger na dimun.²³ Nazaq iyan ya inad giger tigemaiq. Ya isan ka ihuloseq leheq Krais inaq osnan inad ayahmo usaqta. Ya Krais inaq osdaiqta na in qo aka go os uriyameq dimun diqmo iydaqta.²⁴ Teq ya ne ginadin emaiqmo. Na ezaqgo ya kayeqmo osad ne tigilumsihaiqta haqad. Ari ya gihuloseq leheq ya ne a ta hi gilumsihaiq.²⁵ Nazaq iyan ya inad emaiq. Ya ne gihuloseq a hi lehdaiq haqaiq. Haiqgam. Ya ne bunmo nenaq og kab tuqos tuttdaiq haqaiq. Osad ya ne gilumsihsa ne ginad helmo haqayta na ayah iysa ne ginad dimniysa tuqos daqay.²⁶ Nazaq iyid teq ya le ne gigo hib a ta gwahtiqid ne ya inan ginad dimniysa Krais Yesus abin tiqiliw daqay.

Filipay on mataw Krais anan helmo haqad in abinib santitiy sor daqayta

²⁷⁻²⁸ Ari ya ne gigo hib leheq nenaq osdaiq o hajiq ya kab ne gigo hib pesanmo ossa tuteqmo ne daq kazaq emad osiy. Ne gigo luw os bunmo Krais awagamun na inaq rireneqmo lehan. Sa ne gigem amulikmo iyeq giwaz meqniyiq turiy. Ad ne ginad amulikmo iyeq ne an ulumsihad mataw Yesus awagamun wazbuliynan tonsa ne wagam na anononmo gibilen kemi. Teq ne gigo bab na gihar negsa ne hi girabuni. Ne nazaq emsa teq ya le ne gibiydaiq o hajiq ya ne gigo hib pesanmo osad ya ne gibin dimunta nazaq tuhuritdaiq.

Ari ne nazaq giwaz meqniyad tursa ne gigo bab ne gibiyad in gihol loyinim ginad emay. I teq timeqniyam daqagya haqay. Sa negmo ginad emay, God-mo i giqeman i kazaq giwaz meqniyim turauqta haqay. Nazaq iyan i teq leheq in inaq dimunmo tuqosam haqay.²⁹ God ne ginad eman hastitayan ne Krais anan helmo tihqaqta. Teq ne Krais anan helmo haqqomo haqad in ne a hi giwamta. Haiqgam. Ne Krais anan helmo haqad in abinib santitiy sor daqaymo haqad in ne giwamta.³⁰ Kwaziqmo Krais ababun bab yagsa ne ya ibiy yaqayta. Teq muran ya bab na em tutsa ne huritad bab amulik nabmo ne tituraymo.

2

I gihol wazid woqsa i gimaqbaban ginan ginad meqniyan

¹ Ari ne Krais aholib soqotim inaq osad ne gigem zaway iyim osayta. Ossa Krais ne ginan anad bilaqsa ne gigem kiskismo usaqta. Teq God ago Bugaw Dimunta ne bunmo giduganib ussa ne gigem dimunta mataw negad ginan ginad meqniyaqta.² Ne nazaq emsa ya ne ginan inad tidimniyhaq. Ari ne gigo daq dimdimunta na ulumsiheq ne ginad amulikmo ussa araqibmo an anan ginad bilaqsa osiy. Osad ne gigem amulikmo ussa ne ginad amulikmo usanmo. Ne nazaq emsa teq ya ne ginan inad tidimniyhaqmo diq hiqiyidaq.³ Ne negmo gihol anadin emad gibin ayahta waqgo hi emiy. Haiqgam. Ne gihol wazid woqsa an abin iluwad an ahagenib iyeq osiy.⁴ Ne negmo gihol ulumsihgomo daq hi emiy. Haiqgam. Ne giyogniz ginadin emad in gilumsihaymo.

Krais inmo ahol wazan woqan God abin wazan eram

⁵ Krais Yesus anad usta nazaqmo ne ginad usan.

⁶ In God diq iyim osta.

Teq in ago ban uliliba na anad a hi waz.

⁷ Haiqgam. In ago ban ulilibta na hulosim in abin wazan woqan in kabibiy mat samanta abin waqim ahol ug.

Ugad in mat diq asan waqim bo tugwahtim.
⁸ Gwahtiqtim in mat diq iyim osad ahol wazan woqsa in God-mo aqez muzinim lemo in tumom.

Teq in dante dimuntab a hi mom. In ayibmo dom wolam momta.

⁹ In nazaqmo ahol abin wazan woqan teq God in abin wazan ulilibmo diq iy. Ad God in anan araq mataw bunmo ginan uryamta na tuquq.

¹⁰ Ugan teq mataw bunmo Heven-ib osayta na teq og kab osayta na teq og aduganib usayta nagan bun digmo in Jesus anan biyad teq in ayon gibakbakan tuqulum laquw daqay.

¹¹ Ad in bunmo bilaq daqay, Yesus Krais in Iyahta haq daqay.

Haqsa Amam God abin ulilibmo diq gwale tuqusdaq.

Iulig oyaq nazaq nog mataw gilikmanib osuq

¹²⁻¹³ Ari ya iyogniz, negmo teq kazaq emiy. Ne yaqgo nan hurit yaqayta nazaqmo ne muran em tutad osiy. Teq ya nenaq ossa ne nan huritiy haqad ya a hi bilaqaq. Haiqgam. Muran kam kab ya ne gihulosim uliq kab pesamno ossa ne ya iqeza ka hurit naqmo hiqiyi haqaiq. Ne ginad emiy. God-mo ne gimuganib kabiyl emad in ne ginad wazan eraqsa in anad usaqta nazaqmo ne kabiyl daq emayta. Nazaq iyan God ne giwaqnan haqad gimen dante amta na ne muzinad gihol anonommo wamuzad ne rabad gihol harara nemsa dante na muzinad luwiy.

¹⁴ Kabiyl daq bunmo ne emad na ago ananin kabemmo ne bilaqad an hi mugiy. ¹⁵⁻¹⁶ Ne nazaq emad oseq teq ne gigemab ginumlan hiqiysa afaqan araq a hi em daqay. Haiqgam. On mataw meqmeqinta muran kam kab osayta ka gilikmanib ne God ago onmin dimun digta iyeq tuqos daqay. Osad on mataw na daq hihiq emsa ne os dimunta kayeqmo os tut daqayta na agamukan tigibilem daqay. Ne gamuk dimunta na gibilenad ne bilaqne ulig kaitab oyayta nazaq nog ne on mataw God gileh ugayta na gilikmanib oyad tuqos daqay. Ne nazaq diq emid teq Krais ta boldaqta akaman nab ya ihol abin iluwad bilaqdaiq. Ya kabiyl samanmo a hi em haqdaiq. Ad yaqgo zaway hunegan le saman a hi iy haqdaiq.

¹⁷ Ne Yesus anan helmo diq haqad God ago kabiyl emad ne gihol bunmo tamaz nog God ugayta. Sa abeb mataw ya inol emid inedan wain ayun nog ne gigo naw

na amalib wazbalid woqsa i agaribmo gihol tamaz nog God tuquqam. Ya ihol nazaq diq loyinaiqta teq ya inad a hi meqniyaq. Haiqgam. Ne ya inan ginad dimniysa ya inad tidimniyaqmo. ¹⁸ Ad nazaqmo ya ne ginad inad dimniysa ne ginad dimniyanmo.

Pol Timoti emid uliq Filipay-ib lehnab bilam

¹⁹ Ari Iyahta Yesus anad bilaqid teq ya Timoti emid nawa ne gigo hib hidmo tilehdaq. Leheq in muleq ta boleq ne ezaq osayta na awagamun ibilenid ya igem zaway tiqiydaq haqad. ²⁰ Yaqgo mat araq Timoti nogta haiqgam. In anad ya inad nog iyim in ne ginadin diq emaqta. ²¹ Mataw asor bunmo in gimo gihol anadin emad in Jesus Krais ago kabiyl anadin diq a hi emayta. ²² Teq negmo Timoti ago tuhuritiyta. In mat atuw inaqta. Amun amam ulumsihaqta nazaq in ya ilumsihsa i garabmo Yesus awagamun dimunta akabiyen emauqta. ²³ Nazaq iyan ya bit kab ossa yaqgo hazizir le ezaq iyid ya ahol waqad teq ya Timoti emid hidmo nawa ne gigo hib tilehdaq. ²⁴ Teq ya inad emaiq, Asit naqmo Iyahta yaqmen dan emid ya ne gigo hib tilehdaiqmo haqaiq.

Pol Epafroditus emid uliq Filipay-ib lehnab bilam

²⁵ Teq ya inad emaiq, Ya Epafroditus ne gigo hib emid in muleqeq ta lehdaq haqaiq. Na in ya imaqbab nog iyim ya inaq i araqibmo kabiyl emad Yesus ago bab nenaq an wolauqta. Kwaziqmo ne mat na yaqgo hib eman bolim in ya ilumsihad osim bo muran tiqiy. ²⁶ Iyim in muran ne gibiyinan anad diq meqniyaqta. Ad in moqad usta na ago ne huritim ginadnad emitya na ago in aqem afaqan iyaqmo. ²⁷ Helmo in moq waqim tumoqnan tonta. Teq God in anan anad meqniy. Anad meqniysa in Epafroditus amomo anan anad a hi meqniysa in ya inan anad meqniymo. In anad kazaq am. Pol irquran osaqta na ago afaqan sorsa in ayow na moqid ago afaqan na ayah diqmo isihdaq haqad in Epafroditus ulumsihan a hi mom. ²⁸ Nazaq iyan ya in emid ne gigo hib lehnab inad ayahmo bilaqaq. In ne gigo hib lehid ne ahol waqad teq ne ginad tidimniydaq. Sa ya ne ginadin emad inad nad kabemmo emaiqta na asit tihiqiydaq. ²⁹⁻³⁰ Nazaq iyan in le ne gigo hib gwahtiqtid ne ginad dimniysa Iyahta abinib in waqiy. In Krais ago kabiyl aduganib moqnan tonta. Ne ya ilumsiheq yaqgo kabiyl ka asor a hi em daqayta iyan in ame wolnetnan haqad inmo ahol nog hulosnan ton. Nazaq iyan ne mataw naqanta gabin tiqiluw daqay.

3

Mat Krais anan helmo haqaqta naqmo in mat titnonta

¹ Ya imaqbaban, yaqgo gamuk ta asor usaqta na in kazaq. Ne Iyahta anan ginad dimniyan. Gamuk na ya ne gimen tumar tonta. Teq ne gamuk na anadin emad dimunmo tuqos daqay haqad ya a ta mar tonnan ituw a hi hiqiyaq.

² Mataw gihol abatan asan urotgo bilaqayta na gigo ne gihol waz naqmo hiqiyiy. Na in bilaqne gaun karuw asan mugtitay nog iyim in mataw gisan meqin tonayta. In bilaqay, I mataw gisan urotsa in God ago dauhibta iay haqayta. ³Haiqgam. Igmo God ago dauhibta iyim tuqosauqta. Igmo God ago Bugaw Dimunta amalib God ayon lotu emauqta. Ad Krais Jesus amomo i gilumsihan i in abin iluwauqta. Teq i ginad emauq. Gisan akabiyam kabemmo emayta na asit a hi gilumsihdaq haqauqta. ⁴Ari gisango daq nagan mataw gilumsihdaqta iyid ya kwaziqmo tidimniy nagta. Mataw asor gisango daq kabemmo emim in ginad emay, Daq kaqmo i tigilumsihdaq haqayta. Teq gisango daq na gigo hib ya mataw na giquriyamim ya ihol abin tidimniy usta. ⁵Ya inen iqeman yaqgo kam 8 nazaq tiqiy mataw ya isan urotyita. Teq ya Bensamin anaynayin araq iyim ya Isrel mat diqta araq. Nazaq iyan ya Hibrus gigo ned watwatmota. Teq ya Farisi araq iyim ya God ago maror Moses bilamta na anonomno muzinyaqta. ⁶Ya God ago kabiy emnan zaway diq iyim ya Jesus ago on mataw gimuzad gimeqin tonyaqta. Teq ya God ago maror Moses bilamta na ago gunun muzin bugsa mataw ya ilum kemim yaqgo afaqan araq ahol a hi waqad in ya inan mat titnonta haq yaqayta.

⁷Kwaziqmo ya inad emyaiq, Ya Juda gigo maror muzin bugta na ago God tiqiwaqdaq haqyaiq. Ta teq muran ya Krais ago tuhurit kemim ya gisango daq bunmo emta na in bilaqne nagah samanta nog tiqiy. ⁸Helmo ya bilaqaiq. Ya ibin dimunta usta na ya inadib in nagah diq a haiqta. Ari yaqgo Iyahta Krais Jesus ago ya tuhuritta naqmo in nagah heltaqmo. Ya Krais amomo ago hib soqotnan haqad nagah bunmo ya inad wahta na ya tuhulos bug. Ad Krais amomo ilumsihdaq haqad ya gunun akabiyam kabemmo emta na ya inadib in bilaqne naga hekbel didaq asan nog tiqiy. ⁹Ya Krais amomo ago hib soqotnan inad bilaqaq. Ad ya God ago maror Moses bilamta na muzinad matawmo gigo hib ihol abin titnonta waqnan inad a hi bilaqaq. Haiqgam. Ya Krais anan helmo haqeq God-mo ago hib ibin titnonta waqnan inad usaq. Gibin titnonta na mataw Krais anan

helmo haqsa God-mo in gabin na negaqla. ¹⁰Ya Krais ago hurit kemnan inad ayahmo usaqta. Teq God ago zaway Krais wazan eramta na ya iholib loyinnanmo. Ad Krais santitiy sorta nazaqmo ya in ago santitiy na asor sornanmo. Ya nazaq emeq teq Krais santitiy sorim le in momta nazaqmo ya in asen muzeq in amta nazaq ya emnanmo. ¹¹Ya ihol nazaq bibiyowunad oseq teq Krais hodhodab eramta nazaqmo ya hodhodab useq tiqeraqdaiqmo haqaiq.

Pol zaway diq iyeq sibeq le God tow amta nab in gwahitiqnan bilam

¹² Ya Krais ago daq naway na giwaq bugan tiqiyunin nazaq ya a hi bilaqdaiq. Teq ya mat dimun diq tiqiy hasta nazaq a haiqmo. Krais Jesus ya iwaqan ya in ago tiqiyta. Nazaq iyan muran ya in ago daq nagan wazeq ihol ugid yaqgo tiqiy bugdaq haqad ya iholtuw bulad tiluwaq. ¹³Ya imaqbaban, ya inad kazaq emaiq. Ya Krais ago daq nagan a hi waz bugaiqta haqaiq. Teq daq amulikmo ya emaiqta na in kazaq. Kabiy daq bunmo ya ibun ban tilahta nagan anan ya idek zizalsza nagah dimunta ya inobun ban usaqta naqmo ya waznan iholtuw diq bulaiqta. ¹⁴Ya zaway diq iyeq sibeq le God yaqmen tow eman usaqta nab gwahitiqeq naw dimunta na tuwaqdaiq haqad ya iwaz meqniyim iholtuw bulad luwaiqta. Naw na God ya ililewunan ya dante Krais Jesus yaqmen amta na muzineq gwale Heven-ib tiqiyeq teq ya tuwaqdaiqta.

¹⁵ Ari i on mataw ginad tizilimta na, i bunmo ginad nawa ya tibilayta nazaqmo usan. Ad ne ginad ta araq usid teq God giqisihunid ne ginad tiqem has daqay. ¹⁶Teq nagah bunmo ago i ginad tiqem hasauqta naqmo i waz naqmo hiqiyad adan emuq.

¹⁷ Ya imaqbaban, ne ya isen muzeq ya daq em nogmo ne emiy. Ne ezaq luw os daqayta na ago i tigibilen bug. Nazaq iyan mataw i gisen muzad daq emsa ne gibiy kemi. ¹⁸Na ezaqgo mataw kabemmo Krais ago kruse gihar ugad osayta. Ya ime kabemmo ne gidek wazad mataw na ginan tigibileta. Ad muran ya a ta gibilen tonad ya imeqil woqaq. ¹⁹Mataw na oseq teq tihiqiy daqayta. In gihol ginadmo bilaqne in gigo god nog iyan in daq amo amo amebay inaqta emad luwiyata. Teq in gimebay a hi woqaqta. Haiqgam. In gihol abin iluwad ginad dimniysa osayta. Mataw naqanta in og ka ago nagahmo ginadin emayta.

²⁰Ari igmo i on mataw Heven-ibta. Mat i gilumsiheq ta giwaqdaqta na amatin in saw nabmo oseq teq a ta gewoqdaqta. Na i gigo Iyahta Jesus Krais-mo. I in baq

tunad gihol husisiqsa osauqta. ²¹ In ago zaway ayahta amalib nagah bunmo giqemid ahagenib tiziq bugdaqta. Ad in ago zaway naqmo amalib i gihol meqinta ka emid inmo ahol anuwanta nog iyeq dimun diq tiziqdaqta.

4

I gigem amulikmo iyeq ginad dimniysa osad ginad dimunta waqqu

¹ Nazaq iyan ya imaqbaban dimunta, ya tibilayta nazaqmo ne Iyahta ago hib soqoteq giwaz meqniyeq turiy. Ya ne ginan inad bilaqsa ya ne gibiynan igeq gaqaqta. Ne bilaqne yaqgo kabiy anawun dimun diqta nog iysa ya ne ginan inad tidimniyaqta.

² Teq ya on giger Yuodiya ayow Sintike inaq ginan inad meqniysa ya kazaq atoranmo gibilenaiq. Ne giger Iyahta ago on iyim iyan ne gigem amulikmo iyeq osiy haqaqiq. ³ Ad mat ni yaqgo mangteqsor diqta na ya ni kazaq nibillenaiq. Ni on giger na gilumsih haqaqiq. In giger ya iteq-sormo diq iyan i garibmo Yesus awagamun dimunta na akabiyan emyaqta. Sa Klemen teq ya iyogniz ta asor ya nenaq kabiy emyaqta na in on giger na nenaq kabiy em yaqaytamo. In bunmo ginan God ago buk mataw kayeqmo tuteqmo os daqayta ginan usaqta nab mar tonan usaq.

⁴ Ari ne bunmo Iyahta ago hib tisoqotim osad iyan tuteqmo ne ginad dimniysa osiy. Ya gamuk na a ta bilaq tonnan. Ne ginadmo dimniyan.

⁵ Teq ne tok nemeq kiskismo ossa on mataw bunmo ne gigo daq na ahol waq kemiy. Iyahta ne gigerabmo diq osaqta. ⁶ Sa ne nagah araq anan ginad hi meqniyan. Haiqgam. Ne gigo kabiy daq bunmo ago ne God bulonad susumun ugiy. Ad ne God inaq gamuk emad susumun ugad teq ne esey ugiy. ⁷ Ne Krais Yesus aholib soqotim inaq ossa God-mo ne gigem ginad wamuzsa ne gigem kiskismo tuquqdaq. Sa afqaqan ne giholib gwahtiqla ne ezaq tonim gigem kute nemaqta na ago ne a hi hurit daqay.

⁸ Ya imaqbaban, yaqgo gamuk ta asor usaqta na in kazaq. Ne ginad kazaq emad osiy. Naga daqin in helta teq in abin dimunta teq in titnonta teq in anumlan haiqta teq in awaq dimunta teq in ulalab emnanta, daq naqanta bunmo ne anadin emad luwiy. Daq dimdimun diqta teq daq bunmo i abin wazid eraqmag diqta nagan bunmo ne anadin emad adan emiy. ⁹ Daq emnanta na bunmo ya anan gibilenan ne huritim tuwaqiyta. Teq ya daq na bunmo emsa ne yaqgo hib ahol tuwaq kemiy. Nazaq iyan ne daq dimdimunta nagan

emsas God i gigem eman kiskismo usaqta na in ne nenaq tuqosdaq.

Filipay on mataw Pol amen naw eman bolan in anad ayahmo dimniy

¹⁰ Kam sisaq nog ne ya inan ginad meqniyaqta na ya asit a hi loyinta. Helmo ne ya inadin em yaqayta teq ne gigo dan hiqiyqaq. Ari muran Iyahta ne gimen dan eman ne ya tiqilumsihay. Nazaq iyan ya inad diq dimniyaq. ¹¹ Teq ya nagah ago siqim iyim osta na ago ya a hi bilaqaqiq. Haiqgam. Ya nagah osgo inaq o hajna na ya inad a hi meqniysa ya igem dimunmo usaqta. ¹² Kam asor ya mat ina haiqta nog osaqtta. Ad kam asor yaqgo nagah kabemmo inaq iyim osaqtta. Kam asor ya didaq kabemmo neqaiqta. Ad kam asor ya zarow diq iyim osaqtta. Teq ya kam bunmo igem dimniysa osgo adan na ya tuhurit kem. Nazaq iyan ya nagah kabemmo inaq iyim osaqtta na ago ya a hi bilaqad ya igem dimniysa osaqtta. Ad ya nagah kabemmo ago siqim iyim osaqtta na ago ya a hi bilaqad ya igem dimniysa osaqtamo. ¹³ Krais-mo ya zaway yagsa ya kam bunmo igem dimniysa osaqtta.

¹⁴ Teq ne yaqgo afqaqan na gihol ugim soran ya inad tidimniyaq. Na ne daq dimunta emay. ¹⁵ Ne mebmebmox Yesus awagamun dimunta huritiyta nab ya nenaq osim teq ya eraqim saw Masedoniya hulosim lehsa Yesus ago dauh araq ya a hi ilumsihay. Haiqgam. In yaqgo hib nagah tuwaqim teq in amenin emim nagah araq a hi yangi. Kam nab ne gimomo ya ilumsihiyta. Na ne Filipay on mataw, ne tuhuritiyta. ¹⁶ Teq ya ne gihulosim le uliq Tesalonika-ib kabiy emad nagah ago siqim iysa ne ya ilumsihim teq ne a ta ilumsih toniy. ¹⁷ Teq ya ne gigo nagah anan a hi sunaiq. Haiqgam. Ya inad kazaq emaiq. Ne ya ilumsihsa ne gigo daq dimunta na anon kabemmo tisorqendaq haqaqiq. Sa abeb God ne gigo daq anon kabemmo na ahol waqad in amenin dimunta tinegdaq haqaqiq. Na ago ne ya ilumsihan ya inad tidimniyaq.

¹⁸ Ari Epafroditus ne gigo naw a bolim ya ibenab tiqam. Eman ya ne gigo nagah na waqan in tiziqyunin. Nagah ne yag daqayta na ne uriyamim nagah asor bunda inaqmo ne emiy. Ne gigo naw na bilaqne faq aqasim ahuram dimunta nog iyan God tamaz na waqim agent tidimniyaq. ¹⁹ Teq yaqgo God ago nagah dimdimun diqta bunmo Krais Yesus ago hib usaqta. Nazaq iyan ne Krais aholib soqotim inaq ossa nagah bunmo ago ne siqim iyayta na God-mo negid tigiyunindaq. ²⁰ I Gimam God abin tuteqmo kuluwmo iluwuq. Hel diqtaqmo.

Gamuk asor

²¹ Ya ne gigo hib on mataw Krais Yesus
aholib soqotim God ago on mataw tawonta
iyim osayta na bunmo yaqgo zeq dimun
ka in negaiq. Sa ya imaqbaban Krais ago
on mataw ya nenaq kawa osaiqta ka in
zeq dimun ne negaymo. ²² Teq God ago
on mataw tawonta kab osayta na bunmo
in gigo zeq dimun ne negad in gilikmanib
mataw asor Sisa ago bitab kabiy emayta
na in ne ginadin emad in gigo zeq dimun
eman nawa lehaqmo.

²³ I gigo Iyahta Yesus Krais agem dimunta
ne bunmo negan. Nawaqmo.

Kolosi o **Sansandek Pol mar tonan uliq Kolosi-ib lahta Gamuk ameb lehaqta**

Kolosi in uliq araq saw Esiya-ib usta. Teq Pol uliq nab lehim Yesus awagamun a hi gibilan. Haiqqam. In uliq Efesus-ib irquran osad in mataw ta asor gigemant uliq araq araqab God ago kabi yemnan lehad in uliq Kolosi-ib lehiyomo. Lehim in Yesus awagamun dimunta gibilenan Kolosi on mataw asor helmo tihaqy.

Ari abeb Kolosi on mataw na gilikmanib mataw asor suleq katiyta bilaqad in on mataw gigo ginad helta na walebolnan tonsa Pol tuhurit. Mataw na bilaq yaqay, Ne i gigo gunun ka muzinad ne didaq nagah udinad teq ne gihol abatan asan urotiy haq yaqay (Kolosi 2.11, 16-17; 3.11). Teq ne angelo gimen lotu emiy haq yaqay (Kolosi 2.18). Ad in bilaq yaqay, I gimomo God ago nagah ulilemabta kabemmo ahol tuwawta haq yaqay (Kolosi 2.18).

Nazaq iysa iyan Pol Kolosi gimen sansandek ka mar tonim in gigem zaway neggo haqad eman lahta. In kazaq bilam, Krais in nagah bunmo gifaqin iyim in amomo i ta giwaqdaqta ham. Sa dante ta asor na in i a hi gilumsihdaq ham. Dante katiyta nagan in i qiqad Krais ago hib pesan diqmo lehdaqta ham. Ad in bilam, God in Krais-mo amalib nagah bunmo gigeman gwahtiqa ham. Teq Krais ago hib God ago anad awaz meqinta teq in ago zaway bunmo ulal tiquy bugaqta ham. Krais i gimuganib ussa i on mataw muturta iyim i Krais-mo ago daq muzinaqta ham.

Pol bit gigirquran osaytab osad in sansandek ka mar tonim mataw giger Tikikus ayow Onesimus inaq negan in ad uliq Kolosi-ib a lehiyta. Teq Pol in Filemon amen sansandek mar tonad in Onesimus naqmo anan gamuk kabemmo bilamta.

Krais in nagah bunmo gifaqinta iyan os kayeqmo kuluwa-kuluwmo osayta na alulin teq God ago daq bunmo inmo aholib gicus bugaqta

¹⁻² Ari yaqmo Pol. God-mo anad bilaqan ya Krais Yesus ago Aposel iytta. Ya imaqbab Timoti inaq i giger sansandek ka God ago on mataw tawonta uliq Kolosi-ib osayta na ne gimen mar tonan lehaq. I bunmo araqibmo Krais aholib soqotim inaq osad iyan ne i gimaqbabmo diq iyim osayta.

Osad ne Krais ago gamuk muzinad gituw a hi hiqiyayta.

I Gimam God agem dimunta negad in ne gigem emid midemeqmo usan.

Uliq Kolosi on mataw Yesus anan helmo diq haqiy

³⁻⁶ Ari kwaziqmo mataw asor Yesus awagamun dimunta ne gigo hib a lehim gibileniy. In gamuk helta na ne gibilensa God ne gimen os dimun diqta wasti-tayan Heven-ib usaqta na ago ne tuhuritiy. Nazaq iyan muran ne Krais Yesus anan helmo haqad ne God ago on mataw tawonta na bunmo gigem dimunta negayta. I ne giwagamun nazaq huritim kam bunmo i gigo Iyahta Yesus Krais Amam God inaq gamuk emad i esey ugauqta.

Og saw bunmo mataw Yesus awagamun dimunta bilaqsa on mataw kabemmo huritad anan helmo haqsa gamuk na in gigo hib anon kabemmo emaqta. An nazaqmo ne Yesus awagamun waqiyta nabmo gamuk na in ne gigo hib anon emim emim bo muran tiquy. Na ezaqgo God agem dimunta ne nagta na ago agamukan ne huritim ne ginad em hasim anan helmo diq haqiyta na ago iyan.

⁷ Mat anan Epafras haqayta naqmo in God ago gamuk na ne gigo hib a lehan ne huritity. I Epafras inaq garabmo God ago kabibiy mataw iyim osauqta. Teq Krais in mat na kabi yigan in anononmo emad ne gilumsihad atuw a hi hiqiyatqa. ⁸ Mat na muleqim i gigo hib ta bolim in ne ginan kazaq i gibilan, God ago Bugaw Dimunta ne ginad wamuza ne God ago on mataw bunmo ginan ginad bilaqatqa ham.

God Kolosi on mataw ginad helta usaqta na emid awaz meqniyidaq haqad Pol in bulon

⁹ Epafras nazaq i gibilenan kam nab i ne gimen God bulonim bulonim bolim muran i ne gimen bulon tutad i daq na a hi hulosaqta. I ne gimen God susumun ugad i kazaq bilaqauq, God haqauq, ningko Bugaw Dimunta Kolosi on mataw na giholib emid usad in mataw na ginad emid hastitat bugsa in ginad na awaz meqin diq iyan haqauq. Ginad awaz meqniyasa in ninmo ninad muzinad luw daqayta na ago in ginad em hasiy haqauq. ¹⁰ Ginad em hasad in Iyahta ago on matawmo diq iyeq luw osiy haqauq. Osad in ningko hurityata na in ginadib ayah iysa in ningko hurit kemiy haqauq. Hurit kemad in kabi dimdimunta emsa kabi yana anon kabemmo gwah-tiqsa Iyahta in ginan agem dimniyan haqauq. ¹¹⁻¹² Haqad i bulonauq, God haqauq, ningko zaway ayah diqta mataw ahol waqad nibin iluwayta na in on mataw na gigemab kabi yemna in giwaz meqniyeq

osiy haqauq. Ossa afagan amo amo giholib gwahtiqa in sorad gituw hi hiqiyan haqauq. In ginadmo dimniysa osad Gimam Iyah esey ugij haqauq. Na ezaqgo ninmo mataw na gimen dante eman in teq leheq ningi on mataw tawonta na bunmo nenaq araqibmo ningi os dimunta tuwaq daqay haqauq. Wageq in ningi saw anuwanib gwahtiqaq tuqos daqay haqauq.

¹³ Kwaziqmo romriq ago zaway awaz meqinta i ginad wamusza i osyauqta. Ossa God i gilumsihim giwaqim in atatin Jesus ago maror aduganib i giqam. God in atatin na anan anad diq bilaqacta. ¹⁴ Teq God atatin naqmo in i gigo daq meqinta walemad in i gizayan i in agota tiqiy.

Krais in mat ezaqta na ago Pol bilam

¹⁵ Ari God atatin na i God ahol a hi waqauqta nog i in ahol waqauqta. In nagah bunmo God giqeman gwahtiqiyta na gigo Iyahita iyim osaqta. ¹⁶ Na ezaqgo God in atatin naqmo amalib nagah bunmo Heven-ib teq og kab giqusayta na inaqmo giqeman gwahtiqiyta. Nagah bunmo i gimeb ulal iyayta na teq nagah bunmo i gimeb ulilemim usayta na teq angelo giwaz meqmeqinta maror nog iyim ulilib osayta nagan teq bugaw aseseqta zaway amo amo wazayta nagan bunmo God Atatin inmo giqeman gwahtiqiyta. Gwahtiqim nagah na bunmo inmo anad muzingo osayta. ¹⁷ Teq nagah na bunmo a hi gwahtiqa inmo tugosta. Nazaq iyan nagah na inmo ago zawayib gwahtiqim giqusayta. ¹⁸ On mataw in ago nanihuritya na bunmo gigo gifaqin inmo. Sa on mataw na bilaqne in anon nog iyim osayta.

In nagah bunmo gilulinta iyim in ameb hodhodab tiqueramta. Nazaq iyan God nagah bunmo giqamata na gilikmanib inmo danmeb diq iyim osaqta. ¹⁹ Na ezaqgo in Amam anad bilaqan Amamgo zaway teq in anad awaz meqinta teq in ago daq bun diqmo atatin na aholib giqus bugaqta. ²⁰ Sa nagah bunmo Heven-ib teq og kab giqusayta na in God geg ugsa God in atatin na eman ayil othenan turad in anedan tuwom. Woqan bab usta na tihiqiy. Hiqiyan God in daq na amalib nagah nagan bunmo gihureqan in ago hib ta bol bugiy.

²¹ Kwaziqmo ne gigem meqinta God ugad ne in aholib hiqiy yaqay. Ad ne in anan ginad a hi bilaqsa ne daq meqmeqinta haresmo emad luw yaqay. ²² Luwsa God in atatin eman bolim ne gimen ahol nog hulosim tumom. Moqim in ne gimen dante eman ne God inaq an anobun tuwastitayim osayta. God ne giwastitayid ne in ago on mataw tawonta iyeq ne giholib daq araq ananin waq daqayta haiq iysa ne in ameb titnoneqmo tur daqay haqad in daq na

amta. ²³ Nazaq iyan ne giwaz meqniyeq ne ginad God anan helmo haqayta na waz naqmo hiqiyeq osiy. Osad God teq ne gidimun tondaqta na ne anan helmo diq haqad ne ginad na hikidik buliyiy. Luweq mat araq gihureqid ne Yesus awagamun dimunta huritya na hulos daqay. Mataw Yesus awagamun dimunta og saw bunmo a lehim tibilaqiyta. Sa yaqmo Pol ya inaqmo wagam dimunta na ago kabibiy mat iyim osaiqtamo.

Pol in Kolosi gilumsih

²⁴ Ya ne gilumsihad ne gimen santitiy sorad ya inad dimniysa kawa osaiq. Na ezaqgo Krais in ago on mataw gilumsihnan haqad santitiy sorta na a hi hiqiy bugsa ya santitiy na ya ihol ugim sorad ya twolnet bugaiq. Wolnet bugad ya in ago on mataw in anon nog iyim osayta na tigilumsihaiqmo. ²⁵ God ya itowun emim kabiy yagan ya Krais ago on mataw gigo kabibiy mat iyim osaqta. Ossa in anad ya ne inaqmo gilumsihdaq haqad in kabiy na ya ibenab eman ya in ago gamuk bunmo ne gibilenaiqta. ²⁶ Kam sisaq diqmo God ago gamuk ululin na ulilemim ussa on mataw bunmo a hi hurit yaqayta. Ari muran kam kab God in ago gamuk ulilemabta na eman inmo ago on mataw tawonta bunmo gimeb ulal tiqiy. ²⁷ God anad in ago gamuk ulilemista na on mataw en ta asor Juda a haiqta nagan gigo hib anon kabemmo emsa in ago on mataw bunmo ahol waqad abin iluw daqay haqad in nazaq amta. Teq gamuk ulilemabta na alulin kazaq. Krais in ne on mataw en ta asor Juda a haiqta nagan inaqmo gimuganib osad in teq ne giwaqeq giqad le in ago os dimuntab tigiqemdaq. ²⁸ I Krais awagamun naqmo on mataw en bunmo gibilenauqta. Gibilensa God i ginad eman awaz meqniysa i mataw bunmo gidek wazad God ago suleq negauqta. Ad i ginad emauq, I God ago on mataw bunmo gilumsihsa in Krais aholib soqoteq inaq osad in gihol ginad tizilimsa teq i giqad le God ameb tugwahtiqam haqad i kabiy na emauqta. ²⁹ In nazaq diq tugwahtiqdaq haqad ya iholtuw bulad Krais ago zaway ya iholib ayahmo usaqta na amalib ya iwaz meqniyim yaqgo kabiy na atoranmo emaiqta.

2

Ne bunmo Yesus anan helmo haqad gamuk katiyta hulosiy

¹ Ari ya ne gimen kabiy ayahmo emad ihol bibiyowunaiqta ka ago ne ginad em hasiy. Ya negmo teq on mataw Laodisiyabta na teq mataw en asor ya inobun ahol a hi waqiyta na nenaqmo gilumsihnan iholtuw bulad luwaiqta. ² Ya inad God ago

on mataw na bunmo gigem zaway iysa in an anan ginad bilaqsa osad in mataw en amulikmo iyeq osiy haqaiq. Teq in ginad helmo haqayta na ayahmo diq iysa in ginad em hasiy haqaiq. Ginad em haseq God ago gamuk helta ulilemim usta na ago in hurit kemiy haqaiq. Teq gamuk ulilemim usta na alulin Krais-mo.³ Krais amomo i ginad eman hastitayaqta. Hastitaysa i gamuk ulilemabta na alulin hurit kemim i ginad awaz meqniysa i God ago nagah kabemmo ago ginad em hasauqta.

⁴ Ezaq haqad ya kazaq ne gibilenaiq? Luweq mat araq suleq katiyta negad in ago hilhil amalib ne kat negdaq haqad ya ne gimen gamuk ka mar tonaiq.⁵ Ya ne ginaq a hi osaiqta teq ya ne ginadin tutimmo emad ya iwitan ne gigo hib os nog iyaiq. Nazaq iyan ne wastitaymmo osad Krais anan helmo diq haqsa ya ne ginan inad tidimniyaq.

I bunmo Krais ago hib soqoteq teq i giwitan kayeqmo osam

⁶ Ne bunmo Krais Yesus ahol waq hasim anan i gigo Iyatha haqad ahagenib iyim osayta. Nazaq iyan ne in aholib soqoteq inaq luw osiy.⁷ Osad ne suleq waqiyta nazaqmo ne in ago hib zaway waqad ne ginad helmo haqayta na ayah iyan. Ay aninin ogib sisaqmo wolehsa ay na zaway waqim sisakmo gwalaqta nazaq nogmo ne zaway iyeq turad tuteqmo ne God esey ugiy.

⁸ Ne gihol waz naqmo hiqiyeq osiy. Mataw asor eraeqog ka ago suleq katiyta alulin haiqta amalib ne giqirqureq gihureqeq gigad lehnantonsa ne in gigo gamuk na hi huritiy. Mataw naqanta in gisesan gigo gamuk kwaziqta naqmo in bilaqayta. Teq gamuk na in bugaw meqinta og ka ago daq wamuzayta naqmo gigo hib bolaqta. In gigo suleq na Krais ago hib a hi bolaqta.⁹ Na ezaqgo God ago zaway teq in anad awaz meqinta teq in ago daq bun diqmo Krais-mo aholib giqus bugaqta.¹⁰ Teq Krais abin ayah diqmo iyan angelo giwaz meqinta maror gan osayta na teq nagah aseseqta gibin inaqta nagan bunmo in ahaqenib iyim osayta. Nazaq iyan ne inmo amomo ago hib tisoqotim ne tidimniyim osad ne nagah araq ago siqim a hi iyayta.

¹¹ Teq ne bunmo Krais aholib soqotan in ne gigem kwaziqta na ago zaway alulin urotim hunegan lehan ne gigem kwaziqta anad a ta hi muzinay. Bilaqne mataw gibenab gihol abatan asan urotim hunegan lehaqta nazaq nog. Teq Krais abenabmo i gigem kwaziqta ago zaway a hi urot.¹² Haiqqam. Ne Krais abinib yuw huzyita nab ne Krais inaq moqim ne inaq hodhodab tuqus nog iyiy. Teq ne God ago

zaway Krais wazan hodhodab eramta na anan helmo hagan God in ne Krais inaq giwazan ne araqibmo hodhodab ta eraq nog iyimo.¹³ Kwaziqmo ne gigem kwaziqta anad muzinad daq meqinta amo amo emsa daq meqinta nagan in ne ginol eman ne giwitan tumoqim usiyta. Teq God in i gigo daq meqinta na bunmo giwalem bugim in i giqeman i Krais inaq kayeqmo osauqta.¹⁴ I God ago gunun othasta na ago afaqan in i giwazan woqnan tonta. Na ezaqgo nan na in i hazizirib giqemid i amenin meqin diq waqgota. Teq God in nan na ayib dom wolani nan na ago zaway tihiqiy bug.¹⁵ Sa yu nabmo God in bugaw aseseqta zaway amo amo wazayta nagan teq nagah giwaz meqinta gibin inaq iyim maror gan osayta nagan bunmo gigo zaway wolani woqan nagah nagan in mataw bunmo gimeb mataw zaway haiqta nog tiqiyiy.

I Krais inaq tumowta

¹⁶ Nazaq iyan ne didaq haresmo neqad yuw haresmo uluwsa mat araq ne ginan meqin haqsa ne in ago afaqan hi iyiy. Teq in kam aseseqta gigo gunun teq kalam mutur gwahtiqqaqta ago gunun teq lotu akaman amo amo gigo gunun nagan muzgo gibilensa ne hi huritiy.¹⁷ Nagah gunun emayta nagan in daq helta abeb teq gwahatiqdaqta na ago adulan nogta. Teq nagah nagan ginon diq Krais-mo.¹⁸ Mat araq sen qwayim nagah ahol wamta na agamukan bilaqad in ne gibe yahad gibilendaq. Ne gihol wazid woqsa angelo-mo giyon lotu emiy haqsa ne in aholib hiqiysa in ne gidanin hi qwayan. Mat nazaqta in mataw og kabta ginad em nog iyad inmo ahol abin iluwim nazaq bilaqqaqta. Teq in anad na saman diqta.¹⁹ Mat naqanta in i gifaqin Krais ago hib soqotim a hi osaqta. Ta teq i gifaqin naqmo in i giwamuza i in anon nog iyim osauqta. Ossa i gifaqin na in ahliliq teq abensen teq anaghan bunmo didaq negsa in aliklikin teq ahol anaghan bunmo araqibmo an wastonim usayta. Usad in anon na God-mo ago zawayib gwahtiqim ahyay iyayta.

²⁰ Ne bunmo Krais inaq moqim ne bugaw og ka ago daq wamuzayta na gigo maror ahaqenib a ta hi osayta. Nazaq iyan doq tonnan ne og ka ago on matawta os nog iyad ne og ka ago gunun amikmikta nagan ahaqenib os tutay?²¹ Gunun nagan bilaqay, Ni nagah na hi waz haqayta teq didaq na niteb hi em haqayta teq nagah na nibenab hikidik mirirewun haqayta.²² Teq gunun amo amo nagan in nagah tuteqmo usdaqta na ginan a hi bilaqay. Haiqqam. Mataw in nagah gunun emayta na wazim neqsa in hiqiyaqta. Gunun nazaqta na mataw in ginadibmo giqeman gwahtiqan

teq in asuleqin i gibilenayta. ²³ Helmo i gunun nagan huritsa in bilaqne gunun dimdimunta nog iyayta. Na ezaqgo gunun anamreniz na bilaqay, I giholyon gunun emta kagan muz naqmo hiqiyad i gihol wazan woqsa i gigem kwaziqta na a hikidik muzinauqta haqayta. Teq hajiq. Gunun nawa in emayta na in i gigemab ginad kwaziqta nagah haresmo utetaqta na a hikidik wasihaqta.

3

I Krais inaq hodhodab usim ta eraw

¹ God ne Krais inaq hodhodab giwazan eraqiyta. Eraqim muran Krais ulilib gwalehim God aben aqabun ban tugos woqim osaq. Nazaq iyan ne nagah dimdimunta Krais ago hib usaqta naqmo ginagunad luwiy. ² Luwad kam bunmo ne nagah dimdimunta ulilib usaqta naqmo anadin emad ne og ka ago nagah nagan anadin diq hi emiy. ³ Na ezaqgo ne tumoqiyta. Moqim muran ne kayeqmo osayta alulin na in ulilemim Krais inaq God ago hib usaqta. ⁴ Krais-mo ne gigeman ne kayeqmo osayta. Abeb in ulalab bo gwahtiqa nab ne Krais inaq araqibmo mataw gimeb ulal tiqiy daqaymo. Ulal iyeq ne Krais ahol anuwanib dimniyeq ossa on mataw bunmo ne tigibiy kem daqay.

Krais i gimuganib ussa i on mataw muturta iyim osauqta

I on mataw muturta tiqiy

⁵ Nazaq iyan ne og ka ago ginad meqinta gigemab usaqta na gileh ugad wolid moqan. Ne an hareshmo hureqim inaq usayta na, teq ne daq anumlan inaq emayta na, teq ne gihol atoranmo eraqaqta na, teq ne daq meqinta hareshmo emgo ginad bilaqaqta na, teq ne nagah hareshmo utetaya na, daq nagan bunmo ne gihol muzid lehan. Mat nagah hareshmo utetaqta na in bilaqne god katiyta tumuz nog iyaq. ⁶ Mataw God aqez othasad daq meqmeqinta nazaq emsa iyan God ago agem meqniy nawa in gigo hib teq gwahtiqaqta. ⁷ Kwaziqmo ne mataw meqinta na nenaq luw osad ne in gigo daq na em yaqaymo. ⁸ Teq muran ne daq meqinta nagan bunmo hulos bugiy. Ne gigem meqniyyaqtta na, teq ne mataw atoranmo ginad yaqayta na, teq ne an agem meqinta ug yaqayta na, teq ne an agilehunan bilaq yaqayta na, teq ne gamuk meqinta amalib an wad yaqayta nagan bunmo ne hulos bugiy. Bilaqne mat araq tubusan meqinta hasim hunegan lehaqta nazaqmo ne daq nagan hulos tayiy.

⁹ Ne ginad kwaziqta ago daq meqmeqinta inaq na ne gimuzan tilahta. Nazaq iyan ne an hi kat ugiy. ¹⁰ Teq ne ginad

muturta na waqim giholib eman in ne ginad kwaziqta na ago ban tuwaq bug. Waq bugan ne God ago tuhurit kemsia inmo ne ginad eman mutur iyad ne ginad in anad nog iyaqta. ¹¹ Nazaq iyan mataw ginad buliyim mutur iyayta na bunmo in araqibmo iyim osayta. In gilikmanib Grik mat hajiq. Teq Juda mat hajiq. Teq mat ahol abatan asan urotta na haiqmo. Teq mat asan a hi urotta na haiqmomo. Mataw muturta na gilikmanib mat asen tob bolta na haiqgam teq mat yabyabta haiqmo teq kabibiy mat samanta haiqgam teq mat anadibmo samanmo luwaqta na haiqmo. Krais amomo osad teq in ago on mataw bunmo giduganib osaqtamo.

I ginad dimunta gimaqbaban negad gilowan tonuq

¹² God ne gitowun emim in aholyon ne tigiwamta. Giwaqan ne in ago on mataw tawon diqta tiqiyim ossa in ne ginan anad diq bilaqaqta. Nazaq iyan ne daq dimunta kazaqta waqeq giholib emiy. Ne mataw bunmo ginad dimunta negad gilowan toniy. Ad ne gihol wazid woqsa ne mataw nenaq midemqanmo osiy. Osad ne afagan sorad gituw hi hiqiyani. ¹³ Ni nimqabab araq in nimeqin tonid ni nigem hidmo hi meqniysa ni tok nemeq os. Osad ni nan ugdaqta na hulosad ni nimqabab ago daq meqinta na walemad anadin ta hi em. Iyahta ne gigo daq meqinta bunmo tigiwalamta. Nazaq iyan ne an ago daq meqinta walemad anadin a ta hi em daqaymo. ¹⁴ Teq daq ameb diqta ne em daqayta na in kazaq. Ne an anan ginad bilaqsa osiy. Daq na in bilaqne am nog ne gituq tonid ne araqibmo titnoneqmo ossa ne gigo os tidimniyadaq. ¹⁵ Sa Krais ne ginad wamuza ne zib alowabmo osiy. Ne nazaqmo os daqay haqad God in ne gililewunim giqeman ne mat amulikmo anon nog iyim osayta. Kam bunmo ne God esey ugad osiy. ¹⁶ Osad ne Krais ago gamuk dimunta na alowan tonsa in ne giholib anon emeq usan. Ussa ne ginad em hasad suleq dimunta amo amo an bulonad teq ne an adek wazad osiy. Ad Buk Song-ib bar usaqta na teq lotu abarin amo amota na teq bar asor Bugaw Dimunta eman ne ginadib gwahtiqaqta nagan ne wazad gigemabmo diq God esey ugiy. ¹⁷ Ad ne gamuk bunmo bilaqayta na teq kabiy bunmo ne emayta na ne Iyahta Yesus-mo abin emid ayah iynan haqad ne emiy. Teq Yesus ayahmo gidimun tonta na ne anadin emad ne Gimam God esey ugad osiy.

Mat ago aw amun nenaq anonomo os daqayta na agamukan

¹⁸ Ari ne on mat tuwaqiyta na, ne gidugniz giqez huritad gihaqenib osiy. Ne

Iyahta ago on tiqiyim iyan ne nazaqmo os daqayta. ¹⁹ Teq ne mataw aw tuwaqiyta na, ne giqonan ginan ginad bilaqsa ne in ginadat atoranmo hi gibileni. ²⁰ Ari ne onmin, ne ginennmaman giqez huritad ne in ginad muzin bugiy. Iyahta in daq dimunta nazaqta anan anad bilaqaqta. ²¹ Teq ne onmin gimaman, ne gigo onmin gigem emid hi meqniyan. Luweq in gihol loyinsa in kabiy araq dimunta emgo biyab a hi iy daqay.

Kabibiy mataw in gigo aseseqta nenaq anonomo os daqayta agamukan

²² Ari ne kabibiy mataw samanta ne gigo mataw aseseqta og kabta na giqez huritad muzinad osiy. Luweq ne ginad em daqay, I gigo aseseqta kawa osay haqad ne kat negad in gimebmo kabiy emsa in ne ginan ginad dimnii daqay. Haiqgam. Ne Iyahta amomo anan rabad ne ginad amulikmo iyeq kabiy anonomo emiy. ²³ Ne gigo aseseqta naga kabiy negid ne ginad bilaqsa emmo emiy. Ne matmo ago kabiy a hi emayta. Haiqgam. Ne Iyahta ago kabiy emayta. ²⁴ Teq ne Iyahta anad muzinad osayta na amenin in ago os dimunta tinegdaq. Na ago ne tuhuritiya. Nazaq iyan ne ginad emiy. Krais amomo in Iyahta iyim ossa ne in amen kabiy emayta. ²⁵ Teq mat daq meqinta emaqta na in nazaqmo Iyahta abenab in ago daq na amenin tuwaqdaqmo. Kam nab Iyahta in on mataw bunmo gimen daq amulikmo emad in mataw asor gigomo a hi lehdaqta.

4

¹ Ari kabibiy mataw gigo aseseqta na, ne gigo kabibiy mataw samanta na gimen daq titnonta emad ne in gielowan toniy. Ne ginad emiy. Ne gigo Iyahta Heven-ib osad in ne gibiy muzaqtamo.

I bunmo God inaq gamuk emad teq i titnoneqmo luw osuq

² Ne tuteqmo God inaq gamuk emad ne daq na hi hulosiy. Teq ne ginad em haseq God bulonad in ne giqez wazta na ago ne esey ugiy. ³ Ad ne i gimen God buloniymo. Bulonsa in i gimen dante em igid teq i Krais ago gamuk ulilemim usta na on mataw gibilen kemam. Gamuk naqmo ya bilaqsa mataw ya iwazim iqirquran ya kawa osaiqta. ⁴ Ne yaqmen God bulonsa ya in anad muzinad ago gamuk ulilemabta na ulalabmo bilaq sireqdaiq haqad ya kawa ne gibilenaq.

⁵ Ne mataw God ago maror asan ban osayta na gimeb anonomo luw osiy. Ad ne gigo kabiy dimdimunta em daqayta akaman na abu ulumad samanmo hi osiy. ⁶ Kam bunmo ne on mataw gamuk dimdimunta gibilenad luwsa ne gigo

gamuk akamoymoyan inaq iyan, bilaqne kamis didaq eman aneq dimniyaqta nazaq nog. Ne nazaq emad teq ne ginad em hasad on mataw bunmo giqez amenin tiqem daqay.

Pol in Tikikus ayow Onesimus inaq giqeman Yesus ago on mataw Kolosi-ib osayta na gigo hib lehiy

⁷ Tikikus teq ya ihol awagamun ne tigibilen kemdaq. Mat na in i gimaqbab dimun diqta. In Iyahta ago kabiy emad atuw a hi hiqiyaqta. Teq i mat na inaq araqibmo Iyahta ago kabibiy mataw iyim osauqta. ⁸ In i giwagamun gibilenad teq in ne gigem emid awaz meqniyadaq haqad ya eman in ne gigo hib nawla lah. ⁹ Sa ya negmo gigo mat araq Onesimus eman in Tikikus inaq ne gigo hib lahmo. Onesimus in i gimaqbab dimun diqta. Teq in i gilumsihad atuw a hi hiqiyaqta. Mataw giger naqmo teq nagah bunmo i gigo hib kab gwahtimta na ago in ne tigibilen bug daqay.

Pol ayogniz nenaq gigo zeq dimun eman Kolosi giyon lah

¹⁰ Ari Aristarkus in ago zeq dimun eman nawla ne gigo hib lehaq. Ya mat na inaq giqirquran bit kab osauqta. Sa Barnabas ayan Mak in ne gimen zeq dimun eman nawla lehaqmo. Ya ne gimen gamuk ta mar tonta nab ya mat na anan ne tigibilenta. In le ne gigo hib gwahtiqid teq ne waziniy. ¹¹ Sa mat anan Jisas haqayta na in ago zeq dimun eman nawla lehaqmo. In anan araq Jastus haqaytamo. Juda gilikmanib mataw ezeqman naqmo in ya nenaq araqib God ago maror akabiyan emauqta. In ya ilumsihsa ya igem dimun dikan iyaqta.

¹² Teq negmo gigo mat anan Epafras haqayta na in ne gimen zeq dimun eman nawla lehaqmo. Mat na in Krais Yesus ago kabibiy matta teq in aholtuw diq bulad ne gimen God tutimmo bulonaqta. In anad God ne gilumsihsa ne gihol ginad bunmo zilimsa ne God anan helmo diq haqad giwaz meqniyeq tur daqay haqad in ne gimen God bulonaqta. ¹³ Mat na in ne gimen kabiy atoranmo emad in mataw uliq Laodisiya-ibta na teq mataw uliq Herapolis-ibta na gimen kabiy ayahmo ammo. Ya in ago hurit kemta iyim ya ne gibilenaq. ¹⁴ Sa ya iyow dimunta Luk, mat gihol wastitay akabiyan emaqta na, in ayow Demas inaq ne gimen zeq dimun eman nawla lehaqmo. ¹⁵ Ne yaqgo zeq dimun ka i giyogniz uliq Laodisiya-ib osayta na negiy. Ad ne aw anan Nimfa haqayta na teq Yesus ago on mataw in ago bitab humab wolayta na nenaq yaqgo zeq dimun ka in negiymo.

¹⁶ Ari ne sansandek ka ahol tuwaqeq teq ne Yesus ago on mataw Laodisiya-ib osayta na gimen emid lehan. In inaqmo sansandek ka ahol waq daqayta. Ad ya sansandek eman Laodisiya-ib lahta na in ne gigo hib em lehid teq na ne ahol waqiymo.

¹⁷ Teq ne mat anan Arkipus haqayta na kazaq buloniy, Ni Iyatha abenab kabiw wamta na anadin emad ni emid hiqiy bugan haqiy.

¹⁸ Ari ya Pol yaqmo iholbenab yaqgo zeq dimun ka mar tonim ne giyon eman nawa lehaq. Ya bit kab iqirqruran osaiqta ka ne anadin emiy.

Ari God agem dimunta negsa ne osiy.
Nawaqmo.

1 Tesalonaika

o

Sansandek amebta Pol mar tonan uliq Tesalonaika-ib lahta

Gamuk ameb lehaqta

Uliq Tesalonaika in uliq araq saw Masedoniya-ib usaqta. Pol uliq nab lehim Jesus awagamun gibilensa on mataw kabemmo Pol aqez huritim in Jesus Krais anan helmo tihaqi. Haqsa Juda nazaq gibiyad gigem meqniysa in Pol muzan uliq Tesalonaika hulosim tilah (Aposel 17:1-9 nab teq ni ahol waq). Abeb Pol lehim uliq Korin-ib ossa in ayow Timoti bolim Jesus ago on mataw uliq Tesalonaika-ib ezaq iyim osayta na ago in Pol bulon.

Bulunan Pol in Tesalonaika-ib on mataw ginad helta na zaway ugnan haqad sansandek ka mar ton, in ayogniz giger Timoti ayow Sailas inaq. Mar tonim Pol gamuk alulin kazaqta gibilan. In Tesalonaika on mataw Jesus asen muzinad osayta na ago huritim anad ayahmo dimniysa gibin iluw. Teq Tesalonaika-ib mataw asor Pol abin wazan woqsa Pol ahol adanin qwayim bilam, Ya iyogniz nenaq le ne nenaq osad i Yesus awagamun dimunta gibilenad i ne gigo nagah araq a hi hurew ham. Teq uliq nab Juda mataw helmo a hi haqiyta na in Krais ago on mataw afaqan negsa in zaway iyeq turgo haqad Pol gibilamno. Ad on mataw na in gigo os kwaziqta na gileh ugad in an hareshmo hureeq inaq hi usgo haqad in bilammo.

Teq afaqan araq ayahta in gigo hib us na kazaq. Yesus muleqim hidmo a ta hi bolsa in ago on mataw Tesalonaika-ibta na asor moqsa in giyogniz ginadnad em yaqay, luweq mataw na hodhodab ussa Yesus ta bolid in kam na ahol a hi waq daqay haqad. Sa ta asor bilaq yaqay, Yesus ta boldaqta na sinsin tiziysi iyan i kabiyl hulosad ginadibmo samanmo osuq haq yaqay. Haqsa Pol bilam, Haiq ham. Yesus ta boleq in mataw tumoqiyta na a hi gihulosdaq ham. Danmeb diq in mataw tumoqiyta na giwazid hodhodab eraqsa in tigiwaqdaq ham. Haqad in gibilan, Ne Yesus amen emad samanmo hi osiy ham. Ne gituw inaq iyeq mataw asesecta giqez huritad teq ne kabiyl dimdimunta emad osiy ham.

Pol ayogniz nenaq in Tesalonaika on mataw ginan ginad diq meqniy

¹ Yaqmo Pol, ya iyogniz Sailas ayow Timoti nenaq i gamuk ka mar tonim ne Yesus ago on mataw uliq Tesalonaika-ib osayta na gigo hib eman leh negaq. I Gimam God teq i gigo Iyahta Yesus Krais inaq in ne giwamuzsa ne in gihaqenib osayta.

God agem dimunta negad in ne gigem emid midemeqmo usan.

Tesalonaika on mataw God anan helmo diq haqsa Pol in ginan anad ayahmo dimniy

²⁻³ Ari kam bunmo i ne ginadin emad God esey ugauqta. Ne God anan helmo haqad kabiy dimunta emayta. Emad ne on mataw ginan ginad bilaqsa gilumsihayta. Teq ne i gigo Iyahta Yesus Krais ta boldaqta na anan helmo diq haqad ne amen emad gituw a hi hiqiyayta. I ne gigo daq dimdimunta nagan anadin emad sirisirimo i ne gimen i Gimam God bulonauqta.

⁴⁻⁵ I gimaqbaban, God ne ginan anad diq bilaqaqta. Kwaziqmo i God ago gamuk dimunta ne gigo hib a lehim gibilensa i giqezab gamuk gwahtiqyaqta na in gamuk amidemqanta nog a hi iyyaq. Haiqgam. I God ago gamuk ne gibilensa God daq azawayin inaqta giqemid gwahtiqyaqmo. Gwahtiqsa God ago Bugaw Dimunta i gilumsihsa i helmo diq haqad gamuk atorano gibilenyauqta. I mataw nazaq diqta iyim ne gilikmanib osad gilumsihayuqta na negmo tuhurit kemyita. I God ago gamuk ne gigo hib a lehan daq nazaq ne gilikmanib gwahtiqan i ginad emauq, Helmo God inmo aholyon ne tigiwamta haqauq.

⁶ Kam nab ne God ago gamuk huritsa God ago Bugaw Dimunta in ne ginad wazan eraqsa ne ginad dimniysa gamuk na waqim gigemabmo emiy. Emim teq ne i gigo daq muzinad teq ne Iyahta asen muzinim ne afaqan sorad God ago gamuk na a hi hulosiy. ⁷ Ne nazaq emsa saw giger Masedoniya-ib teq Akaya-ib on mataw God anan helmo haqayta na bunmo in ne gibiyad ta in negmo gisen tumuzinaymo.

⁸ Teq ne Iyahta ago gamuk eman saw giger Masedoniya teq Akaya gimomo gigo hib a hi lah. Haiqgam. On mataw uliq saw bunmo in ne God anan helmo haqayta na awagamun tuhuritiyimo. Bilaqne mataw zoq iysa ahulan uliq-uliqgo lehaqta nazaq nog. Nazaq iyan i mat araq ne gihol awagamun bulonamta na haiq tiziysi. On mataw bunmo ne gigo tuhurit bugiy. ⁹ I uliq-uliqgo luwsa on mataw ne giwagamun bilaqsa i huritauqta. In bilaqay, Pol ayogniz nenaq uliq Tesalonaika-ib lehan mataw nabta na in gigem dimunta negad giwaziniy haqayta. Giwazinad in gigo god katiyta nagan gihulosad in gihol buliyim God helta kuluwa-kuluwmo osaqla na ago

hib tisoqotiy haqayta. ¹⁰ Soqotim in God atatin Amango saw huloseq muleqeç ta boldaqta na baq tunim osay haqayta.

God atatin na moqan God wazan ta eramta. Na in Jesus-mo. In i gilumsihsa God ago aqem meeqnay abeb teq gwahtiqad in bo i a hi gimeqin tondaq.

2

Pol uliq Tesalonaika-ib kabiy amta na anan bilam

¹ Ya imaqbaban, i ne gigo hib lehim kabiy eman kabiy na le samanta a hi iy. Na ago ne tuhuritiyta. ² Teq i ne gigo hib le a hi gwahtiqadmo i uliq Filipay-ib osad afaqan ayahta sorta na ago ne tuhuritiyimo. Mataw uliq nabta na in i gibilawunad teq in i gimeqin diq ton yaqay. Ta teq i gigo God in i gigem ulumsih naqmo hiqisya i bab girabunad gihol a hi hureq has. Haiq. I giwaz diq meqniyim ne gigo hib tileh. Lehan ne gigo uliqab mataw asor nazaqmo i gibaymuzsa i na ago a hi bilaqad God i gimen dante amta agamukan dimunta na i ne tigibilenmo. ³ Teq i a hi rabad ne ginad bulyigyo gibilenta na alulin in kazaq. I ginad a hi em hasad gamuk bilaq kireh tonim a hi gibilen. Ad i ne ginad hureqid ne i nenaq daq anumlan inaqtqa emgo i a hi bilaw. Teq i kat negad i gigo soysoy amalib ne a hi gihuremmo. ⁴ Haiqgam. God i gilum kemim i gimugan ezaq diq iyim usaqta na inmo ahol waq kemaqta. In i gimugan ahol waqan i in ago gamuk bilaq sireqamta iyan in Jesus awagamun dimunta na i gibenab amta. Eman i in ago gamuk na wastitay-immo bilaqauqta. Teq i mataw ginad bulyid in i ginan gigem dimniy daqay haqad i kabiy na a hi emauqta. Haiqgam. I God-mo aqem emid dimniydaq haqad kabiy na emauqta.

⁵ I ne gigo hib gamuk a lehta nab i soysoy a hi neg. Na ago ne tuhuritiyta. Ad God i gibiysa i ne gigo nagah samanmo giwaggo haqad gamuk na a hi gibilenmo. ⁶ Teq i gibin ayahta waqgo adanteqin nagunim i ne gigo hib kabiy a hi emmo. Ad ne i gibin iluwgo haqad i ne a hi gibilenad teq i mataw ta asor nazaq a hi gibilenmo. ⁷ Helmo, i Krais ago Aposel osauqta. Nazaq iyan i ginad bilaqid i ne giqemid ne i gilumsihsig azawayin i giholib kawa usaqta. Teq i nazaq ne a hi gitonad i nenaq kiskismo osta, bilaqne aw in ago onmin gilowan tonad giwamuzim osaqta nazaq. ⁸ I ne ginan ginad diq bilaqauqta. Nazaq iyan i Yesus awagamun dimunta God iga na i gimonmo giholyon a hi wazad i ne gibilenan ne hurit toniymo. Teq i gamuk amomo ago hib a hi gilumsihta. Haiqgam. I God ago gamuk negad i ne gimen gihol nog

hulosmo. Na ezaqgo i ne giloyinsa ne i giqitul anabun asormo diq iyiyta na ago.

⁹ I gimaqbaban, i giholtuw bulad kabiy ayahmo ne gilikmanib emta na ne ahol tuwaqiy. I zeqab taromab inaqmo kabiy emyaucqta. I ne gimen kabiy emad teq i igmo giholyon kabiy emyaucqamo. Luweq i Jesus awagamun dimunta God iga na gibilensa ne didaq nagah igad ne gihol husisiqdaq haqad. I afaqan nazaq negnan hulosyauq.

¹⁰ I le ne nenaq ossa ne i gibiy kemyita. I nenaq osad i gigo daq tawon diq iyim tittonimmo lehsa i daq araq ananin waqamta a hi emyaucq. Teq i nenaq osad daq nazaq emsa God i gibiytamo. ¹¹ Mat ago onmin anonommo giwamuzaqta nazaqmo i ne giwamuzyauq. Na ago ne tuhuritiyta. ¹² Giwamuzad i ne gigem zaway negnan haqad i ginad awaz meqin amalib gibileneq bilaqyauq, God in ne gililewunim bilaqaq, Ne boleq yaqgo maror aduganib gwahtiqeq osiy haqad in bilaqaq haqyauq. Ne bo tugwahtiqeq teq ne yaqgo os dimunta na tuwaq daqay haqad in bilaqaq haqyauq. Haqad i ne gibe yahad gibilenyaq, Ne gigo luw os in God ago liley na inaq rireneqmo usan hagyauq.

Yesus ago on mataw uliq Tesalonaika-ibta na in God anan helmo diq haqad zaway iyim turad afaqan soriy

¹³ Ari nagah araq ago i tutimmo God esey ugauqta na in kazaq. Kwaziqmo ne God ago gamuk i gizezab waqiyta nab ne mat araq og kabta ago gamuk waq nogmo a hi iyiy. Haiq. Ne bilaqne God aqezab gamuk waq nog iyiyta. An helmo, gamuk na in God-mo ago gamukta. Ne gamuk na waqan in ne mataw helmo haqayta na gigemab kabiy atoranmo tiqemajta. ¹⁴ I gimaqbaban, saw Judiya-ib God ago on mataw Krais Jesus aholib soqotim ago nan muzinsa in gigo ginedan Juda naqmo in afaqan kabemmo tinegiy. An saw Judiya-ib on mataw na gigo hib daq gwahtimta nazaqmo diq ne gigo hib gwahtimtamo. Ne Jesus anan helmo haqsa iyan negmo gisenlul naqmo in afaqan ne tinegaymo. Ne Jesus ago on mataw gidauhan saw Judiya-ib osayta na gisen muzinim afaqan sorsa i ginad emauq, God ago gamuk ne gigemab kabiy tiqemaj haqauq.

¹⁵ Juda mataw helmo a hi haqayta naqmo in Iyatha Jesus wol emiyta. Ad in God ago nantut ginol emiytamo. Teq mataw naqmo in ne gigo sawab i gimuziytamo. Mataw na in God anad a hikidik muzinad in mataw bunmo gibabunmo diq iyim luwayta. ¹⁶ Nazaq iyan i God ago gamuk a luwad on mataw en ta asor Juda a haiqta nagan gibilensa Juda mataw na i gidanin

qwaynan tonayta. In ginad emay, Luweq mataw en ta asor na God ago gamuk hurratad anan helmo haqsa God in gilumsihet ta giwaqdaq haqayta. In nazaq tutimmo emsa in gigo daq meqinta kuluwmoo diq iyim ban tuwaq bugaq. Samo God ago aqem meqnijy in mataw na sisagmo gimuzad luwim muran in giholib ulal iyim tigimeqin tonaq.

Pol le Tesalonaika on mataw a ta gibiygo anad bilaq naqmo hiqiyyaq

¹⁷ I gimaqbaban, i le ne gigo hib ossa Juda mataw na bolim i tigmiziy. Gimuzan i ne ginobun ahol a ta hi waqyauq. Ta teq i gigem ginad inaq ne gigo hib tuqus tutyaq. Kam asimqanta nab i bilaqne on-min amanmanitaqin ginam haitqa os nog iyyauqta. Osad i ne ginobun ahol a ta waqgo ginad bilaqsa i giwaz meqnijym lehan yo hiqiyyauqta. ¹⁸ I ne gigo hib lehnar ginad diq bilamta. Yaqmo Pol ya ime kabemmo ne gigo hib lehgo inad emyaqta. Teq haiq. Satan tuteqmo i gidanin qwayyaq. ¹⁹ Ari i ne gigo hib lehnar ginad bilaqyaqta na alulin in kazaq. Abeb i gigo Iyahta Yesus ta bolid i in ameb turad naga diq ago i ginad dimniydaq? Teq Yesus in naga diq ago i ginan anad dimniydaqmo? Teq i Yesus ameb tursa naga diq i giholib ussa in i gibiyad gabin tiqiluwdaq? Bilaqne i gifaqinbil balyi dimunta titoreq Yesus ameb gwahtiqid in i gibiyad ame sirirdaqtan nazaq? Nagah nagan bunmo alulin na negmo. ²⁰ Helmo diq. Yesus ameb i gabin ayah iydaqta alulin na teq i ginad dimniydaqta alulin na negmo.

3

Pol Timoti eman in Tesalonaika on mataw gilumsihnan lah

¹ Ari kam sisagmo i ne gigo a hi hurratad osan haiq i ginad tiqem, Yaqmo Sailas inaq ular Atens-ib kab osad i Timoti emid ne gigo hib tilehdag haw. ² Haqad i Timoti eman ne gigo hib nawa tilah. Timoti in i gigo maqbab araq teq i inaq garabmo God ago kabibiy mataw iyim i araqibmo Krais awagamun dimunta na bilaqauqta. I ginad em, Timoti leheq in ne gigem zaway ugad teq in ne ginad helmo haqayta na ulumsihid awaz timeqniydaq haw. ³ Awaz meqniyid teq mataw ne gimeqin tonad gibaymuzsa ne gihol a hi hureq has daqay haw. Ne tuhurityiyya. I afaqan nazaq waqamta na God i gimen kwaziqmo tibilaqan ussa i aban a hi emamta. ⁴ Helmo, kwaziqmo i nenaq osad i gibileneq bilaqauq, Abeb teq i sanctityi waqam haqauq. Haqan daq nazaqmo diq gwahtiyan ne ahol tuwaqay. ⁵ Nazaq iyan ya ne ginadin emad osan haiq ya hidmo

Timoti eman tilah, ne ginad helmo haqayta na dimunmo usaq o haiq na ago ya huritnan haqad. Luweq Mat I Gilum Waqaqta na in ne gilum waqid i ne gilikmanib kabiy emta na le saman tiqiydaq haqad.

Timoti nan dimunta Pol ago hib a bolan Pol anad dimniy

⁶ Ari Timoti in ne gihulosim muran diq kawaqmo bo tugwahtim. Gwahtiqaq in ne giwagamun bilaqad ne ginad helta na waz naqmo hiqiyad on mataw bunmo ginan ginad bilaqauqta na ago in i tigibilan. Gibilenan gamuk na i gidekib dimunmo diq iy. In bilam, Tesalonaika on mataw na tutimmo i ginadin emad in gigem dimunta igayta haqad in bilam. Ad i ne gibiygo ginad bilaqauqta nazaqmo ne i gibiyinan ginad bilaqauqmo haqad in bilam. ⁷ I gimaqbaban, i kab ossa mataw i gimeqin tonad afaqan kabemmo igayta. Ta teq ne God anan helmo diq haqad osayta na ago i huritim i zaway muturta waqim i giwaz meqnijym afaqan na tisoraauq. ⁸ Na in kazaq. Ne Iyahta ago hib giwaz meqnijyeq ossa i nazaqmo dimunmo tuqosammo. ⁹ I ne ginadin emad i gigo God ameb i ne ginan ginad diq dimniyata. Ginad dimniysa tutimmo i God esey ugad i ne ginan gigem dimniyata na ago i bilaq buggo biyab a hi iyyauq. ¹⁰ Ad zeqab teq taromab i ginad awaz meqin amalib God bulonim bilaqauq, Ni i giyon dan wastitayid i le mataw ko ginobun ahol ta waquq haqauq. I le ne gibiyad teq nagah asor ne ginad a hi em hasayta na i qiqishunid ne ginad helmo haqayta na awaz timeqniy hasdaq haqad.

God Tesalonaika on mataw gilumsihgo haqad Pol in bulon

¹¹ Teq ya iyogniz nenaq i ne gimen i Gimam God bulonad i kazaq bilaqauq, God haqauq, Ni i gigo Iyahta Yesus inaq i gilumsihid i dan inaq iyeq Tesalonaika gigo hib lehuq haqauq. ¹² Haqad i bilaqauq, Iyahta haqauq, ni Tesalonaika on mataw na gilumsihsa in an anan ginad bilaqsa ossa daq na in gilikmanib ayahmo gwahtiyan haqauq. Gwahtiqa i in ginan ginad ayahmo bilaqauqta nazaqmo in on mataw bunmo ginan ginad bilaqan haqauq. ¹³ Haqad i ginad emauq, In ne zaway nazaqta negsa teq ne giwaz meqnijyeq ossa le i gigo Iyahta Yesus in ago on mataw tawonta bunmo nenaq ta bol daqay haqauq. Bolid kam nab teq ne i Gimam God ameb turad ne giholib daq araq ananin waq daqayta haiq iysa ne in ago tawon diqta tiqiy daqaymo haqauq.

Tesalonaika on mataw tuteqmo daq dimdimunta emad os daqay

4*I an haresmo hi hurequq*

¹ I gimaqbaban, i gigo gamuk ta asor usaqta na in kazaq. Ne ezaq luw os daqayta na ago i ne giqisihunan ne ahol tuwaqim ne nazaqmo tiqemay. Ad i God anad emid dimniygo adanteqin muzinsa ne i gibiy kemim dante na ne tumuzinaymo. Nazaq iyan i nenaq araqibmo Iyahta Jesus aholib soqotim osad i ginad awaz meqin amalib kazaq gibilenauq. Ne daq dimdimunta nagan em tutad ne ayah diqmo emiy haqaquq.

² I Iyahta Jesus ago hib suleq wawta naqmo i ne gibilenan ne tuhuritiyta. Suleq na kazaq bilam, ³ God anad ne in ago on mataw tawon diqta iyeq ne gihol anumlan haiqmo osiy ham. In ago suleq nazaq bilaqan ne in anad na muzinad an haresmo hureeq qinap hi usiy. ⁴ Ad ne amulk-mulikmo ginad em hasad ne daq dimunta amalib yow emeq teg an waqiy. An waqad teq ne giqonan nenaq God ameb tawon diqta iyeq osiy. ⁵ Osad ne gihol atoranmo eraqsa ne ginad meqinta on haresmo giqutetaya na ne hikidik muziniy. Na in on mataw en ta asor God abin a hi huritiyta nagan gigo daqta. Mataw nazaqta in God ago asit a hi huritiyta. ⁶ Luweq ne nazaq emeq teq ne gimaqbab araq kat ugad ago an waq timeqin ton daqay. Ne nazaq hikidik emiy. Na ezaqgo Iyahta immo daq meqinta nazaqta bunmo aqenin waqaqta. I mebmebmo ne gidek wazim i atoranmo nazaq gibilenta. ⁷ I daq anumlan inaqta emgo haqad God i a hi gililewun. Haiqgam. I in ago on mataw tawon diqta iyeq ginum-lan haiqmo osgo haqad in i gililewun. ⁸ God anad i nazaq wastitayeq osam haqad in ago Bugaw Dimunta igaqta. Nazaq iyan on mataw an waq asuleqin teko ya bilayta na gileh ugad in matmo aqez a hi othasayta. Haiqgam. Na in God-mo aqez othasayta.

I daq dimunta emad gituw hi hiqiyan

⁹ I gimaqbaban, Ne an anan ginad bilaq ago adan na God-mo ne tigiqisihun. Nazaq iyan ne gimaqbaban Krais ago on matawta na ginan ginad bilaqgo agamukan araq ya a ta hi mar ton negdaq. ¹⁰ Helmo ne gimaqbaban saw Masedoniya-ib osayta na bunmo ne gigem dimunta in negayta. Teq muran i ne gibe yahad a ta gibilen tonauq. Ne daq na tuteqmo emsa in ne giholib oy soqotid ne daq na ayahmo emad osiy haqaquq. ¹¹ I kwaziqmo gibilenta kazaqmo ne emiy. Ne tok nemed osad negmo gigo kabiyyta naqmo ne anadin emad ne mat ta araq ago nagah anan hi bilaqiy. Ad ne samanmo hi osad kabiy dag emiy. ¹² Ne nazaq emad teq ne mataw God ago maror asan ban osayta na nenaq titnoneqmo osad ne nagah araq ago siqim a hi iy daqay.

Iyahta teq muleqeinq i gigo hib ta boldaq

¹³ Ari i gimaqbaban, ne gigo on mataw asor tumoqiyta na ago ne ginadnad emgo i hulosauq. On mataw God anan helmo a hi haqayta na in moqeq God inaq kayeqmo os daqayta nazaq in ginad a hi emayta. Nazaq iyan in gigo mat araq moqan in moqab lehim giqitl tartaysa in gaq ayahmo wazayta. Ari luweq ne ginad a hi em haseq ne gisenlul araq moqid ne nazaqmo gaq ayahmo waz daqaymo. Ne nazaq hi emiy. ¹⁴ I Jesus moqim ta eramta na anan helmo haqaquqta. Nazaq iyan i ginad emauq. God in on mataw Jesus anan helmo haqad osim moqiyta na giwaz eraqeinq in Jesus inaq ta bol daqay haqaquq.

¹⁵ Iyahta i gibilenan i in aqez tutad kazaq ne tigibilenaquq. Abeb Iyahta muleqeinq ta bolsa nab i on mataw og kab kayeqmo osauqta ka i on mataw tumoqiyta na giquriyameq Jesus agerab danmab a hi gwalehamta. ¹⁶ Haiqgam. Kam nab Iyahta atoranmo tiqek tondaq. Sa angelo gigo ameba araq in dedibmo lileysa God ago taur tigayondaqmo. Nab teq Iyahta in God ago saw huloseq gehitiqsamo mataw Yesus anan helmo haqad osim moqiyta na in danmab tiqeraq daqay. ¹⁷ Eraqsa teq Iyahta in i on mataw abeyanta kayeqmo og kab osauqta ka giwaqidmo i kaitab on mataw danmab eraqyta na nenaq tugwaleham. Gwaleheq i ulilib kaitabmo Iyahta ahol tuwaqam. Ahol waqad teq i Iyahta inaq kuluwa-kuluwmo tuqosam. ¹⁸ Nazaq iyan abeb ne mataw tumoqiyta na ginadin emad ne gamuk nawa teko ya bilayta naqmo amalib ne an bulonad an anad waqad osiy.

5*Gihol asawan woltayad ossa teq Iyahta bolan*

¹ I gimaqbaban, Iyahta kam gineh ta boldaqta na teq in kam ezaqtab gwahtiqaqdaqta na agamukan araq i ne giyon a hi mar tonam. ² Na ezaqgo ne ginad tiqem hasad osayta. Iyahta ta boldaqta aka-man na in bilaqne mat nagah rin tonaqta taromab bolaqta nazaq nog iydaq. ³ Mataw bilaq daqay. Bab thihiqy bug haq daqay. I nagah araq a hi rabunad i ginad dimniysa tuqosam haq daqay. Haqad in nazaq gadgadmo ossa daq na nan saw haiqmo tugwahtiqaqdaq. Bilaqne aw agem iyim ossa amun baydaqta akaman na anadibmo bilaqta nazaq. Kam na bo tugwahtiqsamo on mataw gihol asawan a hi woltayiyya na in a hi tuk daqay. Haiqgam. In timeqniy bug daqay.

⁴ Ari i gimaqbaban, negmo teq romriqab a hi osayta. Nazaq iyan kam na bo gwah-tiqa ne a hi riten daqay. Bilaqne mat

rin tonaqta bo gwahtiqa bit anamren rite-naqta nazaq nog ne a hi riten daqay. ⁵ Ne bunmo saw anuwanib tugwahtiqa osayta. Osad ne saw anononmo ahol waqayta. I mataw romriqabta a haiq. Ad i taromab saw ahol a hi waqad luwauqta nazaq i a hi emauqmo.

⁶ Nazaq iyan mataw ta asor na gime rursa usayta nazaq nogmo i hi usuq. I gime rireeq qinad hastitaysa osuq. ⁷ Na ezaqgo mataw gime rursa usayta na in taromabmo usayta. Ad mataw yuw atoranta uluwim gifaqin hulosayta na in taromabmo yuw uluwayta. ⁸ Ari igmo on mataw zeqabta. Nazaq iyan i ginad hastitaysa osuq. Ad i ginad God anan helmo haqauqta na teq i on mataw ginan ginad bilaqqa na in bilaqne tubusan ain-ibta mataw gihol sihenim teq bab emayta nazaq nog i giholib usan. Ad God teq boleq i gilumsiheq ta giwaqdaqta haqad i bag tunim osauqta na in bilaqne balaw ain-ibta mataw gifaqinib emim teq bab emayta nazaq nog i giholib usanmo. ⁹ God i gitowun eman i in ago agem meqniy waqgo a hi osauqta. Haiqgam. I gigo Iyahta Jesus Krisi i gimen dante wastitayan God i gilumsiheq giwaqid i in ago os dimunta waqgo tiqiyim osauqta. ¹⁰ Yesus anad i kayeqmo osad i inaq osamta haqqaq. Teq in anad i moqeinq in inaq tuqosammo haqqaq. I in inaq nazaq tuteqmo osamta haqad in i gimen momta. ¹¹ Nazaq iyan ne an ulumsihad an zaway ugayta nazaqmo ne tuteqmo emad ne daq na hi hulosiy.

God in ago on mataw gilumsihsa in daq dimdimunta emad os daqay

¹² Ari i gimaqbaban, i kazaq atoran nog ne gibilenaug. Ne gigo mataw danmehta ne gilikmanib God ago kabiy emsa ne in gieqez huritiy haqauq. Iyahta immo mataw na gieqeman in ne giwamuzad ginad wastitayayta. ¹³ Ne mataw aseseqta na gigo kabiy anadin emad ne in ginan ginad bilaqsa giwaziniy. Teq ne bunmo zib allowabmo osiy.

¹⁴ Teq i gimaqbaban, i ginad awaz meqin amalib kazaq ne gibilenaugmo. Mataw gituw haiqta na ne ginad wastitaysa in gituw inaq iyi yhaqauq. Ad ne mataw nagah haresmo anan rabayta na gigem zaway negad ne mataw giwaz meqin haiqta na gilumsihiy haqauq. Teq ne mataw naqanta bunmo gigo afqaqan sorad kiskismo giwastitayiy haqauq.

¹⁵ Mataw daq meqinta negsa ne amenin daq meqinta hi negiy. Haiqgam. Ne an dimun tonad osad ne on mataw God ago maror asan ban osayta na bunmo gidimum toniyomo.

¹⁶ Kam bunmo ne ginad dimniysa osiy.
¹⁷ Tuteqmo ne God inaq gamuk emiy.

¹⁸ Kam dimuntab teq kam meqintab inaqmo ne daq bunmo giholib gwahtiqaqta na ago ne God esey ugiy. God anad ne Krisi Jesus aholib soqotim osad daq nagzaq emgo in anad bilaqqaqta.

¹⁹ God ago Bugaw Dimunta ne gilikmanib kabiy emsa ne hi wolmiyy. ²⁰ Ad mataw God ago nantut bilaqsa ne gileh hi negiy. ²¹ Ta teq ne gamuk bunmo ulum kemad gamuk dimunta naqmo ne waziy. ²² Wazad ne daq meqinta bunmo aban diq emad pesanmo luyi.

²³ Ari ya ne gimen God kazaq bulonaiq. God haqaiq, ninmo i gieqeman i gieqem kiskismo usaqta haqaiq. Nazaq iyan ni Tesalonaika on mataw na gieqemid in ningo on mataw tawon diqta iyi yhaqaiq. Ad ni in ginad teq giwitan teq ginon bunmo wamuzsa in dimunmo titnoneqmo osiy haqaiq. In nazaq ossa le i gigo Iyahta Jesus Krisi ta boldaqta nab in giholib daq araq ananin waq daqayta hi usan haqaiq. ²⁴ God ne gililewunta na in i gilumsihnan bilamta nazaq diq in emaqta. Nazaq iyan ya nawa ne gimen God bulonta nazaqmo in tiqem negdaq.

²⁵ I gimaqbaban, ne i gimen God buloniyomo.

²⁶ Ari God ago on mataw gigo daq titnonta na amalib ne an zeq dimun ugiy.

²⁷ Ya Iyahta abinib gamuk awaz meqin diqta kazaq ne gibilenaiq. Gamuk kawa i ne gimen mar tonta ka ne i gimaqbaban nab osayta na bunmo gibilensa in huritiy haqaiq.

²⁸ Ari, i gigo Iyahta Jesus Krisi agem dimunta negsa ne osiy. Nawaqmo.

2 Tesalonaika

Sansandek gigerta Pol mar tonan uliq Tesalonaika-ib lahta Gamuk ameb lehaqta

Pol in ago sansandek amepta na uliq Tesalonaika-ib eman lehan in gigo afaqan asor usta na tihiqiy. Hiqiyan teq afaqan giger ka us tut. Yesus ago on mataw uliq nabta na asor in Krais ta boldaqta na ago ginadnad emad bilaq yaqay, Iyahta ago kam na tekomo tugwahtimta daqag haq yaqay. Haqsa ta asor in daq haresmo emad in giholyon kabiya araql emnan gituw hiqiy yaqay. Nazaq iyan teq Pol ayogniz giger Sailas ayow Timoti inaq in sansandek gigerta ka Tesalonaika ginad wastitaygo haqad mar toniy.

Mar tonad Pol kazaq bilam, Iyahta ago kam na a hi gwahtiqaq ham. Ameb diq on mataw kabemmo girerey emeq daq meqinta haresmo emad in God tuhulos daqay ham. Sa mat gunun othasdqta na ulalab tugwahtiqaq ham. Nagah giger na a hi gwahtiqaq i ginad emam, Iyahta ago kam na a hi gwahtiqaq haqam ham.

Teq Pol in mataw luw maleyniza na gamuk atoranmo gibilenim bilam, Ne tok nemeq osad giholyon kabiya emiy ham. Ne giyogniz gigo didaq neqad samanmo hikidik osiy ham. Haqad in Tesalonaika on mataw na bunmo gibilenim bilam, I God ago suleq negta na bunmo ne waz naqmo hiqiyeq osad ne an ulumsihad osiy ham.

Iyahta ago kam abeb teq gwahtiqaqta

¹ Yaqmo Pol ya iyogniz giger Sailas ayow Timoti nenaq i gamuk ka mar tonim ne Yesus ago on mataw uliq Tesalonaika-ib osayta na gigo hib eman lehaq. I Gimam God teq i gigo Iyahta Yesus Krais inaq in ne giwamuza ne in gihaqenib osayta.

² I Gimam God teq Iyahta Yesus Krais inaq in gigem dimunta negad ne gigem emid midemeqmo usan.

Tesalonaika on mataw giwaz meqniyim turad afaqan soriy

³ I gimaqbaban, tutimmo i ne ginan God esey ugad daq na i a hi hulosamta. I nazaq emanta na in dimun diq. Na ezaqgo ne ginad helmo haqayta na in awaz timeqniyiq. Ad ne bunmo an anan ginad bilaqsa ossa ne gigo daq na ne gilikmanib ayah tiqiyaqmo. ⁴ Nazaq iyan i uliq saw kabemmo luwad i God ago on mataw Yesus ago nan huritaya na gigo hib ne gibin

sorauqta. Sorad i gibilenaug, Tesalonaika on mataw na gibabun in gimeqin tonsa in giwaz meqniyim turayta haqauq. Turad in ginad helmo haqayta na wazad in afaqan teq sanctity sorad gituw a hi hiqiyayta haqauq.

God daq titnonta amalib i gilum ke-maqt

⁵ Teq muran ne God ago maror aduganib gwahtiqaq haqad afaqan sorayta na in God anad titnonta eman ulal iyaqta. God anad emaq, Ne afaqan sorad oseq teq ne yaqgo maror aduganib gwahtiqaq gibin inaq tiqiy daqay haqauq. ⁶ Na ezaqgo abeb teq in daq titnonta emad in mataw nawa ne afaqan negayta na giholib amenin emad in mataw na afaqan tinegdaqmo. ⁷ Negad in ta ne gigo afaqan na walemid ne gi-namur tiqem daqay. Ginamur emsa God in i gigo afaqan na walemid i ne nenaq garabmo ginamur tiqemammo. Kam nab Iyahta Yesus Heven huloseq in ago faq amileq ayahta inaqmo bolad in ago angelo giwaz meqinta na nenaq tigehtiqaq daqay. ⁸ Gehitiqe in mataw God ago a hi huri-tad teq in i gigo Iyahta Yesus awagamun dimunta a hi muzinayta na amenin meqin diqta tinegdaq. ⁹ Negid mataw na timeqniy haseq in nazaqmo kuluwa-kuluwmo tuqos daqay. Osad in Iyahta ago hib pesamno osad in Iyahta ago zaway mataw ahol waqad abin iluwuya na ahol a ta hi waq daqay. ¹⁰ Kam nab Yesus in ago on mataw tawonta na gigo hib abin ayahta waqnan haqad tuboldaq. Bolsa in ago on mataw na in ahol waqad in giqutil riten lamsa in ginad tibilaq gigayindaq. Sa ne inaqmo in ahol waqad abin iluwad ginad tidimniy daqaymo. Na ezaqgo kwaziqmo i ne gigo hib lehim God ne gimen dante amta na agamukan gibilenan ne huritim anan helmo haqiyta na ago iyan.

Pol ayogniz nenaq in Tesalonaika on mataw gilumsihgo haqad God buloniy

¹¹ Kam abebtanta nab ne inaqmo Iyahta abin tiqiluw daqay haqad tutimmo i ne gimen i gigo God kazaq bulonaug. God haqauq, ni Tesalonaika on mataw gililewu-nan osayta ko giwamuza in gigo luw os ningi liley na inaq rireneqmo usan haqauq. Ad ni ningi zaway amalib gilum-sihsa in kabiya dimdimunta emnan ginad emayta na em bugiy haqauq. Ad in ni ninan helmo haqad ningi kabiya emsa kabiya na anon kabemmo eman haqauq. ¹² Anon emsa in ahol waqad in i gigo Iyahta Yesus abin sorsa Yesus in gibin soranmo haqauq. Ad i bulonaug, I gigo God haqauq, ni teq Iyahta Yesus Krais inaq gigem dimunta on mataw na negad in giyon daq nazaqmo em negiy haqauq.

2

Mat gunun othasaqta na teq gwahtiqaqta

¹⁻² Ari i gimaqbaban, i gigo Iyahta Yesus Krais muleqeq ta bolsa i bunmo leheq in ago hib humab emamta na ago i ne tigibilennan. Luweq mataw asor kat negeq bilaq daqay, Iyahta ago kam na tekomo tugwahtimta haq daqay. Haqad in gihol ulumsihad kazaq bilaq daqay, Bugaw araq anad igan i bilaqaq haq daqay. O in bilaq daqay, Mat araq nazaq bilaqsa i huritta haq daqay. O in bilaq daqay, Pol ayogniz nenaq sansandek mar tonim nazaq bilaqiyta haq daqay. Ari ne gamuk naqanta huriteq ne riteneq hidmo ginadnad hi emiy. ³ Mat araq le nazaq kat negsa ne in aqez hikidik hurity. Iyahta ago kam na ulilemeq a hi gwahtiqaqta. Haiqgam. Na in atowun inaq kazaq iyeq gwahtiqaqta. Kam na tugwahtiqnan tonsa mataw kabemmo God ago nan baymuzad in gileh tuqug daqay. Samo mat gunun othasaqta na ulal tiqyidaq. Mat nawa na God in ayon bilaqan in oseq teq timeqniy hasdaqta. Daq nagan bunmo tugwahtiqtid teq Iyahta ago kam na bo tugwahtiqaq.

⁴ Ari mat gunun othasaqta na bo gwahitiq in og kab nagah zawayta mataw giwazinad ginan 'i gigo god' haqad gibin iluwayta nagan bunmo gihar tinegdaq. Gihar negad inmo ahol abin iluwad in naqah gisesta nagan bunmo gibayid woqsa in ahaqenib tiqy bug daqay. Ad in God ago Tempel aduganib gwahitiq in ago marorgo ban emeq osad teq in bilaqdaq, Ne gigo god yaqmo kawa haqdaq. ⁵ Yaqmo Pol kwaziqmo ya nenaq osad ya daq nawa gwahitiqaqta na ago agamukan ne tigibilen bugta. Na ago ne gidek tizizl e? ⁶ Teq muran nagah araq in mat gunun othasaqta na adanan qwaysa in ulal a hi iyaq. Na ne tuhurityta. Nagah na in mat na wasihad ossa le in ulal iyadaqta ago akaman tugwahtiqid nab teq in ulal tiqyidaq. ⁷ Na ezaggo mataw ginad meqinta bolsa in gunun othasayta na alulin diq i gimeb ulilemim ussa i ahol a hi waqaucta. Sa ginad meqinta na mataw gibe yahsa in God ago gunun tuqothasad osayta. Ta teq nagah dimunta nawa ya anan bilayta na in mataw ginad meqinta na wasihsa in gwahitiqim ban a hi waq bugaqla. Ari nagah dimunta na in ginad meqinta adan na wasihad oseq le in ahol tuhureq hasdaq. ⁸ Hureq hasid nab teq mat gunun othasaqta na ulal tiqyidaq. Ulal iyeq ossa Iyahta Yesus inmo ahol aqurin ulam hasid le mat na wol emid tumoqdaq. Kam nab Iyahta bo gwahitiqadmo in ago zaway bunmo ulal

isyas zaway na le mat na meqin diq tonid in tihiqyidaq.

⁹ Ari mat gunun othasaqta na bolsa Satan in abunib turad zaway ugza in ulal tiqyidaq. Ulal iyeq in Satan ago zaway ayahta na amalib daq katiya aseseqta azawayin inaqtta amo amo gigemid gwahitiqsa mataw ahol waqad in mat na anan helmo tihaq daqay. ¹⁰ Mat na daq meqinta amo amo amalib mataw kat negsa on mataw asor teq timeqniy has daqayta naqmo in anan helmo tihaq daqay.

Teq on mataw na oseq meqniy has daqayta na alulin in kazaq. On mataw naqanta in God ago gamuk helta anan ginad bilaqid teq God in gilumsiheq ta giwaqngata. Teq in God ago gamuk anan helmo haqnan hulosayta. ¹¹ Nazaq iyan God in ago zaway amalib mataw nazaqta ginad walebolsa in daq aseseqta katiya nagan gibiyad ginan helmo haqayta. ¹² God in on mataw naqanta giyon dante nazaq em negsa in teq ago hazizir ayahta nab tursa in giyon bilaqid in tihiqy bug daqay. Na ezaggo in God ago gamuk helta anan helmo a hi haqad in daq meqinta haresmo emad ginad dimniysa osiyya na ago iyan.

God in ago on mataw giwaqgo haqad gitowun eman osayta

¹³ Ari i gimaqbaban, Iyahta in ne ginan anad bilaqaqta. Mebmebmo diq God ne gitowun emim ago Bugaw Dimunta negan in ne giholib usaqta. Usad in ne giwamuzsa ne God ago on mataw tawonta iyim osad ne in ago gamuk helta anan helmo haqayta. Dante naqmo amalib God in ne gilumsihim giwamta. Nazaq iyan tuteqmo i ne gimen God esey ugamtta. ¹⁴ God nazaq diq ne gidimun tonnan haqad in i giqeman i ne gigo hib lehim Yesus awagamun dimunta gibilen. Gibilensa God i gigo gamuk na amalib in ne gilewunun muran ne i gigo Iyahta Yesus Krais ago os dimunta na ne giholyon waggo tiqiyim osayta. ¹⁵ Nazaq iyan i gimaqbaban, ne giwaz meqniyeq turad i God ago suleq negta na bunmo ne waz naqmo hiqiyi. Suleq na i gizezab gibilenta teq i sansandekib mar tonim eman ne gigo hib lahtamo.

¹⁶ Ari i Gimam God teq i gigo Iyahta Yesus Krais inaq in i ginan ginad bilaqaqta. Ad God agem dimunta igsaa i in ago zaway ahiciqy haiqta na waqad i gigem kute nemsa osauqta. Osad in teq ago os dimunta na tiqidaq haqad i in amen emim osauqta. ¹⁷ Nazaq iyan i ne gimen God bulonlad i kazaq bilaqaq, God haqaqq, ni Tesalonaika-ib on mataw osayta ko gigem zaway negsa in giwaz meqniyeq gamuk dimdimunta bunmo bilaqad teq in kabiy dimdimunta bunmo emiy haqaqq.

Tesalonaika on mataw gilikmanib on mataw gituw haiqta osayta na in tigiwastitay daqay

3

*Tesalonaika on mataw God bulonid in
Pol ayogni nenaq gilumsihdaq*

¹ I gimaqbaban, i gigo gamuk ta asor usaqta na in kazaq. Ne i gimen God bulonsa in i gilumsihan. Gilumsihsa i ne gigo hib Iyahta ago gamuk bilaqan anon kabemmo amta nazaqmo i le og saw bunmo gigo hib bilaqsa in nazaqmo anon kabemmo emeq ameb diq iyan. ² Ad God in mataw meqinta daq hiihq emayta na gibenab i giwaqid in i hi gimeqin tongo haqad ne i gimen God buloniymo. Na ezaqgo, mataw kabemmo God anan helmo a hi haqayta na ago iyan.

³ Teq Iyahta i gilumsihnan bilamta nazaqmo in emaqta. Nazaq iyan in ne giwamuzad zaway negsa mat meqinta na a hi gimeqin tondaq. ⁴ I ginad emauq, Iyahta ne ginad wamuzsa i daq bunmo tigibilenta nagan ne muzinad ne nazaqmo tiqem tut daqay haqauq.

⁵ Haqad i ne gimen Iyahta bulonim bilaqauq, Iyahta haqauq, ni Tesalonaika on mataw ko ginad enqenunsa God in ginan anad bilaqatqa na ago in anadin emad in Krais afaqan sorad ahol a hi hureq hasta na ago in anadin emiyimo haqauq.

Mataw bunmo kabi yem daqayta

⁶ I gimaqbaban, i gigo Iyahta Yesus Krais abinib i gamuk atoranmo kazaq ne gibilenauq. Mat araq samanmo osad aholyon kabi y ahi emsa ne aholib hiqiyiy haqauq. Mat naqanta in i gunun negta na othasad a hi muzinaqta. ⁷ Ne i gisen muzineq daq ezaqta em daqayta na ago ne ginad emayta. Kwaziqmo i ne nenaq osad i samanmo kabi y haiqmo a hi osta. ⁸ Ad i ne gigo didaq araq samanmo a hi wawta. Haiqgam. I zayadmo waqyauqta. Luweq i ne gigo didaq nagah samanmo neqsa ne i gigo afaqan sorad gihol husisiqdaq haqad i taromab zeqab inaqmo i giholtuw bulad kabi y atoranmo emyauqta. ⁹ Helmo i ne gigo hib didaq nagah samanmo waqgo i gibin inaqta. Teq i daq dimunta giqishunid abeb ne i gisen muzinad nazaqmo em daqay haqad i ne gigo nagah samanmo waqgo hulosta.

¹⁰ Kwaziqmo i ne nenaq osta nab i gunun araq kazaq em. Mat araq kabi y emnan atuw hiqiysa ne didaq ugid hi neqan haw. ¹¹ Teq nagaggo muran i gamuk nawa na a ta gibilen tonauq? Nabag ne gilikmanib mataw asor luw maleyniztag osayta. Osad in giholyon kabi y ahi emad in mataw ta

asor gigo kabi y naqmo in wamuzgo ginad emayta. I ne gigo wagam asit nazaq huitim i kawa ne tigibilen sireqauq. ¹² Ari ne mataw gituw haiqta na, i Iyahta Yesus Krais abinib atoran diqmo kazaq ne gibilenauq. Ne tok nemeq osad kabi y emiy haqauq. Kabi y emad negmo giholyon didaq waqeq negiy haqauq.

¹³ I gimaqbaban, ne daq dimunta emad gituw hi hiqiyian. ¹⁴ Ad mat aw nog in gamuk kawa i sansandekib mar tonta ka a hi muzinsa ne gibiy kemiy. Gibiy kemad ne mataw na girabunad giholib hiqiyiy. Ne nazaq gitonsa teq in daq emayta na ago gimebay twoqdaq. ¹⁵ Teq ne mataw na ginan i gibabun haqad hi bilaqiy. Haiqgam. Ne in ginan i gimaqbaban haqad gidekmo waziy.

Gamuk abebtanta

¹⁶ Ari i ne gimen kazaq Iyahta bulonauq. Iyahta haqauq, ni i gigem eman midemim usaqta haqauq. Nazaq iyan kam bunmo Tesalonaika on mataw giholib daq amo amo gwahtiqa ni in gigem emid kute nemsia in nagah araq diq anan ginad hi meqniyan haqauq.

Ari Iyahta ne bunmo nenaq osad giwamuzan.

¹⁷ Yaqmo Pol ya iholbenab yaqgo zeq dimun ka mar tonim ne guyon eman nawa lehaq. Yaqgo sansandek bunmo ya kazaqmo iholnan mar tonaiqta.

¹⁸ Ari i gigo Iyahta Yesus Krais agem dimunta ne bunmo negsa ne osiy. Nawaqmo.

1 Timoti

o

Sanşandek amebta Pol in Timoti amen mar tonan lahta Gamuk ameb lehaqta

Timoti in mat araq minminta. In anen Juda aw araq. Sa in amam Grik mat araq teq in Juda mat a haitqa. Teq Timoti in uliq Listra, saw Galesiya-ib osta. Ossa Pol nab lehim Yesus awagamun dimunta bilaqsa Timoti huritim Yesus anan helmo tiham. Haqan Pol in Timoti waqim inaq lehim God ago kabiy tiqem yaqay (Aposel 16.1-3 nab ni Timoti ahol awagamun asitmo ahol waqdag).

Ari ulig asor le tihiqyan Yesus ago on mataw uliq Efesus-ibta na gilikmanib in gigo mataw danmebta asor eraqim suleq katiya tibilaq yaqay, Pol mebmebmo gibilan, Daq kazaq teq gwahtiqdaq hamta nazaq (Aposel 20.29-30 nab teq ni ahol waq). Mataw na sulep katiya bilaqsa Pol ayow Timoti inaq lehim nazaq gibiyad teq Pol in Timoti hulosan uliq Efesus-ib mataw katiya na giqez wasihnan tuqos. In Timoti hulosad bulon, Ni kab uliq Efesus-ib osad mataw gamuk katiya amalib sulep bilaqayta na gibilenid in nazaq ta hi emiy ham.

Haqad Pol in saw Masedoniya-ib lehim uliq araqab tuqosad teq in Timoti amen sansandek ka mar tonim eman leh ug, Timoti anadnad a hi emad in awaz diq meqniyeg ago kabiy anonomo tiqemdaq haqad. Pol anad Timoti in mataw aseseqta gamuk katiya bilaqayta na giqez emid hiqiysa teq in Yesus ago on mataw na sulep helta gibilenad dante dimunta giqisihunsa in gigo os ta titnondaq haqad in gamuk ka bilam. Haqad in anad dimdimunta kabemmo Timoti ugnan haqad amen gi-mar tonan sansandek kab usaqta.

Timoti inno ahol wamuzad teq in uliq Efesus-ib on mataw Yesus ago nan huritayta na giwamuz tonanno

¹ Yaqmo Pol, ya Krais Yesus ago Aposel araq. God I Gilumsihim Giwaqayta na teq in atatin Krais Yesus i amen emim osauqta na inaq in ya inan bilaqan ya Aposel iyya. ² Timoti, ya inad Krais anan helmo haqaiqta nazaq ni ninad usaqmo. Nazaq iyan ni yaqgo amunmo diq. Ya ninmen gamuk ka mar tonim eman fileh nigag.

I Gimam God teq i gigo Iyahta Krais Yesus inaq in gigem dimunta nigad in ni ninan ginad meqniyisa ni nigem midemeqmo usan.

I gamuk katiya bayid woqan

³ Ari kwaziqmo ya nihuloseq saw Masedoniya-ib lehnar haqad gamuk nibilenta na ya muran a ta nibilen tonaiq. Ni nab uliq Efesus-ib osad mataw God ago gamuk bilaq kireh tonim sulep katiya bilaqayta na atoranmo gibilenid in nazaq ta hi emiy. ⁴ Ad in tutimmo wagam katiya bilaqad teq in gisesan giwagamun bilaqayta na in hulosiymo. Gamuk nazaq na in an mug ayah diqmo eman eraqaqta. Eragsa in gigo walmataw nenaq God ago kabiy emid ayah iyoq ginad a hi emaya. Ni ninad em. I ginad God anan helmo haqauqta naqmo in God ago kabiy eman ayah iyaqta. ⁵ On mataw God ameb gigem dimunmo anumlan haiqmo ussa teq in giholib daq araq meqinta a hi loyinad teq in gimileq a hi iyad God anan helmo diq haqayta, on mataw naqantamo in an anan ginad bilaqsa osayta. Nazaq iyan ni on mataw giwamuzqta na atoranmo gibilenad ginad wastitaya in an anan ginad bilaqsa osiy haqad ya tinibilenaiq.

⁶ Teq mataw asor in daq dimdimunta nawa ya teko ginan bilayta na hulosad in ginad agadan iysa gamuk samantaqmo bilaqad luwayta. ⁷ Mataw na in danmebta iyeq God ago maror Moses bilamta na asuleqin bilaqnan ginad usaqta. Ad in gamuk atoran diqmo bilaqayta, bilaqne in ginad em hasayta nog. Teq haiq. In maror na alulin diq ginad a hi em hasadmo bilaqayta.

⁸ Ari i ginad em hasad God ago maror Moses mar tonta na adan emsa maror na i gidimun tonaqta. Na i bummo tuhurittu. ⁹ Ta teq i maror na anan ginad kazaq em hasuq. God in mataw titnonta giwastitaynan haqad ago maror kwaziqta na eman a hi gwahtim. Haiqgam. God ago maror na in mataw meqinta giwastitaygo usaqta. Mataw naqanta in gunun othasayta teq in nan a hi huritayta teq in God gileh ugayta teq in daq hiihq emaya teq in gigemab ginumlan ayahmo usaqta teq in God bilawunayta teq in gininenmaman ginol emaya teq in mataw asor ginol emaytamo. ¹⁰ Teq in an alulib hureqad inaq usayta teq in Sodom gigo daq emaya teq in mataw girin tonim gizaysa in mat araq ago kabibiy mataw samanta iyayta teq in nan katiya bilaqayta teq in hazizirib gimileq iyad mat dimunta nan ugayta. God ago maror Moses bilamta na in daq meqinta sulep helta bab ugaqta nagan bunmo giwasihgo usaqta. ¹¹ Suleq Yesus awagamun dimunta inaq rirenim usaqta naqmo i anan sulep helta haqauqta. Ad wagam nabmo God ago zaway ulal iy bugsa i ahol waqad i God anan gigem dimniyisa abin iluwauqta. Teq ya Yesus awagamun dimunta naqmo on

mataw wastitayeqmo gibilengo haqad God ya ibenab amta.

Krais Yesus Pol anan anad meqniyta na ago Pol esey ug

¹² I gigo Iyatha Krais Yesus ya ilum kemim inan bilam, Pol atuw inaqta in ya inad usaqta tiqem bugdaq ham. Haqad in ya itowun emim zaway yagan ya in ago kabibiy mat iyim osaigta. Nazaq iyan ya esey diq tuqugaiq. ¹³ Helmo kwaziqmo ya in abin bilawunad ya in ago on mataw gimuzad gimeqin tonyaiqta. Ad ya in ago nan a hi huritad ya girerey ayahmo emyaiqta. Ta teq ya in ago a hi huriit kemta na ago ya in anan helmo a hi haqad daq nagan emyaiqta. Nazaq iyan in ya inan anad meqniy. ¹⁴ Anad meqniyta i gigo Iyatha na agem dimunta ayahmo yagad ilumsihan ya inad tihastitay. Inad hastitayan ya Krais Yesus anan helmo haqad ya on mataw bunmo igem dimunta tinegaiqmo.

¹⁵ Krais Yesus in on mataw God gileh ugad daq megintab osayta naqmo gilumsihnan og kab bolta. Gamuk nawa na in hel diqtaqmo iyan on mataw bunmo huriteq anan helmo tihaq nagiyta. Teq og kab ya on mataw bunmo giqqiriyamim ya mat meqin diqta osyaiq. ¹⁶ Ossa Yesus hidmo gileh a hi yag. Haiqqam. Ya daq hihiq emad luwsa in ya imen emad sisqaqmo os. Osim abeb in ya inan anad meqniyta in ya ilumsihim tiquiwam. Nazaq iyan Yesus ago anad meqniy na yaqgo hib ulal iysa on mataw ya ibiyad ginad emay, God in mat meqin diqta ko ulumsiheq in i tigilumsihdaqmo haqay. Gilumsihid i inaqmo kuluwa-kuluwmo tuqosam haqay. Haqad in Yesus anan helmo tihaqay. ¹⁷ Ya God anan inad ayahmo dimniyaiqta. In on mataw bunmo gigo king iyim giwamuzad kuluwa-kuluwmo osaqla. Osad in a hi moqdaqta teq in on mataw gimeb ulilemim osad in amomo God diq iyim osaqla. Nazaq iyan i in wazinad abin kuluwa-kuluwmo iluwad osuq. Hel diqtaqmo.

Timoti zaway iyeq daq meqinta bayid woqan

¹⁸ Yaqgo amun Timoti, kwaziqmo mataw asor God ago nan tutim ni ninan bilaqiyta nazaqmo ya a ta ni nibilen tonaiq. Ni gamuk na bunmo anadin emad muzin bugsa teq bab ezaq ban bolsa ni inaq an wolad ni niwaz meqniyeg titurdaq. ¹⁹ Turad ni God anan helmo diq haqad ni niholib daq araq meqinta a hi loyindaq. Ni ninad em. Mataw asor gihol daq meqinta ussa in loyinim teq in gileh a hi ugiyta. In gigo daq meginta nazaq alow ugad osim in Yesus anan helmo a ta hi haqimmo tuwoqiy, bilaqne muy kamisib lehim sarteb ulumworim hitimta nazaq nog. ²⁰ Mataw

na gilikmanib Himeneus ayow Aleksanda inaq in nazaqmo emiyya. Eman ya giger na giqeman Satan abenab tilehiy. In ginad em haseq teq God anan a ta hi bilawun daqay haqad.

2

I God bulonid in on mataw bunmo gilumsihan

¹ Ari nagah danmeb diq ni emdaqta na in kazaq. Ni mataw gibilenid in sirisirimo God inaq gamuk emad teq in susumun ugiy. Susumun ugad in on mataw bunmo gilumsihgo haqad God buloni. Sa God in gilumsihsa in esey ugiy. ² In God inaq gamuk emad bulonsa in king teq gavman bunmo anad dimunta negsa in gigo kabiy dimunmo emiy. Nazaq iyid teq i gigo os dimniyta i tuteqmo afaqan a hi waqam. Ad i God anad muzinad ago daq dimdimunta emsa i gibin dimunta og saw bunmo usdaq. ³ I nazaq osamta na in God I Gilumsihim Giwaqaqta na ameb dimun diq iyaqta. ⁴ Na ezaqgo in anad on mataw bunmo inmo ago maror aduganib gwahtiqeq ago gamuk helta huritad ginad em hasad os nagiy haqaqta.

⁵ Na ezaqgo God amulikmo osaqla na in on mataw bunmo gigo God. Sa mat amulikmoqmo God teq on mataw bunmo gilikmanib liqabmo turaqta. Mat na in Krais Yesus-mo. ⁶ In ago on mataw bunmo bab gibenab giwaqgo haqad in gimen ahol naw nog emim gizayta. God anad usta kam nabmo Krais Yesus daq na eman God anad on mataw bunmo in ago maror aduganib gwahtiggo usta na ulal tiquiy. ⁷ Ulal iyan ya nagah na agamukan waqeeg a le og saw haresmo bilaqdaiq haqad God ya itowun eman ya Aposel iytta. (Hel diqmo ya bilaqaiq. Ya a hi katiyaiq.) Ya Aposel tiquiyim ya on mataw en ta asor Juda a haiqta nagan suleq negsa in Krais anan helmo haqad in God ago gamuk helta anan ginad tiqem hasay.

⁸ Nazaq iyan ya inad on mataw uliq bunmo giben tawonta waz eraqsa in gigem meqniy teg an mug hulosad in God inaq gamuk emiy haqaiq.

Kabi dimdimunta naqmo in on gigo balawmo diq

⁹ Ari ya inad on in daq kazaq emiy haqaiq. In tubusan dimunta gihol siheng in inaq diq naqmo in gihol wastitayeqmo siheneq isihiy. In igmo ag haqad giqesan balaw tonad teq in balaw amo amo kaliloy teq gol teq tubusan anawun ayah diqta nagan in hi emiy. ¹⁰ On God anadin emad aqez huritaya na in kabiy amo amo dimdimunta emsa kabiy naqmo in gigo balaw nogmo giholib usan.

¹¹ Teq mataw God ago gamuk asuleqin bilaqsa on gihol wazid woqsa in giqezmo hiqiyeq gamuk na huritadmo muziniy. ¹² Ya on giwasihan in danmeb iyad mataw a hi giwamuzad teq in God ago suleq mataw a hi gibilenayta. Haiqgam. On giqezmo hiqiyeq gamuk huritmo hurit daqay. ¹³ Ni ninad em. God in Adam eman danmeb gwahtimta. Gwahtiqan abeb teq in awe Iv am. ¹⁴ An Adam in gamuk katiya na anan helmo a hi ham. Haiqgam. In ago awmo gamuk katiya na huritim God ago gunun itiyonta. ¹⁵ Nazaq iyan God in on ginan bilamat nazaqmo in osad in onmin ginan iyeq osiy. Ad in God anan helmo haqad in on mataw ginan ginad bilaqsa God ago daq tawonta naqmo in giqemad osiy. In nazaq emad teq in God ago maror aduganib dimunmo kuluwa-kuluwmo tuqos daqay.

3

Yesus ago on mataw gigo danmehta na in titnoneqmo os daqay

¹ Gamuk kawa ka in hel diqtaqmo. Mat Yesus ago on mataw gifaqin iyeq giwamuznan haqad anad emaqta na in kabiy dimun diqta utetaq. ² Nazaq iyan mat Yesus ago on mataw giwamuzdaqta na in mataw gimeb anonon diqmo tur osan. Ad in ago daq bunmo on mataw gimeb dimunmo usanmo. Mat na in aw tuwaqeq inaq osad in ta mat araq ago aw inaq hi luwan. In ago aw diq naqmo aduw iyeq osan. Ad in worworeq osad in anad em hasadmo daq eman. Sa mataw in ago bitab bolsa in anononmo gilowan tonan. Teq in God ago gamuk alulin anad em hasadmo on mataw suleq negan. ³ In yuw atoranta uluwad afaqin agadan hi iyan. Ad in hidmo agem meqniysa mataw haresmo hi ginolan. Haiqgam. In mataw gilowan tonad nenaq kiskismo osan. Ad in mani anan diq hi moqan. ⁴ Teq in ago aw amun giwamuzad nenaq wastitayeg osad in ago onmin giqemid in ahaqenib iyeq aqez muziniy. ⁵ Mat in ago aw amun anonon a hi giwamuzaqta na ezaq teq in Yesus ago on mataw anononmo giwamuzdaqta? Na haiqgam.

⁶ Teq mat Yesus ago on mataw giwamuzdaqta na in Yesus anan helmo haqad inaq sisaqmo luweq teq in ban na waqan. Mat mutur diqmo Yesus anan helmo hamta na in kabiy na a hi wazdaq. Luweq in yaqmo ag haqad girerey emsa God in Satan ayon bilaqan in ago ban ulilibta hulosta nazaqmo in mat na ayon bilaqeq tumuzdagmo. ⁷ Mat in on mataw God ago maror asan ban osayta na gigo hib abin dimunmo usaqta naqmo in Yesus ago on mataw giwamuzdaqta. Luweq mat ahol abin meqinta

araq kabiy nab gwahtiqid mataw asan ban osayta na afaqan ugsa in amebay woqsa Satan ago dobub tuwoqdqaq.

Mataw Yesus ago dauh gilumsihad giyon kabibiy emayta na in wastitayeqmo os daqay

⁸ Ad nazaqmo mataw Yesus ago dauh gilumsihad giyon kabiy amikmikta emayta na in worworeqmo osad in gibin on mataw gilikmanib dimunmo usan. In gimileq iyad giqez giger hi iyan. Ad in wain ayun ayahmo uluwed gifaqin hi hulosiy. Teq in og ka ago nagah kabemmo in gimo giholyon waqgo ginad hi usan. ⁹ In God ameb gigem anumlan haiqmo dimunmo usan. Teq God ago gamuk asuleqin ulilembata God eman ulal iytana in waz naqmo hiqiyyad adan emad osiy. ¹⁰ Mataw kabiy na gihol ugeq emnan bilaqsa ni in gilum ke-meq kabiy asor negid in em waqiy. In kabiy anononmo emsa ni gibiyad teq ni giqemid in Yesus ago on mataw gigo kabibiy mataw iyiy.

¹¹ Sa kabibiy mataw na gigonan in nazaqmo worworeqmo osad in gibin on mataw gilikmanib dimunmo usanmo. In gamuk an agilehunan bilaqayta na hulosiy. Ad in tok nemeq osad gigo kabiy emad in gituw hi hiqyan.

¹² Ari mataw Yesus ago dauh gigo kabibiy mataw iy daqayta na in aw tuwaqeq inaq osad in ta mat araq ago aw inaq hi luwiy. In gigo aw diqta naqmo aduw iyeq osiy. Osad in gigo aw amun anononmo giwamuzad nenaq wastitayeqmo osiy. ¹³ Na ezaqgo mataw kabiy na anononmo emsa in gibin on mataw gimeb dimunmo usad in God ameb dimunmo usaqmo. In gibin nazaq ussa in Krais Yesus ago kabiy atoranmo emnan a hi rabayta.

I God anan helmo haqad muzinauqta na alulin in nagah ayah diqta

¹⁴⁻¹⁵ Timoti, ya hidmo leheq nibiygo inad emaiqta teq ya dan inaq iydaiq o haiq na ya a hi hurit. Nazaq iyan ya ninmen gamuk kawa mar tonim nibilen kemaiq. Ya hidmo ningko hib a hi gwahtiqid ni nimomo nab osad teq ni gamuk ka ahol waqad God asenlul ezaq luw os daqayta asuleqin ka ni gibilendaq. God asenlul na in God kayeqmo osaqta ago on mataw Yesus ago nan huritya naqmo. Teq on mataw na in God ago gamuk helta waz naqmo hiqiyyad asuleqin bilaq sireqsa gamuk na zaway iyim usad a hi woqaqta, bilaqne tituq ayow salmoq inaq giwaz meqniyim bit anon bunmo sorsa a hi woqaqta nazaq nog. ¹⁶ Helmo on mataw God asenlul iyim in anad muzinad ago daq dimdimunta emayta na ago asuleqin in nagah ayah

dicqta. Gamuk na alulin ulilemim usan God eman ulal iytta. Na in kazaq.

In mataw ogibta gisan waqim on mataw gimeb gwahtim.

Teq God ago Bugaw Dimunta ago zaway amalib in ahol alulin dicqta na ulal iy.

Sa angelo in ahol waqiy.

Teq mataw in ahol awagamun a luwad on mataw en bunmo gibileni.

Gibilensa on mataw og saw bunmo in anan helmo haqiy.

Teq God in waqim ad Heven-ib gwalehan in abin ayah diqmo iy.

4

Gamuk katiyta on mataw ginad walebo-laqta na agamukan

¹ Ari God ago Bugaw Dimunta in nantut giqezab kam kawa i osauqta ka anan tibilaq kemaq. In bilaqaq, Kam abebtanta kab mataw in ginad God anan helmo haqayta na tuhulos daqay haqqaq. Ad in le mataw giholib bugaw meqinta ussa gamuk katiyta bilaqayta naqmo gigo hib tisoqot daqay haqqaq. Soqoteq in bugaw meqinta naqmo gigo gamuk tumuzin daqay haqqaq. ² Mataw gamuk katiyta bilaqayta na in gimileq iyad gamuk ahurit dimunta bilaqayta teq in gigo tur os meqin. Mataw na ginad faq oyan in daq meqinta emad gihol a hi loyinayta. ³ In gunun emim bilaqsa in gigo walmataw an a hi waqayta teq in didaq neqnanta asor udinad a hi negayta. Teq God-mo didaq in udinayta na gigamta. In anad on mataw yaqgo gamuk helta huritum anan helmo haqayta na in didaq na waqeyp ya esey yagadmo in tineq daqay ham. ⁴ Nagah bunmo God gigamta na in dimunmota. Nazaq iyan i araq diq a hi hulosam. Haiiggam. I didaq gunun emiyya na inaqmo waqad God esey ugsa teq in dimunta iyaq. ⁵ Na ezaqgo nagah giger God ago gamuk teq i God esey ugauqta na in nagah nagan giqeman God ameb tawonta iyaq.

Timoti in Krais ago kabibiy mat dimunta osan

⁶ Ari ni gamuk nawa teko ya tinibilenta na ni nimaqbaban teq nihiiyan Krais aduganibta na gibilen bugeq teq ni Krais Jesus ago kabibiy mat dimunta iyaq. Ad ni God ago gamuk dimunta i ginad helta wazan eraqaqta na anadin emad ni God ago suleq titnonta muz bugad teq ni niwaz timeqniydaq, bilaqne ni didaq neqim nihol zaway iyaqta nazaq nog. ⁷ Ni wagam katiyta God abin bayan woqaqta na teq ginad samanta alulin haiqta nagan bunmo gileh ug. Gileh ugad ni God ago daq dimdimunta emgo nihol emunad luw. ⁸ Na ezaqgo mataw saw zunnan haqad gihol

emunad giwaz meqniyayta na in asitmomo gilumsihaqta. Ari i God ago daq dimdimunta emgo gihol emunauqta na in ayah diqmo gilumsihaqta. Gilumsihsa muran i God ago os dimuntab tugwahtiim i giwaz meqniyim osauqta. Ad abeb i moqamta nab i giwitan God inaq ginad dimniysa kuluwa-kuluwmo tuqosammo. ⁹ Gamuk nawa na in hel diqtaqmo iyan on mataw bunmo huriteq anan helmo tihaq nagiyyta.

¹⁰ Na ezaqgo God I Gilumsihim Giwaqqaqta na in on mataw bunmo gilumsihim in gimen dante amta. Eman on mataw God anan helmo haqad dante na muzinsa God in ayah diqmo gilumsihaqta. Nazaq iyan i ginad bunmo God kayeqmo osaqta na ago hib emad i giholtuw bulad ago kabiy atoranmo emauqta. ¹¹ Ya gamuk nawa ninmen mar tonta na bunmo ni ningon on mataw na gibilenad asuleqin negsa in muziniy.

¹² Ari ni mataw gimeb titnoneqmo luw os. Luweq ningi walmataw nibiyad in ni ninan amun haqad a hi niwazin daqay. Haiiggam. Ni daq dimdimunta giqishun. Giqishunad ni gamuk dimunta bilaqad teq ni wastitayeq luw osad teq ni on mataw ginan ninad bilaqsa teq ni God anan helmo haqad teq ni daq anumlan inaqta aban emsa in nibiy kemiyy. Nibiy kemad in nisen muzeq ni daq em nogmo in emiy. ¹³ Teq ni ya ibaq tuneq osad tuteqmo ni God ago marib gamuk bilaqsa ningi walmataw hurityi. Ad ni gamuk na asuleqin negad ginad wazid eraqsa in God anad muzin bugiy.

¹⁴ Kwaziqmo Yesus ago on mataw gilikmanib mataw danmebta asor eraqim in giben ni niholib emim niwazad zaway nigiyyta. Ad God ago gamuk in ginadib bolsa in ni ninan bilaqsmo God ago naw ni niholib tubol. Nazaq iyan naw dimunta God nigta na in saman hi usan. Ni anadin emad akabiyan em.

¹⁵ Teq gamuk bunmo kawa ya tinibilenta ka ni muzinad akabiyan em. Ni nazaq emad teq ningi kabiy daq bunmo dimunmo lehsa on mataw bunmo ahol twaqaq daqay.

¹⁶ Nimmo nihol anononmo wamuzad os. Osad ni ninad em haseq ningi suleq bilaq. Ni tuteqmo nazaq emsa teq God in ni nilumsiheq niwaqad in on mataw ni niqez hurityat na inaqmo tigawaqdaqmo.

5

Timoti in ago walmataw gilowan ton-daq

¹ Ni mataw aseseqta ginadad gamuk atoranmo hi gibilen. Haiggam. Ni nimam alowan tonad inaq gamuk kiskismo bilaqaqta nazaqmo ni mataw aseseqta ne-naq gamuk em. Ad ni nimaqbaban gibilen nogmo ni mataw minminta gibilen. ² Teq ni ninen inaq gamuk emaq nazaqmo ni on aseseqta nenaq gamuk em. Ad ni nihiyen nenaq gamuk emaqta nazaqmo ni on baras-barasta nenaq gamuk em. Gamuk emad ni in gigo hib ninad araq meqinta hi gwahtiqaan.

Yesus ago on mataw in on waburta saman diqmo osayta na tigelumsih daqay

³ Aw araq aduw moqan in wabur iyim amomo diq osaqta na in aw waburmo diqta. Ni on naqanta ginadin emad tigelumsihdaqta. ⁴ Ari aw waburta araq ago onmin o in asesan asor osid ni gibilensa in ginad em haseq ginen na ulumsihiy. Na in gigo kabiy danmepta. Na ezaggo in amunibmo ginen gimam gituw bulad luwiyya na amenin in nazaqmo tiqem daqay. Daq na in God ameb dimun diqta.

⁵ Teq aw waburmo diqta na in amomo samanimo osad in anad bunmo God-mo ago hib usaqta. Ussa in tutimmo God inaq gamuk emad in on mataw gigo afaqan inaq na gilumsihgo haqad bulonaqta. ⁶ Ari wabur asor in daq gihol bilaqaqta naqmo amomo anadin emad osayta. Osad in God anadin diq a hi emad in on mataw gilumsihgo ginad a hi emaymo. Nazaq iyan on naqanta in samanta tumoqiyta nog iyim osayta. ⁷ Ni on waburta gamuk ka gibilensa in muzinad mataw gimeb anononmo luw osiy. In nazaq emsa teq mataw in gigilehun ahi bilaq daqay. ⁸ Ari mat aw nog inmo asenlul teq ago ned giwamuzad ahi gilumsihaqta na in God ago suleq dimunta gileh ugaqta. Mat nazaqta in on mataw en ta asor God abin ahi huritim anan helmo ahi haqayta nagan gigo daq meqinta giquriyamim in daq meqin diq emaqta.

⁹ Nazaq iyan ni aw wabur kazaqta ulumsihgo anan mar tonid usan. In ago ulig 60 nazaq tiquiyta teq in mat tuwaqim inaq osad in ta aw araq ago mat inaq ahi luwta. ¹⁰ Aw na ahol abin ahi kabiy dimdimunta kabemmo amta teq in ago onmin anononmo giwamuzta teq mataw in ago bitab bolan in gilowan tonta teq inmo ahol wazan woqsa in God ago on mataw tawonta na gimen kabiy amikmikta amta. Teq in on mataw meqin ossa gibiyad gilumsih. Ad in kabiy amo amo dimdimunta kabemmo giqemad in ahol bunmo kabiy nab eman lahta. Aw wabur naqan diqta ulumsihgo ni anan tu-mar tondaq.

¹¹⁻¹² Ari on baras-barasta gidugniz tumoqiyta na ginan ni hi mar ton. On naqanta in

osim ginad ahi eraqsa in gihol wasihim gunun emiya na itiyonim in Krais gileh ugad mat muturta ahi waqgo ginad emayta. In nazaq tonsa in gibin on mataw gimeb timeqniyaq. ¹³ Teq in daq araq kazaq emaytamo. In gituw hiqiysa kabiy haiqmo osad in bitbitmo gwatal tiqad luwayta. Teq in samanno ahi osayta. Haiq. In gamuk yuwlozin on mataw haresmo bilaqaqta na huritim luwad in on mataw gigilehun bilaqaqta. Ad in on mataw bunmo gigo kabiy daq emaya na huritnan ginad diq bilaqsa in gamuk hi bilaqnanta bilaqaq-tamo. ¹⁴ Nazaq iyan ya inad on barasta gidugniz tumoqiyta na in mat ahi waqeq in onmin giqemad in gimo gigo bit wamuzad osiy haqaiq. In nazaq emsa teq mataw i gihir igayta na in i ginan meqin bilaqgo adanteqin hiqiyaq. ¹⁵ Ni ninad em. On baras-barasta gidugniz tumoqiyta na asor in dan titntona hulosim Satan-mo tumuzad luway.

¹⁶ Ari aw araq Yesus anan helmo haqqaqta na anenan waburta asor ossa aw na in tigelumsihdaq. Afaqan na in Jesus ago on mataw bunmo gigo ahaiqta. Ari on waburta saman diqmo osayta naqmo ne tigelumsih daqay. Luweq ne on waburta bun diqmo gilumsihsa ne gigo nagah siqim iydaq. Siqim iyid ne on wabur ginaghan haiq diqta na ahi gilumsih daqay.

Mataw marorta in gigo kabiy dimunmo emsa i giwazinad gidimun tonam

¹⁷ Ne gigo mataw danmepta in anononmo ne giwamuzsa ne giwazinad naw dimunta negiy. Ad mataw aseseqta na gilikmanib mataw God ago gamuk bilaqad asuleqin negad giholtuw bulayta na ne naw ayahmo negiy. ¹⁸ Na ezaqgo God ago marib gamuk araq kazaq bilam, Bulmakau wit akabiyan emad wit bay ninalsa ne atenmos am ahi waziy ham.

Lo 25.4

Ad gamuk araq bilam, Mataw gamim kabiy emsa in amenin tuqug daqay ham.

Luk 10.7

¹⁹ Teq mat amulikmo era mat danmepta araq amalib nan emsa ni gamuk ahi hurit. Ari mataw giger o ezeqman in gamuk amulik na an ulumsiheq bilaqsa ni in giqez tuhuritdaq. ²⁰ Teq mat danmepta araq daq meqinta emad in hulosnan atuw hiqiysa ni Yesus ago on mataw bunmo gimeb mat na wad. Wadsa mataw danmepta bunmo in giyow na mebay waqsa ahol waqad in daq meqinta araq emnan tirab daqay.

Timoti in mataw gilum kemeq teq God ago kabiyab giqemdaq

²¹ Ari God teq in atatin Krais Yesus inaq teq in ago angelo inmo aholyon gilum kemim giwamta na nenaq bunmo in i

gibiysa ya nidek wazim kazaq nibilenaiq. Gamuk nawa ya teko nibilenta na ni muz naqmo hiqiyad mataw bunmo gigo hib ni daq araqibmo emad mataw asor gigomo hi leh haqaiq.

²² Teq ni hidmo mat araq aholib niben emeq bulonid in God ago kabiy hi eman. Luweq mat na ago daq araq meqinta akasnaknib ulilemeq usdaq. Ussa teq abeb mat na God ago kabiy tiqemad in ago daq meqinta na inaqmo emsa afaqan na ninmo ningo tiqyidaq. Na ezaqgo ni mat na a hi loyin kemimmo hidmo ni kabiy ugta na ago. Ni nihol asawan woltayad ossa afaqan nazaqta niholib hi gwahtiqan.

²³ (Teq ni yuw amomo uluwaqta na hulosad ni wain ayun asitmo uluw tonmo. Ni nazaq emad teq ni nigem titiyaqta na teq niholib moq tutimmo gwalaqta na tihiqyadaq.)

²⁴ Mataw asor gigo daq meqinta ulalabmo usaqta. Nazaq iyan mataw na hazizirib lehsa in giben meqinta na danmеб le mataw gidekib woqsa teq amatawun in abeb bo gwahtiqayta. Sa mataw asor gigo daq meqinta ulilemim usaqta. Nazaq iyan mataw na le hazizirib titursa teq in gigo daq na ulal iyaqta. ²⁵ An nazaqmo mataw gigo daq dimunta in ulilemgo abanan haiqom. Daq dimunta asor ulalabmo diq usaqta teq asor in asitmo ulilem nog iyim usad teq in ulal iyaqta. Nazaq iyan daq dimunta tuteqmo ulilemeq a hi usdaq. Dante nazaqta usaqta iyan ni hidmo mat araq aholib niben emeq bulonid in God ago kabiy hi eman.

6

Kabibiy mataw samanta na in kabiy dimummo em daqay

¹ Kabibiy mataw samanta Yesus anan helmo haqayta na in gigo aseseqta giqez huritad gihagenibmo osiy. Luweq in girey emsa in gigo aseseqta na gibiyad in God abin bilaqwad teq in God ago suleq bilaqwad daqaymo. ² Ari kabibiy mataw na asor gigo aseseqta in inaqmo God anan helmo haqsa luweq in gigo kabibiy mataw helmo haqayta na ginad kazaq em daqay, I gigo aseseqta Yesus anan helmo haqad in i gimbabaiq tiziyyita haq daqay. Nazaq iyan i in giqez othasad kabiy hi emuq haq daqay. Kabibiy mataw na ginad nazaq hi emiy. Haiggam. In ginad kazaq emiy. I gigo aseseqta Yesus anan helmo haqsa iyan i in tigilumsiham haqiy. God-mo i gigo aseseqta ginan anad bilaqsa iyan i in gigo kabiy dimummo tiqemam haqad in ginad nazaq emiy.

Mani utet adan na in daq meqinta bunmo alulin

Gamuk kawa ya tinibilendaiqta ka ni tuteqmo on mataw gibilenad ginad wazid eraqsa in muzin bugiy. Na in kazaq. ³⁻⁴ I gigo Iyahta Yesus Krais ago gamuk helta na in God ago daq dimdimunta asuleqin i gibilenaqta. Ari mat araq Yesus ago gamuk na geg ugad anadibmo suleq ta araq bilaqqa, mat na inmo ahol abin wazid eraqnan anad emaqta. Mat naqanta anad a hi em hasad in anad meqin diq usaqta. Ussa in gamukmo amalib an wolhan anad bilaqsa in mataw gigem ulumsa in nagah amikmikta aqanan mugayta. An mugad in an anan gigem meqniysa teq in an wadad teq in an bilawunad teq in ginad meqinta gimaqbaban negayta. ⁵ Teq in tutimmo mataw nenaq gamukib an wolayta. Mataw na ginadib gamuk helta araq diq a hi ussa in ginad buliyim mataw gigo os meqin tongo ginad emayta. Ad in ginad emay, I God ago daq dimdimunta nagan muzinad teq i es nagah kabemmo tuwaqam haqayta.

⁶ Helmo, mat God anad muzinad ago daq dimdimunta emaqta na in God ago nagah dimunta kabemmo aholyon waqim in bilaqne mat anaghan kabemmo inaqta nog iyaq. Nazaq iyan in og ka ago nagah kabemmo waqqaq aqutil a hi eraqsa in agem midemimmo usaqta. ⁷ I ginad emuq. I ginen giqeman i og kab gehitiqad i nagah araq diq wazim ad a hi gehitiqauqta. Ad nazaqmo i og ka huloseq lehamta nab i nagah araq diq wazeq ad a hi lehamtam. ⁸ Ari i nagah neggota na teq nagah gihol sihengota na inaq iyeq i bilaqam, Ka dimunno tiqy haqam. Haqad i nagah ta asor waqnan ginad a hi emam. ⁹ Ari mataw mani kabemmo waqnan ginad bilaqqa na in dante nagunad luwsa daq meqinta hidmo bo gilum waqaqta. Gilum waqsa mataw na gigem eraqsa in ginad hi emta adan emad in gimo gihol meqin tonayta. Ta teq in gigo ginad meqinta na giqirqr nog iysa in dante na hulosgo biyab a hi iyayta. Haiggam. In dante na muzad luwim in meqniy hasim tihiqiyayta.

¹⁰ Mani anan ginad bilaq ago adan na in afaqan amo amo kabemmo giqeman gwatiqayta. Mataw asor in giholyon nagah kabemmo tuwal emnan giqutil eraqan in dante nagunad luwad in ginad helta na kiskismo hulosad le in Krais anan helmo a ta hi haqiy. In nazaq emad luwim in gimo gihol sanctity kabemmo ugiy, bilaqne em amalib bul aqutil ulumsa in sanctity ayah diqmo waqaqta nazaq.

Ni niholtuw bulad God ago os dimunta ahqiqy haiqta na niholyon waq

¹¹ Ari Timoti ni God ago matmo diq iyim iyan ni daq meqinta na bunmo gileh ugeq tuk. Tuqeq ni God ago daq titnonta naqmo

muzinad luw. Luwad ni God anad muzad ago daq dimdimunta na emad ni in anan helmo haq. Haqad ni mataw ginan ninad bilaqsa ni afqaan sorad nituw hi hiqiyen. Ad ni ning walmataw giyon daq kiskista em neg.¹² Mat Krais anan helmo haqqaqta na in bilaqne mat sibim ameb lehim naw waqqaqta na nog. Nazaq iyan ni niholtuw diq buleq nibabun bunmo giquriyameq leheq os dimunta kuluwa-kuluwmo osayta na ni niholyon waq. God in os dimunta na nignan haqad nililewunta. Nililewunan ni os dimunta naqmo waqnan haqad kwaziqmo ni on mataw kabemmo gimeb turad Yesus anan helmo hamta.

¹³⁻¹⁴ God inmo nagah bunmo giqeman kayeqmo giqusayta. Teq Krais Yesus zaway diq iyim turad in Pontiyus Pailat gamuk bilaq sireqimmo bulonta. Nazaq iyan ya God teq Krais Yesus inaq gimeb atoranmo kazaq nibilenaiq. Ni God ago gamuk awaz meqinta in nigta na ananonmo muzinad ningdaq bunmo on mataw gimeb dimunmo iysa ni daq araq ananin waqdaqta niholib hi usan. Ni nazaq emad ossa le i gigo Iyahta Yesus Krais ni nimeb ulalab bo gwahtiqa. ¹⁵ God anad usaqta kam nabmo in Yesus Krais tuqulal tondaq. In amomo ameb diq iyim in nagah bunmo giwamuzsa in ago on mataw bunmo in abin iluwayta. In king bunmo gigo King-ta teq in mataw aseseqta bunmo gigo Iyah diqta. ¹⁶ In amomo a hi moqadmo kuluwa-kuluwmo osaqla. In ahol anuwan ayahmo oysa iyan mataw agerab a hi loqayta. Mataw in gimeb God ahol waqgo biyab haiqta iyim mat araq diq in ahol a hi wamta. God in mat nazaqta iyan i in abin tuteqmo iluwuq. Sa in zaway bunmo wazad in nagah bunmo diqmo giwamuzad kuluwa-kuluwmo osan. Hel diqtaqmo.

Mat ago mani nagah kabemmo usaqta na in God anan helmo haqad on mataw asor gilumsihan

¹⁷ Mataw og ka ago nagah kabemmo inaqla na in igmo ag haqsa ni gibilenid in gihol abin hi iluwiy. Ad in ginad bunmo in gigo es nagah nagan gigo hib hi emiy. Nagah na muran useq babeq in tihiqiyadaqta. Ni mataw na gibilenid in ginad bunmo God amomo ago hib usan. Na ezaqgo God-mo in nagah dimunta i gigem eman dimniyaqta na bunmo igaqta. ¹⁸ Nazaq iyan ni mataw gigo nagah kabemmo inaqla na gibilsa in mataw gina haiqta gilumsihiy. Gilumsihad in gigo nagah kabemmo usaqta nazaqmo in mataw na ayahmo gidimun toniy. Ad in gigo es nagan ginad hi wazsa in mataw meqin ossa gibiyad in gigo nagah kabemmo mataw na gigo hib ibereq negiy. ¹⁹ In nazaq giholyon dante wastitayeq teq abeb

in nagah araq ago siqim a hi iy daqay. Ad in os helta ahiciqy haiqta na inaqmo in giholyon tuwaq daqay.

Timoti in ago kabiw wamuz naqmo hiqiydaq

²⁰ Timoti, God kabiw nigta na ni wamuz naqmo hiqiyisa in hi woqan. Ad ni og ka ago gamuk samanta alulin haiqta na gileh ug. Teq mataw bilaqay, I dante ahol tuwaw haqad teq in gigo gamuk God ago gamuk inaq a hi rirena ni mataw nazaq katiyayta na girabunad pesanmo luw. ²¹ Mataw asor suleq katiyta na anan helmo haqad muzinim lehim in God ago gamuk helta na tuhulosiy.

Ari God agem dimunta ne bunmo negsa ne osiy. Nawaqmo.

2 Timoti

Sansandek gigerta Pol in Timoti amen mar tonan lahta Gamuk ameb lehaqta

Pol ame gigerta uliq Rom-ub irqruran osad in Timoti amen sansandek ka mar tonim eman leh ug. Kam nab Pol afaqan kabemmo soryaq. In aholyogniz asor God ago kabiyl emnay haqad hulosim lehsa in amomo osyqaq. Ossa mat amulik-mulikmo bo Pol ahol waqsa bunmo in Pol aholib hiqiy yaqay. Hiqiysa Pol ago hazizir amebta nab in amomo iyim tur. Teq in ago hazizir na le a hi dimniyan in anad tiqemyaq. Muran Rom matakaw ka ya inol emid ya tumoqdaiq haqyaq. Nazaq iyan in Timoti bulonid agerab hidmo tuboldaq haqad in amen gamuk ka eman lah.

Timoti in Pol inaq kabiyl agaribmo emsa Pol in Timoti loyinsa in ago amun diqta nog iyyaq. Nazaq iyan luweq in irqruran osaqta na ago Timoti anad meqniy hasdaq haqad in gamuk awaz meqinta kazaq bulon, Timoti, ni ninad helmota na hi hulosad ni Yesus Krais ago wagam dimunta bilaqaqta na ni waz naqmo hiqiy ham. Ni God ago gamuk na bunmo muzin bugsa mataw afaqan nidad santitiy nigsa ni zaway diq iyeq God kabiyl nigta na ni emmo em ham.

Pol anad emyaq. Ya moqid teq Timoti in yaqgo ban waqeql God ago kabiyl ka em tuteq ad tilehdaq haqyaq. Haqad in Timoti bulonim bilam, Kabiyl ka God-mo agota iyan in wamuzsa in a hikidik woqdaq ham. Sa mataw i gisan ka wol emid moqsa i giwitan le God inaq kuluwa-kuluwmo ginad dimniya osamta ham. Nazaq iyan Timoti ham, ni ya isen muzinad helmo haqad nidan sosil hi iyan ham. Ad teq ni nigram kiskismo ussa ni mataw ginan ninad bilaqsa afaqan bunmo sor ham.

Timoti aholtuw bulad God ago kabibiy matmo diq iydaq

¹ Ari yaqmo Pol. God-mo anad bilaqan ya Krais Yesus ago Aposel iytta. Ya on mataw gibilensa in os dimunta God negnay hel diqmo bilamta na ago hurit kem daqay haqad God in kabiyl na ya ibenab amta.

² Timoti, ni yaqgo amunmo diq nog iysa ya ni ninan inad bilaqaqta. Ya ninmen gamuk ka mar tonim eman leh nigaq.

I Gimam God teq i gigo Iyahta Krais Yesus inaq in gigem dimunta nidad in ni ninan ginad meqniysa ni nigram midemeqmo usan.

I Yesus awagamun dimunta ago gimebay hi woqan

³ Ya isesay God abin wazinad ayon lotu em yaqayta nazaqmo ya emaiqmo. Emad ya igem loyinsa in God ameb dimun diqmo usaq. Timoti, taromab teq zeqab inaqmo ya God inaq gamuk emad ya ni ninadin emad God esey ugaiqta. ⁴ Ad ya nihulosim lehsa ni nimeqil womta na ya anadin emad ya ta a nibiynan inad diq bilaqaq, ya nibiyeq teq inad tidimniydaq haqad. ⁵ Teq ni nimileq a hi iyad Krais anan helmo diq haqqaqta na ya anadin emaiq. Kwaziqmo ni nises Lowis teq ni ninen Yunis in helmo haqad osiyta. An ya inad emaiq in ginad nog ni ninad usaqmo haqaiq. ⁶ Nazaq iyan kwaziqmo ya iben niholib emim niwazsa ni God ago naw wamta na ni anadin emad akabiyan waz ta eraqsa in niholib ayahmo diq usan. Bilaqne faq miynan tonsa mat ulam haman amileq a ta eraqqaqta nazaq nog. ⁷ Ni ninad em. God in ago Bugaw igan Bugaw na i giqemid i mataw girabungo a haqta. Haiqgam. Bugaw na i giqemid i zaway diq iyeq osad i on mataw ginan ginad bilaqsa i gigo luw os anononmo wamuzam haqad in ago Bugaw na iga.

⁸ Nazaq iyan ni i gigo Iyahta awagamun ulalab bilaqnan nimebay hi woqan. Ad ya Iyahta ago kabiyl emsa mataw ya iwazim iqirqruran ya kawa osaqtta na ago ni nimebay hi woqanmo. Haiggam. God zaway nigsa ni ya inaq araqibmo Yesus awagamun dimunta akabiyan emad i araqibmo afaqan soruq. ⁹ I God ago on mataw tawonta iyeq osam haqad in i gililewunim aholyon giwamta. Teq i kabiyl dimdimunta emsa in i gibiyad giwamta nazaq a haiq. In anadibmo agem dimunta samanmo igad in i gilumsihim giwamta. Kwaziqmo diq in og ka eman a hi gwahtiqsamo in anad tiqam, Ya on mataw iholyon giwaqdaiqta na inad negad ya Krais Yesus ago kabiyl amalib tigilumsihdaiq ham. ¹⁰ Haqan muran mat i gilumsihim giwaqaqta amatin Krais Yesusmo bo tugwahtiqim in God anad bilaqan usta na eman ulal tiqiy. In bolim moq ago zaway walemmi teq in os dimunta kuluwmo osayta na ago dante eman saw anuwanib tugwahtim. An on mataw Yesus awagamun dimunta huritim anan helmo tibaqayta na in dante na ahol waq kemayta.

¹¹ Ya Yesus awagamun dimunta naqmo waqeql a le og saw haresmo bilaqdaiq haqad God ya itowun eman ya in ago Aposel iytta. Iyim ya in ago gamuk na asuleqin on mataw negad luwaiqta. ¹² Daq alulin naqmo ago ya kawa sanctity waqad osaqtta. Teq ya imebay a hi woqaq. Na ezaqqa ya mat anan helmo haqaiqta na ago ya tuhurit has. In kabiyl dimunta ya ibenab amta na inmo wamuz naqmo hiqiysa yaqgo kabiyl na dimunmo ussa le

Krais Yesus ta boldaqta na akaman tugwah-tiqdaq.

¹³ Ya suleq dimunta nibilenta na ni anadin emad tuteqmo ni suleq na adan emad os. Osad ni Krais Yesus asen muzad ni God anan helmo haqad teq ni on mataw ginan ninad bilaqan. ¹⁴ God ago Bugaw Dimunta i giduganib usaqta na in nilumsihsa ni God kabiy dimunta nibenab amta na anononmo wamuzsa in hi wogaq.

¹⁵ On mataw saw Esiya-ibta na bunmo gileh tiyagij. Ad in gilikmanib mataw giger Filetus ayow Hermogenes inaq tiqihulosimo. Na ago ni tuhuritta.

¹⁶⁻¹⁷ Teq ya Onesiforus asenlulniz gimen Iyahta bulonaiqta, in mataw na ginan anad meqniyidaq haqad. Na ezaqgo ya iqirqruran kab ossa Onesiforus in ya iben am waziyta ka ago amebay a hi womta. Haiqgam. In uliq Rom-ub kab bolim in aholtuw bulad inagunad luyim le in bo ya tiqibiyya. In sirisirimo bo ya ibiysa ya igem hastitaysa zaway muturta waqyaiq. ¹⁸ Nazaq iyan ya inad awaz meqin amalib Iyahta kazaq bulonaiq, Iyahta haqaiq, kam abebtanta nab ni Onesiforus anan ninad meqniyan haqaqid. Teq mat na uliq Efesus-ib ame kabemmo ya ilumsihtamo. Na ago ni tuhurit kamta.

2

Timoti in Krais Yesus ago bab mat dimunta iyeq osan

¹ Ari yaqgo amun Timoti, Krais Yesus agem dimunta nigad nilumsihaqta na ni anadin emad ni niwaz meqniyeq os. ² Ad ninggo walmataw gilikmanib ni mataw asor gituw inaqta ginagun. Ginagunad gibiyeq teq ni gamuk kwaziqmo ya mataw kabemmo gimeb nibilenan ni huritta na agamukan bunmo ni mataw na neg. Negid teq in gamuk na asuleqin tuteq in gigo walmataw gibileniyomo.

³ Teq ni Krais Yesus ago bab mat dimunta iyeq osad ni santitiy sor, i bunmo Yesus ago kabiy emad santitiy sorauqta nazaqmo. ⁴ Mat bab emaqta na in kabiy haresmo mataw uliqabta emaya nagan in a hi emaqta. Haiqgam. In ago ayahta anad muzinad in ago ayahta kabiy anan anad bilaqqaqta naqmo amomo in emaqta. ⁵ Teq mat sibtitayim ameb le towub gwahtiqaqta na in anadibmo a hi sibaqta. Haiqgam. In daq na ago agununin muzinim sibaqta. Ari in gunun nagan itiyoneq in ago naw na a hi waqdaq. ⁶ Teq mat aholtuw bulim kabiyah didaq layta naqmo in kabiy ame waqim neqaqta. Mataw hares in didaq ameta na waqim a hi neqayta. ⁷ Gamuk naway na ni anadin emsa Iyahta teq ninad emid hastitayaq. Hastitaysa ni gamuk ezeqman na alulin bunmo ninad tiqem hasdaq.

⁸ Tuteqmo ni Yesus Krais anadin em. In Devit asenlulib gwahtiqaq in mogim teq ta eramta. Ya Yesus awagamun dimunta nazaqmo bilaqaiqta. ⁹ Teq ya wagam dimunta na bilaqsa mataw ya inan mat meqin haqad in afaqan amo amo yagim le tiqiqirqury. Bilaqne ya gavman gigo gunun itiyonim daq meqinta emta nazaq. Ta teq in God ago gamuk irqureq a hi wasih daqay. ¹⁰ Nazaq iyan ya on mataw God gilumim aholyon giwamta na ginadin emad ya ituw a hi hiqiysa afaqan ka bunmo soraqta. Sorad ya inad emaiq, Ya God ago on mataw na gimen afaqan ka sorsa teq in le ban dimunta Krais Yesus in gimen wasti-tayan usaqta na waqeinq in God inaq ginad dimniysa kuluwa-kuluwmo tuqos daqay haqaiq. ¹¹ Teq gamuk araqa y nibilendaiqta ka in hel digtaqmo.

I Yesus Krais inaq moqeq teq i inaq kayeqmo tuqosam.

¹² Ad i afaqan sorad gituw a hi hiqiysa teq i inaq araqibmo king iyeq tuqosam.

Ari i gileh ugsa teq in i gileh tiqigdaqmo.

¹³ Teq i ginad buliyeq i gigo gamuk helta in bulonta na i a ta hi muzinsa in i gigo hib daq nazaq a hi emdaq.

Inmo gamuk helta i gibilanta na tumuzin tutdaq.

Na ezaqgo inmo ago gamuk in bilamta na in a hikidik hulosdaq.

Timoti atuw bulad God ago kabibiy matmo diq iydäq

¹⁴ Tuteqmo ni gamuk nawa ya teko nibilenta na ninggo on mataw ginadib emsa in anadin emad osiy. Ad ni God ameb in gidek wazad gamuk atoranmo gibilensa in gamuk amikmikta aqanan hi mugiy. An mug nazaq na in mat araq a hikidik ulumsihaqta. Haiqgam. Mataw nazaq an mugsa mataw ta asor gamuk meqinta na huritad in ginad dimunta usaqta na timeqniyaqta.

¹⁵ Ni niholtuw bulad God ago kabiy emsa in ni ninan anad dimniyan. Ad ni on mataw in ago gamuk helta asuleqin negad ni gamuk na alulin anonon ninad em hasadmo in gibilen. Ni nazaq God ago kabiy wastitayeqmo emad teq ni in ameb turad ninggo kabiy anan nimebay a hi woqdaq. ¹⁶ Teq ni og ka ago gamuk samanta God abin wazan woqaqta na bunmo gileh ug. Mataw gamuk naqanta bilaqad oseq in God anad huloseq daq meqinta haresmo emsa le daq naqmo ayahmo diq in gilikmanib tuqusdaq. ¹⁷ Ussa in gigo gamuk meqinta na on mataw kabemmo giholib lehdäq, bilaqne mat aholib asulan meqinta gwahtiqaq lilihim ban bunmo waqaqta nazaq nog. Mataw giger Himeneus ayow Filetus inaq in gamuk naqanta bilaqayta.

18 In giger gamuk helta ago dante tuhulosim in bilaqay, Mataw hodhodab eraq daqayta akaman na tekomo tugwahtim haqayta. Abeb mataw moqe in a ta hi eraq daqay haqayta. Haqad in mataw asor ginad helta walebolsa in ginadnad tiqemaya.

¹⁹ Teq God ago gamuk awaz meqniyim usad ahol a hi buliyaqta. In bilaqne tituq araq zawayta tileyen turaqta nazaq nog. Teq tituq na ahulib gamuk giger mar tonan usaqta na gigo araq in kazaq bilam,

Iyahta in ago on matawti na gigo tuhurit ham.

Teq ta araq na in bilam,

On mataw Iyahta ahaqenib iyim abin wazinayta na bunmo in daq meqinta gileh ugij ham.

²⁰ Ni ninad em. Bit araq ayahtab reb deg teq yuqsan amo amo gijusaqta. Nagah na asor gol teq silva amalib gijemiyta. Teq asor ayib sisoyita teq asor og soskaqib gijemiyta. Nagah na asor in kabiy dimdimunta emgo gijusaqta teq asor in kabiy meqmeqinta emgo gijusaqta. ²¹ Nazaq iyan on mataw in giholib daq meqinta ya ginan teko nawa tibilayta nagan suhol bugeq in bilaqne gog deg dimdimunta amalib kabiy dimunta emayta nazaq nog tiqy daqay. Iyeq in bit anamren na amomo agota iysa in giwazsa in aben inaq diq tiqy daqay. Sa bit anamren na in gimalib kabiy dimdimunta emgo haqad wastitayeqmo gigo banab gijemdaq.

²² Nazaq iyan mataw minminta gigemab ginad meqinta gwahtiqaqta nagan ni gileh ugad tuk. Tukeq ni on mataw gigem anumlan haiqmo osad in Iyahta ahaqenib iyim anan biyayta naqmo nenaq luwad ne bunmo God-mo ago daq titnonta muzinad luwiy. Ad ni mataw dimunta na nenaq God anan helmo haqad ne an anan ginad bilaqsa zib alowabmo osiy. ²³ Teq mataw nan agadanta bilaqsa in gilikmanib an mug alulin haiqta gwahtiqaqta ni gamuk na asor hi bilaq. Mataw gamuk naqanta bilaqad in gigem meqniyisa an haresmo wadayta. Na ago ni tuhuritta. ²⁴ Iyahta ago kabibiy mat in mataw nenaq an a hi mugdaqta. Haiqgam. In mataw bunmo giowan tondaqta. Teq in ago walmataw God ago soleq gibilen sireqsa mataw ta asor in gihar ugsa in mataw na gigo afaqan sorad a hi ginadaqta. ²⁵⁻²⁶ Haiqgam. Mataw na in ago gamuk othassa in kiskismo ginad wastitaydaqta. Mataw gamuk othasayta na in Satan ago dobub woqan Satan in giwazim gijem in anad muzinad daq emayta. Teq Iyahta ago kabibiy mat na in mataw naqanta kiskismo giwastitaydaqta. Na ezaqgo luweq God in mataw na gilumsihid in ginad tubuliy daqay. Ginad buliyeq

gigo daq meqinta gileh ugad teq in God ago gamuk anan ginad em has daqay. Ginad em haseq teq in Satan ago dob bayid woqsa asanib gwahtiqaq osad in ginad hastitaysa dimunmo tuqos daqay.

3

Kam abebtanta na bo sinsin tiqiysa teq on mataw daq meqinta kabemmo em daqay

¹ Ari ni ninad em. Kam abebtanta ha tubolsa afaqan meqmeqinta kabemmo kazaq tugwahtiqdaqta. ² Mataw in gimo gihol anadin emad mani kabemmo waqgo ginad em daqayta. Teq in gihol abin iluwid eraqsa in igmo ag haqad nan meqinta haresmo bilaq daqayta. Teq in ginemmanan gijez othas daqayta. Teq on mataw in gimen daq dimunta emsa in ginad dimunta a hi neg daqayta. Teq in God gileh ugad daq anumlan inaqla naqmo emad os daqayta. ³ Teq in mataw amota meqin diq ossa gibiyad in ginan ginad a hikidik meqniydaqta. Teq in mataw ginan gigem meqniyad in ginad na a hikidik buly daqayta. Teq in mataw gigilehunat bilaq daqayta. Teq in giholmo in ginad wamudaqta. Teq in gimat meqniyisa in mataw haresmo gimeqin ton daqayta. Teq in God ago daq dimunta na bunmo geg ug daqayta. ⁴ Teq in giyogniz kat negeq giwaqeq bab gibenab gijem daqayta. Teq in ginad hi emta adan muzinad bilaq daqay, Igmo asitaqmo haq daqayta. Teq in ginad dimniyisa osnan ginad bilaqsa in God anan ginad a hi bilaq daqayta. ⁵ Teq in mataw kat negad God ago daq akabiyakinmo em daqayta. Ta teq in God ago zaway anan helmo a hi haqad in asit diq a hi loyin daqayta. Nazaq iyan ni mataw naqanta girabunad pesanmo luw.

⁶ Na ezaqgo mataw na gilikmanib asor in le on ginad haiqta na gigo bitab gwalim kat negad ginad wamuzayta. On naqanta gigo daq meqinta kabemmo giholib usad iyan in ginad soqotim usaqta. Sa in gihol gigem eraqsa in muzgomo iyayta. ⁷ On na tuttimmo suleq dimunta huriyatay teq gamuk dimunta na ginadib lehim in soqotim a hi usaqta. Nazaq iyan in gamuk helta na anan ginad a hi em hasayta.

⁸ Mataw nawa daq meqmeqinta nazaq emayta na in gamuk helta bab ugayta, kwaziqmo Janes ayow Jambres inaq in Moses bab ugiytu nazaqmo. Mataw na ginad meqinta ayahmo ussa in katiyad God anan helmo haqayta. ⁹ Ta teq in gigo daq na ayahmo diq a hi gwahtiqaq. Haiqgam. In gigo daq agadanta na gwahtiqaq mataw bunmo ahol tuwaq kem daqay. Kwaziqmo Janes ayow Jambres inaq daq agadanta

emsa on mataw ahol waq kemiyya nazammo.

Timoti in God ago gamuk waz naqmo hiqiydaq

¹⁰ Ari ya ninaq luwad ya on mataw God ago suleq gibilensa ni tuhurit bugta. Ad ni yaqgo daq bunmo ahol waqad ya iholoy dan emim muzaiqta na ago ni tuhuritmo. Teq ya God anan helmo haqaiqta na teq ya ituw a hi hiqiya kabiy emaiqta na teq ya mataw ginan inad diq bilaqsa ya afaqan sorad ihol a hi hureq hasaiqta na ni ahol tuwamtamo. ¹¹ Teq ya God ago kabiy emsa mataw imeqin ton yaqayta na ago ni tuhurit. Antiyok-ib teq Aikoniyan-ub teq Listra-ib mataw santitiy meqin diq yagiyta na ago ni tuhurit bug. Uliq nab mataw imuzad imeqin tonsa ya afaqan ayahmo sorta. Teq Iyahta ilumsihsa afaqan nagan a hi inol am. ¹² Helmo, on mataw Krais Yesus aholib soqoteq in God ago daq dimdimunta emad luwsa mataw tigimeqin ton daqay. ¹³ Sa mataw ginad meqinta usaqta na teq mataw katiyayta na in daq hihiq emad oseq in daq meqinta mebmebmo em yaqayta na uriyamad in ta daq meqin diqta tiqem daqay. In on mataw kat negad teq in gimo nan katiyta anan helmo tihaq daqaymo.

¹⁴ Ari Timoti ninmo nazaq hi em. Haiqgam. On mataw gamuk helta asuleqin nibileniya na gigo tur os ni anadin emad ni suleq in gigo hib huritman anan helmo hamta naqmo ni muzin tut. ¹⁵ Teq kwaziqmo ni amunib osad ni God ago mar tawonta na bunmo huritad osim bo muran kawa tiqiy. God ago gamuk naqmo in Krais Yesus anan helmo haqgo adan niqishunaqta. Nazaq iyan ni gamuk na muzinsa teq God ni nilumsiheq tiniwaqdaq. ¹⁶ God ago marib gamuk usaqta na bunmo God ago Bugaw inmo eman gwahtimta. Nazaq iyan gamuk na ayahmo i gilumsihaqta. Gamuk nab i God ago suleq helta waqauqta. Teq gamuk na in on mataw ginad meqinta wazan woqaqta. Teq in mataw gigo luw os wastitayaqta. Teq gamuk na in God ago dante titnonta na ago i gibilen kemaqta. ¹⁷ Nazaq iyan God ago kabibiy on mataw bunmo in gamuk na wazad in God ago kabiy emgo anaghan araq ago siqim a hi iyayta. Haiqgam. In God ago kabiy dimdimunta bunmo tiqem bug daqayta.

4

Timoti zaway diq iyeq God ago gamuk bilagan

¹ Ari God teq Krais Yesus mat on mataw tumoqiyta teq a hi moqayta inaqmo giyon hazizir emdaqta amatin na inaq in ya

ibiysa ya gamuk araq awaz meqinta tinigan. Ad Krais Yesus teq on mataw bunmo gimeb ulalabmo boleq ago maror og saw bunmo emid gwahtiqaqta na ya anadin emad ya atoranmo kazaq tinibile-naiq. ² Ni on mataw God ago gamuk gibilen. In gamuk na huritnan ginad bilaqsa o hajiq in gituw hiqiya ni na ago a hi bilaqad ni gibilenmo gibilen. Ad ni gamuk awaz meqintaqmo amalib gibilenad giqtil ulumsa in ginad buliyiy. Teq in daq meqinta emsa ni ginad. Ad in gidan sosil iysa ni zaway neg. Tuteqmo ni God ago suleq gibilenad ni in gigo afaqan bunmo sorad nituw hi hiqiyan. ³ Na ezaqgo kam araq meqinta nawa tubolaq. Kam na bo tugwahtiqid teq mataw in suleq dimunta huritnan ginad a hi bilaqdaq. In gamuk gidek siriraqta naqmo huritnan ginad bilaqsa in mataw ta asor ghureqid in bo suleq in ginad usaqta naqmo bilaqsa in tuhurit daqayta. ⁴ Ad in gamuk helta na huritnan gituw hiqiya in gihol buliyeq dante haresmo muzad in wagam samanta alulin haiqta naqmo huritnan gidek tiqem daqay. ⁵ Ari ninmo teq worworeqmo osad mataw afaqan nigsa ni sorad nituw hi hiqiyan. Ad ni on mataw God ago gamuk dimunta gibilenadi n kabiy God nigta naqmo ni em bug.

Pol moqdaqta akaman sinsin tiqiy

⁶ Ari mataw ya inol em daqayta na sinsin tiqiy. Inol emid ya inedan bilaqne mataw wain ayun tamaz emim God anognib wazbalan woqaqta nazaq nog tiqiydaq. ⁷ Ya God ago bab nenaq an wolad ya wagay dimunta nab iwaz meqniyim titur. Ad God yaqmen tow amta nab ya sibim le tugwahtiy. Teq ya God ago suleq helta na waz naqmo hiqiyad ya in anad tumuzin bug. ⁸ Muran mat sibim le towub gwahtiqaqta na ago balaw dimunta gifaqinib emayta na in ya ibaq tunim usaq. Balaw na in kazaq. Iyahta teq ya inan mat titnonta haqid ya ibin nazaqmo iholib turqus tutdaq. Iyahta daq titnontaqmo amalib on mataw gigo daq ulum kemaqta. Ad in hazizir ayahta emdaqta akaman nab teq in naw na tiyagdaq. Teq in ya imomo naw na a hi yagdaq. Haiqgam. On mataw ginad emay, Iyahta hidmo bolan haqad gihol husisiqsa osayta na bunmo inaqmo in God abenab naw dimunta na tuwaq daqaymo.

Timoti in Pol ago hib hidmo bolan

⁹ Timoti, ni agudan hi emad hid naqmo yaqgo hib bol. ¹⁰ Na ezaqgo Demas in og ka ago nagah anan moqad in ya ihulosim uliq Tesalonika-ib tilah. Teq Kresens saw Galesiya-ib lehsa Taitus saw Dalmesiya-ib tilahmo. ¹¹ Sa Luk amomo ya inaq kawa osauq. Nazaq iyan ni bolad teq ni Mak

waqeq inaq bol. In mat dimunta iyim in ya kabiyab tiqilumsihdaqta. ¹² Teq ya Tikikus erman Efesus-ib lahta.

¹³ Ni bolnan teq uliq Trowas-ib ni le Karpus ago bitab yaqgo iholsihen sisqaqta ya hulosan nawa usaqta na ni waqeq teq a bol. Ad ni yaqgo buk giwaqmo. Giwaqad buk karuw asanib giqemiyta na ni inaqmo giwaq ton. Buk naqmo ya ahol waqnan inad bilaqaqta.

¹⁴ Aleksanda mat ain akabiyan emaqta na in ya imeqin diq tonta. Abeb teq Iyatha in ago daq na amenin tuqugdaq. ¹⁵ Ni mat na ago nihol waz. In God ago gamuk i bilaquaqta na ababunmo diq.

¹⁶ Ya ime amebata hazizirib gamuk amenin emad tursa mat araq ya ibunib turad gamukib a hi ilumsih. Haiqgam. Mataw bunmo tiqihulos yagiy. Teq ya God bulonaiq, Mataw ya ihulositya na gigo daq meqinta na ni walemad anadin ta hi em haqaq. ¹⁷ Ari ya hazizirib tursa Iyathaqmo ibiy muzad zaway yagyaq, ya in ago gamuk dimunta bilaq siresqa on mataw en ta asor Juda a haiqta na tuhurit daqay haqad. In nazaq ilumsihim in layion ateb iwaqan ya afaqan araq a hi way. ¹⁸ Ad nazaqmo muran teq abeb mat nog imeqin tonnan tonsa Iyatha ilumsihid ya dimunmo tuqosdaiq. Oseq yaqgo kam tugwahtiqid nab teq in ya iwaqeq iqad ago sawab lehid ya in ago maror aduganib dimunmo tuqosdaiq. Nazaq iyan i bunmo tuteqmo Iyatha amomo abin wazid eraqsa osuq! Hel diqtaqmo.

¹⁹ Ari ni Prisila aduw Akwila inaq teq Onesiforus asenlulniz na bunmo yaqgo zeq dimun neg. ²⁰ Ya Erastus uliq Korin-ib hulosan osaq. Ari Trofimus ago moq inaq iyan ya Miletus-ib hulosan towa osaq. ²¹ Ni agudan hi emad hidmo bol. Luweq ni tim meqinta amuditqanta na anobun qwaydaq.

Yubulus teq Pudens teq Linus teq Klodiya teq ni nimaqbaban Krais aduganibta na bunmo in gigo zeq dimun ninmen eman nawa lah.

²² Iyatha ni niwamuzad ninaq osan.

Ari God agem dimunta ne bunmo negsa ne osiy. Nawaqmo.

Taitus

Sansandek Pol in Taitus amen mar tonan lahta Gamuk ameb lehaqta

Taitus in Juda mat a haiqta. Teq in Jesus anan helmo tihagan Pol in waqim inaq on mataw en ta asor Juda a haiqta na gigo hib Yesus ago kabiy tiqem yaqay. Kam araqab uliq Jerusalem-ub Aposel in humab ayahta araq emsa Pol in Taitus waqim inaq humab nab lehiyta (Aposel 15.2). Teq Pol ame gigerma Taitus eman in uliq Korin-ib kabiy emnan lahmo. (2 Korin 7.6-7; 8.6, 16). Teq in giger kabiy emad luwim le nud Krit-ib gwahtiqim in Yesus awagamun dimunta gibilenim teq in saw nab Yesus ago on mataw gidauhan asor gilulin eman tugwahtiqiy.

Gwahtiqan teq nud Krit-ib kabiy na a hi hiqysamo Pol in Taitus hulosan nab ossa in saw araqab tilah. Lehim in uliq araqab tuqosad teq in Taitus amen sansandek ka mar tonim Taitus in kabiy asor usaq na emid hiqiq bugdaq haqad in bulon. Bulonim in bilam, Taitus ham, ni nab osad kwaziqmo ya nibilenta nazaqmo ni uliq bunmo leheq mataw danmepta Yesus ago on mataw giwamuz daqayta na ni gitowun emid osiy ham. Teq ni ninad em hasadmo mataw dimdimunta suleq katyita bayid woqdaqta naqmo amatawun ni gibiy kemad ni gitowun em ham. Haqad in bilam, Ninmo nihol anononmo wamuzad teq ni Yesus ago on mataw na bunmo ginad engrunusa in dante titnonta na muzad akabiyan emad osiy ham.

Taitus in Jesus ago on mataw nud Krit-ib osayta na gilumsihad gigo daq wastitaysa in ginad helmo haqayta na awaz meqniyan

¹ Yaqmo Pol, ya God ago kabibiy mat teq ya Yesus Krais ago Aposel-mo. Ya God ago on mataw in gilumim aholyon giwamta na gilumsihsa in gigo ginad helta na awaz timeqniyadaq haqad in ya iqeman ya in ago kabiy ka emaiqta. Teq ya God ago gamuk helta na on mataw gibilensa in ginad em hasad God ago daq dimdimunta naqmo emad os daqayt haqad in kabiy kab ya iqamta. ² Iqeman ya God ago on mataw na gimen kabiy emsa in God anan helmo haqad in os dimunta kuluwa-kuluwmo os daqayta na amen emad tuqosayta. Kwaziq diqmo God in og ka eman a hi gwahtiqsamo in ago on mataw os dimunta na negnan hel-

diqmo bilamta. Ad in a hi katiyaqta. ³ God I Gilumsihim Giwaqaqta na in nazaq bilaqim teq abeb kam inmo anad usta nabmo in ya iwaqim ibenab kabiy eman ya in ago gamuk na waqim bilaqsa ulal tiqiyaq.

⁴ Taitus, ya sansandek ka ninmen eman nawa lehaq. Ya inad Krais anan helmo haqaiqta nazaq ni ninad usaqmo. Nazaq iyan ni yaqgo amunmo diq.

I Gimam God teq in atatin Krais Jesus i gilumsihim giwamta amatin na inaq in gigem dimunta nigaq ni nigem midemeqmo usan.

Taitus in mataw dimdimunta gitowun emid in Yesus ago on mataw giwamuzad os daqay

⁵ Ari ya kabiy asor liqabmo hulosan usaqta na ni emid hiqiq bugdaq haqad ya nihulosan ni nud Krit-ib nawa osaq. Ni nab osad kwaziqmo ya nibilenta nazaqmo ni uliq bunmo leheq mataw danmepta Yesus ago on mataw giwamuz daqayta na gitowun emid osiy. ⁶ Teq ni mataw kazaqta gibiyad giwaq. In gibin dimunta mataw gimeb usaqta. Teq in aw tuwaqim inaq osad in ta mat araq ago aw inaq a hi luwayta. Ad in gigo onmin Krais anan helmo haqad in daq hihiq a hi emad teq in gininemaman giqez a hi othasaytamo.

⁷ Ni ninad em. Mat Yesus ago on mataw giwamuzaqta na in God-mo ago kabiy emaqta. Nazaq iyan ni mat abin dimunta on mataw gimeb usaqta naqmo ni waqid in Yesus ago on mataw giwamuzan. Mat ni waqdaqta na in yaqmo ag haqad ago on mataw gamuk atoranmo a hi gibile-naqta. Ad in agem hidmo a hi meqniyaga. In yuw atoran a hi uluwaqta teq in mataw haresmo a hi ginolaqta. Ad in mani kabemmo waqeq tuwal emgo anad a hi emaqtamo. ⁸ Mat na mataw in ago bitab bolsa in gilowan tonaqta. Ad in God ago daq dimdimunta naqmo emnan anad bilaqaqta. In mat anad em hasaqla teq in ago daq titnonta. In God anadin diq emad worworim osaqta. ⁹ Teq in God ago gamuk asuleqin helta i Aposel gigo hib wamta naqmo in waz naqmo hiqiyaqta. Mat nazaqta in Yesus ago on mataw God ago suleq dimunta negsa in gigem zaway tiqiy daqayta. Teq in mataw God ago suleq geg ugayta na giqez amenin emsa in giqez tihiqiy daqaymo.

Nud Krit-ib mataw kabemmo in mataw gigo ginad helta na meqin tonayta

¹⁰ Ni mataw dimdimunta nazaqta gitowun emid in uliq-uliqgo osad teq in Yesus ago on mataw giwamuzad osiy. Na ezaqgo mataw nabta kabemmo in nan dimunta a hi huriyatya. In nan haresmo alulin haiqta bilaqad teq in mataw kat negayta.

Mataw na gilikmanib Juda asor in daq nagan ayahmo emayta.¹¹ Mataw na in on mataw gigo mani hureqad in daq hi emnanta naqmo asuleqin gibilenaya. Gibilenad in mataw asor gigo aw amun nenaqmo giwazbalsa in gigo os timeqniyaqta. Nazaq iyan ni mataw na gidanin qwaysa in giqez hiqiyyat.

¹² Kwaziqmo Krit gigo mat araq anad awaz meqinta inmo ago on mataw gilum kemim ginan kazaq bilam, Mataw Krit-ibta gimileq meqinta ham. In meqin diqta bilaqne karuw kwasikta ginaq amugnaqta nazaq nog iyim in kabiyl hajiqmo osad didaq neq naqmo ago in ginad emayta ham.¹³ Gamuk nawa na in helmo diq. Nazaq iyan ni mataw na ginadad nan awaz meqinta gibilen. Gibilensa in God ago suleq helta naqmo hurit kemi. ¹⁴ Hurit kemeq in Juda gigo wagam samanta amo amo nagan hi huritiy. Ad mataw ta asor God ago gamuk helta gileh ugad in ginadib gunun amo amo emsa in hi muziniyomo.¹⁵ On mataw God ameb gigem anumlan hajiqmo osayta na in didaq nagah bunmo wazsa in abusirinan hiqiysa in neqayta. Ari on mataw gimugan meqniyim ussa in Krais anan helmo a hi haqayta na in didaq nagah bunmo wazsa abusirinan inaq iyaqta. Na ezaqgo mataw na ginad gigem inaqmo God ameb meqniyim usaqta na ago.¹⁶ Mataw naqanta in giqezabmo bilaqay, I God ago tuhurit haqayta. Teq in daqdaq emsa i gibiyad ginad emauq, Mataw ko God gileh ugim osayta haqauq. Mataw na God ago nan othasad in daq araq dimunta emgo biyab a hi iysa God in gibiyad ame a hikidik bilaqaq.

2

On mataw aseseqta in God anad muzinad daq dimunta emiy

¹ Ari ninmo teq suleq dimunta God ago gamuk helta inaq riranta naqmo ni bilaq. ² Bilaqad ni mataw aseseqta gibilenid in worworeqmo osad yuw atoranta hi uluwiy. Ad in gihol anononmo wamuzad in God ago gamuk hurit kemeq ginad em hasiy. Ad in on mataw ginad bilaqsa in afaqan sorad gituw hi hiqiyan.

³ Teq ni on aseseqta gibilenid in luw os dimunta God anan anad bilaqqaqta naqmo muzinad in mataw gibun ban nan meqmeqinta hi bilaqy. Teq in wain ayun ayahmo uluwisa ginad hi wamuzan. Ad in daq dimdimunta emgo adan on mataw bunmo giqisihuniy. ⁴ Giqisihunad in on barasta mat mutur waqiyta na gilumsihad in giholib daq dimdimunta usaqta na asuleqin on barasta na gibilensa in nazaqmo emad osiy. Osad in gidugniz gigo onmin

nenaq gilowan tongo hurit kemi. ⁵ Hurit kemad in gihol anononmo wamuzad in aw silumta nog hi iyiy. In haresmo hi luwad in gigo bit teq in gigo mat amun nenaq giwamuziy. Ad in gidugniz giqez huritad gihaqenib osiy. On aseseqta na in nazaq on baras-barasta gibilensa teq mataw God geg uguya na in God ago gamuk bilawungo adanin hajiq tiqiy daqay.

Taitus in mataw minminta daq dimdimunta giqisihundaq

⁶ Ad nazaqmo ni mataw minminta ginad wazid eraqsa in gimo gihol anononmo wamuziy. ⁷ Ad ni ningo daq dimdimunta giqisihunsa in nibiyad nazaqmo emiymo. Teq ni on mataw suleq negad nan katiyta inaqmo hi gibilenad ni on mataw gimeb mat nihol akamolmolin inaqta nog hi iy. ⁸ Kam bunmo ni ninad em haseq suleq heltaqmo gibilen. Ni nazaq emsa teq ningo bab in ningo nan na bayid woqgo biyab a hi iy daqay. Ad in gimebay woqsa in i gigilehunan bilaqgo adanteqin hajiq tiqiy daqaymo.

Kabibiy mataw in gigo aseseqta giqez hurit daqay

⁹ Ni kabibiy mataw samanta gibilenid in gihol wazid woqsa in gigo aseseqta giqez huritiy. Huritad in kabiyl bunmo dimunmo emsa in gigo aseseqta gigem dimniy. Teq in gigo aseseqta kabiyl agamukan gibilensa in amenin emad hi othasiy.¹⁰ Ad in gigo aseseqta gigo nagah hi rin toniyomo. Kabibiy mataw na in gigo aseseqta giqez huritad kabiyl anononmo emsa in gigo aseseqta na in ginan ginad diq tibilaqdaq. Sa on mataw bunmo in gibiyad in i gigo God I Gilumsihaqta na ago suleq huritnan ginad tibilaqdaqmo.

I God ago daq dimdimunta na muzinad i Krais muleqeq ta boldaqta na baq tuneq osuq

¹¹ I ginad emuq. God in on mataw bunmo agem dimunta negad in gilumsiheq ta giwaqgo adanteqin tuwastitay. Wastitayan dante na ulalabmo tugwatiqim usaq. ¹² Ussa dante na agamukan i ginad wastitaysa i God gileh ugyauqta na hulosad i ginad dimunta tiqemauq. Ad i og ka ago daq gihol bilaqqaqta na hulosad i dan titnonta na tumuzinauq. Helmo muran i og kab on mataw nan a hi huritya gilikmanib osauqta. Teq God dante dimunta na i giqisihunsa i ahol waqad i gihol wamuzad teq i daq dimdimunta God anan anad bilaqqaqta naqmo i emad luwaugta. ¹³ I nazaq God anad muzinad Yesus Krais muleqeq ta boldaqta na amen emad i ginad dimniyosa osauqta. Yesus Krais-mo in i gigo God Awaz Meqinta teq

in i gilumsihet ta giwaqdaqta. In teq ulalabmo ahol abalawun anuwan diqta na oysa bo tugwahtiqaq. ¹⁴ Inmo i gimen ahol nog hulosim momta. In moqeq ahol naw nog emeq in i gizayid i daq meqinta ahagenib a ta hi osam haqad in daq na amta. Teq in i gibusirinan suholid hiqiyid i in ago on matawmo diq iyeq giholtuw bulad daq dimdimunta emad osamta haqad in i gilumsihim aholyon giwamta.

¹⁵ Kam bunmo ni gamuk nawa na ningon on mataw gibilen. Gibilenad ni in ginad wazid eraqsa in gamuk na muziniy. Ad ni on mataw nan othasayta na ginadsa in ginad buliyiy. Ni mat nibin inaq nog iyeq mataw atoranmo gibilensta teq in ni nibilawunad ninan amun a hi bilaq daqay.

3

God i gidimun tonan iyan i in anad muzinad daq dimuntaqmo emuaq

¹ Ni ningon on mataw gibilensta in mataw marorta teq gavman gigo aseseqta bunmo gihagenib iyeq osad nan hurityi. Ad in kabiyl dimunta emgo gihol wastitayeqmo osiy. ² Osad in an agilefunan hi bilaqad in gamukib an hi mugiy. Kam bunmo in tok nemeq osad in on mataw bunmo gidimuntoniy.

³ Ni ninad em. Kwazigmo i inaqmo ginad dimunta haiqgam iyan i nan othasad osyauqta. Ossa mataw kat igsia i God ago dan titnonta na huloseq dante hareshmo muzyauqta. I giholmo in i ginad wamuza i bunmo daq hares emad an gihar ugyauqta. Sa mataw i ginan ginad a hi bilaqsa ta igmo an agem meqinta ugyauqtamo.

⁴ I nazaq meqin diqta iyim ossa God i Gilumsihet na agem dimunta igad in i ginan anad bilam. Anad bilaqsa in i gimen dante dimunta amta na eman ulalab i gimeb gwahtiqa i ahol tuwaw. ⁵ Ahol waqsa God in dante nabmo i gilumsihim tigiwam. Teq i daq dimdimunta emsa in i giviyyad agem dimunta igad gilumsihta nazaq a haiq. I mataw meqin diqta osta teq God anadibmo i ginan anad meqniyasa in i gilumsihim giwamta. Giwaqim in i gimugan suhol nog iyan i on mataw muturta tiziyy. Ad in ago Bugaw Dimunta igan in bo i gilumsihan i gigo os buliyim muturta tiziymo. ⁶ Yesus Krais-mo i gilumsihad gimen dante wastitayan God in ago Bugaw Dimunta na ayahmo wazbalan i giyon thitihim. ⁷ God anad in dante naqmo amalib i giwastitayid i in ameb on mataw titnonta iyeq osam haqad in nazaq i gilumsihta. In i gilumsihim giwaqan muran i os dimunta kuluwa-kuluwmo osamta na i giholyon waqqomo tiziyyim osad i ginad emauq, Helmo i tuwaqamta haqauq.

⁸ Gamuk nawa ya tinibilenta na in hel diqtaqmo.

Teq ya inad ni tuteqmo gamuk nawa ya tekoh nibilenta na ningon on mataw gibilensta gamuk na in ginadib oy soqotan. Oy soqotsa ningon on mataw God anan helmo haqayta na in gituw hi hiqiyas in daq dimdimunta naqmo emad osiy. Na ezaggo God ago daq dimdimunta naqmo in hel diqta teq in on mataw bunmo gilumsihet haqta. ⁹ Teq mataw nan agadanta bilaqad an mugsa ni gilumsihad asor hi bilaq. Ad in gisesan giwagamun nagan ago an mugsa ni giholib hiqiyeq pesanmo tur. Ad mataw gihol husereq an baysa ni in giban diq em. Teq in God ago maror Moses bilamta na ago agamukan amikmikta anan an wadsa ni niqezmo hiqiyeq luw. Daq nawa an mugayta na in saman diqta. In i gilumsihid i kabiylaraq dimunta a hi emamta.

¹⁰ Teq mat araq Yesus ago on mataw gihusernan tonsa ni in adek wazeq bulon. Ari ni nime giger nazaq bulonid in a hi huritsa teq ni mat na aholib hiqiyad gileh ug. ¹¹ Ni ninad em. Mat naqanta in dan titnonta tuhulosim in daq katiya naqmo an helmo haqad in daq meqinta ago kabibiy matmo tiziyyim osaqa. Mat naqanta ago daq meqinta naqmo in mat na ayon bilaqan in God ago faq waqqomo tiziyyim osaqa.

Tatus boleq Pol ahol waqan

¹² Ari ya Artemas o Tikkus emid ningon hib lehid teq ni niwaz diq meqniyeq yaqgo hib bol, uliq Nikopolis haqayta nabmo. Ya inad emaiq, Kam meqinta urom atimum inaq bolsa ya uliq nabmo leheq teq tuqos-daiq haqaiq. ¹³ Teq mataw giger Senas mat midyesin wazaqta na ayow Apolos inaq in ni nihuloseq lehsa ni gilowan tonad gilumsih. Gilumsihid in danib lehad nagah araq ago siqim hi iyiy. ¹⁴ Teq ni ningon on mataw na bunmo gibilenid in kabiyl dimdimunta emad osiy. Osad in on mataw nagah osgota siqim diq iysa giviyyad in gimo gigo nagah amalib gilumsihiy. In daq nazaq emad teq in samanmo a hi ossa God ago kabiy gibenab usaqta na anon kabemmo tisorgendaq.

¹⁵ Ari on mataw ya ginaq kawa osauqta ka in gigo zeq dimun eman ningon hib lehaq. Ad nazaqmo ni i gigo zeq dimun ka i giyogniz Yesus anan helmo haqad nawa osayta na gibilenmo.

Ari God agem dimunta ne bunmo negsa ne osiy. Nawaqmo.

Filemon

o

Sansandek Pol in Filemon amen mar tonan lahta Gamuk ameb lehaqta

Filemon in mat araq ayahta Yesus anan helmo haqad uliq Kolosi-ib osta. Teq in ago kabibiy mat samanta araq anan Onesimus haqayta na in Filemon hulosim tukim uliq Rom-ub tilah. Lehim luwad uliq nab in Pol ahol waqim teq in Krais abin huritim anan helmo tiham.

In anad buliyim Krais Yesus anan helmo tihaqim teq in muleqeq ago ayahta ago hib ta leheq in tukta na ago afaqan wastitaynan haqad anad tiqam. Anad emsa kam nab Pol irquran osad in Onesimus inaq leheq Filemon ahol waqgo haiq iy. Nazaq iyan in Onesimus ayon dante wastitaynan haqad in sansandek ka mar tonim ugim eman in ago ayahta ago hib ta lah. Sansandek kab Pol in Filemon kazaq bulon, Ningkabibiy mat samanta ka hi wad ham. In Krais anan helmo tihaqim muran in ningo maqbab tiqiy ham. Nazaq iyan ni inaq an anobun wastitayeq teq ne an anan ginad bilaqsa osiy ham.

Filemon ago kabibiy mat tukim lehim abeb in Yesus anan helmo haqan Pol eman Filemon ago hib muleqim ta lah

¹ Ari yaqmo Pol. Krais Yesus abin ya iholib usaqta na ago ya bit iqirqruran osaya kab osaiq.

Filemon, ni i giyow dimun diqta. Teq i ninaq araqibmo Iyahta ago kabi emauqta. Ya teq i gimaqbab Timoti inaq i giger sansandek ka mar tonim ningo hib eman lehaq. ² Sa i gihiy Apiya teq Arkipus, mat i inaq araqib Iyahta ago bab nenaq an wolauqta amatin na, teq Yesus ago on mataw ningo bitab humab wolayta na nenaq bunmo gimen sansandek ka i mar tonim eman leh negaqmo.

³ I Gimam God teq i gigo Iyahta Yesus Krais inaq in gigem dimunta negad ne gigem emid midemeqmo usan.

Pol in Filemon ago daq dimdimunta anan anad dimniy

⁴ Ya sirisirimo ni ninadin emad yaqgo God bulonad esey diq ugaiqta. ⁵ Na ezaqgo kam bunmo mataw ni ninan kazaq ibile-nay, Filemon in Iyahta Yesus anan helmo diq haqad in God ago on mataw tawonta

na bunmo ginan anad bilaqaqta haqay. ⁶ Haqsa ya huritim ya ninmen God bulonim bilaqaq, God haqaq, Filemon in Krais ayon daq dimunta kabemmo emdaqta na ni isihunid in anad em hasad in amaqbaban Yesus anan helmo haqayta na gilumsih naqmo hiqiyan haqaq. ⁷ Helmo kadoy, ni God ago on mataw tawonta bunmo ginan ninad bilaqad gilumsihsa in gigem hasti-taysa zaway muturta waqayta. Ya ningk daq nazaqta na awagamun huritim inad dimniyasa igem zaway diq tiqiyaqmo.

Filemon in ago kabibiy mat Onesimus bilaqne amaqbab waq nog iydaq

⁸ Nazaq iyan ni yaqmen daq araq emdaqta na ago ya tinibilennan. Helmo ya Krais abinib gamuk atoranmo nibilenid ni yaqmen daq na emgo azawayin ya iholib usaqta. ⁹ Teq ya gamuk awaz meqinta a hi nibilendaiq. Ya Pol ya mat adinowan tiqiyta. Ad Krais Yesus abin ya iholib usaqta na ago muran ya iqirqruran kawa osaiqta. Ya ninaq an anan ginad bilaqsa ya inad awaz meqin amalib gamuk ka nibile-naiq. ¹⁰ Ni yaqgo amun Onesimus waqe alowan ton haqaiq. Ya uliq kab iqirqruran ossa Onesimus bo ya ibiysa ya Krais awagamun bulonan in huritim anan helmo tiham. Haqan nab ya in amam nog tiqiy. ¹¹ Kwaziqmo in ni ninaq osad in kabi araq dimunta amalib a hi nilumsihyaqta. Ari muran in anad buliyim in ya teq ni inaq garabmo ayahmo i tigilumsihdaq.*

¹² Muran ya Onesimus eman in ningo hib muleqim ta lehaq. In ya iqutilmoe diqta. ¹³ Nazaq iyan ya wasihid in ningo ban waqeq ilumsihad kab osdaq haqad ya inad emta. Ya Yesus awagamun dimunta bilaqsa mataw ya iwazim iqirqruran ya bit kab osaiq. Sa ninmo kab osta iyeq ni tuteqmo ya ilumsih nagta. Nazaq iyan ni ya ilumsih nagta na amenin ya ningk kabibiy mat Onesimus ka wasihgo inad emta. ¹⁴ Teq ni ninad a hi bilaqdaq haqad ya nazaq a hi em. Ni ninad bilaqsa teq ni daq dimunta kawa ya anan bilaqaqta ka ni ninadibmo em yagdaqta na in dimun. Ari ya nibe yahid ni ninad a hi bilaqsa iquez muzdaqta na ya loyinsa in dimun a haiq.

¹⁵ Helmo Onesimus in ni nihulosim in tukim bolim kab kam asitmo tuqosta. Teq ya inad emaiq. In saman yaqgo hib a hi bol haqaiq. Ni mat na ta waqeq inaq tuteqmo anonomo os daqayta naqmo ago in ni nihulosim kab bol haqaiq. ¹⁶ Ta teq muran in ningo hib lehid ni kabi mat nog a hi waqdaq. Helmo in ningo kabi emdaqta. Teq in ningo hib lehid ni nimaqbab araq

* ^{1:11:} Grik nanib gamuk Onesimus ka alulin 'gilumsih' haqayta.

anan ninad bilaqaqta nazaq nog ni tuwaqdaq. Ya mat na loyinsa in ya imaqbab dimun diqta nog iyaq. Sa in ningi hib ta lehid ni nazaq tiloyindaqmo. Ad ne giger araqibmo Iyahta aholib soqoteq inaq osad ni mat na anan ninad bilaq gigayindaq.

¹⁷ Nazaq iyan ni ya ibiysa ya ninaq i giger an ulumsihad Iyahta ago kabiyl araqib emauqta nazaq iyid teq ni Onesimus waqeqq nigem dimunta ugad inaq os. Ni nigem dimunta ya yagad inaq os nagta nazaq. ¹⁸ Teq in ningi nagah araq meqin tonta o ningi amenin araq in ago hib ussun ari ni in ananta ningi hib usaqta na suholeq abanab ni ya inanta mar ton. ¹⁹ Yaqmo Pol ya kawa ibenabmo nan ka mar tonaiq. Ya teq nagah na tuwastitaydaiq. Teq ya ayahmo nilumsihta na amenin ningi hib usaqmo. Helmo ni amenin na yagnan haqad ni nihol bummo yagdaqta. Teq ya na ago a hi nibilendaq. ²⁰ Ya imaqbab dimunta, ni yaqgo gamuk ka hureit. Ya ninaq araqibmo Iyahta aholib soqotim osauqta. Nazaq iyan ni ya ilumsihad daq dimunta kawa ya anan tinibilenta ka ni em yag. I giger Krais-mo ago dauhibta iyim iyan ni ya igem emid hastitaysa ya inad dimniyan.

²¹ Ni yaqgo gamuk ka tumuzindaq haqad ya ninmen sansandek ka mar ton nigt. Ad ya inad emaiq, Ni yaqgo gamuk ka muzinad ni ninadibmo nagah asor ya anan a hi bilayta inaqmo ni tiqem yagdaq haqaiq.

²² Teq yaqgo gamuk araq usaqmo. Ni niyogniz nenaq yaqmen God bulonsa in ya ilumsihad ya bit ka huloseq gwahtiqdaiq haqad ya ne gibilenaiq. Ya inad emaiq. Ne nazaq God bulonsa in ne giqez tuhuritdaq haqaiq. Huriteq teq in yaqgo dan wastitayid a ya ne gigo hib ta lehdaiq haqaiq. Nazaq iyan ningi bit adugan araq ya le usdaiqta na ni wastitay yag.

Pol ayogniz asor in Filemon zeq dimun ugiy

²³ Epafras in Krais Yesus ago afaqan sorad in kawa ya inaq giqirquran osauq. In ago zeq dimun eman ningi hib lehaq. ²⁴ Sa ya iyogniz Mak teq Aristarkus teq Demas teq Luk in nazaqmo in gigo zeq dimun eman ningi hib lehaqmo. In ya nenaq araqibmo Yesus ago kabiyl emauqta.

²⁵ Ari Iyahta Yesus Krais agem dimunta negsa ne osiy. Nawaqmo.

Hibru Gamuk ameb lehaqta

Mat araq in Juda on mataw Yesus anan helmo haqiyta na asor gilumsihnan haqad sansandek ka mar tonta. Juda on mataw na in Hibru nan bilaq yaqayta iyan in ginan araq Hibru usaqtamo. Teq nog diq sansandek ka mar tonta na i a hi hurit.

Juda on mataw na in Yesus ago suleq muzinad ossa in gigo walmataw asor afaqan negad gimeqin ton yaqay. Gimeqin tonsa on mataw na in Yesus huloseq gigo lotu kwaziqta nabmo in muleqeq ta lehnhan ginad em yaqay. In ginad nazaq emsa sansandek ka anamren in ginad meqinta na wastitayid in giwaz meqniyeq Yesus in gimen dante amta na a hi hulos daqay haqad in gimen sansandek ka mar tonta.

Sansandek ka in nagah asesepta ezeq-manmo ginan bilamta. Danmehta na in kazaq. Yesus in God atatinmo diq. In og kab osad afaqan kabemmo teq sanctity ayahmo sorim teq in abin ayah diqta wam. Daq naqmo amalib Yesus in i gilumsiheq ta giwaqdqata amatin tiquyim osaqla (Hibru 2.10). Nazaq iyan in abin ayahta na angelo gibin teq Moses abin teq Juda gigo tamaz mat danmehta na abin tigiquriyam bug.

Teq gamuk afaqin gigerta na in kazaq. Yesus bolim i gimen ahol nog hulosim inmo ahol tamaz nog God ugim in i gigo daq meqinta amebay tisuhol bug. Suhol bugan God in anan bilaqan in i gigo tamaz mat danmehta iyim osaqla. Osad in i gimen dante wastitayim i le God amebmo diq gwahtiqamta na ago dan ez in tihas ig. Nazaq iyan in i gimen kabiyl emaqta na in Juda gigo mataw tamaz em yaqayta na gigo kabiyl tuquriyam bugmo.

Teq gamuk afaqin ezeqmanta na in kazaq. Yesus i gimen dante dimunta na eman i abu a hi ulumad i giwaz meqniyeq afaqan sorad gituw a hi hiqiyam. I mataw kwaziqmo osiyta na ginadin emad in God anan helmo haqad osim moqiyta nazaqmo diq i emam. On mataw kwaziqta na gime le os dimunta Heven-ib usaqla na ahol waq nog iyad in afaqan sorad ginadnad a hi em yaqayta. Ari i nazaq a hi emeq luweq i Yesus muzad inaq lehad teq dan aliqabmo i gihol buliyeq ta muleqam. Nazaq iyan mat sansandek mar tonta na bilam, Afaqan amo amo ne giholib gwahtiqsa ne gigo ginad helmota na ne waz naqmo hiqysa le ne gigo moq akamnib iyan ham. Ne Yesus ago hib gime ussa in ago daq na ne muziniy ham. Ad ne an wamuzad an agem zaway ugad ne bunmo araqibmo os dimunta nab le gwahtiqiy ham.

Yesus in angelo giquriyam bugta

God atatin in gamuk ig

¹ Kwaziqmo God in ame kabemmo i Juda gisesan gibilenad in daq amo amo amalib in ago gamuk eman nantut giqezab gwah-tiqiyat. ² Ari muran kam abebtanta kab God in atatinmo aqezab i tigibilan. God in atatin na atowun emim in zaway bunmo abenab tigamtta. Ad in atatin na amalib og teq kait teq nagah bunmo gigeman gwah-tiqiyta. ³ Amam ahol anuwan teq abin ayahta na in amidon na aholib us bugaqta. Sa amidon na ago zaway teq in anad awaz meqinta teq in ahol anaghan bun diqmo in amammo nogta. In ago gamuk awaz meqinta na amalib nagah bunmo zaway negsa in usayta. Teq in on mataw gigo daq meqinta gisuholan gibusirinan tiliqiy bugan teq in gwale King Awaz Mecin Diqta ulilib osaqla na aben aqabun ban tuqos wom.

God atatin abin in angelo gibin uriyamta

⁴ God atatin abin in angelo gibin uriyamaqta. Nazaq iyan in ban waqim osaqla na in nazaqmo angelo gigo ban uriyamaqtamo. ⁵ Na ezaqgo kwaziqmo God in ago amidon na kazaq bulon,

Ni ya itatin ham. Muran ya ni tiniqulal tonaiq haqad in bilam ham. *Buk Song 2.7*

Ad in ta bilam,
Ya in amam iyeq ossa in ya itatin iyeq tuqosdaq ham. *2 Samuel 7.14*

Ari kam gineh diq God in atatin anan bilamta nazaqmo in angelo araq anan bilam? Na haiqgam. ⁶ Teq in ago Amidon aqenta na emid og kab tubolnan haqad in kazaq ta bilam,

God ago angelo bunmo in amun kaqmo abin iluwiy ham. *Lo 32.43*

⁷ Ari in ta angelo ginan kazaq bilam, In ago angelo giqeman in tim nog iyim luwayta ham. Ad in giqeman in faq amileq nog iyim ago kabiyl emad luwaytamo ham. *Buk Song 104.4*

⁸ Teq God in atatinmo anan kazaq bilam, Ni God ham. Ni king iyeq kuluwa-kuluwmo tuqosdaq ham. Osad ni ningor maror aduganib daq titntona amalib ningor on mataw tigiwamuzdaq ham.

⁹ Ni daq titntonaqmo anan ninad bilaqsa ni daq meqinta anan nigem meqniyacta ham. Nazaq iyan ningor God in ni nimaqbelab masil wazbalan woqsa in ni ninan bilam, Ni niyogniz gilikmanib ninmo nibin ayahta iyeq ni ninad dimniysa osdaq haqad in bilam ham. *Buk Song 45.6-7*

¹⁰ Ad in atatin bulonim kazaq bilammo, Iyahta ham kwaziqmo diq ni og ka eman gwahtiqim in awaz timeqniyim usaqta ham. Ad ninmo nibenab ni kait teq nagah bunmo ulilib usayta na giqamta ham.

¹¹ Og kait inaq timeqniydaqta ham. Teq ninmo nazaqmo kuluwa-kuluwmo tuqos tuttdaqta ham. Nagah giger na in kwaziq tiziq has daqayta ham. Bilaqne tubusan kwaziq iyim tartay bugaqta nazaq in tiziq daqay ham.

¹² Teq nagah nagan kwaziq iyid ni bilaqne mat aholsihen hasim ayaqta nazaq nog ni giqaydaq ham. Giqayeq teq ni nagah nagan giwazbuliyid muturta tiziqdaq ham. Bilaqne mat tubusan kwaziqta hasim hunegad muturta waqim aholib emaqta nazaq nog ham.

Teq ningi daq a hi buliysa ni osaq nazaqmo ni tuqos tutaqta ham. Ad ni kuluwkuwlumo osad ningi kam a hi hiciydaq ham.

Buk Song 102.25-27

¹³ Teq God in atatin kazaq bulonmo, Ni ya iben iqabun ban kab ya imen emad ossa ya ningi bab giqemid nisen ahaqenib tiziq bug daqay ham. *Buk Song 110.1*

Teq kam gineh diq God in angelo araq anan nazaq bilamta? Na haiqgam.

¹⁴ Ari angelo in naga matawun diqta? In bugawta teq in God ago kabiyy emayta. God in giqeman lehad in on mataw God ago os dimunta teq waq daqayta naqmo gilumsihaya.

2

God i gilumsihim ta giwaqaqta na in daq ayah diqta

¹ God atatin ahol abin in ayah diqmo. Nazaq iyan gamuk i tuhuritta na i gimaqbelab waz naqmo hiqiyad muzinuq. Luwed i gidan sosil iysa i gamuk tuhuritta na kiskismo hulosad ta muleqam.² Kwaziqmo God ago gamuk angelo gibenab bolta na in awaz meqin diq usyaqta. Ussa mat araq in gamuk na ago gunun araq othasad itiyoneq in daq meqinta amta na ago afan waqyaqta.³ Ari muran God in i gilumsiheq ta giwaqnan haqad dante muturta amta ka in daq ayah diqta. Nazaq iyan i daq ayahta na gileh ugeq abeb i gigo daq meqinta na ago afan i waqad i edob tukeq leham? I tukamta adanteqin araq haiqmo diq.

God i gilumsiheq ta giwaqdaqta agamukan na Iyahta inmo danmeh bilamta. Bilaqsa mataw in ago gamuk na huritim in aqez tutad i gibilenim bilaqiy, Nagah ka i gime anonabmo ahol wawta haqiy.

⁴ Haqsa God inmo gamuk na zaway ugnan haqad in mataw na gisen bayshid daq azawayin inaqtta amo amo emad in kabiyy azawayin inaqtta amo amo giholib eman tugwahtiqaqmo. Gwahtiqa God anad bilaqsa in anadibmo ago Bugaw Dimunta naw nog on mataw tinneyaqmo.

Yesus amomo i gilumsiheq ta giwaqdaqta

⁵ Ari abeb og ka ahol buliyeq mutur idyadqta na i anadin emuq. God in og muturta na wamuzgo haqad angelo a hi giqam. Haiqgam.⁶ Mat araq God ago marib gamuk kazaq emim in bilam,

God ham, on mataw ogibta in ezaq diq iyan teq ni in ginadin emaqta? ham. Doh haqad ni on mataw ogibta ginadin emad ni ananonmo giwamuzaqta? ham.

⁷ Ni on mataw giqeman in kam asitmo angelo gihaqenib iyim osayta ham. Teq ni giwazinad gibin ayahta na negan in og kab nagah bunmo giquriyamim in ameb diq iyim osayta ham.⁸ Ossa ni nagah bunmo eman on mataw gihaqenib ussa in giwamuzaqta ham. *Buk Song 8.4-6*

God in nagah bunmo mataw gihaqenib emad in nagah araq hulosad mataw gihaqenib samanno a hi usaqta. Ta teq muran nagah bun diqmo mataw gihaqenib ussa in giwamuzaqta nazaq i ahol a hi waqauqta.⁹ Ari Yesus teq i ahol waqauqta. God in Yesus eman in kam asitmo angelo gihaqenib iyim osta. Daq na amalib God agem dimunta igad in Yesus eman bolim in on mataw og saw bunmo gigo ban waqim in gimen sanctity ayahmo sorad osim momta. Nazaq iyan God Yesus wazan eraqan teq in wazinad ahol abin ayahta ugan muran in nagah bunmo giquriyamim ameb diq iyim osaqta.

¹⁰ God in nagah bunmo gilulinta teq in nagah bunmo giqamta. In ago onmin helmo haqayta na kabemmo giwaqeq giqad in ago saw anuwanta nab tugwalehnan haqad in Yesus eman in sanctity ayahmo sorta. Sorim teq in mataw giwaqeq ban dimuntab giqemdaqta amatin dimunta tiziq. Nazaq iyan God in Yesus eman sanctity sorta na in daq dimunta am.

¹¹ Na ezaqgo Yesus in God ago on mataw bunmo giqeman in God ago onmin tawon diqta iyayta. Sa Yesus amam in God-mo. Nazaq iyan Yesus in God ago onmin na ginan ya imaginiz teq ya ihiyan haqnan amebay a hi woqaqta.¹² Inmo bilam,

Ya teq ni nibin ya imaginiz ihiyan gigo hib tibilaqdaiq ham. In humab woleq

ni ninan sorsa ya in gilikmanib ne-naq bar wazad ya ni nibin tiqiluw-daiqmo ham. *Buk Song 22.22*

- ¹³ Ad in ta bilam,
Ya ihol bunmo God ago hib emim ya inmo
amen tiqemaiq ham. *Aisaya 8.17*
Teq in bilam,
Ahol waqiy ham. God in ago onmin ka ya
ibenab eman ya nenaq i kawa osauq
ham. *Aisaya 8.18*

Yesus i gilumsihnan haqad mat diq iy

¹⁴ Ari onmin nawa ya teko ginan bilayta
na in mataw diqta gisan ginedan inaqa. Nazaq iyan Yesus in nazaqmo mataw gisan waqim in mat diq iytamo. In moqe i gibabun moq ago azawayin wamuzim osaqta na ago zaway alulin tuwolnan haqad in mat diq iyta. Teq i gigo bab na Satanno. ¹⁵ On mataw bunmo amunib osad le adinowan iyim in moqman rabayta. Rabsa Satan in gigo rab na muzinim giqrurquran in anad muzinad osayta. Ari Yesus in bab na abenab on mataw giwaqid in gibabun na anad a ta hi muzin daqay haqad in momta.

¹⁶ Helmo. Yesus in angelo gilumsihnan a hi mom. Haiqqam. In on mataw Abraham asen muzinad helmo haqayta naqmo ginadin emad in momta. ¹⁷ Teq Yesus in amaqbaban helmo haqayta na gilumsihnan haqad in ginogmo diq iyan daq bunmo in amaqbaban giholib gwah-tiqqa nazaqmo in aholib gwahitimtamo. Nazaq iyan muran in tamaz mat danmepta tiqiyim in on mataw anad negad ago kabiyan nononmo emaqua. Emad in mataw gigo daq meqinta amenin emad in God ago agem meqniy walemaqta. ¹⁸ In sanctity ayahmo sorsa og ka ago daq bunmo ulum waqsa in loyin kamta. Nazaq iyan on mataw giholib daq gilumwaqgo gwahiqsa in anononmo gilumsihdaqta.

Yesus in Moses uriyam bugta

3

Yesus abin Moses abin uriyamta

¹ Ya imaqbaban tawon diqta, God ulilib osad ne gililewunan ne inaqa in ago on matawti tiquiy. Ne Yesus-mo anadin emiy. God in eman in i gimen gamuk helta a bolta teq in i gigo tamaz mat danmepta iyim osaqua. Ossa i in abin nazaq diqmo on mataw gibilenauqta. ² God kabiya ugan in og kab osad God anad bunmo tumuzin bugta. Kwaziqmo Moses in God ago on mataw giwamuzad God anad muzin bugad kabiya emyaqta nazaqmo Yesus amtamo. ³ Teq og kab mataw maqbab iyim osayta na gigo hib in gimam ayahta naqmo abin in atatniz bunmo gibin uriyamaqta. Ad

nazaqmo Yesus abin in Moses abin ayahmo uriyamaqta. ⁴ Mataw gisenlul amulik-mulikmo in gisesan gililib gwahtiqa. Teq God inno on mataw en bunmo giqeman gwahtiqa. ⁵ Moses in God ago kabiya mat dimunta iyim in God anad bunmo muzinad God ago on mataw gini kabiya emad osyaqta. Kabiya emad in God nagah abeb teq emid gwahtiqa na agamukan in ago on mataw gibilenyaqta. ⁶ Ari Krais in God atatin diq iyim in God anad bunmo tumuz bugtamo. Muzinim muran in God ago on mataw bunmo gi-faqin iyim in giwamuzim osaqua. Nazaq iyan in amomo i gilumsihdaqta na i anan helmo haquq. Ad in teq i gidimum tondaqta na i amen emad i ginad dimniysa abin bilaquq. I ginad helta na waz naqmo hiqiyad teq i inaqmo God ago on mataw Yesus giwamuzim osaqua na tiqiyammo.

Mataw nan othasayta na in God ago saw ginamur emayta nab le a hi gwahtiq daqay

⁷ Nazaq iyan i God ago Bugaw Dimunta aqez God ago gamukib usaqta ka i hurituq. Gamuk nab God kazaq i gibilenaq. Muran ne ya iquez huriteq teq ne gigem hi soqotan haqaq. ⁸ Kwaziqmo ne gisesan nan a hi huritad ya iquez othasiya nazaq ne hi emiy haqaq. Kam nab in saw amatawun haiqtab osad ya ilum waqiyta haqaq. ⁹ Saw nab ne gisesan ya inan helmo a hi haqad ilum waqayata haqaq. Ilum waqsa ya daq azawayin inaqa kabemmo eman gwahtiqa in ulig 40 nazaq ahol waqad luwiyya haqaq. Teq haiq, in ginad asit a hi emiyta haqaq.

¹⁰ Nazaq iyan ya in ginan bilay, Tutimmo in gigem yaqgo hib pesanmo usaqta hay haqaq. In yaqgo maror anan ginad a hi em hasayta hay haqaq. ¹¹ Haqad ya igem meqniysa in ginan bilay, Helmo diq in yaqgo saw ginamur emayta nab le a hikidik gwahitiq daqay hay haqaq. *Buk Song 95.7-11*

Isrel on mataw God ago gamuk othasiyta nazaq i hi emuq

¹² Ya imaqbaban, ne gihol waziy. Luweq ne gilikmanib gimaqbab araq anad meqinta agemab ussa in anad helta na hulosad God Kayeqmo Osaqta na gileh tuqugdaq. ¹³ God ago marib in kam anan Muran hamta na akaman muran kawa i osaqua. Nazaq iyan kam bunmo ne gamuk dimuntaqmo an bulonad an zaway ugiy. Luweq ne gilikmanib mat araq anad meqinta gwahitiqad kat ugsu in muzinad luwad agem tisoqotdaq. ¹⁴ Kwaziqmo i God anan helmo hawta naqmo i ginadib us tutan. Us tutsa i ginad helmota na

waz naqmo hiqiyeq ossa le i gigo moq akamnibmo iyan. I daq nazaq emad oseq teq i Krais ago on matawmo diq tihiqiyam.

¹⁵ Daq alulin na ago iyan God in ago gamukib kazaq bilam,

Muran ne ya iqez huriteq teq ne gigem hi soqotan ham. Kwaziqmo ne gisesan nan a hi huritad ya iqez othasiyta nazaq ne hi emiy ham. *Buk Song 95.7-8*

¹⁶ Ne gisesan na gigo kamub gingen diq God aqez huritum teq in girerey emad ago gamuk othasiyta? Na on mataw bunmo Moses giwaqim Isip hulosim giqad lahta naqmo in daq na emiya. ¹⁷ Teq in ulig 40 nazaq saw amatawun haiqta nab ossa God in gingen diq ginan agem meqniyta? Na on mataw daq meqinta emiya naqmo in ginan agem meqniyta. Agem meqniyan mataw na moqim gisan saw amatawun haiqta nabmo giqsiyta. ¹⁸ Teq God in mataw gingen diq ginan bilam, Helmo diq ham in yaqgo saw ginamur emayta nab le a hi gwahtiq daqay ham? Na on mataw in ago gamuk othasiyta naqmo in ginan nazaq bilamta. ¹⁹ Nazaq iyan i ginad emuq. On mataw na in God ago gamuk anan helmo a hi haqsa iyan God giwasihan in ago saw ginamur emayta nab le a hi gwahtiqiy.

4

God ago on mataw gimomo in God ago saw ginamur emaytab gwahtiqayta

¹ Ari God in ago on mataw giqemid in ago saw ginamur emaytab le tugwahtiq daqay haqad in hel diqmo tibilamta. Bilagan in ago gamuk hel diqta na akaman a hi hiqiyad in muran us tutaq. Nazaq iyan i gihol diq wazuq. Luweq gamuk na akaman us tutsa ne gilikmanib mat araq le saw nab a hi gwahtiqdaq haqad. ² I God ago gamuk dimunta tuwawta. Teq kwaziqmo Isrel in God ago gamuk dimunta tuwaqytamo. Ta teq in gamuk na huritum anan helmo a hi haqan gamuk na a hi gilumsih.

³ Na ezaqgo i on mataw God anan helmo tihwanta naqmo God ago saw ginamur emayta nab le tugwahtiqamta. God bilamta nazaq. In bilam,

Ya igem meqniysa in ginan bilay, Helmo diq in yaqgo saw ginamur emayta nab le a hikidik gwahtiq daqay hay ham. *Buk Song 95.11*

Helmo gamuk na in Moses ago kamub daq gwahtimta naqmo anan bilamta. Ta teq kwaziq diqmo og ka mutur gwahtimta nabmo God in ago kabiy eman tihiqiyta.

⁴ Na ezaqgo God ago mar asor ban gamuk araq kam 7-ta na anan kazaq bilam,

God in ago kabiy bunmo emim tihiqiyam kam 7-ta nab in anamur am ham. *Jenesis 2.2*

⁵ Teq gamuk teko i huritta nab in kazaq ta bilammo,

Helmo diq in yaqgo saw ginamur emayta nab le a hikidik gwahtiq daqay hay ham. *Buk Song 95.11*

⁶ Mataw kwaziqmo God ago gamuk dimunta huriitya na in gamuk na othasad in le a hi gwahtiqiyta. Ta teq mataw ginamur em daqayta agamukan na in us tutaq. Us tutsa i ginad emauq. On mataw ta asor teq God ago saw ginamur emayta nab le tugwahtiq daqay haqauq. ⁷ Ari on mataw kwaziqta na le a hi gwahtiqiyta. An ulig kabemmo le tihiqiyen teq God in kam ta araq mataw le gwahtiq daqayta na Devit aqezab eman gwahtiqsa in bilam, 'Muran' ham. Teko i bilawta nazaq. Gamuk na bilam,

Muran ne God aqez huriteq teq ne gigem hi soqotan ham. *Buk Song 95.7-8*

⁸ Ari kwaziqmo Josuwa in ago on mataw na giqad leheq giqemid in ginamur tiqemid teq gamuk nawa bilam, 'Muran' hamta na akaman tihiqiy nag. Hiqiyid God in kam ta araq mataw le ginamur em daqayta na anan a ta hi bilaq nag. ⁹ Nazaq iyan i ginad emauq, God ago on mataw ginamur em daqayta akaman muran us tutaq haqauq. Us tutsa kwaziqmo God in kam 7-ta nab anamur amta nazaqmo in ginamur tiqem daqaymo haqauq. ¹⁰ Teq on mataw God ago saw ginamur emaytab gwahtiqim ginamur emayta na in kabiy bunmo tuhulosim teq in ginamur emayta. Kwaziqmo God ago kabiy tihiqiyin in anamur amta nazaq. ¹¹ Nazaq iyan i bunmo zaway diq iyeq saw ginamur emayta nab le gwahtiquq. Luweq i gigo mat araq in nan othas adan muzineq kwaziqmo Isrel nan othasiyta nazaqmo in emeq in tuwoqdaq haqad.

¹² God ago gamuk kayeqmo usad kabiy atoran diqmo emaqta. In baqr ame gigermota na uriyamim in ame meqin diqta. Gamuk na in mat ulum turim amuganibmo diq lehim aditin tutim usaqta na ulum tayan milhesaqtta. In liqabmo diq lehim mat anad hares agemab usaqta na giqurotan giholbin iyim usaqta. Nazaq iyan gamuk na in i ginad gigemab ulilemim usaqta na bunmo eman ulal iyaqta. ¹³ Nagah bunmo God giqamta nagan gigo araq diq in God ameb a hi ulilemdaq. Haiqgam. Nagah nagan bunmo ulalab God amebmo diq giqusayta. Ussa God in i gigo daq bunmo i emauqta na anononmo ulum kemaqta.

Yesus Heven-ib God ago maror muturta na ago tamaz

mat danmepta iyim osaqta

Yesus in i gigo tamaz mat danmepta

¹⁴ Ari i gigo tamaz mat danmepta araq nawa osaqta. In ulilib Heven-ibmo diq le tugwahtimta. Na in God atatin Yesus-mo. Nazaq iyan i in awagamun helta nazaq bilaqad i ginad hi buliyuq. ¹⁵ Na ezaqgo i gigo tamaz mat danmepta na in i ginan anad meqniyaga. Gilumwaq meqinta i giholib gwahtiqqaqta nazaqmo in aholib gwahtimmo. Ta teq in woqim daq meqinta araq a hi am. ¹⁶ Nazaq iyan God in ago ban tawontab ossa Yesus i gisen bayshiha i hi rabad God agerabmo diq loquq. I Yesus abinib in agerab loqsa in i ginan anad meqniyasa aqem dimunta tiqigdaq. Sa i gigo afaqan ezaq usaqta na i bulonsa in i gilumsihdaq.

5

Tamaz mat danmepta Yesus-mo i gilumsiheq ta gwaqdaq

¹ Ari mat araq in tamaz mat danmepta iyadqta na adan kazaq. God inmo mataw gilikmanib mat araq atowun eman in gwah-tiqim ban na waqaqta. Waqim in ago on mataw bunmo gigo ban waqim God anognib turad in gibinib naw amo amo God ugad teq in daq meqinta walemgoo atamazin emaqta. ² Teq tamaz mat danmepta na inaqmo in ago zaway haita iyim in ago walmataw ginad a hi em hasad God ago dan titnonta hulosayta na nenaq kiskismo lehaqta. ³ In mat diq iyim iyan in on mataw gigo daq meqinta walemgoo atamazin emad teq inmo ago daq meqinta walemgoo atamazin in emaqmo.

⁴ Tamaz mat danmepta na abin ayah diqta. Mat araq in kabiy na anadibmo ahol a hi ugdaqta. God-mo mat lilewunan in kabiy na waqaqta. Kwaziqmo in Aron lilewunta nazaqmo.

⁵ Ad nazaqmo Yesus in tamaz mat danmepta abin ayahta na in anadibmo ahol a hi ugmo. Haiqgam. God-mo Yesus atowun emim bulon, Ni ya itatin ham. Muran ya ni tiniqulal tonaiq haqad in bilam ham. *Buk Song 2.7*

⁶ Teq God ago mar asor ban in kazaq bilammo,

Ni tamaz mat Melkisedek ago dauhibta iyeq ni tamaz akabiyan kuluwamku luwmo emad tuqosdaq ham. *Buk Song 110.4*

⁷ Kwaziqmo Yesus og kab osad in anad emyaq, God ya ilumsiheq iwaqid ya a hi moq hasdaiq haqyaq. Haqad in God inaq gamuk emad susumun ugad in atoranmo ek tonad ago gaq inaq ame kabemmo bulonyaq. Bulonad in ahol wazan woqsa in

God wazinad ahaqenib iyim osyaq. Nazaq iyan God in aqez tuhurit. ⁸ Yesus in God atatin. Ta teq in santitiy ayahmo sorad in ahol suleq ugad God aqez muzingo in hurit kamta. ⁹ Hurit kemimi teq in tamaz akabiyan emdaqta na ago amatin dimun diqta tiqiyim in os kayeqmo kuluwamku luwmo osayta na alulin iyim osaqta. Ossa on mataw inmo aqez huritad muzinsa in os dimunta na negaqta. ¹⁰ Nazaq iyan God in atatin na atowun emim bulon, Ni Melkisedek nogmo iyeq tamaz mat danmepta tuqosdaq ham.

I onmin amikmikta os nog hi iyuq

¹¹ Ya inadib Melkisedek agamukan kabemmo bilaqdaiqta usaq. Na ya gibilen nagta teq ne gimaqbel soqotim usad ginad a hi hastitayaq. Nazaq iyan ya gamuk na alulin giqisihunnan haqad teq ya ne gibibiyowunaiq. ¹² Kam sisaqmo ne God ago gamuk huritad osiyta. Osim muran negmo gamuk na asuleqin mataw tigibileq nagiyta. Teq haiq. Ne gimaqbel siqim diq iyim ussa ne God ago suleq kiskista ne danmeb huritiyta naqmo ne a ta huritnan os nog iyay. Ne didaq atoranta neqgo ahun haita daqag. Ne susmo neqgo ginad usaqta. ¹³ Teq onmin amikmikta naqmo in sus neqayta. Ad in daq dimunta emgo adan a hikidik hurit kemayta. ¹⁴ Ari on mataw aseseq tiqiy bugiyta naqmo didaq atoranta neqayta. On mataw naqanta in tutimmo gihol suleq ugad ginad emunad in daq ulum kemad dimun meqin haqgo in tuhurit kemiyyta.

6

I zaway iyeq ossa teq God i tigelumsihdaq

¹⁻² Ari Krais ago suleq kiskista ne danmeb huritiyta nab i roreq hi usuq. I ginad bulyeq gunun samanta a hi gilumsihaqta nagan gileh uggo agamukan teq i God anan helmo haqgo agamukan teq i yuw huzgo asulegin teq i mataw giholib gibeni emeq giwazgo agamukan teq mataw moqiyta na bunmo eraq daqayta na agamukan teq mataw hazizirib tureq gigo daq meqinta amenin waqad kuluwamku luwmo os daqayta na agamukan nagan bunmo i ta hi bilaquq. I bit ago tituq tileyeq teq i tituq na titeeqaq a ta leyamta na in dimun a haiq. Nazaq iyan i gamuk asamelan haita na hulosad i suleq awaz meqinta mataw ginad tizilimta hurityta naqmo i bilaq tuteq a lehuq. ³ Ari God i gibisya i mataw nazaqta iyid teq i suleq awaz meqinta nab tileham.

⁴ Ne ginad emiy. God in mataw asor ginad eman hastitayan in naw dimunta Heven-ib usim hitimta na waqim tiloyiniy. Sa God ago Bugaw Dimunta in giholib tuqoy soqotmo. ⁵ Mataw na in God ago

gamuk loyinan in dimunmo diq iytä. Teq in God ago kam muturta azawayin inaq abeb teq gwahtiqaqta na tiloyiniyomo. ⁶ Ari in nagah dimdimunta na loyineq teq abeb in God gileh ugeq ari in ginad ta bulyeq gigo daq meqinta na gileh uggo akaman hajq tiziyyadaq. Na ezaggo in gigo daq naqmo amalib in bilaqne God atatin ayib dom a ta wolan in ulalab tursa mataw ahol waqad bilawunayta nazaq nog in tiqem daqay.

⁷ Urom sirisirimo ogib woqsa og na yuw dimunta waqad didaq eman anom dimunimo emsa og na in dimunta. Og naqantab on mataw didaq akabiyan emim in giholyon didaq dimdimunta waqad dimunimo osayta. Nazaq iyan God in og naqanta anan anad dimniyyaqtä. ⁸ Ari og nab sirisirimo urom woqsa teq in am ta amo amo asasuin inaqta naqmo emid gwalsa og na in dimun a hajqta. In God ameb timeqniyim ussa abeb faq tuqoywordaqtä.

⁹ I giyogniz dimunta, muran i gamuk atoran diqmo ne gibilenauq. Ta teq i ne ginan ginad kazaq emauq, God ne giwaqan ne inmo ago on mataw tiziyyim osayta haqauq. Ossa afaqan nawa i anan bilawta nazaq ne gigo hib a hi gwahtiqaq haqauq. ¹⁰ God in meqin a hajqta. Nazaq iyan ne kabiy dimunta emayta na ago in adek a hi zizaldaq. Sa ne in anadin emad ago on mataw tawonta na ginan ginad bilaqsa gilumsih yaqayta na ago in adek a hi zizaldaqmo. Ne daq naqanta muran tigem tutayta. ¹¹ Teq i ginad ayahmo ne bunmo gigo hib usaqta na in kazaq. Ne amulik-mulikmo nazaqmo God ago kabiy atoranno emad os tutiy haqauq. Ne nazaq emad teq ne ginad nad emad "God teq i gilumsiheq ta giwaqdaq o hajq?" haqad ne ginad kabemmo nazaq a hi usdaq. Ad ne ginad amulikmo God amomo ago hib ussa le in ne guyon kam anan bilamta nabmo teq in ne tigidimun tondaqtä. ¹² Ne gituw hi hajqyan. Mataw God amen emim osad gituw a hi hajqya yaqayta naqmo gisen ne muzinad luwiy. Mataw na in God anan helmo haqad gituw a hi hajqya osim muran in nagah God negnan hel diqmo giblanta na tuwaq bugim osayta.

I God ago gamuk anan helmo diq haqauq

¹³ Kwaziqmo God in Abraham nagah araq ugnan haqad hel diqmo bulonta. Bulonad in mat araq ahol abinib helmo ulilib bilaqdaqta na hajqgam iyan inmo ahol ananib in helmo diq ulilib ham. ¹⁴ In bilam, Ya helmo diq bilaqaiq ham. Ya ni ayahmo diq nidimun tonad nibar tonid teq abeb ni nisesan kabemmo diq tugwahtiqaqdaq ham. *Jenesis 22.17*

¹⁵ God nazaq bilaqan Abraham in nagah na amen emad in hidmo atuw a hi hajqya. An abeb nagah bunmo God ugnan haqad hel diqmo bulonta na in tuwaq bug.

¹⁶ Mataw og kabta in gamuk helmo diq ulilib tibaqnan haqad in mat araq abin in gabinuriyamta naqmo biyad in helmo haqayta. Teq in nagah araq anan an mugsa in gigo araq eraqeq helmo diq ulilib haqid mataw na bunmo gijez hajqiyaqta. ¹⁷ Ari God in ago on mataw gidimun tonnan hel diqmo bilamta. Ad in anad a hi bulyidaqta na ago in on mataw na gijisihunnan haqad in ago gamuk na zaway ugad in helmo diq ulilib ham. ¹⁸ Teq nagah giger na God ago gamuk teq in helmo ulilib hamta na in a hi bulyidaqta. Sa God in nagah giger na amalib i a hi kat igdaqtamo. Hikidik. Nazaq iyan in teq i gidimun tondaqta na agamukan i gigo hib bolan i gamuk na waz naqmo hajqiyauqta. I gamuk na waz naqmo hajqiyad i tukim lehim in ago hib ulilemim osad i a hi rabad giwaz meqniyim osaqtä. ¹⁹ Nagah giger na in giholib bilaqne anka afaqan meqinta i gihol waz nog iyim usaqta. Teq anka na in Tempel aduganibmo diq tubusan ayahta othenan usaqta na agilehnib gwahti lehim usaqta. ²⁰ Sa Yesus in tamaz mat danmehta Melkisedek ago dahuhibta tiziyyim in i gimen dan emad in dammeh Tempel aduganib tubusan na agilehun ban le tugwahtimta. Gwahtiqaq in i gimen tamaz akabiyan kuluwa-kuluwmo emad osaqtä.

7

Melkisedek abin ayahmo diq

¹ Melkisedek in uliq Salem gigo kingta teq in God Ulilib Digta ago mat tamaz emyaqta araq. Kwaziqmo Abraham in mataw en ta asor gigo king nenaq an wolim in ginol emad luwim muleqim aqiliqab ta lehsa Melkisedek in danib ahol waqad bar tonta. ² Bar tonan Abraham in bab emad luwim nagah wamta na huseran humab 10 nazaq iyan in humab amulikmo waqim Melkisedek tuqug.

Teg mat na aholnan Melkisedek haqayta na alulin in 'Daq titnonta ago kingta' haqayta. Teq alulin ta araq na in 'Salem gigo king-ta' haqaytamo. Ad gamuk Salem haqayta na alulin in 'gigem kiskista' haqayta. Nazaq iyan in on mataw gigem kiskismo usaqta na gigo king-tamo. ³ Melkisedek anen nog teq in amam nog na i a hi hurit. In bilaqne anen amam hajqta nog osaq. Teq in asesan ginan na i a hi huritmo. Ad in anen amta akaman na teq in momta akaman na i a hi huritmo. Nazaq iyan in God atatin na adulan nog iyim in tamaz mat kuluwa-kuluwmo os nog iyaqta.

⁴ Ne Melkisedek anadin emiy. In abin ayah diqmo. I gises aqenta Abraham in bab emad luwim nagah dimdimunta giwamta na huseran humab 10 nazaq iyan in humab amulikmo Melkisedek ugta. ⁵ Ari abeb Abraham ases Liway anaynayniz gwah-tiqan God in gitowun emad tamaz em akabiyan tinaq. Negan God ago maror Moses bilamta na ago gunun araq bilaqan Isrel on mataw bunmo in gigo nagah bunmo huserid humab 10 nazaq iyid in humab amulik-mulikmo Liway anaynayniz na tineg yaqay. Isrel mataw bunmo Abraham asenlulib gwahtiqim in Liway mataw na nenaq maqbab iyim osiyta. Ta teq Liway asenlulibta na in gimaqbaban ta asor na bunmo gigo hib in gigo nagah ahumaban amulik-mulikmo waq yaqayta.

⁶ Ari Melkisedek in Abraham ases Liway asenlulibta a haiq. Ta teq in Abraham ago nagah asor inmo aholyon wamta. Waqad in mat God dimun tonnan hel diqmo bulonta na tubar tonmo. ⁷ Ari mat mataw gibar tonaqta na in mat ayahta. Sa mataw in gibar tonaqta na in mat ayahta na ahagenib osayta. Mataw bunmo ginad nazaq emayta.

⁸ Teq Liway mataw Isrel gigo nagah asor waqayta na in mataw diq iyim moqayta. Ari Melkisedek teq haiq. In momta na abin God ago marib a hi ussa iyan in bilaqne tuqos tut nog iyaqta. ⁹ Helmo Liway matawta naqmo in gimaqbaban Isrel gigo nagah asor waqayta. Ta teq i kazaq bilaqam. Kwaziqmo Abraham in ago nagah huserim humab amulikmo Melkisedek ugsa Abraham ases Liway in ago nagah asor huserim humab amulikmo Melkisedek tuqugmo. ¹⁰ Na ezaqgo Melkisedek in Abraham danib ahol waqan Abraham in ago nagah asor Melkisedek ugsa kam nab Liway in ases Abraham aholib usad in bilaqne ases inaq garabmo in gigo nagah asor Melkisedek ugyita nog tiqiyi.

Tamaz mat danmepta muturta na in tamaz mataw kwaziqta na tigiquriyam bug

¹¹ Ari Liway mataw in gigo tamaz akabiyan na amalib on mataw giqeman God ameb titnonta a hi iy hasayta. Nazaq iysa iyan God in tamaz mat ta araq abeb teq gwahtiqdaqta na anan bilam. Helmo, God in Liway mataw gigo tamaz akabiyan naqmo aqunnib in ago maror Moses bilamta na Isrel on mataw nagta. Ta teq abeb God bilam, Mat ta araq teq gwahtiqdaqta na in Melkisedek-mo ago dauhibta iydaq ham. Mat na Aron asenlul Liway mataw giduganib gwahtiqdaq nazaq in a hi bilamta. ¹² Nazaq iyan mataw tamaz emayta

na gidauhan buliysa God ago maror kwaziqta na tubulydaqmo. ¹³ Teq God in mat ta araq anan bilam, "In tamaz mat iyeq tuteqmo osdaq" hamta amatin na in Liway asenlulib a hi gwahtimta. In mataw en ta araq gilikmanib gwahtimta. Teq mataw en ta araq na gilikmanib mat araq diq gwahtiqeq God ayon tamaz em abanan nab in tamaz akabiyan a hi em yaqayta. ¹⁴ Na in kazaq. I gigo Iyahta in Isrel gises Juda-mo asenlulib gwahtimta. Na i bunmo tuhuritta. Teq gem Juda matawta na in tamaz akabiyan em daqay haqad Moses in gimen gamuk araq nazaq a hi bilamta.

¹⁵ Teq tamaz mat muturta Melkisedek nogta na gwahtiqan i ahol tuwaqim teq i ginad tiqem hasauq. Tamaz em akabiyan kwaziqta na in God anad eman a hi diq ulal iysa in tamaz akabiyan muturta na waqim a bo kwaziqta na abanab tiqam haqaq. ¹⁶ Teq mat muturta na in mataw og kabta gigo gunun muzinim Liway asenlulib gwahtiqim tamaz mat a hi iyta. Haiqgam. Mat na tuteqmo kuluwkuuwmo osdaqta naqmo ago azawaynib in tamaz mat iyta. ¹⁷ Na ezaqgo God in anan kazaq bilam,

Ni tamaz mat Melkisedek ago dauhibta iyeq ni tamaz akabiyan kuluwkuuwmo emad tuqosdaq ham. *Buk Song 110.4*

¹⁸ Gamuk naqmo amalib God in maror kwaziqta na muzan tihiqiy. Na ezaqgo maror na in samanta ago zaway hiqiyim usta. ¹⁹ God ago maror Moses bilamta na in nagah araq diq eman God ameb dimniyeq a hi usyaqta. Nazaq iyan God in dante ta araq dimun diqta maror kwaziqta uryamta na tiqem ig. Em igan i dante nabmo gwahtiqim muzinad le God ager-abmo diq tiloqauqta.

²⁰ Ari God in Yesus samanmo eman tamaz mat danmepta a hi iy. Haiqgam. In helmo diq ulilib haqadmo in Yesus atowun eman in tamaz mat danmepta iyta. Ari tamaz mataw ta asor na bunmo gimen daq nazaq a hi em yaqayta. Mat araq helmo ulilib haqad gitowun eman in tamaz emgo amatawun a hi iy yaqayta. ²¹ Teq Godmo in helmo diq ulilib haqad Yesus anan bilaqan Yesus in mat tamaz emaqta amatin iyta. God ago gamuk kazaq bilam,

Iyahta in helmo ulilib tibilam ham. Ad in anad a hikidik buliysa ham. Ni tamaz akabiyan kuluwa-kuluwmo emad tuqosdaq haqad in bilam ham. *Buk Song 110.4*

²² God nazaq bilaqan Yesus in tamaz akabiyan na waqim emad in God ago maror muturta na zaway ugsa in a hi hiqiyayta. Nazaq iyan maror muturta na in God ago

maror kwaziqta na uriyamim in dimun diq iyaqta.

²³ Tamaz mataw aqenta nagan moqsa mataw asor muturta gwahtiqaq in gigo ban waq yaqayta. Nazaq iyan mataw kabemmo in tamaz amatawun iyeq os yaqayta. ²⁴ Ari mat ta araq muturta na gwahtiqaq ban tuwaqim in tamaz akabiyana emsa mat araq bo in ago ban a hi waqatqa. Na ezaqgo in kuluwa-kuluwmo osaqa na ago iyan.

²⁵ Nazaq iyan in on mataw gimen dante wastitayan in God agerab loqsa in gilumsihsa in tutimmo dimunmo osayta. Na ezaqgo mat na kayeqmo kuluwa-kuluwmo osad in on mataw gimen God bulonad osaqa na ago iyan.

²⁶ Tamaz mat danmepta nawa ya anan teko tibilayta naqmo in i tigilumsihdaqta. In tawon diqta iyim in aholib daq araq in ananin waqdaqta haiqgam. In ahol abusirinan haiqta teq in mataw daq meqinta emayta na gigo hib pesanmo luwaqta. Nazaq iyan in kait uriyamim gwalehim God ago saw aduganibmo diq ban tuwaqim osaqa. ²⁷ Tamaz mataw kwaziqmo os yaqayta na in kam bunmo tamaz em yaqayta. Emad danmebt in gimo gigo daq meqinta walemgo atamazin emeq teq in gigo walmataw gigo daq meqinta nagan gimen tamaz in em yaqaymo. Ari Jesus nazaq a hi amta. In ahol naw nog God ugad in ame amulikmoqmo tamaz na amta. ²⁸ God ago maror Moses bilamta na in mataw gihol awaz meqin haiqta ginan bilaqan in tamaz mataw danmepta iyayta. Ari God ago gamuk in helmo ulilib hamta na in God ago maror kwaziqta na abeb gwahtimta. Gwahtiqaq in God atatinmo atowun amta. Eman God atatin na in tamaz mat danmepta dimun diqta tiqiyim in nazqmo kuluwa-kuluwmo osaqa.

8

Yesus tamaz mat danmepta iyim Heven-ib osaqa

¹ Ari gamuk kawa i bilaquqta ka alulin in kazaq. I gigo tamaz mat danmepta naqan diqta Heven-ib God Awaz Meqinta ayo ban tawonta na aqabun ger ban nab osaqa. ² In God ago bit Adugan Tawon Diqta nab tamaz akabiyana emaqa, God ago lotu abitan Heven-ib turaqta nabmo. Bit na mataw wazan a hi eramta. Haiqgam. Iyahtaqmo bit na wazan eramta.

³ Tamaz mataw danmepta bunmo gigo kabi in naw amo amo God ugad teq in ayon tamaz emayta. Nazaq iyan Jesus in tamaz mat danmepta iyim in nazqmo God ayon tamaz tiqamtamo. ⁴ Ta teq Jesus og kab oseq in tamaz mat danmepta a hi iy nagta. Na ezaqgo God ago maror

Moses bilamta na tibilaqan tamaz mataw danmepta naw amo amo God ugayta na in og kab ban tuwaqim osayta na ago iyan. ⁵ Teq kwaziqmo Moses in God ago bit karuwsanibta na wazid eraqnan tonsa God in adek wazim bulon,

Ni garah abigmanib gwalehim ossa ya bit adulan niqishunta nazaqmo diq ni bit na anaghan bummo em gwahitiqan ham.

Kisim Bek

25.40

Nazaq iyan i ginad emauq. Mataw og kab lotu akabiyana emayta na in daq hel diqta Heven-ib usaqta na adulan teq atowunmo emad osayta haqauq. ⁶ Ari muran Jesus tamaz akabiyana tuwaqim in og kab tamaz mataw bunmo gigo kabiya na uriyamim in kabi dimun diqta emaqa. Ad in God teq on mataw gilikmanib turad in God ago maror muturta na akabiyana emsa maror muturta na in nazqmo God ago maror kwaziqta na uriyamaqtamo. Na ezaqgo God in ago maror muturta amalib i gidimum tonnan hel diqmo bilamta nazaq in maror kwaziqta na anan a hi bilamta.

God ago maror muturta na in ago maror kwaziqta na uriyam

⁷ Ari God ago maror kwaziqta na in dimunta iyid God in maror ta araq muturta ka emid a hi gwahtiqaq nagta. ⁸ Ta teq God ago maror kwaziqta na akamnib Iyahta in ago on mataw gigo daq meqinta ulalab eman gwahtiqaq in nan negad bilam, Yaqmo Iyahta ya kazaq bilaqaiq ham. Ahol waqiy ham. Ya teq Juda on mataw saw Isrel-ibta na teq saw Judiya-ibta na bunmo nenaq yaqgo maror muturta tinegdaiq ham. Kam na kowa tubolaq ham.

⁹ Kwaziqmo ya Juda gisesan giben wazim giqad Isip hulosim lehta nab ya mataw na yaqgo maror kwaziqta na tineg ham. Negan in yaqgo maror na a hi muzinsa ya in gileh negyaiq ham. Nazaq iyan maror muturta ya negdaiqta na in maror kwaziqmo ya in gisesan negta nazq nog a hi iydaq ham. Yaqmo Iyahta ya nazqmo bilaqaiq ham.

¹⁰ Ari yaqgo maror muturta ya abeb teq Isrel on mataw negdaiqta na in kazaq ham. Yaqgo maror na agamukan bunmo ya in ginadib tiqemdaiq ham. Ad ya gamuk na in gigemab tumar tondaiqmo ham. Teq ya in gigo God iyeq ossa in yaqgo on mataw iyeq tuqos daqay ham. Yaqmo Iyahta ya nazqmo bilaqaiq ham.

¹¹ Kam nab on mataw na in an suleq a ta hi ug daqay ham. Ad in bilaq daqay, Ne Iyahta ago hurityi nazq in a ta

hi bilaq daqaymo ham. Haiq ham. Yaqgo on mataw bunmo gibin inaqta teq gibin haiqta inaqmo in yaqgo tuhurit daqay ham. ¹² Na ezaqgo ham on mataw na in yaqgo gunun othassa ya in ginan inad timeqniydaq ham. Inad meqniysa ya in gigo daq meqinta na walemad anadin a ta hi emdaiq ham. *Jeremaya 31.31-34*

¹³ Ari gamuk nawa nab God in bilam, Yaqgo maror muturta ham. In nazaq blaqaq in ago maror danmepta na eman in kwaziqta tiqiy. Teq nagah kwaziq tiqiyta na in sisqmo a hi useqmo tihiqiy bugdaq.

9

Tamaz mataw danmepta in karuw anedan amalib tamaz em yaqayta

¹ God ago maror danmeb gwahtimta na in ago lotu emgo agununin inaqta teq in ago lotu abitan og kab turtamo. ² Bit lotu em yaqayta na karuwsanibmo wazan eramta. Teq bit na adugan amepta nab lam teq ban teq bret God anognib eman usaqta nagan in giqusta. Bit adugan amepta na anan Adugan Tawonta haqayta. ³ Teq in tubusan ayahta bit adugan nab otheran ussa abe ban bit adugan amikta usta na in anan Adugan Tawon Dicqta haqayta. ⁴ Ad faq aqasim ahuran dimun diqta gwalaqta abanan gol-ib emiya na teq God ago maror amepta abitan amikta na in bit adugan nab giqusta. God ago maror amepta abitan amikta na in gol amalib isih bugiyta. Teq bit amikta na amuganib manna bret arebun gol-ib emiya inaq in us. Teq Aron ago katek ahokan gwalta na teq gig giger God in ago maror amepta agamukan mar tonta na inaqmo in bit amikta na amuganib giqusmo. ⁵ Ad angelo gidulan gigermo gihol awaqan dimun diqta God ahol anuwan nogta na in bit amikta na amalib adek adek ban an nob ugim turad in bit na ahuqunan isihim turiy. Angelo giger na gisenlotab ban usta nab in ned wazbalid God ago agem meqniy suholyaqta na abanan us. Teq muran ya nagah nagan alulin bilaq hasgo akaman haiq.

⁶ Ari tamaz em anaghan na wastitay bugan tihiqiyen teq kam bunmo mataw tamaz emayta na in bit adugan amepta nabmo le gwahtiqim kabi y emayta. ⁷ Ari bit adugan gigerta nab teq tamaz mat danmepta amomo le gwahtiqaqta. Ulig amulik-mulikmo in ame amulikmo le gwahtiqad in samanmo le a hi gwahtiqaqta. In ned waqim teq a le gwahtiqaqta. Ned na amalib inmo aholoy tamaz emad ago daq meqinta walemim teq in ago on mataw ginad a hi emadmo daq meqinta emiya na gigo afaqan in walemaqtamo. ⁸ Daq

naqmo amalib God ago Bugaw Dimunta in kazaq i giqisihun kemaq. Lotu abitan amepta na tur tutsa i naga danteqin diq muzeq bit Adugan Tawon Dicqta nab le gwahtiqamta na in i gimeb ulal a hi iyaq. ⁹ Tamaz akabiyen kwaziqta na in muran kam kab suleq kazaq igaqta. Bit kwaziqta nab in naw amo amo God ugayaq teq in ayon tamaz amo amo emaytamo. Ta teq tamaz em adan kwaziqta na in mataw God amen tamaz a bolayta na giqeman in God ameb a hi dimniyayta. ¹⁰ Daq kwaziqta na in on mataw gisanmo wastitaygo usaqta. Teq gunun amo amo didaq neqgota na teq yuw uluwgota na teq mataw huzeq gisan abusirinan muzgota nagan bunmo in kuluwa-kuluw usgo a haiqta. God anad on mataw gunun nagan muzinad ossa le in nagah bunmo giwastitaydaqta akaman idyaq haqad in nagta.

Krais inmo ahol anedan amalib tamaz am

¹¹ Ari Krais muran tubolim in dante dimun diqta God i giyon amta na ago tamaz mat danmepta iyim osaqta. In lotu abitan ta araq dimun diqta nab le gwahtiqim teq in i gimen dante na wastitayta. Bit na in lotu abitan karuwsanib emiya na uriyam bugta. Teq bit na mataw gibenab a hi emiytamo. Na ezaqgo bit na in og ka ago a haiqta. ¹² Teq Krais in memeq anedan teq bulmakau amidon anedan amalib bit na aduganib gwahtiqim a hi lah. Haiqgam. Inmo ahol anedan amalib in ame amulik-moqmo bit adugan Tawon Dicqta nab gwah-timta. Gwahtiqim in i giwaqid i tuteqmo in agota iyeq osam haqad in i gizayim amenin inmo anedan na tiqam. Emim teq in bit adugan nab le a ta hi gwahtiqdaqta tiqiy.

¹³ Ari God ago maror kwaziqta na akam-nib on mataw in God ameb gihol abusirinan inaq iysa mataw tamaz emayta na kazaq giton yaqay. In memeq ginedan teq bulmakau matmatta ginedan waqeq bulmakau awta anon bunmo oyworta na abutbutan waqeq ned inaq buliyeq teq in mataw na gimalib hures lam yaqayta. In nazaq gitona teq on mataw na in God ameb gisan abusirinan hiqiysa in dimunmo os yaqayta. ¹⁴ Ari muran Krais anedan in nagah nagan bunmo tigiquriyam bugta. Krais aholib daq araq meqinta a hi ussamo in Bugaw Dimunta tutimmo osaqtta na ago zaway amalib inmo ahol tamaz nog God ugta. Ugan tamaz na in i gisan abusirinan amomo a hi suholta. Haiqgam. Na in gunun samanta a hi gilumsihaqta na ago afaqan ne giholib ussa ne gigem meqin loyin yaqayta na inaqmo suholan tihiqiy bugan ne God Kayeqmo

Osaqta na ago kabibiy on matawta tiqiyim osayta.

Krais anedan naqmo in God ago maror muturta na zaway ugaq

¹⁵ Ari Yesus in daq nazaq emim in God ago maror muturta emid anon emdaqta amatin tiqiy. In God ago maror kwaziqta na ago akamnib moqim in daq meqinta amenin usta na tizay bug. Zay bugan on mataw God gililewunim ago os dimunta ahiqiy haiqta negnan gibilanta na in os dimunta na waggo adanteqin inaq tiqiyi.

¹⁶ Mat araq a hi moqadmo nog diq in ago ahuran nagah waqeq wamuzdaqta na agamukan in sansandekib tumar tondaq. Mar toneq in a hi moqsa ago ahuran nagah agamukan na samanta akabiyen haiqmo usdaq. ¹⁷ Na ezaqgo gamuk anamren a hi moqsmo ago ahuran nagah agamukan na in ago zaway haiqgam. Ari mat na tumoqid teq in ago gamuk na azawayin inaq tiqyidaq. ¹⁸ Daq alulin naqmo ago kwaziqmo in karuw wol emim anedan tuwazbalan teq God ago maror kwaziqta na azawayin inaq tiqiyim usyaq. ¹⁹ Mebmebmo diq Moses in ago walmataw bunmo God ago maror agamukan gibilenad in maror na ago gunun bunmo gibilen bug. Gibilen bugim teq in bulmakau amidon anedan teq memeq matta anedan waqim in yuw inaq buly. Bulyim in sipsip ahulgen kakaqta waqim ay hisop aben amotnib am wazim teq in ned yuw inaq buliyan usta na ulum turim in God ago maror agamukan buk-ib mar tonta na amalib ned hures lamad teq in on mataw bunmo gimalib ned na hunagmo. ²⁰ In gimalib ned hures lamadmo bilam, Ned ka God ago maror in ne muzingo gibilanta na zaway ugaqta ham. ²¹ Ad nazaqmo Moses in lotu abitan karuwsanibta na teq deg bunmo amalib tamaz akabiyen em daqayta na inaqmo gimalib ned na hures lam tonmo. ²² God ago maror Moses wamta na bilaqsa nedmo woqim nagah bunmo giqeman God ameb gibusirinan hiqiyaqta. Helmo, ned araq a hi woqid teq God in on mataw gigo daq meqinta a hi walemdaq.

Krais inmo ahol tamaz gan emim in i gigo daq meqinta na tisuhol bug

²³ Nagah amo amo lotu abitan kwaziqta nab giqusta na in nagah Heven-ib giqusaqta na gidulanmo iyim usta. Sa in karuwmo ginedan amalib nagah nagan suholan God ameb gibusirinan hiqiyaqta. Ari teq karuw ginedan na in nagah hel diqta Heven-ib giqusaqta na giwastitaygo ago zaway haiqta. Tamaz araq karuw ginedan uriyamdaqta naqmo amomo in nagah nagan tigiwastitaydaqta. ²⁴ Nazaq iyan Krais lotu abitan og kab gibenabmo emiya nab in le a hi gwahtimta. Bit

gibenab emiya na in bit diq Heven-ib turaqta na adulanmo. Nazaq iyan Krais in bit diq Heven-ib turaqta nabmo le gwah-timta. Gwahtiqim muran in i gilumsihad God anognib tituraq.

²⁵ Teq og kab tamaz mat danmebta na in ulig bunno ned tamaz emgota wazim bit adugan Tawon Diqta nab le gwahtiqqa. Teq in ned wazaqta na inmo ahol anedan a haiqta. Ari Yesus nazaq ame kabemmo tamaz a hi amta. ²⁶ Na ezaqgo in ame kabemmo ahol tamaz gan emnan haqad teq og mutur gwahtimta nab iyim bo muranmo in tuteqmo sanctity sor nagta. Teq haiq. Muran kam abebtanta kab Krais ulalabmo tugwahtim. Gwahtiqim in on mataw gigo daq meqinta tigiwalem bugnan haqad in ame amulikmoqmo inmo ahol tamaz gan God tuqug. Ugim in tamaz araq a ta ugdaqta na haiq tiqiy. ²⁷ Na ezaqgo God in mataw bunmo giyon bilaqan in gime amulikmoqmo moqeq teq hazizirib tur daqayta. ²⁸ Ad nazaqmo Krais ame amulikmoqmo ahol tamaz gan emim in mataw kabemmo gigo daq meqinta inmo ahol ugim sorim tumomta. Abeb teq in ame gigerta gwahtiqdaqta nab in daq meqinta walemgo a hi boldaq. Haiqgam. In on mataw in amen emad osayta naqmo giwaq-nan haqad in bo a ta gwahtiqdaqta.

10

Tamaz kwaziqta na in daq meqinta a hi walemyaqta

¹ Ari God ago maror Moses bilamta na aduganib nagah dimdimunta abeb teq gwahtiqdaqta na gidulanmo ussa i ahol waquauqta. Nagah nagan ginon diq maror nab a hi usaqta. Nazaq iyan ulig bunno mataw tamaz emaya na in tamaz amulik naqmo emsa tamaz na in mataw God agerab loqayta na giwastitayin in God ameb a hi dimniy hasayta. ² Ari tamaz na in mataw gigemid dimun diq tiqiy hasid teq in ulig ta araq nab tamaz na a ta hi em nagiy. Na ezaqgo tamaz na in mataw lotu-ib bolayta na giwastitayid in gigemab gigo daq meqinta na a ta hi loyin nagiy. ³ Teq haiq. In ulig bunmo tamaz emsa daq na in mataw ginad enqenunsa in gigo daq meqinta usaqta na ginadin a ta emaya. ⁴ Na ezaqgo bulmakau matmatta ginedan teq memeq matmatta ginedan in mataw gigo daq meqinta giwalemgo azawayin haiqta. ⁵ Nazaq iyan Krais in og kab tubolnan haqad in amam kazaq bulon, Karuw wol emim ninmen tamaz emaya

na teq naw amo amo nigayta na ginan ni ninad a hi bilaqqaq ham. Na ago iyan ni yaqmen mat diq asan tuwastitayim eman usaq ham. ⁶ Daq

meqinta atamazin teq karuw anon bunmo faqab eman oyworaqta na ni ginan ninad a hi dimniyা ham.

⁷ Teq ya bilay, Yaqmo kawa osaiq hay ham. Kwaziqmo ning marib ya ibin mar toniyta nazaqmo ya ni ninad tumuzinnan haqad ya kawa tubol hay ham. *Buk Song 40:6-8*

⁸ Gamuk naway nab in danmeh bilam, Karuw wol emim ninmen tamaz emayta na teq naw amo amo ni nigaya na ginan ni ninad a hi bilaqaq ham. Ad in bilam, Daq meqinta atamazin teq karuw anon bunmo faqab eman oyworaqta na ni ginan ninad a hi dimniyা ham. Ta teq mataw in God ago maror Moses bilamta naqmo ago gunun muzinim in tamaz amo amo nagan emayta. ⁹ Ad teq gamuk nab in bilam, Yaqmo kawa osaiq ham. Ya ni ninad tumuzinnan haqad kawa tubol ham. In nazaq haqad in tamaz kwaziqta na baymuzad abanab in tamaz muturta na eman tuqasaq. ¹⁰ Daq na God-mo anad nazaq usan in gwahtimta. Nazaq iyan Jesus ame amulikmo inmo ahol tamaz nog God ugan daq naqmo amalib i gihol tidimniyim i God ago on mataw tawonta tiqiyim osauqta.

Krais tamaz amta naqmo in daq meqinta walemaqta

¹¹ Mataw tamaz emayta na bunmo in gigo banab turad kam bunmo in tamaz akabiyen emayta. In tamaz akabiyen emad in tamaz adan amulik naqmo tutimmo emayta. Ta teq tamaz na in gigo daq meqinta a hikidik walemaqta. ¹² Ari Krais in daq meqinta tigiwalemnan haqad in ame amulikmoqmo tamaz am. Eman tamaz na in kuluwa-kuluwmo usaqta. Krais nazaq tigemim teq in God aben aqabun ban tuqos wom. ¹³ Os woqim osad God in ago bab bunmo qigemid asen ahaqenib iy bug daqayta na akaman in baq tunim osaqta. ¹⁴ Na ezaqgo tamaz amulik naqmo in on mataw God in gitowun emim aholyon giwaqan osayta na qigeman in tidimniy hasayta. Dimniy hasim in God ago on mataw tawon diqta iyim osad in nazaqmo tuqos tut daqayta.

¹⁵ Teq God ago marib Bugaw Dimunta in nagah nagan anan i gibilenaqmo. Gamuk na bilam,

¹⁶ Yaqgo maror muturta abeb teq ya mataw negdaiqta na in kazaq ham. Yaqgo maror na agamukan bunmo ya in gigemab tigemdaq ham. Ad ya gamuk na in ginadib tumar tondaiqmo ham. Yaqmo Iyahta ya nazaqmo bilaqaiq ham. *Jeremaya 31:33*

¹⁷ Haqad in gamuk na tibilaqim teq in bilam,

Ya in gigo daq meqinta teq in yaqgo gunun othasayta na walemad anadin a ta hi emdaiq ham. *Jeremaya 31:34*

¹⁸ Yesus daq meqinta tigiwalem bugan God in daq meqinta nagan anadin a ta hi emaqta. Nazaq iyan daq meqinta walemgo atamazin araq a ta emanta na haiq tiqiy.

I God anan helmo haqad agerab diq loquq

¹⁹ Nazaq iyan, ya imaqbaban, Yesus anedan i giwastitayan i a hi rabad God ago bit adugan Tawon Digtta nabmo i le tugwahtiqam. ²⁰ Yesus anedan na in i gimen dan muturta tutimmo usaqta eman tugwahtim. Dan na le tubusan ayatha God ago bitab otheran usaqta na agileun ban le gwahtimta. Teq tubusan na inmo anon. ²¹ Yesus in i gigo tamaz mat danmepta awaz meqinta iyim osad in God ago on mataw bunmo giwamuzaqta.

²² Yesus inmo ahol anedan i gigemab hures lamad in i gunun itiyonim ginad meqniytaqta na suholan tihiqiy bug. In yuw dimunta amalib i gihuz igan i gisan abusiran nan haiq tiqiy. Nazaq iyan i ginad helta usaqta na ago i zaway diq iyad i gigem God ameb titonimmo ussa i God agerab loquq.

²³ God i gidimun tonnan haqad hel diqmo bilamta nazaqmo in tigemdaq. Nazaq iyan in teq i gidimun tondaqta na abin i bilaqad i ginad hi buliyuq. Ad i ginadnad emad hi hureq hasuq. ²⁴ I an anadin emad an abe yahad i on mataw ginan ginad bilaqsa kabi y dimuntaqmo emuq. ²⁵ Teq mataw asor gituw hiqiyisa in Jesus ago on mataw nenaq humab a ta hi wolayta nazaq i hi emuq. Haiggam. Ne ginad emiy. Krais ago kam na bolim sinsin tiqiy. Nazaq iyan ne tuteqmo humab woleq an bulonad an zaway ugad osiy.

I God atatin gileh hi uguq

²⁶ Ari luweq i Krais ago gamuk helta na huritad ginad tigem haseq teq abeb i ginadibmo daq meqinta a ta emad luwam. I nazaq tonsa teq tamaz araq i gigo daq meqinta a ta walemdaqta na haiqgam.

²⁷ Naqmo i rabad God ago hazir ayatha na amen emad i in ago faq meqinta ago bab ginoy emdaqta naqmo i baq tuneq tuqosam. ²⁸ Kwaziqmo mat araq God ago maror Moses bilamta na itiyonsa mataw giger o ezeqman nazaq in ahol waqeinq in leheq nagah in gimeb ahol waqiyta na tibilaq yaqay. Bilaqsa mataw huriteq in mat na anan ginad a hi meqniyisa in wol emid tumoqyaq. ²⁹ Ari muran mat helmo tihiqim teq in anad buliyim a God atatin gileh ta ugaqta na ne mat naqanta anan ginad ezaq emay? Mat na afaqan ayah diqmo a hi waqdaqmo e? God atatin anedan God ago maror zaway ugaqta na in mat naqanta

eman in God ago mat tawon diqta iyim osta. Ta teq in anad buliyim God gileh ugad in ned na eman in bilaqne ned samanta nog iyaq. Ad God agem dimunta ugad ago Bugaw Dimunta ugan in Bugaw na tibilawunaqmo.³⁰ God ago marib gamuk araq kazaq bilam, Daq meqinta aqenin waqgo na yaqgo kabiy ham. Yaqmo teq mataw daq meqinta emiyya na amenin tinegdaiq ham. *Lo 32.35*

Teq gamuk araq kazaq ta bilam, Iyahta in ago on mataw hazizirib tigilum kemdaq ham. *Lo 32.36*

An gamuk nawa na anamren ago i tuhurit kemta. ³¹ Helmo, God Kayeqmo Osaqta na in ni faq nignan haqad niwazid teq ni rab naqmo diq hiqiydaqta.

I ginad helta usaqta na awaz meqniyeq usan

³² Ne mebmembmo Yesus abin huritim anan helmo haqyta na ne anadin ta emiy. Kam nab God in ne ginad eman hastitayan ne ginad anuwan inaq tiqiyta. Sa mataw ne geg ayahmo negsa ne afaqan kabemmo sorad gituw a hi hiqiy yaqayta. ³³ In ulalab on mataw bunmo gimeb ne mebay negad gibilawunad afaqan neg yaqayta. Ad kam asor in nazaqmo ne giyogniz afaqan negsa ne in gilumsihad in gigo afaqan na ne sor yaqyatamo. ³⁴ Ad ne gigo mataw asor giqrquran ossa ne in ginan ginad meqniysa le gibiy yaqayta. Sa kam asor mataw in ne gigo nagah haresmo ginadibmo giwaqsa ne ginad dimniysa a hi giwasih yaqayta. Ne ginad em yaqay, I gigo nagah dimun diqta tuteqmo usdaqta na in a hi waq daqay haq yaqayta.

³⁵ Nazaq iyan ne ginad Krais anan helmo haqayta na ne hulosid hi woqan. Ne ginad helta ago amenin ayahmo waqnanta usaq. ³⁶ Ne giwazmo meqniyeq God amen emad gituw hi hiqiyani. Ne nazaq God anad muzinad oseq teq naw in negnan hel diqmo bilamta na ne tuwaq daqay. ³⁷ God in ago gamukib kazaq tibilam,

Sisaq haiq mat boldaqta na in tuboldaq ham. In agudan a hi emdaq ham.

³⁸ Sa yaqgo on mataw titnonta na in helmo haqad oseq teq in dimunmo kayeqmo tuqos daqay ham. Ari in helmo haqad oseq gihol hureqid teq ya in ginan inad a hi dimniydaq ham. *Habakuk 2.3-4*

³⁹ Teq i ne nenaq i mataw gihol hureqim meqniyayta na nog a haiqta. I helmo haqad kayeqmo dimunmo osamta aqon matawun tiqiyim osauqta.

I God anan helmo diq haqad giwaz meqniyeq turam

11

I helmo haqauqta na ago adan alulin

¹ Ari i helmo haqauqta na ago adan kazaq. I nagah bunmo God ignan bilamta na amen emim osad i ginad emauq. Helmo diq God tiqigdaq haqauq. Haqad i nagah na i gimeqnagnib ahol a hi waqad i ginad emauq. Nagah na hel diqmo tuqusaqta haqauq. ² Mataw aseseqta kwaziqmo osiyya na in nazaq God anan helmo haqsa God in ginan anad dimniyyaqa.

³ Teq i helmo haqad ginad kazaq emauq, God gamukmo bilaqan kait og inaq gwah-timta haqauq. In nagah i gimeb ulilemin usaqta na amilib nagah bunmo i ahol waqauqta na giqamta haqauq.

Abel, Enok teq Nowa in God anan helmo haqyta

⁴ Teq Abel in God ayon tamaz emad anan helmo diq hamta. Haqad in ago tamaz in abab Kein ago tamaz uriyamim dimun diq iyi. Nazaq iyan God in Abel ago tamaz anan anad dimniysa in Abel anad helta na ahol waqad anan mat titnonta ham. Abel tumomta teq in God anan helmo hamta awagamun na in i suleq dimunta gibilen tutaq.

⁵ Teq Enok helmo haqad osim a hi moqsamo God in waqim ad Heven-ib tug-walah. God in Enok anon awitan inaqmo waqim a gwalehan mataw og kabta in nagunim teq ahol a ta hi waqia. Na ezaqgo God ago marib i gamuk kazaq ahol waqauqta. Gamuk na bilam, God in Enok waqim ad a hi gwalehadmo in Enok anan anad tidimniy ham. ⁶ Na ezaqgo mat God anan helmo a hi haqsa God in anan anad a hikidik dimniydaqta.

Haiqgam. Mat God agerab loqnan anad usaqta na in kazaq anad emdaq. God helmo diq osaqta haqdaq. Ossa mataw giholtuw bulad God nagunad luwsa teq God in gimeb ahol ulal tonad gidimun tonaqta haqdaq. Mat anad nazaq emaqta naqmo in God agerabmo diq loqaqta.

⁷ Teq Nowa in God anan helmo haqan God in nagah abeb teq gwahtiqaqta na ago Nowa anadib emad tuluron. Bulunan in nagah nazaqta ahol a hi wamtta teq in God ago gamuk na huritim anan helmo haqadmo in muy araq tiqam. Emim muy nab in ago aw amun nenaq le gwahtiqaq in dimunmo osad ahi mogiyta. Nowa ago daq naqmo amilib in on mataw God gileh ugiyta na gigo daq meqinta eman ulal iyan in timeqniy has bugiy. Sa Nowa-mo abin God ameb titnonimmo usta. Na ezaqgo in God anan helmo haqan God in anan mat titnonta ham.

Abraham God anan helmo haqan God in awe Sara inaq gidimun ton

⁸ Teq God in Abraham og araq ugid ingo tydaq haqad in lilewunim og nab lehgo tubulon. Bulongan Abraham God aqez na anan helmo haqad in eraqim tilah. Lehadmo in edob diq lehyaqta na ago in a hi hurityaq. ⁹ In helmo haqad lehim God kwaziqmo og ugnan hel diqmo bulonta nabmo in gwahtiqim in mat begbegta nog iyim og nab saw haresmo tiluw osyaq. Osad in bit karuwsanibta emim ossa in atatin Aisak teq Aisak atatin Jekob inaq in bit naqantab og nab tuqos yaqaymo. Teq God in Abraham og ugnan haqad hel diqmo bulonta agamukan na in Aisak ayow Jekob inaq gimen ustamo. ¹⁰ Abraham og nab luwad in uliq ta araq teq gwahtiqdaqta na amen emyaq, uliq na gwahtiqid in nab abe emeq tuteqmo tuqosdaq haqad. Na ezaqgo God-mo in uliq na wazid eraqdaqta teq uliq na ezaq diq iyeq usdaqta na God-mo anadib usaqta.

¹¹ Teq Abraham God anan helmo haqsa in awe amun uggo azawayin aholib tubol.* In awe Sara aw nignigta. Teq in awe amun ugdaqta akaman tekomo tuhulosta. Teq in anad emyaq, God amun yagnan hel diqmo bilamta nazaqmo in tiqemdaq haqyaq. ¹² Nazaq iyan mat adinowan iyim aholib amun emgo azawayin tihiqiyta na alulib mataw en araq tugwahtiqi. Mataw na kabemmo diq gwahtiqiyta, bilaqne kaitab ulig turayta na teq kamis adekib ibur giqusayta nazaq nog in gwahtiqiy. Gwah-tiqan teq mat araq diq in ginulingo ahun haiqgam.

¹³ Mataw nawa i giwagamun huritim bolta na bunmo in God anan helmo haqad osim tumocqiya. Teq in kayeqmo osad in og God negnan hel diqmo gibilanta na a hi waqiyta. Haiqgam. In pesanmo turad nagah abeb teq gwahtiqdaqta na aholmo waqad in ginad tidimniy yaqayta. Ginad dimniysa osad in bilaq yaqay, I bilaqne on mataw uliq araqabta bolim og kab begbeg os nog iyaq haq yaqayta. ¹⁴ On mataw gamuk asen naqanta bilaqsa i huratid ginad emauq. Mataw na giholyon og araq tinagunay haqauqta. ¹⁵ Ari mataw na in gigo og in hulosim boliyta na anadin em tutad teq in muleqeet ta leh nagiyta. ¹⁶ Teq in gigo og na in anadin a ta hi em yaqay. Haiqgam. In og araq dimun digta Heven-ib usaqta naqmo waqnan ginad bilaqyaq. Nazaq iyan in God anan i gigo God haqsa God amebay a hi woqyaq. Na ezaqgo in mataw na gimen uliq araq tuwastitayan usta na ago iyan.

* **11:11:** Mataw asor in Grik nan-ib gamuk ka ahol waqad ginad emay, Sara-mo God anan helmo haqad amun emgo azawayin wamta haqay.

¹⁷⁻¹⁸ Ari God in Abraham bulonim bilam, Ni nitatin Aisak-mo ago onminta naqmo gi-nan Abraham asenlulibta haq daqay ham. *Jenesis 21:12*

Haqan Abraham in God aqez na anan helmo tiham. Nazaq iyan abeb God in Abraham ulum waqad atatin wol emgo bulongan Abraham in Aisak tamaz nog God ug-nan ton. God in Aisak-mo ago hib Abraham dimun tonnan hel diqmo bulonsa Abraham tuhuritta. Teq in atatin amulikmo osta na tamaz nog God uggo tiqiyim os. ¹⁹ Na ezaqgo in anad am, Aisak moqid teq God wazid ta eraqdaq ham. An in nazaq nogmo tiqiy. Aisak moqgo banab usim ta eraqan teq in amam ta wam.

Aisak, Jekob teq Josep in God anan helmo haqiyta

²⁰ Teq Aisak in God anan helmo haqad in atatinz Jekob ayow Iso inaq gibar tonad in giger gigo hib nagah abeb teq gwahtiqdaqta na ago tigibilan.

²¹ Teq Jekob in God anan helmo haqad osim tumoqnan tonadmo in atatin Josep atatinz giger na gibar ton. Gibar tonim hulosad teq in ago katek wazim ulum ugim in kuh tonim God abin tiqiluw.

²² Teq Josep in God anan helmo haqad osim tumoqnan tonadmo bilam, Abeb teq Isrel in Isip huloseq tileh daqay ham. Haqad in leh daqayta nab teq in ahol aditin waqeq ad lehgo in tibilammo.

Moses in God anan helmo hamta

²³ Teq Moses anen agemab hitiqan anen amam in gigo amun na ahol waqan in dimun diq iyyaqta. Nazaq iyan in king ago gunun itiyonnan a hi rabad in God-mo anan helmo haqad in gigo amun na kalam ezeqman nazaq ulileman us.

²⁴ Teq Moses ayah tiqiyim in God anan helmo haqad osad in anad tiqam, Ya inan bilaq daqay, King Fero amiy ago amun Isip-ubta haq daqay na ya hulosaiq ham. ²⁵ Na ezaqgo in daq meqinta ago adan muzinad kam asitmo anad dimniysa osnan atuwu hiqiyayaqta. In God asenlul nenaq afaqan sornan anad bilaqyaqta. ²⁶ Krais in ago on mataw gimen mebay sornan anad bil-amta nazaqmo Moses in mebay na sornan anad bilammo. Ad in anad emyaq, Yaqgo on mataw gimen mebay sordaiqta na in Isip gigo os dimunta anaghan nag bunmo giquriyamta haqyaq. Na ezaqgo in naw dimunta God teq ugdaqta naqmo in anadin tuteqmo emad luwyaqta.

²⁷ Teq Moses God anan helmo haqad osad in eraqim Isip hulosim tilah. Lehsa

Isip gigo king na ahol waqad agem time-qniyyaq. Ta teq Moses in king na anan a hi rab. In ame le God i ahol a hi waqauqta na ahol waq nog iyad in zaway diq iyeq osyaq.

²⁸ Teq Moses God anan helmo haqad in ago on mataw gibilenan in Pasova adidaqan wazim teq in ned waqim in gigo dan ezab tiqemiy. In nazaq tonid teq angelo boleq Isip gitatniz aqenta ginol emad in Isrel gigo onmin gihulosid dimunmo os daqay haqad.

Isrel on mataw kabemmo in helmo diq haqiyya

²⁹ Teq Isrel on mataw Isip hulosim lehiyya na in God anan helmo haqad Kamis Kakaqta urotsa kamis hureq hasan in og amayqanta bay nog iyim lehiyya. Lehsa Isip mataw na in Isrel gimuzim lehad in nazaqmo kamis urotam haqad lehsamo kamis na muleqim gineqanmo tumoqiy.

³⁰ Teq Isrel on mataw na in God anan helmo haqad in uliq Jeriko ago gel lilut ugad kam 7 nazaq in luwanmo gel na tuwom.

³¹ Teq danatab aw Rahab in God anan helmo haqsa Isrel mataw giger in ago uliqab saw wirinim bolan in agem dimunta negad gilumsihta. Nazaq iyan in ago uliqab on mataw God aqez othasiyya na moq bugsa in nenaq a hi momta.

³² Teq ya naga gamukinmo a ta bilaq tutdaiq? Ya Gideon teq Barak teq Samson teq Jepta teq Devit teq Samuel teq God ago nantut nagan giwagamun bilaqgo akaman huiq. ³³ Mataw na in God anan helmo diq haqad in bab emim king kabemmo gidauhan nenaq gibayan woq yaqayta. Teq in gigo walmataw giwamuzad in daq tit-nonta amalib gigo daq ulum kemeq amenin neg yaqayta. Teq God nagah negnan hel diqmo gibilanta na in tuwaq yaqayta. Teq in layion gitenmos ituq yaqayta. ³⁴ In God anan helmo haqad faq ayahta oysa in wolmiy yaqayta. Teq in baqir aban emsa baqir a hi gilum emyaqta. In gihol moqsa in zaway waqim gihol ta dimniy yaqayta. Teq in bab emgo giwaz meqin diq iy yaqayta. Ad in uliq en ta asor gigo mataw bab emayta na gimuzid leh yaqayta. ³⁵ Teq on asor God anan helmo haqsa in gigo onmin tumoqiyta na hodhodab eraqid in nenaq ta os yaqayta.

Ta teq mataw God anan helmo haqiyya na asor bab in ginol titayan moq yaqayta. Moqsa mataw ta asor gilumsihnan tonsa in hulos yaqayta. In ginad em yaqay, Abey i hodhodab eraqeq kayeqmo dimun diqmo tuqosamta haq yaqayta. ³⁶ Sa mataw dimdimunta na asor bab in afaqan negad gibilawunad teq in gusib giwistayad teq in sen-ibmo giqirqrurid os yaqayta. ³⁷ Teq

in mataw na asor gimalib gig hunegad teq in asor ay gugur amalib giqurot tay yaqayta. Teq in baqir amalib ginol emsa moq yaqayta. Sa mataw dimdimunta na asor in sipsip teq memeq gisan tubusan nog weleq luw yaqayta. In gihol ago nagah bunmo ago siqim iysa mataw in afaqan negad teq in giholib daq meqin diqta em yaqayta. ³⁸ Nazaq iyan in haresmo lehad og amatawun haiqtab teq garahab teq gig akuduqnib teq og akuduqnib in ulilemeq os yaqayta. In mataw dimdimun diqta. In og kab mataw meqinta nenaq a hi os nagiyta in os yaqayta.

³⁹ On mataw na bunmo in God anan helmo haqad in gihol abin dimun diqta God ameb usyaqta. Ta teq in og kab osad in nagah dimunta God negnan haqad hel diqmo gibilanta na a hi waqiyta. ⁴⁰ Na ezaq God in i bunmo gimen dante araq dimun diqta teq gwahtiqaqta na in ahol waqan usta. In anad am, Mataw kwaziqmo ya inan helmo haqad osiyta nagan in dante na hidmo ahol a hi waq daqay ham. In on mataw abeb teq gwahtiqaq ya inan helmo haq daqay na gibaq tunsa in bunmo araqibmo dimniy has daqay haqad in anad usta.

12

I Yesus ahol waqad anan helmo haqqa

¹ God ago on mataw dauh biyahta nawa ya ginan bilayta na in i gililut igim turad in i God anan helmo haqamta na adanteqin giqisihunayta. Nazaq iyan i nagah afaqanta giholib usaqta na bunmo teq giholib daq meqinta i ginad hureqqaqta na i hulos buguq. Ad i gituw hi hiqysiya God i gimen dan emim bilam, Bo kazaq sibiy hamta naqmo i muzeq sibug. ² I Yesus anan gime diq tih neman. Inmo i ginad helmota na alulin teq inmo i ginad helta na tuwol netdaqta. Yesus abeb teq os dimunta waqeq anad dimniy osdaqta na anadin emad in zaway diq iyim afaqan sorad tursa le in ayib otheranomo tumom. In ay nab moqdaqta ago mebay na anadin eman in nagah diq a hi iytta. An muran in God ago ban tawonta na aqabun ban tuqos woqim osaqla.

God i giwastitaynan haqad afaqan igaqta

³ Ne ginad em hasiy. Kwaziqmo mataw meqinta in Yesus bab diq ug yaqayta. Ta teq in awaz meqniyim turad ahol a hi hureq hasyaq. Na ne anadin emad ne gihol hisuisqsa gituw hi hiqiyani. ⁴ Helmo ne og ka ago daq meqinta bayid woqgo haqad inaq bab emayta teq bab na amuganib ne ginedan asor a hi woqqaqta. ⁵ Teq God in ne gigem zaway ugnan bilamta na anan ne

gidek tizizal e? In ne ginan yaqgo onminmo diq haqad in kazaq ne gibilan,

Yaggo amun ham, Iyahta suleq nigsa luweq ni suleq na anan nagah samanta haqdaq ham. Ad luweq in ni ni-wastitaynan haqad ninolsa ni nituw hiqiydaq ham.

⁶ Ne nazaq hi emiy ham. Iyahta in on mataw ginan anad diq bilaqaqta naqmo suleq negaqta ham. Teq in on mataw giwaqim ginan yaqgo onmin haqaqta na bunmo in gusib giwistitayaqtamo ham. *Gutpela Sindaun 3.11-12*

⁷ Nazaq iyan ne zaway diq iyeq tursa God ne giwastitaytan. Amun amam in ago amun ayon emaqta nazaq nog in ne giyon emaq. Og kab mat araq in ago amun a hi wastitaydaqta haiqgam. ⁸ Ad nazaqmo God in ago onmin bunmo giwastitayaqtamo. Ari in ne a hi giwastitayid teq ne in ago onmin diq a hi iy daqayta. Haiqgam. Ne bilaqne onmin danatabata nog iy daqayta. ⁹ Ne ginad emiy. I gimaman og kabta na in i giwastitaysa i giwazinauqta. Nazaq iyan i Gimam i giwitan giwamuzaqta na in i giwastitaysa i in aqez huritad ahaqenib a hi osam e? Na haiqgam. I in aqez hurit kemeq ahaqenib iyeq kayeqmo osamta. ¹⁰ I gimaman og kabta na in ginadibmo kam asitmoqmo i giwastitayafta. Ari God-mo i gidimun tonnan haqad giwastitayaqta. In anad emaq, Ya tawon diqta iyim osaigta nazaq nog yaqgo onmin os daqaymo haqad in i giwastitayaqta. ¹¹ I Gimam Iyahta na in i giwastitaysa i ginad a hi dimniysa gigem afaqanno loyinauqta. Teq abeb in i giwastitayta na anon emsa i giholib daq titnota gwahtiqa i gigem kiskismo tuquaqta.

I geditin itiwuneq zaway iyeq turuq

¹² Nazaq iyan ne gibin husisiqim wo yuk tonad usaqta na waz ta eraqan. Ad ne gibakbakan harara nemaqta na itiwund awaz ta meqniyan. ¹³ Ne giholyon dan wastitayid titnonan. Ne nazaq emeq teq ne dan na muzinad gisen kok tonim usaqta na a hi meqniy hasdaq. Haiqgam. Ne dan titnota na muzadom ne gisen kok tonim usaqta na tidimniydaq.

¹⁴ Ne zaway diq iyeq mataw bunmo ne-naq zib alowabmo osiy. Ad negmo gihol God ugad ne God ago daq tawonta naqmo ne muziniy. Mat aholib God ago daq tawonta a hi usaqta na in abeb Iyahta ahol a hi waqdaq. ¹⁵ Teq ne an wamuz naqmo diq hiqiyi. Luweq ne gimaqbab araq woqeq God agem dimunta ugaqta na in hulosdaq. Ad ne an wamuzad ne gigo araq in bilaqne ay aninin agon inaqtta nazaq nog hi iyan. Luweq ay na gwaleq anon emsa

ne bunmo God ameb gihol anumlan inaq iy daqay. ¹⁶ Teq ne gilikmanib mat araq God gileh ugim inmo anad meqinta muzaqta na in ne nenaq hi osan. Mat nazaqta araq in Iso daq amta nazaqmo in emad in God ago nagah dimdimunta anan nagah a hajq haqsa ne mat na hidmo wastitayi. Iso in Aisak atatin agenta iyim in amamgo nagah kabemmo waqdaqta abin dimunta usta. Teq in abin dimunta na amikqan ugad amenin in didaq deg amulikmo waqim hamta. ¹⁷ Wagam na ne tuhuritiyta. Abeb in amam ago hib nagah dimunta na waqnan bulonsa amam gileh tuqug. Gileh ugan Iso gaqad ame kabemmo bulonyaqta teq in anad buliyyadaqta akaman hajq tiqy.

I uliq Jerusalem Heven-ib usaqta nab tugwahtiw

¹⁸ Ari og ka ago saw araq ne God ago nagah ahol waqad waz daqayta nab ne le a hi gwahtiqiyya. Ne ginad emiy. Kwaziqmo Isrel on mataw garah araq asenab gwahatiqim turad in gime anonab daq kabemmo gwahtiqa ahol waqiyta. Garah nab faq ayatha oysa romriq dub diq tigan saw arab inaq iysa tim awaz meqinta sibyaq. ¹⁹ Sa taur gayonsa in mat araq gamuk bilaqsa hurititya. Isrel on mataw bunmo gamuk na huritad in rabad teq in Moses kazaq buloni. Ni God bulonid in i gimen gamuk araq ta hi bilaqan haqiy. ²⁰ Na ezaqko tekо God in gamuk atoranta kazaq gibilan, Mat araq o karuw araq in asen garah ka asitmo mirirewinidmo ne gig hu-neqeg wol emid moqan ham. *Kisim Bek 19.12-13*

Haqsa Isrel mataw gamuk na huritim in gigo zaway tihiqiy bugyaq. ²¹ Helmo, daq asesecta nagan gwahtiqa mataw bunmo rab titay yaqay. Sa Moses inaqmo nagah nagan ahol waqad bilam, Ya rab ilum netsa ihol harara nemsia osaig ham. *Lo 9.19*

²² Ari negmo teq ne le garah nab a hi gwahtiqiy. Haiqgam. Ne garah ta araq anan Sayon haqaytab tugwahtiqiyya. Teq ne God Kayeqmo Osaqta na ago uliq Jerusalem Heven-ib usaqta nab ne tugwahtiqiymo. Uliq nab angelo kuluw diqmo humab wolim ginad dimniysa osayta. ²³ Teq ne God ago onmim Gimamgo nagah kabemmo tuwaqim in atatin agenta nog iyim osayta na gigo humabub ne tugwahtiqiymo. On mataw na gibin Heven-ib mar tonan usaqta. Teq ne God on mataw bunmo gilum kemdaqta na agerab tugwahtiqiymo. Sa ne on mataw titnota God gilumsihan giwitan tidimniy hasim osayta na gigerab tugwahtiqiymo. ²⁴ Teq ne Yesus-mo ago hib tugwahtiqiymo. In i gimen God ago maror muturta a bolta.

Ad ne Yesus anedan in ne gimalib hures lamta na ago hib tugwahtiqiymo. Ned na in Abel anedan uriyamim in i gimen gamuk dimun diqta bilaqaqta.

I gihol wamuz naqmo hiqiyuq

²⁵ Ne gihol waziy. Luweq ne gidek hiqiyad God aqez othas daqay. Kwaziqmo God aqez og kab gwahtiqim in on mataw gidek wazim gamuk atoran diqmo gibilensa in huriitya. Ta teq mataw na God aqez na gileh ugiyta. Gileh ugan God faq negsa in tuk daqayta asawan nagun yo hiqiy yaqayta. Ari muran God aqez Hevenibmo hitiqad i gidek wazaqta. Gidek wazsa i in aqez na othaseq i edob tukeq leham? Na hikidik. ²⁶ Kwaziqmo Isrel on mataw garah na asenab tursa God aqez iyanmo og ahol wolta. Ari muran in ago gamuk hel diqta araq tuqus tutqaq. Gamuk na bilam, Abeb ya og emid in ame amulikmoqmo ahol a ta woldaq ham. Teq ya og amomo emid ahol a hi woldaq ham. Og kait inaqmo ya giqemid in gihol tuwol daqay ham. *Hagay 2.6*

²⁷ Ari in bilam, Og ame amulikmoqmo ahol a ta woldaq hamta. Nazaq iyan i ginad emauq. God in og kait inaq giqemid gihol wolsa nagah bunmo gihol woldaqta na hiqiy bugsa nagah ahol wol haiqta naqmo amomo in tuqus tutdaq haqaq.

²⁸ Nazaq iyan i God ago maror ahol wol haiqta na aduganib gwahtiqim osad i ginad dimniya God esey uguq. Ad i in anad muzinad daq in anan anad bilaqaqta naqmo amalib i in ayon lotu emuq. Lotu emad i in anan rabad abin wazinad osuq. ²⁹ Na ezaqgo i gigo God in bilaqne faq ayahta eraqim nagah meqmeqinta bunmo oy bugaqta nazaq nogta.

13

I gimaqbaban ginan ginad diq bilaqan

¹ Ari ne bunmo maqbab nog an anan ginad bilaqsa osiy. ² Sa mataw uliq araqabta ne gigo bitab bolsa ne gilowan tonad nenaq osiy. Na ezaqgo daq na amuganib mataw asor in angelo-mo giwaqim giqad bitab a lehim nenaq osiyta. In angelo bolitya nazaq in ginad a hi emiy. In ginad emiy, Ka matmo bol haqiy.

³ Teq ne gimaqbaban giqirquran osayta na ginadin emad gigo afaqan soriy. Bilaqne mataw ne inaqmo giqirquran osayta nazaq nog. Ad mataw gibaymuzan afaqan sorayta na ne ginadin emiymo. Bilaqne in afaqan sorsa ne in nenaq araqibmo afaqan sorayta nazaq nog.

⁴ Mat aw inaq an waqayta na in daq dimunta. Teq mat awe inaq an tuwaqeq in God ameb ginumlan haiqmo dimunimo osiy. Ne ginad emiy, Abeb teq God in on

mataw an haresmo hureqim inaq usiyta na teq in an alulib hureqim inaq usiyta na bunmo gigo daq meqinta na amenin meqin diqta tinegdaq.

⁵ Ne mani anan ginad hi bilaqan. Sa nagah ne inaqta naqmo ne wazad ne mat araq ago nagah ta asor hi utetiy. God inmo tibilam,

Ya ne giholib hiqiysa ne samanmo a hi os daqay ham. Haiqmo diq ham. *Lo 31.6*

⁶ Nazaq iyan i gigem zaway ugad kazaq bilaqam,

Iyahta ya ilumsihsa ya a hi rabdaiq haqam. In ya iwamuzsa mat araq a hi imeqin tondaq haqam. *Bułk Song 118.6*

I Yesus muzeq inaq lehad gimebay hi wozan

⁷ Ne gigo mataw danmepta God ago gamuk gibileniya na ne ginadin emiy. In og kab kabiyy daq dimdimunta emad ossa in gigo kabiyy na anon kabemmo emsa in amenin dimunta waqiyta. Na ne anadin emad ne in gisen muzad in God anan helmo haqiyta nazaqmo ne helmo haqiymo.

⁸ Yesus Krais ago daq a hi bulyaqta. In irimo osta nazaqmo in muran osaq. Teq in nazaqmo kuluwa-kuluwmo tuqos tutdaqmo. ⁹ Nazaq iyan suleq amo amo ahuritan araq diqta na in ne ginad hureqsa ne God ago dan ahi hulosiy. God agem dimunta igaqta naqmo in i giqemid i zaway iyeq turamta. Ari didaq agununin amo amo mataw asor bilaqayta na in i gigem zaway ahi ugdaq. Mataw gunun na muzinsa gunun na a hi gilumsihsa in luwayta.

¹⁰ I gigo tamaz em abanan ta araq tuqaqta. Teq mataw God ago bitab tamaz akabiyen kwaziqta emaya na in i gigo ban nab karuw waqeq neqgo giben haiqta.

¹¹ Tamaz akabiyen kwaziqta na amuganib tamaz mat danmepta in karuw anedan waqim ad le bit adugan Tawon Diqta nab gwahtiqim in daq meqinta atamazin emaqta. Emim teq in karuw na ginon uliq asan ban faqmeb hunegan oyaqta.

¹² Nazaq iyan Yesus inmo anedan amalib on mataw giqemid in God ago tawonta iy daqay haqad in nazaqmo uliq asan ban santitiy sormo. ¹³ Daq naqmo ago i uliq asan ban Yesus agerab leheq in nan meqinta waqad mebay sorta nazaqmo i mebay soruqmo. ¹⁴ Na ezaqgo og kab i gigo uliq araq tuteqmo usdaqta na haiqgam. I uliq abeb teq gwahtiqaqta naqmo anan saw waqauqta. ¹⁵ Nazaq iyan Yesus i gimen dante tuwastitayan i tuteqmo God abin iluwauqta na tamaz nog God uguq. Mataw God anan i gigo God haqayta naqmo giqezab gamuk nazaqta gwahtiqaqta. ¹⁶ Ad ne on mataw gigo hib

daq dimunta emiymo. Teq ne gigo asor nagah ago siqim iysa ne negmo gigo nagah na amalib gilumsihiy. God in tamaz naqan diqtaqmo anan anad bilaqaqta.

God i gigemid i dimunmo osamta

¹⁷ Ne gigo mataw danmehta na ne giwamuzad osayta. Abeb teq God in susumun negsa in kabi y bunmo emiya na ago agamukan God tubulon daqay. Nazaq iyan ne in giqež huritad gihaqenibmo osiy.

Ne nazaq emsa teq in ginad dimniysa gigo kabi y ananon digmo emad in gigem afaqan a hi iydaq. Ari ne gigemid gigem afaqan iysa teq in ne gimen kabi y anonommo a hi emad a hi gilumsih daqay.

¹⁸ Teq ne i gimen God bulonad susumun ugsa in i gilumsihan. Na ezaqgo i gihol loyinad i God ameb gigem dimunmo ussa kam bunmo i titnoneqmo luwnan ginad bilaqaqta. ¹⁹ Teq yaqmo inad awaz meqinta amalib kazaq ne gibileiqmo. Ne yaqmen God bulonsa in hidmo iqemid ya ne gigo hib muleqeç ta lehiq haqaiq.

²⁰ God in Sipsip Anamren awaz meqin diqta na hodhodab wazan ta eramta. In anad i gigo Iyahta Yesus eraqeq inmo anedan amalib God ago maror muturta na zaway ugsa maror na tuteqmo usdaq haqad in wazan eramta.

Ari i gigem kiskismo usdaqta na alulin God-mo. ²¹ In ne gilumsihsa teq ne daq dimunta bunmo emgo tiqiyad ne in anadmo diq tumuzin bug daqay. Ad in Yesus Krais kabi y amta na amalib i bunmo giduganib daq in anan anad bilaqaqta na emid tugwahtiqaq. Nazaq iyan i tuteqmo kuluwa-kuluwmo Yesus abin iluwuq. Hel diqtaqmo.

Gamuk abebtanta

²² Ya imaqbaban, ya inad awaz meqin amalib kazaq bilaqaq, Ne gidek emeq yaqgo gamuk ka huritad gituw hi hiqiyan haqaiq. Na ezaqgo ya ne gigem zaway uggo haqad sansandek kab gamuk siqimmo mar tonta. ²³ I gimaqbab Timoti irquran osan in hasiyya na ago ne tuhuritiy. Ari in yaqgo hib hidmo gwahtiqid teq ya inaq i leheq ne tigibiyam.

²⁴ Ari i gigo zeq dimun ka ne waqeq ne gigo mataw marorta na teq God ago on mataw tawonta na bunmo negiy. Sa Yesus ago on mataw Italiy-ib osim boliyta na in gigo zeq dimun ne gimen eman nawa leh negaqmo.

²⁵ Ari God agem dimunta ne bunmo negsa ne osiy. Nawaqmo.

Jems Gamuk ameb lehaqta

Sansandek ka mat araq anan Jems haqay na mar tonta. Mataw kabemmo ginad emay, Yesus amikqan Jems naqmo gamuk ka mar tonta haqay. Mat na Yesus ago dauh uliq Jerusalem-ub osiyta na gigo maror iyim osta (Aposel 15.13; 21.18). Sa Juda on mataw Yesus anan helmo haqiyta na kabemmo le uliq saw haresmo ossa Jems in ginad helta ulumsihid awaz meqniydaq haqad gimen gamuk ka mar tonta.

On mataw na Yesus anan helmo haqiyta teq in gidan sasil iysa afaqan kabemmo in gigo hib usyaq. Daq meqinta gilum waqsa in ginad meqinta haresmo em yaqay. Teq mataw ginaghan kabemmota na in mataw gina haiqta gibayan woqsa in igmo ag haq yaqay. Sa in an mugad an agem meqinta ug yaqay. Mataw na Yesus anan helmo haqiyta teq in ginad helta na akabiyan asit a hi em yaqayta.

Nazaq iysa iyan Jems gamuk kabemmo atoran diqmo gibilan. In anad dimdimunta gibilenad in mat anad em haseq ahol anononmo wamuzdaqta na ago in bilam. Ad in bilam, Mat Yesus anan helmo haqqaqta na samanmo a hi osdaq ham. Haiqgam ham. Mat na amaqbaban gilowan a hi toneq in samanta Yesus anan helmo haqdaqta ham. Mat dimunta God ago gamuk huritim adan emaqta ham. Ad inmo ahol anadin a hi emad in amaqbaban bunmo gilumsihad in mataw asor gigomo a hi lehaqta ham. Teq in bilam, Yesus ago on mataw in gitenmos wamuzad in mataw gigilehun an ahi bilaq daqay ham. Haiqmo diq ham. Mataw Yesus anan helmo diq haqayta na in gihol amileq amalib God abin iluwad teq in giyogniz gamuk dimdimunta in gilumsihdaqta naqmo neg daqayta ham.

Daq meqinta gilum waqsa i giwaz meqniyeq turad teq i God inaq dimunmo osam

Jems sansandek ka mar tonta

¹ Yaqmo Jems. Ya God teq Iyahta Yesus Krais inaq gigo kabibiy matta. Ne gem Isrel on mataw gidauhan 12 nazaq og saw haresmo le osayta na gimen sansandek ka ya mar tonim eman leh negaq. Zeq dimun ne bunmo.

² Ya imaqbaban, afaqan amo amo ne giholib gwahtiqa ne ginadmo dimniyan. ³ Na ezaqgo afaqan nawa ne giholib gwahtiqaqta nagan in ne ginad helmo haqayta na ulum waqaqta. Ulum waqsa ne ginad na hel diqta iyid teq ne tuteqmo giwaz

meqniyeq turad a hi woq daqay. ⁴ Ad ne tuteqmo giwaz meqniyeq turad teq ne gihol kazaq tiloyin daqay. Ne ginad gihol bunmo tiziliman ne tidimniy hasim nagah araq ago siqim a hi iyayta nazaq ne gihol tiloyin daqay.

*Mat anad dimunta ago siqim iyeq teq in
God bulonan*

⁵ Ari ne gilikmanib mat araq anad dimunta ago siqim iyeq teq in God bulonid God anad dimunta ayahmo tuqugdaq. On mataw ginad dimunta waqnan God bulonsa in a hi ginadaqta. Haiqgam. In nagah na negnan anad diq bilaqaqta. ⁶ Teq mat na helmo diq haqad God susumun ugad in anad giger hi eman. Na ezaqgo mat anad haresmo emaqta na in bilaqne tim bolad kamis sorsa haresmo eraqaqta nazaq nog. ⁷ Mat nazaq anadnad emaqta na in ahol kat ugeq Iyahta teq nagah araq tiyagdaq haqad nazaq in anad hi eman. ⁸ Haiqgam. Mat nazaqta na anad giger usaqta. Ad daq bunmo in emaqta na in dante amulikmo a hi muzaqta.

*Mataw ginaghan inaqtta na giyogniz
mataw ginaghan haiqta na nenaq gimen
gamuk*

⁹ I gimaqbaban ginaghan haiqta na God ameb gibin inaq iyim osayta na ago in gihol abin iluwiy. ¹⁰ Teq mataw gigo nagah kabemmota na in gibin God ameb Yesus ago on mataw bunmo gibin nog usaqta na ago in gihol abin iluwymo. Na ezaqgo sisihun azizorin emim asitmo usim hiqiyaqta nazaq nog mat anaghan inaqtta tihiqiyaqta. ¹¹ Zeq gwalmi huramad afanfan diq iyad sisihun oysa in miliyawim mayaqla. Maysa sisihun na azizorin murwoqim ogib woqsa in awaqan dimunta na timeqniyqaqta. Ad nazaqmo mat ago nagah kabemmo inaqtta na in bilaqne sisihun azizorin mayim hiqiyaqta nazaq nogmo. In ago kabiyl kabemmo emad luwad in kiskismo hiqiyeq le tihiqiyl bugdaqmo.

*God i gidimun tonad in i giqemid i daq
meqintab woqgo a hi gilum waqaqta*

¹² Mat afaqan sorad awaz meqniyim turaqta na in tidimniyim osaq. Na ezaqgo afaqan na mat na ulum waqsa in sorad a hi woqid teq God in ago os dimunta kuluwakuluwmo osayta na naw nog tuqugdaq. Iyahta in on mataw inmo anan ginad bilaqaqta na bunmo naw na negnan haqad hel diqmo tibilamta. ¹³ Teq daq meqinta mat araq ulum waqsa mat na kazaq hi bilaqan. God-mo ya ilum waqaq haqad in nazaq hi bilaqan. Haiqgam. Daq meqinta God anad hureqgo ago zaway haiqta. Sa God daq meqinta amalib on mataw a hi

gilum waqaqtamo. ¹⁴ Mat aw amulik-mulikmo gigemab ginad meqinta usaqta naqmo gwahtiqaqad gilum waqaqtqa. Ginad meqinta na gilum waqad kat negad gi-hureqsa in adan emgo gigem eraqaqta. ¹⁵ Ad in gigem eraqaqta na tizilimim teq in daq meqinta eman tugwahtiqaqta, bilaqne aw agemab amun tizilimim teq asan ban gwahtiqaqta nazaq nog. Ad daq meqinta na le ayah tiqiy bugim in anamren ulum-ronan ban meqintab tuwolehaqta.

¹⁶ Ya imaqbabanmo diq, ne gihol hi kat ugiy. ¹⁷ Nagah dimdimunta on mataw samanmo naw nog waqayta nagan bunmo ulilib usim gehitiqaqta. Nagah anuwanta kaitab oyayta na ginamren naqmo in naw tawonta nagan giqeman i gimen bo hitiqaqta. Teq i Gimam Iyahta na ago daq a hi buliyaqta. Ad zeq nagah araq amalib worireqsa awitan sisaqmo iyim gwalehim a siqim ta iyaqta nazaq nog God a hi iyaqtamo. ¹⁸ Inmo anad usta na tuwol net bugnan haqad in ago gamuk helta na amalib i giqeman in asenlulib gwahtiwi. God anad in teq nagah bunmo in giqamta na giwastitayid dimniy daqayta atowun nog igmo danmeb dimniy haseq tuqosam haqad in i giwamta.

I God anan helmo diq haqad daq dimdimunta emad osam

I God ago gamuk huritad muzinuq

¹⁹ Ya imaqbabanmo diq, ne bunmo nagah ka ago hurit kemi. Kam bunmo ne gidek emeq gamuk huritgo haqad gihol wastayat osiy. Teq ne gamuk amenin hidmo hi bilaqad ne giqem hidmo hi meqniyanmo. ²⁰ Na ezaqgo mat agem meqniyaqta na in God ago daq titnonta a hi emaqta. ²¹ Nazaq iyan daq anumlan inaqta teq daq meqinta ne giholib kabemmo diq gwahtiqaqta na ne muzid leh bugan. Ad ne gihol wazid woqsa God ne gigemab gamuk dimunta layta na ne wamuzad alowan toniy. Na ezaqgo God ago gamuk dimunta na ago azawayin inaqta. In ne gilumsiheq giqemid ne dimunmo tuqos daqayta.

²² Teq ne God ago gamuk na huritad muziniy. Luweq ne gamuk na samanta huritad akabiyan asit a hi emad teq ne gihol tikat ug daqay. ²³ Mat God ago gamuk huritad teq in adan a hi emaqta na in bilaqne mat galas-ib ahol adulan ahol waqaqta nazaq nog. ²⁴ Mat na ahol anobun galas-ib ahol waqim teq in ahol buliyim lehad hidmo in anobun ezaqta na ago in adek zizalaqta. ²⁵ Ari mat God ago maror dimun diqta na agamukan anononmo ahol waqad muzinad atuw a hi hiqiyaqta, mat na tidimniyim osaqla. Na ezaqgo God ago maror na in mataw giqeman samanmo luw osayta. Mat nazaqta in gamuk na

huritim adek a hi zizalaqta. In mat kabiyya iyim gamuk na akabiyan emad atuw a hi hiqiyaqta.

²⁶ Ari luweq mat araq ahol buloneq bi-laqdaq, Ya God anadin diq emad ayon lotu emaiqta haqdaq. Haqad teq in anonon atenmos a hi wamuzdaqta. Mat nazaqta na inmo ahol agem tikat ugad in samanta God anadin emad ayon lotu emdaqta na adanteqin diq kazaq. Onmin ginennaman tumoqan in amanmaninta osayta na teq on waburta giholbin iyim afaqan sorayta nagan ni le gibiyad tigilumsihdaq. Ad ni ningi luw osanon diqmo wamuzad og ka ago daq anumlan inaqta na ni aban diq tiqemdaqmo. Lotu adan nazaqta na i Gimam God ameb dimunta anumlan haiqmo usaqta.

2

I on mataw bunmo gimen daq araqibmo em neguq

¹ Ari ya imaqbaban, i gigo Iyahta Yesus Krais abin ayahmo diqta. Nazaq iyan ne in amomo anan helmo haqad og kab ne on mataw bunmo gimen daq araqibmo em negiy. ² Luweq mat araq tubusan dimunta teq ring gol-ibta asor aholib emeq teq in ne gigo lotu abitnib nab le tugwahtiqaq. Sa mat ta araq anaghan haiqta ago tubusan anumlan inaqta aholib emeq in le ne gigo humab nab tugwahtiqaqmo. ³ Id teq ne mat ago tubusan dimunta ahol si-hanta naqmo alowan tonad ne kazaq bulon daqay, Kadroy ni ban dimun diqta kab os woqeq os haq daqay. Ad mat anaghan haiqta na ne kazaq bulon daqay, Ni kobmo le tur haq daqay. O ne bilaq daqay, Kab ya isen agerabmo os woqeq os haq daqay. ⁴ Ne nazaq emad ne ginad meqinta na amalib negmo gihol huserim ne gigo asor ginan meqin haqad asor ne ginan dimun haqayta.

⁵ Ya imaqbaban dimun diqta, ne huritiy. On mataw og kab matawti gimeb ginaghan haiqmo osayta naqmo God in gitowun emim ginad helta ayahmo diq negaqla. Ad in mataw naqmo aholyon giwaqan in teq ago maror aduganib tugwahti daqayta. Na ezaqgo in hel diqmo kazaq bilam, Mataw ya inan ginad bilaqqaqta naqmo ya giwaqid in boleq yaqgo maror aduganib ginad dimniya tuqos daqay ham. ⁶ Ta teq ne mat anaghan haiqta na mebay ugayta. Ne huritiy. Mataw ginaghan kabemmo inaqta naqmo in ne gibayan woqsa in afaqan kabemmo negayta. Mataw naqmo ne giwaqim giqad hazizirib lehayta. ⁷ Ad mataw naqmo Krais abin dimunta ne giholib usaqta na bilawunayta. Nazaq a hiaq

e? ⁸Teq i gigo King diqta na ago maror God ago marib usaqta na bilam,
Ni nihol anan ninad bilaqaqta nazagmo ni niyow anan ninad bilaqan ham.
Wok Pris 19.18

Nazaq iyan ne maror na tuwol net bugeq teq ne tidimniy daqay.

⁹ Ari ne mataw asormo gilowan tonad asor ne gileh negad ne daq meqinta tiqemay. Samo i gigo King ago maror na in ne ginan bilaqan ne daq meqinta emayta amatawun tiqiyim osay. ¹⁰ Na ezaqgo mat araq God ago maror aduganib gunun bunmo muzinad teq in gunun na gilikmanib gamuk amulikmoqmo itiyoneq mat na bilaqne gunun bunmo itiyonta nog tiqiydaq. ¹¹ Na in kazaq. God bilam,

Ni an alulib hureeqeq inaq hi us ham. *Lo 5.18*

Ad in kazaq bilammo,

Ni mat hi wol em ham. *Lo 5.17*

Ari ni mat araq ago aw inaq a hi luwad teq ni mat wol emid moqid nawaqmo ni gunun itiyonaqta amatin tiqiyim ni timeqniy. ¹² Ari ne God ago gunun an anan ginad bilaqgota na ahaqenib iyim muzinad ne gunun ta araq diq ahaqenip a hi osayta. Sa abeb God in ago gunun dimunta naqmo amalib ne gilum kemeq in ne gigo daq amenin tinegdaq. Nazaq iyan ne gihol anononmo wamuzad ne gigo gamuk teq ne gigo daq bunmo gunun an anan ginad bilaqgota na inaq rireneqmo usan. ¹³ Na ezaqgo mat mataw ginan anad meqniysiya gilowan a hi tonaqta na God in mat na hazizirib ulum kemad anan anad asit a hi meqniydaqmo. Ari mat mataw ginan anad meqniysiya gilowan tonaqta na in God ago hazizirib turnan a hi rabaqta.

Mat God anan helmo haqad teq in daq dimdimunta a hi emaqta na in anad helta na samanta usaq

¹⁴ Ya imaqbaban, mat bilaqaq, Ya Krais anan helmo haqaiqta haqad teq in daq dimunta a hi emaqta, mat na Krais anan samanta helmo haqaqta. Mat nazaqta ago anad helta na in mat na tuqulumsihdaq e? Na haiqmo diq. ¹⁵⁻¹⁶ Ne gimaqbab araq teq ne gihiy araq in gigo gholsihen dimunta haiqgam iyim teq in didaq neq daqayta haiqgam iysa ta ne gilikmanib mat araq in gibileneq bilaqdaq, Ne gigem dimniysa lehiy haqdaq. Tim hi ginolan haqdaq. Ne gigem ayah iyan haqdaq. Haqad teq in giholgo nagah nagan a hi negid mat na aqez ezaq teq gilumsihdaq? Na haiqgam. ¹⁷ Nazaq iyan i ginad helta na samanmo usad daq araq dimunta eman a hi gwah-tiqsamo i ginad na moqim a hi gilumsihqaqta.

¹⁸ Teq mat araq ya ibileneq bilaqdaq. Mat araq anad helta ulilemim usaqta haqdaq. Sa mat ta araq daq dimunta emaqta haqdaq. Mat nazaq bilaqdaqta na anad meqin. Ni daq dimunta araq a hi emsa ezaq teq ya ninad helta na ahol waqdaiq? Na haiqgam. Ari ya daq dimunta emaiqta naqmo amalib ya inad helta usaqta na timiqishundiaq. ¹⁹ God amulikmo osaqta na ni anan helmo haqaqta. Ni ninad na dimun. Teq bugaw meqinta nagan inaqmo God anan helmo haqaytamo. Ta teq in God ago hazizirib turgo in rab naqmo hiqiyata.

²⁰ Mat ni ninad siqim diq. Ya bilay, Mat God anan helmo haqad teq in daq dimunta a hi emaqta, mat na ago anad helta saman diqta usaq hay. Haqan ni yaqgo gamuk nawa na alulin huriit kemnan e? Ari ni hurit. ²¹ Kwaziqmo i gises Abraham in atatin Aisak tamaz emgo abanab emim teq in God ugnan tonta. In nazaq tonan God in ago daq in amta naqmo ahol waqim teq in Abraham anan bilam, Mat titnonta ham. ²² Ne ginad emiy. Abraham ago daq dimunta na in anad helta na inaq garabmo diq lehyaqta. Lehad in ago daq dimunta naqmo in anad helta eman tidimniy has. ²³ Abraham daq na emim in God ago marib gamuk araq usaqta na tuwol net bug. Gamuk na kazaq usaq.

Abraham God aqez anan helmo haqan God in anan mat titnonta ham. *Jenesis 15.6*

Nazaq iyan mataw in Abraham anan God ayowmo diq haqiy. ²⁴ Ari ne ginad emiy. God in mat anad helta naqmo amomo ahol waqim anan mat titnonta a hi haqaqta. Haiqgam. In mat ago anad helta na ahol waqad teq in ago daq dimunta na inaqmo ahol waq tonim in anan mat titnonta haqaqta.

²⁵ Ad nazaqmo Josuwa ago mataw asor in aw danatabta anan Rahab haqay na ago hib bolan in giwazinad gilowan tonim giqeman in mataw gime titonim dante ta araq waqim tilehiy. Nazaq iyan God in aw na ago daq dimunta na ahol waqim teq in anan aw titnonta ham. ²⁶ Ne ginad emiy. Mat awitan asan amuganib a hi usaqta na in tumomta. Ad nazaqmo mat God anan helmo haqad teq in anad helta na akabiyan araq a hi emaqta, mat na anad helta na tumomtamo.

3

I giteb gamuk gwahtiqaqta na ago i gihol waz naqmo hiqiyuq

¹⁻² Ya imaqbaban, ne gilikmanib mataw kabemmo diq God ago suleq anamreniz nog iyeq on mataw suleq hi negiy. Na ezaqgo i bunmo daq kabemmo em kireh tonauqta na ago iyan. Abeb God in mataw

bunmo gilum kemdaqta nab in i mataw ganim ago suleq on mataw gibentla na gilum kem naqmo hiqiyad kamolmol a hi igdaqta. Nazaq iyan mat tutimmo gamuk anononmo bilaqad in gamuk araq diq a hi bilaq kireh tonaqta, mat na tidimniy hasim ahol bunmo anononmo wamuzaqta.

³ Ne ginad emiy. I hos giteb ain asugin asor eman ussa i na wamuzsa in edob i ginad usaqta nab in lehayta. Nagah amik diqta giteb usaqta na i wazsa hos abensem teq ahol bunmo in anobun naqmo muzim lehaqta. ⁴ Teq ne muy anadin emiyomo. Muy asor in aseseq diqmo. Sa tim awaz meqinqinta eraqim bolim othassa in kamis amalib sibim lehayta. Sa muy anamren in muy ago stia amik diqta na wazsa in anad saw edob usaqta nabmo muy ayah diqta na lehaqta.

⁵ Ad nazaqmo i gimileq in i ginon bunmo ago anaghan araq amik diqtaqmo. Ta teq in yaqmo ag haqad kabiy aseseqta anan bilaqaqta. I ginad emuq. Faq amik diqta naqmo garanab eraqim in ay bunmo tuqoy bugaqta. ⁶ Teq i gimileq na bilaqne faq nogmota. I gihol anaghan bunmo gilikmanib inmo mat meqin diqta. In usad gamuk meqmeqinta teq daq meqmeqinta bunmo eman gwahtiqaqad in i ginon bunmo eman anumlan inaq iyaqta. Ad in bilaqne faq afanta nog iyim eraqad in i gigo luw os bunmo mideran oyaqta. Teq i gimileqib faq gwahtiqaqta na in saw faq oyad a hi miyaqta naqmo ago faqta.

⁷ Karuw kwasikta amo amo teq ah amo amo teq kwanib amo amo teq nagah kamisib luwayta amo amo nagan bunmo in marmar iyeq i matawmo gihagenib os daqayta. Helmo, mataw in karuw nagan bunmo giqeman marmar ticiyiyta. ⁸ Ta teq igmo gihol amileq emid marmar igyo i bunmo biyah a haiqta. I gimileq naqmo eraqim in gamuk araq meqinta bilaqdaqta na nagunad anamur a hi emaqta. In bilaqne nagah ahulinaqta ate afan ayahmo atemmosib usim bo gwahtiqaqta nazaq nog. ⁹ I gimileq na amalib i Gimam i gigo Iyahta iyim osaqua na abin iluwauqta. Ad i gimileq naqmo amalib i on mataw God giqeman inmo nog gwahtiqaq osayta na gimeqin tongo agamukan bilaquaqtamo. ¹⁰ Gamuk dimunta God abin iluwauqta na teq gamuk meqinta mataw gimeqin tonauqta na inaqmo gigermo i gitenmos amulikmo nabmo gwahtiqaqta. Ya imaqbaban, daq naway na a hi gwahtiqaq nagta gwahtiqaq. ¹¹ Ne ginad emiy. Yuw yayibta nab yuwaqta teq kamis inaq araqibmo gwahtiqaq e? ¹² Ya imaqbaban, ne ya ibileniy. Ay fik abenab oliv anagin gwah-tiqdaq e? Sa am wain ahulib fik anagin

gwahtiqaq e? Na nazaqmo kamis ahol buliyeq yuw dimunta a hi iydaqta.

Mat anad dimunta usaqta na in daq dimunta emaqta

¹³ Ari ne gilikmanib nog diq anad awaz meqin diq iysa in anad em hasaqa. Mat nog aholnan nazaq bilaqaqta na in ago luw os mataw gimeb dimniya in anad em hasad mataw guyon daq kiskista emsa in ahol waq kemi. ¹⁴ Ari ne kam bunmo an anan gigem meqniya gabin ayahta waqgo haqad an bakikiyan ugad teq ne gihol abin samanta hi iluwiy. Ne nazaq gimileq iyad ne God ago gamuk helta na adan a hi emayta. ¹⁵ Ginad meqinta nazaqta na uliq ulilib nab usim a hi gewoqaqta. Na in og ka agota teq in gigem kwaziqta ago nagahta teq in bugaw meqinta gigo ginad nogta. ¹⁶ Na ezaqgo mataw an anan gigem meqniya gabin ayahta waqgo haqad an bakikiyan ugsa in gigo os meqniya daq meqinta bunmo in gilikmanib gwahtiqaqta.

¹⁷ Ari ginad dimunta ulilib usim gewoqaqta na in anumlan haiqta. Teq in mataw nenaq kiskismo osaqua. Ginad dimunta na in mataw gilowan tonad teq in gigo nan huritaqta. In mataw ginan anad ayahmo meqniyaqta teq in anon dimunta kabemmo emaqta. Ginad dimunta na in mataw asor gigomo a hi lehad teq in aqez giger iyad amaqbaban a hi kat negaqa. ¹⁸ Ad mataw ginad dimunta nazaqmo usaqta na in gyogogniz nenaq kiskismo ossa an mug teq an wol hiqiyaqta. Teq mataw ginad dimunta na in gigo walmataw nenaq kiskismo osad in daq titnonta didaq amagin nog walmataw gigemab leysa in gwalim anon emsa daq titnonta kabemmo on mataw na giduganib gwahtiqaqta.

4

Mataw og ka ago nagah meqmeqinta anan ginad diq bilaqsa in God gihar ugayta

¹ Naga daqin diq ne gilikmanib usim an wol teq bab hares eman gwahtiqaqta? Ne gigem atoranmo eraqsa ginad meqinta haresmo gwahtiqaq ginad hureqsa ne an gihar ugayta naqmo in an wol na eman gwahtiqaqta. Ne daq nazaq a hi emayta ye? ² Ne nagah amo amo waqnan ginad bilaqsa teq ne a hi waqayta. Nazaq iyan ne gigem meqniya an gem ugayta. Ne nagah kabemmo utetad teq ne waqan yo hiqiyayta. Nazaq iyan ne an wolad bab ayahmo eman eraqqa. Ne God susumun a hi ugayta na ago ne nagah a hi waqayta. ³ Ad teq nagah asor ne anan susumunayta na ne a hi waqaytamo. Na ezaqgo ne ginad titnonim a hi ussamo ne nagah na ginan susumunayta. Ne nagah na waqeq muran

kam kabmo ne ginad dimniysa osgo ne susumunayta. ⁴ Aw aduw hulosim mat ta araq inaq luwaqta nazaq nog ne God gileh ugim og ka ago anad meqinta hares muzad osayta. Teq mat og ka ago anad meqinta inaq yow emaqta na in God gihar ugaqta. Na ago ne ginad a hi emay ye? Nazaq iyan mat og ka ago anad meqinta ayow iyim osaqtta na, in God ago bab iyim osaqtta.

⁵ Gamuk araq God ago marib kazaq bilam, God ago tim nawa in i gimuganib eman usaqta na in God amomo agota ham. Nazaq iyan i og ka ago anad meqinta inaq yow emsa God agem meqniyaqta ham. Ne ginad ezaq emay? God ago gamuk nawa bilamta na in gamuk samanta haqay ye? Haiqgam.

⁶ Teq God agem dimunta igaqta na in i gigem kwaziqta na uriyamim ayahmo diq gilumsihaqta. Nazaq iyan God ago marib gamuk araq kazaq bilam, God in mataw girerey emayta na geg negaqla ham. Ad in mataw gihol wazan woqsa osayta na agem dimunta negaqla ham. *Gutpela Sindaun 3.34*

⁷ Nazaq iyan ne God ago nan huritad ahaqenibmo osiy. Osad teq ne Satan othasid in ne gihulosad titukdaq. ⁸ Ne God agerabmo diq loqsa in ne gigerab tigel-daqmo. Ne mataw daq meqinta emayta na, ne gibem suholid ginumlan hiqiyen. Ad ne mataw ginad giger usaqta na, ne ginad meqinta na walemid dimunta naqmo amomo usan. ⁹ Ne God anad a hi muzinayta na ago ne qigutl tartaysa gaqad osiy. Ad ne yuquwayta na hulosad ne ginad bulyieq gaq waziy. Teq ne gigem dimniysa osayta na hulosad ne gigem afaqan iysa osiy. ¹⁰ Ne bunmo Iyahta ameb gihol wazid woqsa teq in ne giwazid tiqeraq daqay.

I gimaqbaban gigilehunan hi bilaquq

¹¹ Ya imaqbaban, ne an agilehunan hi bilaqy. Mat in amaqbab araq ago daq ulum kemim anan meqin haqad teq in agilehunan bilaqaqta, mat na in God ago maror gileh ugad in bilaqne maror na ulum kemim anan meqin haq nog iyaqtamo. Teq ni God ago maror ulum kemeq anan meqin haqeq ni maror na ahaqenib osad muzinaqta nog a ta hi iydaq. Haiqgam. Ni bilaqne maror na anamren mataw gigo daq ulum kemim amenin negaqla na nog tiqiydaq. ¹² Teq mat amulikmo maror iqaqta. Teq in amomo mataw gigo daq ulum kemim amenin negaqla. In amomo mat ulumsihid in dimunno tuqosdaqta teq in amomo mat meqin tonid in tihiqiydaqta. Ni nibin ezaqta iyan ni bilaqne maror anamren nog iyim ni niyow ago daq ulum kemim anan meqin haqqaqta?

I girerey hi emuq

¹³ Ari ne gigo asor bilaqay, Muran o babeq i taun-ib leheq ulig amulikmo nazaq i gigo es zayad mani kabemmo waqad oseq teq ta bolam haqayta. Ne yaqgo nan ka huritay. ¹⁴ Nagah babeq gwahtiqaqta na ago ne a hi huritayta. Teq ne og kab osayta na in bilaqne naga daqin diq nog? Ne bilaqne onqas gwalim asitmo usimmo tihiqiyqta nazaq nogta. ¹⁵ Ne kazaq bilaq nagiy. Iyahta anad bilaqid teq i dimunmo osad kabiyl kazaq kazaq emamta haq nagiy. ¹⁶ Ta teq ne igmo ag haqad gihol abin iluwayta. Daq nawa ne girerey emayta na in meqin diqta. ¹⁷ Nazaq iyan ni daq dimunta araq emnanta anadin emeq teq ni daq na a hi emeq na ni daq meqinta tiqam.

5

Mataw gigo nagah kabemmo inaqtta na in abeb naw meqinta tuwaq daqay

¹ Ari ne mataw gigo nagah kabemmta na, ne yaqgo gamuk ka huritay. Ne gigo daq meqinta na amenin nawa ne giholib tugwahtiqaqna tonsa na ne anadin emad ne atoranmo gaqad osiy. ² Ne gigo es nagah bunmo tililh bugim usaqta. Ad ne gigo tubusan bunmo bidbid tumuktitayi. ³ Ne gigo gol teq silva na God ameb samanta iyim usaqta. Hazizirib teq ne gigo nagah naqmo in ne gigo daq meqinta emid ulal iydaq. Ulal iysa ne gigo es nagah na bilaqne faq nog ne giholib oy soqoteq in ne gisan tuqoywordaq. Nagaqgo ne kam abebtanta kab ne giholyon es kabemmo tuwal emad osay? ⁴ Ahol waqiy. Kabibiy mataw ne gigo kabiyab wit urotan ne kat negad in gigo naw asor wasihim a hi negiy. Teq in gigo naw asor rin toniyta na in muran atoranmo lileyad aholib ulal emad usaq. Sa kabibiy mataw na inaqmo lileysa in giqez gwale Iyahta Zaway Bunno Wazaqta na adekib tuwoqqaq. ⁵ Ne ogib kab osad nagah dimdimunta bunmo waqad ne gihol bilaqsa tuqosayta. Osad ne didaq nagah dimdimunta neqad giyuninsa ne gisan huhuw nemsa ne gigem dimniysa osayta. Ta teq ne bilaqne bulmakau amidon anon ayahmota wol emeq neggo tiqiyim osaqtta nazaq nogmo ne osayta. ⁶ Ne hazizirib mataw titntona giyon bilaqad ginol emsa in moqayta. Ad ne ginadibmo mataw na gimeqin tonsa in tok nemim nan araq a hi bilaqayta.

I giwaz meqniyeq osad God inaq gamuk emad teq i Iyahta baq tuneq osuq

I gigem zaway iyeq afaqan sorad teq i Iyahta baq tuneq osuq

⁷ Ari ya imaqbaban, ne giholib afaqan gwahtiqa na sormo sorad Iyahta boldaqta na baq tuneq osiy. Osad ne kazaq ginad emiy. Kabiy anamren ago kabiyyab didaq tileyim teq in og ka ago didaq dimdimunta na baq tunim osaqtta. Mat na agem kiskismo diq ussa urom amepta na woqan teq urom abebtanta na inaqmo tuwoqan in didaq na titayaqta. ⁸ Ad nazaqmo ne afaqan sorad Iyahta amen emad ne gigem kiskismo usammo. Ussa ne gigem zaway ugad gituw hi hiqiyan. Na ezaqgo Iyahta ta boldaqta na ago kam sinsin tiqy.

⁹ Ya imaqbaban, ne yuwlozin ta hi bilaqiy. Ne daq na a hi huloseq teq abeb ne hazizirib turad nab ne gigo daq meqinta na amenin meqin diqta tuwaq daqay. Ne ahol waqiy. Mat ne gigo daq ulum kemdaqta na ahol tuwastitayim in bo tugwahtiqa haqad nawa dan ezab tituraq.

¹⁰ Ya imaqbaban, ne God ago nantut kwaziqmo Iyahta abinib gamuk bilaqiyta na ginadin ta emiy. In gigo bab gimeqin tonsa in gigem kiskismo ussa in afaqan na sorad gituw a hi hiqiy yaqayta. Nazaq iyan ne in gisen muzad nazaqmo emiy. ¹¹ Na ezaqgo i ginadib mataw afaqan sorad gituw a hi hiqiyta na in muran tidimiyyim osay haqaquq. Teq Job agem zaway ugim afaqan aseseqta sorim atuw a hi hiqiyta na awagamun ne tuhuritiy. Ad wagam nab Iyahta anad in Job wamuza le in ago afaqan thihiqiydaq haqad anad amta na ne ahol tuwaqymo. Job awagamun nab Iyahta i ginan anad diq meqniysa agem iqaqta na i ahol waq kemauqta.

*I gigo gamuk zaway ugnan helmo ulilib
hi bilaquq*

¹² Ari ya imaqbaban, daq danmeb diqta ne muzin daqayta na in kazaq. Ne gamuk araq atoranta bilaqnar haqad ne helmo ulilib hi bilaqiy. Ad ne Heven anan teq og ka anan teq nagah asor giwaz meqinta nagan ginan biyad helmo diq haqad nazaq ne hi bilaqiymo. Haiqgam. Ne bilaqeq, Eqe ya tiqemdaiq haqeq na ne nazaqmo emiy. Ad ne bilaqeq, Haiqgam ya a hi emdaiq haqeq na ne nazaqmo emiyomo. Luweq ne katiyad samanta helmo diq haqid God ne giyon bilaqid ne amenin meqinta tuwaq daqay.

Mat titnonimmo luwaqta na in God bulonsa in ago gamuk azawayin inaq iyaq

¹³ Ari ne gilikmanib gimaqbab araq ahol afaqan iyaq e? Mat na God bulonan. Teq ne gigo araq anad dimniysa osaq e? In bar wazad God abin soran. ¹⁴ Ad ne gilikmanib gimaqbab araq ago moq inaq iyeq in Yesus ago on mataw gigo danmepta nagan gililewunan. Gililewunid boleq in mat na amen God bulonad Iyahta abinib in mat na

afaqinib masil wazbalid woqan. ¹⁵ Mataw danmepta na helmo diq haqad God bulonid teq mat moqqaqta na a hi moqdaq. Iyahtaqmo mat na wazid tigeraqdaq. Ad mat na ago daq meqinta asor aholib usid teq Iyahta daq nagan tigiwalemdaqmo. ¹⁶ Nazaq iyan ne gigo daq meqinta gihol usaqta na ulum hasid gwahtiqa ne daq emiyya na ago an buloniy. Ad God ne gigo moq wastitayid gihol dimniygo haqad ne an ulumsihad God buloniymo. Mat titnonta God inaq gamuk emsa in ago gamuk na azawayin inaq iyad kabiyy atoranmo emaqta. ¹⁷ Mat anan Elaija haqayta na in i nogtamo osyaq. Teq in urom hi woqan haqad anad awaz meqin amalib God bulonan ulig ezeqmanmo teq awewepta na asormo urom asit a hi wom. ¹⁸ Ad teq abeb in a God ta bulonan kaitab urom tuwom. Woqan og diqda eman a ta gwalim lah.

*Mat araq dante titnonta hulosid i waqeq
ad dan dimunta nab a ta boluq*

¹⁹ Ya imaqbaban, ne giyow araq God ago gamuk helta na adan hulosad in dante ta araq muzeq lehsa ne gigo araq le waqeq ad muleqed dante helta nab a ta bolan. ²⁰ Teq mat nazaq ayow haresmo luwsa in hureqim dan titnontab a ta bolaqta na in gamuk ka hurit keman. In nazaq ayow daq meqinta emaqta na ulumsihad in ayow na awitan a hi moqdaq. God in ayow na ago daq meqinta kabemmo usaqta na giwalemad anadin a ta hi emdaq. Nawaqmo.

1 Pita

o

Sansandek amebta Pita mar tonta

Gamuk ameb lehaqta

Pita sansandek ka mar tonim Yesus ago on mataw uliq saw haresmo le osiyta na gimen eman lahta. On mataw na gigo uliq diqtan afaqan gwahtiqan in tukim le uliq haresmo tuqos yaqay. Ossa Pita uliq Romub osad in gimen gamuk ka mar tonta. Teq in uliq na anan diq biyنان atuw hiqysa in gamuk awowun hulim anan Babilon hamta (1 Pita 5.13).

Yesus ago on mataw na le begbeg iyim osad afaqan aseseqta sorsa Pita in gigem zaway negnan haqad gimen sansandek ka mar tonta. In bilam, Ne Yesus Krais awagamun dimunta na anadin ta emiy ham. Ne Yesus anan helmo haqayta na in nagah ayah diqta iyan ne waz naqmo hiqiyiy ham. Ad ne afaqan sorad ginad nad hi emiy ham. Daq na in ne ginad helta ulum waqsa awaz timeqniy hasdaq haqad in ne giholib gwahtiqaqta ham. Yesus daq araq meqinta a hi amta teq in sanctity ayahmo sorta ham. Sorim in moqim ta eraqim bilam, Teq ya ta boldaiq haqad in bilam ham. Ne in ago gamuk awaz meqinta na anadin emad in boldaqta na ago ne baq tuneq osiy ham. Osad ne God ago saw anuwanib ossa on mataw God ago maror asan ban osayta na in ne gibiyad gigo daq dimdimunta nagan ahol waq kemyi ham. Sa ne gihol bunnou God abenab emid in ne giwamuzad ossa le ne in ago hib tugwahtiq daqay ham.

I Yesus ago on mataw tawonta iyim iyan i daq dimuntaqmo emad nagah dimunta i waqamta na baq tuneq osuq

1-2 Yaqmo Pita, ya Yesus Krais ago Apostel araq. Ne Yesus ago on mataw saw Pontus teq saw Galesiya teq saw Kapadosiya teq saw Esiya teq saw Bitiniya gigo og saw haresmo begbeg nog iyim osayta na gimen sansandek ka ya mar tonim eman ne gigo hib lehaq. Kwaziqmo diq ne a hi gwahtiqsamo i Gimam God in ne gigo tuhuritim in aholyon ne gitowun tiqamta. Gitowun enim abeb in ne giwaqim ago Bugaw Dimunta negan ne in ago on mataw tawonta tiqiyi. God in Yesus anedan ne giholib hures laman ne gibisirinan tihiqiyen ne Yesus Krais ago gamuk huritad muzinayata.

God agem dimunta negad ne gigem eman kute nemaqta na in ne gigo hib ayahmo diq gwahtiqan.

Os dimunta Heven-ib i gibaq tunim us-aqta

³ Ari i God abin iluwuq. In i gigo Iyatha Yesus Krais ago God teq in Yesus Amamtamo. In i ginan anad ayahmo meqniysa i gimen dante wastitaynan haqad in Yesus Krais hodhodab wazan eram. Eraqan dante naqmo amalib God i gigeman i gimugan muturta iyim i teq in ago os dimunta na tuwaqam haqad amen emim osauqta. ⁴In ago os dimunta igdaqta na a hi meqniydaqta teq in anumlan haiqta teq in ahiciqy haiqta. Teq God nagah na ne gimen tuwastitayim Heven-ib eman usaqta. ⁵Ne God anan helmo haqsa iyan in ago zaway ayahtha amalib ne giwamuzaqta. In ne giwamuzad ossa le kam abebtanta nab in atatin Heven-ib ulalabmo boleq in ne ta giwaqid ne ban dimuntab tuqos daqay.

⁶ Ari God in ago os dimunta negdaqta na ago ne anadin emad ne ginad bilaq gigayinsa osayta. Ta teq muran kam asitmo kab God-mo bilaqan gilumwaq amo amo ne giholib gwahtiqsa ne gihol afaqan diq iyaq. ⁷Daq nawa na amalib God ne gigem ulum kemaqta. Ne ginad emiy. Gig anan gol haqayta na anawun ulilibta teq in usim hiqiyaqta. Teq mataw in gol faqab wizsa anumlan muruwoqim woqsa gol watwat dimun diqta naqmo us tutaqta. Ari ne ginad helta na in gol uriyamim in nagah ayah diqta. Ad nazaqmo gilum waq amo amo ne giholib gwahtiqad in ne ginad helta na ulum kemaqta. Ulum kemsia ne ginad helta na hel diqmo usid teq kam abebtanta Yesus Krais ulal iydaqta nab God in ne gibin sorid gwalsia in ne giwazinad gibin ayahta tinegdaq. ⁸Ne Yesus ahol a hi waqadmo anan ginad bilaqaqta. Ne muran gimeb ahol a hi waqayta teq ne in anan helmo tihaqad ne ginad bilaq gigayinsa gigem dimun diq iyaqta. Ad ne gimugan dimun diq iyaqta na ago ne bilaq buggo biyab a hi iyayta. ⁹Yesus ulal iydaqta nab ne ginad helta na anon emsa ne os dimunta na tuwaq daqay.

¹⁰ Kwaziqmo God ago nantut in God teq ne gilumsiheq ta giwaqdaqta na ago in bilaq yaqayta. Ad in God teq agem dimunta ne negad gidimun tondaqta na ago susumunad in gamuk na alulin nagun diq titay yaqayta. ¹¹Krais ago Bugaw in God ago nantut na giholib usad in Krais afaqan amo amo soreq teq abin ayahta waqdaqta na ago agamukan in nantut na giqezab eman gwahtiqyaq. Sa nantut na in giqezab gamuk gwahtiqyaqta na alulin nagunad in susumun yaqay, Nagah na kam

gineh teq gwahtiqaq? haq yaqay. Teq mat afaqan soreq abin ayahta waqdaqta na nog diq? haq yaqay. ¹² Haqsa God in nantut na giqisihunan in ginad tiqemiy, Nagah i anan bilawta na i gimen a hi gwahtiqaqta haqiy. In ginad emiy, Mataw abeb gwahtiqaqta naqmo gimen gamukta i bilawta haqiy. An muran God in ago Bugaw Dimunta eman Heven-ib titihim. Hitiqan mataw in God ne giyon dante wastitayta na awagamun dimunta a lehim Bugaw Dimunta ago zaway amalib ne tigibileni. Gamuk dimunta gibileniya na in nagah ayah diqta iyan angelo inaqmo huritgo ginad bilaqaqta.

I God ago on mataw tawon diqta iyeq osgo haqad in i glilewun

¹³ Ari nazaq iyan tuteqmo ne daq dimunta emgo haqad ginad emad osiy. Osad ne gihol anonomo wamuziy. Abeb Yesus Krais ulalab boldaqta nab teq God agem dimunta negad tigidimun tondaq. Nazaq iyan ne nagah dimunta na amen emad ne ginadnad hi emad ginad helta amulikmo iyeq usan. ¹⁴ Ne onmin nan hurityata nazaq nog ne osiy. Kwaziqmo ne ginad a hi emad osad ne gigem atoranmo eraqsa ne daq meqinta amo amo em yaqayta nazaq ne ta hi emiy. ¹⁵ Mat ne glilewunta na in tawon diqta osaqta. Nazaq iyan ne gihol bunmo God ugad ne gigo luw os bunmo in tawon diq iyanmo. ¹⁶ Na ezaqgo God ago marib in kazaq bilam, Ya tawon diq iyim osaigta nazaq nogmo ne tawon iyeq osiy ham. *Wok Pris 11.44-45; 19.2; 20.7*

God naw ayah diqmo amalib i gizayim giwam

¹⁷ Ne God anan biyim bilaqay, 'I Gi-mam' haqayta naqmo in on mataw bunmo araqibmo gilum kemad gigo daq ahunibmo amenin negaqa. Negad in mataw asor gigomo a hi lehaqta. Nazaq iyan ne og ka anan i gigo diq hi haqad ne God abin wazinad ahaqenib osiy. ¹⁸ Osad ne nagah ka anadin emiy. Ne gimaman gigo hib daq asor samanta alulin haiqta ne waqim muzinsa daq nagan in ne giqirquran osiyta. Ossa God ne gizayim in ne giqamun na tihas. Ta teq in gol teq silva amalib ne a hi gizayta. Na ezaqgo nagah nagan useq hiqiydaqta. ¹⁹ Nazaq iyan in Krais anedan tawon diqta naqmo amalib ne gizayim gigamun na hasta. Bilaqne mataw sipsip amidon aholib abatlan teq asulan araqa haiqta na anedan amalib God ayon tamaz emayta nazaq nog in am. ²⁰ God kwaziqmo og eman a hi gwahtiqa in Krais atowun eman ne gizayeq giwaqgo in osta. Osan teq muran kam abebtanta kab God in eman

in ne gilumsihgo haqad ulalabmo bo tug-wahtim. ²¹ Gwahtiqaq in ne tigilumsihan ne ginad emay, Helmo diq, God in Krais hodhodab wazan eraqan in abin ayahta tuqug haqay. Haqad ne God anan helmo haqad in teq ne gidimun tondaq haqad ne baq tunim tuqosay.

I gimaqbaban ginan ginad bilaqan

²² Ari ne God ago gamuk helta muzinad ne gigemab gibusirinan usta na tihiqiysa ne osayta. Ad ne gimaliq a hi iyad ne gimaqbaban Yesus ago on matawta na ginan ginad bilaqaqta. Nazaq iyan muran ne gigemabmo diq an anan ginad bilaqsa osiy. ²³ God-mo ne giqeman ne mutur a ta gwahtiqaqta. Teq ne ginan gimam giqeman ne osim teq moqayta nazaq nog in ne a hi giqamata. In ne giqeman ne mutur iyim osad tuteqmo kuluwa-kuluwmo tuqos daqayta. Na ezaqgo God in ago gamuk awaz meqinta tuteqmo usdaqta naqmo amalib ne giqeman ne muturta gwahtiqaqta. ²⁴ God ago gamuk bilam, On mataw bunmo bilaqne sisihun nog ham. Teq in gibilem bilaqne sisihun azizorin nog ham. Sisihun na miliyawaqta ham. Teq azizorin na muruwoqim tiqaqta ham. ²⁵ Ari Iyahta ago gamukmo teq kuluwa-kuluwmo usdaqta ham. *Aisaya 40.6-8*

An Iyahta ago gamuk na in Yesus awagamun dimunta mataw a lehim ne gibileniya naqmo.

2

Yesus in tituq dimunta tutimmo turaqta nazaq nog

¹ Ari ne on mataw muturta tiqiyim iyan ne daq meqinta kagan bunmo hulusiy. An agem meqinta ugayta na teq an kat ugayta na teq gimaliq iyayta na teq gigem meqniyaqta na teq an agilehunun bilaqayta nagan ne hulos bugiy. ²⁻³ Iyahta ne gidimun tonsa ne gihol tiloyiniyta. Nazaq iyan ne amun sosilta nog iyeq God ago sus dimun diqta giwitan neqim aseseq iyayta na ne tuteqmo neqnan ginad bilaqan. Ne sus na neqsa ne giwitan zilimeq tihemid teq God ne tigiwaqdaq.

⁴ Iyahta Yesus in bilaqne tituq araq kayeqmo turaqta nazaq nog. On mataw tituq na anan meqin haqad baymuzyta. Teq God anadib tituq na in dimunmo diq iyan in aholyon wamta. Nazaq iyan ne Iyahta Yesus ago hib boliy. ⁵ Boleq ne bilaqne tituq kayeqmo turayta nog iysa God in ne gimalib inmo aholyon lotu abitan tiqemdaq. Nazaq in emid teq ne in ago on mataw tamaz emayta tawon diqta iyeq osad ne Yesus Krais abinib ne gihol

tamaz nog God ugsa in ne gibiyad anad bilaqdaqta. ⁶ Na ezaqgo daq na agamukan God ago marib kazaq usaqta.

Ahol waqiy ham. Ya uliq Sayon-ib tituq araq tileyan turaq ham. Tituq na ya ahol waqan in bit anon bunmo sordaqta iyan ya inadib in dimun diq iysa ya iholyon wayta ham. An on mataw tituq na anan helmo haqayta na bunmo in ya imeb turad gimebay a hi woqdaq ham. *Aisaya 28.16*

⁷ Nazaq iyan ne mataw helmo haqayta na ginadib Krais in dimun diqta. Teq mataw helmo a hi haqayta na ginadib Krais in bilaqne,

Tituq araq mataw bit wazayta anan ‘meqin’ haqad hunegan lahta nazaq nogta. Ta teq muran tituq naqmo awaz meqniyim bit anon bunmo sorim turaqta. *Buk Song 118.22*

⁸ Teq mataw ginad helta haiqta na gigo hib Krais in bilaqne,

Gig araq danib usad mataw gisen woltagan woqnan tonayta nazaq nog. Mataw in gig nab gisen woltagim in dan titnonta na muzeq ta lehgo hulosayta. *Aisaya 8.14*

Mataw naqanta in God ago gamuk othasad in gisen gig nab wolhamim woqayta. Kwaziqmo God in guyon tibilaqan usta nazaqmo in emaya.

⁹ Ari negmo teq God in ne gitowun eman ne in ago walmat tiqiyim osayta. Ad ne King ago mataw tamaz emaya nog iyim osaytamo. Osad ne God ago on mataw tawon diqta iyim ahaqenib osad ne in amomo anad muzinaya. Mebmebmo ne romiqab ossa God ne gililewunan ne romriq na hulusim bolim in ago saw anuwan dimun diqta nab tugwahtiqiya. In kabiy aseseqta dimdimun diqta emaqta na agamukan ne on mataw bunmo gibilen daqay haqad in ne gitowun emim aholyon giwamta.

¹⁰ Kwaziqmo ne God ago on mataw a haiqta.

Teq muran ne in ago on mataw tiqiyi. Kwaziqmo God ne ginan anad a hi meqniyyaqtta.

Teq muran in ne ginan anad timeqniyaq.

I on mataw God ago maror asan ban osayta na gimeb titnoneqmo luw osuq

*I God ago kabibiy on mataw nog iyeq
osuq*

¹¹ Ari ya iyognizmo diq, ya atoranmo kazaq ne gibilenaiq. Ne on mataw gisen tob bolta nog iyeq og kab begbegta os nog iyiy. Ad ne og ka ago ginad meqinta na bunmo gileh ugiy. Ginad meqinta na in ne ginad helta inaq an wolaqta. ¹² Ne titnoneqmo on

mataw God ago maror asan ban osayta na gimeb luwiy. Luwsa mataw na in ne gigo daq ahol waqad in ne gigilehunan bilaqad ginan meqin haqad oseq teq abeb in ginad tiqem has daqay. God in on mataw hazizirib gigemnan boldaqta nab teq mataw asan banta na in ne gigo daq dimdimunta in ahol waqiyta na anadin a ta emad in God abin tiqiluw daqay.

¹³ Ari ne Iyahta anadin emad gavman bunmo giquez huritity. Rom gigo king in dambem diqta iyim iyan ne in aqez muziniy.

¹⁴ Muzinad ne gavman amikmikta king gigemana osayta na giquez huritimo. Na ezaqgo maror amikmikta nagan in mataw daq meqinta emaya na faq neggo osayta. Ad in mataw daq dimunta emaya na gibin iluwgo osaytamo. ¹⁵ God anad ne daq dimdimunta amalib mataw ginad haiqta gamuk samanta negayta na giquez tuwasih daqay. ¹⁶ Ne mat araq ago kabibiy mat nog iyeq hi luw osiy. Ta teq ne ginad kazaq hi emiymo. I mat araq diq ahagenib a hi osad iyan i daq hihiq ginadibmo tiqemam haqad ne ginad nazaq hi emiy. Haiqgam. Ne ginad kazaq emiy, I mat araq ahagenib a hi osad iyan i God amomo ago kabibiy on mataw iyim osauqta haqiy. ¹⁷ Ne on mataw bunmo giwaziniy. Ad ne gimaqbaban Yesus ago on matawtu na bunmo ginan ginad bilaqanmo. Teq ne God rabunad Rom gigo king na abin waziniyomo.

I Krais asen muzad afaqan soruq

¹⁸ Ari ya kabibiy mataw samanta tigibilennan. Mataw ne gibunib turad giwamusa ne in gihaqenibmo osad girabunad giquez muzin bugiy. Ya mataw dimdimunta ne gibunib turad giowan tonayta na g momo ginan a hi bilaqaiq. Haiqgam. Mataw meqinta kabiy afaqanta negayta na inaqmo gihaqenib ne osiymo haqaiq.

¹⁹ Osad ne God anad muzinad kabiy dimunmo emiy. Emsa ta ne gigo aseseqta na in ginadibmo ginolid ne santitiy na samanta sorsa God agem dimunta tinegdaq. ²⁰ Na ezaqgo ne daq meqinta emeq ago asantitiyin sorad nan a hi bilaqsa nagaqgo God naw dimunta tinegdaq? Ari ne kabiy anonommo emsa ne gigo aseseqta samanta ne ginolid, ne giquez hiqiyeq afaqan na sorsa God agem dimunta negad in ne tigidimun tondaq.

²¹ Ne dante dimunta naqmo muzingo haqad God in ne gililewunta. Na ezaqgo Krais in nazaqmo daq araq meqinta a hi amta teq in ne gimen santitiy sorta. Sorad in anad ne in asen muzeq in daq em nogmo ne tiqem daqaymo haqad in ago daq nawa na ne giqisihunta.

22 In daq araq meqinta a hi am. Ad in gamuk araq katiya a hi bilammo.
Aisaya 53.9

23 Mataw gamuk meqinta ugsa in amenin emim gamuk meqinta a hi nag. In santitiy sorad teq in ago bab na gimeqin tongo a hi bilam. Haiqgam. In ahol bunmo God ago hib emad in anad am, God teq mataw bunmo gigo daq anononmo tuqlulum kendaq ham.²⁴ Krais ayib dom wolan in i gigo daq meqinta na bunmo inmo ahol ugim afaqan na sorad tur. In i giwastitayid teq i daq meqinta hulos tayeq tuteqmo daq titntona emam haqad in afaqan na i giyon sorta. In santitiy sorim anedan womta na amalib ne giqeman tidimniyyi.

25 Kwaziqmo ne bunmo bilaqne sipsip an hulosim haresmo le luw nog iyiyta. Teq muran ne muleqim Sipsip Ginamren Diqta na ago hib ta bolan in ne giwamuzim tuqosaqta.

3

On mataw an tuwaqiyya gimen gamuk

¹ Ari ne on mat tuwaqiyya na, ne gidug-niz gihaqenib osiy, kabibiyy mataw in gigo aseseqta gihaqenib osayta nazaq. Osad ne gidugniz asor God ago gamuk a hi huritayta na ne in gamuk araq a hi gibilensa in ne gigo luw os dimunta naqmo ahol waqad ginad buliyeq God ago hib tubol daqay. ² Na ezaqgo in ne gibiyisa ne titnonimmo luwad teq ne in giwazinim gihaqenibmo osayta naqmo in ginad tubuliyaq. ³ Ad ne gihol awaqqan dimniyyadaq haqad gisan amomo hi balaw toniy. On asor in gisan amomo anadin emad in giqensan otsireqad balaw dimdimunta gol-ibta wazad tubusan amo amo giholib emayta. ⁴ Ari negmo teq ne giugan inaqmo balaw tonid ne giwaqqan dimniy Hasan. Ne gihol wazid woqsa tok nemeq kiskismo luw osiy. Balaw nazaqta a hi hiqiyaqta teq in God ameb dimun diqta. ⁵ Kwaziqmo on dimunta God anadin diq em yaqayta na in balaw naqanta amalib gihol balaw tonad in gidugniz gihaqenib os yaqayta. ⁶ Ne Sara anadin emiy. In aduw Abraham ahaqenib osad anan yaqgo ayahta haqyaqta. Ari ne nagah araq ago a hi rabad daq dimdimunta nagan tiqemad teq ne Sara-mo amigniz nog tiqiy daqay.

⁷ Ad nazaqmo ne mataw aw tuwaqiyya na, ne ginad em hasad ne gigo on nenaq osiy. On in giwaz meqin a haiqta. Nazaq iyan ne giqonan giwazinad gilowan toniy. Ad ne ginad kazaq emiy, God in i gigo on ka inaqmo agem dimunta negan in teq ago os dimunta in giholyon tuwaq daqaymo haqiy. Haqad ne giqonan nenaq nazaq wastitayeqmo osad teq ne God inaq gamuk emsa in ne giqez tuhuritdaq.

Tuteqmo i on mataw bunmo gimen daq dimunta emuq

⁸ Ari yaqgo gamuk ta asor usaqta na in kazaq. Ne bunmo gigem amulikmo iyeq osad araqibmo afaqan soriy. Ad ne an anan ginad bilaqsa an alowan tonad osiy. Teq ne gihol wazid woqsa luwiy. ⁹ Mataw ne gimeqin tonsa ne amenin hi emiy. Ad in gamuk meqinta negsa ne amenin nan meqinta hi negiymo. Haiq. Mataw ne gimeqin tonsa ne God bulonid in mataw na gidimun tonan. Ne daq nazaq emgo haqad God ne gililewunta. Ne nazaq emsa teq God ne tigidimun tondaqmo. ¹⁰ Na ezaqgo, Mat araq in os dimuntab osnan anad emad, teq in og kab osad kam dimunta ahol waqan haqad, in gamuk meqinta hi bilaqan. Ad in aqezab nan katiya araq hi gwahtiqanno. ¹¹ In daq meqinta bunmo gileh ugad in daq dimuntaqmo muzan. Ad in aholtuq bulad on mataw bunmo ne-naq kiskismo osad in daq na hi hu-losan.

¹² Na ezaqgo, Iyahta in on mataw titntona gibiy kemaqta. Ad in adek emad in mataw na gigo susumun huritaqtamo. Teq Iyahta in on mataw daq meqinta emayta na gigo babmo diq.
Buk Song 34.12-16

I daq dimunta emad ago afaqan waqamta na dimunmo

¹³ Ne daq dimdimunta emnan giwaz diq meqniysa nog teq ne giwazid woq daqay? ¹⁴ Ari ne daq dimunta emsa mataw santitiy negsa ne ginad hi meqniyan. God teq ne gidimun tondaqta na ago ne tidimniyy osayta. Nazaq iyan mataw na ne gimeqin tonsa ne girabunad gihol afaqan hi iyan. ¹⁵ Teq ne gigemabmo diq Krais abin wazinad ossa in amomo ne gigo Iyahta iyeq osan. Ad God teq ne tigelumsihdaq haqad ne amen emad luwsa mataw asor ne ginad helta na ago susumun negid ne in giqez amenin emgo ginad em haseqmo luwiy. ¹⁶ Teq ne in gigo susumun na amenin emad ne gihol wazid woqsa kiskismo gibileniy. Ad ne gigem God ameb titnoneqmo ussa ne Krais asen muzinad daq dimunta emiy. Ne nazaq emsa teq mataw ne gibilawunim gamuk meqinta negayta na in ne gibiyad gimebay tuwoqdaq. ¹⁷ Na ezaqgo God anad bilaqid teq i daq dimunta emad ago afaqan tisoram. Na in dimunmo. Ari i daq meqinta emad ago afaqan soramta na in meqin diq.

Krais i giwaqgo haqad moqim ta eram

¹⁸ Krais in on mataw gigo daq meqinta walemann haqad in nazaqmo sanctity sorim tumom. Moqim in sanctity na a ta hi sordaq. In mat titntona teq in mataw meqinta gigo ban waqim in gimen mom, in

i giwaqeq giqad God agerab lehnhan haqad. Mataw in asanmo wol eman momta. Teq God in awitan wazan ta eram. ¹⁹ Teq in awitan naqmo lehim on mataw giwitan giqirquran osiyta na gamuk gibilan. ²⁰ On mataw na in kwaziqmo Nowa ago kamub God ago gamuk othasad osiyta. Kam nab Nowa muy emad luwsa God in mataw na ginad bulyig haqaq gibaq tunim sisaqmo osta. Teq hajqgam. On mataw kabemmo hajq ⁸ nazaqmo muyib gwalim ossa uq tihitim. Hitiqim muy na sorsa God yuw naqmo amalib Nowa asenlul nenaq gilum-sihan in dimunmo osad a hi moqiy.

²¹ Ari daq na in bilaqne muran ne yuw huzayta na adulan nog. Yuw huzgo adan na in ne gilumsihsa ne a hi moqaytamo. Teq ne yuw huzim gisanib ginumlan hiqiyaqta nazaq a hajq. Naqmo God in Jesus Krais hodhodab wazan ta eramta na ago ne anan helmo tihajqim ne gigem God ameb tidimniyim usad iyan ne God anad muzinim yuw huzayta. ²² Yesus Krais Heven-ib gwalehim in God aben aqabun ban osaqta. Ossa angelo teq bugaw aseseqta zaway amo amo wazayta na teq nagaq giwaz meqinta gibin inaq iyim maror gan osayta nagan bunmo in ahaqenib tiqiy bugim osay.

Gilumwaq ayahta Yesus ago on mataw giholib gwahtiqa in sanctity soriy

4

I gigem kwaziqta ago daq bunmo hulosuq

¹ Ari Krais in aholib sanctity ayahmo sorta. Nazaq iyan in anad usta nazaqmo ne ginad ussa ne giwaz meqniyeq osiy. Na ezaqgo mat Yesus sanctity sorta nazaq in aholib sanctity soraqta, mat naqanta in ahol wasihim daq meqinta a ta hi emaqta. ² Mat nazaq emaqta na in agem kwaziqta atoranmo eraqad anad hureqsa in muzin-nan anad a hi bilaqaqta. In og kab osad God amomo anad muzinad oseq le in tumoqdaq haqad in anad emaqta. ³ Kwaziqmo ne Krais anan helmo a hi haq yaqayta nab ne on mataw God ago maror asan ban osayta na gigo ginad meqinta muzinad ne daq hihiq na dimunmo tiqemiy. Ari muran ne daq meqinta nagan ta hi emiy. Mataw asan banta na in daq gihol bilaqaqta naqmo emad osayta. Osad in nagah haresmo ute-tayta teq in yuw atoranta uluwim gifaqin hulosayta teq in giyogniz nenaq garak ayahmo emayta teq in humab wolim yuw uluwad daqdaq emayta teq in God ago gunun othasad god katiyta giyon lotu emayta. ⁴ Teq muran in daq hihiq haresmo em

titursa ne nenaq araqib humab wolim daq meqinta nagan a ta hi emayta. Sa in nazaq ne gibliyad in gihol turuh nemsa ne gibilawunayta. ⁵ Teq mat mataw tumoqiyta inaqmo bunmo gigo daq ulum kemeq amenin negdaqta amatin na in ahol tuwastitayim hazizir emgomo tiqiyim nawa osaqta. Abeb teq mataw ne gibilawunayta na in nagaqgo ne gibin nazaq meqin toniyta na ago in mat na tubulon daqay. ⁶ Daq alulin naqmo ago on mataw tumoqiyta na a hi moqadmo in Jesus awagamun dimunta na hurityta. Huritim ossa teq God in gigo daq gilum kemim giyon bilaqan in tumoqiy, mataw bunmo moqayta nazaq. Ta teq in gamuk dimunta na tuhuritim in giwitan kayeqmo osayta, God kayeqmo osaqta nazaq.

God naw igta na akabiyan I anonon diqmo emuq

⁷ Ari nagah bunmo hiqiydaqta akaman na sinsin tiqiy. Nazaq iyan ne gihol anonomo wamuzad ne ginad em hasad God inaq gamuk emiy. ⁸ Teq daq ameb diqta ne em daqayta na ne tuteqmo an anan ginad bilaqsa osiy. Na ezaqgo mat in ago walmataw ginan anad bilaqsa in mataw na gigo daq meqinta kabemmo walemad anadin a ta hi emaqta. ⁹ Teq Yesus ago on mataw ne gigo bitab bolsa ne gilowan tonad nan kabemmo hi bilaqiy. ¹⁰ Ne amulik-mulikmo naw waqiyta nazaqmo ne an ulumsihiy. Ne nazaq toneq teq ne God ago naw amo amo in samanmo nagta na anonomo tuwamuz daqay. ¹¹ Mat araq in gamuk bilaqgo anawun waqsun, in God ago gamukmo diq bilaqan. Ad mat araq in mataw gilumsihsa anawun waqsun, in God zaway ugaqta naqmo amalib mataw gilumsihan. Ne Yesus Krais abinib ne gigo naw akabiyan nazaq emad God abin emid ayah iyan. In amomo abin ulilibmo diq ussa in nagah bunmo gigo Iyahta iyeq kuluwa-kuluwmo osan. Hel diqtaqmo.

I Yesus afaqan sor nog i sorad ginad dimniyan

¹² Ari ya iyognizmo diq, muran afaqan meqin diqta ne giholib gwahtiqa in faq nog ginoysa ne ritenad ginad hares emad “Ka naga daqin diq i giholib gwahtiqaq?” nazaq ne ginad hi emiy. Afaqan na ne gilum waggo giholib gwahtiqaqta. ¹³ Gilumwaq na ne gigo hib gwahtiqa ne sanctity Krais sor nogmo ne sorayta. Nazaq iyan ne ginad dimniyan. Ne nazaq ginad dimniya afaqan sorid teq abeb Krais abin ayahta inaq ulalab bo gwahtiqa ne ahol waqad ginad dimniya gigem dimun diq iydaq. ¹⁴ Krais abin ne giholib usaqta na ago mataw gamuk meqinta negayta. Nazaq

ian ne tidimniyim osayta. Na ezaqgo God ago Bugaw Dimunta abin ayah diqta inaqta na in ne giholib tuqusaqta. ¹⁵ Helmo ne mat araq wol emeq o ne nagah araq rin toneq o ne daq araq meqin diqta emeq o ne mataw gigo kabi y meqin toneq, ne daq nagan ago asantitiyin waqad ne gimebay tuwoqdaqta. Teq ne daq nawa ya teko ginan gibentla na araq diq emeq ago mebay hi waqiy. ¹⁶ Ari Krais abin ne giholib ussa na ago ne santitiy waqad teq ne gimebay hikidik woqan. Haiqgam. Krais abin ne giholib usaqta na ago ne ginad dimniyisa ne God-mo abin iluwad osiy.

¹⁷ Ari muran God in mataw gigo daq gilum kemdaqta akaman na tubol. Bolan in hazir na alulin emad danmeb inmo ago on matawta gigo daq ulum kemeq amenin tinegdaq. Negeq hulosad in mataw God ago gamuk dimunta gileh ugad a hi huritayta na gigo hib hazir na emid tihiqiyadaq. Ari God danmeb inmo ago on mataw gilum kemeq faq negsa teq ta mataw nan othasayta na in ezaq diq gihol loyin daqay? ¹⁸ Teq, God ago on mataw in God ago os dimuntab gwahtiiggo afaqan diq iysa, ta mataw God gileh ugad daq meqinta emayta na in teq ezaq gwahtiig daqay? *Gutpela Sindaun 11.31*

¹⁹ Nazaq iyan mataw God anad muzinim sanctitiy waqayta na in gihol God abenab emad teq in daq dimuntaqmo emad osiy. God inmo i gigamta teq in i gilumsihnan bilamta nazaqmo diq in tiqemdaq.

5

Yesus ago on mataw gigo danmebta nagan in gigo walmataw gilowan ton daqay

¹ Ari yaqmo Yesus ago on mataw gigo mat danmebta araq teq ya imebmo diq Krais sanctitiy sorsa ahol wayta. Teq abeb God ulalabmo ago on mataw gidimum tonad gibin dimunta negsa ya inaqmo ibin dimunta tuwaqdaiqmo. Nazaq iyan ya ne gilikmanib mataw danmebta na atoranmo kazaq gibilenaiq. ² Ne ginad bilaqsa God ago sipsip anononomo giwamuziy. Luweq mataw ne gituw bulsa ne kabi y na emad gituw tihiqiy daqay. Teq ne mani waqgo kabi y na hi emiymo. Haiqgam. Ne kabi y na gihol bunmo ugad ne ginad bilaqsa emiy.

³ God-mo ne gigo sipsip na ne gibenab giqamta. Nazaq iyan ne in giwamuzad ne igmo ag haqad gibayid hi woqiy. Haiqgam. Ne daq dimuntaqmo ne gigo sipsip giqisihuniy. ⁴ Ne nazaq emsa teq Sipsip Ginamren Danmeb Diqta na bo ulalab tugwah-tiqad in ne kabi y emiyyta na anawun balaw

araq tutimmo dimunmo usaqta na tinegdaq. Negid ne waqe q king gigo balaw nog gifaqinib emid mataw bunmo ne gibiyad gibin tiqiliuq daqay.

I gihol God abenab emuq

⁵ Ari on mataw ta asor na bunmo ya kazaq ne gibilenan. Ne mataw danmebta na gihagenib iyeq osiy. Teq ne bunmo gihol abin wazid woqsa ne an alowan tonad osiy. Na ezaqgo,

Mataw in gimo gihol abin wazan eraqsa God in geg negaqtta. Teq mataw gihol wazan woqsa God in agem dimunta negaqtta. *Gutpela Sindaun 3.34*

⁶ Nazaq iyan ne gihol wazid woqsa God ago zaway ayahta na ahaqenib osiy. Ossa le kam inmo atowun amta nabmo teq in ne gibin wazid tiqeraqdaq. ⁷ God anad negsa ne osayta. Nazaq iyan ne gigo afaqan teq nagah bunmo ne anan ginad meqniyajta na ne God ugid in soran.

⁸ Ne worworeq osad gihol asawan woltayad osiy. I gibabun Satan in bilaqne laiyon araq atoranmo gayonad on mataw gineqgo ginagunad luwaqta nazaq nog in luwaqta. ⁹ Teq ne ginad helta na amalib giwaz diq meqniyeq ossa laiyon na ne giwaznan tonsa ne othasid lehan. Ad ne ginad emiy. Ne gimaqbaban Yesus ago on mataw og saw bunmo osayta na in inaqmo ne afaqan sor nog in soraytamo haqiy. ¹⁰ God agem dimunta negad ayahmo gilumsihsa ne afaqan sorad a hi woq daqay. Ne in inaq ago os dimunta ahiqiy haiqta nab garabmo os daqay haqad in ne gililewun an muran ne Krais aholib sogotim inaq tuqosay. Nazaq iyan ne kam asitmo kab afaqan tisorid teq inmo ne gisen baysihad zaway negsa ne dimniy haseq giwaz meqniyeq titur daqay. ¹¹ God in nagah bunmo gigo Iyahta iyeq in zaway bunmo wazad kuluwa-kuluwmo osan. Hel diqtaqmo.

Gamuk asor

¹² Ari gamuk asimqanta nawa ya bilaqim bolta na ya Sailas bulonsa in ne gimen mar tonta. Ya inadib mat na in ya iholyowmo diqta. God agem dimunta negaqtta na ago agamukanmo diq ya kawa ne gigem zaway uggo haqad tigibilen. Gibilenan ne gamuk ka muzinad giwaz meqniyeq turiy.

¹³ Ari Yesus ago on mataw uliq Babilonib* kab osayta na in ne zeq dimun tinegay. God in on mataw na inaqmo gililewunim aholyon gitowun eman in ne gimaqbaban iyim osayta. Sa Mak inaqmo ago zeq dimun eman ne gigo hib lehaqmo. Mat na in bilaqne ya itatinmo diq nogta. ¹⁴ Teq ne

* 5:13: Pita in uliq Babilon hamta na in gamuk awowun hulim Rom anan nazaq biyta.

nazaqmo an anan ginad bilaqsa an zeq
dimun ugymo.

Ari ne on mataw Krais aholib soqotim
inaq osayta na, ne bunmo gigem kute
nemsa osiy. Nawaqmo.

2 Pita

o Sansandek gigerta Pita mar tonta

Gamuk ameb lehaqta

Aposel gigo kamub Yesus ago on mataw kabemmo ginad em yaqay. Yesus hidmo ta boldaq haq yaqay. Haqsa teq hait. Yesus hidmo a hi bolsa mataw danmebta na tumoq bug yaqay (2 Pita 3.4). Sa mataw katiyta asor eraqim bilaq yaqay, Ahol waqiy haq yaqay. Nabag Aposel bilaqiy, Yesus ta boldaq haqiy na in gimeleq iyim ginadibmo gamuk na bilaq haq yaqay. Yesus a ta hi boldaq daqag haq yaqay. Ad Aposel bilaqiy, Kam abebtanta nab Yesus boleq hazizir emad on mataw bunmo gilum kemdaq haqiyta na in a hi gwahtiqaqmo haq yaqay. Haqad mataw katiyta na in Aposel giqez na wazan woqsa in gimo gibin eman danmeh iyyaq. In ginad em yaqay, Nagah araq i rabunamta na hait tiqiy haq yaqay. I yuw atoranta uluwad an haresmo hureeq qinaq usad teq daq naqanta bunmo i tiqem bugamta haq yaqay.

Haqsa teq sansandek ka bilam, Mataw sulep katiyta bilaqay na in teq amenin meqin diqta God abenab tuwaq daqay ham. Ne mataw na giqez hikidik hurity ham. Aposel gamuk ne gibileniya naqmo amomo ne waz naqmo hiqiyeq osad teq ne God ago hurit kemad ne Iyahta Yesus Krais ago tuhurit kem daqaymo ham. Aposel in gimebmo diq Yesus ahol waqsa Yesus sulep negsa in huritya ham.

Teq sansandek ka bilam, Helmo diq, Yesus teq ta boldaqta ham. Teq in hidmo a hi bolaqta na alulin kazaq ham. Ne gigo araq aban iyo God anad a hi bilaqaq ham. In anad ne bunmo ginad buliyeq gigo daq meqinta gileh ugyi haqad in ne gibaq tunim sisqmo osaq ham (2 Pita 3.9).

I daq dimdimunta emad mataw meqinta na giqez othasuq

¹ Yaqmo Saimon Pita, ya Yesus Krais ago kabibiy matta teq ya in ago Aposel-mo.

Yesus Krais-mo in i gigo God iyim in i gilumsihim giwamta. In daq titnonta emim in ago sulep i Aposel igtu naqmo in ne naktamo. Negan i ginad helta usaqta nazaq nogmo ne ginad ussa iyan ya ne gimen sansandek ka mar tonim eman leh negaq.

² Ne God teq i gigo Iyahta Yesus inaq gigo tuhurit kemiyyta. Nazaq iyan in gigem dimunta negsa ne gigem kute nemaqta na in ne gigo hib ayahmo diq gwahtiqaq.

God aholyon i gitowun am

³ Ari God in ahol abin ayahta na teq in ago daq dimdimun diqta na igid i gigo tiqiydaq haqad in i gililewunta. Gililewanan i in ago tuhurit keman iyan in ago zaway ayahta na i giholib tiqam. Eman i titnoneqmo God ago daqib luwamta tiqiyim osauqta. ⁴ I on mataw nazaqta tiqiy God ago gamuk aseseqta dimdimun diqta na bunmo in i gigo tiqiyim usaqta. Gamuk nab God in ago on mataw bunmo gidimun tonnan haqad hel digmo bilamta. Ad in anad ne mataw gigem atorammo eraqsa nagah haresmo utetad og kab timeqniyim osayta na ne gihuloseq dimunmo os daqay haqqaqta. Ne nazaq osad teq ne inmo ago zaway teq ago daq bunmo waqeq giholib emeq in os nogmo ne os daqay haqad in anad emaqta. Ne nazaq diq iyeq os daqay haqad in ago nagah dimdimunta nawa ya teko ginan tibilata na in ne nagta.

⁵ Daq alulin naqmo ago ne giholtuw bulad daq dimdimunta kazaq emiy.

Ne Yesus ago sulep huritum anan helmo haqiyta na ne ulumsihad daq helta naqmo ne emiy.

Ad ne daq helta emayta na ulumsihad ne God ago hurit kemiymo.

⁶ Teq ne God ago hurit kemayta na ulumsihad ne gihol anononmo wamuziymo. Ad ne gihol anononmo wamuzayta na ulumsihad ne afaqan sorad gituw hi hiqiyanmo.

Teq ne afaqan sorad gituw a hi hiqiyaqta na ulumsihad ne God ago daq dimdimuntab luwiymo.

⁷ Ad ne God ago daq dimdimuntab luwayta na ulumsihad ne maqbab os nog iyad an alowan toniymo.

Teq ne an alowan tonayta na ulumsihad ne an anan ginad bilaqsa osiymo.

⁸ Ne daq dimunta nawa nagan bunmo waqeq giholib emid in ne gilikmanib ayahmo ussa teq ne i gigo Iyahta Yesus Krais ago hurit kemayta na in samanmo akabiyan haitmo a hi usdaq. Haiqqam. Ne ginad dimunta na anon kabemmo diq tisorgendaq. ⁹ Ari teq mat aholib daq dimdimunta nagan a hi usaqta na in ame hiqiyyim nagah anogibmo diq usaqta na in ahol a hi waqaqta. Mat nazaqta na kwaziqmo God in ago daq meqinta walem bugan in God ameb ahol abusirinan tihiqiyyta. Hiqiyan muran in na ago adek zizalan anadin a ta hi emaqta. ¹⁰ Nazaq iyan ya imaqbaban, ne gituw diq buleq daq dimdimunta nagan em bugiy. Em bugsa teq God ne gilumaholoyon giwamta na abin ne giholib oy soqoteq tuqus tutdaq. Ne nazaq emad teq ne a hikidik woq daqay. ¹¹ Ad ne gibin dimun diqta inaq iyeq ne i gigo Iyahta Yesus Krais, mat i

gilumsihim giwamta na ago maror kuluwakuluwmo usdaqta na aduganib ne le tugwahtiqt daqay.

¹² Na ago iyan ya gamuk nawa tekotigibilenta na ya kam bunmo a ta gibilen tondaiqta. Helmo, ne gamuk na ago ginad tiqem hasiyta. Ginad em hasad ne gamuk helta na amalib zaway diq iyim titurayta. ¹³ Ta teq ya a hi moqad isan ka kayeqmo osad ya ne ginad enqenunsa ne yaqgo gamuk ka anadin tuteqmo tiqem daqay. Ya nazaq emdaiqta na ya inadib in daq dimun diqta haqaiq. ¹⁴ Na ezaqgo, ya inad emaiq, ya kam asitmo a ta oseq teq ya isan ka tuhulosdaiq haqaiq, i gigo Iyahta Jesus Krisis iqishunta nazaqmo. ¹⁵ Nazaq iyan ya iholtuw diq bulad gamuk ka ne tigibilendaq. Ya nazaq emeq abeb ya tumoqid teq kam bunmo ne yaqgo gamuk ka anadin emad tuqos daqay.

Aposel God anuwan Krisis aholib oysa ahol waqiy

¹⁶ Ari i gigo Iyahta Jesus Krisis azawayin inaq ame ameba bolta na awagamun i ne tigibilenta. Teq i wagam samanta mataw ginadibmo yuw hunegad bilaqayta na i muzinim Jesus awagamun na a hi gibilen. Haiqgam. I gime anonabmo diq Jesus ahol anuwan ayahta na ahol wawta. ¹⁷ Yesus Amam God in atatin wazinim abin ayahta ugad in saw anuwan lul araq diqta na aduganib aqez gwahtiqtim Jesus anan bilam, Ka ya itatin ham. Ya in anan inad bilaqsa igem dimun diqta ugaqta ham. ¹⁸ I Jesus inaq garah abigmanib God agerabmo diq ossa God aqez na Heven-ib hitiqsa i huritta. ¹⁹ Huritum muran i nantut gigo gamuk in kwaziqmo God ago marib mar toniyta na anan helmo tihauqauqta. Ne nantut gigo gamuk na anadin diq emad teq ne dimunno tuqos daqay. Na ezaqgo gamuk na bilaqne lam saw aromriq inaqtab oy nog iyaqta. Teq ne gamuk na anadin emad anuwanib osad le Jesus ta boldaqta nab ne tidimniy daqay. Kam nab in ne ginad emid tihastitay bugdaq. Hastitaysa teq in ago gamuk na ne gigemab oyad tuqusdaq. Bilaqne saw hastitaysa ulig boy gabolim oyad turaqta nazaq nog.

²⁰ Ari teq nagah ameb diqta ne ginad em has daqayta na in kazaq. Nantut kwaziqmo God ago gamuk bilaqiyta na, mat araq in anadibmo gamuk na alulin a hi bilaqdaq. ²¹ Na ezaqgo God ago nantut na in ginadibmo gamuk na eman a hi gwahtimta. Haiqgam. God ago Bugaw Dimunta inmo mataw na ginad wamuza in God gamuk nagta naqmo agamukan bilaqiyta.

2

Mataw meqinta Yesus ago on mataw ginad walebolay

¹ Ari kwaziqmo nantut katiyta asor Isrel gilikmanib gwahtiqtia nazaqmo teq mataw asor in ne gilikmanib eraqeql suleq katiyta on mataw tigibilem daqaymo. In ulilemeqmo gamuk katiyta bilaqad in ne gigo on mataw asor ginad helta na tigmecqin ton daqay. Ad in Mat Iyahta in gizayim giwamta na gileh tuqug daqaymo. In daq nazaq emad oseq hidmo in timeqniy daqay. ² Ta teq in osadmo in gigo daq gihol bilaqaqta na amo amo ne gigo on mataw giqishunsa kabemmo in tumuzin daqay. Muzinsa mataw God ago maror asan ban osayta na in gibiyad in gamuk helta adanteqin na anan meqin tihaq daqay. ³ Mataw suleq katiyta bilaqayta na giholib nagah utet adan naqmo ayahmo usdaqta. In nan katiyta negad in ne gigo mani teq ne gigo nagah haresmo tuhureq daqay. Teq kwaziqmo God mataw na giyon bilam, In teq timeqniy daqay hamta na in samanta a hi usaqta. Haiqgam. God in mataw na gimeqin tonnan haqad ahol tuwastitayim nawa gibaq tunim osaq.

⁴ Ne ginad emiy. Kwaziq digmo angelo asor daq meqinta eman God gilowan a hi ton. Haiqgam. In giwazim saw meqinta nab gihuneegan wolehan in am awaz meqin diqta amalib giqirqruran in saw aromriq inaqtab nab tuqosay. Osad in nawa God ago hazizir ayahta na amen emay.

⁵ Teq kwaziqmo on mataw God gileh ugsa in gihulosan a hi osymo. Haiqgam. In uq eman hitiqim on mataw meqinta na bunmo tiginan. Teq uq na a hi hitiqsamo Nowa in on mataw na God anad muzingo haqad gibilyenyaqta. Nazaq iyan uq na hitiqim mataw tigineqsa God in Nowa teq on mataw ta asor ⁷ nazaq nenaq gilumsihim giwaqan in a hi moqiy.

⁶ Teq God in uliq giger Sodom ayow Gomora inaq gidimeran oy bugan gisawnib faq abekoq naqmo us. In nazaq uliq giger na gimeqin tonan mataw na gihol amagin tartayan in gisesan ginaynayniz asor og kab a ta hi osayta. An daq nawa gwahtimta nagan gigo hib i ginad tiqem hasauqta. Abeb on mataw God gileh ugaya na bunmo gigo hib afaqan nazaqmo teq tugwahtiqt daq haqauqta.

⁷ Teq uliq giger na meqniysa God in mat titnonta anan Lot haqayta na ulumsihim waqan in a hi mom. Lot uliq Sodom-ub osad in mataw nan a hi hurit yaqayta na gigo daq gihol bilaqaqta naqmo em titursa gibiyad in ahol afaqan diq iyyaqa. ⁸ Helmo, mat titnonta na Sodom gilikmanib

osad kam bunmo in gigo daq meqinta na-gan ahol waqad teq in gigo gamuk meqinta na in hurityaqmo. Mat na agem God ameb titnonim usyaqta teq in mataw na God ago gunun othassa gibiyad in anad ayahmo meqniysi ahol meqin diq loyinyaqta.

⁹ Ari Iyahta in Lot ago hib daq amta na i anadin emad ginad emuq. Iyahta in ago dauh giwamuzgo tuhurit kamta haquq. Daq gilum waqaqta na in Iyahta ago dauh giholib gwahtiqa in gilumsiheq ta giwaqdaqta. Ad in mataw daq meqinta emayta na giwamuzgo tuhurit kamtamo. In mataw na giwamuzad faq negsa le hazizir abebtanta na akaman tuguwahtiqdaq. ¹⁰ Gwahtiqid mataw God ago nan a hi huri-tad gigem atoranmo eraqsa daqdaq emad gibusirinan meqinta giholib usaqta na in Iyahta ago faq meqin digmo tuwaq daqay.

Ari mataw suleq katiya bilaqayta na ginadibmo luwad in a hi rabad in gigo daq hihiq na atoran digmo emayta. Ad in bugaw aseseqta meqinta dimunta inaqmo gibilawunnan a hi rabayta. ¹¹ Teq God ago angelo giwaz meqinta na in nazaq a hi emayta. In mataw na giquriyamim in gigo zaway ayah diqta teq in Iyahta ameb bugaw aseseqta na a hi gibilawunayta. Haiqgam.

¹² Mataw meqinta na in bilaqne karuw ginad haiqta nog. In daq gisanib usaqta naqmo muzinayta. In ginen giqemiyta nabmo iyim bo muran kam kab in saman diqta giwazeq ginol emgomo iyim luwayta. In nagah aseseqta kabemmo ago a hi huritim in nagah nagan gibilawunayta. Mataw karuw kwasikta ginol eman moqayta nazaqmo God in mataw na ginol emid tumoq daqaymo. ¹³ Moqe qteq in daq meqinta emad luwiyya na amenin waqad timeqniy has daqay. Mataw na giholmo in ginad wamuzsa in zeqabmo daq hares gihol bilaqqaqta naqmo emnan ginad diq bilaqqaqta. In ne gigo didaq neq ahumabnib gimileq iyad nenaq osad in haresmo ek tonad daq hihiq emad gihol bilaqsa osayta. Osad in ne giqeman ne ginumlan inaq iysa gibin timeqniyayta. ¹⁴ Kam bunmo mataw na in an alulib hureqeq inaq usnan ginad emayta. Teq in tutimmo saw waqad daq meqinta araq in em daqayta na nagunad in ginamur a hi emad nazaqmo luwayta. In mataw ginad a hi zilimta na kat negad gihureqsa in daq meqintab woqayta. Teq in mataw gigo nagah uteteq giwaqgo gihol emunayta. God in mataw na tukusluw negan in oseq teq timeqniy daqayta. ¹⁵ In dan titnota tuhulosim agadan tiqiyiy. In Beor atatin Balam asen tumuziy. Mataw asor Balam daq meqinta emgo mani ugsa in anad diq bilagaqta. ¹⁶ Teq in God ago gunun itiyonim daq araq meqinta emnan

tonsa ago donki gamuk a hi emaqta na in bilaqne mat gamuk em nog iyim anamren wad. Wadan Balam daq agadanta emgo anad amta na in a ta hi am.

¹⁷ Teq mataw suleq katiya bilaqayta na in saman diqta bilaqne yuw yayibta mayan mataw le a ta hi soqorayta nazaq nog. Ad in bilaqne onqas tim ayahta sibad sor hassa haresmo lehaqta nazaq nogmo. God in mataw na gimen uliq aromriqin meqin diqta araq in leheq os daqayta na tuwasti-tayan usaqta. ¹⁸ Mataw na in gigo daq meqinta na bayinad in haresmo ek tonad luwayta. In mataw kat negad daq gihol bilaqqaqta naqmo giqishunad teq in gi-hureqayta. Gihureqsa mataw ilatow agmo dante katiya rabunad hulosim tukiya na in muleqim dante meqinta nab a ta bolayta. Bolad in mataw katiya girabunim giben lel hasim tukiya na a ta gimuznan tonayta. ¹⁹ Mataw meqinta na bilaqay, Hel diqtaqmo haqay, ne i ginad ka muzinad teq ne ginadibmo luwad ginad dimniysi tuqos daqay haqayta. Ta teq mataw na in daq meqinta ago kabibiy mataw samanta iyim in ginadibmo a hikidik luw osayta. Haiqgam. In gigo daq meqinta naqmo in gigo ayatha nog iyim gibe yahsa in oseq teq timeqniy daqayta. Na ezaqgo, naga daqin in mat anad wamuz naqmo hiqiyaqta naqmo in bilaqne mat na ago ayahta nog iysa mat na in daq na ago kabibiy mat nog iyaqtamo.

²⁰ Helmo, mataw dante katiya rabunim tukiya na in i gigo Iyahta Yesus Krais, mat i gilumsihim ta giwamta na ago tuhuritiya. Huritim in ogib kab daq anumlan inaqta na hulosim in gihol tidimniyim luwayta. Ari abeb in daq meqinta nagan a ta emsa teq daq na awaz diq timeqniyeq mataw na a ta giqirqrud in timeqniy has daqay. Mebmehmbo in giqirqruran osiyta nab in meqin nog osiyta. Ari daq meqinta na a ta giqirqrud in meqniy haseqmo tuqos daqayta. ²¹ Mataw nazaqta in dan titnota na ahol a hi waq nagiyta. Na ezaqgo, in dan na ahol tuwaqim muzad luwiyya teq in gihol buliyim ta muleqiy. Muleqad in God ago gamuk awaz meqinta in nagta na gileh ugad in muleqim ta lehim timeqniy hasim osayta. ²² Ossa gamuk giger mataw bilaqad luwayta nazaqmo diq in giholib gwahtiqaqta. Gamuk araq bilam, Gaun nilim lehim abeb in muleqim ta bolim anilqan na a ta neq tonaqta ham.

Gutpela Sindaun 26.11

Ad gamuk ta araq na bilam, Bul yuw dimuntab tuhuzim lehim teq in ta muleqim hufak a ta huz tonaqta ham.

Iyahta hel diqmo tuboldaq

¹ Ari ya iyognizmo diq, ka yaqgo sansandek gigerta ya mar tonim eman ne gigo hib lehaq. Ya ne ginad wazid eraqsa ne gamuk helta na anadin a ta emad ginad titnondaq haqad ya sansandek giger ka ne gimen mar tonta. ² Nazaq iyan ne ginad titnoneq God ago nantut tawonta kwaziqmo gamuk bilaqiyta na ne anadin diq ta emiy. Ad ne i gigo Iyahta, mat i gilumsihim ta giwamta amatin na ago gamuk awaz meqinta na anadin ta emiyomo. Gamuk na Aposel mebmebmo ne gigo hib a lehim gibilensa ne tuhuritiyta.

³ Ari teq nagah ayah diqta ne ginad em has daqayta na in kazaq. Kam abebtanta nab teq mataw in God ago nantut teq in ago Aposel giqez na anan helmo a hi haqad in gigo gamuk na bilawunad teq in gigemab ginad meqinta naqmo in tumuz daqay. Muzad in kazaq bilaq daqay, ⁴ Mat bilam, Hel diqtaqmo ya ta boldaiq hamta na edowa? haq daqay. I gisesan tumoqiyta kam nabmo iyim bo muranmo daq lul araq diq nazaq gwahtiqa i ahol a hi waqaquq haq daqay. Og mutur gwahtiqa nagah bunmo usta nazaqmo in muran us tutaq haq daqay. ⁵ Mataw na in God ago gamuk helta kawa usaq ka ago a hi bilaqad in nazaq katiyeg bilaq daqayta. Gamuk helta na kazaq bilam, Kwaziqmo God bilaqanmo kait gwahtimta ham. Gwahtiqa teq God a ta bilaqan yuw ayahmo og isihim usta na le araqibmo humab wolam og ka yuwmeb gwahtimta ham. ⁶ Ad abeb God bilaqan yuw naqmo uq nog hitiqsa on mataw kam nab osiyya na timeqniy has bugiy ham. ⁷ Teq kait og inaq muran usayta ka in teq faqab oyworeq hiqiy bug daqay haqad God aqez nazaq tibilaqan usaqmo. Kam nab mataw God gileh ugayta na hazizirib turad timeqniy hassa og ayow kait inaq timeqniy daqaymo.

⁸ Ya iyognizmo diq, ne gamuk amulikmo ka ago ne gidek hikidik zizalan. Iyahta in kam amulikmo loyinsa in bilaqne ulig 1,000 nazaq nog iyaqta. Ad in ulig 1,000 nazaq loyinsa in bilaqne kam amulikmo nog iyaqta. ⁹ Mataw asor ginad emay, Iyahta hel diqmo haqad daq asor emnan bilamta na in emnan agudan emaq haqayta. Teq Iyahta in agudan a hi emaqta. Haiqqam. In ne bunmo gigem buliyyo haqad anad emad in mat araq meqniy hasgo atuw hiqiyagta. Nazaq iyan in ne gimen emim sisaqmo osaqta.

Og teq kait inaq tihiqiydaq

¹⁰ Ari teq Iyahta ago kam bilaqne mat rin tonaqta bol nog iyadaq. Bolsa kam nab kait dedibmo ahulan iyeqmo tihiqiydaq. Ad nagah aseseqta kaitab oyad turayta na

faq ginoy hasid tihiqiy daqay. Hiqiysa og ka teq kabi y bunmo ogib emiyta na inaqmo God ameb ulal tihiqiy hasdaq. ¹¹ Ari nagah bunmo nazaq tihiqiydaqta na ago ne anadin emad ne mataw ezaq diqta iyeq os daqay? Ne gihol bunmo God ugad teq ne in anadin emad ago daq dimdimunta muzin bugiy. ¹² Ne nazaq emad God ago kam na baq tunsa in bo gwahtiqa. Ad ne giholtuw bulad kam na abe yahsa in hidmo gwahtiqa. Kam na gwahtiqa faq kait oyid tihiqiydaqta. Hiqiysa faq na og gig nagah nagan bunmo ginoysa in midemeq yuw nog mimaseq tihiqiy bug daqaymo. ¹³ Ta teq i ne nenaq i God gamuk hel diqmo bilamta na anan helmo haqad i og kai muturta gibaq tunim osauqta. Og saw muturta nabmo God ago daq titnonta naqmo giqus bugdaqta.

I gihol asawan diq woltayad Iyahta amen emeq osuq

¹⁴ Ari ya iyogniz, ne nagah muturta nagan gimen emeq osad ne gihol God ameb anumlan haiqmo usan. Ad ne gihol asawan woltayad ne daq meqinta anan waq daqayta na aban diq emad luwiy. Ad ne God inaq gigem araqibmo iyeq osiy. Ne nazaq emad ossa le Iyahta ago kam gwahtiqaqta nab in bo ne gibiyan. ¹⁵ I gigo Iyahta in i gilowan tonad gimen sisaqmo emaqta na ne ahol waqad ginad emiy. In i gilumsiheq ta giwaqgo haqad sisaqmo i gibaq tunim osaqa haqiy. Teq God in i gimaqbab dimunta Pol anad dimunta ugsa in ne giyon gamuk kaqanta tumar tontamo. ¹⁶ In ago sansandek bunmo nab in nagah ka ago bilaqagta. Helmo, in ago gamuk asor ulal diq a hi iysa i ginad em hasgo afaqan iyaqta. Nazaq iyan mataw ginad haiqta dante haresmo muzayta na in God ago gamuk bunmo walebolayta nazaqmo in Pol ago gamuk na walebolaymo. Teq in gamuk na walebolad in gimo gihol meqin tonayta.

¹⁷ Nazaq iyan ya iyognizmo diq, daq nawa teq gwahtiqaqta na ago ne tuhuritiy ne gihol wamuz naqmo hiqiyiy. Sa mataw God ago gunun othasayta na in ne gihureqsa ne in gigo suleq katiyta na hi huritad ne ginad helta hulosad dante haresmo muzinad hi luwiy. ¹⁸ Ne nazaq gihol asawan woltayad ossa i gigo Iyahta Yesus Krais, mat i gilumsihim ta giwamta na, in agem dimunta negsa daq na ne gigo hib ayahmo usan. Sa ne in ago ginad tiqem hasiyya na in ne ginadib ayahmo ussa ne in ago hurit kemyi.

Ari i Iyahta abin iluwsa in abin nazaqmo muran teq abeb kuluwa-kuluwmo usan. Hel diqtaqmo.

1 Jon

o

Sansandek amebta Jon mar tonta

Gamuk ameb lehaqta

Mataw asor in Jesus ago on mataw gi-hulosim lehim in giholbin iyim osad bilaq yaqay, I gisan ka in og kabta iyim in meqin diq haq yaqay. Nazaq iyan God Atatin mat diq asan waqeet a hi gwahtiq nagta haq yaqay. I ginad emauq haq yaqay, Jesus in God Atatin a haiq haq yaqay. Haqad in bilaq yaqay, I God ago diqta na i gimmel momo tuhurit haq yaqay. Huritim i ginad em hasim daq meqinta a ta emauqta haq yaqay. Haqad in Jesus ago on mataw ta asor na gihereqnan ton yaqay. Sa Jesus ago mataw na gamuk katiyta na huritim dante doqag diq in hel diqta na ago in ginadnad tiqem yaqay.

Sa mat anan Jon haqay na in Jesus ago on mataw na gilumsihid in God ago gamuk helta hurit kemeq ginad kabemmo em yaqay na hulosad in ginad amulikmo usdaq haqad in gimen sansandek ka mar tonta. In bilam, Mat i gime anonabmo ahol waqad teq i giben le in ahol wazta naqmo anan i gibilen kemauq ham. Gibilen kemiid ne ginad i ginad nogmo iyid i bunmo giwastoneq Gimam God teq in Atatin Yesus-mo nenaq ginad dimniysa tuqosad ham (1 Jon 1.3).

Teq in bilam, Ne mataw katiyta na gigo nan hi huritiy ham. Mataw nazaq bilaqyata na in God ago a haiqta ham. In Krais bab ugaya ham. Helmo Jesus in mat diqmo iyim gwahtimta ham. Gwahtiqan on mataw in anan helmo haqayta naqmo in God atatniz iyim in Gimam Iyah na ago hurit kemayta ham. Ad in God anan ginad bilaqsa in on mataw ginan ginad bilaqyatum ham. Teq in bilam, Ne gamuk ka ahol waqeet ginad em daqay, Helmo, i os dimunta kuluwa-kuluwmo osayta na tuwaqim osauq haq daqay haqad ya gamuk ka ne gimen mar tonta ham (1 Jon 5.13).

I saw anuwanib luwad i mataw romriqabta na giholibmo hiqiyid in hi kat igiy

Gamuk mataw giqeman kuluwa-kuluwmo osayta na ulal iy

¹ Ari i God ago gamuk mataw giqeman kayeqmo osayta na anamren anan tibilaq-nan. Gamuk na anamren in mebmebmoo diq osta. Teq in og kab bolim ago gamuk na bilaqsa i huritad teq i gime anonabmo

ahol wawta. I gamuk na anamren ahol waq hasad i giben in aholib emim asan waztamo. ² Kayeqmo osayta anamren na ulal iyan i ahol tuwaqim i in ago gamuk na tutim ne tigibilenaq. Gamuk na anamren in mataw kayeqmo tutimmo osayta na alulinmo diq. Kwaziqmo in Amam inaq osta. Osim in ulal iyan i ahol tuwawta. ³ I in ahol waqim ago gamuk tuhurit i ta ne gibilenauq, gibilenid ne ginad i ginad nogmo iyid i bunmo wastoneq zib a lowab tuqosad haqad. I Gimam Iyahta na Atatin Jesus Krais inaq gigo hib i tisoqotim i in nenaq zib a lowab tuqosauqta. ⁴ Ad i ne nenaq araqibmo nazaq tuqosad teq i ginad tidimniy hasdaq haqad i gamuk ka tumar ton negauq.

I saw anuwanibmo luwuq

⁵ Jesus Krais gamuk bilaqsa i huritta na i tutad kazaq diq ne gibilenauq. God in bilaqne saw anuwan nogta. In aholib romriq asit a hi usaqta. ⁶ Nazaq iyan i giqezabmo bilaqaq, I God inaq zib a lowab osauq haqad teq i romriqabmo luwad na i gimelek iyad gamuk helta adan a hi mizinauqta. ⁷ Ari God saw anuwanib luw nogmo i luwad teq i Jesus ago on matawta na bunmo nenaq araqibmo zib a lowabmo osauqta. Ossa God Atatin Jesus anedan na in i gigo daq meqinta tisuhol bugaqta.

⁸ Teq i bilaqaq, I daq meqinta a hi emauqta haqad na i gigem kat ugsa gamuk helta i gigemab a hi usaqta. ⁹ Ari i gigo daq meqinta na ulum hasid gwahtiqsa teq God bilamta nazaq in tiqemdaq. In daq titnonta emad i gigo daq meqinta na walemad i gigemab daq katiyta usaqta nagan in tisuhol bugdaq.

¹⁰ Teq i bilaqaq, I daq meqinta araq asit a hi emta haqad na i God eman in mat amileq inaqta tiqiyaq. I nazaq gihol kat ugsa God ago gamuk i gigemab a hi usaqta.

2

Yesus in i giteqsormo diq

¹ Yaqgo onmin, ne daq meqinta hi emiy haqad ya gamuk ka mar tonan ne gigo hib lehaq. Ta teq ne daq araq meqinta emid, ari i giteqsor araq i gigo ban waqeet i gimen Gimam Iyahta bulondaqta na in nawa osaq. Na Yesus Krais mat titnonta naqmo. ² God i gigo daq meqinta nagan ginan agem meqniysa Yesus inmo ahol tamaz nog ugan in ago agem meqniy i gigo hibusta na tihiqiy. Teq Yesus in i gimomo gigo daq meqinta anadin emad i gimen ahol nog hulosta nazaq a haiq. Haiqqam. In og kab on mataw en bunmo gigo daq meqinta anadin emad in ahol tamaz nog God ugtu.

Mat Yesus ago daq muz naqmo hiqiyaqta naqmo in Yesus ago tuhurit kamta

³ Yesus Krais gamuk awaz meqinta igta nagan i tumuzin bugad teq i kazaq ginad emam, I Krais ago tuhurit hasta haqam.

⁴ Ari mat araq bilaqaq, Ya Krais ago tuhurit hasta haqad teq in Krais ago gamuk awaz meqinta nagan a hi muzinad, mat na katiya gamuk helta in agemab a hi usaqta.

⁵ Ari mat Krais ago gamuk muzinaqta na in God anan anad bilaq naqmo hiqiyaqta. Nazaq iyan i God anan ginad bilaqsa ago gamuk tumuzinad teq i ginad kazaq emam, I Krais inaq soqotim osauqta haqam. ⁶ Teq mat nog bilaqaq, Ya Krais aholib tisoqotim diq inaq luwaiq haqaqta, mat na Krais luw nogmo in luwan.

⁷ Ya iyognizmo diq, gamuk kawa ya ne gimen mar tonaiqta ka in mutur a haiqta. Haiqgam. Ka gamuk kwaziqta ne mebmemebo tuwaqim osayta naqmo. Teq gamuk kwaziqta na in Yesus awagamun ne tuhuritiya naqmo. ⁸ Ta teq gamuk ya ne guyon kawa mar tonaiqta ka in bilaqne gamuk mutur nogtamo. Na ezaqgo romriq tihiqiyinan tonsa saw anuwan hel diqta na tuqoyaq. Oysa Krais gamuk na muzinsa i tumuzinaqmo. ⁹ Nazaq iyan mat nog bilaqaq, Ya saw anuwanib osaiqta haqad teq in amaqbaban Krais aduganibta na ginan agem meqniyasa, mat na romriqab os tutaqta. ¹⁰ Ari mat in amaqbaban agem dimunta negaqta na in saw anuwanib osaqta. Ossa saw anuwanib nab nagah araq mat na asen woltayid woqdaqta na haiqgam. ¹¹ Teq mat in amaqbaban Krais aduganibta na ginan agem meqniyasa, mat na romriqab osad teq in romriqab luwattamo. Luwsa romriq mat na ameqnagin il tonan in naga danteqin muzaqta na a hi huritaq.

¹² Yaqgo onmin, God in Yesus abinib ne gigo daq meqinta tigiwalam.

Nazaq iyan ya gamuk ka ne gimen mar tonaiq.

¹³ Ne onmin gimaman, ne mat kwaziq diqmo osim bo muran in os tutaqta na ago ne tuhuritiy.

Nazaq iyan ya gamuk ka ne gimen mar tonaiq.

Ne mataw minminta, ne mat meqinta na bayan tuwom.

Nazaq iyan ya gamuk ka ne gimen mar tonaiq.

¹⁴ Onmin amikmikta ne Gimam Iyah ago tuhurit kemiy.

Nazaq iyan ya gamuk ka ne gimen tumar ton.

Ne onmin gimaman, ne mat kwaziq diqmo osim bo muran in os tutaqta na

ago ne tuhuritiy.

Nazaq iyan ya gamuk ka ne gimen tumar ton.

Ne mataw minminta, ne gigo zaway inaq tiqiyiy.

Ad God ago gamuk ne giduganib tuqusaq. Teq ne mat meqinta na bayan tuwom.

Nazaq iyan ya gamuk ka ne gimen tumar ton.

I og ka ago daq anan ginad hi bilaqan

¹⁵ Ari ne og ka ago daq meqmeqinta na ginan ginad hi bilaqan. Mat og ka ago daq meqinta nagan ginan anad bilaqaqta na in Gimam Iyah anan anad a hi bilaqaqta.

¹⁶ Na ezaqgo og kab on mataw God gileh ugaya na in daq kazaq emayta. In gigem atoranmo eraqaqta teq in gimeqnagin naqah ahol waqad utetaya teq in gibin ayulta waqan haqad giholtuw bulad luwata. Teq daq nawa na bunmo Gimam Iyah ago hib a hi bolaqta. Haiqgam. Daq meqinta nagan in og kaqmo agota. ¹⁷ Teq og ka tihiqiydaqta. Sa mataw gigem atoranmo eraqsa in nagah haresmo utetaya na in og ka inaq tihiqiy daqyatamo. Ari mat God anad muzinad osaqta na in kuluwatuqos tutdaqta.

Krais ababun tugwahtiqaq

¹⁸ Ari yaqgo onmin amikmikta, muran i kam abebtanta na ago kamub tugwahtiqaq osauq. Kwaziqmo Krais ababun teq gwahatiqdaq haqsa ne tuhuritiy. An muran ne huriitya nazaqmo diq Krais ababun kabemmo tugwahtiqaq. Gwahtiqa i mataw na gibiyad ginad emauq, I kam abebtanta ago kamub tugwahtiqaq osauq haqauq.

¹⁹ Mebmemebo mataw na i gilikmanib osim teq in i gihulosim tilehiy. Mataw na in i gigo diq a haiqta. In i gigo walmatawta iyeq teq in i gilikmanib tuqos tut nagiyta. Teq in i gihulosim le giholbin luwsa in i gigo diq a haiqta na ulal tiqiqi bugaq.

²⁰ Ari negmo teq ne nazaq a haiqta. Mat Tawonta na in Bugaw Dimunta amalib ne tigibalaw tonan ne bunmo Krais ababun na gigo tuhurit kemay. ²¹ Nazaq iyan ne God ago gamuk helta na a hi huriitya haqad ya gamuk ka a hi mar ton negaiq. Haiqgam. Ne gamuk helta na tuhuritiya na ago ya ne gimen gamuk ka mar tonaiq. Teq God ago gamuk helta na aduganib gamuk araq katiyta a hi usaqta na ne tuhuritiy.

²² Ari i mataw gimileq inaqta na kazaq tigibiy kemam. Mat nog Yesus gileh ugad bilaqaq, Yesus in Krais* a haiq haqaqta naqmo in mat amileq iyaqta. Mat nazaq bilaqaqta na in Krais ababun iyim in i Gimam God teq in Atatin inaq gileh negaqta. ²³ On mataw God Atatin gileh ugayta bunmo in

* ^{2:22:} Gamuk Krais ka alulin “God mat emid bo i gilumsihdaqta na amatin” haqayta.

asan ban osad in i Gimam Iyah na inaq a hi osayta. Ari on mataw God Atatin anan 'Krais' haqayta na, in bunmo Krais inaq osad in i Gimam Iyah inaq tuqosaymo.

Bugaw Dimunta gamuk helta alulin i gibilenagaqt

²⁴ Ari ne gamuk mebmebmo huritytya na in ne gigemab ussa ne waz naqmo hiqiyi. Gamuk mebmebmo ne huritytya na in ne gigemab us tutsa teq ne Gimam Iyahta na Atatin inaq gigo hib tuqos tut daqay. ²⁵ Teq Krais gamuk mebmebmo hel digmo gibila lanta na in kazaq. In i giqemid i kayeqmo kuluwa-kuluwmo tuqosam haqad in bil amta.

²⁶ Ya mataw ne kat negad luwayta ko ginan gibilenad ya ne gimen gamuk ka mar tonaiq. ²⁷ Ari negmo teq Krais in Bugaw Dimunta amalib ne gibilaw tonan Bugaw Dimunta ne nenaq tuqosagta. Nazaq iyan ne ginad dimunta ago siqim a hi iysa mat araq in ne suleq a hi negdaqta. Na ezaqgo Krais ne gibilaw tonim Bugaw Dimunta negan Bugaw Dimunta naqmo in nagah bunmo ago ne gibilenagaqt. Gibilenad in a hi katiyad gamuk heltaqmo bilaqaqta. Nazaq iyan Bugaw Dimunta suleq nagta nazaqmo ne Krais aholib soqoteq inaq osiy.

Muran i God ago onmin tiqiyim osauq

²⁸ Ari yaggo onmin, ne Krais aholib soqoteq inaq os tutiy. Ne Krais inaq tuteqmo ossa teq abeb in ta boldaqta nab i bunmo gimebay a hi wogsa i giwaz meqniyeq anognib tituram. ²⁹ Teq Krais in mat titnon diqta na ago ne ginad tiqem haseq teq ne ginad kazaq em daqay. Krais in on mataw daq titnonta emayta bunmo giqeman in gimugan mutur iyan in God ago onmin tiqiyim osay haq daqay.

3

¹ Mataw! I Gimam Iyahta i ginan anad diq bilaqaqta na ne anadin emiy. Muran i gibin God ago onmin nazaq usaqta. An helmo diq i God ago onmin tiqiyim osauq. Ta teq on mataw God gileh ugayta na in i gibin nazaq usaqta na ago in a hi hurit kemayta. In God ago a hi huritaytamo. ² Ya iyogniq, muran i God ago onmin iyim osauqta. Teq abeb i ezaq diq iyeq osamta na in muran ulal a hi iysa i na ago ginad a hi em hasauq. Ari Krais bo ulalab gwahtiqaqta nab i inmo nog tiqiyamta naqmo ago i ginad em hasauqta. Na ezaqgo kam nab in mat ezaq diqta iyim osaqta na i ahol tuwaq kemam. ³ Ari on mataw bilaqay, I teq Krais nog tiqiyam haqad baq tunim osayta na bunmo in gimo gimugan suholan ginumlan tihiqiy bug. Hiqiy bugan Krais agem anumlan haiqmo osaqta nazaqmo in osaytamo.

⁴ On mataw daq meqinta emayta bunmo in God ago maror tuqothasiya. Na ezaqgo God ago maror othasayta adan naqmo in daq meqinta alulin. ⁵ Teq Krais in i gigo daq meqinta giwalemnan bolta na ago ne tuhuritiy. Ad Krais aholib daq araq meqinta a hi usaqta na ago ne tuhuritiyomo. ⁶ Nazaq iyan mat Krais aholib soqotim inaq osaqta na in daq meqinta adan a ta hi muzinaq. Ari mat araq daq meqinta adan muzinsa i ginad emam, Mat na in Krais asit ahol a hi waqim in Krais ago a hi huritmo haqam.

⁷ Onmin, ne gihol waziy. Luweq mat araq kat negdaq. Mat daq titnonta emaqta na in God ameb titnonimmo luw osaqta nazaqmo. ⁸ Satan danmebmo dig daq meqinta amta. Nazaq iyan on mataw daq meqinta emayta na in Satan-mo asenlulibta. Teq God atatin in mat meqinta na ago kabiy meqin tonnan haqad in ulalab gwahtimta.

⁹ On mataw God in giqeman in ago onmin tiqiyi na bunmo in daq meqinta adan a hi muzinaya. Na ezaqgo on mataw na God alulib gwahtiqaq in Gimam Iyahta na nogmo iyayta. God in mataw na giqeman in ago onmin tiqiyim in daq meqinta adan muzgo giholib a hi usaqta. ¹⁰ Ari ezaq toneq teq i God ago onmin teq Satan ago onmin gibiy kemam? Na in kazaq. Mat daq dimunta a hi emaqta na in God asenlulibta a haitq. Ad mat in amaqbaban ginan anad a hi bilaqaqta na in God ago a haitqamo.

I bunmo an anan ginad diq bilaqsa osuq

I an anan ginad bilaqgo adan na Yesus i tigiqisihun

¹¹ Ne Krais ago suleq danmeb waqiyta na in kazaq bilam, I gimaqbaban ginan ginad bilaqan ham. ¹² Nazaq iyan i mat anan Kein haqayta na asen hi muzuq. In mat meqinta na asenlulibta iyim in amikqan na wol eman tumomta. Teq nagaqgo in amikqan wol eman mom? In ago daq meqin iysa in ama ago daq dimun diq iytta na ago in wol eman momta.

¹³ Ya imaqbaban, mataw God gileh ugayta na in giqem meqinta negsa ne gihol turuh nemsat ginad nad hi emiy. ¹⁴ I tuteqmo gimaqbaban ginan ginad bilaqsa osad teq i ginad kazaq emam. I moq hasamta adanteqin na tuhulosim i kayeqmo kuluwa-kuluwmo osamta na ago danteb gwahtiqaq tilehauq haqam. Ari mat in amaqbaban ginan anad a hi bilaqaqta na in moq ago danibmo luwaqta. ¹⁵ Mat agem meqinta amaqbab ugaqta na in bilaqne amaqbab na wol eman momta nog tiqiy. Ad mat mataw ginol emaqta na aholib os kayeqmo kuluwa-kuluwmo

osayta na alulin a hi usaqta. Na ago ne tuhuritiy.

¹⁶ Yesus i gilumsihnan haqad inmo ahol nog hulosta. In daq nazaq eman i ahol waqad i an anan ginad bilaqsa osamta na ago tuhurit kemauq. Nazaq iyan i nazaqmo gihol nog huloseq gimaqbaban tigilumsihamtamo. ¹⁷ Ari mat nog og ka ago es nagah dimdimunta kabemmo inaq iyim teq in amaqbabaraq nagah ago siqim iysa in ahol waqad a hi ulumsihaqta, mat na aqem sogotim usaq. Mat nazaqta na in God anad a hi muzinad inamaqbaban ginan anad a hi bilaqaqta. ¹⁸ Yaqgo onmin, i gimaqbaban ginan ginad bilaqsa i katiyeq gizezab gamuk dimunta amomo hi neguq. Haiqgam. I daq helta amalib gigem dimunta negad i akabiyan inaqmo em neguq.

Krais ago on mataw bunmo zaway diq iyeq God ameb turiy

¹⁹ I nazaq gimaqbaban ginan ginad bilaqsa osad teq i ginad kazaq eman, I gamuk heltaqmo muzinauqta haqam. Nazaq haqad teq i God ameb osad i gigem kute nemsə tuqosam. ²⁰ Ta teq i God ameb gigem loyinsa in dimun diq a hi iysa i ginad kazaq emuq, I ginad siqim iysa igmo gihol a hi diq ulum kemauqta haquq. Teq God anad i ginad uriyamim in i gigo diq tuhurit kamta haquq. I nazaq ginad emad teq i God ameb gigem midemeqmo tuqusdaq.

²¹ Ya iyognizmo diq, I gigemab daq araq meqinta a hi loyinad nab i God ameb zaway diq iyim turauqta. ²² Turad i nagah araq ago susumun ugza in i igacta. Na ezaqgo i in ago gamuk muzin bugad i ginad emauq, I daq in anan anad bilaqaqta naqmo i emauqta haqaq. ²³ Teq God gamuk awaz meqinta gibilanta na in kazaq. I in atatin Yesus Krais anan helmo haqam. Haqad in atatin gunun igtan a hi muzinad i an anan ginad bilaqsa osam. ²⁴ On mataw God ago gamuk muzin bugayta na bunmo in God inaq ossa God in mataw na nenaq osaqmo. Osad in ago Bugaw Dimunta igan i giduganib ossa i God inaq osauqta na tiloyin kemauq.

4

I bugaw bunmo gilum kemeq gibe alulin hurit kemauq

¹ Ya iyognizmo diq, mataw God abinib nantut katiya bilaqaqta kabemmo og kab leh bolad luwayta. Luwsa bugaw amo amo mataw katiya na ginad wamuzsa in gamuk bilaqaqta. Nazaq iyan ne mataw na bunmo ginan helmo hi haqiy. Ne mataw na gilum kemeq in giholib bugaw usaqta na in God ago hib bol o hait na ne hurit kemi. ² Ari God ago Bugaw Dimunta daq kazaq emsa

ne ahol tuwaq has daqay. Mataw bilaqay, Yesus Krais in mat diq iyim og kab bolta haqayta, mataw naqanta giholib God ago Bugaw Dimunta usaqta. ³ Ari mataw Yesus anan nazaq a hi bilaqaqta na bunmo in gigo bugaw ta araq inaq luwayta. Bugaw na in Bugaw Dimunta God ago hib bolaqta na a haiqta. In mat Krais bab ugaqta naqmo ago bugawta. Mataw nazaqta teq bol daqay haqsa ne kwaziqmo tuhuritiyta. Teq mataw na muran og kab tugwahtiqt gigo kabiq tiqemay.

⁴ Yaqgo onmin, ne God agota tiqiyim osayta. Teq in ago Bugaw Dimunta ne giholib usaqta na in mat meqintog ka wamuzim osaqta na uriyamim in awaz meqin diqta. Nazaq iyan in ne giholib ussa ne mataw nantut katiya bilaqaqta nagan bunmo tigiquriyamim osayta. ⁵ Mataw katiyayta na in og ka agota. Nazaq iyan in og ka ago agamukan bilaqsa mataw God gileh ugaya na in gigo gamuk hurityata. ⁶ Ari i ne nenaq i God agota. Mat God ago tuhuritta na in i gigo gamuk ka huritaqtamo. Teq mat God ago a haiqta na in i gigo gamuk ka a hi huritaqta. Daq na amalib teq i Bugaw gamuk helta bilaqaqta na teq bugaw gamuk katiya bilaqaqta na tigibly kemam.

Mat God anan anad bilaqsa in amaqban ginan anad bilaqanmo

⁷ Ya iyognizmo diq, daq an anan ginad bilaqaqta na in God ago daqmo diq. Nazaq iyan i an anan ginad diq bilaqan. Teq mat mataw ginan anad bilaqaqta na in God ago amun iyim in God ago tuhurit kemauqta. ⁸ I an anan ginad bilaqaqta na alulin God-mo. Nazaq iyan mat in mat ta araq anan anad a hi bilaqaqta na in God ago a hi huritta. ⁹ God in atatin amulikmo osta na eman og kab bolta, in i gilumsihid i kayeqmo kuluwa-kuluwmo tuqosam haqad. God daq nazaq emim in i ginan anad bilaqaqta na i gilikmanib ulal tiqiy bug. ¹⁰ I iturim God anan ginad a hi bilam. Haiqgam. God inmo iturim i ginan anad bilamta. Anad bilaqsa in atatin eman og kab bolim in ahol tamaz nog God ugim i gigo daq meqinta bunmo tigivalam bug. Daq an anan ginad bilaqaqta na adan diq nawaqmo.

¹¹ Ya iyognizmo diq, God nazaq i ginan anad ayahmo bilaqan iyan i nazaqmo an anan ginad bilaqsa osamtamo. ¹² Mat araq diq ameb God ahol a hi wamta. Ta teq i an anan ginad bilaqsa ossa God i gilikmanib ulalab osaqta. Ossa in ago daq an anan ginad bilaqaqta na i gilikmanib gwahtiqt hasaqta.

¹³ God inmo ago Bugaw Dimunta igan iyan i ginad emauq, I God inaq ossa ta

in i ginaq osaqmo haqauq. ¹⁴ Teq Gimam Iyah in atatin eman bolan i gimeb in ahol tuwaqim i on mataw gibilenim bilaqaq, Gimam Iyah in Atatin eman bolim in og kab on mataw bunmo gilumsihim gimen dante tigamat haqauq. ¹⁵ Ari on mataw bilaqay, Yesus in God atatin haqayta na God in on mataw na nenaq ossa in God inaq osaytamo. ¹⁶ Nazaq iysa iyan i ginad emauq, Helmo diq God i ginan anad diq bilaqaqta haqauq. Ad in agem dimunta igsä i gihol nazaq diq tiloyinauq.

I an anan ginad bilaqsa osauqta na alulin God-mo. Teq mat in amaqbaban ginan anad bilaqaqta na in God inaq ossa God in mat na inaq osaytamo. ¹⁷ I og kab osad Krais daq emaqta nazaq nog i emauqtamo. Emsa daq an anan ginad bilaqayta na i gilikmanib tugwahtiq hasaq. Nazaq iyan abeb God ago hazizir akaman bo tugwahtiqa i a hi rabamta. ¹⁸ On mataw an anan ginad bilaqsa osayta na in a hi rabayta. Haiqgam. In giholib an anan ginad bilaqgo adan na awaz timeeqniya in God ago hazizirib turnan a hi rabayta. Ari on mataw an agem meqinta ugayta naqmo teq rabayta. Na ezaqgo in gigo daq meqinta na anadin emad in teq God ago hazizirib turad amenin meqinta tuwaq daqay haqad in rabayta. On mataw na giholib an anan ginad bilaqgo adan sosil iysa iyan in rabayta.

¹⁹ God danmebmo diq i ginan anad bilaqan muran i an anan ginad bilaqsa osauqtamo. ²⁰ Mat aw nog bilaqaq, Ya God anan inad bilaqaqta haqad teq in agem meqinta amaqbab ahol waqaqta na anan anad a hi bilaqeq in God ahol a hi wamta na anan anad a hi bilaqdakmo. ²¹ Teq Krais gamuk awaz meqinta igtä na in kazaq bilam, Mat God anan anad bilaqaqta na in amaqbaban ginan anad tibilaqdakmo ham.

5

Krais ago on matawta na in og ka ago zaway bayan woqaqta

¹ On mataw Yesus anan Krais haqayta bunmo in God ago onminta. Teq on mataw Gimam Iyah na anan ginad bilaqsa in Gimam ago onmin bunmo ginan ginad bilaqaytamo. ² Ad nazaqmo i God anan ginad bilaqsa ago gamuk muzin bugad teq i ginad emam, I God ago onmin ginan ginad tibilaqdakmo haqam. ³ Teq i ezaq toneq God anan ginad bilaqdaq? Na in kazaq. I in ago gamuk muzin bugamta naqmo. Ad in gamuk gibilanta na in afagan diq a haiqta. ⁴ On mataw God ago onmin iyim osayta na bunmo in og ka ago daq meqmeqinta

na gibayan woqaqta. Teq i og ka ago daq meqinta inaq an wolim bayan woqaqta na alulin in kazaq. I God anan helmo haqauqta naqmo. ⁵ Nog diq zaway iyim og ka ago daq meqinta inaq an wolim bayan woqaqta? Mat Yesus anan bilaqaq, Helmo in God atatin haqayta naqmo in og ka ago daq meqinta bunmo giquriyamaqta.

God in atatin anan tibilaq siram

⁶ Yesus Krais in yuw ned inaq gimalib ahol alulin ulal tonta. In yuw huzta na amomo ahol eman ulal a hi iy. Haiqgam. In yuw ned inaqmo gimalib ahol ulal tonta. ⁷ Ulal tonan God ago Bugaw Dimunta in Krais ahol alulin na i gibilen sireqaqta. Na ezaqgo Bugaw Dimunta na gamuk heltaqmo bilaqaqta. ⁸ Teq nagah ezeqman naqmo in Krais ago i gibilen sireqaqta. God ago Bugaw Dimunta teq yuw na teq ned naqmo. Teq nagah ezeqman na gigo gamuk in amulikmota. ⁹ Mataw og kabta gamuk bilaqsa i helmo haqauqta. Ari God gamuk bilamta na in mataw og kabta gigo gamuk tuquriyamta. Na ezaqgo gamuk nawa God bilamta na in atatinmo anan bilamta.

¹⁰ Mat God atatin anan helmo haqayta na in God ago gamuk in atatin anan bilamta na tuwaqan in agemabmo diq usaqta. Ari mat God anan helmo a hi haqayta na in God anan mat katiyta haqayta. Na ezaqgo God in atatin anan bilaqan teq mat na God aqez na anan helmo a hi haqayta na ago iyan. ¹¹ Teq God in atatin anan gamuk i gimen bilamta na in kazaq. Mataw kayeqmo tuteqmo os daqayta na alulin in atatin ago hib usaqta. Sa God in os dimunta kayeqmo osayta na i tigiq. ¹² Mat God atatin inaq osaqta na in kayeqmo tuteqmo tuqosdaq. Ari mat God atatin inaq a hi osaqta na in kayeqmo tuteqmo a hi osdaq.

I kayeqmo tuteqmo osamta na ago i tuhurit kemam

¹³ Ne on mataw God atatin anan helmo haqayta na ya ne gimen gamuk ka mar tonaiq. Ne gamuk ka ahol waqeq ginad em daqay, Helmo, i os dimunta kuluwakuluwmo osamta na tuwaqim osauq haq daqay haqad ya gamuk ka mar ton.

¹⁴ Teq i ginad emauq, I nagah araq God ignan anad usaqta na anan bulonid in i giqez na tuhuritdaq haqauq. I ginad nazaq emad i God susumun ugnan a hi rabauqta. ¹⁵ Helmo, i God-mo anad muzinad susumun ugsa in i giqez huritaqta. Nazaq iyan i nagah araq God ignan anad usaqta na anan susumun ugad i ginad emauq, I nagah anan susumun ugauqta ka i waqmo diq tuwaqam haqauq.

¹⁶ Ari mat araq in amaqbab araq daq meqinta emsa in ahol waqsa daq na in amaqbab na emid awitan moq hasdaqta

nog a hi iyid teq mat na in amaqbab na amen God tubulondaq. Bulonid God in amaqbab na ulumsiheq os kayeqmo tuteqmo os daqayta na tuqugdaq. Mataw asor gigo daq meqinta in mataw na giqemid giwitan a hi moq has daqayta. Nazaq iyan ya bilaqaiq. Ne mataw naqanta gimen God buloniy haqaiq. Ari daq araq meqin diqta nawa usaqta. Mataw daq meqinta na emim in gimo gihol adanin qwayim in giwitan tumoq hasayta. Nazaq iyan mataw daq meqin diqta na emsa ne in gimen God buloniy nazaq ya a hi bilaqaiq.¹⁷ Daq God anad a hi usaqta nagan bunmo in daq meqinta. Teq daq meqinta nagan asor in mat eman awitan a hi moq hasaqta.

¹⁸ God ago onminmo diq daq meqinta adan a hi muzinayta. Haiqgam. God atatin aqenta na in God ago onmin na giwamuz naqmo diq hiqiysa mat meqinta na a hi gimeqin tonaqta. Na ago i tuhurit.

¹⁹ Teq i God ago onmin iyim ossa mat meqinta na in og kab on mataw God gileh ugayta na bunmo giwamuzim osaqta na ago i tuhuritmo.

²⁰ Teq i ginad emauq, God Atatin og kab bolim i ginad eman hastitaysa i God hel diqta na ago tuhurit haqauq. Huritim i in inaq osad i in atatin Yesus Krais inaq tuqosauqmo. Yesus Krais in God hel diqta. Teq on mataw os kayeqmo tuteqmo os daqayta na alulin inmo.

²¹ Yaqgo onmin, ne god katiyta bunmo gihulosad gileh negiy. Nawaqmo.

2 Jon

o Sansandek gigerta Jon mar tonta Gamuk ameb lehaqta

Jesus ago on mataw gigo mat danmebta araq anan Jon haqayta na in sansandek ka mar tonta. Teq in ago gamuk alulin emim in 'Aw ayah' hamta na mataw kabemmo ginad emay, Jon in on mataw Jesus ago nan huriyatya na gidauhan araq giyon sansandek ka mar tonad in gamuk abarawun hulim ginan 'Aw ayah' hamta haqay.

Kam nab mataw asor luwad in suleq katiyta gibileneq bilaq yaqay, Jesus in mat diq asan waqim a hi gwahtimta haq yaqay. Haqsa Jon bilam, Mataw na ne gigo hib le gwahtiqid ne gigem dimunta negad hi glumshiy ham. Ne mataw katiyta na gilowan tonad na ne bilaqne in gigo kabi y katiyta na em nog tiqiy daqay ham. Nazaq iyan ne mataw na gigo gihol waz naqmo hiqiyeq osiy ham. Osad ne God ago gamuk helta waz naqmo hiqiyyad ne an anan ginad dimniya osiy ham.

I God ago gamuk helta na waz naqmo hiqiyeq osad i mataw gamuk katiyta bilaqayta na gigo gihol wazuq

¹ Ari Jesus ago on matawta gigo mat danmebta araq yaqmo kawa.

Aw ayah,* God ni nilum kemim aholyon tiniwamta. Ya ni teq ningon onmin nenaq gimen sansandek ka mar tonim eman ne gigo hib lehaq.

Ya helmo ne gibilenaiq. Ya ne ginan inad diq bilaqacta. Teq ya imomo haiq. On mataw God ago gamuk helta huriyatya na bunmo in ne ginan ginad bilaqaqmo. ² Na ezaqgo gamuk helta na i gigemab usad in i ginaq kuluwa-kuluwmo tuqus tutdaq na ago iyan. ³ I gamuk helta na muzinad an anan ginad bilaqsa ossa i Gimam God teq in atatin Jesus Krais inaq in gigem dimunta igad teq in i ginan ginad meqniysa i gigem midemeqmo usan.

*I bunmo an anan ginad bilaqgo adan
muzinuq*

⁴ Ari ningon onmin asor in i Gimam Iyahta gibilanta nazaqmo in ago gamuk helta muzinsa ya in gabin nazaq huritim inad ayahmo dimniy. ⁵ Teq muran aw ni ya kazaq atoranmo nibilenaq. I an

anan ginad bilaqsa osuq. Gamuk nawa na ya gunun araq muturta a hi nibilenaq. Haiqgam. I gunun mebmebmo wawta naqmo ya a ta nibilen tonaiq. ⁶ Teq i an anan ginad bilaqsa osamta na adan kazaq. God gunun igtä na i muzin bugam. Teq ne gunun an anan ginad bilaqgotta na tuteqmo muz daqayta na ago ne mebmebmo huriytta.

I Krais ago gamuk waz naqmo hiqiyyuq

⁷ Nagaqgo ya kazaq bilaqaiq? Na ezaqgo mataw gimileq iyayta kabemmo i gi hulosim og saw haresmo tilehiy. Mataw na bilaqay, Yesus Krais in mat diq asan waqim og kab a hi gwahtimta haqay. Teq mat nazaq bilaqacta na in mataw kat negad in Krais ababunmo diq iyim luwaqta. ⁸ Nazaq iyan ne gihol asawan woltagay osiy. Luweq i God ago os dimunta akabiy an ayahmo emim negta na ne tihik hules daqay. Ne mataw katiyayta na gigo gihol waz naqmo hiqiyyad teq ne os dimunta na tuwaq daqay. ⁹ On mataw Krais ago asuleqin helta na amomo a hi muzinad in sibim ameb lehim suleq ta asor katiyta inaqmo muzinayta, mataw naqanta in God inaq a hi osayta. Ari on mataw suleq helta na amomo muzinad osayta, mataw naqmo in Gimam Iyah inaq osad in Atatin inaq osaytamo. ¹⁰ Nazaq iyan mat araq Krais ago asuleqin helta na waqe qne gigo hib ad a hi bolid ne mat katiyta na nan dimunta bulonad gigem dimunta ugad hi ulumsihiy. ¹¹ Na ezaqgo ne mat naqanta wazineq alowan tonsa in ne giyow nog nenaq osad ago suleq katiyta bilaqsa ne bilaqne mat na inaq araqibmo suleq katiyta na bilaq nog iy daqay.

*Mat marorta na leheq on mataw na
gibilyan bilam*

¹² Ari yaqgo gamuk kabemmo gibilendaiqta usaq. Teq ya gamuk na sansandek kab mar tonnan inad a hi bilaqaq. Ya inad emaiq, Ya ne gigo hib leheq i an anobun ahol waqad teq ya gamuk na gibilendaiq haqaiq. Gibilenad teq ya nenaq i ginad tidimniy hasdaq haqaiq.

¹³ Ari ni nimaqbab God in ulum kemim aholyon wamta na ago onmin kawa osayta ka in gigo zeq dimun eman ne gigo hib lehaq. Nawaqmo.

* ^{1:1:} Mataw asor ginad emay, Gamuk 'Aw ayah' usaqta ka Jon in on mataw Jesus anan helmo haqayta na gidauhan araq gituwun emim in nazaq bilamta haqay.

3 Jon

Sansandek ezeqmanta Jon mar tonta Gamuk ameb lehaqta

Yesus ago on mataw gigo mat danmehta anan Jon haqayta naqmo in sansandek ka mar tonmo. Mar tonim in mat ayahtha araq anan Gayus haqayta na ago hib eman lah. Gayus in mat araq dimun diqta. In Yesus ago on mataw bunmo ginan anad bilagaqta. Sa mataw pesanta Yesus ago kabi emnan bolsa in agem dimunta negad in giwaqim nenaq ago bitab osyaqta. In nazaq emsa Jon in abin wazan eram.

Teq Gayus ago hib mat araq anan Diyotrefes haqay na osyaq. Mat na in Yesus ago on mataw gilikmanib inmo abin emid ayah iyo haqad in Jon aqez othasyaq. Othasad in Yesus ago mataw pesanta na bolsa gibaymuzyaq. Sa inmo ago walmataw asor in Yesus ago kabibiy mataw na gilumsihan tonsa Diyotrefes giwasihad gimuzsa in lotu-ib Yesus ago on mataw nenaq humab a ta hi em yaqay. Diyotrefes nazaq emsa Jon in Gayus ayon gamuk ka emim in mat na ago ahol asawan woltaygo agamukan mar ton ugim teq in mat araq anan Demitriyus haqay na ugan in waqim ad Gayus ago hib tilah.

I God ago kabibiy mataw gilumsiham

¹ Ari Yesus ago on matawta gigo mat danmehta araq yaqmo kawa.

Gayus, ya ninmen sansandek ka mar tonim eman ningko hib lehaq.

Ya helmo nibilenaiq, Ya ni ninan inad diq bilaqaqta. ² Yaqyow dimunta, God ameb ni niwitan dimun diqmo usaqta nazaqmo ni nihol teq ningko nagah bunmo dimunmo usanmo haqad ya ninmen God bulonaiqta. ³ I gimaqbaban asor bolim ni daq helta emsa in gimeb nibiyiyya na ago tiqbileniy. Helmo, ni tutimmo God ago gamuk helta muzinad osaqla agamukan na ya huritim ya inad ayahmo dimniy. ⁴ Na ezaqgo nagah araq diq ya inad eman dimniy naqmo hiqiyaqta haiqgam. Yaqgo onmin gamuk helta muzinad osayta naqmo amomo ya huritim inad dimniy hasaqla.

Gayus kabi dimunmo emaqta

⁵ Yaqyow dimunta, God ago gamuk bilamta nazaqmo diq ni i gimaqbaban Krais ago kabi emayta na gilumsihaqta. Gilumsihad mataw na asor uliq araqabta bo osayta na ago ni a hi bilaqad ni in gilumsihaqtamo. ⁶ Teq ni mataw gilumsihta na asor muleqim ta bolim in Yesus ago on

mataw kab osayta na gibilenim in ni ninan bilaqiy, I mat na ago hib lehan in i ginan anad diq bilamta haqiy. Nazaq iyan ya kazaq nibilenaiq. Abeb mataw na le ningko hib a ta gwahtiqid ni gilumsiheq giqemid in ni nihulosad ginad dimniyasa lehiy. Ni nazaq God anad muzinad gilumsihaqta na in dimun diq. ⁷ Na ezaqgo mataw na in Yesus abinib kabi emnan haqad uliq-uliqgo lehad luwayta. Luwad in on mataw en ta asor Juda a haiqta nagan gigo hib kabi emad in amenin araq a hi waqayta. ⁸ Nazaq iyan i mataw naqanta tigilumsiham. Gilumsihad i nenaq garabmo gamuk helta na akabyian tigemam.

Diyotrefes daq meqinta emaqta

⁹ Ari ya Yesus ago on mataw ningko hib nawa osayta na gimen gamuk araq mar tonim eman ne gigo hib tilahta. Teq mat anan Diyotrefes haqayta na in mat danmehta iyo haqad in i gigo gamuk na huritim gileh ugaqta. ¹⁰ Nazaq iyan ya ningko hib leheq teq ya in ago daq meqinta na ulalabmo tibilaqdaq. In i gimalib nan meqinta alulin haiqta emaqta. Ad in daq naqmo amomo a hi emaqta. I gimaqbaban Krais ago kabi emad luwim le in ago hib gwahtiqsa in agem dimunta negad nenaq a hi osaqla. Ad in ago mataw asor i gimaqbaban na gilowan tonnan ginad bilaqsa mat na in giwasihad gimuzsa in Yesus ago on mataw nenaq humab a ta hi wolayta.

Demitriyus daq dimunta emaqta

¹¹ Yaqyow dimunta, mataw daq meqeminta emsa ni gisen hi muz. Haiqgam. Ni daq dimdimuntaqmo em. Mat daq dimunta emaqta na in God ago matmo diqta. Ari mat daq meqinta emaqta na in God asit ahol a hi wanta.

¹² On mataw bunmo in mat anan Demitriyus haqayta na anan dimunta haqayta. Teq in ago daq God ago gamuk helta na inaq rirenim diq lehsa in abin dimunta na ulal iyaqmo. Sa yaqgo walmataw nenaq i mat na abin dimunta bilaqaqtamo. Teq i mat na anan helmo bilaqaqtqa na ago ni tuhuritta.

Mat marorta na in Gayus ahol waqnan bilam

¹³ Ari yaqgo gamuk kabemmo nibilendaiqta usaq. Teq ya sansandek kab mar tonnan inad a hi bilaqaq. ¹⁴ Ya inad emaiq, Sisaq haiq ya le tinibiydaiq haqaiq. Kam nab teq i an anobun ahol waqad an tubulonam.

Ne gigem kute nemsa osiy. Ni niyogniz kab osayta na in gigo zeq dimun eman ningko hib lehaq. Teq ni i giyogniz nab osayta na ginan amulik-mulikmo biyad i gigo zeq dimun ka ni negmo. Nawaqmo.

Jud

Gamuk ameb lehaqta

Sansandek ka Yesus amikqan anan Jud haqay na in mar tonta. On mataw Yesus ago nan huriyatna na gidauhan araq gilikmanib mataw gimileq meqinta asor eraqim in nagah sen qwayim ahol waqiyya na amalib suleq katiyya gibileneq bilaq yaqay, I Yesus anan helmo tihaqim i God ago maror Moses bilamta na ahagenib a ta hi osauq haq yaqay. Nazaq iyan i gunun araq muzinamta na haiq tiqy haq yaqay. I samanmo diq luwad i gihol bilaqgo adan naqmo i muzinad tuqosam haq yaqay.

Haqsa teq Jud bilam, Haiq ham. Ne mataw na gigo gamuk katiyya na hi huriyyat ham. Mataw nazaq bilaqyata na in Yesus awagamun helta na geg ugayta ham. God in ago on mataw in anan helmo haqayta na gimen dante amulikmo em nagta ham. Em negan on mataw in aqez na othaseq in amenin meqin diq tuwaq daqay ham. Nazaq iyan ne Yesus awagamun mebmebmo waqiyya naqmo ne waz naqmo hiqiyad ne gihol anonomo wamuzeq osiy ham.

Ne ginad God anan helmo haqayta na wamuz naqmo hiqiyad ne Yesus awagamun dimunta ababun giqez othasiy

¹ Yaqmo Jud ya Yesus Krais ago kabibiy mat araq. Ad ya mat anan Jems haqayta na amikqanmo.

Ne mataw God ago liley huriyat muzinayta na gimen ya sansandek ka mar tonim eman nawa leh negaq. I Gimam God ne ginan anad bilaqqaqtta. Sa Yesus Krais ne giwamuzza ne dimunno osayta.

² God ne ginan anad meqniyaqta na teq in ne gigem eman kiskismo usaqta na teq ne an anan ginad bilaqsa osayta na in ne gigo hib ayahmo diq gwahtiqan.

Yesus awagamun dimunta ababun in Yesus ago on mataw gilikmanib gwahtiqiyy

³ Ya iyognizmo diq, God in i teq ne nenaq araqibmo gilumsihim giwamta na agamukan asor ya sansandek kab ne guyon mar tondaiq haqad inad bilamta. Ta teq afaqan araq nawa ne gigo hib gwahtiqsa iyan ya inad buliyim muran ya gamuk ta araq kazaq gibilenaiq. God in ago on mataw tawonta suleq nagta na ne waz naqmo hiqiyeq osiy haqaiq. Suleq na God in i tiqigim in suleq ta araq muturta igdaqta haiq tiqy. Nazaq iyan mataw ta asor God ago suleq na bab ugad wazbuliyan tonsa

ne gijothesid lehiy. ⁴ Na ezaqgo mataw asor ulilemim lehim in nawa ne gilikmanib gwahtiqim kat negad osayta. Teq God kwaziqmo mataw naqanta guyon tibilaqan usaqta. Ussa mataw na in teq God ago hazizirib gwahtiqeq gigo daq meqinta na amenin meqin diq tuwaq daqayta. Mataw na in God agem dimunta igaqta na asuleqin wazbuliym bilaqay, God agem dimunta igaqta haqayta. Nazaq iyan i ginadibmo daq hares i gihol bilaqqaqtta naqmo i emmo emuq haqayta. In nazaq haqad Yesus Krais gileh ugayta. Teq Yesus Krais amomo in i gigo Maror teq i gigo Iyahta iyim osaqtta.

⁵ Ne ginad emiy. Kwaziqmo Isrel on mataw Isip-ub gigirquran ossa Iyahta in gilumsihim giwaq bugan in saw na hulosim gigo os meqinta na gileh tuqug bugiy. Teq haiq. Abeb Iyahta in on mataw na gilikmanib asor in ago helmo a hi haqiyya na ginol eman tumoqiy. Helmo, ne wagam na tuhurit bugiyta teq ya ne ginad enqenunsa ne nagah na anadin a ta em daqay haqad ya a ta gibilen tonaiq. ⁶ Ad nazaqmo kwaziqmo angelo asor in gabin ayatha usta na itiyonim in gigo banmo diq God nagta na tuhulosiy. Hulossa Iyahta in ginan agem meqniyan in angelo na gibensen am awaz meqinta a hi tartaydaqta na amalib tigiqirqr. Gigirqurim giqeman in saw aromriq inaqtab osad in God ago hazizir akaman ayatha na amen emad nawa osayta. ⁷ Ad nazaqmo kwaziqmo mataw uliq Sodom-ubta na teq uliq Gomora-ibta na teq uliq asor in gigerab sinsin usiyta nagan in God aqez othasiyomo. Othasad in an haresmo hureqim inaq usad teq mat in mat araq ahol waqad ahol eraqsa in inaq daq meqinta em yaqaymo. Emsa God giqeman in saw faq tutimmo oyad a hi miyaqta nab gihol titiysa osad in on mataw bunmo gimen tarin nog iyim osayta.

⁸ Ta teq mataw muran kawa ne gilikmanib gwahtiqim kat negad osayta na in nazaq diq emaytamo. In sen qway nog iyim nagah ahol waqiyya na bilaqad in daqdaq emad God ameb in gihol anumlan inaq iyaqta. Ad in nan dimunta othasad in angelo giwas meqmeqinta nagan inaqmo gibilawunaytamo. ⁹ Teq kwaziqmo angelo gigo ameba Maikel in Satan inaq an mugad nog diq Moses asan waqdaqta na ago in bilaqad Maikel in Satan wadad gamuk atoranta amalib a hi bilawun. Haiqqam. In kazaq bulon, Iyahta qmo teq ninadsa ni niqez tihiqiydaq haqad in bulonta. ¹⁰ Ta teq mataw katiyya nawa ya in ginan teko tigibilenta na in bugaw giwaz meqinta nagan gilulin a hi huriit hasim in a hi girabunadmo gibilawunayta. Mataw na ginad ayemyemqanta karuw kwasikta ginad nog. Ad in gigo daq meqinta gisanib

usaqta naqmo in muzinaya. Muzinsa in gigo daq meqinta na in gimo gimeqin tonaqta.¹¹ Mataw na oseq teq timeqniy has daqayta. Na ezaqgo in Kein daq am nogmo in emayta. Ad in ginad helta hulosad Balam daq agadanta amta nazaq in emad in mataw gigo mani hureqad suleq katiya gibilenayta. Teq Kora ayogniz nenaq God aqez othasan in ginol eman moqiyta nazamko in God aqez othasad osim moqaytamo.

¹² Tutimmo ne Yesus ago on mataw ne-naq humab wolim zib alowab ossa mataw katiya na bolim nenaq osad in ne gigo daq na eman God ameb meqniyaqta. Ad in ne gigo humabub osad in ne gigo daq na a hi wazinad in gimo gihol naqmo in anadin emayta. In saman diqta bilaqne onqas dubta tim waqim ad haris hareshmo lehsa in urom waqim ad a hi bolaqta nazaq nog. Teq in bilaqne ay araq anon emdaqta akamnib anon a hi emim teq may bugan mataw abeqar inaqmo titeqim hunegan lehaqta nazaq nogmo. Ay nazaqta na ame gigermo tumomta nog.¹³ Mataw na gigo luw os in bilaqne kamis wolim bolsa mataw in giwasihgo biyab a hi iyayta nazaq nog. Ad in daq amebay inaqta hareshmo ulalabmo emayta, bilaqne kamis wolim bolad asabalbalin husta yuw amalib ulalab bolaqta nazaq nogmo. Teq in bilaqne ulig asor kaitab oyad turim anonomo gigo dan muzim a hi lehayta nazaq nog. Nazaq iyan God in gimen ban aromriq inaqta na tuwastitayan usaqta. Ussa mataw na teq ban meqinta nab kuluwa-kuluwmo tuqos daqayta.

¹⁴ Mat anan Enok haqayta na in Adam asenlul ago anulinqan 7-ta nab in gwah-timta. Gwahtiqim in nagah abeb teq gwah-tiqaqta na ago bilaqad in mataw meqinta na ginan kazaq bilam, Iyahta in ago angelo tawonta kuluwmo diq ginaq bolsa ya gibiy ham.¹⁵ In boleq mataw bunmo hazizirib gilum kemeq gigo daq meqinta amenin bunmo tineg bugnan ham. Kam nab Iyahta in mataw God gileh ugad anad a hi muziniyta na ginan bilaqsa in gihol tiloyin kem daqay ham. Giloyin kemad in God gihar ugad gamuk atoranmo buloniyta na anadin a ta emad in gigo daq na loyinsa in daq meqin diqta tiquydaq ham.

¹⁶ Teq mataw katiya ne gilikmanib nawa osayta na in tutimmo gigem meqniyasa nan kabemmo bilaqayta. Ad in ginad meqinta gigemab usaqta naqmo muzinaya. In gihol abin atoranmo iluwad teq in mataw ginad wamuzgo haqad soysoy negayta.

Ne ginad helta naqmo in ne gigem zaway ugad usan

¹⁷ Ari ya iyognizmo diq, i gigo Iyahta Yesus Krais ago Aposel in nagah abeb

teq gwahtiqaqta na ago tibilaqiyta. Bi-laqan muran ne gamuk na anadin ta emiy.

¹⁸ Yesus ago Aposel in kazaq ne gibileniy, Kam abebtanta na bo sinsin tiqiya mataw God ago gamuk helta na tibilawun daqay haqiy. Ad in God gileh ugad in ginad meqinta gigemab gwahtiqaqta in tumuzin daqay haqiy.¹⁹ Mataw nazaq emayta na in Yesus ago on mataw gihuserayta. Teq in og ka ago ginad meqinta muzinsa God ago Bugaw Dimunta in gimuganib a hi usaqta.

²⁰ Ya iyognizmo diq, ne mataw naqanta hikidik gimuziniy. Tuteqmo ne ginad tawon diqta God anan helmo haqayta na amalib ne giwaz meqniyeq turiy. Ad kam bunmo ne God ago Bugaw Dimunta ago zaway amalib God inaq gamuk emiy.

²¹ God ne bunmo ginan anad bilaqsa ne in agerabmo diq iyeq ossa in ne giwamuza. Teq i gigo Iyahta Yesus Krais ne ginan anad meqniyasa in ago os dimunta kuluwa-kuluwmo osayta negnan bilamta na ne amen emeq osiy.²² Ad ne mataw ginad helta asitmo usaqta na ginan ginad meqniyasa giowan toniy.²³ Mataw asor faq ginoynan tonsa ne giwazeq gihureqid in ne gigo hib ta boleq dimunmo osiy. Teq mataw asor gigo daq meqinta in bilaqne giholsihen anumlan inaqta nazaq nogmo giholib usaqta. Nazaq iyan ne mataw na ginan ginad meqniyasa ne gihol waz naqmo hiqiyad teq gilumsihiy. Gilumsihad ne mataw na gigo giholsihen anumlan inaqta na rabunad hi waziy.

I bunmo God abin iluwuq

²⁴ Ari God ne giwamuza ne a hi woq daqay. Ad in ne giqemid ne in anognib gwahtiqeq ahol anuwan ayahtab turad ne giholib daq araq ananin waq daqayta na hiqiyas ne ginad dimniyasa titur daqay.

²⁵ God amomo in God iyim osaqla. Teq in i gigo Iyahta Yesus Krais ago kabiyl amalib i gilumsihim ta giwamta. Nazaq iyan i bunmo God abin sorid ulilib gwalsa in amomo i bunmo gigo maror ameb diqta iyeq osan. Ad in amomo zaway bunmo wazsa nagah bun diqmo in ahaqenib iyeq osad anad muziniyoma. Kwaziqmo diq in nazaqmo osta. Ad kam kab in nazaqmo osaqla. Teq abeb in nazaq tuqos tutdaqmo. Hel diqtaqmo.

Revelesen o **Krais gamuk ulilemabta Jon isihunta Gamuk ameb lehaqta**

Kwaziqmo uliq Rom-ub on mataw Yesus ago nan huriyatya na in kam meqin diqta waqiy. Kam nab Rom gigo king bilaqyaq, Yaqmo god haqyaq. Ne bunmo ya iwazinad gibakbakan orqayeq yaqmen tamaz emiy haqyaq. Haqsa Yesus ago on mataw gituw hiqiysa bilaq yaqay, Haiq haq yaqay, i gigo King amulikmo osaq haq yaqay. In anan Yesus haq yaqay. Haqsa Rom in on mataw na gimeqin diq tonad afaqan kabemmo negad teq in kabemmo ginol eman moq yaqay. Sa Jon in on mataw na gigem zaway negid in giwaz meqniyeq afaqan na sorad Yesus gileh a hi ug daqay haqad in gimen sansandek ka mar tonta.

Gamuk kab nagah kabemmo muran gwahtiqaqta na teq abeb gwahtiqaqta na ago gamuk awowun giqusaqta. Teq gamuk awowun ka alulin in kazaq. Yesus Krais in Iyahta iyim osad in og kab ago on mataw bunmo giwamuzim osaqtta. Ossa uliq Heven-ib nagah kayeqta bunmo in God teq in Atatin inaq gabin iluwad osayta. Teq og kab kabiy daq bunmo in God-mo anad muziniim lehaqta. Lehsa kam abebtanta nab teq God in Yesus abenab ago bab bunmo giwazid woqsa in Satan wazid tuwoqdaqmo. Kam nab Yesus in ago kabiy emid tihiqiyid teq God in on mataw zaway diq iyim osad gihol a hi hureq hasiyya na naw tinegdaq. Negid in God inaq ginad dimniyya kuluwa-kuluwmo osad in afaqan araq a ta hi waq daqay. Na ezaqgo bab bunmo tihiqiyid God in nagah bunmo emid muturtamo tihiqydaq.

Nazaq iyan kam bunmo Yesus ago on mataw inmo abinib afaqan soraya na in gamuk ka ahol waqad in ginad a hi meqniyya afaqan sorad giwaz meqniyeq tuqos daqay.

Yesus Krais in ago on mataw gidauhan 7 nazaq gimen nan am

¹ Gamuk ka kwaziqmo ulilemim ussa Yesus Krais eman ulalab gwahtimta. Gwah-tiqan God in Yesus-mo atowun emim gamuk ka ugtta. In anad Yesus gamuk ka waqeq ago kabibiy mataw gibilensa in nagah hidmo gwahtiqaqta na ago thurit daqay haqad. An Yesus in ago angelo araq eman ago kabibiy mat Jon ago hib lehim gamuk ka bulonta. ² Bulonan Jon in God ago gamuk teq Yesus abin in huriitta ka mar

tonad in ameb nagah ahol wamta kagan awagamun inaqmo wastitayimmo tumar tonmo. ³ Mat God ago nantut agamukan ka ahol waqad bilaqqaqta na in gamuk ka muzin bugeq teq in tidimniyyadaq. Ad on mataw gamuk ka huritad osayta na in nazaqmo gamuk ka muzin bugeq teq in tidimniyyadaqyomo. Na ezaqgo nagah ka akamun sinsin tiqiyaqta na ago iyan.

*Jon in Yesus ago on mataw gidauhan 7
nazaq gimen gamuk mar ton nag*

⁴⁻⁵ Yaqmo Jon. Ya gamuk ka mar tonim eman Yesus ago on mataw gidauhan 7 saw Esiya-ib osayta na gigo hib lehaq.

I gigo God kwaziqmo osta teq muran in os tutaqta teq abeb in boldaqtam. In teq bugaw 7 in ago ban tawonta na ameb turayta na teq Yesus Krais inaq in bunmo gigem dimunta negad teq in ne giqemid gigem kute nemsa osiy.

Yesus in God ago gamuk wastitayimmo diq bilaqqaqta. Teq mataw tumoqiyta giликmanib inmo danmeb hodhodab eramta. Eraqim in king og kabta na bunmo giwamuzim osaqtta. I gigo daq meqinta i giqirquran ossa inmo anedan amalib i giqamun na tihas ig. ⁶ Has igim in i giqeman i in ago maror aduganib tugwah-tiqim i God ago on mataw tamaz emayta tihiqiyid osaqtta. Nazaq iyan kam bunmo i Yesus abin ayahta na iluwsa in zaway diq iyeq nagah bun diqmo giwamuzad kuluwakuluwmo osan. Hel diqtaqmo.

⁷ Ne gidek emiy.

In onqas amalib oseq bolsa on mataw bunmo ahol tuwaq daqay, mataw emub ulumiyya na inaqmo.

Ahol waqad on mataw en bunmo og kab osayta na gaq wazad ginad meqniy hiziqiy daqay.

In nazaqmo diq tihiqydaq. Hel diqtaqmo.

⁸ God Iyahta bilam, Nagah bunmo gilulin na yaqmo ham. Ad nagah bunmo hiziqydaqta akaman na yaqmo wazaiqta ham. God Zaway Bunmo Wazaqta na in nazaq bilamta. In muran osaqtta teq kwaziqmo in osta teq in abeb boldaqtam.

Jon in Krais ahol wam

⁹ Ya ne gimaqbab Jon. Ya nenaq i araqibmo Yesus muzad afaqan sorauqta. Ad Yesus ne giqeman ne God ago maror aduganib osayta nazaqmo in ya iqeman ya ne nenaq God ago maror aduganib tuqosaiqtamo. Teq in ne zaway negsa ne afaqan sorad gituw a hi hiziqyaqta nazaqmo in ya ilumsihsa ya afaqan sorad ituw a hi hiziqyagtamo. Ya God ago gamuk anan helmo haqad Yesus abin ulalabmo bilaqaiqta na ago mataw ya iwazim nud anan Patmos haqayta kab iqemiy. ¹⁰ Iqeman ossa ari Iyahta ago kam Sande araqab in

ago Bugaw Dimunta ya iholib ayahmo bol. Bolan ya ibun ban mat araq atoranmo lileysa ya in aqez bilaqne taur ulamayta nazaq nog ya hurit. ¹¹ Sa mat na lileyim bilam, Nagah bunmo ni ahol waqdaqta na ni buk-ib mar toneq emid Yesus ago on mataw gidauhan 7 na gigo hib lehan ham. Yesus ago dauh uliq Efesus-ibta na teq uliq Samerna-ibta na teq uliq Pergamum-ubta na teq uliq Tayataira-ibta na teq uliq Sardis-ibta na teq uliq Filadelfiya-ibta na teq uliq Laodisiya-ibta na gigo hib ni nagah ahol waqdaqta na agamukan emid lehan ham.

¹² Haqsa ya ihol tubuliy, mat nog ibilen-naqta na ahol waqdaiq haqad. Ya ihol bulyim lam 7 nazaq gol-ib emiyta ahol way. ¹³ Ahol waqad ya mat araq lam na gilikmanib luwaqta na, mat na kazaq ne gibilenaq ham. ¹⁴ Ya ne gigo kabiy daq bunmo ne emayta na tuhurit ham. Ad ne giholtuw bulad zaway iyim tursa ya tigibimo ham. Ne mataw meqinta nenaq osnan gituw hiqiyyata ham. Teq mataw katiyad bilaqy, I inaqmo aposel-mo haqayta na ne gilum kemim gigo daq katyta na ahol waq kemayta ham. ¹⁵ Ya ibin ne giholib usaqta na ago mataw ne gimeqin tonayta ham. Gimeqin tonsa ne zaway diq iyim turad afaqan na sorad gituw a hi hiqiyyata ham. Ne gigo daq na bunmo ya tuhuritta ham.

¹⁶ Teq in aben aqabun ban ulig 7 nazaq giwazta. Ad baqir araq ame gigerta ame meqin diqta atenmosib gwahtiqim usta. Teq in anobun bilaqne zeq atoranmo oyaq nazaq nog ya ahol wayta. ¹⁷ Ahol waqad ya in asen agerab woqim ya bilaqne mat tumomta nog iyim us. Ussa in aben aqabun ger ya iholib emim iwazad ibilan, Ni hi rab ham. Ya mat aqen diqta teq ya mat abebtantom ham. ¹⁸ On mataw kayeqmo kuluwa-kuluwmo osayta na alulin yaqmo ham. Ya tumoyma ham. Teq ni ya ibiy ham. Ya kayeqmo osaip ham. Osad ya kuluwa-kuluwmo tuqos tut-daiq ham. Yaqgo zaway kazaq usaq ham. Ya mataw tumoqiyta gidanin has negid in mataw moqiyta gigo uliq huloseq tugwah-tiq daqay ham. Teq ya in gidanin otid in uliq nab tuqos tut daqay ham. ¹⁹ Nazaq iyan nagah ni ahol tuwamta ka bunmo ni mar ton ham. Ad nagah muranta teq nagah abeb teq gwahtiqdaqta na inaqmo ni mar tonmo ham. ²⁰ Ari ya iben iqabnib ulig 7 usaqta ka teq lam gol-ib emiyta ka gilulin ulilemim usaqta na ya tinibilennan ham. Ulig 7 na in yaqgo on mataw gidauhan 7 na gigo angelo amulik-mulikmo gitowun ham. Teq lam 7 na in yaqgo dauh 7 naqmo gitowun ham.

Yesus in ago on mataw uliq Efesus-ib osayta na gimen gamuk bilam

¹ Haqad mat na ya ibilenim bilam, Ari ni yaqgo on mataw uliq Efesus-ib osayta na gigo angelo amen gamuk kazaq mar ton ham.

Mat aben aqabnib ulig 7 giwazaqta na teq in lam gol-ib emiyta 7 gilikmanib luwaqta na, mat na kazaq ne gibilenaq ham. ² Ya ne gigo kabiy daq bunmo ne emayta na tuhurit ham. Ad ne giholtuw bulad zaway iyim tursa ya tigibimo ham. Ne mataw meqinta nenaq osnan gituw hiqiyyata ham. Teq mataw katiyad bilaqy, I inaqmo aposel-mo haqayta na ne gilum kemim gigo daq katyta na ahol waq kemayta ham. ³ Ya ibin ne giholib usaqta na ago mataw ne gimeqin tonayta ham. Gimeqin tonsa ne zaway diq iyim turad afaqan na sorad gituw a hi hiqiyyata ham. Ne gigo daq na bunmo ya tuhuritta ham.

⁴ Teq yaqgo gamuk araq kazaq ne gigo hib lehaq ham. Mebmembmo diq ne ya inan helmo haqiyta nab ne ya inan ginad diq bilaqyata ham. Ari muran ne ya inadin ayahmo diq a hi emayta ham. ⁵ Nazaq iyan ne ban ulilibta nab osim woqiyta na anadin emiy ham. Ne ginad buliyeq ne gigo daq meqinta gileh ugad mebmembmo ne daq dimdimunta em yaqayta na ne a ta em toniy ham. Haiq iyid ya ne gigerab leheq ne gigo lam na abanab tuwalemdaiq ham. Ne ginad a hi buliyyid ya nazaqmo tiqem-daiq ham. ⁶ Teq ne gigo daq dimunta araq na in kazaq ham. Ne on mataw Nikolas muzayta na gigo daq hulosmo diq hulosayta ham. Ya nazaqmo ham. Ya in gigo daq anan inad a hi bilaqaq-tamo ham. ⁷ Ari mat adek inaqta na in Bugaw Dimunta yaqgo on mataw gidauhan bunmo gamuk gibilenaqta ka huriteq anad eman ham. On mataw zaway meqinta qiquriyam bug daqayta na bunmo ya gibilenaq in ay anon neqim kuluwa-kuluwmo osayta na tineq daqay ham. Ay na God ago saw dimunta Paradais-ib turaqta ham.

Yesus in ago on mataw uliq Samerna-ib osayta na gimen gamuk bilam

⁸ Haqad mat na ibilenim bilam, Ari ni yaqgo on mataw uliq Samerna-ib osayta na gigo angelo amen gamuk kazaq mar ton ham.

Mat aqen diqta na teq abebtanta na, in ne gibilenaq ham. In momta teq muran in kayeqmo osaqa ham. Mat na kazaq ne gibilenaq ham. ⁹ Ne afaqan sorad samanmo ginaghan haiqmo osayta na ya tuhurit ham. Ta teq ne giwitan

gigo nagah kabemmo diq usaqta ham. Ad mataw asor ne gibilawunayta na ya tuhuritmo ham. Mataw na bilaqay, I Juda-mo gisenlul haqayta ham. Teq in Juda gisenlul a haitqa ham. Na in Satan-mo asenlul ham.¹⁰ Ari afaqan kazaq teq ne gigo hib gwahtiqsa ne hi rabad gihol asawan woltayeq osiy ham. Ne gidek emiy ham. Satan teq ne asor gihunegid bit giqirquran osaytab tileh daqay ham. Daq na ne gilum waqgo giholih gwahtiqdaqta ham. Gwahtiqid ne afaqan teq sanctity na kam 10 nazaqtisор daqay ham. Sorad ne helmo haqad oseq le ne moq daqayta akaman nab ne moqiy ham. Id teq ya os dimunta kuluwa-kuluwmo osayta na naw nog tinegdaiq ham.¹¹ Ari mat adek inaqta na in Bugaw Dimunta yaqgo on mataw gidauhan bunmo gamuk gibilenaqta ka huriteq anad eman ham. Mat aw nog zaway meqinta giquriyam buqeq in moq gigerta na a hi loyin daqay ham.

Yesus in ago on mataw uliq Pergamum-ub osayta na gimen gamuk bilam

¹² Haqad mat na ibilenim bilam, Ari ni yaqgo on mataw uliq Pergamum-ub osayta na gigo angelo amen gamuk kazaq mar ton ham.

Mat ago baqir ame gigerta ame meqin diqta inaq na in kazaq ne gibilenaq ham.¹³ Ya uliq ne osayta na ago tuhurit kem ham. Satan in ago marorgo ban eman ne gigo uliq nabmo diq usaqta ham. Ta teq ne ya ibin waz naqmo hiqiyayta ham. Kwaziqmo mat ya inad muz bugad yaqgo gamuk bilayqata anan Antipas haqayta na in ne gilikmanib ossa mataw wol emiyta ham, uliq Satan osaqta nabmo ham. Teq kam meqinta nab ne ya inan helmo diq haqad gileh a hi yagiy ham.

¹⁴ Ari yaqgo gamuk asor kazaq ne gigo hib lehaq ham. Ne gigo mataw asor Balam ago daq muzinayta ham. Kwaziqmo Balam in Balak isihunan Balak in Isrel on mataw kat negad gihureqsa in daq meqintab woq yaqayta ham. Balak in Isrel on mataw kat negsa in god katiyta giyon tamaz akaruan neqdad teq in an haresmo hureq yaqayta ham.¹⁵ An nazaqmo Nikolas asenlul nenaq in daq meqinta ne gicisihunsa ne gigo asor in muzinaytamo ham.¹⁶ Nazaq iyan ne ginad buliyad ne gigo daq meqinta na gileh ugij ham. Ne nazaq a hi emid teq ya hidmo ne gigo hib tilehdaiq ham. Leheq yaqgo baqir iteb kawa usaqta ka amalib ya mataw na nenaq an twoldaiq ham.¹⁷ Ari mat adek inaqta na in Bugaw Dimunta yaqgo on mataw gidauhan bunmo gamuk gibilenaqta ka

huriteq anad eman ham. Mat aw nog in zaway meqinta giquriyam bugid ya manna bret kaitib woqim ulilemim usaqta na tinegdaiq ham. Ad ya gig araq husta tinegdaiqmo ham. Gig nab in giholnan muturta mar tonan usaqta ham. Mat araq diq in ginan muturta na a hi huritdaq ham. Mat gig wamta naqmo amomo in aholnan muturta na tuhuritdaq ham.

Yesus in ago on mataw uliq Tayataira-ib osayta na gimen gamuk bilam

¹⁸ Haqad mat na ibilenim bilam, Ari ni yaqgo on mataw uliq Tayataira-ib osayta na gigo angelo amen gamuk kazaq mar ton ham.

God atatin na ham in ameqnagin bilaqne faq atoranmo oyaq nazaq nogta ham teq in asen bilaqne ain baras hikliyan nog iyaqta ham in kazaq ne gibilenaq ham.¹⁹ Ya ne gigo daq bunmo ne emayta na ago tuhurit ham. Ne on mataw ginan ginad diq bilaqaqta ham. Teq ne ya inan helmo haqaytamo ham. Ne on mataw gilumsihad kabiy dimunta emayta ham. Ad ne afaqan sorad zaway diq iyim turayta ham. Teq muran ne gigo daq dimunta ne emayta na in kwaziqmo ne daq em yaqayta na giquriyam bugaq ham. Daq bunmo ne emayta na ya tuhuritta ham.

²⁰ Teq yaqgo gamuk araq kazaq ne gigo hib lehaq ham. Ne aw anan Jezabel haqayta na hulosan in ne gilikmanib osaqta ham. Aw na bilaqaq, Ya God ago tantut araq haqaq ham. Haqad in yaqgo kabibiy on mataw kat negsa in an haresmo hureqad teq in god katiyta giyon tamaz akaruan neqayta ham.²¹ Ya inad aw na anad buliyan haqad ya hulosan osaqta ham. Ta teq hajq ham. In ago daq meqinta na gileh ugnan atuw hiqiyaq ham.²² Nazaq iyan ne gidek emiy ham. Ya aw na moq araq ayahta tuqugdaiq ham. Ad aw na ayogniz in inaq daq meqinta emayta na in ginad buliyeq aw na ago daq meqinta na a hi hulosid teq ya afaqan ayahmo in tinegdaiqmo ham.²³ Negad ya aw na ago onmin ginol emid tumoq daqaymo ham. Nazaq iyid teq yaqgo on mataw gidauhan bunmo in yaqgo tuhurit kem daqay ham. Ya mataw bunmo ginad teq gigem gilum kemaiqta ham. Gilum kemad ya ne amulik-mulikmo gigo daq hanibimo amenin tinegdaiq ham.

²⁴ Ari ne on mataw ta asor uliq Tayataira-ib osayta na ham ne aw na ago suleq meqinta a hi muziyta ham. Ad daq asor anan Satan ago suleq awaz meqinta haqayta na ago ne a hi huriitytamo ham.

Ya ne kazaq gibilenaiq ham. Ya kabiy afaqanta araq a hi negdaiq ham.²⁵ Daq amulikmo ne em daqayta na in kazaq ham. Nagah bunmo ne wazayta na ne waz naqmo hiqiyeq ossa le ya muleqeq ta boldaiq ham.²⁶ Ari mat aw nog in zaway meqinta giquriyam bugad teq in yaqgo daq bunmo muzinad oseq le in gigo kam abebtanta iyid teq,

Ya on mataw na zaway negid in on mataw en bunmo tigiwamuz daqay ham.

²⁷ Giwamuzad in gwatuq ain-ibta wazeq amalib ginol titasya in dahu amikmikta tiqiy daqay ham.

Bilaqne mat reb wolzilayid tiqdaqta nazaq ham.

Ya imam zaway yagan ya on mataw giwamuzaqta nazaq ya in zaway negid in on mataw tigiwamuz daqaymo ham.²⁸ Ad in bab bunmo giquriyamiya na amenin ya ulig boy na tinegdaiq ham.²⁹ Ari mat adek inaqtta na in Bugaw Dimunta yaqgo on mataw gidauhan bunmo gamuk gibilenaqta ka huriteq anad eman ham.

3

Yesus in ago on mataw uliq Sardis-ib osayta na gimen gamuk bilam

¹ Haqad mat na ibilenim bilam, Ari ni yaqgo on mataw uliq Sardis-ib osayta na gigo angelo amen gamuk kazaq mar ton ham.

Mat aholib God ago bugaw 7 giqusaqta na teq in ulig 7 giwazaqta na in kazaq ne gibilenaq ham. Ya ne gigo daq bunmo ne emayta na ago tuhurit ham. Ne gibin mataw God anan helmo diq haqayta nazaq usaqta ham. Teq haiq ham. Ne bilaqne mataw tumoqiyta nog iyay ham.² Nazaq iyan ne gime rireqeq saw waqad osiy ham. Ne gigo daq dimunta amulik-mulikmo us tutaq ham. Daq nagan tihiqiyan diq tonaqta teq ne ulumsihsa in hi hiqiyian ham. Na ezaqgo ya ne gigo daq araq God ameb titnonim usaqta na ahol a hi waqaiq ham.³ Nazaq iyan gamuk ne kwaziqmo huritim waqiyta na ne anadin ta emiy ham. Anadin emad ne ginad biliyad gamuk na anononmoo muziniy ham. Ari ne gime rireqeq saw a hi waqsa teq kam araq ne a hi hurit daqayta nab ya tuboldaiq ham. Bolad mat rin tonaqta kiskismo bolaqta nazaq ya boleq ne tigiritewundaiq ham.

⁴ Teq ne gigo on mataw asor Sardis-ib osayta na in gigo tubusan eman anumlan inaq a hi iyta ham. On mataw na dimunta iyim abeb in tubusan husta emid ya nenaq loq gelad tiluwamta ham.⁵ Mat aw nog in zaway meqinta

giquriyam bugid teq ya tubusan husta giholib tiqemdaiq ham. Ad yaqgo buk on mataw kayeqmo kuluwa-kuluwmo os daqayta ginan usaqta nab ya in ginan a hi suholdaiq ham. Teq ya in gabin ya imam ago angelo nenaq gimeb tibilagdaiq ham.⁶ Ari mat adek inaqtta na in Bugaw Dimunta yaqgo on mataw gidauhan bunmo gamuk gibilenaqta ka huriteq anad eman ham.

Yesus in ago on mataw uliq Filadelfiya-ib osayta na gimen gamuk bilam

⁷ Haqad mat na ibilenim bilam, Ari ni yaqgo on mataw uliq Filadelfiya-ib osayta na gigo angelo amen gamuk kazaq mar ton ham.

Mat tawon diqta na teq in daq helta alulin diqta na teq in King Devit ago ban waqim abinib turaqta na teq in dan ez hasid a hi ot daqayta na teq in dan ez otid a hi has daqayta na, mat na kazaq ne gibilenaq ham.⁸ Ya ne gigo daq bunmo ne emayta na ago tuhurit ham. Ne ahol waqiy ham. Ya ne ginognib dan ez hasan usaq ham. Mat araq dan ez na otdaqta haiq ham. Teq ne gigo zaway asitmo na ago ya tuhuritmo ham. Ta teq ne yaqgo gamuk muzinad ne ya gileh a hi yagayta ham.⁹ Ne gidek emiy ham. Mataw asor bilaqay, Igmo Juda gisenlul haqad teq in Satan-mo asenlulta na, mataw na in Juda gisenlul a haiqta ham. Na in mataw gimeileq meqinta ham. Nazaq iyan ne gime tih nemeq usan. Ya mataw na giqemid in boleq negmo ginognib gibakbakan tuqu-lum laquw daqay ham. Ya nazaq gitonid teq in ginad tiqem daqay, Ya negmo ginan inad diq bilaqqaqta haq daqay ham.¹⁰ Ya ne gibilenan ne zaway diq iyim turad afaqan tisoriyta ham. Nazaq iyan ya ne giwamuzad gilumsihsa afaqan on mataw bunmo gilum waqdaqta na in ne a hi gimeqin tondaq ham. Afaqan na in nawa on mataw og saw bunmo osayta na gigo hib tugwahtiqlar tonaq ham.¹¹ Ya hidmo ne gigo hib nawa tilehaiq ham. Nazaq iyan nagah ne gibebab tuwazayta na ne waz naqmo hiqiyiham. Luweq mat araq ne gigo ban waqeq naw ne waq nagiyta na immo waqdaq ham.

¹² Ari mat aw nog in zaway meqinta bunmo giquriyam bugid teq ya in giqemid in tituq nog yaqgo God ago bitab titur daqay ham. Turad in God ago bit na huloseq asanib asit a ta hi gwahtiq daqay ham. Sa yaqgo God aholnan teq in ago uliq anan ya on mataw na giholib tumar tondaq ham. Uliq na anan Jerusalem Muturta haqayta ham. Yaqgo God in uliq na emid in Heven huloseq gehitiqdaqta ham. Ad yaqmo

iholnan muturta ya in giholib tumar tondaiqmo ham. ¹³ Ari mat adek inaqta na in Bugaw Dimunta yaqgo on mataw gidauhan bunmo gamuk gibilenaqta ka huriteq anad eman ham.

Yesus in ago on mataw uliq Laodisiya-ib osayta na ginem gamuk bilam

¹⁴ Haqad mat na ibilenum bilam, Ari ni yaqgo on mataw uliq Laodisiya-ib osayta na gigo angelo amen gamuk kazaq mar ton ham.

Mat heltaqmo haqad God ago gamuk bunmo titnonimmo bilaqaqta na teq in nagah bunmo God giqamta na alulinmo diqta na, mat na kazaq ne gibilenaq ham. ¹⁵ Ya ne gigo daq bunmo ne emayta na ago tuhurit ham. Ne muditqan diq a hajq ham. Teq ne afan diq a hajqmo ham. Ya inad ne afanfan iiyi haqaiq ham. O ne muditqan diq iiyi haqaiq ham. ¹⁶ Teq hajq ham. Ne afanfanta teq muditqanta gigo liqabmo iyayta ham. Ne afanfan diq a hi iyayta ham. Teq ne muditqan diq a hi iyaytamo ham. Nazaq iysa iyan ya ne ginan ituw hiqiysa iteb ginilid ne tugwahtiq daqay ham.

¹⁷ Ne ginad emay i gigo mani kabemmo haqayta ham. I ginaghan kabemmo usaqta haqayta ham. I nagah araq ago siqim a hi iyaq haqayta ham. Teq hajq ham. Ne meqin diq osayta na ago ne ginad a hi emay ham. Mataw ne gibiyad in ginad diq meqniyatta ham. Ne gime hajqta teq ne saman diqmo gibe aholmo osayta ham. Ad negmo nagah na ago ginad a hi em hasayta ham. ¹⁸ Nazaq iyan ya inad ka diqta ne tinegnan ham. Ne yaqmo igo gol ka zayiy ham. Gol ka faq oyan anaghan meqin usta na muruwoqim tihitimta ham. Ne yaqgo gol ka zayeq teq ne nagah araq ago siqim a ta hi iy daqay ham. Ad ne yaqgo tubusan husta zayeq giholib emiy ham. Emeq ne gibe aholmo luwad gimebay wogaqta na tihiqyidaq ham. Ad ne yaqgo marasin zayeq gimeqnagnib emiy ham. Emeq ne saw anononmo ahol tuwaq daqay ham. ¹⁹ Ya mataw ginan inad bilaqaqta na gina nad ya in gigo daq wastitayiqta ham. Nazaq iyan ne giwaz diq meqniyiy ham. Ad ne ginad buliyeq gigo daq meqinta gileh ugiy ham.

²⁰ Ahol waqiy ham. Ya dan ez wol hamad turaiq ham. Mat araq ya iquez hurit dan has yagid teq ya gwah-tiqeq in inaq tuqosdaiq ham. Osad ya inaq i garabmo didaq tineqam ham. ²¹ Ari mat aw nog in zaway meqinta giquriyam bugid teq ya in gibilenid in ya inaq yaqgo ban tawontab osad nagah bunmo tigiamuz daqay ham. Ya zaway

meginta bunmo giquriyam bugim teq ya imam inaq ago ban tawontab osad wojim osad nagah bunmo giwamuzaqta nazaq ham. ²² Ari mat adeksan inaqta na in Bugaw Dimunta yaqgo on mataw gidauhan bunmo gamuk gibilenaqta ka huriteq anad eman ham.

Sipsip Amidon in Heven-ib buk araq hasan nagah meqmeqinta on mataw ogib osayta na gigo hib gwahtim

4

Heven-ib nagah bunmo God abin iluwayta

¹ Ari daq na abe ban ya saw ahol waqim kaitib dan ez araq hasan ussa ya ahol way. Ahol waqsa mat mebmebmo aqez ahuritan bilaqne taur ahuritan nog iysa ililewunta na in ya a ta ibilenum bilam, Ni kab gabol ham. Gabolid ya nagah bunmo abeb teq gwahtiqdaqta na tiniqishundaiq ham. ² An hid naqmo God ago Bugaw Dimunta ya iholib ayahmo tubol. Bolan ya king ago ban tawonta araq Heven-ib ussa ahol way. Ad mat araq ban tawonta nab ossa ya ahol waymo. ³ Mat na ahol anuwan in bilaqne gig jaspa teq gig kakaqta anan koniliyan haqayta na ginuwan nogta. Teq nagah araq bilaqne mam kaitib gwalaq nazaq nogta in ban tawonta na amatin inaqgilut negim us. Ad mam na awaqaq bilaqne gig kuleetta anan emerald haqayta na awaqaq nog. ⁴ Sa marorgo ban kabemmo 24 nazaq in ban tawonta na lilut ugim usiyomo. Sa mataw marorta 24 nazaqmo in ban nagab osiy. Mataw marorta na gigo tubusan sisqata teq in hus diqta. Ad in gifaqinib king gigo balaw gol-ib emiyta giqusta. ⁵ Teq ban tawonta liqabmo usaqta nab ya ime lehim mewlig hikliyanim haresmo lehsa ya ahol way. Ad ya idek emim nagah haresmo ahulan teq kait ahulan ayahmo ya hurit. Teq ban tawonta na ameblam 7 nazaq oyad os. Lam 7 na in God ago bugaw 7 naqmo. ⁶ Teq ban liqab usta na anobun ban nagah araq bilaqne kamis ayahta hikliyanad ussa ya ahol way. Kamis na ame dimun diq wazmisiwanan usta.

Teq nagah aweweEqmo kayeqmo osayta ban liqabmo usaqta na adek adek ban gitursa ya gibiy. In gimeqnagin kabemmta gihol bunmo isih bugta, ginobun ban teq gibun ban inaqmo. ⁷ Nagah aweweEq na gigo araq awaqaq laiyon awaqaq nogta. Teq gigerta na awaqaq bulmakau matta awaqaq nogta. Teq ezeqmanta na anobun bilaqne mat anobun nogta. Teq aweweQta na awaqaq bilaqne tirkaw melim lehaq

nazaq nogta. ⁸ Nagah aweweEq kayeqmo osayta na giben gayik 6 nazaq giqusta. Ad in gimeqnagin na giben gayik adeqlotab usad in gihol bunmo giqisih bugta. Tutimmo zeqab taromab inaqmo in bilaqay,

Iyahta God Zaway Bunmo Wazaqta haqayta.

In tawon diqta haqayta.

In tawon diqta haqayta.

In tawon diqta haqayta.

Kwaziqmo in osta haqayta.

Teq muran in os tutaqta haqayta.

Ad abeb teq in boldaqtam haqayta.

Haqad in gamuk na bilaqad in ginamur a hi emaya.

⁹⁻¹⁰ Teq Kuluwakuluw ago ban tawonta nab ossa nagah aweweEq kayeqmo osayta na in wazinad abin iluwad esey ugayta. Sa mataw marorta 24 na in Kuluwakuluw anognib gihol hulosan woqim usad abin iluwatta. Ad teq in gifaqinib balaw golibta na in waqim hunegan le ban na asenab woqqaqtu. ¹¹ Ad in bar wazad bilaqay,

I gigo Iyahta teq i gigo God haqay ni nibin dimun diqmo usaqta haqayta.

Mataw ni nimomo nibin iluw daqay haqayta.

In ni nimomo niwazin daqay haqayta.

Ni nimomo zaway bunmo wazaqta haqayta.

Na ezaqgo ninmo nagah bunmo giqamta na ago haqayta.

Ninmo ninad bilaqsa nagah na bunmo osayta haqayta.

Ninmo ninad bilaqsa ni nagah na giqeman gwahtiqa haqayta.

5

Heven-ib buk araq otan ussa Jon ahol wam

¹ Ari God in ago ban tawonta nab ossa buk araq aben aqabnib ossa ya ahol way. Buk na in sansandek araq sisaq diqta anobun ban abun ban inaqmo mar emim teq in tal tonim ay aqagin 7 nazaq giwaqim amalib adek eman soqotta. ² Ad ya angelo araq awaz meqin diqta ahol waymo. In atoranmo lileyim kazaq bilam, Nog ahol abin dimun diqta in buk ka waqeq aqagin hiknerad teq in hasdaq? ham. ³ Haqan Heven-ib teq ogib teq og aduganib mat araq diq buk na haseq aduganib gamuk usaqta ahol waqdaqta na haiq diqmo. ⁴ Mat araq buk na haseq adugan diq ahol waqdaqta haiqgam iyan ya gaq ayahmo tigaqyaq. ⁵ Gaqsa mataw marorta 24 na gigo araq ya ibilenim bilam, Ni hi gaq ham. Mat bab emim ago bab bunmo tigiquriyam bugta ko ni ahol waq ham. Isrel gigo gem anan Juda haqayta na giduganib laiyon gwahtiqa daq haqad bilaqita na inmo kowa ham.

Teq King Devit asenlul giduganib atitoqin gwahitiqdaq haqiyta na in kowaqmo turaq ham. Nazaq iyan inmo buk aqagin 7 na hiknereq buk na tihasdaqta ham.

Jon in Sipsip Amidon ahol wam

⁶ An ya ime lehim Sipsip Amidon araq wol eman momta nog tursa ya ahol way. In King ago ban tawonta na agerab turad in nagah aweweEq kayeqmo osayta na teq mataw marorta 24 ban lilut ugim osayta na gilikmanib turyaq. Tursa in afaqinib adanidin 7 nazaq tursa teq ameqnagin 7 nazaqmo ussa ya ahol way. In ameqnagin na in God ago bugaw 7 God giqeman og saw bunmo lehaya naqmo.

⁷ Ari Sipsip Amidon na lehim mat ban tawontub aben aqabnib buk wazim osta na abenab buk na tuwam. ⁸ In buk na waqanno nagah aweweEq kayeqmo osayta na teq mataw marorta 24 na in gihol hulosan Sipsip Amidon na anognib tuwoqiy. In bunmo gita teq deg gol-ibta aduganib nal ahuran dimunta usaqta na in waziy. Nal ahuran dimunta na in God ago on mataw tawonta gigo gamuk in God bulonayta naqmo atowun. ⁹ In nagah na wazim ogib usad in bar araq muturta kazaq waziy.

Ni nibin dimun diqta iyim ni buk na waqeq aqagin tihknerdaq haqiy.

Na ezaqgo in ni ninol eman ni momta haqiy.

Moqim ni ninedan amalib on mataw en bunmo, teq gigo nan bunmo, teq gisan bunmo, teq uliq saw haresmo osayta na bunmo gigo hib, ni on mataw gizayan in God ago tawonta tiziqiyim osayta haqiy.

¹⁰ On on mataw na giqeman in God ago maror aduganib gwahtiqa, in God ago on mataw tamaz emaya tiziqiyim, in God amomo anad muzad luwayta haqiy.

Teq in bunmo maror iyeq ogib on mataw bunmo tigiwamuz daqaymo haqiy.

Heven-ib nagah bunmo Sipsip Amidon abin iluwiy

¹¹ Ari ya saw a ta waqim angelo kabemmo teq nagah aweweEq kayeqmo osayta na teq mataw marorta 24 na in King ago ban tawon diqta na lilut ugim tursa ya gibiy. Gibiya in gidauhan kuluwmo diq handret milyon nazaq turad giqez iysa ya hurit. ¹² Sa in atoranmo lileyim kazaq bilaqiy,

Sipsip Amidon kwaziqmo wol eman momta na abin dimun diqmo usaqta haqiy.

In awaz meqin diqta haqiy.

In ago nagah dimdimunta kuluwmo haqiy.

In anad awaz meqintaqmo haqiy.

In zaway bunmo wazaqta haqiy.

On mataw bunmo in wazin daqayta haqiy.

On mataw bunmo in abin iluw daqayta haqiy.

On mataw bunmo in anan ginad dimniysa esey diq ug daqayta haqiy.

¹³ Sa Heven-ib teq ogib teq og aduganib teq kamisib nagah bunmo God giqeman kayeqmo osayta na in bilaqiy.

On mataw bunmo in mat ban tawontab osaqtta na ayow Sipsip Amidon na inaq ginan ginad dimmiyiy haqiy.

Ad in giwazinad gibin iluwiy haqiy.

Teq in giger zaway bunmo wazad in nazaqmo kuluwa-kuluwmo osiy haqiy.

¹⁴ Sa nagah aweweinq kayeqmo osayta na bilaq yaqay, Hel diqtaqmo haq yaqay. Haqsa mataw marorta ²⁴ na gihol hulosan ogib woqim usad in God abin tiqiluwiy.

6

Sipsip Amidon buk aqagin gihiknar

¹ Ari ya Sipsip Amidon ahol waqsa in buk aqagin araq tihiknar. Anmo nagah aweweinq kayeqmo osayta na gigo araq aqez bilaqne kait ahulan iyaq nazaq nog iyad in bilam, Ni bol haqsa ya hurit. ² Samo ya saw waqim hos araq husta ahol way. Teq mat araq hos na amalib kilek wazim bolsa ya ahol waymo. Ahol waqsa king gigo balaw gifaqinib emayta araq ugan in mat bab giquriyamdaqta tiqiyim in ago bab ginolnan tilah.

³ Sa Sipsip Amidon buk aqagin gigerta na tihiknar. Anmo nagah kayeqmo osaqtta gigerta na bilam, Ni bol haqsa ya hurit. ⁴ Samo hos ta araq kakqaqta bo tilah. Lehsa mat hos na amalib osta na zaway ugan in tamaz akaman muz bugid mataw an wol emid moq daqayta na ago azawayin in aholib us. Sa in baqir araq ayahta ugymo.

⁵ Sa Sipsip Amidon buk aqagin ezeqmanta na tihiknar. Anmo nagah kayeqmo osaqtta ezeqmanta na bilam, Ni bol haqsa ya hurit. Samo ya saw a ta waqim hos araq dubta bo lehsa ya ahol way. Teq mat hos na amalib osta na abenab in skel araq wazim os. ⁶ Sa nagah aweweinq kayeqmo osayta na gigo araq in bulonim bilam, Ni leheq ningko kabiy emsa mataw didaq ago siqim iyiham. Siqim iyeq teq in kam amulikmo ago kabiyta amenin mani waqeql in wit deg amikta amulikmo o bali deg amikta ezeqmanmo zayiy ham. Ta teq ni masil ayow wain ayun inaq hi gimeqin ton ham.

⁷ Sa Sipsip Amidon buk aqagin awewepta na tihiknar. Samo nagah kayeqmo osaqtta

awewepta na bilam, Ni bol haqsa ya hurit. ⁸ Samo ya saw a ta waqim mat araq hos maliyta amalib osim bo lehsa ya ahol way. Mat hos na amalib osta na anan Moq haqayta. Teq on mataw tumoqiyta gigo uliq anan Hades haqayta na in Moq muzim inaq lehyaq. Ad giger na gibenab in zaway kazaq waziy. In leheq baqir teq zarow teq moq haresmo teq ogib karuw kwasikta nagan gimalib in mataw ginol em daqayta. Ginol emsa on mataw kabemmo tumoq bug daqay.

⁹ Sa Sipsip Amidon buk aqagin abaynaginta na tihiknar. Samo ya ime lehim ban God ayon tamaz emayta na ahaqenib on mataw tumoqiyta giwitan ossa ya gibiy. On mataw na God ago gamuk waz naqmo hiqiyad bilaqsa bab ginol eman moqiyta. ¹⁰ Ya gibiysa in atoranmo lileyim kazaq God buloni, Iyahta haqiy ni titnonim diq osaqtta haqiy. Teq ningko daq bunmo hel diqtaqmo haqiy. I kam sisaoqmo nibaq tunim tuqos haqiy. Kam gineh teq ni on mataw ogib osayta na hazizirib gigemeq in i ginedan wazbaliyya na aqenin ni in gigo hib tuwaqdaq? haqiy. ¹¹ Haqan in on mataw na amulik-mulikmo tubusan husta sisaoqta tinegiy. Negad in kazaq gibileniy, Ne ginamur asitmo ta emiy haqiy. Ne gimaqbaban asor ne nenaq garab kabiya emiyta na in teqmo ginol emsa moqay haqiy. In ne ginol emiyta nazaqmo in ne gimaqbaban na ginol emid tumoq bugid nab teq God in hazizir ne anan bilaqiyta na tiqemdaq haqiy.

¹² Sa Sipsip Amidon buk aqagin 6-ta na tihiknar. Samo ya saw a ta waqsmo kanawrigrig araq ayahta ogib sibsa ya ahol way. Sa zeq ame dub diq zamor nog iysa kalam ame kakaq diq ned nog iy. ¹³ Sa kaitib ulig milhesad ogib woqiy. Bilaqne aylik anon teqmo hemsa tim sibad ulesla anon muruwoqim woqaqta nazaq nog. ¹⁴ Teq kait tihiqiy nog iymo. Sansandek sisaoqta netbulsa bolaqta nazaq nogmo in iytta. Sa garah bunmo teq nud bunmo woltayim kobmo diq loqiy. ¹⁵ Sa og ka ago maror aseseqta bunmo teq mataw gibin inaqta na teq mataw bab emayta gigo aseseqta na teq mataw ginaghan inaqta na teq mataw giwaz meqinta na teq mataw begbegta mataw gigo og inaqta na bunmo in tukim le gig akudugnib teq garahab gig aseseqta gihaqenib ulilemiy. ¹⁶ Ulilemad in gig aseseqta garah inaqmo gibilenim bilaqiy, Ne i gimalib woqeq giqisihy haqiy. Giqisihid i mat ban tawontab osaqtta na ameb ulilemuq haqiy. Id teq Sipsip Amidon ago agem meqniy inaq boleq in i a hi gimeqin tondaq haqiy. ¹⁷ Na ezaqgo haqiy Sipsip Amidon amam inaq in daq meqinta

anan gigem meqniydaqta akaman ayahta na tugwahtim haqiy. Gwahtiyan in gigo gigem meqniy na on mataw ginolsa nog diq turad a hi meqniydaq? haqiy.

7

Isrel on mataw 144,000 nazaq God ago tow gisanib waqiy

¹ Nagah nagan tugwahtiqan abeb yaime a ta lehim angelo aweweinqmo og ago abeqil aweweinqmo nab tursa ya gibiy. In tim aweweinqmo og abeqil ban sibayta na wasihim tur yaqay, tim na leheq ogib teq kamisib a hi sibad teq in ay araq a hi woldaqmo haqad. ² Sa teq angelo ta araq saw zeq gwalaqta ban osim bolsa ya ahol way. Na in God Kayeqmo Osaqta na ago atowun wazim ad bolyaq. Bolad in atoranmo lileyim angelo aweweinq God zaway negan in og teq kamis inaq gimeqin tongo osayta na gibilan. ³ In bilam, Ne og teq kamis teq ay hidmo hi gimeqin toniysa ham. I gigo God ago kabibiy on mataw gimaqbelab i tow emid teq ham. ⁴ Ari in on mataw ganim diq gimaqbelab tow emiyyata na ya hurit. Na in Jekob atatniz ¹² na gigo gem bunmo gigo hib Isrel on mataw 144,000 nazaq in tow na waqiyta.

⁵ Juda ago gemub on mataw 12,000 nazaq tow waqiy.

Sa Ruben ago gemub on mataw 12,000 nazaq tow waqiy.

Sa Gat ago gemub on mataw 12,000 nazaq tow waqiy.

⁶ Sa Aser ago gemub on mataw 12,000 nazaq tow waqiy.

Sa Naptaliy ago gemub on mataw 12,000 nazaq tow waqiy.

Sa Manase ago gemub on mataw 12,000 nazaq tow waqiy.

⁷ Sa Simeon ago gemub on mataw 12,000 nazaq tow waqiy.

Sa Liway ago gemub on mataw 12,000 nazaq tow waqiy.

Sa Isakar ago gemub on mataw 12,000 nazaq tow waqiy.

⁸ Sa Zebulun ago gemub on mataw 12,000 nazaq tow waqiy.

Sa Josep ago gemub on mataw 12,000 nazaq tow waqiy.

Sa Bensamin ago gemub on mataw 12,000 nazaq tow waqiy.

On mataw dauh biyahta God abin iluwiy

⁹ Ari nagah na abeb ya saw a ta waqim on mataw dauh biyah diqmo humab wolim tursa ya gibiy. On mataw na kuluwmo diq iyan mat araq ginulin bugdaqta biyah haiq. Teq in on mataw en bunmo teq og saw bunmo teq gisan bunmo teq nan bunmo gigo asor kabemmo bolim humab

nab turiyta. In tubusan husta sisqaqta gi-holib emim teq in King ban tawontab osa-qtta na ayow Sipsip Amidon na inaq ginog-nib turad in gibenab guren anan wazim turiy. ¹⁰ Turad in atoranmo lileyeq kazaq bilaq yaqay,

I gigo God ban tawontab osa-qtta na ayow Sipsip Amidon na inaq haq yaqay, in gimomo on mataw gilumsihim gi-waqim giqeman ban dimuntab osayta haq yaqay.

¹¹ Sa angelo bunmo in King ban tawontab osa-qtta na teq mataw marorta ²⁴ na teq nagah awewaq kayeqmo osayta na gililut negim turad in bunmo gibakkaban ulum laquwim turad teq in ginobun mulbunim ogib wom. Wogan in God abin tiqiluw yaqay. ¹² Ad in bilaq yaqay.

Hel diqtaqmo haq yaqay.
I gigo God amomo anan i ginad dimniyan haq yaqay.

Ad i in abin ayahta na iluwuq haq yaqay.
In amomo anad awaz meqin diqta haq yaqay.

I in amomo wazineq esey diq uguq haq yaqay.

In awaz diq meqniysa ago zaway ayah diqmo haq yaqay.

In nazaqmo kuluwa-kuluwmo osan haq yaqay.

Hel diqtaqmo haq yaqay.

Yesus ago on mataw gigo sanctity tihiqiy

¹³ Ari mataw marorta ²⁴ na gigo araq in ya kazaq susumun yag. On mataw tubusan husta sisqaqta giqemiyta ko in gingan diq? ham. In edob diq boliyta? ham. ¹⁴ Haqan ya in ago gamuk amenin emim bilay, Mat ayah hay ninmo hurit hay. An in ya kazaq ibilan, On mataw ko bab gibenab afaqan teq sanctity kabemmo diq waqim sorad in giquriyam bugim teq boliyta ham. In gigo tubusan na in Sipsip Amidon anednib suholan hus diq tiqiy ham.

¹⁵ Nazaq iyan in God ago ban tawonta na anognib tituray ham.

Ad in taromab teq zeqab inaqmo God ago bitab osad ago kabiy emayta ham.

God in ago ban tawonta nab osad inmo on mataw na giwamuzad nenaq tuqos-daqta ham.

¹⁶ Osad in on mataw na giwamuzza in gigem a ta hi moqdaq ham.

Teq in ginatguman a ta hi ziziqdaqmo ham.

Zed a ta hi ginoysa in saw afanta a ta hi loyin daqaymo ham.

¹⁷ Na ezaqgo Sipsip Amidon King ago ban tawonta anognib turaqta na inmo tigiamuzdaqta ham.

Bilaqne mat ago sipsip giwamuzaqta nazaqmo ham.

Giwamuzad in giqad yuw yayibta araq mataw uluwim kayeqmo kuluwakuluwmo osayta nab in giqad tilehdaga ham.

Teq God in gimeqil woqaqta na suholid in a ta hi gaq daqayta ham.

8

Sipsip Amidon buk aqagin 7-ta na tihiknar

¹ Ari Sipsip Amidon buk aqagin 7-ta na tihiknar. Ammo Heven-ib saw titok nam. Nagah bunmo ahulan a hi iysa le 30 minit nazaq tiqiy. ² An ya angelo 7 God ameb turayta gibisa in taur 7 nazaq amulik-mulikmo negiy. ³ Negan in taur wazim tursa angelo ta araq bolim in God ayon faq aqasin ahuran dimunta emaya abanan na agerab titur. Ban na in gol-ibta teq in King ago ban tawonta na ameb turaqta. Ari angelo na in ban na agerab turad in deg amikta gol-ibta araq waz. Wazsa nal ahuran dimunta ayahmo ugiy, in miderid oysa aqasin gwalad in God ago on mataw tawonta gigo gamuk in God bulonayta na inaq wastoneq gwalehdaq haqad. ⁴ An angelo na in nal ahuran dimunta na bannab emim mideran oysa aqasin God ago on mataw tawonta gigo gamuk na inaq wastonim God anognib tugwalehyaq. ⁵ Sa teq angelo na in ban nab faq waqim degib emsa deg ate tugwal. Ate gwalan in faq na hunegan wole ogibmo tuwom. Woqanno kait ahulan iysa saw garak ayahmo gwahtiqyaq. Sa mewlig hikliyansa og haresmo ahol tuwolyaq.

Angelo aweweinqmo taur ulamiy

⁶ Ari angelo 7 taur 7 waziyya na in ulamgo haqad gihol tuwastitayi. ⁷ Gihol wastayim angelo amepta na ago taur tuqulam. Ulaman gig teq faq in ned inaq wastonim ogib tuwoqyaq. Woqad faq na og ayahmo teq ay kabemmo tiginoy. Ginoyad in sisihun bunmo tuqoy bugmo.

⁸ Sa angelo gigerta na ago taur tuqulam. Ulaman nagah araq bilaqne garah ayahta faq oyad usaqta nazaq nog tugwahtim. Gwahtiqanmo in hunegan wole kamisembmo tuwom. Woqan kamis asor ayahmo bulyim ned nog iy. ⁹ Sa nagah kayeqta kamisib usayta na kabemmo teq tuy kamisib luwayta na kabemmo timeqniyyi.

¹⁰ Sa angelo ezeqmantna na ago taur tuqulam. Ulaman ulig araq ayahta kaitib turim milhesimmo ogib tuwom. Ulig na atoranmo oyyaq, bilaqne sul mideran oy-aqta nazaq. Na in woqim yuw diq og amalib sibaqta na teq yayib gwahtiqaqta na kabemmo gimalib wom. ¹¹ Ulig na anan Am Agon Meqinta haqayta. In yuw nagan

gimeb woqan yuw na agon iysa mataw kabemmo uluwan gigem oy zizilaysa in tumoqiy.

¹² Sa angelo aweweqlta na ago taur tuqulam. Ulaman zeq ayow kalam inaq teq ulig bunmo ginolan in gnuwan asor ayahmo thihiqiy. Hiqiyan zeqab saw anuwan asor ayahmo hiqysa saw ame huhim us. Sa taromab nazaqmo kalam teq ulig gnuwan asor ayahmo thihiqiyomo.

¹³ Sa ya saw a ta waqim tirkaw araq melim kaitibmo diq lehsa ya ahol way. In melim lehad teq in atoranmo kazaq lileysa ya hurit. In bilaqyaq, On mataw ogib osayta haqyaq ne timeqniyyi haqyaq. Ne timeqniyyi haqyaq. Ne timeqniyyi haqyaq. Angelo ezeqman na in teq gigo taur tuqulam daqayta haqyaq. Ulamsa afaqan aseseq diqta ne gigo hib tugwahtiqdaqta haqyaq.

9

Angelo abaynaginta na ago taur ulam

¹ Ari angelo abaynaginta na ago taur tuqulam. Ulaman ulig araq Heven-ib turim ogib gewoqsa ya ahol way. Ahol waqsa yay araq sisqa abe milhasta ago ambitan in ulig na tuqugiy. ² Ugan in yay na ago dan ez tihas. Hasanmo faq aqasin yay aqezab nab tugwahtiqyaq, bilaqne ay humab araq ayahta oyad aqasin gwahtiqaqta nazaq. Faq aqasin yay nab gwahtiqad zeq ame isihsa kait dub tiqiyqaq. ³ Sa nagah araq bilaqne siksik madawrek nogta kabemmo faq aqasin na amuganib gwahtiqim ogib haresmo tileh yaqay. Lehad teq in zaway araq bilaqne kahkah gigo zaway nazaq nogta in waqiy. ⁴ Zaway waqan teq in siksik madawrek na kazaq gibileniy, Ne ogib sisihun teq kwasin-kwasan teq ay bunmo hi gimeqin toniy haqiy. Haiq haqiy. Ne on mataw God ago tow gimaqbelab a hi usaqta naqmo ne gimeqin toniy haqiy.

⁵ Gimeqin tonad ginol emid hi moqiy haqiy. Santity naqmo ne on mataw na negsa le kalam abaynagin nazaqmo iyan haqiy. Ari santity in negiyya na in bilaqne kahkah on mataw giluman gisan titiyaqta nazaq nog iyyaq. ⁶ Teq kam nab on mataw gisan titiy naqmo diq hiqysa in moqgo adanteqin haquneq teq in ahol a hi waq daqay. In moqgo diq ginad bilaq daqayta teq haiq. Moq in giben lel haseq titukdaq.

⁷ Siksik madawrek na giwaqan bilaqne hos bab emgo abalawun giholib usaqta nazaq nogta. Teq in gifaqinib balaw araq bilaqne king gifaqinib balaw gol-ibta emaya nazaq nog ussa in ginobun bilaqne mat anobun nogta nazaq ya gibiy. ⁸ Teq in giqensan sisqaqmo diq bilaqne on asor giqensan sisqaqta na nog teq in gite bilaqne laiyon gite nog. ⁹ Sa bab emgo abalawun

atoranta gibanib usta na in bilaqne tubusan ain-ib emiya nazaq nogta in giban isihim us. Teq in melad giben gayik ahulan bilaqne hos kabemmo wilka kabemmo hureqim bab eman lehayta nazaq nog ya huritta.¹⁰ Teq siksik madawrek na gibilikin bilaqne kahkah gibilikin gilumaqta na nog. In kalam abaynaginmo on mataw gimeqin tongo azawayin gibiliknib usaqta.

¹¹ Siksik madawrek na gigo king inaqta. King na in angelo-ta teq in yay sisqaqta abe milhasta nab osaqta. Hibru nanib angelo na anan kazaq biyayta, Abadon haqayta. Teq Grik nanib in anan Apolyon haqayta.

¹² Ari afaqan danmepta na tihiqiy. Teq ne gidek emiy. Afaqan ameba na abe ban afaqan giger teq boldaqta nawa usaqta.

Angelo 6-ta na ago taur ulam

¹³ Ari angelo 6-ta na ago taur tuqulam. Ulaman God amen tamaz em abanan golibta God anognib turaqta na ago abeqil aweweinq ate inaqta na gilikmanib mat araq aqez gwahtiqim gamuk bilaqsa ya hurit. ¹⁴ Mat aqez na in angelo 6-ta taur wazim turta na kazaq bulon, Angelo aweweinqmo yuw Yufretis-ib giqirquran osayta na ni gihadis in lehiy ham. ¹⁵ Haqan in angelo aweweinqmo giqirquran osiyta na tighas. Angelo aweweinqmo na in ulig nabmo teq kalam nabmo teq kam nabmo teq zeq adullan nabmo diq gwahtiqeq on mataw kabemmo ginol emid moq daqayta na ago in giqirquran osiyta. In angelo aweweinqmo na gihasan in on mataw kabemmo ginol eman tumoq bugiy. ¹⁶ Ari teq mataw hos-ibta ganim diq le bab emiya na ya hurit. In kuluwmo diq 200 milyon nazaq. ¹⁷ Ad yaqgo sen qway nab mataw hos-ib ossa ya gibiyta na giwaqan kazaq diq ya gibiy. Mataw na gigo bab emgo abalawun atoranta giban isihim usta na awaqaq kakaqta teq rawezta teq maliyta. Teq hos na gifaqin bilaqne layon gifaqin nog. In giteb faq amileq teq faq aqasin teq gig afanta maliyta anan salfa haqayta na gwahtiqeq lehyaq. ¹⁸ Nagah ezeqman meqin diqta faq teq faq aqasin teq gig afanta maliyta na in on mataw kabemmo ginol eman moqiyta. ¹⁹ Ari hos na gigo zaway in gitensosib teq gibiliknib usaqta. Teq in gibilikin awaqaq bilaqne naga ahulinaqta afaqin inaqta nog. Nazaq iyan in ginaghan giger na amilib on mataw gimeqin ton yaqayta.

²⁰ Ari on mataw asor afaqan nagan giwaqan a hi moqiyta na in os tutad in gin-nad buliyad gigo daq meqinta na a hikidik hulos yaqay. In bugaw meqinta teq god katiyta gidulan gibenab emim giyon lotu em yaqayta. Nagah na gidulan gol teq silva teq ain baras teq gig teq ay nagan gimalib in giqem yaqayta. Teq god katiyta na saw

a hi waqayta teq in a hi loq gelayta teq in gidek emad gamuk a hi hurityta.²¹ Ad on mataw na ginad buliyim gigo daq in mataw asor ginol eman moq yaqayta na teq in liqiy em yaqayta na teq in an haresmo hureq yaqayta na teq in nagah haresmo rin ton yaqayta na in a hi hulosiymo.

10

Angelo araq Jon buk ugan in nam

¹ Ari ya angelo araq awaz meqinta Heven-ib gehitiqs ahol way. In onqas araq waqim tubusan nog ahol isihan teq kaitib mam gwaqta na afaqinib us. In anobun bilaqne zeq anuwan nog iysa asen gigermo bilaqne faq oy gigayinaqta nazaq nog iyyaq. ² Angelo na in buk amikta araq hasan ussa abenab waz. Wazad teq in asen aqabun ger waqim kamis amilib emad asen anasaran ger na in waqim og amilib am. ³ Emim teq in atoranmo lilay, bilaqne laiyon atoranmo gayonqta nazaq. In lileyan tihiqiyan kait ahulan 7 na amenin emiy. ⁴ An kait ahulan 7 na amenin emim le tihiqiyan ya gamuk na tumar tondaig hay. Haqadmo mat araq aqez Heven-ib ibilensa ya hurit. Na in bilam, Kait ahulan 7 gamuk bilaqnya na ninadibmo usan ham. Na ni hi mar ton ham.

⁵ Ari angelo kamis ayow og inaq gimalib tursa ya ahol wayta na in aben aqabun ger wazan ulilibmo gwal. ⁶ Gwalsat teq in Kuluwakuluw kait teq og teq kamis teq nagah bunmo saw nagab kayeqmo luwayta inaq giqamta na anan biyad in kazaq bilam, Helmo diq Mat Iyah ya ibiqayq ham. Kam tihiqiy ham. ⁷ Angelo 7-ta na ago taur tuqulamdaq ham. Ulamsa kam nab God in anad ulilemim usta na emid tihiqiy bugdaq ham. In ago kabibiy mataw ago nantut negsa bilaq yaqayta nazaqmo diq in tiqem-daq ham.

⁸ Ad mat aqez na Heven-ib gwahtiqim kazaq ya a ta ibilan, Ni leheq angelo kamis ayow og inaq gimalib turaqta na abenab buk hasan usaqta na ni waq ham. ⁹ Haqan ya angelo na agerab lehim bulon, Ni buk amikta na yag hay. An angelo na ibilenum bilam, Ni buk ka waqeinq neq ham. Ni neqsa in niziyinb bilaqne kubiq akokin aneqan nog iysa ni loyindaqta ham. Ari ni tilonid nigemab woleheq teq in agon tiqyidaqta ham. ¹⁰ Haqanmo ya in abenab buk amikta na waqim tiney. Neqan in ya iziynib bilaqne kubiq akokin nog dimun diq ya loyin. Teq ya neqim tilonan ya igemab in agon meqin diq iyyaq. ¹¹ Sa mat aqez na in ya kazaq ibilan. Ni yaqgo nan a ta tutad on mataw en amo amo og saw bunmo osad gigo nan amo amo bilaqayta nagan teq in gigo king kabemmo osayta na nenaq gigo

hib ni daq abeb teq gwahtiqaqta na ago ananin a ta bilaqdaq ham.

11

Mataw giger gwahtiqaq God ago gamuk bilaqy

¹ Ari God uriw araq titnonta amalib nagaq gitowun waqayta na tiyag. Uriw na ago sisaq bilaqne katek wazim ulum ugayta nazaq nogta. In uriw na yagad ibilan, Ni eraqeet yaqgo Tempel teq bit nab tamaz em abanan turaqtä na inaq gitowun waq ham. Ad ni on mataw bit nab lotu emayta na gitowun waqmo ham. ² Teq yaqgo bit aqezab humah wolayta asawun na ni hulosad atowun hi waq ham. Na ezaqgo ham saw na ya on mataw en ta asor Juda a hajqta nagan tinegta ham. Dauh amo amotag nag in yaqgo uliq tawonta nab boleq uliq na giholyon waqeq kalam 42 nazaq in wamuz daqayta ham. ³ Sa yaqgo mataw giger ya ibin bilaq daqayta na ya giqemid uliq nab tileh daqay ham. In tubusan meqinta abiornaqta giholib emeq teq in leheq yaqgo nantut bilaq daqayta ham. In yaqgo nantut bilaqsa kam 1,260 nazaqmo thiqiydaq ham.

⁴ Ay oliv giger teq lam giger on mataw bunmo gigo Iyahta na anognib turayta na in mataw giger naqmo gitowunta. ⁵ Teq mat aw nog in mataw giger na gimeqin tonnan tonsa mataw na giteb faq gwah-tiqeq le in gigo bab na ginoy bugid tumoq daqay. Helmo diq. Mat aw nog in giger na gimeqin tonnan ginad em daqayta na in dante naqmo amalib tumoq daqayta. ⁶ Teq mataw giger na kait wasihgo azawayin in giholib usdaqta. In kait wasihid urom a hi woqsa in God ago nantut bilaqad tiluw daqay. Ad in yuw buliyid ned iygo azawayin teq moq meqinta amo amo amalib on mataw ogibta gimeqin tongo azawayin in giholib tuqusdaqmo. Mataw giger na in daq nagan ginadibmo emid gwahtiqaqta.

⁷ Ari mataw giger na boleq God ago gamuk bilaq bugid tihiqiyid teq karuw kwasikta yay abe milhastab gwahtiqaqta na in giger na nenaq an wolad zaway diq iyeq ginol emid tumoq daqay. ⁸ Moqid in gisan uliq ayahta na agemab ulalabmo giqusdaq. Teq uliq gisan usdaqta na mataw gamuk abarawun bilaqad anan Sodom haqayta teq in anan Isip haqaytamo. Uliq nabmo mataw giger na gigo Iyahta ayib dom wolam momtammo. ⁹ Sa mataw gisan araq araq uliq amo amo-ibta teq nan amo amo bilaqayta teq og saw bunmo osayta na kabemmo boleq kam ezeqman teq awewe-qua asormo in giger na gisan ahol waqad tiluw daqay. Luwad in mataw giwasihid in giger na gisan a hi giyay ton daqay.

¹⁰ Mataw giger na tumoqid teq on mataw og kab osayta na ginad dimniysa in yuquwad bar wazad teq in an naw tuqug daqay. Na ezaqgo nantut giger na osad in on mataw bunmo ogib osayta na afaqan ayahmo diq neg yaqayta na ago iyan.

¹¹ Ari kam ezeqman teq awewepta na asormo tihiqiy God ago tim mataw giqeman kayeqmo osayta na lehim giger na giholib gwahtiqaq in kayeq ta iyiy. Kayeq iyim in eraqim tursa on mataw in gibiyad rab naqmo diq hiqiy yaqay. ¹² Sa Heven-ib mat araq in giger na dedibmo gibilensa in huritiy. Mat na bilam, Ne giger kab gaboliy ham. Haqan in onqasib Heven-ib gwalehsamo in gigo bab na tigibiyiy. ¹³ Sa kam nabmo kanawrig araq ayah diqta tugwahtim. Gwahtiqaq og ahol wolsa uliq ayahta na ago abeqil 10 giqusta na gigo amulikmo tartayim tuwom. Woqan kanawrig ayahta na siban on mataw kabemmo diq 7,000 nazaqmo tumoqiy. Moqsa on mataw ta asor na bunmo osad in rab naqmo diq hiqiyad teq in God Heven-ib osaqla na abin tiqiluwiy.

¹⁴ Ari afaqan giger aseseq diqta na tihiqiy. Teq ne gidek emiy. Afaqan ezeq-manta na asit naqmo tuboldaq.

Angelo 7-ta na ago taur ulam

¹⁵ Ari angelo 7-ta na ago taur tuqulam. Ulaman mataw kabemmo giqez atoranmo Heven-ib lileysa ya hurit. In bilaqiy,

Muran king bunmo ogib osayta na in i gigo Iyahta teq in ago Krais inaq gigo maror ahaqenib tiqiy bugiy haqiy. Sa i gigo Iyahta in nagah bunmo giwamuzad in nazaqmo king ayah diqta iyeq kuluwa-kuluwmo tuqosdaq haqiy.

¹⁶ Haqsa mataw marorta 24 God ameb in gigo marorgo banab osayta na in gibak-bakan ulum laquwim turad ginobun mul-bunim ogib woqsa in God abin tiqiluwiy. ¹⁷ Abin iluwad in bilaqiy,

Iyahta God haqiy ni zaway bunmo waza-qua haqiy.

Ni kuluwa-kuluwmo osim bolim muran ni os tutaqta haqiy.

Ni ningozaway ayah diqta na ulal tonim muran ni King ayahta iyim nagah bun diqmo giwamuzim osaqla haqiy. Nazaq iyan i esey nigauq haqiy.

¹⁸ Mataw en bunmo in ni gihar nigad gigem meqniy yaqayta haqiy.

Sa ta ninmo nigem meqniydaqta akaman na muramno tugwahtim haqiy.

Gwahtiqaq mataw tumoqiyta bunmo in ningoz hazizirib gwahtiqaq titur daqay haqiy.

Tursa ni ningoz nantut ningoz kabiy em yaqayta na teq ningoz on mataw

tawonta na teq on mataw ni ninan rabad nibin wazin yaqayta nagan bunmo gibin inaqta teq gibin haiqta na inaqmo ni in gigo daq dimunta na amenin tinegdaq haqiy.

Ad mataw in on mataw gimeqin tonad ginol eman moqiyta na ni in ginol emid tumoq bug daqaymo haqiy.

¹⁹ Ari mataw marorta 24 na gamuk bilaqim tihiqiyani God ago Tempel Heven-ib turaqta na ago dan ez tihas. Hasanmo God ago maror gigib mar tonim mataw nagta na ago abitan amikta in God ago Tempel aduganib ulalabmo tugwahtim. Gwah-tiqanno mewlig hikliyani haresmo lehsa kait ahulan ayahmo diq iyyaq. Ad og ahol wolsa gig amikmikta urom nog kaitib woqyaq.

Satan ayogniz nenaq timeqniy hasiy

12

Jon in aw araq teq nagah ahulinaqta ayahta inaq gibiy

¹ Ari nagah lul araq diqta kaitib gwah-tiqsa ya ahol way. Nagah na in kazaq. Aw araq osad in zeq anuwan waqim bilaqne tubusan nog ahol sihenim osta. Teq in asen ahaqenib kalam oyad ussa ulig 12 nazaq bilaqne king ago balaw nog afaqinib giqusyaq. ² Aw na agem iyim ossa amun tubaysa in ahol titiysa tiqek tonyaq. ³ Sa nagah lul ta araq diq kaitib gwahrimmo. Na in nagah ahulinaqta ayahta kakqaqta afaqin 7 nazaq inaqta teq adanidin 10 nazaqmo afaqinib nagab gituryaq. Sa in afaqin 7 nagab king ago balaw amikta 7 nazaq giqusyaqmo. ⁴ Nagah ahulinaqta na abiliknib in ulig kabemmo kaitib turiyta na giwororan ogibmo tuwoqiy.

Ari nagah ahulinaqta na in aw amun emid ya tilondaiq haqad amen emim os. ⁵ Ossa aw na amun matta tiqam. Amun na God atowun eman in teq gwatuq aini-bita wazeq on mataw en bunmo giwamuz-daqta. Aw na amun tiqeman hid naqmo in amun waqim ad God agerab gwalehim God ago ban tawonta nab tiqemiy. ⁶ Sa aw na eraqim tukim saw amatawun haiqtab tilah. Saw nab in osad anamur emdaqta haqad God in ayon tuwastitayan usta. Aw na saw nab ossa in alowan tonad wamuzad didaq ugsa kam 1,260 nazaq tiqyidaq.

⁷ Ari Heven-ib bab araq ayahta gwah-tim. Na angelo gigo amebta Maikel in ago angelo nenaq nagah ahulinaqta ayahta na inaq bab tiqem yaqay. Bab emsa nagaq ahulinaqta na ago walmataw nenaq in eraqim bab na amenin tiqem yaqaymo. ⁸ Amenin emad nagah ahulinaqta na ayogniz nenaq gigo zaway haiqgam iyan in

Heven-ib a ta osgo haiq tiqiyiy. ⁹ Nazaq iyan God ago angelo eraqim in nagah ahulinaqta na wazim hunegan ogibmo tuwom. Nagah ahulinaqta na in mat meqinta kwaziqmo osta naqmo. In anan Mat I Gigilehun Bilaqaqta haqayta teq in anan Satan haqaytamo. Mat na in og kab on mataw God gileh ugayta na bunmo gikat negaqtta. Teq God ago angelo in nagah ahulinaqta na ago walmataw nenaqmo giwazim gihune-gan ogibmo tuwoq bugiy.

¹⁰ Sa Heven-ib mat araq aqez atoranmo lileyim kazaq bilqsa ya hurit.

I gigo God in i bunmo gilumsiheq gi-waqsna in ago zaway ulal iysa in king ayah diqta iyeq osdaqta akaman na tugwahtim ham.

Teq in ago Krais zaway bunmo wazdaqta akaman na tubolmo ham.

Na ezaqqo ham mat meqinta i gimaqbaban gimalib nan emaqta na hunegan ogib tuwom ham.

Mat na taromab teq zeqab inaqmo i gimaqbaban gigilehun God ameb bi-laqaqta ham.

¹¹ Sa nagah gigermo i gimaqbaban na gilumsihan in dimunmo turiy ham.

Na Sipsip Amidon anedan na teq God ago gamuk in atoranmo wazad bilaq yaqayta naqmo in gilumsihsa in gigo bab meqinta na uriyamiy ham.

Ad in bab meqinta na inaq an wolad in ogib kayeqmo os tutgo ginad a hi diq bilaqyaq ham.

In ginad em yaqay, I gibabun ka inaq an wolad oseq moqamta na dimunmo haq yaqay ham.

¹² Nazaq iyan ne on mataw bunmo Heven-ib osayta na ne ginad dimniyyi ham.

Ari og ninyow kamis inaq ne timeqniyyi ham.

Satan ne gigo hib ogib nab tihitim ham. Hitiqim in ago kam siqim diq tiqiyaqta na ago in agem timeqniy hasaq ham.

¹³ Ari nagah ahulinaqta hunegan ogib womta na inmo ahol tiloyin. Loyinad in agem meqniya lehim aw amun matta tiqamta na wol emnan muzad tiluwayq.

¹⁴ Sa God tirkaw ayahta aben gayik gigermo waqim aw na tuqug, in amalib meleq tukeq saw amatawun haiqtab in ayon ban wasti-tayan usaqta nab tilehdaq haqad. An saw nab in aw na alowan tonad didaq ugsa le ulig ezeqmanmo teq ulig awewepta na asormo tiqiy.

¹⁵ Ari aw na tukim lehsa nagah ahulinaqta na nilad ateb yuw ayahmo gwah-tiqsa yuw na in uq ayahta nog iyim aw na ago hib sibim tilehyaq, in aw na soreq ad leheq neqid moqdaq haqad. ¹⁶ Samo og in aw na ulumsihim ate akim in nagah

ahulinaqta ateb yuw gwahtimta na titilon bug.¹⁷ Nazaq emsa nagah ahulinaqta na in aw na anan agem diq meqniya in ahol buliyim tilah, in le aw na ago onmin nenaq bab emnan haqad. Aw na ago onmin in God ago gunun muzin bugad teq in Jesus awagamun anan helmo haqad adan emad osayta.

Ari nagah ahulinaqta na kamisib lehim lan ezab titur.

13

Karuw kwasikta giger gwahtiqaq

¹ Ari karuw kwasikta araq afaqin 7 nazaq inaqta teq afaqinib nagab adanidin 10 nazaqmo gitursa in kamis amuganib usim bo asan ban gwahtiqa ya ahol way. Teq king gigo balaw gifaqinib emayta nazaqta in adanidin 10 nagab giqussa ya gibymo. Sa in afaqin 7 nagab inmo ahol anan meqmeqinta hi bilaqnata giqusyaqmo. In aholnan amo amo nagan in gamuk haresmo amalib God bilawuyata naqmo giqusta.² Ya karuw kwasikta na ahol waqsa in ahol awaqaq bilaqne kasiq kwasikta ayahta anan lepa haqayta na awaqaq nog. Teq in asen bilaqne kudor ayah nenan diqta anan bea haqayta na asen nog iysa atenmos bilaqne layion atenmos nogta ya ahol way. Sa nagah ahulinaqta lan ezab turta na in ago zaway ayahta teq inmo ahol abin ayahta teq in ago marorgo ban in amalib osad nagah giwamuzaqta na in nagah nagan bunmo karuw kwasikta na tuquq bug.

³ Teq karuw kwasikta na ago afaqin araqab asulan awaz meqinta wol emid moqgota nazaq nogta ussa ya ahol way. Sa hidmo asulan meqinta na mayimmo tidimniy. Nazaq iyan on mataw bunmo in daq na ahol waqad gihol riten lamsa in karuw kwasikta na tumuzin yaqay. ⁴ Muzinad in nagah ahulinaqta na inmo ago zaway karuw kwasikta na ugsa ahol waqad in bunmo nagah ahulinaqta na abin wazin yaqay. Ad in karuw kwasikta inaqmo abin wazinad bilaq yaqay, Mat araq karuw kwasikta ka nog a haitq haq yaqay. Mat araq karuw kwasikta ka babub yaqay. Mat araq karuw kwasikta haiqmo haq yaqay.

⁵ Ari God in karuw kwasikta na aholibmo hiqiyian in yaqmo ag haqad atoranno God anan bilawunad in on mataw giwamuzad kalam 42 nazaqmo tiluw. ⁶ Luwad in ate akim God tibilawunyaq. Bilawunad in God abin meqin diq tonad teq in God ago bit in osaqta na abin timeqin tonyaqmo. Bit na in Jesus ago in mataw God inaq Heven-ib osayta naqmo. ⁷ Sa God in karuw kwasikta na aholib hiqiyian in God ago on mataw tawonta na gimuzim ginolad giwazan woq yaqay. Ad in ago zaway ayahta na amalib

on mataw en bunmo teq gisan bunmo teq gigo nan bunmo teq in uliq saw bunmo osayta na bunmo tigiwamuzyaq.

⁸ In nazaq emsa teq ogib kab on mataw kuluw diqmo in karuw kwasikta na abin wazinad ayon lotu tiqem daqay. Kwaziq diqmo God og ka eman a hi gwahtiqa in on mataw kayeqmo tuteqmo os daqayta na ginan Sipsip Amidon ago buk-ib mar tonan tuqusaqta. Ari on mataw Sipsip Amidon kwaziqmo wol eman momta na ago buk-ib giholnan a hi usaqta naqmo in karuw kwasikta na ayon lotu tiqem daqayta.

⁹ Mat aw nog in gidek inaq iyeq teq in gamuk ka huriyyi.

¹⁰ Kam meqinta nab in God ago mat araq ayon bilaqeq,

“In bit giqirqruran osayta nab lehan” haqid,
mat na bit nab tilehdaq.

Ad in God ago mat araq ayon bilaqeq,

“Baqirib wol emiy” haqid,
mat na baqiribmo tumoqdaq.

Daq nazaqta teq gwahtiqa in God ago on mataw tawonta na in gituw hi hiqiyya ginad helta na waz naqmo hiqiyeq osiy.

¹¹ Ari karuw kwasikta ta araq og aduganib gwahtiqa ya ahol way. In abigmanib adanidin giger bilaqne sipsip adanidin nogta afaqinib tursa in gamuk emyaqta na bilaqne nagah ahulinaqta na ago gamuk bilaq nog iyyaq. ¹² Karuw kwasikta gigerta na in karuw kwasikta amepta na anognib turad in karuw kwasikta amepta na ago zaway bunmo amalib ago kabiyaq. Kabiyaq emad in on mataw ogib kab osayta na gigeman in karuw kwasikta amepta na ayon lotu tiqem yaqay. Karuw kwasikta amepta naqmo in ahol asulan awaz meqinta wol emid moqgota na waqan teq asulan na hidmo mayim dimniy bugta.

¹³ Ari karuw kwasikta gigerta na in kabiyaq azawayin inaqta amo amo kabemmo gigemyaq. Gigemad in on mataw gimeb faq amileq emid ulilib kaitibmo useq milheseq ogib hitiqyaq. ¹⁴ God in karuw kwasikta gigerta na aholibmo hiqiyian in karuw kwasikta amepta na anognib daq azawayin inaqta emad in on mataw ogib kabta gikat negyaq. Kat negad in gibileyaq. Ne on mataw og kab osayta haqyaq ne karuw kwasikta amepta ka ahol adulan emeq abin iluwiy haqyaq. Karuw kwasikta kwaziqmo baqirib qwayan asulan awaz meqinta wol emid moqgota gwahtiqaq teq in mayan a hi momta na adulan ne emiy haqyaq. ¹⁵ In nazaq gibilenan in karuw kwasikta amepta na adulan tiqemiy. Eman teq karuw kwasikta gigerta na zaway waqim in tim ulam hasan karuw kwasikta amepta

na adulan aduganib lehan adulan na kayeq iyim gamuk tibilaqyaq. Sa karuw kwasikta gigerta na gibilenyaq. Mat aw nog in karuw kwasikta amebta adulan ka wazinad ayon lotu a hi emsa teq na ne wol emid moqan haqyaq.

¹⁶ Ari karuw kwasikta gigerta na bilaqan on mataw bunmo gisanib tow araq tuwaqiy. Asor giben aqabnib waqsa asor gimaqbelab waqiy. On mataw gibin in-aqta teq gibin haiqta teq mataw ginaghan kabemmo usaqta teq ginaghan haiqta teq mataw gigo og inaqta teq mataw begbeg osayta nagan bunmo in tow na gisanib waqiy. ¹⁷ Sa karuw kwasikta gigerta na gunun eman mat aw nog in karuw kwasikta amebta na ahol anan o ago ahol anulinqan in gisanib a hi waqiyta na in on mataw ta asor na gigo hib didaq nagah osgota a hikidik zay yaqayta. Ad mat araq in on mataw gisan samanmo usaqta na gigo hib nagah araq a hikidik zayyaqtamo.

¹⁸ Ari ne ginad em has ago adanteqin kawaqmo. Mat anad inaqta na in karuw kwasikta amebta na ago ahol anulinqan ka anononmo nulineq ulum keman. In ahol anulinqan nawa na in mat diq ago ahol anulinqanta. Teq in ahol anulinqanta kawa usaqta ka in 666 naqmo.

14

Sipsip Amidon ago on mataw bar mutura waziy

¹ Ari ya saw ahol a ta waqim Sipsip Amidon in mataw 144,000 nazaq nenaq garah Sayon abigmanib tursa ya gibiy. Mataw na gimaqbelab Sipsip Amidon Amam inaq giholnan mar tonan ussa ya gibiy. ² Sa Heven-ib saw ahulan araq bolsa ya hurityaiq. Saw ahulan na bilaqne yuw kabemmo sibaqta ahulan teq kait ahulan ayahmo nazaq nogta ya hurityaiq. Teq ya idekib nagah na ahulan huritsa in bilaqne mataw kabemmo gita wolsa ahulan dimunta gwahtiqaqta nazaq nog ya hurityaiq. ³ Mataw biyahta na in King ago ban tawontab osaqta na teq nagaq aweweinq kayeqmo osayta na giyogniz mataw marorta 24 na nenaq gimeb turad in bar araq muturta waz yaqay. On mataw God ago maror asan ban osayta na in bar na ago a hi hurityata. On mataw og kabta gilikmanib mataw 144,000 God gizayta naqmo gimomo in bar na wazayta. ⁴ Mataw biyahta na in on nenaq daq meqinta anumlan inaqta a hi emiya. Na ezaqgo in gihol wasihim aw inaq asit a hi usiyta na ago iyan. Mataw na Sipsip Amidon ezaqya lehsa in muzim inaq lehaytamo. God in on mataw og kabta bunmo gilikmanib mataw biyahta naqmo

gizayim giwamta, bilaqne mataw kabyi ame waqayta nazaq nog. Giwaqan mataw na in God ayow Sipsip Amidon na inaq gigota tiqiyim osayta. ⁵ Mataw na gimiileq a hi iyayta teq in daq araq meqinta ananin waq daqayta na giholib a hi usaqtamo.

Angelo ezeqman God ago gamuk bilaqiy

⁶ Ari ya angelo araq God ago nan dimunta kuluwa-kuluwmo usaqta na on mataw ogib osayta gibilennan haqad kaitib melim lehad luwsa ya ahol way. In ago kabyi in on mataw en amo amo amo amo teq gisan amo amo teq gigo nan amo amo amo teq uliq saw haresmo osayta na bunmo in God ago gamuk dimunta na gibilenaqta. ⁷ Angelo na in atoranmo lileyim bilam, God in on mataw bunmo hazizirib giqemeq gigo daq amenin negdaqta na akaman tugwahitim ham. Nazaq iyan ne God anan rabad abin iluwad ayon lotu emiy ham. In og, kait, kamis teq yuw diq na bunmo inmo giqamta ham.

⁸ Haqan angelo ta araq gigerta in angelo amebta na muzim abeb bolad in kazaq bilam, Uliq ayahta Babilon twoq bug ham. Helmo in timeqniy has ham. Uliq na in on mataw en bunmo gihureqan in ago daq meqinta emad gihol atoranmo eraqsa in an haresmo hureqad nenaq us yaqayta ham. Bilaqne wain ayun atoranta negan in uluwim ginad dimunta hulosiyta nazaq nog ham.

⁹⁻¹⁰ Haqanmo angelo ta araq ezeqmanta na in angelo giger ameb boliyta na gimusim bolad in atoranmo lileyim bilam, Mat aw nog in karuw kwasikta abin iluwayta teq in ahol adulan ayon lotu emayta teq in gimaqbelab o gibenab ago atowun waqayta, on mataw na bunmo in wain ayun lul araq meqin diqta tuquluw daqay ham. Wain ayun na in God ago agem meqniy naqmo ham. Sa God in wain ayun na yuw inaq buliyid asit amidemqan a hikidikmo iydaq ham. Haiqgam ham. On mataw na God ago agem meqniy watwatmo tuquluw daqayta ham. Uluwad in God ago angelo tawonta nagan giyow Sipsip Amidon inaq gimeb sanctity meqin diqta waqsa gig oyaqta anan salfa haqayta na ginoy titaydaq ham. ¹¹ Ginoy titaysa mataw na gisan oyad aqasin kam bunmo gwalehdagta ham. On mataw na karuw kwasikta na abin iluwad teq in adulan ayon lotu emiyta ham. Teq in karuw kwasikta na atowun in gisanib waqiyta ham. Nazaq iyan in zeqab taromab inaqmo sanctity waqad ginamur hajqmo os daqayta ham.

¹² Daq nazaq diq gwahtiqaqta iyan God ago on mataw tawonta bunmo giwaz meqniyeq ginad helta na waz naqmo hiqiyeq osiy. God ago on matawti na

in God-mo ago gunun muzin bugad Yesus anan helmo diq haqad osayta.

¹³ Ari teq Heven-ib mat araq lileyim gamuk kazaq ibilensa ya hurit. In bilam, Ni nan kazaq mar ton ham. Muran teq abeb on mataw Iyahta anan helmo haqad osimmo mogayta na bunmo tidimniyeq os daqay haqad ni nazaq mar ton ham. Teq God ago Bugaw Dimunta bilaqaq, Nazaqmo haqaq. On mataw na giholtuw bulad kabiy emiyta na hulosad in ginad dimniysa ginamur tigem daqay haqaq. Na ezaqgo in giholtuw bulad kabiy emiyta na anon abeb teq tugwahtiqaqta haqaq.

O gib didaq heman urotgo akaman gwahtim

¹⁴ Ari ya saw ahol a ta waqim onqas husta araq ahol way. Ahol waqsa mat araq awaqaqan bilaqne Mat Atatin awaqaqan nogta onqas na amalib ossa ya ahol waymo. In afaqinib king ago balaw gol-ib emiyta ussa teq baqir ame meqin diqta in abenab wazyaq. ¹⁵ Sa angelo araq God ago bit hulosim asan ban gwahtiqaq in mat onqas amalib osta na lilewunim bulon, Didaq bunmo tiham ham. Heman muran didaq urotgo akaman tiiqy ham. Nazaq iyan ni ningo baqir na amalib didaq giqurot ham. ¹⁶ Haqan mat onqas amalib osta na ago baqir wazim hunegad didaq hemim ogib gituraqta na in tigiqurot bugyaq.

¹⁷ Sa angelo araq God ago bit Heven-ib turraqta na hulosim asan ban gwahtiqaq in inaqmo baqir ame meqinta wazim ad bo tugwahtim. ¹⁸ Gwahtiqaq angelo ta araqmo in ago zaway in God ayon tamaz emayta ago faq wamuzaqta na in God amen tamaz em abanan na hulosim asanib gwahtiqaq in angelo baqir ame meqin diqta wazaqta na atoranmo lilewunim bulon, O gib wain anagin tigihemim usaq ham. Nazaq iyan ningo baqir ame meqin diqta na waqeç amalib am wain anagin aqurnaq na giquroteq ginuw bug ham. ¹⁹ Haqan angelo na ago baqir wazim hunegad ogib wain anagin aqurnaq bunmo giqurotim tiginuw. Ginuwim gihuunegan wain anagin bay ninaleq ayun waqgo banib tuwom. Ban na in God ago agem meqniyimo atowun. ²⁰ In wain anagin na hunegan uliq asan ban bay ninalgo banib woqan in tigibay ninaliy. Bay ninalan ned ayahmo ban nab gwahtiqaq lehim saw ayahmo isihim us, 300 kilomita nazaq. Ad ned na gabolim hos ateb ain usaqta nabmo diq iy.

15

Angelo 7 nazaq in nagah meqin diqta 7 giwazim turiy

¹ Ari nagah lul araq diqta kaitib gwahitiqan ya ahol waqim ihol riten lam. Ya

angelo 7 nazaq giviya in nagah meqin diqta 7 nazaq in amalib on mataw gimeqin ton daqayta na giwazim tursa ya givi. Nagah meqinta na akaman tiiqy bugid teq afaqan araq a ta hi gwahtiqaq. Nagah meqinta 7 na hiqiyid teq God ago agem meqinta na inaqmo tiiqy bugdaqmo.

² Sa ya nagah ta araq diq bilaqne kamis ayahta nog ahol waymo. Kamis na awaqaqan bilaqne faq teq galas inaq wastonan usaqta ya ahol waq nog iy. Teq on mataw biyahmo in God gita nagta na wazim kamis na adekib tursa ya gibiyomo. On mataw nawa na in karuw kwasikta teq in ahol adulan na inaq bab emim giquriyamad in gisanib karuw kwasikta na atowun a hi waqiya.

³ In turad God ago kabibiy mat Moses ago bar wazad teq in Sipsip Amidon ago bar waz yaqaymo. In bar wazad bilaq yaqay,

Iyahta God haq yaqay,

Ni zaway bunmo wazaqta haq yaqay.

Ni daq aseseqta amo amo giqemaqta haq yaqay.

I ningi daq nagan gwahtiqa ahol waqad i gihol turuh nemaqta haq yaqay.

Ningo daq bunmo in titnonta teq in hel diqtaqmo haq yaqay.

Ni on mataw en bunmo gigo King-ta haq yaqay.

⁴ Iyahta ninmo nimomo tawon diq iyim osaqa haq yaqay.

Nazaq iyan on mataw bunmo nirabunad nibin tiqiluw daqay haq yaqay.

Mataw bunmo boleq ninognib lotu tiqem daqay haq yaqay.

Na ezaqgo ningi daq dimdimunta na in mataw bunmo gimeb ulalabmo tugwahtim haq yaqay.

⁵ Ari nagah na tiiqyian abe ban ya saw ahol a ta waqim bit karuwsanibta God abin eman ulal iyyaqta na in Heven-ib Tempel nog iyim turad aqez hasim ussa ya ahol way. ⁶ Sa angelo 7 na in nagah meqin diqta on mataw gimeqin tondaqta anaghan giwazim in God ago bit na hulosim bo asanib tugwahtiqaq. In tubusan dimunta anumlan haiqta hikliyanaqta giholib emiyta teq nagah araq gol-ibta am gan gibanib hureqan us. ⁷ Sa nagah aweweq kayeqmo osayta na gigo araq in deg gol-ib emiyta 7 nazaq a bolim angelo 7 na amulik-mulikmo tinag. Deg nab God kuluwa-kuluwmo osaqa na ago agem meqinta ate gwalim usaqta. ⁸ Sa God ahol anuwan teq in ago zaway inaqmo atoranmo oysa aqasim gwahtiqaq Tempel na adugan tuwaleq ton bugyaq. Sa mat araq le bit nab gwahtiqaqta haiq iyyaq.

Ari angelo nagah meqin diqta 7 nazaq giwazayta na gigo kabiy tiiqiyid nab teq mataw le Tempel nab a ta gwahtiqaq.

16

Angelo in God ago agem meqniy degib usta na ogib wazbaly

¹ Ari ya mat araq aqez God ago bit adugan ban gwahtiqim angelo 7 na atoranmo gililewunsa ya kazaq hurit. In bilam, Ne God ago agem meqinta adegnaq 7 na waqeinq a le ogib wazbalid woqan ham.

² Haqan angelo amepta na lehim God ago agem meqinta adegnaq in wazta na wazbalan ogib woqanmo gisulan awaz meqinta ahuran meqin diqta mataw gisanib gwahtiqeq tilehyaq. On mataw karuw kwasikta na atowun gisanib waqim teq in ayon lotu em yaqayta naqmo giholib gisulan na gwahtiqyaqta.

³ Sa ta angelo gigerta na lehim God ago agem meqinta adegnaq in wazta na wazbalan kamisib woqanmo kamis buliyim mat momta anedan nog iyim gwahtiqeq lehyaq. Sa kamisib nagah bunmo kayeqmo luwayta na tumoq bugiy.

⁴ Sa ta angelo ezeqmanta na lehim God ago agem meqinta adegnaq in wazta na wazbalan yuw sibaqta teq yuw yayib bolaqta nagab tuwom. Woqanmo yuw nagan buliyim ned nogmo gwahtiqeq lehyaq. ⁵ Sa angelo yuw bunmo giwamuzaqta na in kazaq bilaqsa ya hurit. In bilam,

God ham ni muran osad teq kwaziqmo diq ni ostamo ham.

Ningo daq dimun iysa ni tawon diq iyim osaqa ham.

Ad ni mataw gigo daq meqinta na tuqu-lum kemim ni in gigo daq na ahunibmo amenin tinag ham.

⁶ Mataw na in ningon nantut kabemmo teq ningon mataw tawonta kabemmo ginol emsa ginedan mutbalim wom ham.

Nazaq iyan ni mataw meqmeqinta na ned negan in tuquluwiham.

Na in gigo daq meqinta na ago anawun anonon diqmo in tuwaqiy ham.

⁷ Sa mat araq aqez God amen tamaz em abanan nab gwahtiqim kazaq bilaqsa ya hurit.

Nazaqmo ham, Iyahta ham, ni zaway bunmo wazaqta ham.

Ni on mataw gigo daq ulum kemad gimen gamuk heltaqmo bilaqqa ham.

Teq ni mataw gigo daq ahunibmo amenin negaqua ham.

⁸ Ari angelo awewepta na lehim God ago agem meqinta adegnaq in wazta na wazbalan zeq amalib tuwom. Woqanmo zeq zaway diq iyim in era mataw ogibta tiginoy emyaq. ⁹ Zeq oyad afan meqin diqta na mataw ginoy naqmo hiqysa in gigem meqniysa God tibilawun yaqay. God inno nagah mataw gimeqin tonyaqta na bunmo

giwamuzaqta teq mataw na ginad buliyim God abin a hikidik iluw yaqay.

¹⁰ Sa angelo abaynaginta na lehim God ago agem meqinta adegnaq in wazta na wazbalan karuw kwasikta na ago marorgo ban in amalib osad ago on mataw giwamuzaqta nab tuwom. Woqanmo on mataw karuw kwasikta muzinad ago maror ahaqenib osiyya na gigo hib romriq kwasik diqta tugwahtiqyaq. Sa santityi giholib gwahtiqsa in meqin diq loyinad gimileq mugad os yaqay. ¹¹ Mataw na gisanib gisulan titiy naqmo hiqysa iyan in God Ulilib Osaqta na tibilawun yaqay. Ta teq in ginad buliyad gigo daq meqinta na gileh a hikidik ug yaqay.

¹² Sa angelo 6-ta na lehim God ago agem meqinta adegnaq in wazta na wazbalan yuw ayahta anan Yufretis haqayta nab woqanmo yuw na tumay bug. May bugan zeq gwalaqta ban king asor teq bolnan haqad osiyya na gimen dan tugwahtiq.

¹³ Sa nagah ahulinaqta ayahta na teq karuw kwasikta na teq nantut katiyya na in gite akan waqit meqinta gihol anumlan in-aqta giwaqan kuter nogta ezeqmanmo tugwahtiq. ¹⁴ Kuter ezeqman na in bugaw meqin diqta teq in daq amo amo azawayin inaqta emaya. In og saw bunmo haresmo leheq luwad in king aseseqta nagan gikat negsa in gigo bab mataw giwaqeq giqad bo humab tuwol daqayta. Humab woleq in God Zaway Bunmo Wazaqta na ago kam ayahta nab in bab ayahta wazid tigeraq-daqta.

¹⁵ Ne Yesus aqez ka huritiy. In bilaqaq, Mat arin inaqta bolaqta nazaq nog ya ne gigo hib tuboldaiq haqaq. Nazaq iyan mat a hi usad ago tubusan wastitayim ahol agerab emaqta naqmo in tidimniyim osaqta haqaq. Na ezaqgo ya boldaiqta nab mat na ago bit huloseq asan ban gwahtiqeq on mataw gimeb abe aholmo a hi luwdaqta na ago haqaq.

¹⁶ Ari waqit meqinta ezeqman na in king na giwaqim giqad bo saw araqab gihumab tuwoliy. Saw na Hibru nanib in anan Armagedon haqayta.

¹⁷ Sa angelo 7-ta na lehim God ago agem meqinta adegnaq in wazta na wazbalan kait amalib tuwom. Woqanmo Tempel-ib God ago ban tawonta nab mat araq aqez atoranmo lileyim bilaqsa ya kazaq hurit. In bilam, Nawaqmo tihiqiy ham. ¹⁸ Sa mewlig haresmo hikliyansa kait ahulan ayahma diq tiziyyaq. Sa kanawrig ayaah nenan diqta tisib. Kwaziq diqmo mataw mutur gwahtiqim og kab osiyya nab iyim bolim bo kam nabmo og ka nazaq ahol a hi wolta.

¹⁹ Og ahol wolam uliq ayahta Babilon na mizilayim aholsor ezeqmanmo iysa og saw bunmo gigo uliq aseseqta nagan bunmo

tuwoq bugiymo. Kam nab God in uliq ayahta Babilon na anadin emim in ago agem meqniy bilaqne wain ayun agog-naqta nazaq nog in negan tuquluw bugiy. 20 Sa nud bunmo tukim lehsa garah bunmo woq bugan mataw garah araq ahol a ta hi waqiy. 21 Sa kaitib wayway aseseqta gigo afaqan 50 kilo nazaqta urom nog mataw gimmalib wogyaq. Wayway aseseqta na kaitib woqim mataw gimeqin diq tonsa mataw gigem meqniysa God tibilawun yaqay. Na ezaqgo in afaqan na loyinsa giholib meqin diq iysa iyan na ago.

17

Aw ayahta mataw gihureqaqta na in afaqan ayahmo wam

¹ Ari angelo 7 deg wazim turiyta na gigo araq in ya igerab gelim kazaq ibilan. Ni bolid aw danatabta awaz meqinta yuw aseseqta qigurumnib osapta ko in ago daq meqinta amenin waqsa ya ni tiniqishunnan ham. ² Ogib kab king bunmo in aw na inaq usiyya ham. Teq aw na in on mataw bunmo gihureqan in ago daq meqinta emad gihol atoranmo eraqsa in an hareshmo hureqad inaq us yaqayta ham. Bilaqne in wain ayun atoranta negan in uluwim ginad dimunta hulosim daq emiyta nazaq nog ham.

³ Haqsa God ago Bugaw Dimunta ya iholib ayahmo bolan angelo na ya iwaqim isorim iqad og amatawun haiqtab tilah. Lehan saw nab aw araq in karuw kwasikta kakaqta araq amalib ossa ya ahol way. Karuw kwasikta na aholnur kabemmo in asanib mar tonan giqusta. Ad in aholnur amo amo na bunmo abilaqan ahuritan meqin diqta, bilaqne gamuk amalib God bilawunaya nazaq nog. Karuw kwasikta na afaqin 7 nazaq inaqta teq adanidin 10 nazaq afaqinib nagab gituriy. ⁴ Sa aw na ago tubusan kakaqta awaqtan bilaqne king gigo tubusan awaqtan nog. Sa in ago balaw dimdimunta gol-ibta teq ago kaliloy gig awaq dimdimunta amo amo amalib giqemiyya aholib gicus. Aw na abenab in gog araq gol-ibta wazyaq. Sa gog na aduganib daq amo amo God ameb lilihim usaqta na teq aw na danatab luwad daq amebay inaq emaqta nagan bunmo in gog nab ate gwalim giqus. ⁵ Teq aw na amaqbelab in ahol agamukan abarawunta araq nazaq mar tonan us.

YA ULIQ BABILON AWAZ MEQINTA ON
DANATABTA GINENMO DIQ YAQMO DAQ
GOD AMEB LILIHIM USAQTA NA
ANAMREN YAQMO DIQ

⁶ Aw na in God ago on mataw tawonta ginedan uluwim ahol agadan iysa ya ahol way. On mataw na Yesus anan helmo

haqsa iyan in ginol eman moqiyya. Ya nagaqna ahol waqad ihol turuh nem naqmo diq hiqiyayaq.

⁷ Sa angelo na kazaq ibilan. Ni nagaqgo nihol turuh nemaq? ham. Ya teq aw na alulin tinibilendaq ham. Teq karuw kwasikta aw sorad a luwaqta na teq in afaqin 7 na teq in adanidin 10 nazaq usaqta na gilulin ya tinibilendaqmo ham. ⁸ Karuw kwasikta nawna ni ahol tuwamta na in kwaziqmo osta ham. Ad muran in a ta hi osaq ham. Teq abeb in yay abe milhasta na huloseq a ta gwahtiqaq ham. Gwahtiqaq luwad oseq le in timeqniy hasdaqta ham. In kwaziqmo osta teq in a ta hi osaqta teq abeb in ta boldaqta na ago on mataw giholnan God ago buk-ib haiqta naqmo in karuw kwasikta na ahol waqad gihol riten lamdaqta ham. Buk nab on mataw kayeqmo tuteqmo os daqayta na giholnan usaqta ham. Kwaziq diqmo God og ka eman a hi gwahtiqaqmo in on mataw na ginan buk nab mar tonan tuqusaqta ham.

⁹ Mat anad dimunta inaqta na in nagaqka ago tuhurit kemdaq ham. Karuw kwasikta na ago afaqin 7 na in garah 7 nazaq gitowun ham. Sa aw na in garah 7 na gibigmanib osaqta ham. ¹⁰ Sa afaqin 7 naway na in king 7 nazaq gitowunmo ham. King abaynagin nazaq tuqosiyta teq muran king 6-ta na in osaq ham. Sa king 7-ta na teq gwahtiqaqdaqta ham. In gwahtiqaq asitmo tuqosdaq ham. ¹¹ Ossa teq karuw kwasikta kwaziqmo osta teq muran in a ta hi osaqta na in abeb a ta gwahtiqaq in king 8-ta nazaq nog tiqiyadaq ham. In ago daq king 7 na gigo daq nog iydaqta teq in gwahtiqaq luwad oseq teq in timeqniy hasdaqta ham.

¹² Ad ni karuw kwasikta afaqinib adanidin 10 nazaq ahol giwamta na in king 10 nazaq gitowun ham. Teq king 10 na in gigo ban waqim a hi osay ham. Abeb in gwahtiqaq karuw kwasikta na inaq zaway waqeq teq in kam asitmoqmo zeq adulan amulikmo nazaq in king iyeq tuqos daqay ham. ¹³ King nagan ginad amulikmoqmo usdaqta ham. Ad in gigo zaway teq gibin aseseqta na bunmo in karuw kwasikta na tuqug daqay ham. ¹⁴ King nagan in Sipsip Amidon ago walmataw nenaq bab emsa Sipsip Amidon ago mataw na nenaq eraqeet king nagan babub tigiquriyam bug daqay ham. Na ezaqgo Sipsip Amidon in king bunmo gigo King-ta teq in mataw aseseqta bunmo gigo Iyah Diqta ham. Teq Sipsip Amidon ago walmataw na gibin kazaq usaqta ham. Sipsip Amidon inmo mataw na gililewunum aholyon gilumim giwamta ham. Giwaqan in ago nan muzinad gituw a hi hiqiyaya ham.

¹⁵ Haqad angelo na kazaq a ta ibilin. Aw danatabta yuw aseseqta gigerab ossa ni ahol wamta na ham yuw na in on mataw bunmo gitowun ham. Og kab mataw en amo amo gidauhan og saw haresmo osad gigo nam amo amo bilaqayta gitowun na in yuw aseseqta naqmo ham. ¹⁶ Sa karuw kwasikta adanidin 10 na giyow karuw kwasikta ta araq na inaq in aw danatabta na gigem meqin diqta tuqug daqay ham. Ad in aw na abin meqin diq toneq ago tubusan nagah nagan bunmo giwaqid in begbeg iyeq abe aholmo tiluwdaq ham. Sa king 10 na giyow karuw kwasikta na inaq in aw na amizan neqad teq in asan hunegid le faqmeb gwale tuqoywordaq ham. ¹⁷ God in king 10 na giceman in ginad amulikmo iyim gigo zaway in wazayta na bunmo in eman karuw kwasikta na ahaqenib lehan iyan in daq nazaq em daqayta ham. Ad in God-mo anad muzinad daq nazaq emad ossa teq nagah bunmo God anan bilamta na tugwahtiq bugdaq ham. ¹⁸ Teq aw ni ahol wamta na in uliq ayah diqta og kab king bunmo giwamuzaqta naqmo atowun ham.

18

Uliq ayahta Babilon timeqniy

¹ Ari nagah na tihiqyanmo angelo araq awaz meqinta Heven hulosim gehitiqsa ya ahol way. In ahol abalawun oy naqmo hiqiysa ogib kab saw bunmo hastitayan saw anuwan ayahmo us. ² Sa in atoranmo lileyim bilam,

Uliq ayahta Babilon timeqniy has ham.
In timeqniy has ham.

Meqniy hasim muran in bugaw meqinta gigo uliqa tqiqy ham.

Uliq na bugaw meqmeqinta nagan teq ah meqmeqinta ginumlan inaqtat mataw in ginan gituw hiqiyayta nagan bunmo gigo ban tqiqy ham.

³ Na ezaqgo uliq nawa na in on mataw en bunmo gihureqim giceman in gihol atoranmo eraqsa ginad meqinta hares gwahtiqyaqta ham.

Bilaqne in wain ayun atoranta uluwim ginad dimunta hulosiyta nazaq ham. Sa ogib kab king bunmo in uliq na inaq daq amebay inaqtat kabemmo emiy-tamo ham.

Uliq na amatawun in ginad bilaqgo anaghan anan diq moqsa iyan og kab mataw mani akabiyen emayta na bunmo in gigo es nagah uliq nab a le zayad mani ayahmo waq yaqayta ham.

⁴ Ari mat ta araq aqez Heven-ib gwahiqsa ya kazaq hurit. In bilam,

Yaqgo on matawta ham ne uliq na huloseq bo asanib gwahtiqiy ham.

Luweq daq meqinta in emayta na ne giholib soqotid ne em daqaymo ham. Emsa mataw na in gigo daq meqinta na amenin meqinta waqsa ne nenaq araqibmo tuwaq daqaymo ham.

⁵ Uliq na ago daq meqinta kuluwmo diq iyim in an amalib amalib gwale ulilibimo diq tqiqy ham.

Iyan God ahol waqad in uliq na anadin tqicemaq ham.

⁶ Uliq na in bilaqne aw danatabta nog iyim mataw giyon daq amta nazaqmo ne in ayon emiyomo ham.

Emad ne aw na ago daq meqinta in amta na amenin ugad teq ne a ta ug toniy ham.

In yuw atoranta gogib buliyim mataw ne gan uluwitya nazaqmo ne yuw atoran diqta gogib emeq teq ne gog gigermo ugad in uluw bugan ham.

⁷ Aw na inmo ahol abin ayahmo iluwta na teq in daq ahol bilaqgota kuluwmo amta na nazaqmo diq ne in sanctity ayahmo ugga in ame kabemmo gaq wazan ham.

Na ezaqgo ham inmo ahol anan bilaqaq, Ya maror ayah diqta haqaqta ham.

Ya wabur a haiqta haqaqta ham.

Ya gaq a hikidikmo wazdaiqta haqaqta ham.

⁸ Teq Iyahta God ago zaway ayahta inaqtat in Babilon ago daq tuqlulum kemüm anan bilam,

Uliq na timeqniydaq haqad in bilam ham.

Nazaq iyan moq meqin diqta teq sanctity ayahmo

teq zarow akaman amik a haiqta in kam amulik nabmo uliq nab tugwahtiq bug-daqta ham.

Gwahiqsa teq faq eraqeq uliq Babilon oyid in tihiqiy bugdaq ham.

⁹ Ari kam nab og kab king bunmo uliq na inaq gihol bilaqsa osad inaq us yaqayta na in uliq na faq ayahmo oyad aqas in gwalehsa in ahol tuwaq daqay ham. Ahol waqad in ginad meqniysa gigem afaqan iysa gaq wazad tuqos daqay ham. ¹⁰ Osad in uliq na afaqan meqin diq waqsa ahol waqad in rabad pesanmo turad bilaq daqay,

Uliq Babilon timeqniy haq daqay ham.

In timeqniy haq daqay ham.

In uliq ayah diqta teq kam amulik nabmo in ago daq meqinta na anawun tuwaq bug haq daqay ham.

¹¹ Sa og saw bunmo mataw mani akabiyen emayta na in uliq Babilon anadin emad ginad meqniysa gigem afaqan iysa gaqad tuqos daqay ham. Na ezaqgo Babilon on mataw na in mataw mani akabiyen emayta na gigo es a ta hi zay

daqayta na ago iyan ham. ¹² Es naway na gol teq silva teq gig dimdimunta anawun ayahmota teq gig kamisibta anan bokbok haqayta teq tubusan husta dimun diqta anan linen haqayta teq tubusan kakaqta anawun ulilibta teq tubusan dimunta anan silk haqayta teq ay anan sitron haqayta teq karuw aseseqta gite sisooqim nagah dimdimunta gigemayta teq nagah amo amo ayib teq baras-ib teq ain-ib teq gig amarmarin inaqtta na gimalib gigemayta anawun ayahmota nagan bunmo gizaygo akaman tihiqy ham. ¹³ Teq ay sinamon asan ahuran dimunta teq gunay teq nagah araq nal nogta aqasim ahuran dimunta gwahtiqaqta teq masil ahuran dimunta giger mir ayow frenkensens inaq teq wain ayun teq oliv amasilan teq mel dimunta teq wit anagin teq bulmakau teq sipsip teq hos teq wilka teq kabibiy on mataw gizayad gimenin waqayta nagan bunmo gizaygo akaman tihiqymo ham. Nagah nagan bunmo mataw mani akabiyan emayta na in uliq nab a leheq a ta hi gizay daqayta ham. ¹⁴ Kam nab mataw mani akabiyan emayta na in uliq Babilon buloneq bilaq daqay,

Nagah dimdimunta ni anan diq moqaqta na bunmo in ningo hib tihiqiy haq daqay ham.

Ningo nagah dimdimunta teq ningo balaw dimdimunta na bunmo nabagag tilehan mataw ahol a ta hi waq daqay haq daqay ham.

¹⁵ Sa mataw mani akabiyan emad uliq nab mani ayahmo waq yaqayta na in uliq na santiti ayahmo waqsa ahol waqad teq in tirab daqay ham. Ad in hulos ugeq pesanmo turad teq in gaq wazad gigem afaqan iysa tuqos daqay ham. ¹⁶ Mataw na bilaq daqay,

Uliq ayahta na timeqniy haq daqay ham.

In timeqniy haq daqay ham.

Kwaziqmo on mataw na tubusan dimunta anan linen haqayta na teq tubusan kakaqta awaqqan bilaqne king gigo tubusan awaqqan nogta na in giholib gigem yaqayta haq daqay ham.

Sa in gigo balaw dimdimunta gol-ibta teq gigo kaiiloy gig awaqq dimdimunta amo amo amalib gigemiyta in giholib usyaqta haq daqay ham.

¹⁷ Teq kam amulikmo nawaqmo in gigo es nagah nagan bun diqmo tihiqiy haq daqay ham.

Ari muy anamreniz teq mataw muyib luwad uliq aseseqta asorib lehayta na teq muy ago kabiyy mataw teq mataw bunmo kamisib mani akabiyan emad luwayta na in bunmo pesanmo turiy ham. ¹⁸ Turad faq amileq aqasim inaq gwalad oysa in ahol waqad dedibmo bilaq yaqay, Uliq araq

abin in uliq ayahta ko abin nog a haiqta haq yaqay ham. ¹⁹ Haqad mataw na og abutbutan waqim in gimo gifaqinib emad teq in gaqad gigem afaqan iysa lileyeq bilaq yaqay,

Uliq ayahta ko timeqniy haq yaqay.

In timeqniy haq yaqay ham.

Mataw gigo muy inaq na bunmo in uliq nab mani ayahmo waq yaqayta haq yaqay ham.

Ta teq kam amulikmoqmo uliq ayahta na timeqniy has haq yaqay ham.

²⁰ Haqad mat na a ta bilam,

Heven-ib angelo bunmo ham, ne ginad dimniyan ham.

Teq God ago nantut teq in ago Aposel teq in ago on mataw tawonta na bunmo ham ne nagah muran uliq nab gwah-timta na ago ne ginad dimniyanmo ham.

Uliq ayahta na in ago daq meqinta amalib ne gimeqin tonan muran God in uliq na ago daq meqinta na amenin tuqug bug ham.

²¹ Ari gamuk na tihiqyanmo angelo ta araq awaz meqinta in gig araq bilaqne gig ayah nenan diqta amalib wit wol ninalayta nazaq nogta in waqim hunegan kamismeb woqsa in bilam,

Kazaqmo teq uliq ayahta Babilon waqeq atoranmo hunegid tuwoqdaqmo ham.

Wqid teq mataw uliq na ahol a ta hi waq daqay ham.

²² Nazaq iyid teq Babilon ham mataw in gita ahulan teq mataw bar amo amo waz yaqayta giqez teq taur ahulan teq kadug ahulan ne gigo hib a ta hi hurit daqay ham.

Ad ne gigo uliqab in mataw kabiyy amo amo em yaqayta na gisawanmo tuwaq daqay ham.

Teq on mel akabiyan emad wit anagin wol ninalayta na gihulan ne gigo uliq na amuganib a ta hi gwahtiqaq ham.

²³ Lam anuwan ne gigo hib a ta hi oydaq ham.

Sa ne gigo hib on mataw an a ta hi waq daqay ham.

Na ezaqgo ne gigo mataw mani akabiyan em yaqayta na in og kab mataw aseseqta gibin inaqtta iyim in igmo ag haqad osiyta ham.

Teq ne gigo liqiy amalib ne on mataw og saw bunmo gikat negiy ham.

²⁴ Teq God ago nantut kabemmo teq in ago on mataw tawonta kabemmo ginol eman ginedan womta na ago mebay uliq nab usta ham.

Ad on mataw bunmo babub ginol eman ginedan womta na ago mebay uliq nab ustamo ham.

19

Uliq Babilon meqniyan Heven-ib on mataw ginad dimniyyat

¹ Ari nagah na abun ban ya Heven-ib on mataw biyahmo osad gamuk atoranmo bilaq nog iysa ya hurit. Mataw na bilaqiy.

I God abin iluwuq haqiy.

I gigo God amomo in i gwaqim giqeman i ban dimtubat osaqta haqiy.

I in amomo abin sorid ulilibmo gwalehdaq haqiy. In amomo ago zaway ayah diqmota haqiy.

² God in on mataw gigo daq ulum kemad heltaqmo bilaqqa haqiy.

Teq in mataw gigo daq ahunibmo amenin negaqa haqiy.

Aw danatabta awaz meqinta na in on mataw bunmo ogibta gimeqin tonad gihuregan in ago daq muziniyya haqiy. Nazaq iyan God in aw na ago daq meqinta na amenin tuqug haqiy.

Aw na in God ago kabibiya mataw ginol eman moqiyta haqiy. Nazaq iyan God in ago on mataw ginedan womta na aqenin aw na ago hib tuwam haqiy.

³ Haqad in gime gigerta a ta lileyim bilaqiy, I God-mo abin iluwuq haqiy.

Uliq ayahta na oyad faq aqasin tutimmo kuluwa-kuluwmo gwalqa haqiy.

⁴ Sa God ago ban tawontab ossa mataw marorta 24 na giyogniz nagah aweweq kayeqmo osayta na nenaq in gibakbakan ulum laquwim turad God amen lotu emad kazaq bilaq yaqay.

Hel diqtaqmo haq yaqay.

I God abin iluwuq haq yaqay.

⁵ Sa God ago ban tawonta nab mat araq aqez gwahtiqim bilam,

God ago kabibiya on mataw teq on mataw God rabunad abin wazinayta na bunmo ne God abin iluwiy ham.

Ne mataw gibin inaqta teq gibin haiqta inaqmo God anan wazid ulilibmo gwalehan ham.

Sipsip Amidon aw waqnan tonsa neqwaq ayahta gwahtim

⁶ Ari on mataw kabemmo humab wolim gamuk bilaqaya nazaq ya hurit nog iy. In gihulan bilaqne yuw ayahta sibim lehad ahulan kabemmo iyaqta nazaq nog iyad teq in bilaqne kait ahulan ayahmota nog iyyaqmo. On mataw na bilaq yaqay.

I God abin iluwuq haq yaqay.

I gigo Iyahta God zaway bunmo wazaqta haq yaqay.

In king ayah diqtaqmo iyim nagah bunmo giwamuzim osaqta haq yaqay.

⁷ Muran i in anan ginad dimniyya abin iluwuq haq yaqay.

Sipsip Amidon aw waqdaqta ago aka mun tugwahtiyan awe na ahol tuwasti tayim osaqta haq yaqay.

⁸ God in tubusan hus diqta anan linen haqayta araq anumlan haiqta aw na ugan in aholib tiqam haq yaqay.

Tubusan husta dimunta na in God ago on mataw tawonta gigo daq dimunta naqmo atowun.

⁹ Sa angelo araq ibilan, Ni nan ka mar ton ham. God on mataw gimen nan eman in teq Sipsip Amidon ago aw waq adidaqan ayahtab bol daqayta na, mataw na muran tidimniyyim osayta ham. Ad in ya ibilan, Nan kaway ka in God ago nan hel diqtaqmo ham. ¹⁰ Angelo na nazaq haqsamo ya in anognib ihol hulosan tuwom, ya in ayon lotu emnan haqad. Teq haiq. In ya ibilan, Ni nazaq hi ton ham. Ni nimaqbaban nenaq ne Jesus abin bilaqad ago kabi yemaya ham. Sa ya nazaqmo ne gigo kadoy iyim i araqibmo kabiya na emauqta ham. Ni God amomo ayon lotu em ham. Na ezaqgo God ago Bugaw Dimunta inmo mataw gi nad wamuzsa in ago nan tutim Jesus abin bilaqayta ham.

Yesus hos husta amalib ossa Jon ahol wan

¹¹ Ari ya ime gwalehim kait misireq nog iyim aqez hassa hos husta araq nab tursa ya ahol way. Sa hos na amalib mat araq os. Mat na anan Akatiy Haiqta haqayta teq in anan araq Heltaqmota haqayta. In daq titnonta amalib mataw gigo daq gilum kemaqta. Teq in daq titnonta amalib ago bab ginolaqtamo. ¹² Mat na ameqnagin bilaqne faq amileq nogta. Ad in afaqinib king gigo balaw dimdimunta hikliyanaqta kabemmo giquasaqta. Teq mat na aholnan inmo asanib mar tonan usaqta. Mat araq diq in aholnan na a hi huritsa in amomo aholnan na ago huritta. ¹³ In aholib tubusan sisqaqta usaqta na nedmo huz ugtta. Teq mat na anan God Ago Gamuk haqayta.

¹⁴ In ago angelo bab emaya na tubusan husta anan linen haqayta anumlan haiqta giholib emim teq in hos husta gimalib osad mat na muzad inaq lehaya. ¹⁵ Sa mat na ateb baqir araq sisqaqta ame meqinta gwahtiqim usaqta. Baqir na amalib in ogib on mataw en bunmo ginoldaqta. Ad in gwatuq ain-ibta wazaqta na amalib on mataw bunmo atoranmo giwamuzdaqta. In ago bab ginolad gibayid woqsa bab na in God Zaway Bunmo Wazaqta na ago agem meqniy tiloyin kem daqay. Bilaqne mataw wain ayun waqo abanib wain anagin bay ninalsa ayun gwahtiq bugaqta nazaqmo in ago bab gibaydaqta. ¹⁶ Mat na ago tubusanib teq abetab in ahol anan kazaq mar tonan usaqta.

KING BUNMO GIGO KING-TA TEQ MATAW
ASESEQTA BUNMO GIGO IYAH DIQTA

¹⁷ Ari angelo araq zeq ame ituqim tursa ya ahol way. In turad ah bunmo kaitib melad luwayta na atoranmo gililewunim gibilan, Ne bunmo boleq God ago neqwaq ayahta kab humab woliy ham. ¹⁸ Humab woleq teq ne mataw marorta teq mataw bab emayta gigo aseseqta teq mataw giwaz meqinta teq hos kabemmo ginamreniz nenaq kuluwmo gimizan ne tineq daqay ham. Ne mataw amo amo gimizan neq daqay ham. Mataw gina inaqta teq kabibiy mataw samanta teq mataw gibin inaqta teq mataw gibin haiqta inaqmo bunmo gimizan ne tineq daqay ham.

¹⁹ Ari karuw kwasikta na in og ka ago king bunmo gigo bab mataw nenaq giqad bolim gihumab wolim ossa ya gibiy. Mataw na in mat hos amalib osaqa na ago bab mataw nenaq an tuwolnan haqad in bolim humab woliy. ²⁰ Teq haiq. In karuw kwasikta na ayow nantut katiyta na inaq giwazim tigiqirquriy. Nantut katiyta naqmo in karuw kwasikta na ameb daq azawayin inaqta kabemmo emyaqta. Emad in on mataw karuw kwasikta atowun gisanib waqiyta na gikat negsa in karuw kwasikta na adulan ayon lotu em yaqayta. In karuw kwasikta ayow nantut katiyta na inaq giwazim giqirquran in kayeqmo osamo gihuneegan le faq ayahtab tuwoqiy. Faq na bilaqne yuw akurorgqanta ayahta nog iysa gig anan salfa haqayta na kabemmo oyad usayta. ²¹ Mataw giger na le faqmeb tuwoqanno mat hos-ib osaqa na in ago baqir atenmosib gwahtiqaq usaqta na amalib mataw giger na gigo dahu ginol eman tumoq bugiy. Moq bugan ah bunmo bolim mataw tumoqiyta na gimizan neqim gigem aseseq nenan tiqiy bug.

20

Angelo araq Satan irquran in ulig 1,000 nazaq os

¹ Ari angelo araq Heven hulosim gehitiqsa ya ahol way. In yay abe milhasta na ago ambitan teq sen araq ayahta inaqmo abenab wazim ad bo hitim. ² Hitiqim in nagah ahulinaqta ayahta na tuwaz. Nagah ahulinaqta na kwaziqmo osta teq in anan giger Mat I Gigilehunan Bilaqaqta haqayta teq Satan haqaytamo. Angelo na in nagah ahulinaqta na wazim sen-ib irquran in ulig 1,000 nazaqmo tuqos. ³ Teq angelo na Satan irqurim in wazim yay abe milhasta nab hunegan wogan in adanin atoranmo ot, Satan gwahtiqaq on mataw a ta hi kat negdaq haqad. Ari Satan irqurid ossa ulig 1,000 na le tihiqiy bugid nab teq in adanin

hasid in asanib gwahtiqaq kam asitmoqmo a ta luwdaq.

⁴ Ari ya marorgo ban tawonta kabemmo gibiy. Sa mataw kabemmo ban nagab ossa ya gibiyomo. Ossa God in gibenab maror eman in mataw hazizirib gilum kemad osiy. Teq on mataw kabemmo Yesus anan helmo haqad abin iluwad teq in God ago gamuk waz naqmo hiqiyiyya na giwitan ya gibiyomo. Mataw na gigo daq nazaqmo usan iyan in gigo bab baqiribmo ginat urot tayan moqiyta. Teq in karuw kwasikta na atowun gibenab teq gimaqbelab a hi waqad in karuw kwasikta na ago ahol adulan na inaq gimen lotu a hi emiytamo. Mataw na kayeq ta iyim ulig 1,000 nazaq Yesus inaq king iyim osad in nagah bunmo giwamuzad osiy. ⁵ Ossa on mataw tumoqiyta ta asor na bunmo in kam nab kayeq a hi iyiyta. Haiq. In ussa le ulig 1,000 na tihiqiyid teq in kayeq tiqiy daqayta. Ari mataw dimdimunta nawa kayeq iyiyta na in mataw danmeb hodhod huloseq eraq daqayta na gigo dauhibta. ⁶ Mat aw nog kam ameba nab kayeq iy daqayta na in God ago on mataw tawon diqta iyeq tidimniy haseq os daqayta. Moq gigerta na in on mataw na giwazid a hi woq daqay. Mataw na in God teq in atatin Krais inaq gigo mataw tamaz emayta tiqiyeq tuqos daqay. Ad ulig 1,000 nazaq in Krais inaq king iyeq osad nagah bunmo tigiwamuz daqay.

Satan timeqniy has

⁷ Ari abeb ulig 1,000 na tihiqiy bugid teq in Satan adanin hasid in asanib bo tugwahtiqaq. ⁸ In bo asanib tugwahtiqaq teq in on mataw og saw bunmo osayta na gikat negad tiluwdaq. On mataw na ginan giger Gog haqayta teq Magog haqaytamo. Satan in on mataw na kat negad gihureqsaa in God ago on mataw nenaq bab emgo haqad bo humab tuwol daqay. Mataw humab wol daqayta na in kabemmo diq bilaqne kamisdekib ibur usaqta nazaq nog iy daqayta.

⁹ Teq ya on mataw na gibiysa in og saw bunmo hulosim bolim God ago uliq in anan anad bilaqaqta na lilut ugim turad in God ago on mataw tawonta uliq nab osiyta na bunmo gimen tawan emiy. Teq haiq. Heven-ib faq gehitiqim bab meqinta na bunmo ginoyorwan tumoq bugiy. ¹⁰ Moq bugan teq in mat gikat nagta anan Satan haqayta na wazim hunegan in faq ayahtab gig salfa oyad usaqta nab le tuwom. Faq nabmo karuw kwasikta ayow nantut katiyta na inaq osayta. Ossa in Satan hunegan wolehim in ezeqman iyim nenaq faq nab tuqosiy. Mataw ezeqman na

in tuteqmo zeqab taromab inaqmo sanctityi
waqad tuqos daqay.

Heven-ib hazizir ayahta gwahtim

¹¹ Ari king ago ban araq ayahta husta
tursa ya ahol way. Ad Mat ban tawonta
nab ossa ya ahol waymo. In ban nab
ossa og ayow kait inaq rabunim titukiy.
Tukim lehad teq in mataw gimeb ulilem
daqayta na abanan hajiq iyiy. ¹² Sa on
mataw tumoqiyta bunmo gibin inaqta teq
gibin hajiqta inaqmo eraqim ban tawonta
na ameb tursa ya gibiy. Gibiyad buk asor
gihasan ussa ya ahol waymo. Ahol waqsa
in buk ta araq has toniymo. Buk araq nab
in on mataw os kayeqmo kuluwa-kuluwmo
os daqayta na giholnan mar tonan usta.

Ari buk ta asor iturimmo gihasiyta
nagab in on mataw biyatha na kayeqmo
osad daq emiyta na giwagamun amulik-
mulikmo gimir tonan usta. Na in ahol
waqad in giyon meqin bilaqsa in gigo daq
ahunibmo amenin tuwaq yaqay. ¹³ Sa
mataw kamismeb woqan kamis gineqan
moqiyta na kamis gihulosan in hazizir
ayahta nab tugwahtiq bugiy. Teq mataw
tumoqiyta gigo uliq na nazaqmo in mataw
nab osayta na bunmo gihulosan tugwahtiq
bugiymo. Mataw moqiyta na bunmo gwahtiqim
tursa Mat king ago ban tawontab osta
na in amulik-mulikmo gigo daq meqinta
kwaziqmo in emiyta na tigilum kemyaq.
¹⁴ Teq daq na abeb in Moq ayow mataw
tumoqiyta gigo uliq anan Hades haqayta na
inaq gihunegan le faq ayahta nab tuwoqiy.
FAQ ayahta yuw akurorqan nogta na in
anan Moq Gigerta haqayta. ¹⁵ Teq mat
aw nog in giholnan buk mataw kayeqmo
kuluwa-kuluwmo os daqayta nab a hi usid
na in giwazeq gihunegid le faq ame ayahta
nab tuwoq yaqaymo.

God nagah bunmo buliyan muturta iy

21

*Kait muturta ayow og muturta inaq
gwahtim*

¹ Ari nagah na abeb og muturta teq kait
muturta inaq ussa ya gibiy. Kait og inaq
kwaziqmo gwahtiqim usiyta na thihiq bug.
Sa kamis a ta hi usmo. ² Ad God ago
uliq tawonta Heven-ib usim gewoqsa ya
ahol waymo. Na Jerusalem muturta. Uliq
na ago balaw dimun diqta, bilaqne aw
mat waqnan haqad balaw dimunta aholib
giqemim ahol wastitayim ago mat waqnan
tonaq nazaq nog. ³ Sa God ago ban tawonta
nab mat araq aqez gwahtiqim atoranmo
lileysa ya kazaq hurit. In bilam, Ne gidek
emiham. Muran God in ago on mataw
nenaq tuqosdaq ham. Ossa on mataw na in

God-mo ago on matawmo diq tiqiy daqay
ham. Helmo ham, God immo on mataw
na nenaq tuqosdaq ham. ⁴ Osad in mataw
gaqsa gimeqil gimeb usaqta na tisuholdaq
ham. Teq mataw na a ta hi moq daqay ham.
Ad in gaq a ta hi waz daqaymo ham. In a ta
hi gaqad teq in gihol a ta hi titiydaq ham.
Daq kwaziqmo usta nagan thihiqy bugdaq
ham.

⁵ Sa Mat ban tawontab osaqta na bilam,
Ahel waqiy ham. Ya nagah bunmo giqe-
man muturta tiqiyiy ham. Haqad teq in
bilam, Nan ka mar tonid usan ham. Nan ka
in hel diqta teq in kazaqmo diq tugwahtiq-
daqta ham. ⁶ Haqad in ya ibilenim bilam,
Nawaqmo thihiqy ham. Nagah bunmo
gilulin na yaqmo ham. Ad nagah hiqiy-
daqta akaman na yaqmo wazaiqta ham. Ya
nagah bunmo wolnet bugim osaqa ham.
Mat anat ziziqsa ya yuw yayibta mataw
uluwim kayeqmo osayta na samanmo ugid
in tuquluwdaq ham. ⁷ Mat aw nog in zaway
meqinta bunmo giquriyam bugeq in yaqgo
nagah dimdimunta na tuwaq daqay ham.
Sa ya in gigo God ossa in yaqgo onmin os
daqay ham. ⁸ Ari mataw zaway meqinta
nagan rabunad hureq hasayta na teq in
ya inan helmo a hi haqayta na teq in daq
meqinta amo amo emayta na teq in mataw
ginol emayta na teq in danatab on nenaq
luwayta na teq in tagum liqiy emayta na teq
in god katiya muzayta na teq in katiyayta
na mataw na bunmo in gigo uliq faq ayahta
yuw akurorqan nogta gig salfa oyad usaqta
nab in tuqos daqayta ham. Daq naway na
anan moq gigerta haqayta ham.

Jon uliq Jerusalem muturta ahol wam

⁹ Ari angelo araq yaqgo hib tubol. Na
in angelo ⁷ nagah meqinta on mataw
gimeqin tonaqta na adegnaq ame gwalmi
ussa in waziya na gigo araq in yaqgo hib
bolta. Bolim in ya ibilan, Ni bolid ya
Sipsip Amidon awe tinigisihunnan ham.
Muran Sipsip Amidon in aw na tuwaq-
daqta ham. ¹⁰ Samo God ago Bugaw
Dimunta ya iholib ayahmo bolanmo angelo
na ya isorim iqad garah sisqata ulilibmo
gwalahta nab in ya iqad tugwalah. Gwale-
him in God ago uliq tawonta Jerusalem
Heven hulosim gewoqsa tiqiqisihun. ¹¹ Sa
God ahol anuwan ayahmo uliq nab oysa ya
ahol way. Uliq na ya ahol waqsa in hik-
liyan nog iyyaqta, bilaqne gig dimunta hik-
liyanqa anawun ayahmota na nog. Teq
uliq na anuwan bilaqne gig jaspa anuwan
nog teq in awaqan dimun diq galas hik-
liyan nog iyyaqta. ¹² Sa uliq na ago gel in
sisqata teq in ulilibmo gwalahta. Gel na
ago dan ez ¹² nazaq ussa teq dan ez nab
angelo amulik-mulikmo nazaq turim lehiy.
Teq Israel gisesan ¹² na giholnan dan ez

nagab giqu sim lahmo. ¹³ Gel asor ger zeq gwalaqta ban nab dan ez ezeqmanmo us. Teq asor ger ban dan ez ezeqmanmo usmo. Teq na agerab gel asor ger zeq wolehaqta ban nab dan ez ezeqmanmo usmo. Teq ta na agerab asor ger ban dan ez ezeqmanmo usmo. ¹⁴ Sa gel na asenab gig aseseqta 12 nazaq gel zaway ugim usiy. Gig nab Sipsip Amidon ago Aposel 12 na giholnan mar tonan gicus.

¹⁵ Sa angelo gamuk ibilenyaqta na in aytan gol-ibta araq waz, aytan na amalib in uliq na atowun waqad teq in ago dan ez teq ago gel inaqmo gitowun waqdaq haqad. ¹⁶ Uliq ayahta na ago azizinan aweweinqmo araqibmo usiy. Sa ago sisaq ulil ban gwalahta na teq ago sisaq og muzim lahta na bunmo in araqib usiyomo. Angelo na ago aytan amalib uliq ayahta na atowun waqan in atowun 2,200 kilomita nazaqmo iy. Teq ago azizinan teq ago sisaq gwalahta na bunmo in araqibmo 2,200 kilomita nazaqmo diq iyim usmo. ¹⁷ Sa angelo na in uliq ayahta na ago gel atowun tuwammo. An gel ago sisaq ulilib gwalahta na atowun in 65 mita nazaqmo iy. Angelo na in matawmo gigo mita in wazayta naqmo amalib nagah na gitowun wamta.

¹⁸ Uliq ayahta na ago gel in gig anan jaspa haqayta na amalib emiyta. Teq uliq na aduganib bit ban bunmo in gol-ibmo emiyta. Nazaq iyan in awaqaq bilaqne galas nog hikliyanyaqta. ¹⁹ Teq uliq na ago gel asenab gig aseseqta zaway ugad usiyta na awaqaq dimun diqta teq in gig dimdimunta anawun ayahmota amalib gig aseseqta na gibalaw toniyta.

Gig amebta na anan jaspa haqayta.

Sa gig gigerta rawezta na anan sapaya haqayta.

Sa gig ezeqmanta husta na anan aget haqayta.

Sa gig aweweqla kuleetta na anan emerald haqayta.

²⁰ Sa gig abaynaginta na anan sadonikis haqayta. Gig na kakaqta husta inaqmo ahulib usaqta.

Sa gig 6-ta kakaqta na anan koniliyan haqayta.

Sa gig 7-ta maliyta na anan krisolait haqayta.

Sa gig 8-ta kuleetta nog na anan beril haqayta.

Sa gig 9-ta maliyta nog na anan topas haqayta.

Sa gig 10-ta na anan krisopres haqayta. Na ahulib maliyta teq kuleetta usaqta.

Sa gig 11-ta dubta na anan hayasin haqayta.

Sa gig 12-ta kakaqta na anan ametis haqayta.

²¹ Gel na ago dan ez 12 nab bokbok aseseqta husta 12 nazaq in dan ez nog iyim gicus. Dan ez amulikmo nab bokbok amulikmo husta us. Sa uliq aduganib dan lahta na in gol-ibmo emiyta. Ad dan na anuwan diq iyad in bilaqne galas nogmo hikliyanyaqta.

²² Ari uliq nab Tempel araq tursa ya ahol a hi way. Na ezaqgo Iyatha God Zaway Bummo Wazaqta na ayow Sipsip Amidon inaq in Tempel os nog iysa ya gibiy. ²³ Sa uliq ayahta nab zeq ayow kalam inaq gigo kabiy haiq tiqiyimo. Na ezaqgo God-mo ahol anuwan uliq ayahta na anuwan ugaqta. Sa Sipsip Amidon anuwan bilaqne lam oy nog iyad in uliq na anuwan ugaqtamo. ²⁴ Anuwan ugsa on mataw en bunmo in uliq ayahta nab boleq anuwan nab tiluw daqayta. Sa ogib king bunmo in gigo balaw es dimdimun diqta anawun ayahmota giwaqeq giqad uliq nab a tubol daqaytamo. ²⁵ Uliq nab tarom a hi iyaqta. Saw anuwan naqmo tutimmo usaqta. Nazaq iyan in uliq na ago dan ez 12 na a hi otayta. ²⁶ Sa ogib on mataw en bunmo in gigo nagah dimdimunta giqussa amalib gihol abin dimunta waqayta na in giwaqeq giqad boleq uliq ayahta nab giqemid ussa mataw bunmo uliq na tuwazin daqayta. ²⁷ Sa nagah anumlan inaqta teq mataw dag meqmeqinta amo amo emayta teq mataw nan katiyta bilaqayta nagan in le uliq ayahta na amuganib a hikidik gwahtiq daqayta. Haiqmo diq. On mataw giholnan Sipsip Amidon ago buk os kayeqmo kuluwa-kuluwmo os daqayta nab usaqta naqmo in le uliq ayahta nab tugwahtiq daqayta.

22

Nagah giger yuw ayow ay inaq on mataw giqeman kayeqmo osayta na Jon gibiy

¹ Ari angelo na in yuw mataw uluwim kayeqmo kuluwa-kuluwmo osayta na tiqiqishun. Yuw na bilaqne galas hikliyan nog iyad usaqta. Teq yuw na in God ayow Sipsip Amidon inaq gigo ban tawonta na aqiradl gwahtiqlm lehaqta. ² Ad uliq na amuganib yuw na agerab ay anon neqim kuluwa-kuluwmo osayta na tursa yuw na ay asenlotab lehaqta. Ay nawa na anon amo amo 12 nazaq giqemaqta. Ad kalam araqab in anon araq emad kalam araqab in anon araq emaqta. Emad in nazaq emim emim lehaqta. Ad ay na anan in on mataw en bunmo giwastitaygo usaqta. ³ Teq nagah bunmo God kusluw negan meqniyim gicusayta na in uliq nab a hi us daqay. Sa God ayow Sipsip Amidon inaq gigo ban tawonta uliq nab tursa

God ago kabibiy on mataw in ayon lotu tiqemad os daqay. ⁴ Ad mataw na in God anobun ahol waqsa God aholnan mataw na gimaqbelab tuqusdaqmo. ⁵ Tarom tihiqiydaq. Sa zeq teq lam nagan bunmo gikabiyian tihiqiydaqmo. Na ezaqgo Iyahta God ahol anuwan in ago on mataw gimalib tuhuramdaq. Sa on mataw na kuluwmo king iyeq tuqos daqay.

Yesus teq hidmo ta boldaq

⁶ Ari God ago angelo na ibilenum bilam, Gamuk ka hel diqtaqmo ham. God bilamta nazaqmo diq in tugwahtiqdaq ham. Na ezaqgo Iyahta God inmo anad nantut negsa in ago gamuk bilaqayta ham. Ad in ago kabibiy mataw nagah teq hidmo gwahtiqdaqta na giqisihungo haqad in ago angelo eman kawaqmo tubol ham.

⁷ Haqad in ya ibilan, Jesus bilam, Ne gidek emiy ham. Ya hidmo ne gigo hib tilehdaiq haqad in bilam ham. On mataw God ago nantut agamukan buk kab ussa muzinayta na in tidimniyim osayta haqad in bilam ham.

⁸ Ari yaqmo Jon, ya gamuk ka huritta teq ya nagah ka bunmo ahol wayta. Ya nagah ka agamukan tuhuritum teq ya imeb nagah ka ahol tuwaqimmo ya God ago angelo na anognib ibakkaban ulum laquwim turad in ayon lotu tiqemdaiq hay. ⁹ Sa angelo na ibilan, Sey! ham. Ni nazaq hiton ham. Ni nimaqbaban God ago nantut nagan teq on mataw bunmo gamuk buk kab ussa muzinayta na in God ago kabibiy emayta ham. An nazaq nogmo ya in ago kabi emaiqtamo ham. Ni God amomo ayon lotu em ham. ¹⁰ Ad in a ta ibilenum bilam, Nagah abeb teq gwahtiqdaqta ago agamukin buk-ib usaqta ka ni hi ulilem ham. Na ezaqgo nagah na gwahtiqdaqta akaman sinsin tiqiy ham. ¹¹ Nazaq iyan on mataw daq meqmeqinta emayta na in daq meqnaqmo em tuteq a lehiy ham. Sa on mataw daq amebay inaqta emayta na in daq amebay inaqta naqmo em tutiy ham. Sa on mataw daq dimdimunta emayta na in daq dimdimunta naqmo em tutiy ham. Sa on mataw God amomo anadin emayta na in God amomo anadin em tutiy ham.

¹² Yesus bilam, Ne gidek emiy ham. Ya hidmo ne gigo hib tilehdaiqta ham. Ad on mataw gimen naw ya negdaiqta na kawa ya ibenab giqusaqta ham. Mataw daq ezaqta emiyta nazaqmo ya amenin tingdaiqta ham. ¹³ Nagah bunmo gilulin na yaqmo ham. Ad nagah bunmo hiqiydaqta akaman na yaqmo wazaiqta ham. Ya mat aqen diqta ham. Teq ya mat abebtamtamo ham. Ya nagah bunmo wolnet bugim osaqta ham.

¹⁴ On mataw gigo tubusan tisuholiya na in tidimniyim osayta ham. In gibin inaq iyeq ay anon neqim kayeqmo kuluwakuluwmo osayta na tineq daqay ham. Ad God in gihulosid in uliq ayahta na ago dan ezab le tugwahtiq daqay ham. ¹⁵ Teq mataw daq meqmeqinta emayta na teq liqiy emayta na teq an haresmo hureqayta na teq mataw ginol eman moqayta na teq god katiya muzyata na teq nan katiya bilaqayta na teq daq katiya emgo ginad diq bilaqayta nagan bunmo in bilaqne gaun asan-naqta meqinta nog iyeq God ago uliq dimunta na asan ban tuqos daqayta ham.

¹⁶ Haqad in bilam, Yaqmo Yesus yaqgo angelo eman in gamuk ka ni nibilenan nawa ningko hib lahta ham. Nazaq iyan ni gamuk ka tuteq yaqgo on mataw gidauhan bunmo gibilen ham. Ya Devit asenlul amuganib gwahtiyta ham. Teq ulig boy na yaqmo ham.

¹⁷ Ari God ago Bugaw Dimunta in Yesus bulonim bilaqaq, Ni bol haqaq. Sa Sipsip Amidon awe na nazaqmo in bulonim bilaqaq, Ni bol haqaqmo. Sa ne on mataw nan ka huritayta na ne bunmo kazaq in buloneq bilaqiy, Ni bol haqad ne nazaq haqiyimo. Ari mat aw nog yuwnan moqad ginat ziziqaqta na in boliy. Teq mat aw nog yuw mataw uluwim kayeqmo kuluwakuluwmo osayta na uluwnan ginad bilaqta na in boleq yuw na samanmo waqeql uluiwy.

Jon in on mataw buk ka agamukan huriyatya na bunmo gamuk awaz meqin diqta nang

¹⁸ Ari ya on mataw God ago nantut agamukan buk kab huritayta na bunmo nan awaz meqinta kazaq ne gibilenaiq. Mat araq anadibmo gamuk ta asor muturta nantut ka amalib emid teq buk ka ago daq meqmeqin diqta teq gwahtiqdaqta na bunmo God ginuweq mat naqmo amalib emid in aholib tugwahtiqdaqta. ¹⁹ Teq mat araq anadibmo God ago nantut ananin usaqta ka ago gamuk araq walemid God in mat na walemid in nagah dimdimunta buk ka anan bilamta ka a hi waqdaq. Mat nazqaqta na in ay anon neqim kuluwakuluwmo osayta na a hi neeq in God ago uliq tawonta nab a hi osdqatamo.

²⁰ Mat nagah teq gwahtiqdaqta ananin kawa ne gimen bilamta na in bilaqaq, Helmo haqaq. Ya hidmo ne gigo hib tilehdaiqta haqaq.

Hel diqtaqmo. Iyahta Jesus ni bolmo bol.

²¹ Ari i gigo Iyahta Jesus in God ago on mataw tawonta na bunmo agem dimunta negsa in osiy. Nawaqmo.